

Tte Pa'ali Me  
Skököl tö Se' a



New Testament and Shorter Old Testament in Bribri  
(CS:bd:Bribri)

# **Tte Pa'ali Me' Skëköl tö Se' a**

## **New Testament and Shorter Old Testament in Bribri**

### **(CS:bzd:Bribri)**

copyright © 2010 Wycliffe Bible Translators, Inc.

Language: Bribri

Translation by: Wycliffe Bible Translators, Inc.

Bribri

bzd

Costa Rica

### **Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament and Shorter Old Testament**

in Bribri

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 21 Feb 2024 from source files dated 29 Jan 2022  
70b70297-578d-5d61-9b6f-3119201e28ca

## Contents

Génesis . . . . .	1
Éxodo . . . . .	43
Jonás . . . . .	60
Mateo . . . . .	62
Marcos . . . . .	95
Lucas . . . . .	115
Juan . . . . .	150
Hechos . . . . .	175
Romanos . . . . .	206
1 Corintios . . . . .	220
2 Corintios . . . . .	234
Gálatas . . . . .	243
Efesios . . . . .	249
Filipenses . . . . .	254
Colosenses . . . . .	258
1 Tesalonicenses . . . . .	262
2 Tesalonicenses . . . . .	265
1 Timoteo . . . . .	267
2 Timoteo . . . . .	272
Tito . . . . .	275
Filemón . . . . .	277
Hebreos . . . . .	278
Santiago . . . . .	290
1 Pedro . . . . .	294
2 Pedro . . . . .	299
1 Juan . . . . .	302
2 Juan . . . . .	306
3 Juan . . . . .	307
Judas . . . . .	308
Apocalipsis . . . . .	310

## Íyi ulitane e' wì tkënewami

### Génesis

Si'kuaie yëkküò i' kiè *Génesis*, e' wà kiane chë, *íyi ulitane e' wì tkënewami*. Yëkküò i' blatëule bôt tsjini. Et tsjini e' dör capitulo et dö capitulo dabom eyök kî et (1-11). Iët tsjini e' dör capitulo dabom eyök kî bôt dö capitulo dabom skeyök (12-50). Et tsjini e' tò se' a íyi kos e' wì pakë. Ká jai ena ká i' e' yöne kewë. Nies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpá, e' kos yö' Skëköl tò, e' pakë yëkküò et tsjini tò. Nies wës s'ditsö tsá e'pa tò ì sulu wamblë' ena ì 9' Skëköl tò ie'pa tsatkoie inuí yökí, e' tso' kitule yëkküò et tsjini kî. Nies wës s'ditsö pone'mi ká wa'ñe senuk ditséwö wa ditséwö wa ena ì kuekî s'ttö tso' tajë kua'kî kua'kî, e' kos pakë yëkküò et tsjini tò.

Yëkküò iët tsjini tò ikkachë se' a tò wës Israel aleripa e'pa dë'bitü wëm eköl kiè Abraham e' wa. Israel aleripa wa Skëköl tò ibikeitsétke ká ulitane wakpa tsatök inuí yökí. As e' wà tkö, e' kuekî Skëköl tò Abraham klög' iwák a. Abraham erblë' Skëköl mik buaë, e' kuekî Skëköl tò ittë me' ie' a. E' tso' kitule yëkküò iët tsjini kî.

Ttë me' Skëköl tò Abraham a, e' ë me'itö Abraham alà Isaac ena Isaac alà Jacob e'pa a. Jacob ñe' ë kiè ñies Israel. E' kuekî ie' aleripa kiësö Israel aleripa. Yëkküò iët tsjini ë kî itsö' kitule tò wës Skëköl tò Abraham, Isaac ena Jacob, e'pa tsatké'bitü ibolöpka wës yökí as ttë me'itö ie'pa a e' wà tkö wake'.

#### Skëköl tò íyi ulitane yö'

<sup>1</sup> Tsawe tã ká jai ena ká i', e' yö'at Skëköl tò. <sup>2</sup> Mik ie' tò íyi ulitane tsá yö'mi, etã ká wa'ñe kë kî ì ku' yës. Ká sí kë tã'. Di' ë me'r' iskjë. Ká dör ttsettseë. Erë Skëköl Wiköl shkôar di' tsaka.

<sup>3</sup> Etã Skëköl tò ichë: “¡Ká ñinú!”

Etã ká ñine. <sup>4</sup> Ie' tò isuë tò ká ñiwe e' dör buaë, e' méatitö ñiweie. Ká ttsettse, e' méatitö nañeweie. <sup>5</sup> Niwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

<sup>6</sup> E' bule es tã ie' tò ichë: “¡iyönú wës skátke kkö dapee es di' shujá iblatoie as kë iwöierwane ñi a!”

<sup>7</sup> Etã es iyueitö di' blatoie. Es di' atë ká jaisht ena ká i' kî. <sup>8</sup> Í yueitö, e' kiéitö kãköl'ttö. Ekkë kanewéitö etã ká de bôt.

<sup>9</sup> E' bule es tã ie' ichë: “¡Di' atë ká i' kî, e' e' dapa'úka ek tsjini éme as iyök poppo doka!”

Etã es iyöne. <sup>10</sup> Wé iyök poppo deka, e' kiéitö iyök. Wé di' dapaneka, e' kiéitö dayë.

Ie' isuë tò e' kos dör buaë. <sup>11</sup> E' ukuökí tã ie' tò ichë: “¡iyök kî íyi kuá ulitane tskinú! Kãkô wör tã' ese, ñies kal ulitane wör tã' ese kos tskinú iwakmik iwakmik.”

Etã es ekkëpa tschine. <sup>12</sup> Es iyök kî íyi kuá ulitane tschine kãkô wör tã' iwakmik iwakmik, ñies kal wör tã' iwakmik iwakmik. Ie' tò isuë tò ekkëpa kos, e' dör buaë. <sup>13</sup> Ekkë kanewéitö etã ká de mañat.

<sup>14</sup> E' bule es tã ie' ichë: “¡ì dalöburta' yönú ká jai a! Ekkëpa dör buaë ká blatoie ñiwe nañewe, ñies ikkachoie mik tã diwö de kawö tköwoie, ñies ká shtã'woie ena duas tköke e' jchenoie. <sup>15</sup> Ekkëpa kos dalöburke tajë ká i' kî.”

Etã es iyöne. <sup>16</sup> Es ie' tò ì dalöburta' tajë ese yuëat bök. Ikibiie dör ká ñiwoie ñiweie. Wéne dalöbur diöshet e' dör olo'bunoie nañeweie. <sup>17</sup> Ekkëpa méatitö ká jai a dalöbunoie ká i' kî <sup>18</sup> ñië nañeë, ñies ká ñiwe ká nañewe e' blatoie. Ie' tò isuë tò ekkëpa dör buaë. <sup>19</sup> Ekkë kanewéitö etã ká de tkël.

<sup>20</sup> E' bule es tã ie' tò ichë: “¡iyiwak serke di' a dayë a, e' kos yönú tajë! ¡Ñies dù ulitane yönú as iyur kashuk a!”

<sup>21</sup> Etã es iyiwak blublue serke dayë a, ekkëpa yueitö. Nies iyiwak kos serke di' a ena dayë a ekkëpa yueitö iwakmik iwakmik. E' sù dù ulitane yueitö, iwakmik iwakmik.

Ie' isuë tò ekkëpa kos dör buaë. <sup>22</sup> Etã iyiwak yueitö e'pa a ie' er buaë chë ttë i' wa: “a' alönú tajë, di' kos, dayë kos, e' wà iökã tajë. Nies as dù alör tajë ká wa'ñe.”

<sup>23</sup> Ekkëpa kanewéitö etã ká de skël.

<sup>24</sup> E' bule es tã ie' tò ichë: “¡iyiwak serke ká sí kî, e' ulitane yönú iwakmik iwakmik! ¡iyiwak uru, iyiwak kañiru, iyiwak e' kuke iskj, ekkë kos yönú iwakmik iwakmik!”

<sup>25</sup> Etã es ie' tò iyiwak ulitane yuë ká sí kî iwakmik iwakmik. Ie' tò isuë tò ekkëpa kos dör buaë.

<sup>26</sup> E' ukuökí tã ie' tò ichë: “Ditsö yuösö wës se' es as ie'pa tkökasö ká i' kos wökirie. Nima, dù, iyiwak uru, iyiwak kañiru, iyiwak e' kuke iskj, ekkë kos tso' ká i' kî, e' atdaë ie'pa ulá a.”

<sup>27</sup> Mik Skëköl tò s'ditsö tsá yö',

etã iyueitö wës ie' es;

Ie'pa yueitö wëm eköl ena alaköl eköl.

<sup>28</sup> Ie' er buaë chë ie'pa a i' es:

“A' ala'r kóka tajë,

a' alönú tajë ká ulitane kî.

Ká i' kos e' kané ú a' tò.

Nima, dù, ena iyiwak ulitane ekkëpa kos wökir a' dör, e' wà ú.”

<sup>29</sup> E' ukuökí tã Skëköl tò ichë ie'pa a: “Ye' ttö ttsö. Íyi kuá kos wörta' ñarta', ese méatyö a' a ñë. Nies kalwö ulitane katarta' ku'yarta' ese kos méatyö a' a katé ku'yé. <sup>30</sup> Erë iyiwak

kañiru, iyiwak uru ena dù, ekkèpa kòs a kàkò méatyo katè.” Eta es iate. <sup>31</sup> Ie' isué tò ekkè kòs dör buaë shùte. Ekkè kanewéitò eta kà de teròl.

## 2

<sup>1</sup> Es kà jai ena kà i', ñies íyi ulitane tso' iki, e' yöne one se. <sup>2</sup> Kà de kul eta i kòs yö'bitütò e' yöne one, e' kuekji diwò e' wa ie' kè kanèblène. <sup>3</sup> E' diwò wa kè ie' kanèblèneia kà i' yuök e' kuekji ie' iché tò diwò e' dör buaë. Ñies ie' iché tò semana bit e' diwò bata e' dör batse'r se' a.

### *Skèkòl Jehová tò s'ditsò tsá yué*

<sup>4</sup> I' dör kà jai ena kà i' tsá yöneat, e' pakè.

Mik Skèkòl Jehová tò kà jai ena kà i' e' yö', <sup>5</sup> e' kèwò skra' tã kãm ie' tò kalì patkò kà i' kì, ñies kè yi ku' kà kanéuk. E' kuekji kãm kal kuá tskir ena kãm kàkò tskir. <sup>6</sup> Erè di' tskirke iyök a, e' tò iyök kòs nuweke. <sup>7</sup> Eta Skèkòl Jehová tò iyök yué s'ditsòie ekòl wák dör wèm. Eta ie' tò iwóiké iyik a tã iyöne se'ie ttsé'ka.

<sup>8</sup> E' ukuökì tã ie' tò kà buaala yué ekwòki diwò tskirke e' èka, kà kiè Edén eë. Eta wèm yö'itò, e' méatitò kà buaala e' a senuk. <sup>9</sup> Eë ie' tò kal ulitane wër bua'buä, ñies iwò dör buäè katano ese tské. Kà buaala e' shusha, ie' tò kal tské bòlka. Kal elka dör sene michoé e' kéli. Kal iëlka e' dör íyi buäè ena íyi suluè ese jchënoie e' kéli.

<sup>10</sup> Edén kà shua di' tskirke etò, e' tò kà buaala nuweke. Wé kà e' kò dowa eë di' e' ulà jchërke dòkà tkètò. <sup>11</sup> Di' ulà etò kiè Pison. E' tkòkemi kà kiè Havilá, e' kòs a. Kà e' kì oro tso'. <sup>12</sup> Oro e' dör oro bua'buä. Ñies kiò masmas bua'buä, ese tso' ena ák bua'buä kiè ónice ese tso'. <sup>13</sup> Di' ulà ètò tkòkemi kà kiè Cus, e' kòs a. E' kiè Guihón. <sup>14</sup> Iulà ètò skà mir kà kiè Asiria diwò tskirke, e' èka. E' kiè Tigris. Eta di' ulà bata, e' kiè Éufrates.

<sup>15</sup> Mik Skèkòl Jehová tò wèm tsémi méat kà buaala atë Edén e' shua as ikaneütò, as ikkò'nütò, <sup>16</sup> eta ie' tò itè dalóieno i' mé ia: “Kà buaala e' kéliwò ulitane katèmbò. <sup>17</sup> Erè íyi buäè ena íyi suluè ese jchënoie e' kéliwò kè katar. Mik kal e' wò katébò, eta be' duòwaraë. E' kuekji kè ikatar.”

<sup>18</sup> E' ukuökì tã ie' tò iché: “Kè idör bua' wèm a senuk ekörla. Súyo ie' a wapie yué ekòl ikimuk buaë.” <sup>19</sup> Eta iyiwak yö'itò iyök wa ekkè kòs debitü iwã wèm a suè tò íma ie' tò ikiè mekãmì. Tã wes wèm tò ikiè méka es iate. <sup>20</sup> Es wèm tò iyiwak uru ena iyiwak kañiru, ñies dù, ekkè kòs kiè méka. Erè kè ie' kímuk kune buäè ie' wapieie.

<sup>21</sup> Eta Skèkòl Jehová tò wèm kapówéwã tajë, e' dalewa ie' tò ichane yéttsa etò, e' chká wóiwéwãnitò. <sup>22</sup> Ichane e' yuéitò alakòlie tã

idebitü iwã wèm a. <sup>23</sup> Mik wèm tò isué, eta ichéitò:

“Íl' je' dör ye' wák dichéwò ena ye' wák chká! Alakòl dé'kã wèm wa, e' kuekji ikirdaë alakòl.”\*

<sup>24</sup> E' kuekji wèpa kè serpaia iyé ena imì e'pa dapòmik, iserdawa alakòl tã. Ie'pa bõl serdaë ñita, tã imía wes wák ekòl è es.

<sup>25</sup> E' késka' tã wèm ena alakòl ièter sume, erè ie'pa kè wã jaë jcher.

## 3

### *S'ditsò tò Skèkòl ttò dalòsewéwã*

<sup>1</sup> Tkabè tso' etò, e' erbikò tajë s'kìtò'woie iyiwak kañiru yö' Skèkòl Jehová tò, ekkè kòs tsatã. Kà et tã ie' tò alakòl a ichaké:

—¿Mokì Skèkòl tò iyé'at a' a' tò kà buäè shua kal ulitane tso', e' wò kè katar yès?

<sup>2</sup> Alakòl tò iüté:

—Au, e' kè dör es. Ie' tò sa' a iché tò kal ulitane wò katarmi. <sup>3</sup> Erè kal ar kà i' shushaë, e' wò kè katanuk, kè e' kanuk sa' a. E' wamblé sa' tò, eta sa' duòralur.

<sup>4</sup> Eta tkabè tò iché alakòl a:

—Au, e' dör kache. A' kè duòpawã. <sup>5</sup> Ie' wã ijcher buäè tò mik kalwò e' katéwa a' tò, eta i' dör buäè, i' dör suluè e' jcherdaë a' wã wes ie' wák wã ijcher es.

<sup>6</sup> Eta alakòl isué tò kalwò e' wër buäè katè. Ie' éna ikatak íyi jchënoie buäè. E' kuekji ie' tò kalwò batsée, katèwaitò. E' ukuökì tã ie' tò imé iwèm a, eta iwèm ikatéwa ñies. <sup>7</sup> E' bet tã i' dör sulu, i' dör buäè ese ane ie'pa éna, eta ie'pa wã jchënewã tò ie'pa ièter sume. Eta ie'pa tò kal kiè higuera, e' kóyök yué banoie e' wa ie'pa e' patrèwã.

<sup>8</sup> Siwã' bitsirke tsáji, eta wèm ena ilakòl tò Skèkòl Jehová shkòkèdur kà buäè shua, e' ttsé. E' yöki ie'pa e' blélur kal tso' tajë ese shua.

<sup>9</sup> Erè Skèkòl Jehová tò wèm kiè tã ichaké:

—¿Wé be' tso'?

<sup>10</sup> Wèm tò iüté:

—Ye' tò ittsé tò be' shkòkèdur kà buaala shua. Ye' dur sume, e' kuekji ye' suane be' yöki. E' kuekji ye' e' bléwã be' yöki.

<sup>11</sup> Eta Skèkòl tò ie' a iché:

—¿Yi be' a iché tò be' dur sume? Ichò ña tò kalwò yé'yò be' a tò kè ikatar ¿e' katébò?

<sup>12</sup> Ie' tò iüté:

—Be' tò ye' a alakòl me', ye' wapieie, e' tò ye' a kalwò mé katè. E' katéwayò.

<sup>13</sup> Eta Skèkòl Jehová tò alakòl a ichaké:

—¿Iök bõ iwamblé?

Ie' tò iüté:

—Tkabè tò ye' kítéka, e' kuekji ye' tò kalwò e' katéwa.

<sup>14</sup> Eta Skèkòl Jehová tò tkabè a iché:

\* 2:23 Hebreoie ttè kiane yènuk wèm e' dör ish ena ttè kiane yènuk alakòl e' dör isha.

—Ï wamblébe' tò, e' kuęki ye' tò be' a iché tò iyiwak ęos şua be' ě weirdaė michoė. Kękraė be' şhkoraė e' kuęle be' batsi' ki ta be' kkō a ká po mirawa. <sup>15</sup> Be' ena alakōl meraętyō ñi bolōkie. Be' aleripa ęos ena alakōl aleripa ęos, e'pa aęe ñi bolōkie ñies. Alakōl aleri ekōl tò be' wōkir şhka'weraė ena be' tò ie' klō kanifań şhka'weraė.

<sup>16</sup> E' ukuōki ta ie' tò iché alakōl a:

—Mik be' alā kęrketke eęa be' weirdaė şiarė, idalė'r tajė e' ttseraėbō. Erė be' ki be' wēm kiardaė ena ie' dōraė be' wōkirie.\*

<sup>17</sup> E' ukuōki ta ie' tò iché wēm a:

—Be' tò be' alakōl ttō iutė, kalwō yė'yō be' a tò kė ikatar, e' wā katėbō. E' kuęki be' weirdaė ñies. Be' kuęki iyōk sulu'wėrawayō. Be' kaneblōraė darėrėė be' chkė yuloie. <sup>18</sup> İyōk ki dika'chka ena kākō sulusi, alōrdaė. Ñies kalwō kańiru katerabō. <sup>19</sup> Be' kawōta kaneblōk darėrėė choie dō mik be' duowa, miane iyōkie wes be' dōr kuaė es eęa. Be' yōne iyōk wa, e' kuęki be' dōrane iyōkie.

<sup>20</sup> Wēm tsá yōne, e' kiė Adán. İlakōl dōr se' mī tsá. E' kuęki Adán tò ikiė mēka Eva.†

<sup>21</sup> Eęa Şkėkōl tò datsi' yuė ie'pa a iyiwak kkuōlit wa, ta ie'pa paieitō. <sup>22</sup> Eęa ie' tò ichė: “İñe i dōr buaė ena i dōr suluė, e' jęher ditsō wa wes se' wā ijęher es. E' kuęki dō' ie'pa mī, sene michoė e' kėli wōbatsōk katė ta iser michorak.”

<sup>23</sup> E' kuęki ie' tò wēm ena ilakōl yėttsa ká buaala tso' Edén e' a, ta ipatkėmitō İyōk wakanėuk. İyōk wa wēm yōne e' ki ipatkėmi kaneblōk. <sup>24</sup> İe' tò itrė'wėshka, e' ukuōki ta i ttsė'ka pik ta' tso' ká jai a kiė kėrub, e'pa tulėwaıtō ká buaala e' ñalė ska' diwō tskirke e' ěka ikkō'nuk. Ñies tabė wōńarke dalōlōė ratkear siwa' ki, e' męatitō aš kė yi dōwaia sene michoė kėli ska'.

## 4

*Caın tò iėl kiė Abel, e' ttėwa*

<sup>1</sup> Eęa Adán senė Eva ta. Eva duneka ta ilā kune wēm. İkiė mękaitō Caın.\* Mik alā kune, eęa Eva tò ichė: “Jehová tò ye' kımė, e' kuęki ye' alā kune ekōl wēm.” <sup>2</sup> E' ukuōki ta ilā skā kune ek, e' kiė Abel, Caın ěl tsirla. Abel tò obeja alōweke. Caın tò dali kuatkeke.

<sup>3</sup> Ká et ta, Caın wā idali wōne, ese kak mī mē Jehová a idalōie. <sup>4</sup> Eęa Abel wā ie' icha mī ñies. İe' obeja tsá bua'buwa, ese kak mī ie' wā mē Jehová a. Abel ena i mēitō e' wėr buaė Jehová wa. <sup>5</sup> Erė ie' kė wā Caın ena i mēitō e' sune es, e' kuęki Caın uluneka tajė, iwō yėe suluė. <sup>6</sup> E' kuęki Jehová tò Caın a ichakė: “İjōk be' ulune wō yėe sulu? <sup>7</sup> Be' tò i bua' ũpa, e'ma be' jańuke tsuleė. Erė i

sulu wamblėbō, e' kuęki i sulu e' mėtėr bėr be' panuk namuie e' aloka be' ki. Erė be' kė e' alōkka iki.”

<sup>8</sup> Ká et ta, Caın tò iėl Abel kiėmi kańika. Mik ie'pa demi kańika, eęa eę Caın ñippėka iėl ta eęa iėl ttėwaıtō. <sup>9</sup> E' ukuōki ta bet, Jehová tò Caın a ichakė:

—İwė be' ěl Abel?

Caın tò iutė:

—Ye' kė wā ijęher. Ye' kė dōr ie' kkō'nukwak. <sup>10</sup> Şkėkōl tò ie' a ichė:

—İjōk bō iwamblė es? Be' ěl ttėwabō, e' pė tēne tajė iyōk ki, e' nuı tso' be' ki. E' ki ye' kawōta be' we'ikōk. <sup>11</sup> E' kuęki be' weirdaė iyōk ki wė be' tò be' ěl pė tkō'wė, e' ki be' yerattsayō. <sup>12</sup> Be' kaneblōmi tajė, erė kė wā wōrpa buaė. Be' kawōta şhkōk ká wa'ñe, kė a eno ta' yės.

<sup>13</sup> Eęa ie' tò Jehová iutė:

—E' darėrė ye' a. Kė ye' a idalė'ttsėnuk.

<sup>14</sup> İñe be' tò ye' uyėttsa ká i' ki, e' ukuōki ta ye' kawōta şhkōk ká wa'ñe kańiė, kė a eno ta'. Be' kė ku'ia ye' ta, e' kuęki yi ye' kuėwa, ese tò ye' tterawa.

<sup>15</sup> Erė Jehová tò iutė:

—Yi be' ttėwa, ese ki weirdaė şiarė tajė iskėie.

Eęa Şkėkōl tò iwakyuėe iwā kkachoie aš yi tò ikuėwa, ese kė tò ittōwa. <sup>16</sup> Eęa Caın e' yėttsa Jehová wōrki ta imia ká kiė Nod eę, ká e' aę Edén diwō tskirke e' kke.

<sup>17</sup> Eęa Caın senė ilakōl ta. İduneka ta ilā kune wák dōr wēm, e' kiė Enoc. E' ukuōki ta Caın tò ká yuė et, kiė mękaitō ilā kiė wa Enoc. <sup>18</sup> Enoc dōr İrad yė. İrad dōr Mehujael yė. Mehujael dōr Metusael yė. Metusael dōr Lámeç yė.

<sup>19</sup> Eęa Lámeç senėwa alakōlpa bōl ta. Ekōl kiė Adá, ekōl kiė Silá. <sup>20</sup> Eęa Adá dē' alāė kiė Jabal. E' aleripa dōr iyiwak alōukwakpa e' şerke ũla yōule datsi'tak wa ese a. <sup>21</sup> İe' ěl kiė Jubal. E' aleripa dōr ma'ma kicha ta' guitarra sū ena ma'ma pulė sū ese bla'ukwakpa. <sup>22</sup> Silá dē' alāė ñies kiė Tubal-Caın. E' aleripa dōr tabechka kiė bronce ena hierro ese stė. E' kutā kiė Naamá.

<sup>23</sup> Ká et ta Lámeç tò ichė ilakōlpa a:

“A Adá, a Silá, ye' ttō ttsō:

Wēm ekōl duladula tò ye' şhkaō, e' kuęki ye' tò ikōtwa.

<sup>24</sup> Yi tò Caın ttėwa, e' tò iskė tuęraė şiarė, erė yi tò ye' ttėwa, e' tò iskė ki tuęraė jaişęt şuęte.”

<sup>25</sup> Adán alā skā kėkaņe ilakōl ta wák wēm. Eva tò ichė: “Şkėkōl tò ye' a alā skė mé ekōl, Caın tò Abel kōtwa, e' skėie.” E' kuęki ie' tò ikiė mēka Set.†

\* **3:16** Mik be' alā kęrketke...ie' dōraė be' wōkirie: Ñies ttė e' mane'wėmisō i' es: Be' ěna e' alakka be' wēm ki, erė ie' e' alōraka be' ki. † **3:20** Eva: Hebreoie s'kiė e' wā kiane chė ttsė'ka. \* **4:1** Caın: Hebreoie s'kiė e' wā kiane chė ye' ũla a ide. † **4:25** Set: Hebreoie s'kiė e' wā kiane chė ie' tò imė.

<sup>26</sup> Nies Set de aláë wák wëm kiè mékãitö Enós. E' kèwö ska' tã s'ditsö tó Skèköl a' íyí tsá ki'mi ena idalöië'mi ikie Jehová e' wa.

## 5

### Adán aleripa

<sup>1-2</sup> Mik Skèköl tó s'ditsö tsá yò, etã iyuéitö wës ie' wák es. Ie'pa yuéitö wëm ena alaköl. Ie' er buaë ché ie'pa a. Ie' tó ie'pa yué, e' diwö shã tã ikie mékãitö s'ditsö. I' dör Adán aleripa e'pa kiè.

<sup>3</sup> Mik Adán kã duas de cien eyök kã dabom mañayök (130), etã ie' alá kune eköl, e' dör wës ie' wák es, ikie mékãitö Set. <sup>4</sup> E' ukuökã tã ie' kã seneiã duas cien paryök (800). E' shuã ie' ala'r kã kune wëpa ena alakölpa. <sup>5</sup> Es ie' kã duas deka sërãã cien suliyök kã dabom mañayök (930) etã ie' blënewã.

<sup>6</sup> Mik Set kã duas de cien eyök kã skël (105), etã ie' alá wëm kiè Enós, e' kune. <sup>7</sup> E' ukuökã tã ie' kã seneiã duas cien kuryök kã kul (807). E' shuã ie' ala'r kã kune wëpa ena alakölpa. <sup>8</sup> Es ie' kã duas deka sërãã cien suliyök kã dabom eyök kã bök (912) tã iblënewã.

<sup>9</sup> Mik Enós kã duas de dabom suliyök (90), etã ie' alá wëm kiè Cainán, e' kune. <sup>10</sup> E' ukuökã tã ie' kã seneiã duas cien paryök kã dabom eyök kã skël (815). E' shuã ie' ala'r kã kune wëpa ena alakölpa. <sup>11</sup> Es ie' kã duas deka sërãã cien suliyök kã skël (905) tã iblënewã.

<sup>12</sup> Mik Cainán kã duas de dabom kuryök (70), etã ie' alá wëm kiè Mahalalel, e' kune. <sup>13</sup> E' ukuökã tã, ie' kã seneiã duas cien paryök kã dabom tkëyök (840). E' shuã ie' ala'r kã kune wëpa ena alakölpa. <sup>14</sup> Es ie' kã duas deka sërãã cien suliyök kã dabom (910) tã iblënewã.

<sup>15</sup> Mik Mahalalel kã duas de dabom teryök kã skël (65), etã ie' alá wëm kiè Jéred, e' kune. <sup>16</sup> E' ukuökã tã, ie' kã seneiã duas cien paryök kã dabom mañayök (830). E' shuã ie' ala'r kã kune wëpa ena alakölpa. <sup>17</sup> Es ie' kã duas deka sërãã cien paryök kã dabom suliyök kã skël (895) tã iblënewã.

<sup>18</sup> Mik Jéred kã duas de cien eyök kã dabom teryök kã bök (162), etã ie' alá wëm kiè Enoc, e' kune. <sup>19</sup> E' ukuökã tã, ie' kã seneiã duas cien paryök (800). E' shuã ie' ala'r kã kune wëpa ena alakölpa. <sup>20</sup> Es ie' kã duas deka sërãã cien suliyök kã dabom teryök kã bök (962) tã iblënewã.

<sup>21</sup> Mik Enoc kã duas de dabom teryök kã skël (65), etã ie' alá wëm kiè Matusalén, e' kune. <sup>22</sup> Ie' tó Skèköl ttö ë dalöieke. Matusalén kune, etã ie' kã seneiã duas cien mañayök (300). E' shuã ie' ala'r kã kune wëpa

ena alakölpa. <sup>23</sup> Es ie' kã duas deka sërãã cien mañayök kã dabom teryök kã skël (365). <sup>24</sup> Ie' sene' buaë Skèköl tã, e' kuëkã kã etã tã Skèköl wã ie' mitsër ttsë'ka, e' kuëkã kã ie' ku'ia.

<sup>25</sup> Mik Matusalén kã duas de cien eyök kã dabom paryök kã kul (187), etã ie' alá wëm kiè Lámeç, e' kune. <sup>26</sup> E' ukuökã tã, ie' kã seneiã duas cien kuryök kã dabom paryök kã bök (782). E' shuã ie' ala'r kã kune wëpa ena alakölpa. <sup>27</sup> Es ie' kã duas deka sërãã cien suliyök kã dabom teryök kã sulitu (969) tã iblënewã.

<sup>28</sup> Mik Lámeç kã duas de cien eyök kã dabom paryök kã bök (182), etã ie' alá kune wëm. <sup>29</sup> E' kiè mékãitö Noé.\* Mik ie' tó ilã kiè méka, etã ie' tó iché: "Jehová tó íyök suluwã. E' kuëkã se' kawötã kanëblök darërë ikuatkoie; erë alá i' tó se' keraë enuk." <sup>30</sup> Noé kune, e' itök Lámeç kã seneiã duas cien skëyök kã dabom suliyök kã skël (595). E' shuã ilã'r kã kune wëpa alakölpa; <sup>31</sup> Es ie' kã duas deka sërãã cien kuryök kã dabom kuryök kã kul (777) tã iblënewã.

<sup>32</sup> Noé kã duas de cien skëyök, e' itök ilã'r kune mañal. Ikibi kiè Sem. Ishu ëk kiè Cam. Ibata ëk kiè Jafet.

## 6

### S'ditsö ñ sulu ë wambleke këkraë

<sup>1-2</sup> Mik s'ditsö alonémi tajë kã i' kã, etã Skèköl ala'r\* tó isuë tó s'ditsö alá busipa dör bua'buaala. E' kuëkã ie'pa tó busipa wa ie'pa wöbatse ese tsëlur. <sup>3</sup> Erë Jehová tó iché: "Ditsö dör duõtã wã ese wãpa. I'ñe tã ye' kã tó kawö mepaiã ditsö a' sèno kã tajë. Es iserdaë duas cien eyök kã dabom böyök (120), ekkë ulat."

<sup>4</sup> Mik Skèköl ala'r bak senuk s'ditsö alá busipa tã alá koka ie'pa tã, etã e' këska' tã wëpa blublüë, kãkqëë, esepa welepa bak kã i' kã. Nies e' ukuökã wëpa esepa bakia. E'pa dör pë' darërë kkeaukã tajë iã'chki tã ese.

<sup>5</sup> Jehová tó isuë tó s'ditsö tó ñ sulu ë wambleke tajë shütë. Ì suluë ë bikeitseke ie'pa tó këkraë. <sup>6</sup> E' kuëkã Skèköl er a idalënëne tajë. Ie' tó ibikeitsë: "Kë yö ditsö yuöpa." <sup>7</sup> Etã ie' iché: "Ditsö yö' ye' tó kã i' kã, súyo e'pa ewëwa. Nies iyiwak kos serke kã sí kã, e' ewerawayö. ¿Iie ye' tó ie'pa yö?" <sup>8</sup> Erë wëm tso' eköl kiè Noé, e' suëkã Jehová tó er bua' wa.

### Noé tó kanö bërie yué

<sup>9</sup> Ttë ikkë dör Noé pakë.

Noé dör wëm yësyësë Skèköl wãkã. Këkraë ie' tó Skèköl ttö dalöieke buaë. Ie' eköl ë serke

\* 5:29 Noé: Hebreoie s'kiè e' wã kiane chë enuk.

\* 6:1-2 Skèköl ala'r: Kë s'wã ijcher mokã tó yi chéitö es. Wëlepa tó ibikeitsë tó e' dör Skèköl biyöchökwakpaie ö aknamaie erë Jesús tó iché tó esepa kã a' senukwã s'ditsö tã (Marcos 12.25). Wëlepa skã tó ibikeitsë tó e' dör s'ditsö wësele ser suluë. Ì wamblekerakitö ese kë wër buaë Skèköl wa, e' ë jcher se' wã.

wes Skéköl kî ikiane es. <sup>10</sup>Ie' ala'r dör mañal wêpa kiê Sem, Cam, ena Jafet.

<sup>11</sup>Skéköl wörki s'ditsö tso' e' wamlölk sulu ême, ñippök tajê shute. <sup>12</sup>Ie' tö isue' tö tajê iyi suluê ë tso' iyök kî. <sup>13</sup>E' kueki ie' tö Noé a iché: "Ye' tö ibikeitsétke tö ditsö kos tso' ká i' kî e' ewerawayö se. Ie'pa ñippöke tajê shute ká i' kî. E' kueki ye' tö ditsö kos tso' ká i' kî e' ewerawa seraa di' tajê wa. <sup>14</sup>E' kueki kanò yuó etö bère kal bua'buwa ese wa, e' shü blató. Kanò wöar tso' ipamik, e' wötó kiöchka dalolo bötsböts ese wa u'rki ena ishüa as di' kè tköwaia. <sup>15</sup>Kanò yuó batsi metro döka cien eyök kî dabom mañayök kî skel (135 metros) ekké. Nies ishóló yuó metro döka dabom eyök kî mañat kî shaböts (22,5 metros) ekké. E' sù ispe' yuó metro döka dabom eyök kî mañat kî shaböts (13,5 metros) ekké. <sup>16</sup>Kanò wöar u' yuóka, eré kanò kkó kî iulat múat metro shaböts. Kanò shü blató mañat kuó. Nies iwékkó yuó et kanò spe' mik shkowaie kanò a. <sup>17</sup>Di' patkerayó iyi tso' tse'ka ká i' kî e' kos ewöwa. Ekké duörawa seraa ká wa'ñe. <sup>18</sup>Eré ye' tte meraë be' a tö be' tsatkeraeýö kanò a di' yöki. Be' ala'r ena be' alakól ena be' yakpa, e' pa tsúmi e' ta kanò a. <sup>19</sup>E' sù iyiwak kuá'kî kuá'kî tso' ká si kî, e' iómi kanò a etö wé'ñe etö alaki as itsatker wes be' es. <sup>20</sup>Iyiwak kos ió kanò a. Iyiwak kuá'kî kuá'kî urta', iyiwak uru, dö iyiwak e' kúke iski, e' kos iómi kanò a, etö wé'ñe etö alaki, as kè iduóhur. <sup>21</sup>Nies chké ulitane dapa'ú bló be' a ena iyiwak a katè."

<sup>22</sup>Etá ekké kos wakanewé Noé tö se wes Skéköl tö iché ia es.

## 7

### *Di' bak tajê ká i' kî*

<sup>1</sup>4 E' ukuóki ta Jehová tö Noé a iché: "Tñe kuiki ta ye' tö kalj patkeraë ká i' kî döka ká dabom tkéyök (40) ñië nañeë. je' wa iyi ulitane yö' ye' tö tso' tse'ka ká si kî, e' kos ewerawayö yés! Eré ye' tö isue' tö ditsö ulitane shüa be' ë serke buaë yésyësë wes ye' kî ikiane es. E' kueki be' e' ióka kanò a be' yamipa kos ta. Nies iyiwak batse'r\* kos ese tsúmi döka kuktó wé'ñe kuktó alaki. Eré iyiwak kè dör batse'r, ese tsúmi tö wé'ñe etö alaki. E' sù nies dù kuá'kî kuá'kî tsúmi döka kul wé'ñe kul alaki as kè ierwa. Kos tte chéyö be' a, e' wakaneú es." <sup>5</sup>Etá e' kos wakanewé Noé tö yésyësë wes Jehová tö ie' a iché es.

<sup>6</sup>Mik di' bak tajê ká i' kî, etá Noé kî duas tso' cien teryök (600). <sup>7</sup>Ie' e' iéka kanò a ila'r ena ilakól ena iyakpa e'pa kos ta e' tsatkök di' alórke tajê e' yöki. <sup>8-9</sup>Iyiwak batse'r, e' sù iyiwak kè dör batse'r, iyiwak e' kúke ibatsj'

kî nies dù, ekké kos dewa kanò a Noé ta bólka bólka wes Skéköl tö iché ia es.

<sup>10</sup>Ká de kul, etá di' tö ká katémítke. <sup>11</sup>Noé kî duas de cien teryök (600), kî si' e' kî ká dabom eyök kî kul (17). E' diwó shá ta iyök tskirólone ta di' tso' idikja e' deka tajê ká wa'ñe. Nies ká jaishet kköburlone ta di' biteshka tajê kaljie ká i' kî. <sup>12</sup>Etá kalj yéne daréréë döka ká dabom tkéyök (40) ñië nañeë. <sup>13</sup>Kalj yénemi, e' diwó shá ta Noé e' iéka kanò a ila'r ta. Ila'r kiê Sem, Cam ena Jafet. E' sù ilakól, iyakpa mañal, e'pa e' iéka nies ie' ta kanò a. <sup>14</sup>Ie'pa ta iyiwak ulitane dewa kanò a, iyiwak uru, iyiwak kañiru, iyiwak e' kúke iski kî ena dù ulitane. Ekké kos dewa kanò a ie'pa ta. <sup>15</sup>Iyiwak kos ekké dewa kanò a bólka bólka. <sup>16</sup>E' shü imi wé'ñe etö alaki etö, wes Skéköl tö iché ia es. E' one yés ta, Skéköl tö kanò wékkó wötéwa.

<sup>17</sup>Etá kalj yénemiie döka ká dabom tkéyök (40). Wes di' alór mirka es kanò batsemirkaitó. <sup>18</sup>Es di' kî alónemi tajê ta kanò batsemirkaitó buaë. <sup>19-20</sup>Es di' alóneka tajê kabata kos blubluë, e' tsata jaishet dö metro kul ekké. <sup>21</sup>Es kos iyi tso' tse'ka ká si kî, ekképa duolur di' a se. Dù kos, iyiwak uru kos, iyiwak kañiru kos, iyiwak e' kúke iski kos, nies s'ditsö ekképa kos duolur yés. <sup>22</sup>I kos tso' ká si kî tse'ka, e' enewa se. <sup>23</sup>Eré Noé ena i tso' ie' ta kanò a, e'pa ë tsatkéne. Etá imalepa kos e' enewa. Es nies iyiwak ulitane ewéwa di' tö. Dù ulitane, iyiwak uru, iyiwak kañiru dö iyiwak e' kúke iski, ekké kos enewa seraa. <sup>24</sup>Es di' ate iyök kî ká döka cien eyök kî dabom skeyök (150) ekké.

## 8

### *Di' sinewane*

<sup>1</sup> Eré Skéköl kè éna Noé ché'wa. Nies iyiwak ulitane tso' Noé ta kanò a e' kè ché'wa ie' éna. Ie' tö siwa' patké as itó di' siüwane ká wa'ñe. Etá di' pasinemine énaena. <sup>2</sup>Iyök tskirólone e' wöténene. Nies ká jaishet kköburlone e' wötérulunene. Etá kalj wöklönewa kè yérku'ia. <sup>3</sup>Di' tso'ia e' pasirmirne énaena. Ká de cien eyök kî dabom skeyök (150), etá di' sirmir éme. <sup>4</sup>E' kî si' de neról (6) diwó de dabom eyök kî kul (17), etá erpa kanò sineka kabata kiê Ararat e' kî. <sup>5</sup>Etá di' pasinemiiie. Si' de dabop (10), e' tsá diwó, etá kabata kakkeë ese wénemítke.

<sup>6</sup>E' kî ká de dabom tkéyök (40), etá Noé tö kanò wékkó tsitsir kköppée. <sup>7</sup>Ie' tö dù ölö sù, e' émi et. Eré dù e' kè dé'iane kanò a ie' urke wshwshd dö mik di' sine etá. <sup>8</sup>E' ukuóki ta ie' tö nuból émi e' isuoie tö ká sinene. <sup>9</sup>Eré di' tso'ia iyök kî, kam isirwa, e' kueki nuból dene kanò a. Kè ie' wá ká ulat poppo kune

\* 7:1-4 Iyiwak batse'r: E' wá kiane ché iyiwak kè dör ná ie'pa a. Se' wélepa tö iché iyiwak skítane.



e' tkowā. Noé tō nubōl klō'wéwā ulā wa tā itséwaneitō kanō a.

<sup>10</sup> Ie' tō iskā pané dōkā kā kul, etā ie' tō nubōl skā émine. <sup>11</sup> Kā tuinemitke tā nubōl dene, e' wā kal ulatska debitū ikā kī. Es Noé éna iane tō iyōk kī sirmir. <sup>12</sup> Ie' tō iskā pané dōkā kā kul, etā ie' tō nubōl skā émine. Nubōl e' kē dē'iane.

<sup>13</sup> Mik Noé kī duas tso' cien teryōk kī et (601), etā iyōk pasinene. Etā si' kewe, e' tsá diwō, ie' tō kanō kī u tso' e' kléttsa. Etā ie' isuē tō iyōk pasinene. <sup>14</sup> Kawō de si' et kī diwō dabom böyōk kī kul (27), etā ie' isuē tō iyōk pasinene sēraa. <sup>15</sup> Etā Skēkōl tō ie' a iché. <sup>16</sup> "Be' e' yōttsa kanō a, be' alakōl tā, be' ala'r tā, be' yakpa tā ñies. <sup>17</sup> Es iyiwak ulitane yōlurbō sē. Dù ena iyiwak uru ena iyiwak e' kuē iskī e' kos yōlurbō kanō a, as imi' kā wa'ñe alōnuk tajē kā wā iōkne."

<sup>18</sup> Es Noé alakōl ena ila'r ena iyakpa, e'pa e' yélur kanō a. <sup>19</sup> Es ñies iyiwak ulitane, uru ena kañiru ena iyiwak e' kuē iskī, ñies dù e' kos e' yéttsa kanō a sē. <sup>20</sup> E' ukuōkī tā ie' tō ák katatē kā'ie\* et Jehová a. E' bata kī ie' tō iyiwak batse'r ese jché ña'wéitō etō etō Jehová dalōioie. Ñies dù batse'r jchéitō ña'wéitō Jehová a etk etk. <sup>21</sup> Mik ishklé alar buaē, e' demi Jehová ska' tā ittséitō tā ibikeitséitō: "Erē ditsō iā duladula dōkā kēchke, etā i sulu ē bikeitsekeitō. Erē kē yō kā sulu'wepawaia ie'pa kuēkī. Es ñies kē yō i kos tso' tssē'ka e' ewēwāia wēs yō iewéwa es.

<sup>22</sup> "Kā i' tso'ia, etā dali kuatkērmī, iwā wōrmī; kaba tso', kase tso' ñies; kalī tso', duas tso' ñies; kā ñiwe tso', kā nañewe tso' ñies."

## 9

### Skēkōl Jehová tō itte mé Noé a

<sup>1</sup> Etā Skēkōl er buaē ché Noé a ñies ila'r a tā ichéitō ie'pa a: "A alōnú tajē. Kā wa'ñe wā iōne a' ala'r wa. <sup>2</sup> Ditsō yōkī iyiwak ulitane suardaē. Iyiwak ulitane urke kashuk a ena iyiwak serke kā sī kī ena iyiwak serke dayē a, e' kos atē a' dikīa. <sup>3</sup> Iyiwak ulitane ena kalwō ena kākō e' katēmi a' tō wē kiane a' kī ese. E' kos méatyō a' a katanoie. <sup>4</sup> Chkē ulitane katēmi a' tō, erē kē ikatar ipē tā, se' serke s'pē mik e' kuēkī. <sup>5</sup> Se' serke s'pē mik, e' kuēkī kē se' meneat ñi ttōkwā, e' nuī tā'. Yī tō ekōl ttēwā, ese kichatēdaē. E' sū iyiwak wē tō s'ttēwā, ese kawōtā ttēwā ñies. A' wē tō s'ttēwā, ese nuī patuēraēitō ye' a.

<sup>6</sup> "Skēkōl tō s'ditsō yō' wēs ie' es, e' kuēkī yī tō se' ttēwā, ese wāk kawōtā' ttēwā wake'.

<sup>7</sup> Erē a' alōnú tajē, kā wa'ñe wā iō ala'r wa."

<sup>8</sup> Ñies Skēkōl tō iché Noé a ena ila'r a: <sup>9-10</sup> "I'ñe ye' ttē mukeat a' a ena iyiwak e' yéttsa kanō a' a' tā, e' kos a. <sup>11</sup> Mokjē ye' tō a' a iché tō ye' kē tō ditsō ena iyiwak tso' kā wa'ñe, e' kos ewēpawaia di' wa. Di' kē dōpaia kā wa'ñe sulu'ukwā wēs itka es." <sup>12-13</sup> Ye' tō shkaba' tkekear mò shuā iwā kkachioie a' a ena ditsō ulitane a' tō ye' ttē méatyō a' a ena iyiwak kos a kekraē. <sup>14</sup> Mik ye' tō mò patké tā e' shuā shkaba' tkēne e' wērmī, <sup>15</sup> etā ye' éna iane tō ye' ttē me'atbak a' a ena iyiwak kos a tō kē ye' tō ditsō ena iyiwak ulitane ewēpawaia di' wa. <sup>16</sup> Es mik shkaba' tkēne mò shuā e' suēyō, etā bet ye' éna idaa tō ye' ttē me'at ditsō a ena iyiwak kos a michoē kekraē. <sup>17</sup> E' dōr iwā kkachioie tō ye' ttē me'atbak ditsō ulitane a ñies iyiwak tso' kā i' kī e' kos a." Es Skēkōl tō Noé a iché.

*Noé alā kiē Cam e' kē wā iyē dalō tā'*

<sup>18</sup> Noé ala'r e' yélur kanō a, e'pa kiē Sem, Cam ena Jafet. Cam dōr Canaán yē. <sup>19</sup> E'pa mañal dōr Noé ala'r. Ie'pa aleripa tō kā wā iéne.

<sup>20</sup> Noé dali kuatkēmi. E' shuā uva kuatkéitō. <sup>21</sup> Kā et tā ie' tō uva diō shkōshkō e' yé tā e' tō ie' ttékā tajē. Ie' datsi' yéttsa tā iānewa iskī sume iu a. <sup>22</sup> Cam dōr Canaán yē, mik e' tō iyē suē sume, etā ie' miā ibiyō chōk iēlpa bōl e'pa a. <sup>23</sup> Erē Sem ena Jafet e'pa kē éna iyē tēr sume e' suak. E' kuēkī ie'pa tō datsi' klō'wéwā, imēkarakitō e' o' bataki tā ie'pa shkēmi tsikka iwōtrélur bánet dō wē iyē tēr eē tā ipabakéwā datsi' e' wa.

<sup>24</sup> Noé tté tajē blō' tō e' tī'neka. Mik ie' wā ijchēnewā iā tsirla ék kē wā ie' dalōiēne', <sup>25</sup> etā ichéitō:

"¡As Canaán kawō tkō suluē!  
jle' weirdaē siarē shūte klōulewā iēlpa bōl e'pa kanē mésoie!"

<sup>26</sup> E' ukuōkī tā ikī chéitō:

"Jehová dōr Sem Kēkōl as e' kikarka!  
As Canaán aleripa kaneblō Sem aleripa a ikanē mēsopaie.

<sup>27</sup> As Skēkōl kawō buaē mù Jafet a as ie' alōr michoē.

As Jafet ditséwōpa ser Sem yamipa ska'.  
As Canaán aleripa kaneblō ie' a klōulewā ikanē mēsopaie."

<sup>28</sup> Di' bak tajē kī i' kī, e' ukuōkī tā Noé sene'ia duas cien mañayōk kī dabom skeyōk (350). <sup>29</sup> Mik ie' blēnewā, etā ie' kī duas tso' cien suliyōk kī dabom skeyōk (950).

## 10

### I' dōr Noé aleripa kiē

\* 8:20 Ák katatē kā'ie: E' wā kiane chē si'kuaiē altar.

<sup>1</sup>Noé ala'r kiè Sem, Cam ena Jafet. Di' bak tajè e' ukuòkì tã ie'pa wák ala'r kune. Ikkèpa dör Noé aleripa kiè.

<sup>2</sup>Jafet ala'r wèpa dör Gómer, Magog, Madai, Javán, Tubal, Méséc, ena Tírás. <sup>3</sup>Gómer, e' ala'r wèpa dör Asquenaz, Rifat, ena Togarmá. <sup>4</sup>Javán e' ala'r wèpa dör Elisá, Tarsis, Quitim ena Rodanim. <sup>5</sup>E'pa kos dör Jafet aleripa. Ie'pa ñi blatérak ulawa ulawa. Es iká yuérakitò tseè iwakpa a dayè kkòmik. Ittò kuà'kì kuà'kì iwakpamìk.

<sup>6</sup>Cam ala'r wèpa dör Cus, Misraim, Fut, ena Canaán. <sup>7</sup>Cus ala'r wèpa dör Sebá, Havilá, Sabtá, Raamá ena Sabteca. Raamá ala'r wèpa dör Sebá ena Dedán. <sup>8</sup>Cus dör wém kiè Nimrod, e' yé. Nimrod de keweie blu' darèrèè ká i' kì. <sup>9</sup>Jehová ttò wa Nimrod dör yèria poè. E' kuèkì ttè i' meneat' e' a: "Be' dör yèria poè Skèkòl ttò wa wés Nimrod es." <sup>10</sup>Mik Nimrod bak ká kiè Sinar, e' wòkirie etã ká e' shuà ká tso' tkèl kiè Babel, Érec, Acad, ena Calné. E' kos dör ká bua'ie ese. <sup>11</sup>Wém e' yéttsã Sinar a ekòl kiè Asur. E' mía ká bánet. Etã eè ie' ká yué tkèl kiè Nínive, Rehobot-ir, Quélah ena Resen. <sup>12</sup>Resen dör ká bérie. E' atè Nínive ena Quélah, e' shushã.

<sup>13</sup>Etã Misraim aleripa mìa ie'pa ikkè wakpaie: ludeowak, anameowak, lehabiwak, naftuhiwak, <sup>14</sup>patruseowak, casluhítawak, ena caftoritawak. Filisteowak datse caftoritawak wa.

<sup>15</sup>Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup>Canaán aleripa mìa ie'pa ikkè wakpaie: jebuseowak, amorreowak, gergeseowak, <sup>17</sup>heveowak, araceowak, sineowak, <sup>18</sup>arvadeowak, semareowak ena hamateowak. Ká tajè tã e' wakpa kos ñi blabatsérak ponemi ká kuà'kì kuà'kì. <sup>19</sup>Canaánwak ká atè ká kiè Sidón dōwã ká kiè Gaza. Gaza atè ká kiè Guerar e' kke. Nies ie'pa ká atè dōwã ká kiè Lesa diwò tskirke e' kke. Lesa atè ká tkèl kiè Sodoma, Gomorra, Admá ena Seboím e' kke. <sup>20</sup>E' wakpa kos dör Cam aleripa. Ie'pa ñi blabatsérak ulawa ulawa. Es iká yuèitòrak tseè iwakpa a. Ittò kuà'kì kuà'kì iwakpamìk.

<sup>21</sup>Nies Sem dè' alàè, e' dör Jafet èl kibi èk. Heber ala'r kos dör Sem aleripa. <sup>22</sup>Sem ala'r dör Elam, Asur, Arfaxad, Lud ena Aram. <sup>23</sup>Aram ala'r dör Uz, Hul, Guéter ena Mas. <sup>24</sup>Arfaxad dör Sélah yé. Sélah dör Heber yé. <sup>25</sup>E' ukuòkì tã Heber alà de bøl. Ekòl kiè Péleg.\* E' kèwò ska' tã sulitane ñi blabatsérak, e' kuèkì ikiè mékãitò es. Ièkòl kiè Joctán. <sup>26</sup>Joctán ala'r dör Almodad, Sélef, Hasar-mávet, Jérah, <sup>27</sup>Hadoram, Uzal, Diclá, <sup>28</sup>Obal, Abimael, Sebá, <sup>29</sup>Ofir, Havilá, ena Jobab. E'pa kos dör Joctán ala'r. <sup>30</sup>Ie'pa serke ká micho ká kiè Mesá tkörò ká kiè

Sefar e' shuulat a. Sefar atè kabata a, wé diwò tskirke, e' kke. <sup>31</sup>E' wakpa kos dör Sem aleripa. Ie'pa ñi blabatsérak ulawa ulawa. Es iká yuérakitò tseè iwakpa a. Ittò kuà'kì kuà'kì iwakpamìk.

<sup>32</sup>Pè' kos ekkèpa dör Noé aleripa kiè kitule wés iditséwò kuà'kì kuà'kì ena wé iserke ká kuà'kì kuà'kì es. Di' bak tajè, e' ukuòkì tã se' alònene tajè e' ñi blabatsérak ká wa'ñe.

## 11

### Skèkòl tò s'ditsò ké ttòk kuà'kì kuà'kì

<sup>1</sup>Kuaè tã sulitane ttòke ttè etòkicha è wa. <sup>2</sup>Mik ie'pa miyaldak diwò tskirke, e' èka, demirak kakkue kiè Sinar ee, etã eè ie'pa e' tséat senuk. <sup>3</sup>Ká et tã ie'pa iché ñi a: "Mishkarak skauchka yuök blok sù, e' kukuèsò bó' a as imi'a darèrèè u yuoie." Es iwakanewérakitò ák skéie. Nies kiòchka dalolo bõtsbõts ese wa ibatsérakitò i' tso' shùtuule ese skéie. <sup>4</sup>E' ukuòkì tã iská chénerakitò ñi a: "Mishkarak ká blublu yuök. E' shuà u yuòsò kakkèè dōkã ká jaì a. Es se' e' chõmi buaè kèkèpa tajè ena kè se' kawõtã ñi blabatsòk ká wa'ñe."

<sup>5</sup>Erè Jehová e' éwa isaukrak tò ie'pa ká blublu yueke ena u kakkèè yuekerakitò. <sup>6</sup>Etã ie' tò ibikeitsé: "Ie'pa dör ká etkè wak ena ittòrak etkè nies, e' kuèkì ie'pa tò kanè i' kékãmi. E' ukuòkì tã kè i' a ie'pa wòklònuk. Ie'pa sermi wés ie'pa kì ikiane es. <sup>7</sup>E' kuèkì sùyó ie'pa kè ttòk kuà'kì kuà'kì as kè iñi ttò ania."

<sup>8</sup>Es Jehová tò iblabatsérak ká wa'ñe. Eè ie'pa ká yué e' kanè wòpanere. <sup>9</sup>Ká e' kì Jehová tò ie'pa ké ttòk kuà'kì kuà'kì ena iblabatsérakitò ká wa'ñe. E' kuèkì ká e' kinewã Babel.\*

### Sem aleripa

<sup>10</sup>I' dör Sem aleripa kiè. Di' bak tajè, e' ukuòkì duas bök, e' kèwò ska' tã Sem kì duas tso' cien eyök (100). Etã ie' alà kune wém kiè Arfaxad. <sup>11</sup>Arfaxad kune, e' ukuòkì Sem kì seneiã duas dekã cien skeyök (500), etã ie' ala'r skà kune wèpa ena alakòlpa.

<sup>12</sup>Mik Arfaxad kì duas tso' dabom mañayök kì skel (35) etã ie' alà kune wém, e' kiè Sélah. <sup>13</sup>Sélah kune, e' ukuòkì tã Arfaxad kì seneiã duas cien tkèyök kì mañal (403), etã ie' ala'r skà kune wèpa ena alakòlpa.

<sup>14</sup>Mik Sélah kì duas tso' dabom mañayök (30), etã ilà kune, e' kiè Heber. <sup>15</sup>Heber kune, e' ukuòkì tã Sélah kì seneiã duas cien tkèyök kì mañal (403), etã ie' ala'r skà kune wèpa ena alakòlpa.

<sup>16</sup>Mik Heber kì duas tso' dabom mañayök kì tkèl (34), etã ilà kune, e' kiè Péleg. <sup>17</sup>Péleg kune, e' ukuòkì tã Heber kì seneiã duas cien

\* 10:25 Péleg: Hebreoie s'kiè e' wà kiane chè ñi blabatsè.

\* 11:9 Babel: Hebreoie s'kiè e' wà kiane chè chilineka.

tkëyök kî dabom mañayök (430), etä ie' ala'r skà kune wëpa ena alakölpä.

<sup>18</sup> Mik Péleg kî duas tso' dabom mañayök (30), etä ilà kune, e' kiè Reú. <sup>19</sup> Reú kune, e' ukuökî tã Péleg kî seneiã duas cien böyök kî sulïtu (209), etä ie' ala'r skà kune wëpa ena alakölpä.

<sup>20</sup> Mik Reú kî duas tso' dabom mañayök kî bök (32), etä ilà kune, e' kiè Serug. <sup>21</sup> Serug kune, e' ukuökî tã Reú kî seneiã duas cien böyök kî kul (207), etä ie' ala'r skà kune wëpa ena alakölpä.

<sup>22</sup> Mik Serug kî duas tso' dabom mañayök (30), etä ilà kune, e' kiè Nahor. <sup>23</sup> Nahor kune, e' ukuökî tã Serug kî seneiã duas cien böyök (200), etä ie' ala'r skà kune wëpa ena alakölpä.

<sup>24</sup> Mik Nahor kî duas tso' dabom böyök kî sulïtu (29), etä ilà kune, e' kiè Térah. <sup>25</sup> Térah kune, e' ukuökî tã Nahor kî seneiã duas cien eyök kî dabom eyök kî sulïtu (119), etä ie' ala'r skà kune wëpa ena alakölpä.

<sup>26</sup> Mik Térah kî duas tso' dabom kuryök (70), e' ukuökî tã ie' ala'r kune mañal. Ala'r e'pa kiè Abram, Nahor ena Harán.

### *Térah ala'r*

<sup>27</sup> E'pa dör Térah ala'r. Térah dör Abram, Nahor ena Harán, e'pa yë. Harán, e' dör Lot yë. <sup>28</sup> Harán blënewã kewë iyë Térah e' yöki kã kiè Ur eë. Kã e' atë Caldea. Ie' blënewã wë ie' kune eë.

<sup>29</sup> Abram senéwã alaköl kiè Sarai, e' tã. Nahor senéwã alaköl kiè Milcã, e' tã. Milcã dör Harán alã busi ena Iscã kutã. <sup>30</sup> Sarai kë dötã alãë.

<sup>31</sup> Térah e' yëttsã Ur, dör caldeawak kã e' a. Ie' alã Abram ena itala kiè Lot dör Harán alã ena iyäk kiè Sarai e'pa miã ie' tã. Warma ie'pa mîró dökã kã kiè Canaán eë, erë ie'pa demi kã kiè Harán, etä eë ie'pa e' tséat senuk. <sup>32</sup> Eë Térah blënewã. Ie' kî duas tso' cien böyök kî skël (205).

## 12

### *Jehová tté Abram tã*

<sup>1</sup> Mik Abram bak senuk kã kiè Ur eë, etä Jehová tó ie' a iyë: "Be' kã ena be' ditséwöpa ena be' yë yamipa, e' muãt tã be' yúshka senuk, kã kkechekeyö be' a eë. <sup>2</sup> Kã e' kî ye' tó be' aleripa alöweraë tajë. Ie'pa dóraë kã tajë wakpaie. Ye' er buaë chöraë be' a. Ye' tó pë' tajë keraë be' kkeökã tajë. Nies be' er buaë chöraë pë' tajë a. <sup>3</sup> Wëpa er buaë ché be' a, esepa a ye' er bua' chöraë. Wëpa tó alibché be' kî, esepa we'ikerayö. Be' batamik ye' er buaë chöraë kã ulitane wakpa a."

<sup>4</sup> Etä Abram e' yëttsã kã kiè Harán wës Jehová tó ie' a iyë' es. E' këska' tã ie' kî duas tso' dabom kuryök kî skël (75). Ie' miã Canaán. <sup>5</sup> Etä ie' wã iyamipa mîtsër

seraã. Ilaköl kiè Sarai ena ilayök kiè Lot ena iyi ulitane tso' rakiwã, ekkë qos mîtsërak iwã. Nies Harán wakpa wëlepa tso' ie' wã kanë mésoie, e' mîtsër ie' wã. Mik ie' demi Canaán, <sup>6</sup> etä ie' tkami kã qos ekkë dömi kã kiè Siqem atë Canaán eë. Eë kã atë kiè Moré. Eë kós klö är elka. Canaánwakpa a kã e' dör kã dalöiërta' ese. (E' këwö ska' tã Canaánwakpa serkeiã eë.) <sup>7</sup> Etä eë Jehová e' kkaché Abram a tã ichéitö iã: "Kã i' meraëyö be' ditséwö a."

Etä Abram tó ák kataté ka'ie et iyiwak jchoie Jehová dalöioie eë Jehová e' kkeyé' ie' a e' kueki. <sup>8</sup> E' ukuökî tã imiã kã dör kãbataie atë Betel diwö tskirke e' ëka. Etä eë ie' sené ekuölö. Kã e' atë Betel ena kã kiè Ai e' shululat a. Eë ie' tó ák skà kataténe et. Eë ie' tó Jehová dalöié. <sup>9</sup> E' ukuökî tã Abram miã enaëna Négueb kke.

### *Abram miã Egipto*

<sup>10</sup> E' këwö ska' tã ketba tkënewã poë kã e' kî. Kë i tã' katé wë Abram serke eë. E' kueki ie' miã Egipto senuk ekuölö. <sup>11</sup> Abram dökemitke Egipto etä ilaköl Sarai, e' a ichéitö: "Ye' ttö tstsö. Ye' wã ijcher buaë tó be' dör buaala. <sup>12</sup> Mik Egipto wakpa tó be' suë tó be' dör buaala, etä ie'pa tó ichëmi: 'Wj dör wëm wj alaköl.' Etä ye' tterawã ie'pa tó be' kueki erë ie'pa be' meraat senukwã ie'pa tã. <sup>13</sup> E' kueki, be' we'ikëyö, ichö ie'pa a tó ye' dör be' akë as kë itö ye' ttöwã be' kueki as ye' kawö tkö buaë."

<sup>14</sup> Mik Abram demi Egipto, etä Egipto wakpa isuë tó Sarai dör alaköl buaala. <sup>15</sup> Kã e' blü kueblupa tó isuë nies tó Sarai dör alaköl buaala. E' kueki ie'pa miã ichök blu' a tó alaköl e' dör buaala. Etä imîtsërak iwã blu' wë a.

<sup>16</sup> Etä Egipto blü tó Abram kkö'né buaë Sarai dalërmik. Tajë ie' tó Abram a iyiwak uru kakmé. Obeja, baka, burro ena kameio e' kakméitö ie' a. Se' nies kakméitö ie' a kanë mésoie wëpa ena alakölpä. <sup>17</sup> Erë Sarai kueki Jehová tó Egipto blü ena iyamipa we'ikë tajë. Duë mékã tajë ie'pa kî. Kawö darërëë mékãitö ie'pa kî. <sup>18</sup> E' kueki Egipto blü tó Abram tsuk patké tã ichéitö iã: "¿Iök bö iwamblé ye' tã es? ¿I kueki be' kë wã ye' a iyëne tó alaköl i' dör be' alaköl? <sup>19</sup> Be' tó ye' a iyë' tó ie' dör be' kutã. E' kueki tsir etä ye' senéwã ie' tã. I' be' alaköl, itsúmine tã be' yúshka." <sup>20</sup> Etä Egipto blü tó ishkkëipa patké Abram yöktsã kã e' kî ilaköl tã ena i qos tso' ie' wã ekkëpa tã.

## 13

### *Abram ena Lot ñi blabatsélor*

<sup>1</sup> E' ukuökî tã Abram ena ilaköl e' yélur Egipto miãne Négueb. Ie' iyi qos mîtsërak iwã seraã. Ie' alayök Lot e' miã ie'pa tã nies. <sup>2</sup> Abram dör iyi blu' tajë. Ie' wã oro tso'.

Ie' wá inuköl tso' tajë. Ñies ie' wá iyiwak tso' tajë. <sup>3</sup> Négueb eë tá ie' miáne enaena dö Betel. Betel eë tá ie' miáne tkörö wé ie' bak senuk kewe eë. Ká e' átë Betel ena Ai e' ulat shushá. <sup>4</sup> Ká e' á ie' wá ák katatëulebak ká'ie, eë ie' tó Jehová dalöioéne.

<sup>5</sup> Lot dör ñies iyi blú tajë wës iyëla Abram es. Iyiwak tso' tajë ie' wá obeja ena baka. Se' tso' ie' wá ñies kanë mésopaie. <sup>6</sup> Erë wé ie'pa serke ká e' kǐ kakö kē ku'ia ie'pa iyiwak qos á katë. Ie'pa kē chē'kaiá ñi o'mik. <sup>7</sup> Abram ena Lot e'pa iyiwak kkō'nukwakpa ñippöke, ñi wōñatkōke. Ñies pē' tso'tke kenet ká e' kǐ. E' wakpa dör canaánwak ena fereseowak. <sup>8</sup> Ká et tá Abram tó iché Lot a: "Se' dör ñi yami. Kē imène buaë tó se' ñippö. Ñies se' iyiwak kkō'nukwakpa ñippöke éme e' kē dör buaë. <sup>9</sup> Ká saú wǐ ká bua' tso'. Be' ishushtó wéne wa be' wōbatse, e' á be' yúshka. Be' mí wǐ éka, e' tá ye' mí diá éka. Etá be' mí diá éka, e' tá ye' mí wǐ éka."

<sup>10</sup> Etá Lot ká kǐ sué kamië, etá qos di' kië Jordán, e' kkōmik ká buaë tso', e' kǐ sué ie' tó. Etá ie' tó isué tó ká e' dör buaë dö ká kië Sóar eë. Buaë di' tso' wës ká buaë yō' Jehová tó es ena wës Egipto es. (E' kéwō ska' tá kam Jehová tó ká kië Sodoma ena ká kië Gomorra, e' böt eüwa.) <sup>11</sup> Etá kakkue tso' Jordán di' kkōmik e' shushté Lot tó, etá e' wa ie' míá. Es ie'pa ñi blabatsélor. <sup>12</sup> Abram e' tséat senuk Canaán. Lot míá senuk Jordán kakkue kǐ, eë ká tso' tseë. Ie' sené tsinet ká kië Sodoma e' o'mik. <sup>13</sup> Sodoma wakpa, serke suluë. Ie'pa i sulu ë wambleke kékraë Jehová wōa.

<sup>14</sup> Lot míá e' ukuökǐ tá, Jehová tó iché Abram a: "Wé be' tso' eë ká kǐ saú bua'ie shkit wōwǐ wōiá diá éka ja éka ká wa'ñe tó jis idör?" <sup>15</sup> Ká qos kǐ suébö, e' meraëyō be' á ena be' aleripa á kékraë. <sup>16</sup> Ye' tó be' aleripa alōweraë tajë wës iyök po tajë es. Wës iyök po kē shtarpa' es be' aleripa alōrdaë kē ishtarpa yi á. <sup>17</sup> Ká i' qos meraëyō be' á. E' kuekǐ be' yú iweblök seraá."

<sup>18</sup> Etá Abram e' yettsá tá imíá senuk kós klō wōkir àr tajë dör wëm kië Mamré e' icha eë. E' átë tsinet ká kië Hebrón eë. Eë Abram tó ák ská kataté ká'ie Jehová dalöioie.

## 14

### *Abram tó ilayök Lot, e' tsatké*

<sup>1</sup> E' kéwō ska' tá blu'pa tso' tkël. Eköl kië Amrafel, e' dör ká kië Sinar, e' blú. Iëköl kië Arioc, e' dör ká kië Elasar, e' blú. Iëköl ská kië Quedorlaómer, e' dör ká kië Elam, e' blú. Etá ibata ék kië Tidal, e' dör ká kië Goim, e' blú. <sup>2</sup> Blu'pa ská tso' dōkǎ skel e' eköl kië Bera, e' dör ká kië Sodoma, e' blú. Iëköl kië Birsá, e' dör ká kië Gomorra, e' blú. Iëköl kië Sinab, e' dör ká kië Admá, e' blú. Ská kië Seméber, e' dör ká kië Seboím, e' blú.

Ibata ekkë e' dör ká kië Bela, e' blú. Ká e' kië Sóar ñies. E' kéwō ska' tá blu'pa dōkǎ tkël ñe' e' kékǎ ñippök blu'pa ská dōkǎ skel ñe' tá. <sup>3</sup> Blu'pa skel e'pa tó iñippök wakpa dapa'wé ek tsini ñippök blu'pa tkël e'pa tá kakkue kië Sidim eë. Eë dayë wölö me'r bërie kië Mar Muerto.

<sup>4</sup> Blu'pa dōkǎ skel e'pa bak senuk iwakpa tá dōkǎ duas dabom eyök kǐ bök (12), blu' kië Quedorlaómer, e' dikǐa. Mik e' kǐ duas de dabom eyök kǐ mañal (13) etá ie'pa kē éna Quedorlaómer tte dalöiakia. Ie'pa e' kakkǎ ñippök ie' tá. <sup>5</sup> E' kǐ duas de ek etá Quedorlaómer e' yettsá míá ñippök ibolökpa tá. Blu'pa dōkǎ mañal dör ie' klépa, e' míyal ie' tá ñippök. Ie'pa míá ká kië Astarot Carnaim tá eë ie'pa e' alékǎ refaitawak kǐ. Ie' ukuökǐ tá ie'pa e' alékǎ zuzitawak kǐ, ká kië Ham eë. E' ukuökǐ tá ie'pa e' alékǎ emiwak kǐ, e' wakpa ká kië Savé-quiriataim. <sup>6</sup> E' ukuökǐ ie'pa e' alékǎ horeowak kǐ kabata kië Seír eë. Etá itotiémí ie'pa tó dö tkörö ká kië El-parán eë. Ká e' átë ká sir poë, e' kkōmik. <sup>7</sup> Etá eë ie'pa bitene itó wane dö ká kië En-mispat. Ká e' kië Cadés ñies. Ie'pa e' alékǎ Amalec aleripa kǐ tá iká klō'wëwarakitó. Ñies ie'pa e' alékǎ amorreowak kǐ. E' wakpa ká kië Hasesón-tamar. E' ukuökǐ tá ie'pa mi'ke ñippök blu'pa skel tá. E' kuekǐ blu'pa skel e' dapa'wékǎ Sidim kékkuë kǐ blu'pa tkël kǐnuk ñippoie.

<sup>8-9</sup> Etá Sodoma blú ena Gomorra blú ena Admá blú ena Seboím blú ena Bela blú (Bela kië Sóar ñies), blu'pa skel ekkëpa ñi dapa'wékǎ Sidim kékkuë kǐ ñippoie, Quedorlaómer, e' dör Elam blu', e' tá ena blu'pa tso' ie' tá e'pa tá ñies. Blu'pa e'pa dör Tidal, e' dör Goim blu'. Iëköl dör Amrafel, e' dör Sinar blu'. Bata ék dör Arioc, e' dör Elasar blu'. Es blu'pa tkël míyal ñippök blu'pa skel tá. <sup>10</sup> E' kéwō ska' tá Sidim kékkuë kǐ kiöchka dalolo bōtsbōts ese dapé tso' tajë. Mik Sodoma wakpa ena Gomorra wakpa tkayal ñippé yökǐ etá ie'pa shābōts anemi kiöchka dapé tso' tajë ese á. Imalepa tkayalmi kabata shūa.

<sup>11</sup> Es blu'pa dōkǎ tkël e'pa e' alékǎ blu'pa skel kǐ. Etá ie'pa tó chkewō ena iyi bua'buá tso' Sodoma ena Gomorra e' qos klō'wëwarakitó tá iponemirak. <sup>12</sup> E' kéwō ska' tá Abram alayök Lot serke Sodoma. E' mítserak iwá, es ie' dali qos e' mítserak iwá ñies.

<sup>13</sup> Etá ñippé shūa wëm tkashkar eköl, e' wá ibiyō mí Abram á. Abram e' dör hebreowak. Ie' serke tsinet wëm kië Mamré dör amorreowak e' kós klō wōkir àr eë. Mamré dör Escol ena Aner ël. Ie'pa wa Abram wër buaë.

<sup>14</sup> Mik Abram tó ibiyō tseë, etá ie' kanë mésopa kune ie' u á, e'pa dapa'wéitō dōkǎ cien mañayök kǐ dabom eyök kǐ paköl (318) ilayök tsatkoie. Etá ie'pa míyal blu'pa tkël itökǐ dōkǎ ká kië Dan eë. <sup>15</sup> Etá nañewe

ie'pa demi me'ie ñippémiie blu'pa ta. Eta ie'pa tö blu'pa töiémi tkörö ká kiè Hobá ee. Hobá ate ká kiè Damasco e' wówí. <sup>16</sup> Eta ì kos minetsar blu'pa wa, e' kos yélur ie'pa tö blu'pa ulá a. Es Abram tö ilayök Lot e' tsátkée. Nies ì tso' ilayök wa e' kos dene iulá a. Nies alakölpá ena pé' malepa tso' klöulewa e'pa kos tsátkée ie' tö.

*Melquisedec er buaë ché Abram a*

<sup>17</sup> Mik Abram e' aléka Quedorlaómer kǵ, e' sù blu'pa mañal shkóke ie' ta, e'pa kǵ. E' ukuökǵ ta ie' bitene de Savé kékkué kǵ. Kakkue e' kiè nies Blu' Kékkué. Eta ee Sodoma blú de ie' ñaletsuk ie' shké'uk. <sup>18</sup> Nies ká kiè Salem, e' blú kiè Melquisedec, e' dör Skéköl dör íyi ulitane tsata e' sacer-dote. Ie' tö pan ena vino yétsa. <sup>19</sup> Eta ie' er buaë ché Abram a tte ì' wa:

“Skéköl dör íyi ulitane tsata, e' tö ká jai ena ká i' yó'.

Ie' tö be' kǵmé as be' kawö tkö buaë kekraé.

<sup>20</sup> Ie' dör íyi ulitane tsata, e' kǵkókasó.

Ie' tö be' kǵmé e' alókka be' bolökpa kǵ, e' kuékǵ ikǵkókasó.”

Eta íyi kos de Abram ulá a ñippé shua, e' mú blatèsö döká dabop ta e' tsá eyök yétsaitö méitö Melquisedec a Skéköl dalóioie. <sup>21</sup> E' ukuökǵ ta Sodoma blu' tö iché Abram a:

–Sa' yamipa tsátkée be' tö, e'pa múne ye' a. Eré dali kos e' tsúmi be' tö be' a.

<sup>22</sup> Eré Abram tö iüté:

–Au. Jehová dör Skéköl íyi ulitane tsata, e' tö ká jai ena ká i' yó', ie' a ye' kabléke. <sup>23</sup> Tö ì kos dör be' icha, e' kǵ tsepaatyö yés. Dö be' datsi'takla ö be' klökkuö kicha kǵ tsepaatyö etkla wé'ia as kǵ be' ichö tö be' íyi wa ye' blune. <sup>24</sup> Kǵ ì kiane ye' kǵ ye' wák a. Chkö kos ñéte ye' kané mésopa tö, e' é dör wé' ye' a. Eré wépa dare ye' ta ñippök bulu'pa ta kiè Aner ena Escol ena Mamré, as ie'pa wa dali kakmi' kos ikawötá tsukmi eköl eköl ekké.

## 15

*Jehová tö ittè mé Abram a*

<sup>1</sup> E' ukuökǵ ta Jehová tté Abram ta kab-sueie, eta ichéitö ia:

–A Abram, kǵ be' suanuk. Ye' dör be' tsátkökwa. Íyi buaë merayö be' a tajé shüte.

<sup>2-3</sup> Eré Abram tö iüté:

–A Skéköl, ye' wák alá kǵ ta', e' kuékǵ ì kos memibö ye' a e' kǵ dör íie bua' ye' a. Ye' íyi kos atdaé ye' kané méso kiè Eliézer dör Damasco wak e' ulá a. Eré ie' dör o'ka.

<sup>4</sup> Eta Jehová tö iüté:

–Be' wák alá kurdaé, e' kǵ dör o'ka.

<sup>5</sup> Eta Jehová wa Abram mítser u'rkǵ, ta ichéitö ia:

–Ká saú buaë siwa' kǵ. Békwo saú ta ishta'ú. ¿Be' a ishtarǵi? E'ma bua', es be' aleripa alórdaé tajé.

<sup>6</sup> Eta Abram erblé Jehová mik, e' kuékǵ iklö'wéitö wes pé' buaé yésyésé es.

<sup>7</sup> Eta ichéitö ia:

–Ye' dör Jehová. Ye' tö be' yé'ttsa caldeawak ká kiè Ur e' a ká i' moie be' a ena be' aleripa kos a.

<sup>8</sup> Eta Abram ie' a ichaké:

–A Skéköl, ¿wes e' jcherǵi ye' wa yésyésé tö ká i' dömi ye' ulá a?

<sup>9</sup> Jehová tö iüté:

–Baka ena chíbo ena obeja e' kos kǵ duas tso' mañal, ese tsúbitü ña etö etö. Nies nuböl et ena ipupula et, e' tsúbitü ña.

<sup>10</sup> Eta Abram wa iyiwak kos ekké debitu Jehová a. Eta ie' tö iyiwak e' ttélur tǵlor shushaé. Shaböts méwaitö wǵ wa shaböts méwaitö i' wa. Es iaǵé ñi wöshaé. Eré dù kǵ tǵnane ie' wa es. <sup>11</sup> Eta ölö dettsa iyiwak chká dalǵrmik, eré Abram tö ibukueke chké kǵ. <sup>12</sup> Ká tuinemitke, eta Abram kapowa tajé. E' bet Abram pamik ká míá ttsetseé shüte se' suawé ekké.

<sup>13</sup> Eta Jehová tö iché ia:

–Be' wa ijchenü buaé tö be' aleripa serdaé ká kuá' kǵ kǵ wes ká kuá' kǵ wakpa es. Eǵ ie'pa klördawa kané mésopaie kǵ patuǵta'. Ie'pa weirdaé döká duas cien tkéyök (400), ekké ulatök. <sup>14</sup> Eré ká wé wakpa tö ie'pa we'ikera, e' wakpa ské we'ikerayö siǵaré. E' ukuökǵ ta be' aleripa yǵrdattsá ká e' a. Ie'pa wa íyi bua'buá tué darééré ese miraé tajé iwákpa a. <sup>15</sup> Eta mik be' kǵnewá eta be' duöwami buaé, kǵ weir ta'. Es be' michoé be' déütöpa itökǵ. <sup>16</sup> Eta mik be' aleripa tso' ká kuá' kǵ ñe' a e'pa de döká tkétökicha, eta ie'pa dórane ká i' kǵ. Ká i' wakpa, kiè amorreowak, kam e'pa tö ì sulu wamblö dö wé' ishuloie. E' kuékǵ be' aleripa kǵ döpane ká i' kǵ bet.

<sup>17</sup> Katuine de kamié, eta ì dettsa tabechka ukuöie, e' shua shlé batróke tajé. Nies kuatak sí wöñarke tajé ese dettsa ta itkami iyiwak chká blatéule tkéǵer ee, e' shusha. <sup>18</sup> Eta Jehová tö tté mé Abram a i' es:

–Ká i' meraéyö be' aleripa a. Dí' kiè Egipto dí' eemi döká dí' kibi kiè Éufrates, ká ekké kos meraéyö be' aleripa a. <sup>19</sup> I'ñe ta ká e' dör quenitawak, quenizitawak, cadmone-owak, <sup>20</sup> hititawak, fereseowak, refaitawak, <sup>21</sup> amorreowak, canaanwak, gergeseowak ena jebuseowak e'pa kos wakpa ká.

## 16

*Abram alá kǵne kiè Ismael*

\* 15:18 Egipto dí: E' kǵ dör dí' bǵrie tso' Egipto kiè Nilo e'. E' dör dí' tsitsirla tso' Egipto ena Canaan e' shusha.

<sup>1</sup> Abram alaköl Sarai, e' kē dōtā' alàè. Ie' wā alaköl tkēr eköl kanè mésoie kiè Agar. E' dōr egiptowak. <sup>2</sup> Etā Sarai tō iché Abram a:

—Isaū tō Jehová kē wā ye' a alà mène. E' kueki be' senū ye' kanè méso Agar tā. Etā isalema ie' batamik alà dōmi ye' ulā a.

Etā Abram tō Sarai tō iūtē. <sup>3</sup> Etā Sarai tō egiptowak tso' ie' wā kanè mésoie, e' tsébitu, mé iwēm a alakolie. E' kēwō ska' tā ie'pa sené Canaan e' ki' duas de dabop. <sup>4</sup> Etā Abram senéwā Agar tā, etā Agar duneka. Mik ie' isué tō ie' duneka, etā ie' tō iwōkir Sarai suémi sulué. <sup>5</sup> Etā Sarai tō iché Abram a:

—jBe' iane iwiie tō Agar tō ye' sueke sulué! Ye' wák tō be' a Agar me' alakolie i' tā idurtke e' wā kurdaé, etā ie' e' tsoke jaishet ye' tsata. jAs Jehová tō se' a ichō tō yi iane iwiie, ye' o be'!

<sup>6</sup> Etā Abram tō iūtē:

—Ye' ttō tso, be' kanè méso tso' be' ulā a. Be' iū wēs be' éna iwāk es.

E' ukuōki tā Sarai tō ikanè méso we'ikémi tajē. E' kueki Agar tkashkar. <sup>7</sup> Etā Jehová biyōchōkwak bua'ie, e' tō ikué di' tum o' mik ká wé kē yi ku' ese ska'. Di' tum e' tso' ñala micho ká kiè Sur e' kkomik. <sup>8</sup> Etā Jehová biyōchōkwak bua'ie tō ie' a ichaké:

—A Agar, Sarai kanè méso, jWé be' bite? jWé be' micho?

Ie' iūtē:

—Ye' tkashkar ye' wōkir Sarai yōki.

<sup>9</sup> Etā ie' iché ia:

—Be' dakōne be' wōkir ska' tā idaloiō bēre.

<sup>10</sup> Ie' tō ikí ché ia:

“Ye' be' aleripa alōweraé tajē. Kē yi a ishtanuk ekkē.

<sup>11</sup> Be' eriarke, e' tse Jehová tō, e' kueki sē be' dur, e' wā kune, tā ikiè múkabō Ismael.\*

<sup>12</sup> Be' alà dōraé wēs burro pupula kē urutérta' es.

Ie' ñippōraé daréré sulitane tā. Ñies sulitane ñippōraé ie' tā.”

Ie' serdaé kekraé ñippōk iēlpa tā.

<sup>13</sup> Jehová tté Agar tā, e' ukuōki tā Agar tō iché: “Skéköl ye' sué, e' wák suéwayō.” E' kueki ie' tō Skéköl kié i' es: “Skéköl tō ye' sué e'.” <sup>14</sup> E' kueki ñies di' tum e' kiè mékaitō: “Skéköl tso' e' ye' sueke”. Di' tum e' tso' Cadés ena Béréd e' shushāé.

<sup>15</sup> E' ukuōki tā Abram alà kēka Agar tā e' wā kune wák wēm. Abram tō ikiè méka Ismael. <sup>16</sup> Ismael kune, e' kēwō ska' tā Abram ki' duas tso' dabom paryōk ki' teröl (86).

## 17

*Jehová tō ittē mé Abraham a, e' wā kka-cho méaitō*

<sup>1</sup> Mik Abram ki' duas tso' dabom suliyōk ki' sulitu (99), etā Jehová e' kkaché ie' a tā iché ia:

—Ye' dōr Skéköl Diché Tā' Iyi Ulitane Tsata e'. Be' senū yēsēsé ye' wōrkj kekraé. <sup>2</sup> e' tā ye' ttē meraé be' a tō be' aleripa alōrdaé tajē be' itōki.

<sup>3</sup> Etā ie' e' téwā iski iwōtsa méwā iyōk ki'. E' dalewa Skéköl tso' ttōk ie' tā, tā ichéitō ia:

<sup>4</sup> —Ye' ttē meke be' a e' dōr i' es: Be' dōraé ká tajē wakpa yéie. <sup>5</sup> E' kueki i'ñe tā be' kē kièia Abram. Ye' tō be' tkéka ká tajē wakpa yéie, e' kueki be' kiè mékayō Abraham.\* <sup>6</sup> Ye' tō be' aleripa alōweraé tajē. Ie'pa dōraé blu'paie ena ká tajē wakpaie. <sup>7</sup> Kekraé ye' dōr be' Kéköl ñies be' aleripa Kéköl. Kawō e' mekeyō be' a. <sup>8</sup> I'ñe tā be' serke Canaan, ká e' kos meraeyō be' a ena be' aleripa a. E' atē ie'pa ulā a kekraé. Ye' dōr ie'pa Kéköl.

<sup>9</sup> Skéköl tō iskā chéne Abraham a:

—Eré be' ena be' aleripa kos e' kawōtā ttē muk ye' a ñies. <sup>10</sup> E' dōr i' es: A' wēpa kos kawōtā itōtola kkuōlita tōk tsir. <sup>11</sup> E' kueki a' wēpa kos e' wakyō es. E' tō ikkcheraé tō se' ttē me' ñi a. <sup>12</sup> Kekraé kos a' ala'r kurke wēpa, ñies a' kanè mésoapa ala'r wēpa, mik e' ki' ká de pāköl, etā a' kawōtā iwakyōk es. <sup>13</sup> A' kawōtā iuk krōrōé ala'r kos kurke a' u a ekképa tā. Es ttē me'tkeyō a' a, e' atē wakyōule a' chká ki' kekraé. <sup>14</sup> Wēm kē wakyōule, ese kē wā ye' ttō daloiéne, e' kueki kē ikawō tā'ia senuk a' shuā.

<sup>15</sup> Ñies Skéköl tō iché Abraham a:

—Be' alaköl kē kièia Sarai. I'ñe tā ikirdaé Sara.† <sup>16</sup> Ye' er buaé chōraé ie' a as ie' alà kōka be' a. Mokj ye' er buaé chōraé ie' a. Ie' dōraé ká tajē wakpa miè. Ñies ie' aleripa shu dōraé blu'paie.

<sup>17</sup> Abraham skā e' téwane iski iwōtsa méwāitō iyōk ki'. E' dalewa ijañéka tā ibikeitséitō: “jYe' ki' duas tso' cien eyōk (100), wēs e' dōmi yéie? jSara ki' duas tso' dabom suliyōk (90), etā wēs ie' dōmi alàè?”

<sup>18</sup> Eré ie' tō iché Skéköl a:

—jBe' mú er buaé chō Ismael a!

<sup>19</sup> Eré Skéköl tō iūtē:

—Au, e' kē dōr es. Be' alaköl Sara, e' dōraé alàè tā ikiè múkabō Isaac. Ttē me' yō be' a e' ē meraneyō ie' a ena ie' aleripa a kekraé. <sup>20</sup> Kē ye' éna Ismael ché'wa. Ye' tō ie' kimeráé ñies. Ye' tō ie' ala'r alōweraé tajē as ileripa dō tajē ká i' ki'. Ismael dōraé s'blu'pa dōka dabom eyōk ki' bōl e'pa yéie. Ie' aleripa alōrdaé tajē. <sup>21</sup> Eré ttē me'tkeyō be' a e' atdaé be' alà

\* **16:11** Ismael: Hebreoie s'kié e' wā kiane ché Skéköl tō ittse.

\* **17:5** Abraham: Hebreoie s'kié e' wā kiane ché ká wakpa tajē, e' yé. † **17:15** Sarai: Eré s'kié e' ena Sara tsér bēre kuā ki', eré iwā dōr ñies. Iwā kiane ché blu' alà busi o alaköl daloiérta' tajē ese. Skéköl tō ie' kiè mane'wé es iwā kkachoie tō ttē mēne Abraham a e' wā dōraé ie' ki' ñies.

kurdaë kië Isaac e' a. Be' alà e' kerakà Sara tò duas iëk wa kawò ikkè ta.

<sup>22</sup> Mik Skèköl tté one Abraham ta, ta imía. <sup>23</sup> E' wòshaë Abraham tò ilà Ismael e' tottola kkuölitla téé tsir. Nies ie' wà kanè mèsopa tso' kune ie' u a ena wèpa toule ese, e'pa kòs tottola kkuölitla tééitò tsir wès Skèköl tò iyè'ia es. <sup>24-25</sup> Mik Abraham kì duas tso' dabom suliyök kì sulitu (99) ena ilà kì itso' dabom eyök kì mañal (13) età ie'pa tottola kkuölitla téne tsir.

<sup>26-27</sup> Es e' diwò è wa Abraham ena ilà tottola kkuölitla téne tsir. Nies wèpa dör ie' kanè mèsopa, e'pa kòs tottola kkuölitla téne tsir.

## 18

*Jehová tò iché Abraham a tò alà meraëyö be' a*

<sup>1</sup> Ká et dibata a ta Abraham tkër ie' ukkò a. Ie' u tso' wé wëm kië Mamré e' kós klò wòkir àr eë. Ie' tkër eë età Jehová e' kkaché ie' a. <sup>2</sup> E' wà pakè i' es: Abraham wókèka ta ie' isuë tò wèpa de ièter ie' wòrkì mañal. E' suë ie' tò ta bet ie' e' kèka, mía ie'pa ñaletsuk ta ie' e' tewa jskì ta iwòtsa mewa iyök kì ie'pa shkè'woie. <sup>3</sup> Ie' tò iché:

—A kèkèpa, be' we'ikèyò, kè be' minuk bet. <sup>4</sup> Ye' mi' di' tsuk a' klò skuoie, e' ukuökì ta a' enù bère kal i' dikia. <sup>5</sup> A' detke ye' ska', età ilè mekeyò a' a' ñè as a' diché iërne shkoie.

Età ie'pa tò ie' iüté:

—E' ma iú wès be' tò iché es.

<sup>6</sup> Abraham tkawá iu a, ta ichéitò Sara a:

—Bet, harina bua' bua yulò kilo dōka dabom böyök (20) ekkè, e' wa pan yuò.

<sup>7</sup> E' ukuökì ta bet ie' wák tunemi baka pupula shuştök wé bua' bua ese klò'wéwajitò. E' mitsër ie' wà méitò ikanè méso ekòl a. Bet ta ikanè méso tò ikanewé ie' a katè. <sup>8</sup> Abraham tò baka chkà ena baka tsu'diò wòsi ena baka tsu'diò pa'alì e' mé ie'pa a. Ie'pa tulur chkök kal àr ukkò a e' dikia. E' dalewa Abraham dur ie'pa tiök eë.

<sup>9</sup> E' dalewa ie'pa tò ichaké Abraham a:

—¿Wé be' alakòl kië Sara e'?

Ie' iüté:

—Ie' tkër weshke.

<sup>10</sup> Età ie'pa ekòl tò iché ia:

—Duas iëk e' wa ye' döne be' pakòk. E' kèwò ta be' alakòl Sara alà ta'tke.

E' dalewa Sara tkër Abraham tsikka u wékkò a. Ie' tso' ie'pa ttòke, e' tsoök. <sup>11</sup> Abraham ena ilakòl, e' dewatke kèkèpala. Bànet Sara kè tò alakòlpa duè sueta'ia. <sup>12</sup> E' kuekì Sara kè a jañè wòklönuk ta ibikeitsé: “¿Wes ye' tò tè i' klò'wèmi tò sa' kèrulunetke e' dōmi alàè?” <sup>13</sup> Jehová tò iché Abraham a:

—¿Ì kuekì Sara jañèka? ¿Ì kuekì ie' tò iché: “¿Wes ye' kènewatke e' dōmi alàè?” <sup>14</sup> Kè i' ta

ye' a darèrè. Duas iëk ye' döne, età ie' alà ta'tke.

<sup>15</sup> Sara suane e' kuekì ichéitò: “Kè ye' jañène.”

Erè Jehová tò iché ia:

—E' kè dör es. Mokì be' jañèka.

*Abraham kköché Jehová a Sodoma wakpa tsatkö*

<sup>16</sup> E' ukuökì ta ipakòkwakpa e' duékarak ta imíyal dō wé Sodoma kì wène eë. Abraham tò ñalé méré e' choat ie'pa a. <sup>17-19</sup> Età Jehová tò ibikeitsé: “Abraham aleripa alòrdàè tajè diché ta' tajè. Ye' tò iyè'at ie' a tò ie' batamik ye' er buaë chòraë ká ulitane wakpa a. Ye' tò ie' shukit as ie' tò ila' r' ena ileripa a ichò tò ye' ttè dalòió ñies tò i kòs buaë yèsyèsè e' ú. Es i kòs yè'lyò ie' a e' weraëyò. E' kuekì ye' kawòtá ichòkia tò iök ye' mí Sodoma.” <sup>20</sup> E' kuekì ie' tò iché Abraham a:

—Sodoma wakpa ena Gomorra wakpa e' wamblòkerak suluë tajè shutè, e' ché sulitane tò. <sup>21</sup> E' kuekì ye' mía eë isaük tò yène ie'pa e' wamblòke suluë ichök wès ye' a ikkatène es.

<sup>22</sup> Età Abraham pakòkwakpa böl e' yétsa mía Sodoma. Erè Abraham atè dur Jehová ta. <sup>23</sup> Ie' e' skéwa tsinet Jehová ska' ta ichakéitò ia:

—¿S' ser mokìe esepa ewèwamibò se' sulusipa ta? <sup>24</sup> Isalema s' ser mokìe esepa tso' Sodoma dōka dabom skeyök (50), età ¿ká e' wakpa ewèwamibò seraq? ¿Kè be' tò ilo'yepa ie'pa kì s' ser mokìe tso' dōka dabom skeyök (50), e'pa kuekì? <sup>25</sup> ¿Mokì be' kè tò s' ser yèsyèsè esepa ewepawa se' sulusipa ta ñita! Kè bó iwamlepa es. ¡E' kè wamblèrpa! Be' dör sulitane shulòkwak e' kuekì ¿wes e' kè tò se' shulepa yèsyèsè?

<sup>26</sup> Jehová tò iüté:

—S' ser mokìe esepa kuéyò dōka dabom skeyök (50) e' ta e'pa dalèrmik kè ye' tò imalepa ewepawa.

<sup>27</sup> Età Abraham tò iskà chéne ia:

—Be' dör Skèköl. Ta ye' dör wès ká po ena muluchka es be' wò. E' tò be' chakè tajè kè suane. Isalema s' ser mokìe esepa kianeia skel (5) as idōka dabom skeyök (50). <sup>28</sup> Skel e' kianeia, e' ta e'pa è kuekì ¿ká e' wakpa ewèwamibò?

Jehová tò iüté:

—S' ser mokìe esepa kuéyò dōka dabom tkèyök kì skel (45), e' ta kè ye' tò ká e' wakpa ewepawa.

<sup>29</sup> Abraham tò iskà chaké:

—Dò' dabom tkèyök (40) è tso', e' ta ¿be' tò ká e' wakpa ewèwami?

Jehová iüté:

—Au, kè yò ká e' wakpa ewepawa dabom tkèyök (40) e' dalèrmik.

<sup>30</sup> Età Abraham tò ikì ché ia:

—Tajë be' tsiriwëyô, e' kuekî kē be' ulunuk ye' kî. Dô' s'ser yësyësê tso'ia dabom mañayök (30) ë.

Jehová tò iiüté:

—Au, dabom mañayök (30), e'pa dalërmik kē yô iewëpawa.

<sup>31</sup> Abraham tò ikî chaké ëme:

—A ye' Këköl, tajë yô be' dalösewëwä be' chakök i' es, erë kâ kî s'ser mokjê tso' dabom böyök (20) ë, e' tã e'pa kuekî, çkâ e' wakpa ewëwamibô?

Jehová tò iiüté:

—Au, ie'pa dabom böyök (20), e' ë dalërmik kē ye' tò kâ e' wakpa ewëpawa.

<sup>32</sup> Abraham tò ikî chaké tã ichéitô ia:

—Kê be' ulunuk ye' kî. I' ë chakekeyô be' a. S'ser mokjê esepa tso' dôkâ dabom eyök (10) ë, e' tã çwes bö iwëmi? çkâ e' wakpa ewëwamibô?

Jehová tò iiüté:

—Dabom eyök ë dalërmik kē ye' tò kâ e' wakpa ewëpawa.

<sup>33</sup> Mik ie'pa tté one ñitã etã Jehová míane. Abraham bitëane ie' u a.

## 19

*Skëköl tò Sodoma ena Gomorra wakpa ewëwä*

<sup>1</sup> Kâ tuinemitke tã Skëköl biyöchökwakpa böl e'pa demi kâ kië Sodoma eë. Abraham alayök kië Lot, e' tkër kâ e' kköiëulewä e' wëkkö a.\* Mik ie' tò Skëköl biyöchökwakpa suë, etã ie' e' kékã ie'pa shkë'uk. Ie' e' tëwä jskî iwötsã méwãitô iyök kî. <sup>2</sup> Ie' tò iché ie'pa a:

—A këképa, ye' kköchô a' a tò a' kapörô ye' ska'. Eë a' klô skuömi etã bule bla'mi a' mi'mine.

Ie'pa iiüté:

—Au. Kê be' tkinuk. Sa' kapömi u'rki.

<sup>3</sup> Erë Lot kköché tajë ie'pa a. Bata ekkê tã ie'pa míyal ie' u a. Mik ie'pa dewä weshkë, etã ie' tò ie'pa a chkë yulë buaë. Pan kē wötuule iwölöwoka wa ese yuëitô ie'pa a. Ie'pa chkë.

<sup>4</sup> Kam ie'pa kapödur e' yökî Sodoma wakpa wëpa debitu tajë. E'pa tò Lot u kköiëwä shkit. Ie'pa ulitane, duladulapa dô këképaë, e'pa kulëmi Lot wö. <sup>5</sup> Ie'pa tò ichaké ãneule:

—I'ñe wëpa böl debitu be' u a çwé e'pa? Ie'pa yödur ië sa' a u'rki as sa' serkã ie'pa tã kësik wa!

<sup>6</sup> Lot e' yëttsã ttök ie'pa tã. Ukkö wötëwãitô buaë itsjikka. <sup>7</sup> Ie' tò ie'pa a iché:

—A yamipa, ye' kköchô a' a tò i sulu e' kē wamblar ie'pa tã. <sup>8</sup> Ye' alã busipa tulur böl kam ser wëpa tã, e'pa yekeluryô a' a as a' tò iwamblô ie'pa tã wës a' kî ikiane es. Erë kē i

wamblar sulu ye' pakökwakpa dewä ye' ska', e'pa tã.

<sup>9</sup> Erë ie'pa iiüté:

—jBe' e' sköy bänet! Be' kē dör kâ i' wak. Be' kē a i yënuK sa' a. jE' kuekî be' we'ikeraë sa' tò ie'pa së tsatã!

E' ukuökî tã iwe'ikëmi ie'pa tò tã idemirak u wëkkö batsökök. <sup>10</sup> Etã Lot pakökwakpa ulã tiëwä u'rki ukkô a Lot tsëwä weshkë. Etã ie'pa tò ukkô wötëwä. <sup>11</sup> Pé' sulusi kos wöbla sulu'wëdur ie'pa tò, kē wawëneia. Duladulapa dô këképaë e'pa kos wöbla sulurulune. E' kuekî ie'pa shtrinewä ukkô yulök. Kê ie'pa wa iküne. <sup>12-13</sup> Lot pakökwakpa tò iché ia:

—Tajë kâ i' wakpa kkatëne e' tté demi Jehová wö kî. E' kuekî sa' patkéitô ie'pa eukwa. Ie'pa ewëkewa sa' tò yës. E' kuekî be' yamipa ekka kî tso' kâ i' kî, e' tã e'pa yödur. Be' alã duladulapa tã' ö be' alã busipa tã' ö be' nuakipa tã', ö be' yamipa skã tso' kâ i' kî, e' tã jiyödur bet tsümi kamië!

<sup>14</sup> Etã Lot miã wëpa tté meule senukwä ila'r busipa tã e'pa weblök tã iché iarak:

—jA' e' kôkã! jA' yúshka! Jehová tò kâ i' ewëkewa.

Erë ie'pa tò ibikeitsé tò ie' kalöke ie'pa tã. <sup>15</sup> Kâ ñirketke, e' ulatök tã Skëköl biyöchökwakpa tò iché Lot a:

—Sa' tò kâ i' ewëkewa. Kê be' duakwä, e' tã jbet, be' e' kôkã! jBe' alaköl ena be' ala'r busipa tsümi!

<sup>16</sup> Erë ie' e' ukeia enaë. Erë Jehová er buaë ché ie' a, e' kuekî Skëköl biyöchökwakpa tò iklö'wëwä iulã a yëttsã. E' sù ñies ilaköl ena ilã busipa yödur ie'pa tò Sodoma a itsatkoie. <sup>17</sup> Mik ie'pa tò iyëttsarak bänet etã Skëköl biyöchökwakpa tò iché ie'pa a:

—jA' tunú as a' tsatker! jKê a' kâ i' saukia tsjkkane yës! jE' sù kē a' e' wöklö'uk kakkue i' kî! jA' éna e' tsatkak, e' tã a' yúshka etkëme kabata a!

<sup>18</sup> Erë Lot tò iché ia:

—jA këképa, au, a' we'ikëyô! <sup>19</sup> A' tò ye' kímé tajë. A' tò ye' tsatké duöwä ulã a, erë kē ye' shkak kabata a. Ye' ibikeitsé tò i sulu datse kâ i' eukwa, e' tò ye' kuëmi ñalã kî etã ye' duöwami. <sup>20</sup> Kâ tsitsir tso' ië tsinet, eë ye' tköshkarmi. Kawö mú ña shkowä eë e' tsatkoie. Moki e' dör kâ tsir.

<sup>21</sup> Etã ie'pa eköl tò iiüté:

—Ye' be' ttö ttté, e' kuekî yö iweke wës be' tò ye' a ikië es. Kâ chëbö ye' a e' kē ewëkú wayö. <sup>22</sup> Erë be' yú etkëme eë. Kê ye' a i wamblënuK kam be' dömi e' dalewa.

E' kuekî kâ e' kië Sóar.†

<sup>23</sup> Mik kâ ñine etã Lot demi Sóar. <sup>24</sup> Etã azufre wöñarke bö'ie e' patkébitu Jehová tò tajë Sodoma ena Gomorra kî. <sup>25</sup> Kâ e' wakpa

\* **19:1** kâ e' kköiëulewä e' wëkkö a: E' këwö skã tã kâ ulitane dör kköiëule ese kē wëkkö tso'. † **19:22** Sóar: Hebreoie kâ kië e' wã kiane chë kâ tsir.



ewéwa bö' tó yës. Ñies dalikua kôs tskirke ká e' kí e' ñanewa sraa. <sup>26</sup> Erë Lot alaköl dami itökí. E' tó ká sué itsikka. Bet ie' yönane dayë wösiie shkë'ka.

<sup>27</sup> Bule es bla'mi tã Abraham míane wé ikapaké Jehová tã ee. <sup>28</sup> Sodoma ena Gomorra kí suéitö tã ishklé batróke tajë wës tã blublu ña'wësö es. <sup>29</sup> Es Skéköl tó ká e' wakpa ewéwa. Erë i'ki' Abraham tó ie' a, e' ska' ie' er de, e' kuekí ie' tó Lot tsatkée.

*Lot alã busipa alã kékã ie' tã*

<sup>30</sup> Sodoma ena Gomorra ewéwa Skéköl tó, e' ukuökí tã Lot suane senukiã Sóar. E' kuekí imiã senuk kabata a ila'r busipa bö' tã. Ee ie'pa mañal sené ákuk a.

<sup>31</sup> Ká et tã ilã busi kibi tó iché itsirla a:

–Se' yé kënewatke etã kë wé wëpa tã' senuk se' tã wës alakölpa malepa wëpa tã' es. <sup>32</sup> E' kuekí se' yé ttókasö blo' wa etã se' ser' ie' tã, etã es se' ulã a alã dömi.

<sup>33</sup> E' nañewe tã ie'pa tó iyé ttékã blo' wa tajë, etã ilã busi kibi ék sené ie' tã. Erë ie' tteke blo' tó tajë, e' kuekí kë ie' éna i' aneia.

<sup>34</sup> Bule es tã ilã busi kibi tó iché itsirla a:

–Bö ittsó, ye' sené se' yé tã. I'ñe nañewe iskã ttókasö blo' wa. Etã be' senu' ie' tã. Etã es se' bö' ulã a alã dömi.

<sup>35</sup> E' nañewe tã ie'pa tó iyé skã ttékã blo' wa. Etã ilã busi tsirla sené ie' tã. Erë ie' tteke blo' tó tajë, e' kuekí kë ie' éna i' aneia. <sup>36</sup> Es ilã busipa bö' e' bukluwéka iyé wa. <sup>37</sup> Etã ikibi ék alã kune kié mékaitö Moab. I'ñe tã Moab aleripa datse e' batamik. <sup>38</sup> Ñies itsirla de alãe, kié mékaitö Ben-amí. I'ñe tã amonwak datse e' batamik.

## 20

*Abraham ena Abimélec*

<sup>1</sup> Abraham e' yétsã Mamré a, míã tkörö ká kié Négueb ee. Etã ie' e' tséat senuk ká kié Guerar ee. Guerar a tã Cadés ena Sur e' shushãe. <sup>2</sup> Ie' tó ká e' wakpa a iché tó Sara dör ie' kutã. Ká e' blú kié Abimélec, e' tó Sara tsuk patké alakólie e' a. <sup>3</sup> Erë nañewe tã ie' kapowã e' dalewa, Skéköl tté ie' tã kabsuë a tã iché ia:

–Alaköl tsuk patkébö e' wëm tã', e' kuekí be' duówami.

<sup>4</sup> Erë kam ie' ser Abraham alaköl tã, e' kuekí ie' iüté:

–A kékëpa, ye' kë kí e' nuí ku' çwes e' ttëwamibö? <sup>5</sup> E'ma Abraham wák tó ye' a iché tó alaköl e' dör ie' kutã. Ñies ilaköl tó ye' a iché tó Abraham dör ie' aké. E' kuekí ye' tó i' kôs wé er bua' wa. Kë ye' wã iwamblëne er sulu wa.

<sup>6</sup> Skéköl tó iskã iüténe kabsuë a tã ichéitö ia:

–Ye' éna iane buaë tó be' tó iwé er bua' wa. E' kuekí kë ye' wã be' kãne ie' kókwa as be' kë tó i' sulu wamblö ye' kí. <sup>7</sup> Abraham dör

ye' tteköl, e' kuekí bet be' yú ilaköl mukne ia. Ie' tó ye' a ikieraë as be' seria ttsé'ka. Erë be' kë dë'ne imukne, e' tã be' ena be' yamipa kôs duóralur.

<sup>8</sup> Bule es bla'mi tã Abimélec shkëne ikané mésopa kiéitö tã i' suéitö kabsuë a e' kôs pakéitö ie'pa a. Mik e' tssé ie'pa tó etã tajë ie'pa suanéka iyöki.

<sup>9</sup> Etã Abimélec tó Abraham kié tã iché ia:

–çlök be' tó iwamblé sa' tã es? Be' kuekí Skéköl tó sa' pauñé ewéwa, erë Skéköl tó sa' pauñé es, etã çì sulu wambléyö be' tã? Íyi ese kë kawö tã' wamblënu. <sup>10</sup> Be' tó i' sulu wamblé ye' tã, etã çì dör iwã?

<sup>11</sup> Abraham tó iüté:

–Ye' tó ibikeitsé tó ká i' kí kë yi tó Skéköl dalöieta'. Ye' suane dö' a' ye' ttëwã ye' alaköl yottsã ye' ulã a. <sup>12</sup> Erë iyëne tó ie' dör ye' kutã. Ie' yé dör ye' yé, erë ie' mi kë dör ye' mi. Ñies ie' dör ye' tayë. <sup>13</sup> Mik Skéköl tó ye' a iyé' tó be' e' yottsã be' yé ká a, etã yö iché ye' alaköl a: “Kã wa'ñe wé se' demi, etã ichö tó ye' dör be' aké.”

<sup>14</sup> Etã Abimélec tó Sara méne iwëm Abraham a. Ñies iyiwak kakméitö Abraham a obeja ena baka. Ñies kané mésopa kakméitö ie' a wëpa ena alakölpa. <sup>15</sup> Etã ie' iché Abraham a:

–Ye' ká saü sraa wé wa be' wöbatse e' kí be' yú senuk.

<sup>16</sup> Etã Sara a ichéitö:

–Ye' tó inuköl wömulë kakmé be' aké a dökã mil ekké. E' dör i' sulu wambléyö be' tã be' wakpa ulitane wöã e' patuqie. Es be' kë jaëneia.

<sup>17</sup> Etã Abraham tó Skéköl a ikié tó Abimélec ena ilaköl duöke, e' bua'üne. Etã Skéköl tó ie'pa bua'wëne. <sup>18</sup> Alakölpa kôs tso' Abimélec u a, e'pa shu mo'wa Jehová tó as kë idöiarak alãe Sara kuekí. Ie'pa kôs shu wötséene Jehová tó.

## 21

*Sara alã kékã Abraham a*

<sup>1</sup> I' ye' Jehová tó Sara a tó be' alã kórakã, e' wã tka wës iyëne bak es. <sup>2</sup> Erë Sara ena iwëm dör këképalatke, erë ie' dunekã e' wã kune. Alã e' kune mik Skéköl tó ikéwö yé' ie' a etã. <sup>3</sup> Sara alã kune wëm e' kié mékã Abraham tó Isaac. <sup>4</sup> Mik Isaac kí ká de pãköl, etã Abraham tó itóttola kkuólitla téé tsir wës Skéköl tó ie' a iyé' es. <sup>5</sup> E' kéwö ska' tã Abraham kí duas tso' cien eyök (100). <sup>6</sup> Etã Sara tó ibikeitsé: “Skéköl tó ye' jañawéka. Mik sulitane wa ijchenewa tó ye' de alãe etã tajë ie'pa jañumi ye' tã. <sup>7</sup> Kam ye' alã kókã etã kë yi a iyënuk tó ye' dömi alãe. Erë i' tã ye' alã kékã Abraham a, ie' kënewatke etã.”

*Agar ena Ismael uyétsã bánet*

<sup>8</sup> Etã Abraham alã Isaac de bërie tã itsu'batsée e' kéwö tkö'wé Abraham tó tajë.

<sup>9</sup> Età Sara tò isuë tò Abraham alà kune egiptowak kiè Agar e' ta kiè Ismael, e' tò Isaac wayueke suluë. <sup>10</sup> E' kuekji Sara miã ichök Abraham a: "Ì kos tso' be' wà mè se' alà Isaac a, e' kè kawò ta' blatè se' kanè méso e' alà a. E' kuekji iyuoðshkar alàè."

<sup>11</sup> Ismael dör Abraham alà ñies e' kuekji ì ché Sara tò e' tò ie' eriauwé tajë. <sup>12</sup> Erë Skëköl tò iché ia: "Be' aleripa chökke e'pa döraë Isaac wa. E' kuekji kè be' tkinuk be' alà kibi ék kji ena imi kji. Ì kos ché Sara tò e' ù. <sup>13</sup> Be' alà kune a' kanè méso ta, ñies e' aleripa alöweraëyò tajë, ie' dör be' alà e' kuekji."

<sup>14</sup> Età bule es bla'mi ta Abraham tò Agar a chké mè. Ñies di' méitò ia iyiwak kkuölit yöule di' tsoie ese a. E' tiëkä ie' tò seraa itsj kji ta iyueðshkar ilà Ismael e' ta. Agar miã shkëmi éanas wé kè yi serku' ese ska' ká kiè Beerseba e' éka. <sup>15</sup> Mik idi' enewa, età ilà tkéseritò kal dikja. <sup>16</sup> Ie' kè kji ilà kiane suë duökwa, e' kuekji imiã e' tkéser kukuie. Mik ie' e' tkéser isjki età ilà jëmi.

<sup>17</sup> Ilà ijuke e' ttsé Skëköl tò ta bet Jehovah biyöchökwa bua'ie e' tò Agar a ichaké ká jai a: "¿A Agar weş be' de? Kè be' suanuk. Be' alà tkër ijuke e' ttsé Skëköl tò. <sup>18</sup> Be' yu be' alà yulök. Ikóka ulà a kè arwa. Ye' tò ie' aleripa alöweraë tajë."

<sup>19</sup> Età Skëköl tò Agar a di' tum kkaché et. Ie' miã di' e' tsuk, iyiwak kkuölit a e' méitò Ismael a yè. <sup>20</sup> Skëköl tò Ismael kkò'né buaë. Ie' talane sené ká wé kji kè yi ku' kiè Parán eë. Ie' de sulëname buaë. <sup>21</sup> Ie' kibine ta imi tò lulabatséwà alaköl dör egiptowak ese ta.

*Abraham ena Abimélec tò kawò mé ñi a*

<sup>22</sup> E' kéwö ska' ta blu' kiè Abimélec miã ttök Abraham ta. Ie' ñippökwa pa wökir, kiè Ficol, e' mi ie' wapie. Età Abimélec tò iché Abraham a:

—Sa' wà ijcher tò Skëköl be' kimeke tajë ì kos wekebò e' wa. <sup>23</sup> E' kuekji be' ttè mú ye' a jé Skëköl wò wa tò be' kè tò ì sulu wamblepa ye' kji ñies ye' ala'r kji ena ye' aleripa kos e'pa kji. Be' ttè mú ye' a tò be' er bua' chöraë ye' a weş ye' er buaë ché be' a es. Ñies be' ttè mú ye' a tò be' er buaë chöraë ká i' wé be' serke e' wakpa a.

<sup>24</sup> Abraham tò ijuuté:

—Tò. Es ye' ttè mé be' a.

<sup>25</sup> Erë Abimélec wakpa tò di' tum biule ye' ttsa et Abraham wakpa ulà a. E' chaké Abraham tò ie' a. <sup>26</sup> Ie' tò ijuuté:

—Erpa be' ye' tkiwéwà ttè e' wa. Kè bö ichópa ye' a, e'ma kè ye' wà ijcher. Brör zyì tò e' wamblé be' kji?

<sup>27</sup> Abraham tò baka ena obeja kakmé Abimélec a età ie'pa böl kawò mé ñi a. <sup>28</sup> E' ukuökji ta Abraham tò iobeja alakipa pupula

e' dapa'wé döká kuktò ek tsini. <sup>29</sup> Mik e' sué Abimélec tò età ie' tò Abraham a ichaké:

—¿Ì kuekji be' iyiwak kuktò dapa'wé ek tsini?

<sup>30</sup> Abraham tò ijuuté:

—Iyiwak kuktò, e' meke ye' tò be' a iwà kkachöie tò mokji ye' tò di' tum e' bi'.

<sup>31</sup> Ie'pa böl kawò mé ñi a eë e' kuekji ká e' kinewa Beerseba.\*

<sup>32</sup> Ie'pa kawò mé ñi a, e' ukuökji ta Abimélec ena Ficol e'pa biteyal filisteowak ká a. <sup>33</sup> Età Abraham tò kal kuá kiè tamarisco ese kuatké elka Beerseba. Eë ie' tò Jehovah dör Skëköl yöbië e' dalöie. <sup>34</sup> Eë ie' sené ká tajë filisteowak ká a.

## 22

*Skëköl tò Abraham ma'wé ilà wa*

<sup>1</sup> E' ukuökji ta Skëköl tò Abraham ma'wé tò mokji ie' tò idalöieta'. Ie' chakéitò:

—A Abraham.

Abraham tò ijuuté:

—¿Ì?

<sup>2</sup> Età Skëköl tò iché ia:

—Be' alà eköl é kiè Isaac e' dalër be' éna tajë, e' tsúmi Moria. Mik be' demi eë, età ye' tò be' a' kabata kkacheke, e' kji be' alà ttöwà ta ina'üwa ye' a ye' dalöioie.

<sup>3</sup> Bule es bla'mi ta Abraham e' kéká ta burro payueitò. Bö' jchéitò tsëmi. Età ie' miã wé Skëköl tò ie' a iyé' eë ilà ena ikanè mésopa böl e'pa ta. <sup>4</sup> E' böiki es ta Abraham tò ká yöne ie' a' e' kji sué kamië. <sup>5</sup> Età ie' tò iché ikanè mésopa a:

—Íé a' e' tsúat burro i' ta. Ye' ena ye' alà, sa' micho kabata jai a Skëköl dalöiök, e' wa sa' döne.

<sup>6</sup> Età Abraham wà bö' mí e' ppékaitò Isaac kuli' kji. Tabela ena bö'ka bö' batsoie e' mí Abraham wà. Età imiyal ñita. <sup>7</sup> Età Isaac tò iché iyé a:

—A, yéwö.

Abraham tò ijuuté:

—A alà, ¿ì kiane be' kji?

Isaac tò iché ia:

—A Yéwö, bö' tso' se' wà, ñies bö'ka, erë ¿wé obeja pupula ttekewa Skëköl a e'?

<sup>8</sup> Iyé tò ijuuté:

—A alà, Skëköl wák tò e' meraë se' a.

Ie'pa mir ñita. <sup>9</sup> Mik ie'pa demi wé Skëköl tò iyé' Abraham a eë, età Abraham tò ák kataté et ka'ie. E' ukuökji ta ibò' dapa'wéka ká e' kji ta ilà klö'wéwajitò payuëwà mékajitò bö' bata kji. <sup>10-11</sup> Ie' tabela klö'wéwà ilà ttowà ña'wé Jehovah a. E' wösha ta Jehovah biyöchökwa bua'ie e' tò Abraham chaké siwá kji:

—¡A Abraham, a Abraham!

Ie' tò ijuuté bet:

\* **21:31** Beerseba: Hebreoie ká kiè e' wà kiane ché ttè mène ñi a e' di' tum biule ó Obeja kuktò e' di' tum biule.

—¿ì?

<sup>12</sup> Jehová biyöchökwak bua'ie e' tō iché iā:  
—jBe' alà kē shkā'war, kē ittarwā! Be' wāk  
alà ekōl ēme e' kē kēōne be' wā ye' yōki. E'  
wa ye' wā ijcher tō mokì be' tō ye' dalōieta'  
tajē.

<sup>13</sup> E' wōshā Abraham tō isué tō obeja wē'ñe  
e' maljtséwā idula' ā kal tsitsir chale a. Ie'  
tō iyiwak e' klō'wéwā jché ña'wéwa ilà skéie  
Jehová dalōioie. <sup>14</sup> Ie' tō ká e' kiè mékà i' es: “Í  
kiane se' kī e' mera Jehová tō.” E' kuēkī j'ñe  
tā se' tō ichekeia: “Í kiane se' kī, e' merdaē  
se' ā Jehová kēbata a.”

<sup>15-16</sup> Jehová biyöchökwak bua'ie e' tō Abra-  
ham skā kié ká jai ā tā ichéitō iā:

—Jehová tō iché: 'Buaē be' tō ye' dalōieke,  
be' alà ekōl ē, e' métsabō ye' a. <sup>17</sup> E' kuēkī  
ye' er buaē chōraē be' ā tajē. Be' aleripa  
alōweraeyō tajē wes bēkwō tso' tajē ká jai ā  
es, wes ttsā'wō tso' tajē dayē kōmik es. Ñies  
ie'pa e' alōrakā ibolōkpa kī kēkraē. <sup>18</sup> Be' tō  
ye' ttō dalōie, e' kuēkī be' aleripa batamik ye'  
er buaē chōraē ká ulitane wakpa a.'

<sup>19</sup> Etā Abraham biteane wē ikanē mēsopa  
atēat eē tā imiyal sēraā ñitā dōmine Beerseba  
wē ie' serke eē.

#### Nahor alar

<sup>20-23</sup> E' ukuōkī tā biyō debitū Abraham kī  
tō ie' ēl kiè Nahor, e' alakōl kiè Milcá, e' alar  
de pākōl (8). E' alà kō'k kiè Uz. Imalepa kiè  
dōr Buz, Quemuel, e' dōr Aram yē, Quésed,  
Hazó, Pildás, Idlaf ena Betuel e' dōr Rebeca  
yé.

<sup>24</sup> Nahor alakōl skā tso' kiè Reumá, e' tā  
ie' alar kēkā tkēl. E'pa kiè dōr Teba, Gáham,  
Tahas, ena Maacá.

## 23

#### Sara blēnewā

<sup>1</sup> Mik Sara kī duas tso' cien eyōk kī dabom  
böyōk kī kul (127), <sup>2</sup> etā ie' blēnewā ká kiè  
Quiriat-arbā atē Canaán eē. Ñies ká e' kiè  
Hebrón. Abraham schōne e' jēitséitō siarē.  
<sup>3</sup> Ie' tkēr idētū tō nu o'mik e' e' kēkā tā imiā ttōk  
hititawakpa tā, tā ichéitō ie'pa ā:

<sup>4</sup>—Erē ye' dōr ká kuā'kī wak serke a shuā  
e' ē, erē ká wataū ña pōie ye' dētū blowā.

<sup>5</sup> Ie'pa tō iūtē:

<sup>6</sup>—A kēkēpa, be' we'ikē sa' tō, sa' ttō ttsō.  
Sa' ā tā be' dōr kēkēpa tajē e' serke sa' shuā.  
E' kuēkī be' dētū tō nu blō sa' pō bua'ie ese ā.  
Sa' ulitane kē tō ichepa be' ā tō kē iblar sa'  
pō ā.

<sup>7</sup> Ie' e' duēkā ie'pa wōrkī tā ie' e' tkéwā  
kuchē kī ie'pa dalōiōk <sup>8</sup> tā ichéitō ie'pa ā:

—Mokī a' kī ikiane tō ye' dētū tō nu blēwayō  
jē a' ká ā, e' tā wēm kiè Efrón dōr Sóhar alā, e'  
ichō <sup>9</sup> tō ákuk tso' ie' ká kōk ā kiè Macpelá

e' wataūttsā ye' ā ye' yamipa pōie. Ye' tō  
ipatuēmi ie' ā kōs ituē ekkē. Es ákuk e' atē  
ye' ulā ā a' shuā.

<sup>10</sup> Etā Efrón dōr hititawak e' tkērñak ie'pa  
shuā, e' tō Abraham iūtē darērē as iyamipa  
ena kōs daparke ká e' wékkō ā e'pa tō ittō  
ttsō. Ie' tō iché Abraham ā:

<sup>11</sup>—A kēkēpa, kē ye' tō ákuk watuēpa be' a.  
Ká e' ñies ákuk tso' iā, e' kakmekeyō be' ā ē.  
Ye' yamipa kōs tso' jē e'pa tō ye' ttō ttsē tō ká  
e' kakméyō be' a. Be' dētū tō nu blō eē.

<sup>12</sup> Erē Abraham e' tkéwāne kuchē kī ká e'  
wakpa wōrkī <sup>13</sup> tā ichéitō ie' ā sulitane wōrkī:

—Ye' ttō ttsō. Be' pablēyō tō ká e' ské klō'ū  
ye' ulā ā. E' ukuōkī ye' dētū tō nu blekewayō.

<sup>14</sup> Ie' tō iūtē:

<sup>15</sup>—A kēkēpa, ye' ttō ttsō. Ká e' ské dōr  
inukōl wōmulē dōkā cien tkéyōk (400), erē  
inukōl ekkē ē, kē e' kī se' tkinuk. Be' dētū  
tō nu blō eē.

<sup>16</sup> Etā kōs ie' tō ká ské ché imalepa wōrkī e'  
mēne buaē Abraham ā, ekkē patuēttsaitō.\*  
<sup>17-18</sup> Es Efrón ká tso' Macpelá atē Mamré  
diwō tskirke e' ēkā e' de Abraham ulā ā iákuk  
tā ena kal tso' kōs ikī e' tā. Hititawak ena  
sulitane dami ká e' wékkō ā e'pa kōs dōr ká  
tōne e' ttekōlpa.

<sup>19</sup> E' ukuōkī tā, Abraham tō idētū tō nu  
bléwā ákuk tuētō Macpelá eē. Ká e' atē  
Mamré atē Canaán e' o'mik tsinet (Mamré  
kiè ñies Hebrón). <sup>20</sup> Ká e' wataūttsā ie' ā hi-  
titawak tō. Es ká e' ena ákuk e' de Abraham  
ulā ā iyamipa pōie.

## 24

#### Abraham tō alakōl yulōk patké Isaac ā

<sup>1</sup> Abraham dewā kēkēpalaie. Ie' ā Jehová  
er buaē ché íyi ulitane wa. <sup>2</sup> Ká et tā ie'  
tō ikanē méso kibi kié. E' dōr ie' íyi kōs e'  
kuēblu. Ie' tō iché iā:

—Be' ulā múwā ye' tu' dikīā iwā kka-  
choie tō mokī i kiekeyō be' a e' waweraēbō.  
<sup>3</sup> Jehová dōr ká jai ena ká i' e' Kēkōl e' wōrkī  
be' ttē mú ye' ā mokjē tō ye' alā kē kar  
senukwā Canaán jē se' serke e' alékōlpa tā.  
<sup>4</sup> Be' yú ká wē ye' manēt eē, etā eē alakōl yulō  
ekōl ye' yamipa shuā senukwā ye' alā tā.

<sup>5</sup> Ie' tō iūtē:

—Dō' alakōl kē bitū ye' tā, e' tā ¿wes ye'  
iwēmi? ¿Buaē idir be' ā tō be' alā mi' ye' wā  
dō wē be' manēt eē?

<sup>6</sup> Ie' iūtē:

—jAu, kē ye' alā tsarmi eē! <sup>7</sup> Jehová dōr  
ká jai Kēkōl, e' tō ye' yē'ttsā ye' yē u ā ena  
ye' yamipa ká a. Ie' tō ittē me' ye' ā tō ká  
i' meraeitō ye' aleripa ā. Ie' tō ibiyöchökwak  
patkeraē be' kīmuk alakōl tsūkbitū ye' yákie.

\* **23:16** Es ie'pa wōblar íyi wataūk ñi ā. Erē Efrón tō iché tō ká e' kakmeitō Abraham ā erē e' kē yēne. Ñies e' ane Abraham  
ēna, e' kuēkī ie' tō Efrón patuē bēre kōs Efrón ie' ā iché ekkē.

<sup>8</sup> Alaköl kē shhak be' ta, e' ta kē be' tkinuk. Kē be' kàne iská yulök. Erē kē ye' alà tsarṁi ee.

<sup>9</sup> Eta ikanè méso ulà méwa ie' tu' dikia ta ittè mé ia tò iweraè wēs iuk patkéitò es. <sup>10</sup> E' ukuökí ta ie' tò iwökir iyi kos bua' bua, ese shtë tsèmi kakkè. Ekkè kos payuèitò iyiwak kiè kameio e' k'ì dōkà dabop. Eta ie' m'ia iyiwak wēttsè tkörö Nahor atē Mesopotamia ee. <sup>11</sup> Mik ie' demi tsinet Nahor, eta ká tuirketke. Diwō ekkè ta ká e' alékōlpa mi'ke di' tsuk. E' wōsha ta ie' de di' tum biule e' kkōmik ta ikameio kéitò e' tulökser enuk ee. <sup>12</sup> Eta ie' tò iché Skékōl a: "A Jehová, be' dör ye' wökir Abraham e' Kékōl. Ye' k'ímú j'ñe ñies er buaè chō ye' wökir a. <sup>13</sup> Íe di' tum biule o' mik ye' e' tsukeat bērbēr ē ká i' busipa tso' di' tsuk e' dalewa. <sup>14</sup> Kawō mú ña tò wēne ēk a ye' iché: 'Be' kakō' ōwa ye' a di' kakkú yē', as e' tò ye' iūtò: 'Be' di' yō ñies be' kameio a ikakmekeyō.' Es ye' éna iane tò e' ēk shushtë be' tò Isaac a alakōlie. Es ye' wa ijsherṁi tò be' er bua' ché ye' wökir a."

<sup>15</sup> Eta kam i' chekeitò e' or, eta ie' isuē alaköl datse eköl kakō' bune kuli' k'ì di' tsōie. E' dör Rebeca, ie' dör wēm kiè Betuel e' alà busi. Betuel mi dör Milcá ena iyē dör Nahor. Nahor dör Abraham ēl. <sup>16</sup> Rebeca dör busi buaala kam iser wēm ta. Ie' m'ia dōttsa di' tum biule e' a ikakō' wà iök. <sup>17</sup> Mik imítke eta Abraham kanè méso tunemi itökí ta iché ia:

—Be' we' ikèyō, di' dami be' wā e' kakkú ña yē.

<sup>18</sup> Ie' tò iūtē,

—A kékēpa, be' di' yō.

E' bet ie' kakō' éwa klō' wéwā ulà a ta di' méitō ia yē. <sup>19</sup> Mik ie' di' yē one ta Rebeca tò iché ia:

—Ye' mí di' tsuk ñies mè be' kameio a.

<sup>20</sup> Bet ikakō' wà ka' wéitò wé iyiwak di' yōke e' a ta imí di' k'ì tsuk iyiwak a. Es iwéitò kameio ulitane a. <sup>21</sup> E' dalewa Abraham kanè méso tso' isaúk bēre, wà dör tò ie' k'ì ikiane jchenowā yēsēsē tò Jehová tò ie' k'ímé i' dalērmik ie' shkō e' wa as idōttsa buaè ō au. <sup>22</sup> Mik kameio di' yē one, eta ie' tò ula'tsio sū es dör gramo teröl ese tkéwa busi yik a. Ñies ulaio méitō bōt, e' es dör cien gramos tsata. <sup>23</sup> Eta ie' tò iché ia:

—Be' we' ikèyō, ichō ña çYi alà busi be' dör? çYe' chōmi j'ñe nañewe be' yē u a kapōkrō ye' kanè mēsopa ta?

<sup>24</sup> Ie' iūtē:

—Ye' dör Betuel alà busi, e' dör Milcá ena Nahor alà wēm. <sup>25</sup> Sa' u a' a' chōmi. Ñies a' kameio a chké tso'.

<sup>26</sup> Eta Abraham kanè méso e' tkéwā kuchē k'ì Jehová dalōiök <sup>27</sup> ta ichéitò: "Jehová dör ye' wökir Abraham e' Kékōl. E' k'ikōkka ye' tso'. Kēkraē ie' tò ye' wökir Abraham kimeke buaè. Kēkraē ie' er buaè chōke ye' wökir a.

Ie' wā ye' debitū buaè ñala k'ì dō íe ye' wökir yamipa u a. E' kuek'ì ik'ikékayō."

<sup>28</sup> Rebeca tunemi shkālalaē imi u a i kos tka ie' ta e' pakök. <sup>29-30</sup> Ie' akē kiè Labán, e' tò ula'tsio suē ena ulaio suē ikutà ulà a. Ñies i ché Abraham kanè méso tò e' tté ttséitò. E' kuek'ì ie' biteḡa ñalaetsuk di' tum biule a. Ie' de Abraham kanè méso ska' e' tso' ia ikameio ta di' tum biule ska'. <sup>31</sup> Eta Labán tò iché ia:

—Jehová tso' be' ta buaè. ¡Mishka ye' ska! çWes be' e' tsukeat u'r'k'ì? Ye' u kanewétke be' a ñies kameio a.

<sup>32</sup> Es Abraham kanè méso biteḡa ie' ta. Eē ie' tò dali tso' kameio k'ì e' éwa ta itiéitò. E' ukuökí ta ie' wā di' debitū Abraham kanè méso a ena iwapiepa a klō skuoie.

<sup>33</sup> Mik ie' pa tò itié, eta Abraham kanè méso tò iché:

—Kē ye' chkōpa kam ye' tò iök ye' debitū e' wà pakō a' a' eta.

Labán tò iūtē:

—E' ma ichō. çI dör iwà?

<sup>34</sup> Ie' tò iché:

—Ye' dör Abraham kanè méso. <sup>35</sup> Jehová tò ik'ímé taijē. Ie' tò iblu' wé taijē. Obeja, baka, orochka, inukōlchka, kanè mēsopa wēpa ena alakōlpa, kameio ena burro, e' kos méitō ia taijē. <sup>36</sup> Ñies alakōl Sara e' tò alà mé ia eköl wák wēm ikēnewatke eta. I kos tso' ye' wökir wā e' méitō ilà a. <sup>37</sup> Ie' tò ye' kē tté muk ie' a. Ye' a ichéitò: 'Ye' alà kē kar senukwā Canaán wé ye' serke e' alékōlpa ta. <sup>38</sup> Be' yú wé ye' yēpa tso' e' ta alaköl yulō eköl ye' yàkie ye' ditséwō shūa.' <sup>39</sup> Ye' tò iūtē: 'A ye' wökir Abraham, çdō' alaköl kē bitū ye' ta?' <sup>40</sup> Ie' tò ye' iūtē: 'Kēkraē ye' serke buaè Jehová wōa, e' kuek'ì ie' tò ibiyōchōkwak patkeraē be' ta as be' kawō tkō buaè ñala k'ì, ñies as alaköl k'ùbō ye' yàkie ye' yamipa ye' yē wa e' pa shūa. <sup>41</sup> Erē ye' yamipa kē éna ilà busi patkak be' ta, e' ta kē be' tkinuk. Kē i' tté ta' ia be' k'ì.'

<sup>42-44</sup> "E' kuek'ì ye' debitū j'ñe di' tum biule ska'. Eē ye' tò ik'íe Jehová dör ye' wökir Abraham e' Kékōl e' a: 'tò mok'ì be' ye' k'imeke alaköl yulök ye' wökir Abraham yàkie, e' ta as e' bitū ye' ska' íe di' tum biule ska'. Mik ye' tò ie' a di' kak kié, eta as imùitō ye' a ena ichéitò: Ñies ye' tò be' kameio a ikakmeke. Es ye' isuēmi tò alaköl e' shushtë be' tò ye' wökir yàkie.' <sup>45</sup> Mik e' chekeyō e' erketke, eta ye' isuē tò Rebeca datse ikakō' bune ikuli' k'ì. <sup>46</sup> Mik ie' di' yinetke eta ye' tò ie' a iché: 'Be' we' ikèyō, di' dami be' wā e' kakkú ña yē. E' bet ikakō' éwaitō ta ichéitò: 'Be' di' yō. Ñies imekeyō be' kameio a.' Ie' ye' a di' mé ñies ye' kameio a. <sup>47</sup> E' ukuökí ta ye' tò ie' a ichaké: 'çYi alà busi be' dör?' Ie' iūtē: 'Ye' dör Betuel alà busi e' dör Nahor ena Milcá alà.' Eta ula'tsio sū e' tkéwayō iyik a ena ulaio tkéwayō bōt iulà a. <sup>48</sup> E' ukuökí ta ye'

e' tkéwā kuchē kī tā Jehová dalóieyō. Ie' dōr ye' wōkir Abraham e' Kékōl e' kīkékayō. Ie' wā ye' debitū buaē yēsýēsē busi shukititō ye' wōkir yamipa shūā ilā a' e' ska'. <sup>49</sup> Es ʒa' er buaē chōke ye' wōkir a? ʒA' e' chōke ikimuk er bua' wa? Ichō űa i' tā yēsýēsē ima a' tō ichē, es ye' éna iarmi tō i wēmíyō."

<sup>50</sup> Etā Labán ena Betuel e'pa tō iūtē:

—E'ma i' kōs debitū Jehová ttō wa. E' kuekī kē wes sa' a' i' onuk. Kē sa' a' i' yēnuk yēs. <sup>51</sup> I' Rebeca. Itsúmi be' wōkir a' senukwā ilā tā wēs Jehová kī ikiane es.

<sup>52</sup> Mik Abraham kanē méso tō ttē e' tseé, etā ie' e' tkéwā kuchē kī iwōtsā mēwā iyōk kī Jehová dalóioč. <sup>53</sup> E' ukuōkī tā ie' tō iyi yōule orochka wa ena inukōlchka wa űies datsi' bua' bua' e' tajē yélur méitō Rebeca a. űies ie' tō ikakmé Rebeca akē a' ena imi a. <sup>54</sup> E' ukuōkī tā ie' ena iwapiēpa chké di'yé tā ikapere ee. Bule es tā itī'nerak tā Abraham kanē méso tō ichē:

—Ye' mīāne ye' wōkir ska'.

<sup>55</sup> Erē Rebeca akē ena imi e'pa tō ichē iā:

—Rebeca kē tsarmi bet. Kawō mú ie' a' aš ie' e' tsūat sa' tā ká dabop, e' wa wē' be' wā imi' mi.

<sup>56</sup> Erē ie' tō ichē ie'pa a:

—Kē ye' wōklō'ukia a' tō. Jehová tō ye' kímé aš i' kōs dōttsā buaē ye' a. E' kuekī ye' ómi ye' wōkir u a.

<sup>57</sup> Ie'pa tō iūtē:

—Sa' mī Rebeca kiōk chakē ʒima ichēmíitō?

<sup>58</sup> Etā Rebeca kierakitō tā ichakerakitō iā:

—A Rebeca ʒbe' shkak wēm i' tā?

Ie' tō iūtē:

—Tō.

<sup>59</sup> Es ie'pa tō Rebeca ena alakōl tso' ie' kō'ō' nuk kekraē e'pa a' kawō mé aš imi' rak. űies Abraham kanē méso ena iwapiēpa kōs e'pa a' kawō mé rakitō aš imi' rak. <sup>60</sup> Ie'pa mītkē tā Rebeca yamipa er buaē chē ie' a' ttē i' wa:

"A sa' yami,

Aš be' alōr tajē shūtēē.

Aš be' aleripa e' alōkā ibolōkpa kōs kī."

<sup>61</sup> Etā Rebeca ena ikanē mēsopa e' tuléka ie'pa kameio kī tā imiyal Abraham kanē méso itōkī.

<sup>62</sup> E' kēwō ska' tā Isaac serke Négueb wé di' tum biule tso' kiē "Skékōl tso' e' tō ye' suēke" ee, e' dene iyē ska'. <sup>63</sup> Tsálij tā Isaac e' yéttsa shkōk kabikeitsōrami. E' wōshā tā ie' isuē tō kameio datse tseē. <sup>64</sup> E' wōshā Rebeca tō ie' suē űies tā ie' e' éwa kameio kī. <sup>65</sup> Rebeca tō ichakē Abraham kanē méso a:

—ʒWēm doā wj se' kke, e' dōr yi?

Ie' iūtē:

—E' dōr ye' wōkir Isaac.

Etā Rebeca wō pabakéwā datsi' tak wa.

<sup>66</sup> Abraham kanē méso tō i' kōs tka ie' tā e' paké Isaac a. <sup>67</sup> E' ukuōkī tā Rebeca mītsēr Isaac wā imi Sara blēnewā e' u a. Es Isaac senéwā ie' tā. Isaac éna Rebeca dalēr tajē, es ie' er pabléne imi blēnewā e' kuekī.

## 25

### *Abraham ena Queturá e'pa aleripa*

<sup>1</sup> Abraham alakōl ské tséwā kiē Queturá. <sup>2</sup> Ie' ala' r kēka Abraham tā wēpa dōka terōl. E'pa kiē dōr Zimrán, Jocsán, Medán, Madián, Isbac ena Súah. <sup>3</sup> Jocsán dōr Sebá ena Dedán, e'pa yé. Dedán aleripa e' ditséwō dōka mañal kiē asurwak, letuswak ena leumwak. <sup>4</sup> Madián ala' r wēpa kiē Efá, Éfer, Hanoc, Abidá ena Eldaá. E'pa kōs dōr Queturá aleripa.

<sup>5-6</sup> I' kōs tso' Abraham wā e' atē Isaac ulā a. Erē kam Abraham duōwā, e' yōkī ie' tō iyi kakmé ilakōlpa malepa ala' a. Ie'pa patkémíitō senuk ká bánet atē diwō tskirke e' éka kāmíē aš kē iku' rak Isaac ska' tsinet.

### *Abraham blēnewā*

<sup>7</sup> Abraham sene' duas cien eyōk kī dabom kulyōk kī skēl (175) seraā <sup>8</sup> etā iblēnewā buaē ikēnewatke kē weine siarē. Es ie' mi choē idēūtōpa itōkī. <sup>9-10</sup> Ila' r Isaac ena Ismael e'pa tō inu' blé ilakōl Sara pō e' o' mik ákuk kiē Macpelá ee. Ákuk e' atē Mamrē diwō tskirke e' wa. Ká e' bak hititawak kiē Efrón dōr Sóhar alā e' ulā a. Ká e' wato' tsa hititawak tō Abraham a. <sup>11</sup> Abraham blēnewā, e' ukuōkī tā Skékōl er buaē chē Isaac a. Ie' e' tséat senuk tsinet di' tum biule kiē "Skékōl tso', e' ye' suēke" ee.

### *Ismael ala' r*

<sup>12</sup> Ismael dōr Abraham alā Agar tā. Agar dōr Abraham alakōl Sara, e' kanē méso e' dōr egiptowak. Ikkē dōr Ismael ala' r e'pa kiē <sup>13</sup> wēs ikunerak es: Nebaiot, e' dōr ilā tsá. E' itōkī Quedar, Adbeel, Mihsam, <sup>14</sup> Mismá, Dumá, Masá, <sup>15</sup> Hadar, Temá, Jetur, Nafis ena ibata kiē Quedmá. <sup>16</sup> E'pa kōs dōr Ismael ala' r dōka dabom eyōk kī bōl (12). Ie'pa ká kiérak iwákpa kiē wa. Ie'pa kōs dōr iwakpa ká wōkirpa.

<sup>17</sup> Ismael kī duas de cien eyōk kī dabom mañayōk kī kul (137) tā iblēnewā. Es ie' mi choē idēūtōpa itōkī. <sup>18</sup> Ie' aleripa mīa senuk Havilá ena Sur e' shūshā. Ká e' atē Egipto wōshāē Asiria űalé kke. Ie'pa serke ee bánet Abraham aleripa malepa yōkī.

### *Jacob ena Esaú kune*

<sup>19</sup> Ttē i' dōr Isaac dōr Abraham alā, e' paké. <sup>20</sup> Isaac kī duas de dabom tkéyōk (40) tā isenéwā Rebeca tā. Rebeca dōr Betuel e' alā busi ena Labán kutá. Ie'pa dōr arameowak serke ká kiē Padán-aram ee. <sup>21</sup> Rebeca kē dō alāē. E' kuekī Isaac tō Jehová a' kiē aš

Rebeca dö aläë. Jehová tò ittö ttsé tã Rebeca dunekã e' wakpa döör klö. <sup>22</sup> Erë klöpa ñippöke tajë ie' shuã. E' kuekji ie' ibikeitsé: "Ye' weirke i' es, e'ma çïök ye' sermiã?" E' kuekji ie' miã iwã chakök Jehová a. <sup>23</sup> E' tò ie' a iché:

"Be' shuã ala'r tso' böl.

Mik ie'pa de këchke, etã ikibi êk döraë itsirla kanè mésoie.

Ie'pa aleripa döraë kã böt ñi bolökpa ese wakpa.

Itsirla aleripa döraë diché kibiië ikibi aleripa tsatã.

E' kuekji ie'pa ñippémitke kam ikur e' yökj."

<sup>24</sup> Rebeca kéwö de, etã klöpa kune wëpa. <sup>25</sup> Ikewe êk kune e' tsã döör mashmash ipãkö shamamaë. Ie' kië mékãitö Esaú.\* <sup>26</sup> Alã tsã kune e' klölewã iël tsirla wã iklö kaniñak a iulã et wa. E' kuekji ikië mékãitö Jacob.† Mik Rebeca klöpa kune etã Isaac kji duas tso' dabom teryök (60).

*Iyë wã ì tso' mekeat Esaú a e' kéwö watuëttsaitö*

<sup>27</sup> Klöpa kibinetke. Esaú döör yëria poë. Ie' wöbatsö sulu yëble wa. Erë iël Jacob, e' kë döör es. Ie' serke bërë. Ie' wöbatsö senuk u a ê. <sup>28</sup> Iyiwak kañiru tteke Esaú tò e' chkã wa Isaac wöbatsö suluë. E' kuekji Isaac kji Esaú kiar kibiië Jacob tsatã. Erë Rebeca kji Jacob kiar kibiië Esaú tsatã.

<sup>29</sup> Kã et tã Jacob tso' ulök. E' dalewa Esaú debitü shtrinewã tajë datse kañikã. <sup>30</sup> Ie' iché Jacob a:

—Be' we'ikëyö, ì alé be' tò mat se kakkmu ye' a ñë. Sulu ye' dué bli wã. E' kuekji Esaú kië Edom‡ ñies.

<sup>31</sup> Jacob tò iüté:

—Keweie ì mekeat se' yë tò be' a be' döör ilã kibi e' kuekji, e' kéwö mütsã ye' a chkö ì skéie.

<sup>32</sup> Esaú tò iché:

—Ye' tteke bli tò dö' e' tò ye' ttëwa, e' tã ì mekeat se' yë tò ye' a çiië bua' e' döör ye' a?

<sup>33</sup> Jacob tò ikj ché ia:

—I' tã be' ttë mú ye' a tò mokj be' tò ye' a imeke.

Etã Esaú tò ittë mé Jacob a yësyësë Skëköl wöa. Es ì mekeat iyë tò ie' a, e' kéwö métsãitö Jacob a. <sup>34</sup> Jacob tò chkö mé ia pan tã. Mik Esaú chké one di' yé one, tã ie' e' kékã tã imã. Ie' döör ilã kibi e' ulã a iyi bua' kéwö tso', e' kë kji ie' tkine yës.

## 26

### Isaac miã Guerar

\* 25:25 Esaú: Esaú kië ñies Seír. Hebreoie Seír wã kiane chë pakö. Génesis 36.8 saq. † 25:26 Jacob: Hebreoie s'kië e' wã kiane chë s'klö kaniñak. ‡ 25:30 Edom: Hebreoie s'kië e' wã kiane chë mat.

<sup>1</sup> E' kéwö ska' tã ketba ane tajë kã e' qos kji wes ibak Abraham kéwö ska' tã es. E' kuekji Isaac miã Guerar wé filisteowak blü serke kië Abimélec eë. <sup>2</sup> Eë Jehová e' kkaché ie' a tã ichéitö ia: "Kë be' minuk Egipto. Be' e' tsuat wë ye' be' a iché eë. <sup>3</sup> Be' senuã kã i' kji. Ye' tso' be' tã. Ye' er buaë chöraë be' a. Kã i' qos meraëyö be' a ñies be' aleripa a. Es ye' ttë muke be' a wes kewe ime'yö be' yë Abraham a es. <sup>4</sup> Be' aleripa alöweraëyö tajë wes bëkwö tso' tajë es. Kã i' qos merayö be' aleripa a. Ñies ie'pa batamik ye' er buaë chöraë kã ulitane wakpa a. <sup>5</sup> Abraham tò ye' ttë qos e' iütë buaë. Ttë mé ye' tò ie' a e' qos blë' buaë ie' tò e' kuekji ye' tò ttë buaë e' meke be' a ñies."

<sup>6</sup> Isaac e' tséat senuk Guerar. <sup>7</sup> Kã e' wakpa tò Isaac a ichaké: "¿Rebeca döör be' yaie?" Erë ie' suane ichök: "Ie' döör ye' alaköl." E' kuekji ie' iché: "Ie' döör ye' kutã." Ie' tò ibikeitsé tò kã e' wëpa tò ie' ttëwami ilaköl buala kuekji.

<sup>8</sup> Isaac kji kã de tajë eë. Kã et tã, kã e' blü kië Abimélec, e' tò isue ukkö tsitsir a tò Isaac tso' ilaköl Rebeca peñuk. <sup>9</sup> Bet itsuk patkëmitö tã ichéitö ia:

—¿Mokj tò alaköl se döör be' alaköl? ¿Ì kuekji be' tò iyë' kuaë tò ie' döör be' kutã?

Isaac tò iüté:

—Ye' ibikeitsé tò isalema a' ye' ttëwami ie' kuekji.

<sup>10</sup> Erë Abimélec tò iché ia:

—¿Ì kuekji i' wamblëbö sa' tã? Tsir etã wëm wele senëwã ie' tã, e' tã iekkë tã be' tò sa' ké ì sulu wamblök Skëköl wöa.

<sup>11</sup> Abimélec tò iché sulitane a:

—A' isie tò Isaac tsiriwë ö ilaköl tsiriwë, e' tã e' tterawã.

<sup>12</sup> Duas e' wa Isaac tò dali kuatkë, wã wöne buaë, Jehová er buaë ché ie' a e' kuekji. <sup>13</sup> Ie' de iyi blü tajë. Tajë iyi tso' ie' wã. <sup>14</sup> Ie' wã obeja ena baka tso' tajë. Ñies kanè mésopa tso' tajë ie' wã. E' kuekji filisteowak er ttsë'r suluë ie' kji. <sup>15</sup> E' kuekji ie'pa tò di' tum bi' iyë Abraham e' kanè mésopa tò, e' qos wötëwã iyök wa. <sup>16</sup> Bata ekkë tã Abimélec tò iché Isaac a:

—Be' yöne iyi blu' tajë sa' tsatã, e' kuekji jbe' yúshka!

<sup>17</sup> Etã Isaac miã senuk Guerar kakkue kji. <sup>18</sup> Eë di' tum bi' iyë tò, e' wötë'wã filisteowak tò iyë blënewã ukuökj tã, e' qos biëneitö tã ikië mékãitö wes iyë tò ime'kã es. <sup>19</sup> Kã et tã ie' kanè mésopa tso' di' tum biök kã e' kji, etã ie'pa tò di' tum a di' tuökëkã tajë ese kué et. <sup>20</sup> Erë kã e' obeja kkö' nukwakpa debitü ñippök Isaac obeja kkö' nukwakpa tã. Ie'pa tò iché tò di' tum e' döör ie'pa icha. E' kuekji Isaac tò di'

tum biule e' kiè méka "Ñippök." <sup>21</sup> E' ukuökì tã Isaac kanè mésopa di' tum skà bié et, e' kì iskà ñippéak. E' kuëkì di' tum biule e' kiè mékaitò "Se' ñi bolök."

<sup>22</sup> Ie' miã kamië kã e' kì, eë di' tum skà biéitò et. E' kè kì ñi bunerak. Ie' iché: "I' ñe tã Jehová tó kã bua' mé se' a wè' tã se' serdaë buaë." E' kuëkì kã e' kiè mékaitò "Kã tso' tajë se' a."

<sup>23</sup> E' ukuökì tã ie' miã Beerseba. <sup>24</sup> E' nañewe Jehová de ie' ska' tã ichéitò iã:

"Ye' dör be' yë Abraham e' Këköl. Ye' tso' be' tã, e' kuëkì kè be' suanuk. Abraham dör ye' kanè méso e' dalërmik ye' er buaë chöraë be' a, ñies be' aleripa alöwëraëyò tajë."

<sup>25</sup> Eë Isaac tó ák kataté et ka'ie iyiwak jchoie Jehová dalöioie. Eë ie' sené tã ikanè mésopa tó di' tum bié et eë.

*Isaac ena Abimélec kawö mé ñi a*

<sup>26</sup> Kã et tã, Abimélec datse Guerar debitu ttök Isaac tã. Iyamipa debitu böl ie' tã. Eköl kiè Ahuzat. Iëköl kiè Ficol. E' dör Abimélec ñippökwakpa wökir. <sup>27</sup> Isaac tó iché iã:

—A' éna ye' ar suluë. A' ye' yö'shkar a' kã kì. Etã ÿiök' a' do ye' ska'?

<sup>28</sup> Ie'pa tó iüté:

—Sa' isuë tó Jehová tso' be' tã. E' kuëkì sa' biteã be' a' ichök tó kawö mùwasö ñita. <sup>29</sup> Sa' kè wã be' tsiriqule i wa. Këkraë sa' tó be' kímé. Mik be' manetwã, etã sa' kè wã i tté ku' a' kì. I' ñe tã iwënëwã tó be' a' Jehová er buaë chöke tajë. E' kuëkì be' tté mú sa' a' tó be' kè tó i sulu wamblepa sa' kì.

<sup>30</sup> Etã Isaac tó kawö buaë tkö'wé ie'pa tã, chké wa di'yé wa. <sup>31</sup> Bule es bla'mi tã ie'pa tó ikawö mé ñi a' tó kè ñippöiarak. E' ukuökì tã ie'pa e' chéat ñi a' er bua' wa.

<sup>32</sup> E' diwö shã tã Isaac kanè mésopa tso' di' biök, e'pa wã ibiyö de tó sa' di' kuë. <sup>33</sup> Ie' tó di' e' kiè méka Sebá.\* E' kuëkì i' ñe tã kã e' kiëiã Beerseba.

<sup>34</sup> Mik Esau kì duas de dabom tkëyök (40), etã ie' senéwã alakölpa böl tã. Eköl kiè Judit e' yë kiè Beerí, e' dör hititawak. Iëköl kiè Basemat e' yë kiè Elón, e' dör hititawak ñies. <sup>35</sup> Alakölpa böl e'pa tó Isaac ena Rebeca eriawëkã tsiriwëkã tajë.

## 27

*Isaac er buaë ché Jacob ena Esau a*

<sup>1</sup> Isaac dewã kékëpalatke. Ie' kè wöbla wawëriã. Kã et tã ilã kibi Esau e' kiéitò tã ichéitò iã:

—jA alà!

Esau tó iüté:

—A yëwö, ÿi?

<sup>2</sup> Etã Isaac iché iã:

—Be' tó isuë tó ye' kënewatke dö' wekkë alè tã ye' duöwã. <sup>3</sup> E' kuëkì ye' kì ikiane tó be' kuaböt klö'ü tã be' yú ye' a' yëblök. <sup>4</sup> Etã iwakaneü ña buaë wës ye' wöbatsö iwa es, tã itsübitü ña katé. E' wa ye' er buaë chöke be' a' kam ye' duöwã e' yökì.

<sup>5</sup> Erë Isaac ttöke Esau tã e' ttsé Rebeca tó. E' kuëkì mik Esau miã yëblök kañikã <sup>6</sup> etã bet ie' tó iché Jacob a:

—A alà, ye' ttö ttsö. Ye' tó be' yë ttsé ttök be' ël Esau tã, tã iché iã: <sup>7</sup> "Be' yú yëblök, e' wakaneü ña buaë tã itsübitü ña katé. E' ukuökì tã ye' tó be' a' iyi kôs bua' e' kèwö mekeyö be' a' Jehová wörki kam ye' duöwã e' yökì." <sup>8</sup> E' kuëkì ye' ttö ttsö buaë. <sup>9</sup> Be' yú chibo pupula bua' bua' ese tsübitü ña bötö tã ikanewekeyö buaë wës be' yë wöbatsö iwa es. <sup>10</sup> E' ukuökì tã be' tó chké tsümi be' yë a' as ñiuitö. Es iyi kôs e' kèwö atmi be' a' be' ël skéie.

<sup>11</sup> Erë Jacob tó iché imi a:

—Ye' ël pa shamamaë. Ye' kè dör es. <sup>12</sup> Ye' yë tó ye' këmi, e' tã ittsewami tó ye' idir, etã ie' ichëmi tó ye' tso' ie' dalöseukwã. Ie' kè er buaë chepa ye' a. E' skéie ie' er sulu chöraë ye' kì.

<sup>13</sup> Erë imi tó iüté:

—A alà, as ie' er sulu chö ye' kì. Ye' ttö iütö. Be' yú chibola chéyö be' a' e' tsuk.

<sup>14</sup> Etã Jacob miã chibola tsuk e' debitu iwa imi a. E' kanewé imi tó buaë wës Isaac wöbatsö iwa es. <sup>15</sup> Ilã kibi Esau datsi' tso' blëule u a' e' bua' bua' yétsã iëkaitö ilã tsirla kì. <sup>16</sup> E' ukuökì tã chibola kkuölit wa Jacob ulã ena ikuli' patréwaitö. <sup>17</sup> Chkò bua' ena pan yuétkeitö, e' méitö Jacob a' tsëmi iyë a.

<sup>18</sup> Jacob dewã iyë ska' tã ichéitò iã:

—A yëwö.

Isaac tó iüté:

—A alà, ÿbe' dör ye' alà wéne ëk?

<sup>19</sup> Ie' iüté:

—Ye' dör Esau, be' alà kibi ëk. I' chébö ña, e' kanewétkeyö. Be' e' tköser iyiwak ttëyö e' katök. E' ukuökì tã be' iyi buaë e' kèwö mekebö ye' a, e' mú ye' a.

<sup>20</sup> Erë Isaac tó ichaké iã:

—A alà, ÿwës be' ulã de iyiwak e' ska' bet? Ie' iüté:

—Jehová dör be' Këköl e' tó ye' kímé e' wa ikuéwayö bet.

<sup>21</sup> Isaac tó iché iã:

—Be' e' sköwã ye' o' mik pattsyö tó mokjë be' dör ye' alà Esau.

<sup>22</sup> Ie' e' skéwã iyë o' mik as ipattsöitö. Isaac tó iché:

—Be' ttö e' dör Jacob ttö. Erë be' ulã e' dör Esau ulã.

<sup>23</sup> Jacob ulã kò shamamaë wës iël kibi ulã es, e' kuëkì Isaac kè éna iãne buaë tó e' dör

\* 26:33 Sebá: Hebreoie di' biule kiè e' wã kiane chë tté mëne ñi a.

Jacob. Mik ie' er buaë chökette ilà a, <sup>24</sup> etä iská chakéneitö:

—¿Mokì be' dör ye' alà Esaú?

Ie' iüté:

—Tö, ye' dör Esaú.

<sup>25</sup> Iyé tö iché ia:

—A alà, iyiwak ttébö kanewébö e' mú ña katé as ye' er buaë chö be' a.

Ie' tö iyé tié ñies vino mé ia yé. Isaac chké, vino yé. <sup>26</sup> E' ukuökì tã ichéitö ia:

—A alà, be' e' skówa ye' o' mik ye' wöalattsö.

<sup>27</sup> Mik Jacob e' skéwa iyé wöalattsök, etä iyé tö idatsi' alattsé tã ier buaë ché ilà a tté ikké wa:

“Tö, ipaalar wes ye' alà paalar es.

Ie' paalar buaë wes kañikã kkö'nè Jehová tö e' alar è.

<sup>28</sup> As Skéköl tö be' a mò wöli mè kekraë be' dalikua kì.

As ie' tö be' dalikua kos e' wöü buaë

as be' wã trigowö tã tajé ena vino tã tajé.

<sup>29</sup> Kã kuã'kì wakpa tajé as e' dö be' kanè mésoipaie.

As ie' pa e' tulöwarak kuchë kì be' wörkì be' dalöiök.

As be' mú dö be' èlpa wökirie.

As ie' pa e' tulöwã kuchë kì be' wörkì be' dalöiök.

Wépa er sulu ché be' kì, esepa kì Skéköl er sulu ské chöraë.

Ñies wépa er buaë ché be' a, esepa a Skéköl er buaë ské chöraë.”

<sup>30</sup> Isaac er buaë chétke Jacob a tã Jacob miátke. E' bet tã Esaú tso' yëblök e' dene.

<sup>31</sup> Ñies ie' tö chké alé buaë, e' mí iwã iyé a tã ichéitö ia:

—A yéwö, dúla ttéyo e' alí katö. E' ukuökì tã be' er buaë chöke ye' a e' chö ña.

<sup>32</sup> Isaac tö ichaké:

—¿Yi dör be'?

Ilà tö iüté:

—Ye' dör Esaú be' alà kibi.

<sup>33</sup> Isaac tkinewã painékã tajé tã ichéitö:

—E'ma ¿yi dare yëblök, e' wã chké debitu ña? E' katéwayö sërãã kam be' dö e' yöki. E' a ye' er buaë chétke. Es ie' a ye' er buaë ché e' atetke.

<sup>34</sup> Mik Esaú tö ì ché iyé tö e' ttsé, etä ie' erianekã anekã tajé tã ichéitö:

—¿A yéwö, ye' a er buaë chö ñies!

<sup>35</sup> Erë Isaac tö iüté:

—Be' èl datke ye' kütö'uk e' a ye' er buaë chétke be' skéie.

<sup>36</sup> Esaú tö iüté:

—Wée' ie' kië Jacob. I' tã bötökicha iwambléitö ye' tã i' es. Be' iyi kéwö mekebö ye' a ye' dör be' alà kibi e' kuëki, e' kéwö ye'ttsã ye' ulà a ie' tö kuaë. I'ñe tã be' er buaë chöke ye' a e' yéttãitö ye' yöki. ¿Warma be' er buaë chöke ye' a e' kè tã'ia?

<sup>37</sup> Isaac tö iüté:

—Ittsö. Ye' tö ie' mékatke be' wökirie. Ye' tö be' aleripa kos e' métké ie' kanè mésoipaie. Ñies ye' tö ichétke as chkewö ena vino dö ie' ulà a tajé. A alà, ¿ì memiã ye' tö be' a i' tã?

<sup>38</sup> Erë Esaú tö ikí ché iyé a:

—A yéwö ¿be' er buaë chöke sa' a e' dör etké? ¿Ye' a er buaë chö ñies! Etã Esaú jéka tajé.

<sup>39</sup> Isaac tö iché ia:

“Be' serdaë wé mò wöli kè tã tajé ese ska'.

Eë be' dalikua kè wörpa buaë.

<sup>40</sup> Be' ñippöraë tabè wa o'ka tã iyi kuëki, e' mik be' serdaë.

Be' döraë be' èl kanè mésoie.

Erë mik be' ñippémi ie' tã,

etã be' e' yörattsã ie' ulà a.”

*Jacob tkashkar Esaú yöki*

<sup>41</sup> Isaac er buaë ché Jacob a Esaú skéie. E' kuëki Esaú éna suluë Jacob arke. Ie' ibikeitsé: “Ye' yé duökewatke. Mik iduowa e' kéwö tka, etã ye' èl tterawayö.”

<sup>42</sup> Mik Rebeca wã ijchenewã tö Esaú tö iël bikeitsé ttéwã, etã Jacob tsuk patkéitö tã iché ia:

—A alà, ittsö. Be' èl Esaú e' pablöke tö ie' be' tterawã. <sup>43</sup> E' kuëki ye' ttö ttsö. Be' tköshkar bet ye' akè kië Labán serke Harán e' u a. <sup>44-45</sup> Be' e' tsüat ie' ska' kã tajé dö mik be' èl er buanene be' kì ena ì sulu wamblébö e' chowane ie' éna etã. E' ukuökì tã ye' tö be' tsuk patkeraë, e' wa be' döne. ¿Ye' kè kì ikiane tö ye' ala'r böi e' duöwã diwö etké a!

<sup>46</sup> E' ukuökì tã Rebeca tö iché Isaac a:

—Esaú alakölpa dör hititawak e'pa tö ye' shtriwétke tajé. Jacob senéwã alaköl ese tã, e' tã ye' mú duöwã.

## 28

<sup>1</sup> Etã Isaac tö Jacob kié tã ishkwéitö tã ichéitö ia:

—Kè be' senukwã canaánwak tã. <sup>2</sup> Be' yú be' duöchke kië Betuel serke Padán-aram e' ska'. Eë be' senuwã be' nau Labán alà busipa e' eköl tã. <sup>3</sup> Skéköl Diché Tã Ýi Ulitane Tsatã as e' er buaë chö be' a. Ñies as ie' tö be' aleripa alöü tajé kã wa'ñe. <sup>4</sup> Ie' tö iyé'atbak Abraham a tö kã i' meraëitö ie' a. E' kì se' serke shkal. As ie' er buaë chö be' a ena be' aleripa a wes ie' er buaë ye' Abraham a es as kã i' dö a' ulà a.

<sup>5</sup> Es Isaac tö Jacob patkémi Padán-aram. Jacob demi inau Labán ska'. Labán dör arameowak kië Betuel, e' alà. Ie' dör Rebeca aké. Rebeca dör Jacob ena Esaú e'pa mì.

*Esaú senéwã Mahalat tã*

<sup>6</sup> Esaú wã ijchenewã tö Isaac er buaë ché Jacob a ñies tö ipatkémitö kã kië Padán-aram senukwã eë. Ñies ie' wã ijchenewã tö mik iyé er bua' ché Jacob a etã ichéitö ia:



—Kê be' senukwâ canaánwak ta.

<sup>7</sup> Nies ie' wâ ijchenewa' tó Jacob míá ká kiè Padán-aram wés iyé ena imì tó iché iá es. <sup>8</sup> Es ie' éna iane tó iyé kè kî ikiane tó ie' pa serwâ canaánwakpa ta. <sup>9</sup> E' kuèkî ie' míá alalakò skâ yulòk Ismael dór Abraham alá e' ska'. E' ie' senéwâ Ismael alá busi kiè Mahalat e' ta, e' dór Nebaiot kutà. Es alalakò kî tséwáitò ekòl e' kè dór canaánwak wés imalepa es.

### Jacob kabsué Betel

<sup>10</sup> Eta Jacob e' yéttswâ Beerseba michoé Harán. <sup>11</sup> Ie' michoé wé katuine ikî ta eé ikapere. Ák méwáitò wókir kataie, e' kî ie' kapówa. <sup>12</sup> Eé ie' kabsué. Ie' isué tó klókata batsiè tkér iskî ibata dóká ká jai á. E' kî ie' isué tó Skékòl biyòchòkwakpa shkòke wò'k wa'k. <sup>13</sup> Nies ie' isué tó Jehová dur ie' o'mik ta ichéitò iá: “Ye' dór Jehová. Ye' dór be' talá, Abraham, ena be' yé, Isaac, e' pa Kékòl. Ká i' wé be' tēr, e' meraéyò be' a ena be' aleripa á. <sup>14</sup> Ie' pa alórdaé taié wés ká po es. Ie' pa michoé senuk ká wa'ñe. Ye' er buaé chóraé ká ulitane wakpa á be' ena be' aleripa e' pa batamik. <sup>15</sup> Ye' tso' be' ta. Ye' tó be' kko'neraé ká wa'ñe wé be' mir eé. Be' dórane ye' wá ká i' kî. Kè yò be' we'ikepa. Ttè kòs méyò be' a, e' waweraéyò es.”

<sup>16</sup> Mik Jacob ti'neka, eta ie' ibikeitsé: “Mokî Jehová tso' ká i' kî, e' kè jcher ye' wá.” <sup>17</sup> Taié ie' suane ta ibikeitséitò: “Ká i' dór batse'r taié. ¡Ié dór Skékòl wé! ¡Ié dór ká jai wékkòl!”

<sup>18</sup> Bule es ta Jacob e' kéká bla'mi. Ák méwáitò iwókir kataie, e' kékáitò duékaaitò iwá kkachoié tó ká e' dór batse'r. Kiò téitò ák bata kî iwá kkachoié tó ká e' tso' Skékòl dalóioie. <sup>19</sup> Ká e' kiè mane'wéttswane ie' tó Betel\* Kewe ta ká e' kiè Luz.

<sup>20</sup> Eé ie' tó itté mé Jehová á i' es: “Be' tso' ye' ta ena ye' kko'né be' tó i' ye' mir eta, ena be' tó chké ena datsi' mé ye' a, <sup>21</sup> nies ye' dene buaé ye' yé ska', e' kòs wébò ye' a, e' ta be' klò'weraéyò ye' Kékòlie. <sup>22</sup> Ák duékayò i', e' dór iwá kkachoié tó ié be' dalóierdaé. A Skékòl, i kòs mekebò ye' a, e' mú blatésò dóká dabop ta e' tsá eyòk meraneyò be' a.”

## 29

### Jacob demi Labán ska'

<sup>1</sup> E' ukuòkî ta, Jacob míá pè' serke diwò tskirke e' éká. <sup>2</sup> Eé ie' tó di' tum biule sué et kañika. E' pamik obeja daparke mañayòk enuk eé di' e' yekerakitò e' kuèkî. Di' tum biule kòk kî ákkue berie me'r et. <sup>3</sup> Iyiwak kko'nukwakpa wóblanewatke tó as iyiwak ulitane daparka eé, e' ukuòkî ta ákkue skeuke di' tum biule kòk kî as iyiwak di'yò. Iyiwak di' yane one ta i' ie' pa tó ikkò pabakéwane

ákkue wa. <sup>4</sup> Jacob tó iyiwak kko'nukwakpa á ichaké:

—A yamipa, ¿ká wé wakpa a' dór?

Ie' pa tó iüté:

—Sa' dór Harán wakpa.

<sup>5</sup> Ie' tó iskâ chakéne:

—¿A' wá wém kiè Labán dór Nahor alá, e' suule?

Ie' pa tó iüté:

—Tò, e' suule sa' wá.

<sup>6</sup> Ie' tó ichaké:

—¿Is ie' tso'?

Ie' pa tó iüté:

—Ie' tso' bua'. Isaú. Wî busi datse e' dór ie' alá kiè Raquel e'. Ie' datse iyé iyiwak wéttswé.

<sup>7</sup> Ie' tó iché:

—Ká tso' iá ñiwe. Diwò tso' iá kákkéé iyiwak dapa'wowa ek tsjni. I kuèkî a' kè tó di' mè iá ta iémirak chkòk.

<sup>8</sup> Eré ie' pa tó iüté:

—Kè sa' a e' wamblénuk. Sa' kawòta ipanuk. Mik obeja de sraa, eta sa' tó di' tum kko' ppekeka ta di' meke sa' tó iyiwak á.

<sup>9</sup> Ie' ttòke ie' pa ta, e' dalewa Raquel debitu iyé iyiwak wéttswé, ie' dór iyé iyiwak kko'nukwak e' kuèkî. <sup>10</sup> Jacob tó Raquel sué inau iyiwak wéttswé, e' bet ie' tunemi di' kko' kéká ta iyiwak á di' méitò. <sup>11</sup> E' ukuòkî ta Raquel shke'wéitò wóalatséitò ta ie' iékaie ttsé'ne buaé kuèkî. <sup>12</sup> Ie' tó iché iá: “Ye' dór Rebeca alá ena Labán nauyò.” E' bet ta Raquel tunemi ichòk iyé á.

<sup>13</sup> Mik Labán tó inauyòk tté ttsé, eta bet itunemi inaletsuk. Ipaklò'wéwáitò ta iwóalatséitò ta imíts'er iwá iu a. I kòs tka Jacob ta e' pakéitò inau a. <sup>14-17</sup> Ta Labán tó iché iá: “Mokjé be' dór ye' yami ékka.”

### Jacob senéwâ Lía ena Raquel ta

Labán alá busi ból, ikibi ék kiè Lía, itsirla ék kiè Raquel. Lía wóbla e' kè dór buaala\* eré Raquel dór buaala wa'ñe.

Jacob sené Labán ska' dō si' et. E' ukuòkî ta Labán tó iché iá:

—Be' dór ye' yami, eré be' kè kawòta kanablòk ye' á éme. Ichò ña ¿kòs be' tó ye' ña'wèmi? <sup>18</sup> Jacob wóbatse Raquel wa, e' kuèkî ie' tó Labán iüté:

—Be' tó kawò mé ye' a senukwâ Raquel ta, e' ta e' skéie ye' kanablòke be' a dóká duas kul.

<sup>19</sup> Labán tó iüté:

—Ye' a ta e' dór buaé. Be' je' a ye' tó imémi buaé. Ye' kè éna imak o'ka á. Be' e' tsúat ye' ska'.

<sup>20</sup> Es Jacob kanablè' dóká duas kul Raquel dalérmik. Eré ie' kî Raquel kiane taié, e' kuèkî kawò ekké e' ttséitò ká bərbèr é. <sup>21</sup> Mik duas kul tka, eta Jacob tó iché Labán á:

\* 28:19 Betel: Hebreoie kiè e' wá kiane ché Skékòl wé.

\* 29:14-17 Lía wóbla e' kè dór buaala: Hebreoie tté e' wá kè jcher se' wá bua'iewá. Isalema e' wá kiane ché Lía wóbla dór buaala.

—Kawö yë'yö be' a, e' detke. Kawö mü ye' a senukwa be' alà busi Raquel ta.

<sup>22</sup> Etä Labán tö sulitane a ishkeñé tö a shkô ulabatsè e' kèwö tkô'uk. <sup>23</sup> Erë katuine, e' shua Lía mí ie' wä Jacob a Raquel skéie ta Jacob kapé ie' ta. <sup>24</sup> Labán tö ikanè méso eka kiè Zilpá, e' me'tke Lía a ikanè mésoie. <sup>25</sup> Bule es bla'mi ta Jacob tö isuéwä tö e' dör Lía. Ie' mía Labán ska' ta ichéitö ia:

—¿I' wamblé be' tö ye' ta? Ye' kanéblé be' a Raquel dalèrmik. ¿I'ók be' tö ye' k'itö'wé es?

<sup>26</sup> Labán tö iüté:

—Íe sa' wöblar tö alà busi kibi ese serkewa keweie, e' itóki itsirla êk. <sup>27</sup> Se' kawötä Lía ulabatsöke e' kèwö tkô'uk dökä ká kul. Mik kèwö e' tka, etä ye' tö be' a Raquel meke ñies. Erë be' kawötä skà kanéblökne ye' a duas kul Raquel dalèrmik.

<sup>28</sup> E' dör buaè Jacob a. Mik Lía ulabatsè kèwö e' diwö tka, etä Labán tö Raquel mé Jacob a alakölie ñies. <sup>29</sup> Ñies ie' tö ikanè méso eka kiè Bilhá e' mé Raquel a ikanè mésoie. <sup>30</sup> Es Jacob senéwä Raquel ta ñies. Erë ie' kawötä kanéblökne skà Labán a dökä duas kul, erë ie' éna idalèr kibiie Lía tsata.

*Jacob ala'r*

<sup>31</sup> Jehová tö isué tö Jacob kè k'í Lía kiane bua'ie. E' kuek'í Lía a alà méitö. Erë Raquel kè dötä' aläè. <sup>32</sup> Lía dunekä alà kune ta' ie' tö iché: “Ye' eriarke tajè e' sué Jehová tö, e' kuek'í i'ñe ta ye' dalèrdaè ye' wëm éna.” E' kuek'í ikiè mék'aitö Rubén.†

<sup>33</sup> E' ukuök'í ta' ie' alà skà kune eköl ta' ichéitö: “Ye' wëm kè tkine ye' k'í e' sué Jehová tö e' kuek'í alà skà méitö ye' a.” E' kuek'í ikiè mék'aitö Simeón.‡

<sup>34</sup> Ie' alà skà kékä ta' ichéitö: “Ire' ye' ala'r dekä mañal e' kuek'í ye' wëm éna ye' dalèrmi kibiie.” E' kuek'í ikiè mék'aitö Leví.§

<sup>35</sup> E' ukuök'í ta' ie' alà skà kékä ta' ichéitö: “I'ñe ta' ye' tö Jehová k'ikekeka.” E' kuek'í ikiè mék'aitö Judá.\* Etä ekké è ie' alà dè'.

**30**

*Raquel ala'r*

<sup>1</sup> Mik Raquel tö isué tö ie' kè dō aläè, etä ye' sibineka iël k'í. Ie' tö iché iwëm a:

—Be' kè tö ye' a alà mè, e' ta' ye' duörawä.

<sup>2</sup> Jacob ulunekä ie' k'í ta' ichéitö ia:

—Ye' dör Skèköl kalí, e' ma ye' a alà mermi be' a. Ie' wák tö be' méat kè dō aläè.

<sup>3</sup> Ie' tö iüté:

—Ittsö, ye' kanè méso kiè Bilhá, e' ta' be' senü. Mik ie' alà kékä etä e' dör wës ye' alà es. Es ye' dōraè aläè ie' batamik.

<sup>4</sup> Es ie' tö ikanè méso Bilhá e' mé iwëm a alakölie, e' ta' Jacob sené. <sup>5</sup> Ie' ta' Jacob alà kékä. <sup>6</sup> Raquel tö iché: “Skèköl tö ye' tsatké buaè. Ie' tö ye' ttö tssé ta' alà méitö ye' a wëm.” E' kuek'í ie' tö ikiè mék'ä Dan.\*

<sup>7</sup> E' ukuök'í ta' Bilhá alà skà kune Jacob ta. <sup>8</sup> Raquel tö iché: “Ye' ñippé tajè ye' èl ta' etä ye' e' alékä iki.” E' kuek'í ikiè mék'aitö Neftalí.†

<sup>9</sup> Mik Lía tö isué tö ie' kè dè'ia aläè, etä ie' tö ikanè méso kiè Zilpá, e' mé Jacob a alakölie. <sup>10</sup> Zilpá alà kékä Jacob ta. <sup>11</sup> Lía tö iché: “¿Edaa i' mène ye' al!” E' kuek'í ilà kiè mék'aitö Gad.‡

<sup>12</sup> E' ukuök'í ta' Zilpá alà skà kékä Jacob ta. <sup>13</sup> Lía tö iché: “¿Ye' tssé'r buaè! Ire' alakölpa kos tö icheraè tö be' tssé'r buaè.” E' kuek'í ilà kiè mék'aitö Aser.§

<sup>14</sup> Trigo wö alirke e' késka' ta' Rubén mía kañika. Eè ie' tö kalwö kiè mandrágora\* e' alí kué. E' bite' iwä imi Lía a. Mik Raquel tö kalwö e' sué ta' ichéitö Lía a:

—Be' we'ikèyö, kalwö debitu' be' alà wä be' a, e' kakkümü ña.

<sup>15</sup> Lía tö iüté:

—¿Be' kè a' wè' idir tö be' wä ye' wëm mítser? ¿K'íie ta' be' éna kalwö debitu' ye' alà wä ye' a, e' yaktsa ye' ulä a!

Erë Raquel tö iché ia:

—Kalwö e' skéie i'ñe nañewe ye' wëm patkekeyö be' ta' kapök.

<sup>16</sup> Katuirketke ta' Jacob tso' kanéblök e' debitu' ta' Lía mía inaletsuk ta' ichéitö ia:

—Ye' tö ye' alà mandrágora e' mé Raquel a, e' skéie be' kawötä kapök ye' ta' i'ñe nañewe.

E' nañewe Jacob kapé ie' ta'. <sup>17</sup> Etä Skèköl tö Lía ttö tssé ta' idunekä ta' ilà skà kune Jacob ta. Es ie' alà dekä skèl. <sup>18</sup> Lía tö iché: “Ye' tö ye' kanè méso mé ye' wëm a e' skéie Skèköl ye' a alà i' mé.” E' kuek'í ilà kiè mék'aitö Isacar.†

<sup>19</sup> E' ukuök'í ta' Lía alà skà kékä Jacob ta, e' ta' idekä teröl. <sup>20</sup> Ie' iché: “Skèköl tö ye' a i' buaè kakkmé. Ire' ye' ala'r de teröl. E' kuek'í ye' wëm éna ye' dalèrdaè jaishet.” E' kuek'í ilà kiè mék'aitö Zabulón.‡

<sup>21</sup> Bata ekké ta' ie' alà skà kune alaköl. E' kiè mék'aitö Dina. <sup>22</sup> Erë ñies Raquel k'imé Skèköl tö. Ie' tö ala'r mé ia' wës Raquel tö ikiè ia' es. <sup>23</sup> Ie' dunekä ta' ilà tsä kune kiè mék'aitö José. Ie' tö iché: “Ye' jaène! siarè e'

† 29:32 Rubén: Hebreoie s'kiè e' wä kiane chë ye' eriane e' suéitö. ‡ 29:33 Simeón: Hebreoie s'kiè e' wä kiane chë ittsök. § 29:34 Leví: Hebreoie s'kiè e' wä kiane chë ñiita. \* 29:35 Judá: Hebreoie s'kiè e' wä kiane chë Skèköl k'ikékašö. † 30:6 Dan: Hebreoie s'kiè e' wä kiane chë Skèköl tö s'tsatké buaè. ‡ 30:8 Neftalí: Hebreoie s'kiè e' wä kiane chë ñippök. § 30:11 Gad: Hebreoie s'kiè e' wä kiane chë kağwö buaè mène. § 30:13 Aser: Hebreoie s'kiè e' wä kiane chë ittsé'r buaè. \* 30:14 mandrágora: Ká e' kèwöska ta' ie'pa tö ibikeitseke tö mandrágora wö katé alakölpa tö, e' ta' e' tö ie'pa k'imèmi dök aläè. † 30:18 Isacar: Hebreoie s'kiè e' wä kiane chë ské. ‡ 30:20 Zabulón: Hebreoie s'kiè e' wä kiane chë kakmeule. § 30:24 José: Hebreoie s'kiè e' wä kiane chë ilè k'imü.

yéttsa Skéköl tò ye' k̄i. <sup>24</sup> Jehová mú tò ye' a alà k̄i mè ià eköl." E' kuek̄i ikiè mèk̄aitò José. §

*Jacob iyiwak alòne tajè*

<sup>25</sup> José k̄une e' ukuòk̄i t̄a Jacob tò iché Labán a:

–Ye' òmine ye' k̄aska'. <sup>26</sup> Ye' alakòlpa ena ye' ala'r e'pa mú ye' a as imi'rak ye' t̄a. Ye' kaneblétke be' a ié'pa skéie. Be' w̄a ijcher buaè tò k̄os ye' kaneblé be' a.

<sup>27</sup> Erè Labán tò iüté:

–Be' we'ik̄eyò. Be' e' tsúat̄ia senuk ye' ska'. Ye' tò itók̄é tò Jehová er buaè ché ye' a be' batamik. <sup>28</sup> Ichò ña k̄os be' k̄i inuköl kiane be' kanè skéie, e'ma ekké ye' be' patuèmi.

<sup>29</sup> Ie' tò iüté:

–Be' w̄a ijcher tò ye' kaneblé buaè be' a. Nies ye' tò be' iyiwak kkò'né buaè be' a. <sup>30</sup> Mik ye' dè'bit̄u be' ska', et̄a be' k̄e w̄a ì ku' tajè. I'ñe t̄a be' w̄a iyi tso' tajè. Jehová er buaè ché be' a ye' kuek̄i. Erè ùmik ye' kaneblòmi ye' wák a? Ye' wòché yampae.

<sup>31</sup> Labán tò iskà ché ià:

–¿K̄os be' k̄i ikiane tò be' patuèyò?

Ie' tò iüté:

–Be' k̄é tò ye' patauk. Erè ì chekeyò be' a e' iütò, e' t̄a ye' tò be' iyiwak kkò'nemi.

<sup>32</sup> I'ñe ye' mi'ke be' iyiwak shushtök. Obeja k̄os dalolo ena chibo k̄os wòauale shkitshkit ò ulaula ese klò'wekeyò ye' wák a e' patuoie.

<sup>33</sup> Mik be' de ye' iyiwak sauk t̄a eè be' isuèmi tò obeja dalolo ò chibo wòauale shkitshkit ò ulaula ese è tso', e' t̄a be' w̄a ijcherwami tò ye' dör wém yésyèsè. E' k̄é dör es, e' t̄a be' w̄a ijcherdaè tò ye' tò be' iyiwak ekiblè.

<sup>34</sup> Labán tò iüté:

–Tò, buaè idir. Iùsò wés be' iché es.

<sup>35</sup> Erè e' diwò shà t̄a ie' mià ie' iyiwak shushtök. Ie' chibo k̄os tso' wòauale skékshkèk ò ulaula ese yeluritò. Nies ie' obeja k̄os tso' dalolo ese yeluritò t̄a iméitò ila'r wèpa a kkò'né. <sup>36</sup> E' ukuòk̄i t̄a iyiwak yelur ie' tò e' wèttssè ie' mià shkè dō k̄a mañat Jacob yök̄i. Et̄a Jacob kawõt̄a Labán iyiwak malepa e' kkò'nuk.

<sup>37</sup> Erè Jacob tò kal kua'k̄i kua'k̄i dō mañalka e' ulà aki téé. Elka kiè álamo, skà kiè almendro, skà kiè castaño. Kal ulà kkuòlit takla jchéloritò as iwèr wòauale saruru skékshkèk. <sup>38-39</sup> E' ukuòk̄i t̄a kal ulà e' tulèwajitò wé iyiwak daparke di'yök e' wòshaè. Eè iyiwak wòbatsòke ñi wa. Iyiwak wòbatsòke ñi wa kal ulà ñe' wòshaè e' ala'rla k̄os tskirke wòauale skékshkèk ò shkitshkit ò ulaula. <sup>40</sup> Iyiwak tskirke wòauale e' k̄os dapa'wèitò bānet ie' wák a. Ese wè'ñe k̄os uyèwajitò Labán iyiwak k̄os wòauale ò dalolo ese a as itskir wòauale ò dalolo. Es ie' iyiwak alörke tajè bānet, k̄é ku' Labán icha t̄a ñita. <sup>41</sup> Mik iyiwak bua'buā ese wòbatsòke ñi wa, et̄a ie' tò kal ulà ñe' tulèwā wé iyiwak di' yöke eè. Es ie'pa tò kal ulà wòauale e' sué mik

iwòbatsòke ñi wa e' dalewa. E' ala'rla tskirke k̄os e'pa dör wòauale. <sup>42</sup> Erè mik iyiwak sí po ese datse, et̄a ie' k̄é tò kal ñe' tulèwā. E' kuek̄i iyiwak sí po ese ala'rla k̄os tskirke e' dör Labán icha. Erè wé bua'buā ese dör ie' icha. <sup>43</sup> Es ie' de iyi blú tajè. Obeja ena kanè mèsopa wèpa ena alakòlpa ñies kameio ena burro e' k̄os tso' ie' wā tajè.

## 31

*Jacob tkakshkar Labán yök̄i*

<sup>1</sup> Erè Jacob tò ittssè tò Labán ala'r dulakòlpa tò icheke: “Jacob tò se' yé iyi k̄os e' klò'wéwā, e' wa ie' e' blu'wé tajè.” <sup>2</sup> Nies ie' tò isuè tò Labán k̄é tò ie' suèja buaè wés k̄enet es. <sup>3</sup> Et̄a Jehová tò ie' a iché: “Be' yúne be' yèpa k̄aska' wé be' yamipa tso' eè. Ye' michoè be' t̄a be' kkò'nuk.”

<sup>4</sup> Jacob tò Raquel ena Lía tsuk patké dō wé ie' tso' obeja wèttssè eè <sup>5</sup> t̄a ichéitò ià:

–Ye' w̄a ijchenewa tò a' yé k̄é k̄i ye' kianeia wés k̄enet es. Erè ye' yé e' Kéköl tso' ye' t̄a kekraè ye' k̄imuk. <sup>6</sup> A' w̄a ijcher buaè tò ye' kaneblé a' yé a mok̄i. <sup>7</sup> Erè ie' tò ye' k̄itò'wé kekraè ye' kanè ské wa. Erè Skéköl k̄é wā ie' a ikéwò mène as ì sulu wambloitò ye' k̄i. <sup>8</sup> Mik ie' tò ye' a iché: “Ye' be' patuèke iyiwak wòauale shkitshkit ese wa”, et̄a iyiwak ulitane pane wòauale shkitshkit ème. Mik ie' tò ye' a iché: “Ye' be' patuèke iyiwak wòauale shkékshèk ese wa”, et̄a iyiwak ulitane pane wòauale shkékshèk ème. <sup>9</sup> Es Skéköl tò a' yé iyiwak yè'lur mè ye' a.

<sup>10</sup> “Iyiwak wòbatsòke ñi wa e' k̄éwò ska' t̄a ye' kabsuè tò iyiwak wè'ñe wòbatsòke ilàki wa, e' k̄os wák dör wòauale shkékshèk ena shkitshkit ena ulaula. <sup>11</sup> Kabsuè e' a, Skéköl biyòchòkwak ye' chaké ye' kiè wa t̄a ye' iüté: ‘¿Ì?’ <sup>12</sup> Ie' ye' a iché: ‘Isaú bua'ie t̄a be' isüeraè tò iyiwak wè'ñe wòbatsòke ilàki wa, e' k̄os dör wòauale shkékshèk ena shkitshkit ena ulaula. Ì sulu k̄os wamblé Labán tò be' k̄i, e' suéyò, e' kuek̄i ye' tò iwé es. <sup>13</sup> Ye' dör Kéköl dè'bit̄u be' wörk̄i k̄a kiè Betel eè e'. Eè be' tò ák du'kaat ye' dalòioie. Eè be' tò kawò me' ye' a. Be' e' kòk̄a bet, be' e' yótt̄sa k̄a ì' a. Be' yúne wé be' kune eè.”

<sup>14</sup> Et̄a Raquel ena Lía e'pa tò iüté:

–Kè sa' a sa' yé daliukuò t̄a'ia. <sup>15</sup> Nies sa' sué sa' yé tò sulué wés o'ka es. K̄ie t̄a sa' watò'ttsaitò be' a, sa' ské klò'itò buaè e' ewèwajitò yés. <sup>16</sup> E'ma k̄os Skéköl tò iyi yè'lur sa' yé ulà a, e' dör sa' icha ena sa' ala'r icha. E' kuek̄i ì k̄os ché Skéköl tò be' a e' iütò.

*Jacob e' yéttsa Padán-aram*

<sup>17-18</sup> E' ukuòk̄i t̄a Jacob tò ila'r ena ilakòlpa e'pa k̄é e' tkòk̄ka kameio k̄i. Ie' iyiwak k̄os ena ie' iyi k̄os dè' ie' ulà a Padán-aram ikanè skéie, e' patkémiiitò k̄eweie ie' yök̄i. Et̄a ie' e' yéttsa micho iyé Isaac ska' Canaán. <sup>19</sup> Labán mià k̄a bānet ioveja k̄yòk tòk, e' dalewa

ie' wā iyi diököl tso' dalöie e' kōs bléwami Raquel tō. <sup>20</sup> Jacob kē wā iyēne Labán a tō ie' mi'keā. Es ie' tō ikítē buaē. <sup>21</sup> Ie' tkashkar. Iyi tso' ie' wā e' kōs wēttsē. Bet tā ie' tkattsa di' kiē Éufrates, e' wīshēt. Eē tā ie' micho ká kiē Galaad e' ká kōwō kī.

*Labán tō Jacob tōtiē*

<sup>22</sup> Jacob bakshkar e' kī ká de mañat, eṭa Labán wā ijchenewā tō ie' bakshkar. <sup>23</sup> Eṭa ie' miá itōkī iyamipa tā. Ká de kul tā ie' tō ikuē Galaad ká kōwō kī. <sup>24</sup> E' nañewe Labán kabsuē tō Skéköl de ie' wōrkī tā ichéitō ia: "Ye' ttō ttsó. Kē be' káne ttök Jacob tā kēsik wa."

<sup>25</sup> Ie' de wé Jacob úla tular Galaad ká kōwō kī eē. Eē ie' ena iyamipa, e'pa tō iúla tulékā kapowāie ñies. <sup>26</sup> Ie' tō iché Jacob a:

—ǀ wamblé be' tō i' es? ǀiök be' tō ye' kītō'wé i' es? Be' wā ye' alá busipa bitetser wes ñippökwapka tō s'tsēmi es. <sup>27</sup> ǀ kuēkī be' ye' kītō'wé? Be' tkashkar akir ye' yōkī. Kē e' biyō chōpa ye' a, e' ma kawō buaē tkō'wé ye' tō a' wēttsē tsēne buaē wa, ma'ma kicha tā ese wa ena sabak blar buaē ese wa. <sup>28</sup> Kē be' wā kawō mēne ye' a ena ye' ala'r busipa ena ye' duöchkepa e'pa a as sa' e' chōat ñi a. Be' tō iwamblé wes pē' suluē es. <sup>29</sup> Ye' wā diché tso' a ulitane tsaioie buaē, erē eniā nañewe be' yé e' Kéköl tō ye' a'iche: 'Ye' ttō ttsó. Kē be' káne ttök Jacob tā kēsik wa.' <sup>30</sup> Be' mitkene be' yé u a wes be' kī ikiane tajē es, eṭa ǀlie be' tō ye' wā iyi diököl tso' dalöie e' ekiblé?

<sup>31</sup> Eṭa Jacob tō iūtē:

—Ye' suane be' yōkī. Ye' ibikeits dō' be' ye' yōkī be' ala'r busipa yēttsane er sulu wa. <sup>32</sup> Yi wā be' iyi diököl tso' dalöie e' tso', e' tā as e' wák duōwā. Se' yamipa kōs tso' ǀe se' sauk, e'pa wōrkī be' yú be' iyi yulök. E' kuēbö, e' tā itsúmi.

Erē ie' kē wā ijcher tō Raquel tō iyē iyi diököl e' blé'wabitu.

<sup>33</sup> Eṭa Labán tkawā Jacob úla a ie' iyi yulök. E' ukuōkī tā ie' tkawā Líá úla a. Ñies Líá ena Raquel kanē mēsopa bōl e'pa úla shuyuléitō. Erē kē ie' wā ikūne. Ie' e' yēttsa Líá úla a miá Raquel úla shuyulök. <sup>34</sup> E' dalewa Raquel tō iyē iyi diököl bléwā kameio tsikkuō dikīa tā ie' wák e' tkékā ibata kī. Labán tō ie' úla ulitane shuyulé erē kē iwā ikūne yēs. <sup>35</sup> Raquel tō iché ia:

—A yéwō, kē be' ulunuk ye' kī. Ye' e' kōkāmī be' wōrkī, erē ye' duōke sik dué wā.

Labán tō ie' iyi diököl yulé tajē. Erē kē ie' wā ikūne. <sup>36</sup> E' kuēkī Jacob ulunekā tajē tā ichéitō Labán a:

—ǀ sulu wambléyo be' kī, e' kuēkī be' ye' tōtiē dō ǀe? <sup>37</sup> Be' tō ye' iyi kōs e' shuyulé tā ǀbe', i kuēbö? E' tulō ǀe se' yamipa wōrkī as ie'pa tō ichō tō yi ttē dōr mokīē, be' o ye'.

<sup>38</sup> Ye' kaneblé' be' a duas dōkā dabom böyök (20), e' dalewa tā be' chibo ena be' obeja e' kōs tskirke bua'buāē. Be' iyiwak bobokpa kē tkéulettsā yēs. Ñies kē ye' wā be' obeja pupula ē kataulewa. <sup>39</sup> Namu tō be' iyiwak ttéwā, e' tā kē ye' wā inú dē'bitū. E' nuǀ pato' ye' tō be' a. Ñiwe o nañewe be' iyiwak ekiblélur akblökwapka tō, e' patauk be' tō ye' ka'. <sup>40</sup> Ñiwe ye' tteke kaba tō. Nañewe tā ye' tteke kasē tō. Kē ye' kapowā buaē. <sup>41</sup> Ye' kaneblé' be' a duas dabom böyök (20) eṭa es ye' bak weinuk kēkraē. Ye' kaneblé' duas dabom eyök kī tkēl (14) be' alá busipa dalermik. E' ukuōkī tā ye' skā kaneblé' duas terōl be' iyiwak kuēkī, erē be' bak ye' kītō'uk kēkraē ye' kanē ské wa. <sup>42</sup> Abraham ena ye' yé Isaac e'pa Kéköl kē kúpa ye' tā, e' ma be' ye' patkē'bitū ulā wōchka. Erē Skéköl tō isué tō ye' siarla, e' kaneblé' tajē, e' kuēkī ie' tō be' wōuñē eniā nañewe.

*Jacob ena Labán e'pa kawō mé ñi a*

<sup>43</sup> Eṭa Labán tō Jacob iūtē:

—Be' alalókpa dōr ye' alá busipa. Be' ala'r dōr ye' duöchkepa. Obeja kōs e' dōr ye' icha. ǀ kōs suēbö ǀe, e' dōr ye' icha ē. ǀWes ye' a ye' alá busipa ena ye' duöchkepa e'pa ormi? <sup>44</sup> E' kuēkī be' shkō. Mishka kawō muk ñi a. Es se' wā ijcherdaē tō wes se' kawōtā ñi dalöiök.

<sup>45</sup> Eē tā Jacob tō ák duékā ek ie'pa kawō muke ñi a e' wā kkachioie. <sup>46</sup> Ie' tō iché iyamipa a:

—Ák dapa'ú ǀe.

Ie'pa ulitane tō ák dapa'wé tā ichkérak ák dapaule e' o'mik. <sup>47</sup> Eṭa Labán tō ká e' kiē mékā iwák ttō wa "Jegar Sahadutá". Ñies Jacob tō ikiē mékā iwák ttō wa "Galaad."\* <sup>48</sup> Labán tō iché:

—ǀñe ák ikkē dapa'wéatsō kawō mēsō ñi a e' wā kkachioie.

E' kuēkī Jacob tō ká e' kiē mékā es. <sup>49</sup> Ká e' kine ñies Mispá, wā dōr tō Labán tō iché:

—Mik kē se' ñi suneia, eṭa as Jehová tō se' saú tō wes se' ñi wamblōke. <sup>50</sup> Be' tō ye' ala'r busipa we'iké o be' senéwā alakōlpa kuā'kī tā, e' tā e' sueraē Skéköl tō. Erē kē yi ku' e' sauk chēne ye' a, erē Skéköl wák tō isueraē.

<sup>51</sup> Iṭa Labán tō ikī ché Jacob a:

—Ák dur i' ena ák dapaule i' e' dapa'wéyo se' bōl shushāē. <sup>52</sup> Ák dur i' ena ák dapaule i' e' dōr se' bōl a iwā kkachioie tō ǀe ē se' kawōtā dōkwā. Kē ye' tkōpami be' kker ñippök be' tā. Ñies kē be' tkōpami ye' kker ñippök ye' tā. <sup>53</sup> Abraham dōr be' duöchke ena Nahor dōr ye' duöchke, e'pa Kéköl ekōl ē, as e' tō se' shulō.

Eṭa Jacob tō kawō mé mokīē Labán a Skéköl dalöiekie iyē Isaac tō e' wōrkī. <sup>54</sup> E' ukuōkī tā ie' tō iyiwak jché ña'wé Skéköl

\* **31:47** Galaad: Ká e' kiē dōr bōt erē iwā kiane chē ñies. E' dōr ák dapaule kawō mēne e' wa kkachioie.

dalöioie ee. Ie' tō iyamipa kié chkök. Ie'pa ulitane chké tã ikaperö ee.

<sup>55</sup> Bule es bla'mi tã Labán tō iduöchkepa ena ila'r busipa e'pa wöalattse e' choat ie'pa a. Ie' tō iché iarak: a' mú kawö tkö buaé kékraé. E' ukuöki tã imichone ikáška'.

## 32

### *Jacob tō Esau ma'wé er bua'wé*

<sup>1</sup> E' ukuöki tã Jacob mir è wé imirö ee. Nãla kã Skököl biyöchökwakpa de ie' ska'. <sup>2</sup> Mik e'pa suéitö, etã ichéitö: "I'pa dör Skököl ñippökwapka." E' kuéki ie' tō kã e' kié méka Mahanaim.\*

<sup>3</sup> Etã ie' tō ikanè mésopa patkémi biyö muk ie' èl Esau á tō ie' datse. Ie' èl serke kã kié Seír atë Edom ee. <sup>4</sup> Ie' tō ichémi ikanè mésopa a: "A' tō ichö ye' èl a: 'Be' èl Jacob datse be' wöki be' kanè mésoie. Ie' tō ichébitu be' a: Duas ikké kos ye' sené Labán ska'. <sup>5</sup> Ye' wã baka tso' ena obeja tso' ena burro tso' tajé. Nies kanè mésopa tso' ye' wã tajé wëpa ena alakölpã. Be' dör ye' kékëpa. Be' a tté i' patkémiyö as be' tō ye' kiöwã er bua' wa. "

<sup>6</sup> Mik ibiyö wakpa dene, etã ie' á ichéitö: –Sa' dare be' èl ska', e' wák datse bet be' shké'uk. Etã ie' wã wëpa datse e' tã dökã cien tkéyök (400).

<sup>7</sup> Mik e' ttséitö, etã tajé ie' suane. Tajé ie' kabikeitsékã wës ye' e' ùmi. E' kuéki ie' tō iyamipa ena ikanè mésopa ena iobeja ena ibaka ena ikameio e' kos blabatsélor böl tsjní. <sup>8</sup> Ie' ibikeitsé tō isalema ye' èl ñippömi ek tsjní tã, e' dalewa iëk tsjní tköshkarmirak. E' kuéki ie' iblabatsélor es. <sup>9</sup> E' ukuöki tã ie' tō iché Skököl a: "A' Jehovah, be' dör ye' talã Abraham ena ye' yé Isaac e'pa Kököl. Be' ye' a iyé': 'be' yúne be' yamipa ska', etã ye' tō be' kimeráé as be' kawö tkö buaé.' <sup>10</sup> Be' er bua' ché ye' a. Be' kè wã ye' meätule bërbë è. Warma e' kè dör ye' sjarla e' a. Ye' bakmi di' Jordán wã a kè wã ì tã', e' kèwö ska' tã ye' wã shkö kéli è dami. Eré j'ñe tã ye' wöché tajé iyiwakie ena se'ie blabutsule böl tsjní. <sup>11</sup> Be' we'ikéyö, ye' tsatkó ye' èl Esau e' ulã a. Ye' suane ie' yöki dö' ie' datse ñippök ye' tã; ñies dö' ye' alakölpã ena ye' ala'rla e'pa kos ewëwa ie' tō. <sup>12</sup> Be' tō ye' a iyé'atbak yësyësé tō be' tō ye' kimeráé as ye' kawö tkö buaé. Nies be' tō iyé' tō ye' aleripa alördaé tajé wës dayé tséwö kè shtar'tã' es."

<sup>13</sup> E' nañewe ie' kapére ee. Iyiwak tso' ie' tã ee e' shushtë ie' tō kãkme ie' èl a. <sup>14</sup> Ikké shushtë ie' tō: chibo alaki dökã cien böyök (200); chibo wë'ñe dökã dabom böyök (20); obeja alaki dökã cien böyök (200); obeja wë'ñe dökã dabom böyök (20); <sup>15</sup> kameio alaki pane ñiköl ilã tã, ese

dökã dabom mañayök (30); baka alaki dökã dabom tkéyök (40); baka wë'ñe pupula dökã dabop (10); burro alaki dökã dabom böyök (20); burro wë'ñe dökã dabop (10). <sup>16</sup> E' ukuöki tã iyiwak ekké kos tuléitö ikanè mésopa a iwakmik iwakmik ulawa ulawa tã ichéitö iarak:

–A' yú ye' yöki kéwe. Kã ulat múat iyiwak a ulat ulat as kè iwöiërwã ñita.

<sup>17</sup> Etã kanè méso kéwe patkémiitö e' a ichéitö:

–Mik be' tō ye' èl kué tã ie' tō be' chaké: "¿Yi be' wökir? ¿wé be' micho? ¿sekké dör yi iyiwak?", <sup>18</sup> etã iütö: "A kékëpa, iyiwak i' kos e' kak patké be' kanè méso Jacob tō be' a. Ie' wák datse sa' itöki."

<sup>19</sup> E' sù ikanè mésopa malepa patkémiitö iyiwak wëttsé, e'pa á ichémiitö ñies:

–Mik a' tō Esau kué, etã ichö iã es è. <sup>20</sup> Kè a' éna ichökwa ché iã: "A kékëpa, be' kanè méso Jacob e' datse sa' itöki."

Ie' tō ibikeitsé: "Iyiwak patkémiyö kéweie ye' èl a e' dör as ie' er buarne ye' kã. E' ukuöki tã ye' wák tō isuëmi. Es ie' tō ye' kiëwãmi er bua' wa." <sup>21</sup> Es iyiwak kak patkémiitö kéweie ie' yöki. Eré ie' wák e' tséat kapökrö ie' ùla a.

### *Jacob ñippé kapa wa Skököl tã*

<sup>22-23</sup> E' nañewe Jacob e' kékã. Ie' tō ilakölpã böl ena e'pa kanè mésopa böl ena ila'r dökã dabom eyök kã eköl e'pa kos dapa'wéitö tã iuyöktsa kè di' Jaboc wjshet ñies i' kos tso' iwa ekké uyéttsaitö. <sup>24</sup> Ie' e' tséat eköl. Eë tã wëm de eköl ie' ska' tã ie'pa ñippé kapa wa darèrè dö kã ñine etã. <sup>25</sup> Eré wëm e' tō isué tō kè ie' e' alöpakã Jacob kã. E' kuéki ie' tō itëwã itu' wöiërkewã e' kã tã itu' wöyënettã. <sup>26</sup> Etã wëm ñe' tō iché ie' a:

–Kã ñirkewatke e' kuéki ye' öwa.

Ie' tō iüté:

–Kè be' tō ye' a kawö bua' mè, etã kè ye' tō be' epamine.

<sup>27</sup> Wëm tō ie' a ichaké:

–¿Ima be' kié?

Ie' tō iüté:

–Ye' kié Jacob.

<sup>28</sup> Wëm tō iché iã:

–Kè be' kiéiã Jacob. Be' kirdaé Israel.† Be' ñippé Skököl tã ñies s'ditsö tã etã i' kiane be' kã e' de be' ulã a, e' kuéki be' kié mékayö es.

<sup>29</sup> Jacob tō ie' a ichaké:

–Ichö ñã, ¿ima be' kié?

Ie' iüté:

–¿Iök be' kã ye' kié kiane jchënuk?

Eë tã wëm ñe' er bua' ché ie' a. <sup>30</sup> Ie' tō kã e' kié mékã Penuel.‡ Ie' tō iché: "Eré ye' tō Skököl wák suëwã ye' wöbla wa, eré kè ye' du'wã." E' kuéki kã e' kié mékãitö es.

\* **32:2** Mahanaim: Hebreoie kã kié e' wã kiane ché ñippökwapka böltëpa. † **32:28** Israel: Hebreoie s'kié e' wã kiane ché ñippé Skököl tã. ‡ **32:30** Penuel: Hebreoie kã kié e' wã kiane ché Skököl wö.

<sup>31</sup> Mik ie' tkökemitke Penuel, etä diwö tskine. Erë ie' tu' wöyënettsa, e' kuekji ie' shkõrami shaotshaot. <sup>32</sup> Ie' tēnewa itu'kicha kji, e' kuekji dō ikkē tā ie' aleripa kōs kē tō iyiwak tu'kicha katetā'.

### 33

#### *Esau er buanene Jacob kji*

<sup>1</sup> Mik Jacob tō isuē tō ie' ēl datse ena wēpa tajē datse ie' wā dōka cien tkēyōk (400), etā ie' tō ila'rla blabatsé. E'pa méitō Lía a ena Raquel a ena e'pa kanē mēsopa bōl a. <sup>2</sup> Kanē mēsopa bōl e'pa patkēmiitō keweie ila'r tā. E' ukuōkji tā ie' tō Lía ena ila'r patkēmi. Bata ekkē Raquel ena ilā José e'pa patkēmiitō. <sup>3</sup> Etā ie' wāk tkami kewe ie'pa yōkji. Ie' mirwā ie' ēl wōrkji e' dalewa ie' wōēmi dō iskji es iwōōmir dōka kuktōkicha (7 veces). Es ie' demi tsjinet iēl wōrkji. <sup>4</sup> Etā Esau tunebitu ie' wōkji, tā ipaklō'wēwāitō ikuli' a tā iwōalattsēitō tā jérak ñita. <sup>5</sup> E' ukuōkji tā Esau tō Jacob alakōlpa ena ila'rla e'pa suē tā ichakēitō iā:

—¿Wikkēpa dōr yi?

Jacob tō iūtē:

—A kēkēpa, Skēkōl tō ala'rla wikkēpa mé ye' a.

<sup>6</sup> Etā ilakōlpa kanē mēsopa e'pa de ila'rlaē tā iwō éwarak dō iskji. <sup>7</sup> E' ukuōkji tā Lía de ila'rē tā ie'pa wōēwa iskji ñies. Bata ekkē tā Raquel de ilā José tā etā ie'pa wōēwa dō iskji ñies. <sup>8</sup> E' bet tā Esau tō ie' a ichakē:

—Iyiwak kuéyō ñalā kji ulawa ulawa çlie e' dōr?

Ie' iūtē:

—E' dōr as be' er buarne ye' kji.

<sup>9</sup> Esau tō iūtē:

—Au, kē be' tkinuk ye' kji. Ye' wā itso' tajē. E' tsuāt be' wāk tō.

<sup>10</sup> Erë Jacob tō iskā ché iā:

—Au, kē be' tō ye' ttē watōktsa. Be' er buanene ye' kji e' tā iyi kakmekeyō be' a e' klō'ū. Be' tō ye' kiéwā buaē. Be' suēneyō e' dōr buaē ye' a wēs Skēkōl wāk suēyō es. <sup>11</sup> Tajē Skēkōl tō ye' blu'wé. Kē i' kianeia ye' kji. E' kuekji ye' be' pablē tō iyi kakméyō be' a e' tsj ye' ulā a.

Jacob tō iyiwak watké iā tajē, e' kēkēpa iēl Esau tō iyiwak tsé iulā a. <sup>12</sup> Esau tō iché iā:

—E'ma mishka ñita. Ye' mi'ke kewe.

<sup>13</sup> Erë Jacob tō iūtē:

—A kēkēpa. Be' wā ijcher bua' tō ye' ala'r iā tsitsirla. Nies obeja ena baka tso' alàē e' bikeitséyō dō' ishtrirwā tā iduōlurmi sēkka ká etkēme. <sup>14</sup> Ye' a tā buaē idir tō be' yu'tke kewe, etā wē' ye' do be' itōkji enaēna wēs ye' iyiwak ena ye' ala'rla shkōmir es. Es ye' mir ie'pa tā dō be' serke Seir ee.

<sup>15</sup> Etā Esau tō iūtē:

—E'ma buaē idir. Kawō mú ña ye' kanē mēsopa welepa mukat be' a be' kimoie.

Erë Jacob tō iūtē:

—Au, çjōk be' e' we'ikō ye' wā ekkē chōkle?

<sup>16</sup> E' ē diwō tā Esau míane Seir iyamipa tā.

<sup>17</sup> Erë Jacob míā ká kiē Sucot\* ee. Eē ie' u yué iwák a. Nies iyiwak wé chali'wēitō. E' kuekji ká e' kiē mékaitō Sucot.

<sup>18</sup> Es Jacob manétat Padán-aram dō Canaán. Ie' dettsa buaē. Ie' sené ká kiē Siquem, e' wōsha. <sup>19</sup> Wé ie' tō ká yué e' tuēttsa ie' tō. E' ské dōr inukōl wōmulē dōka cien eyōk (100). Hamor dōr Siquem yé, e' ala'r tō ká watuē Jacob a. <sup>20</sup> Ká e' a Jacob tō ak katatē et ká ie' iyiwak jchoie Skēkōl dalōioie. E' kiē mékaitō El-elohé-israel.†

### 34

#### *Dina dalōsewēwā Siquem tō*

<sup>1</sup> Jacob alā busi Lía tā kiē Dina, ká et tā e' míā ká e' wakpa busipa pakōk. <sup>2</sup> Etā Hamor e' dōr heveowak e' dōr ká e' wōkir, e' aladulakōl kiē Siquem e' tō Dina suē. Etā ie' tō iklō'wēwā tā isenēkā itā kēsik wa. <sup>3</sup> Erë ie' wōbatse Dina wa tajē tā ipablēitō tajē. <sup>4</sup> Etā ie' tō iché iyē a:

—A yéwō, be' yū kēkēpa Jacob ska' ilā busi kiōktsa ye' a as ye' serwā ie' tā.

<sup>5</sup> Ì sulu wamblé Siquem tō Dina tā e' jchenewā Jacob wa. Erë ie' aladulakōlpa tso' kañikā iyiwak kanēuk, e' kuekji ie' kē wā iyēne ie'pa a. <sup>6</sup> E' dalewa Hamor dōr Siquem yé e' míā Jacob ska' ttōk ie' tā.

<sup>7</sup> Mik Jacob aladulakōlpa dene u a, etā ì wamblēne Dina tā e' jchenewā ie'pa wā. E' tō ie'pa uluwēkā tajē. Siquem senēkā Jacob alā busi tā e' dōr iyi suluē Israel aleripa a. E' kē kawō tā' wamblé es. <sup>8</sup> Erë Hamor ttē ie'pa tā, tā ichéitō iā:

—Ye' aladulakōl Siquem, e' wōbatse tajē a' kutā wa. A' we'ikéyō kawō mú ie' a senukwā ie' tā. <sup>9</sup> Es a' yōrmi sa' yamipaie. Es sa' serwami a' alā busipa tā. Nies a' serwami sa' alā busipa tā. <sup>10</sup> A' e' tsuāt seruk sa' shua. A' senū sa' ká a wé a' kji ikiane ee. A' tō iyi wataū ena iyi taū. A' tō ká taū. Kē yi tō a' wōklō'wēpa.

<sup>11</sup> Nies Siquem ttē Dina yé tā ena ikēpa tā, etā ichéitō iā:

—Ye' a' pablē tō ye' ttē klō'ū. Ye' tō a' a iyi kakmeraē kōs a' kji ikiane ekkē. <sup>12</sup> Kōs iske\* dōr e' tsatā a' tō ye' a ikji kiē, e' tā ekkē meraēyō a' a. E' kē kji ye' tkine. Ye' tō iyi meraē tajē a' a, erē kawō mú ye' a senukwā be' kutā tā.

\* **33:17** Sucot: Hebreoie ká kiē e' wā kiane chē u yōule chalichali. † **33:20** El-elohé-Israel: Hebreoie kiē e' wā kiane chē Israel Kēkōl dichē tā' tajē. \* **34:12** iské: E' kēwō ska' tā ie'pa wōblar tō ilā busipa watuēke inuāgi a.

<sup>13</sup> Erë Siquem tö ie'pa kutä dalösewéwä, e' kueki ie'pa tö ie' ena iyë iuté kaché wa. <sup>14</sup> Ie'pa tö iché iä:

—Ké sa' a sa' kutä menuk wépa ké tottola kkuölitla téule tsir, esepa a. E' dör suluë sa' a jaë tajë. <sup>15</sup> Es ë sa' tö a' iütëmi. A' wépa kos tottola kkuölitl téé tsir wës sa' es, e' tã sa' tö a' ttö iütëmi. <sup>16</sup> Es a' serwami sa' alä busipa tã. Nies sa' serwami a' alä busipa tã. Es sa' sermi a' tã ñita wës kã etkë wakpa es. <sup>17</sup> Erë ké a' wã a' tottola kkuölitla téne wës sa' tö iché a' a es, e' tã sa' míyalne kã i' kã. Sa' kutä mítserne sa' wã.

<sup>18</sup> Eta Hamor ena ilä Siquem e'pa a imène buaë. <sup>19</sup> Tajë duladula e' kã Jacob alä busi kiane, e' kueki bet iwëitö wës ie'pa tö iché es. Ie' dalö tajë iyë ska' imalepa tsatã. <sup>20</sup> E' kueki ie' mia iyë tã kã kköiëule e' wékkö a. Eë kã e' wakpa ñi dapa'uke tété shuloie. Eë Siquem ena iyë mia ttök ikã wakpa tã. Tã ichéitö irak:

<sup>21</sup> —Pë' debitu ië er buaë se' tã. Ie'pa de senuk se' tã, iyi tãuk ena iyi watauk se' shua. Kã tso' wë' ie'pa a. Se' serwami ie'pa alä busipa tã. Nies ie'pa serwami se' ichapa tã. <sup>22</sup> Eta as se' dö kã etkë wakpaie ie'pa tã ñita, eta s'kawötã iuk wës ie'pa tö iché es. Ie'pa tö iché tö se' wépa ulitane kawötã itöttola kkuölitla tök tsir wës ie'pa wöblane iuk es. <sup>23</sup> Eta kos ie'pa wã iyiwak tso', i tso' e' döraë se' icha. Sö ichö ie'pa a tö. Eta es ie'pa e' tsukeat senuk se' shua.

<sup>24</sup> Eta wépa tso' kã e' kã kibinetke, e'pa ulitane a buaë idir. Eta ie'pa kos tottola kkuölitla télor tsir.

<sup>25</sup> E' ukuöki bökkj es tã mik e' dalërkeia tajë ké wa ie'pa e' tsatkër, eta Jacob aladulakölpã dö Dina aképa kië Simeón ena Levi, e'pa míyal Siquem, eta kã e' wakpa wépa télurdakitö seraã tabè wa. <sup>26</sup> Es ie'pa tö Hamor ena ilä Siquem e'pa ttéwã tabè wa. Ie'pa tö ikutã yétsã Siquem u a tã imíyal. <sup>27</sup> Kã e' wépa télur seraã. E' ukuöki tã Jacob aladulakölpã malepa debitu tã iyi kos tso' kã e' kã e' tsémirakitö. <sup>28</sup> Es ie'pa wã obeja ena baka ena burro ena iyi kos tso' kã kköiëulewã e' a, nies i kos tso' kañika e' mítser. <sup>29</sup> Nies iyi tso' kos u a, e' mítser ie'pa wã seraã. Ala'rla kos ena alakölpã kos e'pa klö'wélur ie'pa tö ie'pa kané mésopaie. <sup>30</sup> Eta Jacob tö iché Simeón ena Levi a:

—A' tö se' tsaié. A' kueki kã i' wakpa e' dör canaanwak ena fereseowak e'pa ulurdaë se' kã tajë. Ie'pa ñi dapa'urãë ñippök se' tã. Kë se' wã ñippökwakpa tã tajë, e' kueki ie'pa e' alörakã se' kã. Ye' ena ye' yamipa kos ttelurdaë ie'pa tö.

<sup>31</sup> Erë ie'pa tö iütë:

—¿Ima ie'pa erbiöl tö ie'pa wã sa' kutä mi'mítser wës alakölpã sulusi es?

## 35

### Skököl er buaë ché Jacob a Betel

<sup>1</sup> E' ukuöki tã Skököl tö iché Jacob a: “Be' yú senuk Betel. Eë ak katató ka'ie ye' döer be' Këköl e' kkeyë' be' a mik be' bakshkar Esaú yöki eta, e' dalöioie.” <sup>2</sup> Eta Jacob tö iché iyamipa a ena kos itso' rak ie' tã, e'pa a ñies:

—Iyi diököl tso' a' wã dalöie, ese kos tulöttsã bet. A' kuö tã a' datsi' mane'ulor. <sup>3</sup> Mishkarak bet Betel. Eë ye' tö ak katateke et ka'ie iyiwak jchoie Skököl dalöioie. Ie' tö ye' kime' mik ye' bak erianuk tajë eta. Ie' tö ye' kköna' kos ye' kãka're ekkë.

<sup>4</sup> E' bet tã iyi diököl tso' ie'pa wã dalöie ese tulérakitö Jacob a. Nies ikukuöio kos, e' tulérakitö Jacob a. E' kos wötéluritö kós klö ter tsinet Siquem e' dikã. <sup>5</sup> Eta ie'pa e' yélur. Erë kã tso' tsinet tsinet e' wakpa kos suawéka tajë Skököl tö, e' kueki e'pa ké wa ie'pa töiëne.

<sup>6</sup> Eta Jacob ena iyamipa kos demi kã kië Luz atë Canaán. Kã e' kië ñies Betel. <sup>7</sup> Eta eë ak katatëitö et ka'ie iyiwak jchoie Skököl dalöioie. Eë Skököl e' kkeyë' ie' a mik ie' bakshkar iël yöki eta. E' kueki ak katatëitö e' kië mékãitö El-Betel.\* <sup>8</sup> E' ukuöki tã kã e' a Rebeca kkö'nukwak bak kië Débora, e' blënewã tã inü bléwarakitö kós klö ter eë e' dikã. Kal e' ter kã kië Betel e' o'mik. Jacob tö kã e' kië méka “Ië kéli”.

<sup>9-10</sup> Mik Jacob biteane Padán-aram dene Canaán, eta Skököl e' kkachéne etökichane ie' a. Eta Skököl er buaë ché ie' a i' es:

“Be' kië Jacob, erë be' ké kiëia es. I'ñe tã be' kië mékayö Israel.”

Skököl tö ie' kië mane'wétsã, <sup>11</sup> e' ukuöki tã ichéitö iä:

“Ye' döer Skököl Diché Tã Iyi Ulitane Tsatã e'; Be' ala'r ena be' aleripa alónú tajë. Be' aleripa alördaë tajë, e'pa döraë kã tajë wakpaie. Nies ie'pa shua blu'pa döraë. <sup>12</sup> Kã me'bakyö Abraham a ena Isaac a, e' méyö be' a ñies be' aleripa a.”

<sup>13</sup> Mik Skököl tté one Jacob tã, tã imia. <sup>14</sup> Eë Jacob ak duéka ek së sù. Ak e' kã ie' tö kiö ena vino té iwa kkachioe tö e' döer batse'r Skököl a. <sup>15</sup> Kã e' kië mékãitö Betel.

### Raquel blënewã

<sup>16</sup> E' ukuöki tã ie'pa e' yélur Betel míyal Efrata. Kam ie'pa dömi Efrata e' tso'ia elkeë, eta Raquel alä kirketke e' diwö de. E' tö Raquel kiri'wéwã tajë erë ké iwa kur yës. <sup>17</sup> Ie' tso'tke suluë ichök eta ikkö'nukwak dur

\* 35:7 El-Betel: Hebreoie kië e' wã kiane ché Skököl tso' Betel.

ee, e' tò iché iá: “Kě be' suanuk. Be' alá kune. E' wák dör wēm.”<sup>18</sup> Etá Raquel wake' duökewatke, isiwa' bata tkókeia, e' shüa ilá kiè mēkaatitō Ben-oni.<sup>†</sup> Erē ilá yě tò ikie mane'wē Benjamín.<sup>‡</sup>

<sup>19</sup> Es Raquel blēnewa. Inú wōtēwarakitō Efrata ñalé kī. I'ñe ta ká e' kiè Belén.<sup>20</sup> Etá wē Raquel nu blēwaitō e' kī ák duéka ek Jacob tò iwá kkachoié. I'ñe ta ák e' tkēria Raquel pō kkachoié.

<sup>21</sup> Etá Israel<sup>§</sup> michoē wē imi'kerō ee. Ie' e' tséat senuk ká kiè Migdal Éder e' wishke.<sup>22</sup> Ie' tò ká yué senoie ee, e' ukuōkī ta ilá Rubén senéka ie' alaköl kiè Bilhá e' ta, e' jchēnewa ie' wa.

#### Jacob aladulakōlpa

Jacob aladulakōlpa dōka dabom eyök kī bōl (12).<sup>23</sup> Ie' ala'r Líá ta e'pa dör Rubén, e' dör ikibi, ñies Simeón, Leví, Judá, Isacar ena Zabulón.<sup>24</sup> Ila'r Raquel ta e'pa dör José ena Benjamín.<sup>25</sup> Raquel kané méso kiè Bilhá, e' ta ila'r dör Dan ena Neftalí.<sup>26</sup> Líá kané méso kiè Zilpá, e' ta ila'r dör Gad ena Aser. E'pa dör Jacob aladulakōlpa kune Padán-aram e'pa.

#### Isaac blēnewa

<sup>27</sup> Jacob minea iyē Isaac sauk ká kiè Mammé ee. Ká e' kiè ñies Arbá ò Hebrón. Ká e' a Abraham ena Isaac bak senuk.<sup>28-29</sup> Isaac kēnewatke. Mik ie' kī duas tso' cien eyök kī dabom paryök (180), etá iblēnewa miá idēütōpa itōkī. Ila'r Esau ena Jacob e'pa tò inú wōtēwa.

## 36

#### Esau aleripa

<sup>1</sup> I'pa dör Esau aleripa. Esau kiè ñies Edom. <sup>2</sup> Esau senéwa canaánwak alakōlpa mañal ta. Eköl dör Adá, e' dör hititawak kiè Elón, e' alá busi. Iéköl kiè Oholibamá, e' dör Aná alá busi ena heveowak eköl kiè Sibón, e' talá. <sup>3</sup> Bata ék kiè Basemat, e' dör Ismael alá busi ena Nebaiot kutá. <sup>4</sup> Adá alá tsá kune e' kiè Elifaz. Basemat alá kiè Reuel. <sup>5</sup> Oholibamá ala'r kune mañal. E'pa kiè dör Jeús, Jaalam ena Coré. E'pa dör Esau ala'r kune mik ie' bak senuk Canaán etá e'pa.

<sup>6</sup> Esau wa ilakōlpa ena ila'r wēpa ena ila'r busipa ena imalepa kos sērke ie' ska' e'pa kos míyal ie' wa e' ta senuk ká bānet iēl Jacob e' yōkī. Ñies ie' wa iyiwak kos ena i kos dē' ie' ulá a Canaán, e' mitsēr sēraa. <sup>7</sup> Esau ena Jacob wa íyi tso' tajē. E' kuekī ie'pa kē chē'kaia nita. Kē i ku'ia wē' ie'pa bōl iyiwak a katē. <sup>8</sup> E' kuekī Esau (e' kiè ñies Edom) e' miá senuk Seír kēbata a.

<sup>9</sup> I' dör Esau aleripa bak senuk Seír ké kōwō kī, e'pa kiè edomwak. <sup>10</sup> I'pa dör Esau ala'r: Elifaz e' dör Esau alá Adá ta, ena Reuel e' dör Esau alá Basemat ta.

<sup>11</sup> Elifaz ala'r dör Temán, Omar, Sefó, Gatam ena Quenaz. <sup>12</sup> Elifaz alaköl ská bak eköl kiè Timná, e' ta ilá ta' eköl kiè Amalec. E'pa dör Esau alaköl kiè Adá e' uyōkpa.

<sup>13</sup> Reuel ala'r dör Náhat, Zérah, Samá ena Mizá. E'pa dör Esau alaköl kiè Basemat e' uyōkpa.

<sup>14</sup> Esau alaköl kiè Oholibamá, e' dör Aná alá busi ena Sibón talá. Ie' ala'r dör Jeús, Jaalam ena Coré.

<sup>15</sup> I'pa dör Esau aleripa e'pa ditséwōpa wōkirpa:

Esau alá kibi kiè Elifaz e' aleripa dör: Temán, Omar, Sefó, Quenaz, <sup>16</sup> Coré, Gatam ena Amalec. E'pa dör Elifaz aleripa e'pa ditséwōpa wōkirpa bak senuk Edom. Ie'pa dör Adá uyōkpa.

<sup>17</sup> Esau alá kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwōpa wōkirpa bak senuk Edom. Ie'pa dör Basemat uyōkpa.

<sup>18</sup> Esau alaköl kiè Oholibamá e' dör Aná alá busi. Ie' ala'r dör: Jeús, Jaalam ena Coré. E'pa dör Oholibamá ditséwōpa wōkirpa.

<sup>19</sup> E'pa kos dör Esau (kiè ñies Edom) e' aleripa. E'pa dör ie'pa ditséwōpa wōkirpa.

<sup>20</sup> I'pa dör wēm dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, <sup>21</sup> Disón, Éser, ena Disán. E'pa dör Seír ala'r wēpa. Ie'pa dör horeowak wōkirpa bak senuk Edom. <sup>22</sup> Lotán ala'r dör Horí ena Hemam. Lotán kutá dör Timná. <sup>23</sup> Sobal ala'r dör Alván, Manáhat, Ebal, Sefó ena Onam. <sup>24</sup> Sibón ala'r dör Aiá ena Aná. Ká e' ta Aná tso' iyē kiè Sibón e' burrokkō'nuk e' dalewa ie' tò di' tum kué tajē ká sí po e' a. <sup>25</sup> Aná alá wēm kiè Disón. Ie' alá busi kiè Oholibamá. <sup>26</sup> Disón ala'r dör Hemdán, Esbán, Itrán ena Querán. <sup>27</sup> Éser ala'r dör Bilhán, Zaaván, ena Acán. <sup>28</sup> Disán ala'r dör Us ena Arán.

<sup>29</sup> Horeowak wōkirpa dör Lotán, Sobal, Sibón, Aná, <sup>30</sup> Disón, Éser, ena Disán. E'pa dör horeowak wōkirpa iyamipa wa. Ie'pa bak senuk Seír.

<sup>31</sup> I'pa dör Edom blu'pa, kām Israel aleripa blúpa dö e' yōkī. <sup>32</sup> Bela, e' dör Beor alá, e' de Edom wakpa blúie. Ie' ká kiè Dinhaba. <sup>33</sup> Bela blēnewa e' skéie Jobab yöne blu'ie. Ie' dör Zérah alá. Ie' datse Bosrá. <sup>34</sup> Jobab blēnewa e' skéie Husam datse Temán e' yöne blu'ie. <sup>35</sup> Husam blēnewa e' skéie Hadad dör Bedad alá e' yöne blu'ie. Bedad e' ali'ka Madián wakpa kī ká kiè Moab ee. Husam

<sup>†</sup> 35:18 Benoni: Hebreoie s'kié e' wá kiane chē ye' eriane e' alé. <sup>‡</sup> 35:18 Benjamín: Hebreoie s'kié e' wá kiane chē ye' ulá bua'kka e' alé. <sup>§</sup> 35:21 Israel: E' dör Jacob kiè pa'alí me'ka Skéköl tò ikí e'.



ká kiè Avit. <sup>36</sup> Hadad blènewa, e' skéie Samlá yöne blu'ie. Ie' ká kiè Masrecá. <sup>37</sup> Samlá blènewa, e' skéie Saúl yöne blu'ie. Ie' ká dör Rehobot. Ká e' atë di' kkõ a tsinet. <sup>38</sup> Saúl blènewa, e' skéie Baal-hanán yöne blu'ie. Ie' dör Achbor alá. <sup>39</sup> Baal-hanán blènewa, e' skéie Hadad yöne blu'ie. Ie' ká kiè Pau. Ie' alakõl kiè Mehetabel, e' dör Matred alá busi ena Mezaab talá.

<sup>40</sup> I'pa dör Esaú aleripa kiè iyamipa wa ñies iká wa: Timná, Alvá, Jetet, <sup>41</sup> Oholibamá, Elá, Pinón, <sup>42</sup> Quenaz, Temán, Mibsar, <sup>43</sup> Magdiel ena Iram. Esaú kiè ñies Edom. E'pa kos dör Edom ká blu'pa wé isenerak iká ki eë.

### 37

<sup>1</sup> Jacob e' tséat senuk Canaán wé iyè bak senuk eë. <sup>2</sup> Ttè i' dör Jacob aleripa e' pakè.

*José ena ièlpa*

Jacob alá kiè José, mik e' kî duas tso' dabom eyök kî kul (17) etá ie' tso' iyè obeja kkõ'nuk ièlpa ta. Ièlpa dör iyè alakõlpa kiè Bilhá ena Zilpá, e'pa ala'r. Etá i' sulu kos wambleke ièlpa tò ie' wöwa, ese kcateke saraq ie' tò iyè a.

<sup>3</sup> Ie' kune mik iyè Jacob kënewatke etá. E' kuèkî Jacob kî ie' kiar ila'r malepa tsata. E' kuèkî Jacob tò datsi' yuè ie' a kîtkèule buaë. <sup>4</sup> Erè mik ie' èlpa wa ijchënewa tò ie'pa yè kî ie' kiar ie'pa ulitane tsata etá ie'pa éna iar suluè, kè ishke'weta'.

<sup>5</sup> Ká et ta ie' kabsuè e' pakéitò ièlpa a. E' kuèkî ie'pa éna suluè ie' kî ane. <sup>6</sup> Ie' tò ikabsuè paké ièlpa a i' es:

–Ye' ttò ttsó. Ye' kabsuè e' pakekeyò a' a. <sup>7</sup> Ye' kabsuè tò se' ulitane tso' kanèblók kañika dali shua. Se' tso' dali wöshtök e' tsatésò ettsak ettsak. Ye' tò isuè tò bet ye' icha e' duéka bua' shkë'ka. A' ichapa e' dapa'wé ye' icha pamik shkit ta e'pa tò ye' icha dalóie.

<sup>8</sup> Etá ièlpa tò iüté:

–¿Be' éna iwá chak tò be' dóraè sa' blúie? ¿Sa' serdaè be' dikjá?

Ie' kabsuè ena wës ipakéitò ie'pa a, e' kuèkî ie'pa éna suluè ie' kî ane.

<sup>9</sup> E' ukuökî ta ie' ská kabsuène, e' pakéitò ièlpa a ñies. Ie' tò iché ie'pa a:

–Ye' kabsuè tò diwò ena si'wò ñies bëkwò doka dabom eyök kî et (11), e' kos tò ye' dalóieke.

<sup>10</sup> Mik ie' tò ikabsuè e' paké iyè a ena ièlpa a, etá iyè tò iuñé:

–¿I' kiane chë be' kî kabsuè e' wa? Ttsésua be' mi ena be' èlpa ena ye', sa' kawõtá be' dalóio.

<sup>11</sup> Ie' èlpa éna iar suluè. Erè iyè tò ibikeitsé tajé: ¿I' kébisuè José tò es?

*José watuéttsa ièlpa tò*

<sup>12</sup> Ká et ta José èlpa míyal dõ Siquem iyè iyiwak wéttse káko yulök. <sup>13</sup> Etá Jacob tò iché José a:

–Be' èlpa tso' tsinet Siquem iyiwak kkõ'nuk. Ye' kî ikiane tò be' yú isaq.

Etá José tò iüté:

–E' buaë. Ye' mí isaqkrak.

<sup>14</sup> Jacob tò iüté:

–Èkèkè. Be' yú be' èlpa saq, is itso'rak, is iyiwak tso' ñies. E' wa be' wá ye' a itté dômine.

Etá Jacob tò ie' patkémi. Ie' e' yéttsa Hebrón ké kkuè kî míá Siquem. <sup>15</sup> Eë ie' shkõdur chõ kañika, e' kuéwá wëm ekól tò ta e' tò ie' a ichaké:

–¿I' yulök be' tso'?

<sup>16</sup> Ie' tò iüté:

–Ye' tso' ye' èlpa yulök. ¿Be' kè wá ijcher wé ie'pa tso' ye' yé iyiwak kkõ'nuk?

<sup>17</sup> Wëm e' tò iüté:

Ie'pa kè ku'ia ié. Ie'pa mineyalbak. Ye' ittò ttsérak tò ie'pa mí'keá Dotán.

Etá ie' míá ièlpa yulök. Etá ie'pa kuéitò Dotán. <sup>18</sup> Etá ièlpa tò ie' sué kamíè tò ie' datse. Kam idõ e' dalewa ièlpa kawõ mérak ñi a ie' ttowa. <sup>19</sup> Ichérakitò ñi a:

–Kabsaukwak datse. <sup>20</sup> Ittöwasò. Inú batrõmisò kauk kè a di' ta' ese a. Etá ichõsò tò iyiwak sulusi ie' katéwa. Es ie' kabsuè e' kè wá tkõpa yès.

<sup>21</sup> Mik Rubén tò ttè e' ttsé, etá ie' éna ièl tsatkak. E' kuèkî ie' tò iché ièlpa a:

–Kè ittarwá. <sup>22</sup> Kè a' tò ie' pè tkõ'uk. A' tò iõmi kauk i' a. Kè e' ulá mukká iki.

Rubén éna José tsatkak tsèmine iyè a, e' kuèkî ie' tò iché ie'pa a es. <sup>23</sup> Erè mik José debitu ièlpa ska, etá ie'pa tò ie' datsi' kîtkèule bua', e' yéttsa. <sup>24</sup> Etá ikló'wéwarakitò batréemi, kauk tso' di' blóie, erè kè iwá ta' ese a.

<sup>25</sup> E'ukuökî ta ie'pa e' tuléwá chkök, e' shua ie'pa isuè tò tajé Ismael aleripa datse. E'pa datse Galaad michoè Egipto dali dami iwá e' watauk. Kameio kî ie'pa wa kiõ alar buaë e' dami. Ñies kiõ masmas kiè bálsamo ena mirra e' dami iwá. <sup>26</sup> Etá Judá tò iché ièlpa a:

–Se' èl ttéwasò ta' e' tté blésò, e' ta' e' wa ¿i buaë dômi se' ulá a? <sup>27</sup> Ye' iché buaë idir tò iwatauttsasò Ismael aleripa a. Ie' dör se' èl se' yami ékka, e' kuèkî kè sò ittöwá.

E' mène buaë ièlpa a. <sup>28</sup> Mik íyi wataukwakpa datse Madián e'pa tkami eë, etá ie'pa tò ièl yéttsa kauk a watuéttsarakitò Ismael aleripa a inukól wõmulé doka dabom böyök (20) ské ekké. Es Ismael aleripa wa José minetser Egipto.

<sup>29</sup> Mik Rubén debitu kauk kkõ kî, etá kè ièl ku'ia. E' tò ie' eriawé tajé. E' kuèkî idatsi' jchélor. <sup>30</sup> E' ukuökî ta, ie' míá ièlpa ska' ta ichéitò ie'pa a:

—Se' èl tsirla kē ku'. ¿Wes ye' e' ùmi?

<sup>31</sup> Età ie'pa tò chibola ttéwa ta e' pé wa José datsi' patiékarakitò. <sup>32</sup> Età datsi' e' patkémii tò iyé a ta ichémi iá: "Datsi' i' kué sa' tò. Ì saú bua'ie. ¿Kē idör be' alà datsi'?"

<sup>33</sup> Età Jacob tò iché: "¡TÖ, i' dör ye' alà datsi'! Iyiwak sulusi wésele tò ye' alà ttéwa katéwa." <sup>34</sup> Età Jacob tò idatsi' jchéloyar ériane kuéki. Età datsi' tso' iéno mik schönéwa ese iékaitò. Età ilà blénéwa e' ériaitséitò ká tajé. <sup>35</sup> Età ila'r, wépa ena alakölpá, e'pa kos de ie' pablök, eré kē ie' pablér: yés. Ikj juke tajé shuté ilà dalérmik. Ie' tò iché: "Ye' schö ériaitséraé dö mik ye' duowa ekké, es ye' dóraé ie' ska'."

<sup>36</sup> Età madiánwakpa demi Egipto. Eé ie'pa tò José watuéttsá wém kié Potifar e' a. Wém e' kaneblöke Egipto blú a. Potifar dör Egipto blú tsatökökwa e' wökir.

### 38

#### Judá ena Tamar

<sup>1</sup> E' kéwö ská' ta Judá e' batséttsá iélpa yöki mía senuk wém kié Hirá e' ska'. E' serke ká kié Adulam. <sup>2</sup> Eé Judá tò alaköl sué eköl. E' dör wém canaanwak kié Súah e' alà busi, e' ta ie' senéwa. <sup>3</sup> E' ukuökj ta idunéka ta ilà kune wém, e' kié mékaitò Er. <sup>4</sup> E' ukuökj ilà ská kune wém, e' kié mékaitò Onán. <sup>5</sup> E' ukuökj ta ilà ská kune wém, e' kié mékaitò Selá. E' kune mik ie' serke ká kié Quezib, eé eta.

<sup>6</sup> Judá tò alaköl yulé senowaie ilà kibi kié Er e' ta. E' kié Tamar. <sup>7</sup> Età Er serke sulué shuté Jehová wöa. E' kuéki Jehová tò ittéwa. <sup>8</sup> Età Judá tò iché Onán a:

—Be' káwötá senukwá be' dabököt ta alà kōká be' èl blénéwa e' a wes se' wakpa a imenaṭbak es.

<sup>9</sup> Onán éna iane tò ie' alà kurmi kos ischö ta, e' kē dör ie' wák ala'r. E' kuéki mik ie' serke ischö ta, etá bet ta ie' e' skéyú bánét as kē alà kōká ischö ta. Es ie' kē wá iél a iditséwö mēnaṭ. <sup>10</sup> E' dör sulusi ichö Jehová a, e' kuéki ie' tò Onán ttéwa ñies. <sup>11</sup> Età Judá tò iché iyák Tamar a:

—Be' yú senuk be' yé u a wes schö es dö mik ye' alà Selá talane eta.

Eré Judá tso' Tamar kītō'uk. Ie' ibikeitsé tò Selá duowami wes iélpa duolur es. Es Tamar mineaṭ senuk iyé ska'.

<sup>12</sup> Ká de tajé ta Judá alaköl dör Súah alà busi e' blénéwa. Ie' schö kéwö tka ta ie' mía ká kié Timnat, wé itso'rak ie' obeja köyök tōk eé. Ie' yami kié Hirá e' dör adulamwak, e' mí ie' ta ie' wapiöuk. <sup>13-14</sup> Tamar tò isué tò Judá alà kié Selá, e' detke kēchke eré kē ie' senéwa ie' ta. E' wa ie' wá ijchenéwa tò Judá tò ie' kītō'wé Selá wa. E' kuéki mik ie' wá ijchenéwa tò inuáki mía Timnat iobeja köyök tōk, etá ie' e' paiöke schöie e'

mane'wéttsaneitò. Iwö pabakéwa datsi'tak wa as kē yi a iwérwa. Etá imía ká kié Enaim. Eé ie' e' tkésér Timnat ñalé kkō a.

<sup>15</sup> Mik Judá tò Tamar sué ta ie' ibikeitsé tò e' dör alaköl sulusi iwö pabakéwa e' kuéki. <sup>16</sup> Etá ie' mía iwökj. Kē ie' wá ierj ta' tò e' dör ie' yák. Etá ichéitò iá:

—¿Se' ser ñita?

Etá Tamar tò iché iá:

—¿Ì meke be' tò ye' a iskéie?

<sup>17</sup> Etá Judá tò iüté:

—Ye' chibo patköke be' a etò iskéie.

Ie' iüté:

—Èkèkè. Eré be' íyi tsá múaṭ ye' a dö mik be' tò chibola patké eta.

<sup>18</sup> Judá tò ie' a ichaké:

—¿Ì kiane be' kī tò ye' iméat be' a?

Etá ie' tò iüté:

—Be' tabechka tso' e' kié shtoié, e' múaṭ ye' a ikichaé. Ñies be' shko kéli múaṭ ye' a.

Judá tò imé iá ta ie' sené ie' ta. Etá alaköl dunéka. <sup>19</sup> E' ukuökj ta Tamar mía iu a etá idatsi'tak wa iwö pabakéwa e' yéttsaitò. Etá ie' e' paiéne schö es.

<sup>20</sup> E' ukuökj ta Judá tò chibo patkémí iyami adulamwak e' ulá a as ie' tò imü alaköl a as alaköl e' tò ie' íyi méat alaköl ulá a e' mubitüne. Eré ie' yami kē wá alaköl e' kuneia. <sup>21</sup> Etá ie' tò ká e' wakpa a ichaké:

—Alaköl sulusi e' dör enaimwak atéat ñala ska', ¿wé e'?

Etá ie'pa tò iüté:

—Íé alakölpá sulusi kē dé'.

<sup>22</sup> Etá ie' biteane Judá wörki ta ichéitò iá:

—Ké ye' wá alaköl kune. Ye' tò ichaké ká e' wakpa a. Ie'pa tò ye' a iché: "Íé alakölpá sulusi kē dé'!"

<sup>23</sup> Judá tò iüté:

—As ye' íyi tsúatitò es kē yi tò sa' jaéwépa. Kē ye' iane iwiie. Ye' tò ichibo patkémí be' ulá a, eré kē be' wá alaköl kune.

<sup>24</sup> Etá si' mañat ulatök ta Judá kī biyö de tò:

—Be' yák Tamar e' sené' wépa kuá'kī ta. Ie' dunéka.

Etá Judá tò iché aneule:

—¡jyöttsá ta iña'úwa!

<sup>25</sup> Eré mik ie' yeketttsá ie'pa tò ttéwa, e' wöshá ie' tté mémi inuáki a: "Yi íyi a'tser ye' ulá a i', e' wák tò ye' duéka. Be' isaú. ¿Yi kié shto tabechka i' ikichaé ena shko kéli i'? ¿e' sşule be' wá?" <sup>26</sup> Mik Judá tò ie' íyi suéwá iyák ulá a ta ichéitò: "Alaköl i' dör buaé. Kē ye' wá iulabatse ye' alà Selá ta. Ye' e' wamblé sulu ie' kī." Etá kē ie' seneia ie' ta.

<sup>27</sup> Tamar alà kune klö wák dör wépa. <sup>28</sup> Itsörke e' wöshá, etá eköl ulá dettsá kewe. Etá ie' kkō'nukwak tò datsi'kicha batsé e' muéwá ilà ulá mik ta ichéitò: "T' èk kune kewe." <sup>29</sup> Eré e' wösháé bet ta alà ulá

\* 38:29 Fares: Hebreoie s'kié e' wá kiane ché tkabitü kéweie.

tiéwáne etókichane etá iék kúne kéweie. Etá ikkò'nukwak tò iché iá: “¿Wes be' kúne kéweie?” E' kuéki ikié mékàitò Fares.\*<sup>30</sup> E' ukuókí tã, iulà á datsi'kicha tkér batsé e' kúne, e' kié mékàitò Zérah.

### 39

*José tkashkar Potifar alaköl ulà á*

<sup>1</sup> José minetsérak iwà Egipto. Ká e' kí wém tso' eköl kié Potifar, e' tò ie' tuéttsa Ismael aleripa á. Wém e' kanèblòke Egipto blú á. Ie' dór Egipto blú tsatkòkwakpa wókir. <sup>2</sup> Eré Jehová tso' José tã, e' kuéki i kòs kanewékeitò e' dòkettšá buaé iwókir egiptowak e' ska'. <sup>3</sup> Iwókir tò isué tò Jehová tso' José tã, e' kuéki i kòs kanewékeitò e' dòkettšá buaé. <sup>4</sup> E' kuéki iwókir kí ikiarke tajé. Ie' tò iméka ie' wák kímukwakie. Nies imékàitò ie' iyi kòs e' kuebluie. Ie' wá iyi kòs tso' e' kkò'nekeitò. <sup>5</sup> Mik Potifar tò ie' méka iyi kòs kuebluie, etá Jehová er buaé chémi Potifar á. Ie' iyi kòs tso' iu á ena kañiká e' kòs mir buaé. <sup>6</sup> José tò Potifar iyi ulitane kkò'neke buaé. E' kuéki Potifar ké wókí i wèneia yés. Í ñak ie' éna e' è bikeitsekeitò.

José wák dór bua'bluká. <sup>7</sup> Ká de ikí tajé etá iwókir alaköl wóbatseká iwa. Ká et tã ie' iché iá:

—Be' senúka ye' tã.

<sup>8</sup> Eré José ké wá ie' tté iütène tã ichéitò iá:

—Ye' ttò tšó. Ye' wókir iyi ulitane méat ye' ulà á sunoie. Ye' tso' íe, e' tã ké ie' tkine ie' iyi kòs kí. <sup>9</sup> Ye' tso' ie' u kueblu kibiiie. Ye' wókir ké wá i kkèone ye' kí. Be' è ké meneat iwá ye' á be' dór ie' alakól e' kuéki. ¿Wes ye' tò í sulu i' wamblémi be' tã? ¿Wes ye' tò í sulu wamblémi Skéköl kí?

<sup>10</sup> Kékraé alaköl tò ie' á icheke: “Be' senú ye' tã.” Eré ie' ké tò iütetá' yés. Ie' tò iulawaté kékraé. <sup>11</sup> Ká et tã ie' tkawá weshke iyi kanéuk etá iwókir alakól e' è tkér. <sup>12</sup> Etá iwókir alaköl tò ie' klò'wéwá idatsi' á tã ichéitò iá:

—Be' senú ye' tã.

Eré ie' tkashkar iulà á míã tuneule. Ie' datsi' yènettsaät alaköl ulà á. <sup>13</sup> Mik iwókir alaköl tò isué tò José datsi' áté ie' ulà á <sup>14</sup> etá ie' tò ikanè mésopa kié tã ichéitò ie' pa á:

—Isáú, ye' wém wá hebreowak dè'bitú e' tso' se' wayuók. Ie' dewá ye' ska'. Ie' senakka ye' tã kèsik wa eré ye' aneká tajé. <sup>15</sup> Mik ie' ittšé tò ye' aneká tajé tã ie' tkashkar tuneule. Ie' datsi' yènettsaät e' áté ye' ulà á.

<sup>16</sup> E' ukuókí tã ie' tò José datsi' blé káyènoie iwém á mik idene etá. <sup>17</sup> Mik iwém dene, etá ipakéitò iá tã ichéitò iá:

—Be' wá hebreowak dè'bitú kanè mésoie, e' tkawá weshke ye' ska'. Ie' senakka ye' tã. <sup>18</sup> Eré mik ye' aneká tajé, etá ie' tkashkar tuneule tã idatsi' áté tēr íe. <sup>19</sup> Es be' kanè méso tò ye' dalòšewéwá.

Mik iwókir tò tté e' tšé etá iluneká tajé. <sup>20-21</sup> José klò'wéwáitò wótókwa patkéitò wé Egipto blú bolòkpa tso' wótèule eé. Eré Jehová tso' José kímuk s'woto wé á ñies. Ie' er bua' chòke iá. Ie' tò s'woto wé wókir ké er buaé chòk iá. <sup>22</sup> S'woto wé wókir tò iméka s'tso' wótèrulewá malepa kòs kuebluie. José tò i kòs weke s'woto wé á e' kéwò meke. <sup>23</sup> Jehová tso' José tã. Ie' tò ikimeke as i kòs dòttšá buaé ie' a. E' kuéki i kanewéke José tò e' ké suéku' iá s'woto wé wókir tò tò is imir.

### 40

*Kabsuè bót e' wá paké José tò*

<sup>1-2</sup> E' ukuókí tã wém dór Egipto blú á vino mukwakpa e'pa kueblu ena wém dór blu' á pan yuókwapka e'pa kueblu, e'pa ból tò iblú tsiriwéka. E' kuéki ie' uluneká ie'pa kí <sup>3</sup> tã ie'pa patkéitò wótèwá ikkò'nukwakpa kueblu e' u á s'woto wé tso' e' á. Eé José tso' wótèule ñies. <sup>4</sup> Etá Egipto blú kkò'nukwakpa e' kueblu tò José ké wépa ból ñe'pa kkò'nuk. Eé ie'pa sené wótèule ká tajé.

<sup>5</sup> Ká et nañewe tã ie'pa ból kabsuè kuá'kí kuá'kí. E' wá dór kuá'kí kuá'kí. <sup>6</sup> Bule es bla'mi tã José debitú isauk. Ie' tò isué tò ie'pa eriane. <sup>7</sup> E' kuéki ie' tò ie'pa á ichaké:

—¿Iók í' ñe tã á' wò wér siar?

<sup>8</sup> Ie'pa tò iüté:

—Sa' kabsuè, eré ké yi ku' sa' á iwà pakók. Ie' tò iché ie'pa á:

—¿A' ké wá ijcher tò Skéköl tò s'kabsuè e' wá chémi se' á? ¿Íma a' kabsuè? E' chò ña.

<sup>9</sup> Etá blu' á vino mukwakpa kueblu e' tò ikabsuè paké iá tã ichéitò:

—Ye' kabsuè tò uva kicha me'r ye' wòšã

<sup>10</sup> e' ulà tso' mañat. E' dapèneká e' wòrkua bune tajé tã iwòrkua míãne iwólie e' yua' tso' tajé. <sup>11</sup> Egipto blú tka' atser ye' ulà á. E' á uwawóli diò tuéyò. E' ukuókí tã ye' wák tò imé blu' á. Es ye' kabsuè.

<sup>12</sup> José tò iché iá:

—Be' kabsuè e' wá kiane yènuK i' es: Be' tò uva kicha ulà kébisuè mañat. E' wá kiane yènuK ká mañat. <sup>13</sup> Ká mañat tã blu' tò be' šhuleraé. Be' kané meraneitò be' á. Vino meranebò ie' á weš be' tò iq' kuaé es. <sup>14</sup> Be' we'ikèyò, mik iwà tka, etá ké be' éna ye' chòkwa. Ye' tté chò blu' á as itò ye' yóttšá íe. ¡Be' er buaé chò ye' á! <sup>15</sup> Ye' dór hebreowak e' ekiblè'wabitu ie'pa tò. Ye' ké wá i sulu wambléne. Ye' tso' wótèule è.

<sup>16</sup> Mik blu' pan yuókwapka kueblu e' tò isué tò José tò iyami kabsuè e' wá paké tã idettšá buaé etá ie' tò ie' icha paké iá ñies. Ie' iché:

—Ye' kabsuè tò ye' wá kkò dami mañal ye' wókir kí, e' á pan saruru dami. <sup>17</sup> Kkò tkér kákke ék e' á pan dami blu' á daklili. Eré pan dami ye' wá kkò á ye' wókir kí e' ñeke dù tò.

<sup>18</sup> Etá José tò iché ie' á:

—Be' kabsué e' wà kiane yënu*k* i' es: kkô mañal e' dör ká mañat. <sup>19</sup> E' wà kiane chè tò ká mañat tã blu' tò be' kuli' tókòk patkeraë, tã be' nu kichatkerakã kal ulã a. Dù tò be' nu katerawã.

<sup>20</sup> Ká de mañat tã blu' tò iduéswo tkó'wé chké wa di'yè wa tajë ikuëblupa ulitane kanëblöke ie' a e'pa a. E' shuã ie' tò ivino mukwakpa kueblu ena ipan yuökwakpa kueblu e'pa bõl tsukbitu patké s'wõto wé a ikuëblupa ulitane wörki. <sup>21</sup> Vino mukwakpa kueblu e' a ikané méneitõ. Ie' tò blu' a itka' méne wës kuaë es. <sup>22</sup> Erë pan yuökwakpa kueblu, e' patkémi nu kichatkékã wës José tò iyè' es. <sup>23</sup> Erë vino mukwakpa kueblu e' kè er aneia José ska'.

## 41

*Egipto blú kabsué bõtókicha e' wà paké José tò*

<sup>1</sup> Dwas de bök, e' ukuöki tã Egipto blú kabsué tò ie' dur di' kiè Nilo e' kkömik. <sup>2</sup> Ie' isuë tò baka deyal di' a kuktõ. E' dör baka bua'buäë jani'janila. E' iëter chkök kuachka shuã. <sup>3</sup> E' itõki baka skã deyal kuktõ di' a. Erë e' dör suluë sí sulula. E' mýal di' kkömik baka malë o'mik. <sup>4</sup> Etã baka sí sulula kuktõ, e' tò baka bua'buäë kuktõ e' katélur.

Eë tã blu' tñ'neka. <sup>5</sup> E' ukuöki tã bet ie' kapowane tã ikabsuëne tò i talarke kuõ sù kiè trigo e' klõ elka ë a ila'k deka kul. Ila'k e' dör bua'buäë iwõ blubluë. <sup>6</sup> E' itõki iskã tskine e' klõ elka ë a ila'k deka kul ñies, erë sulula idir. Siwã' datse diwõ tskirke e' kke e' tò isiwéwã ña'wéwa suluë miã wõ yabé ë. <sup>7</sup> Etã ila'k kul siulewã sulu e' tò ila'k bua'buäë katélur seraã.

Blu' tñ'neka tã iëna iane tò ie' kabsuëke mokj. <sup>8</sup> Erë bule es bla'mi ta ie' kabsué e' tò ie' eriawékã. E' kueki ie' tò Egipto iyi tótkòkwakpa ena iyi jcher tajë ese wakpa, kos tsuk patké. Ie' kabsué e' pakéitõ ie'pa a. Erë ie'pa ulitane kè a ie' kabsué e' wà ane. <sup>9</sup> Etã vino mukwakpa kueblu e' tò iché blu' a:

—A blu', erpa ye' éna idaã tò sulu ye' e' wamblé. <sup>10</sup> Mik be' uluneka tajë be' pan yuökwakpa kueblu ki ena ye' ki, etã be' tò sa' wõtókwa patké' be' kkõ'nukwakpa kueblu e' wé a. <sup>11</sup> Ká et nañewe tã pan yuökwakpa kueblu kabsué. Ye' kabsué ñies. Sa' kabsué e' wã tã ulawa ulawa. <sup>12</sup> Eë wëm dur ekõl duladula hebreowak, e' dör s'wõto wé wõkir e' kané méso. Ie' a sa' tò sa' kabsué e' paké tã ie' tò iwã ché sa' a. <sup>13</sup> Iwambléne yësyësë wës ie' tò sa' a iyè' es! Ye' dene ye' kané a tã iëkõl nu kichatkékã kal ulã a.

<sup>14</sup> Etã blu' tò José tsuk patké tã iyëttsarakitõ bet s'wõto wé a. José tsã téë buaë, e' paie buaë, tã ide ie'pa wã blu' wörki. <sup>15</sup> Blú tò iché ia:

—Ye' kabsué erë kè yi éna iwã ane. Erë ie'pa tò iché ye' a tò buaë be' tò s'kabsué e' wã paké.

<sup>16</sup> Ie' tò iüté:

—A kékëpa e' kè yënu*k* ye' a. Erë Skëkõl tò e' chëmi be' a be' kimoie.

<sup>17</sup> Blu' tò iché ia:

—Ye' kabsué tò ye' dur di' kiè Nilo e' kkömik. <sup>18</sup> Ye' isuë tò baka deyal di' a kuktõ. E' dör baka bua'buäë jani'janila. E' iëter chkök kuachka shuã. <sup>19</sup> E' itõki baka skã deyal di' a kuktõ. Erë e' dör suluë sí pola. jkë ye' wã baka suule sí poë suluë kã i' a ekkë chöklet. <sup>20</sup> Etã baka sí sulula kuktõ, e' tò baka bua'buäë kuktõ e' katélur. <sup>21</sup> Baka sí suluë e' tò baka bua'buäë katélur erë kè iwër tò ikatélur. Itso'ia sí poë wës kenet es.

“Eë tã ye' tñ'neka. <sup>22</sup> Etã bet ye' skã kapowane tã ye' skã kabsuëne tò i talarke kuõ sù e' klõ elka ë a ila'k deka kul. Ila'k e' dör bua'buäë iwõ blubluë. <sup>23</sup> E' itõki iskã tskine e' klõ elka ë a ila'k deka kul ñies. Erë e' ala'k dör sulula. Siwã' datse diwõ tskirke e' kke e' tò isiwéwã ña'wéwa suluë miã wõ yabé ë. <sup>24</sup> Etã ila'k kul siulewã sulu e' tò ila'k bua'buäë katélur seraã. E' kos pakéyõ s'tótkòkwakpa a erë ie'pa shuã kè yi a iwã ane yës.”

<sup>25</sup> Etã José tò blu' iüté:

—A kékëpa, be' kabsué bõtókicha, e' wã dör etkë. I' weraë Skëkõl tò kukuie e' chök ie' tso' be' a kabsué a kam iwã tkõ e' yöki. <sup>26</sup> Baka bua'buäë ena ala'k bua'buäë e' wã dör etkë, e' dör duas kul. <sup>27</sup> Baka sulula sí poë deka i bua'buäë itõki ena ala'k suluë siulewã siwã' wã, e' wã dör etkë. E' dör duas kul skã. E' duéswo wa ketba ardaë s'ki dö duas kul e'. <sup>28</sup> I' weraë Skëkõl tò kukuie e' chök ie' tso' be' a wës ye' tò be' a ichétke es. <sup>29</sup> Kewe dali wõrdaë tajë Egipto kos a dõkã duas kul. <sup>30</sup> E' ukuöki tã duas skã datskene kul e' dör ketba tajë duéswo. Bli e' tò Egipto kos sulu'weraã. E' kueki duas kul buaë e' a dali wõne tajë e' kè arpaia yi éna. <sup>31</sup> Bli ardaë tajë darërë, e' kueki dali wõnebak tajë e' peli kè wërpaia yës. <sup>32</sup> A kékëpa, be' kabsué bõtókicha, e' wã kiane chè tò Skëkõl tò iweraë mokjé. Bli dõraë se' ki bet.

<sup>33</sup> A kékëpa, be' kawõtã wëm yulök ekõl erbikõ buaë wã iyi jcher tajë ese. E' múkã kã kuebluie. <sup>34</sup> Ikaneü i' es: wëpa yulõ as ie'pa mi' Egipto kos a daliwõ kak blök daliwõ tso' tajë duas kul e' dalewa. Mik daliwõ tso' dõkã sacco skel etã ikõ iã sacco e' blënoie ketba yöki. <sup>35</sup> Ie'pa a ichõ tò daliwõ ñe' kos dapa'ü bänet bänet kã tso' kos Egipto e' a. E' kkõ'nuk patkõ be' wák tò sulitane tioie. <sup>36</sup> Es daliwõ blërdaë a' wakpa ulitane a as ie'pa kè ttõ ketba tò mik ketba duéswo de s'ki etã.

*José yöne Egipto wõkirie*

<sup>37</sup> Ì ché José tò ie' a e' mène buaë ie' a ena ikueblupa kos e'pa a. <sup>38</sup> E' kuekì ie' tò iché ie'pa a:

–Wèm i' a Skèkòl Wikòl tso'. Kè se' a wèm skà kurpa wès ie' es.

<sup>39</sup> Età ie' tò iché José a:

–Skèkòl tò iyi ulitane ikkè e' kkaché be' a. E' kuekì be' erbikò buaë, be' wà iyi jcher tajè sulitane tsata. <sup>40</sup> Be' tkekekayö ye' ká kos e' wòkirie. Sa' wakpa kos tò be' ttò dalöieraë. Ye' ekòl è dör kibiie be' tsata, ye' dör blu' e' kuekì. <sup>41</sup> I'ñe ye' tò iché tò be' dör Egipto wòkir kibi. <sup>42</sup> Età blu' tò iulatsio tso' iwà ikka shtoié, e' yétsa iéwà José ulatska a. José paiéarakitò datsi' bua'buá ese wa. Nies bulé dör oro ese iéwàitò José kuli' a et. <sup>43</sup> E' ukuökì tã ie' tò José ké e' tkòkka shkòk karreta shkòke ie' karreta itòkì e' kì. Ie' tò ie'pa wèlpa patkèmi kéwe ichök pé' a aneule: “¡A' e' skò! ¡kãwò mù se' wòkir kibi datse as e' tkòmi!” Es ie' tò José yué Egipto wa'ñe e' wòkirie.

<sup>44</sup> Età blu' tò iché José a:

–Ye' dör Egipto blú eré kè yi a ì onuk ká i' kì, be' kè wà ikéwò mène e' tã.

<sup>45</sup> Ie' tò José kiè mèkã Safenat-panéah egip-towak ttò wa. Ie' tò tayè kiè Asenat e' mé José a senowáie. E' dör wèm kiè Potifera e' alà busi. Potifera dör egiptowak sacerdote\* ekòl. Ie' kaneblòke ká kiè On ee. Es José atè Egipto wa'ñe e' wòkirie. <sup>46</sup> Mik ie'pa wà José dé'bitù blu' ska', e' kéwò ska' tã ie' kì duas tso' dabom mañayòk (30).

José e' chéat blu' a tã imítke ikaneuk Egipto kos a. <sup>47</sup> Duas kul tsá shuà dali wöne tajè shutè. <sup>48</sup> Daliwò e' kos kak dapa'wé José tò tã ibléitò ká wa'ñe. Wé dali e' wöne ese wakpa ká a ibléat u tso' daliwò blóie ese a. Es ibléitò ká ulitane tso' Egipto e' a. <sup>49</sup> Ie' tò daliwò dapa'wé tajè wès dayé tséwò kè ishtar es. E' kuekì ie' kè wà ishtaneia.

<sup>50</sup> Ketba kéwò kam dòwã e' yòkì José alakòl kiè Asenat, e' alà kune bòl wèpa. <sup>51</sup> Mik ilà tsá kune, etã José tò iché: “Skèkòl tò ye' bak erianuk ena ye' yamipa e' kos chówéwa ye' éna.” E' kuekì ikiè mèkãitò Manasés.<sup>†</sup> <sup>52</sup> Mik ilà ská kune, etã ie' iché: “Skèkòl tò ye' a alà mé ká wé kì ye' bak weinuk tajè ee.” E' kuekì ikiè mèkãitò Efrain.<sup>‡</sup>

<sup>53</sup> Duas kul dali wöne tajè Egipto e' tka. <sup>54</sup> E' ukuökì tã duas kul ská debitù e' dör ketba poë duéswo wès José tò iyè' es. Ketba de ká wa'ñe eré Egipto kos a chkewò tso'. <sup>55</sup> Mik Egipto wakpa teketke ketba tò, etã ie'pa miã iblú a chkewò kiök. Ie' tò iché iarak: “A' yú José ska' tã i kos chéitò a' a' e' wà iütò.”

<sup>56</sup> Mik ketba de ká wa'ñe, etã José tò dali tso' blèule iwé a e' kos kkòppée chkewò watuò Egipto wakpa a. Ketba kì datse tajè shutè. <sup>57</sup> Ká ulitane wakpa a kè i ku'ia katanoie, e' kuekì ie'pa de Egipto chkewò tãuk José ska'.

## 42

### José èlpa miã Egipto

<sup>1</sup> Mik Jacob wà ijchenewã tò chkewò tso' Egipto watuè, etã ila'r a ichéitò: “¿Iòk a' ièter ñi sür kë? <sup>2</sup> Ye' a iyène tò chkewò tso' Egipto. A' yú ee chkewò tãuk as kè se' duòlur ketba wa.”

<sup>3</sup> Etã José èlpa dòkã dabop, e'pa miãl Egipto chkewò tãuk. <sup>4</sup> Eré Jacob ké wà ilà Benjamín, e' dör José èl táie imi wa, e' patkènemi ièlpa tã ie' ibikeitsé dō' i tkò itã ñalã kì. <sup>5</sup> Ketba tso' tajè Canaan e' kuekì tajè Canaanwakpa miãl chkewò tãuk Egipto. Esepa shuà Jacob ala'r mirwarak chkewò tãuk ñies.

<sup>6</sup> José dör Egipto ká kuebly. Ie' tò chkewò watuèke sulitane datse itauk e'pa a. Mik ièlpa demi iwòrkì, etã ie'pa wóewa dō iskì ie' dalöiök. <sup>7</sup> Ie' tò ie'pa suéwã bet tò ie'pa dör ièlpa. Eré ie' e' éwa iyòkì wès kè ie' wà isuule es. Kè ie' e' kkeyènewã ie'pa a tò ie' dör ie'pa èl. Etã ie' tò ièlpa chaké kèsik wa:

–¿Wé a' sekkèpa bite?

Ie'pa tò iüté:

–Sa' bite' Canaan chkewò tãuk be' ska'.

<sup>8</sup> Ie' tò ie'pa suéwã, eré ie'pa ké wà ie' sùnewa. <sup>9</sup> Ie' tò ièlpa kébisu' e' anewã ie' éna. Ie' tò iché ie'pa a:

–A' dör sa' bolòkpa datse sa' sauk tò wès a' dòwami ñippòk sa' tã e' alokã sa' kì.

<sup>10</sup> Ie'pa iüté:

–A kèkèpa, e' kè dör es. Sa' kè dör a' bolòkpa. Sa' debitù chkewò è tãuk. <sup>11</sup> Sa' kos i' e' yé dör ekòl è. Sa' serke buaë yèsyèsè. Kè sa' dör yi bolòkpa.

<sup>12</sup> Ie' tò ichéne ie'pa a:

–Au. A' sekkè tso' kachòk. A' datse sa' ká sauk tò wès a' dòwami ñippòk sa' tã e' alokã sa' kì.

<sup>13</sup> Eré ie'pa tò iüté:

–Sa' tso' be' wòrkì wès be' kanè mésopa es. Sa' dòkã dabom eyòk kì bòl (12). Sa' yé dör ekòl è. Sa' serke Canaan. Sa' èl tsirla èk e' atè sa' yé tã. Ièkòl blènewatke.

<sup>14</sup> Eré ie' tò iskã chénerakia:

–Ye' ichétke tò a' dör sa' bolòkpa. <sup>15</sup> Egipto blú ttò wa yò iché a' a' tò a' kè wà a' èl tsirla e' dé' ié, e' tã a' kè mi'pa ká i' kì. Es ye' isuèmi tò a' ttò mokì. <sup>16</sup> A' ekòl yú a' tsirla tsukbitù. A' malepa atè wótèule. Es ye' wà ijchermi tò

\* **41:45** sacerdote: Sacerdote i' kè dör wès j'ñe itso' e'. E' skéie ie'pa dör egiptowakpa siwã e' wà kaneukwakpa. † **41:51** Manasés: Hebreoie s'kiè e' wà kiane ché ichówéwa ye' éna. ‡ **41:52** Efrain: Hebreoie s'kiè e' wà kiane ché alà kékã ò dali wör.

a' ttöke e' dör mokj. E' kě yēne, e' ʔa a' dör sa' bolökpā. E' chéyö Egipto blú ttö wa.

<sup>17</sup> Ie' tō ie'pa wötēwā sekka dōka ká mañat.

<sup>18</sup> Ká de mañat eʔa ie' tō iché iarak:

—Ye' tō Skéköl dalötseta' ká. Í cheke ye' tō a' a' é' ú, e' ʔa ye' kě tō a' ttökwa patkepa. <sup>19</sup> Yēne tō a' dör wēpa ttö mokj ese, e' ʔa a' eköl múat wötēule. A' malepa yúne, chkewö tsúmi a' yamipa tteke ketba tō e'pa a. <sup>20</sup> E' ukuökj ʔa a' él tsirla e' tsúbitu ye' a suē. Es ye' tō isuēmi tō a' ttöke e' dör mokj. E' kě dör es, eʔa a' duóralur.

Eʔa ie'pa tō iché: “E' dör buaē sa' a.” <sup>21</sup> Eʔa ichéraitō ñi a:

—Mokjē se' e' wamblē' suluē se' él José ʔa. Mik ie' kköyē' tajē se' a tō i sulu kě wamblar ie' kǐ erē se' isu' tō tajē ie' eriane, erē kě e' ska' se' tkine. E' nuǐ kǐ se' weirke j'ñe.

<sup>22</sup> Eʔa Rubén tō iūtē:

—Ye' tō iyē' a' a: “Kě i wamblar José kǐ.” Erē a' kě wā ye' ttö iūtēne. E' kuekǐ i'ñe ʔa se' kawōʔa idu'wā e' nuǐ patauk.

<sup>23</sup> José ttöke iēlpa ʔa egiptowak ttö wa e' pakekene o'ka tō ie'pa a iwakpa ttö wa. E' kuekǐ ie'pa kě wā ijcher tō ie'pa ttöke e' ane ie' éna. <sup>24</sup> Mik ie' tō ie'pa ttöke e' tse, eʔa ie' e' skettsa mía bánet juk. Mik ie' er dekanē ttoie, eʔa ie' dene ie'pa ska'. Ie' tō Simeón yöktsa patké ʔa ipayuēwarakitō iēlpa wörki. <sup>25</sup> E' ukuökj ʔa ie'pa tō ikanē mēsopa patké iēlpa sku' wā iök chkewö e' wa. Nies ichéitō iarak: “Ie'pa chkewö e' ské iōwā iwakpa bil ekkē sku' a. Nies chkē bakómirakia ñe ñala kǐ.” Eʔa ie'pa tō iwé wēs ie' tō iché iarak es. <sup>26</sup> E' ukuökj ʔa ie'pa tō ichkewö méka iburro kǐ ʔa imiyal.

<sup>27</sup> Mik ie'pa demi ñala kǐ wé ie'pa kapökerö eē eʔa ie'pa eköl tō isku' a burro chkö tso' e' kkö wöttsee iburro tioie ʔa isuē tō inuköl àr sku' shuǎ. <sup>28</sup> Ie' tō iché iēlpa a:

—Ísaú! Ye' inuköl mébitune ie'pa tō e' àr sku' a.

Ie'pa ulitane suane tajē eriane tajē. Ichéraitō ñi a:

—Í wamblök Skéköl tso' se' ʔa?

<sup>29</sup> Mik ie'pa demine Canaán, eʔa i tka ie'pa ʔa Egipto e' qos pakéraitō iyē a. Ie'pa tō iché iā:

<sup>30</sup> —Ká e' wökir e' tté sa' ʔa kēsik wa. Ie' tō iché tō sa' dör ie'pa bolökpā. <sup>31</sup> Sa' tō iché iā: “Sa' serke buaē. Kě sa' dör yi bolökpā. <sup>32</sup> Sa' dōka dabom eyök kǐ bōl. Sa' yē dör eköl ē. Sa' él eköl blēnewatke, iēköl aʔe sa' yē ʔa Canaán.”

<sup>33</sup> Eʔa ie' tō sa' iūtē: “A' ttö mokj, e' ʔa a' él eköl e' múat íe ye' ska' eʔa chkewö tsúmi a' yamipa a. <sup>34</sup> Erē a' él tsirla ék e' tsúbitu ña suē. Es ye' wā ijchermi tō a' ttö mokj. A' tō iwé es, e' ʔa ye' tō a' él emimine. Nies a' Iyi tuēmi bua' sa' ká i' kǐ.”

<sup>35</sup> Mik José ēlpa tso' isku' wakkauk, eʔa ie'pa isuē sku' a inuköl deyal parratulewā.

Mik e' suē, eʔa ie'pa tkirulune iyē ñies.

<sup>36</sup> Jacob tō iché iarak:

—A' tso' ye' mukat alá kě ʔa'. José blēnewā se' yōki. Simeón ñies, kě ku' se' ʔa. I ʔa Benjamín kiane tsēmi a' kǐ darē wā. Kékraē ye' weirke.

<sup>37</sup> Rubén tō iché iyē a:

—Bejamín múmi ye' a. Ye' tō ikkö'neraē buaē. Ye' wā idōrane be' a. Ye' kě wā idē'ne, e' ʔa ye' alá bōl e' ttólur.

<sup>38</sup> Ie' tō iūtē:

—Ye' alá kě míne a' ʔa. Iēl José du'wā ʔa ie' ē dawaiā. Dō' i sulu tkö ie' ʔa ñala kǐ, e' ʔa kékēla i' duómiwā ilā dalérmik ʔa a' iane iwiie.

### 43

#### *Benjamín ēlpa wā imítser Egipto*

<sup>1</sup> Ketba tkēneia darērē Canaán. <sup>2</sup> Chkewö dē'biturak iwa Egipto, e' enewa. Eʔa Jacob tō iché ila' r a:

—A' yúne chkewö skā ʔauk se' a.

<sup>3</sup> Erē Judá tō iūtē:

—Wēm tso' eē e' tō iyē' sa' a yēsýēsē: “A' kě wā a' él tsirla dē' íe, e' ʔa a' kě tō ye' suepa.”

<sup>4</sup> Be' tō sa' él tsirla émi sa' ʔa, e' ʔa sa' mǐ'mi chkewö ʔauk be' a. <sup>5</sup> Erē be' kě tō iēmi sa' ʔa, e' ʔa kě sa' míne. Wēm e' tō sa' a' iché: “A' kě wā a' él tsirla dē' íe, e' ʔa kě a' tō ye' suepa.”

<sup>6</sup> Jacob tō iūtē:

—Íjök a' tō i sulu wambleke tajē ye' kǐ? Íjök a' tō iché wēm e' a tō a' él skā tso' iā eköl?

<sup>7</sup> Ie'pa tō iūtē:

—Wēm e' tō sa' chakéwāie darē wa: “Ía' ye' tso' iā tsē'ka? Ía' él skā tso'?” Kě wēs sa' a ionukia. Sa' kawōʔa iūtök yēsýēsē. Sa' kě wā ijcher tō wēm e' tō sa' a' ichémi: “A' él tsúbitu ye' a suē.”

<sup>8</sup> Judá tō iché ie' a:

—Se' senakia, e' ʔa be' alá ömi ye' ʔa. Ye' tō ikkö'neraē. Es be' ena sa' ena se' ala' r qos kě duópalur ketba wā. <sup>9</sup> Ye' e' chō ie' skéie. Í de wēs ie' ʔa, e' nuǐ tuēraeyō. Ye' kě wā ie' dē'ne be' ska', e' ʔa ye' iane iwiie kékraē. <sup>10</sup> Kě sō kawō chōuk tajē. Warma i' ʔa sa' daretke bötökicha.

<sup>11</sup> Iyē tō iūtē:

—E'ma kě wēs ionuk. A' tō iú i' es: A' sku' a iyi bua' bua' tso' se' ká a, ese kak tsúmi wēm e' a. Bálsamo elkela ena bul alí elkela ena kiō masmas ena mirra ena kalwō wōdalo katanoie ese qos kak tsúmi iā elkela. <sup>12</sup> Nies inuköl tsúmi iā jaišet dōka bötökicha. Wé a' wā idē'ne e' tsúmine múne iā a' wák ulawa dō' ie' wōǎ ká chē'wa. <sup>13</sup> A' yúne wēm e' ska'. Alá tsúmi. <sup>14</sup> Skéköl Diché ʔa' Íyi Ulitane Tsata e' a ikiéyō as wēm ñe' tō a' saū er sjarē wa ʔa imú tō be' él ena Benjamín óbitune. Ye' aʔe alá kě ʔa', erē ʔwēs ye' e' ùmiia?

<sup>15</sup> Eʔa Jacob ala' r tō iyi kak íe, ñies inuköl ié jaišet dōka bötökicha. Nies Benjamín mirak iwa ʔa imiyal. Mik idemirak José ska' <sup>16</sup> eʔa

ie' isué tó Benjamín debitu ie'pa wa. Ie' tó iché iu kueblu a:

—Wépa wíkké tsúmi ye' u a. Be' yú baka ttókwa elka e' kaneú se' a. Ie'pa chkóke j'ñe ye' tã dibata a.

<sup>17</sup> Etã iu kueblu tó iwakanewé wes ichéitô iã es. Imítserak iwã e' tã José u a. <sup>18</sup> Eré tajé ie'pa tkinewã imítserak iwã José u a e' kueki. Ie'pa ttóramirak ñita: Ie'pa tso' se' kitó'uk. Ie'pa tó inukól ié'mi se' sku' a e' nuí tkéne se' mik. E' nuí kueki ie'pa tó se' kló'werawã kaneblók ie'pa a kané mésopaie kè patuè tã' ese. Ñies se' iyiwak kló'werawarakitô nuí ki.

<sup>19</sup> Mik ie'pa demi u wékkô a, etã ie'pa de tsinet u kueblu wórkj <sup>20</sup> tã ichérakitô ia:

—A kéképa, sukót sa' dè' ié chkwéwó tauk. <sup>21</sup> Eré sa' dè'mi wé sa' kapókerô eé tã sa' sku' kôs kkô wóttsee tã e' a kôs sa' tó chkwéwó tó' e' inukól kuéne sa' tó seraã. E' debitu'ne sa' wã mène. <sup>22</sup> Ñies sa' wã inukól skà de chkwéwó kí tuoie. Eré kè sa' wã ijcher yi tó sa' inukól ié'kane sa' sku' a.

<sup>23</sup> U kueblu tó iüté:

—Kè a' tkinuk. Kè a' suanuk. Ye' tó a' chkwéwó pató' e' inukól klóç. A' Kékól dör a' yé Kékól ñies, e' tó inukól e' ié'wã a' sku' a.

E' ukuókj tã ie' tó Simeón yéttã tsémi wé iélpa tso' ee. <sup>24</sup> E' ukuókj tã imítserak iwã seraã José u a. Etã di' méitô iarak kló skuoie. Ñies iburro tiérakitô. <sup>25</sup> Ie'pa wã ijchenewã tó eé ie'pa chkóke José tã dibata a. E' kueki ie'pa wã iyi kak de ie' a e' dapa'wérakitô mé ie' a.

<sup>26</sup> Mik ie' dewã weshké, etã ie'pa wã iyi kak de e' mé ia. Ie'pa wóéwãe dō iskj idalóioç. <sup>27</sup> Ie' tó ie'pa shké'wã tã ichakéitô:

—A' yé de kéképalatke ye' a' tó ye' a' sukót çis ie' tso'? çidobyërkeia?

<sup>28</sup> Ie'pa skã wóéwane dō iskj tã ichéitô:

—A kéképa, tó, sa' yé tso' buaé. Ie' dobyërkeia.

<sup>29</sup> Etã José kã sué ipamik shkit, tã Benjamín dör iél ekka imi wa ena iyé wa e' suéitô. Etã ichéitô ie'pa a:

—A' èl tsirla ye' a' tó çé' dör wj?

Ie' tó iché Benjamín a:

—A alã, Skékól er buaé chd be' a. <sup>30</sup> Ie' tó iél suéwã e' tó ie' tse'wé buaé tã ie' iaçka. Bet tã ie' e' skéttã miã wé ikapóke ee çuk. <sup>31</sup> Mik ie' ié one tã ier pablène tã iwó skué e' tã imiãne iélpa skã tã ichéitô: “Chkô watiô bet.”

<sup>32</sup> José tiérakitô bánet. Iélpa tiérakitô bánet. Egiptowak chkóke José u a e'pa tiérakitô bánet ñies. Hebreowak dör ñã egiptowak a e' kueki ie'pa kè a kawó tã' chkók ie'pa tã ñita. <sup>33</sup> José tó ie'pa tulókwa patké chkók ñi o'mik wes duas tso' iki es dō ibataé. Ie'pa tó ibikeitsé: “çWes ie'pa wã se' duéswo jcher?” E' kueki ie'pa tkinewã tajé tã iñi suéka. <sup>34</sup> Ie'pa dène chké tso' José mesa ki e' wa. Es iméitô ulitane a. Eré Benjamín a

chké méitô kibiie dōka sketókicha iélpa dène e' tsata. Ie'pa chké tajé blo'yé José tã tse'ne buaé.

## 44

### *José tka' tso' iwã wayé*

<sup>1</sup> E' ukuókj tã iu kueblu kiére José tó tã ichéitô iã:

—Ie'pa sku' kôs wã iókã chié chkwéwó wa. Ñies ie'pa inukól iókane isku' kôs kkô ki.

<sup>2</sup> Ñies ye' tka' yöule inukólchka wa tso' ye' wã wayé e' iókã ie'pa èl tsirla e' sku' kkô ki, inukól chkwéwó patuó e' tã ñita.

Etã u kueblu tó iwakanewé wes José tó iché iã es. <sup>3</sup> Bule es bla'mi diwó tschine tã José tó iélpa a kawó mé shkóke iu a iburroé. <sup>4</sup> Kam ie'pa dōmi kamié, etã ie' tó iché iu kueblu a:

—Be' yú ie'pa itóki. Mik be' ikué, etã ichó iã: ‘Ye' e' wé buaé a' tã, çiók a' e' wamblé sulu ye' ki? çiók a' tó ye' wókir tka' yöule inukólchka wa, <sup>5</sup> e' dör wayé ena iyi tótkoie, e' bléwãbitã a' tó? A' e' wamblé sulué.’

<sup>6</sup> Mik ie' ikuérak, etã ichéitô wes iwókir tó iché iã es. <sup>7</sup> Etã ie'pa tó iüté:

—çiók be' tó tté e' ché sa' a es? Kè ekké chók sa' e' wamblópa. <sup>8</sup> Sa' bité Canaán tkörô ié inukól mine sa' sku' a e' mukne. çWes be' ibikeitsémi tó sa' tó inukólchka ô orochka e' bléwãmi be' wókir u a? <sup>9</sup> Sa' sku' shuyuló. Yi icha a ikuébo, as e' wák duówa. Sa' malepa até be' kané mésopaie.

<sup>10</sup> Ie' tó iché ie'pa a:

—Iwã tköraé wes a' tó iché es. Eré wé èk sku' a iku'newã e' è dóraé ye' kané mésoie. A' malepa kè iane iwiie. A' mi' mine buaé.

<sup>11</sup> E' bet ie'pa ulitane tó isku' éwa iskj tã ikkô wóttse'lor. <sup>12</sup> U kueblu tó sku' shuyulérak ikibi èk kéwe dō itsirla Benjamín ska'. Etã Benjamín sku' kkô a tka' ar. <sup>13</sup> Ie'pa datsi' jchélor eriane tajé kueki. Ie'pa dali payuéne burro ki tã ibiteyalne José ska'.

<sup>14</sup> Mik Judá ena iélpa demine José ska', etã José duriã. Ie'pa wóéwa iskj iwórkj. <sup>15</sup> E' dalewa ie' tó iché iarak:

—çiók a' e' wambló es? çA' kè wã ijcher tó wém dör wes ye' es, e' s'tótké buaé?

<sup>16</sup> Judá tó iüté:

—çIma sa' tó be' iütémi? çI' wa sa' tó be' a' ikkachémi tó sa' kè wã i sulu wambléne? I' wambléule sulu sa' wã e' sué Skékól tó. I' sa' iéter be' wórkj. Sa' kló'ú be' kané mésoie. Yi sku' a be' tka' kune e' kló'ú ñies.

<sup>17</sup> Eré ie' tó iüté:

—Kè ye' a e' wamblénuk es. Yi sku' a ye' tka' kune, e' è até ye' kané mésoie. A' malepa mi' mine buaé a' ye' ska'. Kè yi tó a' tsiriwépa.

### *Judá kkóché siqrla Benjamín dalérmik*

<sup>18</sup> Etã Judá debitu José wórkj tsinet, etã ichéitô iã:

—A kékëpa, be' we'ikëyö, mishka ttök es' böi ë. Be' dalö dör wes Egipto blú dalö es e' kuëkj kē be' ulunuk ye' kj. <sup>19</sup> Be' tō sa' a' ichaki' tō sa' yē tā', sa' ēl skā tā'. <sup>20</sup> Sa' tō be' iūtē' tō, sa' yē tā' kékëpalatke, ñies sa' ēl tā' eköl iā duladula. E' kune mik sa' yē kēnewatke etā. Sa' be' a' iyē' tō sa' yē kj tajē ilā tsirla ēk kiar. Alā e' ē atēat imi a. Ie' ēl blēnewā. <sup>21</sup> Be' tō sa' a' iyē' tō alā e' tsūbitu suëyö. <sup>22</sup> Sa' tō be' a' iyē' tō kē ie' dōpa. Kē ie' a' iyē' menukat ekōrla. Mik ie' tō iyē' méat eköl, etā iyē' duōwami ie' dalērmik. <sup>23</sup> Erē be' sa' a' iyē' tō sa' kē wā ie' dē', e' tā be' kē sa' kiepawa.

<sup>24</sup> “Mik sa' dē'mine sa' yē wörkj, etā i kōs yē' be' tō sa' a, e' paké sa' tō ie' a. <sup>25</sup> Ie' tō sa' a' iché: 'A' yüne chkewö taük.' <sup>26</sup> Erē sa' tō iūtē: 'Sa' kawōtä sa' ēl tsirla tsukmi. Sa' kē wā ie' mīne, e' tā wēm e' kē tō sa' kiepawa.' <sup>27</sup> Ie' tō sa' iūtē: 'A' wā ijcher buaē tō ye' alaköl e' tō ye' a' alā mé böi ë. <sup>28</sup> Iaiāē eköl minea ye' yōkj, kē ye' wā isuneia. Ye' iklö'wé tō ie' kōtwā iyiwak sulusi tō. <sup>29</sup> A' wā ye' alā bata i' mītsēr tā i sulu tka ie' tā ñalā wa, e' tā wö'kela i' duōrawā eriar ē wā. Itka es, e' tā a' iane iwiie.'"

<sup>30-31</sup> “Sa' yē éna ilā dalēr tajē. E' kuëkj sa' demine ie' ska', erē ie' isuē tō ilā tsirla kē dē'ne sa' wā, e' tā ie' duōrawā eriar ē wā. E' wīie sa' iardaē. <sup>32</sup> Ye' tō ye' yē a' iyē': 'Ye' e' chō be' alā tsirla kkō'nuk. Ye' kē wā idē'ne, e' tā ye' iane iwiie tsakraē.' <sup>33</sup> E' kuëkj ye' kkōchō be' a' tō ye' tsūat be' kanē mésoie, alā tsirla skéie. Ie' ömi as imi' iēlpa tā. <sup>34</sup> Alā tsirla kē minene ye' tā, e' tā çwes ye' mi'mine ye' yē ska'? Ye' kē kj ye' yē kiane suē weinuk siarē.”

## 45

### *José e' chéka iēlpa a*

<sup>1</sup> José kē a' iwöklōneia' ikanē mēsopa ulitane tso' kanēblök eē e'pa wörkj. E' kuëkj ie' tō iché ie'pa a' a'neule: “A' kōs yūshka bánet. Sa' múat sa' wakpa ē.” Es mik José e' chéka iēlpa a, etā ikanē mēsopa kē ku' yēs ie' tā.

<sup>2</sup> Etā ie' iéka tajē, e' ttsé Egipto wakpa tō. Egipto blú a' ittē demi tō José tso' iük. <sup>3</sup> José tō iché iēlpa a:

—Ye' dör José. ¿Se' yē tso'ia' ttsé'ka?

Ie'pa tkirulune tajē suane José yōkj, e' kuëkj kē ie'pa a' ie' iūtēneia. <sup>4</sup> José tō iché ie'pa a:

—A' shkōwā tsīnet ye' o'mik.

Mik ie'pa e' skéwā tsīnet, etā ie' tō iché ie'pa a:

—Ye' dör a' ēl José wato'ttsā a' tō tsēmi Egipto e'. <sup>5</sup> Skéköl tō ye' patkē'bitu iē a' yōkj kewe s'tsātkoie ketba ulā a. E' kuëkj kē a' erianuk, kē a' tkinuk ye' wato'ttsā a' tō e' kuëkj. <sup>6</sup> Ketba de e' kj duas de bök. Etā duas skēl kianeia. E' shuā iyi kōs kuatkēmīsō erē

kē itskirpa yēs. <sup>7</sup> Erē Skéköl tō ye' patkē'bitu ká i' kj a' yōkj kewe as a' aleripa kē erwa as Skéköl tō a' tsāt kō ie' diché tajē e' wa. <sup>8</sup> Es Skéköl wāk tō ye' patkē'bitu iē, e' kē dör a' ye' wato'ttsā e' kuëkj. Skéköl tō ye' méka Egipto blú pattōkwakie. Ye' dör ie' u kuēblu ena Egipto wa'ñe wōkir. <sup>9</sup> A' yüne bet ye' yē ska' tā ichō iā: 'Be' alā José ttē i' patkēbitu be' a: Skéköl tō ye' méka Egipto ká kōs, e' wōkirie. Be' shkō ye' sauk bet. Kē bö ipanuk tajē. <sup>10</sup> Be' serdaē ká kiē Gosen eē be' yamipa kōs tā, ñies be' iyiwak kōs ena i kōs tso' be' wā ekkē tā. <sup>11</sup> Ketba duēs wō kianeia skēl. E' kuëkj ye' tō chkewö meraē a' ulitane a' as a' wā chkewö tso' wē'. <sup>12</sup> Ye' ēl Benjamín ena a' ulitane tō ichēmi ye' yē a' tō mokj ye' wāk ttē a' tā. <sup>13</sup> Ipakō ye' yē a' tō ye' dör Egipto wōkir. Ñies i kōs suē a' tō iē, e' pakō iā. iYe' yē tsūbitu bet iē!

<sup>14</sup> Etā José tō iēl Benjamín paklō'wēwā tā iijēka. Es Benjamín tō José paklō'wēwā tā iijē ñies. <sup>15</sup> Etā José tō iēlpa kōs wōalattsé, ñi paklō'wēwarak tā iijērak. Etā erpa iēlpa er deka ttök ie' tā.

<sup>16</sup> Etā Egipto blú u a' ttē demi tō José ēlpa debitu ie' ska', e' tō Egipto blú ena ikueblupa kōs e'pa ttsé'wé buaē. <sup>17</sup> Etā Egipto blú iché José a:

—Ichō be' ēlpa a: 'A' chkewö payuō iyiwak kj tā a' yüne Canaan. <sup>18</sup> Etā a' yē ena a' yamipa kōs e' tsūbitu ye' a. Ká tso' Egipto e' bua'ie mekeyō a' a. Ñies chkewö tso' Egipto e' bua'ie mekeyō a' a.' <sup>19</sup> Ñies ichō ie'pa a: 'karreta tsūmi tajē a' alakōlpa ena a' ala'r ena a' yē e'pa kōs tsobitu. <sup>20</sup> Egipto iyi tso' bua'ua e' kakmeraēyō a' a. E' kuëkj kē a' tkinuk i tso' a' wā e' kj.'"

<sup>21</sup> Etā Jacob ala'r tō iwē i' es. José tō karreta mé ie'pa a' wēs Egipto blú tō iché es. Ñies chkō méitō ie'pa a' ñē ñalā kj. <sup>22</sup> Ñies datsi' pa'ālī mé iarak e' mane'woie. Erē Benjamín a' datsi' kakméitō skētōkicha iēnoie. Ñies inuköl wōmulē méitō iā dōka cien mañalyök (300). <sup>23</sup> Iyi bua'ua tso' Egipto e' kak patkēmi iyē a' payōule burro kj dōka dabop. Ñies trigowō ena pan ena chkewö skā e' payuētō burro dabop skā kj iyē a' ñē ñalā kj. <sup>24</sup> Mik José ēlpa mitke, etā José tō iché ie'pa a:

—Kē a' mīā ñippök ñalā kj.

<sup>25</sup> Ie'pa e' yéttā Egipto a' demi Canaan iyē ska'. <sup>26</sup> Etā ie'pa tō iché iyē a: “Be' alā José tso'ia' ttsé'ka. Ie' tso' Egipto ká kōs e' wōkirie.” Ttē e' tō Jacob wōkrawēwā tajē. Kē uteia. Ie' kē wā ttē e' klōone. <sup>27</sup> Erē mik ie'pa tō i kōs yē' José tō ie'pa a' e' paké iyē a, ñies mik Jacob tō karreta patké José tō ie'pa tsōmi e' suē, etā ie' er dekañe ttsé'ne buaē. <sup>28</sup> Etā ie' iché: “E' ē kata ye' a, ye' alā José tso'ia' ttsé'ka. Ye' mi'ke isaük kam ye' blērwa, e' dalewa.”



## 46

*Jacob mía Egipto*

<sup>1</sup> Etá Jacob e' yéttsa iu a. Ì kòs tso' iwá e' mítser seraá. Mik idemirak ká kiè Beerseba ee, etá iyiwak ña'wéitò iyé Isaac, e' Kékòl dalóioie. <sup>2</sup> E' nañewe Skékòl tté ie' tã kabsueie tã ikiéitò ikié wa:

—A Jacob.

Jacob tò iüté:

—¿ì?

<sup>3</sup> Etá Skékòl iché ia:

—Ye' dör be' Kékòl. Ye' dör be' yé Kékòl. Kè be' suanuk shkòkmi Egipto. Ee ye' tò be' aleripa alöweraé tajé. <sup>4</sup> Ye' mi'ke be' tã Egipto. Nies ye' wák tò be' aleripa yerattsane ká e' a. Nies mik be' duökewatke etá José tso' be' o' mik.

<sup>5</sup> E' ukuökì tã Jacob e' yéttsa Beerseba a. Etá ie' ala'r tò ie' iéka karreta patké' Egipto blú tò ie'pa tso'mi e' a. Nies ie'pa ala'r ena ie'pa alakòlpa e'pa iékarakitò karreta a. <sup>6</sup> Etá Jacob mía Egipto iyamipae se. Ie' baka kòs ena ie' obeja kòs e' mítser ie' wá. Nies i kòs dé' ie' ulá a Canaán e' mítser ie' wá seraá. <sup>7</sup> Ila'r kòs ena isibayòkpa kòs e'pa mía da'a Egipto.

<sup>8</sup> Ikkéda dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alá kibi ék. <sup>9</sup> Etá Rubén ala'r kiè: Hanoc, Falú, Hestrón, ena Carmí.

<sup>10</sup> Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mì dör canaánwak.

<sup>11</sup> Leví ala'r kiè: Guersón, Quehat ena Merarí.

<sup>12</sup> Judá ala'r kiè: Er, Onán, Selá, Fares ena Zérah. (Er ena Onán, e'pa blénewa Canaán.) Fares ala'r kiè Hestrón ena Hamul.

<sup>13</sup> Isacar ala'r kiè: Tolá, Puvá, Job ena Simrón.

<sup>14</sup> Zabulón ala'r kiè: Séred, Elón ena Jahleel.

<sup>15</sup> E'pa kòs dör Jacob ala'r kune Padán-aram Líá tã. Ie'pa kutá kiè Dina, e' kune ee ñies. Jacob aleripa kòs wépa ena alakòlpa e' doka dabom mañayòk kì mañal (33).

<sup>16</sup> Gad ala'r kiè: Sefón, Haguí, Esbón, Suní, Erí, Arodí, ena Arelí. <sup>17</sup> Aser ala'r kiè: Imná, Isvá, Isví ena Beriá. Ie'pa kutá kiè Sérah. Beriá ala'r kiè Heber ena Malquiel. <sup>18</sup> E'pa dör Jacob aleripa Zilpá tã, e' mé Labán tò ilá busi Líá, e' a ikané mésoie. Ie'pa kòs doka dabom eyòk kì teròl (16).

<sup>19</sup> Jacob alakòl kiè Raquel, e' ala'r kiè José ena Benjamín. <sup>20</sup> José ala'r dör ilakòl Asenat tã e'pa kiè Manasés ena Efraín. Ie'pa kune Egipto. Asenat dör wém kiè Potifera, e' alá busi. Potifera dör egiptowak awá ekòl. Ie' kanéblòke ká kiè On ee. <sup>21</sup> Benjamín ala'r kiè Bela, Béquér, Asbel, Guerá, Naamán, Ehi,

Ros, Mupim, Hupim ena Ard. <sup>22</sup> E'pa dör Jacob aleripa Raquel tã. Ie'pa kòs doka dabom eyòk kì tkèl (14).

<sup>23</sup> Dan alá kiè Husim. <sup>24</sup> Neftalí ala'r kiè: Jahseel, Guní, Jezer, ena Silem. <sup>25</sup> E'pa dör Jacob aleripa ilakòl Bilhá tã, e' mé Labán tò ilá busi Raquel a ikané mésoie. Ie'pa doka kul (7).

<sup>26</sup> Jacob tã iyamipa ekka mine Egipto, e' wakpa doka dabom teryòk kì teròl (66). Ie' ala'r e' alakòlpa, kè shtane ishúa. <sup>27</sup> José ala'r kune Egipto e'pa dör bòl. Jacob yamipa dé'mi Egipto doka dabom kuryòk (70) seraá.

<sup>28</sup> Etá Jacob tò ilá Judá patkémí kewe José a ibiyòchòk: “Be' shkò Gosen ye' ñaletsuk.” Etá mik ie'pa demi Gosen, <sup>29</sup> etá José tò ikané mésoipa kè ie' karreta yòktsa tsémi iyé ñaletsòie. Mik idemi iyé ska' etá iyé pakló'wéwáitò etá ie' ié tajé. <sup>30</sup> Etá Jacob tò iché José a:

—¡Ire' ye' blérwami buaé! Ye' be' suéne buaé, be' serkeia e' kuekì.

<sup>31</sup> Etá José tò iché iyamipa kòs a:

—Ye' mía Egipto blú a a' biyòchòk tò 'ye' èlpa ena ye' yé yamipa kòs serke Canaán e'pa debitu e' tsukát ye' ska'. <sup>32</sup> Ie'pa dör iyiwak alòukwakpa. E' kuekì ie'pa baka kòs ena ie'pa obeja kòs ena i kòs tso' ie'pa wá e' debitu ie'pa wá.' <sup>33</sup> Mik Egipto blú tò a' chaké: ‘¿Ì dör a' kanè?’, <sup>34</sup> e' tã ichò ia: ‘Kékraé sa' kané dör iyiwak alòuk wes sa' tsá bak es.’ Egiptowak kè káne senuk obeja alòukwakpa tã ñita, e' kuekì Egipto blú kawò mèmi a' a' senuk Gosen.

## 47

<sup>1</sup> Etá José mía ibiyò muk Egipto blú a tã ichéitò ia: “Ye' yé ena ye' èlpa serke Canaán, e'pa debitu ié. I' tã ie'pa tso' Gosen. Ie'pa obeja ena baka ena i kòs tso' iwá e' debiturak iwá seraá.” <sup>2</sup> José tò ièlpa shushtë doka skèl tã imitsér iwá Egipto blú ska' as ie' tò iwakpa saù. <sup>3</sup> Etá Egipto blú tò José èlpa a ichaké:

—¿Ì dör a' kanè?

Etá ie'pa tò iüté:

—A kékèpa, sa' dör obeja alòukwakpa wes sa' tsá bak es. <sup>4</sup> Ketba meneká tajé sa' kaska'. Sa' iyiwak a kè chké ta'ia, e' kuekì sa' biteá senuk ká i' kì. Be' we'iké sa' tò, kawò mù sa' a' senuk Gosen.

<sup>5</sup> Etá Egipto blú tò iché José a:

—Be' yé ena be' èlpa de senuk be' tã. <sup>6</sup> Ká tso' Egipto e' wé kiane be' kì e' mú ie'pa a senioie. Kòs ká tso' Egipto e' bua'ie dör Gosen e' mú ie'pa a senioie. Be' yamipa shúa wépa tso' iyiwak kkò'nè buaé, e' tã esepa múka ye' iyiwak kkò'nuk.

<sup>7</sup> Nies José wá iyé Jacob mí kkachè Egipto blú a. Jacob tò Egipto blú shké'wé er bua' wa. <sup>8</sup> Etá Egipto blú tò ie' a' ichaké:

—¿Kòs duas tso' be' kì?

<sup>9</sup> Jacob iüté:

—Ye' kǝ duas de cien eyök kǝ dabom mañayök (130) shkök wǝ ã diã ã. Kawö e' kě dör tajë. E' tka ye' kǝ darërë. Erë kam ye' kǝ duas dõ kos ye' yëpa kǝ duas bak ekkë.

<sup>10</sup> E' ukuökǝ tǝ Jacob e' chëat Egipto blú ã tǝ imía. <sup>11</sup> Etǝ José tõ kǝ bua' bua' tso' Egipto, e' mé iyë ena iëlpa ã sënnoie wës Egipto blú tõ ichë es. Kǝ e' atë Ramsés. <sup>12</sup> Nies ie' tõ chkwë meke iyamipa ã kos ila'rla tso' u ã u ã ekkë.

*José tõ chkwë watué Egipto wakpa ã*

<sup>13</sup> Kǝ ulitane kě iyi wöria, e' kuëkǝ ketba kǝ tkërke poë. Ketba tõ s'tteke tajë Canaán ena Egipto. <sup>14</sup> Chkwë tuë Egipto wakpa tõ ena Canaánwakpa tõ, e' ské kos blé José tõ Egipto blú u ã. <sup>15</sup> Mik Egipto wakpa ena Canaánwakpa inuköl enewa sëraa, etǝ Egipto wakpa mía José ska' tǝ ichë ia:

—jBe' sa' ã chkwë mú! Kě sa' inuköl tǝ'ia. Kě idör bua' tõ e' ë kuëkǝ be' tõ sa' méttsa duökwa ketba ã.

<sup>16</sup> Etǝ ie' tõ ie'pa iüté:

—A' kě wǝ inuköl tǝ'ia, e' tǝ ã iyiwak tsübitu ña, e' skéie ye' tõ a' ã chkwë meke.

<sup>17</sup> Egipto wakpa wǝ kabaio ena obeja ena baka ena burro e' kos mí ie' ã. E' skéie ie' tõ chkwë mé ie'pa ã dõ duas ek. <sup>18</sup> Duas e' tka etǝ ie'pa míyalne ie' ska' tǝ iskǝ chë ia:

—Be' wǝ ijcher buaë tõ kě sa' wǝ inuköl tǝ'ia. Nies sa' iyiwak kos, e' dör be' icha. Sa' kǝ ë tso'ia sa' wǝ ena sa' wakpa, e' ë tso'ia sa' wǝ më be' ã <sup>19</sup> Sa' wǝpa taü. Sa' kǝ taü ñies. E' skéie iyiwö mú sa' ã. Sa' kaneblömi sa' wǝpa kǝ ã Egipto blú ã. Es sa' atë Egipto blú kanë mésopaie. Etǝ chkwë ë memibö sa' ã as kě sa' duölr ketba wǝ ena sa' kǝ kě weir ë ichök.

<sup>20</sup> Egipto wakpa tõ ikǝ watuëttsǝ José ã ketba kuëkǝ. Es Egipto kǝ kos de Egipto blú ulǝ ã. <sup>21</sup> Nies Egipto wakpa kos atë blu' kanë mésopaie. <sup>22</sup> Ie'pa sacerdotepa kǝ e' ë kě tone José wǝ. Egipto blú tõ chkwë kakmeke ie'pa ã, e' kuëkǝ ie'pa kě wǝ ikǝ watonettsǝ.

<sup>23</sup> E' ukuökǝ tǝ José tõ ichë Egipto wakpa ã:  
—A' wǝpa kos ena a' kǝ kos e' tǝ' tsa ye' tõ se' blú ã, e' kuëkǝ i'ñe tǝ a' kos atë ie' ulǝ ã. Iyiwö i' tsümi a' tõ tǝ ikuatkö. <sup>24</sup> Mik iwöne tǝ iyiwö tso' dõkǝ sacco skël, etǝ itsǝ yöttsa sacco et më Egipto blú ã. Iyiwö ëyök atë e' dör a' ã kuatkë, ñies a' yamipa ulitane ã ñanoie.

<sup>25</sup> Etǝ ie'pa tõ iüté:

—Be' tõ sa' tsátkë ketba ulǝ ã. Be' er bua' sa' tǝ. E' kuëkǝ sa' e' chöke Egipto blú kanë mésopaie.

<sup>26</sup> Es José tõ kawö mé Egipto wakpa ã tõ iyiwö tso' dõkǝ sacco skël e' tsǝ yöttsa sacco et më Egipto blú ã. I'ñe tǝ e' wëkeia ie'pa tõ es. Egipto sacerdotepa ë kě kawötǝ iyiwö tsǝ muk Egipto blú ã, ie'pa kǝ kě dë' Egipto blú ulǝ ã e' kuëkǝ.

*Jacob tõ ittë bata chë José ã*

<sup>27</sup> Es Israel aleripa e' tsëat senuk Gosen, kǝ e' atë Egipto. Kǝ e' kos de ie'pa ulǝ ã. Eë ie'pa alöne tajë. <sup>28</sup> Jacob sene'ia kǝ e' ã duas dõkǝ dabom eyök kǝ kul (17). Duas de ie' kǝ cien eyök kǝ dabom tkëyök kǝ kul (147).

<sup>29</sup> Mik ie' tõ ittse tõ iduökewatke, etǝ José tsuk patkéitö tǝ ichëitö ia:

—Mokǝ be' er buaë chak ye' ã, e' tǝ be' ulǝ múwa ye' tu' dikǝ iwǝ kkachöie tõ mokǝ i' kiekyö be' ã e' wawëraëbö. Ye' nu kě wötarwa Egipto. <sup>30</sup> Mik ye' blënewǝ mía ye' dëütöpa itökǝ, etǝ ye' nu yöttsa kǝ i' kǝ tsümi wötëwǝ ie'pa pö ã.

Etǝ José tõ iüté:

—Es yö iwëraë.

<sup>31</sup> Iyë tõ ichë ia:

—Ichö ña mokǝ Skëköl wörkǝ tõ be' iwëraë es.

Etǝ José tõ ittë mé mokǝ iyë ã. Etǝ Jacob wömëwǝ ikǝ kǝ tǝ Skëköl kǝkëkitö.

## 48

*Jacob er buaë chë José ala'r ã*

<sup>1</sup> E' ukuökǝ tǝ ie'pa wǝ biyö debitü José ã: “Be' ye' duöke tso' suluë.” Etǝ José mía isaük ila'r bölmí iwǝ e' tǝ. <sup>2</sup> Mik ie'pa tõ ichë Jacob ã tõ José debitü be' saük, etǝ ie' e' tkëkǝ isulú wa ikǝ kǝ. <sup>3</sup> Etǝ ie' tõ ichë José ã:

—Skëköl Dichë Ta' İyi Ulitane Tsata e' e' kkayë' ye' ã kǝ kië Luz atë Canaán ee. Eë ie' er buaë yë' ye' ã <sup>4</sup> tǝ ichëitö ña: “Ye' tõ be' aleripa alöwëraë tajë. Ie'pa doraë kǝ tajë e' wakpaie. Kǝ i' meraëyö ie'pa ã, e' atdaë ie'pa ulǝ ã kekraë michöë.” <sup>5</sup> Be' ala'r bölmí, Efraim ena Manasés, e'pa kune kam ye' dõ Egipto e' yökǝ. Ie'pa tsëtköyö wës ye' wák ala'r es wës ye' ala'r Rubën ena Simeón dör ye' ala'r es. <sup>6</sup> E' kuëkǝ kǝ meraëyö ie'pa ã wës ye' wák ala'r ã es. Ie'pa itökǝ be' ala'r skǝ kurmi, e'pa dör be' wák ã. Erë ie'pa dör Efraim ena Manasés ëlpa, e' kuëkǝ kǝ ñe' kak doraë ie'pa ulǝ ã ñies. <sup>7</sup> Mik ye' manët Padán-aram e' demi Canaán dökëttsatke Efrata, etǝ ee ñala kǝ be' mü blënewǝ ye' yökǝ. Eë ye' tõ ie' nu blë'waat Efrata ñalé kǝ. (I'ñe tǝ kǝ e' kië Belën.)

<sup>8</sup> Mik Jacob tõ José ala'r suë etǝ ichakëitö:

—¿Sepa dör yi?

<sup>9</sup> Ie' tõ iüté:

—I'pa dör ye' ala'r mé Skëköl tõ ye' ã kǝ i' kǝ.

Etǝ iyë tõ ichë ia:

—Ie'pa tsübitü ye' ska' as ye' er bua' chö ie'pa ã.

<sup>10</sup> Jacob kënewatke e' kuëkǝ iwöbla kě wawëria buaë. E' kuëkǝ José tõ ila'r patkëmi tsinet iyë o'mik. Etǝ Jacob tõ italapa paklö'wë wöalattse. <sup>11</sup> E' ukuökǝ ichëitö José ã:

—Ye' ibikeits tö ye' kē tö be' suepaia, erē Skēkōl tö kawō mé ye' a be' ena be' ala'r suojie.

<sup>12</sup> Etā José tö ila'r skēttsā iyē o'mik tā iwōēwa dō įskj iyē dalōioie. <sup>13</sup> E' ukuōkī tā ila'r bōl klō'wēwaitō iulā a. Efraim mī José ulā bua'kka, Manasés mī José ulā baklī'kka. Es itsēmītō iyē ska'. Etā Efraim atē Jacob ulā baklī'kka, Manasés atē Jacob ulā bua'kka. <sup>14</sup> Erē Jacob ulā bua'kka mékā Efraim dur ie' ulā baklī'kka e' wōkir kī. Erē e' dōr alā tsirla. Etā iulā baklī'kka mékātō Manasés dur ie' ulā bua'kka e' wōkir kī. Erē e' dōr alā kibi. Es Jacob ulā tsētkō wj'kē io'kē. <sup>15-16</sup> Etā ier bua' ché José a i' es:

“As Skēkōl er buaē chō ala'r bōl i' a kēkraē. Ye' yēpa bak Abraham ena Isaac, e'pa bak Skēkōl e' dalōiōk, e' tö ye' kkō'nami kuaē dō ikkē tā. Ie' tö ye' tsātke kēkraē iyi sulusi ulā a. As ala'r i' wa kē ye' chōwa sulitane éna kēkraē. Nies ye' yēpa bak Abraham ena Isaac as e'pa kē chōwa sulitane éna kēkraē. As ala'r i' alōr tajē ká ulitane kī.”

<sup>17</sup> Jacob ulā bua'kka mékā Efraim wōkir kī, e' kē mēne José a buaē. E' kuekī ie' tö iyē ulā bua'kka e' klō'wēwā mékā ilā kibi dōr Manasés e' wōkir kī. <sup>18</sup> E' dalewa ichéitō ia: —jA yēwō, kē idōr es! I' dōr alā kibi. Be' ulā bua'kka mūkā i' wōkir kī.

<sup>19</sup> Erē iyē kē wā igne es. Ie' tö iché ia: —jA alā, e' jcher ye' wā, e' jcher ye' wā! Ie' alōrdaē tajē, ie' dōraē kēkēpa tajē. Erē itsirla ék e' dōraē kēkēpa tajē shūtē ikibi tsāta. Nies ie' aleripa dōraē ká tajē e' wakpaie.

<sup>20</sup> Es e' ē diwō wa Jacob er buaē skā ché italapa a i' es:

—Mik Israel aleripa er buaē cheke nī a etā ie'pa tö icheraē nī a i' es: ‘As Skēkōl er buaē chō be' a wēs Efraim ena Manasés e'pa a er buaē yēne es.’

Es Jacob er buaē ché Efraim a, Manasés a imēne, e' tsāta. <sup>21</sup> E' ukuōkī tā José a ichéitō: —Ye' duōkewatke erē Skēkōl tö a' kkō'neraē. Ie' wā se' aleripa mirane Canaán wē se' yēpa bak senuk ee. <sup>22</sup> Ye' tö ká bua'ie méat be' a ime'bakyō be' ēlpa a e' tsāta. Ká e' kiē Siquem. E' yē'ttsā ye' tö amorreowak ulā a nīppē wa.

## 49

### *Jacob tö ittē bata ché ila'r kos a*

<sup>1</sup> Jacob tö ila'r kiē e' ska' tā ichéitō ie'pa a: “A' e' skōwā ye' o'mik. Ī tkōraē a' tā e' wā chekeyō a' a:

<sup>2</sup> “A ala'rla, a' e' skōwā tsjinet ye' ttō tstsōk, ye' dōr a' yē. Ye' ttō tstsō.

<sup>3</sup> “A Rubén, be' dōr ye' alā kibi.

Be' dōr ye' diché tsá e' alé.

Be' dalōiērtā' tajē, be' diché tā' tajē be' ēlpa tsāta.

<sup>4</sup> Erē ĩ'ne tā kē idōr es.

Be' dōr wēs di' yōliie es kē iwōklōr yēs.

Be' tö ye' dalōseō'wā. Be' sene'kā ye' alakōl tā.

E' kuekī be' kē dalōierpaia wēs ko'k es.

<sup>5</sup> “Simeón ena Levī, e'pa dōr nī ēlpa;

ie'pa tabē tso' nīppoie ē.

<sup>6</sup> jWē ie'pa e' dapa'uke ee ye' kē shkak!

Ie'pa tö wēpa kōtulur kēsik ē kuekī.

Baka wē'ne klōkicha blublu e' tēlorakitō éanas.

<sup>7</sup> Ie'pa kēsik dōr suluē ichōkle

e' kuekī ie'pa kawō tkōraē suluē.

jYe' tö ie'pa aleripa powerami senuk iēlpa malepa aleripa shūa wj a diā a!

<sup>8</sup> “A Judá, be' ēlpa tö be' kikeraka tajē.

Be' bolōkpa klō'wēwāraē be' tö ikuli' a,

es be' e' alōrakā ie'pa kī.

Be' ēlpa ekka e' wōōrawa įskj be' dalōioie.

<sup>9</sup> jA Judá, be' dōr ye' alā!

Be' dōr wēs ma'ne alā es.

Mik ĩ ttéitō tā ikatē one,

etā ie' e' wōēwa e' tēwā įskj wēs ma'ne kēchke es.

¿Yi dōmi ie' tsiriuk?

<sup>10</sup> Judá aleripa dōraē blu'paie tajē kēkraē dō mik iblū chōk de etā.

Blu' e' ttō iūteraē sulitane tö.

<sup>11</sup> Ie' tö iburro pupula muēke uva shūa.

Nies idatsi' skuōke uva diō wa.

<sup>12</sup> Ie' wōbla dōr daloloē uva diō tsāta.

Ie' ká dōr saruruē baka tsu'diō tsāta.

<sup>13</sup> “Zabulón serdaē dayē kkōmik.

Eē tajē kanō irirke ese kē tso'.

E' ká kkō dōrawā Sidón kkōmik.

<sup>14</sup> “Isacar dōr wēs iyiwak tso' dali oie diché tā' tajē ese e' mūtēr enuk iwē a es.

<sup>15</sup> Mik ie' isuē tö ká e' dōr buaē senioie nīes enoie,

etā ie' tsjwō kī dali dekane kaneblōk.

Ie' e' mēttsā kaneblōk kanē mésoie, kē tkine e' kī.

<sup>16</sup> “Dan ditsēwō shūa s'shulirdaē buaē yēsēsē wēs Israel aleripa e' ditsēwō malepa es.

<sup>17</sup> Dan dōraē wēs tkabē chōk tso' nīalā kkō a tö kabaio kuē iklō a tā iwāk brutane itsjwōkka ese es.

<sup>18</sup> “jA Jehová, ye' tso' be' panuk tö ye' tsātκό!

<sup>19</sup> “Gad ppök nīppōkwakpa dōraē tajē.

Erē ie' tö ie'pa pperaē, itōtiēraē.

20 “Aser *ká* *kj* *chkè* kata' buaé tskirdaé.  
 Ì wörke *kos* e' dör buaé *shuṭe* mène buaé  
*blu'pa a*.

21 “Neftalí dör *wes suli* alaki dur áie ala'rla  
*ta'* bua'buuala ese es.

22 “José dör *wes burro* kañiru *suḗ* dur di' tum  
*kkömik* es,  
*wes burro* pupula kañiru *suḗ* dur *ká* tukir *kj*  
*es*.\*

23 Kuaböt namépa éna sulu *iaṛ*,  
 ie' *kj* kuaböt *uyérakitö* kèsik wa.

24 Erè ie' ulà *diché* darèrè;  
 e' wa ie' wà *ishkame'* *shuṛikar* darèrèè,  
 kè ulà *shtrirta'wa* yès.

Skèköl tò ie' *a* *diché* e' mé.  
 Skèköl e' dör Jacob Kèköl e' *diché ta'* tajè.

Skèköl e' dör Israel aleripa *kkö'nukwak*.  
 Ie' tò Israel aleripa *tsatkeke*.

25 A José, be' yè e' Kèköl tò be' *kimeke* *kekraé*.  
 E' dör Skèköl *Diché Ta' Íyí* Ulitane *Tsata*,  
 Ie' er buaé *chöraé* be' *a*.

*Kali* buaé *patkeraé* ie' tò be' *daliwö* *kj*.  
 Ñies be' *a* di' *atdaé* buaé *iyök* *kj* *as* be' *dalikua*  
*talar* buaé.

Be' aleripa *alakölpá* ala'r *döraé* *tajè*, ñies be'  
*iyiwak* *döraé* *tajè*.

Es Skèköl er buaé *chöraé* be' *a*.

26 Be' yè er buaé yè' be' *a*,  
 e' *tköka* ye' yè er buaé yè' ye' *a* e' *tsata*.  
 Skèköl tò José *shukit* *ièlpa* *shua* *iwökirie*,  
 e' *a* ie' er buaé *chö* *michoé* *wes* *kabata* *yöbie*  
*kè* *erta'* wa es.

27 “Benjamín dör *wes* *chichi* kañiru *kèsikie*  
*ese* es;

*bla'mi ta'* *iyiwak* *ttéwaitö* *katè*,  
*tsáli ta'* *ibata* *watiéwaitö*.”

28 E'pa dör Israel *ditséwöpa* *daia* *itöki* *döka*  
*dabom* *eyök* *kj* *böt* (12), e' *yépa* *tsá*. Es ie'pa  
 yè tò ie'pa *a* *iché* *mik* ie' tò *ittè* *bata* *ché* ie'pa  
*a* *eta*.

### *Jacob blènewa*

29 Jacob tò *iché* *ila'r* *wépa* *a*: “Ye' *blèrkewa'*  
*kéwö* *dökewatke*. *Mik* ye' *blènewa*, *eta* ye' nu  
*blöwa* *áuk* *a* *ká* *wé* ye' *yamipa* nu *blène* *eḗ*.  
 Pö e' *ate* *wém* *kiè* *Efrón* dör *hititawak* e' *ká*  
*a*. 30 *Ká* e' *ate* *Macpelá* *Mamré* *wöshahè*. *Ká* e'  
*ate* *Canaán*. *Ká* e' *ena* *áuk* e' *watö'ttsá* *Efrón*  
 tò *Abraham* *a* *as* *Abraham* tò *iyamipa* nu *blö*  
*eḗ*. 31 *Eḗ* *Abraham* *ena* *ilaköl* *Sara*, ñies *Isaac*  
*ena* *ilaköl* *Rebeca*, e'pa nu *blène*. *Eḗ* ye' tò ye'  
*alaköl* *Lía*, e' nu *blè'wa* ñies. 32 *Ká* e' *ena* *áuk*  
 e' *watö'* *hititawak* tò.”

33 *Mik* Jacob tò *ttè* e' *kos* *ché* *one* *eta* ie' e'  
*téwane* *ika'* *kj* *ta'* *iblènewa* *mía* *idèütöpa* *itöki*.

\* **49:22** José dör wes burro...ká tukir kj es: Ñies hebreoie ttè e' mane'wëmisö' i es: José dör wes kal tskirke di' kkömik es; tkaká iké kköièule e' mik buaé, ñies iwördaé tajè. \* **50:11** Abel-mizraim: Hebreoie *ká* *kiè* e' wà *kiane* *ché* *egiptowak* *schö* *eriaitsé*.

## 50

1 *Eta* José tò *iyè* nu *paklö'wéwa*  
*wöalattséitö* *ta* *iie* *tajè*. 2 E' *ukuöki* *ta* ie'  
 tò *egiptowak* dör s'nu *kanéukwakpa* e'pa  
*kiè* *iyè* nu *kapeyökwa* *as* *kè* *inurwa*. *Eta* es  
*ikanewérakitö*. 3 *Ikanewérakitö* *döka* *ká*  
*dabom* *tkéyök* (40 días), *ekké* *kawö* *kiane*  
*ikanewojie* e' *kuéki*.

*Egiptowak* tò *ischö* *eriaitsé* *kawö* *döka*  
*dabom* *kuryök* (70 días). 4 E' *ukuöki* *ta* José  
 ttè *Egipto* *blü* *kuéblupa* *ta*, *ta* *ichéitö* ie'pa *a*:

—*A' éna* er bua' *chak* ye' *a*, e' *ta* *a' yú* *ichök*  
*Egipto* *blü* *a* 5 tò *mik* ye' yè *duökewatke*, *eta*  
 ie' tò ye' *ka'* ie' *a* *ttè* *muk* *Skèköl* *wörki* tò  
 inú *blerawayö* *áuk* *kane'at* ie' *wák* tò *ate*  
*Canaán* e' *a*. E' *kuéki* *kawö* *mú* *ña* ie' nu  
*tsömi* *bléwa* *eḗ*. *Mik* ye' *ibléwa* *ta* ye' *dotkene*.

6 *Eta* *Egipto* *blü* tò *iiütè*:

—Be' *yú* be' yè nu *blökwa* *wes* ie' tò be' *a* *iki*  
*es*.

7 *Eta* José *mía* *iyè* nu *blökwa*. *Egiptowak*  
*kuéblupa* *kos* e'pa *míyal* ie' *ta*. 8 *Jacob*  
*yamipa* *ekka* *ena* José *yamipa* *ekka* *ena* *ièlpa*  
 e'pa *kos* *mí* ñies. Ie'pa *ala'r* *ena* ie'pa *iyiwak*  
 e'pa *e* *atéat* *Gosen*. 9 Ñies *pé'* *mí* *tajè* *karreta*  
*kj* *ena* *kabaio* *kj*. Es *pé'* *mí* *tajè* José *ta*. 10 *Mik*  
 ie'pa *demi* *ká* *kiè* *Goren-ha-atad* *ate* *tsinet*  
 di' *Jordán* *diwö* *tskirke* e' *kker* *eḗ*, *eta* *eḗ* ie'pa  
*ulitane* tò *Jacob* nu *wötèrkewa* e' *kéwö* *tkö'wé*  
*dalö* *tajè* wa. *Eḗ* José tò *iyè* *eriaitsé* *döka* *ká*  
*kul*.

11 *Mik* *canaánwak* *serke* *eḗ*, e'pa tò *Jacob*  
 nu *wötèrkewa* *kéwö* *tkö'wè* e' *sué*, *eta* ie'pa  
 tò *iché*: “*Mokj* *egiptowak* tò s'nu *wötèrkewa*  
 e' *kéwö* *tkö'wéke* *dalö* *tajè* wa.” E' *kuéki* *ká*  
 e' *kiè* *méka* ie'pa tò *Abel-Misraim*.\* *Ká* e' *ate*  
*tsinet* di' *kiè* *Jordán* e' *kkömik*.

12 *Es* *Jacob* *ala'r* tò *iyè* nu *kanewé* *wes*  
 ie' tò *iyè'* ie'pa *a* es. 13 Ie'pa *wa* inú *mítser*  
*Canaán* *iblèwarakitö* *áuk* *yöule* *Abraham*  
*wa* *iyamipa* *pöie* e' *a*. E' *ate* *Macpelá*. E'  
*watö'ttsá* *hititawak* *kiè* *Efrón* tò *Abraham* *a*.  
*Ká* e' *ate* *Mamré* *wöshahè*. 14 *Mik* José *dèütö*  
 nu *blène* *one*, *eta* ie' *bitéane* *Egipto*. Ie' *èlpa*  
*ena* *pé'* *ulitane* *mìne* ie' *ta* e'pa *kos* *biteyalne*  
 ie' *ta*.

### *José èlpa suanéqane ie' yöki*

15 *Jacob* *blènewa* e' *ukuöki* *ta* José *èlpa*  
 tò *ibikeitsé*: “*Isalema* José *éna* *sulu* se'  
 arke. Ì *kos* *wamblè'* se' tò ie' *kj* e' *skéie* se'  
*we'ikeraëitö*.” 16 E' *kuéki* ie'pa *ttè* *mémi* ie' *a*:  
 “*Kam* be' yè *blèrwa*, 17 *eta* ie' tò sa' *a* *iché* tò  
*ichö* be' *a*: Ì *kos* *sulué* *wamblè'* sa' tò be' *kj*,  
 e' *olo'yö* sa' *kj*.” E' *kuéki* sa' *kköchö* be' *a* tò e'  
*olo'yö* sa' *kj*. Sa' tò be' yè e' *Kèköl* *dalöieke* e'  
*kuéki*.”

Mik biyō e' demi José a, etā ie' ié siarē.  
 18 Etā iēlpa demi iwōkī. Ie'pa wōēwa dō iškī  
 idalōioie tā ichérakitō:

—I' sa' de be' wōrkī. Sa' dōr be' kanē  
 mēsopa.

19 Etā ie' tō ie'pa iūtē:

—Kē a' suanuk. Ye' kē a' a' shūlinuk Skēkōl  
 skéie. 20 A' iyi sulu bikeits wamblē ye' kī, erē  
 e' mane'wēttsane Skēkōl tō buaē se' kī. E'  
 wa tajē pē' tsātkēne i'ñe tā. 21 E' kuekī kē a'  
 suanuk. Chkewō meraēyō a' a' ena a' ala'r  
 kōs a.

Es ie' tō ie'pa a' iché er buaē wa. E' tō ie'pa  
 ttsē'wēne buaē.

*José blēnewa*

22 José ena iyē alikpō yamipa e'pa sene'ia  
 Egipto. Ie' sene' dōka duas cien eyōk kī  
 dabom eyōk (110). 23 Ie' tō ilà Efraín talapa  
 e' ala'r suéia. Nies ie' tō ilà Manasés e' alà kiè  
 Maquir e' ala'r suéia.

24 Ká et tā ie' tō iché iēlpa a: “Ye' duōkewa  
 e' kēwō kianeia tsir. Erē Skēkōl wák tō a'  
 kīmeraē. Ie' tō a' yelurdaē ká i' kī. Ká  
 yē'bakitō mè Abraham a' ena Isaac a' ena  
 Jacob a' e' a' a' tsemiraēitō.” 25 Etā ie' tō iēlpa  
 kié as ie'pa ttē mù ie' a' Skēkōl wōrkī. Ie' tō  
 ie'pa a' iché: “Skēkōl tō a' yerattsa ká i' kī.  
 Mik e' tka, etā ye' sik tso' blēule e' tsūmi e'  
 tā.”

26 Mik ie' blēnewa Egipto, etā ie' kī duas  
 de cien eyōk kī dabom eyōk (110). Ie' nu  
 kapeyanewa as kē inurwa e' iēnewa s'nu  
 kélkuō a.

## Israel aleripa yërulune Egipto

### Éxodo 1.1–20.21

Yëkkuö i' kië si'kuaie *Éxodo*, e' wà kiane chè yërulune. Kam sa' tó yëkkuö i' mane'ù seraä se'ie, ishábòts maneö' sa' tó dö capítulo 20.21. Ì maneö' sa' tó e' blatëule mañat tsjini. Et tsjini e' dör capítulo et dö capítulo dabom eyök kî skël (1-15). Iët tsjini e' dör capítulo dabom eyök kî teröl dö capítulo dabom eyök kî pàköl (16-18). Ibata ék tsjini e' dör capítulo dabom eyök kî sulítu dö capítulo dabom böyök (19-20).

Et tsjini e' tó se' a ipakè tó i bak Israel aleripa tã ie'pa miã Egipto e' tsatök ketba yöki e' ukuökî. Këwa ie'pa kãwö tka buae Egipto. Ie'pa ena ie'pa iyiwak alöne tajë. Kã tka tajë tã egiptowak suanémi dö' Israel aleripa e' alöka ie'pa kî. E' kuekî ie'pa tó Israel aleripa suë suluë tã iwe'ikérakitó siarë. Ie'pa kérakitó kanëblök darërëë kë patuëta'. Erë Skëköl tó ie'pa weirke e' suë tã wëm këkãitö eköl ie'pa yöksa egiptowak ulã a. Wëm e' kië Moisés, e' ë tó yëkkuö i' kit. Skëköl e' kkayë' ie' a tã iwák kië yë'itö ia. E' ukuökî tã ipatkéitö Israel aleripa yöksa Egipto. Moisés tó iché Egipto blú a tó Israel aleripa ömine. Erë Egipto blú kë éna Skëköl ttö iütak. E' kuekî Skëköl tó egiptowak we'iké siarë tsãkjë ie' diché tajë wa. E' wa ie' tó ikkaché ie'pa a ena Israel aleripa a tó yi dör ie'. Skëköl tó Israel aleripa tsãkëe yëttsa Egipto ie' diché tajë wa, e' wa ie'pa de ie' ichaie ena ie' de ie'pa Këkölle. Ie'pa yënëttsa Egipto e' këwö tkö'uk ie' tó ie'pa patké duas bit ekkë.

Iët tsjini e' tó se' a ipakè tó wës Skëköl tó ie'pa wëttsë' ena ie'pa kime'itö shköktö kã sir poë wë kë yi serku' ee. Erë ie'pa tó ie' tsiriwë tajë kabene wa, erë ie' tó ie'pa tié ena ie'pa tsatkéitö ibolöpa yöki er bua' wa.

Ibata ék tsjini e' tó se' a ipakè tó Skëköl ena Israel aleripa ttë me' ñi a. Mik ie'pa de Sinaí këbata a, etã ie' tó ittë dalöieno mé ie'pa a dökã dabop. Ie' tó iché ie'pa a tó ie'pa tó ie' ttë dalöieno e' qos iütë buaë, e' tã ie'pa doraë ie' wák icha chökïe ena ie'pa a ie' er buaë chöraë kã malepa wakpa tsãta.

*Israel aleripa tso' Egipto e'pa weine tajë*

<sup>1-4</sup> Israel kië ñies Jacob e' ala'r dë'mi Egipto ie' ta, e'pa qos yamipa tã'. Ie'pa kië Rubén, Simeón, Leví, Judá, Isacar, Zabulón, Benjamín, Dan, Neftalí, Gad ena Aser. <sup>5</sup> Jacob yamipa mine ie' tã Egipto e'pa dökã dabom kuryök (70) seraä. Erë José, e' tso'tke Egipto kewe iyamipa yöki.

\* 1:15 hebreowak: E' kië ñies Israel aleripa.

<sup>6</sup> Kãwö tka tajë, etã José ena iëlpa blërulune. Ñies iyamipa dë'mi Egipto ie'pa tã, e'pa qos blërulune se'. <sup>7</sup> Erë Israel aleripa alöne tajë, e' kuekî ie'pa de diché tã' tajë. Ie'pa tso' Egipto wa'ñe.

<sup>8</sup> E' ukuökî tã blu' ské tkënekã eköl e' kë wã José pakë jcher. Ie' tó iché egiptowak a: <sup>9</sup> "Ye' ttö ttsö. Israel aleripa dör tajë. Ie'pa diché tköka se' diché tsatã, dö' ie'pa e' alöka se' kî. <sup>10</sup> Mik se' bolöpa ñippömi se' tã, e' tã dö' ie'pa ñi wöiökã se' ppök se' bolöpa tã, tã es imi'miyal se' yöki. E' kuekî se' tó ibikeitsö bua'iewã tó wës se' tó ie'pa wöklö'wëmi as kë ikî alör tajë."

<sup>11</sup> E' kuekî egiptowak tó iwökirpa patké Israel aleripa we'ikök kanë darërë wa as iëriardak. Ie'pa tó ikérak kã yöük böt chkwëwö dapa'woie Egipto blú a. Kã e' kië Pitón ena Ramsés. <sup>12</sup> Israel aleripa we'ikeke ie'pa tó siarë, erë ikî alörkerak tajë. E' kuekî egiptowak suarke tajë ie'pa yöki.

<sup>13</sup> Egiptowak tó ie'pa ké kanëblök kësik wa. <sup>14</sup> E' tó ie'pa eriawé tajë. Ikérakitó skauchka yöük shtrót shtrót u yuoie. Ñies ikérakitó kanëblök kañikã kanë ulitane uk. Es Israel aleripa qos we'ikérakitó siarë. <sup>15</sup> E' kjië tã Egipto blú ttë alalöpa kië Sifrá ena Puvá e'pa tã. Ie'pa dör hebreowak\* alalöpa alã kurke e' kanëukwakpa. Ie' tó iché ie'pa a:

16 –Mik a' tó hebreowak alalöpa alã kurke, e' kanewëke, etã isaü çî iwák dör? Iwák wëm e' tã ittöwã. Iwák dör alalök, e' tã imúat, kë ittarwa.

<sup>17</sup> Erë alalöpa e'pa tó Skëköl dalöieta'. E' kuekî ie'pa kë wã Egipto blú ttö iütëne wës itó iché es. Ie'pa ala'r wëpa méat ttsë'ka. <sup>18</sup> Etã Egipto blú tó ie'pa kiëre tã ichéitö iarak:

–çlök a' tó iwamblé es? çlök a' tó ala'r la wëpa e' méat ttsë'ka?

<sup>19</sup> Ie'pa tó iütë:

–Hebreowak alalöpa kë alã kur wës egiptowak alalöpa es. Ie'pa alalöpa dör darërë. Ie'pa alã kur bet buaë. Mik sa' demi, etã ie'pa alã kunetke.

<sup>20-21</sup> Es Israel aleripa kî alönëmi tajë. Ie'pa diché kî iërke tajë. Sifrá ena Puvá e'pa tó Skëköl dalöieta'. E' kuekî Skëköl tó ie'pa kímé, ala'r méitö ie'pa a tajë.

<sup>22</sup> Etã Egipto blú tó ikueblupa ulitane a kãwö mé tó hebreowak ala'r la wëpa kune qos e' ömi di' kî. Alalöpala é müat.

## 2

*Moisés kune'*

<sup>1</sup> E' këwö ska' tã wëm eköl dör Leví aleri, e' senéwã alalök dör Leví aleri ñies ese tã. <sup>2</sup> Etã ie' alã skã këkã e' döer wëm. Etã imi tó isué tó

alala buaala, e' kuęki ibléwaítō dō si' mañat. <sup>3</sup> Mik imi kē a ilā blēneia, eťa ie' kkō yulē et, patiē buaē kiōchka tso' chkuā'chkuā ese wa as kē a di' tkōwa. E' ukuōki tǝ alala iéwaítō kkō a, méreitō di' kiē Nilo e' kkōmik kǝkō tso' e' shuā. <sup>4</sup> Eťa alala kutǝ e' duęser kǝmiē ikǝ sauk tō węs idōmi.

<sup>5</sup> E' ukuōki tǝ Egipto blú e' alǝ busi mǝ kuōk di' a. E' dalewa tayępa tso' ie' wǝ ikanē męsopaie e'pa shkō ięter ákitō kǝ. Eťa ie' tō kkō suę kǝkō shuā. Ikanē męsopa ekōl patkémii tō itsukbitu. <sup>6</sup> Eťa ie' tō ikkōkēkǝ tǝ isuę tō alala wēm a'ria ekōl e' juke. Ie' isuę er siarē wa tǝ ichéitō:

—Bēbēla i' dōr hebreowak.

<sup>7</sup> E' wōshǝ bēbēla kutǝ de tǝ ichéitō ia:

—ǝBe' kǝ ikiane tō ye' mi' tayę hebreowak yulōk ekōl be' a alala sę kkō'noie ǝs itala'uitō itsu' wa?

<sup>8</sup> Eťa Egipto blú alǝ busi tō iuutē:

—Be' yú iyulōk.

Eťa bēbēla kutǝ mǝ imi yulōk tǝ idebitu iwa. <sup>9</sup> Eťa Egipto blú alǝ busi tō iché alǝ mi a:

—Alǝ i' tsúmi kkō'nú ña tala'ú ña buaē. Ye' tō be' patuęke ikǝ. Eta imi wǝ ilǝ mǝtser tala'wē. <sup>10</sup> Mik alǝ de bērie, eťa imi wǝ ibitętserne Egipto blú alǝ busi a. Eťa ie' tō ikló'wē węs ie' alǝ ękka es. Ikiē mékǝitō Moisés.\* Ie' tō iché:

—Ye' tō iyę'ttsǝ di' a.

E' kuęki ie' tō ikiē mékǝ es.

*Moisés tso' Egipto e' tkashkar*

<sup>11</sup> Moisés kibineone. Kǝ et tǝ ie' mǝ iyamipa hebreowak, e'pa pakōk. Eťa ie' tō isuę tō iyamipa weirke siarē kanēblōk darērē. Eťa ie' isuę tō egiptowak ekōl tso' iyami hebreowak ekōl e' ppōk siarē. <sup>12</sup> Eťa ie' kǝ suę kǝ wa'ñe. Kē ie' wǝ yi sune. E' dalewa ie' tō egiptowak e' ttęwǝ inú wōtęwǝ ie' tō ttsǝ'wō a. <sup>13</sup> Bule es tǝ ie' skǝ e' yęttsǝ, eťa ie' isuę tō hebreowak bōl tso' ñippōk ñita. Ie' tō iękōl tso' ekōl ppōk, e' a iché:

—ǝlōk be' tso' be' yami ppōk?

<sup>14</sup> Eťa hebreowak e' tō iuutē:

—ǝYi tō be' tkéka sa' wōkirie sa' shulōkwakie? ǝBe' tso' ye' bikeitsōk ttęwǝ węs egiptowak kōtwa bō es?

Mik ttē e' ttsē Moisés tō, eťa e' tō ie' suawę. Ie' ibikeitsé: “Ie'pa wǝ ijchęnewǝ tō ye' tō egiptowak kōtwa.” <sup>15</sup> Mik e' jchęnewǝ Egipto blú wǝ, eťa ie' tō Moisés ttōkwǝ patkē. Erē Moisés tkashkar ie' yōki, mǝ sęuk kǝ kiē Madián eę. Eę ie' e' tkére di' tum biule kkōmik.

<sup>16</sup> Kǝ e' a sacerdote† serke ekōl kiē Reuel. E' alǝ busipa dōkǝ kul. E' diwō wa alǝ busipa

e'pa dē'bitu di' chkök kulē a mē iyę iyiwak a yē. <sup>17</sup> Eťa iyiwak kkō'nukwakpa skǝ wępa debitu busipa trē'wēmi. Eťa Moisés e' kēkǝ e' tō busipa tsatkée. Eťa ie' tō di' mé iyiwak a. <sup>18</sup> Mik ie'pa demine iyę ska, eťa iyę tō ie'pa a ichakē:

—ǝI' wa j'ñe a' dene bet?

<sup>19</sup> Ie'pa tō iuutē:

—Egiptowak ekōl tō sa' tsatkée iyiwak kkō'nukwakpa ulǝ a. Ie' di' yęttsǝ mé iyiwak a.

<sup>20</sup> Iyę tō iché ia:

—ǝWę wēm e'? ǝlōk a' imęat ekōrla? A' yú itsukbitu ǝs ichkö se' ta.

<sup>21</sup> Es Moisés e' tsęat sęuk wēm e' ska. E' ukuōki tǝ Reuel tō ilǝ busi kiē Séfora, e' mé Moisés a sęowǝie itǝ. <sup>22</sup> Eťa Moisés alǝ kēkǝ ekōl kiē mékǝitō Guersón‡ wǝ chéitō: Kǝ i' kǝ ye' dōr o'ka.

<sup>23</sup> Duas tka taję, eťa Egipto blú blēnewǝ. Erē Israel aleripa kkōchōkeia taję kękraē kanē darērēē kuęki. Ie'pa kkōchōke taję e' ttsē Skēkōl tō. <sup>24</sup> Ttē me'bak ie' tō Abraham a ena Isaac a ena Jacob a e' wǝ tsǝ detke kanewę. E' kuęki ie' tō ibikeitsé tō Israel aleripa kimerǝyō i' tǝ. <sup>25</sup> Ie' tō ie'pa suę tǝ ie' ęna iǝne tō i' tkōke ie'pa ta.

### 3

*Skēkōl tō Moisés patkē Israel aleripa tsǝtkōk*

<sup>1</sup> Kǝ et tǝ Moisés tso' inuǝki Jetrō,\* e' iyiwak kkō'nuk. Inuǝki kanēblōke sacerdoteie Madián. E' dalewa ie' wǝ inuǝki iyiwak mǝtser kǝ sir po, e' jaisšet, demi Skēkōl kēbata kiē Horeb† eę. <sup>2</sup> Eťa eę Jehová biyōchōkwak bua'ie e' e' kkachęwǝ ie' a bō' wōrkueie taję kal tsir elka shuā. Moisés tō isuęwǝ bua'ie tǝ isuę tō kal wōbatsekǝ taję bō'ie, erē kē iñarwa. <sup>3</sup> Eťa Moisés tō ibikeitsé: “ǝWǝ dōr i'? Ye' mi isǝuk i' kuęki kal wǝ kē ñarwa.”

<sup>4</sup> Mik Jehová tō isuę tō Moisés dōkewǝtke tsinet bō' ñarke e' o'mik isǝuk, eťa Skēkōl tō ichakē:

—ǝA Moisés! ǝA Moisés!

Moisés tō iuutē:

—ǝI'?

<sup>5</sup> Eťa Skēkōl tō iché ia:

—Kē be' dōkwǝ tsinet. Wę be' dur e' kę dōr batse'r e' kuęki be' klōkkuō yōttsǝ. <sup>6</sup> Ye' dōr be' yę e' Kēkōl ena be' yępa bak kǝ iǝiǝē kiē Abraham, Isaac ena Jacob e'pa Kēkōl.

Moisés suane Skēkōl saukwǝ, e' kuęki ie' e' wōpabakęwǝ. <sup>7</sup> Erē Jehová tō iché ia:

—Ye' isuę tō wępa dōr ye' icha tso' Egipto e'pa weirke siarē. Ie'pa kkōchōke taję ikanē

\* **2:10** Moisés: Hebreoie s'kiē e' wǝ kiane chē iyęuęttsǝ. † **2:16** sacerdote: Kē se' wǝ ijchę yęsęsē tō sacerdote węs e' dōr, erē kē idōr węs j'ñe itso' es. ‡ **2:22** Guersón: Hebreoie s'kiē e' wǝ kiane chē kǝ bǝnet wakpa. \* **3:1** Jetrō: E' dōr Moisés nuǝki. Ie' kiē ñies Reuel ena Hobab. † **3:1** Horeb: E' kiē ñies Sinaí.

wökirpa ulà a e' ttséyö. Ye' wà ijcher buaë tò iweirkerak siarë. <sup>8</sup> E' kueķi ye' dë'ttsa ie'pa tsatškök egiptowak ulà a. Ye' tò ie'pa yerattsä ká e' ki. Ye' wà ie'pa miraë ká tajë buaë ese ķi. Ká e' ķi iyi ulitane tskir buaë, iwà wör buaë shuṭe. <sup>9</sup> Ká e' ķi pë' tso' tajë. E'pa ditséwöpa dör canaánwak, hititawak, amorreowak, fereseowak, heveowak, ena jebuseowak. <sup>9</sup> Ittsö, ye' tò Israel aleripa kköchöke e' ttsé. Ye' tò isuë tò egiptowak tò ie'pa we'ikeke siarë. <sup>10</sup> E' kueķi ye' tso' be' patškök Egipto blú ska' Israel aleripa dör ye' icha e'pa yökulur Egipto a. Be' yú Egipto.

<sup>11</sup> Erë Moisés tò iché ie' a:

—ĶYi ye' dör e' döwami Egipto blú wörķi Israel aleripa yökulur ie' ulà a?

<sup>12</sup> Ie' tò iüté:

—Be' kě mi'pa ekörla. Ye' tso' be' ta be' ķimuk. Mik be' tò Israel aleripa yélur Egipto a, eta a' tò ye' dalöieraë kabata i' ki. E' wa be' wa be' ijcherdaë tò ye' wák tò be' patķe'.

<sup>13</sup> Erë Moisés tò ie' iüté:

—Dö' ye' miá ta ye' tò iché ie'pa a: “A' yépa bak iaiäe e' Kéköl tò ye' patķe' a' tsatškök.” Dö' ie'pa tò ye' a' ichakë: “ĶIma e' kië?”, e' ta Ķi chëmi ye' tò ie'pa a?

<sup>14</sup> Eta ie' tò iüté:

—Ye' dör yi tso'tke e'. Ichö ie'pa a tò Ye' Tso'tke e' tò ye' patķe' a' ska'.

<sup>15</sup> Skéköl tò ikí ché Moisés a:

—Ñies ttë i' chö Israel aleripa a: ‘Se' yépa bak ká iaiäe kië Abraham, Isaac ena Jacob, e'pa Kéköl kië Jehová<sup>S</sup> e' tò ye' patķe' a' tsatškök'. Ttë e' chö ie'pa a. Ye' kië dör Jehová i' dör ye' wák kië kekraë. Kië i' wa ye' kirdaë aishkuö ta kekraë. <sup>16</sup> Be' yú Israel aleripa kueḅlupa dapa'uk ta ttë i' ichö ie'pa a: ‘Jehová, dör se' yépa bak ká iaiäe kië Abraham, Isaac ena Jacob e'pa Kéköl e' e' kkeyë' ye' a ta ye' a iyë'itö tò ie' tò a' weirke siarë egiptowak ulà a e' suë. <sup>17</sup> Ñies ye' a iyë'itö tò a' tsatķeraëitö egiptowak tso' a' we'ikök e'pa ulà a. Ie' wà a' miraë ká buaë ese ķi. Ká e' ķi iyi ulitane tskir buaë, iwà wör buaë shuṭe. Ká e' wakpa ditséwöpa dör canaánwak, hititawak, amorreowak, fereseowak, heveowak, ena jebuseowak.’ Ttë e' chö ie'pa a. <sup>18</sup> Israel aleripa kueḅlupa tò be' ttö tseraë ta be' yú ie'pa ta Egipto blú ska' ta ttë i' chö ie' a: ‘Jehová dör hebreowak Kéköl, e' dë'bitü sa' wöķi. E' kueķi sa' ömi ká mañat shkar ekkë wë kě yi ku' ese ska' iyyiwak ña'uk Jehová dör sa' Kéköl e' dalöioie. Ttë e' chö ie' a. <sup>19</sup> Erë ye' wà ijcher buaë tò ie' kě tò ie'pa a kawö e' mepa éanas. Ye' kawöta ie'pa yöktsa ye' diché tajë e' wa. <sup>20</sup> E' kueķi ye' diché tajë e' kkacheraëyö egiptowak a. I' weraëyö ie'pa shuä e' tò ie'pa tkiweraë. E' wa ie'pa we'ikeraëyö siarë. E' ukuöķi ta Egipto blú tò

Israel aleripa erami as imi'yal. <sup>21</sup> Ñies ye' tò egiptowak keraë ie'pa dalöiök tajë. E' kueķi mik a' e' yökettsa Egipto a, eta a' kě minuk ulà wöchka. <sup>22</sup> Israel aleripa e' alakölpa kos e'pa tò iyi yöule inukölcħka wa ö orochka wa ö datsi' ese kak kieraë egiptowak alakölpa serke bānet ö iserkerak Israel aleripa u a esepa a, e' kos ieraë a' ala'r tò. Es a' tò iyi bua' bua' tso' tajë Egipto e' yerattsä ie'pa ulà a.

#### 4

<sup>1</sup> Erë Moisés tò iüté:

—Ie'pa kě tò ye' ttö klö'wëpa. Kě itö ye' ttö iütëpa. Ie'pa tò ye' a' icheraë: “Jehová kě dë'bitü be' ska'.”

<sup>2</sup> Eta Skéköl Jehová tò ie' a' ichakë:

—ĶI a'tser be' wà ulà a?

Moisés tò iüté:

—Ye' shko kéli.

<sup>3</sup> Jehová tò iché ia:

—Iyüyömi jski!

Eta Moisés tò iyüemy jski. E' wöshä ta ishko kéli yönane tkabëie. Moisés e' skëü iyöķi bet <sup>4</sup> erë Jehová tò iché ia:

—iklö'üwä iķirë bata a ulà wa!

Eta Moisés tò iklö'wëwä eta imiane shko kéliie.

<sup>5</sup> Eta Jehová tò iché ia:

—Mik be' dene Egipto, eta be' tò iü es as ie'pa tò iklö'ü moki tò ye' dör a' yépa bak ká iaiäe kië Abraham, Isaac ena Jacob e'pa Kéköl e' e' kkachë be' a. <sup>6</sup> I' ta be' ulà tiüwä be' batsi' a.

Eta Moisés ulà tiëwä ibatsi' a. Mik ie' ulà yëttsa, eta ie' isuë tò iwölineka saruruë duë kië lepra e' wa. <sup>7</sup> Eta Skéköl tò iché ia:

—Be' ulà skä tiüwane be' batsi' a.

Eta Moisés tò iwë es. Mik ie' ulà yëttsane, eta ie' ulà buanene buaë. <sup>8</sup> E' ukuöķi ta Skéköl tò iché ia:

—I' kkachëyö be' a kewe e' kě klönerak iwä, ñies ie'pa kě wa be' ttö iütëne, e' ta iët skä ü. Isalema e' klö'wëmi ie'pa tò. <sup>9</sup> Erë e' kos wa ie'pa kě wä be' ttö klöne be' ttö iütëne e' ta di' chköka di' kibi a' e' tötttsä ká si ķi. Mik e' tēnettsä ká si ķi eta di' miaraë péie.

<sup>10</sup> Moisés tò iüté:

—ĶAyëwë! ĶA ye' Kéköl! Ye' siarala, kě ttö buaë. E' kě dör i'ñe ëme be' ttöke ye' ta eta. Es ye' wák dör ká iaiäe. Ye' kě ënaë. Ye' kě a' s'iütër buaë.

<sup>11</sup> Erë Jehová tò iüté:

—ĶYi tò a' a' kkö méat? Ye' wák tò a' méat kě ttö ö kě kukuö wattser. Ñies a' wöbla kě wawër ö a' wöbla wawër e' kos méat ye' wák tò a' a. <sup>12</sup> E' kueķi be' yú. Mik be' ttöke, eta ye' tso' be' ta. I' kiane ye' ķi tò be' tò iché, e' kkacheraë ye' tò be' a.

<sup>8</sup> 3:8 Ká e' ķi iyi ulitane tskir buaë, iwà wör buaë shuṭe; Ttë e' dör Hebreoie i' es: Wë baka tsu'diö ena blú alí shköke di'ie.

<sup>S</sup> 3:15 Jehová: Hebreoie kië e' wi dör ye' tso'tke.



13 Eré Moisés tö iché ia:

—Ja kéképa! Ye' kköchō be' a tö o'ka patkōmi ye' skéie.

14 Etā Jehová uluneka ie' kī tā ichéitō ia:

—E'ma be' ēl Aarón dōr Leví alerī ζīma e' bikaitsē be' tō? Ye' wa ijcher tō ie' ttō buaē. Ie' tso'tke ñala kī datsē be' ska'. Mik ie' tō be' suē, etā e' tō ie' tsts'wēmi buaē. 15 I' kōs chak be' éna e' kōs chō Aarón a' as ie' tō ichōne. Ye' wāk tō a' bōl kīmerāē as a' ttō buaē. I' kiane ye' kī tō a' tō iwē e' kkacheraē ye' tō a' a'. 16 Aarón ttōraē be' skéie. Ie' dōraē be' ttekōlie wes be' dōr ye' ttekōl es. I' cheke ye' tō be' a' e' cherane be' tō ie' a' tā e' cherane ie' tō a' yamipa a'. 17 Shko kéli se tsūmi. E' wa i kē or yi a' ese weraēbō. Ie'pa wōkrardawa iweblōk.

### Moisés miāne Egipto

18 E' ukuōkī tā Moisés miāne inuāki, Jetrō ska' tā ichéitō ia:

—Kawō mú ña. Ye' kawōtā shkōkmine Egipto ye' yamipa sauk tō itso'iarak tsts'ka.

Etā Jetrō tō iūtē:

—Ēkēkē. Be' shkō wōbla wa.

19 Moisés tso'ia Madián, etā Jehová tō iché ia:

—Yi kī be' kiarke ttēwā Egipto, e'pa blērulune. Kē i dalō tā'ia be' kī eē. E' kuēkī be' yūne Egipto.

20 Etā Moisés tō ilakōl ena ila'r tkēka burro kī tā imiyal Egipto. Ie' wā Skēkōl shko kéli dami ulā a'.

21 Jehová tō ie' a' iché:

—Mik be' demi Egipto, etā ye' tō diché me'bak be' a' i kē or yi a' ese wōie, e' wakaneū krōrōē Egipto blū wōrkī. Erē ye' tō ie' a' er suluē meraē as kē ie' tō Israel aleripa ōmine. 22 Etā ttē i' chō ie' a': 'Jehová tō iché be' a': Israel aleripa dōr wes ye' alā wēm tsā es. 23 Ye' tō be' a' ichétke tō ie'pa ōmine as imi'yalne ye' kīkōkka. Erē be' kē wā ie'pa a' kawō mēne as imi'yal. E' kuēkī be' alā wēm tsā e' tterawayō. Ttē e' chō ie' a'.

24 Moisés ena iyamipa minia ñala kī etā wē ie'pa kapōkerō ñala kī, eē Jehová debitu Moisés ska' ittōkwa. 25 Erē Moisés alakōl Séfora e' tō āk di'diē klō'wēwā e' wa ilā tottola kkuōlit tēe tsir. E' kkuōlit takla pē wa ie' tō Moisés klō patiē tā ichéitō Moisés a': "Mokī be' tso'ia ye' wēmie pē i' wa."

26 Etā Jehová tō Moisés émi. (Séfora tō ilā tottola kkuōlit tēe tsir e' kuēkī ie' tō iché Moisés a' tō "be' tso'ia ye' wēmie pē i' wa.")

27 Etā Jehová tō Aarón a' iché: "Be' yú Moisés ñalé yulōk wē kē yi serku' eē." Aarón miā Moisés ñalé yulōk tā ie' ikuē Skēkōl kēbata a'. Eē ishke' wēitō wōalattsē wa. 28 Etā i' kōs chōk Jehová tō Moisés patkē', e' pakéne Moisés tō Aarón a'. Nies i kē or yi a' ese kkayē' Jehová tō Moisés a' wawē e' kōs pakéneitō Aarón a'.

29 E' ukuōkī tā ie'pa bōl miyal Israel aleripa kuēblupa dapa'ukka kapakōk ie'pa tā. 30 I' kōs ye' Jehová tō Moisés a' e' pakéne Aarón tō Israel aleripa kuēblupa a'. Nies i kē or yi a' ese kkayē' Jehová tō Moisés a' e' kōs wē Moisés tō Israel aleripa ulitane wōrkī.

31 Israel aleripa tō Aarón ttē klō'wē. Mik ie'pa éna iane tō Jehová éna ie'pa dalērke, ñies tō ie'pa weirke siarē e' suēitō, etā ie'pa e' wōéwa iski ie' dalōiōk.

## 5

### Moisés ena Aarón ttē Egipto blū tā

1 E' ukuōkī tā Moisés ena Aarón miyal Egipto blū ska' tā ichéitō ia:

—Jehová dōr Israel aleripa e' Kēkōl, e' tō iché be' a' tō e'pa dōr ie' icha. Ie'pa ōmi as imi'yal wē kē yi serku' eē kawō tkō'uk ie' dalōioie.

2 Erē Egipto blū tō iūtē:

—ζYi dōr Jehová? Ye' kē wā ie' suule. Ye' kē kawōtā ie' ttō iūtōk. Ye' kē kawōtā Israel aleripa ōkmi. E' kuēkī kē ye' tō Israel aleripa epami.

3 Etā ie'pa tō iché:

—Hebreowak Kēkōl e' dē'bitu sa' wōki. E' kuēkī sa' ōmi kā mañat shkar ekkē wē kē yi ku' ese ska' iyiwak ña'uk sa' Kēkōl Jehová e' a' idalōioie dō' ie' tō sa' wōmēttsa' duōkwa due a' ō tabē a'.

4 Erē Egipto blū tō iūtē:

—A Moisés. A Aarón. ζIōk a' kī ie'pa kiane wōklō'wē ikanē a? iA' ena a' yamipa yūshka kanēblōk!

5 Nies Egipto blū tō iché ie'pa a':

—I'ñe tā Israel aleripa tso' tajiē kā i' kī, etā ζwes a' kī ikiane tō ie'pa kē kanēblōia?

6 E' diwō wa Egipto blū tō iché ikanē wōkirpa a':

7 —Tala'chka kōsi e' kē tsarbituiā Israel aleripa a' skauchka shtrōt shtrōt yuoie wes se' tō ikanewērō es. As ie'pa wākpa mi' itsuk. 8 Erē ikōrak iyuōk kōs kekraē iyuekerakitō ekkē, kē wōarwa yēs. Ie'pa bikēnak ē tajiē, e' kuēkī ie'pa arkerak: 'Mishka iyiwak ña'uk se' Kēkōl a!' 9 Ie'pa kī kō kanēblōk darērēē. Kanē mú ie'pa a' tajiē as kē itō kachē iūtō.

10 Etā ikanē wōkirpa miyal tā ichéitōrak Israel aleripa a': —Egipto blū' tō kawō mé tō kē a' a' tala'chka kōsi tsarbituiā. 11 I'ñe tā a' wakpa kawōtā iyulōk wē a' ikuē, e'ma eē tsūbitu. Erē a' kawōtā iyuōk kōs a' iyueke kenet ekkē, kē wōarwa.

12 Etā Israel aleripa miā Egipto kā wa'ñe kachka ēse yulōk tala'chka skéie. 13 Kanē wōkirpa tō ikérak kanēblōk kēsik wa tā ichekerakitō ie'pa a' kekraē: "A' tō iyuō kōs a' tō iyueke kenet mik sa' tō tala'chka mekeia a' a' ekkē." 14 Egiptowak tō Israel aleripa wēlepa me'ka ñi wōkirie. E'pa ppeke egiptowak tō tsa' bata wa tā ichekerakitō ie'pa a':

—¿I kuęki a' kę wā iyöne chki ena i'ñe wes kenet es?

<sup>15</sup> Eta Israel aleripa kanę wōkirpa mýal kkōchōk Egipto blú wōa. Ie'pa tō iché ia:

—A kękępa. ¿I kuęki be' tō be' kanę męsopa we'ikę es? <sup>16</sup> Tala'chka kę męneia sa' a, erę ie'pa kį ikiane tō sa' tō iyüę kōs sa' a tala'chka merkeia tą iyörke ekkę. Ie'pa tō sa' kę kaneblōk kęsik wa. Nies sa' ppekeitō siarę. ¡A kękępa, be' wakpa iane iwüie!

<sup>17</sup> Egipto blú tō ie'pa iütę:

—¡A' dör bikęwakpa wōchka! E' kuęki a' icheke kękraę: “¡Mishka ká bānet iyiwak ña'uk Jehová a!” <sup>18</sup> ¡A' yüşka kaneblōk! Erę kę tala'chka kōsi merku'ia a' a, erę a' kawōta iyuök kōs kenet a' tō iyueke ekkę.

<sup>19</sup> Mik Israel aleripa kanę wōkirpa a iyęne tō ie'pa kawōta iyuök kękraę kōs iyuekerakitō kenet ekkę, etą ie'pa eriane taję. <sup>20</sup> Ie'pa e' ýelur Egipto blú ska' de wę Moisés ena Aarón tso' ie'pa panuk eę. <sup>21</sup> Ie'pa tō iché iğrak:

—I wambłę a' tō sa' kį e' kuęki aš Jehová tō a' we'ikō. Egipto blú ena ikueblupa e'pa ęna sa' ar suluę. A' iane iwüie. E' dör wes a' wakpa tō tabę mę ie'pa a aš sa' ttōwā ie'pa tō es.

*Moisés kkōché Skékōl a*

<sup>22</sup> Eta Moisés tō iché Jehová a:

—A Jehová. ¿Iōk be' tō ye' patkę'bitü ie?

<sup>23</sup> Mik ye' dę'bitü ttōk Egipto blú tą be' ttō wa, etą ie' tō wępa dör be' icha e'pa kį we'ikę siarę. Dō ikkę tą iweirkeia iwāk suę. Erę be' kę wā i әне yęs ie'pa tsatkoie.

## 6

<sup>1</sup> Eta Jehová tō ie' iütę:

—Kukuie bö isueraę tō wes ye' tō Egipto blú we'ikeraę. Ye' dichę taję e' wa ye' tō ie' keraę ie'pa ökmi. Ye' dichę wa ye' tō ie' keraę ie'pa patkōkmi iką kį.

*Skékōl tō Moisés skā patkémine Egipto blú ska'*

<sup>2</sup> Nies Skékōl tō iché Moisés a:

—Ye' dör Jehová. <sup>3</sup> Miką ye' e' kkeyę' Abraham a ena Isaac a ena Jacob a, etą ye' ichę tō ye' dör Skékōl Dichę Ta' İyi Ulitane Tsata e'. Erę ye' kię Jehová, e' kę yęne ye' wā ie'pa a.

<sup>4</sup> Ye' tō ttę me' ie'pa a. Ye' tō iyę'at ie'pa a tō ká kię Canaan e' merayō a' aleripa a. Eę ie'pa bak senuk wes o'ka ká es. <sup>5</sup> I'ñe ye' wā ijcher tō ie'pa weirke siarę. Egiptowak tō ie'pa keke kaneblōk daręręę kęsik wa. E' kuęki ttę me'bak ye' tō ie'pa a e' wawękeyō i'ñe ta. <sup>6</sup> E' kuęki be' yü ichōk ie'pa a tō ye' dör Jehová. Egiptowak tō a' we'ikeke siarę kanę daręręę wa, e' kōs ulā a a' yerattsą ye' tō. Ye' tō egiptowak we'ikeraę siarę ye' dichę taję e' wa. Es a' tsatkeraę ye' tō egiptowak ulā a.

<sup>7</sup> Ye' tō a' klō'weraę ye' ichapaie. Ye' dōraę a' Kékōl. A' wā ijcherdaę tō ye' dör Jehová. Ye' dör a' Kékōl. A' wā ijcherdaę tō ye' tō a' yę'lur egiptowak bak a' we'ikōk kanę daręręę wa e' ulā a. <sup>8</sup> Ye' wā a' miraę ká muk ye' kablę' Abraham, Isaac ena Jacob e'pa a eę. Ká e' meraę ye' tō a' a. E' atdaę a' a. Ye' dör Jehová e' tō ichę es.

<sup>9</sup> Eta Moisés tō ttę e' skā chęne Israel aleripa a. Erę ie'pa eriarke taję kanę daręręę kuęki. E' kuęki ie'pa kę wā ittō iütęne. <sup>10</sup> Eta Jehová tō ichę Moisés a:

<sup>11</sup> —Be' yü ichōk Egipto blú a tō kawō mú ye' ichapa a e' yōktsą Egipto a.

<sup>12</sup> Erę Moisés tō Jehová iütę:

—Israel aleripa kę tō ye' ttō iütę, etą ¿wes Egipto blú ye' ttō iütęmi? Ye' kę tto buaę.

<sup>13</sup> Eta Jehová tō Moisés ena Aarón e'pa patkęmi ichōk Israel aleripa a ena Egipto blú a tō “Jehová tō sa' patkę Israel aleripa yōkulur Egipto.”

*Moisés ena Aarón ditsęwōpa*

<sup>14</sup> I' dör Moisés ena Aarón ditsęwō datse iyępa wa:

Rubén e' dör Jacob alā węm tsą, e' ala'r dör Hanoc, Falú, Hesrón ena Carmí. Ditsęwōpa datse ie'pa wa e'pa kōs dör Rubén aleripa.

<sup>15</sup> Simeón ala'r wępa dör Jemuel, Jamín, Óhad, Jaquín, Sóhar ena Saúl. Saúl mį dör cananeawak. Ditsęwōpa datse ie'pa wa e'pa kōs dör Simeón aleripa.

<sup>16</sup> Leví sęne' duas dōka cien eyök kį dabom mañayök kį kul (137). I'pa dör ila'r wępa ikibi ęk dō ibata ęk: Guersón, Quehat, ena Merari. <sup>17</sup> Guersón ala'r wępa dör Libní ena Simí. <sup>18</sup> Quehat sęne' duas cien eyök kį dabom mañayök kį mañat (133). Ie' ala'r wępa dör Amram, Ishar, Hebrón ena Usiel. <sup>19</sup> Merari ala'r wępa dör Mahli ena Musí. Ditsęwōpa datse ie'pa wa e'pa kōs dör Leví aleripa.

<sup>20</sup> Amram sęne'wā iyęchke kię Jocabed e' tą. E' dör Moisés ena Aarón mį. Amram sęne' duas cien eyök kį dabom mañayök kį kul (137).

<sup>21</sup> Ishar ala'r wępa dör Coré, Néfeg ena Zicrí.

<sup>22</sup> Uziel ala'r wępa dör Misael, Elsafán ena Sitrí.

<sup>23</sup> Aarón sęne'wā alakōl kię Eliseba e' tą. E' dör Aminadab alā busi ena Nahasón kutá. E' ala'r wępa kię Nadab, Abihü, Eleasar ena Itamar.

<sup>24</sup> Coré ala'r wępa dör Asur, Elcaná ena Abiasar. Ditsęwōpa datse ie'pa wa e'pa kōs dör Coré aleripa.

<sup>25</sup> Eleasar dör Aarón alā, e' sęne'wā Futiel alā busi tą. E' alā kune kię Finees. E'pa kōs datse iyę tsą kię Leví e' wa.

<sup>26</sup> Aarón ena Moisés e'pa patkę' Jehová tō Israel aleripa yōkulur Egipto a dapauleka

wes ñippökwaƙpa tajê e' dapa'ù es. <sup>27</sup> Aarón ena Moisés e'pa ut Egipto blú ƙa as ie' tó ƙawò mù ie'pa a Israel aleripa yòktsarak Egipto a.

*Aarón tté Egipto blú ta Moisés skéie*

<sup>28</sup> Mik Jehová tté Moisés tso' Egipto e' ta, eƙéitò ia:

—Ye' dór Jehová. Ì ƙos chekeyò be' a e' ská chóné Egipto blú a.

<sup>30</sup> Erè Moisés iüté:

—A Jehová, ye' kè tto buaè, eƙéitò ƙwes Egipto blú ye' ttò iütèmi?

## 7

<sup>1</sup> Eta Jehová tó iché Moisés a:

—Ye' ttò tso'. Be' èl Aarón ttóraè Egipto blú ta be' skéie wes ye' tteƙòlpa ttóke ye' skéie es.

<sup>2</sup> Ì ƙos chekeyò be' a, e' cherane be' tó Aarón a ta Aarón tó icherane Egipto blú a as ie' tó ƙawò mù a' a Israel aleripa yòktsarak Egipto a. <sup>3</sup> Erè ye' tó Egipto blú er darè'weƙewa.

Ì kè or yi a ese weƙayò Egipto ye' diché tajê e' wà ƙƙaƙoie. Ie'pa wòƙrardawa isaƙ.

<sup>4</sup> Egipto blú kè tó a' ttò iütèpa. Erè ye' tó egiptowak we'ikeraè siarè ye' diché tajê e' wa. Es ye' tó Israel aleripa yeralur. Ie'pa dór ye' a wes ñippökwaƙpa tso' tajê es. Ie'pa dór ye' icha. <sup>5</sup> Egiptowak we'ikéyò siarè ye' diché tajê wa ñies Israel aleripa yéttayò e' ukuòƙi ta egiptowak tó isuƙraè tó mokjé ye' dór Jehová.

<sup>6</sup> Moisés ena Aarón e'pa tó iwakanewé wes Jehová tó iché ie'pa a es. <sup>7</sup> Mik ie'pa tté Egipto blú ta eƙéitò Moisés ƙi duas tso' dabom paryòƙ (80). Aarón ƙi duas tso' dabom paryòƙ ƙi mañat (83).

*Aarón shko kéli yónane tkabèie*

<sup>8</sup> Jehová tó iché Moisés ena Aarón a:

<sup>9</sup> —Egipto blú' tó a' a' iché: 'Ì kè or yi a ese ú', e' ta ichó Aarón a tó ishko kéli iuyómi jskí as iyónar tkabèie Egipto blú wòrkí.

<sup>10</sup> Eta Moisés ena Aarón miá Egipto blú ska' eƙéitò iúwé wes Jehová tó iché ie'pa a es. Aarón tó ishko kéli uyémi jskí Egipto blú ena ikuéblupa e'pa wòrkí ta iyónane tkabèie.

<sup>11</sup> Eta Egipto blú tó wépa wa íyi jcher tajê ena ie'pa awápa esepa tsuk patké. Ie'pa tó ikanewé ñi suè isiwé wa. <sup>12</sup> Ie'pa shko kéli uyémi jskí ñies ta iyónane ñies tkabèie. Erè Aarón shko kéli tó Egipto shko kéli katéwarak seraƙ. <sup>13</sup> Erè Egipto blú er téwa darèrèè wes Jehová tó iyé' es. Ie' kè wa ie'pa ttò iütène yès.

*Jehová tó di' yuèe pèie*

<sup>14</sup> E' ukuòƙi ta Jehová tó iché Moisés a:

—Egipto blú' er téwa darèrèè. Kè ie' éna Israel aleripa akmine. <sup>15</sup> Bule bla'mi mik ie' miá di'ƙƙa, eƙéitò be' yú ttòƙ ie' ta. Ie' panú di'ƙƙa. Shko kéli yónane tkabèie e' kéli tsúmi. <sup>16</sup> Ie' a' ichó: 'Jehová dór hebreowak Kèkòl,

e' tó ye' patké ichòƙ be' a tó ie' ala'r ómine as imi'rak ie' ƙìƙòƙƙa ƙá wé ƙi kè yi serƙu' eè. Ikkè ta ƙam bò ie' ttò iütò yès.' <sup>17</sup> E' ƙueƙi Jehová tó ye' patké ichòƙ be' a: 'Ire' bò isuƙraè tó mokjé ie' dór Jehová. Mik ye' tó di' ppé shko kéli a'tser ye' wa e' wa, eƙéitò miƙraè pè wòchka. <sup>18</sup> Nima duólurdaè. Di' alaburdaƙa suluè. Egiptowak kè a di' e' yanuk, tajê ie'pa dako'weƙaraèitò.'

<sup>19</sup> Ñies Jehová tó iché Moisés a:

—Ichó Aarón a tó ie' shko kéli klò'ù ta ikòƙa di' ƙos tso' ie'pa wa yè ese tsaka. Di'la, batsòri, di' wòblè, di' bló tso' ese ƙos tsaka ie' ulà kòƙa as imi'a pèie. ¡Es imiƙraè pè wòchka di' bló ulitane yòle kal wa ò ák wa ese a!

<sup>20</sup> Eta Moisés ena Aarón iwakanewé wes Jehová tó iché ie'pa a es. Aarón tó ishko kéli kèƙa e' wa di' ppéitò Egipto blú ena ikuéblupa wòshaè. Eta di' ƙos ekkè miá pèie. <sup>21</sup> Nima ƙos duolur. Di' alanewá suluè kè yar egiptowak a. ¡ƙá wa'ñe di' miá pè wòchka!

<sup>22</sup> Erè egiptowak awápa tó iwé ñies isiwé wa. E' ƙueƙi Egipto blú er téwa wes Jehová tó iyé' es. Ie' kè wa Moisés ena Aarón ttò iütène yès. <sup>23</sup> Ie' miáne iu a. Kè tkine íyi ƙos ƙi. <sup>24</sup> Egiptowak ƙos kè a di' yar e' ƙueƙi ie'pa tó di' wòblè bié di' ƙkòmik di' manene yottsáie.

*Jehová tó egiptowak we'iké siarè bukuè' wa*

<sup>25</sup> Jehová tó di' kiè Nilo e' suluƙwa e' ƙi ƙá de kul,

## 8

<sup>1</sup> eƙéitò ie' tó iché Moisés a:

—Be' yú Egipto blú ska' ta ichó ia: 'Jehová tó ye' patké ichòƙ be' a' i' es: Ye' ichapa ómine as imi' ye' dalóioƙ. <sup>2</sup> Kè be' tó ie'pa émi, e' ta ye' tó bukuè' alóweraƙa tajê a' ƙá ƙi a' we'ikoie. <sup>3</sup> Di' Nilo a bukuè' alórdaè tajê shuƙé. E' e' yóralur di' a mirawa be' u a. Idórawa weshƙé wé be' ƙapòƙe eè, be' ƙa' ƙi. Ñies idórawa be' ƙueƙlupa u a ena be' yamipa ƙos e'pa u a. Ie' tiƙurawa wé a' ulòƙe ese a ena wé a' pan wòtuòƙe ese ƙos a. <sup>4</sup> Bukuè' urdaƙa be' ƙi ena be' ƙueƙlupa ƙi ena ƙos be' ƙá waƙpa tso' e'pa ƙi.'

<sup>5</sup> Eta Jehová tó Moisés a iché:

—Ichó Aarón a tó ie' ulà ena ie' shko kéli kòƙa di' kibi ena di' tsitsir ena batsòri ƙos ekkè tsaka as bukuè' dòƙa di' a Egipto ƙos wa iòƙƙa.

<sup>6</sup> Aarón tó ishko kéli kèƙa Egipto di' ƙos tsaka. Eta Egipto ƙá wa'ñe bukuè' alóneƙa tajê. <sup>7</sup> Erè egiptowak awápa tó iwé ñi suè isiwé wa. Ie'pa tó bukuè' alówéƙa ñies. <sup>8</sup> E' ukuòƙi ta Egipto blú tó Moisés ena Aarón e'pa tsuk patké ta ichéitò ie'pa a:

—A' tó ikiò Jehová a tó bukuè' yólur ye' ƙi ena ye' ƙá waƙpa ƙos ƙi ñies. E' yéluritò eta

ye' tō a' yamipa émimi as imi' iyyiwak ña'uk Jehová dalóioie.

<sup>9</sup> Etā Moisés tō Egipto blú iūtē:

—Ichō ña tō ;Mik be' kī ikiane tō ye' tō ikié Jehová a be' kī ena be' kuēblupa kī ena be' ká wakpa kōs kī as bukuē' kē tō a' tsiriwēia tā iatdaē di' ē a?

<sup>10</sup> Egipto blú iūtē:

—Ikiō Jehová a bule.

Etā Moisés tō iché ie' a:

—E' wā tkōraē wes be' kī ikiane es as be' wā ijcher tō kē yi dōr wes sa' Kēkōl Jehová es. <sup>11</sup> Bukuē' e' yōlurdane be' u a atdaē di' ē a. Kē itō be' tsiriwepaiā. Ñies be' kuēblupa ena be' ká wakpa kōs kē tsiriwepaiāitō.

<sup>12</sup> Etā Moisés ena Aarōn e' yēttsa Egipto blú wōwa. E' ukuōkī tā Moisés ikié Jehová a tō bukuē' patkē'bitū Egipto blú kī e' trē'ūmi ie' yōki. <sup>13</sup> Etā Jehová tō iwakanewé wes Moisés tō ikié iā es. Bukuē' tso' egiptowak u a iupamik u'rki e' kōs duolur. <sup>14</sup> Egiptowak tō bukuē' nu kōs shtë dapa'wé tajē. E' nu alabuneka suluē ká e' kōs a. <sup>15</sup> Erē mik Egipto blú tō isuē tō ie' tsatkēne bukuē' ulā a, etā ier tēwane darērēē wes Jehová tō iyē' es. Kē ie' wā Moisés ena Aarōn ttō iūtēne.

*Mulū'shwak patké tajē Jehová tō ie'pa kī*

<sup>16</sup> E' ukuōkī tā Jehová tō iché Moisés a:

—Ichō Aarōn a tō ie' shko kēli kōka siwā' kī e' wa iyōk po ppō as imi'a mulū'shwakie Egipto wa'ñe.

<sup>17</sup> Etā iwakanewérakitō es. Aarōn tō shko kēli kēka tā iyōk po ppēitō iwa etā iyōk po tso' Egipto wa'ñe e' mīa mulū'shwakie e' iēnekā se' kī ñies iyyiwak kōs kī. <sup>18</sup> Egiptowak awāpa ima'wé mulū'shwak alō'ukkā isiwé wa, erē kē iwā yōne ie'pa a. E' dalewa mulū'shwak iēnekā tajē ie'pa kī ñies iyyiwak kī. <sup>19</sup> Etā iwēpa tō iché Egipto blú a:

—jī' dōr Skēkōl kanē mokī!

Erē ie' er tēwā darērē wes Jehová tō iyē' es. Kē ie' wā ie'pa ttō iūtēne.

*Ō iēka tajē Skēkōl tō ie'pa kī*

<sup>20</sup> E' ukuōkī tā, Jehová tō iché Moisés a:

—Bule bla'mi Egipto blú mi'ke di'kka, e' kuekī be' e' kōka bla'mi tā be' yū ñi kukwā itā. Ichō ie' a: 'Jehová tō ye' patké ichōk be' a i' es: Ye' ichapa ōmine as imi' ye' kīkōkka. <sup>21</sup> Kē be' tō ie'pa èmine, e' tā ye' tō ō tajē patkeraē be' kī ena be' kuēblupa kī ena kōs be' ká wakpa tso' e'pa kī. Ō iērdakā egiptowak u kōs ekkē kī dō iyōk kī. <sup>22</sup> Mik e' wā de a' kī, etā ō patkeraēyō a' ē kī. Wē ye' ichapa serke Gosen eē ō kē supasō yēs. Es be' éna iarmi tō mokī ye' dōr Jehová, e' durse ká i' kī. <sup>23</sup> Be' ká wakpa e'pa ē we'ikeraē ie' tō. Erē ye' ichapa kē we'ikepayō. E' wā tkōraē bule.'

<sup>24</sup> Es Jehová tō iwakanewé. Ō dettsa chkaie Egipto blú u a ena ikuēblupa u a

ñies Egipto wa'ñe e' a. Ō tō Egipto ká kōs klō'wéwa se, sulu'wéwa yēs.

<sup>25</sup> Etā Egipto blú tō Moisés ena Aarōn tsuk patké tā ichéitō ie'pa a:

—A' yū, e'ma a' Kēkōl a iyyiwak ña'uk. Erē kē a' e' yōklor Egipto a.

<sup>26</sup> Moisés tō iūtē:

—Kē e' dōr buaē es. Sa' iyyiwak ña'weke sa' tō sa' Kēkōl Jehová e' a, e' dōr iyyiwak dalóieke a' tō skēkōlie ese. A' tō sa' suē iyyiwak ese ña'uk, e' tā a' tō sa' ttēwami ák wa. <sup>27</sup> Sa' kawōta shkōk dō ká mañat dō wé kē yi serku' ese ska'. Eē sa' tō iyyiwak ña'weke sa' Kēkōl Jehová a wes kawō méatitō sa' a es.

<sup>28</sup> Egipto blú tō iché:

—A' kē mine kamiē shute, e' tā ye' tō a' èmimirak wé kē yi serku' ese ska', iyyiwak ña'uk a' Kēkōl Jehová e' a. A' Kēkōl Jehová a ikiō ye' kī.

<sup>29</sup> Moisés tō iūtē:

—Mik ye' e' yēttsa iē, etā ye' mīa Jehová a ikiōk be' kī as ō pormi be' yōki ena be' kuēblupa yōki ena be' ká wakpa kōs e'pa yōki. Erē kē be' tō sa' kītō'ukīa. Kē be' tō Israel aleripa wōklō'uk as imi' iyyiwak ña'uk Jehová a.

<sup>30</sup> Mik Moisés e' yēttsa Egipto blú wōwa, etā ie' ikié Jehová a. <sup>31</sup> Etā Jehová tō iwé wes Moisés tō ikié ie' a es. Es ō po'wēmīitō Egipto blú yōki ena ikuēblupa yōki ena iká wakpa kōs e'pa yōki. Kē ō ateia etkla wē'ia. <sup>32</sup> Erē Egipto blú er skā tēwane darērēē. Kē ie' wā Israel aleripa anemi.

## 9

*Jehová tō egiptowak iyyiwak ttēlor*

<sup>1</sup> E' ukuōkī tā Jehová tō iché Moisés a:

—Be' yū ttōk Egipto blú tā, tā ichō iā: 'Jehová dōr hebreowak Kēkōl, e' tō ichē i' es: Ye' ichapa ōmine as imi' ye' kīkōkka. <sup>2</sup> Be' kē tō ie'pa èmine, be' tō ie'pa wōklō'wēkeia, <sup>3</sup> e' tā ye' tō duē mekaraē be' iyyiwak kōs e' kī ye' dichē tajē wa. Be' kabaio, be' burro, be' kameio, be' baka ena be' obeja ekkē kōs duōlurdaē. <sup>4</sup> Erē Israel aleripa iyyiwak ulitane kē duōpalur etō wē'ia. Es ye' tō ikkacheraē tō ie'pa dōr ye' ichapa.'

<sup>5</sup> Etā Jehová tō ikéwō mēwā i' es:

—E' kōs wēraēyō bule.

<sup>6</sup> Bule es tā Jehová tō iwé. Egiptowak iyyiwak kōs e' duolur. Erē Israel aleripa icha kē du'wā etō wē'ia. <sup>7</sup> Egipto blú tō Israel aleripa icha sauk patké etā ie' isuē tō mokī Israel aleripa icha kē du'wā etō wē'ia. Erē ie' er kītēwā darērēē. Kē ie' wā Israel aleripa a kawō mēne as imi' rak.

*Jehová tō duē méka egiptowak kī skuēkie*

<sup>8</sup> E' ukuōkī tā Jehová tō iché Moisés ena Aarōn a:

—Mulūchka tso' bö'kkō a e' klō'ū tā as Moisés tō iyyō siwā' kī Egipto blú wōrkī.

<sup>9</sup> Muluchka e' po ardaë Egipto kos e' k̄i. E' tskirdane ie'pa k̄i skuëkie ñies iyyiwak k̄i.

<sup>10</sup> Eta Moisés ena Aarón muluchka klò'wé bö'kkò a ta imiã Egipto blú ska' ta e' wörk̄i Moisés tó muluchka uyé siwa' k̄i. Eta egip-towak mik imonekã skuëkie. Ñies iyyiwak kos mik imonekã skuëkie. <sup>11</sup> Egipto awápa k̄i skuëk tskinekã tajë wes imalepa es, e' kuëk̄i ie'pa k̄e dè' Moisés wörk̄i. <sup>12</sup> Erë Jehová tó Egipto blú er darë'wéwa as k̄e itó Moisés ena Aarón tó iüt wës ie' tó iyé' es.

*Mò wösi sesëë ese patké Jehová tó egip-towak k̄i*

<sup>13</sup> E' ukuök̄i ta Jehová tó iché Moisés a:

–Be' e' kóka bule bla'mi eta be' yú Egipto blú a ichök: 'Jehová dör hebreowak Këköl, e' tó iché be' a i' es: Ye' ichapa ömi as imi'rak ye' k̄ikökka. <sup>14</sup> Kë be' wä ye' tó iütëne i' ta, e' ta ye' tó iýi sulusi kos patkeraë be' k̄i ena be' kuëblupa k̄i ena a' wakpa kos e' k̄i. Es be' wä ijcherdaë tó k̄e yi ku' ye' tsata kã wa'ñe. <sup>15</sup> Ye' mú k̄i ikiane, e' ma ye' tó iýi sulusi me'kãbak be' k̄i ena be' yamipa ulitane k̄i a' eukwa kã i' k̄i. <sup>16</sup> Erë ye' wä be' tso'ia tse'ka as be' tó ye' diché tajë e' saü, ñies as yi dör ye' e' tté pakar kã wa'ñe. <sup>17</sup> Erë be' er dör suluë kekraë. Kë bö ye' ichapa Israel aleripa émi. <sup>18</sup> Bule ikkë mò wösi sesëë ese patkeraëyö a' k̄i tajë. E' dardaë tajë a' k̄i tkökã kenet idarke Egipto e' tsata. <sup>19</sup> Mò wösi ardaë e' tó a' tso' u'rk̄i ena a' iyyiwak kos tso' kañikã e' ttémilur se. E' kuëk̄i a' iyyiwak ena i kos tso' a' wä kañikã e' blök patkó u' dikjã as itsatkër.'

<sup>20</sup> Eta Egipto blú kuëblupa wëlepa suane Jehová tó yöki. E'pa tó iyyiwak blé, ñies ikané mésopa blé u' dikjã. <sup>21</sup> Erë imalepa k̄e wä Jehová tó klöne, e'pa tó icha méat u'rk̄i. <sup>22</sup> Eta Jehová tó Moisés a iché:

–Be' ulã kóka siwa' k̄i as mò wösi sesëë ese dar tajë Egipto kos a. E' ardaë ie'pa k̄i ena iyyiwak k̄i ñies idaliwö tso'rak iwa' e' k̄i.

<sup>23</sup> Mik Moisés tó shko kéli kékã siwa' k̄i, eta Jehová tó alã bla'wé tajë wöñawéitö tajë dötsã iyök̄i k̄i eta mò wösi sesëë ákwöie e' patkéitö Egipto kos a. <sup>24</sup> Es Jehová tó mò wösi sesëë ese patké tajë Egipto kã wa'ñe a. Eta mò wösi ese darke tajë ena kã wöñarke tajë, k̄e iwöklörta'. Kë yi wä e' suule yës Egipto. <sup>25</sup> Eta mò wösi e' bitëshka tajë i kos tso' kã áie a' e' k̄i, se' k̄i ena iyyiwak k̄i ñies. Dali kuã kos péluiritö sulu'wéluritö. Kal tso' kã wa'ñe e' ulã jchërolone. <sup>26</sup> Erë kã kië Gosen, wé Israel aleripa serke, e' a' mò wösi k̄e dane yës.

<sup>27</sup> Eta Egipto blú tó Moisés ena Aarón tsuk patké ta ichéitö ia:

–Ire' yö isué tó ye' e' wamblé suluë. Jehová e' tté dör mokjé. Eta ye' ena ye' kã wakpa sa' iane iwiie. <sup>28</sup> Tajë alã blarke ñies mò wösi darke tajë e' k̄e dalé'ttsëneia sa' a.

Jehová a ikiö tó iwöklö'üne, e' ta ye' tó a' ekemi. Kë yö a' wöklö'wëia.

<sup>29</sup> Eta Moisés tó iütë:

–Ye' e' yettsã kã i' a ta bet ye' ikieke Jehová a, eta mò wösi ena alã wöñarke kos e' wöklördawa as be' wä ijcher tó Jehová dör kã wa'ñe e' wák. <sup>30</sup> Erë ye' wä ijcher buaë tó be' ena be' kuëblupa kam tó Sa' Këköl Jehová e' dalóö.

<sup>31</sup> Eta daliwö kië lino e' tso' wörkuaië ena cebada e' wö ta'tke, e' kuëk̄i iweinewa se. <sup>32</sup> Erë daliwö kië trigo ena centeno, k̄e e' dè' wes kam iwörkuë bur e' kuëk̄i.

<sup>33</sup> Mik Moisés e' yettsã kã e' a miã bänet, eta eë ie' tó ikië Jehová a. Eta bet ta mò wösi k̄e daneia ñies kã k̄e wöñaneia. Kãli tajë e' k̄e yëneia. <sup>34</sup> Mik Egipto blú tó isué tó kali k̄e yërku'ia, eta ye' mò wösi k̄e darku'ia ena alã k̄e blarku'ia, eta ie' e' wambléne suluë. Kë ie' e' er darë'newã ñies ikueblupa. <sup>35</sup> Es Egipto blú er téwa darërëë. Kë iwa' Israel aleripa a' kawö mène as imi'yal wes Jehová tó iyé'ia Moisés tté wa es.

## 10

*Jehová tó ditski patké tajë Egipto*

<sup>1</sup> E' ukuök̄i ta Jehová tó Moisés a iché:

–Be' yüne Egipto blú ska'. Ye' tó ie' ena ikueblupa er téwa darërëë as ie'pa tó isü tó ye' diché tajë, e' wa i k̄e or yi a ese wë ye' tó tajë. <sup>2</sup> Ye' tó ie'pa er téwa darërëë as be' tó ipakö be' ala'r a ena be' talapa a tó wes egiptowak wë'ikéyö ñies wes i k̄e or yi a ese wëyö tajë ie'pa wörk̄i. Es a' ulitane wä ijcher tó ye' dör Jehová.

<sup>3</sup> Eta Moisés ena Aarón miyal Egipto blú ska' eta ichéitö ia:

–Jehová dör hebreowak Këköl, e' tó iché i' es: “¿Mik be' tó ye' tó dalösewëmirö? Ye' ichapa ömi as imi' ye' k̄ikökka. <sup>4</sup> Kë be' tó ie'pa émi bule, e' ta ditski patkeraëyö a' kã k̄i. <sup>5</sup> Ditski tó a' kã wä ierawa tajë, k̄e a iyök ulat wëneia. A' daliwö bata méat mò wösi tó e' kos katerawaitö yës. Ñies kal ulitane katerawaitö sërã. <sup>6</sup> Ñies ditski dörawã tajë be' u kos a ena be' kuëblupa u a ena egiptowak kos u a. ¡Íy i'se k̄e suule a' yépa bak kã iaiaë e'pa wä ie'pa tsã dë'bitu' kã i' k̄i dö ikkë ta!”

Moisés tté one ta ie' e' wötrée ta imiã. <sup>7</sup> E' bet ta Egipto blú kuëblupa tó iché iblú a:

–¿Mik ta wëm e' k̄e tó se' wë'ikéyö? A blu', ie'pa ömi ie'pa Këköl dör Jehová, e' k̄ikökka. Ablu', ¿be' k̄e wä isune tó se' kã sulunewatke sërã?

<sup>8</sup> Eta Egipto blú tó Moisés ena Aarón tsuk patkéne eta ichéitö ia:

–A' yúshka Jehová dör a' Këköl, e' k̄ikökka. Erë keweie a' tó ye' a' ichó tó za' wënepa e' mi'ke?

<sup>9</sup> Moisés tó iütë:

—Sa' kawōtā shkōkmi sekkā. Sa' kawō tajē tkō'uke Jehová ā. E' kuēkī sa' ala'r ena sa' kēkēpa, e'pa kōs kawōtā shkōkmi. Nies sa' obeja kōs ena sa' baka kōs e' mi'ke sa' wā.

<sup>10</sup> Etā Egipto blú tò iché iā:

—Iwēnewā wōshak tò a' erbikōke suluē ye' kī! Ima a' erbikō tò Jehová tò a' kīmēmi as ye' tò a' òmi a' alakōlpāē ena a' ala'rē? <sup>11</sup> Kē iwamblēpa es. A' wēpa kibineone esepa ē yú Jehová kīkōkka es a' kī ikiane e' kuēkī.

Etā Egipto blú tò ie'pa tsukmi ké ie' yōkī. <sup>12</sup> Erē Jehová tò iché Moisés ā:

—Be' ulā kōkā Egipto kī as ditski bitu Egipto kōs wā iōkka nīes dalikua bata meát mò wōsi tò e' kōs katōkwa.

<sup>13</sup> Etā Moisés tò ishko kēli kēkā Egipto kī etā Jehová tò siwā' patkébitu diwō tskirke e' kke Egipto kōs kī nīē nañēē. Bule es bla'mi tā siwā' wā ditski debitu. <sup>14</sup> Ditski tò Egipto kā kōs e' wā iéwā tajē. Ekkē kē sule yi wā ká iaiāē es kē yi tò isupeaiāne. <sup>15</sup> Es ditski dapanekā ká kōs ekkē kī. Kē ā iyōk ulat tā'ia. Dalī kuā ena kalwō e' kōs bata meát mò wōsi tò e' katélur ditski tò yēs. Egipto kōs ā kakō kōs kal kō kōs e' kē atēiā yēs.

<sup>16</sup> E' bet tā Egipto blú tò Moisés ena Aarón e'pa tsuk patké tā iché iā:

—Ye' e' wamblē sulu a' Kēkōl dōr Jehová e' kī nīes a' kī. <sup>17</sup> Ye' kkōchō a' ā i'ñe ē tò a' tò e' olo'yō ye' kī. Ikiō a' Kēkōl dōr Jehová e' ā ye' kī tò ditski ē trē'úlur ye' kī as kē sa' duólur.

<sup>18</sup> Moisés e' yéttsa Egipto blú u ā tā bet ikiēitō Jehová ā. <sup>19</sup> Etā Jehová tò siwā' e' wōtréne tsjikka darērē e' wā ditski mítser anene dayē kiē Dayē Mat, e' kī. Etā ditski kē atē yēs Egipto. <sup>20</sup> Erē Jehová tò Egipto blú er sulu téwāne darērēē. Ie' kē wā Israel aleripa ā kawō mēne as imi'rak.

*Jehová tò ká ttsettseē patké Egipto kī*

<sup>21</sup> Etā Jehová tò Moisés ā iché:

—Be' ulā kōkā siwā' kī as ká tterwā ttsettseē shūtēē.

<sup>22</sup> Etā Moisés ulā kēkā etā ká ttenewā míā ttsettseē Egipto ká wa'ñe kī dōkā ká mañat.

<sup>23</sup> Kē yi wā iyami serke tsinet e' sune yēs. Kē yi ā e' yēnuksā wē itkēr eē dōkā ká mañat. Erē Israel aleripa u ā, eē je' ká olo tso' dalōlō.

<sup>24</sup> Etā Egipto blú tò Moisés tsuk patké tā iché iā:

—A' yúshka Jehová kīkōkka. A' ala'r kōs tsūmi. Erē a' obeja ena a' baka e' kōs muát.

<sup>25</sup> Etā Moisés tò iūtē:

—Au. Be' kawōtā kawō muk sa' ā sa' iyiwak tsukmi ña'wē sa' Kēkōl dōr Jehová e' ā idalōioie. <sup>26</sup> E' kīie tā sa' icha kōs, e' michōē sa' wakpa wā. Sa' iyiwak shushteke sa' tò ña'wē sa' Kēkōl Jehová ā ikīkokaie. Kam sa' dōmi eē etā kē sa' wā ijcher iyiwak isie etō kiane sa' kī ña'wē Jehová ā. E' kuēkī kē sa' tò sa' iyiwak mepaāt yēs.

<sup>27</sup> Etā Jehová tò Egipto blú er sulu téwā darērēē. E' kuēkī ie' kē wā kawō mēne Israel aleripa ā as imi'rak. <sup>28</sup> E' kīie tā Egipto blú tò iché Moisés ā:

—Be' e' yōttsa iē. Be' e' kkō'nú ye' yōkī. Be' dene ye' sauk, e' tā be' duōrawā.

<sup>29</sup> Etā Moisés tò iūtē:

—Buaē bō iché es. Kē ye' dē'iane be' sauk.

**11**

*Ala'r wēpa kibi esepa duōralur e' biyōché Moisés tò*

<sup>1</sup> E' ukuōkī tā Jehová tò iché Moisés ā:

—Ye' tò Egipto blú ena egiptowak ulitane e' bata we'ikeia. E' ukuōkī tā Egipto blú tò a' erami, e' kīie ie' wák tò a' ulitane uyerattsa da'āie ikā kī. <sup>2</sup> Etā ichō Israel aleripa ulitane ā, wēpa ena alakōlpa tò íyi yōule orochka wa ena inukōlchka wa, ese kak kiō egiptowak serke ie'pa pamik esepa ā.

<sup>3</sup> Etā Jehová tò egiptowak ké Israel aleripa dalōiōk tajē. Egipto blú kuēblupa ena egiptowak ulitane e'pa tò iklō'wē tò Moisés dōr kēkēpa tajē.

<sup>4</sup> Etā Moisés tò iché Egipto blú ā:

—Jehová tò iché i' es: Ká shābōts nañewe ye' mi'ke Egipto kōs ā. <sup>5</sup> Ala'r wēpa kibipa e' kōs duōralur. Egipto blú tso' s'wōkirie e' alā wēm kibi duōrawā, nīes egiptowak malepa icha kōs dō s'siārēpa tso' rak iwā iyiwō woie esepa icha duōralur nīes. Nīes iyiwak uru alā wē'ñe kibi ese kōs duōralur. <sup>6</sup> Sulitane iuraē tajē Egipto kōs ā. Kē ese tseule yi wā es, nīes kē yi tò ese tsepaia es. <sup>7</sup> Erē Israel aleripa shūā kē chichi isie arpa yēs se' wōā ena iyiwak wōā. Es a' wā ijcherdaē tò ye' dōr Jehová e' tso' Israel aleripa kīmuk, erē egiptowak we'ikōk ye' tso'.

<sup>8</sup> Etā Moisés tò ikī ché iā:

—Be' kuēblupa kōs dōraē ye' ska', etā ie'pa e' tkōrawā kuchē kī ye' wōrkī tā ikkōchōarak ye' a' Be' yúshka. Be' yamipa tso' kōs be' tā e'pa tsūmirak nīes.

Etā Moisés ulune tajē e' yéttsa Egipto blú wōrkī. <sup>9</sup> E' ukuōkī tā Jehová tò iché Moisés ā:

—Egipto blú' kē tò a' ttō iūtepa as ye' tò i' kē or yi ā ese kī ù tajē Egipto.

<sup>10</sup> Iyi ekkē kōs wē Moisés ena Aarón tò Egipto blú wōrkī, erē Jehová tò ie' er darē'wēwā as kē itō ittō iūtō. E' kuēkī ie' kē wā kawō mēne Israel aleripa ā as imi'yal.

**12**

*Israel aleripa tsatkēne e' kēwō*

<sup>1</sup> Jehová tò iché Moisés ena Aarón tso' Egipto e'pa ā:

<sup>2</sup> "Si' i' dōraē a' ā duas si' tsawe kēkraē.

<sup>3</sup> Israel aleripa ulitane ā ichō: 'Si' i' e' diwō dabop (10) etā u bitkue ekkē wakpa tò obeja ò chibo ese wē'ñe pupula yulō etō katē ila'r tā. <sup>4</sup> U wakpa wēlepa kē dōr tajē, kē ā

chkè ekkè katarwà, e' tã ie'pa tò iyamipa tso' iupamik esepa kið chkòk ie'pa tã ñita kòs iwakpa dòkà ekkè ena kòs ie'pa à ikatar ekkè. <sup>5</sup> Obeja ò chibo wè'ñe bua'buu, kè kji ì sulu ku' kji duas tso' ek ese yulò etò. <sup>6</sup> E' blò. Si' i' e' diwò de dabok kj tkèl (14) e' tsálij etã a' wã yiyiwak tso' blèule ese ttò u a u a. <sup>7</sup> E' ukuòkij tã a' tò ikló'ú tã u wé a' a' tò ikateke, e' wékkò kátke patiúka a' tò ipé wa. <sup>8</sup> Ká e' nañewe chkè e' katò katuule bõ' a' ár bacha'bacha tã ñies pan kè yòule iwölöwòka wa, ese tã. <sup>9</sup> Kè ikatar aki ena paliule elkela wè'ia. Ichkã kòs, iwòkir, iklã'tska, ena ññattse e' kòs kawõtã kakuéwã bõ' a'. <sup>10</sup> Kè a' tò ibata mukat dö bule es. Ibata atëja, e' tã ñña'ülör bõ' a'. <sup>11</sup> Mik a' chkòketke etã a' e' paiò, a' klòkkuò iò, a' shko kéli klò'ú. Ye' dör Jehová e' tò a' tsatkeke e' kèwò tkò'weke a' tò, e' kuekji a' chkò bet.

<sup>12</sup> “ I'ñe nañewe ye' tkòraè Egipto kã kòs a' egiptowak ala'r tsã wëm esepa ttökulur. Ñies ie'pa yiyiwak ala'rla tsã dör wè'ñe e' kòs tteralur ye' tò. Es kèkòlpa kòs tso' egiptowak wã dalòie e' we'ikeraè ye' tò tajè. Ye' wák dör Jehová e' tò ichè es. <sup>13</sup> U kòs a' wé a' tso' e' wékkò ta'oule ipamik yiyiwak pé wa e' dör a' wakpa a' ikkachoie. Mik ye' tò pé e' sué, etã ye' damitkò u e' ttómik. Mik ye' tso' egiptowak we'ikòk siarè, etã e' kè döpa a' ska'.

<sup>14</sup> “ A' kawõtã kawò e' tkò'uk. A' kawõtã itkò'uk kekraè duas bit ekkè ye' dör Jehová e' dalòioie. <sup>15</sup> Kã dòkã kã kul e' shuã a' kè kawò tã pan yòule iwölöwòka wa ese ñuk. E' kuekji kawò tkò'weke e' diwò tsã etã pan wölöwòka kòs ese tulöttsã a' u a. Yi tò pan yòule iwölöwòka wa ese ñé kã kul e' shuã, e' tã ese wák kè kawò tã' senuk Israel aleripa shuã. <sup>16</sup> Kawò tkò'weke e' tsã diwò etã a' e' dapa'úka ek tsjní òme ye' dalòioie. Ñies e' diwò bata tã a' e' dapa'úkanè. Kã tsã ena ibata, e' diwò kè a' kawò tã' kanèblòk yès, ù è alirmi a' a. <sup>17</sup> Kawò kiè Pan Kè Yòule iwölöwòka Wa, e' kèwò tkò'uk a' kawõtã. E' è kèwò wa ye' tò a' yerattsa Egipto a' seraã. E' kuekji a' kawõtã e' kèwò tkò'uk. E' kèwò tkò'weraè a' tò kekraè. E' meneat dalòie a' a ena a' ditséwòpa datse a' itòki aishkuò tã e'pa kòs a'. <sup>18</sup> Si' i' dör duas si' tsã, e' diwò dabom eyòk kj tkèl (14) e' tsálij a' kè kawò tã pan yòule iwölöwòka wa ese ñuk dö si' i' kj diwò de dabom böyòk kj et (21), e' tsálij etã a' tò ññemine. <sup>19</sup> Kawò kul e' shuã a' kè kawò tã pan wölöwòka seuk u a. Yi tò pan yòule iwölöwòka wa ese ñé kã kul e' shuã, kã kuã'kji wakpa ò Israel aleripa, e' tã ese wák kè kawò tã' senuk Israel aleripa shuã. <sup>20</sup> E' kuekji i kòs yòule pan wölöwòka wa, ese kè ñar yès. Wé a' tso'rò eë tã a' kè kawò tã pan yòule iwölöwòka wa, ese ñuk.”

<sup>21</sup> Etã Moisés tò Israel aleripa kueblupa dapa'wé tã ichéitò ia: “A' wakpa bil ekkè yú

obeja ò chibo klò'uk etò etò, tsúmi a' u a' a' yamipa a. Ittòwã, Jehová tò se' tsatkere i'ñe, e' kèwò tkò'woie. <sup>22</sup> Ipé klò'ú tka' a. Etã kakò kiè hisopo e' ulã klò'ú eyòk, e' nuúka pé wa, e' wa u wékkò kátke patiúka. Kè a' e' yòkulur u a' kam kã ñir e' yòki. <sup>23</sup> Mik Jehová tkòmi egiptowak ttökulur, etã ie' tò u wékkò e' kátke sué iaulekã pé wa etã ie' damitkò u e' ttómik. Es Jehová kè kawò mepa ibiyòchòkwak tò s'ttekelur e' a' a' ttökulur weshke. <sup>24</sup> A' kawõtã ttè i' kòs dalòioik kekraè, ñies a' aleripa kòs datse a' itòki e'pa kawõtã idalòioik. <sup>25</sup> Mik a' demi kã ye' Jehová tò tò imeraè se' a' eë, etã a' kawõtã kawò i' tkò'uk. <sup>26</sup> Mik a' ala'r tò ichakè a' a': “¿Iòk se' tò kawò i' tkò'weke?”, <sup>27</sup> etã a' kawõtã iütòk: ‘Iyiwak i' ttekesò Jehová dalòioie ie' tò se' tsatkè' egiptowak ulã a' e' kuekji. Mik ie' bakmi egiptowak ttökulur, etã ie' bakmi se' Israel aleripa u ttómik kè dè'wã. Es ie' tò se' yamipa tsatkè'lor.”

Etã Israel aleripa e' tkélur kuchè kj Jehová dalòioie. <sup>28</sup> E' ukuòkij tã ie'pa miã iwakanewé wes Jehová tò iché Moisés ena Aarón a' es.

#### *Ala'r wèpa kibipa esepa duolur*

<sup>29</sup> Kã shabòts Jehová tò egiptowak ala'r wèpa kibipa esepa kòs ttélur seraã. Egipto blú tso' s'wòkirie e' alã wëm kibi e' duowa. Egiptowak malepa icha kòs dö s'tso' wòtèule s'wòto wé a' e'pa ala'r wèpa kibipa e'pa duolur ñies. Ñies yiyiwak alã wè'ñe kibi e' kòs duolur. <sup>30</sup> E' nañewe Egipto blú ena ikueblupa ñies egiptowak kòs e'pa e' kèkarak seraã ñik ème. Kè u ku' yès e' kè a' s'nu ku'. <sup>31</sup> E' nañewe Egipto blú tò Moisés ena Aarón tsuk patké tã ichéitò ia:

—A' yúshka a' yamipäe. A' e' skò bänet sa' yòki. A' yúshka Jehová kíkòkka wes a' tò iyé' kuaè es. <sup>32</sup> Iyiwak kòs tsúmi wes a' kj ikiane es. A' yúshka sa' yòki. Ñies a' kkòchò Jehová a' as ie' ye' kímù.

<sup>33</sup> Etã egiptowak tò iché Israel aleripa a: “A' yúshka betbet sa' yòki. A' kè mine e' tã sa' ulitane duòralur.” <sup>34</sup> Israel aleripa tò harinachka, kè wòtuule iwölöwòka wa, ese patrèwã tka'è idatsi' a' iéka ppéka kul' kj tã imíyal. <sup>35</sup> Ie'pa tò orochka ena inukòlchka ena datsi' e' kòs kak kiè egiptowak a' wes Moisés tò iyé' ia es. <sup>36</sup> Jehová tò egiptowak kè Israel aleripa dalòioik e' kuekji ie'pa tò iyi kòs kak kiérakitò e' mé Israel aleripa a. Es Israel aleripa tò egiptowak iyi bua'buu e' kòs tsémi.

#### *Israel aleripa e' yélur Egipto a*

<sup>37</sup> Israel aleripa e' yélur Ramsés, míyal Su-cot. Ie'pa wèpa kibineonetke dòkã 600.000. Alakòlpa ena ala'rla kè shtaoule. <sup>38</sup> Ie'pa tã pé' kuã'kipa mí ñies tajè. Ñies yiyiwak mírak iwa tajè obeja ena chibo ena baka. <sup>39</sup> Egiptowak tò Israel aleripa ka' e' yòktsã bet kè wã kawò meneat ie'pa a

uloie, e' kuęki ie'pa wa harinachka mir kę iwölöwoka ta'. E' wa ie'pa pan yuę ñala kị.

<sup>40</sup> Israel aleripa bak senuk Egipto duas doka cien tkęyök kị dabom mañayök (430). <sup>41</sup> Ie'pa senę Egipto duas doka cien tkęyök kị dabom mañayök (430) tas, eta e' nañewe wöshae ta' ie'pa e' yęlur Egipto a iditsęwö wa iditsęwö wa węs ñippökwapka taję es. <sup>42</sup> E' nañewe Jehová tö ie'pa kko'ne buaę as ie'pa e' yölur Egipto a. E' kuęki nañewe e' kęwö kawöta tkö'wę wöñine wa duas bit ekkę kękraę Jehová dalöioie.

*Węs Israel aleripa kę itsatkęne e' kęwö tkö'uk*

<sup>43</sup> Jehová tö ichę Moisés ena Aarón a:

“Ye' tö a' tsatkeke egiptowak ulä a e' kęwö tkö'uk a' kawöta i' es: Kä kua'kị wakpa esepa kę kawö ta' obeja ö chibo tteke a' tö e' kęwö ska' ta' ese chkä katök. <sup>44</sup> Erę ká kua'kị wakpa wępa ena alakölpa wępa to'ttsatke a' tö kanę męsoie ena e' wępa tottola kkuölit tęule tsir, esepa e' tö ikatęmi. <sup>45</sup> Erę ká kua'kị wakpa tso' shkar ö kanęblök inuköl klö'uk, esepa kę kawö ta' ikatök. <sup>46</sup> A' kawöta chkę e' katök węshke. A' kę kawö ta' chkę e' tsukmi u'rki yęs. Nies a' kę kawö ta' idichęwö pükwa. <sup>47</sup> Israel aleripa ulitane kawöta kawö e' tkö'uk. <sup>48</sup> Erę a' shua'kị wakpa tso' senuk esepa ena kawö e' tkö'wak a' ta' Jehová dalöioie e' ta' as itö itkö'ũnak. Erę kęwe ie'pa tö iyamipa wępa ulitane tso' ie' u' a' e'pa keraę itöttola kkuölit tök tsir. E' ukuökị ta' ie'pa kawö tkö'węmi a' ta' a' yamipae. Erę wępa kę tottola kkuölit tęule tsir esepa kę kawö ta' a' kawö tkö'uke e' chkę katök. <sup>49</sup> A' ulitane ena ká kua'kị wakpa serke a' shua' e' kawöta ttę i' dalöiök ñikkę.”

<sup>50</sup> Israel aleripa tö ttę i' kos iutę węs Jehová tö ichę Moisés ena Aarón a es. <sup>51</sup> E' diwö Jehová tö Israel aleripa yęlur Egipto iditsęwö wa iditsęwö wa węs ñippökwapka taję es.

**13**

<sup>1</sup> Jehová tö ichę Moisés a:

<sup>2</sup> “Israel aleripa ala'r wępa kibi esepa kos dör batse'r ye' a. Nies a' iyiwak alä tsá węñe e' kos dör batse'r ye' a. E' kuęki e' kos blö ye' a.”

<sup>3</sup> Eta Moisés tö ichę Israel aleripa a: “Iñe Jehová tö a' yekettsa Egipto a ie' dichę taję e' wa. Kä i' a' a' weine siarę kanęblök egiptowak kę patuę ta'. E' kuęki a' er anü diwö i' ska'. A' kę kawö ta' pan yöule iwölöwoka wa ese ñuk. <sup>4</sup> Iñe a' e' yökettsa, si' i' kię Abib e' a. <sup>5</sup> Mik a' demi ká muk Jehová kablę' se' yępa bak ká iaię e'pa a ee, eta a' kawöta kawö i' tkö'uk si' i' a. Kä e' kị iyi ulitane tskir buaę, iwä wör buaę shute. Kä e' dör canaanwak, hititawak, amorreowak, heveowak ena jebuseowak, e'pa ká. <sup>6</sup> A'

kawöta kawö i' tkö'uk i' es: Kä kul shua' a' kę kawö ta' pan yöule iwölöwoka wa ese ñuk. Kawö e' diwö bata, eta kawö tkö'weraę bua'ie Jehová dalöioie. <sup>7</sup> Kawö kul e' shua' a' kę kawö ta' pan yöule iwölöwoka wa ese ñuk. Pan wölöwoka ena pan yöule iwölöwoka wa ese kos kę kawö ta' se'wę e' tö a' ká kos e' a. <sup>8</sup> E' diwö ta' a' tö ichö a' ala'r a: Kawö e' tkö'weke se' tö, e' wä dör tö Jehová tö se' yęlur Egipto a. <sup>9</sup> Ie' tö se' yę'ttsa Egipto a idichę taję wa, e' kuęki se' dör ie' icha. Mik se' tö kawö e' tkö'weke, eta e' tö se' ulitane a ieri meraę as Jehová ttę kị se' er me'rie. E' dör węs se' e' wakyuð se' wötsa kị ena se' ulä kkuę kị es. <sup>10</sup> E' kuęki a' kawöta kawö e' tkö'uk duas bit ekkę idiwö i' e' wa.

<sup>11</sup> “Ká iaię Jehová tö iyę'at a' yępa a tö ie' tö canaanwak ká meraę a' a. Mik ie' wa a' demi ká e' a, <sup>12</sup> eta a' kawöta a' ala'r wępa kibi esepa kos blök ie' e' a' e'pa kos dör ie' icha, e' kuęki. Nies a' iyiwak parke kos węñe, e' kibi kos e' dör ie' icha, e' kuęki ese kawöta blę ie' e' a. <sup>13</sup> Eta obeja węñe pupula ö chibo węñe pupula e' mú a' tö burro alaki e' alä węñe kibi e' skęie burro alä tsatkoie. Erę a' kę a' patuę es, e' ta' burro alä węñe kibi e' kuli' püwa. Es a' kawöta a' ala'r wępa tsá kune esepa kos skęie iyiwak muk itsatkottsä. <sup>14</sup> Aishkuö ta' mik a' ala'r tö a' chakeke tö: 'ziök a' tö ikanewę i' es?', eta iutö: 'Jehová tö se' yę'ttsa Egipto a idichę taję e' wa. Eę se' bak weinuk siarę kanęblök kę patuę ta'. <sup>15</sup> Mik Egipto blü er tę'wa dareręe, ie' kę wa kawö męne se' a' e' yöktsane ie' ká a, eta Jehová tö egiptowak ala'r wępa tsá kune e'pa kos ttęlur. Nies iyiwak alä węñe kibi e' kos ttęluritö. E' kuęki se' tö se' iyiwak alä węñe kibi, ese kos meke Jehová a. Nies se' ala'r wępa tsá kune, ese skęie iyiwak mekesö Jehová a itsatkottsä. <sup>16</sup> E' kuęki kawö i' tkö'ú as kę a' ena ichöwa tö Jehová tö a' yę'ttsa Egipto a idichę taję e' wa. E' dör węs se' e' wakyuð se' wötsa kị ena se' ulä kkuę kị es.”

*Jehová tö Israel aleripa węttseke mö wa*

<sup>17</sup> Mik Egipto blü tö Israel aleripa emi, eta Skéköl tö ibikeitsö tö Israel aleripa muk kę ñippö filisteowak ta, e' ta' ie'pa bitumiane Egipto. E' kuęki ie' kę wa ie'pa węttsenemi ñala michoę filisteowak ká a' e' wa, e' dör ñala yęsýsę. <sup>18</sup> E' kuęki tö ie'pa węttsemi bänet kamię ñala tköke ká sir po e' shua' dötsa dayę kię Dayę Mat e' ska'.

Israel aleripa e' yę'lur dapauleka węs ñippökwapka taję e' e' dapa'ü es. <sup>19</sup> Moisés wa José sik kęchke e' mítser ie'pa ta' ñita. Kam José blęrwä e' yöki ie' tö iyę' ięlpä a: “Mokị Skéköl dörane a' tsatkök. Mik e' wä tka, eta ye' sik tsümi a' ta.” Es ie'pa tö kawö mé ñi a. E' kuęki Moisés wa José sik mítser ie'pa ta.



<sup>20</sup> Etä Israel aleripa e' yélur ká kiè Sucot míyal ká kiè Etam, ee ie'pa e' tséat. Ká e' ate ká sir po e' kkömik tsinet. <sup>21</sup> Nñiwe ta Jehovahá tò ie'pa wéttsege mò àr tajè alabo e' wa. E' mir ie'pa yòki kewe ñala kkachoiè ie'pa a. Nañewe ta mò e' wõnarke bõ'wõie dalöburke. E' wa ie'pa shkõmir wes ká ñiwe es. <sup>22</sup> Niwe ta mò e' mir kekraè ie'pa yòki kewe. Nañewe ta mò e' wõnarke bõ'wõie e' mir ie'pa yòki kewe.

## 14

### *Israel aleripa tkattsa Dayè Mat a*

<sup>1</sup> Etä Jehovahá tò iché Moisés a:

<sup>2</sup> "Ichõ Israel aleripa a: A' yúne a' itõ wane ta a' e' tsúat ká kiè Pi-hahirof e' wõsha. Ká e' ate ká kiè Migdol ena dayè kkömik e' shusha, ká kiè Baal-sefón, e' wõsha. E' wõsha dayè kkömik tsinet úla yuó. <sup>3</sup> Es Egipto blú tò ibikeitseraè: 'Israel aleripa kè wa ijcher wé imi'kiró. Ie'pa cholurmi ká sir po, e' shusha.' <sup>4</sup> Erè ye' tò ie' er terawa darèrè as ie' tò a' tòtiümü. Ye' e' alóraká ie' kí ena ñippökwa ká ká, e' wa ye' dalóierdaè tajè. Egiptowak ulitane wa ijcherdaè tò mokí ye' dór Jehovahá."

Etä Israel aleripa tò iwakanewé es. <sup>5</sup> E' dalewa Egipto blú wòki ibiyó demí tò Israel aleripa tkayal. Ie' ena ikueblupa erbikéne kuá'ki ta ichérakitó ñi a: "¿Wes se' tò i wamblé i' es? ¿Iie se' tò Israel aleripa émi ta yi kanebloñiia se' a?"

<sup>6</sup> E' ukuókí bet ta Egipto blú tò ikarreta tso' ñipooie e' tsuk patké ta ñippökwa patkéitò ñi dapa'uk. <sup>7</sup> Etä imiá Israel aleripa itókí karreta ñipooie ibua'buá dóká cien teryók (600) ekkè. Egipto karreta ñipooie e' malepa kos mírak iwá ñies. Karreta kos e' a ñippökwa wókir shkóke ek ek. <sup>8</sup> Jehovahá tò Egipto blú er daré'wéwa as ie' mi' Israel aleripa itókí erè ie'pa yénettsa Egipto a Jehovahá diché tajè wa.

<sup>9</sup> Etä Egipto ñippökwa mirwa kabaio kí, karreta kí, e'pa kos tò Israel aleripa tòtiémi kuérakitó wé Israel aleripa tso' dayè kkömik ká kiè Pi-hahirof e' o'mik ena ká kiè Baal-sefón, e' wõsha. <sup>10</sup> Mik Israel aleripa isué tò egiptowak datse, e' tò ie'pa suawé tajè. Ie'pa kóché tajè Jehovahá a tò sa' tsatkó. <sup>11</sup> Moisés a ichérakitó:

—¿Iima be' ikló'wé pò kè ta' Egipto, e' kuéki be' tò sa' ye'ttsa duókwa íe ká sir po shuá? ¿Iók bõ iwamblé es sa' ta? ¿Iie be' tò sa' ye'lur Egipto a? <sup>12</sup> Kuaè sa' tò be' a iyé' Egipto: 'Sa' muát kaneblok bèrè egiptowak a. ¡Sa' weirke siarè kaneblok egiptowak a, e' dór bua' sa' a duókulur íe ká sí poè a e' skéie!'

<sup>13</sup> Erè Moisés tò iituté:

—Kè a' tò egiptowak suupaia. E' kuéki kè a' suanuk. A' e' tkówa darèrè. I'ñe Jehovahá tò a' tsatkeraè e' saú. <sup>14</sup> Kè se' tkinuk i kí. Jehovahá ñippóraè se' skéie.

<sup>15</sup> Jehovahá tò iché Moisés a:

—¡Kè be' kkóchókí ye' a! Ichõ ie'pa a tò a' shkó wówi è. <sup>16</sup> Be' shko kéli kóka dayè tsaka as dayè blaténar ñaláie shkotkó poppo dayè shuá. <sup>17</sup> Erè ye' tò ie' er terawa darèrè as ie' tò a' tòtiümü. Ye' e' alóraká ie' kí ena ñippökwa ká ká, e' wa ye' dalóierdaè tajè. Egiptowak ulitane wa ijcherdaè tò mokí ye' dór Jehovahá. <sup>18</sup> Egiptowak ulitane wa ijcherdaè tò mokí ye' dór Jehovahá.

<sup>19</sup> E' wõshaè ta Skèkól biyóchókwak mirwa Israel aleripa yòki kewe e' e' mane wéttseane ie'pa tsikkane. Nies mò àr tajè alabo e' mia ie'pa tsikkane. <sup>20</sup> Es mò e' ate Egipto ñippökwa ena Israel aleripa e' shusha. Egiptowak kke mò ettaie dór tsettsèe, e' kuéki ie'pa tso' ká tsettsè a. Erè Israel aleripa kke mò e' dalöburke tajè ká ñiwe sù. E' kuéki egiptowak kè ulá dè' Israel aleripa ska' e' nañewe.

<sup>21</sup> Etä Moisés ulá kéká dayè tsaka ta Jehovahá tò siwa' bitsiwéka darèrèe datse diwó tskirke e' éka. E' bitsijne nañèe dayè kí. E' tò dayè blatée shusha. Es Jehovahá tò ká ulat poppo yué ñaláie dayè shuá ie'pa a shkotkó. <sup>22</sup> Ie'pa tkami ká poppo a. Es dayè wótuki ate wí'ké ió'kè.

<sup>23</sup> Etä egiptowak ñippökwa mirwa kabaio kí ena karreta kí e'pa kos tò Israel aleripa tòtiémi dayè a. <sup>24</sup> E' bla'mi ká ñirketke etá mò wõnarke bõ'wõie e' shuá Jehovahá tso' egiptowak sauk. Ie' tò ie'pa suawéka tajè e' tò ie'pa wóá ká chówéka tajè. <sup>25</sup> Nies ie' tò ie'pa karreta wõshki kos e' wótélur dó a as kè ishkó bet. Ie'pa tò iché ñi a:

—Mishka Israel aleripa yòki. Jehovahá tso' ñippök se' ta ie'pa tsatkoie.

<sup>26</sup> Jehovahá tò iché Moisés a:

—Be' ulá kóka dayè tsaka as iwóierwane Egipto ñippökwa kí.

<sup>27</sup> Moisés ulá kéká dayè tsaka. Mik ká ñine, etá dayè wóienewane es. Mik egiptowak mí tkóshkar, etá dayè wóienewá ie'pa kí. Es Jehovahá tò ie'pa ewéwa dayè a. <sup>28</sup> Es Egipto ñippökwa mineyal Israel aleripa itókí e'pa kos durulune seraá dayè a ikabaioè. Egipto blú ñippökwa e' kè ate yés tstsé'ka. <sup>29</sup> Erè Israel aleripa tkami buaè dayè a dõ wishet ká sí kí, dayè wótuki wí'ké ió'kè e' shusha.

<sup>30</sup> E' kewa Jehovahá tò Israel aleripa tsatkée egiptowak ulá a. Ie'pa tò egiptowak nu sué dayè kkömik. <sup>31</sup> Mik ie'pa tò isué tò wes Jehovahá tò egiptowak ewéwa idiché tajè e' wa, etá ie'pa tò ie' dalóie tajè. Ie'pa er blé ie' mik ñies ittekól Moisés e' mik.

## 15

### *Moisés tò Jehovahá kíkéka ttsé wa*

<sup>1</sup> Moisés ena Israel aleripa ttsé Jehovahá kíkóka ttsé i' wa:

“Ye' tsoke Jehovahá dalóioie.

Kabaio tajë ena iwákpa kôs e' ewéwaitö dayë a.

Es ie' e' alé tajë shutë ie'pa kí.

<sup>2</sup>Ye' tso' ttsök Jehová ë a.

Ie' tò ye' a idiché mé. Ie' tò ye' tsatkéé.

Ie' dör ye' Këköl. Ye' kawötä ie' kikökka buaë.

Ie' dör ye' yë Këköl. Ye' tò ie' dalöieraë er mokj wa.

<sup>3</sup>Ie' dör ñippökwa darërë bua'ie.

Jehová e' dör ie' kië.

<sup>4</sup>Egipto blú karreta tso' ñippoie ena ie' ñippökwakpa

e'pa kôs émi dayë a Jehová tò.

Egipto blú ñippökwakpa bua'bu

e'pa kôs duolur së Dayë Mat a.

<sup>5</sup>Ie'pa katsirulune dayë shuä wës ák es.

Dayë iskië e' ë me'r ie'pa kí.

<sup>6</sup>A Jehová, be' ulà bua'kka diché tajë,

e' wa be' tò be' bolökpa batsélor.

<sup>7</sup>Ie'pa demi ñippök be' ta,

erë ie'pa kôs ewéwa be' tò be' diché tajë, e' wa.

Be' ulunekä ie'pa kí,

tä ie'pa ñanewä wës kákó sí es.

<sup>8</sup>Dayë wöikébö darërëë

tä iwöklönewaie wj'kë iö'kë

míä wës ká ukuö es.

Dayë wöklönewä, kë shkökü'ia.

<sup>9</sup>Be' bolök e' ttsékä tajë tä iché:

'Ye' mi' ie'pa itökj wéyö ikuérö

tä eë ì mirwarak iwä e' yerattsayö iulä a,

e' wä tierayö kôs ye' kí ikiane ekké.

Ye' tabë yerattsä inäléka,

e' wa yö ie'pa tterawä.'

<sup>10</sup>Erë be' tò dayë wöiké tä e' tò ie'pa ttélur.

Ikatsjnewä dayë a wës tabechka es.

<sup>11</sup>A Jehová,

jWépa skä kiekerakitö "skëköl", esepa kôs tsatä be' dör!

jKë yi dör batse'r tajë wës be' es!

jKë yi diché tä' tajë wës be' es!

jÌ kë or yi a ese wë be' tò buaë, e' tò sulitane tkiwëwä!

jSulitane kawötä be' kikökka!

<sup>12</sup>Be' ulà bua'kka kékä

tä iyök tò ie'pa maléwä.

<sup>13</sup>Be' tò sa' tsatkéé. Be' éna sa' dalër tajë,

e' kuëkj be' tso' sa' wëttsük.

Be' wä sa' mi'ke be' diché wa dö wë be' wák serke eë.

<sup>14</sup>Mik ká ulitane wakpa wä e' jchënewä,

etä ie'pa painuraë suane ë wa.

Filisteowak krardawä suane ë wä,

<sup>15</sup>Edomwak wökirpa chkerdawä suane ë wä,

Moabwak wökirpa painuraë tajë.

Canaánwak ulitane kësik kôs e' chörawa yës.

<sup>16</sup>A Jehová, jas ie'pa tkirwä! jas ie'pa suar tajë!

Be' diché wa as ie'pa at kë tiria suane kuëkj dö mik sa' ulitane dör be' icha e'pa tka etä.

<sup>17</sup>A Jehová,

Sa' tseramibö döka be' kabata buaë e' a.

Eë sa' serdaë buaë këkraë.

Kabata e' shukitbö be' a senoië.

Eë be' wák e' wé yué e' dör yöbië.

<sup>18</sup>Jehová tso' se' wëttsük s'blúie këkraë."

*María tò Jehová kikéka ttsë wa*

<sup>19</sup>Mik Egipto blú ñippökwakpa tkawä dayë

a kabaio kí, karreta kí, etä Jehová tò dayë

wöiéwane ie'pa kí erë Israel aleripa tka buaë

ká poppo a. <sup>20</sup>E' ukuökj tä Jehová tteköl

kië María, e' dör Aarón kutä, e' tò ma'ma

klö'wéwä ttsoie, tä alakölpä kôs mí ie' itökj

klötökerak es ima'ma blardami. <sup>21</sup>E' dalewa María ttsöke i' es:

jA' ulitane tsö Jehová kikökä!

Kabaio ena iwákpa uyéwaitö dayë a.

Es ie' e' alékä ie'pa kí.

*Jehová tò di' bacha'bachaë e' bua'wéne.*

<sup>22</sup>Moisés tò Israel aleripa ké e' yöktsä Dayë

Mat e' kkömik. Ie'pa míal ká sir poë kië Sur

e' a. Eë ie'pa shkére ka mañat etä kë ie'pa

wä di' kune yë yës. <sup>23</sup>Mik ie'pa demi ká kië

Marä, etä eë di' tso' bacha'bachaë, kë yar

ie'pa a. E' kuëkj ká e' kië mékarakitö Marä\*

<sup>24</sup>Etä Israel aleripa tò Moisés chémi su-

luë. Moisés chakerakitö: "¿Ì yëmisö?" <sup>25</sup>Etä

Moisés tò Jehová a ikië tò sa' kimú. Etä Je-

hová tò ie' a kal tsitsir kkaché elka e' iéwäitö

di' a etä di' baché chowa de buaë yë.

Eë Jehová tò ittë dalöiëno mé ie'pa a, ñies

ie'pa ma'wëitö isuöie tò ie'pa tò idalöiëmi.

<sup>26</sup>Ie' tò iché ie'pa a: "Ye' dör Jehová. Ye' dör

a' Këköl. Ye' dör a' bua'ukwak. Ì cheke ye' tò

a' a' e' tsé a' tò, e' iüté a' tò ñies a' sené buaë

wës ye' kí ikiane es, e' tä ye' kë tò a' we'ikepa

ì sulu patké'yö egiptowak kí ese wa."

<sup>27</sup>E' ukuökj tä ie'pa demi ká kië Elim. Eë

di' tum tso' döka dabom eyök kj böt (12). Ñies

ì klö tso' dikó klö sù ese tso' dabom kuryök

(70). Eë ie'pa e' tséat di' kkömik tsjnet.

## 16

*Jehová tò Israel aleripa tié chké kië maná e' wa*

<sup>1</sup>E' ukuökj tä Israel aleripa ulitane e' yélur

ká kië Elim míal ká sir poë kië Sin eë. Ká e'

atë Elim ena Sinaí, e' shushä. Ie'pa e' yë'ttsä

Egipto e' kí si' de e' kí shäbötö. <sup>2</sup>Etä eë ká sir

poë shuä ie'pa ttëmi tajë kësik wa Moisés ena

Aarón kí. <sup>3</sup>Ie'pa tò iché iarak:

—Jehová tò sa' tópalur Egipto! Eë sa' e'

tulökeser ù tulturkä wä iëule chikchië chké

\* 15:23 Marä: Hebreoie Marä e' wä kiane chë ì bacha'bacha.

wa e' o'mik ta sa' bak iwà katòk wè' kòs sa' k'j ikiane ekkè. Erè a' wà sa' dè'bitu ká sir po i' a sa' ulitane ttowà bli wa.

<sup>4</sup> Jehová tò iché Moisés a:

–Súyò pan da'wè siwa' k'j a' a. E' shtò ká bit ekkè. Erè ishtò kòs iñar ká etkè ekkè è. Ye' k'j ikiane suè tò wépa tò ye' ttò iutèmi ena wépa kè tò ye' ttò iutepa. <sup>5</sup> Ká de teròl e' bule es ta a' tò chké k'j shtò wè' katar ká bót ekkè. Es a' tò iú kekraè.

<sup>6</sup> Eta Moisés ena Aarón tò iché Israel aleripa a:

–I'ñe tsálij ta a' tò isuèraè tò mokj Jehová tò se' yè'lur Egipto a. <sup>7</sup> A' ttòke kèsik wa e' ttsé ie' tò, e' kuekj bule bla'mi ta ie' wák olo tajè dalölöe e' suèraè a' tò. I cheke ie' tò sa' a' è chòkne sa' tso' a' a. E' kuekj a' kè ulurku' sa' k'j. A' ulurke ie' k'j.

<sup>8</sup> Nies Moisés tò iché iarak:

–A' ulurke tajè e' sué Jehová tò. E' kuekj i'ñe tsálij ta ie' tò iyiwak chká patkeraè a' a. Bule bla'mi ta pan patkeraèitò a' a ñè tajè kòs a' k'j ikiane ekkè. Sa' kè dör iy, as a' ulur sa' k'j. A' ulurke Jehová k'j.

<sup>9</sup> E' ukuökj ta Moisés tò iché Aarón a:

–Ichò Israel aleripa a' tò a' ttòke kèsik wa e' ttsé Jehová tò e' kuekj a' e' dapa'ú Jehová wörkj.

<sup>10</sup> Aarón tso' ttòk ie'pa ta, e' dalewa ie'pa ulitane ká sué ká sir po e' èka. Ie'pa isué tò Jehová olo dalölöe dettsa mò tso' ie'pa wètttsuk e' a. <sup>11</sup> Eta Jehová tò iché Moisés a:

<sup>12</sup> –Israel aleripa ttòke kèsik wa, e' ttséyò. Be' ttò ie'pa ta, ta ichò iarak: 'I'ñe tsálij a' tò iyiwak chká kateraè. Bule bla'mi ta a' tò pan ñeraè kòs a' k'j ikiane ekkè. Es a' wà ijcherdaè tò ye' dör Jehová, e' dör a' Kéköl.'

<sup>13</sup> Ká e' tsálij ta tajè dù debitu káklò sù. E' tò wé ie'pa serke e' wà iéwa seraa. Eta bla'mi ta upa kòs shkene mò wöli è. <sup>14</sup> Mik mò wöli kaneka, eta itòq jskj i' a' ta taklaie sabubula. <sup>15</sup> E' kè sùule Israel aleripa wà. E' kuekj mik ie'pa tò isué, eta ie'pa tò iché ñi a: “¿Diò dör i?” Eta Moisés tò iché iarak:

–E' dör pan mé Jehová tò a' a ñè. <sup>16</sup> Ie' tò iché tò a' kawòta iuk i' es: A' tò ishtò eköl eköl kòs a' tso' u a' e' a' iñar ekkè è. Ishtò skátke bót ulatòk wák eköl eköl a.

<sup>17</sup> Eta Israel aleripa ishté wés ikéwò mène es. Welepa tò ishté bérébèrè, welepa tò ishté kibiie. <sup>18</sup> Mik ie'pa tò ima'wé, eta wé tò ishté tajè ese icha kè bata a' a. Wé tò ishté bérébèrè ese icha deka wè'. Ie'pa ulitane tò ishté eköl eköl kòs iñar ekkè è. Es sulitane iñè wè'.

<sup>19</sup> Moisés tò iché ie'pa a: “Kè a' kawò ta' pan e' blök dö bule es.”

<sup>20</sup> Erè welepa kè wa Moisés ttò iutène. E'pa tò icha bata blé dö bule es. E' a' òña

iènekà ena ilabunekà suluè. E' kuekj Moisés ulunekà ie'pa k'j.

<sup>21</sup> Mik d'ba ba'nebitu, eta pan e' diarolone, e' kuekj ie'pa wakpa bik tò ishteke bla'mi kòs iñar ekkè. <sup>22</sup> Erè mik ká de teròl, eta ie'pa ishté dö iñar ká bót ekkè. E' dör skátke tkèl wák eköl eköl a. Eta Israel aleripa wörkirpa miá ichòk Moisés a. <sup>23</sup> Eta Moisés tò iché ia:

–Jehová tò ichè tò a' kawòta iuk i' es: Bule dör eno diwò. Diwò e' dör se' a' ie' dalòioie. A' kè kawò ta' ulòk e' diwò wa. E' kuekj i' aleke a' tò e' alò i'ñe. Ibata a' e' blò ñè bule.

<sup>24</sup> Eta ie'pa tò iwé wés Moisés tò iché es. Ie'pa tò chké bata a' e' blé dö bule es. Eta kè ilane sulu, kè ia' òña iènekà. <sup>25</sup> Eta Moisés tò iché ie'pa a:

–I'ñe dör eno diwò e' dör se' a' Jehová dalòioie. I'ñe kè i' kuepa a' tò ñè u'rkj. E' kuekj chké bata a' e' è ñú. <sup>26</sup> A' ishtèmi kekraè dö ká teròl. Erè e' bule es dör eno diwò, e' diwò kè a' tò i' kuepa u'rkj.

<sup>27</sup> Eta eno diwò shua ie'pa welepa miyal chké shtòk, erè kè iwà i' kune yès. <sup>28</sup> Eta Jehová tò iché Moisés a:

–¿E'ma kòs a' tò ye' ttè dalòsgewemirò? <sup>29</sup> A' éna ianú tò ye' dör Jehová, ye' tò eno diwò me'atbak a' a. E' kuekj eno diwò e' chki es ye' tò a' a' chké meke tajè ñè ká bót ekkè. E' kuekj a' ulitane kawòta senuk wèshke è eno diwò wa. Kè a' patkène bánet.

<sup>30</sup> E' kuekj Israel aleripa enuke diwò e' wa, kè kaneblènerak.

<sup>31</sup> Israel aleripa tò chké shteke e' kiè méka maná\* Iwà chká dör saruruè wés suiyòk es. E' dör blo'bloè wés pan yöule bul alí wa es.

<sup>32</sup> E' ukuökj ta Moisés tò iché:

–Kanè i' me' Jehová tò se' a: 'Maná e' iò skátke bót ekkè ta i'hlò a' aleripa a' k'kachè as ie'pa tò chké me' ye' tò a' a' ká sir poè e' a' mik a' yè'ttsayò Egipto eta, e' saù.'

<sup>33</sup> Eta Moisés tò iché Aarón a:

–Tka' klò'ú et, e' a' maná iò skátke bót ekkè. E' blò Jehová wörkj as a' aleripa tò isaù.

<sup>34</sup> Eta Aarón tò maná e' blé wé Jehová a' i'yi tso' blèule, e' kélkuò wòshgè wés Jehová tò iyè' Moisés a es.

<sup>35</sup> Israel aleripa bak maná ñuk dö mik ie'pa demi wé pè' serke e' eta. E' dör Canaán kkòmik. Ie'pa bak maná ñuk duas dòka dabom tkéyòk (40) seraa.

<sup>36</sup> (I' wa Israel aleripa tò maná ma'wé, e' kiè ie'pa tò gomer. E' wà dör skátke blublu bót ekkè. E' dör litro bót ulatòk.)

## 17

### Ák a di' dettsa

<sup>1</sup> Israel aleripa ulitane e' yélur ká sir po kiè Sin e' ta imiá ñalà k'j enaena wés Jehová tò

\* 16:31 maná: Hebreoie maná e' wà kiane ché ¿Diò dör i?

iyë' iarak es. Ie'pa demirak ká kiè Refidim, eë ie'pa e' tséat. Erë eë di' kē tā' ie'pa a yē.  
 2 E' kueḳi ie'pa tō Moisés a di' kié kēsik wa. Ie'pa tō iché ie' a:

—iSa' a di' mú ye!

Moisés iiuté:

—ǀI kueḳi a' tō ye' a di' kié kēsik wa? ǀIók a' tō Jehová wōñatkeke?

3 Ie'pa ersine tajē e' kueḳi ie'pa tō di' kiek-erak kēsik wa Moisés a. Ie'pa tō iché ie' a:

—ǀIók be' tō sa' ena sa' ala'r ena sa' iyiiwak e' yē'lur Egipto a ttēwā ersir wa?

4 Etā Moisés kkōché tajē Jehová a tā ichéitō iā:

—ǀWes ye' ie'pa i' wēmi? ǀTsir etā ie'pa ye' ttēwā ák wa!

5 Jehová tō iiuté:

—Be' yú ie'pa wēttsē kēweie. A' kueḳlupa wēlepa tsúmiñak. Be' shko kéli wa be' tō di' kié Nilo e' buk, e' tsúmi. 6 Be' yú Horeb kēbata\* a. Eë ye' be' paneke ák bērie tso' e' ska'. Mik be' tō ák e' ppé be' shko kéli wa, etā di' dōratsā tajē ie'pa a yē.

Etā es Moisés tō iwakanewé Israel aleripa kueḳlupa wōrkj. 7 Israel aleripa tō di' ki' kēsik wa, e' kueḳi Moisés tō ká e' kié méka Meribá.† Nies ie'pa tō iyē, "Sa' kē wā iklōne tō Jehová tō sa' kímēmi." E' kueḳi Moisés tō ká e' skā kié méka Masá.‡ Eë ie'pa tō Jehová wōñatké' e' kueḳi.

*Amalec aleripa ñippé Israel aleripa tā*

8 Amalec aleripa debitu ñippök Israel aleripa tā Refidim. 9 Moisés tō iché Josué a:

—Be' tō se' wēpa wēlepa shushtō tsúmi ñippök Amalec aleripa tā. Bule ye' tso' kábata wōbata kǀ Skēköl shko kéli yaar.

10 Etā Josué tō iwakanewé wes Moisés tō iché iā es tā imiýal ñippök Amalec aleripa tā. E' dalewa Moisés ena Aarón ena Hur miýal kábata wōbata kǀ. 11 Mik Moisés ulā kēka, etā Israel aleripa e' alōke ibolōkpa kǀ. Erë mik ie' ulā éwa, etā Amalec aleripa e' alōke ie'pa kǀ. 12 Ie' ulā shtrinewā tajē, e' kueḳi ie'pa ák yulē ie' a e' tkoie. Nies Aarón ena Hur e'pa tō ie' kímé ulā bōt kōkka siwā' kǀ as kē ishtrirwā. Es ie' ulā sē'wé ñiē siwā' kǀ dō katuine ekké. 13 Es Josué ena Israel aleripa e' alékā Amalec aleripa kǀ tabē wa.

14 Etā Jehová tō iché Moisés a:

—A' ñippé i' e' paké shtōkǀ yēkkuo kǀ as a' wakpa kē éna ichōwa kēkraë. Ichō Josué a tō ye' tō Amalec aleripa ulitane ewerawa yēs.

\* 17:6 Horeb kēbata: Kábata e' kié ñies Sinaí kēbata. † 17:7 Meribá: Hebreoie kié e' wā kiane chē ñippé. ‡ 17:7 Masá: Hebreoie kié e' wā kiane chē s'ma'wē. § 17:15 Jehová diché wa se' e' alékā. Iwakpa ttō wa Moisés tō iktié Jehová nisi, e' wā kiane chē Jehová dōr ye' bandera. Wēsua e' kiéitō es ie' ulā kēka Jehová a wēs bandera kēka es, e' wa ie'pa e' alékā e' kueḳi. \* 18:1 Jetró: E' kié ñies Reuel, e' dōr Moisés tayē kié Séfora e' yē. Éxodo 2.21 saú. † 18:3 Guersón: Hebreoie s'kié Guersón wā kiane chē ká kuā'kǀ wak. ‡ 18:4 Eliézer: Hebreoie s'kié Eliézer wā kiane chē ye' Kēköl dōr ye' kímukwak.

15 Etā Moisés tō ák dapa'wēka kǀ ie et iyiiwak ña'woie Jehová dalōioie. E' kié mékǀitō "Jehová diché wa se' e' alékā."§ 16 Ie' tō iché:

"ǀYe' ulā kēka Jehová a ikiök as ie' tō se' kímù! ǀJehová ñippōraë Amalec aleripa tā kēkraë!"

E' kueḳi ie' tō ikié méka es.

**18**

*Jetró de Refidim Moisés pakók*

1 Jetró dōr ká kié Madián e' sacerdote ena Moisés nuāki.\* ǀKos Skēköl tō Moisés ena Israel aleripa kímē, e' jchēr ie' wa. Nies ie' wā ijchēr tō wes Jehová tō Israel aleripa yē'lur Egipto a. 2 Moisés tō ilaköl Séfora e' patkē'mi iyē ska'. 3 Ie' tō ilā busi kiéwā buaë ila'r bōl tā. Séfora alā eköl kié Guersón. Moisés tō iyē: "Ye' sēne' ká kuā'kǀ kǀ wes ká kuā'kǀ wakpa es." E' kueḳi Moisés tō ikié méka Guersón.† 4 Ilā eköl kié Eliézer. Moisés tō iyē: "Ye' yē Kēköl e' dē'bitu ye' kímuk. E' tō ye' tsatké' Egipto blú ulā a." E' kueḳi ie' tō ikié méka Eliézer.‡

5 Moisés ulā yuékā Skēköl kēbata o'mik tsǀnet. Etā eë inuāki Jetró e' de Moisés alaköl ena ila'r bōl, e' pa tā. 6 Jetró tō iché Moisés a:

—Ye' dōr Jetró, be' nuāki, ye' debitu be' pakók. Be' alaköl ena be' ala'r bōl e'pa de ye' tā ñies.

7 Moisés e' yéttsā tā inuāki shkē'wéitō buaë dalōie wa wōalattē wa. E' ukuōkǀ tā idewarok weshkē. 8 Wes Jehová tō Israel aleripa tsatké Egipto blú ena egiptowak ulā a ñies wes ie' tō ie'pa kkō'né i' sulu tka ie'pa tā ñāla wa etā, e' kos paké Moisés tō inuāki a.

9 Kapaké e' tō Jetró ttsé'wé buaë. Jehová er bua' ché tajē Israel aleripa a. Ie' tō ie'pa tsatké'lor egiptowak ulā a. E' kueḳi Jetró ttsé'ne buaë. 10 Ie' tō iché Moisés a:

—As sulitane tō Jehová kǀkōkǀ. Ie' tō be' ena be' wakpa kos tsatké'lor buaë Egipto blú ena egiptowak ulā a. 11 Ire' ye' tō isué tō mokǀ Jehová dōr wēpa kiekerakitō "skēköl" esepa ulitane tsatǀ. Yi bak a' we'ikōk kēsik wa, e'pa kos we'ikéitō siarē.

12 Etā Moisés nuāki, Jetró, e' tō iyiiwak klō'wēwā etō ña'wéitō Jehová a idalōioie. Nies iyi skā méitō ie' a idalōioie. E' ukuōkǀ tā Aarón ena Israel aleripa kueḳlupa debitu chkök Moisés nuāki tā Jehová dalōioie.

*Moisés tō s'shulōkwakpa kǀ yulē*

13 Bule es tā Moisés e' tkēsēr ikula' kǀ Israel aleripa shulōk. Ie'pa e' dapa'wé iēter

ie' wörki ñië bla'mi dö tsälj as Moisés tö ishulörak. <sup>14</sup> E' kos suë Moisés nuäki tö ta ichéitö Moisés a:

—¿I wamblok be' tso' ie'pa ta? Be' ë e' tkésar ie'pa shulök ta ie'pa iëter ñië be' panuk.

<sup>15</sup> Moisés tö iüté:

—E'ma ie'pa wák de ye' ska' ittsök tö ima Skéköl tö iché. <sup>16</sup> Mik ie'pa welepa ñippöke ñita, eta' ie'pa datse ye' ska' ta' ye' tö ie'pa tté shuleke. Nies ye' tö ie'pa patteke Skéköl tté wa.

<sup>17</sup> Moisés nuäki tö iché ia:

—Wes be' tö iweke e' kë döb buaë. <sup>18</sup> Be' shtrirwami. Nies ie'pa tso' be' wörki e'pa shtrirwami. Kané e' e' alökami be' ki. Kë be' a iwöklönuk ekörla. <sup>19</sup> A Moisés, ye' tö be' patteke e' ttsö. As Skéköl tö be' kímü. Be' kawöta ttök Skéköl ta ie'pa skéie. Be' kawöta ie'pa ñippöke e' chök Skéköl a as ie' tö ichö be' a tö wes ishuleke. <sup>20</sup> Ie'pa wöbla'ü Skéköl tté wa. Ikkachö ie'pa a wes ie'pa kawöta senuk yësyësé. Ichö ie'pa a tö i kiane Skéköl ki tö ie'pa tö iwë. <sup>21</sup> Erë be' kawöta a wëpa shushtök tseë be' kímuk tö shuloie. Wëpa serke yësyësé, Skéköl dalöeta' tajë, kë e' watauta'ttsa i sulu wambloie, es-epa shushtö Israel aleripa shulök be' ta. Ishulökwakpa blatö i' es. Israel aleripa mil biyök (1000) e' kos ki ishulökwakpa múka eköl eköl. Mil biyök e' kos blabatsölor cien eyök (100) cien eyök döka dabop. Cien biyök e' kos ki ishulökwakpa múka eköl eköl. Cien biyök e' kos blabatsölor dabom skeyök (50) dabom skeyök. E' kos ki ishulökwakpa múka eköl eköl. Dabom skeyök kos e' blabatsölor dabom eyök dabom eyök döka skel. E' kos ki ishulökwakpa múka eköl eköl. <sup>22</sup> Ie'pa tö Israel aleripa kos tté shuleraë këkraë be' skéie. Erë tté wé kë shulinuk ie'pa a ese bituraie ie'pa wa be' ska' shulë. Tté wé shulirai ie'pa a e' ta ese shuleke ie'pa tö. Eta' es be' ki kané e' öshömi. Ie'pa tö be' kímëmi kané e' wa. <sup>23</sup> Skéköl tö be' ké iwakanéuk, nies be' tö iwakanewé es, e' ta be' a ikatatkëmi. Nies Israel aleripa kos mi'mine iu a ttsé'ne buaë.

<sup>24</sup> Eta' Moisés tö inuäki ttö iüté. Iwakanewéitö wes inuäki tö iché ia es. <sup>25</sup> Ie' tö Israel aleripa shuä wëpa didir ese shushtë. E'pa mékaitö Israel aleripa shulökwakpaie. Wëlepa meneka mil biyök e' kos ki ishulökwakpaie. Wëlepa skä meneka cien biyök e' kos ki ishulökwakpaie. Wëlepa skä meneka dabom skeyök e' kos ki ishulökwakpaie. Wëlepa meneka dabom eyök e' kos ki ishulökwakpaie. <sup>26</sup> Ie'pa tö Israel aleripa tté shuleke këkraë. Tté wé darërë, ese mí ie'pa wa Moisés a shulë. Eta' tté wé tottola, ese shuleke ie'pa tö. <sup>27</sup> E' ukuöki ta Moisés nuäki e' chéat ie' a ta imiäne ikaska'.

## 19

### Israel aleripa demi Sinai

<sup>1-2</sup> E' ukuöki ta Israel aleripa e' yélur Refidim a demirak Sinai. Ie'pa e' yë'lur Egipto, e' ki si' de böt ki ká et. Sinai döb ká sir poë. Eë ie'pa e' tséat Sinai kébata o'mik tsinet. <sup>3</sup> Eta' Moisés miä kabata a ttök Skéköl ta. Eë Jehová tö ikie ta ichéitö ia:

—Tté cheke ye' tö be' a e' chöne Israel aleripa a. E'pa döb Jacob aleripa. <sup>4</sup> Ichö ie'pa a: 'Ye' tö egiptowak we'ik e' su' a' tö. Nies a' wa ijcher tö wes ye' wa a' dë'bitü buaë ie ye' wörki wes pu wa ilala mi' ipik ki es. <sup>5</sup> Ká ulitane wakpa döb ye' icha. Erë ye' ttö iüté a' tö seraä, nies tté mekesö ñi a e' wa iüté a' tö buaë, e' ta ká ulitane wakpa shuä a' döraë ye' icha chökíe. <sup>6</sup> A' döraë ye' sacerdotepaie. A' döraë batse'r ye' a.' Tté i' kos chö Israel aleripa a.

<sup>7</sup> Eta' Moisés biteane, e' tö Israel aleripa kuëblupa kos dapa'wé. I' ché Jehová tö ie' a e' kos chéneitö ie'pa a. <sup>8</sup> Ie'pa ulitane tö iüté ñikkëe:

—I' kos ché Jehová tö e' wa iüteraë sa' tö.

Eta' Moisés miäne tté e' chökne Jehová a.

<sup>9</sup> Eta' Jehová tö iché ia:

—Ye' ttö ttsö. Mochka tërdawa kabata ki tajë e' shuä ye' datse ttök be' ta as Israel aleripa ulitane tö ye' ttöke be' ta e' ttsö. Es ie'pa tö be' tté klö'weraë këkraë.

Eta' ima Israel aleripa tö iüté e' chéne Moisés tö Jehová a. <sup>10</sup> Jehová tö iché ia:

—Be' yú Israel aleripa batse'uk i'ne ena bule. Nies ichö iarak: 'a' datsi' skuölor.' <sup>11</sup> Ye' döb Jehová, e' datse böiki Sinai kébata a ie'pa ulitane wörki, e' kuëki ie'pa batse'ü as ie'pa tso' batse'r böiki yöki. <sup>12</sup> Kabata wakyuö shkit as kë yi mi'tkö e' wishët. Ichö iarak: 'A' kë a kawö ta' shkökwa iwakyöne e' wishët. Nies a' kë a kawö ta' shkökwa tsinet ipamik. Wëpa tkawa e' wishët esepa duörawa. <sup>13</sup> Yi míwa eë ese kë kawö ta' kë ulä wa. Ese kawöta ttëwa ák wa ö sulë wa. Kë a' tkinuk tö se' idir ö iyiwak idir, a' kawöta ittökwa. Mik a' tö duk blar ttsé e' ë ta' a' dömiwa tsinet kabata o'mik.'

<sup>14</sup> Eta' Moisés biteane tö Israel aleripa batse'wé ta ie'pa ulitane datsi' skuélor. <sup>15</sup> Moisés tö iché ia:

—A' ulitane e' kkö'nú batse'ne böiki yöki. E' dalewa kë a' senukka alaköpa ta.

<sup>16</sup> Böiki es bla'mi ta kabata a ká wöñane alá blane tajë. Mò tajë dettsa kabata e' ki. Ie'pa tö ittsé tö duk blane tajë, e' tö ie'pa suawé tajë painékaie. <sup>17</sup> Eta' Moisés tö Israel aleripa tso'rak iwákpa u a e'pa yélur tsémi Skéköl wörki. Ie'pa e' wöklö'wërak kabata kuli' a tsinet. <sup>18</sup> Jehová dettsa Sinai kébata ki bö' shuä, e' kuëki kabata e' miä shklë éme. Shklë e' wër wes tö shklë butró es. Kabata kos wötrike darërë. <sup>19</sup> Duk ki blarke tajë

shuṭe. Moisés ttöke ṭa Skëköl tö ie' iṭe ke alá blar ttsëë.

<sup>20</sup> Jehová dettsa kabata kakkeë, e' wöbata ki ṭa Moisés kiékaitö eë. Moisés tkaka eë, <sup>21</sup> ṭa Jehová tö iché ia:

–Be' e' öwane ṭa ichö ie'pa a: 'Kë a' tkökbitü wé iwakyöule e' iqshet ye' weblök dö' ie'pa duölur tajë.' <sup>22</sup> Nies wëpa kanëblöke ye' a sacerdotepaie esepa kawöṭa e' batse'uk buaë dö' nies ye' tö ie'pa ttélurmi.

<sup>23</sup> Eta Moisés tö Jehová iuté:

–Be' tö sa' ké iwakyöök as kë ie'pa döwa kabata a tsinet. E' kuëki kë ie'pa bitüpa kabata i' a.

<sup>24</sup> Eta Jehová tö iché Moisés a:

–Be' yüne ṭa Aarón tsübitü e' ṭa. Erë a' sacerdotepa ena Israel aleripa malepa e'pa kë kawö ṭa' shkökbitü wé ye' tso' eë dö' ye' tö ie'pa ttélur.

<sup>25</sup> Eta Moisés biteane Israel aleripa ska' ṭa i ché Jehová tö ie' a e' chéne ie' tö ie'pa a.

## 20

### *Ttè dalöiëno döka dabop*

<sup>1</sup> Skëköl tté ṭa ichéitö i' es:

<sup>2</sup> “Ye' dör Jehová. Ye' dör a' Këköl. Ye' tö a' yë'lur Egipto wé a' bak weinuk siarë kanë wa eë.

<sup>3</sup> “Kë a' kawö ṭa' këkölpa skà dalöiök. Ye' ë dalöiö a' Këkölie.

<sup>4</sup> “Kë a' kawö ṭa' i diököl yuök dalöie yës. I' kôs tso' ká jai a ena ká i' a ena dayë a ena iyök dikja, e' kôs diököl kë yuar a' tö dalöie. <sup>5-6</sup> Ye' dör Jehová. Ye' dör a' Këköl. A' tö këkölpa kuë'ki dalöie, e' kë dalé'ttsënuke ye' a. Wëpa ye' suë suluë esepa we'ikeraëyö, nies ileripa dö inukökopaë e'pa we'ikeraëyö. Erë wëpa tö ye' dalëritseke ena ye' ttè dalöiëno e' iṭe ke, esepa ena iëtkuöpa döka mil e' dalëritseraëyö. E' kuëki kë a' e' tulökwa kuchëwö ki iyi ñekkë kôs wörki idalöioie.

<sup>7</sup> “Ye' dör Jehová. Ye' dör a' Këköl. Ye' kië kë aritsar éanas iyi sulu wambloie. Yi tö e' wamblé ese wák we'ikeraëyö.

<sup>8</sup> “Éno diwö e' blö Ye' ë dalöioie. E' kë chökwa a' éna. <sup>9</sup> Semana bit e' a kawö tso' kul. Kawö teröl e' dör a' wákpa a kanëbloie. <sup>10</sup> Erë kawö teröl e' bule es e' dör eno diwö ye' dalöioie. E' këwö a' a' kë kawö ṭa' kanëblök. Nies a' ala'r ena a' kanë mésopa ena a' iyiwak ena ká kuë'ki wakpa serke a' ska', e'pa kôs kë kawö ṭa' kanëblök e' diwö a. <sup>11</sup> Ye' dör Jehová. Ye' tö ká i' ena ká jai ena dayë ena iyi ulitane e' kôs yö' ká teröl shua. E' bule es ṭa ye' eni', e' kuëki kawö e' batseoyö me'atyö a' a' eno diwöie ye' dalöioie.

<sup>12</sup> “A' yë ena a' mi e'pa dalöiö as a' ser ká tajë ká mekeyö a' a' e' a.

<sup>13</sup> “Kë a' kawö ṭa' s'ttökwa.

<sup>14</sup> “Kë a' kawö ṭa' s'senewabak dalöseukwa.

<sup>15</sup> “Kë a' kawö ṭa' akblök.

<sup>16</sup> “Kë a' kawö ṭa' s'kkatök kachë wa.

<sup>17</sup> “Kë a' kawö ṭa' o'ka u kkechök. Nies ilaköl ena ikanë mésopa, alakölpä ö wëpa, ena iyiwak kôs ena i' kôs tso' iwa, ese kë kkechar.”

### *Israel aleripa suane Skëköl yöki*

<sup>18</sup> Mik Israel aleripa ulitane tö alá blarke e' ttsé ena iwönarke e' suë nies duk blarke tajë e' ttsé ena shkle butrökëka tajë kabata a e' suë, eta e' yöki ie'pa suane tajë painëkarak tajë. Ie'pa iëter isaük kamië. <sup>19</sup> E' kuëki ie'pa tö iché Moisés a:

–Be' ttö sa' ṭa, eta sa' tö be' ttö dalöieraë. Erë kë sa' ki ikiane tö Skëköl ttö sa' ṭa dö' sa' duölur.

<sup>20</sup> Moisés tö iüté:

–Kë a' suanuk. Skëköl dettsa a' ma'uk isuoie tö mokä a' tö ie' dalöieke. Ie' ki ikiane tö a' tö ie' ttö dalöie as kë a' tö i' sulu wamblö.

<sup>21</sup> Ie'pa aṭe isaük kamië. Moisés ë miá tsinet mö tajë wé Skëköl tso' eë.

## Jonás dör Jehovahá ttéköl e' pakè Jonás

Yèkkuò i' tò se' a ipakè tò ì bak Israel aleri ekòl kiè Jonás e' ta. Ie' kanèblé' Skèkòl ttekòlie duas cien paryòk ena duas cien kuryòk kì dabom skeyòk (800-750 AC) e' shu ulatòk kam Jesucristo kur e' yòki.

Skèkòl kè wà ie' patkène Israel aleripa malepa pattòk wes Skèkòl ttekòlpa malepa patkèitò es. E' skéie ie' tò ie' patkè' kà kiè Nínive, e' wakpa pattòk. Nínive dör kà kiè Asiria e' kà kibi. Asiria wakpa dör Israel aleripa bolòkpa kibi. Ie'pa serke suluè tajè shùtè Skèkòl wòà. E' kuekì ie' tò Jonás patkè ichòk ie'pa a tò kà de dabom tkèyòk età ie'pa erdawa. Jonás wà ijcher tò Skèkòl tò s'suè er siarè wa. Ie' ibikeitsé: "Nínive wakpa er mane'wé, e' ta ie'pa nuì olo'yeràè Skèkòl tò ie'pa kì." Erè ie' kì ikiane tò Skèkòl tò ie'pa ewèwa, e' kuekì ie' kè shkakmi ie'pa pattòk. E' skéie ie' tò ima'wé tkòkshkar bānet Skèkòl yòki. Erè Skèkòl tò ie' wòklò'wé ta ipatkèmi Nínive wakpa pattòk wake'. Ie'pa er mane'wé, e' kuekì Skèkòl kè wà ie'pa eonewa.

Yèkkuò i' wa se' éna iane tò Skèkòl tò kà ulitane wakpa suè er siarè wa. Ì sulu wamblekesò ese nuì olo'yak ie' éna se' kì. Ie' kì ikiane tò se' er mane'ù ie' a as kè ie' tò se' we'ikò.

### Jonás kè éna Jehovahá ttò iutak

<sup>1</sup> Etòkicha ta Jehovahá tò iché ittekòl kiè Jonás dör Amitai alá, e' a; <sup>2</sup> "Be' yú kà kibi kiè Nínive ee, ta ichò kà e' wakpa a wes a' e' wamblo e' dör suluè ye' wòà, e' kuekì ye' tò a' ewerawa."

<sup>3</sup> Erè ie' kè éna Jehovahá ttò iutak. E' kuekì ie' tkashkar iyòki. Ie' míà dayè kkòmik kà kiè Jope wé kanò irirke ee. Eè ie' tò kanò kuè etò mitke kà kiè Tarsis e' patuèitò shkomi ta ie' e' iéka ikì ta imía.

<sup>4</sup> Erè Jehovahá tò sèrkè patkè ie'pa kì tajè darèrèè. E' tò kanò uyé tajè dō wésua it-skirwami. <sup>5</sup> Età kos ie'pa tso' kanò a, e'pa suane tajè. Ie'pa ekòl ekòl tò ikieke aneule iwák kèkòl a: "¡sa' tsatko, sa' tsatko!" Età dali kos tulétsami dayè kì as kè kanò katsirwa.

Erè Jonás e' a' wa kanò shuà dali bló wé a, ee ie' kapòtèr tajè. <sup>6</sup> Età kanò ñakòkwak míà dō wé ie' kapòtèr ee ta iché ia:

—¿Iòk be' kapòtèr? ¡be' e' kòka! Be' kèkòl a ikiò as ie' tò se' tsatko. Isalema ie' se' suèmi er siarè wa ta se' tsatkèmiitò.

<sup>7</sup> E' dalewa kanò wakpa malepa tò iché ñi a:

—Mishka itòtkòk isuoiè yi iane iwiie e' kuekì se' weirke i' es.

Età iwène tò Jonás idir. <sup>8</sup> E' kuekì ie'pa iché ie' a:

—Ichò sa' a, ¿ì kuekì ì sulu i' tkòke se' ta? ¿Iòk be' e' iébitu kanò i' a? ¿Wé be' datse? ¿Yi ditséwò be' dör?

<sup>9</sup> Ie' iutè:

—Ye' dör hebreowak. Jehovahá dör Skèkòl tso' kà jaì a e' dalòiókwak ye' dör. Ie' tò dayè ena kà i' yò'at.

<sup>10-11</sup> Ie' tò ie'pa a ipakè tò ie' tso' tkòkshkar Jehovahá yòki. Mik e' ttsé ie'pa tò ñies isuérakitò tò dayè kì ulune tajè, età ie'pa suane tajè shùtè. Ie'pa tò ie' a ichakè:

—¿Ì wèmi sa' tò be' ta as sèrkè wòklòrwa?

<sup>12</sup> Ie' tò iutè:

—Ye' wà ijcher buaè tò ye' kuekì sèrkè i' bitsineka tajè e' kì. E' kuekì ye' uyòmi dayè a età sèrkè wòklòrdawa.

<sup>13</sup> Erè kanò wakpa tò kanò iklémi darèrèè as irirka. Erè kè ie'pa diché dè'ka, dayè kì ulune tajè e' kuekì. <sup>14</sup> Età ie'pa tò Jehovahá a ikié i' es: "A Jehovahá, kè sa' maktsa duòkwa wém i' kuekì. I' ùk be' tso' sa' ta, e' wekebò wes be' kì ikiane es. E' kuekì wém i' kè kì ì nuì ta, e' ta sa' tò ie' uyekemi dayè a e' nuì kè markà sa' kì."

<sup>15</sup> E' ukuòkì ta ie'pa tò Jonás uyémi dayè a, età sèrkè wòklònewa ta dayè míane almiè.

<sup>16</sup> Mik kanò wakpa tò e' suè, età ie'pa suane tajè Jehovahá yòki ta idalòierakitò tajè. E' ukuòkì ta ie'pa tò iyiwak jché ña'wé mè Skèkòl a idalòioie, ñies ie'pa tò tte mé ie' a tò sa' tò be' dalòieraè.

<sup>17</sup> Età Jehovahá tò nima bèrie shùtè patkè etò Jonás mulukwa. Età nima e' tò imulèwa ta ee nima shuà ie' sené dòka kà mañat ñie nañeè.

## 2

### Jonás tté Jehovahá ta

<sup>1</sup> Età Jonás tté Jehovahá dör ie' Kèkòl e' ta nima shuà, <sup>2</sup> ta ichéitò ia i' es:

"A Jehovahá, ye' eriarke siarè, e' shuà ye' tò be' a ikié tò ye' tsatko, età be' tò ye' iutè. Ye' tso'tke kà dià kaska' s'duulewa ké a, ee ye' be' a ikié tò ye' kímú, età ye' ttò tsebò.

<sup>3</sup> Be' ye' uyémi dayè a jskjë dayè dikja, ye' kítèulewa dayè wa. Dayè urke tajè e' patkébò, e' tka ye' kíkke. <sup>4</sup> Ye' ittsé tò ye' kè ku'ia be' wòrki.

Ye' ibikeitsé tò ye' kè dè'iane be' wé buaè e' a.

<sup>5</sup> Dayè tajè, e' shuà ye' anemi. Ye' kíkke, ye' pamik, ye' dikja, e' dör dayè ème.

Dayè a itò'kònu tso', e' malítséka ye' wòrki mik tajè dayè shuà.

<sup>6</sup> Ye' anemi dayè a dō jskjë, dō wé kabata bitukeka ee.

Ye' ittse tò ye' wötënewa da' a ká dià kaska'.  
Erë, a Jehová, be' dör ye' Këköl,  
be' dör ye' yëttsane s'duöwä ulà a dekanı  
ttsé'ka.

<sup>7</sup>A Jehová, mik ye' ittse tò ye' duökewatke,  
etä ye' be' a ikié tò ye' tsatkö,  
etä i kiéyö, e' ttsébö be' wé buaé e' a.

<sup>8</sup>Wépa tò iyi diököl dalöieke be' skéie,  
e'pa kë tò be' dalöieku'ä.

<sup>9</sup>Erë ye' tò wéstela cheraé be' a këkraé,  
iyiwak jcheraé ña'wëraëyö be' a be' dalöioie.  
Ye' ttë mé be' a, e' wawëraëyö.  
<sup>1</sup>A Jehová, be' ë a sa' tsatkërmil''

<sup>10</sup>E' ukuökj ta' Jehová tò nima patké Jonás  
tuöktä ká sí kj, ta' ituëttsaitö.

### 3

#### *Jonás tò Jehová ttö iüté*

<sup>1</sup>Etä Jehová tò iská chéne Jonás a: <sup>2</sup>“Be' yú  
ká kibi kié Nínive eë ta' i chekeyö be' a, e' chö  
ká e' wakpa a.”

<sup>3</sup>Etä ie' tò Jehová ttö iüté. Ie' míä Nínive.  
E' dör ká bërie. Shkotkö ká e' shüa, e' dör  
ká mañat wa'ñe. <sup>4</sup>Jonás shkë ká e' shüa ká  
et wa'ñe ta' ie' tò icherami ká e' wakpa a  
aneule: “Ká i' kj ká de dabom tkëyök (40),  
etä a' erdawa.” <sup>5</sup>Etä Nínive wakpa kos erblé  
Skëköl mik. E' kuëkj ie'pa kos, ësëpala ena  
dalöiërtä, e'pa kos tò iché: “S'kawötä batsök,  
ñies s'kawötä datsi' ajaé ese iök iwä kkachöie  
tò se' er mane'wé.” Etä es ie'pa tò iwé.

<sup>6</sup>Mik ttë e' ttsé Nínive blú tò, etä ie' e' kéka  
ikulé kj, ta' idatsi' bua'buäé iëtkër iwä, e'  
yëttsä skéie datsi' ajaé iékaitö ta' ie' e' tkëser  
jskj muluchka kj. <sup>7-9</sup>Etä ie' tò ttë patké ká  
e' ulitane wakpa a. Ttë e' tò iché i' es: “A'  
ulitane kë káne chkök di'yök yës. Ñies kë a'  
káne a' baka ena a' obeja tiök. A' ulitane  
kawötä datsi' ajaé iökka. A' kköchö Skëköl a'  
a' diché kos wa' as a' e' wamblö suluë ese kos  
nuj olo'yöitö a' kj. Ñies a' e' wamblö suluë,  
ese kos olo'yö. Isalema ie' er mane'umine,  
etä ie' er buarmine se' kj, etä ie' kë tò se'  
ewëpawa. Ttë i' dör ye' dör a' blú e' ttë  
ena a' wökirpa ttë, e' kuëkj a' ulitane kawötä  
idalöiök.”

<sup>10</sup>Etä ie'pa tò ttë e' iüté buaé. Ie'pa e'  
wamblö suluë ese kos olo'yérakitö. Mik e'  
sué Skëköl tò, etä ie' ibikeitséne kë yö ie'pa  
we'ikepa wës ye' ibikeits es.

### 4

#### *Jonás uluneka Skëköl kj*

<sup>1</sup>Erë e' kë dör bua' Jonás a ta' ie' uluneka  
tajë. <sup>2</sup>Ie' iché Jehová a:

—A Jehová, be' isué. Mik ye' tkëriä ye'  
kaska', etä ye' iyë' tò be' er buaé chöraé  
Nínive wakpa a. Ye' wä ijcher tò be' dör es,  
e' kuëkj ye' bakshkar Tarsis. Ye' wä ijcher tò  
be' kë ulurta'ka bet. Be' er tottoé. Be' sa' sué

er siarë wa. Mik sa' tò i' sulu wamblé ta' sa' er  
mane'wé, e' ta' bet e' nuj olo'yé be' tò sa' kj,  
kë sa' we'iké wës be' sa' pauné es. <sup>3</sup>A Jehová,  
e' kuëkj ye' be' a iché ye' ttöwä, e' dör bua'ie  
ye' a.

<sup>4</sup>Erë Jehová tò ie' a ichaké:

—Zima be' ibikeitsè tò be' wä kawö ta'  
ulunukka së es?

<sup>5</sup>Etä Jonás e' yëttsä Nínive míä diwö tskirke  
e' kke ta' eë úla yuékaitö e' blóie diba yöki.  
Eë ie' e' tkëser i tkömi Nínive wakpa ta' e'  
wä panuk. <sup>6</sup>Etä Skëköl Jehová tò kalkua  
tskéka elka tala'wékaitö Jonás tsaka as iki'  
ttsé'r buaé. E' tò ie' ttsé'wé buaé. <sup>7</sup>Erë  
bule es bla'mi ká ñine etä Skëköl tò i' patké  
kalkua katökwa ta' isinewa duowa. <sup>8</sup>Mik  
diwö deka, etä ie' tò siwä darërëé ba'baé e'  
patké diwö tskirke e' kke Jonás kj. Diba ane  
darërëé Jonás wökir kj, ta' ie' tò ittse tò ie'  
siwä'arkewa. Ibikeitséitö “iye' mú duöwä!”  
Ie' iché, “Ye' duowa, e' dör bua'ie ye' a.”

<sup>9</sup>Erë Skëköl tò iché ie' a:

—Zima be' ibikeitsè tò be' wä kawö ta'  
ulunukka kalkua sinewa e' kuëkj?

Ie' iüté:

—Tö, ye' wä kawö ta'. iye' ulune tajë mik  
ye' duowa etä e' olone!

<sup>10</sup>Etä Jehová tò iché ie' a:

—Kal kuá kë tkëne be' wä, kë talane kë ka-  
neone be' wä. E' tskine talane ká et nañewe  
ë, bule es nañewe ta' iduowa, e' daléne be'  
éna. <sup>11</sup>Etä wës ye' kë éna Nínive wakpa  
dalënu? Ie'pa dör tajë, ie'pa ala'rla tso' tajë  
döka 120.000 kë wä ijcher i dör buaé, i dör  
suluë. Ñies ie'pa iyiwak tso' tajë.



## Jesús Tté Buaë Kit Mateo tö Mateo

Wëm bak eköl kiè Mateo e' tö yëkkuö i' kit. Nïes ie' kiè Leví. Ie' dör Israel aleripa eköl. Jesús tö ie' ki' ittökataie (Mateo 9.9 saü), erë e' yöki ie' bak kaneblök inuköl patueke Roma wökirpa a ese shtök. Erë mik Jesús tö ie' ki' ittökataie, etä ie' mineaie Jesús tä.

Ïo' Jesús tö su' Mateo tö iwák wöbla wa, ese tso' kitule yëkkuö i' kï. Nïes i' su' ie' tö ena i' ttsë'itö Jesús tö s'wöbla'weke e' a, ese kit ie' tö.

Ká iaiäe Skëköl tö iyë' tö wëm döraë eköl Israel aleripa tsatök e' paneke ie'pa tö. S'tsatökkwak e' kiè Mesías hebreoie ena griegoie ikiè Cristo. Se'ie kiè e' mane'wësö *wé pairine'bitü idi' wa s'blúie e'*. Mateo tö yëkkuö i' kit bua'ie Israel aleripa a ikkachoie tö s'tsatökkwak ñe' dör Jesús.

### Jesucristo yëpa bak (Lucas 3.23-38)

<sup>1</sup> Jesucristo dör se' blú bak kiè David e' aleri, David dör Abraham aleri. Jesucristo yëpa bak kôs e'pa wëpa kiè dör i' es:

<sup>2</sup> Abraham alá dör Isaac, e' alá dör Jacob, e' ala'r dör Judá ena iëlpa. <sup>3</sup> Judá ala'r dör Fares ena Zérah, e'pa mî dör Tamar. Fares alá dör Hesrón, e' alá dör Aram. <sup>4</sup> E' alá dör Aminadab, e' alá dör Nahasón, e' alá dör Salmón. <sup>5</sup> E' alá dör Booz, e' mî dör Rahab. Booz alá dör Obed, e' mî dör Rut. Obed alá dör Jesé, <sup>6</sup> E' alá dör se' blú bak David e'.

Se' blú bak David, e' alá dör Salomón, e' mî bak Uriás tä kewe. <sup>7</sup> Salomón alá dör Roboam, e' alá dör Abías, e' alá dör Asá. <sup>8</sup> E' alá dör Josafat, e' alá dör Joram, e' alá dör Ozías. <sup>9</sup> E' alá dör Jotam, e' alá dör Acaz, e' alá dör Ezequías. <sup>10</sup> E' alá dör Manasés, e' alá dör Amón, e' alá dör Josías. <sup>11</sup> E' ala'r dör Jeconías ena iëlpa. E' k'éwö ska' tä Israel aleripa klö'wélur Babilonia wakpa tö tä itsémirakitö Babilonia.

<sup>12</sup> Israel aleripa aneyalne Babilonia, e' ukuöki tä Jeconías alá kiè Salatiel e' kune. Ie' alá dör Zorobabel, <sup>13</sup> E' alá dör Abihud, e' alá dör Eliaquim, e' alá dör Azor. <sup>14</sup> E' alá dör Sador, e' alá dör Aquim, e' alá dör Eliud. <sup>15</sup> E' alá dör Eleazar, e' alá dör Matán, e' alá dör Jacob. <sup>16</sup> E' alá dör José, e' dör María wëm. María dör Jesús mî. Jesús dör *wé pairine'bitü idi' wa s'blúie e'.*\*

<sup>17</sup> Es Abraham k'éwö ska' dökä David kune', etä Jesús ditséwö alöne dökä dabom eyök kí tkëtökicha (14). Nïes David k'éwö

\* **1:16** *wé pairine'bitü idi' wa s'blúie: E' dör Mesías si'kuaié. Iesaias 7.14*

ska' dökä Israel aleripa minetser Babilonia, etä Jesús ditséwö alöne dökä dabom eyök kí tkëtökicha (14). Nïes Israel aleripa minetser dökä *wé pairine'bitü idi' wa s'blúie e' de*, etä Jesús ditséwö alöne dökä dabom eyök kí tkëtökicha (14).

### Jesucristo kurke e' biyö yëne (Lucas 2.1-7)

<sup>18</sup> I' dör Jesucristo kune' e' pakë: Ie' mî kiè María. E' bakiä busi kam ser wëm tä, erë ittë me'bak senukwä wëm kiè José e' tä. Kam ie'pa serwä ñita, kam ie'pa ñi kowa, etä María buklunekä Wiköl Bats'e'r diché wa. <sup>19</sup> José dör wëm buaë yësyësë, e' kueki ie' kè éna María jaëwäkkä sulitane wörki. E' kueki ie' tö ibikeitsé: "Süyö imëät bërë." <sup>20</sup> Ie' tso'ia ibikeitsök tä ikapowä tä ikabsuë tö Skëköl biyöchökwak de eköl e' tö ie' a iché: "A José, David aleri, María buklunekä e' dör Wiköl Bats'e'r diché wa. E' kueki kè be' suanuk senukwä ie' tä. <sup>21</sup> Ie' alá kurdaë eköl wák wëm. Ikiè múkabö Jesús† Ie' tö iwakpa tsatkeräe sene sulu nuí yöki, e' kueki ikiè múka es." Es Skëköl biyöchökwak tté José tä.

<sup>22</sup> E' kôs tka es as i' yë'atbak Skëköl tö itteköl wa e' wä tkö, e' tö iché:

<sup>23</sup> "Busi eköl kè wä wëm kaule e' buklur-dakä,

e' alá kurdaë wák wëm,  
ikirdaë Emanuel."‡

(s'kiè e' wä kiane chë: "Skëköl tso' se' tä").

<sup>24</sup> Mik José t'ñekane, etä ie' tö iwé wës Skëköl biyöchökwak tö ie' a iché es. Ie' ula-batséwä María tä. <sup>25</sup> Erë alá kam kur, e' yöki ie'pa kè ñi kánewa. Mik alá kune, etä José tö ikiè méka Jesús.

## 2

### Wëpa yöle iyi tötkök békwo wa esepa de Jesús sauk

<sup>1</sup> Jesús kune' ká kiè Belén atë Judea ee. E' k'éwö ska' tä wëm eköl kiè Herodes e' dör ká e' blú. Etä wëpa wëlepa datse ká kamië atë diwö tskirke e' kke, e'pa de Jerusalén. Ie'pa dör iyi tötkök békwo wa esepa. <sup>2</sup> Ie'pa tö ichaké:

—¿Wé alala kune judiowak blúie e'? Sa' tö ibékwo su' sa' kaska', e' kueki sa' de ierö idalöiök.

<sup>3</sup> Mik Herodes tö ttë e' ttsé, etä e' tö ie' ena Jerusalén wakpa kôs tsiriwëkarak tajë. <sup>4</sup> E' kueki ie' tö sacerdotepa wökirpa ena s'wöbla'uk ttë dalöiëno wa wakpa kiéttä seraä tä ichaké ie'pa a:

—¿Ima a' iché? Wé pairine'bitü idi' wa s'blúie, ¿wé e' kurmi?

<sup>5</sup> Ie'pa tö iutérak:

† **1:21** Jesús: S'kiè e' wä kiane chë S'tsatökkwak. ‡ **1:23**

—Ie' kurdäë Belén atë Judea ee. Skëköl tteköl tö ikität i' es:

<sup>6</sup> Skëköl tö ichè:

Belén atë Judea, e' wakpa a ye' ichè tö a' shuä blu' kardakä eköl, e' tö ye' icha dör Israel aleripa e'pa wëttseraë.

E' kuëkj a' kâ dör kâ bua'ie wës Judea kâ bua'ie malepa tso' es.\*

<sup>7</sup> Mik Herodes tö ttè e' ttsé, etä ie' tö wëpa tö iyi tötkeke bëkwö wa ñe'pa kié akir ijchënowä tö mik ie'pa tö bëkwö e' su'mi, kës e' kî kâ de. <sup>8</sup> Ie' tö ie'pa ä iché:

—A' yú Belén. Alala e' yulö bua'ie. Mik a' tö iküé, etä ibiyö chö ye' ä as ñies ye' mi' idalöiök.

<sup>9-10</sup> Mik blu' tö ttè e' ché one, etä ie'pa míyal. Etä bëkwö su' ie'pa tö ikaska', e' suëne ie'pa tö ñala wa. E' tö ie'pa ttsé'wëne buaë shüte. Wé bëkwö mirwä e' wa ie'pa mi'ke dö wé bëkwö e' wöklö'wëwä ee. Bëkwö e' wöklö'wëwä wé alala e' tso' e' u tsakä. <sup>11</sup> E' ukuöki tä ie'pa dewä u ä tä ie'pa tö alä ena imi María kué. Ie'pa e' tulëwä kuchë kî tä idalöierakitö. Kalkuöla dérak iwä e' kköyéttarakitö tä orochka ena i masmas ña'wë ena mirra, ese mërakitö alä ä. <sup>12</sup> E' ukuöki tä ie'pa ä iyëne kabsuë ä tö ie'pa kë minukne Herodes ska'. E' kuëkj ie'pa míyalne ikä kî ñala kuä kî wa.

*José ena María tkashkar míyal Egipto*

<sup>13</sup> Wëpa tö iyi tötkeke bëkwö wa e'pa pone-mine, e' ukuöki tä José kabsuë tö Skëköl biyöchökwak eköl tö ie' ä iché: “Be' e' kôkä, María ena ilä klö'ü tä be' tköshkar Egipto. Blu' Herodes tö alala së yuleraë ttëwä, e' kuëkj be' e' tsüät senuk ee dö mik ye' tö be' ä iché etä.”

<sup>14</sup> Etä ie' tü'nekä e' kékä tä alä ena María klö'wëitö tä e' nañewe imíyal Egipto. <sup>15</sup> Eë ie'pa sené dö mik Herodes blënewä ekkë. E' tka es as itkö wës Skëköl tö iyë' itteköl wa es. Ie' tö iyë': “Ye' alä tso' Egipto, e' kiéne ye' tö.”†

*Herodes tö kawö mé ala'rla ttökulur*

<sup>16</sup> Mik Herodes wä ijchënewä tö wëpa tö iyi tötkeke bëkwö wa, e'pa kë wa ie' ttö dalöiëne', etä e' tö ie' uluwëkä tajë. Belén ena kâ tso' ipamik e' ä ala'rla wëpa kurke kës, e'pa ttökulur patké ie' tö sëraä kam kî duas dö böc e' yöki. Wëpa tö iyi tötkeke bëkwö wa e'pa tö bëkwö su' kës e' kî kâ de, e' yë' ie'pa tö Herodes ä. E' wa ie' tö ikëwö yë'ttsä tö duas döketke böc e' kî. E' kuëkj ie' tö ala'rla wëpa kurke e' këwö ulatök, esepa kës ttökulur patké.

<sup>17</sup> Es i yë' Skëköl tteköl kié Jeremías e' tö, e' wä tka. Ie' tö iyë':

<sup>18</sup> “Kâ kié Ramä ee ittse'ne tö tajë ie'pa iüke aneule kköchöke siarë.

Eë alakölpa dör Raquel aleripa e'pa iüke ila'rla jëitsök.

Ila'rla kës ttëtur, e' kuëkj ie'pa kë er pablërta'.”

*María ena ilä ena José e' yëttsä Egipto biteyalne Israel*

<sup>19</sup> Blu' Herodes blënewä, e' ukuöki tä José tso' Egipto, e' kabsuë tö Skëköl biyöchökwak eköl tö ie' ä iché: <sup>20</sup> “Wëpa éna alä ttakwa, e'pa blërunetke. E' kuëkj be' e' kôkä tä María ena ilä klö'ü tä a' yüshkane Israel.”

<sup>21</sup> Etä José e' kékä tä María ena ilä klö'wëitö tä ie'pa biteyalne Israel. <sup>22</sup> Erë mik ie' wä ijchënewä tö Herodes alä kié Arquelao e' tso'ne Judea blúie iyë skéie, etä ie' suane senuk ee. Etä ie' kabsuë tö Skëköl tö ie' ä iché: “A' yüshkane Galilea.” E' kuëkj ie'pa míyalne Galilea. <sup>23</sup> Mik ie'pa de Galilea, etä ie'pa míyal senuk kâ kié Nazaret ee. E' tka es as i yë' Skëköl ttekölpa tö e' wä tkö wé ichéitö: “Ie' kirdäë Nazaret wak.”

### 3

*Juan S'wöskuökwa tö s'pattë*

(*Marco 1.1-8; Lucas 3.1-9,15-17; Juan 1.19-28*)

<sup>1</sup> E' këwö ska' tä Juan S'wöskuökwa de Skëköl ttè pakök kâ sir poë wé kë yi serku' atë Judea ee. <sup>2</sup> Juan tö ie'pa ä icheke: “Ï blúie Skëköl tso' e' këwö dewätke tsinet, e' kuëkj a' er mane'ü ie' ä.”

<sup>3</sup> Skëköl tö Juan yë' itteköl Isaías wa i' es:

“Kâ sir poë wé kë yi serku' tajë, ee yile ttöraë aneule, e' tö icheraë: ‘A' er mane'ü Skëköl datse e' yöki,

e' dör wës ñala yuësö yësyësë ie' yöki es.’”\* Es Isaías tö iyë'at.

<sup>4</sup> Juan datsi' yöle kamele köyök wa; ikipamo e' dör iyiwak kkuölit. Ie' chké döc ditski ena bulalí. <sup>5</sup> Jerusalem wakpa ena kâ malepa tso' Judea e' wakpa de tajë ie' ttöke e' tsök. Ñies kâ tso' di' Jordán kkömik, e' wakpa de. <sup>6</sup> Ï sulu kës wambleke ie'pa tö e' chekekarakitö tä Juan tö iwöskueke Jordán ä.

<sup>7</sup> Erë mik Juan tö isuë tö fariseowakpa ena saduceowakpa de tajë äs ie' tö ie'pa wöskuölor etä ie' tö ie'pa ä iché: “¡A' döc s'kütö'ukwakpa suluë wës tkabë es! ¿Yi tö a' ä iché tö a' tkömishkar Skëköl tö a' we'ikeraë siarë e' ulä ä? <sup>8</sup> A' senu yësyësë, e' wa iwërwa'mi tö mokî a' er mane'wëtke Skëköl ä. <sup>9</sup> Kë a' tö ibikeitsök tö a' döc Abraham aleripa, e' ë kuëkj Skëköl kë tö a' we'ikepa. Ye' tö a' ä iché tö Skëköl kî ikiane, e' tä ie' tö ák ikké yuëmi Abraham aleripaie. <sup>10</sup> Ie' döc wës kal bikökwa es. Ie' tso'tke kal ulitane kë wörtä' ese kës bikökök ña'wëwä bö' ä.

\* 2:6 Miqueas 5.2 † 2:15 Oseas 11.1 \* 3:3 Isaías 40.3

11 Moki ye' tō a' wōskueke di' a iwà kkachoiē tō a' er mane'wétke Skèkōl a. Erē ye' itōki idatse ekōl, e' tō a' ierawa Wikōl Batse'r a ena bō' a. Ie' dōr kèkèpa tajē ye' tsatā, e' kuēki ie' klōkuō ē tsēmi e' kē dōr ye' siarla e' a. 12 Ie' tō s'wōpperaē wēs iyiwō wōppēsō es. Iba'ua bleraēitō idichakuō a, erē isulusi uyerawaitō bō' kē wōittā'wā e' a."

*Jesús wōsune*

*(Marcos 1.9-11; Lucas 3.21-22)*

13 Jesús e' yéttsā Galilea demi Jordán di'kka wē Juan tso' eē as e' tō iwōskuō. 14 Kewe tā Juan kē éna ie' wōskuak, ie' tō iché iā:

—Warma be' kawōtā ye' wōskuōk. ¿Wēs be' do ye' ska' as ye' be' wōskuō?

15 Ie' tō iūtē:

—Ī dōr yēsēsē Skèkōl wōa, ese kōs kawōtā wē se' tō es, e' kuēki imuatsō es i'ñe tā.

Etā Juan tō ie' ttō iūtē. 16 Jesús wōsune e' e' duékane di' a e' wōshā tā kā jai kkōbunane tā ie' isué tō Skèkōl Wikōl bitē ie' kī nubōl sū. 17 Etā ttō tēsēne datse kā jai a e' tō iché: "Se dōr ye' alà dalēr tajē ye' éna, e' wēr buaē shūte ye' wa."

## 4

*Bē tō Jesús erkiōwé*

*(Marcos 1.12-13; Lucas 4.1-13)*

1 E' ukuōki tā Skèkōl Wikōl tō Jesús tsēmi kā sir poē wé kē yi serku' eē as bē tō ie' erkiōū i sulu wamblōk. 2 Eē ie' sené dōka kā dabom tkēyōk (40), kē chkane yēs. Ekkē tā ie' duē bli wā. 3 Bē debitū ie' ska' tā ichéitō iā:

—Be' dōr Skèkōl Alà, e'ma ichō ak sekkèpa a tō a' yōnū chkeie.

4 Jesús tō iūtē:

—Au. Skèkōl yēkuō tō iché: 'Kē se' senuk chké ē mik. E' skéie i kōs cheke Skèkōl tō e' mik se' serke.\*

5 E' ukuōki tā bē wā ie' mītser Jerusalén dōr kā batse'r eē tā itsēmikaitō Skèkōl wé kakkēē e' bata kī 6 tā ichéitō iā:

—Be' dōr Skèkōl Alà, e'ma be' e' batrōōmi dōttsā iski. Skèkōl yēkuō tō iché:

'Skèkōl tō ibiyōchōkwakpa patkeraē be' kkō'muk.

Ie'pa tō be' klō'weraqā iulā a as be' klō kē tērwa ak kī yēs.†

E' kuēki be' e' batrōōmi dōttsā iski.

7 Etā Jesús tō iūtē:

—Au. Nies Skèkōl yēkuō tō iché: 'A' kē kawō tā Skèkōl dōr a' Kèkōl e' wōtsiriuk.‡

8 E' ukuōki tā bē tō ie' tsēmi kabata kakkēē a, tā eē kā kōs wēs kā tkōke ekkē, ñies íyi bua'buāē tso' iki, ese kkachéitō ie' a seraaq bet. 9 Ie' tō iché iā:

—Be' e' tkéwā kuchēwō kī ye' wōrkī ye' dalōiōk Skèkōlie, e' tā i kōs suē be' tō e' meraēyō be' a.

10 Erē Jesús tō ie' iūtē:

—A Satanás, Skèkōl yēkuō tō iché: 'Skèkōl dōr a' Kèkōl, e' ē dalōiō a' tō Skèkōlie, ie' ē a' a' senú.§ E' kuēki be' yūshka.

11 Etā bē tō Jesús méat wák miā bānet. Tā Skèkōl biyōchōkwakpa de Jesús ska' ikimuk.

*Kanē mēne Jesús a e' tsā wéitō Galilea*

*(Marcos 1.14-15; Lucas 4.14-15)*

12 Mik Jesús wā ijchenewā tō Juan S'wōskuōkwak wōtēwarakitō s'wōto wé a, etā ie' dene Nazaret atē Galilea eē. 13 Erē kē ie' atē senuk Nazaret. Ie' miā senuk Cafarnaúm, e' atē batsōri kiē Galilea e' kkōmik. Cafarnaúm atē zabolónwak ena neftaliwāk e'pa kē a. 14 Itka es as i kit Skèkōl ttekol Isaías tō yēkuō kī e' wā tkō es. Ie' tō iyé':

15 "Zabolónwak ena neftaliwāk, e'pa serke di' kiē Jordán e' wishet batsōri kkōmik.

Ie'pa serke Galilea wé ñies pē' kē dōr judiowak esepa serke eē.

16 Ie'pa serke wēs se' serke stui a es e' kē wā Skèkōl sūle.

Ie'pa dōr wēs s'duulewā es.

Erē ekōl doia, e' tō ie'pa er ñi'weraē Skèkōl tte wā

wēs kā olo tō kā ñiwe es."\*

Es Isaías tō iyé'at.

17 E' ukuōki tā Jesús tō s'pattēmitke tā ichéitō: "Ī bliue Skèkōl tso' e' kēwō dewatke tsjnet, e' kuēki a' er mane'ū ie' a."

*Jesús tō nima klō'ukwakpa dōka tkēl e'pa kiē ittōkatapaie*

*(Marcos 1.16-20; Lucas 5.1-11)*

18 Jesús shkōrami batsōri kiē Galilea e' kkōmik, eē ie' tō wēpa suē bōl ñi ēlpa. Ekōl kiē Simón, e' kiē ñies Pedro. Ièkōl kiē Andrés. Ie'pa kanē dōr nima klō'uk. Ie'pa tso' ikla' uyōk batsōri a nima klō'woie. 19 Ie' tō ie'pa a iché:

—A' shkō ye' tā. A' yueraēyō s'ditsō klō'uk ye' a ye' ttōkataie.

20 E' bet tā ie'pa tō ikla' tuléat tā imíyal ie' tā.

21 E' wī'kie ie' tō wēpa skā suē bōl ñi ēlpa kiē Santiago ena Juan, e'pa dōr Zebedeo ala'r. Ie'pa tulur kanō a iyé tā kla' wōyuōk, ie'pa kiēmi ie' tō e' tā. 22 E' wōshā tā ie'pa tō ikanō ena iyé méat tā imíyal ie' tā.

*Jesús tō s'wōbla'wé taiē*

*(Lucas 6.17-19)*

23 Jesús shkē Galilea kōs a s'wōbla'uk judiowak ñi dapa'wō wé kōs a. Ī bliue Skèkōl tso', e' ttē buaē pakekeitō, ñies s'duōke kōs,

\* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13 \* 4:16 Isaías 9.1-2

ì dalërke s'mik kòs, ese bua'wëkeitò. <sup>24</sup> Ie' ttë buneka Siria kòs a. E' kuëkji pë' wà tajë iyamipa duòke duè daklilìe wà ese debitù ie' ska'. Welepa a aknama tso', welepa siwà' arke iròirò, welepa kraulewà, esepa kòs bua'wëneitò.

<sup>25</sup> Età pë' datse Galilea, Decápolis, Jerusalén, Judea ena ká atë Jordán wìshet, e'pa mi'ke tajë ie' tã.

## 5

*Jesús tò ittòkatapa wòbla'wé kabata a*

<sup>1</sup> Mik Jesús tò isuè tò pë' dapanè tajë, età ie' mià kabata tukir kji tã eë ie' e' tkéser tã ittòkatapa de ie' ska'. <sup>2</sup> Ie' tò ie'pa wòbla'wémitke ttë i' wa:

*Ì wër buaë Skèkòl wa*

*(Lucas 6.20-23)*

<sup>3</sup> "Wépa morke Skèkòl è mik, esepa tso' ì blúie ie' tso' e' a, e' kuëkji ayècha buaë esepa.

<sup>4</sup> "Wépa eriarke siarë, esepa er pablërdaë, e' kuëkji ayècha buaë esepa.

<sup>5</sup> "Wépa e' wòokewa diòshet, esepa a ká i' merdaë, e' kuëkji ayècha buaë esepa.

<sup>6</sup> "Wépa tò sene yèsyèsè ese kòs jèitseke chké ena di'yè tsata, esepa ulà a iwà dòraë, e' kuëkji ayècha buaë esepa.

<sup>7</sup> "Wépa tò s'malepa suëke er siarë wa, esepa sueraë Skèkòl tò er siarë wa, e' kuëkji ayècha buaë esepa.

<sup>8</sup> "Wépa er maneneë, esepa tò Skèkòl sueraë, e' kuëkji ayècha buaë esepa.

<sup>9</sup> "Wépa tò s'er bua'wëkene ñi kji, esepa kieraë Skèkòl tò ila'r, e' kuëkji ayècha buaë esepa.

<sup>10</sup> "Wépa weirke iserke yèsyèsè e' kuëkji, esepa tso' ì blúie Skèkòl tso' e' a, e' kuëkji ayècha buaë esepa.

<sup>11</sup> "Ayècha buaë mik pë' tò a' cheke suluë, a' we'ikeke, a' kkaateke kachè wa ye' dalèrmik. <sup>12</sup> Ká jai a' ì buaë merdaë a' a' iskéie, e' kuëkji mik ese tkòke a' tã, età a' ttsé'nú buaë kaneë. Es ñies Skèkòl ttekòlpa bak a' yòkji kewe e'pa weine.

*A' dör wës dayë katanoie es*

*(Marcos 9.50; Lucas 14.34-35)*

<sup>13</sup> "A' dör wës dayë es ká i' wakpa a. Erë dayë kè kke tã'ia, e' tã kè ìbuarpaiane. Kè iia' lie bua' tã ikeukemi ñalà kji tã pë' dakòlor ikji.

*A' dör wës bö'wò es*

<sup>14</sup> "A' dör wës bö'wò es ká i' wakpa a. U tso' tajë kabata kji, e' kè blènuqwa, e' wëne kamië. <sup>15</sup> Kè yi tò bö'wò tskepaka tã ìblèwàitò ò ipatkéwàitò kalkuò dikji. E' skéie

itkekekaitò kákke sulitane tso' u a' esepa wò a ká ñi'woie. <sup>16</sup> Es ñies a' senú buaë yèsyèsè sulitane wòrkj as e' saù ie'pa tò tã a' Yé tso' ká jai a' e' kjkarka.

*Ttë dalòieno kit Moisés tò e' ché Jesús tò*

<sup>17</sup> "Kè a' tò ibikeitsòk tò ye' dè'bitù i kit Moisés ena Skèkòl ttekòlpa tò yèkuò kji, e' wòshòkwa. E' skéie ye' dè'bitù as iwà tkò wës itso' kitule es. <sup>18</sup> Mokj ye' tò a' a' ichè tò ttè e' kè watèrpattsa etkla wè'ia kam ká jai ena ká i' erwa e' yòkji; ttè e' kòs wà tkòraë. <sup>19</sup> E' kuëkji yi tò ttè e' wèle dalòsewëkewa, erë ttè tsir idir, ena o'ka wòbla'wëkeitò idalòseukwa, ese dòraë s'èsela imalepa blúie Skèkòl tso' esepa dikja. Erë yi tò ttè e' dalòieke ena o'ka wòbla'wëkeitò idalòioök, ese dòraë kèké tajë imalepa blúie Skèkòl tso' esepa tsata. <sup>20</sup> E' kuëkji ye' tò a' a' ichè tò a' kè ser yèsyèsè tkòka s'wòbla'uk ttè dalòieno wa wakpa ena fariseowakpa tsata, e' tã a' kè dõpa ì blúie Skèkòl tso' e' a.

*S'ulurke ñi kji ese ché Jesús tò*

*(Lucas 12.57-59)*

<sup>21</sup> "A' wà ittseüle tò iyènebak ká iaiä e' yépa a: 'Kè a' kawò tã' s'ttòkwa,' ñies 'Yi tò s'ttèwà, ese wák kichatërdaë.' <sup>22</sup> Erë ye' tò a' a' ichè tò yi uluneká iyami kji, ese kichatërdaë. E' kjié tã yi tò iyami ché suluë, ese kichatërdaë. Ñies yò tò iyami kichatëttsa, ese kji inuí tso' tajë tò ipatkerami bö' ké a.

<sup>23</sup> "E' kuëkji a' wà ilè mí mè ka' tso' i'yi moka Skèkòl a' e' kji tã eë a' éna ianewà tò a' yami wèle wà ilè ttè tso' a' kji, <sup>24</sup> e' tã ì mí a' wà mè e' múat eë, kè imar. A' yú a' yami er bua'ukne a' kji. E' ukuòkji tã a' yúne ì meke a' tò e' mú.

<sup>25</sup> "Yile wà a' mí kkatè s'shulo wé a, e' tã mik a' dami ñalà kji ie' tã, età ishulò ie' tã as ie' kè tò a' müttsa s'shulòkwak ulà a. A' kè tò iwè es, e' tã s'shulòkwak tò a' merattsa s'shkèkpa ulà a tã esepa tò a' wóterawa s'wòto wé a. <sup>26</sup> Mokj ye' tò a' a' ichè tò a' kè dõpattsa dõ mik a' tò inuí patuëttsa sera a' etã.

*S'senewabak dalòsewëwà ese ché Jesús tò*

<sup>27</sup> "A' wà ittseüle tò iyènebak: 'Kè a' kawò tã' s'senewabak dalòseukwa.' <sup>28</sup> Erë ye' tò a' a' ichè tò yi tò o'ka alakòl sué tã ikkechéitò, e' tã e' wa isenewabak dalòsewëwàitò ier a.

<sup>29</sup> "E' kuëkji a' wòbla bua'kka tò a' keke ì sulu wamblòk, e' tã iyòttsa kòumi bánet. A' yese alè kéu a' tò, e' dör bua'ie a' uyèwà bö' ké a' wa'ne e' tsata. <sup>30</sup> A' ulà bua'kka tò a' keke ì sulu wamblòk, e' tã itòò uyòmi bánet. A' yese alè kéu a' tò, e' dör bua'ie a' uyèwà bö' ké a' wa'ne e' tsata.

*Se' ñi òwa ese ché Jesús tò*

*(Mateo 19.9; Marcos 10.11-12; Lucas 16.18)*

<sup>31</sup> "Ñies iyènebak: 'Wëm tò itayè éwa, ese wák kawòtã ñi owa yèkuò muk ia.' <sup>32</sup> Erë

ye' tò a' a' ichè tò wëm tò itayè éwa, kè dör itayè trèr kuèkj, e' ta' e' wa ese tò itayè wömètsami isenewabak dalòseukwa\* Nies wëm wele senéwa tayè ese ta, e' wa e' tò tayè senewabak dalòsewéwa.

*S'ttè mè ñi a Skèköl wörkj ese ché Jesús tò*

<sup>33</sup> "Nies a' wa ittseule tò iyènebak ká iaiäe a' yépa a: 'A' ttè mé Skèköl wörkj, etä e' wä uk a' kawöta mokjè.' <sup>34</sup> Erè ye' tò a' a' ichè tò kè a' kawö ta' ttè muk ñi a Skèköl wörkj ö ilè skà wa. Kè a' kawö ta' ttè muk ñi a ká jai wa, e' dör wé Skèköl tkèr s'blúie e' kuèkj. <sup>35</sup> Kè a' kawö ta' ttè muk ñi a ká i' wa, e' dör Skèköl klö tkokäie e' kuèkj. Kè a' kawö ta' ttè muk ñi a Jerusalén wa, e' dör Skèköl dör s'blú, e' kè, e' kuèkj. <sup>36</sup> Nies a' wakpa kè a' a' tsä ë manuk saruru ö dalolo, e' kuèkj a' kè kawö ta' ttè muk ñi a' i' es: "I chéyö e' kè yène, e' ta' ye' wökir töö." <sup>37</sup> E' kuèkj mik a' ttè meke ñi ä, ta' a' tò icheke, "tö", etä e' dör tö; mik a' tò icheke, "au", etä e' dör au. A' tò i skà chéne bánet, e' ta' e' dör suluë.

*Se' e' tsatkö s'sulusipa yökj ese ché Jesús tò*

*(Lucas 6.29-30)*

<sup>38</sup> "A' wä ittseule tò iyènebak: 'Yi tò o'ka wöbla tskéwa, ese wák kawöta wöbla ské tskéwa. Yi tò o'ka kà péwa, ese wák kawöta kà ské péwa.' <sup>39</sup> Erè ye' tò a' a' ichè tò kè a' e' tsatkök pé' sulusipa yökj. E' skéie yi tò a' ppé a' aswö bua'kka kj, e' ta' a' aswö etta mú ia ppé. <sup>40</sup> Yi tò a' kkaté s'shulökwakpa wörkj a' paio kiane iki e' kuèkj, e' ta' a' paio mú ia, ñies a' paio kikké mú ia. <sup>41</sup> Yi tò a' kè idali tsukmi késik wa dö kilómetro et', e' ta' iki tsúmi dö kilómetro böt. <sup>42</sup> Yi tò a' a' ilè kak kié, e' ta' imú ia. Nies yi tò a' a' iyi kié peitule, e' ta' ipeitö ia.

*S'bolökpa ché Jesús tò*

*(Lucas 6.27-28,32-36)*

<sup>43</sup> "Nies a' wa ittseule tò iyènebak: 'S'yamipa daléritsö erè s'bolökpa saü sulu.' <sup>44</sup> Erè ye' tò a' a' ichè: A' bolökpa daléritsö. Wépa tò a' we'ikeke, esepa kj ikiö S'yé a' tò ikimú. <sup>45</sup> A' tò iweke es, e' ta' e' wa a' tso' ikkachök tò mokj a' dör a' Yé tso' ká jai a' e' ala'r. Ie' tò diba patkeke s'ser buaë ena s'ser sulu esepa kj. Nies ie' tò kalj patkeke s'ser yésyèsè ena s'ser sulu esepa kj. <sup>46</sup> Wépa tò a' daléritske esepa ë ské daléritske a' tò, e' ta' z'wes Skèköl tò i buaë mèmi a' a' iskéie? Nies inuköl shtökwakpa Roma wökirpa a' e'pa tò iweke es. <sup>47</sup> A' tò a' yamipa ë shkè'weke, e' ta' z'i buaë weke a' tò s'sulusipa tsata? Nies pé' kè tò Skèköl daloiè esepa tò iweke es. <sup>48</sup> A' senú buaë yésyèsè wes Skèköl dör S'yé tso' ká jai a' e' ser buaë yésyèsè es.

\* **5:32** itayè wömètsami...e' dalòseukwa: Ttè i' wä armi se' éna ñies i' es: "e' ta' ie' tso' itayè sauk wes alaköl trèrta' es. **† 5:41** E' kèwö skà tà Roma ñippökwakpa wä kawö ta' judiowak kök idali tsukmi dö kilómetro etk. \* **6:13** Yi dör sulu ichök: E' dör bé kié Satanás e'.

# 6

*Jesús tò s'wöbla'wé tò wes se' ké s'siarépa kímuk*

<sup>1</sup> "JA' e' kkö'nú! Mik a' tò i buaë weke s'kimoie, etä kè iwar sultane wörkj as ie'pa tò a' kkeökä. A' tò iwé es, e' ta' Skèköl dör S'yé tso' ká jai a, e' kè tò i mepa a' a' iskéie.

<sup>2</sup> "E' kuèkj mik a' tò s'siarépa kimeke, etä kè e' ttè pparkä sultane kukua wes e' ökwakpa es. Ie'pa tò iweke ie'pa ñi dapa'wo wé a' ena ñala wa as sultane tò ie'pa kkeökä. Mokj ye' tò a' a' ichè tò pé' tò ie'pa kkeekeka e' ë dör ie'pa icha ské. <sup>3</sup> Erè mik a' tò s'siarépa kimeke, etä a' tò iü bère, kè ichar yi a. <sup>4</sup> Es Skèköl tò i kos tso' bléule ese suèke, e' tò i buaë merae a' a' iskéie.

*Jesús tò s'wöbla'wé tò wes se' ké ttök S'yé ta*

*(Lucas 11.2-4)*

<sup>5</sup> "Mik a' ttöke S'yé ta, etä kè a' ttök sultane wörkj wes e' ökwakpa es. Sulu ie'pa wöbatsö e' duökser ttök S'yé ta ie'pa ñi dapa'wo wé a' ena wé pé' daparke tajé ká äie ese ska' as ikkearkä. Mokj yö ichè a' a' tò ie'pa icha ské detke iulä a' seraa. <sup>6</sup> Erè mik a' ttöke S'yé ta, etä a' yúwa a' úshu a, ukkö wötöwa eë a' ttö Skèköl dör a' Yé e' ta' bère. A' tò iweke es, e' ta' Skèköl tò i kos tso' bléule ese suèke, e' tò i buaë merae a' a' iskéie.

<sup>7</sup> "Nies mik a' ttöke S'yé ta, etä kè a' ttök wes pé' kè tò ie' daloiè e'pa ttöke ie'pa kékölpa ta es. Ie'pa ttöke ttè etké wa tajé batsjé kè wa ta'. Ie'pa tò ibikeitseke tò ikékölpa tò ie'pa ttö ttsèmi ie'pa tté tajé e' kuèkj. <sup>8</sup> Kè a' tò iuk wes ie'pa es. I kiane a' kj e' jcher Skèköl wä kam a' tò ie' a' ikiö e' yökj. <sup>9</sup> A' ttö ie' ta' i' es:

'A Sa' Yé tso' ká jai a,  
as be' daloiö sa' tò i ulitane tsata.

<sup>10</sup> As be' dö sa' blúie da'äie.  
I kiane be' kj as e' or ká i' kj  
wes iorke ká jai a es.

<sup>11</sup> Chké kiane sa' kj i' ñe sènoie e' mú sa' a.

<sup>12</sup> Sa' nuì olo'yö sa' kj  
wes sa' tò s'malepa kj inuì olo'yéke es.

<sup>13</sup> Kè sa' marttsä tò i sulu tò sa' erkiöü,  
e' skéie sa' tsatkö yi dör sulu ichök\* e' yökj.'

<sup>14</sup> "S'malepa nuì olo'yéke a' tò ie'pa kj, e' ta' ñies S'yé tso' ká jai a, e' tò a' nuì olo'yerae a' kj. <sup>15</sup> Erè a' kè tò s'malepa kj inuì olo'yé, e' ta' S'yé kè tò a' nuì olo'yepa a' kj.

*Jesús s'wöbla'wé tò wes se' ké batsök*

<sup>16</sup> "Mik a' batsöke Skèköl a, etä kè a' e' ök siarè wes e' ökwakpa es. Ie'pa e' öke siarèla as s'malepa tò isaü ta' ikkeökarakitö ibatsökerak e' kuèkj. Mokj ye' tò a' a' ichè tò ie'pa icha ské

detke ie'pa ulà a. <sup>17</sup> Erè mik a' batsöke, età a' wöskuöö, a' tsaiklöö, <sup>18</sup> as s'malepa kè tò isàù tò a' tso' batsök. S'yé kè wèrtà e' tò íyí ulitane tso' bléule e' suéke. A' batsö ie' è wöà tã ie' tò iské meraë a' a' buaë.

*Íyí bua'buá blö ká jai a*  
(Lucas 12.33-34)

<sup>19-21</sup> “Wé a' íyí bua'buá tso' bléule eé a' er me'rie. E' kuéki kè a' tò íyí bua'buá blök ká i' kí. Ká i' kí powak se' íyí sulu'wekewa, ñies akblökwapka tò ikibleke. E' skéie, a' íyí bua'buá e' blö ká jai a. Eé powak kè döpa íyí sulu'ukwã ñies akblökwapka kè döpa íyí ekiblök.

*S'wöbla buaë ena s'wöbla suluë*  
(Lucas 11.34-36)

<sup>22</sup> “S'wöbla dör wes bö'wö es s'chká kôs a. E' kuéki s'wöbla dör buaë, e' tã se' chká kôs e' a' ká olo ta' buaë. E' dör wes se' er dör buaë es, i' kôs dör buaë yésyèsè ese kí se' er me'rie. <sup>23</sup> Erè s'wöbla kè dör bua', e' tã s'chká kôs e' tso' stui a. E' dör wes se' er suluë es, i' sulu kôs ese kí se' er me'rie. Erè se' er buaë e' miáne suluë stuiie, e' tã e' dör suluë ichökke.

*¿Yi dör a' wökir?*  
(Lucas 16.13)

<sup>24</sup> “Wé klöulewã kanè mésoie, ese kawötã iwökir è ttö dalöiök. Ie' wökirpa chöpa bö, e'ma ie' kawötã eköl è dalöiök ena iéköl watöktã. Es a' kè a' er menukwã Skéköl kí ena inuköl kí ñitã.

*Kè a' tkinuk i' kí*  
(Lucas 12.22-31)

<sup>25</sup> “E' kuéki ye' tò a' a' ichè: Ì kiane a' kí senoie chkeie, di'ie, datsi'ie ñie, ese kôs kè kí a' tkinuk. S'tso' tsts'ka e' kè dör chkök ème, ñies s'chká kè dör datsi' è ioie. <sup>26</sup> Dù saü a' tò. Ie'pa kè tò i' kuatketã i' wöshetã, ie'pa kè tò chkè bletã, erè S'yé tso' ká jai a' e' tò ie'pa tieke. Ie' éna a' dalér tajé dù kôs tsãta. <sup>27</sup> A' tkirke tajé e' kí, e' kè tò a' a' kawö kí mepa senoie ekuölö è.

<sup>28</sup> “¿Ì kuéki a' tkirke datsi' kí? Ma'ma wörkua bua'buála ese saü wes italar, kè kaneblöta', kè datsi' yueta'. <sup>29</sup> Erè blu' bak kiè Salomón, e' wã íyí ulitane bua'buá bak tajé, erè ye' tò a' a' ichè tò ie' datsi' bua'buá kè wër buaë wes ma'ma wër es. <sup>30</sup> Kãkö suésö j'ñe, bule tã iñanewa, erè Skéköl tò ikítkeke buaala iwörkua wa. Ie' tò kãkö kítkeke es, je' yitã ie' tò a' kianeia' erblök buaë ie' mik, esepa paieraë! <sup>31</sup> E' kuéki kè a' tkinuk. Kè a' e' chakök, ¿Ì ñemi sa' töt? ö ¿Ì wa sa' e' paiömi? <sup>32</sup> Pè' kè tò Skéköl dalöie esepa tkirke tajé íyí kôs ekké kí. Erè i' kôs kiane a' kí e' jcherkte a' Yé tso' ká jai a' e' wã. <sup>33</sup> E' kuéki i' kôs blúie ie' tso' ena i' dör yésyèsè ie' a' ese kí a' er múwã kewe. A' tò iweke es, e'

tã ñies íyí ñekkè kôs döraë a' ulà a. <sup>34</sup> Diwö bit ekkè íyí tso' kí tkine e' dör wè' se' a. Bulebö k se' tkirmi i' tkömi eé e' kí, e' kuéki kè a' tkinuk iki i' tã.

## 7

*Kè a' tò s'kichatök*  
(Lucas 6.37-38,41-42)

<sup>1-2</sup> “Tè wa a' tò s'malepa kichatè e' è wa Skéköl tò a' kichateraë. Wes a' tò s'malepa weke e' sù a' weraë Skéköl tò. E' kuéki kè a' s'kichatök as Skéköl kè tò a' kichatö. <sup>3</sup> Kaltak jchela tsir tso' a' yami wöbla a, e' sué a' tò, erè ¿ì kuéki kaltak bérie tso' a' wák wöbla a, e' kè sune a' wã? <sup>4</sup> ¿Wes a' tò ichèmi a' yami a: 'súyö be' wöbla a' kaltak jchela tsir tso' e' yëttsã'? Erè kaltak bérie tso' a' wöbla a, ¿e' kè sune a' wã? <sup>5</sup> ¡A' e' öke suluë! Kaltak bérie tso' a' wöbla a' e' yöttsã kewe, es a' yami wöbla a' kaltak jchela tsir tso' e' wërmi a' a' buaë yëttsã.

<sup>6</sup> “I' dör batse'r ese kè tularrtsã chichi a' dö' ie'pa bitüne a' jchöklor. Ñies a' íyí bua'buá\*, ese kè tularrtsã köchi a, ie'pa tò iñateraë ikla'tska wa.

*Ì kiane a' kí, ese kiö Skéköl a*  
(Lucas 11.9-13; 6.31)

<sup>7-8</sup> “Wépa tò íyí kieke Skéköl a, esepa a' imeraë ie' tò; wépa tò íyí yuleke ie' ska' esepa tò ikueraë; wépa tò ie' chakeke, esepa kierawã ie' tò weshke. E' kuéki i' kiane a' kí e' kiö ie' a, etã ie' tò a' a' imeraë; e' yulö ie' ska', etã a' tò ikueraë; ie' chakö, etã ie' tò a' kierawã weshke.

<sup>9</sup> “Kè a' wéne tò ák mepa ilã a' pan kiéitö e' skéie. <sup>10</sup> Ñies kè a' tò tkabè mepa a' alã a' nima kiéitö e' skéie. <sup>11</sup> A' dör pè' suluë erè e' tò íyí buaë meke a' alã a. ¡E' yitã buaë S'yé tso' ká jai a, e' tò íyí buaë meraë yi' tò ie' a' ikieke ese a'!

<sup>12</sup> “A' senü s'malepa tã wes a' kí ikiane tò ie'pa ser a' tã es. Tè e' a' i' kit Moisés ena Skéköl ttekölpa tò yékuö kí e' kôs wöieulewã. E' kuéki a' senü es.

*Sené michoë wékkö e' dör tsir*  
(Lucas 13.24)

<sup>13</sup> “Sené michoë e' wékkö dör tsir, e' a' a' shkówa. S'weir micho e' ñalé ena iwékkö dör shoë; tajé s'mi'ke iki. <sup>14</sup> Erè sené michoë e' wékkö dör tsir ena iñalé kí darèrèè shka', wépa tò ikué esepa kè dör tajé.

*Kal buaë ena kal suluë*  
(Lucas 6.43-44)

<sup>15</sup> “A' e' kkö'nú chakökwapka e' chö tò ie'pa dör Skéköl ttekölpa esepa yöki. Ie'pa e' ö tò ie'pa dör buaë wes obeja urula es, erè ie'pa er suluë wes iyiwak sulusi es. <sup>16</sup> Wes ie'pa e' wamblöke, e' wa a' tò isuğrawã pè'

\* 7:6 íyí bua'buá: E' dör perla si'kuaie.

wése idir. ¿Wé a' wá isúule tò uvawö ö higowö e' shteta'sö dika' kicha mik? <sup>17</sup> Kal buaë kos ese wö dör buaë, erë kal sulusi kos ese wö dör suluë. <sup>18</sup> Kal bua' bua kē wörtä' kalwö sulusië. Nies kal sulusi kē wörtä' kalwö bua' buaie. <sup>19</sup> Kal kos kē wör buaë, ese bikeeke tä inä' wëkewa bö' a. <sup>20</sup> Es a' tò kaçökwakpa suerawä wes ie' pa e' wamblö e' wa.

*Jesús tò icheraë 'kë ye' wä a' sùule'*  
(Lucas 13.25-27)

<sup>21</sup> “Wépa tò ye' a icheke: ‘A Skëképa, a Skëképa’, kē esepa döpawä seraä i blúie Skëköl tso' e' a. Erë wépa serke wes ye' Yë tso' ká jai a e' k' i kiane es, esepa ë dörawä. <sup>22</sup> Aishkuö tä mik a' wöchakirketke a' nuñ k' i e' këwö de, eta tajë ie' pa tò ye' a icheraë i' es: ‘A Skëképa, be' ttö wa sa' ut Skëköl ttekölie, be' ttö wa sa' tò aknama uya'lur, be' ttö wa i kē or yi a ese o' sa' tò tajë.’ <sup>23</sup> Erë ye' tò ie' pa iüteraë: ‘Kë ye' wä a' sùule yës. A' e' wamblö suluë. ¡A' yúshka bánet ye' yöki!’

*Uyuökwa bö'*  
(Marcos 1.22; Lucas 6.47-49)

<sup>24</sup> “E' kueki yi tò ye' ttö tse tä iwa iuteke, ese dör wes wëm eköl tò u yué es. E' tò u chki töbie iskjé ká dör äk ë ese a. <sup>25</sup> Kal' yëne tajë, di' pone tajë, sérkë tka tajë, e' kos tène u e' mik, erë u kē anerö, ichki tuluulewä äk a e' kueki. <sup>26</sup> Erë yi tò ye' ttö tse, erë kē iwa iuteku', ese dör wes wëm eköl kē kabikeitsöta' es. E' tò u yué tsa' wö a' tä chki ate jalälä. <sup>27</sup> Kal' yëne tajë, di' pone tajë, sérkë tka tajë, e' kos tène u e' mik tä ianerö iski tä kē i tä' iä iwa.”

<sup>28</sup> Mik Jesús tté one tä wes ie' tò s'wöbla'weke e' tò sulitane tkiwéwa. <sup>29</sup> Ie' tò ie' pa wöbla'weke tté moki, diché tä' tajë, ese wa. E' kē dör wes s'wöbla'uk tté dalóieno wa wakpa s'wöbla'weke es. E' kueki ie' pa wökranewä ittök.

## 8

*Wëm eköl kiri'weke lepra tò e' bua'wé Jesús tò*

(Marcos 1.40-45; Lucas 5.12-16)

<sup>1</sup> Mik Jesús biteatkene kabata a, eta tajë pë' dami ie' itök; <sup>2</sup> e' shuä wëm debitu' eköl ie' ska' kiri'weke lepra\* tò. Ie' e' tkéwä kuchë k' Jesús wörki tä ichéitö:

—A kékëpa, be' k' i kiane, e' tä be' a ye' buarmine as ye' batse'rne.

<sup>3</sup> Jesús tò ikéwä ulä wa tä ichéitö iä:

—Tö, ye' k' i kiane. Be' dene batse'r.

E' wöshä tä ie' buanene, kē k' i lepra ku' iä.

<sup>4</sup> Jesús tò iché ie' a:

—Ittsö, kē ichar yi a. Be' yú e' k' kachök sacerdote a. Ì muk Moisés tò a' ka' e' batse'woje, e' tsúmi mè Skëköl a iwa k' kachöie tò be' buanene.

*Kanè méso eköl bua'wéne Jesús tò*  
(Lucas 7.1-10; Juan 4.43-54)

<sup>5</sup> Mik Jesús de Cafarnaúm, eta Roma ñippökwa dökä cien ese wökir de eköl ie' ska' k' köchök, <sup>6</sup> tä ichéitö iä:

—A kékëpa, ye' kanè méso duladula eköl kirinewä tajë. Ie' me'r u a ka' k' i pa dalërke tajë kranewa.

<sup>7</sup> Jesús tò iütë:

—Ye' mí ibua'ukne.

<sup>8</sup> Ñippökwa wökir tò iütë:

—A kékëpa, be' döwa ye' u a e' kē dör ye' siarla e' a. Erë ikéwö ë mü tä ye' kanè méso buardane. <sup>9</sup> Ye' wökirpa tä, e' pa ttö iütök ye' kawötä. Nies ye' dör ñippökwa tajë e' pa wökir, ie' pa kawötä ye' ttö iütök. Mik ye' tò eköl a icheke: ‘Be' yú, tä imí. Eköl a ye' tò icheke: ‘Be' dou, tä ide. Nies ye' tò icheke ye' kanè méso a: ‘Íyi ü' tä iwéitö. Ye' iklö'wé tò be' wä kawö tä' íyi ulitane tsata, e' kueki ye' wä ijcher tò be' tò ikéwö mé, e' tä ye' kanè méso buardane.

<sup>10</sup> Mik Jesús tò e' tse tä e' tò ie' tkiwéwa. Ichéitö pë' dami ie' itök i' e' pa a:

—Moki ye' iché a' a tò Israel aleripa kos shuä kē ye' wä yi kune erblök ye' mik wes wëm i' es. <sup>11</sup> Ye' tò a' a iché tò mik i blúie Skëköl tso' e' kēwö de da'äie, eta pë' kē dör judiowak tso' ká wa'ñe, esepa döraë tajë e' tköksër chkök se' yépa bak kië Abraham ena Isaac ena Jacob e' pa tä. <sup>12</sup> Erë warma wépa e' tulökeser ee esepa uyardattsa bánet stu' i kē a. Ee ie' pa iüraë siarë ikä yilidawä weine kueki.

<sup>13</sup> Eta Jesús tò iché ñippökwa wökir a:

—Be' yú u a tä itköraë wes be' erblé ye' mik es.

E' wöshä tä ikanè méso buanene.

*Jesús tò Pedro yäk bua'wéne*  
(Marcos 1.29-31; Lucas 4.38-39)

<sup>14</sup> Jesús tò ma' Pedro u a tä ie' isué tò Pedro yäk me'r ka' k' i kiri'weke duè dalölö tò. <sup>15</sup> E' tò iké iulä k' i tä duè dalölö tò iéwa tä ie' e' kēka tä ilè yuléitö ie' a ñe.

*Jesús tò s'duöke tajë esepa bua'wéne*  
(Marcos 1.32-34; Lucas 4.40-41)

<sup>16</sup> Ká tuirketke tä tajë ie' pa wä pë' a aknama tso' esepa debitu' Jesús ska'. Itö ë wä ie' tò wimblupa ñe' trë' wéyal seraä. Nies s'kirirke e' pa bua'wéneitö seraä. <sup>17</sup> E' tka es as i yë'at Skëköl tteköl kië Isaías e' tò, e' wä tkö. Ie' iyë':

“Se' duè kos e' yéttsa ie' tò se' k' i,

\* 8:2 Lepra: E' dör duè s'méwöie ese. Judiowak tò iklö'wé tò duè e' tò yi tteke ese dör ñä. Esepa batsekttsä bánet kē a kawö tä' senuk pë' malepa shuä. Nies ie' pa kē a kawö tä' shkökwa Skëköl wé a. † 8:17 Isaías 53.4

Se' weirke qos e' mítser ie' wá se' yöki bánet."<sup>†</sup>

*Wépa böl e' yuak Jesús ttókatapae  
(Lucas 9.57-62)*

<sup>18</sup> Mik Jesús tò isué tò pé' dapaneká tajé ipamik, etá ie' tò iché ittókatapa á: "Mishka batsöri wíshet." <sup>19</sup> Etá s'wöbla'ukwak tté dalöieno wa eköl de ie' ska' tá ichéitö ia:

—A S'wöbla'ukwak, ye' shkak be' tá be' ttókataie ká wa'ñe wé be' miró ee.

<sup>20</sup> Jesús tò iüté:

—Bakli' u tá' ñies dúla u tá', eré ye' dör S'ditsó Alá e' ké wa u tá' senoie.

<sup>21</sup> Etá wém ská dör ie' klé eköl e' tò ie' á iché:

—A kéképa, káwö mú ña, mik ye' yé blénewa tá inú wötókwá, e' ukuóki ye' mi'ke be' tá.

<sup>22</sup> Jesús tò iüté:

—I' tá be' shkó ye' ta. Wépa dör wes s'duulewá es Skéköl wöá, as esepa tò iyamipá nu blö.

*Séreké wöklö wé Jesús tò  
(Marcos 4.35-41; Lucas 8.22-25)*

<sup>23</sup> Etá Jesús e' iéka kanó á ittókatapa tá tá imíyal batsöri kí. <sup>24</sup> Ie'pa mirwáia e' shúá siwá' batsíneka tajé tò di' uyéka tajé tá kanó á di' ienekámi. Eré ie' kapóme'r. <sup>25</sup> Etá ittókatapa de ie' ska' tá ití'wéka tá ichéitórak ia:

—jA Skéképa, se' tsátkó! jse' duölurmi!

<sup>26</sup> Ie' tò ie'pa iüté:

—¿I' kueki a' suane sekké? Wésua a' ké erblóku' ye' mik bua'ie.

Etá ie' e' kéká tá siwá' ena di' yöli uñéitö tá iwóklónewa míane alamié. <sup>27</sup> Ie'pa tkinewa tajé tá iní chakéka:

—¿Yi dör wém wí? jE' ttó dalöieke siwá' tò ena di' tò!

*Jesús tò wépa böl á aknama tso' e'pa bua'wé*

*(Marcos 5.1-20; Lucas 8.26-39)*

<sup>28</sup> Mik Jesús demi batsöri wíshet ká kié Gadara ee tá wépa böl á aknama tso', e'pa e' yétsá pó ké á de ie' ska'. Ie'pa e' wamblórak sulué e' kueki ké yi shkótá' ñalá e' wa. <sup>29</sup> Ie'pa tò ichémi áneule:

—Be' dör Skéköl Alá. ¿Iók be' de sa' tsiriuk? ¿Be' debitu' sa' we'ikók kam sa' kéwö dö e' yöki?

<sup>30</sup> Ee tsjnet köchi iéter tajé chkök.

<sup>31</sup> Aknamapa tso' tajé e'pa kkóché Jesús á:

—Be' tò sa' uyekettsá, e' tá káwö mú sa' á e' tiúkwa köchi tso' tajé jai á.

<sup>32</sup> Ie' tò iché ie'pa á:

—A' yúshka ee.

Etá aknamapa qos e' yélur wépa á tá e' tiélur köchi á. E' bet tá köchi qos poneka

tunemirak ká spé mik brutolonemi batsöri á tá ee iduulur.

<sup>33</sup> Köchi kkó'nukwakpa tkayalmi. Mik ie'pa de ká kibi kí, etá ie'pa tò i qos tka wépa á aknamapa bak e'pa tá, e' tté ppéka. <sup>34</sup> Etá ká e' wakpa qos mía Jesús ska'. Mik ie'pa de, etá ie'pa kkóché ie' á: "Be' e' yótsá sa' ká á."

### 9

*Jesús tò wém eköl kraulewá e' bua'wéne  
(Marcos 2.1-12; Lucas 5.17-26)*

<sup>1</sup> E' ukuóki tá Jesús e' iéka kanó á tá imíane itö wa demi Cafarnaúm wé ie' serke ee. <sup>2</sup> Etá ee ie'pa wá wém kraulewá eköl mítser Jesús ska' ká'la kí. Mik Jesús tò isué tò mokí ie'pa erblé ie' mik, etá ie' tò iché wém kirirke e' á:

—A yami, be' er kuú, i sulu qos wamblébö, e' nuí olone be' kí.

<sup>3</sup> Etá s'wöbla'uk tté dalöieno wa wakpa welepa tò ibikeitseke: "¿I' ché ie' tò e' wa ie' tso' Skéköl chök sulué?" <sup>4</sup> Eré i bikietsök ie'pa tso' e' suéwá Jesús tò bet. E' kueki ie' tò ie'pa á ichaké:

—¿I' kueki a' tso' iyi sulu bikietsök? <sup>5</sup> Ye' tò wém i' bua'wémime as ishkóne, e' tá ¿wes a' tò ikló'wémi tò ye' ké á inuí olonuk ikí? <sup>6</sup> Ye' dör S'ditsó Alá, sú e' tò a' á ikkaché tò ye' wá káwö tá' ká i' a nuí olo'yoie.

Etá ie' tò iché wém kraulewá e' á:

—Be' e' kóka, be' ká'la kóka tá be' yúne be' u á.

<sup>7</sup> Etá ie' e' kéká tá imíane iu á. <sup>8</sup> Mik e' sué pé' tso' ee e'pa tò, etá ie'pa suane tajé. Ie'pa tò isué tò Skéköl tò diché tajé mé s'ditsó eköl á, e' kueki ie'pa tò Skéköl kíkéká tajé.

*Jesús tò Mateo kié ittókataie  
(Marcos 2.13-17; Lucas 5.27-32)*

<sup>9</sup> E' ukuóki tá Jesús e' yétsá tá imía, e' tò wém sué eköl kié Mateo,\* e' dör inuköl shtókwak Roma wókirpa á. Ie' tkér ikaneblöke e' wé á. Tá Jesús tò ie' á iché:

—Be' shkó ye' tá ye' ttókataie.

Etá ie' e' kéká tá imía Jesús tá.

<sup>10</sup> E' ukuóki tá Jesús de ittókatapa tá Mateo u á chkök. Ie'pa tulur chkök, e' dalewa inuköl shtókwakpa Roma wókirpa á esepa tajé ena pé' sulusipa ská deyalñak e' tulésér chkök Jesús tá. <sup>11</sup> Mik e' sué fariseowakpa tò, etá ie'pa tò Jesús ttókatapa á ichaké:

—¿Iók a' wöbla'ukwak chköke inuköl shtókwakpa ena pé' sulusipa ská tá?

<sup>12</sup> Jesús tò ittse tá ichéitö iarak:

—Wépa ké kirirku' esepa ké kí s'kapeyókwak kiane. Eré wépa kirirke, esepa kí ikiane. <sup>13</sup> Skéköl tò iyé' iyékuó kí: 'Iyiwak jchéule mé ye' á, ese ké kiane ye' kí. Ye' kí ikiane tò a' ñi saú er siaré wa.<sup>†</sup> A' e' yuó tté e' wa. Ye' ké dē'bitu wépa e'

\* 9:9 Mateo: E' dör yékuó i' shtókwak. Ie'pa wöblane e' chök wes ó'ka ché es, e' kueki ie' ké wá iyéne ye'. † 9:13 Oseas 6.6



ttsö tö ie'pa sër buaë yësyësë esepa kiök ye' ttökataie; ye' dë'bitu pë' sulusipa kiök ye' ttökataie.

*Ï kuëki Jesús ttökatapa kë batsöta'*  
(*Marcos 2.18-22; Lucas 5.33-39*)

<sup>14</sup> Juan S'wöskuökwaq ttökatapa de Jesús ska' tã ichakërakitö ie' a:

—Sa' ena fariseowakpa batsöke tajë. *Ï* kuëki be' ttökatapa kë batsö?

<sup>15</sup> Jesús tö ie'pa iütë:

—Mik s'kiule ulabatsë ese këwö tkö'uk tã *ç*wës ie'pa eriarmi wëm ulabatske e' tso'ia ie'pa tã e' dalewa? Erë ikëwö döraë etã ie' miratser ie'pa yöki. E' je' tã ie'pa batsöraë.

<sup>16</sup> “Kë yi tö datsi' këchke wöyuepawã datsi'tak pa'alï wa. Datsi'tak pa'alï wöklönekã, e' tö datsi' këchkela shukueke tã ikï jcheeke tajë. <sup>17</sup> Nïes vino kë tërta'kã iyyiwak kkuölit yöule ibloie ese këchke a. Itëkasö es, e' tã mik ibachanëbitu, etã ikkuölit këchke jchëemitö. Es vino ena ikkuölit weirwami éme. E' kuëki vino tekekã ikkuölit pa'alï a, es vino ena ikkuölit kë weirpawa.”

*Jesús tö Jairo alã busi shkë'wékane nïes alaköl eköl bua'wénéitö*

(*Marcos 5.21-43; Lucas 8.40-56*)

<sup>18</sup> Jesús tso'ia ttök, e' dalewa judiowak wökir debitu eköl ie' ska' tã ie' e' tkëwã kuchë kï tã ichéitö:

—Niköl ye' alã busi blënewã. Erë be' shkö, be' ulã mükã ikï tã ishkerdakane.

<sup>19</sup> Jesús e' kékã tã imiã ittökatapa tã judiowak wökir itökï. <sup>20-21</sup> E' shua alaköl eköl dewã tsinet Jesús tsj kker. E' du'mi alakölpa duë wã e' kï duas de dabom eyök kï bök (12). Ie' tö ibikeitseke: “Jesús datsi' bata ë këwayö, e' tã ye' buanene.” E' kuëki idatsi' bata këwaitö. <sup>22</sup> Erë Jesús wötrée tã isueitö tã ichéitö ia:

—A alã busi, be' er kuü. Be' erblé ye' mik, e' kuëki be' buanene.

E' wöshã tã ie' buanene buaë.

<sup>23</sup> Mik Jesús de Jairo u a, etã ie' tö isue tö ma'ma bla'ukwakpa detke s'nu blërketke e' kuëki, nïes pë' juke tajë. <sup>24</sup> Ie' tö ie'pa a ichë:

—A' e' yölu, busila kë du'wã, ikapöme'r ë.

Ie'pa tö Jesús jañeitsékã tajë, <sup>25</sup> erë ie' tö ie'pa ké e' skökmi bánet. E' ukuök tã ie' dewã weshkë tã busila ulã klö'wëwaitö tã busila e' kékã. <sup>26</sup> E' ttë bunekã kã e' qos a.

*Wëpa bül kë wöbla wawër e'pa bua'wéné*  
*Jesús tö*

<sup>27</sup> Jesús e' yëttsã eë tã wëpa bül kë wöbla wawër mirwã ie' itökï, e'pa arke:

—jA Jesús, s'blú David bak e' aleri,‡ sa' saü er siarë wa!

<sup>28</sup> Mik Jesús de u a, etã ie'pa bül de ie' ska'. Ie' tö ie'pa a ichakë:

—çA' tö iklö'wë tö ye' a a' buarmine?

Ie'pa tö iütë:

—A këkëpa, tö, sa' tö iklö'wë.

<sup>29</sup> Etã Jesús tö ie'pa wöbla ké tã ichéitö ie'pa a:

—Wës a' erblöke ye' mik es iwã ordaë.

<sup>30</sup> Etã ie'pa wöbla buanene. Tã Jesús tö iché ie'pa a:

—Kë a' kãne ichök yi a yës.

<sup>31</sup> Erë ie'pa miyal tã ì wë Jesús tö e' pakë ie'pa tö kã e' wakpa ulitane a.

*Wëm kë tto eköl e' bua'wë Jesús tö.*

<sup>32</sup> Wëpa bül wöbla buanene e'pa miyal, e' bet tã pë' welepa wã wëm kë tto, ese debitu eköl Jesús ska', e' a aknama tso'. <sup>33</sup> Mik Jesús tö aknama trë'wëshkar, etã wëm ttëkane buaë. Pë' tso' eë e'pa tkirilune tã ichërakitö:

—Kë yi wã iyi wise suule Israel aleripa shua.

<sup>34</sup> Erë fariseowakpa tö ichë:

—Bë, e' wák dichë wa ie' tö ie'pa trë'wéyal.

*Jesús tö pë' suë er siarë wa*

<sup>35</sup> Jesús shköke kã qos tso' Galilea blublu nïes tsitsir e' a. Ie' s'wöbla'wëke judiowak nü dapa'wö wë qos tso' e' a. Ì blüie Skëköl tso' e' ttë buaë pakekeitö. Nïes s'kirirke qos, idalërke s'mik qos, e' bua'wëkeitö. <sup>36</sup> Ie' tö isue tö ie'pa eriärke siarë, weinetke siarë wës obeja kë kkö'nukwak tã es, e' kuëki ie'pa suëitö er siarë wa. <sup>37</sup> Ie' tö ichë ittökatapa a:

—Mokj, ye' a tã ie'pa dör wës iyyiwö tso'tke wë'iaë shtë es, erë ishtëkwakpa kë dör tajë. <sup>38</sup> E' kuëki a' tö ikïö kanë wák a tö ishtëkwakpa patkö.

## 10

*Jesús tö ittekölpa tsá e'pa a kawö mé*  
(*Marcos 3.13-19; Lucas 6.12-16*)

<sup>1</sup> Jesús tö ittökatapa dabom eyök kï bül (12), e'pa kië e' ska' tã kawö méitö ie'pa a wimblupa sulusi trë'woyal nïes s'kirirke duë ulitane wã esepa bua'wone.

<sup>2</sup> Ie'pa ekkëpa dör nïes Jesús ttekölpa tsá, e'pa kië i' es: kewe dör Simón, e' kië nïes Pedro ena ie' ël kië Andrés; Santiago ena iël kië Juan, ie'pa dör Zebedeo ala'r; <sup>3</sup> Felipe ena Bartolomé; Tomás ena Mateo dör inuköl shtëkwak Roma wökirpa a e'; Santiago dör Alfeo alã, ena Tadeo; <sup>4</sup> Simón Celote ena Judas Iscariote tö Jesús wömekettsã aishkuö tã ibölökpa a e'.

*Jesús tö ittökatapa patkëmi s'wöbla'uk*  
(*Marcos 6.7-13; Lucas 9.1-6*)

<sup>5</sup> Wëpa dabom eyök kï bül (12), ñe'pa patkëmi Jesús tö tã ipattëitö i' es: “Kë a' minuk pë' kë dör judiowak esepa kã

‡ 9:27 David aleri: Es ie'pa tö wë pairine'bitu idi' wa s'blüie kitulebak tö idatse e' ë kië. E' wã kiane chë si'kuaie El Mesías.

ḡ. Nies kē a' minuk Samaria. <sup>6</sup> A' yú Israel aleripa ká ḡ, ie'pa dör wēs obeja chōwa es. <sup>7</sup> A' yú ipakök tō i blúie Skéköl tso' e' kēwō dewatke. <sup>8</sup> S'kirirke bua'üne, s'duowa shkē'úkane, s'kiri'weke lepra tō, esepa bua'üne as ibatse'rne. Nies aknamapa yóttsa. E' diché mēne a' ḡme, e' kuekī kē yi ña'war ikī.

<sup>9-10</sup> “Kē i tsarmi. A' kē kawō ta' inuköl tsukmi yēs. Nies sku', datsi' skā, klökkuō, shko kéli ese kōs kē tsarmi. Kaneblökwak chkōmi i kanewekeitō e' ské wa, e' kuekī kē i tsarmi.

<sup>11</sup> “Mik a' demi ká tsitsir ö ká blublu ḡ, etā yi tō a' kiēwami er bua' wa ese yulō. Mik a' ikué, etā e' ē u ḡ a' kapörō a' tso' eē e' dalewa. <sup>12</sup> Mik a' dewa u e' ḡ, etā ie'pa kōs serke eē e'pa shkē'ú er bua' wa. <sup>13</sup> Ie'pa tō a' kiēwa er bua' wa, e' ta' Skéköl er buaē chōraē ie'pa ḡ. Erē ie'pa kē wā a' kinewa er bua' wa, e' ta' kē Skéköl er buaē chōpa ie'pa ḡ. <sup>14</sup> U wēle wakpa ö ká wēle wakpa kē wā a' kinewa buaē ö kē éna a' ttō tsak, e' ta' a' e' yölur u e' ḡ ö ká e' ḡ ta' kapo tso' a' klōttō mik e' ppōō iwā kkachoie ie'pa a' tō ie'pa dör Skéköl bolökpa. <sup>15</sup> Mokī, ye' tō a' ḡ ichē tō aishkuō ta' mik a' wōchakirketke a' nuī kī, etā ká e' wakpa wōmerdatsa weinuk tajē Sodoma ena Gomorra wakpa bak senuk suluē e'pa tsata.

#### *Jesús ttōkatapa weirdaē ie' kuekī*

<sup>16</sup> “Iye' ttō tsól! Ye' tō a' patkekemi pē' shūḡ wēs obejala émi namu tso' tajē, e' shūḡ es. E' kuekī a' senu' wōsh wa wēs tkabē es; erē ñies a' senu' bēre wēs nuböl es. <sup>17</sup> A' tso' erkī. A' miraē ie'pa wā s'shulökwakpa ulā ḡ, ñies a' burdaē siḡrē judiowak ñi dapa'wō wē a'. <sup>18</sup> Ie'pa wā a' miraē duēs'er s'wōkirpa ena s'blūpa wörkī ye' ttē kuekī. Es a' tō ye' ttē pakeraē ie'pa ḡ, ñies ká ulitane wakpa ḡ. <sup>19</sup> Mik ie'pa tō a' mettsa s'shulökwakpa ulā ḡ, etā kē a' tkinuk i chēmi a' tō e' tsatkoie. E' wōshā ta' Skéköl tō ttē eraē a' er ḡ chē ie'pa ḡ. <sup>20</sup> Es kē a' ttōpa a' wák er wa, e' skéie S'yē Wiköl tō ttē eraē a' er ḡ chē.

<sup>21</sup> “Mik e' kēwō de, etā wēlepa tō iel wōmerattsā ttēwa, iyē tō ilā wōmerattsā, ñies ala'r e' kōrakā iyē ena imi kkatōk as ittōwa. <sup>22</sup> Sulitane tō a' sueraē suluē ye' ttē kuekī. Erē kē a' isie e' tkēwā darērēē dōkā bata ekkē, e' tsatkērdaē. <sup>23</sup> Mik ie'pa tō a' we'ikeke ká wēle kī, etā a' tkōshkar iyōkī, a' yú ká kua'kī a. Mokī ye' tō a' ḡ ichē tō kam ye' dör S'ditsō Alā e' dōne, e' yōkī a' kē dōpa Israel kē kōs a'. <sup>24</sup> “Wē wōblarke e' kē dör iwōbla'ukwak tsata. Nies kanē méso kē dör iwōkir tsata. <sup>25</sup> E' dör wē' wē wōblarke e' a' tō idō wēs iwōbla'ukwak es. Nies e' dör wē' kanē méso a' tō idō wēs iwōkir es. U wōkir kiérakitō

Beelzebú\* ie' yitā iyamipa cherarakitō suluē!

#### *Yi yōkī se' ké suanuk (Lucas 12.2-7)*

<sup>26</sup> “E' kuekī kē a' suanuk ie'pa yōkī. Kē i ku' blēulewā e' kē kkeyēpa aishkuō ta, ese kōs jcherdane. <sup>27</sup> I' chéyō a' ḡ akir bēre, e' chōne sulitane kukua. Nies i kōs chéyō bēre asas a' kukuō ḡ, e' chōne aneule sulitane ḡ. <sup>28</sup> Kē a' suanuk yi tō s'tteta'wā esepa yōkī. Ie'pa tō s'chka ē ttēwami erē ie'pa kē a' s'wiköl duökwa. E' skéie Skéköl yōkī a' suanū. Ie' tō s'chka ñies s'wiköl ewēwami bō' kē a'.

<sup>29</sup> “Dūla bōt tuē tottola inuköl etk wōshkila ē, erē dūla kē arta'wā iskī S'yē kē wā ikéwō mēne e' ta'. <sup>30</sup> E' yitā a' k'kō'neraēitō buaē dō a' tsakō bitō tso' shtaoule ie' wa. <sup>31</sup> Ie' a' ta' ta' tuē tajē tkōkā dūla tso' tajē ese tsata. E' kuekī kē a' suanuk.

#### *Wēpa kē jaēne Jesús kī (Lucas 12.8-9)*

<sup>32</sup> “Yi e' chō sulitane wörkī tō ie' dör ye' ttökata, e' ta' ñies ese cheraēyō ye' Yē tso' ká jai ḡ a' wörkī tō ie' dör ye' ttökata. <sup>33</sup> Erē yi tō iblē s'malepa wörkī tō ie' kē dör ye' ttökata, e' ta' ñies ibleraēyō ye' Yē tso' ká jai ḡ a' wörkī tō ie' dör ye' ttökata.

#### *Jesús ttē kuekī se' ñi blabatsölordaē (Lucas 12.51-53; 14.26-27)*

<sup>34</sup> “Kē a' tō ibikeitsök tō ye' dē'bitū ḡ a' ser bēre ñita ká i' kī. Ye' kē dē'bitū ḡ a' ser bēre ñita, e' skéie ye' dē'bitū a' mukka ñippök. <sup>35</sup> Ye' dē'bitū ḡ a' ilā wēm ñippō iyē ta, ḡ a' ilā busi ñippō imi ta ena ḡ a' iyāk ñippō iyāk ta. <sup>36</sup> Es yamipa ekka dōraē ñi bolökpaie ye' ttē kuekī.

<sup>37</sup> “Yi éna iyē ö imi dalēr tkōkā ie' éna ye' dalēr e' tsata, ese kē dōpa ye' ttökataie. Nies yi éna ilā wēm ö ilā busi e' dalēr tkōkā ie' éna ye' dalēr e' tsata, ese kē dōpa ye' ttökataie. <sup>38</sup> Yi kē e' chō weinuk dō ittēwā krus mik ta iser wēs ye' ttökata es, ese kē dōpa ye' ttökataie. <sup>39</sup> Yi e' tsatkak ittēwā yōkī, ese kē ulā a' sene michoē dōpa. Erē yi e' mettsa ttēwā ye' dalērmik, ese ulā a' sene michoē dōraē.

#### *Wēs Skéköl tō iskē meraē se' ḡ (Marcos 9.41)*

<sup>40</sup> “Yi tō a' kiēwā er bua' wa, e' dör wēs ye' kiēwāitō er bua' wa es. Nies yi tō ye' kiēwā er bua' wa, e' dör wēs yi tō ye' patkē' e' kiēwāitō er bua' wa es. <sup>41</sup> Yi tō Skéköl ttekol kiēwā er bua' wa Skéköl ttekol idir e' kuekī, e' ta' ese a' i meraē Skéköl tō ittekōlpa a, ese merdaē ñies. E' sū yi tō s'ser yēsyesē ese kiēwā er bua' wa iserke yēsyesē e' kuekī, e' ta' ese a' i meraē Skéköl tō s'ser yēsyesē esepa a, ese merdaē ñies. <sup>42</sup> Yi isie tō di' kaka lē mé ye' ttökata ēsela

\* 10:25 Beelzebú: E' dör bē, e' ē kiē Satanás.

a yë, ye' ttökata idir e' kuekji, e' ta mokj ye' tö a' a' ichë tö ese a' iské patordäe buaë."

## 11

*Juan S'wösokuökwak ttökataka e'pa de ilë chakök Jesús a*

(Lucas 7.18-35)

<sup>1</sup> Mik Jesús tö ittökataka dabom eyök kji böl (12) e'pa wöbla'wë one, etä ie' miä ká tso' tsinet ese a' s'wöbla'uk ena Skëköl ttë buaë e' pakök.

<sup>2</sup> Juan S'wösokuökwak tso' wötëule s'wötö wë a, eë ie' tö i weke Cristo tö e' ttë ttsé. E' kuekji ie' tö ittökataka wëlepa patké iska'. <sup>3</sup> Ie'pa tö ichaké ia: "¿Be' dör wë pairine'bitu idi' wa s'blüie yëule idatse e' ö yi skä panëia sa' tö?"

<sup>4</sup> Jesús tö ie'pa iutë: "A' yüne Juan ska' ta i kos sué a' tö, i kos ttsé a' tö, e' paköne ie' a. <sup>5</sup> Ipakö ie' a' tö s'wöbla kë wawër, esepa wöbla wawënëne; s'kraulewä kë shko, esepa shkëne; wëpa kiri'weke lepra tö, esepa buanene batse'nene; s'kukuö kë watsers, esepa watsënëne; s'duowa shkënekane; ñies Skëköl ttë buaë e' pakane s'siarëpa a. <sup>6</sup> Yi kë yöki ye' sulune, ayëcha buaë ese!"

<sup>7</sup> Mik ie'pa míyalne, etä Jesús tö Juan ttë pakémitke pë' a, ta ichë ie'pa a: "Mik a' dë'rö ká sir poë wë kë yi serku' eë Juan sauk, etä jima a' erbikö wëm wëse suëmi a' tö? A' kë dë'rö wëm èse, kabikeitsö wj a' diä a' wës kua'kó wöppë siwä' tö es, ese sauk. <sup>8</sup> A' kë dë'rö wëm ese sauk, e' ta jwëm wëse sauk a' dë'rö? A' kë dë'rö wëm e' paiö datsi' bua'buwa wa ese sauk. A' wa ijcher tö wëpa e' paiö es esepa serke blu' u a. <sup>9</sup> Erë jwëm wëse sauk a' dë'rö? A' dë'rö wëm dör Skëköl tteköl ese sauk. Ye' tö a' a' ichë tö mokj Juan dör Skëköl tteköl, erë ie' kë dör ese è. Ie' dör Skëköl tteköl tsatä. <sup>10</sup> Skëköl yëkkuö kji itso' kitule wë Skëköl tö ichë wë pairi'bituitö idi' wa s'blüie e' a;

'Ye' tso'tke ye' ttë pakök kwak patkök be' yöki kewe be' ñialé yuök.\*

Skëköl ttë pakök kwak e' dör Juan. <sup>11</sup> Mokj, ye' tö a' a' ichë tö s'ditsö ulitane tso'tke dö ikkë ta, e'pa shuä kë yi ku' Juan S'wösokuökwak tsatä. Erë i'blüie Skëköl tso' e' a' wë dör èsela shütëe' e' dör Juan tsatä.

<sup>12</sup> "Mik Juan S'wösokuökwak s'tsä pautmi dö ikkë ta, wëpa blüie Skëköl tso' esepa weirke siarë. Pë' kësik sulüë esepa éna ie'pa ewäkwä. <sup>13</sup> Kam Juan tö s'pattömi e' yöki Skëköl ttekölpa kos ena Moisés, e'pa tö iyë'bak tö Skëköl datse se' blüie. <sup>14</sup> A' éna iklö'wak es, e' ta Juan dör Skëköl tteköl kië Elías yëuletke tö idatskene e'. <sup>15</sup> I'A' éna ye' ttö ttsak, e'ma ikukueblö bua'ie!

<sup>16</sup> "¿Jima a' chëmi ye' tö? ¿Wes a' dör? A' dör wës tte' i' tö ichë es: Ala'rla tso' inuk u

itöki. Shäbötspa arke tajë ta' ichëke iyamipa a: <sup>17</sup> 'Sa' tö pulë bla'wë, erë a' kë klötëne'; sa' tö s'eriari tseittsë, erë a' kë jüne.' <sup>18</sup> E' wä dör tö Juan de batsötä', blo' kë yötä', ta a' tö ichë tö aknama tso' ie' a. <sup>19</sup> E' ukuökji ta' ye' dör S'ditsö Alä, e' de kë batsötä', blo' yetä', ta' a' ye' cheke tö ye' chkö tajë, ye' blo' yë tajë ñies tö ye' dör inuköl shtök kwak ena pë' sulusipa malepa, esepa sini'. A' tö ye' cheke es, erë isugasö bulebök ta' tö wëpa serke wes Skëköl siwë tö ichë es esepa dör yösyëse."

*Ká mañat wakpa weiräe siarë*

(Lucas 10.13-15)

<sup>20</sup> Etä ká wëpa kji Jesús tö i kë or yi a' ese o' tajë ká malepa tsata, e' wakpa kër er maneone Skëköl a. E' kuekji ie' tö ie'pa chë ttë i' wa: <sup>21</sup> "A' Corazín wakpa, a Betsaida wakpa, jwëstela ina a' ta! I' kë or yi a' ese o' ye' tö tajë a' wörki, erë a' kë er maneone. E' úpa ye' tö Tiro ena Sidón wakpa wörki, e'ma ká iaiäe ie'pa er mane'bak. Ie'pa tö eriane datsi' ajaë ië'kabak, ñies ie'pa e' tkë'kabak muluchka kji iwä kkachoie tö ie'pa er mane'wë Skëköl a. <sup>22</sup> E' kuekji ye' tö ichë tö aishkuö ta' mik a' wöchakirketke a' nu' kji, etä a' wömerdattsä weinuk tajë shütë Tiro ena Sidón wakpa tsatä. <sup>23</sup> A' Cafarnaúm wakpa, kë a' tö ibikeitsök tö Skëköl wä a' mi'mitsër ká jai a. Ie' tö a' patkerami diöshët wë s'wimblu weirke eë. I' kë or yi a' ese wëyo tajë a' wörki, erë a' kë er maneone. E' úpa ye' tö Sodoma wakpa sulüë wörki, e'ma ie'pa tso'ia dö ikkë ta. <sup>24</sup> E' kuekji ye' tö ichë tö aishkuö ta' mik a' wöchakirketke a' nu' kji, etä a' wömerdattsä weinuk tajë shütë Sodoma wakpa tsatä."

*A' kos erblö Jesús mik*

(Lucas 10.21-22)

<sup>25-26</sup> Etä Jesús tö ichë: "A' ye' Yë, be' dör iyi ulitane tso' ká jai a' ena ká i' a' e' Këköl. Të buaë blë'wä be' tö pë' wä siwä' jcher iskië ena erbikö tajë esepa yöki, erë ikkachëbö s'ësepala a. Es be' kji ikiane, e' kuekji be' tö iwë es. E' kuekji be' kjkékayö."

<sup>27</sup> Jesús ttë iyë ta' one ta' ichëitö pë' tso' eë e'pa a: "Ye' Yë tö iyi ulitane méat ye' ulä a. Ye' dör Skëköl Alä, kë yi wä ijcher mokj tö wës ye' dör, e' jcher ye' Yë è wä. Ñies kë yi wä ijcher mokj tö wës ye' Yë dör, e' jcher ye' è wä. Ñies wëpa a' ye' éna ikkachak esepa wä ijchermi. <sup>28</sup> A' eriarke tajë, weirke siarë iyi ulitane dikjä wës dali ekké dikjä s'shtrirwä es. A' shkó ye' ska', etä a' enuraë ye' batamik. <sup>29-30</sup> Ye' ser bërë, ye' er buaë, e' kuekji a' e' tiüwä ye' ttë dikjä. Të wa ye' tö a' wöbla'wëke, e' kë dör darërëe', e' kë tö a' we'ikepa wës. E' kuekji a' e' wöbla'ü ye' wa ta a' enuraë buaë."

12

*Jesús ttókatapa tó trigo wóikléé éno diwó a (Marcos 2.23-28; Lucas 6.1-5)*

1 E' kéwó ska' ta, éno diwó a, Jesús dami trigo shuá ta ittókatapa dué bli wá. E' kuéki ie'pa tó trigo wóiklérami ta ikatérámirakitó. 2 Mik fariseowakpa tó isué, eta' ie'pa tó iché Jesús a:

—Isaú, be' ttókatapa tso' i ké kéwó ta' wé éno diwó a, ese uk.

3 Ie' tó ie'pa iuté:

—Í o' David tó ká iaiáé ze' ké aritsule a' wa Skékól iyékuó kí? Etókicha ta ie' éna iklépa dué bli wá. 4 E' kuéki ie' dewá Skékól wé a ta pan meule Skékól a' e' kló'wéitó ta iñéitó. Pan e' ké kéwó ta' ñé ie' éna iklépa a, sacerdotepa é a ikéwó ta' ñé. Eré a' éna iane tó e' ké dór sulué Skékól wóa. 5 Ñies za' ké wá iaritsule tté dalóieno kit Moisés tó e' kí tó eré sacerdotepa kanebloke Skékól wé a éno diwó a, eré e' ké wa ie'pa tó idalósewéku'wa? 6 Ye' tó iché a' a tó ieró se' dur ekól, e' dór Skékól wé tsata. 7 Skékól tó iyé' iyékuó kí: 'Yiwak jchéule mé ye' a, e' ké kiane ye' kí. Ye' kí ikiane tó a' ñi saú er siaré wa.\* Tté e' wá anúpa a' éna mokjé, e' ma ké s'kí i nuí ta' ese ké kkatepa a' tó. 8 Ye' dór S'ditsó Alá, e' wá kawó ta' ichók tó i dór buaé ó i dór sulué wé éno diwó a.

*Jesús tó wém ekól ulá siulewá e' bua'wéne (Marcos 3.1-6; Lucas 6.6-11)*

9 E' ukuóki ta Jesús dewá ie'pa ñi dapa'wo wé a. 10 Eta' eé wém tkér ekól ulá etk siulewá. Ie'pa éna Jesús kkaták ilé kí e' kuéki ie' a ichakérakitó:

—¿Ima be' tó ibikeitsé? ¿Kawó meule se' a Moisés tté a' s'buawóne éno diwó a ó au?

11 Ie' tó ie'pa iuté:

—A' obeja anemi etó káuk a éno diwó a, e' ta' a' miráé iyóktsá. 12 E' yitá se' tuetá tajé obeja tsata, e' kuéki kawó tso' se' a' s'kimoie éno diwó a.

13 Eta' ie' tó iché wém ulá siulewá e' a:

—Be' ulá shulóó.

Ta' ie' ulá shuléé ta' ibuanene buaé wes ulá iét es. 14 Fariseowakpa e' yétsa ta' ilaritsérakitó “¿wes sô Jesús ttéwami?”

*Jesús dór Skékól kané méso bua'ie'*

15 E' jchénewá Jesús wá, e' kuéki ie' mía bánét. Tajé pé' dami ie' itókí e'pa shuá ikirirkerak e'pa kós bua'wéne ie' tó. 16 Ie' tó iché ie'pa a:

—Ké ye' tté pparká. 17 Ie' tó iché ie'pa a es as iwá tkó wes Skékól ttekól kié Isaiás tó iyé' es, e' tó iyé' i' es:

18 Skékól tó iché: ‘T' dór ye' kané méso shukit ye' tó,

e' dalér tajé ye' éna, ie' wér ye' wa buaé shute.

Ye' Wikól meraéyó ie' a, ta' ie' tó sene yésyésé wá pakeraé ká ulitane wakpa a.

19 Ie' serdaé bèrè. Ké yi wónaktkepa ie' tó.

Ké i chepa ie' tó aneule. Ké yi tó ie' ttó tsepa ñala kí.

20 S'weirke siaré, esepa ké kí we'ikepa ie' tó, Se' ké diché ta'ia esepa kimeráé ie' tó dó mik ie' e' alóraká i sulu kós kí sene yésyésé wa eta.

21 Ká ulitane wakpa tó ie' é paneraé e' tsatkoie.”†

*Fariseowakpa tó Jesús kkaté*

*(Marcos 3.20-30; Lucas 11.14-23; 12.10)*

22 Eta' ie'pa wá wém ekól a aknama tso' ese debitu Jesús ska', e' ké wóbla wawér, ké tto. Jesús tó ibua'wéne ta iwóbla wawénene ñies ittékane. 23 Ie'pa kós tkirulune iweblók ta iñi chakérak: “¿A' iché wí dór s'blú bak David, e' aleri?”

24 Mik i ché ie'pa tó, e' ttsé fariseowakpa tó, eta' ie'pa tó iché: “Beelzebú dór bé, e' diché wa ie' tó ie'pa tré'wekeyal.”

25 Eré i bikeitseke ie'pa tó e' suéwaitó, e' kuéki ie' tó iché ie'pa a:

“S'érke ká etké kí e' ñi blabatsélor ñippók ñita, ké wóklór, e' ta' ie'pa wákpa é ñi éurawa.

Ñies ñi yamipa e' kéka ñippók ñita, ké wóklór, e' ta' ie'pa mir wa'k éme. 26 Es ñies Satanás mú tó iklépa tré'wéyal, e' ta' ie' tso' ñippók iwakpa é ta. ¿Wes i blúie ie' tso' e' sermiá? 27 Ye' tó aknamapa tré'úpayaal Beelzebú diché wa, e' ta' zyí diché wa a' klépa tó itré'wémiyal? Ie'pa ké a' itrénukyal Beelzebú diché wa, e' ta' kuéki ¿wes a' tó ye' kkatémi tó ye' tó itré'wekeyal Beelzebú diché wa? A' wák klépa tó iwá kkacheraé tó a' tté ké dór mokí. 28 Ye' tó aknamapa tré'wéyal Skékól Wikól diché wa, e' ta' e' wá kiane ché tó i blúie Skékól tso', e' kéwó detke a' a.

29 “¿Wes yi mi'niwá wém diché tajé‡ ese u a' ie' íyi ekiblók kam ie' tó iwák maúwá e' yóki? Es éme íyí ekiblérimi.

30 “Yi ké a' ye' dór bua', ese dór ye' bolók. Yi ké tó ye' kímé imalepa tsukbitu Skékól ska', ese tó ie'pa po'wekemi.

31 “E' kuéki ye' tó iché tó i sulu kós wambleke a' tó ñies Skékól ché sulu kós e' nuí olo'yemiitó a' kí. Eré yi tó Wikól Batse'r ché sulué, e' nuí ké olorpa ikí. 32 Ñies yi tó ye' dór S'ditsó Alá, e' ché sulué, e' nuí olo'yemi Skékól tó ikí. Eré yi tó Wikól Batse'r ché sulué e' nuí ké olorpa ikí i'ñe ta' ñies aishkuó ta.

*Kal buaé éna kal sulué (Lucas 6.43-45)*

\* 12:7 Oseas 6.6 † 12:21 Isaiás 42.1-4 ‡ 12:29 Wém diché tajé: E' wá kiane ché Satanás. Jesús dór wé dór ie' íyi ekibleke e'.

<sup>33</sup> “Kal wérkewá iwó kǐ. Kal buaé, ese wó dór buaé; kal sulu, ese wó dór sulu. <sup>34</sup> Já' dór sulué wés tkabé chók es! A' er dór sulué, ¿wes a' ttómi buaé? Í bikeitsekesó, e' é chekesó. <sup>35</sup> Wém dór buaé ese serke buaé, ttó yésyése ie' er dór buaé e' kuéki. Wém dór sulué, ese serke sulué, ttó sulué ie' er dór sulué e' kuéki. <sup>36</sup> Ye' tó a' a' iché tó aishkuó tǎ mik a' wóchakirketke a' nuí kǐ e' kéwó de, etǎ tté sulu ché a' ulitane tó shabatshabat e' kǐ a' wóchakirdaé. <sup>37</sup> A' wakpa tté wa a' shulirdaé. A' tó tté buaé cheke, e' tǎ Skékól tó icheraé tó ké a' kǐ í nuí tǎ'. Eré a' tó tté sulu cheke, e' tǎ ie' tó icheraé tó a' kǐ nuí tso'.”

*Fariseowakpa tó ì kè or yi a ese kié sué  
(Marcos 8.12; Lucas 11.29-32)*

<sup>38</sup> Etǎ fariseowakpa ena s'wóbla'uk tté dalóïéno wa wakpa wélepa tó iché Jesús a:

—Í kè or yi a ese ú sa' a iwá kkachóie tó mokǐ be' patké'bitu' Skékól tó.

<sup>39</sup> Ie' tó ie'pa iüté:

—A' dór pé' sulué e' ké tó Skékól dalóïé wés trér wakpa ké tó imaso dalóïé es. A' tó ye' a' ikié tó ì kè or yi a ese uyó iwá kkachóie tó mokǐ Skékól tó ye' patké'bitu'. Eré ye' tó ilé weraé etókicha éme iwá kkachóie e' dór wés ibak Jonás dór Skékól ttekol e' tǎ es. <sup>40</sup> Ie' sene' nima bérie e' shuá doka kǎ mañat ñie nañeé, es ñies ye' dór S'ditsó Alá, e' serdaé iyók shuá kǎ mañat ñie nañeé. <sup>41</sup> Mik Jonás tó Nínive wakpa paut, etǎ ie'pa er maneo' Skékól a. Eré j'ñe tǎ ye' dur íe' e' dór ie' tsatǎ, eré a' ké er maneo' Skékól a. E' kuéki aishkuó tǎ mik a' wóchakirketke a' nuí kǐ, etǎ Nínive wakpa e' kórakǎ ie' wórkǐ a' kkatók. <sup>42</sup> Aishkuó tǎ mik a' wóchakirketke a' nuí kǐ, etǎ alakól datse kǎ bánet diwó tsirkirke e' o'mik, bak ikǎ blúie, e' e' kórakǎ ie' wórkǐ a' kkatók tó a' dór pé' sulué. Kǎ iaiáé alakól e' dé'bitu' datse kamié se' blú bak Salomón wa iyi jcher tajé e' ttó kǐjtsók. Eré j'ñe tǎ ye' dur a' shuá e' dór Salomón tsatǎ, eré a' ké tó ye' ttó iüté. E' kuéki alakól e' tó a' kkataraé.

*Wimblu sulusi dene wém a  
(Lucas 11.24-26)*

<sup>43</sup> “Mik wimblu sulusi tréneskar yile a, etǎ imía kǎ sir poé wé kè yi ku' ese ska'. Ie' tso' kǎ yulók senoie eré kè ie' wǎ ikúne. E' kuéki ie' ibikeitsé: <sup>44</sup> ‘Ye' míane wé ye' tréneskar ee' senuk.’ Mik ie' demine wém e' a, etǎ ie' tó isué tó wém dór wés u shuiriule buaé maneneé kè a' yi ku' es. <sup>45</sup> Etǎ ie' míá iyamipa kǐ yulók doka kul sulué shuté ie' tsatǎ tǎ ie'pa kos de senuk wém e' a. Wém e' míane sulué shuté kenet tsatǎ. Es iwambléndaé a' dór pé' sulusipa e'pa tǎ.”

*Jesús mì ena iélpá debitú ie' weblók  
(Marcos 3.31-35; Lucas 8.19-21)*

<sup>46</sup> Jesús ttókeia pé' tǎ e' shuá ie' mì ena iélpá ena ikutapa e'pa iéter u'rkǐ. Ie'pa ttak ie' tǎ. <sup>47</sup> Yile tó ibiyó ché ie' a:

—Be' mì ena be' élpá ena be' kutapa e'pa shkó be' weblók.

<sup>48</sup> Eré Jesús iüté:

—¿Yi dór ye' mì ena ye' élpá ena ye' kutapa?

<sup>49</sup> Etǎ Jesús tó ie' a ittókatapa kkaché ulá wa tǎ ichéitó:

—Isaú, ie'pa dór wés ye' mì ena ye' élpá ena ye' kutapa es. <sup>50</sup> Yi serke wés ye' Yé tso' kǎ jaí a e' kǐ ikiane es, esepa dór wés ye' éi ena ye' kutá ena ye' mì es.

## 13

*Té kuantók kwak tté*

*(Marcos 4.1-9; Lucas 8.4-8)*

<sup>1</sup> E' é diwó wa Jesús e' yéttsa u a míá batsóri kkómik tǎ ee' ie' e' tkésér. <sup>2</sup> Pé' debitú tajé ie' ska', e' kuéki ie' e' iéka kanó a tǎ ee' ie' e' tkésér ie'pa wóbla'uk. Ie'pa ulitane até kǎ sí kǐ batsóri kkómik. <sup>3</sup> Ie' tó tté tsakjé kleé ie'pa a. E' et dór i' es: “Wém ekól míá té kuantók ppé ululu éme\* <sup>4</sup> Mik ie' tso' iwó ppók, etǎ ditsówó wéle anewa ñalǎ ska' tǎ dù debitú tó ikatéwa. <sup>5</sup> Ditsówó wéle anewa áklo a wé iyók kè tǎ' tajé ese ska'. Iyók kè tǎ' tajé, e' kuéki bet tǎ itskineka. <sup>6</sup> Eré kè iwí kicha tǎ' tajé, e' kuéki mik díba aneka ikǐ etǎ isinewa. <sup>7</sup> Ditsówó wéle anewa dika'chka shuá. Dika'chka ena ditsówó talane ñita, eré dika'chka e' aléka ikǐ. <sup>8</sup> Eré ditsówó wéle anewa iyók bua' bua' kǐ, e' tskine talane wóne buaé. Wéle wóne doka cien eyók (100) elka elka, wéle dabom teryók (60), wéle dabom mañayók (30). <sup>9</sup> Já' éna ye' ttó ttsak, e'ma ikukuebló bua'ie!”

*Í kuéki Jesús tó s'wóbla'weke kleaule  
(Marcos 4.10-12; Lucas 8.9-10)*

<sup>10</sup> Etǎ Jesús ttókatapa debitú ie' ska' tǎ ichakérakitó ia: “¿Í kuéki be' tó ie'pa wóbla'weke kleaule?” <sup>11</sup> Ie' tó ie'pa iüté: “Í blúie Skékól tso' e' tté bléulewǎ e' kéwó meneat a' a' wa jchenoie, eré pé' malépa a' kè imeneat es. <sup>12</sup> Yi wǎ tté e' jcher ese a' imerdaé as ie' wǎ ikǐ jcher bua'ie. Eré yi kè éna iǎnak, ese wǎ í jcher bérébéré e' yerattsane iyóki. <sup>13</sup> Í weke ye' tó e' suéke ie'pa tó, eré ie'pa kè éna iwá ane. Í cheke ye' tó e' ttseke ie'pa tó, eré ie'pa kè tó ittseku' er mokǐ wa, ie'pa kè éna iwá iütak. E' kuéki ye' kapakóke ie'pa tǎ es. <sup>14-15</sup> Es iwá tkóke ie'pa tǎ wés Skékól ttekol kié Isaiás tó iyé' es, e' tó iyé' i' es:

‘Kǎ i' wakpa er míá daréré, kè ì dé'waia. Ie'pa kukuóña wótéwǎ daréré as kè iwattser, ie'pa tó iwóbla tsjimiwéwǎ as kè iwawér.

\* 13:3 té kuantók ppé ululu: E' kéwó ska' tǎ pé' wóblar té kuantók wó ppélur té kos e' kǐ.

ie'pa to iwé es as ie'pa ké éna iwà ar, as ie'pa ké er mane'ù ye' ska' ta ye' to ie'pa bua'wè.

E' kuekì ie'pa to ittseraè je', erè ké ie'pa éna iwà arpa,

ie'pa to isueraè je', erè ké ie'pa to iklò'wepa.† Es Isaias to iyè'.

16 "Erè a' wòbla wawèr buaè, a' kukuòña watsèr buaè, e' kuekì ayècha buaè a'. 17 Mokì ye' to a' ichè to Skèkòl ttekolpa tajè ena kà iaiàè s'bak sèr yèsyèsè e'pa to i sué a' to ena i ttsé a' to e' kkeyè' siarè suè ena ttsé, erè ie'pa ké wà isune ittse.

*Tè kuantkòkwak tté e' wà paké Jesús tò (Marcos 4.13-20; Lucas 8.11-15)*

18 "Ittsò, i kleéyo të kuantkòkwak tté wa, e' wà pakekeyò a' a. 19 Pè' wèlepa ta itkòmi wès ditsòwò arwa ñalà ska' es. Esepa to i blúie Skèkòl tso' e' tté ttsé, erè ie'pa ké éna iwà ane. Bè de ta tté buaè yéttsa ie'pa er a. 20 Wèlepa skà ta itkòmi wès ditsòwò arwa áklo a es. Esepa to Skèkòl tté ttsé ta iklò'wèrakitò ttsé'ne buaè wa. 21 Erè ie'pa ké wù kicha ta' tajè, e' kuekì ie'pa to iklò'wé ekuòlò è. Mik ie'pa weinemitke Skèkòl tté kuekì, età ie'pa anemine bet. 22 Wèlepa skà ta itkòmi wès ditsòwò arwa dika'chka shua es. Esepa to Skèkòl tté ttsé, erè ie'pa to iyi tso' kà i' kì ese bikeitseke kibiiè. Ie'pa er me'rie inukòl kì ena i tso' kà i' kì to s'ttsé'wèke buaè ese kì. E' kos to Skèkòl tté kui'wéwa ie'pa er a ta ké idè'ttsà buaè wès ikiane es. 23 Erè wèlepa skà ta itkòmi wès ditsòwò arwa iyòk bua'buwa kì es. Esepa je' to Skèkòl tté ttsé ta iwà ane buaè ie'pa éna ta iwà dettsà buaè wès ikiane es. Ie'pa dör wès iyi kuà wör buaè es wèle wöne dòka cien eyòk (100), wèle dabom teryòk (60), wèle dabom mañayòk (30)."

*Kakò kuà'kì tkène trigo shua e' tté*

24 Jesús tò tté skà kleéne ie'pa a i' es: "I blúie Skèkòl tso' e' ta itkòke wès itka wèm ekòl tò trigowò kuantké ikà a e' ta itka es. 25 Nañewe ie'pa kapolur e' dalewa ibolòk debitù ekòl kakò dör trigo suè ese wò kuantké trigo shua ta iwák mía. 26 Mik trigo wöne, età iwènewà tò ñies kakò kuà'kì tso'. 27 Ikanè mésopa mía ta iché kanè wák a: 'A kèkèpa, be' tò trigowò bua'buwa kuantké be' kà a ta çwes e' a kakò kuà'kì tso'?' 28 Ie' tò ie'pa iuté: 'Ye' bolòk wèle tò iwamblé ye' kì.' Ie'pa tò ie' a ichaké: '¿Be' kì ikiane tò sa' mi' kakò ñe' yòkulur?' 29 Erè ie' tò ie'pa iuté: 'Au, imúat es. A' tò kakò yéttsa e' ta trigo yéttssami ità ñies. 30 Imúat as italar ñita dō mik itèrketke età. E' wa ye' tò itòkwakpa patkeke kakò tók kewe muè eyòk eyòk ña'wewa bò' a. E' ukuòkì ta ye' tò trigowò tók patkeke blè wé ye' iyiwò blòke e' wé a.'"

*Mostaza wò tté*

(Marcos 4.30-32; Lucas 13.18-19)

31 Ttè skà kleéne Jesús tò ie'pa a i' es: "I blúie Skèkòl tso' e' dör wès mostaza wò kuantkèsò kà a es. 32 E' wò dör tsirlala iyiwò ulitane dikija. Erè mik italane ta e' dör iyi kuà tsitsir ulitane tsata. E' mia kalie ta dù datse u yuòk iulà tsaka."

*Pan wòlòwòka tté (Lucas 13.20-21)*

33 Jesús tò ie'pa a tté skà kleéne i' es: "I blúie Skèkòl tso' e' dör wès pan wòlòwòka wòtué tayè tò harinachka mañayòk a es. E' tò harinachka e' kos wòlòwòka tajè."

*Jesús tò s'wòbla'wèke kleaule (Marcos 4.33-34)*

34 Ttè e' kos kleé Jesús tò ie'pa a. Mokì ie' ké wà i pakane ie'pa a ké kleaule. 35 Ie' tò s'wòbla'wé es, e' wa i yè'bak Skèkòl ttekol ekòl tò e' wà tka, e' dör i' es: "Ye' tò s'wòbla'weraè kleaule. Ttè tso' blèule kà iaiàè kà i' yöne e'tami, ese kkacherayò ie'pa a."‡ Es Skèkòl ttekol tò iyè'.

*Kakò kuà'kì tté e' wà paké Jesús tò*

36 Eta Jesús e' cheat pè' a ta imía u a. Ittòkatapa de ie' ska' ta iché ie' a: "Kakò kuà'kì wakléébò, e' wà pakò sa' a." 37 Ie' tò ie'pa a iché: "Yi tò trigowò kuantké, e' dör ye' dör S'ditsò Alà e'. 38 Tè wé kì ikuatkène e' dör kà i'. Trigowò e' dör wépa blúie Skèkòl tso' esepa. Kakò kuà'kì e' dör wépa dör bé icha esepa. 39 Bolòk tò kakò kuà'kì kuantké e' dör bé è. Ilir kéwò e' dör kà i' erkewatke e' kéwò. Itòkwakpa e'pa dör Skèkòl biyòchòkwakpa. 40 Wès ie'pa tò kakò kuà'kì yéttsa uyéwa bò' a, es itkòraè kà i' erkewatke età. 41 E' kéwò ska' ta ye' dör S'ditsò Alà e' dóraè iyi ulitane blúie da'ie. Ye' tò ye' biyòchòkwakpa patkeraè wépa tò o'ka keke i sulu wamblòk ena wépa e' wamblò sulu esepa kos shtòkka. 42 Ie'pa uyewararakitò bò' tajè a, e' iurarak ñies ikà yilidawarak iweir kuekì. 43 Erè s'ser yèsyèsè, esepa dalòburdaè wès diwò es wé S'yé tso' ie'pa blúie ee. ¡A' éna ye' ttò tsak, e' ma ikukueblò bua'ie!

*Iyi tuè darèrèè blèulewà e' tté*

44 "I blúie Skèkòl tso' e' dör wès iyi tuè darèrèè ese blèulewà yile kà a es. E' kuè wèm ekòl tò ta e' tò ie' ttsé'wé buaè. E' kuekì ie' tò ibléwane ta imía ta i kos tso' iwà, e' watuèttsaitò. E' ské wa ie' tò kà e' tuè. Es iyi tuè darèrèè e' de ie' ulà a.

*Ákwòla bua'buwa tuè darèrèè e' tté*

45 "Ñies i blúie Skèkòl tso' e' dör wès ákwòla bua'buwa yuleke iyi wataukwak ekòl tò tuè es. 46 E' tò ákwòla bua'buwa ichòk tuè darèrèè shùtè ese kuéwa ta imía ta i kos tso' iwà e'

† 13:14-15 Isaias 6.9-10      ‡ 13:35 Salmo 78.2

watuétttsaitö. E' ské wa ie' tö ákwöla bua'buá e' tuétttsá.

### *Kla' tté*

<sup>47</sup> “Ñies ì blúie Skéköl tso' e' dör wes kla' uyé wépa wélepa tö dayé á es. E' tö nima kló'wé tajé tsakjé buaé ena sulué. <sup>48</sup> Mik ie'pa tö kla' yétttsá ká sí kǐ tá ie'pa e' tulésér nima shushtök; ibua'buá iéka kǐ á tá isulusi uyémi bánet. <sup>49</sup> Es itkóraé mik ká ì' erkewatke etá. Skéköl biyöchökwakpa bituraé s'shushtök; s'sulusipa michoé bánet, s'ser yésyése michoé bánet. <sup>50</sup> S'sulusipa kos uyerawá Skéköl biyöchökwakpa tö bö' tajé e' á, eé ie'pa júraé siaré, ká yilitdawa iweir kuekǐ.”

### *Íyi pa'alǐ ena íyi kéchke e' tté*

<sup>51</sup> Jesús tö ittökátapa á ichaké:

—¿Tté ekké kos wá áne a' éna?

<sup>52</sup> Ie'pa iüté:

—Tö.

Ie' tö ie'pa á iché:

—E' kuekǐ mik s'wöbla'uk tté dalöiéno wa wakpa ese eköl e' yué buaé ì blúie Skéköl tso' e' tté wa, etá ie' tö s'wöbla'wémi buaé tté kéchke wa ñies tté pa'alǐ wa. Ie' dör wes u wák wa íyi tso' bléule ibló á es. Ese wá ijcher mik tá ikéchke ö ipa'alǐ kiane yétttsá s'malepa kǐmoie.

### *Nazaret wakpa tö Jesús watétttsá*

<sup>53</sup> Mik Jesús tté kleé one, etá imía <sup>54</sup> demi Nazaret, e' dör ie' wák ká. Eé ie' tö s'wöbla'wémitke judiowak ñi dapa'wo wé tso' eé e' á. Wes ie' tö ie'pa wöbla'wéke e' tö ie'pa tkiwéwa. Ie'pa tö iché ñi á:

—¿Wé ie' e' yué tté tajé ekké wa? ¿Wes ì ké or yi á ese wé ie' tö buaé? <sup>55</sup> ¿Ie' wǐ yé ké dör se' íyi yuök kaltak wa e'? ¿Ie' mì ké dör María? ¿Ie' élpá ké dör Santiago, José, Simón ena Judas? <sup>56</sup> ¿Ñies ie' kutapa ké serku' se' shua? Etá ì kos wéke ie' tö ¿wé e' bite' ie' wá?

<sup>57</sup> Ie'pa ké éna ie' tté kló'wak. Eré ie' iché ie'pa á:

—Ká wa'ñe Skéköl tteköl dalöiértá, eré iwák ká kǐ ena iwák u á eé ké idalöiértá'.

<sup>58</sup> Ie'pa ké erbléne ie' mik, e' kuekǐ ì ké or yi á ese ké one ie' wá tajé eé.

## 14

### *Juan S'wöskuökwak kötewa*

(*Marcos 6.14-29; Lucas 9.7-9*)

<sup>1</sup> E' kéwö ska' tá Herodes dör Galilea blú, e' tö Jesús tté ttsé, <sup>2</sup> e' kuekǐ ie' tö iché ikané mésopa á: “Wém ñe' dör Juan S'wöskuökwak shkénékane e'. E' kuekǐ ie' wá diché tso' ì ké or yi á ese wöje.”

<sup>3</sup> Herodes tö Juan kló'ukwá patké' wöté'waitö s'wöto wé á, e' kuekǐ ie' tö Jesús ché es. Ie' sene' Herodías tá, e' dör ie' él kié Felipe e' alaköl. <sup>4</sup> E' yé' Juan tö ie' á: “Ké

be' kawö tá' senuk be' él alaköl tá.” E' kuekǐ Herodes tö Juan wötökwa patké'.

<sup>5</sup> Herodes éna Juan ttakwá eré ie' suane pé' yökǐ, ie'pa tö ikló'wé tö Juan dör Skéköl tteköl e' kuekǐ. <sup>6</sup> Eré mik Herodes tö iduéswo kéwö tkó'wéke, etá Herodías alá busi e' klóte s'kiule tso' tajé e'pa wörkǐ. E' wér buaé Herodes wa. <sup>7</sup> E' kuekǐ ie' tö iché ie' á yésyése Skéköl wörkǐ: “Mokǐ ye' tö iché, ìkié be' tö ye' á, e' meraéyö be' á.” <sup>8</sup> Etá ie' tö iché Herodes á wes imì tö ie' á iyé' es:

—Juan S'wöskuökwak ttökwa patkó tá iwökir mú ye' á kulé' á iwá kkachöie tö mokǐ ittéwarakitö.

<sup>9</sup> Etá blu' Herodes erianeká tajé, eré ie' tö itté métké s'kiule tso' e'pa kukua, e' kuekǐ ie' tö ikéwö mé. <sup>10</sup> Ie' tö Juan kuli' tökök patké s'wöto wé á. <sup>11</sup> E' ukuökǐ tá ie'pa wa iwökir debitu' kulé' á mé busi á tá ie' tö imé imì á.

<sup>12</sup> Juan ttökátapa de tá inú tsémirakitö wötéwa. E' ukuökǐ tá ie'pa mía tá ibiyö ché Jesús á.

### *Pé' döka mil skeyök e' tié Jesús tö*

(*Marcos 6.30-44; Lucas 9.10-17; Juan 6.1-14*)

<sup>13</sup> Mik Jesús tö biyö e' ttsé, etá ie' mía kanó kǐ ekörla bánet wé ké yi serku' ese ska'. Mik pé' wá ijchenewa tö ie' mía, etá ie'pa miyal itökǐ batsöri kkómik klö wa. <sup>14</sup> Mik Jesús e' yétttsá kanó á, etá pé' tso' tajé ipanuk e' suéitö. Ie'pa suéitö er siaré wa. S'kirirke kos demi ie'pa wá e' bua'wéitö. <sup>15</sup> Ká tuirketke, e' kuekǐ ittökátapa de ie' ska' tá ichéraitö ie' á:

—Ká de tsálǐ, ké yi serku' íe. Ie'pa yuömi as ie'pa mi' pé' serke tsǐnet eé ilé taúk ñé.

<sup>16</sup> Ie' tö ie'pa iüté:

—Ie'pa ké kawötá mi'kyaal; ie'pa tüö a' tö.

<sup>17</sup> Ie'pa tö iüté:

—Pan ské ena nima bötö e' é tso' sa' wá.

<sup>18</sup> Ie' tö iché:

—Itsu'bitu' ña.

<sup>19</sup> Etá ie' tö pé' ké e' tulöksér iskǐ ta'tsi kǐ. E' ukuökǐ tá ie' tö pan ské ena nima bötö e' kló'wé tá iká sué ká jai á tá wéstela chéitö Skéköl á. Tá pan blatéitö mé ittökátapa á as ie'pa tö iwatiö pé' á. <sup>20</sup> Ie'pa ulitane chké de wé'. Ibata até e' shtéraitö iéne döka kköla dabom eyök kǐ böc. <sup>21</sup> Ie'pa chké e'pa döka mil skeyök (5.000) wépa é, alakölpa ena ala'rla ké shtáne.

### *Jesús shké di' kǐ*

(*Marcos 6.45-52; Juan 6.16-21*)

<sup>22</sup> E' ukuökǐ tá Jesús tö iché ittökátapa á: “A' e' iöká kanó á, a' yúshkatke ye' yökǐ kewe batsöri wíshet.” Ie' tö iché pé' malepa á: “A' yúne a' u á.” <sup>23</sup> E' ukuökǐ tá ie' mía ekörla kabata á ttök S'yé tá. Mik ká tuine, etá ie' tso'ia kabata á. <sup>24</sup> E' dalewa ittökátapa mirwá batsöri kǐ demitke elkeé. Siwa' bitsirke tajé ie'pa kke wöiá, e' tö di' uyeke tajé térke kanó

mik. <sup>25</sup> Ká ñirketke eta Jesús mía ie'pa ska' shkõrami di' kí. <sup>26</sup> Erë mik ie'pa tò isué tò ie' shkõdatse di' kí, eta e' tò ie'pa tkiwéwa suawé tajë tá ñaneqarak:

—jWimblu datse se' kker!

<sup>27</sup> Erë ie' iché ie'pa a:

—jA' er kuú! Kë a' suanuk, ye' idir.

<sup>28</sup> Eta Pedro tò iché ie' a:

—A Skëképa, mokí be' idir, e' tá kawõ mú mi ye' a shkõk di' kí dõ be' ska'.

<sup>29</sup> Eta Jesús tò iüté:

—Be' shkõ ye' ska'.

Eta Pedro e' yétsa kanõ a shkëmi di' kí dõ Jesús ska'. <sup>30</sup> Erë mik ie' isué tò siwa' bitsirke darërë, eta ie' suanëka tajë tá iwõtunewami di' a tá ñaneka tajë:

—jA Skëképa, ye' tsatko!

<sup>31</sup> E' bet tá Jesús tò iklõ'wé iulã a tá iché ia: —jWësu be' erblõke ye' mik bërëbërë! ¿Ì kueki be' ibikeitsëka bõtõt?

<sup>32</sup> Mik ie'pa bõl e' iëka kanõ a, eta siwa' wõklõne. <sup>33</sup> Ie'pa kos tso' kanõ a, e'pa e' tulësr kuchë kí Jesús wõrkí idalõioie tá ichërakitõ:

—jMokí be' dõr Skëkõl Alã je'!

*Jesús tò s'kirirkepa bua'wé Genesaret (Marcos 6.53-56)*

<sup>34</sup> Itkatsarak batsõri wíshet demirak Genesaret. <sup>35</sup> Mik ká e' wakpa tò isué tò Jesús idir, eta ie'pa tò ittë ppëka ká e' kos a. Ie'pa wa s'kirirke mi'ke ie' ska' as ibua'ütitõ. <sup>36</sup> S'kirirke esepa kkõchõke ie' a tò ie'pa a ie' datsi' bata ë mú këwa. Wëpa kos tò ikë e'pa banene.

**15**

*Ì tò se' ia'wëmi ñáie (Marcos 7.1-23)*

<sup>1</sup> Fariseowakpa ena s'wõbla'uk ttë dalõieno wa wakpa serke Jerusalén, e'pa wëlepa debitu Jesús ska'. Ie'pa tò ie' a ichaké:

<sup>2</sup> —¿Ì kueki be' ttõkatapa kë tò se' yëpa bak e'pa ser e' dalõieh? Ie'pa chkõ ulã kë pakõule.

<sup>3</sup> Ie' tò ie'pa iüté:

—¿Ì kueki Skëkõl ttë dalõieno e' dalõsewëkewa a' tò a' wakpa ser dalõioie?

<sup>4</sup> Skëkõl iyë'at: 'A' yë ena a' mi e'pa dalõio,\* ñies ie' tò iyë'at: 'Yi tò iyë õ imi chë suluë ese wák wõmerdatssa ttëwa.'\* <sup>5</sup> Erë a' ichëke tò se' a iyëmi s'yë a õ s'mi a' i' es: 'Ì kos tso' ye' wa a' kimoie, e' meuletke Skëkõl a'\*, e' kueki kë ye' a' k'imenuk i' wa'. <sup>6</sup> A' tò ichëke tò yi isie e' chë, ese wák kë kawõtãia iyë õ imi k'imuk. Es Skëkõl ttë dalõieno ñe' dalõsewëkewa a' tò a' wakpa ser iütë wa. <sup>7</sup> jA' e' õ suluë! Buaë Isaiás tò a' yë' mik ie' iyë':

<sup>8</sup> Skëkõl tò ichë: 'Pë' ikkëpa tò ye' dalõieke kkõ ë wa,

erë ie'pa er tso' kamië ye' yõki.

<sup>9</sup> È ichõkle ie'pa mi'ke ye' wé a ye' dalõioõk.

Ttë wa ie'pa s'wõbla'wëke e' dõr s'ditsõ ttë dalõieno ë.'S

Es Isaiás tò iyë'at.

<sup>10</sup> E' ukuõki tá ie' tò pë' tso' eë e'pa kié tá ie' iché iarak:

—A' tò ye' ttõ ttsõ, iwã anú a' éna. <sup>11</sup> Ì ñeke a' tò ese kë tò a' ia'wëpa ñáie Skëkõl wõa. Erë ì sulu wambleke a' tò tskirke a' er a ese je' tò a' ia'wëraë ñáie.

<sup>12</sup> Eta ittõkatapa de ie' ska' tá ie' a ichaké:

—¿Be' wa ijcher tò ì chekebõ e' tò fariseowakpa uluwé?

<sup>13</sup> Ie' tò ie'pa iüté:

—Fariseowakpa esepa dõr wës iyi kuã kë tkënewa ye' Yë tso' ká jai a e' wa es, e' kueki ie'pa yërdatssa wië. <sup>14</sup> Ie'pa múat es. Ie'pa dõr wës s'wõbla kë wawër ese tò o'ka wõbla kë wawër e' ulaië es, e'pa bõl tkõaraë kawuk a.

<sup>15</sup> Eta Pedro tò iché ie' a:

—Ttë waklëbõ ñe' wã pakõ sa' a.

<sup>16</sup> Ie' tò iüté:

—¿Ñies a' kë éna iwã ane? <sup>17</sup> ¿A' kë éna iane tò ì ñekesõ ese mi'ke s'ñawi a e' ukuõki tá iwekettsasõ? <sup>18</sup> Erë ì sulu tskirke a' er a ese tò a' ia'wëmi ñáie. <sup>19</sup> Ì sulu bikeitseke a' tò, s'ttëwa, senewabak dalõsewëwa, trë, akblë, s'kkatë kachë wa ñies ñi chë sulu ese kos tskirke a' er a. <sup>20</sup> Iyi ese tò a' ia'wëraë ñáie. Erë a' chkõ kë ulã pakõule e' kë tò a' ia'wëpa ñáie.

*Tayë ekõl kë dõr judiowak e' erblë Jesús mik (Marcos 7.24-30)*

<sup>21</sup> Eta Jesús ena ittõkatapa míyal ká kië Tiro ena Sidón eë. <sup>22</sup> Eta tayë ekõl serke eë dõr cananwak, e' ardatse tajë Jesús itõki:

—A kékëpa be' dõr David aleri, ye' saú er siarë wa. Ye' alã busi kirirke tajë a aknama tso'.

<sup>23</sup> Erë Jesús kë wa ie' iütëne yës. Eta ittõkatapa kkõché ie' a:

—Tayë ardatse tajë se' itõki, ì kiane ie' ki' e' mú ie' a as imi'a.

<sup>24</sup> Ie' tò ie'pa iüté:

—Skëkõl tò ye' patkë' Israel aleripa ë k'imuk. E'pa dõr wës obeja chõwa siarë es.

<sup>25</sup> Eta tayë dewa e' tkéwa kuchë kí Jesús wõrkí tá ichéitõ ia:

—jA kékëpa, ye' k'imú!

<sup>26</sup> Jesús iüté:

—Kë idõr buaë ala'rla chkë yétsa mè chichi a.

<sup>27</sup> Tayë tò iché:

\* 15:4 Éxodo 20.12; Deuteronomio 5.16 † 15:4 Éxodo 21.17; Levítico 20.9 ‡ 15:5 meuletke Skëkõl a: Ie'pa tò iché es erë ie'pa ulã a itso'ia, e' wakanewëmi ie'pa tò wës ie'pa kí ikiane es. § 15:9 Isaiás 29.13



—A këkëpa, e' yëne; erë chkë mulé darke jskj e' ñeke chichi tō.

<sup>28</sup> Etā Jesús iché ie' a:

—A tayé, be' erblé mokj ye' mik, e' kuekj i kiane be' kj e' de be' ulā a.

E' wōshā tā ilā busi buanene.

*S'kirirke ese bua'wéne Jesús tō*

<sup>29</sup> Etā Jesús ena ittōkatapa biteyalne batsōri kié Galilea e' kkōmik. Etā ie' tkakā kabata tukir kj ta eē ie' e' tkésēr. <sup>30</sup> Tā pē' de tajé ie' ska', e'pa wā iduepa de Jesús wōrkj. Iduepa kë shko, kë wōbla wawēr, kë tto, ulā ō klō suluulewā ñies s'kirirke dué ulitane wā ese kōs bua'wéitō. <sup>31</sup> Pē' ulitane tso' eē isaḷk e'pa wōkrarulune. Ie'pa tō isuē tō kë s'tto esepa ttékane, s'ulā ena s'klō suluulewā esepa buanene, kë s'shko esepa shkéne, ñies kë s'wōbla wawēr, esepa wōbla wawéne. E' kuekj ie'pa tso' Israel aleripa Kékōl kjkōkka tajé.

*Wēpa dōkā mil tkëyōk e' tié Jesús tō*  
(Marcos 8.1-10)

<sup>32</sup> Etā Jesús tō ittōkatapa kié tā ichéitō ie'pa a:

—Siārē ye' wa pē' ikkëpa wēr. Ie'pa tso' ye' tā e' kj ká de mañatk tā kë ie'pa wā i ku' ñē. Kē ye' éna ie'pa patkak u a kë chkaule dō' isiwā arwarak ñalā kj.

<sup>33</sup> Etā ittōkatapa tō iché iā:

—Erē ká i' a kë yi serku'. ζWēs sa' tō pan kuēmī tajé pē' ekkëpa tōioe?

<sup>34</sup> Ie' tō ie'pa a ichaké:

—ζKōs a' wā pan tso'?

Ie'pa iūté:

—Sa' wā pan tso' kul (7), ñies nima tso' elkela.

<sup>35</sup> Etā ie' tō pē' ké e' tulōksēr jskj <sup>36</sup> tā pan kul ena nima e' klō'wéitō tā wēstela chéitō Skékōl a tā iblatéitō mé ittōkatapa a tā ie'pa tō iwatié pē' a. <sup>37</sup> Pē' ulitane chké de wē' tā ibata aṭe e' iēne dōkā kkō kul. <sup>38</sup> Ichkérak e'pa dōkā mil tkëyōk (4.000) wēpa ē, alakōlpa ena ala'rla kë shtāne. <sup>39</sup> Jesús tō pē' yuémīne tā ie' e' iéka kanō a tā imiā ká kié Magdala eē.

## 16

*Fariseowakpa tō i kë ōr yi a ese uk ké sué*  
(Marcos 8.11-13; Lucas 12.54-56)

<sup>1</sup> Fariseowakpa ena saduceowakpa wēlepa de Jesús ska'. Ie'pa éna ie' tsaiak, e' kuekj ie'pa tō ikié ie' a tō i kë ōr yi a ese iūtō iwā kkachōie tō mokj ie' patkē'bitū Skékōl tō.

<sup>2</sup> Erē ie' tō ie'pa iūté: “Tsālī tā a' tō icheke; <sup>3</sup> bla'mi tā a' icheke; <sup>4</sup> Ká tanewa mat kalj yērmi, etā ζwēs i' tkōke j'ñe tā e' kë wā ar a' éna? <sup>4</sup> A' dōr pē' suluē e' kë tō Skékōl dalōiē wēs trēr wakpa kë tō imaso dalōiē es. A' ye' a' ikié

tō i kë ōr yi a ese uyō iwā kkachōie tō mokj Skékōl tō ye' patkē'bitū. Erē ilē weraéyō etōkicha ēme iwā kkachōie, e' dōr wēs Jonás tā ibak es.”

Etā ie' tō ie'pa méat tā imiā bánet.

*Fariseowakpa pan wōlōwōka e' paké*  
(Marcos 8.14-21)

<sup>5</sup> Jesús ena ittōkatapa demi batsōri wishēt, erē ittōkatapa éna ilē chowa tsēmī ñē. <sup>6</sup> Ie' iché ie'pa a:

—Ye' ttō ttsō. A' e' kkō'nú fariseowakpa ena saduceowakpa pan wōlōwōka e' yōkī.

<sup>7</sup> Ittōkatapa iché ñi a:

—jKē se' wā i dē' ñē!

<sup>8</sup> I' chōk ie'pa tso' e' suéwāitō tā ichéitō ie'pa a:

—ζI' kuekj a' tso' ichōk ñi a tō kë se' wā i dē' ñē? jKam a' erblō ye' mik mokjē! <sup>9</sup> ζKam a' éna iwā ar? Pan skēl wadé'yō wēpa dōka mil skeyōk (5.000) ekké a, ζe' chowa a' éna? Etā ζkkō bik ibata kit a' tō? <sup>10</sup> Nies pan kul wadé'yō wēpa dōkā mil tkëyōk (4.000) ekké a, ζe' chowa a' éna? E' ukuōkī tā ζkkō bik ibata kit a' tō? <sup>11</sup> ζWēs a' kë éna iāne tō ye' kë ku' i ñekesō ese chōk? A' e' kkō'nú fariseowakpa ena saduceowakpa pan wōlōwōka ese yōkī.

<sup>12</sup> Etā ie'pa éna iāne tō Jesús kë ku' pan wōlōwōka tso' se' wā ese chōk. Ie'pa éna iāne tō ttē wa fariseowakpa ena saduceowakpa tō s'wōbla'wēke e' chōk ie' tso'.

*Pedro tō iché tō Jesús dōr wé pairine'bitū idi' wa s'blúie e'*

(Marcos 8.27-30; Lucas 9.18-21)

<sup>13</sup> Mik ie'pa de ká kié Cesarea Filipo, etā Jesús tō ittōkatapa a ichaké:

—Ye' dōr S'ditsō Alā, ζima e' cheke pē' tō ye' dōr yī?

<sup>14</sup> Ie'pa iūté:

—Welepa tō icheke tō be' dōr Juan S'wōskuōkwak. Welepa skā tō icheke tō be' dōr Skékōl ttekol bak kié Elías shkēnekane e'. Welepa skā tō icheke tō be' dōr Skékōl ttekol bak kié Jeremias ō Skékōl ttekolpa skā bak e' wēle.

<sup>15</sup> Ie' tō ie'pa a ichaké:

—Erē ζima a' iché, ye' dōr yī?

<sup>16</sup> Simón Pedro tō iūté:

—Be' dōr wé pairine'bitū idi' wa sa' blúie e'. Be' dōr Skékōl chōk Alā e'.

<sup>17</sup> Jesús iché ie' a:

—A Simón, Jonás alā, ayécha buaē be' dōr. I' ché be' tō e' kë mēne s'ditsō wā be' a, e' mé ye' Yē tso' ká jai a' tō be' a. <sup>18</sup> E' kuekj ye' be' a' iché tō be' dōr Pedro (kié e' wā kiane ché ak). Be' dōr wēs ak dōr u katabloie es, e' wa ye' ichapa kj dōraē tajé. I' kōs tso' dō duéwā diché, e' kë e' alōpakā ie'pa kj. <sup>19</sup> I' blúie Skékōl tso' e' wékkō kkōppōo kéwō meke ye' tō be' a. Ye' tō kawō meke be' a ye' ttē buaē pakōk as Skékōl dō s'tso' tajé e' blúie. E'

dör wës blu' eköl kané méso tö blu' wékkö kköppèe aš s'dōwajā es. Ì kē kēwō mēne be' wā kā i' a, ese kē kēwō mēne Skéköl wā. Nies ì kēwō mé be' tö kā i' a, ese kēwō me'bak Skéköl tö.

<sup>20</sup> E' ukuōkī tā Jesús kē wā ittōkatapa kàne yi ā ichök tö ie' dör wē pairine'bitū idi' wa s'blúie e'.

*Jesús e' biyō ché tö ie' tterawā*  
(*Marcos 8.31-9.1; Lucas 9.22-27*)

<sup>21</sup> E' ukuōkī tā Jesús tö itsā ché ittōkatapa ā: —Ye' kawōtā shkōkmi Jerusalén, eē judiowak kuēblupa ena sacerdotepa wōkirpa ena s'wōbla'uk ttē dalōiēno wa wakpa tö ye' we'ikeraē tajē. Ye' tterawā erē e' kī kā de mañat etā ye' shkērdakāne.

<sup>22</sup> Pedro tö ie' kiēmi bānet tā iuñēmiitō:

—jA Skékēpa, kē e' char! jE' mü kē dör es! jKē e' wamblēnuk be' ta!

<sup>23</sup> Erē ie' e' wōtrēe Pedro kē tā iché:

—jA Satanás, be' yūshka bānet ye' yōkī! Be' tso' ye' wōklō'uk. Be' kē tö iyi suē wës Skéköl tö isuēke es; be' tö isuēke wës s'ditsō tö isuēke es.

<sup>24-25</sup> Ie' tö iché ittōkatapa ā:

—Yi e' tsātkak ittēwā yōkī, ese kē ulā ā sene michoē dōpa. Erē yi e' mettsā ttēwā ye' dalērmik, ese ulā ā idōraē. E' kuēkī yi e' yuak ye' ttōkataie, ese kē kàne tkinukīā e' kī. E' skéie ikawōtā e' chök dō ittēwā wōtēulewā krus mik ekkē. Es ie' kawōtā shkōk ye' itōkī. <sup>26-27</sup> Ye' dör S'ditsō Alā, e' dōraē Skéköl olo tā' tajē e' a, nīes Skéköl biyōchōkwakpa tā. Ye' tö sulitane patuēraē eköl eköl wës iser es. E' kuēkī iyi ulitane tso' kā i' a e' de a' ulā a, erē sene michoē kē dē' a' ulā a, e' tā e' dör žie bua' a' a? Sene michoē kē patorpa ì wa. <sup>28</sup> Mokī ye' tö a' ā iché tö a' tso' jē, e'pa wēlepa tö ye' dör S'ditsō Alā, e' datse blu'ie e' sueraē kām iblērulur e' yōkī.

## 17

*Jesús tö ilo tajē e' kkaché ittōkatapa ā*  
(*Marcos 9.2-13; Lucas 9.28-30*)

<sup>1</sup> E' kī kā de teröl, etā Jesús wā Pedro ena Santiago ena Juan dör Santiago ēl, e'pa mītsēr e' tā kā bata kakkeē ese kī. <sup>2</sup> Eē ie'pa wō shaē ie' manenetšā mīā kuā'kī, iwō olobune wës diwō es, nīes idatsi' manenetšā mīā saruruē wōnarke dalōlōē. <sup>3</sup> E' bet tā ie'pa tö Skéköl ttekolpa bak kā iaiāē kiē Moisés ena Elías e'pa suē kapakök ie' tā. <sup>4</sup> Etā Pedro tö iché ie' ā:

—A Skékēpa, buaē se' tso' jē. Be' kī ikiane, e'ma ye' tö ulā yuēkā mañatkuela; etkue be' ā, etkue Moisés ā, etkue Elías ā.

<sup>5</sup> Ie' ttōkeiā e' wōshā tā mochka wōnarke dalōlōē ese tö ie'pa kītēwā. Mochka šuā ie'pa tö tšé tö iché: “Sē dör ye' alā dalēr

tajē ye' éna, e' wēr buaē šuēte ye' wa. Ie' ttō iūtō.”

<sup>6</sup> Mik e' tšse ittōkatapa tö tā ie'pa suanēkā tajē, e' kuēkī ie'pa e' tēlur wōwakkōt. <sup>7</sup> Jesús dewā ie'pa o'mik tā ie' tö ie'pa kēwā tā ichéitō ie'pa ā:

—A' e' kōkā; kē a' suanuk.

<sup>8</sup> Mik ie'pa tö kā suē, etā ie'pa isuē tö kē yi ku'ia, Jesús ē dur.

<sup>9</sup> Ie'pa bitētkene wa'k, etā Jesús tö ie'pa ā iché:

—Ī suē a' tö e' kē pakar yi ā dō mik ye' dör S'ditsō Alā, e' ttēwā shkēnekāne e' ukuōkī.

<sup>10</sup> Ie'pa tö ie' ā ichakē:

—žĪ kuēkī s'wōbla'uk ttē dalōiēno wa wakpa tö icheke tö Elías kawōtā dōkne kēwe wē pairine'bitū idi' wa s'blúie e' yōkī?

<sup>11</sup> Ie' tö ie'pa iūtē:

—E' yēne tö Elías datsekene kēwe. Ie' tö ì kos kaneweketke kewe wē pairine'bitū idi' wa s'blúie e' yōkī. <sup>12</sup> Erē ye' tö a' ā iché tö ie' dē'bak, erē ie'pa kē éna iane tö ie' idir. Ie'pa tö iwe'ik siarē wës ie'pa kī ikiane es. Es nīes ie'pa tö ye' dör S'ditsō Alā e' we'ikeraē.

<sup>13</sup> Ie'pa éna iane tö ie' tso' Juan S'wōskuōkwak e' chök.

*Duladula eköl tteke aknama tö e' bua'wēne Jesús tö*  
(*Marcos 9.14-29; Lucas 9.37-43*)

<sup>14</sup> Mik Jesús ena ittōkatapa demine wē pē' daparke tajē ie' panuk eē, etā wēm de eköl ie' ska' tā ie' e' tkēwā kuchē kī Jesús wōrkī tā ichéitō ia:

<sup>15</sup> —A kēkēpa, ye' alā saū ēr siarē wa. Ie' kirirke siarē, wekkē alē tā ĩlīneka, mikle tā ie' anērō bō' a, mikle tā di' a. <sup>16</sup> Kām be' dō etā ye' wā idebitū be' ttōkatapa ā erē ie'pa kē ā ibuarne.

<sup>17</sup> Jesús tö iché:

—A pē' kē erblōtā' Skéköl mik, a' kē éna kā ane. žMik ye' sērmirō a' tā? žKos ye' tö a' dalē'tsemirō? Kabēla nē' tsūbitū nā.

<sup>18</sup> Etā ie' tö aknama uñē tā itrē'wēshkar duladula ā. E' wōshā tā duladula buanene buaē.

<sup>19</sup> E' ukuōkī tā ittōkatapa ttē ie' tā bānet. Ie'pa ie' ā ichakē:

—žĪ kuēkī sa' kē ā aknama e' trēneshkar?

<sup>20</sup> Ie' iché ie'pa ā:

—A' kē erblōku' Skéköl mik mokjē e' kuēkī. Mokjē ye' tö a' ā iché tö a' erblōpa Skéköl mik tsir mostawa wō dör tsirila ekkē, e' tā a' tö ichēmi kabata wī ā: 'Be' e' skōttšā yūshka bānet', tā imirāā bānet. A' erblōke mokjē Skéköl mik, e'ma kē ì dör darērē a' ā wē. <sup>21</sup>\*

*Jesús skā e' biyō ché tö itterawā*  
(*Marcos 9.30-32; Lucas 9.43-45*)

\* **17:21** Yēkkuō kēchke wēle tö wersículo 21 kī kuōtkēkā. E' tö iché i' es: Erē aknama ese yērmitšā ikīē S'yē ā ena batsē e' ē wa.

22 Mik Jesús ena ittökatapa ñi dapa'wé Galilea, eta ie' tö ie'pa a ichè:

—Ye' dör S'ditsö Alà, e' wömerdatssa pè' ulà a, 23 ta ye' tterawarakitö, erè e' kî kâ de mañat ta ye' shkërdakane.

Ttè e' tö ie' ttökatapa eriawé tajè.

*Inuköl shteke Skëköl wé kanéwoje ese patuè Jesús tö*

24 Mik Jesús ena ittökatapa de Cafarnaúm, eta pè' tö inuköl shteke Skëköl wé kanéwoje e'pa de Pedro ska' ta ie' a ichakè:

—Ze'be' wöbla'ukwak tö inuköl patuèkesö Skëköl wé kanéwoje e' patuèta'?

25 Pedro tö ie' iütè:

—Tö, ipatuèta'.

E' ukuöki ta mik Pedro de wëshkë, eta Jesús ttè ie' ta kewe ta ichéitö ie' a:

—A Simón, ¿ima be' ibikeitsè? ¿Yi ña'wëke kâ wökirpa tö, ikâ wakpa ekka ö pè' kua'kî?

26 Pedro tö iiütè:

—Pè' kua'kî.

Jesús tö ichè:

—E' yène, e' kuëki ila'r kë kawötâ ipatauk.

27 Erè ipataüsö as ie'pa kë ulurkâ se' kî. E' kuëki be' yú batsöri kkömik eta biklö' uyömi di' a. Etâ nima tsâ kli'wé be' tö e' kkö shuppö, eë be' tö inuköl kueraè et. E' tsümi ie'pa patuöje, e' dör wë' se' böi nuï patuöje.

### 18

*Yi dör ibua'ie Skëköl wöa*

*(Marcos 9.33-37; Lucas 9.46-48)*

1 E' kèwö ska' ta Jesús ttökatapa de ie' ska' ta ie' a ichakèrakitö:

—Ï blúie Skëköl tso' e' shüa ¿yi dör ibua'ie imalepa tsata?

2 Jesús tö alala kié eköl duésër ie'pa shushaè 3 ta ichéitö ie'pa a:

—Mokî ye' tö a' a ichè tö a' kë er mane'ü as a' dö wës alala i' es, e' ta a' kë döpawâ ï blúie Skëköl tso' e' a. 4 Yi er mane'wé ta ie' e' wóewa wës alala i' es, ese döraè ibua'ie ï blúie Skëköl tso' e' a. 5 Yi tö alala i'se kiéwa ye' ttö wa, ese tö ye' wák kiéwa.

*A' tso' wösh wa ï tö s'ké ï sulu wamblök ese yöki*

*(Marcos 9.42-48; Lucas 17.1-2)*

6 “Yi tö ikkëpala erblöke ye' mik, esepa eköl kë ï sulu wamblök, esepa weirdaè tajè shütë tkökâ ák wawoie muéwa ikuli' a batrèemi dayè a e' tsata. 7 Iyi tso' tajè s'erkiöwoje ï sulu wamblök, e' kuëki wëstela ina kâ i' wakpa ta. Kekraè ï sulu tso' s'erkiöuk, erè yi tö s'ké ï sulu wamblök, wëstela ina esepa ta.

8 “A' ulà ö a' klö tö a' ké ï sulu wamblök e' ta itöo uyömi bánet. A' döwa sene micho a ulà etkè ö klö etkè, e' dör buaè. E' skéie a' uyéwa bö' ñar michoè e' a ulà bötkè ena klö

bötkè e' dör suluè. 9 Ñies s'wöbla tö s'ké ï sulu wamblök, e' ta iyöttsa uyömi bánet. A' döwa sene micho a wöbla ek è wa, e' dör buaè. E' skéie a' uyéwa bö' ñar michoè e' a wöbla bötkè, e' dör suluè.

*Obeja chowa e' pake*

*(Lucas 15.3-7)*

10-11 “A' e' kkö'nú, ikkëpala kë watarttsa. Ye' tö a' a ichè tö Skëköl biyöchökwakpa tso' ie'pa kkö'nuk e'pa tso' kekraè ye' Yé tso' kâ jai a e' wörki ie'pa ttè chök.

12 “¿Ima a' tö ibikeitsè? Wëm eköl wâ obeja tso' döka cien ta e' etö chowa, e' ta ¿i wëmi ie' tö? Obeja döka dabom suliyök kî sulitu (99) e' meraat ie' tö kañikâ ta imia obeja chowa e' yulök. 13 Mokî ye' tö a' a ichè tö mik ie' tö ikué, eta ie' ttsé'nene buaè tkökâ imalepa kë ché'wa e' tö ie' ttsé'wé e' tsata. 14 Es Skëköl dör a' Yé tso' kâ jai a, e' kë kî ikiane tö ikkëpala chöwa ekla wë'ia.

*Wës se' ké er buanukne ñi kî*

*(Lucas 17.3)*

15 “A' yami wele tö ï sulu wamblé a' kî, e' ta a' yú ie' ska' ta ï sulu wambléitö e' chö ie' a, e' shulö a' böi è tö. Ie' tö a' ttö iütè, e' ta a' er buanene ñi kî. 16 Erè ie' kë wâ a' ttö iütène, e' ta a' yamipa tsümi eköl ö böi, ttè kî a' tö ie' kkatè e' ttekölie as iqr wës itso' kitule es. E' tö ichè, “Ttè kës shulekesö eta ittekölpä kiane böi ö mañal ichoie tö mokî idir ö au.” 17 Erè kë ie' wâ e'pa ttö ttsène, e' ta ichö ye' icha erule e' kukua. Ñies kë iwâ ie'pa ttö iütène, e' ta isaü wës pè' kë tö Skëköl dalöie es ö wës inuköl shtökwapka Roma wökirpa a e'pa saü es.

18 “Mokî ye' tö a' a ichè tö ï cheke a' tö tö e' dör suluè kâ i' a, ese cheraè Skëköl tö tö e' dör suluè. Ñies ï cheke a' tö tö e' dör buaè kâ i' a, ese cheraè Skëköl tö tö e' dör buaè.

19-20 “Ye' tö ï skâ chekene a' a: Wé a' böi ö mañal ñi dapa'wé ye' ttö wa, eë ye' tso' a' ta. E' kuëki a' böi er mewa ñikkè kâ i' a ilè kiök ye' Yé tso' kâ jai a e' a, e' ta imeraèitö a' a.”

21 Eta Pedro dewâ Jesús ska' ta ichakèitö:

—A Skëkëpa, ¿bitökicha ye' yami tö ï sulu wamblé ye' kî, e' olo'yëmiyö ikî? ¿Mokî dö kul ekkè?

22 Ie' iiütè:

—Kè ye' tö be' a ichè kul è. Ye' ichè tö be' kawötâ inuï olo'yök ikî kekraè bitökicha ekkè\*.

*Blu' er buaè ché ikanè méso eköl a*

23 “Ï chéyo a' a e' wa pakekeyö ttè i' wa. Ï blúie Skëköl tso' e' dör wës blu' eköl éna nuï shulak ikanè méso pa ta es. 24 Ie' tö ie'pa nuï shulémitke eta ikanè méso eköl debutu ie'pa wâ ie' wörki, e' wâ nuï tso' tajè shütë 25 Ie'

\* 18:22 kekraè bitökicha ekkè: Griegoie e' dör dabom kuryök döka kuktökicha (70\*7). † 18:24 nuï tajè shütë: Ttè ï dör inuköl kiè talento e' mil döka dabop. I'ñe ta e' ské dör dólares döka millón döka dabom skeyök (50,000,000)

kê a nuj ekkê patorpa, e' kuekji blu' tō ie' ena ilakōl ena ila'r ena i kos tso' iwa e' watauktsa kē inuj ekkē patuoie. <sup>26</sup> Ikanē mēso e' tkéwā kuchē kji blu' wōrkj tā ikkōché tajē ie' a: 'Be' wa'iekēyō, ye' panū bērē tsir, e' wa ye' tō be' patuēttsa sēraa.' <sup>27</sup> Blu' ie' suē er siarē wa, e' kuekji iñarke kos e' olo'yēitō ikj sēraa tā iémine bērē.

<sup>28</sup> "Erē mik kanē mēso e' mīa, etā ie' tō kanē mēso iēkōl kuē nā'weke ie' tō elkela ē. Tā iklō'wēwāitō ikuli' a tuéwā darērēē tā ichēitō iā: 'jBe' nārke ye' ulā a, e' pataūttsa nā!' <sup>29</sup> Tā iēkōl e' tkéwā kuchē kji ie' wōrkj tā ikkōché tajē: 'Be' wa'iekēyō, ye' panū bērē tsir, e' wa yō be' patuēttsa sēraa.' <sup>30</sup> Erē ie' kē wā iēkōl kōkōchōke e' iūtēne. Ie' tō iwōtōkwā patkē s'wōto wē a dō mik inuj patuēttsaitō sēraa etā. <sup>31</sup> Mik kanē mēso mālepa tō ittsē, etā e' tō ie'pa ēriawē tajē. E' kuekji ie'pa mīa blu' ska' tā ichēka sēraa. <sup>32</sup> Etā blu' tō kanē mēso e' kiōk patkē tā ichēitō iā: 'jBe' dōr pē' suluē! Ye' tō be' kji be' nuj tajē e' olo'ya sēraa be' kōyō' ye' a e' kuekji. <sup>33</sup> jI kuekji be' kē wā be' yami sune er siarē wa wēs ye' be' su' es?' <sup>34</sup> Etā blu' ulunekā tajē, e' tō ikanē mēso wōtōkwā patkē aš iwe'ikō ie'pa tō siarē dō mik inuj patonēttsa sēraa etā. <sup>35</sup> Es nīes a' yami tō i sulu wamblē a' kji e' nuj kē olo'yē a' tō ikj er mokj wa, e' tā ye' Yē tso' kā jai a' e' tō a' wē'ikeraē siarē."

**19**

*Se' nī ōwa ese ché Jesús tō*

*(Mateo 5.31-32; Marcos 10.1-12; Lucas 16.18)*

<sup>1</sup> Mik Jesús tō ttē ekkē chē one, etā ie' e' yēttsa Galilea mīa Judea tā itkattsa Jordán a wishet. <sup>2</sup> Tajē pē' dami ie' itōkji e'pa shūa wēpa kirirke esepa kos bua'wēitō.

<sup>3</sup> Etā fariseowakpa wēlepa de ie' ska' tā ie'pa tō ie' a' ichakē itšaoie:

—jWēpa a kəwō tā' itayē owa íyi ulitane kuekji?

<sup>4</sup> Ie' tō ie'pa iūtē:

—jTō kitule Skēkōl yēkkuō kji, jē' kē sune a' wā? E' tō ichē tō tsawe tā Skēkōl tō se' yō' wēm ena alakōl. <sup>5</sup> Ie' tō iyē': 'E' kuekji wēpa kē serpaia iyē ena imi e'pa dapōmik, tā iserdawā alakōl tā. Ie'pa bōl serdaē nīta tā ie'pa mīa wēs wák ekōl ē es.\* Es ikiteat <sup>6</sup> e' kuekji ie'pa kē iā bōl, ie'pa yōne wēs wák ekōl ē es. E' kuekji wēpa batséwā Skēkōl tō esepa kē batsōkōk yi tō.

<sup>7</sup> Etā ie'pa tō ie' a' ichakē:

—E' dōr es, e' tā jI kuekji Moisés tō iyē'at tō wēm tō itayē éwa, ese wák kəwōtā nī owa yēkkuō muk iā?

<sup>8</sup> Ie' iūtē:

—A' er darērē, e' kuekji Moisés tō kəwō me' a' a' tayē ōkwa, erē tsawe tā kē idōr es. <sup>9</sup> Ye' tō a' a' ichē tō yi tō itayē éwa, kē dōr itayē trēr kuekji, ese tō alakōl skā tséwāne, e' tā e' wa isenewābak kēwe e' dalōsēwēwāitō.

<sup>10</sup> Jesús ttōkatapa tō ichē ie' a:

—E' dōr es e' tā bua' idir sa' a' tō kē sa' alakōl tsūwa.

<sup>11</sup> Ie' tō ie'pa iūtē:

—jChé a' tō e' kē dōr sulitane a, e' dōr wēpa a imēne esepa ē a. <sup>12</sup> Wēpa wēlepa dōr kachir ie'pa wák dē'ka es e' kuekji. Wēlepa skā yueke s'kapeyōkwakpa tō kachirie. Iskā tso' esepa serke kachirie i blúie Skēkōl tso' e' kanē kuekji. Wēpa sērmi es, esepa sēnū es.

*Jesús tō ikie Syé a ala'rla kji*

*(Marcos 10.13-16; Lucas 18.15-17)*

<sup>13</sup> Pē' wā ala'rla debitū Jesús ska' as ie' ulā mukā ikj ena ikidō Syé a ikj. Erē ittōkatapa tō pē' uñēlor. <sup>14</sup> Erē ie' tō ichē:

—Aš ala'rla bitū ye' ska'. Wēpa dōr wēs ie'pa es, esepa blúie Skēkōl tso', e' kuekji kē iwōklō'wāria.

<sup>15</sup> Etā ie' ulā mēka ie'pa kji, e' ukuōkji tā imīa bānet.

*Inukōl blú ekōl tō Jesús a ichakē*

*(Marcos 10.17-31; Lucas 18.18-30)*

<sup>16</sup> Wēm ekōl debitū Jesús ska' tā ie' a' ichakē:

—A S'wōbla'ukwak, jI buaē wēm ye' tō aš sene michoē dō ye' ulā a?

<sup>17</sup> Ie' tō iūtē:

—jI kuekji be' tō ye' chakē i dōr buaē ese kji? Skēkōl ekōl ē dōr buaē. Be' kji sene michoē kiane, e' tā ttē me'atbak ie' tō dalōiēno e' dalōiō.

<sup>18</sup> Ie' tō Jesús a ichakē:

—jTtē wēne?

Ie' iūtē:

—'Kē a' kəwō tā' s'ttōkwā, kē a' kəwō tā' s'senewābak e' dalōsēukwā, kē a' kəwō tā' akblōk, kē a' kəwō tā' s'kkatōk kachē wa, <sup>19</sup> a' yē ena e' mī dalōiō, nīes a' mālepa dalērītsō wēs a' wāka e' dalēr es.†

<sup>20</sup> Duladula tō ie' a' ichē:

—Ttē e' kos dalōiē'bitū ye' tō iaiāē. Etā jI skā kianeia?

<sup>21</sup> Ie' iūtē:

—Be' éna i buaē kos wák sēraa, e' tā be' yū tā i tso' be' wā, e' wataūttsa sēraa tā iské mūttsa s'siarēpa a. E' ukuōkji tā be' shkō ye' tā ye' ttōkataie. Es tā íyi buaē tajē dōraē be' ulā a ká jai a.

<sup>22</sup> Duladula dōr inukōl blú tajē, e' kuekji mik ie' tō e' ttsē etā ie' erianekā tajē tā imiātkē.

<sup>23</sup> Etā Jesús tō ichē ittōkatapa a:

‡ **18:28** elkela ē: Ttē i' dōr inukōl kiē denario ese dōka cien. Deuteronomio 5.16-20; Levítico 19.18

\* **19:5** Génesis 2.24 saú. † **19:19** Éxodo 20.12-16;

—Mokj ye' tō a' a' ichè tō inukōl blúpa a darèrèè idir dōkwa i blúie Skèkōl tso' e' a. <sup>24</sup> Iskà chènèyō a' a' tō inukōl blúpa a dōkwa i blúie Skèkōl tso' e' a' e' dōr darèrèè tkōka kameio tkōmi datsi' yuo diké ese wōukla a' e' tsata.

<sup>25</sup> Mik e' t'se' ie'pa tō, etā ie'pa tkinewā tajē tā ichéitōrak:

—E' dōr es e' ma ζyi tsatkērimi?

<sup>26</sup> Ie'pa webléitō tā ichéitō:

—E' kē onuk s'ditsō a wes, erē Skèkōl a iyi ulitane ormi.

<sup>27</sup> Etā Pedro tō iché iā:

—Sa' tō iyi ulitane me'at tā sa' bitē be' tā. ζi dōmi sa' ulā a' e' skéie?

<sup>28</sup> Ie' tō ie'pa iūtē:

—Mokj ye' tō a' a' ichè tō mik ká i' manerketkene buaē aishkuō tā, etā ye' dōr S'ditsō Alā e' dōraē ká ulitane blúie olo tā' tajē. Nies a' dōr ye' ttōkatapa, e'pa e' tulōraser blu' kulé dōka dabom eyōk kī bōt e' kī, Israel ditséwōpa dōka dabom eyōk kī bōl e'pa wēttsuk. <sup>29</sup> Wépa kos tō iu o iēlpa o iikutapa o iyē o imi o ila'r o iká ese méat ye' tté kueki, e' tā e'pa ulā a' iské dōrane tajē shūtēē, nies aishkuō tā sene michoē dōraē ie'pa ulā a. <sup>30</sup> Erē j'ñe tā se' tajē tō' kewe esepa dōraē bataie ena se' tso' bataie j'ñe tā esepa dōraē keweie.

## 20

### Kanè mésopa patuē e' tté

<sup>1</sup> “I blúie Skèkōl tso' e' tā itkōke wes itka wēm ekōl tā es. E' míā bla'mi kanè mésopa yulōk ie' uva tso' tkéule e' kanéuk. <sup>2</sup> Ie' tō iché ie'pa a: 'Ye' tō a' patuēke kos s'patōrke ká etk ekké, e' dōr denario etk.' E' dōr buaē ie'pa a tā ie' tō ie'pa patké kanēblōk. <sup>3</sup> Diwō de suljtu (9) etā kanè wák miāne kanè mésopa ská yulōk etā eē ie' tō isuē tō wēpa tulus nāla' ska' kē ku' kanēblōk. <sup>4</sup> Ie' tō ie'pa a' iché: 'A' yú kanēblōk ye' kanē a' tā ye' tō a' patuēke kos s'patōrke mokj ekké.' Etā ie'pa míā kanēblōk. <sup>5</sup> Diwō de bata a' tā ie' míā kanè mésopa ská yulōk etā ie' tō ie'pa patké kanēblōk. Nies tsáli diwō de mañat etā ie' míā kanè mésopa ská yulōk tā ie'pa patkéitō nies kanēblōk. <sup>6</sup> Diwō dōketke skēl etā ie' míā kanè mésopa ská yulōk, eē ie' tō wēpa kuē iēter kē ku' kanēblōk. Ie' tō ie'pa a' ichaké: 'ζi'ōk a' iēter ñie jē kē ku' kanēblōk?' <sup>7</sup> Ie'pa tō iūtē: 'Kē yi wā sa' a' kanè mēne.' Etā ie' tō ie'pa a' iché: 'A' yú kanēblōk ye' a.'

<sup>8</sup> “Mik ká tuine, etā kanè wák tō iché ikanè mésopa pataukwak a: 'Kanè mésopa kiō etā ie'pa pataū. Wépa debitu' bataie, e'pa pataūmi kewe, tā wépa debitu' kewe, e'pa pataū bataie.' <sup>9</sup> Etā kanè mésopa debitu' kanēblōk tsáli diwō skēl, e'pa patōne kewe. Ie'pa kos patōne denario et et. <sup>10</sup> Mik kanè mésopa debitu' kanēblōk kewe,

e'pa patōrketke etā ie'pa tō ibikeitsé: 'Sa' patōrke aishet sa' malepa tsata.' <sup>11</sup> Erē ie'pa kos patōne denario et et ē. <sup>12</sup> E' tō ie'pa kabewéka tā iché kanè wák a: 'Wépa ikkēpa debitu' bataie kanēblé bērbērla ē, e' skéie sa' kanēblé ñie, ña'wé díba tō, nies shtrine tajē. Etā ζwes be' tō ie'pa patuē kos be' tō sa' patuē ekké?' <sup>13</sup> Erē kanè wák tō ikanè méso ekōl iūtē: 'A yami, ye' kē ku' i' sulu wamblok be' tā. Se' tté mé ñi a' tō ye' be' patuēke denario etk. <sup>14</sup> E' kueki be' inukōl klō'ú tā be' yúshka. Wēm debitu' kanēblōk ibataie ese a' ye' éna inukōl mak kos ye' tō be' a' imé ekké etā ζwes ide? <sup>15</sup> Ye' a' kawō ta' i' wak ye' éna ye' inukōl wa, ese wōie. Ye' tō ilé kakmeke yile a, ζe' tō be' ukyéweke ye' kī?'

<sup>16</sup> “Es s'tso' bataie esepa dōraē keweie ena s'tso' keweie esepa dōraē bataie.”

### Jesús e' biyō chéne tō ie' tterawā pē' tō (Marcos 10.32-34; Lucas 18.31-34)

<sup>17</sup> Jesús ena ittōkatapa dabom eyōk kī bōl (12), e'pa mirka' Jerusalén tā ie' tō ie'pa kié bānet tā ichéitō iā:

<sup>18</sup> —Se' mirka' Jerusalén i', etā eē ye' dōr S'ditsō Alā, e' merdattsa' sacerdotepa wōkirpa ena s'wōbla'uk tté dalōiēno wa wakpa ulā a. Ie'pa tō ye' kichatōraē. <sup>19</sup> Ye' merattsarakitō pē' kē dōr judiowak esepa ulā a. E'pa tō ye' wayueraē pperaē siarē tā ye' tterawarakitō wōtēule krus mik. Erē e' kī ká de mañat, etā ye' shkerdakane.

### Santiago ena Juan e'pa mī tō kawō kié Jesús a

#### (Marcos 10.35-45)

<sup>20</sup> Santiago ena Juan dōr Zebedeo ala'r e'pa mī de ie'pa tā Jesús ska' tā ie' tkéwā kuché kī iwōrkī ilé kioie ie' a. <sup>21</sup> Jesús tō ie' a' ichaké:

—ζi kiane be' kī?

Ie' tō iūtē:

—Ye' tō be' a' kawō kieke tō mik be' tkéneka' s'blúie, etā ye' alā ekōl tkōwā be' ulā bua'kka, ekōl be' ulā bakli'kka s'wēttsuk be' tā.

<sup>22</sup> Ie' iūtē:

—I kieke a' tō e' kē wā jcher a' wā. ζYe' tka' wayarmi a' a? ζA' e' ché weinuk wes ye' weirdaē es?

Ie'pa tō iūtē:

—Tō, sa' dirmi.

<sup>23</sup> Ie' iché:

—Mokj ye' tka' wayeraē a' tō, a' weirdaē wes ye' es. Erē e' tkōksēr ye' ulā bua'kka o ye' ulā bakli'kka, e' kē kēwō menuk ye' a. E' tso'tke ye' Yē wā klōule yi a' imekeitō esepa a.

<sup>24</sup> Mik tté e' t'sewā ittōkatapa malepa dōka dabom eyōk (10) e'pa tō, etā ie'pa uloneka' ie'pa bōl ñe' kī. <sup>25</sup> Erē ie' tō ie'pa ulitane kié tā iché iā:

—A' wā ijcher tō pē' kē tō Skèkōl dalōiē, esepa wōkirpa kos e' alōkeka' ie'pa kī kēkraē,

ñies iblúpa tò ie'pa patkeke kësik wa. <sup>26</sup> Erë a' kè kàne e' wamblok es. E' skéie, a' isie e' yuak a' wókirie, ese kawótá e' wóokwa imalepa dikjá dióshet ikanè mésoie. <sup>27</sup> Ñies a' isie e' yuak ibu'ie a' malepa tsata, ese kawótá e' muktsa imalepa a kanè mésoie. <sup>28</sup> Ye' dör S'ditsó Alá, e' kè dë'bitu as yi tò ye' kímü. Ye' dë'bitu ie'pa kímuk ena e' muktsa ttëwá pë' tso' tajë e' nuñ skéie. E' kuëkj a' kawótá e' wóokwa a' malepa kanè mésoie.

*Wëpa bøl wöbla kè wawër e'pa bua'wé Jesús tò*

*(Marcos 10.46-52; Lucas 18.35-43)*

<sup>29</sup> Jesús ena ittókatapa e' yéttsa Jericó, e'pa itóki pë' mirwá tajë. <sup>30</sup> Eta wëpa bøl wöbla kè wawër, e'pa tulur ñala ska'. Mik ie'pa tò ittsé tò Jesús dami, eta ie'pa tò iché aneule:

— ¡A kékëpa, s'blú David bak e' aleri, sa' saú er siarë wa!

<sup>31</sup> Pë' tò wëpa e' uñeke as ie'pa siwá blöwa, erë ie'pa kí aneká tajë:

— A kékëpa, David aleri, sa' saú er siarë wa

<sup>32</sup> Jesús e' duéser tá wëpa wöbla kè wawër e'pa kiéitó tá ie'pa a' ichakéitó:

— ¡I kiane a' kí?

<sup>33</sup> Ie'pa iüté:

— A kékëpa, sa' wöbla bua'ú.

<sup>34</sup> Ie' tò ie'pa sué er siarë wa tá ie'pa wöbla kèitó. E' wó shà tá ie'pa wöbla buanene tá imiyal ie' tá.

## 21

*Jesús demi Jerusalén*

*(Marcos 11.1-11; Lucas 19.28-40; Juan 12.12-19)*

<sup>1</sup> Mik Jesús ena ittókatapa demi tsinet Jerusalén, ká kiè Betfagé tso' Olivo kébata a' ee, eta ie' tò ittókatapa kié bøl <sup>2</sup> tá ichéitó iarak:

— A' yú wì u wëne eruleë ee. Mik a' demi ee, eta bet tá a' tò burro alaki kueraë etó moulewá ena ilala dur io'mik. E' wótsöo tá itsúbitu ña. <sup>3</sup> Yile tò a' a' ichaké, e' tá iütó: 'Skékëpa kí ikiane, e' wa ie' tò imène.'

<sup>4</sup> Itka es as i ye'atbak Skéköl ttekol tò e' wa tkó es. Ie' tò iyé':

<sup>5</sup> 'Ichó Jerusalén wakpa a:

'Ye' ttó tssó, a' blú datse a' ska' e' tkéuleka burro kí.

Ie' dör pë' bërë kè e' tssótá'ka.

Ie' datse burro alala kí, e' dör iyiwak tso' dali oie ese.' '\*'

Es Skéköl ttekol tò iyé'at.

<sup>6</sup> Ittókatapa míyal tá iwérakitó wes Jesús tò iché ie'pa a' es. <sup>7</sup> Ie'pa wá burro alaki ena ilala bitëtser Jesús a. Ie'pa tò ipaio kíkke méka burro alala kí tá Jesús e' tkéka iki. <sup>8</sup> Pë' tso' tajë e'pa tò ipaio kíkke shuélor ñala kí,

ñies wëlepa tò kal kó télor shuélor ñala kí Jesús ñalé tsoie. <sup>9</sup> Pë' mirwá keweie Jesús yöki ñies itóki, e'pa ulitane arke tajë:

— ¡Ie' i' dör se' blú bak David e' aleri, e' kíkókasó! Ayécha buaë ie' datse Skéköl ttó wa. ¡Skéköl tso' ká jai a' e' kíkókasó!†

<sup>10</sup> Mik ie' dewá Jerusalén, eta' e' wakpa aláneka tajë tá ichaké:

— ¿Yi dör ie'?

<sup>11</sup> Pë' datse tajë ie' tá, e'pa tò iüté:

— E' dör Jesús. Ie' dör Skéköl ttekol datse Nazaret atë Galilea e'.

*Jesús tò Skéköl wé batse'wé*

*(Marcos 11.15-19; Lucas 19.45-48; Juan 2.13-22)*

<sup>12</sup> Eta Jesús dewá Skéköl wé a. Eta wëpa tso' ee iyi taúk ena iyi wataúk e'pa qos trë'wéyal ie' tò. Inuköl mane'úk wakpa mesa trélurkaitó. Ñies nuböl wataúkwakpa kula' trélurkaitó. <sup>13</sup> Ie' iché ie'pa a:

— Skéköl tò iyé'at iyékkuó kí: 'Ye' u kirdaë tto ye' tá wé, § erë a' tò iia'wéka akblo wéie.

<sup>14</sup> Eta s' wöbla kè wawër ena kè s'shko bua' esepa debitü Jesús ska' Skéköl wé a' tá ie' tò ie'pa bua'wé. <sup>15</sup> Ala'rla tso' ee'pa tò iché aneule: '¡S'blú bak David, e' aleri kíkókasó!' Mik sacerdotepa wókirpa ena s'wöbla'uk tte dalóieño wa wakpa tò i' wé Jesús tò e' sué, ena ima ala'rla tò ie' ché e' tssé, eta ie'pa uluneka tajë <sup>16</sup> tá ichéitórak Jesús a:

— ¡I chók ala'rla tso', ¿e' tssé be' tò?

Ie' tò ie'pa iüté:

— Tó, e' tsséyó. Erë ima e' ché Skéköl yékkuó tò, wësua e' kè suule a' wá. E' tò iché: 'A Skéköl, ala'rla ena bëbëpala tsu'yókeia, es-epa kébó e' kíkókka.\*'

<sup>17</sup> Eta ie' tò ie'pa méat tá imía ká kiè Betania ee. Eë ie' kapére.

*Higo kló siwéwá Jesús tò*

*(Marcos 11.12-14, 20-26)*

<sup>18</sup> Bule es bla'mi tá Jesús michone Jerusalén tá ie' mirwá ñala wa tá ie' dué bli wá. <sup>19</sup> Ie' tò higuera kló ter elka sué tá imía iwó yulók katé. Erë kè iwó tá, ikó è arwá tajë. E' kuëkj ie' tò iché kal e' a:

— ¡Kè be' wópaia yës!

Ie' wóshá tá higuera kló sinewami. <sup>20</sup> Mik e' sué ittókatapa tò, eta' e' tò ie'pa tkiwéwá tajë, e' kuëkj ie'pa tò ie' a' ichaké:

— ¿Wes higuera kló sinewá bet?

<sup>21</sup> Ie' tò ie'pa iüté:

— Mokj ye' tò a' a' iché tò a' erblé Skéköl mik mokj, kè ibikeitsule bötbót, e' tá i' wé ye' tò, e' ormi a' a' ñies. E' kúie tá a' tò ichémi kabata wì a: 'Be' e' skóttsa je anúwa dayè a', e' tá es iwá tkóraë. <sup>22</sup> A' erblé Skéköl mik mokj, e' tá i' qos kié a' tò ie' a' e' wá dóraë a' ulá a.

\* **21:5** Zacarias 9.9 † **21:9** Salmo 118.26 ‡ **21:12** inuköl mane'úk: Judiowak a inuköl tso' wakanewé Skéköl wé e a, e' tuékene ie'pa tò inuköl èse wa. § **21:13** Isaias 56.7 \* **21:16** Salmo 8.3

*¿Yi tō kawō mé Jesús a?*

*(Marcos 11.27-33; Lucas 20.1-8)*

<sup>23</sup> E' ukuōkī tā Jesús dewā Skēkōl wé a, eē ie' tso' s'wōbla'uk. Etā sacerdotepa wōkirpa ena judiowak kuēblupa de ie' ska' tā ichaké iā:

—¿Yi ttō wa be' tō iyi ikkē weke? ¿Yi tō e' kéwō mé be' a?

<sup>24</sup> Ie' iūtē:

—Ñies ye' tō a' a ilè chakeke, e' iūtē a' tō, e' tā ye' tō a' a icheke tō yi tō ikéwō me' ye' a.

<sup>25</sup> ¿Yi tō Juan patké' s'wōskuōk? ¿Skēkōl tso' ká jai a e' ō s'ditsō?

Ie'pa ñi iūtēmi tā ichérakitō: “Se' tō ichēmi tō Skēkōl tō kawō mé Juan a, e' tā ie' tō se' iūtēmi: ‘Etā ¿i kuēkī a' kē wā ie' ttē klōone?’

<sup>26</sup> Pē' ulitane tō iklō'wé tō Juan dōr Skēkōl ttekōl. Se' suane ie'pa yōkī, e' kuēkī kē se' a iyēnuk tō Juan a kawō me' s'ditsō tō.” <sup>27</sup> E' kuēkī ie'pa tō iūtē:

—Kē sa' wā ijcher.

Ie' tō ie'pa a iché:

—Es ñies ye' kē tō a' a ichepa tō yi tō ye' a kawō mé iyi ikkē woje.

*Ala'r bōl e' ttē*

<sup>28</sup> Jesús tō ie'pa a iché:

—Ttē kleekeyō a' a e' tso' a' tō. Wēm ekōl alā dōr bōl wēpa, e' debitū ilā ekōl ska' kewe tā ichéitō iā: ‘A alā, be' yū kaneblōk l'ñe ye' uva tso' tkēule e' a.’ <sup>29</sup> Ilā tō iūtē: ‘Kē ye' mīne.’ Erē e' ukuōkī tā ie' tō ibikeitséne kuā'kī tā imiā. <sup>30</sup> E' ukuōkī tā iyē mīā ilā iēkōl ska' tā ichéitō iā: ‘Be' yū kaneblōk ye' uva tso' tkēule e' a.’ Ilā iūtē: ‘Ēkēkē ye' mī'ke.’ Erē ie' kē mīne.

Etā Jesús tō ie'pa a ichaké:

<sup>31-32</sup> —¿Ima a' tō ibikeitsé? Ala'r bōl, ¿e' wēne tō iyē ttō iūtē?

Ie'pa tō ie' iūtē:

—Wēne a' ichéitō kéwe e'.

Ie' iché ie'pa a:

—Juan S'wōskuōkwak dē'bitū sene yēsyesē ñalē kkachōk a' a, erē a' kē wā ie' ttē klōone. Erē inukōl shtōkwakpa Roma wōkirpa a ena alakōlpa sulusipa, esepa tō ie' ttē klō'wē. E' sué a' tō erē kē a' er manegne ie' ttē klō'woje. E' kuēkī mokī ye' tō a' a iché tō ie'pa esepa dōrawā a' skéie i blúie Skēkōl tso' e' a.

*Uva kanéukwakpa sulusipa e' ttē*

*(Marcos 12.1-12; Lucas 20.9-19)*

<sup>33</sup> Iskā kleekeyō a' a, e' tso'. Kané wák ekōl tō uva kuatké tajē tā ikkōiēwāitō buaē, kawk biéitō uva diō tuoie. Ñies úla yuéitō kakkēe uva kkō'noie. E' ukuōkī tā ie' tō ipeitēg wēpa wēlepa a as ie'pa tō ipataū ie' a iwōrke e' kak wa. E' ukuōkī tā ie' mīā ká bānet. <sup>34</sup> Mik uvawō aline tso'tke wē'iāē shtē, etā ie' tō ikanè mēsopa wēlepa patkēmi ie' icha tsuk. <sup>35</sup> Erē kanéukwakpa tō

ikanè mēsopa klō'wēwā, ekōl ppérakitō siarē, ekōl ttēwarakitō, ekōl shkā wérakitō tajē ak wa. <sup>36</sup> Etā kané wák tō ikanè mēsopa skā patkēmine tkōkā kuāē ipatkē'itō e' tsaat. Erē kanéukwakpa tō iwamblé ie'pa tā wēs ie'pa tō iwamblé' wēpa dē'rō kuāē e'pa tā es.

<sup>37</sup> “Bata ekkē tā ie' tō iwák alā patkēmi tā ie' ibikeitsé: ‘Ye' alā idir, e' kuēkī ie'pa tō idalōieraē.’ <sup>38</sup> Erē mik ie'pa tō ilā suē, etā ie'pa iché ñi a: ‘Ie' wī dōr ká i' wak alā, ká i' atdaē ie' ulā a. Ittōwasō etā es se' ulā a ká i' atdaē.’ <sup>39</sup> E' kuēkī ie'pa tō iklō'wēwā yéttā bānet tā ittēwarakitō.”

<sup>40</sup> Etā Jesús tō iché:

—Ye' tō a' a ichaké: ¿Ima a' tō ibikeitsé? Mik kané wák dene etā ¿i weraē ie' tō kanéukwakpa e'pa tā?

<sup>41</sup> Ie'pa tō iūtē:

—Ie' tō pē' sulusipa e'pa tteralur er sulu wa tā uva kané meraneitō kanéukwakpa kuā'kīpa tō ipatueraē buaē mik ikéwō dōke bit ekkē esepa a.

<sup>42</sup> Etā ie' tō iché ie'pa a:

—Ye' ttē tso' kitule Skēkōl yēkkuō kī, ¿e' kē syne a' wā? E' tō iché:

‘Ák watē'ttsa u yuōkwakpa tō e' yōnene ak bua'buāe.

E' kaneq' Skēkōl tō,

tā e' tō s'ttsē'weke buaē, s'tkinewā iweblōk.'†

Es Skēkōl yēkkuō tō iyē'at.

<sup>43</sup> E' kuēkī yō iché a' a tō i blúie Skēkōl tso' e' kané mēne a' a, erē e' yerattsaitō a' ulā a tā imeraeitō pē' kuā'kīpa tō iwakaneweraē buaē esepa a. <sup>44</sup> Es yi klastkēne ak e' mik ese parolordaē ena yi kī ak e' anekā ese yal-itdawa idikīā. <sup>45</sup> Mik sacerdotepa wōkirpa ena fariseowakpa tō i kleé Jesús tō ñe' ttsé, etā ie'pa tō isuwā tō ie' tso' ie'pa chōk. <sup>46</sup> E' kuēkī ie'pa éna ie' klō'wakwa eē. Erē pē' tō iklō'wé tō ie' dōr Skēkōl ttekōl, e' kuēkī ie'pa suane pē' yōkī tā kē ie'pa wā iklōnewā.

## 22

*Blu' alā ulabatske e' ttē*

*(Lucas 14.15-24)*

<sup>1</sup> Etā Jesús tō ttē skā kleé ie'pa a i' es: <sup>2</sup> ‘I blúie Skēkōl tso' e' a' itkōke wēs itka blu' ekōl tā es. E' tō ilā ulabatske e' kéwō tkō'weke.

<sup>3</sup> Ie' tō ikanè mēsopa patké wēpa kiule kōs e'pa a ichōk: ‘Blu' alā ulabatske e' diwō de, a' shkō ikéwō tkō'uk.’ Erē ie'pa kē shkak.

<sup>4</sup> E' ukuōkī tā blu' tō ikanè mēsopa kuā'kī skā patkēmi e'pa a ichéitō: ‘Ichō wēpa kiule kōs a tō ye' iyiwak bua'buāē e' duotke alinetke, katē ē kianeia. E' kuēkī a' shkō ye' alā ulabatske e' kéwō tkō'uk.’ Etā ie'pa míyal e' chōk wēpa kiule e'pa a. <sup>5</sup> Erē wēpa kiule kōs e'pa kē wā blu' ttō iūtēne. Ie'pa ekōl mīā ikané kī, ekōl mīā iyi watauk <sup>6</sup> tā imalepa tō blu' kané mēsopa klō'wēwā tā iwe'ikérakitō siarē,

ñies welepa ttéwarakitö. <sup>7</sup> Etä blu' uluneka tajë ie'pa ki ta ie' tö iché inípökwakpa a: 'A yú ie'pa kos ttökulur, ñies ie'pa u kos ña'úwa.' <sup>8</sup> E' ukuöki ta ie' tö iché ikané mésopa a: 'Íyi ulitane tso'tke ye' alá ulabatske e' kéwö tkö'woie, eré wépa kiule e'pa dö'r pé' suluë, e' kueki ye' ké tö kawö mepa ie'pa a ye' alá ulabatske e' kéwö tkö'uk. <sup>9</sup> E' kueki a' yú bet ñala kibi kos ese ki ta pé' kos sué a' tö e'pa a ishkeñú kawö tkö'uk ye' ta.' <sup>10</sup> Etä ikané mésopa miyal ñala kos ki ta pé' kos kué ie'pa tö, pé' buaé ena pé' suluë, esepa dapa'wéka wé ie'pa tso' ikéwö tkö'uk e' wé a. Es iwé wá iène tajë.

<sup>11</sup> "Eré mik blu' de wépa dapane e'pa sauk, etä wém eköl suéitö ké e' paiëule wes ikawöta e' paiök ulabatsé kéwö tkö'wo es. <sup>12</sup> E' kueki blu' tö ie' a iché: 'A yami, ¿wes be' dewa? Be' ké e' paiëule ulabatsé kéwö tkö'wo ese datsi' wa.' Eré wém e' ké wá blu' iüténe ye'. <sup>13</sup> Etä blu' tö iché ichkö watiökwaipa a: 'Wém i' ulá ena iklö moúwa' a' tö ta iuyóttsa bánet stui ké a, eé ie' juräé siarë, iká blardaé iweir tajë e' kueki.' <sup>14</sup> Ttë e' pakéyö a' a' e' wá dö'r i' es. 'Tso' tajë kiule as Skéköl klö'urakitö iblúie, eré wépa shukitbakitö esepa ké dö'r tajë."

*S'wökirpa patauk, e' tté*  
(Marcos 12.13-17; Lucas 20.20-26)

<sup>15</sup> E' ukuöki ta fariseowakpa miyal ta ittérak ñita: "ilë chakösó Jesús a as ie' tö ilë sulu chö ikkatoie." <sup>16</sup> E' kueki ie'pa tö iklépa welepa ena Herodes klépa welepa patkémi ie' a ichakök. Ie'pa tö ie' a iché:

—A s'wöbla'ukwak, sa' wá ijcher tö kékraé be' tö mokié. Be' tö sultitane suéke ñikkéé. Ima pé' tö be' cheke e' ké ki be' tkine. E' kueki be' tö s'wöbla'weke yésyèsé Skéköl ñalé tté wa. <sup>17</sup> E' kueki ichö sa' a, ¿ima be' tö ibikeitsé? Roma wökir kibi patuësó ¿e' dö'r buaé ö ké idör buaé?

<sup>18</sup> Ie' tö isuéwa tö ie'pa tso' ie' chakök er sulu wa, e' kueki ie' iüté i' es:

—A' e' ö suluë, ¿i kueki a' tso' ye' ma'uk tsaié? <sup>19</sup> Inuköl tso' a' wá Roma wökir patuëje, e' kkachö ye' a et.

Ta ie'pa wá inuköl wóshki ese debituiá et. <sup>20</sup> Etä ie' tö ie'pa a ichaké:

—¿Yi diököl ena yi kié me'rká iki?

<sup>21</sup> Ie'pa iüté:

—Roma wökir kibi.

Etä ie' tö ie'pa a iché:

—E'ma kos Roma wökir kibi icha, ese mú ie' a, ta kos Skéköl icha ese mú ie' a.

<sup>22</sup> Mik ie'pa tö e' ttsé, etä ie'pa tkinewa. Ie'pa tö iméat ta imiyal.

*¿S'duolur e' shkermikane ö au?*  
(Marcos 12.18-27; Lucas 20.27-40)

<sup>23</sup> E' é diwö wa, saduceowakpa welepa de Jesús ska'. E' wakpa tö iklö'wé tö s'duowa e'pa ké shkenukkane. Ie'pa tö ie' a ichaké:

<sup>24</sup> —A s'wöbla'ukwak, Moisés tö se' a iyé'tat tö wém blénewá ké alá ate, e' ta ie' éi kawöta ischö tsukwa as ilá kóka iél blénewá, e' a. <sup>25</sup> Etökicha sa' shua wépa bak döka kul ñi épa. Ikibi alaköl tséwa, eré iblénewá ké alá ate. E' ukuöki ta ie' itökí iél tö ischö tséwa, <sup>26</sup> eré ñies e' blénewá ké alá ate. Es itka iél ská ta ñies imalepa kos e'pa ta. Ie'pa kul blérulune ké alá ate yés. <sup>27</sup> Bata ekké ta ñies ilaköl blénewá. <sup>28</sup> Wépa kul e'pa bak alaköl eköl é ta. Mik s'duowa e'pa shkenekane, etä ¿wéne dömi ie' wém chökíe?

<sup>29</sup> Ie' tö ie'pa iüté:

—A' ké wá Skéköl yékuö suule, ñies ie' diché ké jcher a' wa, e' kueki a' wöa ká chowa. <sup>30</sup> Mik s'duolur e'pa shkenekane, etä wépa ena alakölpá ké serpawaiá ñita. E'pa miyal wes Skéköl biyöchökwaipa tso' ká jai a ké sertsá wa ñita es. <sup>31</sup> ¿A' ki kiane jcheno tö mokí s'duowa e'pa shkerdakane? Í ye' Skéköl tö a' a iyékuö ki ¿e' ké aritsule a' wá? Ie' tö iyé' Moisés a: <sup>32</sup> 'Ye' dö'r Abraham, Isaac ena Jacob, e'pa Kéköl.\* Ie' ké dö'r s'duowa e'pa Kéköl. ¿ie' dö'r s'ttsé'ka e'pa Kéköl! E' kueki se' wá ijcher tö s'duowa e'pa shkerdakane.

<sup>33</sup> Mik pé' tö tté wa Jesús tö s'wöbla'weke ñe' ttsé, etä ie'pa tkirulune.

*¿Skéköl tté dalöieno e' isie dö'r ikibiie?*  
(Marcos 12.28-34)

<sup>34</sup> Mik fariseowakpa wá ijchenewa tö Jesús tö saduceowakpa siwa'blöwéwa tté mokí wa, <sup>35</sup> etä ie'pa eköl dö'r s'wöbla'ukwak tté dalöieno wa, e' tö ie' a ilé chaké itsaioie:

<sup>36</sup> —A S'wöbla'ukwak, Skéköl tté dalöieno ¿e' wéne dö'r ibua'ie imalepa tsatá?

<sup>37</sup> Ie' iüté:

—Kéké dö'r a' Kéköl, e' daléritsö a' er kos wa, a' wák kos wa ena a' erbiké kos wa.'

<sup>38</sup> Ttë e' dö'r ibua'ie tté dalöieno malepa kos tsatá. <sup>39</sup> Eré e' itökí tté ská tso', e' dö'r wes iét ñe' es, e' tö iché: 'A' malepa daléritsö wes a' wákpa e' dalér es.' <sup>40</sup> Ttë dalöieno kos kitbak Moisés tö ena Skéköl ttekölpá tö yékuö ki, e' wöienewa tté böt ñe' é a.

*¿Wé pairine'bitü idi' wa s'blúie e' dö'r yi aleri?*

(Marcos 12.35-37; Lucas 20.41-44)

<sup>41</sup> Fariseowakpa daparkeia, <sup>42</sup> e' dalewa Jesús tö ie'pa a ichaké:

—¿Ima a' tö wé pairine'bitü idi' wa s'blúie e' ché, tö yi aleri idir?

Ie'pa ie' iüté:

—E' dö'r s'blú bak kié David e' aleri.

<sup>43</sup> Etä ie' iché ie'pa a:

\* **22:32** Ye' dö'r Abraham, Isaac ena Jacob, e'pa Kéköl: Mik tté e' ché Skéköl tö Moisés a, etä Abraham, Isaac ena Jacob e'pa blérulunebak ká iaiáé. Wes ie' tö iché, e' wá kiane ché tö ie'pa tso' tssé'ka Skéköl ta. Éxodo 3.6 saqú.



—E' dör es, e' ta ʒwes David tö iki' ie' Këköl? David tö iyé' Skëköl Wiköl wa i' es:

44 'Skëköl tö iché ye' Këköl a:

Be' e' tköser ye' ulà bua'kka dalöiëno tajë, dö mik ye' tö be' bolökpa méréo be' klö dikja eta.<sup>†</sup>

45 Ie' dör David aleri, e' ta ʒwes e' kiëmi David tö ie' Këköl?

46 Kë yi a' ie' iutëneia yës. E' ukuökj ta kë yi kësik dë'kajia ie' a' i skà chakök.

## 23

*Fariseowakpa ena s'wöbla'uk ttë dalöiëno wa wakpa kkaté Jesús tö*

*(Marcos 12.38-40; Lucas 11.37-54; 20.45-47)*

1 E' ukuökj ta Jesús tö iché ittökatapa a ena s'tso' tajë e' kukua: 2 S'wöbla'uk ttë dalöiëno wa wakpa ena fariseowakpa a kawö mène ttë dalöiëno me'atbak Moisés tö e' wà pakök se' a. 3 E' kuekji i kos dalöiök a' ké ie'pa tö e' dalöiö. Erë i dalöiök ie'pa tö a' ké ese kë dalöieta' ie'pa wakpa tö. E' kuekji kë ie'pa waköwar a' tö. 4 Ie'pa tö ttë dalöiëno tajë darërëe ese meke s'malepa a wà dalöie. E' dör wës dali ekkeë ie' s'ki es, erë ie'pa kë tö iketa' wà iulatska ë wa s'kimoie. 5 I kos weke ie'pa tö e' dör s'ditsö ë wö wa e' oie tö ie'pa dör pë' buaë. Skëköl ttë wele kitule datsi'tak kj, ese muëke ie'pa tö iwötsa kj ena iulà kj e' kitkoie. Nies ie'pa wöbatsö idatsi' kjtök datsi'tak batsibatsj chalala buaala ese wa. 6 Wé ie'pa kawö tkö'uke nies nì dapa'wo wé a ese ska' kula' tso' skëkëpa dalöiërtä' tajë esepa a, ese kj ie'pa wöbatsö e' tköksér. 7 Nies ie'pa kj iklar tö pë' tö ie'pa shké'wë wës këkëpa dalöiërtä' tajë ese shké'wë es wé pë' tso' tajë e'pa wöwa. Ie'pa wöbatsö tö pë' tö ie'pa kië s'wöbla'ukwak'.

8 "Erë a' ulitane dör nies ë, e' kuekji kë a' nì kiök s'wöbla'ukwak.' A' wöbla'ukwak e' dör eköl ëme e' kuekji kë a' nì kiök es. 9 Nies a' ulitane yë dör eköl ëme, e' dör Skëköl tso' ká jai a e'. E' kuekji kë yi kiar ká i' a 'S'yë.' 10 Nies a' wökir dör eköl ëme, e' dör wé pairine'bitu idi' wa s'blúie e'. E' kuekji kë a' nì kiök s'wökir.' 11-12 Yi e' tseká tajë, esepa wöardawa; erë yi e' wöëwa diöshët, esepa kjkardaká. E' kuekji wé dör ibua'ie a' shüa ese kawöta' e' wökwa kanë mésoie imalepa kímuk.

13-14 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! I blúie Skëköl tso' e' wëkkö wötekewa a' tö s'malepa yöki as kë ie'pa döwa. A' kë mi'wa, nies wépa shkakwa esepa wöklö'weke a' tö.

15 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! A' shkoke ká kos ekkë kj s'yulök as ie' yuö a' ttökataie. Mik a' ikuë, eta iyue a' tö i sulu

wamblökwa tajë tköká a' wákpa tsatá. Es ie' weirdaë siarë bö' ké a wës a' es.

16 "JA' dör wës sulaiökwa'pa wöbla kë wawër es! jWëstela ina a' ta! A' icheke: 'Yi tö ttë mé Skëköl wé wa, ese kë kawöta' iütök kröröë. Erë yi tö ttë mé orochka tso' wötüle Skëköl wé mik e' wa, e' ta e' wà kawöta' iütë.'

17 JA' kë er ta'! JA' dör wës s'wöbla kë wawër es! jI dör ibua'ie, orochka tso' Skëköl wé mik e' ö Skëköl wé tö orochka batse'wé e'? 18 Nies a' tö icheke: 'Yi tö ttë mé ka' tso' i'yi moka Skëköl a e' wa, e' ta ese kë kawöta' iütök kröröë. Erë yi tö ttë mé i'yi me'rka' ka' n'e' kj e' wa, e' ta e' wà kawöta' iütë.' 19 JA' dör wës s'wöbla kë wawër es! jI dör ibua'ie, i'yi me'rka' ka' n'e' kj e' ö ka' tö ibatse'wé e'? 20 Yi tö ttë mé ka' n'e' wa, ese kë ku' ttë muk ka' n'e' ë wa, nies ie' tso' ttë muk kos i' tso' i'ki e' wa. 21 Yi tö ttë mé Skëköl wé wa, ese kë ku' ttë muk Skëköl wé ë wa. Nies ie' tso' ttë muk Skëköl serke eë e' wa. 22 Yi tö ttë mé ká jai wa ese tso' nies ttë muk Skëköl kulé wa. Nies itso' ttë muk Skëköl wák tär ikulé kj e' wa.

23 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! Káköla tso' iëno chké a kië menta ena anís ena comino ese kos tsá meke a' tö Skëköl a. E' dör buaë erë ttë dalöiëno e' bua'ie kë dalöie a' tö. E' dör sene yësyësë, ena nì saü er siarë wa ena erblö Skëköl mik moki kë ilo'yeta'. Nies e' kos dalöiök a' kawöta. 24 JA' dör wës sulaiökwa'pa wöbla kë wawër es! E' dör wës a' tö schö'wak wöppée tá a, erë kameio maléwá a' tö wa'ne, kë ittsë'ne a' wa.

25 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! A' dör wës a' tka' kos pa skueke a' tö ikikke ë es. A' wër buaë erë a' er suluë. A' dör akblökwa'pa. A' kj s'yamipa i'yi kos kianettsa a' ë a. 26 JA fariseowakpa, a' dör wës s'wöbla kë wawër es! Tka' ttö skuöo kéwe, es nies ikikke pa sune.

27 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! A' dör wës pö pateule saruruë es. Ese wër buaë ikikke, erë ishüa s'nu diché tso' tajë, e' dör nã suluë. 28 A' dör wës pö ese es, a' e' ö tö a' dör pë' buaë yësyësë, erë a' er dör suluë. A' dör e' ökwakpa.

29 "JA s'wöbla'uk ttë dalöiëno wa wakpa, a fariseowakpa, wëstela ina a' ta! JA' e' ö suluë! A' tö Skëköl ttëkölpá bak ká iaiä e'pa pö yuekene pa'ali. Nies i' yué a' tö as s' ser yësyësë bak e'pa kë chöwa a' éna, ese kjtkeke a' dör buaë. 30 E' dalewa a' icheke: 'Sa' tköpa sa' yépa bak ká iaiä e'pa kéwö ska' ta, e'ma kë sa' wá ie'pa sini'küne Skëköl ttekölpá ttökulur.' 31 Mik e' cheke a' tö, eta a' e' chökëka tö a' dör wépa tö Skëköl ttekölpá kötulur, e'pa aleripa. 32 Wës a' mir e' wa iwënewá tö i sulu

wamblé'mi a' yépa tò ese kí wambleraé a' tò dō ibataie.

<sup>33</sup> “JA' dōr sulué wēs tkabē es, wēs tkabē ichōk es! ¿Wēs a' tkōmishkar kē wōmerpattsā weinuk bö' ké a? <sup>34</sup> Ittsō, ye' tò Skékōl ttekōlpa ena s'pattōkwakpa ena s'wōbla'ukwakpa ye' ttē wa, esepa patkeraé a' a. Erē a' tò ie'pa wēlepa tterawā, wēlepa skā wōterawā a' tò krus mik ttēwā, wēlepa skā pperaé siarē a' tò tsa'bata daloie wa a' ñi dapa'wō wé a. Ie'pa yuleraé a' tò iwe'ikeraé a' tò ká wa'ñe. <sup>35</sup> E' kueki s'ser yēsēsē kōtulur a' yépa tò mik Abel kōtwā Cain tò dōkā mik Zacarías dōr Berequías alā e' kōtwā a' yépa tò ká' tso' íyi mokā Skékōl a' e' ena ie' wé e' shūshā, e' nuí kōs kierane ie' tò a' a. <sup>36</sup> Mokí ye' tò a' a ichē tò s'ser yēsēsē kōs kōtulur a' yépa tò, e' nuí kí a' ena wépa dōr wēs a' es esepa weirdaé siarē.

*Jesus eriane Jerusalén wakpa dalērmik (Lucas 13.34-35)*

<sup>37</sup> JA' Jerusalén wakpa, Skékōl ttekōlpa kōs ttekewā a' tò kēkraé! Nies ittē pakōkwakpa patkeke ie' tò a' a, e'pa ttekewā a' tò ák wa. ¿Wēkkē ye' erkiē tò ye' mú a' dapa'wē e' ska' wēs dakro mitchke tò ila'rila dapa'wē ipik dikjā es, erē kē a' kí ikiane yé! <sup>38</sup> Ye' ttō ttsō, Skékōl kē tò a' ká kkō'nepaia. <sup>39</sup> Ye' tò a' a ichē tò i'tami a' kē tò ye' suēpaia dō mik ye' dene e'tā. E' kēwō ska' tā a' tò ye' cheraé: '¡Ayēcha buaé yi datse Skékōl ttō wa e'!

## 24

*Jesus tò ichē tò Skékōl wé olordawā (Marcos 13.1-2; Lucas 21.5-6)*

<sup>1</sup> Jesús e' yéttšā Skékōl wé a' tā imiā tā ittōkatapa de ie' ska' tā Skékōl wé ena u bua'buā skā tso' ipamik, e' kkaché ie'pa tò ie' a. <sup>2</sup> Erē ie' ichē:

—Mokí ye' tò a' a ichē tò u kōs tso' bua'buā sué a' tò íe, e' olordawā seraa, iékwō ē kē ātpa ñi bata kí.

*¿I' wa sō isuēmi tò ká i' erkewatke?*

*(Marcos 13.3-23; Lucas 21.7-24; 17.22-24)*

<sup>3</sup> E' ukuōkí tā ie'pa míyal kabata kiē Olivo ee. Jesús e' tkēsēr tā ittōkatapa de ie' ska' tā ie' ē a' ichaké:

—Ichō sa' a' ¿mik íyi ekkē wamblērmí? ¿I' wa sō isuēmi tò be' dotkene, nies tò ká i' erkewatke?

<sup>4-5</sup> Ie' tò ie'pa iuté:

—Tajē pé' datse e' chōk tò ie'pa dōr ye'. Icherarakitō: 'Ye' dōr wé pairine'bitū idi' wa s'blúie e'', tā pé' kíterarakitō tajē. E' kuekí a' tso' wōsh wa as kē yi tò a' kí'tō'ū. <sup>6</sup> Ká tajē wakpa ñippōke tajē wí a' diā a' e' biyō ttersaé a' tò. E' wake' tkōraé erē ká i' erwami e' kianeia. E' kuekí kē a' tkinuk e' wā. <sup>7</sup> Ká

kuā'kí kuā'kí wakpa ñippōraé ñita. Nies í tò ká wōtí'weraé ká wa'ñe. Nies ká tseé wakpa tteraé bli tò tajē. <sup>8</sup> Erē íyi ekkē kōs dōr erpa s'tsā weirketke kām ye' dōne e' yōkí ese. E' dōr wēs alakōl alā kurketke tā ikirir es.

<sup>9</sup> “A' merdattsa wē'ikē. A' ttelurdaé pé' tò. Sulitane tò a' suēraé sulué ye' ttē kuekí. <sup>10</sup> E' kēwō ska' tā wépa erblé ye' mik, esepa tajē tò ye' waterattsa. Ie'pa ñi sauraé sulué, ñies wēlepa tò iéltēpa wōmerattsa ibolōkpa ulā a. <sup>11</sup> Kachōkwakpa e' chō tò ie'pa dōr Skékōl ttekōlpa esepa dōraé tajē. Ie'pa tò s'kítō'weraé tajē. <sup>12</sup> I' sulu kí wamblērdaé tajē shūte, e' kuekí s'kibiie kē tò imalepa dalēritsepaia. <sup>13</sup> Erē yi e' tkēwā darērēé dōkā bata ekkē, esepa tsātkēdaé. <sup>14</sup> I' blúie Skékōl tso' e' ttē buaé pakardaé ká wa'ñe as ká ulitane wakpa wā ijcher, e' ukuōkí tā ká i' erdawa.

<sup>15</sup> “Skékōl ttekōl bak kiē Daniel, e' tò ikit iyēkkuō kí tò i' sulusi tò i' dōr bats'e'r e' ia'wē ñaie, e' dōrawā Skékōl wé a' iia'ukka ñaie, (yi tso' yēkkuō i' sauk, e' éna iwā anū). Mik e' sué a' tò, <sup>16</sup> e'tā wépa serke Judea e'pa tkōyalmi kabata a'; <sup>17</sup> yi tso' u bata kí' esepa tkōshkar kē dōkwane weshkē íiyi tsukmi. <sup>18</sup> Nies yi tso' kaneblok kañika esepa kē dōkwane weshkē idatsi' yōktsā. <sup>19</sup> E' kēwō ska' tā alakōlpa alā kurketke ena alakōlpa tsu' muke ilā a' iwēstela ina esepa tā! <sup>20-21</sup> S'ditsō weirdaé tajē shūte. Mik ká i' yōne dō ikkē tā kē s'we'ikule ekkē, ñies kē s'weirpa aishkuō tā ekkē. E' kuekí ikíō Skékōl a' as kē iwamblér a' tā yuēdiō kēska' o' eno diwō a. <sup>22</sup> E' kēwō kē wōōpawa Skékōl tò, e'ma kē yi isie atukia' tstsē'ka. Erē e' kēwō wōerawaitō, wépa shukitbakitō esepa dalērmik.

<sup>23-24</sup> “Kachōkwakpa e' kōraka e' chōk tò ie'pa dōr wé pairine'bitū idi' wa s'blúie e' o' Skékōl ttekōl wēle. E'pa tò i' kē or yi a' ese weraé s'kítō'woie tò ie'pa ttē dōr mokíe. Dō wépa shukit Skékōl tò, esepa mú kí'tēmi, e'ma ikítērdaé. E' kuekí yile tò a' a' icheke: 'Isaú, wé pairine'bitū idi' wa s'blúie e' dur íe', o' 'Isaú, ie' dur wíe', e' tā kē a' tò ikló'war. <sup>25</sup> Ittsō, íyi ekkē biyō chétkeyō a' a' keweie. <sup>26</sup> E' kuekí mik ie'pa tò icheke a' a': 'Isaú, wé pairine'bitū idi' wa s'blúie e' tso' ká wé kē yi serku' ee', e'tā a' kē minuk isaúk. Mik ie'pa tò icheke a' a': 'Isaú, ie' tso' íe' bléulewā', e'tā kē a' tò ikló'war. <sup>27</sup> Ye' dōr S'ditsō Alā, mik e' dene, e'tā sulitane tò isuēraé wēs alā wōñar tò ká olo ppēe ká wa'ñe e' suēsō es. <sup>28</sup> Sulitane wā ijcher tò wé olō daparke tajē, ee ilē nu tēr. Es ñies mik ye' dene, e'tā sulitane wā ijcherdaé.

*Jesus dōrane olo tā' tajē*

*(Marcos 13.24-37; Lucas 17.26-30,34-36; 21.25-33)*

\* **24:17** u bata kí: E' kēwō ska' tā ie'pa u tsābata dōr kkuēie, e' kí ie'pa shkōke.

<sup>29</sup> “S’weine e’ k’éwö tka, e’ bet diwö wötuirdawa, ñies si’wö k’é wöñarpaia. Békwo darolordaë ena i k’os tso’ ká jai a e’ wötirdaë. <sup>30</sup> Eta sulitane tö iyi sueraë ká jai a iwä k’kachoie tö ye’ dör S’ditsö Alà, e’ datsene bet. Ká ulitane wakpa suardaë tajë e’ yöki, ie’pa iuraë tajë ta bet ie’pa tö isueraë tö ye’ datsë kashuk a mö a diché ta’ tajë olo ta’ tajë. <sup>31</sup> Duk blardaë tajë ta ye’ biyöchökwakpa patkeramiyö wépa shukitbakyö, esepa dapa’ukka ek tsini’ éme. Ie’pa tö iyuleraë ká wa’ñe dö wé ká i’ bata erkerö ee ena wé ká jai bata erkerö ee.

<sup>32</sup> “A’ e’ wöbla’ü ttë ikkë wa iwä saü higo klö wa: Mik iulatska tso’ ulölöla ena erpa iköyök tskirdoka, eta a’ wä ijcher tö duas dewatke tsinet. <sup>33</sup> Es ñies mik a’ tö isuë tö iyi ekkë wamblërke, eta a’ wä ijchenü tö ye’ datskene, e’ diwö dewatke tsinet. <sup>34</sup> Mokí ye’ tö a’ a’ iché tö iyi ekkë wamblërdaë wépa dör wes a’ es esepa kam erwa e’ yöki. <sup>35</sup> Kashuk ena ká i’ erdawa, erë ye’ ttë michoë e’ k’é erpawa yës.

<sup>36</sup> “Erë e’ k’éwö e’ diwö k’é jcher yi wä. Skéköl biyöchökwakpa tso’ ká jai a, e’pa k’é wä ijcher, ñies ye’ dör Skéköl Alà e’ k’é wä ijcher. S’yë é wä ijcher.

<sup>37</sup> “Ye’ dör S’ditsö Alà, mik e’ dene eta e’ k’éwö dör wes Noé késka’ es. <sup>38</sup> E’ késka’ ta kam di’ tajë tkö e’ yöki, ie’pa tso’ chkök, di’yök, senukwa wes kekraë es dö mik Noé dewa ikanö bérie e’ a eta. <sup>39</sup> Erë ie’pa k’é ku’ ipanuk yës eta di’ dettsa tajë ie’pa k’i, e’ tö ie’pa ulitane ttélur. Es itkóraë mik ye’ dör S’ditsö Alà e’ dene eta. <sup>40</sup> E’ k’éwö ská ta wëm böi tso’ kaneblökö ese eköl mira iwä ta iëköl atdaë. <sup>41</sup> Alakölpä böi tölur ák wawök, ese eköl mira iwä ta iëköl atdaë.

<sup>42</sup> “E’ kuëki a’ tso’ erki. A’ k’é wä ijcher tö diwö wekkë a’ Kéköl dörane. <sup>43</sup> A’ wä ijcher buaë tö u wák mü wä ijcher tö wekkë akblökwak datsë, e’ma k’é ikapöpawä iyöki, k’é itö kawö mepa yi a dökwä iyyi ekiblökö. <sup>44</sup> Es ñies ye’ dör S’ditsö Alà, e’ datskene mik a’ k’é ku’ ye’ panuk eta, wes akblökwak es. E’ kuëki a’ tso’ erki.

*Kané méso buaë ena kané méso suluë e’ ttë (Lucas 12.41-48)*

<sup>45</sup> “Kané méso yésyësë kabikeitsö buaë, ese meraká iwökir tö imalepa kuebluie ie’pa tiök kekraë mik k’é iku’ e’ dalewa. <sup>46</sup> Iwökir dene ta ikuéitö iwakanéuk wes iyéneia es, e’ ta ayécha e’ dör buaë ie’ a. <sup>47</sup> Mokí ye’ tö a’ a’ iché tö kané méso ese merakaitö ie’ wä iyi tso’ kos e’ kuebluie. <sup>48</sup> Erë kané méso ñe’ dör suluë tö ibikeitsé tö k’é iwökir döpane bet. <sup>49</sup> E’ kuëki ie’ tö imalepa ppémi. Ñies ie’ chkémi, blo’ yémi bloblopa ta. <sup>50</sup> Erë idiwö ena ikéwö k’é wa ie’ ku’ ipanuk, eta iwökir

dörane <sup>51</sup> ta iwe’ikeraitö siarë wömerattsa weinuk e’ ökwakpa ta. Ie’pa iurarak siarë, iká blardaë iweir kuëki.

## 25

*Busipala döka dabop e’ ttë*

<sup>1</sup> “I blúie Skéköl tso’ e’ ta itkóraë wes itka ulabatsë a es. Busipala döka dabop e’ e’ yélur ibö’wöla wa wëm ulabatsöke, e’ ñaletsuk. <sup>2</sup> Busipa skël e’pa dör kabikeitsöta’ buaë esepa, erë imalepa skël k’é dör es. <sup>3</sup> Wépa k’é kabikeitsöta’ buaë e’pa wa ibö’wöla é mí, k’é wä bö’wö diö kí mine. <sup>4</sup> Erë wépa kabikeitsöta’, e’pa wa ibö’wöla mí, ñies idiö kí mirak iwä. <sup>5</sup> Erë wëm ulabatsöke, e’ k’é de’ bet, iwötkënekä e’ kuëki. E’ dalewa busipa shtrine ta ikapolur. <sup>6</sup> Ká shaböts ta ie’pa tö ittsé tö iarkerak: ‘jWëm ulabatsöke, e’ datsë! jA’ yú ñaletsuk!’ <sup>7</sup> Eta busipa kos e’ kékä ta ibö’wöla wötskémirakitö. <sup>8</sup> Eta busipa k’é kabikeitsöta’ e’pa tö iché imalepa a: ‘A’ bö’wö diö kákmü sa’ a as sa bö’wöla k’é wöitwa.’ <sup>9</sup> Erë ie’pa iüté: ‘Au, sa’ tö imé a’ a, e’ ta k’é idöpakä se’ ulitane k’i. E’ kuëki a’ yú a’ icha taük wé iwatorke ee.’ <sup>10</sup> Eta ie’pa míyal bö’wö diö taük. E’ dalewa wëm ulabatsöke e’ de, eta wépa wa bö’wö diö kí mí e’pa dewa wëm ulabatsöke e’ ta iulabatso wé a ta iwékkö wötënewa. <sup>11</sup> E’ ukuökí ta busipa malepa debitu ta ichakeke u’rki: ‘jA kékëpa, a kékëpa, ukkö kköppöö sa’ a!’ <sup>12</sup> Erë wëm ulabatsöke e’ tö ie’pa iüté: ‘Mokí ye’ tö a’ a’ iché tö k’é ye’ wä a’ suule.’

<sup>13</sup> “Ye’ tö a’ a’ iché tö a’ k’é wä ijcher i k’éwö, i diwö ye’ dömine e’ kuëki a’ tso’ erki.

*Inuköl méne wakanewé e’ ttë (Lucas 19.11-27)*

<sup>14</sup> “Ñies i blúie Skéköl tso’ e’ ta itkóraë wes itka wëm eköl mi’keä kamië ká kuä’kí a ese ta es. Ie’ tö ikané méso k’ié ta iché ie’pa a: ‘Ye’ inuköl wakaneü ye’ a buaë as ikí klör.’ <sup>15</sup> Ikané méso eköl a ie’ tö inuköl kié talento\* ese mé mil skël (5.000). Iëköl a ie’ imé mil böt (2.000). Eta iská a ie’ tö imé mil et é (1.000). Ie’ tö ie’pa a imé kos ie’pa a iwakanewé ekké. E’ ukuökí ta ie’ míä. <sup>16</sup> Wéne a imène mil skël, e’ tö iwakanewé buaë. Ie’ tö ikí klö’wé mil döka skël. <sup>17</sup> Es ñies wéne a imène mil böt, e’ tö ikí klö’wé mil döka böt. <sup>18</sup> Erë wéne a imène mil et, e’ míä ta iyök biéitö e’ a itö iwökir inuköl wötéwa.

<sup>19</sup> “Ká de tajë eta ie’pa wökir dene e’ tö ie’pa k’ié isuoie tö kos ie’pa tö inuköl kí klö’wé. <sup>20</sup> Wéne a imène mil skël, e’ de kewe iwökir ska’. Ie’ wä inuköl kí debitu mil döka skël. Ie’ iché iwökir a: ‘A kékëpa, be’ tö ye’ a inuköl me’ mil skël, e’ kí klö’wéyo mil döka skël.’ <sup>21</sup> Iwökir tö iché ie’ a: ‘E’ dör buaë, be’ dör kané méso buaë yésyësë.

\* 25:15 talento: E’ dör ie’pa inuköl kié denario e’ mil teröl (6.000). Denario et e’ dör s’kaneblö ká et e’ ské ekké.

Inuköl elkela me'yö be' a e wakanewé be' tö yësyësë. E' kuekji ye' tö iyi skä meraë be' a tajë wakanewë. Be' shkôwä ttsë'nü buaë ye' ta.' 22 E' ukuökj ta wëne a imëne mil böt e' de ta ichëitö: 'A kékëpa, mil tö ye' a inuköl me' mil böt, e' k' klö'wëyo mil dökä böt.' 23 Iwökir tö ie' a ichë: 'E' dör buaë, be' dör kanë méso buaë yësyësë. Inuköl elkela me'yö be' a e wakanewé be' tö yësyësë. E' kuekji ye' tö iyi skä meraë be' a tajë wakanewë. Be' shkôwä ttsë'nü buaë ye' ta.'

24 "Erë kanë méso a imëne mil et, mik e' de, etä ie' tö ichë iwökir a: 'A kékëpa, ye' wä ijcher tö be' dör wëm er darërë ese. Be' tö iyi wöshteke wë kë be' wä ikuatkëne eë. Nies i kë dör be' icha ese klö'wëkewä be' dör. 25 E' kuekji ye' suane be' yöki dö' ye' tö be' inuköl chöwëwa. E' kuekji be' inuköl blé ye' tö iyök a. I' be' inuköl dene ye' wä be' a.' 26 Etä iwökir tö iüté: 'Be' dör kanë méso suluë, bikër tajë ese. Be' ichë tö ye' tö iyi wöshteke wë kë ye' wä ikuatkëne eë ena i kë dör ye' icha ese klö'wëkewäyo.' 27 E' ta be' tö ye' inuköl blöpa inuköl bló wé a a eë ikj klör. Be' ikaneüpa es, e'ma ye' dene etä ye' inuköl ena ikj klöne, e' de ye' ulä a.' 28-29 Etä ie' tö ichë: 'Wé wä iyi tso' e' a ikj merdaë. Erë wë kë wä i ku', i tso' e' wä elkela e' yerattsa iyöki. E' kuekji inuköl me'yö ie' a, e' yöttsa ie' ulä a ta imü wé wä itsö' dökä 10.000 e' a. 30 Etä kanë méso suluë i' e' uyöttsa stui kë a, eë pë' suluë jurarak siarë ikä blardaë iweir kuekji.'

*Jesús tö ká ulitane wakpa shuleraë*

31 "Ye' dör S'ditsö Alä, e' dörane s'blúie olo ta' tajë ye' biyöchökwakpa kos ta. Mik ye' dene, etä ye' e' tkörakä blu' kulé k' ká ulitane wakpa shulök. 32 I'e'pa dapardaë ye' wörkj ta ye' tö ie'pa blabatseraë wës iyiwak kkö'mukwak tö obeja ena chibo blabatsë es. 33 S'er wësyësë esepa dör wës obeja es, ie'pa merawä ye' tö ye' ulä bua'kka. S'er suluë esepa dör wës chibo es, ie'pa merawä ye' tö ye' ulä baklj'kka. 34-36 Etä ye' tö icheraë wépa tso' ye' ulä bua'kka e'pa a: 'Ye' dör a' blü. Ye' yé er bua' ché a' a. Mik ye' du' bli wä, etä a' tö ye' dë'; mik ye' bak ersinuk, etä a' tö ye' a di' me'; a' kë wä ye' suule, erë a' tö ye' kiéwä buaë a' u a. Ye' bak datsi' kë ta', etä a' tö ye' a datsi' kakme'; ye' bak duök siarë, etä a' dë' ye' kimuk; ye' bak wötëulewä s'wöto wé a, etä a' dë' ye' sauk. E' kuekji a' shkôwä i blúie ye' tso' e' a, e' kos yöulebak a' a kam ká i' yör e' yöki.' 37 Erë s'er yësyësë e'pa tö ye' a' ichakeraë: 'A Skékëpa, sa' kë wä ijcher. ¿Mik sa' tö be' su' tö be' tteke bli tö, e' dë' sa' tö? ¿Mik sa' tö be' su' tö be' tteke ersi tö, e' a di' me' sa' tö? 38 ¿Mik be' dë'bitu sa' u a, kë suule sa' wä, e' ki'wä buaë sa' tö? ¿Mik sa' tö be' su' datsi' kë ta', e' a datsi' kakme' sa' tö? 39 ¿Mik sa' tö be' su' tö be' duöke ö be' wötëulewä s'wöto wé a, e' sauk sa' dë'?' 40 Etä

ye' tö ie'pa iuteraë: 'Mokj ye' tö a' a ichë tö mik a' tö iyi ekkë buaë o' ye' yamipa siarë ikképa a, etä e' dör wës a' tö ye' wák a iwë es.'

41-43 "E' ukuökj ta ye' tö icheraë wépa tso' ye' ulä baklj'kka e'pa a: 'Ye' du' bli wä, erë a' kë wä ye' dëne; ye' bak ersinuk, erë a' kë wä ye' a di' mène. Ye' dë' a' ska', kë suule a' wä, erë a' kë wä ye' kinewä a' u a; ye' bak datsi' kë ta', erë a' kë wä datsi' mène ye' a; ye' bak duök ena wötëulewä s'wöto wé a, erë a' kë dë' ye' sauk. E' kuekji a' wömeulettsabak weinuk siarë. A' e' skötttsa ye' yöki. A' yúshka bö' nar michoë yöule bë ena iklépa we'ikoie e' a.' 44 Erë ie'pa tö ye' a' ichakeraë: 'A Skékëpa, e' kë jcher sa' wä. ¿Mik sa' tö be' su' tö be' duöke bli wä? ¿Mik sa' tö be' su' tö be' ersine? ¿Mik be' dë' sa' u a? ¿Mik sa' tö be' su' datsi' kë ta'? ¿Mik sa' tö be' su' duöke ö wötëulewä s'wöto wé a? ¿Mik sa' kë wä be' kimene?' 45 Etä ye' tö ie'pa iuteraë: 'Mokj ye' tö a' a ichë tö mik a' kë wä iyi ekkë s' siarëpa ikképa a, etä e' dör wës kë a' wä ye' wák a igne es.' 46 S'er suluë esepa michoë weinuk, erë s'er yësyësë esepa ser michoë buaë ye' ta.'

**26**

*Judiowak wökirpa tö Jesús aleritsé klö'wëwä*

(*Marcos 14.1-2; Lucas 22.1-2; Juan 11.45-53*)

1 Mik Jesús tö s'wöbla'wé kos e' one, etä ie' tö ichë ittökatapa a:

2 —A' wä ijcher tö böiki se' tö Se' Yépa Yërulune Egipto e' këwö tkö'wëke. E' këwö ska' ta, ye' dör S'ditsö Alä, e' wömerdattsa ttëwä wötëulewä krus mik.

3 E' këwö ska' ta sacerdotepa wökirpa ena judiowak kuëblupa ñi dapa'wé sacerdote kibi kië Kafáis, e' u a. 4 Eë ie'pa tö Jesús aleritsé kjitö'wë iklö'wöwä ttëwä. 5 Erë ie'pa ichë ñi a:

—Kë sö iwamblë Se' Yépa Yërulune Egipto e' këwö tkö'wëkesö e' a' a s' pë' kë shutirka tajë.

*Kiö masmas téka alaköl eköl tö Jesús ki (Marcos 14.3-9; Juan 12.1-8)*

6 Jesús tso' Betania, Simón kiri'uk lepra bak, e' u a. 7 Ie' tkëriä mesa k' chkök. Etä alaköl eköl de ie' ska', e' wä kiö masmas tuë darërë ese debitu, e' mí ie' wä iukkuö yöule ák bua'buwa wa ese a. Etä kiö e' tékaitö Jesús wökir k'j. 8 Erë mik e' sué ittökatapa tö, etä ie'pa uluneka ta ichë:

—¿Iöök kiö se' we'ikéwa ie' tö éanas? 9 Iwatormittsa inuköl tajë skéie s'siarëpa kimoie.

10 E' ttsé Jesús tö ta ie' tö ichë ie'pa a: —¿Iöök a' tso' alaköl i' tsiriuk? Íyi buaë wëitö ye' a. 11 S'siarëpa tso' kekraë a' shüa,

erë ye' kē ku' kēkraä a' ta'. <sup>12</sup> Kiō tékai'tō ye' kī ye' kanéwoje kam ye' nu wōtērwa e' yōki. <sup>13</sup> Mokī ye' a' a' ichē tō kā wa'ñe wé Skéköl ttē buaë pakarke, eë ipakardaë ñies tō ie' tō i' buaë o' ye' a'. Es e' kē chōpawa yi éna.

*Judas tō Jesús watké*

(*Marcos 14.10-11; Lucas 22.3-6*)

<sup>14</sup> Jesús ttōkatapa dabom eyōk kī bōl, e'pa ekōl dōr Judas Iscariote, e' miā sacerdotepa wōkirpa ska' <sup>15</sup> ta' ie' tō ichē ie'pa a:

—¿Kos a' tō ye' patuēmi Jesús wōmottsā a' a'?

Etā ie'pa tō inukōlchka wōshki mé ie' a' dōka dabom mañayōk (30). <sup>16</sup> E'tami ie' tō kawō yulēmi bua'iewā Jesús wōmottsā.

*Jesús tō Judiowak Yēpa Yērulune Egipto e' kēwō bata tkō'wé*

(*Marcos 14.12-25; Lucas 22.7-23; Juan 13.21-30; 1 Corintios 11.23-26*)

<sup>17</sup> Kawō kiē Pan Kē Yōule Iwölöwōka Wa\* e' kēwō tsā diwō dewatke. Etā Jesús ttōkatapa de ie' ska' ta' ie' a' ichaké:

—¿Wé be' kī ikiane tō sa' tō Se' Yēpa Yērulune Egipto kēwō tkō'wēkesō e' chké kanewé?

<sup>18</sup> Ie' tō ie'pa iūtē:

—A' yū Jerusalén, wēm yē' ye' tō a' a' e' u' a' ta' ichō ie' a': 'S'wōbla'ukwak be' a' ichōk kē: Ie' kēwō dōkewatke. Ie' datse be' u' a' kawō tkō'wēkesō e' tkō'uk sa' ta.'

<sup>19</sup> Ie'pa tō iwé wēs ie' tō ie'pa a' iché es ta' eë ie'pa tō ichké kanewé.

<sup>20</sup> Mik ka'tuinetke, etā ie' tkēr mesa kī chkök ittōkatapa dabom eyōk kī bōl e'pa ta'. <sup>21</sup> Ie'pa chköke, e' dalewa ie' tō iché ie'pa a':

—Mokī ye' tō a' a' ichē tō a' ekōl tō ye' wōmerattsā.

<sup>22</sup> Ie'pa erianekā tajē ta' ichakēmi ie' a' ekōl ekōl:

—A Skékēpa, ¿ye' alē idir?

<sup>23</sup> Ie' tō ie'pa iūtē:

—A' tso' ye' ta' pan nuuk tka' etkē a' ñe, e' ekōl ye' wōmerattsā. <sup>24</sup> Ye' dōr S'ditsō Alā, e' ta' itkōraē wēs itso' kitule Skéköl yēkkuō kī es. Erē wēstela ina yi ye' wōmekettsā, e' ta'. Buaë idir wēm e' a' tō kē ikunūpa.

<sup>25</sup> Etā Judas tō iwōmekettsā, e' tō ie' a' ichaké:

—A S'wōbla'ukwak, ¿ye' alē idir?

Ie' iūtē:

—Be' wāk e' chéka.

<sup>26</sup> Ie'pa tso'ia' chkök, e' shuā pan klō'wéitō ta' e' kī wēstela chéitō Skéköl a' ta' iblatéitō ta' iwā tié ie'pa a' ta' ichéitō:

—Pan se' dōr ye' chká, e' ñū a' tō.

<sup>27-28</sup> E' ukuōkī ta' tka' a' vino tso', e' klō'wéitō ta' e' kī wēstela chéitō Skéköl a' ta' iméitō ie'pa a' ta' ichéitō:

—Vino se' dōr ye' pē. Ye' tterawa e' pē tērdaē, e' wa ttē pa'alī me' Skéköl tō e' wā de. Ye' ttēwa, e' wa s'tso' tajē e'pa nuñ olo'yarmi. E' kuekī a' ulitane tō ikakyō. <sup>29</sup> Ye' tō a' a' ichē tō vino kē yepaiayō dō mik i' blúie ye' Yé tso' e' kēwō de da'aie, etā iskā yeraneyō a' ta'.

*Pedro tō icheraē tō ie' kē wā Jesús suule*

(*Marcos 14.26-31; Lucas 22.31-34; Juan 13.36-38*)

<sup>30</sup> Etā ie'pa tō Skéköl ttseitssé, e' ukuōkī ta' ie'pa miyal Olivo kēbata a'. <sup>31</sup> Jesús tō iché ie'pa a':

—I' nañewe a' ulitane tkōyaldaē. A' ye' meraat ekōrla. E' dōr wēs itso' kitule Skéköl yēkkuō kī es, e' tō iché: 'Obeja kkō'nukwak ttewaraēyō ta' obeja pordami wī a' diā a.'† <sup>32</sup> Erē mik ye' ttēwa shkēnekane, e' ukuōkī ta' ye' miraē Galilea a' yōkī kēwe.

<sup>33</sup> Pedro tō ie' a' iché:

—Erē ie'pa ulitane be' memiāt ekōrla, erē ye' kē tō be' mepaat.

<sup>34</sup> Ie' tō iūtē:

—Mokī ye' iché be' a' tō i' nañewe, kam dakro ar, e' yōkī be' icheraē mañatōkicha tō be' kē wā ye' suule.

<sup>35</sup> Pedro tō ie' a' iché:

—Erē ye' ttēmiwarakitō be' ta', erē kē ye' ichepa tō kē ye' wā be' suule.

Etā ie'pa ulitane ttōke es éme.

*Jesús ttē S'yé ta' Getsemani*

(*Marcos 14.32-42; Lucas 22.39-46*)

<sup>36</sup> E' ukuōkī ta' Jesús miā ittōkatapa ta' ká kiē Getsemani eë. Ie' tō iché ie'pa a':

—A' ate tular ié, e' dalewa ye' miā wishké ttök S'yé ta'.

<sup>37</sup> Etā ie' wā Pedro ena Zebedeo ala'r bōl, e'pa mítser e' ta'. Etā ie' erianemi chkenewami tajē. <sup>38</sup> Ie' tō iché ie'pa a':

—Ye' eriane tajē ttseskua ye' ttēwamiitō ekkē. A' e' tsuāt ié ye' ta', kē a' kapōkwa.

<sup>39</sup> Ie' miā wishké ta' ie' e' kēutēr wōwakkōt iskī ta' ikiéitō Skéköl a' i' es: "A yéwō, i' tkōraē ye' ta' e' dōr wēs iyi bacha'bachaē yēwasō es. E' mú ulā a' ye' yērmittsā, e'ma ye' yōttsā iulā a'. Erē kē iwār wēs ye' kī ikiane es, i' wēs be' kī ikiane es."

<sup>40</sup> E' ukuōkī ta' ie' dene wé ittōkatapa tular eë ta' ie'pa kuéitō kapōtular ta' ichéitō Pedro a':

—¿A' kē wā kapēwa wōklōne dō hora ek ē ye' ta'? <sup>41</sup> Kē a' kapōkwa. A' ikiō Skéköl a' as i' sulu tō a' erkiōwēke ese kē e' alōka a' kī. Mokī a' éna i' buaē wak, erē a' diché kē dē'ka iwā uk, e' kuekī a' a' darērē idir.

<sup>42</sup> Etā ie' skā miāne wishké ttōkne S'yé ta' ta' ichéitō: "A yéwō, i' tkōraē ye' ta' e' mú ulā a' ye' yērmittsā, e'ma ye' yōttsā iulā a'. Erē i' wēs be' kī ikiane es."

\* **26:17** Kawō kiē Pan Kē Yōule Iwölöwōka Wa: Kawō e' tkō'wēke Israel aleripa dō ká kul, e' diwō tsā kiērakitō Se' Yēpa Yērulune Egipto e' kēwō. † **26:31** Zacarias 13.7

<sup>43</sup> Mik ie' dene, etā ie'pa kuéneitō kapōtulur; ie'pa wōbla surirkewa kapē wā e' kueķi. <sup>44</sup> Ie' skā mīāne wishķe ttōk S'yē tā, i' tā idare mañatōkicha. Etā ittēne wes ittē kuaē es. <sup>45</sup> E' ukuōķi tā ie' dene wē ie' tō ittōkatapa mañal méat eē tā ie' tō ichē ie'pa ā: —ǰA' kapōtuliuriā enukeiā? Ye' dōr S'ditsō Alā, e' diwō deķatke mēttsā pē' sulusipa ulā ā. <sup>46</sup> A' e' kōka, yi tō ye' wōmekettsā, e' dotke i' tā. Mishka ie' panuk.

*Jesús klō'wēwa ibolōķpa tō*

*(Marcos 14.43-50; Lucas 22.47-53; Juan 18.2-11)*

<sup>47</sup> Jesús tso'ia ttōk, e' dalewa ittōkatapa dabom eyōk ķi bōl (12), e'pa ekōl kiē Judas, e' debitu pē' tā tajē. E' wakpa debitu tabē ķi ena kal wōlō ķi. Ie'pa patķē'mi sacerdotepa wōkirpa ena judiowak kueblupa tō. <sup>48</sup> Judas dōr iwōmēttsā e' tō ie'pa ā iyē'bak: “Wē shkē'wekeyō wōalattē wa, e' dōr ie', iklō'ūwā a' tō.” <sup>49</sup> Etā ie' de Jesús ska' tā ichē ia:

—ǰA S'wōbla'ukwak!

Tā iwōalattēwaitō. <sup>50</sup> Jesús tō ichē ie' ā:

—A yami, i' uk be' de, e' ū.

Etā pē' datse Judas tā e'pa de Jesús ska' tā iklō'wēwarakitō.

<sup>51</sup> Etā ie'pa iēter eē Jesús tā e'pa ekōl tō itabē yēttsā tā e' wa sacerdotē kibi e' kanē méso kukuōña tēttsā. <sup>52</sup> Jesús tō ichē ie' ā:

—Wēpa űippōke tabē wa, esepa dōraķa tabē kōō ā. E' kueķi be' tabē blōwane ikuōlit ā. <sup>53</sup> ǰBe' kē wā ijcher tō ye' ķi ikiane, e'ma ye' tō ikiēmi ye' Yē ā tā ie' tō ibiyōchōkwakpa tajē dōka 70.000 e' patķēmi ye' tsatkōk? <sup>54</sup> Erē ye' tō ikiē es, e' tā ǰwes Skēkōl yēkkuō ķi itso' kitule e' wā tkōmi? E' tō ichē tō i' suluē tkōke ye' tā e' kawōtā tkōk es.

<sup>55</sup> Etā ie' tō ichakē pē' ekkēpa ā:

—ǰI kueķi a' bite ye' klō'ukwā tabē ķi kal wōlō ķi wēs akblōkwakpa klō'wēwā es? Keķraē ye' bak e' tkōkser Skēkōl wē ā s'wōbla'uk, erē a' kē wā ye' klōonewā. <sup>56</sup> Erē i' tkōke i' e' dōr ās iwā tkō wēs Skēkōl tteķōlpa tō ikitatbak Skēkōl yēkkuō ķi es.

E' wōshā tā ie' ttōkatapa kōs tkayalmi tō imēat ekōrla.

*Jesús demi ie'pa wā Caifās wōrkī*

*(Marcos 14.53-65; Lucas 22.54-55, 63-71; Juan 18.12-14, 19-24)*

<sup>57</sup> Etā pē' tō Jesús klō'wēwā e'pa tō ie' tsēmi sacerdotē kibi kiē Caifās e' u ā. Eē s'wōbla'uk ttē dalōiēno wa wakpa ena judiowak kueblupa kōs daparke. <sup>58</sup> Erē Pedro datse ie'pa itōķi kāmīē dōttsā sacerdotē kibi e' u pamik, eē ie' e' tsēat tkēr Skēkōl wē shkēķipa tā isaūķ tō i' tkōmi.

<sup>59</sup> Etā sacerdotepa wōkirpa ena judiowak wōkirpa malepa tō ttē yuleke Jesús kkatōie as ie'pa tō iwōmūttsā ttēwā. <sup>60</sup> Tajē pē' de ie'

kkatōk kachē wa, erē kē yi wā ie' kkatēne wē' ie' wōmōttsā ttēwā. Bata ekkē tā idebitū bōl ikkatōk kachē wa, <sup>61</sup> e'pa tō ichē:

—Wēm sē tō iyē' tō ie' ā Skēkōl wē olorwami, e' yuēkamineitō kā mañat shūā.

<sup>62</sup> Sacerdotē kibi e' kēka tā ichakē Jesús ā:

—ǰKē be' ie'pa iuteķū' yēs? ǰÑe' ie'pa be' kcateke, e' dōr i'?

<sup>63</sup> Erē Jesús siwa'blēwā ie'pa yōķi. Etā sacerdotē kibi tō ichakē ie' ā:

—Ichō sa' ā yēsēsē Skēkōl chōķ e' wōrkī tō ǰbe' dōr ie' Alā? ǰBe' dōr wē pairine'bitū idi' wa sa' blūie e'?

<sup>64</sup> Ie' iūtē:

—Wes be' ichē es idir. Ye' tō ichē a' ā tō ye' dōr S'ditsō Alā, e' sueraē a' tō tkērķa Skēkōl dichē tā' tajē iyi ulitane tsatā e' ulā bua'kka dalōiērtā' tajē. Nies ye' datskene kashuk ā mō ā e' sueraē a' tō.

<sup>65</sup> Etā sacerdotē kibi e' datsi' jchēe ikkachōie tō ilunekā tā ichēitō:

—ǰI chē ie' tō, e' wa ie' tso' Skēkōl chōķ sulūē. ǰIie se' ķi ikkatōkwakpa ķi kiarmiia? Ttē sulūē chēitō, e' tstsētkesō. <sup>66</sup> ǰIma a' tō ibikeitsē?

Ie'pa tō iūtē:

—Ie' wāk iāne iwiie, e' kueķi iķawōtā ttēwā.

<sup>67</sup> Etā ie'pa wirituōke Jesús wō ķi tā itek-erakitō tajē. Welepa tō ippē iwō ķi <sup>68</sup> tā ichērakitō:

—Be' dōr wē pairine'bitū idi' wa s'blūie e', e'ma sa' ā ichōķā ǰyi tō be' ppē?

*Pedro tō iblē tō kē ie' wā Jesús suule*

*(Marcos 14.66-72; Lucas 22.56-62; Juan 18.15-18, 25-27)*

<sup>69</sup> Pedro tkēriā sacerdotē kibi e' u pamik tā alakōl kaneblōke u e' ā, ese de ekōl ie' ska' tā ichēitō ia:

—Be' nies dōr Jesús Galilea wak e' klē ekōl.

<sup>70</sup> Erē ie' tō iblē sulitane tso' e'pa kukua. Ie' tō ichē:

—Ye' kē ēna iāne tō i' chōķ be' tso'.

<sup>71</sup> Ie' mīā ukkō tkēr kañiķa eē tā alakōl skā tō isuē e' tō ichē imalepa ā:

—Ie' i' dōr Jesús Nazaret wak e' klē ekōl.

<sup>72</sup> Etōkichane Pedro tō iskā chē:

—ǰYe' ichē Skēkōl wōrkī tō ye' kē wā wēm e' suule!

<sup>73</sup> E' kuōlō tā wēpa tso' eē e'pa debitu ie' ska' tā ichēitō:

—Mōķi be' dōr ie'pa ēltē wak, be' ttō ie'pa ttō tstsēē.

<sup>74</sup> Etā ie' ichē:

—Skēkōl wōrkī yō ichē tō i'wēm e' kē suule ye' wā! Kē idōr es, e'ma as ye' kichatēr.

E' wōshaē dakro ane, <sup>75</sup> tā i' yē' Jesús tō ie' ā e' anewā ie' ēna, e' dōr i': 'Kām dakro ar, e' yōķi be' tō icheraē mañatōkicha tō be' kē wā ye' suule.' Etā ie' e' yēttsā mīā kañiķa tā eē ie' iē tajē siarē.

## 27

*Jesús mítser Pilato wörki*

(*Marcos 15.1; Lucas 23.1-2; Juan 18.28-32*)

<sup>1</sup> Mik ká ñine, etá sacerdotepa wókirpa ena judiowak kuęblupa kos ñi dapa'wéka iler-itsók tó "¿wes sô Jesús ttëwami?" <sup>2</sup> Ie'pa wa imítser moulewá mé Pilato a. Pilato tkê'ka Roma wókir kibi tó Israel aleripa ké wókirie.

*Judas e' ttëwá*

<sup>3</sup> Judas tó Jesús wato'ttsabak, mik e' wa ijchenewá tó mokí Jesús wómenettsá ttëwá, etá e' tó ie' eriawéne tajë. E' kuęki ie' miá sacerdotepa wókirpa ena judiowak kuęblupa ska' tã inukól mène ie' a mañayók (30), e' ménéitó ie'pa a. <sup>4</sup> Ie' iché ie'pa a:

—Ì sulu wambléyô. Wëm kē kī ì sulu nuí tã, ese wóméttsayô ttëwá.

Erë ie'pa tó ie' iüté:

—jE' kē kī sa' tkine! jE' wërke be' wóki!

<sup>5</sup> Etá ie' inukól e' uyémine Skékól wë shuá ta imiá e' kuli' skéká tã, es ie' e' ttëwá.

<sup>6</sup> Etá sacerdotepa wókirpa tó inukól e' shtéka tã ichéarakitó:

—Inukól i' dör s'kötulewá ské, e' kuęki ñá idir. Kē iënnukwá inukól tso' Skékól a İyi kanéwoie ese a.

<sup>7</sup> E' kuęki ie'pa ttë mé ñi a tó ká tauttsasô iwa yuë pöie pë' datse ká bānet blénewá je, esepa nu blóie. Etá ká kië Skauchka Yuókwak Ké e' tué ie'pa tó. <sup>8</sup> Ie'pa tó ká e' tué s'kötulewá ese kē wa, e' kuęki dō ikké tã ká e' kië Ká Tõne S'kötulewá Ské Wa. <sup>9</sup> İyi ekké kos tka wës Skékól tekól kië Jeremías tó iyë'atbak es. Ie' tó iyë': "Israel aleripa tó iské méka inukólchka wóshki döká dabom mañayók (30), ekké klö'wé ie'pa tó, <sup>10</sup> tã e' wa ie'pa tó ká kië Skauchka Yuókwak Ké e' tué wës Skékól tó ye' a iyë' es."\* Es Jeremías tó iyë'at.

*Pilato tó Jesús a ichaké*

(*Marcos 15.2-5; Lucas 23.3-5; Juan 18.33-38*)

<sup>11</sup> Jesús mítser ie'pa wa Pilato dör ká e' wókir e' ska' tã e' tó ie' a ichaké:

—¿Be' dör judiowak blu?

Ie' iüté:

—Tó, wës be' iché, e'ma es idir.

<sup>12</sup> Sacerdotepa wókirpa ena judiowak kuęblupa tó ie' kcateke Pilato a, erë Jesús kē wa ie'pa iütëne yës. <sup>13</sup> E' kuęki Pilato tó ie' a ichaké:

—Ie'pa tó be' kcateke tajë ¿e' kē tséne be' wá?

<sup>14</sup> Erë ie' kē wá iütëne yës, e' tó Pilato tkiwéwá darërë.

*Jesús métttsá ttëwá Pilato tó*

(*Marcos 15.6-20; Lucas 23.13-25; Juan 18.38-19.16*)

<sup>15</sup> Judiowak Yépa Yërulume Egipto, e' kēwô wa Pilato wóblar s'wötëulewá s'wôto wé a ese yóktsa ekól émine wé kiane pë' kī e'. <sup>16</sup> E' kēwô ska' tã wëm tso' wötëule ekól kië Barrabás kkekaulekã tajë judiowak shuá. <sup>17</sup> E' kuęki mik ie'pa e' dapa'wé tajë, etá Pilato tó ie'pa a ichaké:

—¿S'wötëulewá wéne kiane a' kī tó ye' tó iyëttsane a' a: Barrabás ô Jesús kiekerakitó wé pairine'bitü idi' wa s'blúie e'?

<sup>18</sup> Ie' tó isuwéwá tó ukýene wa sacerdotepa wókirpa tó Jesús me'ttsá ie' ulá a. E' kuęki ie' tó ie'pa a ichaké es.

<sup>19</sup> Ie' tkërkaia s'shulo kulé kī, etá ilakól tó ichök patké ie' a: "Nañewe ye' tó Jesús kébisué, e' tó ye' tsiriwétka tajë, e' kuęki be' kē e' tiuk wëm ser yësyésé e' tã."

<sup>20</sup> Erë sacerdotepa wókirpa ena judiowak kuęblupa tó pë' ulitane dakñé tã ichéarakitó: "Ikió Pilato a tó Barrabás ómine erë Jesús ttówa."

<sup>21</sup> Pilato tó ie'pa a iskà chakéne:

—¿Wëpa böl i', wé kiane a' kī tó ye' tó iëmine?

Ie'pa iüté:

—jBarrabás ómine!

<sup>22</sup> Ie' tó ie'pa a ichaké:

—Etá ¿wës Jesús kiekerakitó wé pairine'bitü idi' wa s'blúie e' wëmüyô?

Ie'pa iüté:

—jİttówá wötëulewá krus mik!

<sup>23</sup> Ie' tó ichaké ie'pa a:

—¿İ kuęki? ¿İ sulu wambléitó?

Erë ie'pa kī arke:

—jİwötówá krus mik!

<sup>24</sup> Ie' tó isué tó ie' kē a Jesús tsatkënuw wës, pë' kī arkeka tajë, e' kuęki ie' tó di' tsuk patké tã iulá skué ie'pa ulitane wórkj iwá kkachoie tó ie' kē iane iwiie. Ie' iché:

—Wëm i' patkeraëyô ttëwá erë e' nuí kē kü' ye' kī. E' nuí ardaé a' ulitane kī.

<sup>25</sup> Etá ie'pa ulitane iüté:

—Sa' ena sa' ala'r kos as e' kī inuí ar.

<sup>26</sup> Etá Barrabás émi ie' tó. E' ukuökj tã ie' tó Jesús ppók patké tsa' bata daloie wa, tã imétttsaitó iñippókwakpa ulá a wötëwá krus mik.

<sup>27</sup> Etá Pilato ñippókwakpa wa Jesús mítser s'wókirpa wé kië Pretorio e' pamik ta eę ie'pa tó ñippókwakpa malepa kos kiétttsá dapa'wé ek tsini Jesús pamik. <sup>28</sup> Ie'pa tó Jesús datsi' yétttsá tã datsi' mat daloshdalosh ese wa ipaierakitó blu'ie. <sup>29</sup> Nies dika'kicha yué wóshkii, e' tkékarakitó iwókir kī blu'ie. Kuakól wóló mérakitó ie' a iulá bua'kka wës blu' es. E' ukuökj tã ie'pa e' tkéwá kuché kī ie' wórkj iwayuoié tã ichéarakitó:

\* 27:10 Jeremías 19.1-13; 32.6-9

—jBe' dör judiowak blú! jBe' kíkòkka sa' tso'!

<sup>30</sup> Ñies ie'pa wiritue ikj tajë, tã kuaköl wööl a'tser iulà a, e' yétsarakitò, e' wa ippéarakitò tajë iwökir kj. <sup>31</sup> Mik iwayué one, etã datsi' mat daloshdalosh, e' yétsarakitò tã iwák datsi' iékanerakitò ikj tã imítserak iwã wötewã krus mik.

*Jesús wötëne krus mik*

(*Marcos 15.21-32; Lucas 23.26-43; Juan 19.17-27*)

<sup>32</sup> Mik ñippòkwakpa wã Jesús dami e'pa e' yélur ee, etã wëm eköl kué ie'pa tã ñalã kj kië Simón, e' dör Cirene wak. Ie' ké ie'pa tã Jesús krus tsukmi.

<sup>33</sup> Mik ie'pa de kã kië Gólgota ee (Gólgota wã kiane chë s'wókirliche), <sup>34</sup> etã ie'pa tã vino shutuule kapóli bacha'bachaë wa, ese mé Jesús a yë. Erë mik ie' tã ipattsé, etã ie' ké wã iyanewa.

<sup>35</sup> Mik ie'pa tã iwótë krus mik one, e' ukuökj tã ie'pa iné ñi ma'woie suë tã wes ie'pa tã ie' datsi' blatemi ñi a. <sup>36</sup> E' ukuökj tã ie'pa e' tuluéser ikkò'nuk as ké yi itsátkò. <sup>37</sup> Kaltak kj itso' kitule tã ichë: "I dör Jesús dör judiowak blú e'", e' batséwarakitò ie' wökir tsakã. E' kit ie'pa tã iwã kkachioie tã i nuí kj ie' wötënewã krus mik.

<sup>38</sup> Etã ñies wëpa bõl akblòkwakpa wötëwarakitò krus mik, eköl iulã bua'kka, eköl iulã bakl'i'kka. <sup>39</sup> Pë' tkòke ee e'pa tã icheke sulu, iwökir wötiukerak iwõã, es ichekerakitò:

<sup>40</sup> —jBe' së tã Skëköl wé tkekettsa, tã kã mañatk ë tã be' tã iyuékane! Mokj be' dör Skëköl Alã, e'ma be' e' tsátkò, be' e' ówa krus së mik.

<sup>41</sup> Es ñies sacerdotepa wókirpa ena s'wöbla'uk ttë dalóiëno wa wakpa ena judiowak kuëblupa, e'pa tã ie' wayueke. Ie'pa ñi a ichòke:

<sup>42</sup> —Q'kapa tsátkéitò erë ie' wák ké a e' tsátkër. Mokj ie' dör Israel aleripa blú, e'ma as ie' e' ówa krus wj mik, e' iarma tã sa' erblómi ie' mik. <sup>43</sup> ¿Ie' ké wã sa' a jyëne tã ie' dör Skëköl Alã? ¿Ie' erblòke Skëköl mik e' kj ikiane, e'ma as e' tã itsátkò!

<sup>44</sup> Dõ ñies akblòkwakpa bõl wötëulewã krus mik ie' o'mik, e'pa tã ie' cheke sulu.

*Jesús duowã*

(*Marcos 15.33-41; Lucas 23.44-49; Juan 19.28-30*)

<sup>45</sup> Mik diwö de bata a, etã kã mĩa ttsetsee kã wa'ñe, dõ tsãlì diwö de mañat ekkë. <sup>46</sup> E' wõshã tã Jesús anekã tajë tã ichë: "Elí, Elí, ¿lemã sabactani?" (e' wã kiane chë: "Ye' Këköl, a ye' Këköl, ¿iök be' ye' we'ikétsã?")

<sup>47</sup> Mik welepa tso' ee, e'pa tã ttë e' tstsé tã ichéarakitò:

—Wëm wj tso' Skëköl tteköl bak kië Elías, e' kiök.

<sup>48</sup> Etã ie'pa eköl tunemi tã suiyök nuwékã vino shkòshkò wa, e' tkéka kuaköl bara kj tã itkewã ie' kkò mik as ikuyóitò. <sup>49</sup> Erë imalepa tã ichë ie' a:

—Imúat bër, ipanusò suë tã Elías datse itsátkòk.

<sup>50</sup> Etã ie' skã anene tajë tã iwiköl émiitò. Es iduowã. <sup>51</sup> E' wõshã tã Skëköl wé a ie'pa wã datsi' buririë ese shukuar u blaitoie e' jchënane kákke dottsã iskj. Ñies kã wöti'neka tã ak blublu tskirolone. <sup>52</sup> Etã pò kkòburoolone tã s'batsérpa blërulune, esepa tajë shkënekane <sup>53</sup> e' yélur ipò a. Ie' du'wã shkënekane, e' ukuökj tã ie'pa de Jerusalén dör kã batsér ee, tã tajë pe' tã ie'pa suë.

<sup>54</sup> Roma ñippòkwak eköl dör capitán ena imalepa tso' ie' tã Jesús kkò'nuk, mik e'pa tã kã wöti'ne ena i kos tka ee e' suë, etã ie'pa tskirulune tã ichë ñi a:

—Mokj wëm wj dör Skëköl Alã je'.

<sup>55</sup> Ñies alakõlpa manetwã Galilea Jesús tã ikimuk, e'pa tso'ñak tajë ie' kj sauk kãmië. <sup>56</sup> E'pa eköl dör María Magdala wak, iëköl dör María dör Santiago ena José e'pa mì, iëköl dör Zebedeo ala'r, e'pa mì.

*Jesús nu wötëne pò a*

(*Marcos 15.42-47; Lucas 23.50-56; Juan 19.38-42*)

<sup>57</sup> Wëm eköl tso' kië José Arimatea wak, e' dör inuköl blú, ñies ie' dör Jesús klé eköl. Mik kã tuirketke, <sup>58</sup> etã ie' mĩa Pilato ska' Jesús nu kiök. Pilato tã imuk ké ie' a. <sup>59</sup> Ie' wã imítser patrëwã datsi' ukuë bua'buasururu maneneë ese wa. <sup>60</sup> E' ukuökj tã ie' tã ibléwã ákuk bine pa'alì iwák nu blóie e' a. Ie' tã ak bërie trémi dõ pò kkò mik, e' wa iwötëwã. E' ukuökj tã imĩa. <sup>61</sup> Erë María Magdala wak ena María skã, e'pa atë tulur pò kkò wõshã.

*Jesús nu blëne e' kkò'né Shkëkpa tã*

<sup>62</sup> E' bule es e' dör eno diwö, etã sacerdotepa wókirpa ena fariseowakpa mĩyal ñita ttök Pilato tã. <sup>63</sup> Ie'pa ichë iã:

—A këkëpa, sa' éna inanewã tã mik kachòkwak e' bak tstsé'ka, etã ie' tã iyé' tã ie' duowã e' kj kã de mañat etã ishkerdakane. <sup>64</sup> E' kuekj sa' tã be' a ikië tã pò kkò'nuk patkò dõkã kã mañat dõ' ittòkatapa dõ inu ekiblòkwã tã i' ukuökj tã ichënerakitò sulitane a tã ishkenekane. E' wërakitò es, e' tã e' dör kachë tajë shutë tkòkã ikãche kewë e' tsatã.

<sup>65</sup> Pilato tã ichë ie'pa a:

—Së a' wã ñippòkwakpa tso', a' yu' ikkò'nuk bua'iewã kos a' a' ikkò'narmi ekkë.

<sup>66</sup> Etã ie'pa mĩa pò a tã iyi batséwarakitò pò kkò mik as ké yi mi'wãia ee. Ie'pa tã ñippòkwakpa méat pò kkò'nuk, etã iwákpa mĩyal.



## 28

*Jesús shkenekane*

(*Marcos 16.1-8; Lucas 24.1-12; Juan 20.1-10*)

<sup>1</sup>Eno diwō tka, e' bule es e' dōr domingo e' nīrketke tã Maria Magdala wak ena María skà, e'pa míyal Jesús pō sauk. <sup>2</sup>E' wōshã tã Skékōl biyōchōkwak ekōl tso' kã jai a e' de, etã j tka darērēē. Ie' mīã pō a tã ák bastkēr e' tréuītō bānet tã ie' e' tkēsēr ikī. <sup>3</sup>Ie' wōnarke dalōlōē wēs alã wōnar es, idatsi' damiwã saruruē wēs suiyōk es. <sup>4</sup>Mik ñippōkwakpa tō e' sué, etã ie'pa tkirulune painékarak siwã' arulune suane ē wã, aṭe wēs s'duowã es. <sup>5</sup>Etã Skékōl biyōchōkwak tō iché alakōlpa a:

—Kē a' suanuk. Ye' wã ijchēr tō a' tso' Jesús kōtewã krus mik, e' nu yulōk. <sup>6-7</sup>Erē ye' de a' a' ichōk tō kē ikū' iē, ishkenekane wēs ie' tō iyē'atbak es. A' shkō wé ie'pa tō inú me'wã e' tō weblōk. E' ukuōkī tã a' yú bet ibiyō chōk ittōkatapa a: 'Ie' shkenekane, e' mir a' yōkī kewe Galilea, eē a' tō isuērãē.'

*Jesús e' kkaché alakōlpa a*

<sup>8</sup>Etã alakōlpa míyal shkãlãlãē. Ie'pa suane erē ñies ie'pa ttsē'ne buaē. Ie'pa tunemirak ibiyō muk Jesús ttōkatapa a. <sup>9</sup>E' wōshã tã Jesús de dur ie'pa wōrkī tã ie'pa shkē'wéitō. Ie'pa dewã ie' ska' tã ie'pa e' tuléwã kuchē kī tã iklō paklō'wēwãrakitō tã idalōiérakitō. <sup>10</sup>Ie' tō iché ie'pa a:

—Kē a' suanuk. A' yú ichōk ye' ttōkatapa a tō a' yú Galilea tã eē a' tō ye' suērãē.

*Ñippōkwakpa patōle kachōk*

<sup>11</sup>Alakōlpa míyal, e' dalewa ñippōkwakpa tso' pō kkō'nuk e'pa welepa míyal Jerusalén tã i kōs tka e' pakérakitō seraa' sacerdotepa wōkirpa a. <sup>12</sup>Sacerdotepa wōkirpa míyal ttōk judiowak kueblupa tã. Ie'pa ttē mé ñi a: "Sú sō ñippōkwakpa patuē inukōl tajē wa as ie'pa ichō wēs se' kī ikiane es." <sup>13</sup>Ie'pa tō iché ñippōkwakpa a:

—A' ichō tō nañewe a' kapolur e' dalewa Jesús ttōkatapa debitū e' wã inú mítser. <sup>14</sup>A' wōkir kibi wã ijchēnewã, e' tã sa' ttōrãē ie' tã a' tsatkoie. Es kē i' tkōpa a' tã.

<sup>15</sup>Etã ñippōkwakpa tō inukōl e' klō'wé tã ichérakitō wēs ie'pa kē ichōk es. Dō j'ñe tã kachē e' pakekeiã judiowak tō.

*Jesús tō ittōkatapa patké ie' ttē pakōk kã ulitane wakpa a*

(*Marcos 16.14-18; Lucas 24.36-49; Juan 20.19-23*)

<sup>16</sup>Etã Jesús ttōkatapa dabom eyōk kī ekōl (11), e'pa míyal Galilea kabata a wé ie' tō ie'pa a iyē' eē. <sup>17</sup>Mik ie'pa tō isué, etã ie'pa tō idalōié, erē ie'pa welepa tō ibikeitséka bōtbōt. <sup>18</sup>Ie' de ie'pa ska' tã ichéitō:

—Skékōl tō ye' tkē'kã iyi ulitane wōkirie kã jai a ena kã i' a. <sup>19</sup>E' kuēkī a' yú kã ulitane a s'yuōk ye' ttōkatapaie. Ie'pa wōskuō S'yé ena

ye' dōr ilã ena Wikōl Batse'r e' ttō wa. <sup>20</sup>Ñies ttē kōs wã dalōiōk a' ka' ye' tō, e' wa ie'pa wōbla'ú as ñies ie'pa tō iwã dalōiō. Ye' ser michoē a' tã kēkraē. Erē kã i' enewatke, erē ye' kē tō a' mepaāt a' wakpa ē.

# Jesús Tté Buaë Kit San

## Marcos tö Marcos

Yi tö yëkkuö i' kit e' kië Marcos. Nies ie' kië Juan Marcos. Ie' kë dör Jesús ttekölpa tsá dabom eyök kï bøl e'pa eköl. Erë wele tö ibikeitsë tö ie' dör Pedro klé. E' kuekï pë' tajë tö ibikeitsë tö Pedro tö ie' kime' yëkkuö i' shtök. Nies ie'pa ibikeitsë tö Marcos bak senuk Jerusalén, e' kuekï i' o' Jesús tö ena i' yë'itö e' ane buaë ie' éna.

Jesús dör Skëköl alá e' dë'bitü ká i' kï e' tö iyi buaë o' tajë sulitane á ie'pa wörkï. E' kit Marcos tö yëkkuö i' kï. Ie' kï ikiane tö sulitane wá ijcherwá. Nies wes Jesús weine tajë ena iwötënewá krus mik e' paké ie' tö tajë. Jesús weine tajë ena idu'wa, e' ukuökï ishkenekane, e' kuekï idiché tá' tajë tköka se' bolök Satanás tsata. I'ne tá kekraë ie' tso' se' kimoie, e' kiane Marcos kï tö se' wá ijcher. E' kuekï ie' tö yëkkuö i' kit.

Marcos i' tté tso' kitule Hechos 12.12,25; 13.5,13; 15.36-39 ena 2 Timoteo 4.11 e' kï. Erë kë s'wá ijcher yësyësë tö mik ie' tö yëkkuö i' kit, erë se' tajë tö ibikeitsë tö ikittitö Jesús kune' e' kï duas de dabom skeyök (50) ena dabom kuryök (70) e' shü ulat.

*Juan s'wöskuök tö s'patté*  
(Mateo 3.1-12; Lucas 3.1-9,15-17; Juan 1.19-28)

<sup>1</sup> Jesucristo dör Skëköl Alá, e' tté buaë dör i' es.

<sup>2</sup> Ká iaiäë Skëköl tteköl kië Isaías e' tö ikitat yëkkuö kï, e' ichë i' es:

Skëköl tö ichë: "Ye' tso'tke ye' tté pakökwak patkök be' yöki kewe, be' ñalé yuök.\*"

<sup>3</sup> Ká sir poë wé kë yi serku' eë ie' ttöraë aneule:

'A' er mane'ü Skëköl datse e' yöki, e' dör wes ñalá yuësö yësyësë ie' yöki es.' "† Es Isaías tö iyë'at.

<sup>4</sup> Es Juan S'wöskuökwak tso' ká sir poë wé kë yi serku' eë, e' tö s'pattémi i' es: "A' er mane'ü Skëköl á as a' nuü olo'yöitö a' kï tá a' e' wöskuölor iwà kkachöie."

<sup>5</sup> Jerusalén wakpa ena ká malepa tso' Judea e' wakpa kos döke ie' ttöke e' ttsök. Ie'pa e' wamblö sulu kos e' chekekarakitö tá Juan tö iwöskuelor di' kië Jordán e' a.

<sup>6</sup> Juan datsi' yöule kameio köyök wá; ikipamo yöule iyiwak kkuölit wa. Ie' chké dör dtskí ena bulali. <sup>7</sup> Tté pakeke ie' tö ie'pa á i' es: "Ye' itökï idatse eköl, e' dör kéképa tajë ye' tsata, e' kuekï ie' klökkuö kicha é kë wötsënanuk ye' siarla e' a. <sup>8</sup> Ye' tö a' wöskueke di' á, erë ie' tö a' ierawá Wiköl Batse'r a."

*Juan tö Jesús wöskué*  
(Mateo 3.13-17; Lucas 3.21-22)

<sup>9</sup> E' k'éwö ska' tá Jesús e' yéttsá Nazaret atë Galilea eë, e' de Jordán tá eë Juan tö ie' wöskué. <sup>10</sup> Mik ie' wösune e' e' duékane di' a, e' wöshá tá ie' isué tö ká jai kköbunane tá Skëköl Wiköl bitë ie' kï nuböl sù. <sup>11</sup> Etá ttö ttséne datse ká jai á, e' tö ichë: "Be' dör ye' alá dalër tajë ye' éna, e' wër ye' wa buaë shütë."

*Satanás tö Jesús erkiöwé i' sulu wamblö*  
(Mateo 4.1-11; Lucas 4.1-13)

<sup>12</sup> E' ukuökï tá Skëköl Wiköl tö Jesús ké shkökmi ká sir poë wé kë yi serku' eë. <sup>13</sup> Eë iyiwak sulusi tso' tajë. Eë ie' sené ká dabom tkëyök (40), e' dalewa Satanás tö ie' erkiöwé i' sulu wamblö. Skëköl biyöchökwapka tö ie' kímé.

*Jesús tö ie' kanè wawémitke Galilea*  
(Mateo 3.1-12; Lucas 3.1-9,15-17; Juan 1.19-28)

<sup>14</sup> Juan klö'wéwarakitö wötëwá s'wöto wé á, e' ukuökï tá Jesús miá Galilea Skëköl tté buaë e' pakök. <sup>15</sup> Ie' s'patteke i' es: "Ï blúie Skëköl tso' e' k'éwö dewatke tsinet. E' kuekï a' er mane'ü ie' á tá ie' tté buaë e' klö'ü."

*Jesús tö nima klö'ukwakpa döka tkël e'pa kïé*

(Mateo 4.18-22; Lucas 5.1-11)

<sup>16</sup> Mik Jesús shkórami batsöri kië Galilea e' kkömik, etá wépa bøl suéitö. E'pa dör Simón ena iël Andrés. Ie'pa dör nima klö'ukwakpa. Ie'pa tso' ikla' uyök batsöri á nima klö'woie.

<sup>17</sup> Jesús tö ie'pa á ichë:

—A' shkó ye' tá. A' yueraëyö s'ditsö klö'uk ye' á ye' ttökataie.

<sup>18</sup> E' bet tá ie'pa tö ikla' tuléat tá miyal ie' tá.

<sup>19</sup> E' wí'kie Jesús tö Santiago ena iël kië Juan e'pa sué. Ie'pa dör Zebedeo ala'r. Ie'pa tular kanö á ikla' wöyüök. <sup>20</sup> E' wöshá tá Jesús tö ikiémirak e' tá. Etá ie'pa tö iyë méat ikané mësopa tá kanö shüá tá imiyal Jesús tá.

*Jesús tö aknama trë'wëshkar wëm eköl á*  
(Lucas 4.31-37)

<sup>21</sup> Ie'pa demi ká kië Cafarnaüm eë. Eno diwó á Jesús tkawá judiowak ñi dapa'wö wé á tá ie' tö s'wöbla'wémitke. <sup>22</sup> Ie' tö s'wöbla'weke tté mokï diché tá' tajë ese wa. E' kë dör wes s'wöbla'uk tté dalöiëno wa wakpa tö s'wöbla'weke es. E' kuekï e' tö wépa tso' ittök e'pa tkiwéwá. <sup>23</sup> Etá eë wëm eköl tso' e' á wimblu sulusi tso' e' tö ichë aneule:

<sup>24</sup> —A Jesús Nazaret wak, ¿iie be' tso' sa' tsiriuk? ¿Be' debitu sa' eukwa? Ye' wa wá se' sule. Ye' wá ijcher tö be' dör yi dör batse'r patkë'bitü Skëköl tö e'.

<sup>25</sup> Jesús tö wimblu e' uñé:

—¡Be' siwa'blöwá, be' e' yöttsa wëm se' á!

\* 1:2 Malaquías 3.1 † 1:3 Isaías 40.3

<sup>26</sup> Wimblu sulusi tō wēm siwā' éwa ta ianekā tajē tā ie' yéttsa ia. <sup>27</sup> Sulitane tkinewā iweblök tā ifi chakérak:

—¿Wí dör i? ¡Ie' s'wöbla'weke ttē pa'ali wa ena diché wa dō wimblupa sulusi kéitō e' yöktsa tā ittō iütérakitō ekkē!

<sup>28</sup> E' bet tā ie' ttē bunekā Galilea kōs a.

*Jesús tō Simón yāk bua'wéne*  
(Mateo 8.14-15; Lucas 4.38-39)

<sup>29</sup> Mik ie'pa e' yélur ñi dapa'wō wé a tā Jesús miá Simón ena Andrés e'pa u a. Santi-ago ena Juan mí ie' tā. <sup>30</sup> Eē Simón yāk me'r ká' kī kiri'weke duē dalölō tō, e' ché ie'pa tō Jesús a. <sup>31</sup> Etā ie' e' skéwa tā iklō'wéitō iulā a tā ikimé e' tkökser. E' bet tā duē dalölō ie' éwa tā ie' e' kéka ilē yulök ie'pa a ñē.

*Jesús tō tajē s'kirirke esepa bua'wéne*  
(Mateo 8.16-17; Lucas 4.40-41)

<sup>32</sup> Ká tuine diwō miwátke tā s'kirirke ena wépa a aknama tso' esepa kōs debiturak iwā Jesús ska'.<sup>‡</sup> <sup>33</sup> Ká e' wakpa kōs e' dapa'wékā ukkō a. <sup>34</sup> Etā ie' tō duē ulitane bua'wéne pé' tso' tajē e'pa a. Ñies aknamapa tajē trē'wéyalitō. Erē aknamapa wā ijcher yi dör ie', e' kuekī ie' ké wā kawō mēne ie'pa a ttök.

*Jesús tō Skéköl ttē paké judiowak ñi dapa'wō wé a*  
(Lucas 4.42-44)

<sup>35</sup> Ká ñirketke iā ttsettseē, tā Jesús e' kéka miá bánet wé ké yi ku' ese ska' ttök S'yé tā. <sup>36</sup> Etā Simón ena iwapiepa miyal ie' yulök. <sup>37</sup> Mik ikuéwarakitō, etā ie'pa ie' a iché:

—Sulitane tso' be' yulök.

<sup>38</sup> Erē ie' tō ie'pa iütē:

—Mishka ká tso' tsinet tsinet ese a. Ñies ee ye' ké Skéköl ttē pakök, eseie ye' dē'bitū.

<sup>39</sup> Es Jesús shkē ká tso' Galilea e' kōs a ttē pakök judiowak ñi dapa'wō wé kōs a, ñies aknama trē'ukyal.

*Wēm eköl kiri'weke lepra tō e' bua'wéne Jesús tō*  
(Mateo 8.1-4; Lucas 5.12-16)

<sup>40</sup> Wēm eköl kiri'weke lepra tō, e' e' skéwa Jesús o'mik tā ie' e' tkéwā kuchē kī tā iché ia:  
—Be' kī ikiane, e' tā be' a ye' buarmine as ye' batse'rne.

<sup>41</sup> Jesús tō ie' sué er siarē wa tā ikéwāitō ulā wa tā iché:

—Tō, ye' kī ikiane. Be' dene batse'r.

<sup>42</sup> E' wōshā tā wēm buanene batse'nene.

<sup>43-44</sup> E' ukuökī Jesús tō ie' a iché:

—Ye' ttō ttsō, i tka be' tā e' ké char yi a. Be' yú e' kkachök sacerdote a. I muk Moisés tō a' ka' e' batse'woie e' tsúmi mē Skéköl a iwā kkachoe.

<sup>45</sup> Erē wēm miá tā ie' e' kéka i tka itā e' pakök sulitane a. E' kuekī Jesús ké a e' kchayēnuk wé pé' tso' tajē ese ska'. Ie' kawōtā e' tsukat kañiuk wé ké pé' ku' ese ska', erē ká wa'ñe wakpa datse ie' ska'.

## 2

*Wēm eköl kraulewā e' bua'wéne Jesús tō*  
(Mateo 9.1-8; Lucas 5.17-26)

<sup>1</sup> Ká wekkē alē kuökī tā Jesús dene Cafarnaúm. Mik pé' wā ijchenewā tō ie' tkēr u a, <sup>2</sup> etā tajē ie'pa e' dapa'wé ie' ska' ké chē'kaia weshke, ké chē'kaia ukkō a ekkē. Ie' tso' Skéköl ttē pakök ie'pa a. <sup>3</sup> E' dalewa wépa dōka tkēl wā wēm kraulewā ké karkā debitū eköl ká'la kī. <sup>4</sup> Erē tajē s'tso', e' kuekī ké wēs ie'pa tkōmi weshke Jesús ska'. E' kuekī ie' tsāka u tsābata jché\* ie'pa tō tā iduē émirakitō enaē e' a dōttsa iski. <sup>5</sup> Mik Jesús tō isuē tō mokī ie'pa erblē ie' mik, etā ie' iché ikirirke e' a:

—A alā, i sulu kōs wamblēbō, e' nuí olone be' kī.

<sup>6</sup> Erē s'wöbla'uk ttē dalöiēno wa wakpa welepa tulur ee, e'pa ibikeitsē: <sup>7</sup> “¿I kuekī wēm wí tō es? Skéköl ē a se' nuí oló'yarmi. I ché ie' tō e' wa ie' tso' Skéköl chök suluē.” <sup>8</sup> Erē i bikietsök ie'pa tso' e' suéwā Jesús tō bet. E' kuekī ie' tō ie'pa a ichakē:

—¿I kuekī a' tō ibikeitseke es? <sup>9</sup> Ye' tō s'kraulewā diō bua'wēmine as ishkōne, e' tā ¿wēs a' tō iklō'wēmi tō ye' ké a inuī olonuk ikī? <sup>10</sup> Ye' dör S'ditsō Alā, sú e' tō a' a ikkachē tō ye' wā kawō tā' ká' i' a nuí oló'yoie.

Etā ie' tō iché wēm kraulewā e' a:

<sup>11</sup> —Be' e' kōka, be' ká'la kōka tā be' yúne u a.

<sup>12</sup> Bet tā ie' e' kéka, ika'la kéka, tā imiá sulitane wēm. E' tō ie'pa kōs tkiwéwā tā ie'pa tō Skéköl kīkékā tajē tā ichérakitō:

—Kē se' wā íyí wíse sūle yēs.

*Jesús tō Leví kié ittökataie*  
(Mateo 9.9-13; Lucas 5.27-32)

<sup>13</sup> E' ukuökī tā Jesús miáne batsōri kkomik tā pé' e' dapa'wékā ie' ska' tā ie' tō ie'pa wöbla'weke. <sup>14</sup> Ie' domitkō tā ie' tō inuköl shtökwaq Roma wōkirpa a e' sué eköl tkēr ikaneblöke e' wé a. E' dör Leví dör Alfeo aladulaköl. Ie' tō iché ia:

—Be' shkō ye' tā ye' ttökataie.

Etā ie' e' kéka tā imiá Jesús tā.

<sup>15</sup> E' ukuökī Jesús tso' chkök Leví u a. Pé' shkōke tsākiē Jesús tā, e' kuekī inuköl shtökwaqpa ena pé' sulusipa skā tulurñak chkök ie' ena ittökatapa tā. <sup>16</sup> S'wöbla'uk

<sup>‡</sup> 1:32 Diwō e' dör eno diwō, e' kuekī s'kirirke kōs ké dē' ie'pa wā Jesús ska' ñiwe. Ie'pa ké a kawō tā' kaneblök eno diwō a. Ie'pa a tā íyí ö yile tsēmi e' dör kanē. E' kuekī ie'pa tō s'kirirke tsēmi Jesús ska' diwō miwátke e' ukuökī, ekkē eno diwō erkerō e' kuekī. \* 2:4 u tsābata jché: Ie'pa u tsābata dör kkuēie, e' kī ie'pa shkōke.

tté dalöiëno wa wakpa wëlepa dör fariseowakpa. Mik e'pa wele tö Jesús sué tö ichkôke pë' esepa ta, etä ie'pa tö ichaké ittökatapa a:

—ÿiök a' wöbla'ukwak chkôke inuköl shtökwaqpa ta ena pë' sulusipa skä ta?

<sup>17</sup>Jesús tö ittésä tö ichéitö iarak:

—Wépa kë kirirku' esepa kë kï s'kapeyökwaq kiane, erë wépa kirirke esepa kï ikiane. Ye' kë dë'bitu wépa e' ttsö tö ie'pa serke yësyësë esepa kiök. Ye' dë'bitu pë' sulusipa kiök.

*ÿ kueki Jesús ttökatapa kë batsötä'*

*(Mateo 9.14-17; Lucas 5.33-39)*

<sup>18</sup>Etökicha ta Juan S'wöskuökwaq ttökatapa ena fariseowakpa tso' batsök, etä pë' wëlepa de Jesús ska' ta ichakéarakitö ie' a:

—Juan S'wöskuökwaq ttökatapa ena fariseowakpa klépa batsöke. ÿi kueki be' ttökatapa kë batsö?

<sup>19</sup>Jesús tö ie'pa iüté:

—Mik s'kiule ulabatsë kéwö tkö'uk, etä çwes ie'pa batsömi wëm ulabatske e' tso'ia ie'pa ta' dalewa? Ie' tso'ia ie'pa ta, e' dalewa ie'pa kë batsöpa. <sup>20</sup>Erë ikéwö döraë etä ie' mi'datsër ie'pa yöki. E' je' ta ie'pa batsöraë.

<sup>21</sup>“Kë yi tö datsi' këchke wöyuepawa datsi'tak pa'alï wa, datsi'tak pa'alï wöklöneka, e' tö datsi' këchkela shukuëë ta ikï jché tajë. <sup>22</sup>Nies kë yi tö vino pa'alï tepaka iyiwak kkuölit yöule ibloie ese këchke a. Itékasö es, e' ta mik ibacha'nebitu, etä ikkuölit jchémiitö. Es vino ena ikkuölit weirwami éme. E' kueki vino pa'alï tekeka ikkuölit pa'alï a.”

*Jesús ttökatapa tö trigowö butsé eno diwö*

a

*(Mateo 12.1-8; Lucas 6.1-5)*

<sup>23</sup>Etökicha ta eno diwö a, Jesús dami trigo shua ta ittökatapa tö trigowö butsémi ishkörämi e' dalewa katë. <sup>24</sup>Fariseowakpa tö ie' a ichaké:

—Sa' ttö ttsö, ÿi kueki be' ttökatapa tso' i kë kéwö ta' wë eno diwö a ese uk?

<sup>25</sup>Erë ie' iüté:

—Etökicha ká iaiaë mik David ena iklépa du' bli wa ta kë ie'pa wa i dami në, etä i o' ie' tö çe' kë aritsule a' wa Skëköl yëkkuö kï?

<sup>26</sup>Mik Abiatar dör sacerdotë kibi, e' kéwö ska' ta David dewä Skëköl wé a ta pan meule Skëköl e' n' néitö ta nies iméitö iklépa a në. Sacerdotëpa ë a pan ese kéwö ta' në. Erë a' éna iane tö i o' David tö e' kë dör suluë Skëköl wöa.

<sup>27</sup>Ie' tö ikï ché:

—Eno diwö meneat s'ditsö kimoie, erë s'ditsö kë yöne eno diwö ë batseitsök. <sup>28</sup>E' kueki ye' dör S'ditsö Alä, e' wa kawö ta' ichoie tö i dör buaë ö i dör suluë wë eno diwö a.

### 3

*Wëm ulä siulewa e' pakë*

*(Mateo 12.9-14; Lucas 6.6-11)*

<sup>1</sup>Jesús skä dewäne judiowak në dapa'wo wë a, ta eë wëm tkër eköl ulä etëk siulewa.

<sup>2</sup>Ie'pa éna ie' kkatäk ilë kï, e' kueki ie'pa tso' ie' weblök tö wëm në' bua'wëmine ie' tö eno diwö a. <sup>3</sup>Ie' tö iché wëm ulä siulewa e' a:

—Be' e' kökä ta be' e' duöser ië silitane wöshaë.

<sup>4</sup>Ie' tö ie'pa a iché:

—ÿi kéwö ta' se' a wë eno diwö a: i buaë ö i suluë? çS'tsätök ö s'ttökwa?

Erë ie'pa siwa'bléwa ie' yöki. <sup>5</sup>Ie' tö ie'pa weblë kësik wa. Ie'pa er darërë e' tö ie' eriwë. Ie' iché wëm a:

—Be' ulä shulöö.

Ta ie' ulä shuléë ta ibuanene. <sup>6</sup>Etä fariseowakpa ponemi, e' bet ta ie'pa në dapa'wëka Herodes klépa ta ileritsök Jesús ttowaie.

*Tajë pë' tso' batsöri kkömik*

<sup>7</sup>Etä Jesús miä ittökatapa ta batsöri kkömik ta tajë Galilea wakpa miyal ie' ta. <sup>8</sup>Nies pë' tso' tajë eë datse Jerusalén ena Judea ká malepa a. Nies ie'pa datse Idumea ena Jordän wishët ena ká wë Tiro ena Sidón atë eë. Ie'pa tö i kos weke Jesús tö e' tté ttsë' e' kueki ie'pa de iweblök. <sup>9-10</sup>S'kirirke tajë bua'wëtke Jesús tö, e' kueki imalepa tajë e' uyökeka ie' kï ikökwa. E' kueki ie' tö iché ittökatapa a tö kanö tsübitu tértke dö' ie'pa tö ye' tuëwä darërë.

<sup>11</sup>Mik wépa a wimblupa sulusi tso' esepa tö ie' sué, etä ie'pa e' tullélur kuchë kï ie' wöa ta iarkerak:

—jBe' dör Skëköl Alä!

<sup>12</sup>Erë ie' tö ie'pa a iché kësik wa:

—jKë ye' tté pparkä!

*Jesús tö ittekölpä tsä dabom eyök kï böi e'pa shushtë*

*(Mateo 10.1-4; Lucas 6.12-16)*

<sup>13</sup>E' ukuöki ta Jesús miä kabata a. Etä wépa kiane ie' kï kië, e'pa kiéitö ta ibiterak ie' ska'. <sup>14</sup>Ie' tö ie'pa shushtë dabom eyök kï böi shkök ie' ta ena patkëmi ie' tté pakök. E'pa kië mékaitö ittekölpä tsä. <sup>15</sup>Ie'pa a diché méitö aknama trë'ukyal. <sup>16</sup>Ie'pa kië i' es: Simón, e' kië mékaitö Pedro; <sup>17</sup>Santiago ena iël Juan, e'pa dör Zebedeo aladulakölpä, e'pa kië skä mékaitö Boanerges (kië e' wä kiane chë “wépa dör wës alä es”); <sup>18</sup>Andrés, Felipe, Bartolomé, Mateo, Tomás ena Santiago dör Alfeo alä; ena Tadeo, Simón Celote, <sup>19</sup>ena Judas Iscariote tö Jesús wömekettsä aishkuö ta ibölöpä a e'.

*Jesús ena Beelzebü*

*(Mateo 12.22-32; Lucas 11.14-23; 12.10)*

<sup>20</sup>E' ukuöki ta Jesús dewä u a ittökatapa ta. Etä tajë pë' në dapa'wëkane kë wa ie'pa chko ekkë. <sup>21</sup>Mik Jesús yamipa ëkka wa

ijchēnewā tō wēs ie' tso', eṭā ie'pa de itsukmi iyērke tō ie' alīnekā e' kueḱi.

<sup>22</sup> Nies s'wōbla'uk ttē dalōiēno wa wakpa datse Jerusalén e'pa tō Jesús ché i' es: "Beelzebū dōr bē e' tō wēm wī éna kā chōwēwa, e' diché wa ie' tō aknama trē'wekeyal."

<sup>23</sup> Eṭā Jesús ikiéttarak tā ikleéitō iarak i' es: "¿Wēs Satanás e' trē'ushkarmi? <sup>24</sup> S'serke kā etkē kī e' nī blabatsélor nīppōk nīta, kē wōklōr, e' tā ie'pa wākpa mir wa'k éme.

<sup>25</sup> Nies nī yamipa e' kékā nīppōk nīta, kē wōklōr, e' tā ie'pa mir wa'k éme. <sup>26</sup> Es nīes Satanás klépa mú nī blabatsélor nīppōk nīta, e' tā idiché wōarwami tā ierdawarak.

<sup>27</sup> "Kē yi mī'pawā wēm diché tajē ese u a ie' iyi ekiblōk kam ie' tō iwák maṭwā e' yōki. Es éme iyyi ekiblērmi.

<sup>28</sup> "Mokī ye' tō a' a' iché tō i sulu kōs wambleke a' tō, nīes Skékōl cheke a' tō sulu kōs e' nuī olo'yēmītō a' kī. <sup>29</sup> Erē yi isie tō Wikōl Batse'r ché suluē, ese kē kī inuī olorpa, itso' ikī kēkraē."

<sup>30</sup> Ie'pa iyē' tō wimblu sulusi tō ie' éna kā chōwēwa e' kueḱi Jesús tō e' ché ie'pa a.

*Jesús mi ena iēlpa de iweblōk  
(Mateo 12.46-50; Lucas 8.19-21)*

<sup>31</sup> E' ukuōkī tā Jesús mi ena iēlpa ena ikutapa e'pa debitū ie' yulōk, erē ie'pa kē dē'wā weshkē. Ie'pa tō ikiōk patkē. <sup>32</sup> Pē' tulur ie' pamik e'pa tō iché ia:

—Be' mī ena be' ēlpa ena be' kutapa e'pa shkō be' weblōk.

<sup>33</sup> Ie' iūtē:

—¿Yi dōr ye' mī ena ye' ēlpa ena ye' kutapa?

<sup>34-35</sup> Wēpa tulur ie' pamik e' suéitō ēk tā ichéitō:

—Yi isie tō i kiane Skékōl kī ese wé, ese dōr wēs ye' ēl ena ye' kutā ena ye' mī es. E' kueḱi ie'pa ikkēpa dōr wēs ye' mī ena ye' ēlpa ena ye' kutapa es.

## 4

*Tē kuatkōkwak ttē  
(Mateo 13.1-9; Lucas 8.4-8)*

<sup>1</sup> Etōkicha tā Jesús s'wōbla'wémítke batsōri kkōmik. Pē' dapane tajē ipamik, e' kueḱi ie' e' iéka kanō tkērki tsīnet ese etō a. Eē ie' e' tkēsēr ie'pa wōbla'uk. Ie'pa kōs aṭē batsōri kkōmik ie' ttō ttsōk. <sup>2</sup> Eē ie' tō ttē tsākiē kleē ie'pa a iwōbla'woie, e' et dōr i' es: <sup>3</sup> "A' tō ittsō. Etōkicha tā wēm ekōl mīā tē kuatkōk ppé ululu éme\* <sup>4</sup> Mik ie' tso' iwō ppōk, eṭā ditsōwō wele anewa nīalā ska' tā dū debitū tō ikatēwa. <sup>5</sup> Ditsōwō wele anewa áklo a wé iyōk kē tā' tajē ese ska'. Iyōk kē tā' tajē, e' kueḱi bet tā' itskine. <sup>6</sup> Erē kē iwī kicha tā' tajē, e' kueḱi mik dība anekā ikī, eṭā isinewā. <sup>7</sup> Ditsōwō wele anewa dika'chka

shuā. Dika'chka ena ditsōwō talane nīta, erē dika'chka e' alékā ikī, kē wōne. <sup>8</sup> Erē ditsōwō wele ane iyōk bua'buā kī ese tskine talane wōne buaē. Wele wōne dōkā dabom mañayōk (30) elka elka, wele dabom teryōk (60), wele cien eyōk (100)."

<sup>9</sup> Eṭā ie' tō ie'pa a' iché: "iA' éna ye' ttō ttsak, e'ma ikukueblō bua'ie!"

*I' kueḱi Jesús tō s'wōbla'weke kleaule  
(Mateo 13.10-17; Lucas 8.9-10)*

<sup>10</sup> Mik Jesús aṭē dur ekōrla, eṭā ittōkatapa dabom eyōk kī bōl ena iklépa welepa skā de ie' ska' tā ichakérakitō ia:

—Ttē wā kleébō, ¿ima e' wā dōr?

<sup>11</sup> Ie' ie'pa iūtē:

—"I blúie Skékōl tso' e' ttē bléulewā, e' kēwō meneat a' a iwā jchēnoie. Erē pē' tso' tajē kē éna ye' ttē klō'wak, esepa a ye' ikleeke <sup>12</sup> as ie'pa tō iweblō je', erē kē ie'pa a iwā wēr, nīes as ie'pa tō ittsō je', erē kē ie'pa a iwā ar as kē ie'pa er mane'ū tā inuī kē olor ie'pa kī."†

*Tē kuatkōkwak ttē e' wā paké Jesús tō  
(Mateo 13.18-23; Lucas 8.11-15)*

<sup>13</sup> Eṭā ie' tō ie'pa a' iché: "Ttē kleéyō nē' wā kē ane a' éna, e' tā ¿wes a' éna imalepa wā armi? <sup>14</sup> Wé tō ditsōwō kuatké, e' dōr wé tō Skékōl ttē pakeke ese. <sup>15</sup> Pē' welepa tso' e'pa tā itkōmi wēs ditsōwō arwa nīalā kī es. Esepa tō Skékōl ttē ttsé erē bet Satanás de iska' tā Skékōl ttē yéttsa ier a. <sup>16</sup> Welepa skā tā itkōmi wēs ditsōwō arwa áklo a es. Esepa tō Skékōl ttē ttsé tā ikló'wérakitō ttsé'ne buaē wa. <sup>17</sup> Erē ie'pa kē wī kicha tā' tajē, e' kueḱi ie'pa tō ikló'wé ekuōlō ē. Mik ie'pa weine-mítke Skékōl ttē kueḱi, eṭā ie'pa anemine bet. <sup>18</sup> Welepa skā tā itkōmi wēs ditsōwō arwa dika'chka shuā es. Esepa tō Skékōl ttē ttsé, <sup>19</sup> erē ie'pa tō iyi tso' ká i' kī ese bīkeitseke kibīie. Ie'pa er me'rie inukōl kī ena i skā tso' ká ikī tō s'ttsé'weke buaē ese kī. Ese kōs tō Skékōl ttē kui'wéwā ie'pa er a tā kē idé'ttsā buaē wēs ikiane es. <sup>20</sup> Erē welepa skā tā itkōmi wēs ditsōwō arwa iyōk bua'buā kī es. Esepa tō Skékōl ttē ttsé tā ikló'wé tā iwā dettsā buaē wēs ikiane es. Ie'pa dōr wēs iyi kuā wōr buaē es. Wele wōne dōkā cien eyōk (100), wele dabom teryōk (60), wele dabom mañayōk (30)."

*Bō'wō ttē  
(Lucas 8.16-18)*

<sup>21</sup> Eṭā ie' tō iché iarak: "Kē yi tō bō'wō tskepaka tā ibléwaitō kalkuō dikīā ō kā' dikīā. E' skéie itkekekaitō kákke kā nī'woie. <sup>22</sup> Es nīes kē i ku' bléulewā kē jchenukwā aishkuō tā. Ese kōs kkayērdaē. <sup>23</sup> Yi éna ye' ttō ttsak, e'ma ikukueblō bua'ie!"

<sup>24-25</sup> Nīes ichéitō: "Yi e' yuak buaē ye' ttē wa, ese a' ikī meraēyō as iéna iwā ar

\* 4:3 tē kuatkōk ppé ululu: Ie'pa wōblar tē kuatkōk wō ppélur tē kōs e' kī. † 4:12 Isaías 6.9-10

buaé. Eré yi kě e' yuak ye' ttè wa, ese yöki ì bikeitséitò tò ane ie' éna, ese qos yérdattsane. E' kuékj ì cheke ye' tò a' a' e' kukueblö. A' tò iwé es, e' ta' a' éna iarmi buaé, ñies Skéköl tò a' kimerae' as ikj ar a' éna."

*Íyi kuatké tté*

<sup>26</sup> Ñies Jesús tò iché: "Ì blúie Skéköl tso' e' ta' itkóke wés itkó iyiwö kuatké wém eköl tò ese ta' es. Ie' tò ikuatké të kĭ <sup>27</sup> ta' iméat bĕrĕ. Ká bit ekkĕ ie' kapökewa nañewe, ñiwe ta' ie' t'ırke ta' íyi kuatkéitò e' tskine, talane eré ie' kĕ éna iane tò wés itskine wés ita-lane. <sup>28</sup> Íyök ĕ tò itskeke. Kewe ikua tskine, e' ukuökĭ ta' iwörkuane, e' ukuökĭ ta' iwöne. <sup>29</sup> Mik ikĕwö de shtë, etá wém míá ishtëkká."

*Mostaza wö tté (Mateo 13.31-32; Lucas 13.18-19)*

<sup>30</sup> Ñies Jesús tò iché: "Ì blúie Skéköl tso' çwes e' dör? Çtté wé wa ye' tò ikleëmi? <sup>31</sup> E' dör wés mostaza wö tkĕsö es. E' wö dör tsirlala iyiwö ulitane dikĭa. <sup>32</sup> Eré mik ikuatkĕnewa, etá italar íyi kuá tsitsir ulitane tsata. E' ulá döká wĭ'wĭĕ, e' tsaká dù u yuöke." <sup>33</sup> Es Jesús tò ie'pa a' iklee' tajĕ wés tté i' es dö wé ie'pa éna iane ekkĕ. <sup>34</sup> Ie' kĕ wá ì pakane ie'pa a' kĕ kleaule. Eré iwá qos pakekeneitò ittökatapa a' bánet kĕ kleaule.

*Siwa' tajĕ e' wöklö'wé Jesús tò (Mateo 8.23-27; Lucas 8.22-25)*

<sup>35</sup> E' tsálĭ mik ká tuine, etá Jesús tò iché ittökatapa a':  
—Mishka batsöri wĭshĕt.  
<sup>36</sup> Pĕ' tso' tajĕ e'pa méarakitò ta' ie' iékarak kanò a' Jesús tso' e' a' ta' imíyal. Kanò ská mirwá ie'pa ta' tseé. <sup>37</sup> E' bet ta' siwa' bitsĭneká tajĕ tò di' uyéká tajĕ e' tò kanò wá iekeká.

<sup>38</sup> Eré ie' kapöme'r kanò ñak a' wökir kata kĭ, eé ittökatapa ie' t'iwéka ta' iché ia:  
—jA s'wöbla'ukwak! Çse' duökeler e' kĕ kĭ be' tkine?  
<sup>39</sup> Etá ie' e' kĕká tò siwa' uñĕ ta' iché di' a':  
—jBe' e' shtëwá bĕr!

Etá siwa' wöklöne di' wöklöne míane alamié. <sup>40</sup> Etá ie' tò ittökatapa a' iché:  
—Çĭ kuékĭ a' suane sekkĕ? Çkam a' erblö ye' mik?

<sup>41</sup> Ie'pa kĭ tkinewa' tajĕ ta' iñi chakéká:  
—Çyi dör wém wĭ? jE' ttö dalöieke siwa' tò di' töl!

**5**

*Wimblu sulusi trĕ'wéyal Jesús tò (Mateo 8.28-34; Lucas 8.26-29)*

<sup>1</sup> Ie'pa demi batsöri wĭshĕt ká kié Gerasa \* eé. <sup>2</sup> Mik Jesús e' yéttsa kanò a, etá wém eköl a' wimblu sulusi tso' e' yéttsa de Jesús ska'. <sup>3</sup> Wém e' serke pö kĕ a. Kĕ imonukwa

tabechka kichaie wa ì wa. <sup>4</sup> Tseé imonere iulá a' ena iklö a' tabechka kichaie wa eré ibatséloritö. Kĕ yi diché ta' wĕ' iwöklö'woie.

<sup>5</sup> Ñĭĕ nañĕĕ ie' shkóke pö a' ena kabata a' arke tajĕ, ñies ie' e' shka'uke ák wa. <sup>6</sup> Eré mik ie' tò Jesús sué kamié, etá ie' tũnebitu e' tkĕser kuchĕ kĭ Jesús wö shaĕ <sup>7</sup> ta' ichéitò ia aneule:

—jA Jesús, be' dör Skéköl dör íyi ulitane tsata e' Alá! Çĭók be' de ye' tsiriuk? jYe' kköchöke be' a' Skéköl wörkĭ tò kĕ ye' we'ikar!

<sup>8</sup> Jesús tò ie' a' ichétke: "jA wimblu sulusi, wém se' öwa!" E' kuékĭ ie' tò iché Jesús a' es.

<sup>9</sup> Etá Jesús tò ie' a' ichaké:

—Çĭma be' kié?

Ie' iüté:

—Ye' kié Tajĕ Wakpa, sa' dör tajĕ e' kuékĭ.

<sup>10</sup> Etá ikköchöke tajĕ Jesús a': "Kĕ sa' patkar kamié." <sup>11</sup> Eé tsĭnet kabata kuli' a' tajĕ köchi iĕter chkök. <sup>12</sup> Etá aknama kköché ie' a':

—Sa' patkömi köchi a. Kawö mú sa' a' e' tiukwá ie'pa a.

<sup>13</sup> Etá ie' tò kawö mé ĩarak ta' wimblupa sulusi e' yélur wém e' a' ta' ie' tiéwarak köchi a. Köchi ekkĕpa döká mil böyök ulatök (2.000). Etá köchi poneká tũnemirak ká spĕ mik brutolonomi batsöri a' ta' eé iduolur.

<sup>14</sup> Köchi kkö'nukwakpa tkayalmi ta' ittĕ ppékarakitö ká e' wa'ne a. Tajĕ pĕ' de iwe-blök. <sup>15</sup> Mik ie'pa de Jesús ska' ta' wém a' aknama bak e' suĕrakitö. E' tkĕr datsi' iéne éna ká anene buaé, e' tò ie'pa suawé. <sup>16</sup> Wépa tò ì tka wém a' aknama bak e' ta' ena köchi ta' e' sué, e'pa tò ipakéne imalepa a. <sup>17</sup> Etá ie'pa kköché Jesús a': "Be' e' yöttsa ká i' a, be' yú bánet."

<sup>18</sup> Mik Jesús dene kanò a' ta' wém a' aknama bak, e' kköché ie' a': "Ye' shkakmi be' ta."

<sup>19</sup> Eré Jesús kĕ wá ikĕwö mĕne ie' a. Ie' iché ia:

—Be' yúne be' u a' be' yamipa ska'. Ì buaé wé Skéköl tò be' a' ena wés ie' tò be' sué er siarĕ wa, e' qos pakö ie'pa a.

<sup>20</sup> Etá wém míá ta' ì wé Jesús tò ie' a' e' pakĕitö ká tso' Decápolis e' wakpa a. Ie'pa qos tkinewa' ittök.

*Jesús tò Jairo alá busi shkĕ'wékane ñies alaköl bua'wĕneitö eköl*

*(Mateo 9.18-26; Lucas 8.40-56)*

<sup>21</sup> Mik Jesús dene kanò kĭ batsöri iöshĕt, etá batsöri kkömik tajĕ pĕ' e' dapa'wéka ie' ska'. <sup>22</sup> E' dalewa wém debitü eköl kié Jairo. E' dör judiowak ñi dapa'wö wé e' wökir eköl. Mik ie' tò Jesús sué, etá ie' e' téwá wöwakköt Jesús wörkĭ <sup>23</sup> ta' ikköché tajĕ ie' a':

—Ye' alá busi duökewaťke. Be' shkó ulá mukká ikj as iuuarne ta' iserne.

<sup>24</sup> Etá Jesús míá ie' ta. Tajĕ pĕ' dami Jesús ta' e' térdami ie' mik. <sup>25</sup> E' shua' alaköl dami e' du'mi alakölpa dué wá e' kĭ duas de

\* 5:1 Gerasa: Yĕkkuö kĕchke wĕle tò ká e' kié Gadara ö Gergasa. Mateo 8.28 şaú.

dabom eyök kî böc (12). <sup>26</sup> Tajê ie' weine s'kapeyökwa kpa ulà a ena i kôs tso' ie' wà e' ewéwaitö yës ie'pa kî, erë kè ibuanene, e' skéie imir wà'k ème. <sup>27-28</sup> Ie' wà Jesús tté ttséule e' kuëkj ie' ibikeitsé: "Jesús datsi' bata è kéwayö e' ta ye' buanene." E' kuëkj ie' e' skéwà Jesús tsj kker pè' shuà ta idatsi' kéwaitö. <sup>29</sup> E' bet ta ipè wöklöne ta ie' ittse e' kî tó ibuanene. <sup>30</sup> E' bet Jesús ittse tó ilè tka ie' diché wa, e' kuëkj ie' tó pè' tso' ipamik e' kôs sué èk ta ichakéitö ia:

—¿Yi tó ye' datsi' ké?

<sup>31</sup> Ittökatapa tó ie' a iché:

—¿Kè be' wa isune tó tajê ie'pa tãrdami be' mik? Ta wës be' tó ichaké: "¿Yi tó ye' ké?"

<sup>32</sup> Erë ie' tó wépa tso' ipamik e'pa kî weblé ia isuqie tó yi ie' ké. <sup>33</sup> Alaköl buanene e' painéka tajê suane wa. I tka ie' ta e' ane ie' éna, e' kuëkj ie' debitu e' tkéwà kuché kî Jesús wörkj. I kôs tka ie' ta e' chékaia yësyesé. <sup>34</sup> Età Jesús ie' a iché:

—A alà busi, be' erblé ye' mik, e' tó be' bua wéne. Be' yúne bèrè. Be' buanene.

<sup>35</sup> Ie' ttókeia alaköl ta e' dalewa welepa bité Jairo u a e'pa wà ibiyö de Jairo a ta ichéitorak:

—Be' alà busila blénewatke. ¿Iök s'wöbla'ukwak tsiriwèiabö?

<sup>36</sup> Erë i cheke ie'pa tó e' kè kî Jesús tkine. Ie' tó Jairo a iché:

—Kè be' tkinuk. Be' erblö ye' mik è.

<sup>37</sup> E' ukuökj ta ie' mía Jairo u a. Pedro ena Santiago ena Santiago èl kiè Juan e'pa è mí ie' wà, kè ie' wà yi skà mine e' ta. <sup>38</sup> Mik ie'pa demi Jairo u a, età tajê pè' dapaneka e' tröke juke tajê siarè. <sup>39</sup> Jesús dewà wëshke ta ichéitö ie'pa a:

—¿I tso' a' aláuk? ¿I kuëkj a' iuke? Busila kè du'wà, ikapöme'r è.

<sup>40</sup> Età ie'pa tó ie' wayué ena ijañeitsé, erë ie' tó ie'pa ké e' yökulur. Età alà yé ena imi ena wépa de ie' ta, e'pa è mí ie' wà e' ta úshu a wé alà nu me'rka eë. <sup>41</sup> Ie' tó iulà klö'wéwà ta ichéitö ia:

—Talíta kum. (ttè e' wà kiane chè: "A tayèla, ye' be' a iché, be' e' kóka.")

<sup>42</sup> E' bet ta busila e' e' duéka shkè'ka ta ishkémi. E' tó ie'pa tkiwéwà tajê. (Tayé e' kî duas tso' dabom eyök kî böc.) <sup>43</sup> Erë Jesús tó ie'pa a iché: "I tka i' e' kè char yi a." E' ukuökj ta ie' iché: "Alà sè tiö."

## 6

*Jesús dene Nazaret*

(Mateo 13.53-58; Lucas 4.16-30)

<sup>1</sup> E' ukuökj ta Jesús e' yétsa ká e' a mía ittökatapa ta iwák ká a. <sup>2</sup> Mik èno diwö de, età ie' tó s'wöbla'wémitke judiowak ñi dapa'wö wé a. Tajê pè' daparke eë. Mik ie'pa tó ie' tté ttsé, età itkirulune ta ñi chakérak:

—¿Wé ie' e' yué tté tajê wa? ¿Wes ie' ulà de tté buaè iskjé ese ska'? ¿Wes i kè or yi a ese wéitö? <sup>3</sup> ¿Ie' kè dör kaltak kanéukwak bak kanéblök jërö e'? ¿Ie' kè dör María alà? ¿Ie' kè dör Santiago, José, Judas ena Simón e'pa èl? ¿Ñies ie' kutapa kè serku' se' shuà?

E' kuëkj kè ie'pa erblène ie' mik. <sup>4</sup> Erë ie' tó iché iarak:

—Ká wa'ñe Skéköl tteköl dalöiërta', erë iwák ká kî ena iyamipa shuà ena iwák u a eë kè idalöiërta'.

<sup>5</sup> Eë iekkè ta i kè or yi a ese kè one ie' wa. Ie' ulà méka welepa kirirke esepa kî ta ibuanerak, erë e' kè dör tajê. <sup>6</sup> Ká e' wakpa kibiiepa kè erblène ie' mik, e' tó ie' tkiwéwà.

*Jesús tó ittökatapa patkemi s'wöbla'uk*  
(Mateo 10.5; Lucas 9.1-6)

E' ukuökj ta Jesús mía ká tsitsirpa tso' tsinet ese a s'wöbla'uk. <sup>7</sup> Ie' ttökatapa dabom eyök kî böc e'pa kiéitö ta ipatkémirak böc böc. Ie' kawö mé iarak wimblupa sulusi tré'woyal. <sup>8</sup> Ie' tó iché iarak:

—Kè i tsarmi, shko kéli e' è tsúmi. Sku' kè tsarmi, chkö kè tsarmi, inuköl kè tsarmi. <sup>9</sup> Klökkuö ena datsi' iömi, e' è mik a' mi'mi, erë datsi' kî kè tsarmi.

<sup>10</sup> Ñies ie' iché ia:

—Mik a' dewà u wele a, età a' e' tsuat eë dö mik a' míyal ká bánet ekké. <sup>11</sup> Ká wele wakpa kè wa a' kinéwà buaè ö kè kî a' kapaköke e' kiane ttsé, e' ta a' e' yölor eë ta kapo tso' a' klöttó mik e' ppöö. E' tó ie'pa a' ikkacheraè tó ie'pa dör Skéköl bolökpa.

<sup>12</sup> Età ittökatapa mía s'pattök i' es: "A' er mane'ú Skéköl a." <sup>13</sup> Ñies ie'pa tó aknama tré'wéyal tajê. Ñies tajê s'kirirke esepa kî ie'pa tó kiö té ta ibuanerak.

*Juan S'wöskuökwa kotéwa*  
(Mateo 14.1-12; Lucas 9.7-9)

<sup>14</sup> Età Jesús tté buneka ká wa'ñe, e' kuëkj itté ttsé ñies blu' kiè Herodes e' tó. Welepa tó icheke:

—Jesús dör Juan S'wöskuökwa shkenekane e', e' kuëkj ie' wà diché tso' i kè or yi a ese woie.

<sup>15</sup> Welepa skà tó icheke:

—Ie' dör Skéköl tteköl bak kiè Elías e' shkenekane.

Welepa skà tó icheke:

—Skéköl tteköl idir wës Skéköl ttekölpa ia'chki es.

<sup>16</sup> Erë tté ekké ttsé Herodes tó ta ichéitö:

—Ie' dör Juan kuli' tókök patké' ye' tó e' shkenekane.

<sup>17</sup> Herodes tó iché es ie' tó Juan S'wöskuökwa klö'ukwà patké' wötéwà s'wöto wé a Herodias kuëkj. Herodias dör Herodes èl kiè Felipe e' alaköl, erë Herodes sene'wà ie' ta. <sup>18</sup> Erë Juan tó iyé' Herodes a:

“Kê be' kawô ta' senuk be' ël alaköl ta'. E' wa be' tso' tte dalöiëno dalöseukwa.”

<sup>19-20</sup> E' kuekï Herodías uluneka Juan kï ta' ie' kï ikiane ttëwa. Erë Herodes wa ijcher tó Juan dör wëm yësyësë ena bats'e' ese, e' dalöiekeitö tajë, e' kuekï ikkô'nekeitö. Ie' tó Juan kapaköke e' ttseke er bua' wa, erë kê iëna iane i wëmiitö. Ie' tó Juan dalöieke es, e' kuekï Herodías kê a wës Juan or. <sup>21</sup> Erë mik Herodes tó iduëswö këwö tkö'weke, etä Herodías isuë wës iulä dömi Juan ska'. Herodes tó ikueblupa ena iñippökwa' wökirpa ena wëpa dalöier'ta' tajë serke Galilea esepa kiëttsä ikëwö tkö'uk. <sup>22</sup> Mik ie'pa tso' ikëwö tkö'uk, etä Herodías alä busi dewä ta' iklötë ie'pa wörki. E' wër buaë Herodes ena imalepa tso' chkök ie' ta', e'pa wa, ta' ie' iché tayë busi a:

—Ï kiane be' kï e' kiö ye' a ta' ye' tó be' a imeraë.

<sup>23</sup> Etä ie' tó iché ia' ttë mokï wa Skëköl wörki sulitane kukua:

—Ï kos kiëbö ña, e' mekeyö be' a. Ká kos wökirie ye' tso', e' kiö ña ta' e' merayö be' a shushaë.

<sup>24</sup> Etä tayë busi mía, ta' imi chakéitö:

—Ï kiëyö?

Ta' imi iutë:

—Juan S'wöskuökwak wökir kiö ia.

<sup>25</sup> Ie' mía'ne bet blu' tkër eë ta' iché ia:

—Ye' kï ikiane tó irö Juan S'wöskuökwak wökir tsübitu' ña kulë' a iwä kkachoie tó mokï ittëwarakitö.

<sup>26</sup> Etä blu' erianeka' tajë, erë ie' tó ittë métke s'kiule tso' e'pa kukua, e' kuekï kê ie' a ionuk wës. <sup>27</sup> E' kuekï bet ie' tó ñippök'wak patkëmi eköl Juan wökir tsuk. Etä iñippök'wak mía s'woto wé a ta' Juan kuli' téë, <sup>28</sup> ta' iwökir tsëbitu' kulë' a méitö tayë busi a, ta' tayë busi tó imé imi a.

<sup>29</sup> Mik Juan ttökatapa wa' ijchenewa' ta' ie'pa debitu' inü kökka tsëmi wötëwa.

*Pë' döka' mil skeyök e'pa tié Jesús tó*

(Mateo 14.13-21; Lucas 9.10-17; Juan 6.1-14)

<sup>30</sup> Mik Jesús ttekölpa tsä e'pa dene ie' ska', etä i kos wé ie'pa tó ena i kos wa ie'pa s'wöbla'wé e' pakërakitö ie' a. <sup>31</sup> Pë' datse tajë míyal iskë datsene kê wa ie'pa chkoia' ekkë, e' kuekï ie' iché ittökatapa a:

—Mishka enuk bänet wé kê yi ku' ese ska'.

<sup>32</sup> Etä ie'pa míyal bänet kanö kï wé kê yi serku' ese ska'. <sup>33</sup> Erë ie'pa míyal e' suë pé' tó tajë ñies pé' tó isuëwa tó ie'pa e' idir. Etä pé' kos serke eë e'pa míyal tuneule ipanuk wé ie'pa irirke eë demi kewe. <sup>34</sup> Mik Jesús e' yëttsä kanö a, etä pé' tso' tajë ipanuk e' suëitö. Ie'pa wër ie' wa wës obeja kê kkö'nukwak ta' es, e' kuekï ie'pa suëitö er siarë wa. Etä ie' e' kékä ie'pa wöbla'uk tte

kuä'kï kuä'kï tajë wa. <sup>35</sup> Ká detke tsälí ta', ittökatapa de ie' ska' ta' ichërakitö ie' a:

—Ká de tsälí, kê yi serku' ie'. <sup>36</sup> Ie'pa yuömi as ie'pa mi' pé' serke tsinet ena ká tso' tsinet ese ska' ilë ta'uk ñë.

<sup>37</sup> Erë ie' tó ie'pa iutë:

—Ie'pa tío a' tó.

Ie'pa iutë:

—ÏBe' kï kiane tó sa' mi' chké ta'uk ie'pa tioie? Chké ekkë tuëje inuköl kiane s'kaneblömi dö ká cien böyök e' ské ekkë.

<sup>38</sup> Ie' tó ie'pa a' ichakë:

—ÏKos a' wa pan tso'? A' yú iweblök.

Ie'pa dare iweblök ta' ichéitö ia:

—Pan tso' skel ena nima bö'tö.

<sup>39</sup> Etä ie' tó iché ie'pa a:

—Pë' kos kó e' tulöksër ta' tsi kï erule erule.

<sup>40</sup> Etä pé' e' tulësër cien eyök, welepa e' tulësër dabom skeyök. <sup>41</sup> E' ukuökï ta' ie' tó pan skel ena nima bö'tö e' klö'wé ta' iká suë ká jai a ta' wëstela chéitö Skëköl a. E' ukuökï ta' ie' tó pan ena nima blaté ta' iméitö ittökatapa a as ie'pa tó iwatiö pé' kos a. <sup>42</sup> Ie'pa ulitane chké de wë'. <sup>43</sup> Pan ena nima bata atë e' shtërakitö iëne döka' kköla dabom eyök kï bök. <sup>44</sup> Wëpa këchkepa chké esepa döka' mil skeyök (5.000).

*Jesús shkë di' kï*

(Mateo 14.22-27; Juan 6.16-21)

<sup>45</sup> E' ukuökï ta' Jesús tó iché ittökatapa a: “A' e' iökä kanö a, a' yúshkatke ye' yöki kewe batsöri wishët Betsaida kker.” Ie' tó iché pé' malepa a: “A' yú a' u a.” <sup>46</sup> E' ukuökï ta' ie' mía kabata a ttök S'yé ta'. <sup>47</sup> Ká tuine ta' kanö demi batsöri shushaë. Ie' e' tsëat ekörlä ká si kï. <sup>48</sup> Ie' tó isuë tó ie'pa kaneblöke darërë kanö patkoië siwa' bitsirke ie'pa kke wöiä e' kuekï. Ká ñirketke ta' ie' mía ie'pa ska' shkörämi di' kï. Ie' tkökemitke tsinet ie'pa o'mik. <sup>49-50</sup> Erë mik ie'pa isuë tó ie' shködatsë di' kï, etä ie'pa ibikeitsé tó wimblu idir, e' tó ie'pa tkiwéwa tajë ta' ianekararak. Erë bet ta' ie' iché ie'pa a:

—ÏA' er kuú! jkë a' suanuk! Ye' idir.

<sup>51</sup> Etä ie' e' iéka kanö a ta' siwa' wöklöne. Ie'pa tkiirilune tajë iweblök. <sup>52</sup> Ie'pa er dör daloie, e' kuekï Jesús tó pé' tajë dë' pan skel ë wa, e' wa kê dë'wa ie'pa er a. E' kuekï ie'pa tkiirilune tajë ekkë.

*Jesús tó s'kirirke bua'wé Genesaret*

(Mateo 14.34-36)

<sup>53</sup> Itkattsarak batsöri wishët demirak Genesaret ta' eë kanö muëwarakitö. <sup>54</sup> Ie'pa e' yélur kanö a ta' e' wöshä ta' pé' tó Jesús suëwa tó ie' idir. <sup>55</sup> Etä itunerak ká e' wa'ñe ibiyö chök. Mik pé' tó ittse, etä ie'pa tó s'kirirke tsëmi wé ittserakitö tó Jesús tso' eë. <sup>56</sup> Ká wa'ñe wé ie' mir, wé s'tso' tajë ö bërëbërë, etä pé' tó s'kirikepa tulekesër ñalä shaë ta' ikköchökerak ie' a tó ie'pa a' idatsi'



bata ě mú kèwā. S'kirirke kōs tō iké, ešepa buanene.

7

Ī tō se' ia'wēmī ñáie  
(Mateo 15.1-20)

1 Fariseowakpa ena s'wōbla'uk ttē dalōiēno wa wakpa welepa datšē Jerusalén e'pa debitū Jesús ska'. 2 Mik ie'pa tō isuē tō Jesús ttōkatapa welepa chköke ulā kē pakōule, eṭā e' kī ie'pa tō icheke suluē. 3 (Fariseowakpa ena judiowak malepa kōs tō ie'pa yēpa bak e' ser klō'wē darērē. E' kuēkī kē ichkōtā rak kē ulā pakōule wēs ie'pa ā imeneat es. 4 Mik ie'pa dare chkwō ṭauk, eṭā kē ichkōtā wa kam iulā pakōr e' yōkī. Es ie'pa wā īyi ese skā tso' tajē dalōiēno. Nies tka', kulē', ū, ka' ekkēpa kōs pakueke ie'pa tō.) 5 E' kuēkī fariseowakpa ena s'wōbla'uk ttē dalōiēno wa wakpa tō Jesús ā ichakē:

—Ķī kuēkī be' ttōkatapa kē tō se' yēpa bak e' ser e' ttē dalōiē? Ķōk ichkōrak ñā ulē wa?

6 Ie' tō ie'pa iūtē:

—Buaē Isaiās tō a' e' ō sulu e'pa yē' mik ie' tō iyē':

'Skēkōl tō ichē: Pē' ikkēpa tō ye' dalōiē kōd ě wa,

erē ie'pa er tso' kamiē ye' yōkī.

7 ě ichōkle ie'pa mi'ke ye' wē ā ye' dalōiōk.

Ttē wa ie'pa s'wōbla'weke e' dōr s'ditsō ttē dalōiēno ě.\*

Es Isaiās tō iyē'at.

8 A' tō Skēkōl ttē watēttsā s'ditsō ser e' ttē dalōiēno.

9 Nies ie' ichē iarak:

—Skēkōl ttē dalōiēno e' meāt a' tō bánet a' wākpa ser e' ttē dalōiēno. 10 Moisés tō iyē': 'A' yē ena a' mi e'pa dalōiō.'† Nies ie' tō iyē'at: 'Yi tō iyē ō imi chē suluē ese wāk wōmerdattsa ttēwā.'‡ 11 Erē a' icheke tō se' ā iyērmi s'yē ā ō s'mì ā i' es: 'Ī kōs tso' ye' wā, e' dōr corbán' (e' wā kiane chē tō imeulettsā Skēkōl āŠ). E' kuēkī kē ye' ā a' kīmenuk i wa. 12 Nies a' tō icheke tō yi isie e' chē, ese kē kawōtāīā iyē ō imi kīmuk. 13 Es a' wākpa ser e' ttē wa a' tō s'yueke, e' iūtē wa a' tō Skēkōl ttē dalōiēno e' dalōšewekewā. Ī sulu ese skā wambleke a' tō tajē.

14 E' ukuōkī ṭā ie' tō pē' tso' eē e'pa kiē ṭā ie' ichē iarak:

—A' ulitane tō ye' ttō ttsō, iwā anū a' éna. 15-16 Ī ñeke a' tō e' kē tō a' ia'wēpa ñáie Skēkōl wōā. Erē i sulu wambleke a' tō tskirke a' er ā ese je' tō a' ia'wērāē ñáie.\*

17 Mik ie' tō pē' meāt dewā wēshkē, eṭā ittōkatapa tō ikleē ie' tō e' wā chakē ie' ā. 18 Ie' tō ie'pa iūtē:

—Ķ Nies a' kē éna iwā ane? Ķ A' kē éna iane tō i kōs ñekewasō e' kē tō s'ia'wēpa ñáie?

19 Ī kōs ñekewasō e' kē mi'ku'wā s'er ā, e' mi'kewā s'ñawi ā e' ukuōkī ṭā iwekēttsasō. E' kuēkī e' kē tō s'ia'wēpa ñáie.

(Ttē e' wa ie' kī ikiane chē tō chkē ulitane dōr batse'r.) 20 Nies ichēitō:

—Ī sulu wambleke a' tō tskirke a' er ā ese je' tō a' ia'wērāē ñáie. 21 Ī sulu bikeitseke a' tō, trē, akblē, s'ttēwā, 22 senewābak dalōšewēwā, o'ka īyi kkechē, i kōs sulu wamble, s'malepa wōyūē, s'malepa wōrieikē, ukyēne, ñi chē suluē, e' ttsēka, i kōs dōr yēsýēsē ese watēttsā, 23 īyi ese kōs tskirke a' er ā e' tō a' ia'wērāē ñáie.

Tayē ekōl kē dōr judiowak e' erblē Jesús mik

(Mateo 15.21-28)

24 E' ukuōkī ṭā Jesús miā ká kiē Tiro e' kker. Eē ie' e' tsēat yile ska'. Ie' kē kī ikiane tō yi wā ijcherwā tō ie' tso' e' er; kē kē ie' ā e' blēne.

25 E' bet busila ekōl ā wimblu sulusi tso', e' mī wā ijchenewā ṭā imiā ṭā ie' tkēwā kuchē kī ie' wōrkī. 26 Alakōl e' kē dōr judiowak, e' dōr ká kiē Sirofenicia e' wak. Eṭā ikkōché ie' wōā:

—Aknama tso' ye' alā busi ā e' trē'ušhkar.

27 Erē ie' tō ichē iā:

—Kē idōr buaē ala'rīa chkē yēttsā mē chichi ā. E' kuēkī ās ye' ala'r chkō kēwe.

28 Erē tayē tō ie' iūtē:

—A kēkēpa, e' yēne; erē s'ala'r chköke e' kamulē darke jskī ese ñeke chichi tō.

29 Jesús tō ie' ā ichē:

—Buaē be' iūtē, e' kuēkī be' yūne bērē. Aknama trēneshkartke be' alā busila ā.

30 Mik alakōl e' demine u ā, eṭā ilā busila kuēitō ká kī. Aknama kē ku'īā ie' ā.

Wēm ekōl kukuō kē watsēr e' bua'wē Jesús tō

31 Jesús e' yēttsā Tiro tkami Sidón demi Galilea batsōri Decápolis kker. 32 Eē pē' wā wēm debitū ekōl ie' ska' e' kē kukuō watsēr ena kē tto buaē. Ie'pa tō ikiē Jesús ā: "be' ulā múkā iki ās ibuarne." 33 Jesús wā imitsēr bánet wē kē yi ku' eē, ṭā iulatska tiēwā wēm kirirke e' kukuōuk bōk ā ṭā iwiri wa iku' kéwā. 34 E' ukuōkī ṭā ká suēitō ká jai ā, isiwa' tkēkā ṭā ichēitō wēm ā:

"Ķefatá!" (e' wā kiane chē ie'pa ttō wa: "ĶKukuō shūbunú!")

35 E' bet ṭā wēm kukuō ena ittō buanene ṭā ittēkā buaē. 36 Jesús tō ichē iarak tō kē ichar yi ā. Erē kōs e' chē ie' tō ie'pa ā, e'

\* 7:7 Isaiās 29.13 † 7:10 Éxodo 21.17 ‡ 7:10 Levítiko 20.9 § 7:11 meuletke Skēkōl ā: Ie'pa tō ichē es, erē ie'pa ulā ā itso'īā e' wakanewēmī ie'pa tō wēs ie'pa kī ikiane es. \* 7:15-16 Yēkkuō kēchke wele versículo 16 kī kuōtkéka, e' tō ichē: Ķ A' éna ye' ttō ttsak, e' ma ikukeublō bua'ie!

tsaṭa ie'pa tō ikí chekeia. <sup>37</sup> Ie'pa tkirilune tajē iweblök, ta ichérakitō, “jì kos weke ie' tō buaé dō s'kukuō kē watsēr ese bua'wéitō ta iwattsēne buaē, ñies s'me' bua'wéitō ta ittēkane buaé!”

**8**

*Pē' dōka mil tkēyök e'pa tié Jesús tō (Mateo 15.32-39)*

<sup>1</sup> Etōkicha ta pē' e' dapa'wēne tajē Jesús ska', e'pa kē wā i ku' ñē. Ta ie' tō ittōkatapa kié ta ichéitō ie'pa a:

<sup>2</sup> —Siārē ye' wa pē' ikkēpa wēr. Ie'pa tso' ye' ta e' kī ká de mañat ta kē ie'pa wā i ku' ñē. <sup>3</sup> Welepa datse kamiē. E' kuēkī dō' ye' tō ipatkéminerak u a kē chkaule ta isiwa'arwamirak ñala kī.

<sup>4</sup> Etā ittōkatapa ie' iüté:  
—Erē ži wa se' tō ie'pa tiēmi ká i'se a wé kē yi serku' ee?

<sup>5</sup> Ie' tō ie'pa a ichaké:  
—Žkos a' wā pan tso'?  
Ie'pa iüté,  
—Kul (7).

<sup>6</sup> Etā ie' tō pē' kē e' tulökser iski ta pan kul klō'wéitō ta wéstela chéitō Skéköl a ta iblatéitō mé ittōkatapa a watiē pē' a, etā es ie'pa tō iwé. <sup>7</sup> Ñies nima tsitsirla tso'arak iwa elkela e' kī wéstela chéitō Skéköl a ta ittōkatapa patkéitō iwatiök. <sup>8</sup> Pē' ulitane chké de wē' ta chké bata aṭe e' shtérakitō iēne dōka kkö kul. <sup>9</sup> Ichkérak e'pa dōka mil tkēyök (4.000) ulatök. E' ukuökj ta Jesús tō ie'pa yuémine <sup>10</sup> ta ie' e' iéka kanō a ittōkatapa ta míyal ká kié Dalmanuta ee.

*Fariseowakpa tō i kē or yi a ese uk kē sué (Mateo 16.1-4; Lucas 12.54-56)*

<sup>11</sup> Fariseowakpa debitu Jesús ska' ta ittémirak ie' ta kēsik wa. Ie'pa éna ie' tsaiak, e' kuēkī ie'pa tō ie' a ikié tō i kē or yi a ese wéitō iwa kkachoié tō mokj ie' patkē'bitu Skéköl tō. <sup>12</sup> Jesús siwa' tkéka iskié ta ichéitō:

—Ži kuēkī i kē or yi a ese kieke a' tō iwa kkachoié tō yi dör ye'? Mokj yō a' a iché tō ese kē kkayērpa a' a.

<sup>13</sup> Etā ie' tō ie'pa méat ta ie' e' iéka kanō a ta imía batsöri wišet.

*Fariseowakpa pan wölöwoka e' paké (Mateo 16.5-12)*

<sup>14</sup> Etā Jesús ttōkatapa éna ilē chowa tsēmi ñē. Pan etkē mirak iwa e' ta kanō a. <sup>15</sup> Jesús iché iarak:

—jA' tso' wōsh wa! A' e' kkō'nú fariseowakpa pan wölöwoka e' yöki. Ñies a' e' kkō'nú Herodes pan wölöwoka e' yöki.

<sup>16</sup> Ittōkatapa iché ñi a:  
—jKē se' wā i ta' ñē! <sup>17</sup> Jesús wā ijchēnewa, ta ie' iché iarak:

—Ži kuēkī a' tso' ichök ñi a tō a' kē wā i ta' ñē? Žkam a' éna iwa ar? Žkam a' wa

iwa jcherwa? ŽA' er darērē dō ekké? <sup>18</sup> A' wōbla ta' že' kē wawēr? A' kukuōña ta' že' kē watsēr? ŽA' kē éna ianeia? <sup>19</sup> Mik ye' tō pan skel wadé' wēpa dōka mil skeyök (5.000) ekké a, etā žkkō bik ibata kit a' tō?

Ie'pa iüté:  
—Dabom eyök kī bök (12).

<sup>20</sup> —Ñies mik ye' tō pan kul (7) wadé' wēpa dōka mil tkēyök (4.000) ekké a, etā žkkō bik wā ié' a' tō ibata wa?

Ie'pa iüté:  
—Kul (7).

<sup>21</sup> Etā ie' iché iarak:  
—Žkam a' éna iwa ar?

*S'wōbla kē wawēr eköl e' bua'wēne Jesús tō*

<sup>22</sup> E' ukuökj ta idemirak Betsaida ta wēm wōbla kē wawēr ese debitu eköl pē' wā Jesús a ta ikköchökerak ie' a tō ikö ulā wa as ibuarne. <sup>23</sup> Etā ie' tō iklö'wéwā iulā a ta iyéttsaitō bánet. Ee ie' tō iwōbla bök nuwéka wiri wa ta iulā méka iki ta ichakéitō, “žBe' wōbla wawēne?” <sup>24</sup> Etā wēm tō ká weblé ta iché:

—Pē' suékeyō erē ye' wa iwēr wēsua kal shkōke sué.

<sup>25</sup> Etā Jesús ulā mékane iwōbla kī ta wēm tō ká sué krereé ta iwōbla wawēnene buaē. Íyi ulitane suéitō buaē. <sup>26</sup> Etā Jesús tō ipatkémine iu a ta iché ia:

—Kē be' mi'itkō pē' shuā.

*Pedro tō iché tō Jesús dör wé pairine'bitu idi' wa s'blúie e'*

*(Mateo 16.13-20; Lucas 9.18-21)*

<sup>27</sup> E' ukuökj ta Jesús ena ittōkatapa míyal ká tso' tseé aṭe Cesarea Filipo e' a. Ñala kī Jesús tō ie'pa a ichaké:

—Žima pē' tō iché, ye' dör yi?  
<sup>28</sup> Ie'pa iüté:

—Welepa tō icheke tō be' dör Juan S'wōskuökwak. Welepa skā tō icheke tō be' dör Skéköl tteköl bak kié Elías shkēnekane e'. Welepa skā tō icheke tō be' dör Skéköl ttekölpa skā bak e' wele.

<sup>29</sup> Ie' tō ie'pa a ichaké:  
—Erē žima a' iché, ye' dör yi?

Pedro tō iüté:  
—Be' dör wé pairine'bitu idi' wa sa' blúie e'.

<sup>30</sup> Erē Jesús kē wā ie'pa kane yi dör ie', e' chök yi a.

*Jesús e' biyó ché tō itterawa (Mateo 16.21-28; Lucas 9.22-27)*

<sup>31</sup> Jesús tō ie'pa a itsá ché:  
—Ye' dör S'ditsö Alā, e' weirdaé tajē. Judiwak kuēblupa ena sacerdotepa wōkirpa ñies s'wōbla'uk ttē dalöieno wa wakpa tō ye' waterattsā. Ye' tterawa, erē e' kī ká de mañat eta ye' shkerdakane.

<sup>32</sup> Ttè e' chéitò ie'pa a wöshak. Erë Pedro tò ie' kiémi bánet ta iuñémittò. <sup>33</sup> Erë Jesús e' wötrée ta ittòkatapa weblé krereë ta Pedro uñéitò i' es:

—¡A Satanás, be' yúshka bánet ye' yökí! Be' kè tò íyí sué wes Skéköl tò isueke es; be' tò isueke wes s'dítsò tò isueke es.

<sup>34-35</sup> E' ukuökí ta ie' tò ittòkatapa ena pè' malepa kié e' ska' ta ichéitò:

—Yí e' tsatkak ittèwá yökí, ese kè ulá a sene michoë döpa. Erë yi e' mettsa ttèwá ye' dalèrmik ena ye' ttè buaë e' dalèrmik, ese ulá a idóraë. E' kuekí yi e' yuak ye' ttòkataie, ese kè kàne tkinukí e' kí. E' skéie ie' kawötá e' chök dö ittèwá wötèulewá krus mik ekké. Es ie' kawötá shkòk ye' itòkí. <sup>36</sup> Íyí ulitane tso' ká i' a, e' de a' ulá a, erë sene michoë e' kè dè' a' ulá a, e' ta e' dör çie bua' a' a? <sup>37</sup> Sene michoë kè patorpa i' wa. <sup>38</sup> Mik ye' dör S'dítsò Alá, e' dene ye' Yë olo ta', ñies ibiyöchökwa kpa batse'r e' pa ta, etá wépa jaëne ye' kí pè' sulusipa kè tò Skéköl dalóie wes trer wakpa kè tò imaso dalóie es esepa wörki, esepa kí ye' jaërdaë ñies.

**9**

<sup>1</sup> Ñies ie' tò iché ie'pa a:

—Mokí ye' tò a' iché tò a' tso' íe, e' welepa tò i' blúie Skéköl tso' e' kéwö de diché ta', e' sueraë kam íblèrurul e' yökí.

*Jesús tò ilo tajë e' kkaché ittòkatapa a*  
(Mateo 17.1-13; Lucas 9.28-36)

<sup>2</sup> Ká teröl ukuökí ta Jesús míá ká bata kakkéë e' kí. Pedro, Santiago ena Juan e'pa mítser iwá e' ta. Etá eë ie'pa wö sháë ie' manenetsá míá kuá'kí. <sup>3</sup> Ie' datsi' manenetsá míá dalóie saruruë, kè yi a ká wa'ñe datsi' sunuk as idóttá saruruë es. <sup>4</sup> Etá ie'pa tò Skéköl ttekölpa bak ká íaiaë kié Elías ena Moisés e'pa sué kapakök Jesús ta. <sup>5-6</sup> Ie'pa tkinewá tajë. Pedro kè éna i' añaia ché, e' kuekí ichéitò Jesús a:

—¡A S'wöbla'ukwak, buaë s' tso' íe! Sú sa' tò úla yuéká mañatkuela, etkue be' a, etkue Moisés a, etkue Elías a. <sup>7</sup> Etá mochka tò ie'pa kítewá ta e' shua ie'pa tò ttò ttsé tò iché: “Se dör ye' alá dalèr tajë ye' éna, e' ttò ttsó.” <sup>8</sup> E' bet ta ie'pa ká sué ipamik ta ie'pa isué tò kè yi ku'ía, Jesús è dur ie'pa ta.

<sup>9</sup> Ie'pa datskene wöwa'k ta Jesús tò ie'pa a iché:

—Í sué a' tò e' kè pakar yi a dö mik ye' dör S'dítsò Alá, e' ttèwá shkènekane e' ukuökí.

<sup>10</sup> E' kuekí ie'pa tté iwakpa è ñi ta. Erë ie'pa ñi chakòke: “Ie' ttèwá shkènekane çíma e' wà dör?” <sup>11</sup> Ie'pa tò Jesús a ichaké:

—Çí kuekí s'wöbla'ukw tté dalóieño wa wakpa tò icheke tò Elías kawötá dökne kéwe wes pairine'bitü idi' wa s'blúie e' yökí?

<sup>12</sup> Ie' iütérak:

—E' yène tò Elías datse kéwe. Ie' tò i' kòs kanewèketke kéwe wé pairine'bitü idi' wa s'blúie e' yökí. Erë çí kuekí Skéköl yèkkuò tò iché tò S'dítsò Alá, e' weirdaë ena iwatèrdattá? <sup>13</sup> Ye' tò a' a' iché tò Elías dè'bak, etá ie'pa tò iwe'ik siarè wes ie'pa kí ikiane es. E' bak wes ie' tté tso' kitule Skéköl yèkkuò kí es.

*Kabëla eköl a aknama tso' e' bua'wéne Jesús tò*

(Mateo 17.14-21; Lucas 9.37-43)

<sup>14</sup> Mik idenerak wé ittòkatapa malepa tso' eë, etá ie'pa isué tò tajë pè' tso' ipamik. Ñies isuéitorak tò s'wöbla'ukw tté dalóieño wa wakpa welepa ñi iütòke ie'pa ta. <sup>15</sup> Mik pè' tò Jesús sué, etá iwö krarulune ta iünemirak ishke'uk. <sup>16</sup> Ie' tò ichaké ittòkatapa a:

—Çí kí a' ñi iütòke?

<sup>17</sup> Wém eköl tò iché ie' a:

—A s'wöbla'ukwak, íe ye' wa ye' aladulaköl debitü be' a. Wimblu sulusi tso' ía e' kuekí kè itto. <sup>18</sup> Ká wa'ñe wé ie' tso' eë wimblu tò ie' éna ká chöwékewa ta ikéure ískí ta shuya deká ikkò a, iká blarke ñi mik ena íkranewá. Be' ttòkatapa a íkiéyö tò wimblu e' tré'úshkar eré kè ie'pa a íone.

<sup>19</sup> Jesús tò iüté:

—¡A pè' kè erblöta' Skéköl mik! Çí Mik ye' sermirò a' ta? Çí Kòs ye' tò a' dalé'ttsemirò? Kabëla ñe' tsúbitü ña.

<sup>20</sup> Etá ie'pa wa kabëla mítser Jesús ska'. Erë mik wimblu sulusi ñe' tò Jesús sué ta kabëla painuwékaitò tajë anerò ískí e' tréka burup burup ta ikkò a shuya deká. <sup>21</sup> Jesús tò kabëla yé a ichaké:

—Çí Mik i' wamblènnemi ie' ta?

Iyé tò iüté:

—Mik íe' ía sirlala e'tami. <sup>22</sup> Tajë wimblu tò ie' ma'wé ttèwá. Mikle ta iuyéwáitò bö' a ö di' a ittowaie. Sa' sa'ü er siarè wa. Ilè ormi be' a, e'ma sa' kímú.

<sup>23</sup> Jesús tò iüté:

—Çí Wes bö ibikeitsèmi tò ye' kè a ionuk? Yi erblòke Skéköl mik, jese a i kòs ormi!

<sup>24</sup> Etá kabëla yé tò iché aneule:

—Ye' erblòke Skéköl mik. ¡Ye' kímú kí erblök imik!

<sup>25</sup> Mik Jesús tò isué tò tajë pè' daparke, etá wimblu sulusi uñéitò i' es:

—A wimblu, kabëla i' teke be' tò kukuò kè wattser, kè tto. Ye' tò be' kè e' yóttá kabëla i' a. Kè be' e' tiukwane ie' a.

<sup>26</sup> Wimblu aneká ta kabëla ská éna ká chöwéwaneitò. E' ukuökí ie' e' yéttá ta kabëla até wes s'duowa es. E' kuekí pè' tajë tò iché tò mokí iduowa. <sup>27</sup> Erë Jesús tò ikló'wéwa iulá a ta íkimé e' kókka ta ie' e' kéka.

<sup>28</sup> E' ukuökí ta Jesús dewá weshké ta ittòkatapa tò ie' a ichaké bánet.

—Çí kuekí sa' kè a wimblu e' trèshkar?

29 Ie' tō ie'pa iūtē:  
—Wimblu sulusi ese trēoṣhkarmi ikie S'yē a e' ē wa \*

*Jesús skà e' biyō ché tō itterawa  
(Mateo 17.22-23; Lucas 9.43-45)*

30-31 Jesús ena ittōkatapa e' yéttsa eḡ tkami Galilea. Ie' tso' ie'pa wōbla'uk, e' kueḡi ie' kē kī ikiane tō wé ie'pa tso' e' jcherwa yi wa. Ie' tō iché ie'pa a:

—Ye' dōr S'ditsō Alà, e' wōmerdatssa pē' ulà a ṭa ye' tterawarakitō. Erē e' kī ká de mañat ṭa ye' shkerdakane.

32 Erē ì ché ie' tō, e' wà kē ane ie'pa éna, ñies ie'pa suanerak ichakōk.

*Yi dōr ibua'ie Skēkōl wōḡ  
(Mateo 18.1-5; Lucas 9.46-48)*

33 E' ukuōkī ie'pa demi Cafarnaúm. Mik ie'pa dewa wēshke, eṭa Jesús tō ie'pa a ichaké:

—Ĭ kī a' ñi iūtōro ñala kī?

34 Erē ñala kī ie'pa ñi iūtōro tō wé dōr ibua'ie imalepa tsata, e' kueḡi ie'pa siwa'bléwa. 35 Eṭa Jesús e' tkēsēr ṭa ie'pa dabom eyōk kī bōl e'pa kiéitō ṭa ichéitō ia:

—Yi kī ikiane tō idō ibua'ie imalepa tsata, e' ṭa ese kawōṭa e' wōōkwa imalepa dikja ikanē mésoie ikimoie.

36 E' ukuōkī ṭa alala duēsritō ekōl ie'pa shushaē ṭa ikēkaitō ulà a ṭa ichéitō iarak:

37 —Yi tō alala i'se kiéwa ye' ttō wa, ese tō ye' wák kiéwa. Es ñies yi tō ye' kiéwa, ese kē wa ye' ē kinewa, yi tō ye' patkē'bitu, e' kiéwaitō ñies.

*Yi kē ku' ñippōk se' ṭa ese tso' buaē se' ṭa  
(Mateo 10.42; Lucas 9.49-50)*

38 Juan tō iché Jesús a:  
—A s'wōbla'ukwak, wēm suē sa' tō ekōl, e' tō aknama trē'wéyal be' ttō wa. Erē ie' kē ku' se' ṭa, e' kueḡi sa' tō iché ia tō kē iwaria.

39-40 Ie' tō ie'pa iūtē:

—Yi tō ì kē or yi a ese wé ye' ttō wa, ese kē a ye' yēnuk suluē. Yi kē ku' ñippōk se' ṭa, ese tso' se' ṭa. E' kueḡi kē iwōklō'wār. 41 Yi isie tō di' kakla ē mé a' a yē, ye' dōr Cristo e' icha a' dōr e' kueḡi, molḡi ye' tō a' a iché tō ese a' iské patōrdaē buaē.

*A' tso' wōsh wa ì tō s'ké ì sulu wamblōk ese yōkī  
(Mateo 18.6-9; Lucas 17.1-2)*

42 “Yi tō ikkēpala erblōke ye' mik, ese ekōl kē ì sulu wamblōk, esepa weirdaē tajē shūṭe tkōka ak wawoie muéwa ikuli' a batrēmē dayē a e' tsata. 43-44 A' ulà tō a' kē ì sulu wamblōk, e' ṭa itōō. A' dōwa sene micho a ulà etkē, e' dōr buaē. E' skéie a' dōwa bō' kē a ulà bōtkē e' dōr suluē. Eḡ bō' kē wōitta'wa. 45-46 A' klō tō a' kē ì sulu wamblōk, e' ṭa itōō. A' dōwa sene micho a klō etkē, e' dōr buaē.

E' skéie a' uyéwa bō' kē a klō bōtkē e' dōr suluē. 47 A' wōbla tō a' kē ì sulu wamblōk, e' ṭa iyōttssa. A' dōwa ì blúie Skēkōl tso' e' a wōbla ek ē, e' dōr buaē. E' skéie a' uyéwa bō' kē a wōbla bōkē e' dōr suluē. 48 E' kē a ōña tō s'kateke kekraē kē duōṭa'wa, ñies bō' wōñarke kē wōitta'wa.

49 “S'weir e' dōr s'paiklē wēs iyiwak jchē ña'wē mè Skēkōl a ese paiklē dayē wa es. 50 Dayē dōr buaē, erē kē ikke ṭa'ia, e' ṭa kē ibuarpaiane. Kē a' tō dayē kke chōukwa a' er a. A' sēnū bērē ñita.”

### 10

*Se' ñi ōwa ese ché Jesús tō  
(Mateo 19.1-12; Lucas 16.18)*

1 Jesús e' yéttsa Cafarnaúm miá Judea ṭa itkattsa Jordán a wīshet. Eḡ pē' e' dapa'wēne ie' ska' ṭa ie' tō ie'pa wōbla'wémiteke wēs ie' wōblar es. 2 Eṭa fariseowakpa welepa de ie' ska' ṭa ie'pa tō ie' a ichaké itsaioie:

—Ĭ wēpa a kawō ṭa' itayē owa ō au?

3 Ie' tō ie'pa iūtē:

—Ĭ uk Moisés tō a' ka' ttē dalōiēno kī?

4 Ie'pa tō ie' iūtē:

—Moisés tō ikéwō me' se' a' ñi owa yēkkuō muk s'tayē a ṭa itrē'ukshkar.

5 Ie' tō ie'pa a iché:

—A' er darērē, e' kueḡi Moisés tō ttē e' me'at a' a es. 6 Erē mik ká i' yōne, eṭa kē idir es. Itso' kitule i' es: 'Skēkōl tō se' yō' wēm ena alakōl. 7 E' kueḡi wēpa kē serpaia iyē ena imi e'pa dapōmik ṭa iserdawa alakōl ṭa. 8 Ie'pa bōl serdaē ñita ṭa ie'pa miá wēs wák ekōl ē es.\* Es ikiteat, e' kueḡi ie'pa kē ia bōl, ie'pa yōne wēs wák ekōl ē es. 9 E' kueḡi wēpa batséwa Skēkōl tō esepa kē batsōkōk yi tō.

10 Mik ie'pa dene wēshke, eṭa ittōkatapa tō ie' ichaké ttē e' kī. 11 Ie' tō ie'pa iūtē:  
—Wēm tō itayē éwa, ese tō alakōl ské tséwane, e' ṭa e' wa ie' tō isenewabak kewe e' dalōsēwéwa. 12 Ñies tayē tō iwēm éwa, ese tō wēm ské tséwane, e' ṭa e' wa ie' tō isenewabak kewe e' dalōsēwéwa.

*Jesús tō ikie S'yē a ala'rla kī  
(Mateo 19.13-15; Lucas 18.15-17)*

13 Eṭa pē' wa ala'rla debitū sa Jesús ulà mūka ikī. Erē ittōkatapa tō pē' e'pa uñēlor. 14 Mik e' suéitō ṭa iluneka ṭa ichéitō ie'pa a:

—As ala'rla bitū ye' ska'. Wēpa dōr wēs ie'pa es, esepa blúie Skēkōl tso', e' kueḡi kē iwōklō'waria. 15 Mokī ye' tō iché tō yi kē e' wōōwa wēs alala es ì blúie Skēkōl tso' e' kiowa, ese kē dōpawa.

16 Eṭa ie' tō ala'rla paklō'wéwa ṭa iulà méka ikī ṭa ier buaē ché ia.

*Inukōl blu' ekōl e' tō Jesús a ichaké  
(Mateo 19.16-30; Lucas 18.18-30)*

\* 9:29 ikie S'yē a e' ē wa: Yēkkuō kēchke wēle tō ikī kuōtkéka i' es: ena batsé wa. \* 10:8 Génesis 2.24

<sup>17</sup> Mik Jesús shkémítke, etá wëm debítu ekól tñeule, e' tkéró kuchè kí ie' wórkí, tá ie' a' ichakéitò:

—A s'wòbla'ukwak, be' dór buaè, ÷ì wëmi ye' tò as sene michoè dō ye' ulà a'?

<sup>18</sup> Ie' tò iüté:

—÷ì kuèkí be' tò ye' kié buaè? Skèköl ekól è dór buaè. <sup>19</sup> Ie' ttè dalöièno e' jcher be' wá: 'Kè a' kawò tá' s'ttòkwa, kè a' kawò tá' s'senewabak dalòsèukwa, kè a' kawò tá' akblòk, kè a' kawò tá' s'kkatòk kachè wa, kè a' kawò tá' s'kítò'uk, a' yé ena a' mi e'pa dalöiò.'<sup>†</sup>

<sup>20</sup> Wëm ie' iüté:

—A s'wòbla'ukwak, ttè e' kòs dalöiè'bitu ye' tò ye' ià duladula e'tami.

<sup>21</sup> Jesús ie' sué er bua' wa tá ichéitò:

—Íyi etkè kianeia be' a wè, e' dór i': Be' yú tá i tso' be' wa, e' wataútsá seraá tá iské múttsá s'siarépa a. E' ukuökí tá be' shkó ye' tá ye' ttókataie. Es tá íyi buaè tajè dóraè be' ulà a ká jai a.

<sup>22</sup> Ie' dór inuköl blu' tajè, e' kuèkí mik e' ttséitò, etá iwó éwa iskí tá imía eriane tajè.

<sup>23</sup> Jesús tò ká sué ipamik tá ichéitò ittòkatapa a:

—jInuköl blúpa a darèrèè idir dökwa ì blúie Skèköl tso' e' a!

<sup>24</sup> Ttè e' tò ittòkatapa tkiwéwa, erè ie' tò ie'pa a iskà chéne:

—jA ala'r, darèrèè idir dökwa ì blúie Skèköl tso' e' a! <sup>25</sup> Inuköl blu'pa a dökwa ì blúie Skèköl tso' e' a, e' dór darèrèè tkòka kamekò tkòmi datsi' yuo diké ese wòukla a e' tsatá.

<sup>26</sup> Mik e' tse ie'pa tò, etá ie'pa kí tkinewa tajè tá ie'pa ñi chaké:

—E' dór es, e' ma ÷yi tsatkèrmi?

<sup>27</sup> Ie'pa webléitò tá ichéitò:

—E' kè onuk s'ditsò a wës, erè kè dór es Skèköl a, ie' a íyi ulitane ormi.

<sup>28</sup> Pedro tò ie' a ichémi:

—Sa' tò íyi ulitane me'at tá sa' bité be' tá.

<sup>29</sup> Jesús iüté:

—Mokí ye' tò a' a' ichè tò yi tò iu ò ièlpa ò ikutapa ò imi ò iyè ò ila'r ò iká méat ye' dalèrmik ena ye' ttè buaè dalèrmik, <sup>30</sup> e' tá ká i' kí ese ulà a' iské dórane tajè doka u cien eyök. Es ñies ièlpa ò ikutapa ò imi ò iyè ò ila'r ò iká ese dóraè iulà a' doka cien eyök. Erè ñies iweirdaè siarè ye' ttè buaè kuèkí. Erè aishkuò tá sene michoè dóraè iulà a'. <sup>31</sup> Erè j'ñe tá s'tso' tajè keweie esepa dóraè bataie, ena s'tso' bataie j'ñe tá esepa dóraè keweie.

*Jesús skà e' biyò chéne tò itterawa*

*(Mateo 20.17-19; Lucas 18.31-34)*

<sup>32</sup> Etá ie'pa mirka ñala kí micho Jerusalén. Jesús shkòrami ittòkatapa yökí kewe. Ittòkatapa mir tkirulewa ena pè' mir ie'pa itökí e'pa suane. Ie' ittòkatapa dabom eyök kí ból, e'pa kiémiiò bánet tá i tkóraè ie'

tá e' pakémiitò ie'pa a. Ichéitò: <sup>33</sup> 'Se' mirka Jerusalén i', etá ee ye' dór S'ditsò Alà, e' merdattsa sacerdotepa wókirpa ena s'wòbla'uk ttè dalöièno wa wakpa ulà a. Ie'pa tò ye' kichateraè tá ye' wómerattsa pè' kè dór judiowak esepa ulà a' ttèwa. <sup>34</sup> Ye' wayuraè ie'pa tò, iwiri tuóraè ye' kí, ye' pperarakitò, ena ye' tterawarakitò; erè e' kí ká de mañat etá ye' shkèrdakane."

*Santiago ena Juan tò kawò kié Jesús a*

*(Mateo 20.20-28)*

<sup>35</sup> Santiago ena Juan e'pa dór Zebedeo ala'r e'pa dewa Jesús o'mik tá ichéitò iá:

—A s'wòbla'ukwak, sa' kí ikiane tò ì kiekie sa' tò be' a' e' mú sa' a.

<sup>36</sup> Ie' tò ichakérak:

—÷ì kiane a' kí?

<sup>37</sup> Ie'pa tò iüté:

—Mik be' tkèneká s'blúie olo ta' tajè, etá kawò mú sa' a' e' tkòksèr be' o'mik, ekól be' ulà bua'kka, ekól be' ulà baklì'kka s'wètttsuk be' tá.

<sup>38</sup> Ie' tò ie'pa iüté:

—A' kè wá ijcher ì kiök a' tso'. ÷Íyi yeraè ye' tò bacha'bachaè, e' yarmi a' a? ÷A' e' ché weinuk wës ye' weirdaè es?

<sup>39</sup> Ie'pa tò iüté:

—Tò, sa' dirmi.

Ie' tò iché iá:

—Ye' tka' wá yeraè a' tò. A' weirdaè wës ye' es. <sup>40</sup> Erè e' tkòksèr ye' ulà bua'kka ò ye' ulà baklì'kka, e' kè kéwò menuk ye' a. E' tso'tke klòule yi a' imeke esepa a.

<sup>41</sup> Mik ttè e' tsewa ittòkatapa malepa doka dabom eyök (10) e'pa tò, etá ie'pa uluneka Santiago ena Juan kí. <sup>42</sup> Erè ie' tò ie'pa kié seraá tá ichéitò:

—A' wá ijcher tò pè' kè tò Skèköl dalöiè, esepa wókirpa kòs e' alòkeka ie'pa kí kekraè, ñies iblúpa tò ie'pa patkeke kèsik wa. <sup>43</sup> Erè a' kè kàne e' wamblòk es. E' skéie, a' isie e' yuak s'wòkirie, ese kawòtá e' wòókwa s'malepa dikjá diòshet ikanè mésoie. <sup>44</sup> Ñies a' isie e' yuak ibua'ie s'malepa tsatá, ese kawòtá e' muktsá s'malepa a kanè mésoie. <sup>45</sup> Ye' dór S'ditsò Alà, e' kè dé'bitu as yi tò ye' kímú, ye' dé'bitu s'kímuk ena e' muktsá ttèwa s'tso' tajè e' nuí skéie. E' kuèkí a' kawòtá e' wòókwa s'malepa kanè mésoie.

*Bartimeo bua'wéne Jesús tò*

*(Mateo 20.29-34; Lucas 18.35-43)*

<sup>46</sup> Ie'pa demi Jericó. Mik Jesús e' yòketttsatke ittòkatapa tá ena pè' dami tajè itökí e'pa tá, etá ee wëm ekól siarè tkèr ñala ska'. E' dór inuköl kak kiökwa kié Bartimeo dór Timeo alà, e' wòbla kè wawèr. <sup>47</sup> Mik ie' ittse tò Jesús Nazaret wak damitkò, etá ie' iché aneule:

<sup>†</sup> 10:19 Éxodo 20.12-16; Deuteronomio 5.16-20

—ja Jesús, s'blú bak David e' aleri, ye' saú er siarè wa!

<sup>48</sup> Tajè pè' tò ie' uñeke as isiwā'blōwā, erè ie' kī arkeka:

—ja David aleri, ye' saú er siarè wa!

<sup>49</sup> Eta Jesús e' duèser ta ichéitò:

—Ie' kiöttsa.

Eta wëm wöbla kè wawër, e' kiëttsa ie'pa tò ta ichérakitò ia:

—Be' er kuú. Be' e' kōka. Ie' tso' be' kiök.

<sup>50</sup> Eta wëm tò ipaio kikkè yëttsa ppéumi ta ie' e' kékā bet dewā Jesús ska'. <sup>51</sup> Ta Jesús tò ie' a ichaké:

—¿I kiane be' kī tò ye' tò iwè be' a?

Ta ie' tò iüté:

—A s'wöbla'ukwak, ye' kī ikiane tò ye' wöbla buarne.

<sup>52</sup> Jesús tò iché ia:

—Be' erblé ye' mik, e' wa be' buanene. Be' yúne.

E' wöshā ta ie' wöbla buanene ta imía Jesús ta ñalā wa.

### 11

#### Jesús demi Jerusalén

(Mateo 21.1-11; Lucas 19.28-40; Juan 12.12-19)

<sup>1</sup> Mik Jesús ena ittökatapa dökemitke Betfagé ena Betania tso' tsinet Jerusalén, Olivo kébata kuli' a ta eé ie' tò ittökatapa kié bōl <sup>2</sup> ta ichéitò iarak:

—A' yú wí u wéne eruleë eé. Mik a' demi ee, e' bet ta burro pupula moulewā kueraë a' tò etō kè kī yi e' tkéulekā ese. E' wötsōō ta itsūbitu ña. <sup>3</sup> Yile tò a' a ichakeke: '¿I uk a' tso'?', e' ta iütò: 'Skéképa kī ikiane', e' wa ie' tò iméne.

<sup>4</sup> Eta ie'pa míyal tò burro ñe' kué, moter ukkō a ñalā shaé. Iwötsée ie'pa tò tsémi.

<sup>5</sup> Eta welepa iéter eé e' tò ichakérak:

—¿I uk a' tso'? ¿Iie a' tò burro se wötsée?

<sup>6</sup> Ittökatapa tò iüté wés Jesús tò iché ia es ta ie'pa tò iébitu. <sup>7</sup> E' ukuökí ittökatapa wa burro bitetser Jesús a. Ie'pa tò ipaio kikkè mékā burro kī ta Jesús e' tkékā ikí. <sup>8</sup> Tajè pè' tò ipaio kikkè shuélor ñalā kī, iskā tò kal kō té'lor kañikā tsémi ese shuélor ñalā kī Jesús ñalé tsöje.

<sup>9</sup> Pè' mirwā kéweie Jesús yöki ñies itöki, e'pa ulitane arke tajé:

—jskéköl kikkāsō! Yi datse ie' ttō wa, ayécha buaé e'. <sup>10</sup> E' datse s'wéttsukne s'blúie wés se' yé David bak es. Ayécha buaé ie'. jskéköl tso' ká jai a e' kikkāsō!\*

<sup>11</sup> Jesús dewā Jerusalén ta imía dewā Skéköl wé a. Ie' tò iyi weblé seraa. Ká tuirketke, e' kuéki imía Betania ittökatapa dabom eyök kī bōl, e'pa ta.

#### Jesús tò higowö yulé

(Mateo 21.18-19)

<sup>12</sup> Bule es ta mik ie'pa e' yélur Betania, eta Jesús dué bli wa. <sup>13</sup> Kamié ie' tò higuera klō sué kō arwā buaé. Ie' mía iweblök tò iwō ta'. Erè kè ie' wa iwō kune. Kam iwō kéwō dōwa, e' kuéki ikō è arwā tajé.

<sup>14</sup> Ie' tò iché higo klō a:

—jKè yi tò be' wō katepaiā!

E' ttsé ittökatapa tò.

#### Jesús tò Skéköl wé batse'wé

(Mateo 21.12-17; Lucas 19.45-48; Juan 2.13-22)

<sup>15</sup> Ie'pa demi Jerusalén ta Jesús dewā Skéköl wé a. Eé ie' e' kékā wépa tso' iyi taük ena iyi wataük e'pa trè'ukyal. Inuköl mane'ukwakpa' mesa trélurkaitō. Nies nuböl wataükwakpa kula' trélurkaitō. <sup>16</sup> Nies ie' kè tò yi a kawō mè iyi tsuktö Skéköl wé shūa. <sup>17</sup> Eta ie' tò s'wöbla'wémitke ta ichéitò:

—Skéköl tò iyé'at iyékkuō kī: 'Ye' u kirdaé tto ye' ta wé ká ulitane wakpa a,† erè a' tò iia'wéka akblo wéie.

<sup>18</sup> Mik e' ttsé sacerdotepa wökirpa ena s'wöbla'uk tté dalöieno wa wakpa tò, eta ie'pa ileritsémi Jesús ttowaie. Ie' tò s'wöbla'weke e' tò pè' jos tkiwéwa, e' kuéki judiowak wökirpa suane iyöki. <sup>19</sup> Erè mik ká tuine, eta ie' e' yëttsa Jerusalén ittökatapa ta.

#### Higo klō sinewa

(Mateo 21.20-22)

<sup>20</sup> Bule es bla'mi ie'pa tkamine higuera klō o'mik, eta ie'pa tò isué tò isinewa dö iwí kicha è. <sup>21</sup> Eta i bak e' anewa Pedro éna, e' kuéki ie' tò Jesús a iché:

—A S'wöbla'ukwak, isaú higuera klō wayé'abō e' sinewa.

<sup>22</sup> Jesús iüté:

—A' erblō Skéköl mik. <sup>23</sup> Mokí ye' tò a' a iché tò yi tò iché kabata wí a: 'ibe' e' sköttsa ié anúwa dayé a!' ta ikd'wéitō mokí kè ibikeitseka bōtbot tò i chéitō e' wa tkōraé, e' ta es iwā tkōraé. <sup>24</sup> E' kuéki ye' tò a' a iché tò ikd'ú tò i kié a' tò Skéköl a' e' wa detke a' ulā a, eta iwā dōraé. <sup>25-26</sup> Nies mik a' tso' ikiök ie' a, eta ilé tté tso' a' wa yile kī, ese nuí olo'yō ikí as S'yé tso' ká jai a e' tò a' icha olo'yō a' kī ñies.

#### ¿Yi tò kawō mè Jesús a?

(Mateo 21.23-27; Lucas 20.1-8)

<sup>27</sup> E' ukuökí ta ie'pa dene Jerusalén. Jesús shkōdur Skéköl wé a. Eta sacerdotepa wökirpa ena s'wöbla'uk tté dalöieno wa wakpa ena judiowak kuéblupa e'pa de ie' ska' <sup>28</sup> ta ichaké ia:

—¿Yi ttō wa be' tò iyi ikké weke? ¿Yi tò e' kéwō mé be' a?

\* **11:10** Salmo 118.25-26 † **11:15** inuköl mane'uk: Judiowak a inuköl tso' wakanewé Skéköl wé é a, e' tuékene ie'pa tò inuköl èse wa. ‡ **11:17** Isaías 56.7

29 Ie' tò iüté:  
 –Ñies ye' tò a' a ilè chakeke, e' iüté a' tò, e' ta ye' tò a' a icheke tò yi tò ikéwō me' ye' a.  
 30 ¿Yi tò Juan patkè' s'wōskuók? ¿skèköl tso' ká jaì a' e' ò s'ditsö? Ye' iütö.  
 31 Ie'pa ñi iütémi ta' ichekerakitö: “Sö ichèmi tò Skèköl tò ipatkè'bitu, e' ta ie' tò se' a ichèmi: ‘¿Ì kuekì a' kè wà ie' ttè klöone?’”  
 32 Pè' ulitane tò iklö'wé tò Juan dör Skèköl tteköl chökle, e' kuekì ie'pa suane pè' yökì. E' kuekì ie'pa tò icheke ñi a: ‘Kè se' a iyènuK tò s'ditsö tò ie' patkè'’.  
 33 E' kuekì ie'pa tò iüté:  
 –Kè sa' wà ijcher.  
 Ie' tò ie'pa a' iché:  
 –Es ñies ye' kè tò a' a ichepa tò yi tò ye' a kàwō mé iyi ikké wöje.

**12**

*Uva kanéukwakpa sulusipa e' tté*  
 (Mateo 21.33-46; Lucas 20.9-19)

1 Jesús tò ttè kleé ie'pa a' i' es: “Wém eköl tò uva kuatké tajé ta' ikkoiéwáitö buaé, kàuk biéitö uva diö tuoie. Ñies úla yuéitö kàkkéé uva kkö'noie. E' ukuökì ta' ie' tò ipeitéat wèpa welepa a' as ie'pa tò ipataù ie' a' iwörke e' kak wa. E' ukuökì ta' ie' míka ká bánet. 2 Mik uva wöline tso'tke wè'iaé shtë, età ie' tò ikanè méso patkémie eköl ie' icha tsük. 3 Eré ie'pa tò ikanè méso klö'wéwà ppé tajé patkémie ulà wöchka. 4 Età kané wák tò ikanè méso skà patkémie eköl, eré e' shka'wé ie'pa tò iwökir kì ta' iché sulué. 5 E' ukuökì ta' eköl skà patkémie ie' tò ta' e' ttéwà ie'pa tò. E' ukuökì ikanè mésopa skà patkémiiitö tajé, eré ie'pa tò welepa ppélor welepa ttélor.  
 6 “Bata ekké ta' iateia eköl è. E' dör iwák alà, e' dalèr tajé ie' éna. E' patkémiiitö ta' ie' ibikeitsè: ‘Ye' alà idir, e' kuekì ie'pa tò idalöieraé.’ 7 Eré ie'pa tò iché ñi a: ‘Ká i' atdaé ie' wì ulà a. Ittöwasö, es ká i' doraé se' ulà a.’ 8 E' kuekì ie'pa tò iklö'wéwà ttéwà ta' inú kéumi ie'pa tò uva ké a bánet.”

9 Età Jesús tò ie'pa a' chaké:  
 –¿Ima a' ibikeitsè? ¿Ì weraé kané wák tò? Ie' mira kanéukwakpa ttökulur ta' uva kané meraneitö pé' kua'kì a.

10 Ye' tté tso' kitule Skèköl yèkkuö kì, ¿e' kè sune a' wà? E' tò iché:  
 ‘Ák watéttsa u yuökwakpa tò e' yöne ak bua'buaié.  
 11 E' kaneö' Skèköl tò, ta' e' tò s'ttsè'weke buaé, s'tkinewà iweblök.\* Es Skèköl yèkkuö tò iché.

12 Ie'pa tò isuéwà tò kleé e' wa Jesús tò ie'pa chane, e' kuekì ie'pa éna iklö'wákwa. Eré ie'pa suane pè' yökì, e' kuekì ie'pa tò iméat ta' iponemi.

*S'wökirpa patauk, e' tté*  
 (Mateo 22.15-22; Lucas 20.20-26)

13 E' ukuökì ta' ie'pa tò fariseowakpa welepa ena Herodes klépa welepa patkémie Jesús ska'. Ie'pa kì ikiane tò ie' tò ilè ché ikkatoie. 14 Ie'pa demi ie' ska' ta' ichéraitö ia:

–A s'wöbla'ukwak, sa' wà ijcher tò kekraé be' ttö mokì. Be' tò sulitane suéke ñikkéé. Ima pé' tò be' cheke e' kè kì be' tkine. E' kuekì be' tò s'wöbla'weke yésyèsé Skèköl ñalé tté wa. Ichö sa' a, Roma wökir kibi patuésö ¿e' dör buaé ö kè idör buaé?

15 Eré ie'pa tò isuéwà tò ie'pa e' öke er sulu wa, e' kuekì ie' tò iché iarak:

–¿Ì kuekì a' tso' ye' ma'uk tsaié? Inuköl wöshki tsúbitu ña et sué.

16 Età ie'pa tò inuköl wöshki tsémi ie' a et ta' ie' tò ichaké ie'pa a:

–¿Yi diököl ena yi kié me'rka' ikì? Ie'pa tò iüté:

–Roma wökir kibi.  
 17 Età ie' tò iché ie'pa a:

–E'ma kos Roma wökir kibi icha, ese mú ie' a, ta' kos Skèköl icha ese mú ie' a. Ie' tò ie'pa iüté es, e' tò ie'pa tkiwéwà.

*¿S'duolur e' shkermikane ö au?*  
 (Mateo 22.23-33; Lucas 20.27-40)

18 Età saduceowakpa welepa de Jesús ska'. E' wakpa tò iklö'wé tò s'duowà e' kè shkenukkane. Ie'pa tò ie' a' ichaké:

19 –A s'wöbla'ukwak, Moisés tò ttè dalöièno kitat yèkkuö kì e' tò iché i' es: Wém blènewà kè alà até, e' ta' ie' èl kàwötà ischö tsükwà as ilà kókà ièl blènewà, e' a. 20 Etökicha wèpa bak dökà kul ñi èlpa, ikibi alaköl tséwà, eré iblènewà kè alà até. 21 Ie' itökì ièl tò ischö tséwà, eré e' ñies blènewà kè alà até. E' sù iwamblène ièl ta' 22 ena imalepa ta. Ie'pa kul blèrulune kè alà até alaköl e' ta. Bata ekké ta' ñies alaköl e' blènewà. 23 Wèpa kul e' bak alaköl eköl è ta. Mik s'duowà e' shkenekane, età ¿wéne dömi ie' wém chökíe?

24 Ie' tò ie'pa iüté:  
 –A' kè wà Skèköl yèkkuö suule, ñies ie' diché kè jcher a' wà, e' kuekì a' wöa' ká chowa. 25 Mik s'duolur e' shkenekane, età wèpa ena alakölpà kè serpawajá ñita. E'pa míyal wés Skèköl biyöchökwakpa tso' ká jaì a kè serpa'wà ñita es. 26 ¿A' kì kiane jchèno tò mokì s'duowà e'pa shkèrdakane? Skèköl ut Moisés ta' kal tsir wöñarke bö'ie, e' shuá, ¿e' paké kè aritsule a' wà Moisés yèkkuö kì? E' kéwö ska' ta' Skèköl tò iyé': ‘Ye' dör Abraham, Isaac ena Jacob, e'pa Kèköl.’ 27 E' wà kiane ché tò ie' kè dör s'duowà, e'pa Kèköl. ¡Ie' dör s'ttsè'ka, e'pa Kèköl! Tajé a' wöa' ká chowa.

\* 12:11 Salmo 118.22-23 † 12:26 Ye' dör Abraham, Isaac ena Jacob, e'pa Kèköl: Mik tté e' yè' Skèköl tò Moisés a, età Abraham, Isaac ena Jacob e'pa blèrulunebak ká iaiáé. Wés ie' tò iché, e' wà kiane ché tò ie'pa tso' tstsè'ka Skèköl ta. Éxodo 3.6 saú.

¿Skèkòl ttè dalöiëno e' isie dör ibua'ie?  
(Mateo 22.23-40)

28 Età s'wöbla'ukwak ttè dalöiëno wa dur ekòl ie'pa tso' ñi iutök e' tstsök. Ie' tò ittsé tò Jesús tò ie'pa iuté buaë, e' kueki ie' ichaké ia:  
—Skèkòl ttè dalöiëno, ¿e' wéne dör ibua'ie imalepa tsata?

29 Ie' iuté:

—Skèkòl ttè dalöiëno kibiie imalè tsata e' dör i': 'A Israel aleripa, a' tò ittsé. Kèké dör se' Kèkòl, e' è dör Skèkòl. 30 E' dalèritsò a' er kos wa ena a' wák kos wa ena a' erbike kos wa ena a' diché kos wa.' 31 E' itóki e' dör i': 'A malepa dalèritsò wés a' wákpa e' dalèr es.' Kè ttè ta' dalöiëno tkòka ttè bót e' tsata.

32 Età s'wöbla'ukwak ttè dalöiëno wa, e' tò iché ia:

—A s'wöbla'uk, be' iuté buaë. Ì ché be' tò e' dör mokí. Skèkòl dör ekòl ème. Kè e' skà ta. 33 Nies s'kawötà ie' dalèritsök se' er kos wa ena se' kabikeitsò kos wa, ena se' diché kos wa, ñies s'kawötà s' malepa dalèritsök wés se' wák e' dalèr es. E' wésò, e' ta e' dör buaë se' a tkòka iyiwak jchéule ña'wè wa'ñe ena iyiwak jchéule skà mésò Skèkòl a' e' kos tsata.

34 Mik ie' isué tò s'wöbla'ukwak ttè dalöiëno wa, e' tò ie' iuté buaë yésyèsè, età ie' tò iché ia:

—Ì blúie Skèkòl tso' e' o'mik tsinet be' tso'.

Età ké yi kèsik dè'kaia ie' a' ì skà chakòk.

¿Wé pairine'bitu idi' wa s'blúie e' dör yi aleri?

(Mateo 22.41-46; Lucas 20.41-44)

35 Jesús tso' ie'pa wöbla'uk Skèkòl wé a' ta ie'pa a' ichakéitò:

—¿Wés s'wöbla'uk ttè dalöiëno wa wakpa tò ichémi tò wé pairine'bitu idi' wa s'blúie, e' dör s'blú bak kiè David e' aleri? 36 Erè David wák tò iyé' Wikòl Batse'r wa' i' es:

'Skèkòl tò iché ye' Kèkòl a':

Be' e' tkóser ye' ulà bua'kka dalöiëno tajè, dō mik ye' tò be' bolòkpa méro be' klò dikia età.\*

37 Wé pairine'bitu idi' wa s'blúie e' dör David aleri, e' ta ¿wés e' kièmi David tò ie' Kèkòl?

Età pé' tso' tajè, e'pa tò Jesús ttò ttseke er bua' wa.

Jesús tò s'wöbla'uk ttè dalöiëno wa wakpa kkaté

(Mateo 23.1-36; Lucas 11.37-54; 20.45-47)

38 Jesús tò s'wöbla'weke e' shua ie' tò iché: "A' e' kkò'nú s'wöbla'uk ttè dalöiëno wa wakpa yöki. Ie'pa wöbatsò shkòk datsi' batsjè ese mik wé pé' tso' tajè ese ska' as pé' tò ie'pa shké'ù wés kèképa dalöiértà' tajè es. 39 Nies se' ñi dapa'wo wé a' ena wé ie'pa kawò tkò'wekerakitò, ese ska' kula' tso' kèképa dalöiértà' esepa a, ese yuleke ie'pa tò

e' tkoie. 40 Ie'pa tò alakòlpa schö u yetà'ttsa iulà a, età ittòkerak S'yè ta braraè sulitane wöwa idiki'ñoie tò ie'pa dör pé' buaë yésyèsè. Ie'pa weirdaè siarè s'malepa tsata."

Alakòl siarè tò inukòl mé Skèkòl a  
(Lucas 21.1-4)

41 Etókicha ta Jesús tkèr kalkuò tso' inukòl ioie mè Skèkòl a' e' wösha pé' tso' inukòl iök kalkuò a' e' sauk. Inukòl blúpa tso' tajè esepa tò inukòl ieke tajè. 42 E' wöshaè ta alakòl siarè dör schö debitu ekòl, tò inukòl wöshkila yöule cobre wa tuè tottola ese iéwa bót kalkuò ek a. 43 Jesús tò ittòkatapa kié ta ichéitò ia:

—Mokí ye' tò a' a' iché tò alakòl siarèla dör schö wé inukòl iéwa kibiie imalepa tò ié kos e' tsata. 44 Ie'pa ulitane tò inukòl kuò ate ese ié, erè ie' siarè, e' tò ie' wa itso' sènoie e' kos méttsa. E' kueki ye' tò ie' ché es.

### 13

Jesús tò iché tò Skèkòl wé olordawa  
(Mateo 24.1-2; Lucas 21.5-6)

1 Mik Jesús e' yéttsa Skèkòl wé a, età ittòkata ekòl tò iché ie' a:

—¡A s'wöbla'uk, isaú! U bua'buáè yöule ák bua'buuála wa.

2 Ie' iuté:

—U kos tso' bua'buáè sué a' tò íe, e' olordawa sèraa, iékwò è ké atpa ñi bata kí.

¿Ì wa só isuèmi tò ká i' erkwatke?  
(Mateo 24.3-28; Lucas 21.7-24; 17.22-24)

3 E' ukuökí ta ie'pa míyal kabata kiè Olivo tkèrka Skèkòl wé wöshaè ee. Jesús e' tkésér ta Pedro, Santiago, Juan ena Andrés e'pa tò ie' a' ichaké bānet: 4 "Ichö sa' a: ¿mik iyi ekkè wamblermi? ¿Ì wa só isuèmi tò iwamblerketke?"

5-6 Ie' iuté: "Tajè pé' datse e' chök tò ie'pa dör ye'. Icherarakitò: 'Ye' dör wé pairine'bitu idi' wa s'blúie e', ta pé' kíterarakitò tajè. E' kueki a' tso' wösh wa as ké yi tò a' kí'tò'ù.

7 "Mik a' tò ibiyò ttsé tò ká tajè wakpa ñippòke tajè wì a' dià a, età e' ké tò a' tkiuk. E' wake' tkòraè, erè ká i' erwami e' kianeia.

8 Ká kua'kí kua'kí wakpa ñippòraè ñita. Nies í tò ká wötí'weraè ká wa'ñe. Nies ká tseè wakpa tteraè bli tò tajè. Iyi ekkè dör erpa s'tsá weirketke kam ye' döne e' yöki ese. E' dör wés alakòl alá kurketke ta ikirirke es.

9 "A' e' kkò'nú. A' merdattsa s'shulòkwakpa a' ta a' burdaè siarè judiowak ñi dapa'wo wé a. Ie'pa tò a' keraè e' duókser shulé s'wòkirpa ena s'blúpa wörki ye' tté kueki. Es a' tò ye' tté pakeraè ie'pa a. 10 Erè kam ká i' erwa e' yöki ye' tté buaè e' kawötà pakè ká ulitane wakpa a. 11 Mik a' menettsa ttè shulòkwakpa a, età ké a' tkinuk jma a' e' tsatkòmi. Mik e' kéwò



de, etā kē a' ttōpa a' wákpa er wa, e' skéie Wikól Batse'r ttōraē a' wa. E' kuekī ttē eraē Skékōl tō a' a' chē e' chō. <sup>12</sup> Etā welepa tō iēl wōmerattsa ttēwa, iyē tō ilā wōmerattsa, ñies ala'r e' kōrakā iyē ena imī kkatōk ās ittōwā. <sup>13</sup> Sulitane tō a' sueraē suluē ye' ttē kuekī. Erē yi e' tkēwā darērēē dōkā bata ekkē, esepa tsatkērdaē.

<sup>14</sup> “Íyi sulusi tō i dōr batse'r ia'wē ñáie e' tkērdaā wē kē ikawōtā tkēkē eē\* (yi tso' yēkkuō i' sauk, e' éna iwā anú). Mik e' suē a' tō, etā wépa serke Judea e'pa tkōyalmi kabata a. <sup>15</sup> Ýi tso' u bata kī ese kē dōkwāne weshkē íyi yōktsa, itkōshkarmi. <sup>16</sup> Ñies yi tso' kaneblōk kañikā ese kē dōkwāne weshkē idatsi' yōktsa. <sup>17</sup> E' kēwō ska' tā alakōlpa alā kūrketke ena alakōlpa tsu' muke ilā a jwēstela ina esepa tā! <sup>18-19</sup> S'ditsō weirdaē taiē shuṭē kos kē s'we'ikule ekkē mik ká yō' Skékōl tō dō ikkē tā, ñies kos kē s'weirpa aishkuō tā ekkē. E' kuekī ikiō Skékōl a as kē e' wamblēr a' tā yuēdiō kēska'. <sup>20</sup> E' kēwō kē wōōpawa Skékōl tō, e' ma kē yi isie atukia tsts'ka. Erē e' kēwō wōerawaitō, wépa shukitbakitō esepa dalērmik.

<sup>21-22</sup> “Kachōkwakpa e' kōrakā e' chōk tō ie'pa dōr wē pairine'bitū idi' wa s'blúie e' ō ie'pa dōr Skékōl ttekol wele. E'pa tō i kē or yi a ese weraē s'kitō'woie tō ie'pa ttē dōr mokjē. Dō wépa shukit Skékōl tō, esepa kitō'wēmi e' mú kitērmī e'ma. E' kuekī yile tō ichē a' a: 'Isaú, wē pairine'bitū idi' wa s'blúie e' dur jē', ō 'Isaú, idur wjē', e' tā kē a' tō ikló'war. <sup>23</sup> ¡A' tso' erki! Íyi ekkē biyō chétkeyō a' a keweise.

*Jesús dōrane olo tā' taiē*  
(Mateo 24.29-35, 42, 44; Lucas 21.25-36)

<sup>24</sup> “Erē s'weine e' kēwō tka, etā diwō wōtuirdawā, ñies si'wō kē wōñarpaia. <sup>25</sup> Bēkwō darolordaē ena i kos tso' ká jai a' e' wōtjirdaē. <sup>26</sup> Etā ye' dōr S'ditsō Alā, e' datse mō a' diché tā' taiē olo tā' taiē, e' wērdaē. <sup>27</sup> Skékōl biyōchōkwakpa patkeramiyō wépa shukitbakjō, esepa dapa'ukka ek tsjinet ēme. Ie'pa tō iyuleraē ká wa'ñe dō wē ká i' bata erkerō eē ena wē ká jai bata erkerō eē.

<sup>28</sup> “A' e' wōbla'ú ttē ikkē wa iwā saú higo klō wa: Mik iulatska tso' ulōlōla ena erpa ikōyōk tskirdokā, etā a' wā ijcher tō duas dewatke tsjinet. <sup>29</sup> Es ñies mik a' tō isuē tō íyi ekkē wamblērke, etā a' wā ijchenū tō ye' datskene, e' diwō dewatke tsjinet. <sup>30</sup> Mokjē ye' tō a' a' ichē tō íyi ekkē wamblērdaē wépa dōr wēs a' es esepa kam erwa e' yōkī. <sup>31</sup> Kashuk ena ká i' erdawa, erē ye' ttē michoē e' kē erpawa yēs.

<sup>32</sup> “Erē e' kēwō e' diwō kē jcher yi wā. Skékōl biyōchōkwakpa tso' ká jai a, e'pa kē wā ijcher, ñies ye' dōr Skékōl Alā e' kē wā ijcher. S'yé ē wā ijcher.

\* 13:14 Íyi sulusi...tkēkē eē: Mateo 24.15 saú.

<sup>33</sup> “A' kē wā ijcher wēkkē tā idiwō de, e' kuekī a' tso' erki, a' senú wōsh wa. <sup>34</sup> E' dōr wēs wēm ekōl mi'keā kamiē ká kuā'kī a' es. Ie' tō ichē ikanē mēsopa a: 'U kkō'nú ña'. Etā kanē tulēgūtō ie'pa bik ekkē a. Ie' tō ichē ie' ká wékkō kkō'mukwak a: 'Be' tso' wōsh wa.' <sup>35</sup> Es ñies a' tso' erki. A' kē wā ijcher mik ye' dōr wēs u wák es e' dotkene. Ye' dōmibitū ká tuinetke ekkē alē, ká shābōts alē, dakro ane ekkē alē ō ká ñine alē tā. <sup>36</sup> A' tso' wōsh wa dō' a' kuēwayō kapē a. <sup>37</sup> Ttē chéyō a' a, e' chekeyō sulitane a: ¡A' tso' wōsh wa!”

**14**

*Judiowak wōkirpa tō Jesús aleritsé klō'wēwā*

(Mateo 26.1-5; Lucas 22.1-2; Juan 11.45-53)

<sup>1</sup> Ká bōt ē kianeia Judiwak Yépa Yērulune Egipto e' kēwō tkō'woie. Ñies e' kēwō ska' tā Pan Kē Yōule Iwōlōwōkā Wa e' kēwō tkō'weke judiowak tō. Sacerdotepa wōkirpa ena s'wōbla'uk ttē dalōiēno wa wakpa tō Jesús aleritsé kitō'wē ikló'wōwā ttēwā. <sup>2</sup> Ie'pa welepa tō ichē:

–Kē sō wamblō Se' Yépa Yērulune Egipto e' kēwō a' as pē' kē shuṭjirka. E' kuekī ie'pa éna ikló'wakwā ikitē wa.

*Jesús klō kī kiō masmas tékā alakōl ekōl tō*  
(Mateo 26.6-13; Juan 12.1-8)

<sup>3</sup> Jesús mineā Betania, Simón kiri'uk lepra bak, e' u a. Ie' tkēria mesa kī, e' dalewa alakōl debitū ekōl e' wā kiō masmas kiē nardo ese chōkle tuē darērē, ese debitū. Kiō e' ukkuō yōule ák kiē alabastro e' wa. Kiō ukkuō kuli' pēwaitō tā itēkā Jesús wōkir kī. <sup>4</sup> Welepa uluneka ie' kī tā iñi a' ichérak:

–¿Í kuekī alakōl tō kiō we'ikéwa? <sup>5</sup> Ituē darērē dōkā s'kaneblō duas ek ské ekkē. Iwatormittsa s'siarēpa kimoie.

Etā suluē ie'pa tō alakōl e' pakē.

<sup>6</sup> Erē Jesús tō ichē:

–Imuāt bērē. ¿Í kuekī a' itsiriweke? Íyi buaē kanewē ie' tō ye' a. <sup>7</sup> S'siarēpa tso' kēkraē a' shuā, etā e'pa kīmēmi a' tō mik a' kī ikiane e' tā. Erē ye' kē ku' kēkraē a' tā. <sup>8</sup> Ie' tō iwē ye' a' kos ie' a' ior ekkē. Ie' kiō té ye' kī ye' kanēwoie kam ye' nu wōtērwa e' yōkī. <sup>9</sup> Mokjē ye' tō a' a' ichē tō ká wa'ñe wē Skékōl ttē buaē pakarke eē ipakardaē ñies tō ie' tō i' buaē g' ye' a. Es e' kē chōpawa yi éna.

*Judas tō Jesús wōmēttsā*  
(Mateo 26.14-16; Lucas 22.3-6)

<sup>10</sup> Jesús ttōkatapa dabom eyōk kī bōl, e' ekōl dōr Judas Iscariote, e' miā sacerdotepa wōkirpa ska' ichōk tō ye' a' Jesús mermittsa a' a. <sup>11</sup> Mik e' tstsē ie'pa tō, etā ittse'nerak buaē tā ikablé ie' a' inukōl muk. Etā ie' tō kawō yulēmi bua'iewā Jesús wōmōttsa.

*Jesús bata chkéia ittōkatapa ta*  
(Mateo 26.17-29; Lucas 22.7-23; Juan 13.21-30; 1 Corintios 11.23-26)

<sup>12</sup> Kawō kiè Pan Kē Yōule Iwōlōwōkā Wa e' kēwō tsā diwō dewatke\* E' diwō wa ie'pa obeja pupula jcheke Judiowak Yēpa Yērulune Egipto, e' kēwō tkō'woie. Etā Jesús ttōkatapa tō ie' a ichaké:

—ǀWé be' kī kiane tō sa' mi' kawō tkō'wekesō e' chké kanēuk be' a?

<sup>13</sup> Ie' tō iché ie'pa bōl a:

—A' yú Jerusalén. Mik a' demi ee, etā wēm kueraè a' tō ekōl, e' wā di' dami skauña a. E' itōkī a' yú. <sup>14</sup> Tā u wé a ie' demi e' wāk a ichō: 'S'wōbla'ukwak be' chakōk ké: ǀUshu wé a ie' tō kawō tkō'wekesō e' chké nēmi ie' ttōkatapa tā?' <sup>15</sup> Ie' tō úshu bērie tso' kākke tso'tke kanequle buaè, e' kkacheraè a' a. Eè ichké kanēu se' a.

<sup>16</sup> Etā ie'pa bōl míyal Jerusalén ta íyi ulitane kuérakitō wes ie' tō iché es. Eè chké kanewérakitō kawō tkō'woie.

<sup>17</sup> Mik ká tuine, etā ie' debitu ittōkatapa dabom eyōk kī bōl, e'pa tā. <sup>18</sup> Mik ie'pa e' tulēsér chkök, etā ie' tō iché ie'pa a:

—Mokī ye' tō a' a iché tō a' ekōl tō ye' wōmerattsā. E' wāk tso' ye' tā chkök.

<sup>19</sup> Etā ie'pa erianeka tajē tā ie'pa tō ie' a ichakémi ekōl ekōl:

—ǀYe' alè idir?

<sup>20</sup> Ie' tō iūté:

—E' dōr a' dabom eyōk kī bōl tso' ye' tā pan nuuk tkā' etké a nē, e' ekōl. <sup>21</sup> Ye' dōr S'ditsō Alà e' tā itkōraè wes itso' kitule Skékōl yēkkuō kī es. Erē wētela ina yi ye' wōmekettsā e' tā. jBuaè idir wēm e' a tō kē ikunúpa!

<sup>22</sup> Ie'pa tso'ia chkök, e' shua pan klō'wéitō, e' kī wētela chéitō Skékōl a tā iblatéitō watié ie'pa a tā ichéitō:

—Pan sē dōr ye' chká, e' nū a' tō.

<sup>23</sup> E' ukuōkī tkā' a vino tso', e' klō'wéitō, e' kī wētela chéitō Skékōl a tā ie'pa ulitane tō tkā' e' wayé. <sup>24</sup> Ie' tō iché ie'pa a:

—Vino sē dōr ye' pé. Ye' tterawa e' pé' tērdaè tajē, e' wa ttē pa'alī me' Skékōl tō, e' wā de. E' wa pé' tajē tsatkēraè. <sup>25</sup> Mokī ye' a' a iché tō kē yepaiayō dō mik i blúie Skékōl tso' e' kēwō de etā. Mik ide, etā iskā yeraneyō a' tā.

*Pedro tō icheraè tō ie' kē wā Jesús suule*  
(Mateo 26.30-35; Lucas 22.31-34; Juan 13.36-38)

<sup>26</sup> Etā ie'pa tō Skékōl tseittsē, e' ukuōkī tā ie'pa míyal Olivo kēbata a. <sup>27</sup> Jesús tō iché ie'pa a:

—A' ulitane tkōyaldaè. A' ye' meatdaè ekōrla. E' dōr wes itso' kitule Skékōl

yēkkuō kī es, e' tō iché: 'Obeja kkō'nukwak ttewaraeyō, etā obeja pordami wī a dià a.'†  
<sup>28</sup> Erē mik ye' ttēwā shkenekane, e' ukuōkī tā ye' miraè Galilea a' yōkī kewe.

<sup>29</sup> Pedro tō ie' a iché:

—Erē ie'pa ulitane be' memiat ekōrla, erē ye' kē tō be' mepaat.

<sup>30</sup> Ie' iūté:

—Mokī ye' tō be' a iché tō i' nañewe, kam dakro skā arne, e' yōkī be' tō icheraè mañatōkicha tō be' kē wā ye' suule.

<sup>31</sup> Erē Pedro tō ikī ché ia krōrōè:

—Erē ye' ttewamirakitō be' tā, erē kē ye' ichepa tō kē ye' wā be' suule.

Etā ie'pa ulitane ttōke es ème.

*Jesús ttē S'yé tā Getsemani*  
(Mateo 26.36-46; Lucas 22.39-46)

<sup>32</sup> E' ukuōkī tā ie'pa míyal ká kiè Getsemani ee. Jesús tō iché ittōkatapa a:

—A' atē tuler íe, ye' miā ttōk S'yé tā.

<sup>33</sup> Pedro, Santiago ena Juan e'pa mítser iwa e' tā. Etā ie' erianemi chkenewami tajē.

<sup>34</sup> Ie' tō iché ie'pa a:

—Ye' eriane tajē tšeskuia ye' ttewamiitō ekkē. A' e' tsuāt íe, kē a' kapōkwa.

<sup>35</sup> E' ukuōkī ie' miā wishke tā ie' e' kēutēr wōwakkōt iskī tā ikiéitō Skékōl a tō i' tkōraè ie' tā, e' diwō tkōami ie' kī, e' tā itkōúu.

<sup>36</sup> Ie' iché: "A yēwōla, íyi ulitane ormi be' a. Ì tkōraè ye' tā e' dōr wes íyi bacha'bachaè yēwasō es. E' ulā a ye' yōttsa. Erē kē iwar wes ye' kī ikiane es, iū wes be' kī ikiane es."

<sup>37</sup> E' ukuōkī tā ie' dene wé ittōkatapa tuler ee tā ie'pa kuéitō kapōtuler. Ie' tō iché Pedro a:

—A Simón, ǀbe' kapōwā? ǀKē be' wā kapēwā wōklōne dō hora ek è? <sup>38</sup> Kē a' kapōkwa. A' ikiō Skékōl a as i sulu tō a' erkiōwēke ese kē e' alōkā a' kī. Mokī a' éna ì buaè wāk, erē a' diché kē dē'kā iwā uk, e' kuekī a' a daréréè idir.

<sup>39</sup> Ie' miāne tā ttē Skékōl a wes kewe ittē es. <sup>40</sup> Mik ie' dene tā ie'pa kuéneitō kapōtuler; ie'pa wōbla surirkewa kapē wā e' kuekī. Ie'pa kē wā ttē kune ie' iutoie. <sup>41</sup> Ie' skā miāne ttōk S'yé tā e' dene, i' tā idare mañatōkicha, etā ie' tō iché iğarak:

—ǀA' kapōtuleria enukeia? Wē' a' kapōwa. Ye' dōr S'ditsō Alà, e' diwō dekatke mēttsā pé' sulusipa ulā a. <sup>42</sup> A' e' kōkā, yi tō ye' wōmekettsā, e' dotke i' tā. Mishka ie' panuk.

*Jesús klō'wéwā ibolōkpa tō*  
(Mateo 26.47-56; Lucas 22.47-53; Juan 18.2-11)

<sup>43</sup> Jesús tso'ia ttōk, e' dalewa ittōkatapa dabom eyōk kī bōl, e' ekōl kiè Judas, e' debitu pé' tā tajē. E' wakpa debitu tabē

\* **14:12** Pan Kē Yōule Iwōlōwōkā Wa e' kēwō: Kawō e' tkō'weke judiowak tō dō ká kul, e' tsā diwō kiérakitō Se' Yēpa Yērulune Egipto e' kēwō. † **14:27** Zacarias 13.7

kj ena kal wölo kj. Ie'pa patkë'mi sacerdotepa wökirpa ena s'wöbla'uk ttë dalöiëno wa wakpa ena judiowak kueblupa ekkëpa tö. <sup>44</sup> Judas dör iwömëttsa e' tö ie'pa a iyë'bak: "Wé shké'wéyo wöalattse wa, e' dör ie', iklö'üwä a' tö ta itsümi kkö'naule buaë as kë itköshkar." <sup>45</sup> Etä ie' e' skéwä Jesús o'mik ta iché iä:

—jA S'wöbla'ukwak!  
Ta iwöalattséwäitö. <sup>46</sup> Etä Jesús klö'wéwä pë' tö.

<sup>47</sup> Erë ie'pa iëter ee, e' eköl tö itabë yëttsa ta e' wa sacerdotete kibi e' kanë méso kukuöña téttsa. <sup>48</sup> Etä Jesús tö ichaké pë' ekkëpa a:

—jI kuekj a' bite ye' klö'ukwä tabë kj kal wölo kj wes akblök'wakpa klö'wéwä es?

<sup>49</sup> Këkraë ye' bak a' shüa s'wöbla'uk Skéköl wé a, erë a' ké wä ye' klö'önewä. Erë i' tköke as itkö wes itsö' kitule Skéköl yëkküö kj es.

<sup>50</sup> Etä ittök'atapa kos tkayalmi tö iméat ekörla. <sup>51</sup> Erë duladula eköl dowä ie' itöki e' patrëwäbitü ka' kishuo wa, e' klö'wéwarakitö, <sup>52</sup> erë idatsi' ppëeatitö wak tkashkarmi sume.

*Jesús demi ie'pa wä Judiowak wökir kibipa wörkj*

(Mateo 26.57-68; Lucas 22.54-55,63-71; Juan 18.12-14,19-24)

<sup>53</sup> Jesús tsémirakitö sacerdotete kibi ska'. Etä eë sacerdotepa wökirpa malepa ena judiowak kueblupa ena s'wöbla'uk ttë dalöiëno wa wakpa kos dapparke. <sup>54</sup> Pedro datse ie'pa itöki kãmië dötsä sacerdotete kibi u pamik, etä ee ie' e' tséat tkër Skéköl wé shkëkipa ta bö' baiklök.

<sup>55</sup> Etä sacerdotepa wökirpa ena judiowak wökirpa malepa tö ttë yuleke Jesús kkatöie as ie'pa tö iwömüttsa ttëwä, erë kë ie'pa wä i' ttë kune ikkatöie. <sup>56</sup> Tajë pë' de ie' kkatök kachë wa, erë ie'pa ttë kë dë'ttsa nüttsëë. <sup>57</sup> Welepa tö ie' kkatëmi kachë wa ta ichërakitö:

<sup>58</sup> —Sa' tö ie' ttsé'wä ichök tö Skéköl wé yo' s'ditsö tö i', e' olo'yerawäitö ta iské, kë yöne s'ditsö wä, ese yuérakaneitö kã mañat shüa.

<sup>59</sup> Erë ie'pa ttë kë dë'ttsa nüttsëë.

<sup>60</sup> Etä sacerdotete kibi e' kékã iyamipa shüa, ta Jesús a' ichakéitö:

—jKë be' ie'pa iütëku' yës? jÑe' ie'pa be' kkatëke, e' dör i'?

<sup>61</sup> Erë Jesús siwä'bléwä ie'pa yöki, kë ie' wä i' iütënë.

Sacerdotete kibi ie' skä chaké:

—jBe' dör wé pairine'bitü idi' wa sa' blúie e'? jBe' dör Skéköl kikaulekã tajë e' Alä?

<sup>62</sup> Jesús ie' iütë:

—Tö, ye' idir. Ye' dör S'ditsö Alä e' suëraë a' tö tkërka Skéköl diché ta' i'yi ulitane tsata' e' ulä bua'kka dalöiërtã tajë. Nies ye' datskene kashuk a' mö a' e' suëraë a' tö.

<sup>63</sup> Etä sacerdotete kibi e' datsi' jchéé ikkachoie tö iluneka ta ichéitö:

—jIe se' kj ikkatökwakpa kj kiarmiã? <sup>64</sup> A' ittsé tö ie' e' chö tö ie' dör Skéköl Alä, e' wa ie' tso' Skéköl chök suluë. jWes a' iweké?

Ie'pa ulitane nï sini'kuë tö ie' iãne iwiie, e' kuekj ikãwötã ttëwä.

<sup>65</sup> Ie'pa welepa wirituëmi iki nïes iwöbla pabakëwarakitö ta itërakitö ta ichakërakitö:

—Be' dör Skéköl tteköl, e' ma sa' a' ichökã jyi tö be' té?

Etä Skéköl wé shkëkipa tö ippë iwö kj tajë.

*Pedro tö iblé tö kë ie' wä Jesús suule*  
(Mateo 26.69-75; Lucas 22.56-62; Juan 18.15-18,25-29)

<sup>66</sup> Pedro tkëria jskj u pamik, e' dalewa tayëla debitü e' dör sacerdotete kibi e' kanë méso eköl. <sup>67</sup> Ie' Pedro suë bö'iklök, ta isueitö krereë ta ichéitö iä:

—Be' nïes dör Jesús Nazaret wak e' klé eköl.

<sup>68</sup> Pedro tö iblé. Ie' tö iché:

—Kë ye' wä ie' suule. Ye' kë éna iãne tö i' chök be' tso'.

Etä ie' e' yëttsa ukkö a. E' wöshäë dakro ane. <sup>69</sup> Kanë méso ñe' tö Pedro suëne ta ie' e' kékã ichök imalepa a:

—Ie' i' dör Jesús klépa e' eköl.

<sup>70</sup> Erë Pedro tö iskã bléne. E' kuölö ta wépa tso' ee nïes e'pa tö iché ie' a:

—Be' dör Galilea wak, e' kuekj mokj be' dör ie'pa éltë wak.

<sup>71</sup> Ie' tö iché:

—jSkéköl wörkj ye' ichë tö wëm chök a' tso' e' kë suule ye' wä! Kë idör es, e' ma as ye' kichatër.

<sup>72</sup> E' wöshäë ta dakro ane etökichane, ta ie' éna iãnewä tö Jesús tö ie' a' iyë': 'Kam dakro skä arne e' yöki be' icheraë mañatökicha tö be' kë wä ye' suule.' Etä ie' jékã tajë.

## 15

*Jesús mitsër Pilato wörkj*  
(Mateo 27.1-2,11-14; Lucas 23.1-5; Juan 18.28-38)

<sup>1</sup> Mik kã ñine, etä sacerdotepa wökirpa ena judiowak kueblupa ena s'wöbla'uk ttë dalöiëno wa wakpa nï dapa'wékã ta Jesús aleritsétke. Ie'pa wä imitsër moulewä mé Pilato a. <sup>2</sup> Pilato tö ichaké ie' a:

—jBe' dör judiowak blü?

Ie' iütë:

—Tö, wes be' iché, e' ma es idir.

<sup>3</sup> Sacerdotepa wökirpa tö ie' kkaté tajë.

<sup>4</sup> Etä Pilato tö iskã chakéne:

—Ñekkë ie'pa be' kkaté jé' ttsébö? jI' kuekj e' kë iütëbö?

<sup>5</sup> Erë ie' kë wä iütënë, e' tö itkiwéwä darërëë.

*Jesús métsã ttëwä*  
(Mateo 27.15-31; Lucas 23.13-25; Juan 18.38-19.16)

6 Judiowak Yépa Yërulune Egipto e' k'éwö wa Pilato wöblar s'wötëulewá s'wöto wé a ese yöktsá eköl émine wé kié pë' tò e'. 7 Wëm kié Barrabás e' tso' wötëulewá s'wöto wé a imalepa sulusipa tã. Ie'pa wá s'kötulewá mik ie'pa e' ka'ka ñippök romawakpa tã etã. 8 Ta pë' debitu Pilato ska' e'pa tã ikíe ie' a tò iú wës iwöblar es. 9-10 Ie' tò isuégwá tò ukyëne wa sacerdotepa wókirpa tò Jesús me'ttsá ie' ulá a. E' kuekí ie' tò ichakérak iã:

—A' judiowak blú ç'e' èmineyö?

11 Erë sacerdotepa wókirpa tò pë' shutiwékátke as ie'pa tò kiö Pilato a tò Barrabás yótttsá Jesús skéie. 12 Pilato tò ichakéne:

—Etã çwës a' k' kiane tò ye' tò wëm kié a' tò judiowak blú e' wë?

13 Ie'pa iüté aneule:

—jwötówá krus mik!

14 Ie' tò ichaké ie'pa a:

—ç'ì kuekí? ç'ì sulu wambléitö?

Erë ie'pa kí arke:

—jwötówá krus mik!

15 Ie' atak buaë ie'pa ta, e' kuekí Barrabás yétsáitö. Etã Jesús ppök patkémiitö ttsa' bata daloie wa. E' ukuökí tã ie' tò imétsá wötëwá krus mik.

16 Etã ñippökwakpa wá Jesús mítser ká e' wókir u kié Pretorio e' shua wé ulat tso' áie eë. Eë ie'pa tò ñippökwakpa malepa kiétsá dapa'wë ek tsini éme. 17 Ie'pa tò datsi' mat daloshdalosh ese iéka Jesús kí blu'ie. Nies dika'kicha yuerakitö wöshkiie tkékarakitö iwókir kí blu'ie iwayuoié. 18 E' ukuökí tã ie' wayuémirakitö aneule:

—jBe' dör judiowak blú! jBe' kíkókká sa' tso'!

19 Etã ippémirakitö tajë iwókir kí kuaköl wölö wa ena iwiri tuérak ikí ena ie' e' tulésarak kuchë kí iwórkí iwayuök tò sú sa' be' dalóie.

20 Mik iwayué one, etã datsi' mat daloshdalosh, e' yétsarakitö tã iwák datsi' iékanerakitö ikí tã imítserak iwá wötëwá krus mik.

*Jesús wötëne krus mik*

(Mateo 27.32-44; Lucas 23.26-43; Juan 19.17-27)

21 Ñippökwakpa tò wëm kié Simón dör Cirene wak, e' kué ñalá kí, e' datse bánet micho Jerusalén. Ie' dör Alejandro ena Rufo yé. Ie' ké ie'pa tò Jesús krus tsükmi.

22 Ie'pa wá Jesús mítser ká kié Gólgota eë. (Gólgota e' wá kiane chë s'wókir diche.) 23 Etã vino shutuule kapóli kié mirra e' wa, ese mé Jesús a yë, erë ké ie' wá iyanewa. 24 Etã iwóterakitö krus mik. E' ukuökí tã ie'pa iné

ñi ma'woie suè tò wës ie'pa tò Jesús datsi' blatemi ñi a.

25 Mik ie'pa tò iwötëwá krus mik, etã diwö de sulitu (9). 26 Kaltak tso' e' kí itso' ki-tule tò ichë: “I' dör judiowak blú e'”, e' dör iwá kkachoié tò i nuí kí ie' wötënewá krus mik. 27-28 Nies wëpa ból akblókwakpa wötëwarakitö krus mik, eköl iulá bua'kka, eköl iulá bakl'kka.

29 Pë' tköke eë e'pa tò icheke sulu, iwókir wótiukerak iwöa, es ichekerakitö:

—jKëta, be' se tò Skéköl wé tkekettsá etã ká mañat ë tã be' tò iyuékane! 30 jE'ma be' e' tsatkö, be' e' ówa krus se mik!

31 Es ñies sacerdotepa wókirpa ena s'wöbla'yuk ttë dalóieno wa wakpa tò Jesús wayueke. Ie'pa tò icheke ñi a:

—O'kapa tsatkéitö erë ie' wák kë a e' tsatké. 32 Mokí ie' dör wé pairine'bitu idi' wa s'blúie, mokí ie' dör se' Israel aleripa e' blú, e'ma as ie' e' ówa krus wí mik, e' iarma tã se' erblómi ie' mik.

Wëpa wötëne ie' tã krus mik e'pa tso'ñak ie' chök suluë.

*Jesús duowa*

(Mateo 27.45-56; Lucas 23.44-49; Juan 19.28-30)

33 Mik diwö de bata a, etã ká míá ttsettsëé ká wa'ñe dö tsáli diwö de mañat ekkë. 34 E' wöshá tã Jesús aneká tajë tã ichë: “Eloí, Eloí, çlemá sabactani?” (e' wá kiane chë: A ye' Kéköl, a ye' Kéköl, ç'ók be' ye' we'ikétsá?)

35 Welepa tso' eë, mik e'pa tò ttë e' ttsé tã ichéarakitö:

—ç'A' ittse? Ie' tso' Skéköl tteköl bak kié Elías, e' kiök.

36 Etã ie'pa eköl tunemi tò suiyök nuwéka vino shkóshkó wa e' tkékaitö kuaköl bata kí tã itkéwá ikkó mik as ikuyóitö. Ie'pa tò ichë:

—Imúat bër, ipanusö suè tò Elías datse iökwa.

37 Jesús aneká tajë tã isiwá' bata tké. 38 Etã Skéköl wé a ie'pa wá datsi' buririé ese shukuar u blatoie e' jchënane kákke dötsá iskí. 39 Etã Roma ñippökwakpa eköl dör capitán e' durshkó Jesús wómk. Mik e' tò isuè tò wës Jesús duowa, etã ichéitö:

—Mokí, wëm wí dör Skéköl Alá je'.

40 Nies alakólpa iëtër eë ie' kí sauk kamië. E' shua eköl dör María Magdala wak. Iéköl dör María e' dör Santiago tsirla ék ena José, e'pa mì. Iéköl dör Salomé. 41 Alakólpa e'pa bak shkók Jesús tã ena ikime' mik ibak Galilea etã. Nies alakólpa ská tso' tajë dë'bitu Jesús tã dö Jerusalén.

\* 15:42-43 Ká tuirketke: Judiowak ttë dalóieno tò ichë tò s'nu kë tsertá'mi éno diwö a. Éno diwö e' tkérkewami Viernes ká tuine ekkë. Nies ké idör buaë ie'pa a tò s'nu at áie nañewe. E' kuekí José Arimateawak éna Jesús nu akwa blëwá bet kam ká tuir e' yöki.

*Jesús nu wõtëne*  
(Mateo 27.57-61; Lucas 23.50-56; Juan 19.38-42)

<sup>42-43</sup> E' diwö dör judiowak a iyi kanëwojie eno diwö yöki. Kä tuirketke\* e' kueki wëm eköl kië José Arimateawak, e' kësik iéwä tä imiä Jesús nu kiök Pilato a blëwä. Ie' dör judiowak wökirpa e' eköl dalöiertä' tajë ese. Nies ie' tso' i blúie Skëköl tso' e' këwö panuk. <sup>44</sup> Pilato tkinewä tö Jesús duowatke, e' kueki ie' tö icapítan kié chakë tö moki Jesús duowatke. <sup>45</sup> Mik ie' wä ijchenewä, etä ie' tö Jesús nu këwö mé José a tsëmi. <sup>46</sup> E' ukuöki tä José tö datsi' ukuö bua'buwa saruru ese tué et. Jesús nu éwaitö krus mik, e' patrëwaitö datsi' ñe' wa blëwä ákuk biule s'nu blóie ese a. Etä ákuk kkö wötëwaitö ák bërie wa. <sup>47</sup> Wë Jesús nu menewä e' sué María Magdala wak ena María dör José mi, e'pa tö.

**16**

*Jesús shkenekane*  
(Mateo 28.1-10; Lucas 24.1-12; Juan 20.1-10)

<sup>1</sup> Mik eno diwö tka, etä María Magdala wak ena María dör Santiago mi ena Salomé e'pa tö kiö masmas bua'buwa ese tué mí ie'pa wä tëkä Jesús nu ki. <sup>2</sup> Etä domingo bla'mi erpa diwö tskine tä ie'pa míyal wë Jesús nu blëne eë. <sup>3</sup> Ie'pa ñi a iché:

—¿Yi tö se' a ák yëmittsä ákuk kkö a?

<sup>4</sup> Erë mik ie'pa tö iweblé, etä ie'pa tö isué tö ák rratune bánet. Ák e' dör bërie. <sup>5</sup> Mik ie'pa dewä ákuk a, etä ie'pa tö isué tö duladula tkër eköl ulä bua'kka, e' datsi' saruruë batsjë. Ie'pa tkinewä iyöki. <sup>6</sup> Erë ie'pa tö iché ie'pa a:

—Kë a' tkinukwä. Ye' éna iane tö a' tso' Jesús Nazaret wak këtewä krus mik e' nu yulök. Erë kë iku' íe, ie' shkenekane. Wë ie'pa tö ime'wä e' tö weblö. <sup>7</sup> A' yú Pedro ena ittökatapa malepa a ibiyö chök tö ie' mitke a' yöki këwe Galilea. Eë a' tö ie' suëraé wës ie' tö a' a' iyë' es.

<sup>8</sup> Alakölpa tkinewä painékä tajë, e' kueki ie' e' yélur ákuk a tkayalmi. Ie'pa suane, e' kueki kë wä i yëne yi a.

*María Magdala wak tö Jesús sué*

[ <sup>9</sup> Jesús shkenekane domingo bla'mi, e' ukuöki tä ie' e' kkaché këwe María Magdala wak a, e' a' ie' tö aknamapa bak kul (7) e' trëo'yal. <sup>10</sup> Etä alaköl e' míä ibiyö chök wépa bak shkök Jesús tä e'pa a. Ie'pa eriarke iü tulur siarë. <sup>11</sup> Erë mik ie'pa ittse tö Jesús shkenekane nies tö alaköl ñe' tö isué, etä kë ie'pa wä iklöone.

*Jesús ittökatapa bül e'pa tö ie' sué*  
(Lucas 24.13-35)

<sup>12</sup> E' ukuöki tä ittökatapa bül shkörami micho bánet, etä ñälä ki Jesús e' kkaché ie'pa a, erë iwër kuä'ki. <sup>13</sup> Etä ie'pa míyal ibiyö chök imalepa a, erë nies kë ie'pa wä ittö klöone.

*Jesús tö ittökatapa patké s'wöbla'uk*  
(Mateo 28.16-20; Lucas 24.36-49; Juan 20.19-23)

<sup>14</sup> E' ukuöki tä Jesús e' kkaché ittökatapa dabom eyök ki eköl e'pa a. Ie'pa tulur chkök e' dalewa ie' de. Wépa tö ie' shkenekane e' sué, e'pa ttö kë klöone ie'pa wä, ie'pa er darëré e' kueki. E' ki ie' tö ie'pa uñélor. <sup>15</sup> Etä ie' iché ie'pa a: “A' yú ká wa'ñe ye' tté buaé e' pakök sulitane a. <sup>16</sup> Yi erblé ye' mik tä ie' e' wöskué e sepa tsatkërdaé. Erë yi kë erblëne ye' mik e sepa kichatërdaé. <sup>17</sup> Wépa erblöke ye' mik e sepa tö i kë or yi a ese wëraé iwä kkachoie. Ye' ttö wa ie'pa tö aknamapa trë'werattsa, ñies ie'pa a imeraé ttoie s'ttö kuä'ki kuä'ki wa. <sup>18</sup> Tkabë chök klö'wéwä ie'pa tö ulä wa ö kapöli sulusi yëwarakitö, e' tä kë ie'pa döpa wës. Nies ie'pa ulä murakä s'kirirke e sepa ki tä ibuardane.”

*Jesús mikane ká jai a*  
(Lucas 24.50-53)

<sup>19</sup> Mik Skëképa Jesús tté e' ché one, etä ibutséka mia ká jai a tä eë ie' tkëser Skëköl ulä bua'kka. <sup>20</sup> Etä ittökatapa míyal ká wa'ñe Jesús tté buaé pakök. Skëképa Jesús tö ie'pa kímé, i kë or yi a ese uk. E' wa ie' tö iwä kkaché tö ie' tté dör mokij.\*

\* 16:20 Yëkkuö këchke wele tö 16.9-20 ki kuötkëkä. Ttè e' kë ku' yëkkuö këchke bua'ie ese ki.

## Jesus Tté Buaë Kit Lucas tö Lucas

Wëm tö yëkkuö i' kit e' wák kiè Lucas. Ie' tö ikit wëm eköl kiè Teófilo e' a. Welepa tö ibikeitsè tö Teófilo dör romawak eköl ena ie' dör kékëpa tajë ese. Lucas tö ie' a yëkkuö i' kit as i o' Jesús tö ena i wa s'wöblo'itö e' jcherwä ie' wa yësyësë.

Yëkkuö i' kî Lucas tso' ikkachök tö Jesús dë'bitu sulitane tsatök, Israel aleripa ena pe' ulitane. Jesús kè dë'bitu Israel aleripa ë a. Lucas tö ichë tö Jesús kune' kâ i' kî sulitane kimoie. Nies Lucas kî ikiane tö s'wä ijcherwä tö Jesús dë'bitu iYë ikkachök se' a.

Ì tso' kitule Colosenses 4.14 ena Filemón 24 ena 2 Timoteo 4.11, e' wa se' wä ijcher tö Lucas bak Pablo wapiök. Welepa tö ibikeitsè tö ie' kè dör Israel aleri. Ie' bak kaneblök s'kapeyökwakie. Nies welepa tö ibikeitsè tö ie' tö yëkkuö i' kit kâ kiè Roma ee Jesús kune' e' kî duas de dabom teryök (60) ena dabom kuryök kî sulitu (79) e' shü ulat.

### Tte tsá kitule

<sup>1-3</sup>A kékëpa tajë Teófilo, i o' Jesús tö sa' shüa mik ibak kâ i' kî eta, e' paka' sa' a wépa itsá su'bitu dö ibata ekkë e'pa tö. Ie'pa dör Jesús tte buaë e' kanéukwakpa. Tajë sa' malepa ima' shtë yëkkuö kî, erë kè idë'tsa wes ikiane shtë es. E' kuëkî ye' tö iwä chakéwa bua'iewä itsá dö ibataë. Es ye' isué tö buaë idir shtëmi be' a yëkkuö i' kî seraä wes ibak es <sup>4</sup>as be' éna iar tö tte wa be' wöblane, e' dör moki.

### Juan S'wöskuökwak kurke e' biyö yëne

<sup>5</sup>Mik Herodes bak judiowak blüie eta sacerdotè tso' eköl kiè Zacarías. Judiowak sacerdotèpa nü dapa'ule erule erule kaneblök Skéköl wé a. Zacarías dör sacerdotèpa erule kiè Abías wakpa e' eköl. Ie' alaköl kiè Elisabet, e' dör nies sacerdotèpa ditséwö wes iwëm es. <sup>6</sup>Ie'pa bül serke yësyësë Skéköl wöa. Ie'pa tö Skéköl tte me'bak dalöieno, e' dalöieke buaë, kè kî i' sulu tte ta'. <sup>7</sup>Erë Elisabet kè dötä' aläë. Nies ie'pa bül dör kékëpalatke.

<sup>8</sup>Etökicha ta' mik Zacarías ena imalepa kane iwakanéuk Skéköl wé a, <sup>9</sup>eta ie'pa iné ilè wa wes ie'pa wöblar es isuoie tö yi kane shkökwa Skéköl wé shüa iyi masmas ña'uk Skéköl a. Eta idettsä tö Zacarías kawötä shkökwa. <sup>10</sup>Mik ie' tso' Skéköl wé shüa iyi masmas ña'uk, e' dalewa tajë s'daparke u'rki ttök S'yé ta'. <sup>11</sup>E' wöshä ta' Skéköl biyöchökwa eköl e' kkachéwa ie' a kâ' tso' iyi masmas ña'woie Skéköl a e' ulä bua'kka. <sup>12</sup>Mik ie' tö Skéköl biyöchökwa sué ta' ie' tkinewa suane tajë iyöki. <sup>13</sup>Eta biyöchökwa tö ichë ie' a:

—A Zacarías, kè be' suanuk. Ì kié be' tö Skéköl a, e' meraëitö be' a. Be' alaköl dör Elisabet, e' döraë aläë, e' wák wëm. Ie' kiè mükä a' tö Juan. <sup>14-15</sup>Ie' döraë kékëpa tajë Skéköl wöa. E' kuëkî e' be' ttsë'weraë buaë kaneë. Nies ie' tö tajë pe' ttsë'weraë buaë. Ie' kè i' shköshkö yepa. Kam ie' kur eta Wiköl Batse'r döraë ie' kî tajë. <sup>16</sup>Ie' tö Israel aleripa tajë, e' kerane ie'pa Kéköl yulökne. <sup>17</sup>Ie' döraë Skéköl yöki kéwe itte pakök. Ie' tö ipakeraë Wiköl Batse'r diché tajë e' wa wes Skéköl tteköl kiè Elías bak kâ iaiaë es. Ie' ipakeraë as iyë er buarne ila'r kî ena ila'r er buarne iyë kî. Nies ipakeraëitö as wépa tö Skéköl tte dalöesewéwa, esepa e' wöbla'ü senuk yësyësë. Es ie' tö ie'pa patteraë Skéköl datse' e' panoie.

<sup>18</sup>Eta Zacarías tö Skéköl biyöchökwa a ichakë:

—Ï wa be' ye' a ikkachëmi tö tte e' dör moki? Ye' dör kékëpalatke. Nies ye' alaköl dewatke kékëpalatke, ta' zwas sa' alala kökamiä?

<sup>19</sup>Ie' iütë:

—Ye' dör Gabriel. Ye' kaneblöke Skéköl a. Ie' ye' patké tte buaë i' chök be' a. <sup>20</sup>Erë be' kè wa ye' tte klöone, e' kuëkî be' ttö wöblerdawa kè ttöpaia dö mik be' alä kune eta. Mik i' chéyö be' a e' kèwö de, eta be' ttörane.

<sup>21</sup>E' dalewa ie'pa tso' Zacarías panuk u'rki, e'pa tö ibikeitsè, “Ï tö ie' wöklö'wé, e' kè dötsä bet Skéköl wé a?” <sup>22</sup>Mik ie' dettsä, eta ie'pa tö isué tö ie' ttö wöblënewa, kè ie' ttöia ta' ulä ë wa ie' tö iwä kkaché ie'pa a. Eta ie'pa éna ione tö ilè suëitö kabsueie. Es ie' atë me'ie.

<sup>23</sup>Mik ie' kanë one Skéköl wé a, eta imiáne iu a. <sup>24</sup>E' ukuöki ta' ie' alaköl Elisabet duneka. Ie' e' tkéwa iu a dö si' skël, kè dë'ttsä wérö. <sup>25</sup>Ie' tö ichë, “Ikképa Skéköl tö alä mé ye' a. Es ie' er buaë ché ye' a, ekkë ye' jaëne.”

### Jesus kurke e' biyö yëne

<sup>26</sup>Elisabet duneka e' kî si' de teröl, eta Skéköl tö ibiyöchökwa kiè Gabriel, e' patké Nazaret, kâ e' atë Galilea. <sup>27</sup>Eë busi serke eköl kiè Maria. Ie' kam ser wëm ta', erë ie' tte meule wëm eköl kiè José e' a senuwa ie' ta'. José dör blu' bak kiè David e' aleri eköl. <sup>28</sup>Eta Skéköl biyöchökwa dewä wé María tkër ee, ta' ichéitö ie' a:

—Ïs be' shkëne? Skéköl er buaë ché be' a. Ie' tso'ie be' a.

<sup>29</sup>Tte e' tö María tkiwéwa ta' ibikeitsëitö, “Jök ye' shkë'wé es?” <sup>30</sup>Eta Skéköl biyöchökwa tö ichë ie' a:

—A Maria, Skéköl er buaë ché be' a, e' kuëkî kè be' suanuk. <sup>31</sup>Be' durkaraë, be' alä kurdaë wák dör wëm, ikiè mükabö Jesús. <sup>32</sup>Ie' döraë kékë tajë, dalö tajë. Ie' kirdaë Skéköl dör iyi ulitane tsata, e' Alä. Skéköl tö

ie' meraka blu'ie wēs iyē bak kiē David es  
33 as Jacob aleripa wēttsqūtō blu'ie kēkraē kē  
ertā'wa.

34 Etā Mariā tō ichakē Skēkōl biyōchōkwak  
a:

—Kam ye' ser wēm tā, etā ζwēs ì ché be', e'  
wā tkōmi ye' tā?

35 Skēkōl biyōchōkwak iūtē:

—Wikōl Batse'r dōraē be' kī, Skēkōl dōr  
īyi ulitane tsāṭa e' diché ardaē be' kī. E'  
kuēkī be' alā kūrdaē, e' serdaē Skēkōl ē a.  
Ie' kirdaē Skēkōl Alā. 36 Nies be' yami kiē  
Elisabet kēkēpalatke cheke tō kē idōṭa' alāē,  
e' alā kūrdaē. Si' i' wa tā ie' kī ide si' terōl.

37 Ì kōs őr Skēkōl a, kē ì ku' darērē ie' a wē.

38 Etā Mariā tō ichē:

—Ye' dōr Skēkōl kanē mēso, as ie' tō iū ye'  
tā wēs be' ichē es.

Etā Skēkōl biyōchōkwak mīa.

*Mariā mīa Elisabet pakōk*

39 E' ukuōkī tā Mariā dali ié tā imīa bet  
Elisabet pakōk. Elisabet serke Judea kā dōr  
kabataie ee. 40 Mik ie' dewā Zacariās u a,  
etā ie' tō Elisabet shkē'wē. 41 Mik e' ttsē  
Elisabet tō, etā ilā wōṭi'ne tajē ie' shūa tā  
Wikōl Batse'r de ikī tajē. 42 Ie' ttēmi darērēē  
tā ichēitō Mariā a:

—Skēkōl er buaē ché be' a alakōlpa ulitane  
tsāṭa. Nies ie' er buaē ché be' alā kūrmi e'  
a. 43 Ye' siarē ζwēs e' a ie' er buaē ché tō ye'  
Kēkēpa mi e' de ye' pakōṭ? 44 Mik be' tō ye'  
shkē'wē e' ttsē yō, e' bet tā ye' alā wōṭi'ne ye'  
shūa ittēsē'ne buaē e' kuēkī. 45 Ì yē' Skēkōl  
tō be' a, e' klō'wēbō tō iwā tkōraē, e' kuēkī  
ayēcha buaē be' dōr.

46-49 Mariā tō ichē:

“Ye' dōr Skēkōl kanē mēso ēsela siarē ese ē,  
erē e' ska' ie' er de.

E' kuēkī ie' kīkekeka ye' tō.

Ie' dōr ye' tsāṭkōkwak, e' tō ye' ttsē'wēke buaē.  
Ie' diché tajē īyi ulitane tsāṭa, e' tō ì buaē  
shūṭēē wē ye' a.

E' kuēkī i'tami ye' yērdaē: ¡Ayēcha buaē!  
jSkēkōl dōr batse'r!

50 Wēpa tō ie' dalōieke, esepa suēke ie' tō  
kēkraē er siarē wa.

51 Ì kē őr yi a ese wēitō idiché tajē wa:  
Pē' e' ttsōka tajē esepa tō ì bikeitseke wē ese  
wōklō'wēitō.

52 Kā wōkirpa uyēttsājōtō ikulé kī,  
e' skēie s'siarēpa tkēkaitō.

53 Wēpa siarē kē wā ì ku' nē,  
esepa a ì buaē méitō tajē.

Erē inukōl blūpa esepa patkēmiitō ulā  
wōchka.

54 Israel aleripa dōr ie' kanē mēsopa.  
Kā iaiāē ie' tō ie'pa a iyē' tō ie' tō ie'pa suērāē  
er siarē wa.

Ttē e' kē chē'wa ie' éna.

55 Es ie' tō iyē'bak Abraham a,

ñies ie' aleripa kōs daiā ie' itōkī e'pa a.”

Es Mariā tō ichē.

56 Mariā senē Elisabet ska' dō si' mañat tā  
imīane iu a.

*Juan S'wōskuōkwak kune'*

57 Mik Elisabet alā kūrke e' kēwō de, etā  
iwā kune wēm. 58 Mik pē' serke tsinet ena  
iyamipa ekka, e'pa ibiyō ttsē tō Elisabet suē  
Skēkōl tō er siarē wa, etā ie'pa kōs ttsē'ne  
buaē wēs Elisabet es. 59 Mik ilā kune' e' kī  
kā de pākōl (8), etā ie'pa debitū ilā tottola  
kkuōlit tērke tsir, e' kēwō tkō'uk wēs ie'pa  
wōblane es iwā kkachoie tō alā e' dōr ju-  
diowak. Ie'pa éna iyē kiē Zacariās, e' kiē  
makka ikī. 60 Erē imi tō ichē:

—Au, ie' kirdaē Juan.

61 Ie'pa tō ichē:

—Kē yi ku' be' yamipa shūa kiē es. Etā ì  
kuēkī be' ikiē mekeka es?

62 Etā ie'pa ulā kkaché ichakoie alā yē a,  
“ζIma be' éna ikiē makka?” 63 Etā iyē tō  
kaltak kiē, e' kī ie' tō ishtë tō “ikiē Juan.” E'  
tō ie'pa kōs tkiwēwā. 64 E' wōshā tā Zacariās  
ttékane, etā Skēkōl kīkēka ie' tō tajē. 65 Pē'  
serke tsinet, e'pa kōs tkirulune tajē. Nies  
pē' kōs serke Judea kēbata a, e'pa shūa ittē  
buneka tajē. 66 Ie'pa ulitane tō ittē ttsē e'pa  
tō ibikeitsē: “Alā e' dōraē kēkēpa tajē.” Ie'pa  
isuē tō Skēkōl tso' ie' tā, e' kuēkī ie'pa tō  
ibikeitsē es.

*Zacariās tō Skēkōl kīkēka*

67 Etā Wikōl Batse'r de tajē Zacariās kī, e'  
wa ie' ttēmi Skēkōl ttekōlie tā ichēitō:

68 “Skēkōl dōr Israel aleripa Kēkōl,  
e' de ie' icha kōs tsāṭkōk,  
e' kuēkī ikikōkashō tajē.

69 Ie' tō S'tsāṭkōkwak diché tajē, e' patkē ekōl,  
e' dōr ie' kanē mēso bak kiē David e' aleri.

70 E' dōr wēs Skēkōl ttekōlpa batse'r  
bak kā iaiāē e'pa tō iyē'at es.

71 Skēkōl tō iyē'atbak tō ie' tō se' tsāṭkeraē  
s'bolōkpa ulā a,

ñies wēpa éna se' ar suluē esepa kōs yōkī.  
72 Ie' tō ittē batse'r me' se' yēpa bak kā iaiāē  
e'pa a

tō ie' se' suērāē er siarē wa,  
e' kē ska' ie' er chē'wa.

73 Ie' tō iyē' se' yē bak kā iaiāē kiē Abraham  
e' a

74 tō se' tsāṭkeraeitō s'bolōkpa ulā a  
as se' ser ie' a kē suarṭa',

75 ñies as se' ser batse'r ena yēsēsē ie' wōa  
se' tso'ia ttsē'ka e' dalewa.

76 A ye' bēbēla, mik be' de kēchke,  
etā be' mirāē kewe s'pattōk

as se' tō Skēkōl kiōwā buaē mik ide etā.  
E' kuēkī be' kirdaē Skēkōl dōr īyi ulitane  
tsāṭa, e' ttekōl.

77 Israel aleripa a be' tō ttē pakeraē

as ie'pa wa ijcher tō i sulu wambleke ie'pa tō,

e' olo'yemi Skëköl tō ie'pa kɪ itsatkoie.

<sup>78</sup> Skëköl tō se' suke er siarē wa, e' kuëkj ie' tō S'tsatkōkwak patkekebitu se' a datse ká jai a

olo ta' tajē wēs diwō tskir bla'mi es.

<sup>79</sup> Wépa tso' klōulewā i sulu ulā a wēs s'tso' stui a es,

wépa tso' iduökewatke e' ē kɪnuk, esepa wōa ká ñi'weraē ie' tō as itsatkërdak. Ie'pa wëttseraito sene bërē ie' ta' e' ñalē kɪ."

Es Zacariás tō iché.

<sup>80</sup> Juan talane de këhke ta' Wiköl Batse'r tso' tajē ie' a. Ie' sené ká wé kē yi serku' eē dō mik ikéwō de e' kkachoié Skëköl ttekolie Israel aleripa a eta.

2

Jesús kune' (Mateo 1.18-25)

<sup>1</sup> Juan kune', e' kéwō ska' ta, Roma wōkir kibi kié Augusto, e' tō ká kōs tso' ie' ulā a, e' wakpa kié shtök ké seraa. <sup>2</sup> (I dōr s'kié tsá kite mik Cirenio dōr ká kié Siria e' wōkir e' kéwō ska' ta.) <sup>3</sup> Sulitane kawōta shkōkne ká wé iyēpa datse eē e' kié shtök.

<sup>4-5</sup> José dōr David bak Israel blú e' aleri. David kune' Belén atē Judea eē. Erē José serke Nazaret atē Galilea eē. E' kuëkj ie' miá María ta Belén e' kié shtök. Ie'pa ttē meuletke ñi a senowāie, erē kam ie'pa serwa ñita. María batsō dur. <sup>6</sup> Ie'pa tso' Belén, e' dalewa ie' alā kurke, e' diwō de. <sup>7</sup> Wé s'kapōkerō, e' wé a, kē ká kuneia ie'pa a kapoie. E' kuëkj ie'pa miá iyiwak wé a kapōkrō. Eta eē ie' alā tsá kune wák wēm, ipatrewaitō datsi'tak batsi wa mékaitō iyiwak tioie ese kulé' a ká skéie.

Skëköl biyöchökwakpa tō ttē buaē ché obeja kkö'nukwakpa a

<sup>8</sup> E' nañewe tsinet Belén obeja kkö'nukwakpa tso' iyiwak kkö'nuk. <sup>9</sup> E' bet ta' Skëköl biyöchökwak de eköl ie'pa ska' ta Skëköl olo tajē e' olo buneka ie'pa pamik, e' yökj ie'pa suane tajē. <sup>10</sup> Erē Skëköl biyöchökwak tō iché ie'pa a: "Kē a' suanuk, ttē buaē datse ye' wa a' a, e' tō pē' ulitane tse'weraē buaē. <sup>11</sup> I'ñe a' tsatkōkwak kune David ká a, e' dōr Skëképa pairine'bitu idi' wa a' blúie e'. <sup>12</sup> A' tō ie' kueraē parratulewā datsi'tak batsi wa tēr kulé' tso' iyiwak tioie ese a. E' wa a' wa ijcher tō i ché ye' tō a' a, e' dōr mokj."

<sup>13</sup> E' bet ta' Skëköl biyöchökwakpa kɪ de tajē shute, e' tō Skëköl kikekeka ta' ichekerakitō:

14 "iSkëköl tso' ká jai a, e' kíkōkašō!

iÑies wépa a Skëköl er buaē chō as esepa ser bërē ñita ká i' kɪ!"

<sup>15</sup> Mik Skëköl biyöchökwakpa miyalne ká jai a, eta obeja kkö'nukwakpa tō iché ñi a:

—Mishka Belén, i ché Skëköl tō se' a, e' wá sauk.

<sup>16</sup> Eta ie'pa miyal bet, ta' María ena José kuéraitō, ta' iyēne tō alā ar iyiwak tio kulé a. <sup>17</sup> Mik ie'pa isué, eta i kōs ché Skëköl biyöchökwak tō ie'pa a alā e' kɪ, e' pakéne ie'pa tō itso'rak eē e'pa a. <sup>18</sup> Mik wépa tō, i ché obeja kkö'nukwakpa, e' tse, eta e'pa kōs tkirulune. <sup>19</sup> Ttē e' kōs bleke María tō ier a ta' ie' iwá bikeitseke ē. <sup>20</sup> Eta obeja kkö'nukwakpa miyalne. I kōs tse ie'pa tō, sué ie'pa tō, e' kɪ ie'pa tō Skëköl kikekarami.

Alala Jesús tsémi Skëköl wé a

<sup>21</sup> Mik alala kɪ ká de paköl (8), eta ie'pa itóttola kkuölit tēe tsir ta ikié mékarakitō Jesús wēs Skëköl biyöchökwak iyē' María a kam ie' buklurka e' yökj es.

<sup>22</sup> Mik Jesús kune' e' kɪ ká de dabom tkëyök (40), eta María ena José miá e' batse'uk\* wēs ttē dalöiēno kit Moisés tō e' tō iché es. Ie'pa wa ilā mí mè Skëköl a Skëköl wé atē Jerusalén eē. <sup>23</sup> Skëköl ttē dalöiēno e' kɪ itso' kitule e' tō iché: "Alaköl alā tsá kune wēm, e' kirdaē batse'r Skëköl a." E' kuëkj ie'pa wa ilā mí mè Skëköl a. <sup>24</sup> Ñies ie'pa miá iyiwak muk jché Skëköl a e' batse'woie wēs Skëköl ttē dalöiēno tō iché es: e' dōr dù kié tórtola, et wé'ñie ena et alaki ö nuböl pupula böt.

<sup>25</sup> E' kéwō ska' ta wēm serke Jerusalén kié Simeón. Ie' serke yēsýsē wēs Skëköl kɪ ikiane es. Skëköl tō Israel aleripa tsatkeke e' kéwō paneke ie' tō. Wiköl Batse'r tso' ie' a, <sup>26</sup> e' tō ie' a iyē: "be' kē blérpawā kam be' tō wé pairine'bitu idi' wa a' blúie patkeraē Skëköl tō e' saū e' yökj." <sup>27</sup> Ie' ittse Wiköl Batse'r wa tō ie' kawōta shkōk Skëköl wé a, e' kuëkj ie' miá demí eē. Eē ñies José ena María demí. Ie'pa wa ilala Jesús mí wakanewē wēs Moisés ttē dalöiēno tō iché es. <sup>28</sup> Simeón tō alala kékā ulā a ta' Skëköl kíkékaitō ta' ichéitō:

<sup>29</sup> "A Skëköl, ye' dōr be' kané méso, i yē' be' tō ye' a, e' wá suéyō.

E' kuëkj ire', ye' duówami bërē.

<sup>30</sup> Sa' tsatkōkwak patké be' tō e' wá suéiyāyō ye' wák wōbla wa.

<sup>31</sup> E' patké be' tō ká ulitane wakpa a.

<sup>32</sup> Ie' dōraē wēs ká olo es, pē' kē dōr judiowak esepa er ñi'woie as ie'pa éna be' ttē mokjē e' wá ar.

Ñies Israel aleripa dōr be' icha, e'pa kíkardakā tajē ie' batamik."

Es Simeón tō iché.

\* 2:22 e' batse'uk: E' batse'wē i' e' kē dōr wēs se' bribriwak e' batse'ù es awá wa i wa.



<sup>33</sup> Jesús ché Simeón tö Skëköl a, e' tö Jesús mi ena iyë tkiwéwa. <sup>34</sup> Ie' tö ikié Skëköl a as e' er buaë chö ie'pa a ta ichéitö María dör Jesús mi e' a:

–Skëköl ibikeitsbak tö alà i' kuekji se' Israel aleripa tajë tsatkërdaë ñies e'pa tajë weirdaë. Ie' tö Skëköl olo kkacheraë se' a, erë tajë pë' tö ie' waterattsa. <sup>35</sup> E' tö i' bikeit-sekesö e' wà kkacheraë. Be' er a idalërdaë tajë wës tabë tiëwa be' wák er a es.

<sup>36-38</sup> E' wöshã ta alaköl debitu eköl ie'pa ska' kië Ana, e' dör Skëköl tteköl. Ie' yë kië Fanuel, e' dör Aser aleri. Ie' dör kékëpalatke. Ie' sene'wã mik iia busi eta. Ie' sene' wëm e' ta duas kul (7) ë ta iwëm blënëwa. Ie' schönëwã e' kji duas de dabom paryök kji tkël (84). Ie' serkeie Skëköl wé a idalöiök ñië nañë S'yë ta tte wa ena batsë wa. Ie' tö wëstela chëmi Skëköl a alala Jesús kuekji. Ñies ipakëitö tajë Israel aleripa malepa tso' itsatkë panuk esepa a.

#### *José ena María míyalne Nazaret*

<sup>39</sup> Mik José ena María e'pa tö i' kës kanewé wës Skëköl ttë dalöiëno tö ichë es, eta ie'pa míyalne Nazaret atë Galilea ee, e' dör iwakpa kã. <sup>40</sup> Alala talar ë, e' tso' buaë, ñies ie' yörke buaë, ikabikeitsöke tajë ta Skëköl er buaë chöke ie' a.

#### *Jesús atë Skëköl wé a*

<sup>41</sup> Duas bit ta Jesús mi ena iyë mi'ke Jerusalén Judiowak Yëpa Yërulune Egipto e' kéwö tkö'uk. <sup>42</sup> Mik Jesús kji duas de dabom eyök kji bök (12), eta ie'pa míyal kawö e' skã tkö'uk wës ie'pa wöblar es. <sup>43</sup> Mik ikéwö tka, eta ie'pa míyalne iu a, erë Jesús atë Jerusalén, e' kë jcher imi wã iyë wa. <sup>44</sup> Ie'pa tö ibikeitsé tö ie' dami iyamipa ta. Ie'pa shkë kã et ta ie'pa isué tö Jesús kë ku' ie'pa ta. E' kuekji ie'pa iyulëmi iyamipa dami tajë e'pa shua. <sup>45</sup> Erë ie'pa kë wã ie' kune, e' kuekji ie'pa míyalne Jerusalén iyulökne.

<sup>46</sup> Kã de böiki es, eta ie'pa tö Jesús kué Skëköl wé a. Ie' tkër s'wöbla'uk ttë dalöiëno wa wakpa shua ikittösök ena ichakök. <sup>47</sup> Jesús tö iüteke e' ttsé ie'pa kës tö e'pa wökrarlune ittösök ena isa'uk tö wës ie' wã i'yi jcher tajë. <sup>48</sup> Mik imi ena iyë tö ie' sué ee, eta ie'pa tkinëwã. Eta imi tö iché ia:

–A alà, ¿iök be' e' wamblé sa' ta es? ¿iök be' tö be' yë ena ye' eriawé ekkë? Sa' be' yulë tajë.

<sup>49</sup> Jesús tö ie'pa iüté:

–¿iök a' ye' yulë tajë? ¿Wës a' kë wã ijcher tö a' ye' kueraë ye' Yë u a?

<sup>50</sup> Erë i' ché ie' tö, e' wã kë ane ie'pa éna.

<sup>51</sup> Eta imiãne ie'pa ta Nazaret ta ie' tö ie'pa ttö iüteke buaë kékraë. E' kës bleke imi tö ie' er a. <sup>52</sup> Jesús talarke buaë, ñies ie' kji yörke

tajë, kabikeitsöke buaë, wër buaë Skëköl wa, ñies s'ditsö wa.

## 3

#### *Juan S'wöskuökwak*

(Mateo 3.1-12; Marcos 1.1-8; Juan 1.19-28)

<sup>1-2</sup> Kã et ta Skëköl ttë Juan dör Zacarías alà e' ta wé kë yi serku' ee ipatkoie ittë pakök. E' kéwö ska' ta wëm kië Tiberio e' dör Roma wökir kibi. Ie' tkëneka kã e' wökirie, e' kji duas de dabom eyök kji skël (15). Ie' dikja kã tsit-sirpa wökirpa tso'. E'pa kië dör i' es: Poncio Pilato dör Judea wökir, Herodes dör Galilea wökir, e' ël kië Felipe e' dör Iturea ena Tracónítide e' wökir ena Lisaniás dör Abilinia wökir. E' kéwö ska' ta Anás ena Caifás e'pa dör judiowak sacerdotepa wökirpa. E' kéwö ska' ta Skëköl ttë Juan ta kã sir poë wé kë yi serku' ee. <sup>3</sup> Eta Juan míã di' kië Jordán kkómik pë' serke ee, e'pa a Skëköl ttë pakök. Ie' tö iché ie'pa a: “A' er mane'ü Skëköl a as a' nu' olo'yöitö a' kji ta a' e' wöskuölor iwã kkachoe.” <sup>4</sup> Isaías dör Skëköl tteköl e' tö Juan ttë kit kã iaiã Skëköl yëkkuö kji, e' tö ichë:

“Kã sir poë wé kë yi serku', ee yile ttöraë aneule, e' tö icheraë:

‘A' er mane'ü Skëköl datse' e' yöki, e' dör wës ñalã yuësö yësyësë ie' yöki es.

<sup>5</sup> Kãblë kës kawötã wã iëka sërãa, ñies kabata ena kãkkuö kës kawötã wë ñikkëë, ñalã shkuli'shkuli', e' kës kawötã yëttsã yësyësë,

ñies ñalã suluë, e' kës kawötã paiklëttsã buaë.

<sup>6</sup> Skëköl tö s'tsatkë, e' suëraë sulitane tö'.”\*

Es Isaías iyë'.

<sup>7</sup> Pë' debitu tajë Juan ska' as ie' tö ie'pa wöskuö ta ie' tö ie'pa a iché: “iA' dör s'kitö'ukwakpa suluë wës tkabë es! ¿Yi tö a' a iché tö a' tkómishkar Skëköl tö a' we'ikeraë siarë e' ulã a? <sup>8</sup> A' senú yësyësë, e' wa iwërmiawã tö mokji a' er mane'wétke Skëköl a. Kë a' tö ibikeitsök tö a' dör Abraham aleripa e' ë kuekji Skëköl kë tö a' we'ikepa. Ye' tö a' a iché tö Skëköl kji ikiane, e' ta ie' tö ak ikkë yuëmi Abraham aleripaie. <sup>9</sup> Ie' dör wës kal bikökkwak es. Ie' tso'tke kal ulitane kë wörtã' ese kës bikökök ñã'wëwa bö' a.”

<sup>10</sup> Eta ie'pa tö Juan a ichakë:

–¿E'ma i' wëmi sa' tö?

<sup>11</sup> Ie' tö ie'pa iüté:

–Yi wã datsi' tso' böt, e' etka mú wé kë wã itã' ese a. Es ñies yi wã chkë tso', ese tö chkë kãk mú wé kë wã itã' ese a.

<sup>12</sup> Inuköl shtökwapka Roma wökirpa a, e'pa welepa debitu Juan ska' as ie' tö ie'pa wöskuö, ie'pa tö ie' a ichakë:

–A' s'wöbla'ukwak, ¿i' wëmi sa' tö?

\* 3:6 Isaías 40.3-5

13 Ie' tō ie'pa iūtē:  
—Kē a' tō inukōl shtōk kōs ikawōtā shtē e' tsata.

14 Nies nīppōkwakpa welepa ie' a ichaké:

—Nē' tā çì wēmī sa' tō?

Ie' tō ie'pa iūtē:

—Kē a' s'pauñuk inukōl yottsaje. Kē a' kachōk s'ña'woie. Kōs a' patōrke, ekkē ē klō'ū, tā a' ttsē'nú buaē iwa.

15 Wē pairine'bitū idi' wa s'blúie e' datske bet, e' wā panuk sulitane tso'. E' kuekī ie'pa tso' ibikeitsōk tō isalema Juan dōr e'.

16 Erē Juan tō iché ie'pa ulitane a: “Mokī ye' a' wōskueke di' wa. Erē ye' itōkī idatse ekōl, e' tō a' ierawā Wikōl Batse'r a' ena bō' a. Ie' dōr kēkēpa tajē ye' tsata, e' kuekī ie' klōkkuō kicha ē kē wōtsēnanuk ye' siarla e' a. 17 Ie' tō se' wōpperā wēs iyyiwō wōppē es. Ibwā'buā bleraēitō idichakuō a, erē isulusi uyerawaitō bō' kē wōittā'wā e' a.”

18 Es Juan ie'pa pattē ttē ese wa tajē. Es ie' tō S'tsātkōkwak ttē buaē e' pakeke ie'pa a.

19 Nies Juan tō Herodes dōr Judea wōkir, e' uñē. Herodes serke ie' wāk ē' e' alakōl kiē Herodías e' tā. Nies ie' tō i sulu skā wamblé tajē. E' kuekī Juan ie' uñē. 20 Herodes tō i sulu wamblé tajē, erē e' kīe tā ie' tō Juan wōtōkwa patkē s'wōto wē a.

*Jesús wōsune*

*(Mateo 3.13-17; Marcos 1.9-11)*

21 Mik Juan bak sulitane wōskuōk, etā nīes ie' tō Jesús wōskuē. Mik Jesús tso'ia ttōk S'yē tā, e' dalewa ká jai kkōbunane 22 tā Wikōl Batse'r de ie' kī wēr nubōl sū. Etā ttō tstsene ká jai a, e' tō iché:

—Be' dōr ye' alà dalēr tajē ye' éna, e' wēr ye' wa buaē shūte.

*Jesús yēpa bak e'pa kiē*

*(Mateo 1.1-17)*

23 Mik Jesús kī duas de dabom mañayōk (30) ulatōk, etā ie' tō Skēkōl ttē pakémitke. Ie'pa tō ibikeitsē tō ie' dōr José alà. José dōr Elí alà<sup>†</sup>, 24 e' dōr Matat alà, e' dōr Leví alà, e' dōr Melquí alà, e' dōr Janai alà, e' dōr José alà, 25 e' dōr Matatías alà, e' dōr Amós alà, e' dōr Nahúm alà, e' dōr Eslí alà, e' dōr Nagai alà, 26 e' dōr Máhat alà, e' dōr Matatías alà, e' dōr Semeí alà, e' dōr Josec alà, e' dōr Judá alà, 27 e' dōr Johanán alà, e' dōr Resá alà, e' dōr Zorobabel alà, e' dōr Salatiel alà, e' dōr Neri alà, 28 e' dōr Melquí alà, e' dōr Adí alà, e' dōr Cosam alà, e' dōr Elmadam alà, e' dōr Er alà, 29 e' dōr Josué alà. e' dōr Eliézer alà, e' dōr Jorim alà, e' dōr Matat alà, 30 e' dōr Leví alà, e' dōr Simeón alà, e' dōr Judá alà, e' dōr José alà, e' dōr Jonam alà, e' dōr Eliaquim alà, 31 e' dōr Melea alà, e' dōr Mená alà, e' dōr Matatá alà, e' dōr Natán alà, 32 e' dōr David

alà, e' dōr Jesé alà, e' dōr Obed alà, e' dōr Booz alà, e' dōr Sélah alà, e' dōr Nahasón alà, 33 e' dōr Aminadab alà, e' dōr Admín alà, e' dōr Arni alà, e' dōr Esrom alà, e' dōr Fares alà, e' dōr Judá alà, 34 e' dōr Jacob alà, e' dōr Isaac alà, e' dōr Abraham alà, e' dōr Térah alà, e' dōr Nahor alà, 35 e' dōr Serug alà, e' dōr Ragau alà, e' dōr Péleg alà, e' dōr Heber alà, e' dōr Sélah alà, 36 e' dōr Cainán alà, e' dōr Arfaxad alà, e' dōr Sem alà, e' dōr Noé alà, e' dōr Lámec alà, 37 e' dōr Matusalén alà, e' dōr Enoc alà, e' dōr Jéred alà, e' dōr Mahalalel alà, e' dōr Cainán alà, 38 e' dōr Enós alà, e' dōr Set alà, e' dōr Adán alà. Adán dōr Skēkōl alà.

## 4

*Bē tō Jesús erkiōwē*

*(Mateo 4.1-11; Marcos 1.12-13)*

1 Jesús tso' Jordán di' kkōmik, ie' a' tajē Wikōl Batse'r tso'. E' tō ie' tsémi ká sir poē wē kē yi serku' ee. 2 Eē ie' sené dōka ká dabom tkēyōk (40), e' dalewa bē tso' ie' erkiōuk i sulu wamblōk. E' kēwō kōs tā ie' kē chkane yēs, e' ukuōkī tā ie' dué bli wā. 3 Etā bē tō ie' a' iché:

—Be' dōr Skēkōl Alà, e'ma ichō ák sē a' tō iyyōnū chkeie.

4 Jesús tō iūtē:

—Skēkōl yēkkuō tō iché: “Kē se' senuk chkē ē mik.”\*

5 E' ukuōkī tā bē tō ie' tsémi kabata kakkēē a, tā eē ká kōs wēs ká tkōke ekkē kkachéitō iā bet. 6 Ie' tō iché iā:

—Ká kōs suēbō e' meule ye' ulā a, e' kuekī yi a' ye' éna imak, ese a' ye' imeke. Ye' be' yuēmi ká kōs e' blúie. Nies iyi buaē tso', inukōl tso', i tso' ká ulitane kī, e' kōs wákie be' yuēmi ye' tō. 7 Be' e' tkéwā kuchēwō kī ye' wōrkī ye' dalōiōk, e' tā e' kōs dōraē be' ulā a.

8 Erē Jesús ie' iūtē:

—Skēkōl yēkkuō tō iché: ‘Skēkōl dōr a' Kēkōl, e' ē dalōiō; ie' ē a' a' senú.’† E' kuekī be' e' skōttśya ye' yōki bānet.

9-11 E' ukuōkī tā bē wā imítser Jerusalén tā iduekaitō Skēkōl wé e' bata kī kakkēē tā ichéitō iā:

—Skēkōl yēkkuō tō iché: ‘Skēkōl tō ibiyōchōkwakpa patkeraē be' kkō'nuk be' tsātkōk.

Ie'pa be' klō'weraqā iulā a' as be' klō' kē tērwa ák kī.’‡

Es Skēkōl yēkkuō tō iché, e' kuekī be' dōr Skēkōl Alà, e'ma be' e' ppōōmi dōttśya iski.

12 Erē Jesús iūtē:

—Nies Skēkōl yēkkuō tō iché: ‘A' kē kawō tā' a' Kēkōl wōtsiriuk.’§

13 Mik bē kē wā i skā kune Jesús erkiōwoie, etā ie' imeāt dō iētōkicha.

† 3:23 Kiē ikkēpa kōs dōr wēpa ē kīe.

\* 4:4 Deuteronomio 8.3

† 4:8 Deuteronomio 6.13

‡ 4:9-11 Salmo 91.11-12

§ 4:12 Deuteronomio 6.16

*Jesús dene Galilea**(Mateo 4.12-17; Marcos 1.14-15)*

<sup>14</sup> Jesús minea dene Galilea. Ke kraë Wiköl Batse'r diché tso' ie' a tajë. Ie' tté buneká ká e' qos a. <sup>15</sup> Judiowak ñi dapa'wo wé qos tso', e' a ie' tó s'wöbla'weke Skéköl tté wa ta sulitane tó ie' kikekeka buaë.

*Nazaret wakpa tó Jesús uyéttsa iká ki**(Mateo 13.53-58; Marcos 6.1-6)*

<sup>16</sup> Jesús demine Nazaret wé ie' talane ee. Mik judiowak eno diwö de, eta ie' dewa ie'pa ñi dapa'wo wé a wes ie' wöblane es. Eta ee ie' e' duésér Skéköl yékkuö arítsók ie'pa tso' ee, e'pa kukua. <sup>17</sup> Yékkuö kit Skéköl ttekol kié Isaias e' tó, e' mé ie'pa tó ie' a suë. Ie' ishuppéé ta ikuéitö wé Skéköl kané méso bua'iewa e' tté tso' kitule ee. E' tó iché i' es: <sup>18</sup> "Skéköl Wiköl tó ye' pairi'bitü idi' wa tté buaë pakoie s' siarëpa a,

e' kueki ie' tso' ye' a. Ie' tó ye' patké'bitü ichök s'tso' klöulewa i sulu ulá a esepa a tó 'a yërdattsá.' Ie' tó ye' patké'bitü wépa wöbla ké wawër esepa wöbla bua'ükne.

Ie' tó ye' patké'bitü wépa weirke siarë s' sulusipa ulá a, esepa tsatök.

<sup>19</sup> Ie' tó ye' patké'bitü ipakö sulitane a tó Skéköl er buaë chöke se' a, e' kéwö detke.\*

<sup>20</sup> E' ukuöki ta Jesús tó yékkuö wotrëwane mé judiowak ñi dapa'wo wé e' kimukwak a, ta ie' tkésér iwá pakök. Qos s'daparke ee e'pa tó ie' suéwa krereë. <sup>21</sup> Eta ie' tó iché ie'pa a:

—Skéköl yékkuö arítsé ye' tó ñe', e' wa tka i' ta.

<sup>22</sup> Ie'pa ulitane tó icheke ie' dör pë' buaë. Ñies tté bua'buä chekeitö, e' tó sulitane tkiwéwa. Ie'pa tó iché ñi a:

—A'ká, zie' ké dör José alá?

<sup>23</sup> Ie' tó iüté:

—Ye' wa ijcher buaë a' tó ye' cheraë tté i' wa: 'A s'kapeyökwak, be' wák e' bua'üne.'

Ñies a' tó ye' a icheraë: 'Sa' ittse tó i' ké or yi a ese wé tajë be' tó Cafarnaúm, ese ü ñies je be' wák ká a.'

<sup>24</sup> Ie' tó ikí ché ie'pa a:

—Moki ye' a' a iché tó Skéköl ttekolpa qos ké dalöiërta' iwakpa ká ki. <sup>25</sup> Moki ye' a' a iché tó mik Skéköl ttekol kié Elias bak, eta kalí ké yéne yés döka duas mañal kí shaböts ta bli bak poë Israel. E' kéwö ska' ta alakölpä schöpa tso' tajë Israel, <sup>26</sup> erë Skéköl ké wa Elias patkéne ie'pa ska' ikimukrak. Ie' tó Elias patké alaköl dör schö eköl serke Sarepta, ká e' atë tsinet Sidón, e' kimuk. <sup>27</sup> Es ñies mik Skéköl ttekol kié Eliseo e' bak, e' kéwö ska' ta lepra tó s'teke tajë Israel. Erë ie'pa qos ké buaone. Wém kié Naamán dör ká kié Siria e' wak, e' è buaone Eliseo tó Skéköl batamik.

<sup>28</sup> Mik ie'pa tó tté e' ttsé, eta ie'pa qos tso' judiowak ñi dapa'wo wé a, e'pa uluneka tajë ie' ki. <sup>29</sup> Ie'pa iëneká ie' ki ta iuyéttsarakitö ká e' a bánet. Ká e' tso' kabata kakkeë e' ki, ie'pa wa ie' mütser dö katte kakkeë e' kkömik batrëmi as iduüwa. <sup>30</sup> Erë ie' tkami ie'pa shüa ta imía.

*Wém eköl a aknama tso' e' bua'wéne Jesús tó*

*(Marcos 1.21-28)*

<sup>31</sup> Jesús miá Cafarnaúm, ká e' atë Galilea. Eno diwö bit ekké ta ie' tó s'wöbla'weke judiowak ñi dapa'wo wé a. <sup>32</sup> Ie' tó s'wöbla'weke tté mokí diché ta' tajë ese wa, e' kueki ie'pa tkinewa.

<sup>33</sup> Ká et ta ie'pa ñi dapa'wo wé a wém dur eköl e' a aknama ö wimblu sulusi tso', ie' tó iché aneule:

<sup>34</sup> —A Jesús Nazaret wak, sa' múat bëre.

¿Ie be' tso' sa' tsiriük? ¿Be' debitü sa' eukwa? Ye' wa be' s'uule. Ye' wa ijcher tó yi be' dör. Be' dör batse'r patké'bitü Skéköl tó e'.

<sup>35</sup> Jesús tó aknama e' ünë:

—¿Be' siwa'blöwa, be' e' yöttsa wém se a!

Eta aknama tó wém e' éró iski sulitane wörki, ta ie' e' yéttsa ia ké wa wes wém one.

<sup>36</sup> Sulitane tkinewa iweblök ta iñi chakerak:

—¿Tté wése dör ñe'? Tté diché ta' tajë e' wa wém wí wimblupa sulusi ké e' yöktsa ta ie' yélur je'.

<sup>37</sup> Eta Jesús tté buneká tajë ká e' qos a.

*Jesús tó Simón yák bua'wéne**(Mateo 8.14-15; Marcos 1.29-31)*

<sup>38</sup> Jesús e' yéttsa judiowak ñi dapa'wo wé a ta imía Simón u a. Eë Simón yák kiri'weke dué dalölö tó tajë. Ie'pa kköché Jesús a tó ibua'üne. <sup>39</sup> Eta Jesús e' wöéwa ie' ki ta dué dalölö ünëitö ta ibuanene. E' bet ta ie' e' kéká ta ilé yulëmitö ie'pa a ñe.

*Jesús tó s'kirirke tajë esepa bua'wéne**(Mateo 8.16-17; Marcos 1.32-34)*

<sup>40</sup> Diwö mi'kewatke ta tajë pë' wa iyamipa kiri'weke dué tsakjé tó, esepa debitü tajë Jesús ska'. Ie' ulá méka ie'pa kirirke qos ki eköl eköl, ta es ie' tó ibua'wenerak serag.

<sup>41</sup> Ñies e' shüa tajë s'tso' tteke aknamapa tó. Mik ie' tó ie'pa bua'wéne, eta aknama e' yélur ie'pa a ta aknamapa tó iché ie' a aneule:

—¿Be' dör Skéköl Alá chöklet!

Erë ie' tó ie'pa ünë. Ie'pa wa ijcher tó ie' dör wé pairine'bitü idi' wa s'blúie e'. E' kueki ké ie' wa ie'pa káne ttök.

*Jesús tó Skéköl tté paké judiowak ñi dapa'wo wé qos a*

*(Marcos 1.35-39)*

<sup>42</sup> Bule es ká ñine ta Jesús e' yéttsa miá bánet wé ké yi ku' ese ska'. Erë ie'pa tó ie'

\* 4:19 Isaias 61.1-2

yulé. Mik ie'pa tò ikué, etá ie'pa tò ima'wé wóklò'wé as kè imi'. <sup>43</sup> Erè ie' tò ie'pa iuté:

—Ì hlúie Skèkòl tso' e' tté buaé pakòk ye' kawòtá ñies judiowak serke ká malepa a esepa a, eseie ye' patkène'bitu.

<sup>44</sup> E' kuèkì ie' míá tté pakòk judiowak ñi dapa'wò wé tso' tajé Judea e' a.

## 3

*Jesús ttò wa nima klòne tajé*

*(Mateo 4.18-22; Marcos 1.16-20)*

<sup>1</sup> Etòkicha tá Jesús dur s'wòbla'uk batsòri kiè Genesaret e' kkomik (batsòri e' kiè ñies Galilea). Tajé pè' dapanie ie' ska' Skèkòl tté pakekeitò e' kíttsòk, e' kè wa ie' shkoia.

<sup>2</sup> Nima klò'ukwakpa dene tso' ikla' skuòk, e'pa kanò àr bòtò, e' sué Jesús tò. <sup>3</sup> Tá ie' e' iéká kanò etò a, e' dör Simón kanò. Ie' tò ikíe Simón a: “Be' we'ikèyò, kanò patkòmi bèrè wówik.” Ie' e' tkésèr kanò a tá ie'pa wòbla'wéitò. <sup>4</sup> Mik ie' s'wòbla'wé one, etá ie' tò iché Simón a:

—Kanò patkòumi di' shuá tá a' tò kla' uyómi nima klò'woie.

<sup>5</sup> Simón tò ie' iuté:

—A s'wòbla'ukwak, nañie sa' ima'wé, erè kè sa' wá iwà klòne yès. Erè be' ttò wa ye' tò kla' uyekene.

<sup>6</sup> Mik ie'pa tò ikla' uyémi tá iwà klò'wérakitò tajé, e' tò kla' batseeketke. <sup>7</sup> Tá iulá kkaché iyamipa tso' kanò etò a e'pa a tò a' shkò sa' kímuk. Iyamipa debitu ie'pa kímuk tá kanò bòtò wá iérakitò chié, tsir etá kanò wòturkewátke di' a. <sup>8</sup> Mik e' sué Simón Pedro tò, etá ie' e' tkéwá kuchè kì Jesús klò ska' tá ichéitò iá:

—¡A Skèképa, ye' dör pè' sulusi, be' e' skòttsa ye' yòki!

<sup>9</sup> Nima klòne tajé, e' tò Simón Pedro ena iyamipa kòs tso' ie' tá, e'pa tkiwéwá tajé, e' kuèkì ie' tò iché es. <sup>10</sup> Ñies Santiago ena Juan dör Zebedeo ala'r e'pa tkirulune. Ie'pa kaneblòke Simón tá nima klò'uk. Etá Jesús tò iché Simón a:

—Kè be' suanuk. Be' kè tò nima klò'wepaia. I' tami be' wá s'ditsò bituraé ye' ska'.

<sup>11</sup> Etá ie'pa tò kanò ikléká, tá íyi kòs tuléat ie'pa tò eé tá imiyal Jesús tá.

*Wém ekòl kiri'weke lepra tò e' bua'wéne Jesús tò*

*(Mateo 8.1-4; Marcos 1.40-45)*

<sup>12</sup> Etòkicha tá Jesús tso' Judea ké et a. Etá eé wém debitu ekòl kiri'weke lepra\* tò. Mik ie' tò Jesús sué, etá ie' wóéwa dō jskì tá ikkòché tajé Jesús a:

—A kèképa, be' kì ikiane, e' tá be' a ye' buarmine as ye' batse'rne.

<sup>13</sup> Jesús tò ikéwá ulá wa tá ichéitò iá:

—Tò, ye' kì ikiane. Be' dene batse'r.

E' wòshá tá ie' buanene, kè kì lepra ku'ia.

<sup>14</sup> Etá Jesús tò ie' a iché:

—Kè ichar yi a. Be' yú e' kkachòk sacer-dote a. Ì muk Moisés tò a' ka' e' batse'woie, ese tsúmi mè Skèkòl a ie'pa a ikkachoie.

<sup>15</sup> Erè Jesús tté tñeká tajé shuté. Tajé pè' dòke ie' ska' ie' tté kíttsòk, ñies as ie' tò ie'pa bua'üne. <sup>16</sup> Erè tajé ie' mi'ke bánet ttòk S'yé tá wé kè yi ku' ese ska'.

*Jesús tò wém ekòl kraulewá e' bua'wéne*

*(Mateo 9.1-8; Marcos 2.1-12)*

<sup>17</sup> Etòkicha tá Jesús tso' s'wòbla'uk tá eé fariseowakpa ena s'wòbla'uk tté dalòiéno wa wakpa tulur Jesús tso' s'wòbla'uk e' kíttsòk. Ie'pa datse' ká kòs tso' Galilea ñies Judea ena Jerusalam. Jesús wa Skèkòl diché tso' s'kirirke ese bua'wone. <sup>18</sup> Etá wépa wélepa debitu e'pa wa wém kraulewá debitu ekòl ká'la kì. Ie'pa éna iduè tsákmì a shuá wé Jesús dur eé as ie' tò ibua'üne. <sup>19</sup> Erè tajé s'tso', e' kuèkì ie'pa kè a itkòmi wés a shuá. E' kuèkì ie'pa míka a bata kì† tò a jchéé tá iduè émirakitò énaé dottsá jskì wé Jesús dur pè' tso' tajé e' shuá eé. <sup>20</sup> Mik Jesús tò isué tò mokì ie'pa erblé ie' mik, etá ie' tò iché wém kirirke e' a:

—A yami, ì sulu kòs wamblébò, e' nuí olone be' kì.

<sup>21</sup> Etá s'wòbla'uk tté dalòiéno wa wakpa ena fariseowakpa tò ibikeitsé: “¿Ima wém wí erbikò tò ie' dör yi e' tò Skèkòl ché sulué es? Skèkòl è a se' nuí olo'yarmi.”

<sup>22</sup> Erè ì bikeitsòk ie'pa tso' e' suéwá Jesús tò bet. E' kuèkì ie' tò ie'pa a ichaké:

—¿Ì kuèkì a' ibikeitseke es? <sup>23</sup> Ye' tò wém i' bua'wémime as ishköne, e' tá z'wes a' tò ikló'wèmi tò ye' kè a inuí oloyanuk ikì? <sup>24</sup> Ye' dör S'ditsò Alá, sú e' tò a' a ikkachè tò ye' wá kawò tá' ká i' a nuí olo'yoie.

Etá ie' tò iché wém kraulewá e' a:

—Be' e' kòkà, be' ká'la kòkà tá be' yúne a a.

<sup>25</sup> E' wòshá tá ie' e' kéká sulitane wòrkì tá ká'la a ie' debitu, e' kékaitò tá imíane iu a Skèkòl kíkèkaramiitò tajé. <sup>26</sup> Ie'pa wòkharulune iweblòk tá Skèkòl kíkèkarakitò tajé. Ie'pa suane tá ichéitòrak:

—Ì sué se' tò j'ñe, e' kè sule se' wá yès.

*Jesús tò Leví kié ittòkataie*

*(Mateo 9.9-13; Marcos 2.13-17)*

<sup>27</sup> E' ukuòkì tá Jesús míá, e' tò wém sué ekòl kié Leví, e' dör inukòl shtòkwak Roma wòkirpa a. Ie' tkér ikaneblòke e' wé a. Tá Jesús tò ie' a iché:

\* **5:12** lepra: E' dör duè s'méwòie ese. Judiowak tò ikló'wé tò duè e' tò yi teke ese dör ñá. Esepa batsekettá bánet kè a kawò tá' senuk pè' malepa shuá. Nies ie'pa kè a kawò tá' shkowá Skèkòl wé a. † **5:19** u bata kì: Ie'pa u kè dör wés se' bribriwak u es. Ie'pa u tsábata dör kkuèie klòkata tá'.

—Be' shkō ye' t̄a ye' ttōkataie.

<sup>28</sup> Et̄a Levī ē' kēk̄a tō ì kōs mēat̄ t̄a imīa Jesūs t̄a.

<sup>29</sup> E' ts̄ali t̄a Levī tō ikēwō tkō'wē buaē chkē wa di'yē wa Jesūs dalōioie. Inukōl shtōkwakpa de t̄ajē. Nies pē' kuā'k̄ipa de, e'pa tulur chkōk Jesūs ena ittōkatapa t̄a. <sup>30</sup> Mik fariseowakpa ena s'wōbla'uk ttē dalōiēno wa wakpa tō isuē, et̄a ie'pa tō ichēmi Jesūs ttōkatapa a:

—Ĵiōk a' chkōke di' yōke inukōl shtōkwakpa t̄a ena pē' sulusipa malepa t̄a?

<sup>31</sup> Jesūs tō ie'pa iūtē:  
—Wēpa kē kirirku' esepa kē k̄i s'kapeyōkwak kiane. Erē wēpa kirirke esepa k̄i s'kapeyōkwak kiane. <sup>32</sup> Ye' kē dē'bitū wēpa ē' bikeitsō tō iserke yēsēsē esepa kiōk. Ye' dē'bitū pē' sulusipa kiōk as ie'pa er mane'ū.

*Ĵi k̄ueki Jesūs ttōkatapa kē batsōta'*

*(Mateo 9.14-17; Marcos 2.18-22)*

<sup>33</sup> Judiopa wōkirpa welepa tō ichē Jesūs a:  
—Juan S'wōskuōkwak ttōkatapa batsōke t̄ajē, ttōke S'yē t̄a t̄ajē, wēs fariseowakpa klēpa tō iwēke es, erē be' ichapa chkōke ena di'yōke kēkraē kē batsōta'.

<sup>34</sup> Jesūs tō ie'pa iūtē:  
—Mik s'kiule ulabatsē kēwō tkō'uk t̄a Ĵwēs ie'pa batsōmi wēm ulabatske ese tso'ia ie'pa t̄a e' dalewa? <sup>35</sup> Erē ikēwō dōraē et̄a ie' mi'datser ie'pa yōki. E' je' t̄a ie'pa batsōraē.

<sup>36</sup> Nies Jesūs tō ie'pa wōbla'wē tō judiowak ttē kēchke e' kē shūtūrpak̄a ie' ttē pa'alī t̄a. E' kleēitō tē i' wa:

—Kē yi tō datsi' pa'alī tak teepa batsēwā datsi' kēchke wōyuowāie. Iwēsō es, e' t̄a e' tō datsi' pa'alī we'ikēwa, n̄ies itak pa'alī kē mēne buaē datsi' kēchke k̄i. <sup>37</sup> Nies vino pa'alī kē tērt̄a'k̄a iyiwak kkuōlit yōule ibloie ese kēchke a. Itēkašō es, e' t̄a mik ibacha'nebitū, et̄a ikkuōlit kēchke jchēmiitō. Es vino ena ikkuōlit weirwami ēme. <sup>38</sup> E' k̄ueki vino pa'alī tekeka ikkuōlit pa'alī a. <sup>39</sup> Yi tō vino bacha'bacha yeke, ese tō ibikeitseke tō e' ya' bua' vino pa'alī tsata. E' k̄ueki ie' kē ēna vino pa'alī yakia. Es n̄ies a' tō ibikeitseke tō ye' ttē pa'alī e' kē dōr buaē.

## 6

*Jesūs ttōkatapa tō trigo wōiklēe eno diwō a*  
*(Mateo 12.1-8; Marcos 2.23-28)*

<sup>1</sup> Etōkicha t̄a eno diwō a Jesūs dami trigo shūa t̄a ittōkatapa tō trigo wōiklērami t̄a iwōsiētō irikirik ulā wa t̄a ikatēramirakitō. <sup>2</sup> Et̄a fariseowakpa welepa tō ie'pa a ichakē:  
—Ĵi k̄ueki a' tso' i kē kēwō t̄a' wē eno diwō a ese uk?

<sup>3</sup> Jesūs tō ie'pa iūtē:  
—Ĵi o' David tō k̄a Ĵaiāē Ĵe' kē gritsule a' wa Skēkōl yēkkuō k̄i? Etōkicha t̄a ie' ena iklēpa duē bli wā. <sup>4</sup> Ie' dē'wā Skēkōl wē a t̄a pan

meule Skēkōl a e' klō'wēitō n̄eitō. N̄ies ie' tō iblatē iklēpa a t̄a inérakitō. Sacerdotepa ē a pan e' kēwō t̄a n̄e. Erē a' ēna Ĵane tō ì o' David tō n̄e' kē dōr suluē Skēkōl wōa.

<sup>5</sup> N̄ies Jesūs tō ichē ie'pa a:  
—Ye' dōr S'ditsō Alā, e' wā kawō t̄a' ichoie tō ì dōr buaē ò ì dōr suluē wē eno diwō a.

*Wēm ekōl ulā siulewā e' bua'wēne Jesūs tō*  
*(Mateo 12.9-14; Marcos 3.1-6)*

<sup>6</sup> Eno diwō skā t̄a Jesūs dewā judiowak n̄i dapa'wō wē a t̄a eē ie' tō s'wōbla'wēmitke. T̄a eē wēm detkēr ekōl e' ulā bua'kka siulewā. <sup>7</sup> S'wōbla'uk ttē dalōiēno wa wakpa ena fariseowakpa ēna ie' k̄katak ilē k̄i, e' k̄ueki ie'pa tso' ie' weblōk tō wēm n̄e' bua'wēmineitō eno diwō a. <sup>8</sup> Erē ì bikeitseke ie'pa tō, e' suēwā ie' tō, e' k̄ueki ie' tō ichē wēm ulā siulewā e' a:

—Be' e' kōk̄a t̄a be' e' duōser Ĵe sulitane wōshaē.

Et̄a wēm e' duēser. <sup>9</sup> Jesūs tō ichē ie'pa a:  
—A' chakēyō: Ĵi kēwō t̄a' se' a wē eno diwō a: ì buaē ò ì suluē? Ĵs'ts̄atkōk̄ ò s'ttōkwā?

<sup>10</sup> E' ukuōk̄ t̄a ie' tō ie'pa ulitane weblē e' pamik t̄a ichēitō wēm ulā siulewā e' a:

—Be' ulā shūlōō.  
T̄a ie' tō iwē es et̄a iulā buanene. <sup>11</sup> E' tō ie'pa uluwēk̄a t̄ajē, t̄a Ĵni chakērak, Ĵwēs se' tō Jesūs wēmi?

*Jesūs tō ittekōlpa tsā dabom eyōk k̄i bōl*  
*e'pa shushtē*

*(Mateo 10.1-4; Marcos 3.13-19)*

<sup>12</sup> E' kēwō ska' t̄a Jesūs miā kabata a ttōk S'yē t̄a, eē ie' ttē ie' t̄a nañē. <sup>13</sup> Mik k̄a n̄ine, et̄a ie' tō ittōkatapa kiē dapa'wē ie' t̄a. E' shūa ie' tō wēpa shushtē dabom eyōk k̄i bōl (12), e'pa kiētō ittekōlpa tsā. <sup>14</sup> Ie'pa kiē i' es: Simón, e' kiē mēk̄a Jesūs tō Pedro; Andrés dōr Simón ēl, Santiago, Juan, Felipe, Bartolomé, <sup>15</sup> Mateo, Tomás, Santiago dōr Alfeo alā, Simón kine Celote, <sup>16</sup> Judas dōr Santiago alā ena Judas Iscariote tō Jesūs wōmekettsā ibolōkpa a e'.

*Jesūs tō s'wōbla'wē n̄ies s'buawēne*

*(Mateo 4.23-25)*

<sup>17</sup> Jesūs biteatkene kabata a ittekōlpa tsā e'pa t̄a, e' e' wōklō'wē k̄akkue k̄i. Eē iklēpa tso' t̄ajē ie' panuk. Nies pē' datse Judea ena Jerusalén, esepa de t̄ajē. Nies pē' de t̄ajē katse Tiro ena Sidón. K̄a bōt e' atē dayē k̄kōmik. <sup>18</sup> Ie'pa ekkēpa kōs debitū Jesūs tō s'wōbla'wēke e' k̄ittsōk n̄ies as ikirirkerak e' bua'wēnitō. Nies wēpa tteke wimblupa sulusi tō esepa bua'wēitō. <sup>19</sup> T̄ajē dichē tso' ie' a e' wa s'kirirke kōs e' buanene, e' k̄ueki sulitane ēna ie' kakwā.

*Ĵi wēr buaē Skēkōl wa*

*(Mateo 5.1-12)*

<sup>20</sup> Jesūs tō ittōkatapa weblē t̄a ichēitō ie'pa a:

“A wépa dör siarë kē wā ñ ã tajë, esepa tso' i blúie Skéköl tso' e' a, e' kueki ayécha buaë a'.

<sup>21</sup> “A wépa tteke bli tō ká i' a, esepa ttsë'rdaë dö wè', e' kueki ayécha buaë a'.

“A wépa iúke ká i' a, esepa jañurane buaë, e' kueki ayécha buaë a'.

<sup>22</sup> “Ayécha buaë mik pë' éna a' ar suluë, a' wateke, a' cheke suluë, a' cheke tō a' dör pë' sulusipa ye' dör S'ditsö Alà e' tté kueki.

<sup>23</sup> Mik e' tköke a' ta, etä kē a' erianuk. E' skéie a' ttsë'nú buaë. Aishkuö ta ká jai a ñ buaë merdaë a' a' iskéie e' kueki a' ttsë'nú kaneë. Kē a' éna ichökwa tō ká iaiäe ie'pa yépa bak Skéköl ttekölpä we'ikök es.

<sup>24</sup> “Erë wéstela ñna a' wā iýi tso' tajë ká i' a esepa ta, e' ukuöki ta kē ñ ská ta'ia a' ttsë'woie buaë.

<sup>25</sup> “Wéstela ñna a' wā iýi tso' tajë ñë wé' j'ñe ta esepa ta, e' ukuöki ta' tterane bli tō.

“Wéstela ñna a' jañuke buaë ká i' a e'pa ta, e' ukuöki ta' eriardaë, juraë siarë.

<sup>26</sup> “Wéstela ñna a' ta mik sultane tō a' kíkékä, es ie'pa yépa bak ká iaiäe e'pa tō kachökwakpa e' chö tō ie'pa dör Skéköl ttekölpä, e'pa kika'ka.

#### *S'bolökpa ché Jesús tō*

*(Mateo 5.38-48; 7.12)*

<sup>27</sup> “Erë a' tso' ye' tō kïttsök, esepa a ye' tō ichë: a' bolökpa dalëritsö. Wépa éna sulu a' ar, esepa a ñ buaë ú. <sup>28</sup> Wépa alibchöke a' kï, esepa a' er buaë chö. Wépa tō a' cheke suluë esepa kï ikïö S'yé a tō ikimú. <sup>29</sup> Yi tō a' ppë a' aswö kï, e' ta' a' aswö etta mú ia ppë. Yi tō a' paio kïkke tsémi, e' ta' ñies a' paio mú ia. <sup>30</sup> Yi tō ilë kak kië a' a, e' ta' imú ia. Yi wā a' iýi mítser, e' ta' kē a' tō ikiökneia. <sup>31</sup> A' senú s'malepa ta wes a' kï ikiane tō ie'pa ser a' ta es.

<sup>32</sup> “Wépa tō a' dalëritseke, esepa ë ské dalëritseke a' tō, e' ta' ze' kï Skéköl tō wéstela chëmi a' a? ¡Au! Ñies pë' sulusipa tō wépa tō ie'pa dalëritseke, esepa ské dalëritseke. <sup>33</sup> Wépa tō ñ buaë weke a' a, esepa ë a' tō iské weke buaë, e' ta' ze' kï Skéköl tō a' kíkékami? ¡Au! Ñies pë' sulusipa tō iweke es. <sup>34</sup> A' tō iýi peiteke, wépa kló'wé a' tō tō imeraneitö, esepa ë a, e' ta' ze' kï Skéköl tō a' kíkékami? ¡Au! Ñies pë' sulusipa tō iýi peiteke ñi a, mik ie'pa tō ikló'wé tō imerdane etä. <sup>35</sup> A' bolökpa dalëritsö. Ì buaë ú ie'pa a, iýi peitö ie'pa a, kē iské panane. A' tō iweke es, e' ta' Skéköl tō a' a' iské merane buaë. Ie' er buaë chöke s'sulusipa a ena wépa kē tō wéstela cheta' ie' a esepa a. A' tō iweke es, e' ta' a' tō ikkcheraë tō mokjé a' dör ie' dör iýi ulitane tsäta, e' ala'r. <sup>36</sup> S'malepa saú er siarë wa wes S'yé tō a' suëke er siarë wa es.

#### *Kë se' kàne s'kichatök*

*(Mateo 7.1-5)*

<sup>37</sup> “Kë a' s'kichatök, e' ta' Skéköl kē tō a' kichatëpa. Kē a' ichök yi a tō Skéköl mú tō be' tsaiö, e' ta' Skéköl kē tō a' tsaiëpa. Ì sulu kos wamblé ie'pa tō a' kï, ese nu' olo'yö ie'pa kï, e' ta' a' nu' olo'yeraë Skéköl tō a' kï. <sup>38</sup> Kos a' tō ñ mé s'malepa a, ekké a' a' imerdane. E' kueki iýi kakkú s'malepa a, etä iské merane Skéköl tō a' a. Erë ie' tō imerane a' a' tajë wes dakö'ukuö wä iësö chië wötigule buaë ikï wä ië döka ikkö a katötöë tsä tkënettsamitke es.”

<sup>39</sup> Nies Jesús tō ttë kleë ie'pa a' i' es: “¿Wé a' wā isuule tō s'wöbla kē wawër, ese tō eköl wöbla kē wawër ese ulä iëmi? ¿E'pa kē brutarmi bölä kauk a? <sup>40</sup> Wé wöblarke ese kē dör iwöbla'ukwak tsäta. Mik iwöblagne, e' je' ta' idöraë wes iwöbla'ukwak es.

<sup>41</sup> “Kaltak jchëla tsir tso' a' yami wöbla a, ese sué a' tō, erë ¿i kueki kaltak bërie tso' a' wák wöbla a, ese kē sune a' wä? <sup>42</sup> ¿Wes a' ichëmi a' yami a: 'A yami, súyö kaltak jchëla tsir tso' be' wöbla a, e' yëttsa?' Erë kaltak bërie tso' a' wöbla a, e' kē sune a' wä. ¡A' e' ö suluë! Kaltak bërie tso' a' wöbla a, ese yöttsa kewe, es kaltak jchëla tsir tso' a' yami wöbla a, ese wërmi a' a' buaë yëttsa.

#### *Kal buaë ena kal sulusi*

*(Mateo 7.17-20; 12.34-35)*

<sup>43</sup> “Kal buaë kē wörta' kalwö suluie, ñies kal sulusi kē wörta' kalwö bua'ie. <sup>44</sup> Kal wërkewä iwö kï. Higowö ö uwawö ese kē shtetä'sö dika' kicha mik. <sup>45</sup> Ì bikeitsekësö, ese ë chekesö. E' kueki wëm döer buaë, ese er döer buaë, e' kueki ie' serke buaë, tō yësyësë. Erë wëm döer suluë, ese er döer suluë, e' kueki ie' serke suluë, tō suluë.

#### *Uyuökwak bö*

*(Mateo 7.24-27)*

<sup>46</sup> “¿i kueki a' tō ye' kieke: 'A Skékëpa, a Skékëpa,' erë kē a' tō ye' ttë iuteku? <sup>47</sup> Yi datse ye' ska', ta ye' tō tseke ta iwä iuteke, súyö a' a' ichë tō wes ese döer. <sup>48</sup> Ese döer wes wëm eköl tō u ye' es. E' tō u chki töbié iskië, ká döer äk ë, ese a. Mik di' pone tajë, tkami u kï tajë, erë u kē minetsër iwä, iyöule buaë e' kueki. <sup>49</sup> Erë yi tō ye' tō ttsé erë kē iwä iuteku', ese döer wes wëm eköl tō u ye', erë kē wa itöbinewä iskië, tkékaitö jalëjalë iyök ë bata kï es. Mik di' pone tajë e' tkami u kï, etä u mítser iwä, kē ñ ajeia.

## 7

*Jesús tō ñippökwapka wökir eköl e' kanë méso bua'wëne*

*(Mateo 8.5-13; Juan 4.43-54)*

<sup>1</sup> Mik Jesús tō s'wöbla'wé one, etä imía demí Cafarnaüm. <sup>2</sup> Etä eë Roma ñippökwapka döka cien, e' wökir serke eköl. E' kanë méso eköl kirinewä tajë duökewatke. Iwökir éna ie' dalër tajë. <sup>3</sup> Mik ñippökwapka wökir tō Jesús tté ttsé, etä ie' tō iché judiowak

kueblupa wɛləpa a: “A' yú Jesús ska' t̃a ichõ ie' a: 'Be' we'ikè sa' t̃o, be' shkõ ñippõkwakpa wõkir, e' kanè méso ekõl duõke tajè, e' bua'ukne.”<sup>4-5</sup> Mik ie'pa demi Jesús ska' t̃a ikkõchérak tajè ie' wõa:

–Ñippõkwakpa wõkir e' éna se' judiowak dalèr tajè. Ie' wák t̃o se' ñi dapa'wõ wé e' yuók patké' se' a. E' kuek̃i sa' a t̃a buaè idir t̃o be' ie' k̃imè.

<sup>6</sup> Et̃a Jesús mía ie'pa t̃a. Erè mik ie'pa dòkemitke ñippõkwakpa wõkir e' u a, et̃a ie' t̃o iyamipa wɛləpa patké ichõk Jesús a: “A kékèpa, kè be' e' tsiriuk. Be' dõr kékè tajè, e' dõw̃a ye' u a, e' kè dõr ye' siarla e' a. <sup>7</sup> E' kuek̃i ye' kè dè'rõ be' ska'. Erè ikèwõ è mú t̃a ye' kanè méso buardane. <sup>8</sup> Ye' wõkirpa t̃a, e'pa ttõ iutõk ye' kawõta. Nies ye' dõr ñippõkwakpa tajè e'pa wõkir, ie'pa kawõta ye' ttõ iutõk. Mik ye' t̃o ekõl a icheke, 'Be' yú' t̃a imí. Ekõl a ye' t̃o icheke, 'Be' dou' t̃a ide. Nies ye' t̃o icheke ye' kanè méso a, 'Íyi ú' t̃a iwèitõ. Ye' iklõ'wé t̃o be' w̃a kawõ t̃a' iyi ulitane tsat̃a, e' kuek̃i ye' w̃a ijcher t̃o be' t̃o ikèwõ mé, e' t̃a ye' kanè méso buardane.”

<sup>9</sup> Mik Jesús t̃o ttè e' t̃tsé, et̃a e' t̃o ie' t̃kiwéw̃a. Ie' wõtréene t̃a ichéitõ pé' dami ie' itõk̃i e'pa a:

–Ye' ichè a' a t̃o Israel aleripa k̃os sh̃ũa, kè yi kune ye' w̃a erblõk ye' mik wés wém i' es.

<sup>10</sup> Et̃a mik ñippõkwakpa wõkir yamipa dene u a, et̃a ie'pa t̃o isué t̃o ikanè méso kirirke, e' buanene.

*Alakõl ekõl schõ alà blènew̃a e' shkè'wékane Jesús t̃o*

<sup>11</sup> E' ukuõk̃i t̃a Jesús mía k̃a kiè Nain eè. Ie' dami ittõkatapa t̃a, ñies pé' dami ie'pa t̃a tajè. <sup>12</sup> Mik ie'pa de tsinet k̃a e' a, et̃a ie'pa isué t̃o tajè pé' datse, e' w̃a s'nu datse micho wõtew̃a. Dèutõ e' mi dõr schõ, ie' alà ekõl ème wém, e' blènew̃a. Tajè k̃a e' wakpa t̃o ie' pablerami. <sup>13</sup> Mik Skékèpa Jesús t̃o isué, et̃a ie' wa iwèr siarè t̃a ichéitõ ĩa:

–Kè be' iuk̃ia.

<sup>14</sup> E' bet t̃a ie' dew̃a tsinet k̃a'la k̃i s'nu dami e' o' mik t̃a k̃a'la kèitõ. Wépa w̃a idami e'pa e' wõklõ'wéw̃a. Jesús t̃o ichè s'nu a:

–A duladula, be' a ye' t̃o ichè, iBe' e' kók̃a!

<sup>15</sup> E' bet t̃a s'nu shkènekane e' tkésér t̃a ittè. Et̃a Jesús t̃o imé imi a. <sup>16</sup> K̃os pé' tso' ie'pa t̃a e'pa suane tajè, Skékõl k̃ikék̃a ie'pa t̃o tajè t̃a ichérakitõ:

–Skékõl ttekõl chõk ekõl, e' de se' sh̃ũa.

Ñies ie'pa t̃o ichè:

–Skékõl de se' dõr ie' icha esepa k̃imuk.

<sup>17</sup> Et̃a i wé Jesús t̃o e' ttè bunek̃a tajè Judea kè k̃os e' a, ñies k̃a tso' Judea pamik e' a ittè t̃inek̃a.

*Juan S'wõskuõkwak ttõkatapa de Jesús ska' ichakõk*

*(Mateo 11.2-19)*

<sup>18</sup> Juan S'wõskuõkwak ttõkatapa t̃o i k̃os wéke Jesús t̃o, e' paké Juan tso' s'wõtõ wé a e' a. E' kuek̃i ie' t̃o ie'pa bõl kiè <sup>19</sup> t̃a ichéitõ ie'pa a:

–A' yú Skékèpa Jesús a ichakõk t̃o z̃be' dõr wé pairine'bit̃u idi' wa s'blúie yeüle t̃o idatse e', õ yi sk̃a panèia sa' t̃o?

<sup>20</sup> Mik ie'pa de Jesús ska' t̃a ie'pa t̃o ichè ie' a:

–Juan S'wõskuõkwak t̃o sa' patké be' a ichakõk t̃o z̃be' dõr wé pairine'bit̃u idi' wa s'blúie yeüle t̃o idatse e', õ yi sk̃a panèia sa' t̃o?

<sup>21</sup> E' wõsh̃a t̃a Jesús t̃o s'kirirke duè tsak̃iè w̃a, esepa bua'wé tajè. Nies s'tteke wim-blupa sulusi t̃o, ena s'wõbla kè wawèr esepa bua'wèitõ tajè. <sup>22</sup> E' ukuõk̃i t̃a ie' t̃o ichè Juan ttõkatapa bõl a:

–A' yúne Juan ska' t̃a i sué a' t̃o, i t̃tsé a' t̃o, e' k̃os pakó ie' a. Ichõ ie' a t̃o s'wõbla kè wawèr esepa wõbla wawènene; s'kraulew̃a kè shko esepa shkène; wépa kiri' wéke lepra t̃o esepa buanene batse'nene; s'kukuõ kè watsèr esepa watsènene; s'duowa shkènekane; ñies Skékõl ttè buaè e' pakane s'siarèpa a. <sup>23</sup> iYi kè yõk̃i ye' sulune, ayècha buaè ese!

<sup>24</sup> Mik ie'pa miyalne, et̃a Jesús t̃o Juan ttè pakémitke pé' a, t̃a ichéitõ ie'pa a: “Mik a' dè'rõ k̃a sir poè wé kè yi serk̃u' eè Juan sauk, et̃a z̃ima a' erbikõ wém wése suèmi a' t̃o? A' kè dè'rõ wém èse, kabikeitsõ w̃i a dià a wés kua'kõ wõppè siwa' t̃o es, ese sauk. <sup>25</sup> A' kè dè'rõ wém ese sauk, e' t̃a z̃wém wése sauk a' dè'rõ? A' kè dè'rõ wém e' paiõ datsi' bua'buwa, ese sauk. A' wa ijcher t̃o wépa e' paiõ èse ena iyi bua'buwa tso' iwa tajè e' t̃tsé'woie buaè, esepa serke blu' u a. <sup>26</sup> Erè z̃wém wése sauk a' dè'rõ? A' dè'rõ wém dõr Skékõl ttekõl ese sauk. Ye' t̃o a' a ichè t̃o mok̃i Juan dõr Skékõl ttekõl, erè ie' kè dõr e' è. Ie' dõr Skékõl ttekõl ese tsat̃a. <sup>27</sup> Skékõl yèkkuõ k̃i itso' kitule wé Skékõl t̃o ichè wé pairi'bit̃uitõ idi' wa s'blúie e' a, e' t̃o ichè i' es:

‘Ye' tso'tke ye' ttè pakõkwak patkõk be' yõk̃i kèwe be' ñalè yuók.’\*

Skékõl ttè pakõkwak e' dõr Juan. <sup>28</sup> Ye' ichè a' a t̃o s'ditsõ ulitane sh̃ũa, kè yi ku' Juan tsat̃a. Erè i blúie Skékõl tso', e' sh̃ũa yi dõr èsela, ese dõr ie' tsat̃a.”

<sup>29</sup> (Mik pé' ulitane ñies inukõl shtõkwakpa Roma wõkirpa a, e'pa t̃o Jesús s'wõbla'wéke e' t̃tsé, et̃a ie'pa t̃o ichè t̃o Skékõl ttè dõr yèsyèsè. Ie'pa dè' as Juan t̃o ie'pa wõskuõ iwà kkachõie t̃o ie'pa t̃o Juan ttè klõ'wé, e' kuek̃i ie'pa t̃o ichè es. <sup>30</sup> Erè fariseowakpa ena s'wõbla'uk ttè dalõièno wa wakpa kè w̃a Juan ttè klõgne, e' kuek̃i ie' kè w̃a ie'pa wõsune,

\* 7:27 Malaquías 3.1

es ie'pa tò Skèköl er buaë chöke ie'pa a e' watétsa.)

<sup>31</sup> Jesús tò iché: “¿Ima a' chèmi ye' tò? ¿Wes a' dör? <sup>32</sup> A' dör wes ttè i' tò iché es: Ala'rla tso' inuk u itöki. Shabötspa arke tajè tá iché iyamipa a: 'Sa' tò pulè bla'wé, erè a' kè klötène'; sa' tò s'eriar ttseitssé, erè a' kè ijine.' <sup>33</sup> E' wà dör tò Juan S'wöskuókwak de batsötä, kè blo' yetä' ta a' tò iché tò aknama tso' ie' a. <sup>34</sup> E' ukuóki ta ye' dör S'ditsó Alà, e' de kè batsötä, blo' yetä', ta a' tò ye' cheke tò ye' chkö tajè, blo' yè tajè, ñies tò ye' dör inuköl shtókwakpa ena pè' sulusipa malepa, esepa sini'. <sup>35</sup> A' tò ye' cheke es erè isuerasó bulebök ta tò wépa serke wes Skèköl siwé tò iché es, esepa dör yèsyèsé.”

*Jesús miá upakò Simón dör fariseowak e' ska'*

<sup>36</sup> Fariseowak eköl kiè Simón, e' tò Jesús kié chkök ie' u a. E' kueki Jesús miá ie' ska' ta ie'pa e' tulésér chkök. <sup>37</sup> Etä alaköl sulusi serke ká e' a, e' wä ijchenewa tò Jesús tso' chkök fariseowak e' u a. Ie' wä kió masmas de e' ukuó yöule ák bua'kié alabastro ese wa. <sup>38</sup> Ie' de dur Jesús ska', e' iúke Jesús tsikka, iwöríö yénane tajè Jesús klö ki, e' pasiwéitö itsä wa, ta Jesús klö wóalattsémiitö tá kió masmas téitö Jesús klö ki. <sup>39</sup> Mik fariseowak tò Jesús kié chkök e' tò alaköl sué, etä ibikeitséitö: “Wém wí mú dör Skèköl tteköl mokí, e'ma ie' éna iarmi alaköl wése tso' ie' kók. Ie' éna iarwami tò e' dör alaköl sulusi.” <sup>40</sup> Jesús iché ie' a:

—A Simón, ilè tso' ye' wä yénoie be' a.

Ie' iüté:

—A s'wöbla'ukwak, ichö ña.

<sup>41</sup> Jesús tò iché:

—Wém böi ñarke inuköl peitókwak ulà a. Eköl ñarke cien skeyök (500), iéköl ñarke dabom skeyök (50). <sup>42</sup> Ie'pa böi kè a ipator, e' kueki inuköl peitókwak tò inuú olo'yé ie'pa ki. Ye' tò be' a ichakè tò ie'pa böi, ¿wéne ék éna inuköl peitókwak dalèrmi kibiié?

<sup>43</sup> Ie' iüté:

—Ye' a ta, wéne nuú olone kibiié e' ék.

Jesús tò iché:

—Buaë be' iüté.

<sup>44</sup> Etä Jesús tò alaköl sué ta ichéitö Simón a:

—Alaköl i' saú. Mik ye' dewä be' u a, etä be' kè wä ye' a di' mène ye' klö skuoie, erè alaköl i' tò ye' klö skué iwöríö wa ta ipasiwéitö itsä wa. <sup>45</sup> Be' kè wä ye' shkéone wóalattsé wa wes s'wöblar es. Erè ie' dewä íe, etä ie' tò ye' klö wóalattsémi tajè.

<sup>46</sup> Be' kè wä kió èsela, e' tène ye' wökir ki wes s'wöblar es. Erè ie' tò kió masmas tué darèrèé ese te' ye' klö ki. <sup>47</sup> E' kueki ye' iché be' a tò ie' éna ye' dalèr tajè e' wa iwénewa

tò i' sulu wamblé ie' tò tajè, e' nuú olone ie' ki. Erè wépa kè éna ye' dalèrta' tajè, e' wa iwénewa tò esepa ki inuú olone elkela é.

<sup>48</sup> E' ukuóki ta ie' iché alaköl e' a:

—Í sulu kqs wamblé be' tò e' nuú olone be' ki.

<sup>49</sup> Imalepa kiule chkök ñies tso' ee, e'pa ñi chakérak:

—A' iché ¿yi ie' dör e' ttö es? Skèköl é a se' nuú olo'yarmi.

<sup>50</sup> Erè ie' tò alaköl a iché:

—Be' erblé ye' mik, e' tò be' tsatkée. Be' yúne bère.

## 8

*Alaköpa tò Jesús kime*

<sup>1</sup> E' ukuóki ta Jesús miá i' blúie Skèköl tso' e' ttè buaë pakók ká blublu ena ká tsitsir tso' e' a. Ie' ttekölpa tsá dabom eyök ki böi, e'pa shkóke ie' ta. <sup>2</sup> Ñies alaköpa wélepa bua'ne ie' tò, e'pa shkóke ie' ta. E'pa wélepa bak weinuk wimblupa sulusi wa, ñies dué wä. Ie'pa eköl, kié María Magdala wak, e' a aknamapa ye'ttsaitö dökä kul. <sup>3</sup> Ñies Juana dör Cuza alaköl, e' shkóke ie' ta. Cuza dör Herodes dali kkö'nukwak. Ñies Susana ena alaköpa malepa tajè shkóke ie' ta. Ie'pa tò Jesús ena ittökatapa kimeke tajè, i' tso' ie'pa wä ese wa.

*Tè kuatkökkwak, e' paké*

*(Mateo 13.1-9; Marcos 4.1-9)*

<sup>4</sup> Pè' e' yélur iká ki debitu tajè Jesús ska'. Ie' tò ie'pa a ittè kleé i' es: <sup>5</sup> Wém miá eköl tè kuatkök ta ie' tò iwö ppé ululu tè ki\* Mik ie' tso' iwö ppök, etä ditsöwö wele anewa ñala ska' ta pè' dakélor iki, e' tò inatélur, ñies dù debitu tò ikatéwa. <sup>6</sup> Ditsöwö wele anewa áklo a ta e' kuölö ta itskine buaë. Erè ká tsabe kè ta' ee, e' kueki bet ta isinewa. <sup>7</sup> Ditsöwö wele anewa dika'chka shua. Dika'chka ena ditsöwö talane ñita, erè dika'chka e' aléka iki. <sup>8</sup> Erè ditsöwö wele ane iyök bua'buwa ki, ese tskine talane wöne buaë. Iklö wele wöne dökä cien eyök (100) elka elka.

Mik Jesús tò iché one, etä ikí chéitö ie'pa a aneule: “¡A' éna ye' ttö ttsak, e'ma ikukueblö bua'ie!”

*Í kueki Jesús tò s'wöbla'weke kleaule*

*(Mateo 13.10-17; Marcos 4.10-12)*

<sup>9</sup> Jesús ttökatapa tò ie' a ichaké:

—Ttè wäkleébö, ¿ima e' wä dör?

<sup>10</sup> Ie' tò iché ie'pa a: “Í blúie Skèköl tso' e' ttè bléulewa, e' kéwö meneat a' a ijchenoie. Erè pè' tso' tajè kè éna ye' ttè klö'wak, esepa a ye' tò ikleeke as ie'pa tò iweblö je', erè kè ie'pa a iwä wër, ñies as ie'pa tò ittso' je', erè kè ie'pa a iwä ar.†

\* **8:5** tè kuatkök ppé ululu: Ie'pa wöblar tè kuatkök wö ppélur tè kqs e' ki. † **8:10** Isaías 6.9



*Të kuatök'kwak tté e' wà paké Jesús tò*  
(*Mateo 13.18-23; Marcos 4.13-20*)

11 “Ttè wakléyö e' wà dör i' es: Skëköl tté pakèsö e' dör wës ditsöwö kuatkèsö es. 12 Pë' wëlepa tà itkõmi wës itka ditsöwö anewa ñala ska' ñe' tà itka es. Esepa tò Skëköl tté ttsé, erë bé de ie'pa ska' tà iyéttsaitö ie'pa er a as ie'pa kë tò iklö'ù tà itsatkër. 13 Wëlepa skà tà itkõmi wës itka ditsöwö anewa áklo a ñe' tà itka es. Esepa tò Skëköl tté ttsé tà iklö'wérakitö ttsé'ne buaë wa erë ekuölö è. Ie'pa kë a e' tkërwa darèrèè Skëköl tté a. Mik ie'pa weinemitke ie' tté kuëkj, etä ie'pa anemine tottola. 14 Wëlepa skà tà itkõmi wës itka ditsöwö anewa dika'chka shuä ñe' tà itka es. Esepa tò Skëköl tté ttsé, erë ie'pa tò iyi tso' ká i' kji e' bibeitseke kibiie. Ie'pa er me'rie inuköl ena i tso' ká iki tò s'ttsé'wëke buaë ese kji. Ese kos tò Skëköl tté kui'wëwä ie'pa er a, tà ie'pa kë sene buaë Skëköl tté a. 15 Erë wëlepa skà tà itkõke wës itka ditsöwö anewa iyök buaë kji ñe' tà itka es. Esepa tò Skëköl tté ttsé tà iklö'wé er buaë wa mokji. Ie'pa tò iüteke buaë tà iwà dalöikerakitö këkraë. E' kuëkj ie'pa tò i buaë kos ese wé wës Skëköl kji ikiane es.

*Bö'wö tté*  
(*Marcos 4.21-25*)

16 “Mik bö'wö wötskékasö, etä kë sö ipabikepawä, kë sö ipatkepawä ka' dikjä. E' skéie itkekeka kákke s'yamipa datse esepa wö a ká ñi'woie. 17 Es ñies tté tso' bléulewä j'ñe tà, ese jcherdawä sulitane wä aishkuö tà. I ché ye' tò, e' kë wä ane ie'pa éna j'ñe tà, erë e' wä ardaë ie'pa éna aishkuö tà.

18 “Yi e' yuak buaë ye' tté wa, ese a ikji meraëyö as ie' éna iwà ar buaë. Erë yi kë e' yuak ye' tté wa, i bibeitse ese tò tò ane iéna, e' kos yèrdatsane iyöki. E' kuëkj ye' ttö kukueblö a' tò bua'ie.”

*Jesús mi ena ie' èlpa debitü ie' weblök*  
(*Mateo 12.46-50; Marcos 3.31-35*)

19 Etä Jesús mi ena ièlpa ena ikutapa e'pa debitü ie' weblök. Erë ie' tkër wé pè' tso' tajë e' shuä, e' kuëkj ie'pa kë dè'wä ie' ska'. 20 E' biyö ché yile tò ie' a:

–Be' mi ena be' èlpa ena be' kutapa e'pa shkö be' weblök.

21 Ie' tò iüté:

–Èkèkè, erë ye' tò a' a ichè tò wépa tò Skëköl tté ttsé tà iwà iütéitö, esepa dör wës ye' mi ena ye' èlpa ena ye' kutapa es.

*Siwä tajë e' wöklö'wé Jesús tò*  
(*Mateo 8.23-27; Marcos 4.35-41*)

22 Etökicha tà Jesús e' iéka kanö a ittökatapa tà, tà ichéitö ie'pa a:

–Mishka batsöri wishet.

Etä ie'pa miyal. 23 Ie'pa mirwaiä tà ie' kapowä kanö a. E' dalewa siwä batsineka tajë tò di' uyéka tajë tà kanö a di' iènekami

katsirkewatke. 24 E' kuëkj ie'pa tò itj'wéka tà ichérakitö ia:

–jA s'wöbla'ukwak! jA s'wöbla'ukwak! jSe' duölurmi!

Etä ie' e' kéka tà siwä' ena di' yöli uñéitö tà iwöklönewä miáne alamié.

25 E' ukuökj tà ie' tò iché ie'pa a:

–¿Wës a' erblöke ye' mik, e' de?

Erë ie'pa suanéka tajë, tkinewä tajë tà iñi chakéka:

–¿Yi dör wëm wj? jE' ttö dalöié di' tò ena siwä' tò!

*Wëm eköl a aknamapa tso' tajë e'*  
*bua'wéne Jesús tò*  
(*Mateo 8.28-34; Marcos 5.1-20*)

26 E' ukuökj tà ie'pa miä demi ká kié Gerasa atë batsöri wishet Galilea wöshäè ee. 27 Mik Jesús e' yéttsä de ká sí kji, etä wëm eköl de ie' ska', e' a aknamapa tso'. Ie' dör Gerasa wak. Iaiäè ie' sene'mi sume, kë serku'ia u a, ie' serke pö a. 28 Mik ie' tò Jesús sué, etä ie' anekä tajë tà ie' tkëwä kuchë kji. Ie' iché Jesús a:

–A Jesús, be' dör Skëköl dör iyi ulitane tsatä e' alä. ¿jök be' de ye' tsiriük? Ye' müat bërè. Ye' kköchö tajë be' a tò kë ye' we'kar.

29 Jesús tò ichétke wimblu sulusi a kewë: “Be' e' yöttsä wëm sè a.” E' kuëkj wimblu tò ie' a iché es. Iaiäè ie' we'ikbitü aknama tò. Këkraë aknama tò ie' wö aliwëke. E' kuëkj pè' tò ie' muëke iulä a iklö' a tabechka daloie wa, erë e' batsélor ie' tò tottola tà aknama tò ie' kji aliwéka patkëmi wé kë yi serku' ese ska'. 30 Etä Jesús tò ie' a ichaké:

–¿Ima be' kié?

Ie' iüté:

–Ye' kié Tajë Wakpa.

Ie' a aknamapa tso' tajë, e' kuëkj ie' tò iüté es. 31 Ie'pa kköchöke tajë Jesús a: “Kë sa' patkarmi kauk tajë tso' iskié e' a.” 32 Tsjinet kabata kuli' a köchi iëter tajë chkök, e' kuëkj wimblupa kköchöke Jesús a: “Kawö mü sa' a e' tiu'kwä köchipa jai a.” Jesús tò ikéwö mé ie'pa a. 33 Etä ie'pa e' yélur wëm a tà ie' tiélur köchipa a. Köchi kos poneka tünemirak ká spé mik brutolonemi batsöri a tà ee iduolur.

34 Mik köchi kkö'mukwakpa tò isué, etä itkayalmi tà itté ppëkarakitö ká e' wa'ñe.

35 Pè' de tajë iweblök tò i tka. Mik ie'pa de Jesús ska', etä wëm a aknamapa yërulune tajë, e' sué ie'pa tò itkër Jesús wörki datsi' iéne éna ká anene buaë. E' tò ie'pa suawé.

36 Wépa tò i tka e' sué, e'pa tò ipaké ie'pa a tò wës wëm a aknamapa bak e' buanene. 37 Ká e' wakpa ulitane suane tajë, e' kuëkj ie'pa kköché Jesús a: “Be' e' yöttsä sa' ká a.” Etä Jesús e' iéka kanö a ittökatapa tà tà imiatke.

38 Etä wëm a aknamapa yërulune e' kköché Jesús a: “Ye' shkakmi be' ta.” Erë Jesús tò iüté:

—Au, be' e' tsúat. <sup>39</sup> Be' yúne be' u a ta ì kòs wé Skékòl tò be' a, e' pakò sulitane a.  
 Ta ie' mía, ta ì kòs buaé wé Jesús tò ie' a, e' pakéitò sulitane a.

*Jesús tò Jairo alá busi shké'wékane ñies alakòl bua'wéneitò ekòl*

*(Mateo 9.18-26; Marcos 5.21-43)*

<sup>40</sup> Mik Jesús dene batsòri iqshet, eta pè' tso' tajè ie' panuk, e' kuekì ie'pa tò ie' kiéwa ttsè'ne bua' wa. <sup>41</sup> Eta wém ekòl kiè Jairo e' de. Ie' dór judiowak ñi dapa'wo wé e' wòkir ekòl. Ie' e' téwa wòwakkòt Jesús wòrkì ta ikkòchòke tajè ie' a: "Mishka bet ye' u a." <sup>42</sup> Jairo alá dór ekla è wák dór alakòl kì duas tso' dabom eyòk kì bòk ulatòk (12), e' duòkewatke.

Jesús miria, e' dalewa tajè pè' dami, e' tèrdami ie' mik. <sup>43</sup> E'pa shuà alakòl dami ekòl e' du'mi alakòlpa duè wa e' kì duas de dabom eyòk kì bòk (12). Ì kòs tso' ie' wa e' ewéwaitò yés s'kapeyòkwak kì, erè kè yi a ibuanene. <sup>44</sup> Ie' dewa tsinet Jesús tsj kker ta idatsi' bata kéwaitò. E' wòsha ta ipè wòklòne ta ibuanene buaè. <sup>45</sup> Eta Jesús tò ichakè:

—¿Yi tò ye' ké?

Sulitane tò iché:

—Kè sa' wa be' kàne.

Pedro tò iché ia:

—A s'wòbla'ukwak, pè' tso' tajè e' tèrdami be' mik.

<sup>46</sup> Erè Jesús tò iché:

—Ye' ittsé tò ilè tka ye' diché wa. E' kuekì ye' wa ijcher tò yile tò ye' kè.

<sup>47</sup> Mik alakòl buanene, e' tò isué tò kè ie' a e' blènukià ta ide Jesús ska' painéka tajè suane wa. Ie' e' tkéwa kuchè kì Jesús wòrkì ta ie' e' chéka sulitane kukua tò ì kuekì Jesús kéwaitò. Ie' tò iché: "Mik ye' tò be' kéwa, e' wòsha ta ye' buanene." <sup>48</sup> Jesús tò iché ia:

—A alá busi, be' erblé ye' mik, e' kuekì be' buanene. Be' yúne bèrè.

<sup>49</sup> Ie' ttòkeia alakòl ta, e' dalewa ekòl bite Jairo u a, e' debitu ta iché Jairo a:

—Be' alá busi blènewatke. S'wòbla'ukwak kè tsiriwaria.

<sup>50</sup> Mik e' ttsé Jesús tò, eta ie' tò iché Jairo a:

—Kè be' tkinuk. Be' erbló ye' mik è, be' alá busila buardane.

<sup>51</sup> Mik ie'pa de Jairo u a, eta Jesús kè wa yi kàne shkòkwa wé busila nu me'r ee. Pedro ena Santiago ena Juan ena alá yé ena imi, e'pa è kiéwaitò e' ta. <sup>52</sup> E' dalewa sulitane ijuè alárke tajè. Erè Jesús tò ie'pa a iché:

—Kè a' ijukià. Busila kè du'wa, ikapòme'r è.

<sup>53</sup> Sulitane wa ijcher tò busila duowa, e' kuekì ie'pa tò ie' wayuéka jañeitséka tajè. <sup>54</sup> Erè Jesús tò busila ulá klò'wéwa, ta iché ie' a:

—¡A tayèla, be' e' kòka!

<sup>55</sup> Eta ishkenekane, e' bet ta ie' e' kéka ta Jesús tò iché ie'pa a:

—Itiò.

<sup>56</sup> Iyè ena imi tkirulune iweblòk. Eta Jesús tò iché ie'pa a:

—Ì tka ie, e' kè char yi a.

**9**

*Jesús tò ittòkatapa patké s'wòbla'uk*

*(Mateo 10.5-15; Marcos 6.7-13)*

<sup>1</sup> Jesús tò ittòkatapa dabom eyòk kì bòl e'pa dapa'wé ta diché méitò ie'pa a aknamapa ulitane trè'woyal. Ñies kawò méitò ie'pa a s'kirirke bua'wone. <sup>2</sup> Ipatkéraak ì blúie Skékòl tso' e' tté buaé pakòk ñies s'buawukne. <sup>3</sup> Ta ie' tò iché ie'pa a:

—Mik a' mi'ke, eta kè ì tsarmi. Shko kéli, sku', iyi ñanoie, inukòl, datsi' skà, ese kòs kè tsarmi.

<sup>4</sup> Mik yile tò a' a' iché a' kapòrò, eta a' tso' ká e' a' e' dalewa a' kapòrò ie' u è a. <sup>5</sup> Eta ká wele wakpa kè wa a' kinewa, e' ta a' e' yòlur ká e' a, ta kapo tso' a' klóttò mik, e' ppòò a' tò. E' tò ie'pa a' ikkacheraè tò ie'pa dór Skékòl bolòkpa.

<sup>6</sup> Eta ie'pa míyal judiowak ké tsitsir kòs a Skékòl ttè buaé pakòk ñies s'kirirke bua'ukne.

*Herodes tò ibikeitséka tajè tò yi dór Jesús*

*(Mateo 14.1-12; Marcos 6.14-29)*

<sup>7-8</sup> Herodes dór Galilea wòkir, mik e' tò ì kòs wéke Jesús tò e' tté ttsé, eta ie' tò ibikeitséka tajè tò yi dór Jesús. Welepa tò icheke tò Jesús dór Juan S'wòskuòkwak kòtèwa e' shkenekane. Welepa tò icheke tò ie' dór Skékòl ttekkòl bak kiè Elias e' shkenekane. Welepa tò icheke tò ie' dór Skékòl ttekkòlpa skà bak esepa wele shkenekane. <sup>9</sup> Erè Herodes tò iché:

—Ye' wák tò Juan kuli' tòkòk patké', e' ta wém tté ttséyo tso' iyi uk tajè s'tkiwè ekkè ze' dór yi?

E' kuekì Herodes éna suluè Jesús suakwa.

*Pè' dòka mil skeyòk e'pa tié Jesús tò*

*(Mateo 14.13-21; Marcos 6.30-44; Juan 6.1-14)*

<sup>10</sup> Mik Jesús ttekkòlpa tsá e'pa dene, eta ì kòs wé ie'pa tò, e' pakéne ie'pa tò Jesús a. Eta Jesús tò ie'pa kiémi e' ta dò tsinet ká kiè Betsaida wé kè yi serku' ee. <sup>11</sup> Erè mik pè' malepa wa ijchenewa, eta ie'pa mí itòkì ta ie'pa kiéwaitò buaè. Ì blúie Skékòl tso' e' tté buaé paké ie' tò ie'pa a ñies s'kirirke bua'wéneitò.

<sup>12</sup> Mik ká tuirketke, eta Jesús ttòkatapa dabom eyòk kì bòl (12) e'pa de ie' ska' ta ichérakitò ia:

—Ká ì' kì kè ì ku' katanoie ñanoie, e' kuekì ie'pa yuòmi as ie'pa mí' ká tso' tsinet ena pè' serke tsinet esepa ska' chké taük ñè ena kapòkrò.

<sup>13</sup> Jesús tò ie'pa a iché:

—Ie'pa tiõ a' tõi.

Ie'pa tõi iüté:

—Sa' wã pan skel ena nima bõtõ e' ã tso'. Kẽ sa' mine ikí taũk, e' ta' i tso' sa' wã e' kẽ dõkkã ie'pa tajê ekkẽpa tioie.

<sup>14</sup> Wẽpa tso' eẽ dõkã mil skeyõk (5000), e' kuẽkí ittõkatapa tõi iché es. Eré Jesús tõi ie'pa a' iché:

—A' tõi ie'pa kõi e' tkõksr iskí ek tsjini ek tsjini dabom skeyõk (50) dabom skeyõk. <sup>15</sup> Es ie'pa tõi iwé ta' pè' ulitane e' tkẽsgr. <sup>16</sup> E' ukuõkí ta' ie' tõi pan skel ena nima bõtõ, e' klõ'wé ta' ikã sué kã jai a' ta' wẽstela chéitõ Skèkõl a'. E' ukuõkí ta' ie' tõi pan ena nima blaté mé ittõkatapa a' as ie'pa tõi iwatiõ pè' a'. <sup>17</sup> Mik ie'pa chké de wè', e' ta' ibata a' tẽ, e' shtérakitõ iène dõkã kkõla dabom eyõk kí bõk (12).

*Pedro tõi iché tõi Jesús dõr wé pairine'bitu idi' wa s'blúie e'*

(Mateo 16.13-19; Marcos 8.27-29)

<sup>18</sup> Etõkicha ta' Jesús tso' ittõkatapa ã ta'. Ie' tso' S'yé ta' ttõk, ta' eẽ ie' tõi ie'pa a' ichaké:

—¿Iima pè' tõi iché tõi ye' dõr yi'?

<sup>19</sup> Ie'pa tõi iüté:

—Welepa tõi icheke tõi be' dõr Juan S'wõskuõkwak. Welepa skã tõi icheke tõi be' dõr Skèkõl ttekkõl bak kié Elías e' shkẽnekane. Welepa skã tõi icheke tõi be' dõr Skèkõl ttekkõlpa bak kã iaiãe e' wẽle shkẽnekane.

<sup>20</sup> Ie' tõi ie'pa a' ichaké:

—Eré ¿iima a' iché, ye' dõr yi'?

Pedro tõi iüté:

—Be' dõr wé pairine'bitu idi' wa sa' blúie e'.

*Jesús e' biyõ ché tõi ie' tterawã*

(Mateo 16.20-28; Marcos 8.30-9.1)

<sup>21</sup> Eré Jesús kẽ wã ie'pa kãne yi' a' ichõk yi' dõr ie'.

<sup>22</sup> Nies ie' tõi iché:

—Ye' dõr S'ditsõ Alã, e' weirdaé tajê. Judiwak kuẽblupa ena sacerdotepa wõkirpa ena s'wõbla'uk tte dalõiẽno wa wakpa tõi ye' waterattsa. Ye' tterawã, e' kí kã de mañat e' ta' shkẽrdakane.

<sup>23-24</sup> E' ukuõkí ta' ie' tõi iché ie'pa ulitane a':

—Yi' e' tsãtkak ittewã yõkí, ese kẽ ulã a' sene michõẽ dõpa. Eré yi' e' mettsã ttewã ye' dalèrmik, ese ulã a' idõrae. E' kuẽkí yi' e' yuak ye' ttõkataie, ese kẽ kãne tkinukiã e' kí. E' skéie kekraé ikãwõtã e' chõk dõ ittewã wõtõulewã krus mik ekkẽ. Es ie' kawõtã shkõk ye' itõkí. <sup>25</sup> Iyi ulitane tso' kã' i' a', e' de a' ulã a', eré sene michõẽ kẽ dè' a' ulã a', e' ta' e' dõr ¿iie bua' a' a'? <sup>26</sup> Mik ye' dõr S'ditsõ Alã, e' dene ye' olo wa, nies ye' Yé olo wa, nies ibiyõchõkwakpa batse'r e'pa olo wa, e' ta' wépa jaẽne ye' kí, esepa kí ye' jaẽndaé nies. <sup>27</sup> Mokí ye' tõi a' a' iché tõi a' tso' ié, e' welepa tõi i' blúie Skèkõl tso' e' sueraé kam iblèrurur e' yõkí.

*Jesús tõi ilo ta' tajê e' kkaché ittõkatapa a' (Mateo 17.1-8; Marcos 9.2-8)*

<sup>28</sup> E' kí kã de pãkõl (8) ulatõk, e' ta' Jesús miã kabata a' ttõk S'yé ta'. Pedro ena Juan ena Santiago e'pa mĩtser iwã e' ta'. <sup>29</sup> Ie' tso' ttõk S'yé ta', e' ta' iwõ manenettsa miã kuã'kí dalõlõẽ nies idatsi' miã saruruẽ wõñarũ dalõlõẽ. <sup>30</sup> E' wõshã ta' wẽpa de ièter bõl tso' ttõk ie' ta'. Ie'pa dõr Skèkõl ttekkõlpa bak kã iaiãe kié Moisés ena Elías e'pa. <sup>31</sup> Ie'pa olo bunekã tajê dalõlõẽ. Ie'pa ièter kapakõk Jesús ta' wẽs ie' tterawã pè' tõi Jerusalén as iwã tkõ wẽs Skèkõl kí ikiane es. <sup>32</sup> Pedro ena iyamipa bõl, e'pa tteke kapewã tõi tajê. Eré mik ie'pa tõi nekane bua'ie, e' ta' ie'pa tõi Jesús olo tajê e' sué, nies wẽpa bõl ièter ttõk ie' ta' e'pa suérakitõ. <sup>33</sup> Mik Moisés ena Elías mitkene, e' ta' Pedro tõi iché Jesús a':

—A S'wõbla'ukwak, buaé se' tso' ié. Sú sa' tõi úla yuèkã mañatkuela, etkue be' a', etkue Moisés a', etkue Elías a'.

Eré i' cheke Pedro tõi e' wã kẽ ane ie' éna. <sup>34</sup> Pedro ttõkeiã, e' wõ shã ta' mochka tõi ie'pa kítewã. E' tõi ie'pa suawé tajê. <sup>35</sup> Mochka shuã ie'pa tõi ttõ ttsé tõi iché: "Sẽ dõr ye' alã, e' pairi'bitubak ye' tõi idi' wa a' blúie. Ie' tõi iütõ."

<sup>36</sup> Mik ie'pa tõi ttè e' ttsé, e' ta' ie'pa tõi isué tõi Jesús a' tẽ dur ekõrã. Eré i' ttsé ie'pa tõi, i' sué ie'pa tõi, e' blé ie'pa tõi ier a', kẽ ie'pa wa ipakane yi' a' dõ aishkuõ ta'.

*Duladula ekõl tteke aknama tõi e' bua'wéne Jesús tõi*

(Mateo 17.14-21; Marcos 9.14-29)

<sup>37</sup> Bule es ta' ie'pa tso' kabata a' e'pa biteyal, e' ta' tajê pè' de Jesús ñaletsuk. <sup>38</sup> E' shuã wẽm tso' ekõl, e' tõi iché aneule:

—A s'wõbla'ukwak, be' we'ikèyõ, ye' aladulakõl saũ, e' dõr ye' alã ekõl ã. <sup>39</sup> Mik wimblu sulusi tõi ie' éna kã chõwéwa, e' ta' ie' anekã tajê, painekã katõtõẽ, ta' ikkõ a' ishuya deka tajê. Kekraé ie' we'ikekitõ siarẽ. Wimblu kẽ éna ie' akwa. <sup>40</sup> Ye' kkõché tajê be' ttõkatapa a' tõi wimblu tré'úshkar eré kẽ ie'pa a' iõne.

<sup>41</sup> Jesús tõi iché ie'pa ulitane a':

—A' wakpa kẽ erblõtã' Skèkõl mik, a' kẽ éna kã ane. ¿Mik ye' sermirõ a' ta'? ¿Kos ye' tõi a' dalé'ttsemirõ? Be' alã tsúbitu ña.

<sup>42</sup> Mik duladula de tsjinet, e' ta' aknama tõi ie' éna kã chõwéwa kéu iskí ta' ipainekã tajê. Eré Jesús tõi wimblu sulusi uñé tré'wèshkar ta' duladula bua'wéneitõ méneitõ iyé a'. <sup>43</sup> I' buaé wé Skèkõl tõi idiché tajê wa e' tõi ie'pa ulitane tkiwéwã.

*Jesús skã e' biyõ chéne tõi itterawã*

(Mateo 17.22-23; Marcos 9.30-32)

I' buaé wé Jesús tõi, e' chekeiã ie'pa tõi ñi a', e' dalewa ie' tõi iché ittõkatapa a':

44—Ì cheke ye' tò a' a, e' ttsò buaë, kè a' éna ichòkwa: Ye' dör S'ditsò Alà, e' wòmerdattsa pè' ulà a.

45 Erè ì ché ie' tò e' blèulewà ie'pa yòki, e' kuekì ie'pa kè éna iwà ane. Nies ie'pa suane ichakòk tò jma iwà dör.

*Yi dör ibua'ie Skèkòl wòg  
(Mateo 18.1-5; Marcos 9.33-37)*

46 E' ukuòkì tã Jesús ttòkatapa ñi iütòkerak tò ie'pa shuà yi dõmi ibua'ie imalepa tsata.

47 Ì bikeitsòk ie'pa tso', e' suèwà Jesús tò, e' kuekì ie' tò alala kié ekòl duésèr ie' o'mik 48 tã ichéitò ie'pa a:

—A' shuà yi e' wòéwa imalepa dikjà diòshet ese dör ibua'ie. E' kuekì yi tò alala i'se kiéwà ye' ttò wa, ese tò ye' wák kiéwà. Es ñies yi tò ye' kiéwà, ese tò yi tò ye' patkè'bitù, e' kiéwà.

*Yi kè ku' ñippòk se' tã ese tò se' bikeitsèke er bua' wa*

*(Marcos 9.38-40)*

49 Juan tò iché Jesús a:

—A s'wòbla'ukwak, wèm sué sa' tò ekòl, e' tò aknama trè'wéyal be' ttò wa. Erè ie' kè ku' se' tã, e' kuekì sa' tò iché iã tò kè iwàriã.

50 Jesús tò iüté:

—Yi kè ku' ñippòk se' tã, ese tso' se' tã. E' kuekì kè iwòklò'wà.

*Santiago ena Juan e'pa uñé Jesús tò*

51 Jesús mi'kekane ká jai a, e' kèwò dòkewatke, etã Jesús tò ibikeitsé tò ye' miã diché wa Jerusalén, tã imiã. 52 Ie' tò wèpa wèlepa patkèmi ie' yòki kewe u yulòk kaporóie. Ie'pa miã demi ká tso' etk Samaria ee. 53 Erè Samaria wakpa wà ijcher tò Jesús ena ittòkatapa mi'ke Jerusalén, e' kuekì ie'pa kè wà ikinewà. 54 Mik Jesús ttòkatapa kié Santiago ena Juan e'pa tò isué tò Samaria wakpa kè wà ie'pa kinewà, etã ie'pa tò Jesús a iché:

—A Skèkèpa, ¿be' kì ikiane tò sa' tò bõ' kié ká jai a ie'pa ewowà?

55 Erè Jesús wòtréene ie'pa sauk tã ie'pa uñéitò. 56 E' ukuòkì tã ie'pa miã ká skà tso' tsjinet ee.

*Wèpa mañal e'yuak Jesús ttòkatapaie  
(Mateo 8.19-22)*

57 Ie'pa mirwà ñalã kì tã wèm ekòl tò Jesús a iché:

—A kèkèpa, ye' mi'ke be' tã ká wa'ñe wé be' mürò ee.

58 Jesús tò iüté:

—Bakli' u tã, ñies dúla u tã, erè ye' dör S'ditsò Alà, e' kè wà u tã' senóie.

59 Jesús tò iché wèm ekòl skà a:

—Mishka ye' tã.

Erè wèm tò iüté:

—A kèkèpa, kawò mú ña, mik ye' yè blèrkewà e' nu wòtòkwà, e' ukuòkì tã ye' mi'ke be' tã.

60 Jesús tò iüté:

—Wépa dör wes s'duulewà es Skèkòl wòg, as esepa tò iyamipa nu wòtò. Erè be' yú, ì blúie Skèkòl tso' e' tté pakòk sulitane a.

61 Wèm ekòl skà tò iché Jesús a:

—Ye' e' yuak be' ttòkataie, erè kewe kawò mú ña shkoie e' chòkãt ye' yamipa a.

62 Jesús tò iüté:

—Yi e' yué ye' ttòkataie tã ì kòs méatitò ye' dalèrmik, erè ibikeitséneitò tajé, etã ese kè kì ì blúie Skèkòl tso' e' mène.

## 10

*Jesús tò ittòkatapa dabom kuryòk kì bõl  
(72) e'pa patkè*

1 E' ukuòkì tã Skèkèpa Jesús tò ittòkatapa skà shushtë dòkã dabom kuryòk kì bõl (72) patkèmi ie' yòki kewe bõl bõl wé ie' mi'ke ese ska'.

2 Ie' tò iché ie'pa a: “Mokì pè' tso' tajé e' kì Skèkòl tté buaë kiane tssé. Esepa dör wes iyiwò tso'tke wè'iaé shtë es, erè ishtëkwakpa kè dör tajé. E' kuekì a' tò ikiò kané wák a' tò ishtëkwakpa patkò. 3 A' yú. Ye' tso' a' patkòk ye' tté pakòk pè' shuà wes obejala èmi namu tso' tajé, ese shuà es. 4 Inukòl skúla ena dali skú ena klòkkuò skà, ese kòs kè tsãrmi yès. Nies yi kué a' tò ñalã wa, ese kè tã a' ttòk tajé. 5 Mik a' dewà yile ska', etã kewe ichò ie'pa a' tò 'Skèkòl er buaë chò a' a.' 6 Ie'pa tò a' kiéwà er bua' wa, e' tã Skèkòl er buaë chòraé ie'pa a. Erè kè idór es, e' tã Skèkòl kè er buaë chòpa ie'pa a. 7 Ie'pa tò a' kiéwà buaë, e' tã a' e' tsuát u e' a. Ttè tso' e' tò iché i' es: 'Kaneblòkwak chkömi ì kanewèkeitò e' ské wa.' E' kuekì ì meke ie'pa tò a' a' ñé yé, e' ñú, e' yó. U e' è a' a' e' tsuát a' tso' ká e' a' e' dalewa. 8 Ká wé a' demi tã ká e' wakpa tò a' kiéwà buaë, e' tã ì mekeitò a' a' ñé e' ñú. 9 Ie'pa duòke, e' tã e'pa bua'üne. Nies ichò ie'pa a: 'Ì blúie Skèkòl tso' e' kèwò dewatke tsjinet a' o'mik.' 10 Erè ká wèle wakpa kè wà a' kinewà, e' tã a' yú ie'pa ñalã wa tã ichò ie'pa a: 11 'A' kapo tso' sa' klóttò mik, e' ppée sa' tò iwà kkachóie tò a' dör Skèkòl bolòkpa. Erè a' wà ijchenú tò ì blúie Skèkòl tso' e' kèwò dewatke tsjinet a' o'mik.' 12 Ye' tò a' a' iché tò mik Skèkòl tò a' chakeutke inu kì aishkuò tã, etã ká e' wakpa weirdaé siarè Sodoma wakpa bak senuk sulué e'pa tsatã.

13 “A Corazín wakpa, a Betsaida wakpa,

iwèstela ñna a' ta! Ì kè or yi a ese wé ye' tò tajé a' wòrkì, erè kè a' er maneone. E' úpa ye' tò Tiro ena Sidón e' wakpa wòrkì, e'ma ká iaiaé ie'pa er mane'bak. Ie'pa tò eriane datsi' ajaé ese iè'kábak, ñies ie'pa e' tkè'kábak muluchka kì iwà kkachóie tò ie'pa er mane'wé Skèkòl a. 14 E' kuekì ye' tò iché tò aishkuò tã mik a' wòchakirketke a' nu kì e' kèwò de, etã a' wòmerdattsa weinuk

*Ká mañat wakpa weirdaé siarè*

*(Mateo 11.20-24)*

13 “A Corazín wakpa, a Betsaida wakpa, iwèstela ñna a' ta! Ì kè or yi a ese wé ye' tò tajé a' wòrkì, erè kè a' er maneone. E' úpa ye' tò Tiro ena Sidón e' wakpa wòrkì, e'ma ká iaiaé ie'pa er mane'bak. Ie'pa tò eriane datsi' ajaé ese iè'kábak, ñies ie'pa e' tkè'kábak muluchka kì iwà kkachóie tò ie'pa er mane'wé Skèkòl a. 14 E' kuekì ye' tò iché tò aishkuò tã mik a' wòchakirketke a' nu kì e' kèwò de, etã a' wòmerdattsa weinuk

tajë shütë Tiro ena Sidón wakpa tsata. <sup>15</sup> A Cafarnaúm wakpa, kē a' tō ibikeitsōk tō a' mi'mitser ká jai a. Ie' tō a' patkerami diōshet wé s'wimblu weirke eg."

<sup>16</sup> Etā Jesús tō iché ittōkatapa a: "Yi tō a' ttō tseke tã iutekeitō, ñies ese tō ye' ttō tseke tã iutekeitō. Yi tō a' wateke, ñies ese tō ye' wateke. Ñies yi tō ye' wateke, ese tō Skëköl tō ye' patkë', e' wateke."

*Jesús ttōkatapa dabom kuryök kī bōl (72) e'pa dene*

<sup>17</sup> E' ukuōkī tã Jesús ttōkatapa dōkã dabom kuryök kī bōl (72) patkë' ie' tō, e'pa dene tse'nerak buaë. Ie'pa tō iché ie' a:

—A Skëképa, aknamapa tō sa' ttō dalöie be' ttō wa.

<sup>18</sup> Ie' tō ie'pa iuté:

—Tō. A' e' alékã Satanás kī je'. Ye' isuë tō ie' bateshkar ká jai a wés alá wōñar es. <sup>19</sup> Ye' tō a' a' diché mé e' alokã tkabë kī ena bachë' kī ñies e' alokã Satanás dichë kī. Es kē ì tō a' we'ikepa. <sup>20</sup> Kē a' tse'ñuk buaë wimblupa sulusi tō a' ttō dalöie, e' ë kuëkj. E' skëie a' kië tso' kitule ká jai a sene michoë yëkkuō kī, e' kuëkj a' tse'ñu buaë.

*Jesús tse'ne buaë*

*(Mateo 11.25-27; 13.16-17)*

<sup>21</sup> Jesús tso'ia' ttök ittōkatapa tã, e' shua Wiköl Bats'e'r tō ie' tse'wé buaë shütë. Ie' tō iché: "A ye' Yë, be' dör iyi ulitane tso' ká jai a ena ká i' a' e' Këköl. Be' tō ttë ikkë blë'wã pë' wã siwã' jcher iskië ena erbikō tajë esepa yöki. Erë ikkachëwãbō s'ësela a. Es be' kī ikiane, e' kuëkj be' iwë es. E' kuëkj be' kīkëkayō."

<sup>22</sup> Jesús ttë S'yë tã one tã ichéitō pë' tso' eë e'pa a: "Ye' Yë tō iyi ulitane méat ye' ulã a. Ye' dör Skëköl Alã, kē yi wã ijcher mokj tō wés ye' dör, e' jcher ye' Yë ë wã. Ñies kē yi wã ijcher mokj tō wés ye' Yë dör, e' jcher ye' ë wã. Ñies wépa a ye' éna ikkachakwã esepa wã ijchermi."

<sup>23-24</sup> Etã Jesús wotrëene ittōkatapa kke tã ichéitō ie'pa ë a: "Ye' tō a' a' ichë tō Skëköl ttekölpã tajë ena blu'pa bak ká iaiaë esepa tajë tō, ì suë a' tō, e' kkeyë' siarë suë, erë ie'pa kē wã isune. Ñies ì tse' a' tō, e' kkeyë' siarë ie'pa tō tse, erë ie'pa kē wã ittsëne. E' kuëkj wépa tō ì suë a' tō e' suë, ayëcha buaë esepa."

*Samariawak buaë e' pakë*

<sup>25</sup> Etökicha tã s'wöbla'ukwã ttë dalöiëno wa ese eköl debitu Jesús ska', e' tō ie' a' ichakë itsaioie:

—A s'wöbla'ukwã, ç'Ï wëmi ye' tō as sene michoë dö ye' ulã a?

<sup>26</sup> Jesús tō ie' a' ichakë ñies:

—Ç'Ï tso' kitule Skëköl yëkkuō kī? ç'Ïma e' wã dör be' a'?

<sup>27</sup> Etã s'wöbla'ukwã tō iütë:

—Skëköl yëkkuō tō iché: 'Skëköl dalëritsō a' er kōs wa, a' wák kōs wa, a' diché kōs wa, ena a' erbikë kōs wa.' Ñies e' tō iché: 'A malepa dalëritsō wés a' wákpa e' dalër es.'

<sup>28</sup> Jesús tō iché ie' a:

—Be' tō iütë buaë. Be' tō iwë es, e' tã sene michoë dōraë be' ulã a.

<sup>29</sup> Erë ie' e' tsatkak ttë e' yöki, e' kuëkj ie' tō Jesús a' ichakë:

—Etã s'yamipa chë Skëköl yëkkuō tō, çesepa dör s'yamipa wëse?

<sup>30</sup> Etã Jesús tō iütë ttë i' wa:

—Wëm eköl datse Jerusalén, e' micho Jericó, etã ñalã wa akblökwakpa tō ie' klö'wëwã. Ì dami iwã kōs dö idatsi' e' blëwãrakitō. Ie' ppërakitō tajë tã imiyal. Ie' méat tër ie'pa tō ñalã ska', tsir etã iduowã. <sup>31</sup> Etã judiowak eköl dör sacerdote e' dami ñalã e' kī. Mik ie' tō wëm tër shkã'ule e' suë, etã ie' tkami bánet iyöki. <sup>32</sup> Es ñies judiowak skã eköl dör Leví aleri kaneblöke Skëköl wé a, e' dami ñalã e' kī. Mik ie' tō wëm tër shkã'ule, e' suë, etã ie' ñies tkami bánet iyöki. <sup>33</sup> Erë samariawakpa kē mik a' wödör, suëkj e' tō suluë, esepa eköl dör wëm, e' dami ñalã e' kī. Mik ie' tō wëm tër shkã'ule e' suë, etã ie' wa iwër siarë. <sup>34</sup> Ie' de iska', tã wé ishka'ne e' paskuëitō vino wa, paiklëitō kiō wa, tã ipatrëwãitō eköl tak wa. E' ukuōkī tã ie' tō itkëkã iwák burro kī tsëmi wé s'kaporō ese wé a, tã eë ie' tō ikkō'neia ipasuëia buaë. <sup>35</sup> Bule es tã samariawak tō s'kaporō wé, e' wák patuë inuköl dōkã s'kaneblö ká böt e' skë ekkë, tã iché ie' a: 'Wëm shkã'ule i' kkö'ñu ña. Ilë kī tuë be' tō ie' a, e' tã e' kī ye' tō be' patuërane mik ye' dene etã.'

<sup>36</sup> Etã Jesús tō ichakë s'wöbla'ukwã a:

—Wëm shkã'wé akblökwakpa tō e' suë ie'pa mañal tō, çie'pa wé tō idalëritsë mokj wés s'kawõtã s'yamipa dalëritsök es?

<sup>37</sup> S'wöbla'ukwã tō iütë:

—Wë tō isuë er siarë wa e'.

Jesús tō ie' a' iché:

—Es be' yú tã iü wés samariawak tō iwë es.

*Jesús miã Marta ena María ska' upakök*

<sup>38</sup> Jesús ena ittōkatapa miryal ñalã wa dö Jerusalén, tã ie'pa de ká tsir es a. Eë alaköl serke eköl kië Marta, e' tō Jesús kiëwã buaë ie' u a. <sup>39</sup> Marta ël, kië María, e' e' tkëwã tsinet Jesús ska', tã ì cheke Jesús tō e' tsoök ie' tkër. <sup>40</sup> Erë Marta wã kanë tso' tajë iu a kanewë, e' kuëkj ie' de Jesús ska' tã ichéitō ie' a:

—A Skëképa, ye' ël tō ye' méat ekörla u kanëuk, ç'e' kē kī be' tkine? Ichö ie' a tō ye' kímú.

<sup>41</sup> Erë Jesús tō iütë:

—A Marta, a Marta, tajë be' e' tkiüke kanë tso' tajë be' u a e' kī, <sup>42</sup> erë iyi etkë, e' dör ibua'ie, e' shushtë María tō wë. Kē yi tō iyepattsa iulã a.

## 11

*Jesús tó ittókatapa wöbla'wé ttök S'yé ta*  
(Mateo 6.9-15; 7.7-11)

<sup>1</sup> Etókicha ta Jesús tso' ttök S'yé ta. Mik ie' tte one, eta ie' ttókatapa eköl tö ie' a iché:

—A Skéképa, Juan S'wöskuökwaq tö ittókatapa wöblao' ttök S'yé ta. Es ñies sa' wöbla'ú ttök S'yé ta.

<sup>2</sup> Jesús tö ie'pa a iché:

—Mik a' ttöke S'yé ta, eta ichö ie' a i' es:

'A Sa' Yé, as be' dalöio sa' tö i' ulitane tsata. As be' dö sa' blüie da'äie.

<sup>3</sup> Chkë kiane sa' kï senoie, e' mú sa' a ká bit ekkë.

<sup>4</sup> Sa' malepa qos e' nuí olo'yeta' sa' tö ie'pa kï, e' kuëkï sa' nuí olo'yó sa' kï.

Kë sa' marttsa tö i' sulu tö sa' erkiöü.'

<sup>5-6</sup> Ñies ie' tö ie'pa wöbla'wé tté i' wa:

—Sö ichëmi tö a' wële wa yami tso' eköl, ese ska' a' mía nañewe ká shaböts, ta a' tö iché ie' a': 'A yami, író ye' yami datse bánet, e' debitu ye' ska', eré ye' kë wa i' ta' më ie' a. Be' we'ikëyö, pan peitö ña mañat.' <sup>7</sup> Be' yami e' tö a' iütëmi i' es: 'Kë ye' tsiriwar. Ukkö wötënewatke. Ye' ena ye' ala'r, sa' e' téwatke kapökwa. Ye' kë e' köpaka i' muk be' a.' <sup>8</sup> Jesús tö iché ie'pa a' tö u wák e' kë e' köpaka chkë muk a' a, a' dö'r iyami e' è kuëkï. Eré a' tö ikié kröröe, kë wöklör ekkë, e' ta' ie' e' köraká ta i' qos kiane a' kï, e' meraëitö a' a, a' tö ie' a' ikié kröröe e' kuëkï. <sup>9-10</sup> "Wépa tö íyi kié Skéköl a, esepa a' imeraëitö. Wépa tö íyi yulé ie' ska' esepa tö ikuëraë. Wépa tö ie' chaké, esepa kierawaitö weshkë. E' kuëkï i' kiane a' kï e' kiö ie' a, eta ie' tö a' a' imeraë; e' yulö ie' ska', eta a' tö ikuëraë; ie' chakö, eta ie' tö a' kierawa weshkë.

<sup>11</sup> "Kë alá yé wéne tö tkabë mepa ilá a nima kiéitö e' skéie. <sup>12</sup> Ñies kë a' wéne tö bachë' mepa ilá a dakro sia' kiéitö e' skéie. <sup>13</sup> A' dö'r pë' suluë eré e' tö íyi buaë meke a' alá a. ¡E' yita buaë S'yé tso' ká ja! a e' tö Wiköl Bats'e'r meraë yi tö ie' a' ikié ese al!"

*Judiowak tö Jesús kkaté*  
(Mateo 12.22-30; Marcos 3.20-27)

<sup>14</sup> Etókicha ta Jesús tso' aknama trë'ukshkar wëm eköl a. Aknama tö wëm e' ttö wöblëo'wa. Mik aknama mía, eta wëm ttékane buaë. Wépa qos tö isué, e'pa tkirulune iweblök. <sup>15</sup> Eré ie'pa welepa tö iché: "Beelzebú dö'r bë, e' diché wa ie' tö ie'pa trë'wëkeyal."

<sup>16</sup> Ie'pa welepa ská éna Jesús tsaiak, e' kuëkï ie'pa tö ikié ie' a' tö i' kë or yi a ese úitö iwá kkachöie tö mokï ie' patkë'bitü Skéköl tö. <sup>17</sup> Eré i' bikiëitseke ie'pa tö, e' suéwá ie' tö, e' kuëkï ie' tö ie'pa a iché:

"S'serke ká etkë kï, e' ñi blabatsélor ta iñippöke iwakpa è ñita, kë wöklör, e' ta' ie'pa

wákpa è ñi eukewa kë diché ta'ia. Ñies ñi yamipa è e' kéka ñüppök ñita, kë wöklör, e' ta' ie'pa sulunewa mía siarë. <sup>18</sup> Es ñies Satanás mú tö aknamapa trë'wéyal, e' ta' ie' tso' ñüppök iwakpa è ta. ¿Wes i' blüie ie' tso' e' sërmiia? A' ichëke tö aknamapa trë'wéyal ye' tö Beelzebú diché wa, e' kuëkï e' ché ye' tö. <sup>19</sup> Ye' tö itrë'úpaya! Beelzebú diché wa, e' ma' zyí diché wa a' klépa tö itrë'wéyalmi? Ie'pa kë a' itrënukyal Beelzebú diché wa. E' kuëkï ¿wes a' tö ye' kkatëmi tö ye' tö itrë'wëkeyal Beelzebú diché wa? A' wakpa klépa tö iwá kkacheraë tö a' tté kë dö'r mokï. <sup>20</sup> Aknamapa trë'wéyalö Skéköl diché wa, e' ta' e' wá kiane yënoie tö i' blüie Skéköl tso', e' kéwö dewatke a' a.

<sup>21</sup> "Mik wëm diché tajé tö iu kkö'neke buaë tabë wa, i' wa, eta ie' íyi qos tso' blëule buaë. <sup>22</sup> Eré mik wëm ská datse diché ta' tajé shüte ie' tsata, ñüppök ie' ta, eta e' e' aléka ikï ta íyi mik ierblöke e' tsatkoie ena i' ská qos tso' ie' wa, e' yéts'a sëraa iyökï, ta' ikakmëmiitö iyamipa a.\*

<sup>23</sup> "Yi kë dö'r ye' sini', ese dö'r ye' bolök. Yi kë tö ye' kímë obeja kkö'nuk buaë, ese tö obeja po'wëkëmi.

*Aknama dene wëm a*

(Mateo 12.43-45)

<sup>24</sup> "Mik wimblu sulusi trë'neshkar yile a, eta imía ká sir poë wé kë yi ku' ese ska'. Ie' tso' ká yulök senoie, eré kë ie' wá ikune. E' kuëkï ie' i' bikiëitse: 'Ye' miãne wé ye' trë'neshkar ee' senuk.' <sup>25</sup> Mik ie' demine wëm e' a, eta ie' tö isué tö wëm dö'r wes u shüiriule buaë maneneë es. <sup>26</sup> Eta' ie' mía iyamipa kï yulök döka kul suluë shüte ie' tsata ta' ie'pa qos de senuk wëm e' a. Wëm e' miãne suluë shüte kënë tsata."

*Ayëcha buaë e' dö'r yi*

<sup>27</sup> Jesús tso' ttök, eta alaköl eköl dur ee, e' tö iché aneule:

—¡Alaköl tö be' tsö', be' tala', ayëcha buaë e'!

<sup>28</sup> Eré ie' iüté:

—¡Ayëcha buaë shüte, wépa tö Skéköl tté ttsé ta' idalöiekerakitö esepa!

*Wépa dö'r pë' suluë esepa kë tö Jesús tté klö'weta'*

(Mateo 12.38-42; Marcos 8.12)

<sup>29</sup> Ie'pa kï ñi dapa'wé Jesús pamik, eta ie' tö iché ie'pa a: "A' dö'r pë' suluë. A' tö ye' a' ikieke tö i' kë or yi a ese uyö iwá kkachöie tö mokï Skéköl tö ye' patkë'bitü. Eré ye' tö ilé wëraë etókicha éme iwá kkachöie, e' dö'r wes Jonás ta' ibak es. <sup>30</sup> ¡I' bak Jonás ta' e' tö iwá kkayé! Nínive wakpa a' tö Skéköl tö ie' patkë'bitü ie'pa pattök. Es ñies, ye' dö'r S'ditsö Alá, e' tö iwá kkacheraë a' a' tö mokï

\* **11:22** Tté i' wa kiane chë tö Jesús e' aléka Satanás kï, e' kuëkï ie' tö aknamapa trë'wëkeyal.

Skëköl tō ye' patkë'bitū. <sup>31</sup> Aishkuō tã mik a' wöchakirketke a' nuñ kī, etã alaköl datse kã bánet diwō tskirke e' o'mik' bak ikã blúie, e' e' kōrakã Skëköl wörkj a' kkatök tō a' dör pë' suluë. Kã iãiaë ie' dë'bitū datse kamië shutë se' blú bak kië Salomón wã iyi jcher tajë, e' ttō kjttsök. Erë j'ñe tã ye' dur a' shuã, e' dör Salomón tsata, erë a' kē tō ye' ttō iütë. E' kuekj alaköl e' tō a' kkateraë. <sup>32</sup> Mik Jonás tō Nínive wakpa paut, e' tō ie'pa er mane'ottsã Skëköl a, erë j'ñe tã ye' dur jerō, e' dör Jonás tsata, erë a' kē er mane'ù Skëköl a. E' kuekj aishkuō tã mik a' wöchakirketke a' nuñ kī, etã Nínive wakpa e' kōrakã Skëköl wörkj a' kkatök.

*Se' wöbla buaë ena se' wöbla suluë*

*(Mateo 5.15; 6.22-23)*

<sup>33</sup> "Kë yi tō bö'wō tskepakã tã ibléwaitō ö ipatkéwaitō kalkuō dikjã. E' skéie se' tō itkekeka kãkke se' yamipa datse e'pa wō a' kã ñi'wōie. <sup>34</sup> Se' wöbla dör wes bö'wō es se' chká kōs a. E' kuekj se' wöbla dör buaë, e' tã se' chká kōs e' a' kã olo tã buaë. E' dör wes se' er dör buaë es, i' kōs yësyëse buaë, ese kī se' er me'rie. Erë se' wöbla dör suluë, e' tã se' chká kōs e' tso' stui a. E' dör wes se' er suluë es, i' kōs suluë, ese kī se' er me'rie. <sup>35</sup> A' e' kkō'nú buaë as a' kē e' kjtō'ù tō a' wöbla wawër buaë, erë kē iwawër buaë. <sup>36</sup> A' wöbla dör buaë, e' tã i' kōs buaë, ese wër buaë a' wa. E' dör wes a' serke wë bö'wō ñarke kēkraë eë es, kē ku' stui a."

*Wëstela ina fariseowakpa ena s'wöbla'uk ttë dalöiëno wa wakpa ta*

*(Mateo 23.1-36; Marcos 12.38-40; Lucas 20.45-47)*

<sup>37</sup> Mik Jesús ttë one, etã fariseowak eköl tō ie' kiëmi chkök iu a. Etã ie' mia' demi eë e' tkëser mesa kulë kī. <sup>38</sup> Erë fariseowak e' tō isuë tō kē ie' wã iulã pakōne wes ie'pa wöblar es, e' tō ie' tsiriwëkã. <sup>39</sup> E' kuekj Jesús tō iché ie' a:

—A fariseowakpa, A' dör wes a' tkã' kōs pa skueke a' tō ikikë ë es. A' wër buaë, erë a' er suluë. A' dör akblökwakpa. A' kī s'yamipa iyi kōs e' kianettsã a' ë a. <sup>40</sup> jA' kē éna i' ane yës! jA' kē wã ijcher tō Skëköl tō se' chká yō, e' ë tō se' er yō? <sup>41</sup> S'siãrëpa kímú a' iyi wa, etã i' kōs atdaë maneneë a' a.

<sup>42</sup> jA' fariseowakpa, wëstela ina a' tã! Kãkõla tso' iëno chkë a' kië menta ena ruda ena iskã tso', ese kōs tsã meke a' tō Skëköl a. Erë a' kē serku' yësyëse s'malepa ta. A' kē tō Skëköl dalëritsetã, e' uk a' kawõtã ñies.

<sup>43</sup> jA' fariseowakpa, wëstela ina a' tã! Kula' tso' a' ñi dapa'wō wë a' kékëpa dalöiërtã esepa a, ese kī a' wöbatsö e' tkökser. A' kī ikiar tō a' shkë'wë wes kékëpa tajë shkë'wë es, wë pë' tso' tajë, e'pa wöwa.

<sup>44</sup> jWëstela ina a' tã! A' dör wes pō tso' kē jcher yi wã e' bata kī s'shkōrami es. Ishu' dör ñã tajë alar suluë, e' kē alar ttsëne s'wa.

<sup>45</sup> S'wöbla'ukwak ttë dalöiëno wa, ese tso' eköl eë, e' tō iché Jesús a:

—A s'wöbla'ukwak, mik be' tō e' ché fariseowakpa a, etã ñies be' tso' sa' chök suluë.

<sup>46</sup> Jesús tō iütë:

—jA' s'wöbla'uk ttë dalöiëno wa wakpa, wëstela ina a' tã ñies! A' ttë dalöiëno tajë darërëë, ese meke a' tō s'malepa a' wã dalöië wes dali ekëë ië s'kī es, erë a' ulatska ë kē tietã'wã a' tō ie'pa kimoie.

<sup>47</sup> "jWëstela ina a' tã! A' tō Skëköl ttekolpa bak kã iãiaë e'pa pō yuekene pa'alj, erë a' yëpa tō ie'pa kótulur. <sup>48</sup> Es a' tso' iwã kkachök tō i' wamblé' a' yëpa tō, e' dör buaë a' a. A' yëpa tō ie'pa kótulur, tã j'ñe tã a' tō ie'pa pō yuekene buaë.

<sup>49</sup> "E' kuekj Skëköl wã iyi jcher tajë, e' tō iyë'atbak: 'Ye' tō ye' ttekolpa ena ye' ttë pakökwakpa patkeraë Israel aleripa a, etã e'pa welepa tterawã ie'pa tō, ñies welepa skã we'ikeraë ie'pa tō.' <sup>50</sup> Skëköl ttekolpa tajë kótulur a' yëpa tō. Mik kã i' yöne kuaë. <sup>51</sup> etã Abel kōtwã Caín tō. E' itökj a' yëpa bak tō Skëköl ttekolpa tajë kótmí. I'batã kōtwãrakitō e' dör Zacariás. E' kōtwã ie'pa tō kã' tso' iyi mokã Skëköl a' e' ena iwë e' shushã. Skëköl ttekolpa kōs kótulurbak a' yëpa tō, e' nuñ kierane ie' tō a' ena wëpa dör a' es, e'pa a. Mokj ye' tō a' a' ichë tō Skëköl ttekolpa kōs kótulur a' yëpa bak e'pa tō, e' nuñ kuekj a' ena wëpa dör wes a' es, esepa weirdã siarë.

<sup>52</sup> "jA' s'wöbla'uk ttë dalöiëno wa wakpa, wëstela ina a' tã! A' wã Skëköl yëkuō tso', e' dör wes ukkō yottsã tso' es as se' wã ijcher tō wes Skëköl dör. Erë e' kékë a' tso' a' malepa yökj. A' kē wã ijcher mokj tō wes Skëköl dör, ñies wëpa kī e' kiane jchënoie, esepa wöklö'weke a' tō as ie'pa kē wã ijcher."

<sup>53</sup> Etã Jesús e' yëttsã u' a. S'wöbla'uk ttë dalöiëno wa wakpa ena fariseowakpa ulunekã tajë ie' kī. Ie'pa tō ie' chakëmi tajë ttë darërëë wa. <sup>54</sup> Ie'pa éna ie' klö'wakwã ittë kī ikkatoie.

## 12

*A' e' kkō'nú fariseowakpa yökj*

*(Mateo 10.26-27)*

<sup>1-3</sup> Etã pë' dapanë tajë Jesús ska' dökã miles, e'pa tërke ñi mik tajë. Jesús tō ichëmi ittökatapa a' kewe: "A' e' kkō'nú fariseowakpa pan wölöwoka yökj. E' wã kiane chë tō a' e' kkō'nú wes ie'pa ser e' yökj. Ie'pa e' wambllö suluë, erë ie' örak tō ie'pa dör buaë s'malepa tsatã. Kë i' ku' blëulewã ese kē kkayërpawã aishkuō tã. Ese kōs jcherdane. I' cheke a' tō bikeitsë a' tō tō kē ittëne, ese

† 11:31 diwō tskirke e' o'mik: Si'kuaie ttë e' dör sur. Kë se' wã ijcher tō ima e' chëmisö bua'ie se' ttë wa.

ttserane sulitane tō. Ì kōs cheke a tō asaw ukkō wōtēulewā shūā, ese yērdane āneule sulitane kukua. E' kuēkī a e' kkō'nū ās a' kē ē' ō wēs ie'pa es.

*Yi yōkī s'kawōtā suanuk*

*(Mateo 10.28-31)*

<sup>4</sup> “A ye' yamipa, kē a' suanuk yi tō s'tteta'wā esepa yōkī. Ie'pa tō s'ttēwā, erē e' ukuōkī tā kē wēs ie'pa ā se' onukīā. <sup>5</sup> Erē s'tyō a' a' ichē tō yi yōkī a' kē suanuk. A' suanū Skēkōl yōkī. Ie' tō a' ttēwāmi, e' ukuōkī tā ie' wā dichē tā' a' uyowā bō' kē a. Ye' tō iskā chēne a' ā, a' suanū ie' yōkī.

<sup>6</sup> “Dūla skēl tuē tottola, inukōl bōt wōshkila ē, erē ie'pa kē ska' Skēkōl er chōtā'wā. <sup>7</sup> Nies a' kē ska' ie' er chōpawa. Dō a' tsākō bitō tso' shtaoule ie' wā. Ie' a' tā a' tuē tajē tkōkā dūla tso' tajē ese tsāta, e' kuēkī kē a' suanuk.

*Wēpa kē jaēne Jesús kī*

*(Mateo 10.32-33; 10.19-20)*

<sup>8</sup> “Yi e' chō sulitane wōrkī tō ie' dōr ye' dōr S'ditsō Alā, e' ttōkata, e' tā ese cheraēyō Skēkōl biyōchōkwakpa wōrkī tō ie' dōr ye' ttōkata. <sup>9</sup> Erē yi tō iblē sulitane wōrkī tō ie' kē dōr ye' ttōkata, e' tā nies ibleraēyō Skēkōl biyōchōkwakpa wōrkī tō ie' kē dōr ye' ttōkata.

<sup>10</sup> “Yi tō, ye' dōr S'ditsō Alā, e' chē suluē, e' nuī olo'yēmi Skēkōl tō ikī. Erē yi tō Wikōl Bats'e' chē suluē, e' kē kī inuī olorpa.

<sup>11</sup> “Mik pē' tō a' klō'wēwā tsēmi kkatē ye' tē kuēkī judiowak nī dapa'wō wē a' ō s'shulōkwakpa wōrkī ō s'wōkirpa wōrkī, etā kē a' tkinuk tō ì chēmi a' dōr e' tsātkoie. <sup>12</sup> E' wōshā tā Wikōl Bats'e' tō ttē eraē a' a' chē ie'pa ā.”

*Inukōl blū ekōl e' er me'rie inukōl ē kī*

<sup>13</sup> Pē' dapanē tajē e' ekōl tō Jesús a' ichē:

—A s'wōbla'ukwak, ichō ye' ēl ā tō sa' yē ìyi ukuōl atē kōs e' blatōō, ye' icha mū ye' ā.

<sup>14</sup> Jesús tō iūtē:

—A wēm, ye' kē dōr a' ìyi shulōkwak, nies ye' kē dōr a' ìyi blatōkwak.

<sup>15</sup> Nies Jesús tō ichē:

—Sēne chōk e' kē dōkū' s'ulā ā ìyi tso' s'wā tajē ese wā. E' kuēkī a' e' kkō'nū ìyi kkechē tajē ese kōs yōkī.

<sup>16</sup> Etā Jesús tō ttē kleē ie'pa i' es: “Wēm ekōl dōr inukōl blū tajē, e' tō ìyi wōwē tajē shūtē ikā kī. <sup>17</sup> Ie' tō ìbikēitsē: ‘Ye' ìyi wōne tajē ¿wēs e' wēmi ye' tō? Kē ichē'kaia iwē a.' <sup>18</sup> Etā ie' tō ichē: ‘Ye' ēna iāne tō wēs ye' tō iwēmi. S'tyō iwē tkēttsā skē yuēkane pa'ali, bērie shūtē, e' a' ye' iyyiwō kōs ena ì kōs tso' ye' wā e' blekeyō. <sup>19</sup> E' ukuōkī tā ie' tō ìbikēitsē: ìyi tso' tajē ye' wā blēule, e' mik ye' sermi dō duas tajē. E' kuēkī sū ye' enū, chkö, di'yō, ttsē'r buaē.’ <sup>20</sup> Erē Skēkōl tō ichē ie' ā: ‘Be' kukuō darērēē, bērē nañewe be' duōwaraē, etā ì kōs tso' be' wā blēule, e' atē pē' kuā'kī ulā ā.’” <sup>21</sup> Etā Jesús tō ichē: “Es itkōraē wē

tō ìyi blē tajē iwāk ā kā i' ā, erē kē serku' wēs Skēkōl kī ikiane es, ese wāk dōr siārē Skēkōl ā.”

*Kē a' tkinuk ì kī*

*(Mateo 6.25-34)*

<sup>22</sup> E' ukuōkī tā Jesús tō ichē ittōkatapa a: “Ye' tō a' a' ichē: Kē a' tkinuk ì kiane a' kī senioie, chkeie, datsi'ie, ìie, ese kōs kī. <sup>23</sup> S'tso' ttsē'ka e' kē dōr chkök ēme, nies s'chkä kē dōr datsi' ē ioie. <sup>24</sup> Dū saū a' tō. Ie'pa kē tō ì kuatketā' ì wōstetā' kē tō chkö bletā', erē Skēkōl tō ie'pa tieke. E' yita ie' a' tā a' tuē tajē dū kōs tsāta. <sup>25</sup> A' tkirke tajē e' kī, e' kē tō a' a' kawō kī mēpa senioie ekuōlō ē. <sup>26</sup> E' dōr tottola erē kē a' ā iqr. ¿Wēs a' tkirke ìyi malē kī?

<sup>27</sup> “A' tō ma'ma wōrkua bua'buāala ese saū wēs italar, kē kanēblōtā', kē datsi' yueta'. Erē blu' bak kiē Salomōn, e' wā ìyi ulitane bua'buāē bak tajē, erē ye' tō a' a' ichē tō ie' datsi' bua'buā, e' kē wēr buaē wēs ma'ma wēr es. <sup>28</sup> Kākō suēsō j'ñe, bule tā ìñanewa, erē Skēkōl tō ikītkeke buāala iwōrkua wa. Ie' tō kākō kītkeke es, jē' yita ie' tō a' kianeia erblō buaē ie' mik, e' paieraē! <sup>29</sup> E' kuēkī kē a' er mukwā chkö kī, di'yē kī, ese kōs kē kī a' tkinuk. <sup>30</sup> Pē' kē tō Skēkōl dalōiē esepa tkirke tajē ìyi kōs ekkē kī. Erē ì kōs kiane a' kī e' jchertke a' Yē wā. <sup>31</sup> E' skēie ì kōs blūie Skēkōl tso' e' kī a' er mū keweie. A' tō iwē es, e' tā nies ìyi ñekkē dōraē a' ulā ā.”

*Ìyi buaē bleke kā jai ā*

*(Mateo 6.19-21)*

<sup>32</sup> “A ye' obejapala, kē a' suanuk ì yōkī. A' kē dōr tajē, erē S'yē er buaē chōke a' ā. Ie' tō a' shushtē ās ì blūie ie' tso' e' dō a' ulā ā ie' tā ñita. <sup>33</sup> Ì tso' a' wā, e' wataūttsā tā iskē mū s'siarēpa ā. Ì dōr buaē Skēkōl ā, e' ū, etā es a' ā ìyi bua'buā blērdaē kā jai ā wēs inukōl blēsō, ì kē nurta'wā, ese ā es. Eē akblōkwakpa kē ā iekiblēnuk, nies powak kē ā ikatanukwā. <sup>34</sup> Wē a' ìyi bua'buā tso' eē a' er me'rie nies, e' kuēkī a' ìyi blō kā jai ā.”

*A' tso' erki Jesús datsene e' panuk*

<sup>35-36</sup> “A' tso' erki wēs kanē mēsopa tō iwōkir tso' ulabatsē kēwō tkō'uk datsene, ese panē es. Ie'pa tso'tke ie' panuk datsi' ìenēte ikanewoie, ìbō'wō tskēkatke buaē. Mik iwōkir de tā ichakē ukkō ā, etā bet tā ie'pa ukkō ppēe i' ā. <sup>37</sup> Wēpa kuē iwōkir tō ttsē'ka ie' panuk mik ide etā, ayēcha bua esepa. Mokī ye' tō a' a' ichē tō ie' e' paiōraē wēs chkö watiōkwak es tā ikanē mēsopa keraēitō e' tkōks'er kula' kī tā ie'pa tierāitō chkö buaē wā. <sup>38</sup> Kanē mēsopa kuē iwōkir tō ttsē'ka ie' panuk kā shabōts alē ō kā ñirketke alē etā, ayēcha buaē esepa. <sup>39</sup> Erē a' ēna iānū tō u wāk mū wā ijcher tō wēkkē akblōkwak datse, e'ma ie' kē tō kawō mēpa yi ā dōkwā ìyi ekiblōk. <sup>40</sup> Es nies ye' dōr S'ditsō Alā,



e' datsene mik a' kē ku' ye' panuk eta, wes akblōkwak es. E' kueki a' tso' erkī.”

*Kanè mēsoa bōl ekōl dōr buaē, ekōl dōr suluē*

(Mateo 24.45-51)

<sup>41</sup> Pedro tō Jesús a' ichakē:

—A Skēkēpa, ttē waklēébō ζe' dōr sa' ē a' ō sulitane a'?

<sup>42</sup> Ie' iūtē: “Kanè mēso yēsēsē kabikeitsō buaē, ese mekeka iwōkir tō imalepa kuebluie ie'pa tiōk kekraē mik kē iku' e' dalewa. <sup>43</sup> Iwōkir dene tā ikuētō iuk wes iyēneia es, e' tā ayēcha e' dōr buaē ie' a. <sup>44</sup> Mokī ye' tō a' a' ichē tō kanè mēso e' merakaitō, ie' wā iyi tso' kos, e' kuebluie. <sup>45</sup> Erē kanè mēso ñe' erbikō tō 'ye' wōkir kē dōpane bet.' E' kueki ie' tō imalepa wēpa ena alakōlpa ppēmi darērēē. Ñies ie' chkēmi, di'yēmi tajē ena ie' tēmi blo' wa. <sup>46</sup> Erē idiwō ena ikēwō kē wa ie' ku' ipanuk, eta iwōkir dōrane tā iwe'ikeraitō siarē wōmerattsa weinuk wes pē' kē erblōtā Skēkōl mik esepa es.

<sup>47</sup> “Kanè mēso wē wā i kiane iwōkir kī, ese jcher buaē, erē ie' kē wā i one yēs, kē tō ittō dalōiē, ese we'ikeraē iwōkir tō siarē. <sup>48</sup> Erē kanè mēso wē kē wā ijcher tā e' tō i suluē wamblē, e' tā ese we'ikeraē iwōkir tō erē kē tajē. Wēpa a' imēne tajē kanebloie Skēkōl a, esepa a' ikieraēitō tajē. E' sū wēpa a' imēne tajē shūtē, esepa a' ikieraēitō tajē shūtē. Kos se' a' imēne e' mik se' a' ichakirdaē.

*Jesús ttē kueki se' ñi blabatsōraē*

(Mateo 10.34-36)

<sup>49</sup> “Ye' dē'bitū kā i' a' s'alāuk wes bō' tajē wōbatska ese tō s'alāwē es, e' mú wōbatskatke. <sup>50</sup> Erē kewe tā ye' weirdaē siarē, e' kawōtā dalē'ttsēyō, e' tō ye' eriawēke tajē dō mik itka eta. <sup>51</sup> ζA' ibikeitsē tō ye' dē'bitū kā i' a' as a' ser bēre ñita? Ye' ichē, au. E' skēie ye' dē'bitū a' blabatsōk. <sup>52</sup> I' tā iñak tkēnewamitke, se' serke skēl ñita, e' ñi blabatsōraē ye' ttē kueki, bōl ñippōraē mañal tā, mañal ñippōraē bōl tā. <sup>53</sup> Iyē ñippōraē ilā wēbie tā ena ilā ñippōraē iyē tā; imi ñippōraē ilā busi tā ena ilā ñippōraē imi tā; yāk ñippōraē iyāk tā.”

*I' wēke Jesús tō e' wā kē ane ie'pa éna*

(Mateo 16.1-4; Marcos 8.11-13)

<sup>54</sup> Ñies Jesús tō ie'pa a' ichē: “Mik a' isuē tō kalī moneka diwō mi'ke e' ēka, eta a' tō icheke 'kalī yērdāē', eta mokī iwā yērdāē. <sup>55</sup> Mik a' ittē tō siwa' datse kā sir poē e' ēka, eta a' tō icheke 'diba ardaē', eta mokī iwā ane. <sup>56</sup> ζA' e' ō suluē! A' éna iane mik kalī yērmī, mik diba armi, erē i' uk ye' tso' iwā kkachōie tō yi dōr ye', ζwes kē e' wā ane a' éna? ζA' kē wā i' jcher tajē wes a' ibikeitseke es!”

*A' ñi shulō*

(Mateo 5.25-26)

<sup>57</sup> “ζI' kueki a' kē a' ibikeitsē tō i' dōr buaē, i' dōr suluē Skēkōl a? <sup>58</sup> Yile tō a' kkatē nūi kueki e' wā a' mí s'shulōk wē a, e' tā ima'ū shulē ie' tā ñalā kī as ie' kē tō a' wōmūttsa s'shulōkwak ulā a' we'ikē. A' kē tō iwē es, e' tā s'shulōkwak tō a' wōmerattsa s'shkēkīpa ulā a' tā e'pa tō a' wōterawā s'wōto wē a. <sup>59</sup> Ye' tō a' a' ichē tō kē a' dōpattsa dō mik a' tō nūi e' patuēttsa seraa eta. E' kueki a' er mane'ū Skēkōl a' kam iwā dō a' kī e' yōkī.”

## 13

*S'kawōtā er mane'uk Skēkōl a*

<sup>1</sup> E' ē kēwō tā pē' welepa tso' ee, e'pa tō ichē Jesús a' tō Galilea wakpa wēpa welepa tso' iyiwak jchōk mē Skēkōl a' iwē a. E' dalewa Pilato tō ie'pa ttōkular patkē tā ipē shutuēka iyiwak jchēne e' pē tā.

<sup>2</sup> Jesús tō ichē ie'pa a: “ζIma a' erbikō? ζGalilea wakpa kōtular ñe'pa dōr pē' sulusīpa tkōkā imalepa tsatā, e' kueki ie'pa weine es? <sup>3</sup> Ye' tō ichē au, kē idōr es. Erē a' kē er mane'ū, e' tā ñies a' wāka kos duōlurdaē. <sup>4</sup> Ñies u' tso' Jerusalén kiē Siloé, e' yöule kākkeē ak wa, mik e' anebitū anekā ie'pa kī, eta ie'pa duo dōka dabom eyōk kī pākōl (18). ζIma a' erbikō? ζIe'pa duolur ñe'pa kī inūi tso' tkōkā Jerusalén wakpa malepa tsatā? <sup>5</sup> Ye' tō a' a' ichē au, kē idōr es. Erē a' kē er mane'ū Skēkōl a, e' tā ñies a' duōlurdaē.”

*Higuera klō ttē wa pakē Jesús tō*

<sup>6</sup> Jesús tō ttē kleē ie'pa a' i' es: “Wēm ekōl wā kal kiē higuera tso' tkēule elka idali shūa. Ie' mia iwō yulōk, erē kē iwō tā yēs. <sup>7</sup> E' kueki ichēitō idali kkō'nukwak a: 'T' tā duas mañal, ye' de kekraē higuera wō yulōk, erē kē iwō tā'. E' kueki itōōbō as kē iku' àr éanas.' <sup>8</sup> Erē idali kkō'nukwak tō ichē: 'A' kēkēpa, as iaria duas ek. Sūyō iwi paiklē kapōli tkēka iki. <sup>9</sup> E' wa sō isuē tō duas étō tā iwōrmī e' ma buaē idir. Erē kē iwōne, e' tā iteerasō.' ”

*Alakōl ekōl wōkōulewā e' bua'wēne Jesús tō*

<sup>10</sup> Eno diwō eta Jesús tso' s'wōbla'uk Skēkōl ttē wa ñi dapa'wō wē etuke a. <sup>11</sup> Eta eē alakōl tso' ekōl tteke wimblu sulusi tō wōkōulewā. Ie' kirirke es, e' kī duas de dabom eyōk kī pākōl (18). Kē ie' a' e' wōdurka yēsēsē. <sup>12</sup> Mik Jesús tō isuē, eta ikiēitō e' ska' tā ichēitō iā:

—A tayē, be' buanene. Duē tō be' kiri'wēke, e' ulā a' be' tkashkar.

<sup>13</sup> Eta ie' ulā mēka iki tā iwōdunekane yēsēsē tā Skēkōl kīkēkamiitō tajē. <sup>14</sup> Erē Jesús tō alakōl bua'wēne eno diwō a, e' kueki judiowak ñi dapa'wō wē e' wōkir ulunekā i' tajē. E' kueki ie' tō ichē pē' dapane eē e'pa a:

—Domingo eto shuḡa ká tso' kul. Ká teröl dör se' a kanebloie. Ká teröl shuḡa a' shkō íe bua'wène. Kē a' kine eno diwō a' bua'wène.

<sup>15</sup> Jesús tō iché ie' a':

—ja' e' ò sulué! Eno diwō a' a' ulitane tō a' iyiwak wöttseeke tã itsekemi di' yök. <sup>16</sup> Tayē i' dör Abraham aleri, e' tso' klöulewã Satanás ulã a' dōka duas dabom eyök kã pãköl (18) wēs iyiwak moulewã es. Erē i'ñe dör eno diwō, erē çwes a' kē kã ikiane tō iwöttseeeyō aknama yökã?

<sup>17</sup> Mik Jesús tō e' ché, etã ibolökpa jaënekã tajë. Erē pë' malepa tts'e'nerak buaë, i buaë kōs wé Jesús tō e' kuëkã.

*Mostaza wō tté*

(Mateo 13.31; Marcos 4.30-32)

<sup>18</sup> Ñies Jesús tō iché: “Í blúie Skëköl tso' çwes e' dör? Çtté wé wa yō ikleëmi? <sup>19</sup> E' dör wēs mostaza wō tkéwã wëm eköl tō iyök a es. Mostaza wō dör tsirlala, erē itskine talane bérie kalie, ese ulã tsakã dù u yuöke.”

*Pan wölöwoka tté*

(Mateo 13.33)

<sup>20</sup> Ñies Jesús tō iché: “Í blúie Skëköl tso' çtté wé wa yō ikleëmi? <sup>21</sup> E' dör wēs pan wölöwoka wötué tayē tō harinachka mañayök a es. E' tō harinachka, e' kōs wölöwëkã tajë.”

*Ukkö tsitsir*

(Mateo 7.13-14,21-23)

<sup>22</sup> Jesús dami Jerusalén ñalé wa, etã eë kã tso' tseé, kã blublu ena kã tsitsir, e' wakpa wöbla'weke Jesús tō. <sup>23</sup> Etã yile tō ie' a' ichaké: —A kékëpa çyëne tō kē yi tsatkërpa tajë?

Ie' iüté:

<sup>24</sup> —Tsatkë wëkkö dör tsir. Tajë pë' tō ima'weraé shkökwaia, erē kē ie'pa döpawa. E' kuëkã a' e' diché iö shkökwaia. <sup>25</sup> Mik u wák e' kékã tō ukkō wótéwã, etã a' tso' u'rkã, e'pa tō ie' kieke ukkō a. A' tō ichakeke: ‘A kékëpa, be' ukkō kköppöo sa' a.’ Erē ie' tō a' iüteraé: ‘Kē ye' wã a' suule.’ <sup>26</sup> Etã a' tō icheraé ie' a': ‘Sa' chka' be' tã. Sa' di'ya' be' tã. Be' tō sa' wöbla' wã kã a.’ <sup>27</sup> Erē ie' tō a' iüteraé: ‘Kē ye' wã a' suule. A' dör i' sulu wamblökwakpa, a' yúshka bánet ye' yökã.’ <sup>28</sup> Mik a' tō Abraham, Isaac, Jacob ena Skëköl ttekölpa kōs e'pa sué i' blúie Skëköl tso' e' a, erē a' uyanettsã bánet, etã a' juraé siarë i' kã yilitdawã weine kuëkã. <sup>29</sup> S' ditsö datse kã wa'ñe, esepa döraé chkök buaë i' blúie Skëköl tso' e' a. <sup>30</sup> Es se' wëlepa kē dalöiërta' kã i' a, esepa dalöiërdaé tajë aishkuö tã. E' s'ü se' wëlepa dalöiërta' tajë kã i' a, esepa atdaé ibataie aishkuö tã.

*Jesús eriane Jerusalén wakpa dalërmik*

(Mateo 23.37-39)

<sup>31</sup> E' wöshã tã fariseowakpa wëlepa de Jesús ska' tã ichéitörak ia:

—Herodes éna be' ttakwã, e' kuëkã be' yúshka kã bánet.

<sup>32</sup> Jesús tō ie'pa iüté:

—A' yú tã ichö s'kitö'ukwak ñe' a': ‘Íñe ena bule ye' tso' aknamapa trë'ukyal, ñies s'buau'kne, böiki tã ye' kanë ene.’ <sup>33</sup> Ye' mitke i'ñe, e' shkömi bule böiki tkörö Jerusalén wé ie'pa wöblane Skëköl ttekölpa bak e'pa ttökulur eë, e' kuëkã ye' kē ttepa'wã íe.

<sup>34</sup> ja' Jerusalén wakpa, Skëköl ttekölpa kōs ttekewã a' tō kekrae! i'Ñies ittë pakökwakpa patkeke ie' tō a' a, e'pa ttekewã a' tō ák wa! i'Wëkké ye' erkie tō ye' mú a' dapa'wé e' ska' wēs dakro mitchke tō ila'rla dapa'wé ipik dikã es, erē kē a' kã ikiane yës! <sup>35</sup> Ye' tō ttsö, Skëköl kē tō a' kã kkö'nepaia. Ye' tō a' a' iché tō a' kē tō ye' suepaia dö mik ye' dene etã. E' këwö ska' tã a' tō ye' cheraé: ‘¡Ayëcha buaë yi datse Skëköl ttö wa e'!’

## 14

*Wëm eköl iënekã tajë e' bua'wé Jesús tō*

<sup>1</sup> Etökicha tã eno diwō a' Jesús miã chkök fariseowakpa wökir eköl, e' u a. Etã eë fariseowakpa wëlepa tso' iweblök krerëé ikkatoie ilë kã. <sup>2</sup> Etã wëm eköl kirirke iënekã tajë, e' de dur Jesús wörki. <sup>3</sup> Etã Jesús tō ichaké s'wöbla'uk ttë dalöiëno wa wakpa a' ena fariseowakpa a:

—çKawö ta' se' a' s'buau'kne eno diwō a'?

<sup>4</sup> Erē ie'pa kē wã ie' iütëne yës. Etã Jesús tō wëm e' klö'wé tã ibua'wéitö tã ichéitö ia: ‘Be' yúshka.’ <sup>5</sup> Etã ie' tō iché fariseowakpa a:

—A' alã ö a' baka anemi di' biule uk a' eno diwō a, e' tã bet a' miã iyöktsã.

<sup>6</sup> Ie'pa kē a' ie' iütëne yës.

*Skawötã e' ökwa s'malepa yökã*

<sup>7</sup> Jesús isué tō pë' shkeñaule chkök, e'pa wëlepa tō kula' tso' kékëpa dalöiërta' tajë, esepa a' ese shushtë e' tkoie. E' kuëkã ie' tō ie'pa patté i' es:

<sup>8</sup> —Mik yile tō a' wële shkeñë ulabatsé këwö tkö'uk, etã kē a' e' tköksër kula' tso' kékëpa tajë a' ese kulé kã. Isalema kékëpa dalöiërta' tajë a' tsatã ese de, <sup>9</sup> etã yi tō a' shkeñë, e' tō iché a' a': ‘Be' we'ikëyö, kula' se' mú kékëpa i' a' e' tkoie.’ Etã a' jaërkamã tajë, miraé e' tköksër kula' tso' se' ésepa a' ese kã. <sup>10</sup> E' skéie, mik yi tō a' shkeñë, etã a' e' tköksër kula' tso' se' ésepa a' ese kulé kã. Es mik yi tō a' shkeñë, e' de a' ska', etã ie' tō iché be' a': ‘A yami, be' yú e' tköksër kula' tso' kékëpa a, ese kulé kã.’ Es pë' kōs tso' eë, e'pa tō a' dalöieraé wēs kékëpa tajë es. <sup>11</sup> Yi e' tso'kã tajë, ese ardawa diöshët, erē yi e' wöëwa, ese kïkardakã tajë.

<sup>12</sup> Wëm tō ie' shkeñë chkök, e' a' Jesús tō iché ñies:

—Mik be' tō pë' shkeñëke chkök be' ska' ö di'yök be' ska', etã be' sini'pa ena be' ëlpa

ena be' yamipa malepa ena inuköl blúpa serke tsinet be' pamik, esepa kos kě shkeña. Ie'pa tò be' shkeñemine, etã es be' ulã à iské detke. <sup>13</sup> E' skéie mik be' kawö tkö'uke, etã s'siarëpa ena s'yulëpa ena s'klö bachiulewã ena s'wöbla kě wawër, esepa shkeñú. <sup>14</sup> Ie'pa kě à iské menukne be' a. Erë mik s'ser yësyësë, esepa duowã shkenekã aishkuö ta, etã Skököl tò be' a iské meraë, e' tò be' tstsë'weraë buaë.

*Këwö tajë e' tkö'wë  
(Mateo 22.1-10)*

<sup>15</sup> Wëm eköl tkër chkök mesa kï ie'pa ta, mik e' tò ì ché Jesús tò e' tstsë, etã ie' tò ichë iã:

—Wëpa kawö tkö'weraë buaë aishkuö ta ì blúie Skököl tso' e' a, ayëcha buaë esepa.

<sup>16</sup> Jesús tò ie' a ichë:

—Wëm eköl tò kawö tkö'weke tajë ta ie' tò tajë pë' shkeñë. <sup>17</sup> Mik ikawö tkö'uke e' diwö de, etã ie' tò ichë ikanë méso a: 'Se' kawö tkö'uke, e' tso'tke kaneoule e' kuekï be' yú s'kiule kos e'pa a ichök tò a' shkö kawö tkö'uk.' <sup>18</sup> Erë ie'pa ulitane tò ichë kanë méso a: 'Wëstela be' ta, erë sa' wötkërke tajë, kě sa' dõpa.' Itsã tò ichë ie' a: 'Erpa ye' tò kã tuë e' sauk ye' mi'ke, e' kuekï ye' kě dõpa. Ye' kköchö be' a tò e' olo'yö ye' kï.' <sup>19</sup> Iskã tò ichë: 'Baka wë'ñe tuëyö kanebloie dabop, e' wã ma'uk ye' mi'ke, e' kuekï ye' kě dõpa. Ye' kköchö be' a tò e' olo'yö ye' kï.' <sup>20</sup> Iëköl tò ichë: 'Író ye' ulabatsëwã, e' kuekï kě ye' dõpa.' <sup>21</sup> Ikanë méso biteane iwökir ska' ta ì kos chë ie'pa tò ie' a e' chëne ie' tò. Etã u wák ulunekã tajë ta ichëitö iã: 'Be' yú bet ñalã kibi kï, ñies ñalã malepa kï, ta s'siarëpa ena s'yulëpa ena s'wöbla kě wawër ena s'klö bachiulewã, esepa tsübitü ië kawö tkö'uk ye' ta.' <sup>22</sup> Bërë ta kanë méso dene, e' tò ichë iwökir a: 'A kékëpa, ì uk be' tò ye' patkë, e' wétke ye' tò, erë be' u kam wã iër.' <sup>23</sup> Etã iwökir tò ichë ie' a: 'Be' skã yüne u tso' bánet ese ñalë kos wa, etã pë' kó shkökwa ye' u a as iwã iërka.' <sup>24</sup> Ye' tò ichë tò wëpa shkeña' ye' tò kewe, e'pa kě wëne kawö tkö'upa ye' ta.'

*Jesús ttökataie sene e' dör darërë  
(Mateo 10.37-38)*

<sup>25</sup> Tajë pë' mir Jesús itökï ta ie' e' wötrëe ta ichëitö ie'pa a: <sup>26</sup> "Yi senak ye' ttökataie, erë kě iëna ye' dalër iyë, imi, ilaköl, ila'r, iëlpã, ikutapa tsata, ñies iwák tsata, e' ta ese kě dõpa ye' ttökataie. <sup>27</sup> Yi kě e' chö weinuk dö ittëwã krus mik ta iser wes ye' ttökataie es, ese kě dõpa ye' ttökataie. <sup>28</sup> Ichösö tò a' wële éna u yuak bérie. Kewe ie' e' tkökëser ibikeitsök tò kos u e' tuë isuoie tò inuköl dómikã ö kě idõpakã iyuuoie. <sup>29</sup> Erë ie' kě wã ibikeitsë kewe, e' ta ie' tò ichkï tulëwã ta inuköl kě ta iã iyuuoie. Sulitane tò isuëmi, e'pa tò ie' wayueraë. <sup>30</sup> Ie'pa tò ichëmi: 'Wëm wí u yuëmi, erë kě ie' a iyönea.' <sup>31</sup> Nies kã

blu' wële wã ijcher tò kã kuã'kï blu' datse ñippök ie' ta, e' ta ie' e' tköraser ibikeitsök kewe: 'Ye' wã ñippökwakpa tso' dõkã 10.000. Ye' bolök wã ñippökwakpa tso' dõkã 20.000. ¿Ye' e' alómikã ikï ö kě ye' e' alõpakã ikï?' <sup>32</sup> Ie' isuë tò ie' kě e' alõpakã ibolök kï, e' ta kam ibolök dö tsinet, e' yökï ie' tò ibiyöchökwakpa patkeraë ibolök a ichök tò '¿wes sö ishulëmi as se' ser bërë ñita?' <sup>33</sup> E' kuekï yi senak ye' ttökataie ese tò iwã bikeitsö kewe. Es a' kě e' chö ì kos tso' a' wã e' mukat, e' ta kě a' dõpa ye' ttökataie.

*Dayë kě kke ta'ia*

*(Mateo 5.13; Marcos 9.50)*

<sup>34</sup> "Dayë dör buaë, erë kě ikke ta'ia, e' ta kě ibuarpaiane. <sup>35</sup> Kë ibua'ia iyök kapëyoie. Kë ibua'ia iie. E' dör buaë këumi ë. ¡Yi éna ye' ttö ttsak, e'ma ikukueblö bua'ie!"

## 15

*Obeja kkö'nukwak e' ttë*

*(Mateo 18.10-14)*

<sup>1</sup> Kekraë inuköl shtökwakpa Roma wökirpa a, esepa dõke tajë Jesús ska' ikittsök. Nies pë' malepa cheke fariseowakpa tò e'pa dör pë' sulusipa, esepa dõke tajë Jesús ttõke e' kïttsök. <sup>2</sup> Fariseowakpa ena s'wöbla'uk ttë dalöiëno wa wakpa tò Jesús chëmi suluë ñi a. Ie'pa tò ichë:

—Ie' tò pë' sulusipa suëke buaë, ñies esepa ta ie' chköke.

<sup>3</sup> E' kuekï ttë kleë ie' tò ie'pa a' i' es: <sup>4</sup> "A' isie wã obeja tso' dõkã cien, e' etö chowa, e' ta a' tò imalepa dõkã dabom sulijyök kï sulitu (99), e' meraat ikë a ta a' miraë ichowa e' yulök dö wë a' tò ikuë eë. <sup>5</sup> Mik a' tò ikuë, etã a' tstsë'rdaë buaë ta a' tò ikerakã pperakã kuli' kï. <sup>6</sup> Mik a' dene iu a, etã a' yamipa ena pë' serke a' o'mik, e'pa kiera a' tò a' u a ta a' tò icheraë ie'pa a: 'Ye' obeja chë'wa, e' kuëneyö. A' tstsë'nú buaë ye' ta.' <sup>7</sup> Es ñies ye' tò a' ichë tò mik pë' sulusi eköl, ese er mane'wë Skököl a, etã e' tò Skököl tso' kã jai a, e' tstsë'wë buaë shutë tkökã imalepa dõkã dabom sulijyök kï sulitu (99) e' bikeitsö tò ie'pa dör yësyësë, kě kawõtã er mane'uk, esepa tsatã.

*Inuköl chowa, e' ttë*

<sup>8</sup> "Nies alaköl wã inuköl tso' dõkã dabop, e' chowa etk, e' ta ie' tò bö'w' tskëkã iushklëttsã ta iyulë bua'iewã ta iwã kuëitö. <sup>9</sup> E' ukuökï ta ie' tò iyamipa ena pë' serke iö'mik e'pa kië iu a ta ichëitö ie'pa a: '¡A' tstsë'nú buaë ye' ta! Ye' inuköl chë'wa, e' kuëneyö, e' kuekï e' këwö tkö'üsö ñita.' <sup>10</sup> Es ñies ye' tò a' ichë tò mik pë' sulusi eköl er mane'wë Skököl a, etã e' tò Skököl biyöchökwakpa tstsë'weke buaë shutë."

*Alã e' wamblö suluë e' nuí olo'yé iyë tò ikï, e' ttë*

<sup>11</sup> Nies Jesús tò ikleë ie'pa a ttë i' wa: "Kékëpa eköl alã dör böi wëpa. <sup>12</sup> Ilã tsirla tò

iché iyé a: 'A yéwō, ì mekeat be' tò ye' a mik be' duökewatke eta, e' mútke be' tò ye' a.' Eta iyé iyi qos, e' blabatséitō méitō ila' r' bōl a ekōl ekōl qos ikawōtā imuk ia ekké. <sup>13</sup> Ká kē bak tajé, eta ì qos méitō ilā tsirla a, e' watuēttsā ilā tò, e' ské klō'wéitō tā imiā ká kua'kī. Eē ie' tò ie' inukōl qos we'ikéwa iyi sulu ē kī. <sup>14</sup> Mik ie' inukōl enewa, eta bli ane tajé ká e' kī, e' kuekī ie' ttémitke bli tò. <sup>15</sup> Eē tā ie' miā kané yulók ká e' wakpa ekōl ska'. Eta wēm e' tò ie' a kané mé kōchi tiök. <sup>16</sup> Ie' duéwa bli wa suluē. Kōchi chké kē ñano se' a ese ñakwā ie' éna, eré kē yi tò ie' a imé. <sup>17</sup> Bata ekké tā ie' tò ibikeitsé: 'ǀók ye' e' tōtkēr bli wa iē? Wēkké ye' yé u a kané mésopa tso', e' pa wa chké tso' tajé. <sup>18</sup> Ye' miāne ye' yé ska', tā ye' tò icheraé ie' a: 'A yéwō, ye' tò ì sulu wamblé Skékōl kī, ñies be' kī. <sup>19</sup> Ye' jaéne tajé. Ye' kiök be' alā, e' kē dōr ye' siarla e' a. E' skéie ye' saú wes be' kané mésopa sukebō es.' <sup>20</sup> Eta iē' e' kékā miā iyé ska'.

"Mik idókemitke iyé ska', eta iyé wō de iska' tā idoiā kamié tā ie' wa iwēr siaré. Ie' tūnemi iñaletsuk tā ipaklō'wéwaitō iwōalattséitō. <sup>21</sup> Eta ilā tò iché ie' a: 'A yéwō, ye' tò ì sulu wamblé Skékōl kī ñies be' kī. Ye' jaéne tajé. Ye' kiök be' alā, e' kē dōr ye' siarla e' a.' <sup>22</sup> Eré iyé tò iché ikané mésopa a: 'Datsi' bua'ie yuló iōkā ie' kī bet, tā ula'tsio iōwā tā klōkkuō iōkā ikī. <sup>23</sup> Baka pupula bua'ie yuló tā ittōwā. Ye' alā dene e' kēwō tkō'wēkesō. <sup>24</sup> Ye' alā i' dene, e' dōr wes ie' du'wā e' shkēnekāne es. Ye' alā mineā ye' yōkī kē tté tšēniā ye' wā, e' dene e' kuekī ikéwō tkō'ūsō.' Eta iē' pa tò ikéwō tkō'wēmi tajé.

<sup>25</sup> "E' dalewa ilā kibi tso' kanēblōk kañikā. Mik ie' datse e' de tsinē u a, eta ie' tò ittse tò iyamipa alárkerak tajé blarkerak, klōtōke tajé. <sup>26</sup> Eta iē' tò kané méso kié ekōl tā ichakéitō: 'ǀi kēwō tkō'wēke a' tò ekké?' <sup>27</sup> Eta kané méso tò ie' iuté: 'Be' ēl dene, e' kuekī be' yé tò sa' patké baka pupula bua'ie ttōkwā be' ēl dene buaé, kē wes ie' dē', e' kēwō tkō'woie.' <sup>28</sup> Eré e' tò ilā kibi uluwéka tajé. Ie' kē shkakwā weshké. E' kuekī iyé e' yéttsa u'rki tā iwōpablé tajé tā iché ie' a: 'Be' shkōwā sa' tā, kē be' ulunuk.' <sup>29</sup> Eré iē' tò iyé iuté: 'Ye' kanēblé'mi be' a e' kī duas de tajé. Ye' kē wā be' ttō dalōseoulewā yēs. Eré chibola ē kē meule be' wā ye' a katano ye' sini'pa tā. <sup>30</sup> Eré i'ñe tā be' alā e' dene. Ie' tò be' inukōl we'ikwa alakōlpa sulusipa tā eta be' tò baka bua'ie ttōkwā patké ie' dene e' kēwō tkō'woie.'

<sup>31</sup> "Iyé tò ie' iuté: 'A alala, be' tkériā ye' tā kēkraé. Ì qos tso' ye' wā e' dōr be' icha. <sup>32</sup> Eré be' ēl dene buaé, e' dōr wes ie' du'wā e' shkēnekāne es. Ie' mineā ye' yōkī kē tté tšēniē ye' wā, e' dene, e' kuekī s'kawōtā e' kēwō tkō'uk chké wa, di'yé wa, tšé'ne bua'

wa.' "

## 16

*Inukōl blú iyi kueblu e' erbikō buaé, e' tté*

<sup>1</sup> Ñies Jesús tò tté kleé ittōkatapa a i' es: "Wēm bak ekōl kanēblōke inukōl blú a iyi kuebluie. Etōkicha tā pē' wēlepa tò ie' kkaté iwōkir a tò ie' tso' iwōkir inukōl we'ikōkwa. <sup>2</sup> Iwōkir tò ie' kié tā iché ia: 'Ye' wā ijchenewā tò be' tso' ye' inukōl we'ikōk. Be' kē a kané tā'ia. Ye' be' trē'wēkeshkar. E' yōkī ì kos kanewé be' tò, e' yēkkuō kkachō ye' a.' <sup>3</sup> Ie' ibikeitsé: 'Ye' wōkir tò ye' trē'wēkeshkar, ¿wes ye' e' ūmi? Kē ye' diché tā'ia kané dareré woie ena ye' jaéne inukōl kakkīōk. <sup>4</sup> Ye' éna ianetke tò wes ye' e' ūmi mik ye' trēneshkar eta as yile tò ye' kō'ō'nū.' <sup>5</sup> Eta iē' tò pē' qos ña'weke iwōkir tò e'pa kiéttsa ekōl ekōl. Mik e' tsā de, eta e' a iē' tò ichaké: 'ǀKos be' ñarke ye' wōkir ulā a?' <sup>6</sup> E' tò iuté: 'Ye' ñarke ie' ulā a kiō dōkā galon cien (100) ekké.' Ie' iché ia: 'T be' yēkkuō. Be' e' tkōser bet tā yēkkuō se kī be' ñarke se, e' mane'ūttsa tā ishtōkā se kī be' ñarke galon dōkā dabom skēyōk ē (50).' <sup>7</sup> E' ukuōkī tā ie' tò ichaké iēkōl ñarke a: 'ǀÑe be', qos be' ñarke ye' wōkir ulā a?' E' tò iuté: 'Ye' ñarke trigowō dōkā sacco cien (100) ekké.' Ie' tò iché ia: 'T be' yēkkuō. Se kī be' tò imane'ūttsa tā ishtō ikī sacco dōkā dabom paryōk ē (80).' <sup>8</sup> Mik ì wambléitō, e' jchenewā iwōkir wā tā ibikeitséitō: 'Ye' iyi kueblu kē wā ikané one yēsýēsé, eré ie' kabikeitso buaé e' kimoie. E' ē kuekī ikikekekeqayō.' "

Jesús tò ichéne: "Es ñies yō iché tò wépa kē tò Skékōl dalōie esepa kabikeitso buaé e' kimoie tkōkā wépa dōr ie' olo tā' tajé e' icha esepa tsata. <sup>9</sup> E' kuekī yō iché a' a tò inukōl kē dōr ibu'ie. E' wa s' malepa kimū as ie' pa tò Skékōl dalōiō. A' tò iwé es e' tā aishkuō tā ie' pa tò a' kierawā buaé weshké seno wé yōbié e' a.

<sup>10</sup> "Yi tò kané tsitsir wēke yēsýēsé, ñies ese tò kané tajé wēmi es. Eré yi kē tò kané tsitsir wēkū' yēsýēsé, ñies ese kē tò kané tajé wépa yēsýēsé. <sup>11</sup> E' kuekī inukōl kē wakanewé a' tò yēsýēsé, e' tā zyí erblōm a' mik ì tueta' chōke, ese wakanewōje? <sup>12</sup> Ñies a' kē tò o'ka icha wakanewé yēsýēsé, e' tā zyí tò a' icha mēmi a' a wakanewé?

<sup>13</sup> "Wé klōulewā kané mésoie, ese kawōtā iwōkir ē ttō dalōiōk. Iwōkirpa chōpa bōl, e' ma ie' kawōtā ekōl ē dalōiōk ena iēkōl watōktsā. Es a' kē a er menukwā Skékōl kī ena inukōl kī ñita."

<sup>14</sup> I' ché Jesús tò e' tšsē seraā fariseowakpa tò. Ie' pa éna inukōl dalér tajé, e' kuekī ie' pa tò iwayué. <sup>15</sup> Ie' tò iché ie' pa a: "A' e' ō sulitane wōrkī tò a' dōr pē' buaé yēsýēsé, eré a' er sūle buaé Skékōl wā. Ì kikekeka' s'ditsō tò tajé, ese wēr sulué ie' wa.

*Ì kòs kitule Skèkòl yèkkuò kị e' wà tkòràè*

16 “Ì kit Moisés ena Skèkòl ttekòlpa tò yèkkuò kị, e' wa s'wòblaonebitu dō mik Juan S'wòskuòkwak dè'bitu' eti. Erè e' itòkì tã ì blúie Skèkòl tso' e' ttè buaè pakarke tã sulitane tso' ima'uk darèrèè diché wa dòkwà e' a.

17 “Ká jài ena ká i' ertã'wa. Erè Skèkòl yèkkuò kitule, e' kè ertã'wa yés, e' wà tkòràè seraq dōwã ttè bataè.

*Se' ñi òwa ese ché Jesús tò*

*(Mateo 19.1-12; Marcos 10.1-12)*

18 “Wèm tò itayè éwa ese tò tayè skã tséwãne, e' tã e' wa ie' tò isenewãbak kéwe e' dalòsèwèwã. Nies tayè a'wa iwèm tò, ese tséwãne wèm o'ka tò, e' tã e' wa ie' tò tayè e' sènewãbak kéwe e' dalòsèwèwã.

*Inukòl blú ena Lázaro, e' ttè*

19 “Inukòl blú bak ekòl e' e' paiò datsi' bua'buã è wa. Kèkraè ie' chkòke, di' yöke buaè. 20 Nies s'siãrè bak ekòl kiè Lázaro, e' e' tkòeser blu' e' u wèkkò ã. Ie' pa dör smewò éme. 21 Ie' éna blu' chké po darke, e' ñakwã suluè. Chichi dòke ie' smewò pakuyòk. 22 Ká e' tã ie' siãrla blènewã, tã Skèkòl biyòchòkwakpa tò ie' wimblu tsémi ká jài ã chkòk Abraham tã. Nies inukòl blú ñe' blènewã tã inú wötènewã.

23 “Etã ie' tso' weinuk siãrè wé s'wimblu weirke eé tã iwökèkã tã Abraham suéitò kamiè kè bãnèt, e' batsi' ã Lázaro tkèr. 24 Etã ie' ar tajè Abraham wòã tã ichéitò: ‘Ìã kèkèpa Abraham, ye' saú er siãrè wa! Ye' weirke tajè bõ' i' a. Be' we'ikèyò, Lázaro patkò iulatska bata nuukkã di' ã tã ipatkò ye' ku' nuukkã as ipasèr.’ 25 Erè Abraham tò iüté: ‘Be' éna iãnú tò mik be' bak ttsè'ka, eti ìyi buaè kòs bak be' wã. E' skéie Lázaro bak weinuk siãrè. Erè ì'ñe tã ie' wòpablène buaè, e' skéie be' weirkene siãrè. 26 Kíie tã, káblè iskiè e' tso' se' shushagè. E' kueki sa' shkak a' ska', esepa kè dõpa a' ska'. Nies a' shkak sa' ska', esepa kè dõpa sa' ska'.

27 “Inukòl blú tò iché: ‘A yèwò Abraham, ye' kkòchõ be' a, Lázaro patkò ye' yé u ã 28 ye' èlpa dõkã skèl, e' pa pattòk as ie' pa kè dõ ká i' ã wé s'weirke siãrè eé.’ 29 Abraham tò iché ie' a: ‘Ì kit Moisés ena Skèkòl ttekòlpa malepa e' pa tò yèkkuò kị, e' tso' ie' pa wã, ias ttè e' iütò ie' pa tò!’ 30 Blu' tò iüté: ‘A yèwò Abraham, e' kè dör wè'. Erè se' duowã ekòl shkènekane ese tò ie' pa patté, e' tã ie' pa er mane'uraè.’ 31 Erè Abraham tò iché iã: ‘Ttè kit Moisés ena Skèkòl ttekòlpa e' pa tò, e' kè iütène ie' pa wã, e' tã s'du'wã shkènekane ese miã ie' pa pattòk, e' tã ñies ie' pa kè tò ie' ttò iütèpa.’ ”

**17**

*A' tso' wòsh wa ì tò ské ì sulu wamblòk ese yöki*

*(Mateo 18.6-7,21-22; Marcos 9.42)*

1 Jesús tò iché ittòkatapa a: “Kèkraè se' erkiòorke ì sulu wamblòk; jèrè yi tò se' erkiòwèke, esepa tò inuí sueraè! 2 Yi tò ikkèpala erblòke ye' mik, esepa ekòl kè ì sulu wamblòk, esepa weirdaè siãrè shutè tkòkã ak wawoie muèwã ikuli' ã batrèemi dayè ã e' tsatã. 3 Ìã' tso' wòsh wa!

“A' yami tò ì sulu wamblé a' kị, e' tã iuñú. Ie' er mane'wéne, e' tã inuí olo'yò iki. 4 Erè ká etkè ã ie' tò ì sulu wamblé a' kù dõkã kuktòkicha (7), erè ie' iché dõkã kuktòkicha: ‘ye' er mane'wéne, e' tã ilo'yò iki.’ ”

*S'kí erblò Skèkòl mik*

5 Etã Skèkèpa Jesús ttekòlpa tsã e' pa tò ie' a iché:

—Sa' kímú kị erblòk Skèkòl mik.

6 Ie' tò ie' pa iüté:

—A' erblòpa Skèkòl mik tsir wes mostaza wò dör tsirla ekkè, e' ma a' tò ichèmi kal bèrie i' a: ‘Be' e' yòttsã ié e' tkòwã dayè a', tã iyèrdattsa.

*Wes s'kawòtã kanèblòk Skèkòl a*

7 “Ichòsò tò a' wele wã kanè mèsò tso' ekòl, e' miã tè tók alè ò a' iyyiwak kkò'nuk alè. Mik idene u ã, eti a' kè tò ichèpa ie' a: ‘Weshke, be' e' tkòeser chkòk, ye' tò be' tieke.’ 8 A' kè tò ichèpa iã es. E' skéie a' tò ichera ie' a: ‘Be' datsi' mane'ú, be' ulò ye' ã tã ye' tiò. Ye' panú, ye' chké one, ye' di' yane one, e' wa be' mi' chkòk.’ 9 Ie' tò iwé wes a' tò ie' kè iuk es, e' kị a' kè tò wèstela chèpa iã. 10 Es ñies mik ì uk Skèkòl tò se' kè, ese wésò seraq, eti ichòsò ie' a' i' es: ‘Ì uk sa' kàne, e' è wé sa' tò. Sa' dör kanè mèsopa èsepala è.’ ”

*Wèpa dabop kiri'wèke lepra tò e'pa bua'wéne Jesús tò*

11 Jesús michoè Jerusalén, e' damitkò Samaria ena Galilea. 12 Mik ie' dökemitke ká tsitsirla ã tã eé wèpa dõkã dabop kiri'wèke lepra tò, e'pa e' yéttssã ièter kamiè 13 tã iãrkerak Jesús tsakã:

—Ìã Jesús, a s'wòbla'ukwak, sa' saú er siãrè wa!

14 Mik ie' tò ie' pa sué, eti ichéitò ie' pa a:

—A' yú e' kkachòk sacerdotèpa ã as sulitane wã ijcher tò a' buanene. Ie' pa mirwãia ñalã kị e' dalewa ie' pa buanene. 15 Mik ie' pa ekòl tò isué tò ibuanene, eti ibiteane Jesús ska' Skèkòl kíkòkkã tajè aneule. 16 Ie' e' tkèwã kuchè kị iwò méwã iyòk kị Jesús klò ska' wèstela chòk. Wèm e' dör Samaria wak. 17 Jesús tò iché iã:

—Ìã' buanene e' kè dör dabop? ¿Wé be' malepa sulítu (9)? 18 Wèm dör ká kuã kị wak ¿e' è bitèane Skèkòl kíkòkkã?

19 Ie' tò iché wèm a:

—Be' e' kōkə be' yúshkane. Be' erblé ye' mik, e' tō be' bua'wéne.

*Í blúie Skèkōl tso', wēs e' kéwō dōr (Mateo 24.23-28,36-41)*

<sup>20</sup> Fariseowakpa tō ichaké Jesús a:

—Í blúie Skèkōl tso', ¿mik e' kéwō datse?

Ie' tō ie'pa iutē:

—Í blúie Skèkōl tso' e' kē dōr íyi suèmi sulitane tō ese. <sup>21</sup> Itso'tke a' shuà, e' kuèkí kē yi a iyërpa, 'Íe itso', ò 'Wjē itso'".

<sup>22</sup> Tā ichéitō ittōkatapa a:

—Ikéwō dōraē mik a' tō ibikeitseraē: 'Jesús dōr S'ditsō Alà, e' mú dō i' tā s'blúie. E' diwō et è kkechekesō suē.' A' tō bikeitseraē es, erē a' kē tō isuēpa kām ye' dōne e' yōkí.

<sup>23</sup> Welepa tō icheraē: 'Íe ie' de', ò 'Diàē ie' de'; erē kē a' minuk isaŋk, kē a' minuk itōkí. <sup>24</sup> Ye' dōr S'ditsō Alà, mik e' dene, etā sulitane tso' ká wa'ñe e'pa tō isueraē wēs alà wōñar tō ká olo ppēe ká wa'ñe e' suēsō es.

<sup>25</sup> Erē e' yōkí kewe ye' kawōtā weinuk tajē ye' bolōkpa ulà a, ie'pa tō ye' wateratsā. <sup>26</sup> Ye' dōr S'ditsō Alà, mik e' dene, etā e' kéwō dōraē wēs Noé kēska' es. <sup>27</sup> E' kéwō ska' tā ie'pa tso' chkōk, di'yōk, senukwā wēs kēkraē es dō mik Noé dewā ikanō bērie e' a' etā. E' bet tā di' dettsā tajē ie'pa kí, e' tō ie'pa ulitane ttélur. <sup>28</sup> Es ñies iwamblēne wēm bak kiē Lot, e' kéwō ska' tā. Sodoma wakpa tso' chkōk, di'yōk, ie'pa tso' íyi tauk ena íyi watauk, ie'pa tso' íyi kuatkōk ena u yuōk wēs kēkraē es. <sup>29</sup> Erē mik Lot e' yettsā Sodoma, etā azufre datse ká jai a wōñarke bō'ie, ese yēne ká e' kí wēs kají es, e' tō ie'pa kōs ttélur. <sup>30</sup> Es itkōraē mik ye' dōr S'ditsō Alà, e' dene etā.

<sup>31</sup> "Mik e' kéwō de, etā yi tso' u bata kí, ese kē dōkwane weshkē íyi tsukmi. Ñies yi tso' kaneblōk kañika, ese kē dōkwane weshkē. <sup>32</sup> Í bak Lot alakól tā\* e' ska' a' er' anu. Ie' yōnane dayē wōsiie, ie' éna íyí dalēr tajē e' kuèkí. <sup>33</sup> Yi e' tsatkak ittēwā yōkí, ese ulà a sene michoē kē dōpa aishkuō tā. Erē yi e' mettsā ttēwā ye' dalērmik, ese ulà a sene michoē dōraē aishkuō tā.

<sup>34</sup> "Ye' tō a' a' ichē tō e' nañewe se' bōl kapōke ka' etkē kí, tā ekōl mira iwā tā ièkōl atdaē. <sup>35-36</sup> Alakōlpa bōl tulur ak wawōk ñiita tā ekōl mira iwā tā ièkōl atdaē.†

<sup>37</sup> Jesús ttōkatapa tō ie' a' ichaké:

—A Skèképa, ¿wé e' wamblērmí?

Jesús tō ie'pa iutē ttē i' wa:

—Sulitane wā ijchēr tō wé òlō daparke tajē, eē ilē nu tēr. Es ilē suēraē a' tō iwā kkachōie tō wé iwamblērmí.

### 18

*Alakól dōr schō ena s'shulōkwak ekōl, e' tté*

<sup>1</sup> Jesús éna ikkachak ittōkatapa a tō s'kawōtā ikiōk S'yé a kēkraē kē shtrirta'wa, e' kleéitō ie'pa a' i' es: <sup>2</sup> "Ká e' kí s'shulōkwak ekōl tso', e' kē suarta' Skèkōl yōkí, ñies ie' kē tō yi dalōieta'. <sup>3</sup> Ká e' a' ñies alakól dōr schō tso' ekōl, e' ñippōke ibolōk tā. Kēkraē ie' míā s'shulōkwak ñe' ska' tā ichekeitō iā: 'Ye' kímú. Ye' bolōk tō ye' we'ikeke, e' shulō ye' a'. <sup>4</sup> E' tka ká tajē erē s'shulōkwak kē wā iūtēne. Bata ekkē tā s'shulōkwak tō ibikeitsé: 'Alakól schō i' tso' ye' tsiriuk ñiē. Erē ye' kē suarta' Skèkōl yōkí, ñies kē ye' tō yi dalōieta', <sup>5</sup> erē ie' tté shuleraēyō as kē idōiā ye' shtriuk tajē ttē e' wa.'"

<sup>6</sup> Skèképa tō ikí ché: "Í ché s'shulōkwak suluē ñe' tō e' bikeitsō buaē. <sup>7</sup> Wépa shukitulebak Skèkōl wā, tso' ie' a' ikiōk ñiē nañeē, ¿esepa kē tsatkepaítō? ¿ie' tō ie'pa keraē ipanuk? <sup>8</sup> Ye' ichē, au. Ie'pa tsatkeraitō bet, kē dōr ká tajē. Erē ye' dōr S'ditsō Alà, mik e' dene, etā s'erblōke Skèkōl mik, ¿esepa kuēmíyō ká i' a'?

*Fariseowak ena inukōl shtōkwak Roma wōkirpa a, e' tté.*

<sup>9</sup> Pē' tso' Jesús ttō kíttsōk, e'pa welepa e' bikeitsō tō ie'pa serke yēsýesē Skèkōl wōa, erē ie'pa wōska sulu s'malepa wēr. Esepa a' ie' tō ttē kleé i' es: <sup>10</sup> "Wépa bōl míā Skèkōl wé a' ttōk S'yé tā. Ekōl dōr fariseowak, ekōl dōr inukōl shtōkwak Roma wōkirpa a. <sup>11</sup> fariseowak ttōdur S'yé tā, ie' iché i' es: 'A Skèkōl, wéstela chekeyō be' a' tō ye' kē dōr suluē wēs s'malepa es. Ie'pa dōr ak-blōkwakpa ena pē' sulusipa ena s'senewābak e' dalōseukwā wakpa. Ñies ye' kē dōr suluē wēs inukōl shtōkwak dur wj es. <sup>12</sup> Domingo bit tā ye' batsōke ká bōt ká bōt kēkraē. Ñies i' kōs de' y' ulà a, e' blatekeyō dōkā dabop, e' tsá eyōk mekeyō be' a'. <sup>13</sup> Erē inukōl shtōkwak e' dur bánet, ie' eriane tajē, ie' wō è kē kanekā ká jai sauk, ie' batsi' è tōke iulà wa ie' eriane tajē kuèkí. Ie' tō iché: 'A Skèkōl, ye' dōr pē' sulusi, ye' saú er siarē wa!'

<sup>14</sup> Jesús tō ichéne: Ye' tō a' a' ichē tō yi e' ttsōkā tajē ese wōardawa, erē yi e' wōéwa ese kíkardakā tajē. E' kuèkí inukōl shtōkwak ñe' míane iu a klō'wé Skèkōl tō wēs pē' buaē yēsýesē es. Erē fariseowak kē minene es.

*Jesús tō ikié S'yé a' ala'rla kí (Mateo 19.13-15; Marcos 10.13-16)*

<sup>15</sup> Pē' wā ala'rla debítu Jesús ska' as ie' ulà mùkā ikí. Erē mik e' sué ittōkatapa tō, etā ie'pa tō pē' uñélor. <sup>16</sup> Erē ie' tō ittōkatapa kíe tā ichéitō:

—As ala'rla bitú ye' ska'. Wépa dōr wēs ie'pa es, esepa blúie Skèkōl tso', e' kuèkí kē iwōklō'wariā. <sup>17</sup> Mokí ye' tō ichē tō yi kē

\* **17:32** Génesis 19.26 saú. † **17:35-36** Yèkkuō kèchke wēle tō wérsicūlo 36 kí kuōtkéka. E' tō iché i' es: Wépa bōl tso' kaneblōk tē a, ekōl mitsēr tā ièkōl atē.

e' wöowa wës alala es, i blúie Skéköl tso' e' kiowa, ese kè döpa<sup>w</sup>ai<sup>a</sup>.

*Inuköl blú eköl tö Jesús a ichaké (Mateo 19.16-30; Marcos 10.17-31)*

18 Judiowak wökir eköl tö Jesús a ichaké: —A S'wöbla'ukwak, be' dör buaé, çì wèmi ye' tö as sene michoé dö ye' ulà a?

19 Ie' tö iüté: —Çì kuekì be' ye' kié buaé? Skéköl eköl è dör buaé. 20 Ttè me'atbak ie' tö dalöieno, e' jcher be' wa buaé. E' tö iché: 'Kè a' kawö ta' s'senewabak dalöseukwa, kè a' kawö ta' s'ttökwa, kè a' kawö ta' akblök, kè a' kawö ta' s'kkatök kachè wa, a' yé ena a' mi dalöio.\*

21 Wëm e' tö ie' a' iché: —Ttè e' kôs dalöie'bitu ye' tö, ye' ià duladula eta.

22 Ie' tö ttè e' tssé ta' ie' iüté: —Íyi etké kianeia be' a wè, e' dör i': i tso' be' wa, e' wataüttsa seraa ta iské múttsa s'siarépa a. E' ukuökì ta be' shkó ye' ta ye' ttökataie. Es ta íyi buaé tajé dóraé be' ulà a ká jai a.

23 Erè wëm e' dör inuköl blú tajé e' kuekì mik ie' tö e' tssé, eta ie' erianeká tajé. 24 Jesús tö isué tö ieriane ta ichéitö ia:

—Inuköl blúpa a darèrè idir dökwà i blúie Skéköl tso' e' a! 25 Esepa a döká eé, e' dör darèrè tköká kameio tkómi datsi' yuo diké ese wöukla a e' tsata.

26 Wépa tso' ittsoé e'pa tö ichaké Jesús a: —E' dör es, e' ma çyi tsatkèrmi?

27 Ie' tö ie'pa iüté: —Ì kè or s'ditsö a, ese ormi Skéköl a buaé.

28 Eta Pedro tö ie' a' iché: —Ittsö, sa' íyi kôs me'at sa' tö ta sa' bite be' ta.

29 Ie' tö iché ie' a:

—Mokì ye' tö a' a' iché tö yi isie tö iu ö ilaköl ö ièlpa ö iyé ö imi ö ila'r, e' méat i blúie Skéköl tso' e' dalèrmik, 30 ese ulà a iské dörane tajé shüté ká i' a, ñies aishkuö ta sene michoé dóraé iulá a.

*Jesús skà e' biyö ché tö itterawa (Mateo 20.17-19; Marcos 10.32-34)*

31 Jesús tö ittökatapa dabom eyök kì bøl (12), e'pa kiémi bánet ta ichéitö ie'pa a: "Se' mirká Jerusalén i', eta eé i kôs kitat Skéköl ttekölpä tö yèkkuö kì e' wà tkóraé, ye' dör S'ditsö Alà, e' ta. 32 Ie'pa tö ye' wömerattsa pe' kè dör judiowak esepa ulà a. E'pa tö ye' wayueraé, cheraé sulué, iwiri tuörarak ye' kì. 33 Ie'pa tö ye' pperaé, ye' tterawa; eré e' kì ká de mañat eta ye' shkerdakane.

34 Erè i ché ie' tö ittökatapa a, e' wà blèulewa ie'pa yöki, e' kuekì ie'pa kè a iwà ane.

*Wëm eköl wöbla kè wawèr tso' Jericó e' bua'wéne Jesús tö*

*(Mateo 20.29-34; Marcos 10.46-52)*

\* 18:20 Éxodo 20.12-16; Deuteronomio 5.16-20

35 Mik Jesús demi tsinet Jericó, eta eé wëm tkèr eköl ñala ska' inuköl kak kiök. Ie' wöbla kè wawèr. 36 Mik ie' tö ittssé tö pe' dami tajé ñala kì, eta ie' tö ichaké tö çì wamblérke?

37 Ie'pa tö iché ie' a' tö Jesús Nazaret wak dami ñala kì. 38 E' kuekì ie' tö iché aneule:

—Çì Jesús, s'blú David bak e' aleri, ye' saü er siarè wa!

39 Pe' dami Jesús yöki kewe, e' tö wëm e' uñeke as isiwä'blöwa. Eré ie' tö ikì ché aneule:

—Çì David aleri, ye' saü er siarè wa!

40 Jesús e' duésér ta itsuk patkéitö. Mik ide, eta Jesús tö ie' a' ichaké:

41 —Çì kiane be' kì tö ye' tö iwè be' a? Ie' iüté:

—A kékèpa, ye' kì ikiane tö ye' wöbla buarne.

42 Jesús tö ie' a' iché: —Be' erblé ye' mik, e' wa be' buanene!

43 E' wösha ta ie' wöbla buanene ta imia Jesús ta e' tö Skéköl kikekarami tajé. Ñies wépa kôs tö isué e'pa tö Skéköl kikekarami tajé.

### 19

*Jesús ena Zaqueo, e' paké*

1 Jesús de Jericó, e' shködur eé. 2 Eé wëm eköl serke kié Zaqueo, e' dör inuköl shtökwapka Roma wökirpa a, e'pa wökir. Ie' dör inuköl blú tajé. 3 Ie' kì Jesús kiane sué, eré ie' dör tsirlalá jskìla, tajé pe' tso', e' kuekì ie' kè wö dè'kà Jesús saük. 4 E' kuekì ie' tunemi wé Jesús tkökemi eé tkaka kal ulà a ipanuk sué. 5 Mik Jesús dökemitke kal e' dikia, eta iwökéka ta iché Zaqueo a:

—A Zaqueo, be' e' ówa bet. Íñie ye' mi'ke be' ska' kapökrö.

6 Zaqueo e' éwa bet ta Jesús kiéwa<sup>itö</sup> iu a tssé'ne buaé. 7 Mik pe' ulitane tö isué, eta ie'pa tö Jesús ché sulué. Ie'pa tö iché ñi a: "Çìök ie' mi'ke pe' sulusi u a?" 8 Zaqueo e' duéka ta iché Skékèpa Jesús a:

—A kékèpa, ye' ttö tssö. Í kôs tso' ye' wa, e' shaböts meraeyö s'siarépa a. Ñies yile íyi ekiblèyö, e' ta e' mekeneyö ie' a döká tkètökicha.

9 Jesús tö iché ie' a:

—Be' dör Abraham aleri, eré be' erblé Skéköl mik mokì wës Abraham es, e' kuekì íñie ta be' de Abraham alà chökìe. E' kuekì íñie be' tsatkéne, ñies wépa tso' be' u a erblé Skéköl mik e'pa tsatkéne. 10 Ye' dör S'ditsö Alà, e' dè'bitu, wépa ché'ulur i sulu ulà a esepa yulök tsatké.

*Inuköl mène wakanewè, e' tté*

11 Jesús dökemitke Jerusalén. Pe' tso' ie' tö kïttsök, e'pa tö ibikeitsé tö mik ie' de Jerusalén eta i blúie Skéköl tso' e' kè wö

dewatke da'äie. E' kuekji ie' tö ie'pa a ikleé i' es:

<sup>12</sup> "Wëm tso' eköl dör blu' ditséwö, e' míä kamië ká kuä'kí a iblú kibi ska' as e' tö ie' tkòkà blu'ie, wé ie' bité ee. E' ukuòkí tã ibitúkeane. <sup>13</sup> Kam ie' mí, etã ie' tö ie' kané mészopa kié dabop, e'pa a ie' tö inuköl mé tajé ñikkéë eköl eköl a. Ie' tö iché ie'pa a: 'A' tö inuköl sę wakaneú dō mik ye' dōne etã, isuoie kos a' tö ikí klō'wëmi.' <sup>14</sup> Erë pë' serke ie' kaska', e'pa éna ie' ar sulué. E' kuekji ie'pa welepa patkérakitō blu' kibi ska' ichök: 'Sa' kē kí ie' kiane sa' blúie, e' kuekji kē itkarka.'

<sup>15</sup> "Erë blu' kibi tö ie' tkéka blu'ie tã ie' míane wé ibité ee. Mik ie' dene, etã ie' tö ikané mészopa dabop, wépa a ie' tö inuköl me'at, e'pa kiök patké isuoie tö kos inuköl kí klō'wérakitō. <sup>16</sup> Itsä debitū tö iché iblú a: 'A kéképa, be' inuköl wakanewéyō, e' kí klō'wéyō dōka dabobtōkicha.' <sup>17</sup> Blu' tö ie' iuté: 'E' dör buaé. Be' dör kané méso buaé. Í elkela wakanewébō yésyèsé, e' kuekji ye' tö be' tkekeka ká dabop, e' wōkirie.' <sup>18</sup> Iskã debitū tö iché: 'A kéképa, be' inuköl wakanewéyō, e' kí klō'wéyō dōka sketōkicha.' <sup>19</sup> Nies blu' tö ie' iuté: 'Ye' tö be' tkekeka ká skël, e' wōkirie.'

<sup>20</sup> "Erë iéköl debitū, e' tö iblú a iché: 'A kéképa, i' be' inuköl. Ye' tö ipatréwa tsamo a tã ibléyō. <sup>21</sup> Be' dör wëm er darërëë ese. Í kē dör be' icha ese klō'wékewabō. Nies be' tö iyi wöshteke wé kē be' wã ikuatkéne ee. Ye' suane be' yōkí, e' kuekji ye' tö be' inuköl blé.' <sup>22</sup> Etã blu' tö ie' a iché: 'Be' dör kané méso sulusi ese. Ye' tö be' kichaterattás be' wák ttè wa. Be' tö iché tö ye' dör wëm er darërëë ese. Be' tö iché tö í kē dör ye' icha ese klō'wékewayō, nies tö ye' tö iyi wöshteke wé kē ye' wã ikuatkéne ee. <sup>23</sup> E' dör es, e' tã ñi kuekji be' kē wã ye' inuköl bléne inuköl bló wé a as ee ikí klór? Be' tö iúpa es, e'ma mik ye' dene, etã ye' inuköl ena ikí klōne e' de ye' ulá a.' <sup>24</sup> Etã blu' tö iché itso'rak ee, e'pa a: 'Inuköl yóttás ie' ulá a, tã imú wé wã itso' dabop, e' a.' <sup>25</sup> Erë ie'pa tö blu' a iché: 'A kéképa, erë ñi kuekji be' tö ie' a ikí meke, ie' wã itso'tke dabop?' <sup>26</sup> Ie' tö ie'pa iuté: 'Ye' tö a' a iché tö wé wã iyi tso', ese a ikí merdaé. Erë wé kē wã í ku', í tso' ese wã elkela, e' yerattás iyōkí. <sup>27</sup> Wépa kē kí ye' kiane blu'ie, e'pa dör ye' bolōkpa; ie'pa tsūbitū ié tã ittōlur ye' wōrkí.'"

*Jesús demi Jerusalén*

(Mateo 21.1-11; Marcos 11.1-11; Juan 12.12-19)

<sup>28</sup> Jesús ttè paké one, etã ie' mirkaia Jerusalén ñalé kí. <sup>29</sup> Mik idökemitke tsinet Betfagé ena Betania atę kabata kié Olivo kébata e' kuli' a, etã ie' tö ittōkatapa bōl kié <sup>30</sup> tã ichéitō iarak:

—A' yú kewe, u tso' se' wōshaé e' a, etã ee burro kueraé a' tö etō moule kē kí yi e' tkéuleka ese. E' wōtsōō tã itsūbitū ña. <sup>31</sup> Yile tö a' a ichaké: ñie a' tö iwōtseeke? e' tã iütō: Skéképa kí ikiane.

<sup>32</sup> Ittōkatapa míyal tã ikuérakitō wés Jesús tö iché ie'pa a es. <sup>33</sup> Ie'pa tso' burro wōtsōök tã burro wakpa debitū tã ichakéitō:

—ñie a' tö burro sę wōtseeke?

<sup>34</sup> Ie'pa tö iuté:

—Skéképa Jesús kí ikiane e' kuekji.

<sup>35</sup> Etã ittōkatapa wã burro bitetser Jesús a. Ie'pa tö ipaio kíkke méka burro kí, tã Jesús kimerakitō e' tkókka ikí. <sup>36</sup> Jesús mirkaia Jerusalén ñalé kí, ee pë' tso' tajé, e'pa tö paio kíkke shuélor ñala kí kewe Jesús yōkí. <sup>37</sup> Ie'pa mirwa Olivo kébata kuli' a wō wa'k. Iklépa tso' tajé, e'pa anemi tssé'ne buaé wa. Skéköl kíkékarakitō tajé. Í kē or yi a ese o' Jesús tö tajé ie'pa wōrkí, e' kuekji Skéköl kíkékarakitō.

<sup>38</sup> Ie'pa tö iché:

—jAyécha buaé s'blú i' datse Skéköl ttō wa! Skéköl tso' ká jai a olo tã tajé as e' tã se' ser bërë. Ie' kíkōkásō.\*

<sup>39</sup> Pë' shuã fariseowakpa welepa tso', e'pa tö iché Jesús a:

—Be' klépa uñú.

<sup>40</sup> Erë ie' tö ie'pa iuté:

—Ye' tö iché a' a tö ie'pa siwa'bléwa, e' tã ák tö ye' kikeraka aneule.

<sup>41</sup> Mik ie' de tsinet Jerusalén, etã ie' ikí sué tã ie' ié idalèrmik. <sup>42</sup> Ie' tö ibikeitsé: jA' mú wã ijcher j'ñe tö wés a' sermi bërë Skéköl tã! Erë e' tso' bléule a' yōkí, e' kuekji a' kē a' isurpa. <sup>43</sup> Kawō sulu dōraé a' kí. A' bolōkpa dōraé, e'pa tö a' ká kōierawa shkit as a' kē tkōyal. Ie'pa miraé ñippök a' tã. <sup>44</sup> Ie'pa tö a' ká ena a' wakpa kos ewerawa. A' u kos olordawa, e' éki kē atpa ñi bata kí. Skéköl de a' tsatök, e' kēwō de a' kí erë iwattétsa a' tö. E' kuekji e' kos tkōraé a' tã.

*Jesús tö Skéköl wé batse'wé*

(Mateo 21.12-17; Marcos 11.15-19; Juan 2.13-22)

<sup>45</sup> E' ukuòkí tã Jesús de Skéköl wé a, tã ie' tö iyi wataukwakpa tré'wéyalmi, <sup>46</sup> tã ichéitō ie'pa a:

—Skéköl tö iyé' iyèkuuò kí: 'Ye' u dör tto ye' tã wé', erë a' tö iia'wéka akblo wéie.

<sup>47</sup> Kékraé Jesús tö s'wōbla'wéke Skéköl wé a. Sacerdotepa wōkirpa ena s'wōbla'uk ttè dalōiëno wa wakpa ñies judiowak wōkirpa malepa, e'pa tö ileritsekerak Jesús ttowaie. <sup>48</sup> Erë judiowak malepa ulitane tö ie' ttōke e' kíttséke er bua' wa, e' kuekji ibolōkpa kē ulá dé'wã ittōkwa.



## 20

¿Yi tō kawō mé Jesús a?

(Mateo 21.12-17; Marcos 11.27-33)

<sup>1</sup> Etókicha tã Jesús tso' s'wöbla'uk ena Skéköl tté buaé e' pakök Skéköl wé a tã eë sacerdotepa wökirpa ena s'wöbla'uk tté dalöiëno wa wakpa ena judiowak kueblupa e'pa de. <sup>2</sup> Ie'pa tō ichaké ie' a:

—¿Yi ttō wa be' tō iyi ikké weke? ¿Yi tō e' kéwō mé be' a?

<sup>3-4</sup> Ie' iüté:

—Ñies ye' tō a' a ilé chakeke: ¿Yi tō Juan patké' s'wöskuök? ¿Skéköl tso' kã jai a' ö s'ditsö? Ye' iütö.

<sup>5</sup> Etã ie'pa ichëmi ñi a: “Se' tō ichëmi tō Skéköl tō Juan patké', e' tã ie' tō se' iütëmi: ‘¿I' kueki a' kē wã ie' tté klöone?’ <sup>6</sup> Ñies pë' ulitane tō iklö'wé tō mokjë Juan dör Skéköl tteköl, e' kueki kē se' a iyënuk tō ipatké' s'ditsö tō. Se' tō iché es, e' tã ie'pa tō se' ttëwami ák wa.” <sup>7</sup> E' kueki ie'pa tō iüté:

—Kē sa' wã ijcher tō yi tō Juan patké' s'wöskuök.

<sup>8</sup> Ie' tō ie'pa a' iché:

—Es ñies ye' kē tō a' a ichepa yi tō ye' a kawō mé iyi ikké woje.

*Uva kanéukwakpa sulusipa, e' tté*

(Mateo 21.33-44; Marcos 12.1-11)

<sup>9</sup> E' ukuöki tã Jesús ttëmi pë' tã tã tté kleéitö i' es: “Wëm eköl tō uva kuatké tajé. Ie' tō ipeitéat wëpa wëlepa a as ie'pa tō ipataü ie' a iwörke e' kak wa. E' ukuöki tã ie' miã kã kuã'ki dö kã tajé. <sup>10</sup> Mik uva wöline tso'tke wë'iaë shtë, etã ie' tō ikané méso patkëmi eköli ie' icha tsük. Erë kanéukwakpa tō ikané méso klö'wëwã, ppé siarë, tã ipatkëmine ulã wöchka. <sup>11</sup> Etã iwák tō ikané méso skã patkëmine eköl. Ñies e' ché ie'pa tō suluë, ppé siarë, tã ipatkëmine ulã wöchka. <sup>12</sup> Ikané méso skã patkëmine ie' tō eköl, etã ñies e' shka'wërakitö tajé, tã itrë'wëshkar.

<sup>13</sup> “Bata ekké tã iwák tō iché: ‘¿I' wëmi ye' tō? Ye' alã dalër tajé ye' éna, e' patkerami ye' tō. Isalema ie'pa tō ie' dalöiëmi.’ <sup>14</sup> Erë mik kané méso tō kané wák alã sué, etã ie'pa tō iché ñi a: ‘Ie' wj dör kã i' wak alã, e' a kã i' atdaë. E' kueki ittöwasö, etã es kã i' atdaë se' ulã a.’ <sup>15</sup> E' kueki ie'pa tō iklö'wëwã yëttsã bänet tã ittëwërakitö.

“Ye' tō a' a ichaké: ¿I' ma' ibikeitsé? ¿I' wëraë kané wák tō? <sup>16</sup> Yö iché tō ie' miraë tã kanéukwakpa tteratulur, tã uva kané meraneitö pë' kuã'ki a.”

Mik e' tse' judiopa wökirpa tō, etã ie'pa tō iché:

—E' mú kē wamblër es.

<sup>17</sup> Erë ie' tō ie'pa sué krereë, tã ichéitö:

—¿Wes a' tō ibikeitsëmi tō e' kē tköpa a' tã? Skéköl yëkkuö tō ye' ché i' es:

‘Ák watë'ttsã u yuökwakpa tō,

e' yönene ák bua'buaië.\* <sup>18</sup> Yi klastkëne ák e' mik ese parolordaë ena yi kã ák e' anekã ese yalitdawa idikja.

<sup>19</sup> Ie'pa tō isuëwã tō kleë e' wa Jesús tō ie'pa ché. E' kueki ie'pa éna ie' klö'wakwã ee, erë ie'pa suane pë' yökj.

*S'wökirpa patuë, e' tté*

(Mateo 22.15-22; Marcos 12.13-17)

<sup>20</sup> E' kueki ie'pa tso' Jesús weblök isuöie tō i' kã ikkatërmi. Ie'pa tō wëpa wëlepa patké ie' chakök ittö yoktsã, e' wa ikkaté Roma wökirpa a as e'pa tō iklö'üwa. Wëpa e'pa e' ö tō ie'pa dör pë' buaé yësyësë ese. <sup>21</sup> Ie'pa tō ie' a' ichaké:

—A s'wöbla'ukwak, sa' wã ijcher tō i' cheke be' tō ena tté wa be' tō s'wöbla'weke, e' dör mokj. Be' a sulitane dör ñies ëme. Be' tō s'wöbla'weke yësyësë Skéköl ñalé tté wa. <sup>22</sup> ¿I' ma be' tō ibikeitsé? Roma wökir kibi patuësö ¿e' dör buaë ö kē idör buaë?

<sup>23</sup> Ie' wã ijcher tō ie'pa tso' ie' chakök er sulu wa, e' kueki ie' iüté i' es:

<sup>24</sup> —Inuköl tso' a' wã Roma wökir patuöie, e' kkachö ye' a' et. ¿Yi diököl ena yi kië me'rka'iki?

Ie'pa tō iüté:

—Roma wökir kibi.

<sup>25</sup> Ie' iché ie'pa a:

—E' ma kos Roma wökir kibi icha, ese mú ie' a. Tã kos Skéköl icha, ese mú ie' a. <sup>26</sup> I' kos ché ie' tō sulitane wörki, e' a' ie'pa kē wã i' kune ie' kkatöie. Ie' tō ie'pa iüté es, e' tō ie'pa tkiwëwã. E' kueki ie'pa siwã'blélur iyökj.

*¿S'duolur e'pa shkermikane ö au?*

(Mateo 22.23-33; Marcos 12.18-27)

<sup>27</sup> E' ukuöki tã saduceowakpa wëlepa debity Jesús ska'. E' wakpa tō iklö'wé tō s'duowã e' kē shkenukkane. Ie'pa tō ie' a' ichaké:

<sup>28</sup> —A s'wöbla'ukwak, Moisés tō tté dalöiëno kitãt yëkkuö kã se' a, e' tō iché i' es: Wëm blënëwã kē alã atë, e' tã ie' èl kawötã ischö tsükwã as ilã kökã iël blënëwã e' a. <sup>29</sup> Etókicha wëpa bak döka kul ñi èlpa. Ikibi alaköl tsëwã, erë iblënëwã kē alã atë. <sup>30</sup> E' ukuöki tã ie' itökj iël tō ischö tsëwã, erë ñies e' blënëwã kē alã atë. <sup>31</sup> Es itka iël skã tã ñies imalepa kos e'pa tã. Ie'pa kul blërlulene kē alã atë yës. <sup>32</sup> Bata ekké tã ñies alaköl e' blënëwã. <sup>33</sup> Wëpa kul e'pa bak alaköl eköl ë tã. Mik s'duowã e'pa shkenekkane, etã ¿wëne dömi ie' wëm chökje?

<sup>34</sup> Ie' tō ie'pa iüté:

—S'tso'ia' kã i' a tã wëpa ena alakölpa ñi tsükewã. <sup>35</sup> Erë aishkuö tã wëpa kã sene michoë mène, esepa shkërdakane tã eë wëpa ena alakölpa kē serpawãia' ñita. <sup>36</sup> Ie'pa ser michoë kē duötã'wã wes Skéköl biyöchökwakpa kē duötã'wã es. Skéköl tō

\* 20:17 Salmo 118.22

ie'pa shkeo'kane, e' kueki ie'pa doraë ie' ala'rie. E' kueki ie'pa kë serpawaja nita.  
<sup>37</sup> Nies Moisés wák tò se' a ikkayè' tò s'duowa e'pa shkerdakane. Kal tsir wónarke bô'ie e' paka'itò, ee ie' tò iyè' tò Skèkòl dór Abraham, Isaac ena Jacob, e'pa Kèkòl.† Es isués tò ie'pa tso'ia ttsè'ka Skèkòl a. <sup>38</sup> E' wà kiane chè tò s'tso' ttsè'ka ena s'duowa, e'pa kos tso' ttsè'ka Skèkòl a kekraë. E' kueki ie' kë dór s'duowa e' Kèkòl. Ie' dór s'ttsè'ka e' Kèkòl.

<sup>39</sup> Eta s'wöbla'uk ttè daloiëno wa wakpa welepa tò iché ie' a:

—A s'wöbla'ukwak, i ché be' tò, e' chébò buaë yësyësë.

<sup>40</sup> Eta saduceowakpa kë kësik dè'kaja ie' a i skà chakòk.

*¿Wé pairine'bitu' idi' wa s'blúie e' dór ye aleri?*

*(Mateo 22.41-46; Marcos 12.35-37)*

<sup>41</sup> Jesús tò ie'pa a ichaké:

—¿Wes ie'pa tò ichèmi tò wé pairine'bitu' idi' wa s'blúie, e' dór s'blú bak kiè David e' aleri? <sup>42</sup> Erè David wák tò ie' yè'at yëkkuò kiè Salmos e' k'i. Ie' tò iyè'at i' es: 'Skèkòl tò iché ye' Kèkòl a:

Be' e' tkòser ye' ulà bua'kka daloiëno tajè <sup>43</sup> dök mik ye' tò be' bolòkpa méré be' klò dikja eta.‡

<sup>44</sup> Es se' isué tò wé pairine'bitu' idi' wa s'blúie, e' kié David wák tò ie' Kèkòl, e' ta ¿wes ie' dór David aleri?

*Jesús tò s'wöbla'uk ttè daloiëno wa wakpa kkaté*

*(Mateo 23.1-36; Marcos 12.38-40; Lucas 11.37-54)*

<sup>45</sup> Sulitane tso' Jesús ttòke e' k'ittsòk, eta' ie' tò iché ittòkatapa a: <sup>46</sup> "A' e' kkò'nú s'wöbla'uk ttè daloiëno wa wakpa yöki. Ie'pa wöbatsò shkòk datsi' batsjë ese mik wé pè' tso' tajè ese ska' as pè' tò ie'pa shke'ù wes kékèpa daloiërtà' tajè es. Nies se' nì dapa'wò wé a ena wé ie'pa kawò tkò'wèkerakitò, ese ska' kula' tso' kékèpa daloiërtà' esepa a, ese yuleke ie'pa tò e' tkoie. <sup>47</sup> Ie'pa tò alakòlpa schò u yekettsà iulà a ta iwòkatekerakitò ittòkerak S'yé ta braraë e' wa. Ie'pa weirdaë siarè s'malepa tsata.

## 21

*Alakòl ekòl siarè e' tò inukòl mé Skèkòl a (Marcos 12.41-44)*

<sup>1</sup> Jesús tso'ia Skèkòl wé a, eta' ie' tso' inukòl blúpa tso' inukòl iök kalkuò tso' iioie mè Skèkòl a ese a e'pa sauk. <sup>2</sup> Nies ie' tò alakòl ekòl siarèla dór schò e' sué inukòl wòshkila yöule cobre\* wa ese bót iökwa. <sup>3</sup> Eta Jesús tò iché:

—Mok' ye' tò a' a iché tò alakòl wí siarèla dór schò e' tò inukòl iéwa kibie imalepa kos tsata. <sup>4</sup> Ie'pa ulitane tò inukòl kuò ate ese ié, erè ie' siarè, e' tò ie' wà itso' senoie e' kos méttsa. E' kueki ye' tò ie' ché es.

*Jesús tò iché tò Skèkòl wé olordawa (Mateo 24.1-2; Marcos 13.1-2)*

<sup>5</sup> Eta Jesús ttòkatapa welepa tso' ichòk tò Skèkòl wé wër buaala, k'itkéule tajè ak bua'buwa wa ena íyi bua'buwa kakmeule Skèkòl a tajè, ese wa. Jesús tò iché:

<sup>6</sup> —Ikéwò doraë eta' i kos sué a' tò i', e' olordawa seraa, iékwò è kë atpa nì bata ki.

<sup>7</sup> Eta ittòkatapa tò ichaké:

—A s'wöbla'ukwak, ¿mik e' wamblèrmi? ¿i wa sò isuëmi tò iwamblèrketke?

<sup>8</sup> Ie' iüté: "Tajè pè' datse e' chòk tò ie'pa dór ye'. Icherarakitò: 'Ye' dór wé pairine'bitu' idi' wa s'blúie e'". Nies icherarakitò tò s'erkewa e' kéwò detke. Erè kë a' minuk esepa itòki. Pè' k'iterarakitò tajè. E' kueki a' tso' wòsh wa as kë yi tò a' k'itò'ù. <sup>9</sup> Mik a' tò biyò ttsé tò ká wele wakpa ñippòke tajè ká kua'ki wakpa ta, eta' e' kë tò a' tküik. Nies mik a' tò ibiyò ttsé tò pè' ñippòke tajè iké wakpa wòkirpa ta, eta' e' kë tò a' tküik. Ese wamblèrdaë kam ye' döne e' yöki, erè ká i' erwa e' kam kéwò dowa."

<sup>10</sup> Ie' tò ie'pa a ikí ché ia: "Ká kua'ki kua'ki wakpa ñippóraë nita. <sup>11</sup> Nies í tò ká wòti'weraë tajè. Nies ká kua'ki kua'ki ki bli tò ena duè tò pè' tteraë tajè. Ká jai a íyi sueraëò tajè suluë iwà kkachoie, e' tò ie'pa tkiweraë tajè.

<sup>12</sup> Kam e' kéwò tkò, e' yöki ie'pa tò a' klò'wera'wa, wè'keraë siarè. A' miraë ie'pa wa se' nì dapa'wò wé a shulè, nies a' wòtèrdawa s'wòto wé a. Ie'pa wa a' miraë duésèr s'blúpa ena s'wòkirpa wòrki ye' ttè kueki. <sup>13</sup> Erè es nies a' tò ye' ttè pakeraë ie'pa a. <sup>14</sup> Eta kë a' tkinuk tò ima a' e' tsatkòmi. <sup>15</sup> Ye' tò ttè eraë a' a e' tsatkoie buaë, e' kueki kë a' tkinuk e' k'i. A' bolòkpa kë a iwòklònuk, nies ie'pa kë a iyènik tò e' dór kachè. <sup>16</sup> A yé, a' mi, a' èlpa, a' yamipa malepa, a' sini'pa, e'pa welepa tò a' wòmerattsa a' bolòkpa ulà a. Ie'pa tò a' welepa tterawa. <sup>17</sup> Sulitane tò a' sueraë suluë ye' ttè kueki. <sup>18</sup> Erè kë a' tkinuk, a' kë weirpa kekraë, a' doraë buaë ká jai a aishkuò ta. <sup>19</sup> A' e' tkéwa darèrè dòka bata ekké, e' ta a' tsatkèrdaë.

<sup>20</sup> Mik a' isué tò ká kua'ki ñippòkwakpa iène tajè Jerusalén kkòieule e' pamik shkit ñippòk Jerusalén wakpa ta, eta' a' éna ianú tò Jerusalén erdawa bet. <sup>21-22</sup> Mik e' kéwò de, eta' wépa serke Judea e'pa tkòyalmi kabata a. Skèkòl tò Jerusalén wakpa wè'keraë tajè siarè. E' kueki wépa serke Jerusalén,

† 20:37 Skèkòl dór Abraham, Isaac ena Jacob, e'pa Kèkòl: E' ché Skèkòl tò ie'pa blèrulunbak ká iajiaë e' ukuòki. ‡ 20:43 Salmò 110.1 \* 21:2 cobre: E' dór tabechka èse kë tueta' darèrè wës orochka ena inukòlchka es.

e'pa e' yölor. Nies wépa tso' kañika, esepa kē kinewane ee. E' kos tkōraē wēs itso' kitule Skēkōl yēkkuō kī es. <sup>23</sup> Kawō suluē dōraē kā i' kī, iwakpa we'ikeraē siarē Skēkōl tō. E' kuēkī e' kēwō ska' tā jwēstela ina alakōlpa alā kurketke ena alakōlpa tsu' muke ilā ā esepa tā! <sup>24</sup> Judiowak welepa tterawā tabē wa; welepa tserdami klōulewā kā wañe. Eta pē' kē dōr judiowak, esepa tō Jerusalén klō'werawā wēs iwākpa icha es, dō mik Skēkōl tō ikēwō mé ie'pa ā ekkē.

*Jesús dōrane olo tā' tajē*

*(Mateo 24.29-35; Marcos 13.24-37)*

<sup>25</sup> “Diwō ā, si'wō ā ena bēkwō ā iyi wērdaē tajē suluē iwā kkachoie tō kā i' erkawatke. Nies kā i' kī dayē blardaē tajē ena iyōli busdakā tajē, ese yökī kā ulitane wakpa suardaē tajē, kē ie'pa ā e' onukīā wēs. <sup>26</sup> Ī sulu tkōraē kā i' kī, ese yökī ie'pa suardaē tajē, isiwā' ardawarak suane ē wa. Ī kos tso' kā jai ā e' wōtirdaē. <sup>27</sup> Eta ye' dōr S'ditsō Alā, e' datse mō ā dichē tā' tajē olo tā' tajē, e' wērdaē. <sup>28</sup> Mik iyi ikkē suē ā tō, eta bet tā' a' tsatkerketke, e' kuēkī ā' er kuū, a' wō kōkā siwā' kī.”

<sup>29</sup> Nies ie' tō ie'pa ā ikleē ttē i' wa: “Kal kiē higuera o' kal ulitane, e' bikeitsō. <sup>30</sup> Mik a' isuē tō erpa kal kō shlōrketke, eta ā' wa ijcher tō duas dewatke tsinet. <sup>31</sup> Es nies mik a' tō isuē tō iyi ekkē wamblērke, eta ā' wa ijchenū tō ī blúie Skēkōl tso', e' kēwō dewatke tsinet.

<sup>32</sup> “Mokī ye' tō ā' ā ichē tō iyi ekkē wamblērdaē wépa dōr wēs ā' es esepa kam erwa e' yökī. <sup>33</sup> Kashuk ena kā i' erdawa, erē ye' ttē michoē e' kē erpawa yēs.

<sup>34</sup> “ja' e' kko'nú! Kē ā' e' muktsā ī sulu ulā ā. Kē ā' e' ttōkkā blo' wa. Kē ā' er mukwā ī tso' kā i' ā, e' ē kī. E' kos tō ā' er darē'werawā Skēkōl kī. A' e' kko'nú ās ye' datskene, e' kēwō kē tō ā' klō'ū <sup>35</sup> wēs iyiwak klōr sho' ā es. Kawō e' dōraē sulitane serke kā wañe e'pa kī, e' kuēkī ā' e' kko'nú e' yökī. <sup>36</sup> A' senū wōsh wa. A' ikiō S'yē ā kekraē ās iyi suluē kēwō datse, e' kē dō ā' kī. Nies ikiō ie' ā kekraē ās ā' e' duōser buaē ye' wōrkī mik Ye' dōr S'ditsō Alā, e' datskene sulitane shulōk eta.”

<sup>37</sup> Niwe tā Jesús tō s'wōbla'weke Skēkōl wē ā, nañewe tā ie' miā kabata kiē Olivo e' ā. <sup>38</sup> Bla'mi sulitane mi'ke Skēkōl wē ā Jesús tō s'wōbla'weke e' kīttsōk.

## 22

*Judas ena judiowak kuēblupa tō Jesús aleritsē klō'wēwa*

*(Mateo 26.1-5,14-16; Marcos 14.1-2,10-11; Juan 11.45-53)*

<sup>1</sup> Judiowak Yēpa Yērulune Egipto, e' kēwō tkō'wekerakitō, e' dōkewatke tsinet, ese kēwō ska' tā judiowak wōblar pan kē yöule iwōlōwōkā wa ese ñuk. <sup>2</sup> Sacerdotepa

wōkirpa ena s'wōbla'uk ttē dalōiēno wa wakpa suane pē' yökī, e' kuēkī ie'pa tso' ikēwō yulōk Jesús ttowa.

<sup>3</sup> Eta Satanás tkawā Judas er ā. Judas e' kiē nies Iscariote. Ie' dōr Jesús ttōkatapa dabom eyōk kī bōl e' ekōl. <sup>4</sup> Ie' miā ttōk sacerdotepa wōkirpa tā ena Skēkōl wē shkēkēpa wōkirpa tā. Wēs ie' tō Jesús mētsami ie'pa ulā ā e' chéitō ie'pa ā. <sup>5</sup> E' tō ie'pa tsts'wérak buaē tā ikablé ie' ā inukōl muk. <sup>6</sup> E' dōr buaē ie' ā. E' kuēkī ie' tō kawō yulēmi iwōmottsā mik kē yi ku' tajē Jesús tā e' dalewa.

*Judiowak Yēpa Yērulune Egipto e' kēwō tkō'wē Jesús tō ittōkatapa tā*

*(Mateo 26.17-29; Marcos 14.12-25; Juan 13.21-30)*

<sup>7</sup> Eta Pan Kē Yōule Iwōlōwōkā Wa e' kēwō tsá de. E' diwō ā judiowak tō obeja pupula jcheke Ie'pa Yēpa Yērulune Egipto, e' kēwō tkō'woie. <sup>8</sup> Jesús tō Pedro ena Juan kiē, tā ichē ie'pa ā:

—A' yū kawō tkō'wekesō, e' chké kanēuk.

<sup>9</sup> Ie'pa ie' ā ichakē:

—¿Wé be' kī ikiane tō sa' mi' ikaneuk?

<sup>10</sup> Ie' iitūē:

—Mik ā' de Jerusalén, eta eē wēm kueraē ā' tō ekōl, e' wā di' dami skañña ā. E' itōkī ā' yū dō u wē ā ie' demi ee. <sup>11</sup> U e' wāk ā ichō: 'S'wōbla'ukwak be' chakōk kē: ¿Ushū wē ā ie' tō kawō tkō'wekesō e' chké ñemi ie' ttōkatapa tā?' <sup>12</sup> Ie' tō ā' ā úshū bērie tso' kākke, kaneguletke buaē, e' kkacheraē. Eē ichké kanēu' se' ā.

<sup>13</sup> Eta ie'pa miā tā iyi ulitane kuérakitō wēs ie' tō ichē es. Eē chké kanewérakitō kawō tkō'woie.

<sup>14</sup> Mik ichkōketke e' diwō de, eta ie' e' tkēser chkōk mesa o' mik ittekōlpa tsá e'pa tā. <sup>15-16</sup> Ie' tō ichē ie'pa ā:

—Ye' tō ā' ā ichē tō kawō i' kē tkō'wepaiayō ā' tā dō mik iwā tka mik ī blúie Skēkōl tso' e' kēwō de eta. E' kuēkī suluē ye' éna ikēwō bata tkō'wakīā ā' tā kam ye' ttōwā ie'pa tō e' yökī.

<sup>17</sup> Eta tkā' klō'wéitō, tā wēstela chéitō Skēkōl ā, tā ichéitō ie'pa ā:

—Íkē, ā' itsā yö ekōl ekōl. <sup>18</sup> Ye' ā' ā ichē tō vino kē yepaiayō dō mik ī blúie Skēkōl tso' e' kēwō de eta.

<sup>19</sup> E' ukuōkī tā pan klō'wéitō, tā wēstela chéitō Skēkōl ā tā iblatéitō wā tié ie'pa ā tā ichéitō:

—Pan se' dōr ye' chká wōmeuletsā ttēwā ā' skéie e'. A' tō inū kekraē ās ā' er arne ye' ska'.

<sup>20</sup> Es nies mik ie'pa chké one, eta tkā' klō'wéitō tā ichéitō:

—Vino i' dōr ye' pē. Ye' tterawā e' pē tērdāe ā' tsatkoie. E' wa ttē pa'alj me' Skēkōl tō, e' wā de. <sup>21</sup> Erē yi ye' wōmekettsā, e' tkēr ye' tā mesa i' o' mik. <sup>22</sup> Ye' dōr S'ditsō Alā, e'

ta itkoraë wës isuletëneatbak es, erë iwëstela ina yi ye' wömekettsa, e' ta!

<sup>23</sup> Etä ie'pa ñi chakémitke: "A' ichè, çyi ie' wömekettsa?"

*çYi dör këkëpa tajë Skëköl a?*

<sup>24</sup> Jesús ttökåtapa ñi iütëka tò ie'pa wë êk dör këkëpa tajë imalepa tsata. <sup>25</sup> Jesús tò ichè ie'pa a: "Pë' kè tò Skëköl dalôië, esepa blúpa e' alòka ie'pa kï kekraë, erë ie'pa e' chò tò ie'pa dör imalepa kïmukwakpa buaë. <sup>26</sup> Erë e' kè dör es a' ta. E' skéie yi dör këkëpa tajë imalepa tsata a' shuq, ese kawötä e' ökwa se' ëselaie. Nies a' wökir kawötä e' ökwa wës kanè méso es. <sup>27</sup> E'ma çyi dör këkëpa tajë? çItkër chkök mesa o'mik ese ö wë tso' chké watiök ese? Tò, itkër mesa o'mik ese dör këkëpa tajë. Erë ye' tso' a' shuq wës kanè méso tso' chké watiök es.

<sup>28</sup> "Kos ye' weirke e' a' tso' ye' ta ye' wapie. <sup>29</sup> E' kuëki ye' tò a' tkekeka blu'paie, wës ye' Yë tò ye' tkë'ka blu'ie es. <sup>30</sup> Aishkuö ta ì blúie ye' tso' e' a' e' tulóraser chkök di'yök buaë ye' ta. Nies a' e' tulóraser blu' kulé kï, Israel ditséwöpa dökä dabom eyök kï böi (12), e'pa wëtsuk."

*Pedro tò icheraë tò ie' kè wa Jesús suule (Mateo 26.31-35; Marcos 14.27-31; Juan 13.36-38)*

<sup>31</sup> Nies Skëkëpa Jesús tò iché:  
—A Simón, a Simón, iye' ttò ttsó! Satanás tò a' kèwö kié ma'wë. Ie' tò a' ulitane wöpperaë darërëë wës iyiwö wöppë es. <sup>32</sup> Erë ye' ikiétke Skëköl a' as be' erblö ye' mik e' kè olo'yöbö. Mik be' erbléne buaë ye' mik, etä ye' ttökåtapa malepa kïmú as ie'pa e' tköwä darërëë ye' mik.

<sup>33</sup> Simón tò ie' a' iché:  
—A Skëkëpa, ye' e' chétké wötënuqwä be' ta s'wöto wé a' dö ttëwä be' ta.

<sup>34</sup> Ie' iüté:  
—A Pedro, ye' ichè be' a' tò i'ñe kam dakro ar, e' yökï be' icheraë mañatökicha tò be' kè wa ye' sùule.

*Jesús weirketke e' kèwö dökewatke*

<sup>35</sup> E' ukuökï ta Jesús tò ittökåtapa a' ichaké:  
—Mik ye' tò a' patkë'mi Skëköl ttë pakök inuköl kè ta', chkwö kè ta', klökkuö kè ta', etä çì kianeia a' kï?

Ie'pa tò iüté:  
—Kè ì kianeia sa' kï.  
<sup>36</sup> Ie' tò ichè ie'pa a:

—E' skéie, i'ñe ta, ye' tò a' a' ichè tò a' wë wa inuköl ta', e' tsümi; a' wë wa chkwö ta', e' tsümi; a' wë kè wa tabè ta' e' tsatkoie, etä a' paio wataüttsa ta' e' ské wa tabè taüttsa. <sup>37</sup> Ye' ttë kos tso' kitule Skëköl yëkkuö kï, e' wä tköraë wës itso' kitule es, e' tò ichè: 'Ie'pa tò ye' we'iké wës pë' sulusi we'iké es.\* Ttë e'

wä tköketke i' ta, e' kuëki a' tò iü wës ye' tò a' a' ichè es.

<sup>38</sup> Ie'pa tò ichè ie' a:  
—A Skëkëpa, ië tabè tso' böt. Ie' tò ie'pa iüté:  
—Wë' idir, jkè a' ttökia!

*Jesús ttë S'yë ta Getsemaní (Mateo 26.36-46; Marcos 14.32-42)*

<sup>39</sup> E' ukuökï ta Jesús mia' Olivo kébata a wës iwöblar es, etä ittökåtapa miyal ie' ta. <sup>40</sup> Mik ie'pa demi wë ie'pa mirö ee, etä ie' ichè ie'pa a:

—A' ikiö Skëköl a' as ì sulu tò a' erkiöwëke e' kè e' alòka a' kï.

<sup>41</sup> Ie' mia' banet ie'pa yökï dö kos ak uyëmisö ekké, eë ie' e' tkëser kuchè kï ta ittë S'yë ta i' es: <sup>42</sup> "A yëwö, ì tköraë ye' ta, e' dör wës iyi bacha'bachaë yëwasö es. Be' kï ikiane, e'ma be' ye' yöttsa e' ulä a. Erë kè iwar wës ye' kï ikiane es, iü wës be' kï ikiane es."

<sup>43</sup> [E' wöshä ta Skëköl biyöchökwak de eköl ie' ska' idichè kï iök. <sup>44</sup> Ie' eriane tajë, e' shuq ie' ttëmitke S'yë ta taninië, ta ipaali wër s'pë es e' yërke tajë darke iyök kï.]†

<sup>45</sup> Mik ie' ttë one, etä idene ittökåtapa ska' ta ie'pa kuëitö kapötulur. Ie'pa shtrinewä eriar e' wa, e' kuëki ie'pa kapolur. <sup>46</sup> Ie' tò ie'pa a' ichaké:

—çIök a' kapötulur? A' e' kòka, a' ikiö Skëköl a' as ì sulu tò a' erkiöwëke e' kè e' alòka a' kï.

*Jesús klö'wëwq ibolökpa tò (Mateo 26.47-56; Marcos 14.43-50; Juan 18.2-11)*

<sup>47</sup> Jesús tso'ia' ttök e' dalewa tajë pë' de. Ie' ttökåtapa dabom eyök kï böi, e' eköl kié Judas e' debitu ie'pa wëtsë. Ie' dewä Jesús ska' ishke'uk wöalattsë wa. <sup>48</sup> Erë Jesús tò ie' a' iché:

—A Judas, çwöalattsë wa be' tò ye' dör S'ditsö Alä, e' wömekettsa?

<sup>49</sup> Mik Jesús ttökåtapa tso' ie' ta, e'pa tò isué tò ie' klörkewatke, etä ie'pa tò ie' a' ichaké:

—A Skëkëpa, çtabè yëttsa sa' tò ie'pa kï?

<sup>50</sup> Etä ie'pa eköl tò sacerdote kibi, e' kanè méso eköl kuköña ulä bua'kka tëttsa. <sup>51</sup> Jesús tò iché:

—Imúat; wë' idir.  
Etä ie' tò kanè méso kukuöña kewa ta ibua'wëneitö. <sup>52</sup> E' ukuökï ta sacerdotepa wökirpa ena Skëköl wé shkëkipa wökirpa ena judiowak kuëblupa debitu ie' tsükmi, e'pa a' ie' iché:

—çI kuëki a' bitë ye' ñalé kï tabè kï kal wölö kï ye' klö'ukwä wës akblökwakpa klö'wëwä es? <sup>53</sup> Kekraë ye' bak a' shuq Skëköl wé a, erë a' kè wa ye' klöönewä. Erë i' ta a' a' ikëwö de ye' klö'wöwäie. Nies bë a' ikëwö de ì sulu wamblak ie' éna e' wambloie.

\* 22:37 Isaias 53.12 † 22:44 Ttë i' kè ku' yëkkuö këchke wele kï.

*Pedro tō iblé tō kē ie' wā Jesús suule*

(*Mateo 26.57-58,69-75; Marcos 14.53-54,66-72; Juan 18.12-18,25-27*)

<sup>54</sup> Etā ie'pa tō Jesús klō'wēwā tsēmi sacerdotē kibi, e' u a. Pedro dami ie' itōkī kāmīē. <sup>55</sup> Etā eē pē' wēlepa tō bō' batsēka upa shushāē baiklē, etā Pedro e' tkēsēr ie'pa tā. <sup>56</sup> Etā alakōl ekōl dōr kanē mēso, e' tō Pedro suē bō' kōkō a tā isuēwā krereē tā ichēitō:

—Ñies ie' wī dōr Jesús klé.

<sup>57</sup> Erē Pedro tō iblé. Ie' tō iché:

—A tayē, ye' kē wā wēm e' suule.

<sup>58</sup> E' ukuōkī kukuie tā wēm ekōl tō Pedro suē ñies tā ichēitō:

—Be' ñies dōr Jesús klēpa ekōl.

Erē Pedro tō iūtē:

—A wēm, kē ye' dōr ie'pa ekōl.

<sup>59</sup> E' ukuōkī hora de e' tā iskā tō iché:

—Wēm sē dōr Galilea wak e' kuekī mokī ie' dōr Jesús klé ekōl.

<sup>60</sup> Pedro tō iché:

—A wēm, ì cheke be' ye' a, e' kē jchēr ye' wā.

Pedro ttōkeiā e' wōshā tā dakro āne. <sup>61</sup> Etā Skēkēpa Jesús wōtrée, tā Pedro suēitō ēk. Etā Pedro ēna iānewā tō ttē i' yē' Jesús tō ye' a: "I'ñe kām dakro ar, e' yōkī be' tō icherāē mañatōkicha tō be' kē wā ye' suule." <sup>62</sup> Etā Pedro e' yēttsā kañikā tā iīē siarē.

*Jesús wayué ie'pa tō*

(*Mateo 26.67-68; Marcos 14.65*)

<sup>63</sup> Wēpa ulā a Jesús tso' klōulewā, e'pa tō ie' wayué suluē, ippé tajē. <sup>64</sup> Ñies ie'pa tō iwōbla pamuēwā datsī'tak wa, etā ie'pa tso' ippōk, e' dalewa ie'pa tō ie' a' ichakeke:

—Be' dōr Skēkōl ttekōl, e'ma sa' a' ichōka zyī tō be' ppē?

<sup>65</sup> Etā ie'pa tō ie' skā cheke suluē ttē ulitane wa kuā'kī kuā'kī.

*Jesús mītsēr ie'pa wā judiowak kueblupa wōrkī*

(*Mateo 26.59-66; Marcos 14.55-64; Juan 18.19-24*)

<sup>66</sup> Mik ká ñine, etā judiowak kueblupa ena sacerdotepa wōkirpa ena s'wōbla'uk ttē dalōiēno wa wakpa tō Jesús tsēmi wē judiowak wōkir kibipa ñi dapa'uke ee. Tā ie'pa tō ie' a' ichaké:

<sup>67</sup> —Ichō sa' a' z'mokī be' dōr wē pairine'bitū idi' wa s'blūie e' ō au?

Ie' tō ie'pa iūtē:

—Ye' tō ichēmi tō, erē kē a' tō ye' ttō klō'wēpa. <sup>68</sup> Ñies ye' tō a' a' ilē chakēmi, e' tā a' kē tō ye' iūtēpa. <sup>69</sup> Erē ye' dōr S'ditsō Alā, i' ukuōkī tā ye' e' tkōraser Skēkōl diché dōr iyi ulitane tsatā, e' ulā bua'kka dalōiērtā' tajē.

<sup>70</sup> Ie'pa ulitane tō ie' a' ichaké:

—z'ē'ma be' e' chō tō be' dōr Skēkōl Alā?

Jesús tō ie'pa iūtē:

—Tō, wēs a' tō iché es idir.

<sup>71</sup> Etā ie'pa iché:

—z'ie se' kī ikkatōkwakpa kī kiarmiia? ì ché ie' tō, e' ttsē se' wākpa tō.

## 23

*Jesús mītsēr Pilato wōrkī*

(*Mateo 27.1-2,11-14; Marcos 15.1-5; Juan 18.28-38*)

<sup>1</sup> Etā ie'pa ulitane e' kékā tā Jesús tsēmīrakitō Pilato ska' as ishulōitō. Pilato dōr ká e' wōkir patkē' Roma wōkir kibi tō.

<sup>2</sup> Ie'pa tō Jesús kkatēmi Pilato a' tā ichērakitō:

—Sa' wā ijchēr tō wēm i' tō tajē sa' judiowak mekekā ñippōk s'wōkirpa tā. Ie' iché tō sa' kē kawōtā inukōl patauk Roma wōkir kibi a. Ñies ie' iché tō ie' dōr wē pairine'bitū idi' wa s'blūie e'. Ie' e' chō tō ie' dōr sa' judiowak blū.

<sup>3</sup> Pilato tō ichaké ie' a':

—z'Be' dōr judiowak blū?

Ie' iūtē:

—Tō, wēs be' iché, e'ma es idir.

<sup>4</sup> Etā Pilato tō iché sacerdotepa wōkirpa a' ena pē' tso' ee, e'pa a' ñies:

—Ye' kē wā ì nuī kune wēm i' kī.

<sup>5</sup> Erē ie'pa tō ikī kcateke āneule tā ichē-erakitō:

—Ttē wa ie' tō s'wōbla'wēke, e' tō sa' wakpa mekekā ñippōk ñita. Ie' tō itsā paka'bitū Galilea, i'ñe tā ide iē Judea.

*Pilato tō Jesús patkēmi Herodes ska'*

<sup>6</sup> Mik e' ttsē Pilato tō, etā ichakēitō: z'wēm i' dōr Galilea wak? <sup>7</sup> Mik ie' wā ijchēnewā tō Jesús dōr Galilea wak, etā ie' tō ipatkēmi Herodes ska' as e' tō ishulō, e' dōr Galilea wōkir e' kuekī. E' kēwō ska' tā ie' tso' Jerusalén.

<sup>8</sup> Mik ie' tō Jesús suē, etā e' tō ie' ttsē'wē buaē. Bānet ie' ēna isuak. Ie' wā ittē jchēnewā tō, ì kē or yi a' ese wēkeitō, e' wā paneke ie' tō suē. <sup>9</sup> Ie' tō Jesús chaké tajē, erē Jesús kē wā ie' iūtēne yēs.

<sup>10</sup> Ñies sacerdotepa wōkirpa ena s'wōbla'uk ttē dalōiēno wa wakpa tso' ñak ee. Ie'pa tō Jesús kcateke tajē ie' a.

<sup>11</sup> Ie' ena iñippōkwakpa, e'pa tō Jesús suē suluē, tā ie'pa tō datsī' bua'buā, blu' datsī' sū, ese iēka ikī iwayuoie. E' ukuōkī tā ie' tō ipatkēmine Pilato ska'. <sup>12</sup> Herodes ena Pilato dōr ñi bolōkpa, erē e' diwō shā tā ie'pa er buanene ñi kī.

*Jesús mēttsā ttēwā*

(*Mateo 27.15-26; Marcos 15.6-15; Juan 18.39-19.16*)

<sup>13</sup> Sacerdotepa wōkirpa ena judiowak wōkirpa malepa ena judiowak tajē, e'pa kiēttsā Pilato tō e' dapa'uk ek tsinī ēme. <sup>14</sup> Ie' tō ie'pa a' iché:

—A' wā wēm i' de ye' ska' kkatē. A' tō iché tō ie' tō a' wakpa mekekā ñippōk sa' tā. Erē ye' tō ie' a' ichaké a' wōrkī, etā ì kī a' tō ie' kkatē, e' kē nuī kune ye' wā ie' kī yēs. <sup>15</sup> Ñies

Herodes kë wà ì nuí kune ie' kí, e' kuęki ie' tó ipatkébitune ye' ska'. E' kuęki a' tó isuęé tó ie' kë wà ì sulu nuí kí ittewami ese wambléne. <sup>16-17</sup> Súyó ippók patké tsa'bata daloie wa iwe'ikoie bërëbërë, e' ukuókí tã ye' tó ie' ekemine.\*

<sup>18</sup> Erë ie'pa ulitane anemi ñikkëë:

—jJesús ttówã tã Barrabás ómine sa' a!

<sup>19</sup> Barrabás e' tó iyamípa dapaŋ'ká ñippók ká e' wókirpa tã, ñies ie' wã s'kótulewã. E' kuęki ie' tso' wótëulewã s'wóto wé a. <sup>20</sup> Pilato éna Jesús akmine, e' kuęki ie' tó iskà chéne Jesús tsatkoie. <sup>21</sup> Erë ie'pa kí arkeka tajé:

—jIwótówã krus mik! jIwótówã krus mik!

<sup>22</sup> Pilato tó iskà chéne ie'pa a, i' tã ide mañatókicha:

—jI kuęki? jI sulu wambléitó? Ye' kë wã ì sulu kune ie' wómottsã ttëwã. Súyó ippók patké tsa'bata daloie wa iwe'ikoie, e' ukuókí tã ye' tó ie' ekemine.

<sup>23</sup> Erë ie'pa kí arkeka tajé shute; “jIwótówã krus mik!” Bata ekké tã Pilato tó ie'pa tté iuté. <sup>24</sup> Ie' tó iwé wés ie'pa kí ikiane es. <sup>25</sup> Es wém tso' wótëulewã ñippé s'wókirpa tã kuęki, ñies s'ttëwã kuęki, e' émine Pilato tó. Etã Jesús ttókwã patkéitó wés judiowak kí ikiane es.

*Jesús wótëne krus mik*

(Mateo 27.32-44; Marcos 15.21-32; Juan 10.17-27)

<sup>26</sup> Mik Roma shkëkipa wã Jesús dami, e'pa tó isuęé tó ie' kë kí krus de'kãia, etã ie'pa tó wém ekól kié Simón e' kló'wëwã tã iké krus ppókka tsëmi Jesús itóki. Wém e' dór Cirene wak. Ie' tso' bánet, erpa e' de Jerusalén.

<sup>27</sup> Tajé pé' mirwa Jesús itóki. E'pa shuã alakólpa tso' tajé iðuramirak tajé ie' jëitsók. <sup>28-29</sup> Jesús wótréene ie'pa sauk tã ichéitó:

—A Jerusalén alékólpa, kawó sulué dóraë a' kí, e' kuęki kë a' juk ye' jëitsók. E' skéie a' wákpa e' jëitsó, ñies a' ala'r jëitsó. Aishkuó tã iyërdaë: 'Ayëcha buaë alakólpa qos kë dótã' alãë. Ayëcha buaë alakólpa qos kë alã tã.' <sup>30-31</sup> Ye' dór wés kal pa'ãli es e' weirke i' es, e' tã jì kë wamblërpa a' dór wés kal sí es, e'pa tã? E' kuęki e' kéwó ska' tã iyërdaë kabata a: 'Be' anúka sa' kí as sa' duówã wótëulewã iyók a.'†

<sup>32</sup> Ñies wëpa bõl dór pé' sulusipa e'pa mirwarak iwã Jesús tã wótëwã krus mik. <sup>33</sup> Mik ie'pa demirak kã kié S'wókirliche eë, etã ie'pa tó Jesús wóte krus mik. Ñies wëpa bõl sulusipa wóterakitó, ekól iulã bua'kka, ekól bakli'kka. <sup>34</sup> jJesús tó iché: “A yëwó, ì wambleke ie'pa tó ye' tã, e' kë ane ie'pa éna, e' kuęki e' nuí olo'yó ie'pa kí.”‡

Etã Roma shkëkipa iné ñi ma'woie sué tó wés ie'pa tó Jesús datsi' blatemi ñi a. <sup>35</sup> Pé' iëter Jesús sauk. Dó judiowak wókirpa tso' ie' wayuók sulué, ie'pa tó icheke:

—Mokí ie' dór wé pairine'bitu idi' wa s'blúie shukit Skékól tó e' e'ma as iwák e' tsatko wés o'kapa tsatkéitó es.

<sup>36</sup> Ñies Roma shkëkipa tó ie' wayué. Ie'pa de tsinet ie' ska' tã blo' shkóshkó watké ie'pa tó ie' a. <sup>37</sup> Ie'pa iché:

—jMokí be' dór judiowak blú, e'ma be' wák e' tsatko!

<sup>38</sup> Kaltak kí itso' kitule tó iché: “I' dór judiowak blú e'”, e' batsulewã Jesús tsaka.

<sup>39</sup> Etã wém ekól ar wótëulewã ikrus mik Jesús o'mik, e' tso' ie' chók sulué. Ichéitó ia:

—jMokí be' dór wé pairine'bitu idi' wa s'blúie e', e'ma be' e' tsatko, ñies sa' tsatko!

<sup>40</sup> Erë iëkól tso' wótëulewã ie' o'mik, e' tó iëkól uné tã ichéitó:

—Be' wómenettsã ttëwã wés ie' es, erë wësua be' kë suar tã' Skékól yöki. <sup>41</sup> Mokí se' weirke se' wák kuęki, se' nuí kuęki. Erë ie' kë wã ì sulu wambléne yës.

<sup>42</sup> E' ukuókí tã ie' tó iché Jesús a:

—A Jesús, mik be' detkene s'blúie, etã kë be' éna ye' chókwa.

<sup>43</sup> Ie' tó iüté:

—Mokí ye' tó be' a' iché tó j'ñe be' dörawã kã buaala tso' kã jai a e' a ye' tã.

*Jesús duowa*

(Mateo 27.45-46; Marcos 15.33-41; Juan 19.28-30)

<sup>44</sup> Mik diwó de bata a, etã kã míã ttsetseë kã wa'ne, dó tsáji diwó de mañat ekké.

<sup>45</sup> Diwó kë dalóbuneja, etã Skékól wé a ie'pa wã datsi' buririé ese shukuar u blatoie, e' jchëneane shushaë. <sup>46</sup> Etã Jesús tó iché aneule:

—A yëwó, ye' wikól méat be' ulã a. E' chéitó tã isiwa' bata tké.

<sup>47</sup> Roma ñippókwak ekól dór capitán, mik e' tó isuęé, etã Skékól kíkékaitó tã ichéitó:

—Mokí, wém wí sene' yësyesë.

<sup>48</sup> Pé' daparke tajé isauk, mik e'pa tó isuęé tó wés Jesús blënëwã, etã ie'pa erianekã tajé tã es imiyálnerek iu a. <sup>49</sup> Erë wëpa wã Jesús suule buaë ena alakólpa manetwã ie' tã Galilea, e'pa qos iëter ie' kí sauk erë kamië.

*Jesús nu wótëne*

(Mateo 27.57-61; Marcos 15.42-47; Juan 19.38-42)

<sup>50-51</sup> Wém tso' ekól kié José, e' dór kã kié Arimatea e' wak. Arimatea atë Judea. Ie' dór wém buaë yësyesë. Ñies ì blúie Skékól tso' e' kéwó panuk ie' tso'. Ie' dór judiowak wókirpa e' ekól, erë ie' tó ibikeitsé tó wés imalepa tó Jesús wé e' dór sulué. <sup>52</sup> Ie' míã Pilato ska', etã Jesús nu kiéitó. <sup>53</sup> Ie' tó Jesús nu

\* **23:16-17** Yëkuó këchke wele tó kuótkéka. E' tó iché i' es: Pilato wóblar s'wótëulewã e' ókmi ekól mik judiowak tso' Ie'pa Yëpa Yërulune Egipto e' kéwó tkó'uk etã. † **23:30-31** Oseas 10.8 ‡ **23:34** Ttë tso' iwakyóule i' es...e' shuã, e' kë ku' yëkuó këchke wele kí.

yéttsa krus mik éwa iski tá ipatréwáitō datsi' ukuō bua' bua saruru ese wa. E' ukuōki tá ie' tō Jesús nu bléwa ákuk bine pa'alí s'nu blóie ese a. <sup>54</sup> Ká tuirketke etá enō diwō batseitsekemitke, e' kuēki ie' kawōtá Jesús nu wōtōkwa bet.

<sup>55</sup> Etá alakōlpa manetwá Jesús tá Galilea, e'pa mirwañak isaúk tō wé Jesús nu mekwá. Ie'pa tō isué tō wes ie' nu bléne ákuk a. <sup>56</sup> Mik ie'pa dene u a, etá kiō masmas tso' tē s'nu ki, ese kanewérakitō. Ie'pa tō enō diwō batseisé wes Skékōl ttē dalóieno tō iché es.

## 24

### *Jesús shkēnekane*

(Mateo 28.1-10; Marcos 16.1-8; Juan 20.1-10)

<sup>1</sup> Erē domingo ká ñirketke, etá alakōlpa míane Jesús pō a kiō masmas kanewétke ie'pa tō, e' mí ie'pa wá tē Jesús nu ki. <sup>2</sup> Mik ie'pa de, etá ie'pa tō isué tō ák bérie bastkér pō kkō a, e' rratune bānet. <sup>3</sup> Erē mik ie'pa dewá ákuk a, etá ie'pa tō isué tō Jesús nu kē ku'. <sup>4</sup> Ie'pa tso'ia' ibikeitsōk tō wék Jesús nu mí, e' bet tá ie'pa tō isué tō wēpa bōl de iēter ie'pa o'mik, e'pa datsi' wōñarke dalóioē. <sup>5</sup> E' tō alakōlpa suawéka tajē tá iwō éwarak dō iski. Erē wēpa e'pa tō iché ie'pa a:

—¿Iōk a' tō ie' tso' ttsé'ka, e' yuleke s'nupa shuá? <sup>6</sup> Ie' kē ku' íe, ishkenekane. Í yē'bakitō a' a mik ibak Galilea etá, e' anú a' éna. <sup>7</sup> Ie' tō a' a iyē'bak tō ie' dōr S'ditsō Alá, e' wōmerdatsá pē' sulusipa ulá a tá iwōtērdawá krus mik, e' kī ká de mañat etá ishkerdakane. <sup>8</sup> Etá í yē' Jesús tō, e' anewāne ie'pa éna.

<sup>9-10</sup> Alakōlpa dare Jesús pō a, e'pa kiē María Magdala wak ena Juana ena María dōr Santiago mí. Ñies alakōlpa ská tso'ñak ie'pa tá. Í sué ie'pa tō pō a, e' pakéne Jesús ttekolpa tsá dabom eyōk kī ekōl (11) e'pa a, ñies imalepa a. <sup>11</sup> Erē í paké alakōlpa tō e' kē wá tá ie'pa a, e' kuēki ie'pa kē wá iklóone. <sup>12</sup> Erē Pedro tynemi pō a isaúk. Mik ie'pa tō ie' tō isué ákuk shuá, etá datsi' wa Jesús nu parratēwa, e' é tkēter. Etá ie' biteane u a, e' tō ibikeitsēro tō ¿wék imí?

*Jesús ttōkatapa bōl tō ie' suéne Emaús ñalé kī*

(Marcos 16.12-13)

<sup>13</sup> E' diwō wa Jesús ttōkatapa bōl e' yéttsa Jerusalén michoē ká kiē Emaús ee. E' ñalé dōr kamiē kilómetro dōká dabom eyōk kī et (11), e' ulatōk. <sup>14</sup> Í tka Jesús tá Jerusalén, e' kos pakerami ie'pa tō ñi a. <sup>15</sup> Ie'pa kapakōrami ñita, etá Jesús tō ie'pa kué etá ishkémi ie'pa tá. <sup>16</sup> Ie'pa tō isué, erē ie'pa kē a ikkayēnewá tō yi idir.

<sup>17</sup> Jesús tō ie'pa a ichaké:  
—¿Í pakerami a' tō?

Etá ie'pa e' wōklō'wé iēter. Ie'pa eriarke tajē e' wēnewá iwō kī. <sup>18</sup> Ie'pa ekōl kiē Cleofás, e' tō Jesús iūtē:

—Wēsua se' kos dē'rō Jerusalén kawō tkō'uk e' shuá be' é kē wá ijcher tō í bak ee chki bōki.

<sup>19</sup> Ie' tō ie'pa a ichaké:

—¿Í bak?

Ie'pa iūtē:

—Í bak wēm kiē Jesús dōr Nazaret wak e' tá e'. Ie' dōr Skékōl ttekol buaé, diché tá' tajē Skékōl wōa. Í kē or yi a ese wé ie' tō tajē sulitane wōrki. Ñies s'wōbla'wéitō ttē buaé mokí wa. <sup>20-21</sup> Sa' tō ie' pana' tō isalema Skékōl tō ie' patké' se' dōr Israel aleripa e' tsatkōk. Erē sacerdotepa wōkirpa ena s'wōkirpa malepa, e'pa tō ie' wōméttsa ttēwá wōtēulewá krus mik. E' kīe tá, í kos wamblēne, e' kī ká de mañat etá ¿í panemiá sa' tō? <sup>22</sup> Ñies alakōlpa wēlepa tso' sa' ska', e'pa tō sa' tkiwēwá. Íñe bla'mi ie'pa dare Jesús pō a <sup>23</sup> erē ie' nu kē ku' ee. Ie'pa tō sa' a iché tō Skékōl biyōchōkwakpa de ie'pa ska', tá ichéitō ie'pa a tō Jesús tso'ne ttsé'ka. <sup>24</sup> E' ukuōki tá sa' wakpa wēlepa dare isaúk tá ie'pa tō ikué wes alakōlpa tō iché es, erē ie'pa kē wá Jesús sune.

<sup>25</sup> Etá Jesús tō iché ie'pa a:

—A' kukōña darērē. A' kē wōblar bet. Í kos yē'atbak Skékōl ttekolpa tō e' kē klōne a' wá bet. <sup>26</sup> Skékōl yēkkuō tō iché tō wé pairine'bitū idi' wa s'blúie e' kawōtá weinuk es kam ie' dō sulitane wōkirie olo tá' tajē e' yōki.

<sup>27</sup> Etá ie' wák ttē tso' kitule Skékōl yēkkuō kī, e' kos wa pakémiitō ie'pa a. Kēwe í kit Moisés tō, e' wá pakéitō. E' ukuōki tá í kit Skékōl ttekolpa kos e'pa tō, e' wá pakéitō ie'pa bōl a.

<sup>28</sup> Mik ie'pa demi wé ie'pa mīrō ee, etá iwēr tō Jesús kī mi'keia ñalá kī, <sup>29</sup> erē ie'pa tō ie' kiémi krōrōē kapōkrō ie'pa ska'. Ie'pa tō iché ía:

—Ká tuirketke, e' kuēki be' e' tsuáat sa' ska' kapōkrō.

E' kuēki ie' dewá ie'pa tá weshke. <sup>30</sup> Mik ie'pa e' tuléwá mesa o'mik chkök, etá ie' tō pan klō'wé ulá a tá wéstela chéitō Skékōl a tá íblatéitō méitō ie'pa a. <sup>31</sup> E' wō shá tá ie'pa tō isuéwá tō Jesús idir; erē bet tá ie' kē ku' ía ie'pa tá. <sup>32</sup> Etá ie'pa tō iché ñi a:

—Wēe', mik ie' kapakōratse se' tá ñalá wa, Skékōl yēkkuō wá pakeratséitō, e' tō se' ttsé'wé buaé ichók.

<sup>33</sup> E' wōshá tá ie'pa e' yéttsa míyalne Jerusalén. Mik ie'pa demi ee, etá ie'pa tō Jesús ttōkatapa tsá dōká dabom eyōk kī ekōl (11) ena imalepa, e'pa kué ee ñita. <sup>34</sup> E' a ie'pa iché:

—Mokí Skékēpa Jesús shkēnekane. Ie' e' kkaché Simón a.

<sup>35</sup> Etā wēpa bōl tō ì kōs tka ie'pa tā ñalā wa e' paké imalepa a. Ñies wēs ie'pa tō Jesús suēwā, mik ie' tō pan blaté eta, e' pakéitōrak.

*Jesús e' kkaché ittōkatapa a*

(Mateo 28.16-20; Marcos 16.14-18; Juan 20.19-23)

<sup>36</sup> Ie'pa tso'ia ipakōk, etā Jesús de dur ie'pa shua, e' tō ie'pa shkē'wé ttē i' wa:

—As a' kawō tkō buaē.

<sup>37</sup> Ie'pa tkirulune tō ibikeitsé tō ie'pa tso' s'wimblu sauk. <sup>38</sup> Erē Jesús tō iché ie'pa a:

—ǀ kuēki a' tkirulune? ǀ kuēki a' ibikeitsé bōtbōt? <sup>39</sup> Ye' ulā kī itō saū. Ye' klō kī itō saū. Ye' kō, e' wa a' isuēraē tō ye' kē dōr wimblu. S'wimblu kē chkā tā', kē dichéwō tā', erē a' isué tō ye' chkā tā' ye' dichéwō tā'.

<sup>40</sup> E' chōk ie' tso' ie'pa a, tā ie' tō iulā ena iklō kkaché ie'pa a. <sup>41</sup> Ie'pa iēterīa ttsē'nerak buaē tkirulune tajē, e' kuēki darērē ie'pa a iklōg' tō mokī idir. E' kuēki Jesús tō ie'pa a ichaké:

—ǀ tso' a' wā ñè? <sup>42</sup> Etā ie'pa tō nima катуле bö' a, e' mé ia. <sup>43</sup> Tā ie' tō ikaté ie'pa wōrkī. <sup>44</sup> Etā ie' tō iché ie'pa a:

—ǀ tka ye' tā, e' yē' ye' tō a' a, mik ye' bak a' tā eta. Ye' tō a' a iyē' tō ye' tté kōs kit Moisés ena Skēkōl ttekōlpa tō yēkkuō kī ñies Salmos yēkkuō kī, e' kōs kawōtā wā tkōk.

<sup>45</sup> Etā ie' tō ie'pa er ñi'wé as ì chē Skēkōl yēkkuō tō, e' wā ar ie'pa éna. <sup>46</sup> Tā ichéitō ie'pa a:

—Itso' kitule Skēkōl yēkkuō kī i' es: wé pairine'bitū idi' wa a' blúie e' kawōtā ttēwā, mik e' kī ká de mañat etā ishkerdakane.

<sup>47</sup> Ñies tō iché i' es: Ttē buaē pakardaē ye' ttō wa Jerusalén wakpa a kewe, e' itōkī ipakardaē ká ulitane wakpa a. Ttē buaē e' dōr tō wēpa er mane'wé Skēkōl a, esepa kī ie' tō ì sulu wamblérakitō e' nuí olo'yeraē. <sup>48</sup> Ì kōs tka ye' tā, e' sué a' tō, e' pakōk a' kawōtā sulitane a. <sup>49</sup> Ye' yé kablé' Wikōl Batse'r muk a' a, e' patkeraē ye' tō a' a. Ie' datse ká jai a, e' dōraē a' kī idiché tajē wa, e' panū iē Jerusalén.

*Jesús míane ká jai a*

(Marcos 16.19-20)

<sup>50</sup> E' ukuōkī tā Jesús wā ittōkatapa mítser tsjinet Betania. Eē Jesús ulā kēkā tā ie' er buaē ché ie'pa a. <sup>51</sup> Ie' tso'ia ie'pa a er buaē chōk tā ie' butséka míā ká jai a ie'pa wōrkī. <sup>52</sup> Ie'pa tō ie' dalōié tajē, e' ukuōkī tā ie'pa míane Jerusalén ttsē'nerak buaē. <sup>53</sup> Kēkraē ie'pa tso' Skēkōl kīkōkka iwé a.



## Jesús Tté Buaë Kit Juan tö Juan

Yëkkuö i' kit Juan tö e' dör Jesús ttökatapa dabom eyök kí böl e' eköl. Yëkkuö i' kí Juan tö Jesús ttökata eköl tté cheke (13.23; 19.26; 20.2,21; 7.7, 20, 24). E' kiëitö "Jesús ttökata dalër tajë iëna e'." Ibikeitsësö tö Juan wák tso' e' chök es. Ie' dör Israel aleri. Ie' ena iëñ Santiago e'pa ki' Jesús tö ittökataie. Ie'pa bak kaneblök nima kli'ük. Ie'pa bak senuk batsöri tajë me'r Galilea e' o'mik tsjinet. Iklö'wésö tö yëkkuö i' kit ie' tö Jesús kune' e' kí duas de dabom paryök ena suljyök e' shü ulat (80-90 DC).

Ie'pa tö ibikeitsè tö ie' tö ikit Israel aleripa bak senuk bánet Israel esepa a. Juan 20.31 ee ie' tö se' a ikkachè tö iie ie' tö yëkkuö i' kit. E' tö ichè i' es: yëkkuö i' kitule as a' tö iklö'ü tö Jesús dör Skëköl Alà pairine'bitü idi' wa s'blúie e'. Nies ikitule as sene michoë dö a' ulá a' erblö ie' mik e' wa. Es Juan tö ikit. Yëkkuö i' kí ie' tö se' a ikkachè bua'iewa tö Skëköl dör Jesús Yë.

Mik Juan wötënewa s'wöto wé a dayë nane kië Patmos ee etá ie' dewatke kékëlaie. Mik ie' bak eg, etá Jesús tö ie' ka' yëkkuö kië Apocalipsis e' shtök. Nies ie' tö yëkkuö tsitsirla ská kit döká mañat.

### Skëköl Ttö yöne s'ditsöie

<sup>1</sup> Tsawe tá eköl kië Skëköl Ttö e' tso'tke. Ie' tso' Skëköl tá, nies ie' dör Skëköl. <sup>2</sup> Kenet ie' tso'tke Skëköl tá. <sup>3</sup> Skëköl tö íyí ulitane yö' ie' tá ñita. Kë i ku' ká i' kí, e' kè yöneñak ie' wá. <sup>4</sup> Ie' dör sene michoë e' wák. Ie' dör wes bö'wö es, e' tö se' er ñi'wëke. <sup>5</sup> Bö'wö ñe' tö se' er suluë tso' wes stui a es e' ñi'wemir. Kë i sulu e' aldopaká ikí.

<sup>6</sup> Wëm eköl patkë'bitü Skëköl tö e' kië Juan. <sup>7</sup> E' dë'bitü yi dör bö'wö ñe' ttekölíe itté pakök as sulitane erblö imik Juan tö itté pakeke e' wa. <sup>8</sup> Ie' wák kè dör bö'wö ñe', eré ie' dë'bitü itté pakök.

<sup>9</sup> Yi dör bö'wö ñe' e' dör bö'wö chökke datse ká jai a sulitane er ñi'woie e'. <sup>10</sup> Ká i' kós yö' Skëköl tö ie' tá ñita, eré mik idë'bitü ká i' a, etá ká i' wakpa kè éna íane tö yi dör ie'. <sup>11</sup> Ie' dë'bitü iwák ká a ena iwák ditséwöpa a, eré e'pa kè wa ikinewa. <sup>12</sup> Eré wépa tö ikiéwa tá ierblé imik, esepa a kawö méitö as idórak Skëköl ala'rie. <sup>13</sup> Ie'pa de Skëköl ala'rie, eré e' kè dör wes se' ala'r kurke yé wa mi wa es. Ie'pa de Skëköl ala'rie ie' wák er wa.

<sup>14</sup> Wé kië Skëköl Ttö ñe' yöne s'ditsöie tá isene' sa' shua. Ie' dör Skëköl Alà eköl è e'. Ie' wa Skëköl er buaë chö se' a ena wes Skëköl dör mokí, e' kós kkayëne se' a. E' su' sa' tö. <sup>15</sup> Juan tö ie' tte' paka' tá ichéitö aneule:

"Wëm i' yë'yö a' a' mik ye' iché tö wëm eköl daia ye' ukuökí s'pattök ye' skéie, e' tso'tke ká íaiaë ye' yöki, e' kuekí ie' dör buaë ichökke ye' tsata."

<sup>16-18</sup> Skëköl tté dalöiëno e' mène Moisés wa. Eré kós Skëköl er buaë chö se' a ena wes ie' dör mokí e' jchenewa sa' wá Jesucristo wa. Kë yi wá Skëköl suule iwöbla wa, eré ilá eköl è tkérie iyé tá, e' dör nies Skëköl, e' tö iyé kkaché se' a. E' kuekí ie' dör er buaë chökwa. Ie' er buaë kí ché se' a tajë shüte.

*Juan dör S'wöskuökwa e' tö Jesucristo tté paké*

(Mateo 3.11-12; Marcos 1.7-8; Lucas 3.15-17)

<sup>19</sup> Judiowak wökirpa tö sacerdotepa ena Levi aleripa, e'pa welepa patké Juan ska' ichakök: "¿Yi dör be'? ¿Be' dör wé pairine'bitü idi' wa s'blúie e'?" <sup>20</sup> Juan kè wa iblène. Ie' tö ie'pa iüté yësyësé:

—Ye' kè dör wé pairine'bitü idi' wa s'blúie e'.

<sup>21</sup> Ie'pa tö iskà chaké:

—E'ma ¿be' dör yi? ¿Be' dör Skëköl tteköl bak kië Elías e'?

Juan tö ie'pa iüté:

—Au, ye' kè dör ie'.

Ie'pa tö iskà chaké:

—¿Be' dör Skëköl tö iyé'at tö itteköl ská datse e'?

Etá Juan tö iüté:

—Au, ye' kè dör ie'.

<sup>22</sup> Etá ie'pa tö iskà chaké ía:

—E'ma, ¿be' dör yi? Sa' kí ikiane jchenewa yësyësé chéne yi tö sa' patké e'pa a. E' kuekí ichó sa' a tö ¿yi dör be'?

<sup>23</sup> Juan tö ie'pa iüté:

—Ye' dör wé ye' Skëköl tteköl Isaías tö e'. Ie' tö iyé': "Ká sir poé wé kè yi serku' ee yile ttóraé aneule, e' tö icheraé: A' er mane'ü Skëköl datse e' yöki. E' dör wes ñalá yuèsö yësyësé ie' yöki es.\*"

<sup>24</sup> Etá wépa patké fariseowakpa tö ttök Juan tá, <sup>25</sup> e'pa tö ie' a iskà chaké:

—Be' kè dör wé pairine'bitü idi' wa s'blúie e', be' kè dör Elias, be' kè dör Skëköl tteköl ñe', e'ma ¿i kuekí be' tö s'wöskueke?

<sup>26</sup> Ie' tö iüté:

—Ye' s'wöskueke di' a, eré eköl dur a' shua kè ijcher a' wá tö yi idir, <sup>27</sup> e' dóraé ye' ukuökí kaneblök ye' skéie. Ie' dör kéké tajë ye' tsata, e' kuekí ie' klökkuö kicha è kè wötsënanuk ye' siarla e' a.

<sup>28</sup> E' kós tka Betania. Ká e' atë di' kië Jordán e' wishët. Eé Juan tso' s'wöskuök.

*Jesús dör Skëköl obeja jchéne e'.*

<sup>29</sup> Bule es tá Juan tö Jesús sué tö idatse ie' ska' tá ichéitö: "Isa'ü. Wí idatse e' dör Skëköl obeja pupula patkébitü jché i sulu

\* 1:23 Isaías 40.3

wambeleke sulitane tō e' nu' olo'yoie e'.<sup>30</sup> Ie' wɨ paka' ye' tō a' a' mik ye' tō iyē': 'Ekōl doia ye' ukuōki, e' tso'tke ká iaiāē ye' yōki, e' kuēki ie' dōr buaē ichōkle ye' tsata.'<sup>31</sup> Ye' wák kē wā ijcher bua'iewā tō yi dōr ie', erē ye' tō s'wōskueke as Israel aleripa wā ijcherwā tō yi dōr ie'."

<sup>32</sup> Nies Juan tō iché: "Ye' isué tō Wikōl Batse'r datse ká jai a nubōlie, e' atē ie' a.<sup>33</sup> E' yōki ye' kē wā ijcher tō yi idir, erē Skékōl tō ye' patkē' s'wōskuōk di' a, e' tō ye' a iyē': 'Yi kɨ Wikōl batse'r de atē ie' a, e' dōr wé tō a' iekewā Wikōl Batse'r a e' wák.'<sup>34</sup> E' sué ye' tō, e' kuēki ye' tō iché a' a tō ie' dōr Skékōl Alā ichōkle."

### *Jesús ttōkatapa tsá*

<sup>35</sup> Bule es tã Juan durne eē tã ie' tã ittōkatapa de bōl.<sup>36</sup> Mik Juan tō isué tō Jesús damiā e' wa, etã ie' tō iché ie'pa a:

—Wēm wɨ dōr Skékōl obeja pupula patkébitu' jchē se' skéie e'!

<sup>37</sup> I ché Juan tō, e' t̄sē Juan ttōkatapa bōl tō, etã e'pa míyal Jesús itōki.<sup>38</sup> Jesús e' wōtréene tã isué tō idatserak ie' itōki tã ichakéitō:

—¿I kiane a' kɨ?

Ie'pa tō iūtē:

—A Rabí (judioie ttē e' wā kiane chē s'wōbla'ukwak), ¿wé be' serke?

<sup>39</sup> Etã ie' tō ie'pa iūtē:

—A' shkō isaŋk.

Etã ie'pa míyal ie' tã, tã wé ie' serke, e' sué ie'pa tō. Mik ie'pa miā ie' tã etã diwō detke tkēl. Ie'pa e' tséat ie' ska' dō katuirketke ekkē.

<sup>40</sup> Ittōkatapa bōl tō Juan ttō t̄sē' tã imineyal Jesús itōki, e' ekōl kiē Andrés, e' dōr Simón Pedro ēl.<sup>41</sup> E' ukuōki bet tã Andrés tō iēl Simón e' kué tã ichéitō iā:

—Wé pairine'bitu' idi' wa s'blúie, e' kué sa' tō. ("Wé pairine'bitu' idi' wa s'blúie" e' kiē judioie "Mesías" ena griegoie ikiē "Cristo".)

<sup>42</sup> E' ukuōki tã Andrés wā Simón m̄tser wé Jesús tso' eē. Mik Jesús tō Simón sué, etã ie' tō iché iā:

—Be' dōr Simón, Juan alā, erē be' kirdaē Cefas (griegoie s'kiē Pedro, e' wā kiane chē ák.)

*Felipe ena Natanael e'pa kié Jesús tō ittōkatapaie*

<sup>43</sup> Bule es tã Jesús tō ibikeitsé tō "ye' mi'keā Galilea." Kam ie' mi' e' yōki tã ie' tō Felipe kué tã ichéitō iā:

—Be' shkō ye' tã ye' ttōkataie.

<sup>44</sup> Felipe dōr ká kiē Betsaida e' wak. Andrés ena Pedro e'pa serke nies Betsaida.<sup>45</sup> Felipe tō Natanael kué tã ichéitō iā:

—Wé pairine'bitu' idi' wa s'blúie kit Moisés ena Skékōl ttekolpa tō yēkuō kɨ, e' wák kué sa' tō. Ie' dōr Jesús, José serke Nazaret, e' alā.

<sup>46</sup> Natanael tō iché:

—¿I buaē dōtt̄sami Nazaret?

Felipe tō iché iā:

—Be' shkō sa' tã, tã iwā saŋ.

<sup>47</sup> Mik Jesús tō isué tō Natanael datse tã ichéitō:

—Wēm wɨ e' je' dōr Israel aleri bua'ie. Ie' kē kachōtã.

<sup>48</sup> Natanael tō ie' a' ichaké:

—¿I be' a' ichōk tō ye' dōr es?

Ie' tō iūtē:

—Ye' kē ku' dur ee, erē kam Felipe tō be' kiō, e' yōki ye' tō be' su' higuera klō dikjã.

<sup>49</sup> Natanael tō iché ie' a:

—A S'wōbla'ukwak, ¡Be' dōr Skékōl Alā ichōk! ¡Be' dōr Israel aleripa blú ichōk!

<sup>50</sup> Jesús tō ie' iūtē:

—Ye' be' a' iché tō "ye' be' su' higuera klō dikjã," ¿e' ē kuēki be' erblé ye' mik? Erē e' tsata be' tō ikɨ sueraia.

<sup>51</sup> Nies ie' tō iché:

—Mokɨ ye' tō a' a' iché tō ká jai sueraē a' tō áie tã a' isueraē tō ye' dōr S'ditsō Alā e' dōr wēs klōkata† e' shkokaie ká jai a, e' kɨ Skékōl biyōchōkwakpa shkōke wō'k wa'k.

## 2

### *Ulabatsé kéwō tkō'weke Caná*

<sup>1</sup> Böiki es tã ulabatsé Caná atē Galilea ee, ee Jesús mi' tso'.<sup>2</sup> Nies Jesús ena ittōkatapa kiule, e'pa de ulabatsé e' kéwō tkō'uk.<sup>3</sup> Mik ie'pa vino enewa, etã Jesús mi' tō iché ie' a:

—Vino enewa.

<sup>4</sup> Jesús tō ie' a' iché:

—¿Iōk be' tō e' ché ye' a? Kam ye' kéwō dō iwā kkachioie tō yi dōr ye'.

<sup>5</sup> Etã imi' tō iché íyi watiōkwakpa a:

—¿I kos chekeitō a' a, e' ú a' tō es.

<sup>6</sup> Eē skaŋ tso' terōl (6) judiowak e' batse'ukerak Skékōl a, e' dí dapa'woie. Skaŋ ek ē a' di' chokã galon dōkã dabom böyōk (20) ō dabom mañayōk (30) ekkē.<sup>7</sup> Jesús tō iché watiōkwakpa a:

—Skaŋ ikkēpa wā iōkã chiē di' wa.

Tã watiōkwakpa tō iwā iékarak es.<sup>8</sup> Etã Jesús tō iché iarak:

—I' tã itsã yōtt̄sa elkela tã itsúmi ikéwō tkō'uk wōkir a pattse.

Es ie'pa tō iwé.<sup>9</sup> Etã iwōkir tō di' yöne vinoie e' pattse. Ie' kē wā ijcher tō wé vino e' datse (erē watiōkwakpa tō di' yétt̄sa, e'pa ē wā ijcher tō wé idatse.) E' kuēki ie' tō wēm ulabatske, e' kié<sup>10</sup> tã ichéitō iā:

—Sulitane wōblane vino bua'iewā, ese watiōk kéwe. Mik s'kiulepa tō iyé tajiē, etã vino ēse watieke. Erē be' tō vino bua'ie blé, ikkē erpa be' tō iwatieke.

<sup>11</sup> I' wé Jesús tō Caná atē Galilea ee, e' dōr i' kē or yi a ese tsá o' ie' tō. E' wa ie' tō ilo tajiē, e' kkaché ie'pa a, tã ittōkatapa erblé ie' mik.

† 1:51 Génesis 28.11 saŋ.

<sup>12</sup> E' ukuöki tä ie' mia imi tä, ielpa tä, ñies ittökatapa tä, kä kië Cafarnaüm ee. Eë ie'pa e' tséat kä böt kä mañat ekkë alë.

*Jesús tò Skëköl wé batse'wé*

*(Mateo 21.12-13; Marcos 11.15-18; Lucas 19.45-46)*

<sup>13</sup> Judiowak Yépa Yërulune Egipto e' kéwö tkö'wë dökewatke tsinet, e' kueki Jesús mia Jerusalén kawö e' tkö'uk. <sup>14</sup> Mik ie' de Skëköl wé pamik, etä ie' tö obeja ena bakala pupula ena nuböl ese wataukwakpa kué. Ñies inuköl mane'ukwakpa\* kuéitö tulurdak imesa o'mik. <sup>15</sup> Tä ie' tö tsa' tréwa, e' wa ie' tö iyi wataukwakpa kos tré'wéyal iobeja ibakala tso' kos e' tä. Ñies inuköl mane'ukwakpa inuköl tuléttsaitö tä imesa trélurka. <sup>16</sup> Ie' tö iché nuböl wataukwakpa a:

—Íyi i' yölor seraa! ¡kë ye' Yë u klö'warwa a' iyi watuöie!

<sup>17</sup> E' ukuöki tä ittökatapa éna ianewa tö Skëköl yëkkuö tö iché: “Be' u dalër tajë ye' éna, e' tsätkeraë ye' tö dö ye' duöwa ekkë.”

<sup>18</sup> Judiowak wökirpa tö ichaké Jesús a:

—Í kë or yi a ç'e' wése wëmi be' tö sa' a iwä kkachöie tö be' wä kawö tä' iyi ikkë wöie?

<sup>19</sup> Ie' tö iüté:

—U i' tkéttsa' a' tö, e' tä böiki es tä ye' tö iyuékane.

<sup>20</sup> Ie'pa tö iché ia:

—U i' kané döer duas dabom tkëyök kí teröl (46), etä ç'wes iyuékami be' tö kä mañatk é?

<sup>21</sup> Erë u cheke ie' tö, e' döer iwák e' chöke.

<sup>22</sup> E' kueki mik ie' shkënekane, etä ittökatapa éna ianewa tö ie' tö iyé' es. E' kueki ie'pa tö Skëköl yëkkuö ena i yé' Jesús tö e' klö'wë.

*Jesús wä sulitane er suule buaë*

<sup>23</sup> Mik Jesús tso' Jerusalén Judiowak Yépa Yërulune Egipto e' kéwö tkö'uk, etä i' kë or yi a ese weke ie' tö tajë. E' kueki tajë pë' erblé ie' mik. <sup>24</sup> Erë ie' wä ie'pa er suule buaë, e' kueki kë ie' erblëne ie'pa er mik. <sup>25</sup> Ie' wák wä ijcher buaë wës sulitane er döer. E' kueki kë yi a i' yënuök ie' a tö wës se' er döer.

**3**

*Jesús ena Nicodemo tté ñita*

<sup>1</sup> Wëm tso' eköl kië Nicodemo, e' döer judiowak wökirpa eköl. Ie' döer fariseowak. <sup>2</sup> Kä et nañewe ie' de Jesús ska' tä ichéitö ia:

—A S'wöbla'ukwak, i kë or yi a ese weke be' tö. Skëköl kë kúpa be' tä, e' ma kë be' a' onuk. E' kueki sa' wä ijcher tö ie' tö be' patké' sa' wöbla'uk.

<sup>3</sup> Jesús tö iché ia:

—Mokj ye' be' a ichè tö yi kë skä kunene etökichane, ese kë döpawä i blúie Skëköl tso' e' a.

<sup>4</sup> Nicodemo tö ie' a ichaké:

—Mik s'de këchke, etä ç'wes s'kürmine etökichane? Ç'wes s'mi' miwane s'mi shua, e' kürmi etökichane?

<sup>5</sup> Jesús tö iüté:

—Mokj ye' be' a ichè tö yi kë kune di' wa ena Skëköl Wiköl wa, ese kë döpawä i blúie Skëköl tso' e' a. <sup>6</sup> S'kune s'mi wa s'yé wa ese ser wës s'ditsö ser es, erë yi kune Skëköl Wiköl wa, ese ser wës Skëköl ser es. <sup>7</sup> Ye' tö be' a ichè tö be' kawötä kunukne etökichane. Ç'wes e' tö be' tkiwëmi? <sup>8</sup> Í wakaneweke Skëköl Wiköl tö se' a, e' döer wës siwa' bitsjirke kä wa' ñe es. E' blar ttsésö, erë wé idatse ena wé imirö e' kë jcher s'wa. Es itköe sulitane kune Skëköl Wiköl wa e'pa tä. Se' wä ijcher tö ie'pa kunene Skëköl Wiköl wa, erë kë se' wä ijcher wës iwä tköke.

<sup>9</sup> Nicodemo tö iskä chaké:

—Ç'e' ma ima iwä döer?

<sup>10</sup> Etä Jesús tö iüté:

Be' döer s'wöbla'ukwak dalöiërtä' tajë Israel aleripa shua ese, erë ç'wes be' kë wa iyi ikkë jcher? <sup>11</sup> Mokj ye' tö be' a ichè tö i jcher sa' wa, e' cheke sa' tö a' a, ñies i sué sa' tö, e' pakeke sa' tö, erë a' kë éna sa' ttö klö'wak yës. <sup>12</sup> Iyi tso' kä i' kí, ese wa ye' tö ikleeke a' a, erë e' kë klö'wë a' tö. Ye' mü tö ipaké iyi tso' kä jai a ese wa kë kleaule, e' ma ç'wes e' klö'wëmi a' tö?

<sup>13</sup> “Kë yi mine'ka kä jai a ese dene kä i' a. Erë ye' döer S'ditsö Alä, e' datse kä jai a, e' kueki iyi tso' ee' e' jcher seraa ye' wä buaë.

<sup>14</sup> Mik Israel aleripa bak kä wé kë yi serku, ese ké a, etä Moisés tö tabechna yué tkabë diökölie,\* e' batséwaitö kalka mik tä itkéka. Es ñies, ye' döer S'ditsö Alä, e' kawötä tkéka kal mik <sup>15</sup> as wépa erblé ye' mik, esepa ulä dö sene michöe e' ska'.” Es Jesús tö iché Nicodemo a.

*Skëköl éna sulitane dalër*

<sup>16</sup> Skëköl éna kä ulitane wakpa dalër tajë. E' kueki ie' alä eköl ë, e' me'ttsaitö ttéwa se' skéie, as yi erblé imik esepa kë duöwa aishkuö ta, e' skéie sene michöe dö iulä a. <sup>17</sup> Skëköl kë wä ilä patkëne kä i' a se' kichatökta. E' skéie ipatké'itö se' tsätkök.

<sup>18</sup> “Yi erblé Skëköl Alä mik, ese kë kichatëne. Erë yi kë erblëne imik, ese kë erblëne Skëköl Alä eköl ë e' mik, e' kueki ikichatënettsätke. <sup>19</sup> Skëköl Alä dë'bitü kä i' a, e' döer wës bö'wö es se' er ñi'wöie. Erë s'tso' i' sulu wamlök, esepa döer wës s'tso'

\* **2:14** inuköl mane'ukwakpa: Inuköl tso' Skëköl wé a, e' döer kuä'ki, kë döer inuköl tso' judiowak wä iyi tuöie bánet ese. E' kueki yi tö iyi tuöke ee, ese kawötä ie'pa inuköl mane'uk inuköl ñe'se wa. \* **3:14** Moisés tö tabechna yué tkabë diökölie: Israel aleripa ukyëne Skëköl kí ena Moisés kí. E' nuñie Skëköl tö tkabë patké' ie'pa ttökulur. Erë Skëköl tö iyé' Moisés a tö tabechna yué tkabë diökölie tä ibatsöwa kalka mik as wépa duökewatke esepa isaü tä ibuarne. Números 21.4-9 saü.

stui a es, e' wa ie'pa wöbatsö bua'ie. Ie'pa kë ki ie' kiane. E' kueki wépa kë erblène ie' mik, esepa kichatënetke. <sup>20</sup> Wépa tö i sulu wambleke, esepa éna suluë Skéköl Alà ar. Ie'pa kë ki Skéköl Alà ttè kiane ttsé as i sulu wamblekerakitö, ese wà kë kkeyërwa. E' dör wës s'tso' stui a kë shkakwä bö'wö olo ska' es. <sup>21</sup> Erë wépa serke wës Skéköl ttè mokj tö iché es, esepa ki Skéköl Alà kiar buaë. Ie'pa dewa buaë Skéköl Alà dör wës bö'wö es e' ska' iwä kkachöie tö i wëke ie'pa tö, e' wëkerakitö Skéköl batamik."

*Juan S'wöskuökwaq tö iché tö Jesús dör ie' tsatä*

<sup>22</sup> E' ukuöki tä Jesús míä Judea ittökäpata tä. Eë ie' e' tséat kä tajë ie'pa tä s'wöskuök. <sup>23</sup> Nies Juan tso' s'wöskuök kä kië Enón eë, eë di' tso' tajë e' kueki. Kä e' atë tsjinet Salim. Pë' döke ie' ska' tä ie' tö ie'pa wöskueke. <sup>24</sup> (Iyi ikké kaneone kam ie' wöterwä s'wöto wé a, e' yöki.)

<sup>25</sup> Erë ie' ttökäpata wëlepa ñi iütémi judiowak eköl tä, ie'pa e' bats'e'uke di' wa, e' tté ki. <sup>26</sup> E' kueki ie'pa míyal Juan ska' tä ichéitö iä:

—A S'wöbla'ukwak, wëm dë' be' ska' Jordán di' wishet yë' be' tö, e' wák tso' s'wöskuök tä sulitane mi'ke ie' tä. ¿E' kë tö be' tsiriwë?

<sup>27</sup> Juan tö iüté:

—Au, e' kë tö ye' tsiriwë. Skéköl kë wä se' a ikéwö mène, e' tä kë se' a i onuk yës. <sup>28</sup> Ye' tö iyë' tö 'ye' kë dör wë pairine'bitü idi' wa s'blúie e', erë ye' patkëne'bitü ie' yöki keweie,' e' ttsé' a' wákpa tö buaë. <sup>29</sup> Mik ulabatske, etä alaköl dör iwëm icha. Etä iwëm sini' tso' eë, ese tö wëm ttö ttsé, etä e' tö ie' ttsé'wë buaë. Ye' dör wës wëm sini' es. E' kueki ye' ttsé'ne buaë i'ñe tö sulitane mi'ke Jesús tä. <sup>30</sup> Ie' kawötä kíkëkä tajë ye' tsatä, e' skéie ye' ké e' wöökwa diöshet.

*Jesús datse kä jai a*

<sup>31</sup> Yi datse kä jai a, e' dör sulitane tsatä. Wépa tso' kä i' ki, esepa dör kä i' wakpa, i tso' kä i' ki, ese ë cheke ie'pa tö. Erë yi datse kä jai a e' dör sulitane tsatä. <sup>32</sup> I suule ie' wä éna i ttséule ie' wä kä jai a ese pakekeitö, erë pé' kibiiépa kë wä ie' tté klóone. <sup>33-34</sup> Yi patkë'bitü Skéköl tö e' a Skéköl Wiköl mène tajë shütë, e' kueki ie' tö Skéköl ttö pakekene. E' kueki wépa tö ie' tté kló'wë, e' wa esepa tso' ichök tö Skéköl tté dör mokjé. <sup>35</sup> S'yé éna ilä dalër tajë, e' kueki iyi ulitane méatitö iulä a. <sup>36</sup> Wé erblé Skéköl Alà mik, ese ser michöë. Erë wë kë tö Skéköl Alà ttö iüté, ese kë ulä döpa sene michöë ska'. E' skéie Skéköl kësik me'rie ikj.

#### 4

*Jesús tté alaköl eköl tä Samaria*

<sup>1-3</sup> Fariseowakpa tö ittsé tö Jesús klépa kí iërke éna s'wösurkerak tajë Juan tö s'wöskué e' tsatä. (Erë Jesús wák kë wä s'wösune, ittökäpata tö s'wöskué.) Mik i cheke ie'pa tö e' ttsé Jesús tö, etä ie' e' yéttä Judea míáne Galilea.

<sup>4</sup> Erë ie' ittsé tö ie' kawötä shkótkö Samaria. <sup>5</sup> Ie' éna ittökäpata de kä atë Samaria kië Sicar eë. Eë tsjinet kä me' Jacob tö ilä José a, e' atë. <sup>6</sup> Di' bi' Jacob tö kä iaiä e' tso' eë. Eë Jesús demi tä ishtrinewä. Ie' e' tkésér di' biule e' kkómik etä diwö döketke bata a. <sup>7-8</sup> Jesús ttökäpata míyal Sicar chkwé täuk ñë. E' dalewa alaköl eköl dör Samaria wak, e' debitü di' tsuk tä Jesús tö iché iä:

—A tayë, be' we'ikéyö, di' kaktü ña yë.

<sup>9</sup> Ie' tkinewä tä iütéitö:

—Be' dör judiowak, ye' dör Samaria wak. ¿Wes be' tö ye' a di' kieké? (Judiowak éna Samaria wakpa kë wö dör ñi mik, kë dötä'wä ñi ska', e' kueki alaköl tö iüté es.)

<sup>10</sup> Jesús tö iüté:

—I meke Skéköl tö se' a éme éna yi dör ye', e' jchenúpa be' wä, e'ma be' tö ye' a di' kieraë tä di' tö sene meke siä ese meraëyö be' a.

<sup>11</sup> Alaköl e' tö Jesús a iché:

—A këképa, be' kë wä tkä' ku' di' i' yottsä, ñies di' i' tso' iskië. ¿Wé be' tö di' e' kuëmi më ye' a? <sup>12</sup> ¿Ima be' tö ibikeitsé? Se' yé bak dör Jacob, e' tö di' i' me'at sa' a. Di' i' ya' ie' wák tö éna ilär' tö ñies iyyiwak. ¿Be' tö ibikeitsé tö be' dör ie' tsatä?

<sup>13</sup> Jesús tö ie' iüté:

—Wépa tö di' i' yé esepa er sirdane. <sup>14</sup> Erë wépa tö di' meke ye' tö e' yé, esepa kë er sirpaiane yës. Di' e' dör ie'pa er a wës di' tskirke wötüwö tajë es, e' tö sene michöë meraë ie'pa a.

<sup>15</sup> Etä alaköl tö iché iä:

—A këképa, di' e' mú ye' a as kë ye' er siria, ñies as kë ye' döia di' watsuk ië.

<sup>16</sup> Jesús tö iché iä:

—Be' yú, be' wëm kiök tä be' kiéne.

<sup>17</sup> Etä alaköl tö iüté:

—Ye' kë wëm tä'.

Jesús tö iché iä:

—Buaë be' iché tö kë be' wëm tä'. <sup>18</sup> Be' ulabatsule skëtökicha tä i'ñe tä be' wä itso', e' kë tä' be' ulabatsule. I ché be' tö, e' dör mokj.

<sup>19</sup> Etä alaköl tö iché ie' a:

—A këképa, ye' tö isüé tö wësua be' dör Skéköl tteklö. <sup>20</sup> Sa' dör Samaria wakpa, e' këképa bak kä iaiä, e'pa tö Skéköl dalöie e' wakané' kabata i' ki. Erë a' judiowak tö icheke tö s'kawötä e' kanéuk Jerusalén ë.

<sup>21</sup> Etä Jesús tö iüté:

—A tayë, ye' ttö kló'ú. Kawö döraë tä Skéköl dalöie e' wakanéqraë kä wa'ñe, kë dör kabata i' ë ki ö Jerusalén ë a. <sup>22</sup> A' tö Skéköl dalöieke, erë e' kë jcher a' wä

buaë. Erë s'tsätkër tté e' datse sa' dör judiowak ditsewó wa, e' kueq̄i sa' wá ie' jcher buaë. <sup>23</sup> S'yé dalöiökwakpa chök̄le, esepa tö ie' dalöieraë mok̄ië iWikól wa. E' k̄ewó dökette, mok̄i idetke i' ta. <sup>24</sup> Skökól dör wikól, k̄é wërta'wá, e' kueq̄i wépa tö ie' dalöieke esepa ké idalöiök mok̄ië wës ie' k̄i kiane es iWikól wa.

<sup>25</sup> Etá alakól tö iché:  
 –Ye' wá ijcher tö wé pairine'bitü idi' wa s'blúie e' datse (e' kië "Cristo" griegoie ena "Mesías" hebreoie). Mik ie' de etá ie' tö iyi ulitane wá pakeraë se' a.

<sup>26</sup> Jesús tö ie' a iché:  
 –E'ma e' dör ye' tso' ttök be' ta' e'.  
<sup>27</sup> E' wóshá ta ittökatapa debitune. E'pa tö Jesús sué kapakök alakól ta, e' tö ie'pa tkiwéwá tajé. Erë k̄é yi k̄esik dé'ka ichakök ie' a tö "¿i kiane be' k̄i?" ö "¿iök be' tso' kapakök alakól se' ta?" <sup>28</sup> Etá alakól tö iskau méat tkr̄e eē ta imiáne wé iu tso'rak eē, ta ichéitö e' wakpa a:

<sup>29</sup> –Mishka wëm dur ekól e' sauk. Ì sulu k̄os wamblë'yö, e' chéitö ye' a s̄eraa. ¿Ie' alé dör wé pairine'bitü idi' wa s'blúie e'?

<sup>30</sup> Etá ká e' wakpa biteyal Jesús weblök.  
<sup>31</sup> E' dalewa Jesús ttökatapa tö iché iá:

–A S'wóbla'ukwak, be' chkó.  
<sup>32</sup> Erë Jesús tö ie'pa a iché:  
 –Ye' wá chké tso', e' k̄é s̄ule a' wá.  
<sup>33</sup> Ie'pa ñi chakérak:  
 –¿Yile wá chké debitü ie' a ñè?  
<sup>34</sup> Erë Jesús tö ie'pa a iché:

–Ye' chké dör, yi tö ye' patkè', e' ttö iütök ena kanè me'itö ye' a, e' eukwa s̄eraa. <sup>35</sup> A' wá tté tso' e' tö iché: 'Kawó kianeia si' tkél etá iyiwó tso'tke shtè'; erë ye' tö a' a iché tö pé' datse tajé e'pa webló. Ie'pa dör wës iyiwó alinetke tso'tke wë'iàë ténuk es. Ie'pa tso'tke erblök ye' mik. <sup>36</sup> Wépa tö ie'pa kimeke erblök ye' mik, esepa dör wës iyiwó shtökwakpa es, e' ské dóraë ie'pa ulá a. Ñies wépa shteke ie'pa tö, esepa ulá a sene michoë dóraë. Es wépa dör wës iyi kuatkókwakpa es ena wépa dör wës iyiwó shtökwakpa es, esepa t̄sè'rdäë buaë ñita. <sup>37</sup> Pè' tö icheke: 'wele tö ikuatkeke, ská tö iwóshteke.' Ttè e' dör mok̄i. <sup>38</sup> Ye' tö a' patkè'mi iyiwó shtök wé a' k̄é wá ikuatkéule eē. Eē o'ka kanèblè', erë iwá de buaë a' ulá a.

<sup>39</sup> Alakól e' tö ipaké Samaria wakpa a: "Ì sulu k̄os wamblë'yö, e' chéitö ye' a s̄eraa." E' kueq̄i Samaria wakpa tajé s̄erke ká e' a, e'pa erblé Jesús mik. <sup>40</sup> Etá mik Samaria wakpa de Jesús ska', etá ie'pa kkóché ie' a ta ichérakitö iá:

–Be' e' tsúat sa' ta.

Ie' e' tséat ie'pa ta ká böt. <sup>41</sup> Ie' kapakóke ie'pa ta, e' kueq̄i ie'pa k̄i dapane tajé erblök ie' mik. <sup>42</sup> Etá ichérakitö alakól a:

–Sa' erblé ie' mik e' k̄é dör be' tö sa' a iché, e' è kueq̄i. I'ñe ta' sa' wápa tö ittö t̄sè, e' kueq̄i sa' tö ikló'wé tö mok̄i ie' dör sulitane tsätkókwak.

*Jesús tö blu' kanè kueblu ekól e' alá bua'wéne*

(Mateo 8.5-13; Lucas 7.1-10)

<sup>43</sup> Böiki es ta Jesús e' yéttsá Samaria e' michone Galilea. <sup>44</sup> Ie' tö iyé': Skökól ttekol k̄é dalöiërta' iwák ká k̄i. <sup>45</sup> Mik ie' demi Galilea etá ká e' wakpa tö ikiéwá er bua' wa. Mik ie'pa dè'rö Jerusalén Judiowak Yépa Yêrulune Egipto e' k̄éwó tkó'uk, etá ì k̄os buaë o' Jesús tö, e' su' ie'pa tö. E' kueq̄i ie'pa tö ikiéwá er bua' wa.

<sup>46</sup> Jesús dene Caná at̄e Galilea wé ie' tö di' yó' vinoie eē. Ká e' blú kanè kueblu ekól tso' Cafarnaúm, e' alá kirinewá tajé. <sup>47</sup> Mik ie' wá ijchenewá tö Jesús tso' Judea, e' dene Galilea, etá ie' míá Jesús ska' ta ikkóché iá:

–Mishka Cafarnaúm ye' alá duökewatke e' bua'ukne.

<sup>48</sup> Ie' tö iüté:

–Wësua ì k̄é or yi a ese k̄é one ye' wá a' a iwá kkachoie tö yi dör ye', e' ta k̄é a' erblöpa ye' mik.

<sup>49</sup> Erë blu' kanè kueblu tö iché iá:  
 –A k̄ékèpa, mishka bet kam ye' alá duówa e' dalewa.

<sup>50</sup> Jesús tö iché iá:

–Be' yúne be' u a. Be' alá s̄erdaia.  
 Ie' tö Jesús ttö kló'wé mok̄ië ta ie' miáne iu a. <sup>51</sup> Kam idómine u a, etá ikanè mésopa tö ikué ñala k̄i ta ie'pa tö ie' a iché:

–Be' alá buanene.  
<sup>52</sup> Ie' tö ie'pa a ichaké:  
 –¿Diwó wekkè ye' alá buanémine?

Ie'pa tö iüté:  
 –Chki diwó bata rrat̄e ekké.

<sup>53</sup> Iyé éna iáne tö diwó ekké Jesús tö iyé' ie' a tö be' alá s̄erdaia. E' kueq̄i ie' ena iyamipa k̄os e'pa erblé imik.

<sup>54</sup> Jesús tso' Galilea, i' ta, ì k̄é or yi a ese wéitö bötókicha eē.

**5**

*Jesús tö wëm kraulewá bua'wéne*

<sup>1</sup> E' ukuök̄i ta judiowak tso' kawó tkó'uk Jerusalén, eē Jesús míá. <sup>2</sup> Jerusalén di'dape kuoie me'r ukkó kië Obeja Ukkó e' o'mik ts̄inet. Di'dape e' kië hebreoie Betsata, e' kkómik úla tso' skél. <sup>3-4</sup> Úla ekké a tajé s'kirirke esepa tso'. E'pa welepa k̄é wóbla wawër, welepa k̄é shko, welepa kraulewá.

\* 5:3-4 Ttè i' k̄é ku' Juan yékkuó k̄éche kibipa e' k̄i. E' tö iché i' es: Mikle ta mikle ta Skökól biyóchókwak ekól e' ókewa di' wótiuk. Di' wótiurke etá yi míwa di' a k̄ewe, e' buanene. K̄é itkine tö dué wése tö ie' tteke. E' kueq̄i s'kirirke tso' ipanuk tö as di' wótiur.

Ie'pa tso' ipanuk tö as di' wötir.\*<sup>5</sup> Ie'pa shua wëm tär eköl kraulewa. Ie' kirinemi e' kī duas de dabom mañayök kī päköl (38).<sup>6</sup> Jesús tö isuë tär ee. Ie' wä ijchenewa tö kä iaiäë ikirinemi. Eta' ie' tö wëm kraulewa e' ä ichaké:

—¿Be' kī ikiane tö be' buarne?

<sup>7</sup> Eta' ikirirke tö ie' iuté:

—A këkëpa, kë yi ku' ye' kī muk e' iowa di' ä mik iwötirke eta. Bitökicha ye' e' iakwa, eta yile e' iéwatke ye' yöki këwe.

<sup>8</sup> Jesús tö ie' ä iché:

—Be' e' kōka, be' ka'la kōka tä be' shkōmi.

<sup>9</sup> E' bet tä wëm buanene ika'la këkaitö tä ishkémi ekka. Erë e' diwö dör judiowak eno diwö. <sup>10</sup> E' kuekī judiowak wōkirpa tö iché wëm buanene e' ä:

—I'ne dör eno diwö, e' kuekī be' kë ä kawö tä' ka' se tsukmi i'ne.

<sup>11</sup> Ie' tö ie'pa iuté:

—Yi tö ye' bua'wéne, e' tö ye' ä iché: 'Be' ka' shtōka tä be' shkōmi.'

<sup>12</sup> Eta' ie'pa tö ie' ä ichaké:

—¿Yi tö be' ä iché tö 'be' ka' shtōka tä be' shkōmi'?

<sup>13</sup> Jesús miä pé' tso' tajë e' shua, kë wëneia, e' kuekī wëm buanene e' kë wä ijcher yi tö ie' bua'wéne. <sup>14</sup> E' ukuökī tä Jesús tö ie' kuë Skëköl wé ä tä ichéitö ia:

—Ye' ttö tssö. Be' buanene, e' kuekī i sulu kë wambliariä dö' i sulu kī döbitune be' kī.

<sup>15</sup> Eta' wëm e' miä judiowak wōkirpa ska' tä ichéitö, 'Jesús tö ye' bua'wéne.'<sup>16</sup> Jesús tö i kë or yi ä ese wé eno diwö ä, e' kuekī judiowak wōkirpa tö ie' suémitke suluë. <sup>17</sup> Erë ie' tö iché ie'pa ä:

—Ye' yé kanablöke këkraë, es ñies ye' kanablöke.

<sup>18</sup> Tté e' tö judiowak wōkirpa kī uluwéka, éna ie' ttakwa éme. Ie'pa kë ulune ie' kī, ie' tö eno diwö dalöséwéwa, e' ë kuekī. Erë ie' ichéke tö Skëköl dör ie' yé, es ie' e' chö tö ñies ie' dör Skëköl, e' tö ie'pa kī uluwé tajë ie' kī.

*Skëköl tö ilä ä diché tajë mé*

<sup>19</sup> Jesús tö iché ie'pa ä: "Mokī ye' tö ä ä iché tö ye' dör Skëköl Alä, e' kë ä i onuk ye' wäk er wa. I kos weke ye' Yé tö, e' sué ye' tö, e' ë weke ye' tö. I weke ye' Yé tö, e' kos weke ye' tö. <sup>20</sup> S'yé éna ye' dör ie' Alä e' dalër tajë, e' kuekī i kos wekeitö, e' kkachekeitö ye' ä. Ñies ilë kī kkacheraëitö tajë ye' ä, e' tö ä tkiwerawä tajë. <sup>21</sup> S'yé tö s'duulewa e' shkewëta'kane tä sene mekenetö ie'pa ä. E' sué ye' dör ie' Alä, e' tö sene meke wépa ä ye' kī ikiane më esepa ä. <sup>22</sup> Ñies S'yé kë tö yi shuletä' ichoie tö yi kichatërdaë ö yi ser michoë, e' këwö méitö ye' ä as ye' tö s'shulö. <sup>23</sup> Ie' tö iwé es as sulitane tö ye' dalöiö wës ie'pa tö ie' dalöieke es. Wépa kë wä ye' dalöiëne, ñies esepa kë wä S'yé tö ye' patkë'bitü e' dalöiëne.

<sup>24</sup> "Mokī ye' tö ä ä iché tö wépa tö ye' tté iuteke ena ierblökerak yi tö ye' patkë'bitü, e' mik, esepa ulä ä sene michoë detke. Ie'pa kë kichatërpattsä. Ie'pa kë ku'ia wës s'duulewa es, ie'pa ulä detke sene chökle ska'.<sup>25-26</sup> Ye' Yé dör sene mukwak ñies ye' dör sene mukwak, e' këwö me' ie' tö ye' ä e' kuekī. Wépa kë wä sene michoë ku', esepa dör wës s'duulewa es Skëköl ä. Kawö döraë tä ie'pa tö ye' dör Skëköl Alä e' ttö tseraë. Wépa tö ye' ttö tssä tä iklö'wéitö mokī, esepa ser michoë. Mokī ye' tö ä ä iché tö e' këwö datse, ñies e' de i' tä. <sup>27</sup> Ñies ye' dör S'ditsö Alä, e' kuekī ie' tö kawö mé ye' ä sulitane shuloie. <sup>28-29</sup> Kawö datse aishkuö tä, tä s'duulewa kos tö ye' ttö tseraë tä ie' yöratsarak pö ä. Wépa tö i buaë o', esepa shkerdakane sene michoë ä. Erë wépa tö i sulu wamblië, esepa shkerdakane kichatënoie. Tté e' kë tö ä tkiukwa.

*Wës se' wä ijcher tö Jesús tté dör mokïë*

<sup>30</sup> "Kë ye' ä i onuk ye' wäk er wa. Ye' kë kī i kiane wé ye' wäk er wa. E' skéie i kiane wé Skëköl tö ye' patkë'bitü, e' kī, ese wekeyö. E' kuekī ye' tö s'shuleke wës ye' Yé tö ye' ä ichéke es. E' kuekī ye' tö s'shuleke yësyësë. <sup>31</sup> Ye' wäk e' chöpa tö ye' ttö dör mokī, e'ma e' kë wä tä'. <sup>32</sup> Erë itso' eköl e' tö ye' tté cheke, e' dör Skëköl. Ye' wä ijcher tö ima ie' tö ye' tté cheke, e' wä tä'. <sup>33</sup> Ä' tö ye' chakök patkë' Juan ä tä ie' tö ye' tté yé, e' dör mokïë ñies. <sup>34</sup> Erë s'ditsö tö ye' tté cheke, e' kë ska' ye' tkine. Erë i yé' Juan tö, e' chéyo ä ä as ä tsatkër e' ë kuekī. <sup>35</sup> Ä' ä Juan dör wës bö'wö wönarke olo burke es. Kuaë ä' tö ie' tté klö'wé buaë tssë'ne bua' wa, erë ekuölö ë. <sup>36</sup> Erë i skä tso', e' tö ye' tté cheke buaë, i yé' Juan tö, e' tsatä. E' dör, i kë or yi ä ese wekeyö tajë wës ye' Yé tö ye' patkë' iuk es. E' tö sulitane ä ikkacheke tö mokī ye' Yé tö ye' patkë'bitü. <sup>37</sup> Ñies ye' Yé tö ye' patkë'bitü, e' tö ye' tté cheke, erë ä kë wä ie' ttö tsséule, ñies ä' kë wä ie' s'uule. <sup>38</sup> Ie' tö ye' patkë'bitü, erë ä kë erblëne ye' mik. E' kuekī ä' kë tö ye' tté klö'wëta' mokī ä' er ä. <sup>39</sup> Ä' tö ibikeitseke tö Skëköl yëkküö tö ichëmi tö wës sene michoë dömi ä ulä ä, e' kuekī ä' tö isuegëwa bua'iewa. Erë yëkküö e' tö ye' tté cheke. <sup>40</sup> Erë ä' kë erblak ye' mik as sene michoë dö ä ulä ä.

<sup>41</sup> "S'ditsö tö ye' kükëka, e' kë ska' ye' tkine. <sup>42</sup> Erë ye' wä ä s'uule buaë tö wës ä' dör. Ye' wä ijcher tö kë ä éna Skëköl dalër. <sup>43</sup> Ye' dé'bitü ye' Yé ttö wa, erë kë ä' wä ye' kinewa. Erë o'ka bitüpa iwäk ttö wa, e'ma e' kiéwa ä' tö buaë. <sup>44</sup> Ä' wakpa ñi kükökeka, e' wa ä' wöbatsö bua'ie. Erë ä' kë kī ikiane tö Skëköl eköl ë, e' tö ä' küköka, e' tä çwë e' erblömi ye' mik? <sup>45-46</sup> Moisés tö ye' té kitat yëkküö kī, e' kuekī mokī ä' tö ie' tté klö'wé, e'ma ñies ä' tö ye' tté klö'wëmi. E' kuekī kë ä' ibikeitsök tö ye' tö ä' kkatëmi ye' Yé ä. I kit Moisés tö kä

iaiaë e' mik a' erblöke, e' je' tö a' kkateraë.  
 47 Erë i kitbak ie' tö, e' kë klöne a' wä, e'ma  
 ¿wes i cheke ye' tö, e' klö'wëmi a' tö?"

## 6

*Pë' döka mil skeyök e'pa tié Jesús tö*

(Mateo 14.13-21; Marcos 6.30-44; Lucas 9.10-17)

<sup>1</sup> E' ukuöki tã Jesús miã batsöri kië Galilea e' wishet. Batsöri e' kië ñies Tiberias. <sup>2</sup> Ì kë or yi a' ese weke ie' tö tajë. Ie' tö s'kirirke esepa bua'wëne, e' suë pë' tö, e' kueki tajë pë' mir ie' itöki. <sup>3</sup> Ie' miã ittökatapa tã kabata a tã eë ie' e' tkëser ie'pa tã. <sup>4</sup> Judiowak Yëpa Yërulune Egipto e' këwö dökewatke tsinet tkö'wë. <sup>5</sup> Mik ie' tö isuë tö pë' de tajë ie' itöki, etã ichéitö Felipe a:

—¿Wëse' mi'mi iyi taük pë' kos ikkëpa a ñè?

<sup>6</sup> E' chéitö Felipe a isuöie tö jma Felipe tö ie' iütëmi. Erë ie' wák wä ijcher buaë tö i wëmi ie' tö.

<sup>7</sup> Felipe tö iütë:

—S'kaneblömi dö ká cien böyök, erë e' ské kë döw wë' iyi tuöie më ie'pa a elke elke.

<sup>8</sup> Ittökata eköl kië Andrés döw Simón Pedro ël, e' tö iché ia:

<sup>9</sup> —Íë duladula tso' eköl, e' wä pan yöule cebada wa tso' skel ena nima böto; erë e' kë döpakã s'tso' tajë e' kï.

<sup>10</sup> Jesús tö iütë:

—Ichö ie'pa ulitane a tö a' e' tulüser jski.

(Ká e' a tajë ta'tsi tso'.) Etã pë' ulitane e' tulëser. Eë wëpa ë döka mil skeyök (5.000).

<sup>11</sup> Jesús tö pan klö'wë tã wëstela chéitö Skëköl a. E' ukuöki tã iblatéitö méitö ittökatapa a as iwatiörakitö. Ñies iwéitö nima ta es. Etã ie'pa tö iñë kos ie'pa kï ikiane ekkë. <sup>12</sup> Mik ie'pa chké de wë' etã Jesús tö iché ittökatapa a:

—Ibata atë e' shtö as kë iweirwa.

<sup>13</sup> Etã ittökatapa tö pan yöule cebada wa döka skel, e' bata atë, e' shté iëne döka kköla dabom eyök kï bök (12). <sup>14</sup> Mik pë' isuë tö, ì kë or yi a' ese wë Jesús tö, etã ie'pa iché:

—Mokj wëm wj döw Skëköl tteköl cheke kã iaiaë tö idatse e'.

<sup>15</sup> Erë Jesús wä ijchenewa tö ie'pa wa ie' mi'ketser diché wa tkëkã blu'ie, e' kueki ie' miãne kabata a e' tsuukat ekörla.

*Jesús shkë di' kï*

(Mateo 14.22-27; Marcos 6.45-52)

<sup>16</sup> Mik kã tuirketke, etã Jesús ttökatapa biteyalne dö batsöri a. <sup>17</sup> Jesús ichétke ie'pa a tö kë ye' panar. Kã tsenewatke etã Jesús kam döne, e' kueki ie'pa e' iëkarak kanò a tã imichorak batsöri wishet dö Cafarnaüm. <sup>18</sup> E' wöshã tã siwa' bitsineka tajë, e' tö di' uyeke tajë. <sup>19</sup> Mik ishkerak dö kilometro skel ö teröl e' ulatök, etã ie'pa isuë tö Jesús shköratsë ie'pa kker di' kï. E' tö ie'pa suawë.

<sup>20</sup> Ie' iché ie'pa a:

—¡Kë a' suanuk! Ye' idir.

<sup>21</sup> Ie'pa ttsë'ne buaë ie' ikiökwa kanò a, e' wöshã tã idemirak wë imi'kerak eë.

*Pë' tö Jesús yuleke*

<sup>22</sup> Bule es ta, pë' atë batsöri wishet, e'pa wä ijchenewa tö Jesús ttökatapa mineyal kanò ar eë etö ë, e' kï, erë Jesús kë mineã ittökatapa tã. <sup>23</sup> Etã kanò skã datse tseë Tiberias, e' irine tsjnetkla wë ie'pa pan ña' mik Jesús wëstela yë' Skëköl a pan kï etã eë. <sup>24</sup> Mik pë' isuë tö ie' ena ittökatapa kë ku'ia, etã ie'pa e' iëkã kanò demi tajë ese kï tã imiãl Cafarnaüm iyulök.

*Jesús döw shkë tö sene michoë meke e'*

<sup>25</sup> Mik pë' demi batsöri wishet, etã ie'pa tö Jesús kuë tã ie' a ichakërakitö:

—A S'wöbla'ukwak, ¿mik be' dë'bitü ië?

<sup>26</sup> Ie' iütë:

—Mokj ye' tö a' a' iché tö a' kë ku' ye' yulök, ì kë or yi a' ese wëyo, e' wä ane a' éna e' kueki. A' tö chké ña' tajë, e' ë kueki a' tso' ye' yulök. <sup>27</sup> Kë a' kaneblök chké ertã'wa ese skéie. A' kaneblök chké kë ertã'wa tö sene michoë meke a' a, ese skéie. Chké e' meraë ye' döw S'ditsö Alá e' tö, ye' Yë döw Skëköl e' tö ikéwö me' ye' a' e' kueki.

<sup>28</sup> Ie'pa tö ie' a' ichakë:

—¿Ì wëmi sa' tö as ì kiane Skëköl kï ese ù sa' tö?

<sup>29</sup> Ie' tö iütë:

—Skëköl tö ye' patkë' e' kï ikiane tö a' erblö ye' mik. E' ë kiane ie' kï.

<sup>30</sup> Ie'pa tö iché ie' a:

—Ì kë or yi a' ¿e' wëse wëmi be' tö as sa' tö isaü tã sa' erblö be' mik? ¿Ì wëmi be' tö? <sup>31</sup> Se' yëpa bak kã iaiaë e'pa tö ì kië maná e' ña' kã sir poë wë kë yi serku' eë. E' tso' kitule Skëköl yëkküwö kï wë iché: 'Moisés tö ie'pa dë' chké datse kã jai a' e' wa.'

<sup>32</sup> Jesús tö ie'pa iütë:

—Mokj ye' tö a' a' iché tö Moisés kë wä chké datse kã jai a' e' mène a' yëpa bak e'pa a. Ye' yë tö chké e' me' ie'pa a. Erë chké chökle datse kã jai a' e' watkeke ie' tö a' a. <sup>33</sup> Chké chökle meke Skëköl tö, e' döw yi datse eköl kã jai a' tö sene michoë mëmi sulitane a' e'.

<sup>34</sup> Ie'pa tö Jesús a' iché:

—A këkëpa, chké e' mú sa' a' këkraë.

<sup>35</sup> Ie' tö ie'pa a' iché:

—Ye' döw chké tö sene michoë meke e'. Yi bitüke ye' ska' ena ierblöke ye' mik, ese kë tepaia bli tö, ñies ese kë ersirpaia. <sup>36</sup> Erë e' döw wës ye' tö a' a' ichétke tö erë a' wä ye' syule a' wöbla wa, erë a' kë erblöku' ye' mik. <sup>37</sup> Wëpa me' ye' Yë tö ye' a, esepa kos bituraë ye' ska' tã wëpa bitüke ye' ska', esepa kë watepattsayö. <sup>38</sup> Ye' datse kã jai a, e' kë dë'bitü ì kiane ye' wák kï e' uk. Ye' dë'bitü ì kiane yi tö ye' patkë' e' kï e' uk. <sup>39</sup> Yi tö ye' patkë', e' kï ikiane tö wëpa kos me'itö ye' a, esepa kë wëne we'iköyö. E' kueki ie'pa kë watepattsayö. E' skéie ie' kï ikiane tö

ie'pa kos shkë'wëkaneyö aishkuö tã mik kã i' enewa e' këwö ska'. <sup>40</sup> Ye' Yë kï ikiane tö wëpa tö ye' suë ena erblë ye' mik, esepa kos ser michoë kekraë. Ie'pa shkë'wëkaneyö aishkuö tã mik kã i' enewa e' këwö ska'.

<sup>41</sup> Jesú tö ichétkë: "Ye' dör chké datse kã jai a e'." E' kuekï ie'pa ukyënemi ie' kï suluë.

<sup>42</sup> Ie'pa tö iché:

—¿I' kë dör Jesús dör José alá e'? Iyë ena imi sule se' wã buaë. ¿Wes ie' tö ichëmi tö ie' datse kã jai a'?

<sup>43</sup> Ie' tö ie'pa iütë:

—Kë a' ukyënkia ye' tã. <sup>44</sup> Kë yi bitúpa ye' ska', ye' Yë tö ye' patkë', e' kë wã idë' e'ma. Wëpa bitë ye' Yë wã, e'pa shkë'wëkaneyö mik kã i' erkewatke etã. <sup>45</sup> Skëköl yëkkuö kitule ittekölpa wã e' tö ichë: 'Skëköl tö ie'pa kos wöbla'weraë'. Es wëpa tö ye' Yë ttö ttsetã', ñies e' wöblautã' ie' wa, esepa kos biturãe ye' ska'.

<sup>46</sup> "Kë yi wã Skëköl sule. Erë ye' dë'bitu ie' ska', e' kuekï ye' ë wã ie' suule. <sup>47</sup> Mokï ye' tö ichë a' a tö wëpa erblë ye' mik, esepa ser michoë kekraë. <sup>48</sup> Ye' dör chké tö sene michoë meke e'. <sup>49</sup> A' yëpa bak kã iaiãe, e'pa tö chké kië maná e' ña' kã wë kë yi serku' ese ska', erë ie'pa durulune. <sup>50</sup> Erë chké datse kã jai a, e' cheke ye' tö a' a. Wëpa tö chké e' ñë, e'pa kë duöpawã. <sup>51</sup> Erë chké tö sene michoë meke datse kã jai a, e' dör ye'. Wëpa tö chké e' ñë, e'pa ser michoë. Chké meraëyö ie'pa a, e' dör ye' wák chká, e' merattsayö ttëwã as kã ulitane wakpa isiepa erblë ye' mik, esepa ser michoë."

<sup>52</sup> Etã ie'pa ñi iütëmi:

—¿Wes ie' tö ichkã mëmi se' a katë?

<sup>53</sup> Ie' tö ie'pa iütë:

—Mokï ye' tö a' a ichë tö a' kë tö ye' dör S'ditsö Alá, e' chká katë, e' pë yë, e' tã sene michoë kë döpa a' ulã a. <sup>54-55</sup> Ye' chká e' dör chké chökle, ye' pë, e' dör di'yë chökle. E' kuekï wëpa tö ye' chká katë, ye' pë yë, esepa ulã a sene michoë detke. Aishkuö tã mik kã i' erkewatke, etã ie'pa shkë'wëkaneyö. <sup>56</sup> Wëpa tö ye' chká katë, ye' pë yë, esepa bätse buaë ye' mik. Ñies ye' bätse buaë ie'pa mik. <sup>57</sup> Ye' yë tö ye' patkë' e' serke iwák mik. Ie' mik ye' serke. Es ñies ye'pa tö ye' chká katë esepa serke ye' mik. <sup>58</sup> Chké dë'bitu kã jai a, e' chök ye' tso' a' a. Chké e' kë dör wes chké kië maná ña' a' yëpa bak kã iaiãe e'pa tö e' es. Ie'pa tö ña' erë ie'pa durulune. Erë wëpa tö chké cheke ye' tö a' a' ñë, esepa ser michoë.

<sup>59</sup> Ttë e' wa Jesús tö ie'pa wöbla'wë judiowak ñi dapa'wö wë tso' Cafarnaúm e' a.

*Jesús ttë batamik se' ser michoë*

<sup>60</sup> Pë' shköke tajë Jesús tã, e'pa tö ttë ñe' ttsé tã ichërakitö:

—Ttë e' dör darërë. ¿Yi tö iklö'wëmi?

<sup>61</sup> Ima ie'pa tso' ichök e' suëwaitö. E' kuekï ie' tö ie'pa a ichakë:

—¿Ttë e' kuekï a' éna ye' wataktasã? <sup>62</sup> Ye' dör S'ditsö Alá, e' mikane kã jai a wë ye' datse ee, e' mú suë a' tö, e' ma e' je' tã ¿a' erblömi ye' mik? <sup>63</sup> Wiköl Bats'e'r tö sene michoë meke sia. Ì wëke s'ditsö tö, ese kë dör iie bua'. Ttë wa a' pattekeyö e' wã datse Wiköl Bats'e'r wa. Ttë e' klö'wë a' tö, e' tã a' ser michoë. <sup>64</sup> Erë a' wëlepa kë erblökü' ye' mik.

Wëpa kë erblökü' ie' mik ena yi tö ie' mekettsã e' jchertke ie' wã kewë, e' kuekï ie' tö ichë es. <sup>65</sup> Ie' tö ikï chë:

—E' kuekï ye' tö a' a ichë tö kë yi bitúpa ye' ska', ye' Yë kë wã imëne e' tã.

<sup>66</sup> E' ukuökï tã tajë pë' shköke Jesús tã, e' kibiiepa tö iméat, kë shköia' ie' tã. <sup>67</sup> Etã Jesús tö ittökatapa dabom eyök kï bö (12), e'pa a ichakë:

—¿A' shkakmi ñies ye' yöki?

<sup>68</sup> Etã Simón Pedro tö iütë:

—A Skëkëpa, ¿yi tã sa' mi'mi? Be' ttë ë wa sa' ser michoë. <sup>69</sup> Sa' erblétkë be' mik. Sa' wã ijcher mokïë tö be' dör yi dör bats'e'r patkë'bitu Skëköl tö e'.

<sup>70</sup> Jesús tö ie'pa iütë:

—A' dabom eyök kï bö (12), e' shükit ye' tö, erë a' eköl dör bë icha.

<sup>71</sup> Mik Jesús tö e' chë etã Judas chéitö. E' dör Simón Iscariote e' alá. Ie' dör Jesús ttökatapa dabom eyök kï bö (12) e' eköl erë ie' tö Jesús wömekettsã.

## 7

*Jesús ëlpa kë erblëne ie' mik*

<sup>1</sup> E' ukuökï tã Jesús shköke Galilea. Judiowak wökirpa éna ie' ttakwa, e' kuekï ie' kë shkak Judea. <sup>2</sup> Erë judiowak tö kawö tkö'wëke kiekerakitö Úla Këwö, e' këwö tkö'wëkerakitö Judea, e' dewatke tsjinet. <sup>3</sup> E' kuekï Jesús ëlpa tö ie' a iché:

—Kë be' e' tsukat ië. Be' yú Judea as i kë or yi a ese wëke be' tö, e' wã saü be' ttökatapa serke ee e'pa tö. <sup>4</sup> Yi kï ikiane tö s'malepa tö ikikëkã tajë, ese tö iýi kos wë sulitane wörki. Mokï i kë or yi a ese ormi be' a, e' tã iú sulitane wörki.

<sup>5</sup> Jesús ëlpa kë erblëne ie' mik, e' kuekï ie'pa tö iwayü es. <sup>6</sup> Ie' tö iché ie'pa a:

—Kam ye' këwö döka, erë a' kawö kos ese dör buaë. <sup>7</sup> Wëpa kë tö Skëköl dalöie esepa kë a' a' sunuk suluë. Erë ye' tso' ie'pa a ichök tö i wambleke ie'pa tö, ese dör suluë. E' kuekï ie'pa éna ye' ar suluë. <sup>8</sup> A' yúshka Úla këwö tkö'wëkerakitö e' a. Ye' këwö kam döka, e' kuekï kam ye' mi'.

<sup>9</sup> E' chéitö tã ie' e' tsëat Galilea.

*Jesús miã Jerusalén Úla këwö tkö'uk*

<sup>10</sup> Jesús ëlpa miyal, e' ukuökï tã ñies ie' miã. Erë ie' miã bërë, kë e' kkeyüle. <sup>11</sup> Këwö



tkò'weke, e' shuà judiowak wòkirpa tso' ie' yulòk. Ie'pa tò ichaké:

—¿Wé'ie' tso'?

12 Pé' dapané tajé ee, e'pa tò Jesús cheke ñi a bër ñi kukuò a. Welepa tso' ichök: "Jesús dör buaé." Eré welepa tso' ichök: "Ie' kè dör buaé. Ie' tò se' k'jeteke."

13 Eré ie'pa suane judiowak wòkirpa yöki, e' kueki ie'pa kè ttökü' darèrè.

14 Mik ikéwö tkò'wekerakitö, e' döketke shabòs, età Jesús dewà Skèköl wé a ta ie' tò s'wòbla'wémi. 15 Età judiowak wòkirpa tkirulune iweblök ik'ittsòk ta ichèrakitö:

—Ie' kè yöule ¿wes e' wà ttè jcher tajé?

16 Jesús tò iüté:

—Ttè wa a' wòbla'weke ye' tò, e' kè dör ye' wák ttè, e' dör Skèköl tò ye' patké' e' ttè. 17 Yi e' chéteke ì kiane Skèköl k'j e' wà uk, ese wà ijcherdaé tò ttè wa s'wòbla'wekyö, e' dör Skèköl ttè. Ie' kè tò ibikeitsepa tò e' dör ye' wák ttè è. 18 Yi ttòke iwák er wa, ese k'j ikiane tò pé' tò ie' k'jèkà. Eré wé k'j ikiane tò yi tò ipatké' e' k'jarkà, ese ttò mok'j kè kachòta'.

19 "Sulitane wa ijcher tò Moisés tò Skèköl ttè dalòieno e' meát se' a. Eré a' ulitane kè tò iwà dalòie. ¿I kueki a' k'j ye' kiane ttèwà?"

20 Età pé' tso' tajé ee, e'pa tò iüté:

—Be' a' aknama tso'. ¿Yi éna be' ttakwà?

21 Ie' tò ie'pa a' iché:

—Ì kè or yi a' ese wé ye' tò etòkicha eno diwò a, e' tò a' ulitane tkiwéwa. 22 Moisés tò ttè dalòieno me'at a' a' tò a' ala'r wépa kos wakyuö itòttola kkuòlitla tte tsir e' wa ká de ik'j pàköl (8) età. (Ñermata se' wà ijcher tò ttè e' kè mène Moisés wà, imène a' yépa bak ká iaiáè Moisés yöki e'pa a.) Ñies Skèköl yèkkuò tò iché tò kè a' kawò ta' kaneblök eno diwò a. Eré mik ká de ala'r'la k'j pàköl, e' ane eno diwò a, età a' tò a' ala'r'la wakyueta' eno diwò a. 23 A' a' kawò ta' alala wakyuök eno diwò a Moisés ttè dalòioie, e' ta' ¿wes a' ulirmi ye' k'j, ye' tò wém eköl bua'wéne wa'ñe eno diwò a' e' k'j? 24 Kè s'kkatar is iwèr e' è wa. E' skéie itò yulò yèsyèsè.

*Jesús dör wé pairine'bitü idi' wa s'blúie e'*

25 Jerusalén wakpa welepa tò ichaké:

—¿Wém wí kè yuleku' s'wòkirpa tò ttèwà?

26 Isaú, w'j idur ttök sulitane wòrk'j età ie'pa kè tò ì ché ie' a' yès. ¿A' iché, s'wòkirpa tò iklö'wé tò mok'j ie' dör wé pairine'bitü idi' wa s'blúie e'? 27 Eré se' wà ijcher buaé tò wé ie' datse. E' skéie mik wé pairine'bitü idi' wa s'blúie e' datse, età kè yi wà ijcherpa tò wé idatse.

28 Jesús tso' s'wòbla'uk Skèköl wé a. Mik e' tò ttè e' ttsé, età ichéitö aneule:

—A' ibikeitseke tò a' wà ye' s'jule buaé. A' ibikeitseke tò a' wà ijcher buaé tò wé ye' datse. Eré ye' kè dè'bitü ye' wák er wa. Yi tò ye' patké'bitü e' mik s'erblómi, ie' kè s'jule a'

wà. 29 Eré ye' datse ie' ska', e' kueki ye' wà ie' suule buaé. Ie' tò ye' patké'bitü.

30 Ie'pa tò ima'wé klö'wèwà, eré kam ie' kéwö dòka, e' kueki kè yi ulà dè'wà iska'. 31 Eré tajé pé' erblé ie' mik e'pa tò iché:

—Kè yi skà a' kè or yi ese onuk tkòkà Jesús tò iwé e' tsatà. Ie' wake' dör wé pairine'bitü idi' wa s'blúie e'.

*Fariseowakpa éna Jesús klö'wakwà*

32 Jesús cheke pé' tò bère ñi kukuò a, mik e' ttsé fariseowakpa tò, età ie'pa ena sacerdotepa wòkirpa, e'pa tò Skèköl wé shkék'ipa patké iklö'ukwà. 33 Jesús tò iché:

—Ye' tso'ia' a' ta' bèrbèr ème ta' ye' miáne yi tò ye' patké'bitü e' ska'. 34 A' tò ye' yuleraé, eré a' kè tò ye' kuepa. A' kè dòpakà wé ye' míró ee, e' kueki a' kè tò ye' kuepaia'.

35 Ta' judiowak wòkirpa ñi chaké:

—¿Wé ie' wí mi'kea, e' kè kuepa se' tò? ¿A' iché imi'kea wé judiowak mineyal senuk ká kuá'k'j wakpa shuà ese ska' pé' kè dör judiowak, esepa wòbla'uk? 36 Ie' tò iché: 'A' tò ye' yuleraé, eré a' kè ye' kuepa. A' kè dòpakà wé ye' míró ee, e' kueki a' kè tò ye' kuepaia'. ¿Ima e' wà kiane ché?

*Se' er a' ituoraé tajé wes di' klòka tuò es*

37 Ikéwö tkò'weke judiowak tò, e' kéwö bata e' dör ibua'ie, e' kéwö Jesús e' kékà ta' ichéitö aneule:

—Wépa ersine, esepa shkò ye' ska' di'yök.

38 Wépa erblé ye' mik, esepa ta' itkóraé wes Skèköl yèkkuò tò iché es, e' tò iché: "Ie'pa er a' ituoraé tajé wes di' klòka tuò es."

39 Mik Jesús tò di' klòka ché, età ie' tso' Skèköl Wiköl merdaé wépa erblé ie' mik esepa a, e' chök. Eré e' kéwö ska' ta' kam Jesús mi'kane iyé ska' olo ta' tajé, e' kueki kam Skèköl Wiköl mer.

*Judiowak ttè chilineka Jesús batamik*

40 Wépa tò ttè e' ttsé, e'pa welepa tò iché:

—Mok'j wém wí dör Skèköl tteköl datse e'.

41 Welepa skà tò icheke:

—Ie' dör wé pairine'bitü idi' wa s'blúie e'.

Eré welepa skà tò icheke:

—Au, kè idör e'. Wé pairine'bitü idi' wa s'blúie e' kè bitüpa Galilea. 42 Skèköl yèkkuò tò iché tò ibitúraé se' blú bak David e' ditséwò wa, ñies ibitúraé Belén wé David bak senuk ee.

43 Es ie'pa ttè chilineka Jesús batamik.

44 Ie'pa welepa éna iklö'wakwà, eré kè yi ulà dè'wà ie' ska'.

*Judiowak wòkirpa kè erblène Jesús mik*

45 Skèköl wé shkék'ipa dè'bitü Jesús klö'ukwà, e'pa dene fariseowakpa ena sacerdotepa wòkirpa ska', età e'pa tò ichakérak ishkék'ipa a:

—¿I kueki a' kè wà Jesús dè'?

46 Ishkék'ipa tò iüté:

—jSa' kē wā yi ttsēule ttök wēs wēm e' ttō es!

<sup>47</sup> Fariseowakpa tō iché ie'pa a:

—¿Ñies a' e' mettsa kitō'wē? <sup>48</sup> ¿Ima a' ibikeitsē tō s'wōkirpa ō fariseowakpa e'pa wēle erblé ie' mik? <sup>49</sup> Pē' ēsepa kē wā Moisés ttē dalōiēno sūule, esepa e' mukettsa kitō'wē. Erē ie'pa kichatēnettṣatke.

<sup>50</sup> Erē fariseowak ekōl kiē Nicodemo dē'rō Jesús sauk nañewe, e' tō iché ie'pa a:

<sup>51</sup> —Ttē mēne se' a dalōiēno, e' tō iché kē se' kawō tā' yi wōmuktsa we'ikē kam itō yulōttsasō buaē e' yōki. Es se' wā ijcher tō i sulu wambléitō ō kē iwā iwamblēne.

<sup>52</sup> Ie'pa tō ie' iūtē:

—jWēsua ñies be' dōr Galilea wak! Skēkōl yēkkuō saú bua'ie, etā be' isueraē tō Skēkōl ttēkōl kē karpakā yēs Galilea.

*Alakōl ekōl tō isenewābak dalōsewēwā*

<sup>53</sup> [Etā ie'pa ulitane miāne iu a.

### 8

<sup>1</sup> Erē Jesús miā Olivo kēbata a. <sup>2</sup> Bule es bla'mi ie' dene Skēkōl wé a tā pē' ulitane debitū ie' ska'. Ie' e' tkēser ie'pa wōbla'uk.

<sup>3</sup> S'wōbla'uk ttē dalōiēno wa wakpa ena fariseowakpa de ie' ska'. Ie'pa wā alakōl ekōl kunewā isenewābak dalōseukwā e' debitū. Ie'pa tō ikē e' duōksēr sultitane wōrkī.

<sup>4</sup> Ie'pa tō iché Jesús a:

—A s'wōbla'ukwak, alakōl i' kunewā isenewābak dalōseukwā. <sup>5</sup> Ttē dalōiēno me'at Moisés tō se' a, e' tō se' kē alakōl i'se ttōkwā ak wa. ¿Ima e' chē be' tō?

<sup>6</sup> Ie'pa tō Jesús a ichaké ima'woje tō ima ie' tō iūtēmi ikkatoie. Erē Jesús e' wōēwa iski tā iulatska wa ishtēmiitō iski wēs iyi shtēsō yēkkuō kī es. <sup>7</sup> Ie'pa tō ikī chaké iā. Ie' wōduékā tā ichéitō:

—A' wē kē wā i sulu wamblēule yēs, ese tō ak tsá uyō ie' kī.

<sup>8</sup> Etā Jesús e' wōēwane iski tā ishtēmineitō iski. <sup>9</sup> Mik ie'pa tō ttē e' ttsē, etā i sulu wambleke ie'pa tō, ese ane ie'pa éna tā imiyal ekōl ekōl. Ikēkēpa miyal kewe, e' itōkī iduladulapa. Bata ekkē tā alakōl ē aṭe dur Jesús wōrkī. <sup>10</sup> Etā Jesús e' wōduékane tā ie' a ichakéitō:

—A tayē, ¿wē ie'pa? ¿Yi aṭe be' kkatōk?

<sup>11</sup> Ie' tō iūtē:

—A kēkēpa, kē yi aṭe.

Jesús tō iché iā:

—Ye' ñies kē tō be' kkatē. Be' yūshka. Kē i sulu skā wamblaria.]\*

*Jesús dōr wēs ká olo es sultitane a*

<sup>12</sup> Etā Jesús tō iská chéne pé' a:

—Ye' dōr ká ulitane wakpa a wēs ká olo es. Wēpa e' yué ye' ttōkataie, esepa ser michōē

ká olo e' a. Ie'pa kē serpaia wēs s'shkō stui a es.

<sup>13</sup> Fariseowakpa tō iché ie' a:

—Be' wák tso' e' ttē chōk, e' kuekī be' ttō kē wā tā'.

<sup>14</sup> Ie' tō ie'pa iūtē:

—E' yēne tō ye' e' ttē chōke, erē ima ye' e' chōke e' wā tā'. Ye' wā ijcher wé ye' datse, ñies wé ye' michōē, erē e' kē jcher a' wā. E' kuekī ima ye' e' chō e' wā tā'. <sup>15</sup> A' tō ye' bikeitseke wēs a' wakpa kabikeitsō es, e' kuekī a' tō ye' kkatēke tō ye' dōr kachōkwak. Erē ye' kē tō yi bikeitseta' es. Ye' kē dē'bitū yi shulōk, ye' dē'bitū s'tsaṭkōk. <sup>16</sup> Erē mik ye' tō s'shulē, etā ye' kē tō s'shuleta' ekōrla, e' kuekī ye' tō s'shuleraē yēsēsē. Ye' yē tō ye' patkē', e' tso' ye' tā s'shulōk. <sup>17</sup> Ttē dalōiēno tō iché tō s'ditsō bōl tso' ittekōlie, e'pa tō iché ñikkē, e' tā ie'pa ttē wā tā'. <sup>18</sup> Es e', ye' dōr ye' wák ttekol. Ñies ye' Yē tō ye' patkē', e' dōr ye' ttekol. E' kuekī ye' ttekolpa dōr bōl.

<sup>19</sup> Ie'pa tō ie' a ichaké:

—¿Wē be' yē tso'?

Ie' iūtē:

—A' kē wā ye' sūule, ñies a' kē wā ye' Yē sūule. A' mū wā ye' sūule, e'ma ñies a' wā ye' Yē sūule.

<sup>20</sup> Ttē ikkē ché Jesús tō itso' s'wōbla'uk e' dalewa. Ie' tkēr s'wōbla'uk Skēkōl wé a wé kalkuō tso' inukōl ioie mē Skēkōl a eē. Erē kam ie' kēwō dōka, e' kuekī kē yi wā iklōnewā.

*A' kē dōpa wé ye' mirō eē*

<sup>21</sup> Jesús tō iská ché ie'pa a:

—Ye' miā tā a' tō ye' yuleraē, erē a' duōralur i sulu kōs wambleke a' tō e' a. E' kuekī kē a' dōpakā wé ye' mirō eē.

<sup>22</sup> Etā judiowak wōkirpa tō iché:

—Ie' iché tō sa' kē dōpakā wé ie' mirō eē. Ie' e' ttōkewā alē, e' kuekī ie' iché es.

<sup>23</sup> Ie' tō ie'pa a iché:

—A' dōr ká i' wakpa ē, erē ye' dōr ká jai wak. A' dōr ká iē wakpa, erē ye' kē dōr ká iē wak. <sup>24</sup> E' kuekī ye' tō a' a iché tō a' duōralur i sulu kōs wambleke a' tō e' a. A' kē wā iklōne tō ye' dōr yi yē'bitū ye' tō a' a e', e' tā a' duōralur i sulu kōs wambleke a' tō ese a.

<sup>25</sup> Etā ie'pa tō ie' a ichaké:

—¿Yi be' dōr?

Ie' tō iūtē:

—Ye' dōr yi yē'bitū ye' tō a' a kuaē e'. <sup>26</sup> Tajē ye' wā ttē tso' a' kkatōie. Erē i kōs cheke ye' tō sultitane a' e' ttsēule ye' wā yi tō ye' patkē' e' kkō a. Ie' ttē dōr mokjē.

<sup>27</sup> Erē ie'pa kē éna iwā ane tō ie' tso' iyē dōr Skēkōl, e' chōk. <sup>28</sup> E' kuekī ie' tō iché ie'pa a:

—S'ditsō Alà, e' dōr ye'. Mik a' tō ye' batsékā krus mik, etā a' tō isueraē tō yi dōr ye'. Ye' kē tō i wēpa ye' wák er wa. I cheke

\* 8:11 Isalema ttē i' kē ky' yēkkuō kēchke kit Juan tō. E' ukuōkī tā yile skā tō ime'ká iki.

ye' Yé tò ye' a tò ichö, e' ë chekeyö. <sup>29</sup> Yi tò ye' patkë' e' tso' ye' ta. Ì wër buaë ie' wa, e' ë wekeyö, e' kuëki kè ie' wa ye' meuleat ekörla. <sup>30</sup> Mik e' ché Jesús tò, etä tajë pé' erblé ie' mik.

*Se' yënettsa i sulu ulà a Jesús batamik*

<sup>31</sup> Jesús tò iché judiowak erblé ie' mik, e' pa a:

—A' serke kekraë ye' ttè dikia, e' je' ta a' dör ye' ttökatapa chökle. <sup>32</sup> A' wä Skëköl ttè mokij e' jcherdaë buaë ta e' tò a' yerattsa, i ulà a' klöulewa e' yöki.

<sup>33</sup> Ie' pa tò ie' iuté:

—Sa' dör Abraham aleripa. Sa' kè klöulewa i ulà a. ¿Wes be' tò ichëmi tò sa' yërdattsa?

<sup>34</sup> Ie' tò ie' pa iuté:

—Mokij ye' tò a' a' iché tò wépa tò i sulu wambleke, esepa tso' klöulewa sene sulu ulà a. <sup>35</sup> Erë s'klöulewa kanë mésoie ese serke iwökir ska', erë kè idör iwökir yami ekka. Iwökir alà e' dör iyami ekka kekraë. <sup>36</sup> Ye' dör Skëköl Alà. Ye' tò a' yëttsa sene sulu ulà a, e' ta mokij a' yënettsa. <sup>37</sup> Ye' wä ijcher tò a' dör Abraham aleripa, erë a' kè tò ye' ttè klö'wë, e' kuëki a' kji ye' kiane ttëwa. <sup>38</sup> Ì kkacheke ye' Yé tò ye' a, ese cheke ye' tò a' a. Es ñies a' tò iwambleke wës a' yé tò a' a' ikkacheke es.

<sup>39</sup> Ie' pa tò iüté:

—Sa' yé bak ká iaiaë e' dör Abraham.

Erë ie' tò ie' pa a' iché:

—A' mü dör Abraham aleripa, e' ma' a' sermi wës ie' sene' es. <sup>40</sup> Ye' tò ttè mokij ché a' a' wës Skëköl tò ye' a' ikkaché es. E' ë wéyö, erë a' kji ye' kiane ttëwa. Ese kè wamblène Abraham wa. <sup>41</sup> A' e' wamblö wës a' yé e' wamblö es.

Ie' pa tò ie' a' iché:

—jsa' kè dör ñalá alé! jsa' yé dör eköl ë e' dör Skëköl!

<sup>42</sup> Ie' tò ie' pa a' iché:

—Ye' datse Skëköl ska', e' tso' íe. Ye' kè dë' ye' wák er wa. Ie' tò ye' patkë'. E' kuëki mokij ie' chöpa a' yé, e' ma' ye' dalërmi a' éna. <sup>43</sup> ¿I kuëki a' kè éna ye' ttè wä ane? A' kè kji ye' ttè kiane klö'wë, e' kuëki a' kè éna ye' ttè wä ane. <sup>44</sup> A' yé dör bë. A' dör ie' ala'r. A' dör ie' icha ta a' e' wamblö wës ie' kji kiane es. Kekraë ie' dör s'ttökwa. Ie' ttö kqs e' dör kachè wöchka, e' kuëki Skëköl ttö mokij, e' kè wa ie' wöbatsö. Ie' dör kachökwa, ie' wák dër es, e' kuëki ie' kachö tajë. Ie' dör kachè kéköl. <sup>45</sup> Erë ye' tò ttè mokij ché a' a, e' kuëki a' kè tò ye' ttè klö'wë. <sup>46</sup> ¿A' wé tò ikkachëmi tò ye' tò i sulu wamblé? Ye' tò ttè mokij cheke a' a, e' ta ¿i kuëki a' kè tò ye' ttè klö'wë? <sup>47</sup> Yi dör Skëköl icha, ese tò ie' ttè tsë er bua' wa. Erë a' kè dör ie' icha, e' kuëki a' kè éna ie' ttè ttsak.

*Abraham kam kur e' yöki Jesús tso' tke*

<sup>48</sup> Etä judiowak kè erblène Jesús mik, e' pa tò iché ie' a:

—Mik sa' iché tò be' dör Samaria wak suluë, e' a' aknama tso', etä sa' tò iché yësyesë.

<sup>49</sup> Jesús tò ie' pa iuté:

—Au, kè ye' a' aknama ku'. Ye' tò ye' Yé dalöieke, erë a' kè tò ye' dalöie. <sup>50</sup> Ye' kè ku' i yulök ye' wák a' e' kjkokä. Erë itso' eköl, e' kji ikiane tò a' tò ye' kjkëka. E' dör s'shulökwa. <sup>51</sup> Mokij ye' tò a' a' iché tò yi tò ye' ttè iuteke mokij, ese kè duöpawa.

<sup>52</sup> Ie' pa tò iché ie' a:

—I'ñe je' sa' tò iklö'wé mokij tò be' a' aknama tso'. Abraham ena Skëköl ttekölpä kqs durulune. ¿Wes be' tò iché tò yi tò be' ttè iuteke, esepa kè duöpawa? <sup>53</sup> ¿I ma be' erbikö tò be' dör se' yé Abraham e' tsatä? Ie' hlënewä ñies Skëköl ttekölpä kqs blërulune. ¿I ma be' erbikö tò be' dör yi?

<sup>54</sup> Ie' tò ie' pa iuté:

—Ye' wák e' kjkökëka, e' ma' e' kè dör iie bua'. Erë ye' Yé tò ye' kjkökëka, e' wák cheke a' tò to' e' dör a' Këköl. <sup>55</sup> Erë a' kè wä ie' suule. Ye' je' wä isuule. Ye' ichöpa tò ye' kè wä ie' suule, e' ma' ye' kachö suluë wës a' es. Mokij ye' wä isuule. Ie' ttè iutekeyö. <sup>56</sup> Abraham dör a' yé bak ká iaiaë e' tò ye' datse, e' këwö suëraë, e' kuëki ie' ttsë'ne buaë. Ie' tò isü' ta e' tò ie' ttsëg' buaë.

<sup>57</sup> Ie' pa tò ie' a' iché:

—Kam be' kji duas dö dabom skeyök (50), etä ¿wes be' ichëmi tò be' wä Abraham suule?

<sup>58</sup> Jesús tò ie' pa iuté:

—Mokij ye' tò a' a' iché tò ye' tso'tke Abraham bak ká iaiaë e' yöki kewe.

<sup>59</sup> Etä ie' pa tò ak klö'wé tajë Jesús toie. Erë Jesús e' bléwa ie' pa shüa e' yëttsa Skëköl wé a.

## 9

*Jesús tò s'küne eköl wöbla kè wawër e' bua'wéne*

<sup>1</sup> Jesús shkórami e' tò wëm küne' wöbla kè wawër ese sué eköl. <sup>2</sup> Etä ittökatapa tò ie' a' ichaké:

—A S'wöbla'ukwak, ¿yi tò i sulu wamblé', e' nüj kuëki wëm i' küne' wöbla kè wawër, ie' wák ö iyë ö imi?

<sup>3</sup> Ie' tò ie' pa iuté:

—Kè idör tò ie' ö iyë ö imi tò i sulu wamblé' e' nüj kuëki. Ie' küne' es as Skëköl diché tajë e' wawër iki. <sup>4</sup> Yi tò ye' patkë', e' kanë kawötä wë se' tò kawö ta'ia se' a' e' dalewa. E' dör wës se' kaneblö ñiwe es. Se' blënewä etä kè se' a' i kaneoneia. E' dör wës katuine s'kji es, kè se' a' kaneblënuä. <sup>5</sup> Ye' tso'ia ká i' kji, e' dalewa ye' dör wës ká olo es sulitane er ñi'woie.

<sup>6</sup> Ie' tò iché one tã ie' wiritué íyök kî, e' wa ie' tò dôchka yué. Tã wëm kě wöbla wawër e' wöbla kî dôchka e' tíéitö. <sup>7</sup> Tã ichéitö ie' a':

—Be' yú wöskuök di'dape kié Siloé eé. (Siloé e' wã kiane ché: "patkéule").

Wëm wöbla kě wawër e' mía tã iwöskuée tã iwöbla wawënene buaé tã imiã iu a. <sup>8</sup> Pë' serke ie' o'mik ena pë' wã ie' s'ule inuköl kak kiök e' pa ñi chaké:

—¿Wëm wí kě dôr wëm e' tkökeser inuköl kak kiök e'?

<sup>9</sup> Welepa tò iché:

—Tö, ie' idir.

Erë welepa skà tò iché:

—Au, kě dôr ie' erë ie' s'ù idir.

Erë ie' wák tò iché:

—Tö, ye' je' idir.

<sup>10</sup> Etã ie' pa tò ie' a' ichaké:

—¿Wes i' tã be' wöbla wawënene?

<sup>11</sup> Ie' tò ie' pa iüté:

—Wëm kié Jesús e' tò dôchka yué, e' tíéitö ye' wöbla kî tã ichéitö ña: 'Be' yú wöskuök di'dape kié Siloé e' a.' Etã ye' mía wöskuée tã ye' wöbla wawënene.

<sup>12</sup> Etã ie' pa tò ie' a' ichaké:

—¿Wé wëm e'?

Ie' tò ie' pa iüté:

—Kě ye' wã ijcher.

*Wëm wöbla buanene e' kí chaké taië fariseowakpa tò*

<sup>13-14</sup> Mik Jesús tò dôchka yué ena wëm wöbla kě wawër e' bua'wëneitö, e' kěwö dôr eno diwö. E' kueki wëm buanene e' tsémirakitö fariseowakpa ska'. <sup>15</sup> E' pa tò ie' a' ichaké:

—¿Wes be' wöbla buanene?

Ie' tò ie' pa iüté:

—Wëm eköl tò dôchka tié ye' wöbla kî tã ye' wöskuée tã ye' wöbla buanene.

<sup>16</sup> Ie' pa welepa tò iché:

—Wëm wé tò e' wé e' kě wã eno diwö dalöiene, e' kueki e' wák kě patkéne Skéköl wã.

Erë welepa skà tò iché:

—Ie' chöpa pë' sulusi, e' ma ¿wes i' kě or yi a' ese ormi ie' a'?

Es ie' pa ttë chilineka.

<sup>17</sup> Ie' pa tò iskã chakéne wëm buanene e' a':

—Ie' tò be' wöbla bua'wëne, ¿ima e' wák bikeitsè be' tò?

Ie' tò ie' pa iüté:

—Ye' a' tã ie' dôr Skéköl tteköl.

<sup>18</sup> Erë ie' pa kě éna iklö'wak tò ie' bak wöbla kě wawër tã iwasuëitö. E' kueki ie' pa tò imi ena iyé tsuk patké <sup>19</sup> tã ie' pa a' ichaké:

—¿Wëm i' dôr a' alã? A' iché tò ie' kune' wöbla kě wawër, e' tã ¿wes i' ñe' tã iwöbla wasuëitö?

<sup>20</sup> Iyé ena imi tò iché ie' pa a':

—Sa' wã ijcher buaé tò ie' dôr sa' alã. Ñies sa' wã ijcher tò ikune wöbla kě wawër. <sup>21</sup> Erë

wes i' ñe' tã ie' wöbla buanene e' kě ijcher sa' wã. Ñies kě sa' wã ijcher yi tò ie' wöbla bua'wëne. E' chakö ie' wák a. Ie' detke kéchke. ¡ie' wák tò ichémi a' a! <sup>22</sup> Iyé ena imi e' pa suane judiowak wökirpa yöki, e' kueki ie' pa tò iché es. Judiowak wökirpa tò iyé'bak ñi a' tò wépa iklö'wé tò Jesús dôr wé pairine'bitü idi' wa s'blúie e', e' tã esepa yekelur ie' pa tò ie' pa ñi dapa'wo wé a, kě kiéwaia yés. <sup>23</sup> E' kueki iyé ena imi tò iché: "Ie' detke kéchke. Ie' wák tò ichémi a' a."

<sup>24</sup> Etã ie' pa tò wëm buanene, e' skã kiéne tã ie' a' ichaké:

—Be' ttö mokië Skéköl wörki. Sa' wã ijcher tò wëm tò be' bua'wëne, e' dôr pë' sulusi.

<sup>25</sup> Wëm tò iüté:

—Kě ye' wã ijcher tò wëm e' dôr pë' sulusi ö au. Erë ye' wã ijcher buaé tò ye' bak wöbla kě wawër, erë i' ñe' tã ye' tò iwasuë. E' é jcher ye' wã.

<sup>26</sup> Ie' pa tò iskã chakéne ie' a':

—¿Wes be' wéitö? ¿Wes ie' tò be' wöbla bua'wëne?

<sup>27</sup> Ie' tò ie' pa iüté:

—E' chétkeyö a' a, erë a' kě éna itt sak. ¿¡ie a' kî ikiane tò ye' tò iskã ché? Wësua ñies a' e' yuak ie' kléie.

<sup>28</sup> Ie' pa tò ie' ché suluë tã ichérakitö ia:

—Be' dôr wëm e' ttökata, erë sa' dôr Moisés ttökata. <sup>29</sup> Sa' wã ijcher tò Skéköl ut Moisés tã, erë wëm e', kě jcher sa' wã wé ie' datse.

<sup>30</sup> Ie' tò ie' pa iüté:

—¡I ché a' tò, e' tò ye' wökrawéwã! Ie' tò ye' wöbla bua'wëne tã ¿wes a' kě wã ijcher wé ie' datse? <sup>31</sup> Se' wã ijcher tò pë' sulusipa ttö kě iütetã Skéköl tö. Erë wépa tò Skéköl dalöieke ena iserke wes ie' kî ikiane es esepa é ttö iütete ie' tò. <sup>32</sup> Kã i' tsã yöne e'tami kě yi wã iütéule tò se' kune wöbla kě wawër esepa wöbla buarta'ne. <sup>33</sup> Ie' kě patköpa Skéköl tö, e' ma kě i' orpa ie' a.

<sup>34</sup> Ie' pa tò iüté:

—Be' kune', be' talane i' sulu é a. ¿Wes be' kësik deka sa' wöbla'uk?

Etã ie' pa tò itrë'wëshkar.

*Wëm wöbla buanene e' erblé Jesús mik*

<sup>35</sup> Jesús ittse tò wëm wöbla buanene e' trë'wëshkar ie' pa tò Skéköl wé a. Mik ie' tò ikué tã ie' a' ichakéitö:

—¿Be' erblé S'ditsö Alà mik?

<sup>36</sup> Ie' tò iüté:

—A kékëpa, ichö ña yi idir as ye' erblö imik.

<sup>37</sup> Jesús tò iüté:

—Be' wã isüulebak; e' dôr ye' tso' ttök be' tã e'.

<sup>38</sup> Etã ie' e' tkéwã kuché kî idalöiök tã iché ia:

—A Skékëpa, be' mik ye' erblé.

<sup>39</sup> E' ukuök tã Jesús tò iché:

—Ye' dë'bitü kã i' a' s'shulök as wépa dôr wes s'wöbla kě wawër es esepa wöbla wawër.

Ñies ye' dë'bitu wépa e' chò tò iwòbla wawër buaë esepa muka' wës iwòbla kè wawër es.

<sup>40</sup> Mik fariseowakpa welepa tso' ie' ska', e'pa tò ttè e' tssé, età ichéraitò ià:

—¿Ima be' sa' bikeitsé? ¿Sa' dör wës s'wòbla kè wawër es?

<sup>41</sup> Ie' tò ie'pa iüté:

—A' mú wòbla kè wawër, e'ma i' sulu nu' kè ku' a' k'j. Erè a' tò icheke tò a' wòbla wawër, e' kue'ki a' k'j i' sulu nu' tso' ià.

## 10

### *Obeja kkò'nukwak e' tté*

<sup>1</sup> Età Jesús tò iché: “Mok' ye' a' a' iché tò obeja ekiblökwakpa, esepa kè shkötä wä wé obeja tso' wötèule, e' wékkö chökla a. E' skéie ie'pa shkökewä bánet. Esepa dör akblökwakpa. <sup>2</sup> Erè wé shkökewä obeja wékkö chökla a, ese dör obeja kkò'nukwak chökla. <sup>3</sup> Obeja wékkö kkò'nukwak, ese tò obeja wékkö kköppeeke obeja kkò'nukwak a ta e' tò iobeja kieke ikiè wa etò etò. Obeja tò ie' ttò tsséwä buaë, ta ie' tò iyekelur wé itso' rak wötèule ee. <sup>4</sup> Obeja tò ie' ttò tsséwä buaë, e' kue'ki mik ie' tò iyélur serag, età imi' kerak ie' itöki. <sup>5</sup> Yi kè sùule ie'pa wä, ese kè toie ie'pa tò. Ie'pa kè wä ese ttò tsséule, e' kue'ki ie'pa ponekä iyöki.”

<sup>6</sup> Ttè e' paké Jesús tò judiowak a, erè ie'pa kè éna iwà ane.

### *Jesús dör wës obeja kkò'nukwak buaë es*

<sup>7</sup> Ie' tò iskà ché ie'pa a: “Mok' ye' tò a' a' iché tò ye' wák dör wës obeja wötèule ese wékkö es. <sup>8</sup> Pè' dë'bitu ye' yök' kewe s'wòbla' uk kache tté wa, esepa dör wës obeja ekiblökwakpa es, ie'pa dör pè' sulué. Erè wépa dör wës ye' obeja es, esepa kè wä ie'pa ttò tsséne. <sup>9</sup> Ye' dör wës obeja wékkö es, wépa shkökewä ye' wa, esepa tsatkèrdäe. Ie'pa doraé wës obeja shkökewä dökettsane chkök kkò'naule buaë ese es.

<sup>10</sup> “Obeja ekiblökwakpa datse iekiblökö ena ittökulur ie' ukwa, e' è wamblök esepa datse. Erè ye' dë'bitu ká i' a' sene bua'ie muk a' a, e' dör sene michoé chökla. <sup>11</sup> Ye' dör wës obeja kkò'nukwak buaë es, e' e' murattsa ttéwä iobeja tsatkoie. <sup>12</sup> Erè wé kaneblöke inuköl dalérmik, ese kè dör ikkò'nukwak chökla. Ie' kè dör obeja wák, e' kue'ki mik chichi kañiru datse, età ie' tò obeja méat ta itkashkar ta chichi kañiru tò obeja ttéwä ta imalepa ponekä. <sup>13</sup> Wëm e' kè tkine obeja k'j. Ie' tkirke inuköl è k'j, e' kue'ki itkashkar.

<sup>14-15</sup> “Ye' wák dör wës obeja kkò'nukwak buaë es. Ye' Yé wä ye' sùule buaë, es ñies ye' wä ie' sùule. Wépa dör ye' icha e'pa dör wës ye' obeja es, ie'pa sùule ye' wä buaë, ñies ie'pa wä ye' sùule. Ye' e' murattsa ttéwä ie'pa tsatkoie. <sup>16</sup> Ñies ye' wä ye' icha skä tso' bánet,

esepa dör ye' obejapa ñies, erè ie'pa kè dör a' ditséwö. Ie'pa doraé ye' wä ye' ska' ta ie'pa tò ye' ttò iüteraé ta ièrdawarak ye' icha tso' ié e'pa ta ñita echka ème. Ye' è doraé ie'pa kos e' kkò'nukwakie.

<sup>17</sup> “Ye' e' murattsa ttéwä e' shkerdakane, e' kue'ki ye' Yé éna ye' dalér tajé. <sup>18</sup> Kè yi a ye' duökwa. Ye' e' murattsa ttéwä ye' wák er wa. Ye' a kawö mène e' mottsa ttéwä ena shkenokane wës ye' Yé tò ye' patkè iwà uk es.”

<sup>19</sup> Mik judiowak tò ttè e' tssé, età ie'pa ttè chiliwékane. <sup>20</sup> Ie'pa kibiiepa tò icheke:

—¡Ie' dör aljie! ¡Ie' a' aknama tso'! ¿Ie' a' tò ittò ttseke?

<sup>21</sup> Erè imalepa tò icheke:

—¡Yi a' aknama tso', ese kè ttò es! Aknama kè a' s'wòbla buanukne.

### *Judiowak kè erblène Jesús mik e'pa tò iwatéttsa*

<sup>22</sup> Tskiri kéwö de, età Jerusalén wakpa tso' Skéköl wé batse'one ká iaiäé, e' kéwö tkö'uk. <sup>23</sup> E' shüä Jesús shködur Skéköl wé üle kiè Salomón üle e' a. <sup>24</sup> Età judiowak kè erblène Jesús mik, esepa iènewä ie' pamik tajé ta ie'pa tò ie' a' ichaké:

—¿Kos sa' tò be' tté panemirö? Iwà chö sa' a' yésyèsè tò be' dör wé pairine'bitu idi' wa s'blúie e' ö kè be' dör e'.

<sup>25</sup> Ie' tò ie'pa iüté:

—Ye' tò ichétke a' a, erè a' kè erblène ye' mik. I kè or yi a' ese wéyo ye' Yé ttö wa. E' tò ikkaché buaé sulitane a' tò yi dör ye'. <sup>26</sup> Erè a' kè dör ye' obeja, e' kue'ki a' kè erblökü' ye' mik. <sup>27</sup> Ye' obeja tò ye' ttò ttseke. Ye' wä ie'pa sùule buaé ena ie'pa datse ye' itöki. <sup>28</sup> Sene michoé mekyö ie'pa a' ta ie'pa kè duöpawä aishkuö ta. Ie'pa kè yèrpattsaia yi a' ye' ulä a. <sup>29</sup> Ye' Yé tò ie'pa me' ye' a' e' dör iyi ulitane tsata. E' kue'ki kè yi a' ie'pa yèrpattsa ie' ulä a. <sup>30</sup> Ie' ena ye', sa' dör eköl è.

<sup>31</sup> Età judiowak kè erblène Jesús mik, e'pa tò ak skä klö'wéne tajé ie' toie. <sup>32</sup> Ie' tò ie'pa a' iché:

—Ye' Yé batamik iyi buaé wé ye' tò tajé a' wörki é' wé kue'ki a' k'j ye' kiane ttéwä ak wa?

<sup>33</sup> Ie'pa tò iüté:

—Sa' kè éna be' ttakwä iyi buaé wé be' tò ese kue'ki. Sa' éna be' ttakwä be' tò Skéköl ché sulué e' kue'ki. Be' dör s'ditsö è, erè be' e' chö tò be' dör Skéköl.

<sup>34-36</sup> Ie' iüté:

—¿Wes a' tò ye' kkatete ttè e' k'j? ¿A' kè éna iane tò ká iaiäé Skéköl tò iyé' a' shülökwakpa bak e'pa a: “a' dör kékölpa”?\* Ttè e' tso' kitule Skéköl yèkkuö k'j. Se' wä ijcher tò yèkkuö e' dör mok' kekraé. Ie'pa wépa a' Skéköl tò ittè me'bak s' shülök, esepa ki' ie' tò

\* 10:34-36 kékölpa: Si'kuäie ttè e' dör dioses.

kèkòlpa, e' yitá ye' kirmi buaë ie' alà. E' wà dör tò ie' wák tò ye' klòg' tã ye' patkè'bituitò ká i' a. ¿Wes a' ichèmi tò ye' tò ie' ché suluë mik ye' iché tò ye' dör ie' alà etã? <sup>37</sup> Ì kiane ye' Yé kí tò ye' tò iwë, e' mú kè uk ye' ku', e'ma kè a' erblòk ye' mik. <sup>38</sup> A' kè erblòku' ye' mik, erè ì wëkeyò, e' mik a' erblò as a' wã ijcher mokj tò ye' Yé ena ye' sa' dör ekòl è.

<sup>39</sup> Judiowak tò Jesús skà ma'wé klò'wëwã, erè ie' tkashkar ie'pa yòki.

<sup>40</sup> E' ukuòki tã Jesús miáne Jordán wíshet wé Juan bak s'wòskuòk eë. Eë ie' e' tséat.

<sup>41</sup> Tajè pè' de ie' ska' tã ichekerakitò:

—Juan kè wã, ì kè or yi a' ese one, erè wëm i' paka' Juan tò kos e' dör mokj.

<sup>42</sup> Etã tajè pè' tso' ká e' a, e'pa erblé Jesús mik.

## 11

### *Lázaro blènewã*

<sup>1</sup> Wëm tso' ekòl duòke kiè Lázaro serke Betania. Eë María ena ièl kiè Marta e'pa serke. <sup>2</sup> María e' dör Lázaro kutà tò Skèképa Jesús klò kí kiò masmas tè'ka tã ipasiò'wãitò itsákò wa e'. <sup>3</sup> Ie' ena Marta e'pa tò Jesús a' ichòk patké:

—A Skèképa, Lázaro dalér tajè be' éna, e' duòke.

<sup>4</sup> Mik Jesús tò ittse tã ichéitò:

—Duè e' kè e' alòpaka' ikì da'a. E' dör buaë Skèkòl olo kkachoié, ñies ye' dör ie' Alà e' olo kkachoié.

<sup>5</sup> Marta ena ièl ena Lázaro, e'pa dalér tajè Jesús éna. <sup>6</sup> Erè mik ie' ittse tò Lázaro duòke, etã ie' kè mìnè iska'. Ie' e' tséatã dō ká böt wé itso' eë. <sup>7</sup> E' ukuòki tã ie' iché ittòkatapa a':

—Mishkane Judea.

<sup>8</sup> Ie'pa tò iché ie' a':

—A S'wòbla'ukwak, i' kukuie se' dè'rò eë, tã judiowak kí be' kiane ttèwã ák wa. ¿Wes eë be' shkakne?

<sup>9</sup> Ie' tò ie'pa a' iché:

—Kè a' tkinuk e' kí. Kam ye' kéwö dōka, e' kuekì kè ì tkòpa ye' tã. E' dör wës ttè ì tò iché es: Ká ñiwe á diwò tso' dōka dabom eyök kí böt (12). Ñiwe tã ká olo buaë, e' kuekì se' shkòke ñiwe, e' tã kè se' klastkèrpawã. <sup>10</sup> Erè s'shkòke ká ttsettse a', e' tã se' klastkèrdaë. Ye' tso' iã shkòk wës s'shkòke ñiwe es, e' kuekì kè ì tkòpa ye' tã.

<sup>11</sup> E' ukuòki tã ie' tò ichéne:

—Se' yami Lázaro kapowã, erè ye' mi'ke ishke'ukkane.

<sup>12</sup> Etã ittòkatapa tò iché ie' a':

—A Skèképa, ie' kapowã, e' tã ibuarmine.

<sup>13</sup> Ie' tò Lázaro blènewã e' ché ie'pa a es. Erè ittòkatapa tò ibikeitsé tò é ikapowã. <sup>14</sup> E' kuekì ie' tò ie'pa a' iché yësyësé:

—Lázaro blènewã. <sup>15</sup> Erè a' kuekì ye' ttsè'ne buaë tò ye' kè ku' eë as a' erblò ye' mik. Mishka isauk.

<sup>16</sup> Etã Tomás (e' kiè ñies Dídimo) e' tò iché imalepa a':

—Mishka as se' ttòwã ie'pa tò Jesús tã.

### *Jesús dör s'duulewã ese shkè'ukkanewak.*

<sup>17</sup> Mik Jesús demi Betania, etã Lázaro nu wòtènewã, e' kí ká de tkèl. <sup>18</sup> Betania atë tsinet Jerusalén o' mik kilómetro mañat ekkè. <sup>19</sup> Marta ena María akè blènewã, e' kuekì tajè judiowak dè'bitu' ie'pa pablòk. <sup>20</sup> Mik Marta wa ijchenewã tò Jesús dòketke tã imía iñaletsuk, erè María atë u a. <sup>21</sup> Ie' tò iché Jesús a':

—A Skèképa, be' chòpa tkèr ie, e'ma ye' akè kè blènewã. <sup>22</sup> Ie' blènewatke, erè ye' wã ijcher tò ì kié be' tò Skèkòl a, e' meraëitò be' a.

<sup>23</sup> Ie' tò ie' a' iché:

—Be' akè blènewã e' shkèrdakane.

<sup>24</sup> Marta tò iché iã:

—Ye' wã ijcher tò ie' shkèrdakane aishkuò tã mik ká i' erkewatke etã.

<sup>25</sup> Jesús tò iché ie' a':

—Ye' dör s'duulewã e' shkè'ukkane wak. Ye' dör sene michoë e' mukwak. Yi erblé ye' mik erè iblènewatke, erè ishkerdakane tã iser michoë. <sup>26</sup> Yi serke ye' mik erblòke ye' mik, ese kè duòpawã aishkuò tã. ¿E' klò'wé be' tò?

<sup>27</sup> Marta tò iüté:

—A Skèképa, iklò'wéyö. Ye' tò iklò'wé tò be' dör Skèkòl Alà, be' dör wé pairne'bitu' idi' wa s'blúie cheke ká iãie tò idatse ká i' kí e'.

### *Jesús ié wé Lázaro nu blène eë*

<sup>28</sup> Marta tò ttè e' ché one, tã imía ièl María kiök, tã iché ie' kukuò a':

—S'wòbla'ukwak detke. Ie' tò be' kié.

<sup>29</sup> Mik e' ttsé María tò, etã bet ie' e' kèkã miã Jesús sauk. <sup>30</sup> Jesús tso' iã wé ie' tté Marta tã eë. Kam ie' dōwã wé ie'pa serke eë. <sup>31</sup> Mik wépa tso' María u a' ipablòk, e'pa tò isué tò ie' e' kèkã miã bet, etã ie'pa miã itòki. Ie'pa ibikeitsé tò ie' miã iuk idèütò nu blène eë.

<sup>32</sup> Mik María demi Jesús ska', etã ie' e' tkéwã kuché kí ikld ska' tã ichéitò ie' a':

—A Skèképa, be' chòpa tkèr ie, e'ma ye' akè kè blènewã.

<sup>33</sup> Mik Jesús tò isué tò María iuke ena wépa debitù ie' tã e'pa iukeñak, etã e' tò ie' chkwéwã tajè shuté. <sup>34</sup> Ie' tò ie'pa a' ichaké:

—¿Wé a' tò inú blè'wã?

Ie'pa tò iüté:

—A Skèképa, be' shkò isauk.

<sup>35</sup> Etã Jesús ié. <sup>36</sup> Ie'pa tò iché:

—Isau. Ie' éna Lázaro dalér tajè.

<sup>37</sup> Erè ie'pa wèlepa tò iché:

—Ie' tò wëm wòbla kè wawèr, e' buao'ne tã ¿i' kuekì ie' kè wã ì one as Lázaro kè blèrãwã?

### *Jesús tò Lázaro shkè'wékane*

<sup>38</sup> Etã Jesús skà erianekã tã idemi wé Lázaro nu blène eë. E' dör ákuk bërie. Ák

bërie bastkër, e' wa ákuk wõtëulewá. <sup>39</sup> Jesús tò iché:

—Ák bastkër ákuk kk'ò mik, e' sk'óttsa bánet.

Marta dör dëüt'ò kutá e' tò iché:

—A Skékëpa, ká detke tkël inú kî, e' kuëkî suluë inú alanewatke.

<sup>40</sup> Ie' tò iüté:

—Ye' tò be' á ichétke tò be' erblé ye' mik, e' tã mokî be' tò Skéköl olo tajë e' sugräë.

<sup>41</sup> Etã ie'pa tò ák skéu bánet tã Jesús wökéka ká jai á tã ichéit'ò:

—A yëwö, i kiëyö be' á e' ttsëbö. E' kuëkî wëstela chekeyö be' á. <sup>42</sup> Ye' wa ijcher tò kekraë i kiekeyö be' á, e' ttsekebö. Erë ikiëyö be' á pë' tso' tajë jë, e'pa kukua as ie'pa tò iklö'ù tò mokî be' ye' patkë'.

<sup>43</sup> E' chéit'ò one tã ie' iché aneule:

—A Lázaro, jbe' e' yóttsa seë!

<sup>44</sup> Etã Lázaro blënëwá e' dettsá ttsë'ka. Ie' ulá, ie' klö parratulewá datsi'tak wa. Nies iwö parratulewá datsi'tak wa. Jesús tò iché iarak:

—Iparratulewá datsi'tak wa, e' wötsöö as imí'á.

*Judiowak tò Jesús ileritsé klö'wëwá*

(Mateo 26.1-5; Marcos 14.1-2; Lucas 22.1-2)

<sup>45</sup> Judiowak dë'bitü María wapiöuk, e'pa tò ì wë Jesús tò e' suë, e' kuëkî ie'pa tajë erblé ie' mik. <sup>46</sup> Erë ie'pa welepa miá, ì wéit'ò, e' chök fariseowakpa á. <sup>47</sup> Etã fariseowakpa ena sacerdotepa wökirpa, e'pa tò judiowak wökirpa kié tã ñni dapa'wëká tã ichérakitö ñni á:

—¿Wes se' tò Jesús wëmi? Ì kë or yi á ese wekeitö tajë. <sup>48</sup> Se' tò ie' méat es, e' tã sulitane erblóraë ie' mik tã itkërdaka se' blúie. E' mú ttsé Roma wökirpa tò, e' ma ie'pa bituraë tã Skéköl wë tskerawarakitö, ñies se' judiowak ewerawarakitö.

<sup>49</sup> Erë ie'pa shuá wëm tso' eköl kié Caifás, e' dör sacerdote kibi duas e' wa. Ie' tò iché ie'pa á:

—A' kë wá ì jcher yës. <sup>50</sup> Ttsësua á' kë éna iane tò wëm eköl ë duöwá se' judiowak skéie, e' dör bua'ie se' qos erwa e' skéie.

<sup>51</sup> Erë e' kë yëna Caifás wa iwák er wa. Ie' dör sacerdote kibi duas e' wa, e' kuëkî Skéköl tò ie' ké ichök es ittekölíe. Ie' tò iché Skéköl ttekölíe tò Jesús tterawá judiowak ulitane skéie. <sup>52</sup> Kë idör judiowak ë skéie, ñies itterawá Skéköl ala'r ulitane serke ká wa'ñe e'pa skéie as ie'pa dö judiowak tã ñitá wës wakpa etókicha ë es. <sup>53</sup> E' diwö tã judiowak wökirpa tò kawö mé ñi á Jesús ttowa.

<sup>54</sup> E' kuëkî ie' kë shkóia sulitane wöshá judiowak shuá. Ie' e' yéttsa miá ká kié Efraín eë. Ká e' atë ká sir poë wë kë yi serku' ese ska' tsinet. Eë ie' e' tséat ittókatapa tã.

<sup>55</sup> Judiowak Yëpa Yërulune Egipto e' kéwö dökewatke tsinet tkö'wë. Judiowak serke bánet e'pa tajë dökemitke Jerusalén e' batse'ukne ikawö tkö'uke e' yökî wes ie'pa wöblar es. <sup>56</sup> Ie'pa tso'ie Jesús yulök. Ie'pa ñi chakökerak Skéköl wé á:

—¿Ma a' tò iché, Jesús dömi kawö tkö'uk ö kë idöpa?

<sup>57</sup> Fariseowakpa ena sacerdotepa wökirpa, e'pa tò iché sulitane á tò yi wá ijcher tò wë Jesús tso', e' tã ibiyö chó sa' á iklö'wowa.

## 12

*Alaköl eköl tò kiö masmas téka Jesús klö kî*

<sup>1</sup> Kawö kianeia teröl Judiowak Yëpa Yërulune Egipto e' kéwö tkö'woie tã Jesús miá Betania wë Lázaro serke eë. Lázaro du'wá e' shkéo'kane ie' tò e' ska' ie' miá. <sup>2</sup> Eë ie'pa ulérak, chkéak buaë Jesús kíkoka. Marta tso' iwatiök. Lázaro tkër ie'pa shuá mesa kî chkök Jesús tã. <sup>3</sup> Etã María wá kiö masmas kié nardo chökle tuë darërë, ese debitü litro shaböts, e' téit'ò Jesús klö kî. E' ukuökî tã ipasiwëwáitö itsákö wa. Kiö e' tò úshü qos alappöwëká buaë jamamaë. <sup>4</sup> Etã Jesús ttökata eköl kié Judas Iscariote tò iwömekettsá e' tò iché:

<sup>5</sup> —Kiö masmas se tuë kanë duas ek ské ekkë. ¿Ì kuëkî kë iwatönettsá s'siarëpa kimoie?

<sup>6</sup> Erë e' kë yëna ie' wá, ie' éna s'siarpa dalër tajë e' kuëkî. Ie' dör akblökwak, e' kuëkî ie' tò iché es. Ie' dör Jesús ttókatapa inuköl blökwak, e' kak ekibleke ie' tò iwák á. <sup>7</sup> Jesús tò iché ia:

—Imúat. Kiö e' bleke të se' nu kî, erë ité ie' tò ye' kî kam ye' ttöwá e' yökî. <sup>8</sup> S'siarëpa tso' kekraë a' shuá as a' tò ikímü, erë ye' kë ku' kekraë a' tã.

*Sacerdotepa wökirpa kî Lázaro kiane ttëwá*

<sup>9</sup> Tajë judiowak wá ijchenewá tò Jesús tso' Betania tã imiyal eë, kë dör Jesús ë sauk. Nies ie'pa kî Lázaro shkéo'kaneitö e' kiane suë. <sup>10-11</sup> Lázaro batamik tajë ie'pa erblé Jesús mik, tã sacerdotepa wökirpa ttë kë iütëia ie'pa tò. E' kuëkî sacerdotepa wökirpa tò ibikeitsétke Lázaro ttowa ñies.

*Jesús demi Jerusalén*

(Mateo 21.1-11; Marcos 11.1-11; Lucas 19.28-40)

<sup>12</sup> Tajë pë' de Jerusalén Judiowak Yëpa Yërulune Egipto e' kéwö tkö'uk. Bule es tã ie'pa wá ijchenewá tò Jesús datsë ñies Jerusalén. <sup>13</sup> E' kuëkî ie'pa sî kó télor tsémi shuélor ie' datsë e' ñalé kî idalöioie tã imiyal iñaletsük. Ie'pa tò iché aneule:

—jSkëköl kjkökäsö! ¡Ayëcha buaë se' Israel aleripa blú datse Skëköl ttö wa e!\*

<sup>14</sup> Eta Jesús tö burro pupula kué etö, e' kji ie' e' tkëka wes ikitule Skëköl yëkkuö kji es, e' tö ichë:

<sup>15</sup> A Siön wakpa, kë a' suanuk.

Isaü, a' blú datse

e' tkëuleka burro pupula kji.†

Es Skëköl yëkkuö tö ichë.

<sup>16</sup> Ima Jesús tté tso' kitule Skëköl yëkkuö kji e' wa tka ie' ta. Erë e' kéwö ska' ta ie' ttökatapa kë éna iwà ane tö Skëköl yëkkuö kitule ká iaiäe e' tö Jesús tté pakeke. Erë ie' míkane ká jai a olo ta' tajë, e' ukuöki ta ie'pa éna iwà ane tö i kos wé pé' tö ie' ta, e' tso'tke kitule Skëköl yëkkuö kji.

<sup>17</sup> Wépa tso' mik Jesús tö Lázaro shkeo'kane eta, e'pa tö tté e' pakeke imalepa a. <sup>18</sup> E' kueki pé' wá tajë tté e' jchenewa, e' kueki imíyal Jesús ñaletsuk. <sup>19</sup> Erë fariseowakpa tö iché ñi a:

—¡Isaü, sulitane mi'ke Jesús ë itökí! ¡Se' tsaiëne buaë!

*Griegowak welepa tö Jesús yulé*

<sup>20</sup> Pé' mine Jerusalén Judiowak Yépa Yërulune Egipto e' kéwö tkö'uk, e' shüa griegowak welepa tso'ñak. <sup>21</sup> Griegowak e'pa debitu Felipe ska'. Felipe dön ká kië Betsaida e' wak. Ká e' ate Galilea. Ie'pa kköché tajë:

—A këképa Felipe, sa' kji Jesús kiane suë.

<sup>22</sup> Eta Felipe miä ichök Andrés a ta ie'pa böi miyal ichök Jesús a. <sup>23</sup> Jesús tö iché ie'pa a:

—Ye' dön S'ditsö Alà, e' olo tajë e' kkeyërkette. <sup>24</sup> Moki ye' tö a' a iché tö iyiwö etkla kë tkënewa iyök a, e' ta iaгдаä ekörla, kë wö ta'. Erë iyiwö etkla tkënewa iyök a, ese shölöne ta iwödalö duowa, e' ta itskine wördäe tajë. <sup>25</sup> Wé e' dalër tajë kë duakwa, ese weirdaë aishkuö ta. Erë wé e' mettsa ttëwä ká i' a, ese tsatkërdaë ser michoë. <sup>26</sup> Yi kaneblak ye' a, ese kawötä shkök ye' ta; wé ye' tso' eë ye' kanë mésopa tso' ñies. Yi kaneblöke ye' a, ese kikeraka ye' Yë tö.

*Jesús ttekewatke, e' ché ie' tö*

<sup>27</sup> “Ye' ittse' i' ta, tajë ye' eriane. ¿l' chëmiyö? ¿Yö ichëmi ye' Yë a: ‘A yëwö, ye' tsatköö i' tkökette ye' ta e' yöki? Au, e' kë chepayö. ¡ye' wák e' dë'bitu ttëwä! <sup>28</sup> A yëwö, be' olo tajë e' kkachö as be' kjkarka.”

Eta ká jai a ttö ttsëne e' tö iché: “Ye' olo tajë e' kkachëtkeyö be' kji, ta iska kkachëraneyö.”

<sup>29</sup> Pé' tso' ittsoök eë, e'pa tö iché tö alá blane, erë welepa tö iché:

—Skëköl biyöchökwak wele tté ie' ta.

<sup>30</sup> Jesús tö iché ie'pa a:

—Ttö tssé a' tö, e' kë dön ye' a, e' dön a' kimoie. <sup>31</sup> Ká i' wakpa shulé kéwö detke.

Bé dön ká i' wakpa wökir, e' uyardatssa i' ta. <sup>32</sup> Mik ye' wötënewa krus mik e' tkëneka, eta ye' wá sulitane bituraë ye' ska'.

<sup>33</sup> Es ie' tö wes itterawa e' ché. <sup>34</sup> Pé' tö iütë:

—Se' wá ijcher tö Skëköl yëkkuö kji ikitule tö wé pairine'bitu idi' wa s'blúie e' ser michoë. ¿Wes be' tö iché tö S'ditsö Alà, e' kawötä tkëka krus mik? S'ditsö Alà ¿e' dön yi?

<sup>35</sup> Jesús tö iché ie'pa a:

—Yi shköke stui a, ese kë wá ijcher wé imirö. Ye' dön wes ká olo es, erë ye' tso'ia a' shüa ekuölö ë. E' kueki a' shkó ye' olo a as kë stui tö a' küwa. <sup>36</sup> Ye' dön wes ká olo es, e' tso'ia a' shüa. Ye' mik a' erblö as a' dö ye' ichaie.

E' ché one Jesús tö ta imía e' blëwä ie'pa yöki.

*I kueki judiowak kë erblö Jesús mik*

<sup>37</sup> I kë or yi a ese wé Jesús tö tajë judiowak wörki, erë ie'pa kë erblëne ie' mik. <sup>38</sup> E' kos wamblëne wes Skëköl tteköl Isaías e' tö ikit Skëköl yëkkuö kji es, e' tö iché:

“A Skëköl, tté paka' sa' tö wësua kë yi wa iklöne.

Be' diché tajë e' kkeyë' be' tö ie'pa a, erë ie'pa kë wa sa' tö iütëne.”‡

<sup>39</sup> Es ie'pa kë a Skëköl tté klör. Ñies Isaías ikitat tö i kueki ie'pa kë wá Skëköl tté klöne. E' tö iché:

<sup>40</sup> “Ie'pa er darërëë, kë éna Skëköl tté klö'wak yës.

E' kueki ie'pa wöa Skëköl tö ká chöwëwa.

Ie' tö ie'pa méat wes s'wöbla kë wawër es.

Ie' tö ie'pa er darë'wëwä as ie'pa kë éna iwà ar.

Skëköl tö iché tö ye' tö iwé es

as ie'pa kë er mane'ü ye' a ta ie'pa bua'wëneyö.”§

<sup>41</sup> Isaías tö Jesús olo tajë e' su' ena ie' tö Jesús cheke, e' kueki ie' tö iché es.

<sup>42</sup> Erë tajë judiowak wökirpa erblë Jesús mik. Erë ie'pa suane fariseowakpa yöki, e' kueki kë ie'pa ichéka sulitane kukua. Ie'pa kë kji ikiane tö fariseowakpa tö ie'pa trë'wëshkar ie'pa ñi dapa'wo wé a. <sup>43</sup> S'ditsö tö ie'pa kikekeka e' wa ie'pa wöbatsö bua'ie, Skëköl tö ie'pa kikekeka e' skëie.

*I ché Jesús tö e' wa se' kichatërdaë*

<sup>44</sup> Jesús tö iché aneule: “Wépa erblë ye' mik, esepa kë erblëne ye' ë mik. Ie'pa erblë ye' Yë tö ye' patkë' e' mik ñies. <sup>45</sup> Wépa tö ye' suë, esepa tö ye' Yë tö ye' patkë' e' suë ñies. <sup>46</sup> Ye' dön wes ká olo es. Ye' dë'bitu ká i' a as wépa erblë ye' mik, esepa kë kü'ia wes s'tso' stui a es. <sup>47</sup> Wépa tö ye' ttö tssé, erë kë iwä iwä iütëne, esepa kë kichatëpa ye' wák tö. Ye' kë dë'bitu ká i' a s'ditsö kichatök. Ye' dë'bitu

† 12:15 Zacarias 9.9    ‡ 12:38 Isaías 53.1    § 12:40 Isaías 6.10



s'ditsö tsatök. <sup>48</sup> Wépa tö ye' watekettsa, kë tö ye' ttö dalöie, esepa kkatökwak tso'tke, e' tö ie'pa kichaterattsä. Ttë yë'bak ye' tö, e' kë klöne ie'pa wa, e' kuëkj mik ká i' erkewatke, etä ie'pa kichatërdattsä. <sup>49</sup> Ye' kë wä i' yëule ye' wák er wa. I cheke ye' tö, e' chekeyö wës ye' Yë tö ye' patkë'bitü, e' tö ye' patkë' ichök es. E' kuëkj ye' ttö dör mokjé. <sup>50</sup> Ye' wä ijcher tö i' ché ie' tö e' tö sene michoë mé. Es i' chekeyö, e' chekeyö wës ye' Yë tö ye' ké ichök es."

**13**

*Jesús tö ittökatapa klö skué*

<sup>1</sup> Judiowak Yëpa Yërulune Egipto e' këwö dökewatke bule es. Jesús wä ijcher tö ie' tö ká i' mekeattke ta imichone iyé ska, e' këwö dewatke. Wépa dör ie' icha tso' ká i' a, e'pa dalër këkraë ie' éna. Es ie'pa dalër michoë ie' éna këkraë.

<sup>2</sup> Jesús ena ittökatapa tso' chkök nañewe. Ie'pa eköl kië Judas, e' dör Simón Iscariote e' alä. Bé tö ie' këtke ibikeitsök Jesús wömüttsä.

<sup>3</sup> Erë Jesús wä ijcher tö iyé tö i' kës këwö mé iulä a. Nies ie' wä ijcher tö ie' dë'bitü Skëköl ska' e' mitkene ee. <sup>4</sup> Es ie' e' kékä wé ie'pa tso' chkök ee, ta ipaio kikké yétsaitö tã datsi' ukuö e' pasiwöle, ese muëwäitö e' kipa mik. <sup>5</sup> E' ukuökj tã di' téitö kulé' a tã ie' tö ittökatapa klö skuémi. Datsi' ukuö tso' iwä moule e' kipa mik, e' wa ittökatapa klö pasiwéitö.

<sup>6</sup> Mik Jesús mi' Simón Pedro klö skuök, etä e' tö ie' a' iché:

—A Skëképa, be' dör sa' wöbla'ukwak. ¿Wës e' tö ye' klö skuémi?

<sup>7</sup> Jesús tö iüüté:

—Í uk ye' tso' e' wä kë ane be' éna i'ñe, erë i' ukuökj tã be' éna iwä ardaë.

<sup>8</sup> Etä Pedro tö iché ie' a':

—jKë ye' tö kawö mepa be' a' as be' tö ye' klö skuö!

Jesús tö iüüté:

—Ye' kë tö be' klö skué, e' tã be' kë döpaia ye' ttökataie.

<sup>9</sup> Simón Pedro tö iché ia:

—A Skëképa, e' dör es e'ma ye' klö skuö. jNies ye' ulä ena ye' wökir e' kës skuö!

<sup>10</sup> Erë Jesús tö iüüté:

—Yi kuétke ñiköl pa sunetke maneneë, ese kë kawötã kuöwëne, iklö ë kiane skué. A' kibiiepa tso'tke maneneë, erë eköl dur a' shüa, e' kë dör manene.

<sup>11</sup> Ie' wä ijcher tö yi tö iwömekettsä, e' kuëkj ie' tö iché: "eköl dur a' shüa, e' kë dör manene."

<sup>12</sup> Jesús tö ittökatapa klö skué one tã ipaio kikké iékaneitö tã imía e' tkésërne mesa o'mik tã ichéitö:

—¿Í wé ye' tö a' a, e' wä ane a' éna? <sup>13</sup> A' tö ye' kië S'wöbla'ukwak ö Skëképa, es je' idir,

ye' dör e'. <sup>14</sup> Ye' dör a' wöbla'ukwak, ye' dör a' kékëpa, erë ye' e' wöëwa dö diöshet a' klö skuök wës kanë méso es. E' yitã a' ké e' wöökwa dö diöshet ñi yökj ñi kimum. <sup>15</sup> Í wé ye' tö a' wörkj, e' wä kkachéyo a' a' as a' tö iwakaneü es. <sup>16</sup> Mokj ye' tö a' a' iché tö kanë mésopa kës, esepa kë dör iwökirpa tsatã. Nies yi patkéule, ese kë dör yi tö ipatké ese tsatã. <sup>17</sup> Ttë e' wä ane a' éna tã iwawé a' tö es, e' tã ayécha e' dör buaë a' a.

<sup>18</sup> "Kë ye' ku' a' ulitane chök. Ye' tö a' shukitbak, e' kuëkj ye' wä ijcher buaë wës a' dör. Erë Skëköl yëkkuö tö iché: 'wépa chköke ye' tã, e' isie alé eköl míane ye' bolökje.' Ttë e' kawötã wä tkök es. <sup>19</sup> E' ché ye' tö a' a' kam iwä tkö e' yökj. Es mik iwä tka, etä a' tö iklö'weraë mokj tö Skëköl tö ye' patkë'bitü. <sup>20</sup> Mokj ye' tö a' a' iché tö yi tö yi patkekeyö, ese kiekewä er bua' wa, ese tö ye' kiekewä er bua' wa. Nies yi tö ye' kiekewä er bua' wa, ese tö yi tö ye' patkë'bitü e' kiekewä er bua' wa."

*Jesús tö iché Judas tö ye' wömerattsä (Mateo 26.20-25; Marcos 14.17-21; Lucas 22.21-23)*

<sup>21</sup> Jesús tö iché one tã ichkenewä tã ichéitö ittökatapa a' yësyésé:

—Mokj ye' tö a' a' iché tö a' eköl tö ye' wömerattsä.

<sup>22</sup> Ittökatapa ñi suéka. Ie'pa kë wä ijcher tö yi chök ie' tso'. <sup>23</sup> Ie'pa eköl dalër taië Jesús éna, e' tkër io'mik tsjnet ie'pa chköke e' dalewa. <sup>24</sup> Ie' a' Simón Pedro ulä kkaché tö ichakö yi cheke Jesús tö. <sup>25</sup> Ie' kí e' skéwä tsjnet Jesús skä tã ichakéitö ia:

—A Skëképa, ¿yi idir?

<sup>26</sup> Jesús tö iüüté:

—Ye' tö pan takla nuwëke udiö a, tã yi a' yö imé e' idir.

E' bet tã ie' tö pan takla nuwéka tã iméitö Judas dör Simón Iscariote alä e' a. <sup>27</sup> Judas tö pan takla ñé tã bet Satanás tkawä ie' er a. Jesús tö iché ia:

—Í wëke be' tö e' ú bet.

<sup>28</sup> Erë ie'pa tso' chkök mesa o'mik, e'pa kë éna iane i' kuëkj Jesús tö iché es. <sup>29</sup> Judas dör inuköl blökwak, e' kuëkj Jesús ttökatapa welepa tö ibikeitsé tö Jesús tö Judas ké ilé tã uk ikawö tkö'wëkerakitö e' a' ö ilé kakmuk s'siarëpa a.

<sup>30</sup> Es Judas tö pan ñé tã imía. Mik imía, etä kã detke nañewe.

*Jesús tö ttë dalöiëno pa'ali mé ittökatapa a*

<sup>31</sup> Judas mía e' ukuökj tã Jesús tö iché:

—Ye' dör S'ditsö Alä e'. I'ñe ye' olo wërdaë, ñies Skëköl wäk olo wërdaë ye' kj. <sup>32</sup> Skëköl olo wërdaë ye' kj, e' tã ie' wák tö ye' olo kkacheraë sulitane wörkj, e' wëraëitö bet. <sup>33</sup> A ala'r, kë ye' serpaia a' tã kã taië. A' tö ye' yuleraë, erë i' yë'bak ye' tö judiowak wökirpa

a, e' cheke ye' tò a' a' ñies: a' kě dōpa wé ye' mi'ke eę. <sup>34</sup>Ye' tò ttè pa' alimeke a' a' dalöie, e' dör i': a' ñi dalëritsōk. A' kawōtā ñi dalëritsōk węs ye' tò a' dalëritseke es. <sup>35</sup>A' ñi dalëritsōke es, e' tã sulitane wā ijcherdaē tò a' dör ye' ttōkatapa.

*Pedro icheraē tò ie' kě wā Jesús suule*  
(Mateo 26.31-35; Marcos 14.27-31; Lucas 22.31-34)

<sup>36</sup>Simón Pedro tò ichaké Jesús a:  
—A Skëképa, ¿wé be' mi'ke?  
Ie' tò iiüté:  
—Kě be' dōpami ye' itōkī wé ye' mi'ke eę, erē aishkuō tã be' dōmi ye' itōkī.

<sup>37</sup>Pedro tò iché ie' a:  
—A Skëképa, ¿i kuękī ye' kě mi'pa be' itōkī i' tã? ¿Ye' e' chétke duōkwā be' tsatškōk!

<sup>38</sup>Jesús tò iiüté:  
—¿Mokī be' e' chétke duōkwā ye' tsatškōk? Ye' be' a' iché yēsýsē tò kam dakro ar, e' yōkī bō icheraē mañatōkicha tò be' kě wā ye' suule.

**14**

*Shkowa Skëkōl ska' e' ñalé dör Jesús*

<sup>1</sup>E' ukuōkī tã Jesús tò iché ittōkatapa a:  
“Kě a' tkinuk. A' erblō Skëkōl mik. Ñies a' erblō ye' mik. <sup>2</sup>Ye' yé u blatëule tajé. Ye' mi'ke iwakanéuk kewe a' yōkī. E' kě chōpa es, e' ma kě ye' wā iyène. <sup>3</sup>Ye' miā tã mik iwakaneone, etã ye' datskene a' tsukmi as a' mi' senuk wé ye' tkēr ee. <sup>4</sup>Wé ye' mi'ke e' ñalé suule a' wā buaé.”

<sup>5</sup>Tomás tò ie' a' ichaké:  
—A Skëképa, kě sa' wā ijcher wé be' mi'ke tã ¿wes sa' a' ñalé armī?

<sup>6</sup>Ie' tò iiüté:  
—Ye' dör ñala e'. Ì dör mokīē ena sene michoē e' dör ye'. Kě yi dōpa S'yé ska', e' kě dör ye' wa e' tã. <sup>7</sup>A' wā ye' suule mokīē, e' tã es a' wā ye' Yé suule. I' tãmi a' wā ie' suule, mokīē isuętke a' tò.

<sup>8</sup>Felipe tò iché iā:  
—A Skëképa, S'yé kkachō sa' a' tã e' ē dör wē'.

<sup>9</sup>Jesús tò iiüté:  
—A Felipe, kã tajé ye' sené a' tã, ¿wes kě be' wā ye' suule? Yi tò ye' sué, ese tò S'yé sué ñies. ¿Wes be' ichëmi, 'S'yé kkachō sa' a'? <sup>10</sup>A Felipe, ¿be' kě wā iklōgne tò ye' ena S'yé, sa' bōl dör ekōl ē? Ì chekeyō a' a, e' kě chekū ye' wā ye' wák er wa. Ì kōs kanewekeyō, e' kaneweke S'yé serke ye' a' e' tò. <sup>11</sup>Iklō'ú tò ye' ena S'yé sa' bōl dör ekōl ē. Ì chekeyō a' a, e' kě klō'wé a' tò, e' tã iklō'ú i kě or yi a, ese wéyo e' wa. <sup>12</sup>Mokī ye' tò a' iché tò wépa erblé ye' mik, esepa tò i weke ye' tò, e' weraē ñies. Erē ye' mi'ke S'yé skā e' kuękī i oule ye' wā, ese weraē ie'pa tò, ye' wā ioule e' tsatã. <sup>13</sup>Ì kōs kiekie a' tò ye' ttō wa, e' weraëyō as

S'yé olo tajé e' kkeyer ye' dör ilā e' wa. <sup>14</sup>Ì kōs kiekie a' tò ye' a, e' weraëyō.

*Jesús kablé Wikōl Bats'e'r patškōk*

<sup>15</sup>“A' éna ye' dalër, e' ma ye' ttè dalöieno e' dalöieraē a' tò. <sup>16</sup>Ye' tò ikieraē S'yé a' tã ie' tò iskã patkeraē ekōl a' kīmuk, e' dör Sulaiōkwak, ie' tso'ie a' tã kekraē. <sup>17</sup>Ie' dör Skëkōl Wikōl. Ie' tò S'yé ttō mokī e' kkacheraē a' a. Wépa kě tò Skëkōl dalöie esepa kě a' iWikōl wënuk ena ie'pa kě wā isuule, e' kuękī ie'pa kě a' ikinukwā e' kīmoie. Erē a' wā ie' suule. Ie' serke a' tã, ñies ie' serdaē a' er a.

<sup>18</sup>“Ye' kě tò a' mepaät s'jchu'rlaie. Ye' datskene a' ska'. <sup>19</sup>Kukur tã wépa kě dör ye' icha esepa kě tò ye' suepaia. Erē a' tò ye' suerane. Ye' duowā shkënekane, e' batamik sene michoē dōraē a' ulā a. <sup>20</sup>Mik e' kēwō de, etã a' wā ijcherdaē tò ye' ena S'yé sa' bōl dör ekōl ē. Ñies a' wā ijcherdaē tò a' ena ye', se' dör węs wák ekōl ē es. <sup>21</sup>Wépa tò ye' ttè dalöieno klō'weke tã iwā iųteke, esepa éna ye' dalër. Wépa éna ye' dalër, esepa dalërdaē ye' Yé éna. Ñies ye' éna ie'pa dalërdaē ena ye' e' kkachōraē ie'pa a.

<sup>22</sup>Etã ekōl skā kiē Judas, kě dör Judas Iscariote, e' tò ie' a' ichaké:

—A Skëképa, ¿wes be' e' kkachōmi sa' a, erē be' kě e' kkachōpa sulitane a'?

<sup>23</sup>Ie' iiüté:  
—Wépa éna ye' dalër, esepa tò ye' ttè iųteraē. Ie'pa dalëritseraē ye' Yé tò. Ie' ena ye', sa' dōraē ie'pa ska' senuk ie'pa tã. <sup>24</sup>Wépa kě éna ye' dalër, esepa kě tò ye' ttè iųtepa. Ttè chekeyō a' a, e' kě dör ye' wák ttè, e' dör Skëkōl tò ye' patkē', e' ttè.

<sup>25</sup>“I' kōs chekeyō a' a, e' chekeyō ye' tso'ia a' tã e' dalewa. <sup>26</sup>Erē Sulaiōkwak, e' dör Wikōl Bats'e'r, e' patkeraē Skëkōl tò a' a ye' ttō wa. Ì kōs yé' ye' tò a' a, e' wa ie' tò a' wōbla'weraē as a' éna iarne.

<sup>27</sup>“Sene bërē méatyō a' a, e' datşę ye' wā. E' dör ichōk kě dör węs sene bërē cheke wépa kě tò Skëkōl dalöie esepa tò es. E' kuękī kě a' tkinuk, kě a' suanuk. <sup>28</sup>A' wā ittşeuile tò ye' tò a' a' iché tò 'ye' mi'ke erē ye' datskene a' ska'. A' éna ye' dalër mokī, e' tã a' tts'e'rdāē buaé tò ye' mi'ke S'yé ska', e' dör ye' tsatã e' kuękī. <sup>29</sup>I' tã ye' tò ichétke a' a' kam iwā tkō e' yōkī as mik iwā tka, etã a' erblō ye' mik.

<sup>30</sup>“Bē dör kã i' wōkir, e' datşetke bet, e' kuękī ye' kě a' kawō tã'ia ttōk a' tã tajé. Ie' kě diché tã' e' aloka ye' kī yēs. <sup>31</sup>Erē ye' tò iwé węs ye' Yé tò ye' ka' iųk es as sulitane tò isaų tò ye' Yé dalër ye' éna.

“Se' e' yōlur ię, mishkatke.

**15**

*Jesús dör węs uva kicha es*

<sup>1</sup>“Ye' dör uva kicha chōkle, e' kaneweke ye' Yé tò. <sup>2</sup>Iulā wé kě wör, ese télor ye' Yé

tö. Iulà wör tã' kôs, ese paiklëloritö buaë maneneë as ikí wör tajë. <sup>3</sup> A' pairiuletke maneneë ttë wa ye' tö a' wöbla'wé e' wa. <sup>4</sup> A' senu' ye' tã ñita, etã ye' serdaë a' tã ñita. Mik ulà kã ku'ia iwí mik, etã kã iwöria. Kã iwönuk iwák ë mik. Es ñies a' kã ku' ye' mik, etã kã a' wöpa.

<sup>5</sup> "Ye' dör uva kicha. A' dör iulà. A' kã ku' ye' mik, etã kã i onuk a' a' yës. E' kuëkj wépa serke ye' mik, ñies ye' serke e'pa a', esepa wörke tajë. <sup>6</sup> Wépa kã serku' ye' mik, esepa tãrdattsã kéu bánet tã isinewã wës uva kicha ulà sir es. Iulà ese shtekekã uyëwã bö' a' tã iñanewa.

<sup>7</sup> "A' serke ye' mik, ñies ye' ttë tso'ie a' er a, e' tã i kôs kiane a' kã, e' kiö Skëköl a' tã imeraëitö a' a. <sup>8</sup> Mik i kiane Skëköl kã, ese wé a' tö, etã e' dör wës uva wör es. E' tö ye' Yë kikekëkj tajë. E' wa iwënewã tö mokj a' dör ye' ttökatapa. <sup>9</sup> Ye' éna a' dalër wës ye' Yë éna ye' dalër es. A' senu' kekraë ye' mik as ye' tö a' dalëritsö kekraë. <sup>10</sup> Ye' ttë dalöiëno e' dalöieke a' tö, e' tã ye' tö a' dalëritsë michoë. E' dör wës ye' tö ye' Yë ttë dalöiëno e' dalöieke tã ye' tö ye' dalëritsë michoë es.

<sup>11</sup> "I' kôs chekeyö a' a' as a' tsts'r buaë wës ye' es. Ye' kã ikiane tö a' tsts'r buaë shute. <sup>12</sup> Ye' ttë dalöiëno e' dör i': a' ñi dalëritsö wës ye' tö a' dalëritseke es. <sup>13</sup> Se' e' mettsã duökã yile dalër se' éna, e' skéie, e' tã kã se' éna yi dalënu' e' tsãtã. <sup>14</sup> I' uk ye' tö a' ké, ese weke a' tö, e' tã a' dör ye' sini'pa. <sup>15</sup> I' bikeitseke i' kaneweke kanë wökir tö, ese kã jcher ikanë méso wã. Iwökir kã tö ipaketa' ie' a. Erë i' kôs yé' ye' Yë tö ye' a, e' chényö a' a, e' kuëkj a' kã kiëiyö ye' kanë mésopa, a' kiekeyö ye' sini'pa. <sup>16</sup> A' kã wã ye' shukite, e' skéie ye' tö a' shukit. Ye' tö a' patkeke as a' mi' wönuk buaë wës uva ulà es, erë iwö ese tso'ie kekraë. Es i' kôs kié a' tö ye' Yë a' ye' ttö wa e' meraëitö a' a. <sup>17</sup> Ye' ttë dalöiëno dör i': a' ñi dalëritsö.

*Pë' kã erblëne Jesús mik esepa tö Jesús ttökatapa sueraë suluë*

<sup>18</sup> "Wépa kã tö Skëköl dalöie esepa tö a' suëke suluë, e' tã a' éna ianu' tö ie'pa tö ye' su'bak suluë a' yökj kewe. <sup>19</sup> A' chöpa wës ie'pa es, e' ma ie'pa tö a' dalëritsëmi wës ie'pa ñi dalër es. Erë ye' tö a' shukit ie'pa shua, e' kuëkj i'ñe tã a' kã dör wës ie'pa es. E' kuëkj ie'pa éna suluë a' ar. <sup>20</sup> Ye' tö iyë'bak a' a' tö 'ikanë méso kã dör iwökir tsãtã, e' anu' a' éna. Ie'pa tö ye' we'iké siarë, e' tã ie'pa tö a' we'ikeraë siarë. Ie'pa tö ye' ttö dalöie, e' tã ñies ie'pa tö a' ttö dalöieraë. <sup>21</sup> A' dör ye' ichapa. Ie'pa kã wã ye' Yë tö ye' patkë' e' suule. E' kuëkj i' kôs suluë wambleraë ie'pa tö a' kã.

<sup>22</sup> "Ye' kã döpa kã i' a, ye' kã ttë paköpa ie'pa a, e' ma ie'pa kã kã i' sulu nuí tã'. Erë i'ñe

tã ie'pa kã tköpashkar inuí ulà a. <sup>23</sup> Wépa tö ye' suëke suluë, esepa tö ye' Yë suëke suluë ñies. <sup>24</sup> I' kã or yi a' ese kã úpayö ie'pa wörki, e' ma ie'pa kã kã i' nuí tã'. Erë ie'pa tö isu'bak erë ie'pa tö ye' suë suluë, ñies ye' Yë suë suluë ie'pa tö. <sup>25</sup> Erë itka es as i' tso' kitule Skëköl yëkkuö kã, e' wã tkö es, e' tö ichë: 'Ie'pa tö ye' suë suluë kã wã tã'."

<sup>26</sup> "Ye' tö Sulaiökwaq tso' ye' Yë ska', e' patkeraë a' a, e' dör Skëköl Wiköl. Ie' dör Skëköl ttö mokj chökwaq. Mik ie' de, etã ie' tö ye' ttë cheraë. <sup>27</sup> A' manetwã ye' tã kuaë, e' kuëkj a' tö ye' ttë cheraë ñies.

**16**

<sup>1</sup> Ttë e' kôs chéyö a' a' as a' erblö ye' mik e' kã olo'yö a' tö. <sup>2</sup> Ie'pa tö a' uyerattsã se' ñi dapa'wö wé a. Mokj kawö dökwatke tã yile tö a' ttéwa, e' tã e' tö ibikeitseraë tö es ie' tso' Skëköl kanë uk. <sup>3</sup> Ie'pa kã wã ye' ena ye' Yë suule mokj, e' kuëkj ie'pa e' wamblö es. <sup>4</sup> Erë ttë e' chéyö a' a' as mik ikéwö de, etã a' éna iar.

*I' weke Wiköl Batse'r tö, e' pakë*

Ye' tso'ia' a' tã, e' kuëkj kuaë ttë e' kã yëne ye' wã a' a. <sup>5</sup> Erë i'ñe tã ye' mitkene, ye' Yë tö ye' patkë', e' ska'. Erë a' kã tö ye' a' ichakë tö 'z'wé be' mi'ke?' <sup>6</sup> E' skéie a' erianekã tajë, i' ché ye' tö a' a' e' kuëkj. <sup>7</sup> Mokj ye' tö a' a' ichë tö buaë idir a' a' tö ye' mia. Ye' kã mine, e' ma Sulaiökwaq kã döpa a' a. E' kuëkj ye' tö a' a' ichë tö buaë idir a' a' tö ye' mia. Ye' mia, e' tã ye' tö Sulaiökwaq patkeraë a' a. <sup>8</sup> Mik ie' de, etã ie' tö ikkcheraë wépa kã tö Skëköl dalöie esepa a' tö ie'pa e' wamblö sulu. Ñies ie' tö ikkcheraë ie'pa a' tö ye' eköl ë dör yësyësë Skëköl wöa. Ñies ie' tö ikkcheraë ie'pa a' tö ie'pa kichatërdaë aishkuö tã. <sup>9</sup> Ie'pa kã erblöku' ye' mik, e' kuëkj ie'pa dör i' sulu wamblökwaqpa. <sup>10</sup> Ye' mi'kene ye' Yë ska', e' kuëkj kã ye' suëpaia' a' tö. E' wa ikkayëne ie'pa a' tö ye' eköl ë dör yësyësë Skëköl wöa. <sup>11</sup> Bë dör kã i' wakpa wökir e' kichatënetke, e' wa ikkayëne tö ñies ie'pa kichatërdaë.

<sup>12</sup> "Tajë ye' wã i'yi tso'ia' chë a' a, erë i' tã kã a' a' iwã anuk. <sup>13</sup> Erë mik Skëköl Wiköl ttö mokj e' de, etã ie' kã ttöpa iwák er wa. I' tseke ie' tö Skëköl ska', ese cherane tö tö a' a. E' kuëkj ie' tö a' wöbla'weraë ttë mokj kôs ese wa. I' tköraë aishkuö tã, ese cheraëitö a' a. <sup>14</sup> I' tso' ye' er a, ese cheraneitö a' a. Es ie' tö ye' kikeraka. <sup>15</sup> I' kôs tso' ye' Yë er a, ñies e' tso' ye' er a. E' kuëkj ye' tö a' a' iché tö, i' tso' ye' er a, ese cherane Wiköl Batse'r tö a' a.

*Ittökatapa eriane e' manerdattsane tsts'rdane buaë*

<sup>16</sup> "Bërbër setcha, etã kã a' tö ye' suëpaia. Erë e' ukuökj setcha, etã a' tö ye' suëmine."

<sup>17</sup> Ie' ttökatapa welepa ñi chakë:

\* 15:25 Salmos 35.19; 64.4

—Ie' tò iché, 'Bèrbèr setcha età a' kè tò ye' suepaia. Erè ekuölò tà a' tò ye' suèmine.' ¿ì cheke ie' tò es? ¿ìma iwà dör? Nies ie' tò iché tò 'Ye' mi'ke ye' Yé ska.' 18 Ie' iché 'Bèrbèr setcha' ¿ìma e' wà kiane chè? ¿ì ché ie' tò, e' wà kè àne se' énal!"

19 Jesús wà ijcher tò ie'pa éna ie' chakak, e' kuekì ie' tò iché ie'pa a:

—Ye' tò iché a' a: 'Bèrbèr setcha, età a' kè tò ye' suepaia. Erè e' ukuökì setcha, età a' tò ye' suèmine.' ¿E' wà chakeke a' tò ñi a? 20 Mokì yò iché a' a' tò a' juráe kkóchoraè siarè, erè wépa kè tò Skèköl dalòie esepa tstsè'rdáe buaè. Erè a' eriardaè, erè e' manerdattsane tstsè'rdane buaè. 21 Mik alalòk alá kurketke, età ieriane tajè, ikirine e' kéwò de, e' kuekì. Erè mik ilà kune, età ittse'nene buaè. Ie' alá kune e' tò ie' tstsè'weke buaè. E' kuekì ikirine weine siarè e' chowa ie' éna. 22 E' sù ì'ñe tà a' eriärke siarè, erè se' ñi saurane, e' tò a' tstsè'werane buaè shutè. Tstsè'ne buaè e' kè yènuksa yi a' er a.

23 "Mik e' kéwò de, età kè ì kiepaia a' tò ye' a. Mokì ye' tò a' a' iché tò ì koskié a' tò ye' Yé a ye' ttò wa, e' meraèitò a' a. 24 Ikkè tà a' kè wà ì kiule Skèköl a ye' ttò wa, erè ì' tà ikiómmitke ie' a, ikiò ie' a' kèkrae età imerdaè a' a' as a' tstsè'r buaè shutè.

*Jesús e' alékatke pè' kè erblène ie' mik esepa kì*

25 "Ì' kos chéyò a' a, e' chéyò ttè kleaule wa. Erè kawò dórae età kè ye' tò ichéia a' a es. Ye' tò ye' Yé ttè pakeraè a' a wés idör es kè kleaule. 26 Mik e' kéwò de, età e' kiane a' kì e' kieraè a' wákpa tò ye' Yé a ye' ttò wa. E' wà kiane chè tò kè ikianukia tò ye' tò ì kos kiane a' kì e' kiò ye' Yé a. Ie' wák éna a' dalèr tajè, e' kuekì ì kiane a' kì, ese kièmi a' wákpa tò ie' a ye' ttò wa. 27 Ie' éna a' dalèr, e' kuekì a' wákpa tò ikièmi ie' a. A' éna ye' dalèr, ñies a' tò iklò'weke tò ye' dè'bitu ie' ska', e' kuekì ie' éna a' dalèr. 28 Ye' datse ie' ska' e' dè' ká ì' a, ì'ñe tà ye' mitkene ie' ska'."

29 Ittòkatapa tò iché ie' a:

—Ì' tà be' tso' ichòk a' a wés idör es kè kleaule. Be' kè ku' ichòkia ttè kleaule wa. 30 Ire' sa' wà ijcher tò be' wà íyi kos e' jcher. Dò ì chakak sa' éna be' a, e' jchertke be' wà. E' kuekì sa' tò iklò'wé tò be' datse Skèköl ska'.

31 Jesús tò iüté:

—¿Ire' a' tò iklò'wé? 32 A' tò ye' meraat ekòria. A' michone ekòl ekòl a' u a. Kawò e' datse, e' detke ì' tà. Erè mokì ye' kè ku' ekòria. Ye' Yé tso' ye' ta. 33 E' kos chéyò a' a' as a' ser bèrè a' batsulewa ye' mik e' wa. Ká ì' kì a' weirdaè siarè. Erè a' er kuú, iye' e' ali'kabak ì sulu diché kì!

**17**

*Jesús ikié S'yé a ittòkatapa kì*

1 Ttè ekkè ché Jesús tò one tà iká sué ká jai a' tà ichéitò: "A Yéwòla, ye' kéwò detke. Ye' dör be' alá, e' olo kkachò as be' olo kkayèr sulitane a ye' wa. 2 S'ditsò ulitane kéwò me' be' tò ye' a' as sene michoè mù ye' tò, wépa kos me' be' tò ye' a, esepa a. 3 Sene michoè e' dör tò ie'pa bats buaè be' dör Skèköl chòkle ekòl è e' mik, ñies ye' dör Jesucristo patkè' be' tò e' mik.

4 "Kanè me' be' tò ye' a wè ká ì' a, e' wétkeyò. E' wa ye' tò be' olo kkayè'bitu. 5 E' kuekì ì' tà, a yéwòla, ye' tò be' a' ikiè tò mik ye' dene be' ska', età ye' olo kkachò, wés be' tò ye' olo kkayè' mik ye' bak be' tà kam ká ì' yòr e' yòki ete s.

6 "Wépa shukitbak be' tò ká ì' wakpa shua mè ye' a, e'pa a ye' tò ikkaché tò be' dör yi. Be' ichapa idir, e'pa me' be' tò ye' a. Ie'pa tò be' ttè iuteke. 7 Ì'ñe tà ie'pa wà ijcher tò ì kos wéyò, ñies ì kos chéyò, e' me' be' tò ye' a. 8 Ttè me' be' tò ye' a pakè, e' pakéyò ie'pa a, tà ie'pa tò iklò'wé. Ie'pa wà ijcher tò mokì ye' datse tò be' ska' patkè' be' tò.

9 "Ye' tso' be' a' ikiök ie'pa kì. Ye' kè ku' ikiök wépa kè tò be' dalòieta' esepa kì. Ye' tso' ikiök wépa me' be' tò ye' a esepa kì, ie'pa dör be' icha e' kuekì. 10 Wépa kos dör ye' icha, esepa dör be' icha. Nies be' icha kos esepa dör ye' icha. Ie'pa wa ye' olo tajè e' kkayène.

11 "Kè ye' serpaia tajè ká ì' kì. Ye' mitkene senuk be' ska'. Erè ie'pa ate ká ì' kì. A Yéwòla batse'r, be' dalò tajè, be' diché tajè me' be' ye' a, e' wa ie'pa kkò'nú as ie'pa ser ñita wés wák ekòl è es wés be' ena ye' es. 12 Mik ye' tso'ia' ká ì' a' ie'pa ta, età ye' tò ie'pa kkò'né tsatké diché me' bõ ña e' wa. Ie'pa kos tsatkéyò. Wé wómenettsabak weinuk, e' è e' yé'ttsa sa' shua. Ie' è weinewa as iwà tkò wés be' yékuò tò iché es.

13 "Író ye' mitke be' ska', erè ttè ì' chekyò, ye' tso'ia' ká ì' a' e' dalewa, as ie'pa tstsè'r buaè mokìe wés ye' es. 14 Be' ttè yé'yò ie'pa a, erè wépa kè tò be' dalòie esepa tò ie'pa sueke suluè. Ye' kè dör wés ká ì' wakpa es, e' sù ye' ttòkatapa kè dör wés ie'pa es. E' kuekì ká ì' wakpa tò ie'pa sueke suluè. 15 Ye' kè ku' ikiök be' a' tò ie'pa yótsa ká ì' kì. Ye' tso' be' a' ikiök tò ie'pa blò bè yòki. 16 Ye' kè dör wépa kè tò be' dalòie esepa ekòl, ñies ye' ttòkatapa kè dör ie'pa es. 17 Ie'pa klòybò be' wák è a' be' ttè wa. Be' ttè dör mokì. 18 Ye' tso' ie'pa patkòk ká ì' wakpa shua, wés be' tò ye' patkè' ká ì' wakpa shua es. 19 Es ye' e' müttsa be' a' as ie'pa e' müttsa mokì be' a' ñies.

20 "Ye' kè ku' ikiök be' a' ie'pa è kì. Erè wépa erblòmi ye' mik ie'pa ikképa ttò batamik, ñies esepa kì ye' tso' be' a' ikiök. 21 Ye' tò be' a' ikiè as ie'pa dõ wés wák ekòl è es. Be' ena ye', se' dör wák ekòl è. Es ye' tò be' a' ikiè tò ie'pa dõ wés wák ekòl è es se' tà wés se' dör ekòl è es, as ká ì' wakpa tò iklò'ù mokì tò be' tò

ye' patkè'. <sup>22</sup> Diché me' be' tò ye' a, e' mé ye' tò ie'pa a as ie'pa dô wés wák ekòl è es, wés be' ena ye', se' dór ekòl è es. <sup>23</sup> Ye' bàtsè buaè ie'pa mik, ñies be' bàtsè buaè ye' mik. Es idir as ie'pa dô mokjè wés wák ekòl è es. E' dór es, e' tã kã i' wakpa wa ijcherdaè tò be' tò ye' patkè'. Ñies ie'pa wa ijcherdaè tò be' éna ye' ttòkatapa dalèr tajè wés be' éna ye' dalèr es.

<sup>24</sup> "A yèwò, be' tò ie'pa me' ye' a. Ye' kï ikiane tò aishkuò tã ie'pa dômi ye' tã, wé ye' tso' eg, as ie'pa tò olo me' be' tò ye' a, e' saù. Kãm kã i' yör, etã wake' be' éna ye' dalèr tajè, e' kuekï olo e' me'bak be' tò ye' a. <sup>25</sup> A Yèwò, be' dór yèsyèsè. Wépa kè tò be' dalòie esepa kè wa be' sùule, erè ye' wã be' sùule. Ñies ie'pa ikkèpa wã ijcher tò be' tò ye' patkè'bitù. <sup>26</sup> Ye' tò ie'pa a ikkayè' tò be' dór yi, e' kkachekeiyò ie'pa a as ie'pa ñi dalèritsò wés be' tò ye' dalèritseke es, ñies as ye' dô senuk ie'pa er a."

**18**

*Judiowak tò Jesús klò wéwã*

(Mateo 26.47-56; Marcos 14.43-50; Lucas 22.47-53)

<sup>1</sup> Jesús tté S'yè tã one, tã imía ittòkatapa tã di'la kiè Cedrón, e' wishèt. Ie'pa de wé kal klò tso' tkèule eg. <sup>2</sup> Eè Jesús krá ñi dapa'uk ittòkatapa tã, e' kuekï Judas tò ie' wòmekettsã, e' wã kã e' sùule buaè. <sup>3</sup> E' itòki Judas demi eg Roma ñippòkwakpa tã tajè. Ñies Skèkòl wé, e' shkèkipa de ie' tã. E'pa patkè judiowak sacerdotepa wòkirpa ena fariseowakpa tò. Ie'pa de Judas tã bò'wò kï ena kuàtak sí wònarke tajè ese kï, ñies tabè damirak iwã tajè. <sup>4</sup> I wamblèrketke ie' tã, e' kos jcher buaè ie' wã, e' kuekï ie' dettsã tã ichaké ie'pa a:

—¿Yi yuleke a' tò?

<sup>5</sup> Ie'pa iüté:

—Jesús Nazaret wak, e' yuleke sa' tò.

Jesús tò iché:

—Ye' idir.

Judas tò ie' wòmekettsã, e' tso' ñippòkwakpa tã. <sup>6</sup> Mik Jesús tò iché: "Ye' idir", e' wòshã tã ie' skéurak tsikka tã ianeròrak ìskï. <sup>7</sup> Jesús tò iskã chaké ie'pa a:

—¿Yi yuleke a' tò?

Ie'pa tò iüté:

—Jesús Nazaret wak.

<sup>8</sup> Jesús tò iskã iüté:

—Ye' tò ichétke a' a tò ye' idir. A' ye' yuleke, e' ma wépa tso' ye' tã, e'pa múat bèr.

<sup>9</sup> Ie' tò iché es as ttè yè'itò iyè a, e' wã tkò. Ie' tò iyè': "wépa mé be' tò ye' a, esepa kè weinuk yès." <sup>10</sup> Etã Simón Pedro wã tabè shkò, e' yéttsaitò tã sacerdotè kibi kanè méso, e' kukuòña ulà bua'kka téttsã, e' kiè Malco. <sup>11</sup> Jesús tò iché Pedro a:

—Be' tabè blòwane ikkuòlit a. Ye' Yè tò íyi bacha'bacha i' mé ye' a, e' tã ¿wés e' kè yepawayó?

*Jesús mítser Anás wòrkï*

(Mateo 26.57-58; Marcos 14.53-54; Lucas 22.54)

<sup>12</sup> Etã Roma ñippòkwakpa ena iwòkir kibi ena Skèkòl wé shkèkipa tò Jesús klò'wéwã muéwã iulã a. <sup>13</sup> Tã itsémirakitò kewè Anás u a. Anás dór Caifás nuakï. Duas e' wa Caifás dór judiowak sacerdotè kibi. <sup>14</sup> Caifás e' tò iyè' judiowak wòkirpa a tò buaè idir ie'pa a tò wém ekòl è ttèwã ie'pa ulitane skéie.

*Pedro iblé tò kè ie' wã Jesús sùule*

(Mateo 26.69-70; Marcos 14.66-68; Lucas 22.55-57)

<sup>15</sup> Simón Pedro ena Jesús ttòkata skà ekòl, e'pa bòl mirwã Jesús itòki. Ittòkata tso' Pedro wapieie, e' sùule buaè sacerdotè kibi wã, e' kuekï ie' dewã buaè Jesús tã sacerdotè kibi upa a. <sup>16</sup> Erè Pedro atè dur u'rkï ukkò tkèr kañika eg. Etã ittòkata sùule sacerdotè kibi wã, e' biteane ttòk tayè tso' ukkò kkò'nuk e' tã as Pedro dòwã. Etã es Pedro dewã. <sup>17</sup> Etã tayè dur ukkò kkò'nuk, e' tò Pedro a ichaké:

—¿Yène be' dór wém klònewã e' klé?

Ie' tò iüté:

—Au, ye' kè dór iklé.

<sup>18</sup> Kã dór seseè, e' kuekï sacerdotè kanè mésopa ena Skèkòl wé shkèkipa tò bò' batséka baiklé. Eè Pedro de bò' baiklòk ñies ie'pa tã.

*Sacerdotè kibi tò Jesús chaké*

(Mateo 26.59-66; Marcos 14.55-64; Lucas 22.66-71)

<sup>19</sup> Anás bak sacerdotè kibi e' tò Jesús chaké ittòkatapa kï ena ttè wa ie' s'wòbla'wéke, e' kï. <sup>20</sup> Jesús tò iüté:

—Kekraè ye' ttè sulitane kukua. Kekraè ye' tò s'wòbla'wé se' ñi dapa'wò wé kos a ena Skèkòl wé a wé sulitane ñi dapa'uke eg. Kè ye' wã ì yèule akir. <sup>21</sup> ¿Iòk be' tò ye' chaké? Í chéyò e' jcher wépa wã ye' tseùle ichòk, esepa wã. Ie'pa a ichakò.

<sup>22</sup> Mik e' ché Jesús tò, etã Skèkòl wé shkèkipa ekòl tò ie' ppé iwò kï iulatò wa tã iché iã:

—¿Wés be' tò sacerdotè kibi iütèmi es?

<sup>23</sup> Jesús tò iüté:

—Í chéyò, e' dór suluè, e' ma ichò wé isulune. Erè ì ché ye' tò e' dór mokï, e' tã ¿ì kï be' tò ye' ppé?

<sup>24</sup> E' ukuòkï tã Anás tò Jesús patkèmi moule Caifás ska', e' dór judiowak sacerdotè kibi.

*Pedro tò ibléne tò kè ie' wã Jesús sùule*

(Mateo 26.71-75; Marcos 14.69-72; Lucas 22.58-62)

<sup>25</sup> E' dalewa Pedro duriã bò' baiklòk tã ichakérakitò:

—¿Yène be' dór wém klònewã e' klé ekòl?

Ie' iüté:

—Au, ye' kè dór ie' klé.

<sup>26</sup> E' ukuökí tã sacerdote kibi kanè méso kukuõña tèa' Pedro tò, e' yami ekòl tò ie' a' iché:

—Ye' tò be' sué ie' tã, kal klõ tso' tkèule ee.

<sup>27</sup> Pedro tò iskà bléne tã e' wõshã tã dakro ane.

*Jesús míts'er Pilato wörki*

*(Mateo 27.1-2,11-14; Marcos 15.1-5; Lucas 23.1-5)*

<sup>28</sup> Bla'mi, diwö tsirketke, etã Jesús yettsarakitò Caifás u a' tsèmi judiowak wökir kiè Pilato, e' ska'. E' kè dör judiowak. Ie' tkèulekã Roma wakpa wã judiowak wökirie. Eë ie'pa tò Jesús tsèmi. Judiowak éna Ie'pa Yépa Yèrulune Egipto e' kéwö tkõ'wãk, e' kuëkí ie'pa kè e' ia'wãkã. Ie'pa a' tã shkèwã yi kè dör judiowak ese u a' e' dör ñã, e' kuëkí ie'pa kè dè'wã Pilato u a'. <sup>29</sup> E' kuëkí ie' dettsã ie'pa tã ttök, tã ie'pa a' ichakéitò:

—¿Í ki a' tò wèm e' k'kateke?

<sup>30</sup> Ie'pa tò iüté:

—Wèm e' kè tò íyi sulu wamblõpa, e'ma sa' kè wã ie' mène be' ulã a'.

<sup>31</sup> Ie' tò ie'pa a' iché:

—Itsúmine tã ishulõ wës a' wakpa ttè dalöiëno e' tò iché es.

Erè judiowak wökirpa tò iché:

—Kè sa' a' kawõ mène s'ttókwa.

<sup>32</sup> Mik e' ché ie'pa tò es, etã e' wa Jesús tò wës ie' duõrawã e' yè', e' wã tka.\* <sup>33</sup> Pilato míane weshkë tã Jesús kiéitò tã ichakéitò:

—¿Be' dör judiowak blú?

<sup>34</sup> Jesús tò iché ie' a':

—¿E' chaké be' tò be' wák er wa, ö yile tò ye' ché be' a' e' kuëkí?

<sup>35</sup> Pilato tò iüté:

—¿Ttsèskua tã ye' dör judiowak? Be' wák ditsëwõpa ena sacerdote wökir kibipa, e'pa wã be' debitu ye' a' shulè. ¿Í sulu wamblébõ?

<sup>36</sup> Jesús tò iüté:

—Moki ye' dör blu', erè ì blúie ye' tso' e' kè dè'kã kã í' kí. Imú dör es, e'ma ye' ttókatapa ñippõmi as judiowak wökirpa kè tò ye' klõ'wëwã. Erè ì blúie ye' tso' e' kè dè'kã kã í' kí.

<sup>37</sup> Etã Pilato tò ie' a' ichaké:

—¿E'ma moki be' dör blu'?

Jesús tò iüté:

—Tõ, wës be' iché e'ma es idir. Ye' dör blu'. Ye' kune' kã í' a' ttè moki e' choie, e' kuëkí ye' dè'bitu. Wëpa éna ttè moki dalèr esepa kos tò ye' ttè iuteraè.

<sup>38</sup> Pilato tò ie' a' ichaké:

—¿Í dör ttè moki?

*Pilato tò iché tò Jesús ttõwã*

*(Mateo 27.15-31; Marcos 15.6-20; Lucas 23.13-25)*

Pilato tò ichaké one tã ie' skã dettsã ttök judiowak tã, tã ichéitò ie'pa a':

—Ye' kè wã ì sulu kune Jesús kí. <sup>39</sup> Erè a' wöblanewãtke tò mik A' Yépa Yèrulune Egipto e' kéwö tkõ'weke, etã s'wõtëule e' yekettsã èmine ye' tò ekòl. ¿A' kí ikiane tò a' blú e' èmiyõ?

<sup>40</sup> Ie'pa tò iüté aneule:

—¿Ie' kè wõttsaar! ¡Barrabás wõttsoo sa' a'!

(Barrabás e' dör akblökwak.)

## 19

<sup>1</sup> Etã Pilato tò Jesús ppök patké ttsa' bata daloië wa. <sup>2</sup> Roma ñippökwakpa tò dika'kicha yuè wõshkiie tã itkékarakitò Jesús wökir kí blu'ie. Nies ie'pa tò datsi' daloshdalosh ese iéka ikí blu'ie iwayuoië. <sup>3</sup> E' ukuökí tã idewarãk tsinet ie' o'mik tã iché ia':

—¿Ie' dör judiowak blú! ¡Be' mú kawõ tkõ buaè!

Tajë ie'pa tò ippé iwõ kí.

<sup>4</sup> Pilato dettsane tã iskà ché judiowak a':

—Isaú, ye' mía itsukbitu as a' wã ijcher tò ye' kè wã ttè kune ie' k'katoie.

<sup>5</sup> Etã Jesús dettsã dika'kicha yöule wõshkiie, e' tkèulekã iwökir kí tã ipaiëule blu' datsi' daloshdalosh ese wa. Pilato tò iché:

—I' dör wèm e'. A' tò isaú.

<sup>6</sup> Mik sacerdotepa wökirpa ena Skèköl wé shkékipa tò Jesús sué, etã ie'pa tò iché aneule:

—¿Iwõtõwã krus mik! ¡Iwõtõwã krus mik!

Pilato tò iché ie'pa a':

—Ye' kè wã ì ttè kune ie' kí, e' kuëkí itsúmine, iwõtõwã a' wãkpa tò krus mik.

<sup>7</sup> Judiowak wökirpa tò iché ie' a':

—Sa' wã ttè dalöiëno tso', e' tò iché ie' kawõtã ttëwã, ie' e' yè' tò ie' dör Skèköl Alã e' kuëkí.

<sup>8</sup> Mik e' ttsé Pilato tò, etã ie' kí suane tajë. <sup>9</sup> Ie' míane u shuã tã Jesús a' ichakéitò:

—¿Wé be' datse?

Erè Jesús kè wã iütëne yës. <sup>10</sup> Pilato tò iché ie' a':

—¿Íök be' kè ttõ ye' tã? ¿Be' kè wã ijcher tò ye' a' kawõ tso' be' wõtõwã krus mik ö be' omine?

<sup>11</sup> Jesús tò iüté:

—Skèköl kè wã kawõ meule be' a, e'ma be' kè a' wës ye' onuk. E' kuëkí wëpa tò ye' me'ttsã be' ulã a, e'pa kí inuí tso' be' tsatã.

<sup>12</sup> Etã Pilato tò ibikeitsékã tajë tò wës ie' a' Jesús armimine, erè judiowak tò iché ie' a' aneule:

—Be' ie' èmine, e' tã be' mía romawak wökir kibi e' bolökie. Wé e' chõ tò ie' dör blu', ese dör se' wökir kibi e' bolök.

<sup>13</sup> Mik e' ttsé Pilato tò, etã Jesús tsuk patkéitò u'rkí. E' ukuökí tã ie' e' tkés'er s'shulo kulé kí. E' atë uitò kí kiè hebreoie Gabatá ee (e' wã kiane ché uitò yöule ák wa).

<sup>14</sup> E' dör judiowak Yépa Yèrulune Egipto e'

\* 18:32 Juan 3.14 ena 12.32 saú.

kéwō tkō'wēke e' chki es, diwō detke bata a ekkē. Etā Pilato tō iché ie'pa a:

—j! dōr a' blú!

<sup>15</sup> Erē ie'pa tō iché aneule:

—jttōwā! jttōwā! jwōtōwā krus mik!

Pilato tō ie'pa a iché:

¿ma a' ibikeitsē tō ye' tō a' blú ttēwāmi?

Sacerdotepa wōkirpa tō iūtē:

—Sa' blú ekōl ē, e' dōr romawak wōkir kibi.

<sup>16</sup> Etā ie' tō iwé Jesús tā wēs ie'pa ki ikiane es. Ie' tō imétsa iñippōkwakpa ulā a wōtēwā krus mik tā ie'pa wā imítser.

*Jesús wōtēwārakitō krus mik*

(Mateo 27.32-44; Marcos 15.21-32; Lucas 23.26-43)

<sup>17</sup> Etā Jesús e' yétsa Jerusalén, krus kugeramiitō michoé ká kié S'wōkirdiche eē (ká e' kié hebreoie Gólgota). <sup>18</sup> Eē ie'pa tō iwóté krus mik. Nies wēpa bōl sulusipa wōtēne krus mik w'kē iō'kē, Jesús atē ie'pa shushāē. <sup>19</sup> Pilato tō ishtōk patké kaltak kī, e' batsēwārakitō Jesús krus mik. Ikitule e' tō iché: "I' dōr Jesús Nazaret wak dōr judiowak blú e'." <sup>20</sup> Wé ie' wōtēwārakitō krus mik, e' atē Jerusalén tsinet, e' kuekī tajē judiowak tō ikitule e' sué. Ikitule ttē mañatōkicha wa: hebreoie, latinie ena griegoie. <sup>21</sup> E' kuekī judiowak sacerdotepa wōkirpa tō iché Pilato a:

—Kē ishtar tō ie' dōr judiowak blú. Ishtō tō ie' e' chō tō ie' dōr judiowak blú.

<sup>22</sup> Erē Pilato tō iūtē:

—Ī shtétke ye' tō, e' shtétkeyō, iméattkeyō es.

<sup>23</sup> Roma ñippōkwakpa tō Jesús wōtēwā krus mik, e' ukuōkī tā ie'pa tō idatsi' blatélor ie'pa tkēl a. Erē Jesús datsi' batsiē e' atē. Datsi' e' yōule alabo, <sup>24</sup> e' kuekī ie'pa tō iché ñi a:

—Kē se' tō ijchēlor. Mishka inuk ákwōla wa isuoié tō yi ulā a iatni.

Es itka wēs itso' kitule Skékōl yēkkuō kī es, e' tō iché: "Ye' datsi' blabatsélor ie'pa tō ñi a, tā inérak ákwōla wa isuoié tō yi ulā a ye' datsi' batsiē e' atni."\* Es Roma ñippōkwakpa tō iwé.

<sup>25</sup> Krus o' mik Jesús mī ena imila ena María dōr Cleofás alakōl ena María Magdala wak e'pa iēter. <sup>26</sup> Mik Jesús tō imi ena ittōkata dalēr tajē ie' éna, e'pa sué iēter eē, etā ichéitō imi a:

—A tayē, sē be' alā dur.

<sup>27</sup> Etā ie' tō iché ttōkata ñe' a:

—Sē be' mī dur.

Es ittōkata ñe' wā Jesús mī mītsēr kkō'nè ie' u a.

*Jesús duowā*

(Mateo 27.45-56; Marcos 15.33-41; Lucas 23.44-49)

<sup>28</sup> Jesús wā ijchēr buaē tō i' uk ie' dē'bitu, e' wakaneone. Nies ttē kitule Skékōl yēkkuō kī, as e' wā tkō, e' kuekī ie' tō iché: —Ye' er sine.

<sup>29</sup> Etā eē tkā' tkēr, e' a vino shkōshkōē tso'. E' wa ie'pa tō suiyōk nuwéka, tā itkéka kal kié hisopo, ese ulatska kī, tā itkéwā ie' kkō a.

<sup>30</sup> Ie' tō ikuyé tā ichéitō:

—Ī kōs uk ye' dē'bitu, e' wakaneonetke.

E' ukuōkī tā ie' e' wōéwa tā iwikōl émiitō, es iduowā.

*Jesús nu tkérakitō ichane a kuabōt wa*

<sup>31</sup> Kawō e' wa, judiowak e' katablōke Ie'pa Yēpa Yērulune Egipto e' kéwō tkō'wēkerakitō bule es, e' yōkī. Bule es e' dōr eno diwō. Erē eno diwō e' batseitseke tajē shūtē ie'pa tō, e' kuekī ie'pa wōkirpa kē kī ikiane tō pé' wōtēulewā krus mik, esepa nu mēat dō bule es. E' kuekī ie'pa tō ikié Pilato a tō itu' puḱlor patkō as iduōlur bet tā inū ówarakitō iski wōtēwā. <sup>32</sup> Etā Roma ñippōkwakpa mīa, tā wēm kewe e' tu' péwā, e' ukuōkī tā ñies iēkōl wōtēnewā Jesús tā krus mik, e' tu' péwā. <sup>33</sup> Erē mik ie'pa de Jesús ska', etā ie'pa tō isué tō iduowatke. E' kuekī ie'pa kē wā itu' panewā.

<sup>34</sup> Erē ñippōkwak ekōl, e' tō Jesús nu ar e' tké kuabōt wa ichane a tā pé ena di' dettsa.

<sup>35</sup> E' kōs tka, e' sué ye' tō ye' wák wōbla wa, e' chōk ye' tso' a' a. Ī chekeyō, e' dōr mokī. Ye' wā ijchēr tō e' dōr mokī. Ipakekeyō a' a as a' erblō ie' mik. <sup>36</sup> E' kōs tka as i' tso' kitule Skékōl yēkkuō kī e' wā tkō, e' tō iché: "Ie' diché ké pāpawā yē."† <sup>37</sup> Ikitule skā tō iché: "Ie' tkēule kuabōt wa, e' suēraē ie'pa tō."‡

*Jesús nu wōtēwā ie'pa tō pō a*

(Mateo 27.57-61; Marcos 15.42-47; Lucas 23.50-56)

<sup>38</sup> E' ukuōkī tā wēm de ekōl kié José Arimatea wak, e' dōr Jesús klé ekōl, erē ie' suane judiowak wōkirpa yōkī, e' kuekī ie' dōr iklé ekōl kē jchēr yi wā ese. Ie' tō Pilato a kawō kié Jesús nu tsykmi blē. Pilato tō ie' a ikéwō mē, etā ie' mīa tā Jesús nu mītsēr iwā. <sup>39</sup> Nicodemo dē'rō ttōk Jesús tā nañewe, e' wák debitū José tā. Kapōli tso' s'nu patioie as kē inurwā bet, e' debitū Nicodemo wā dō kilo dabom mañayōk (30) ekkē. Kapōli e' shūtule kiō masmas kié mirra ena áloe ese wa. <sup>40</sup> Ie'pa bōl tō Jesús nu patrēwā datsi' tak batsiē bua' bua saruru nuulekā kapōli e' wa wēs judiowak wōblar es. <sup>41</sup> Wé Jesús du'wā krus mik, eē tsinet kal klō tso' tkēule. E' a ákuk tso' biule e' s'nu blóie, erē kām s'nu blēriā. <sup>42</sup> Pō e' atē tsinet wé Jesús dunewā eē, ñies judiowak eno diwō dōketke, e' kuekī ie'pa tō Jesús nu blé eē.

\* 19:24 Salmo 22.18 † 19:36 Salmo 34.20 ‡ 19:37 Zacarías 12.10

## 20

*Jesús shkenekane*

(Mateo 28.1-10; Marcos 16.1-8; Lucas 24.1-12)

<sup>1</sup>Eno diwö, e' bule es bla'mi, ká iä tsetseé tã Mariá Magdala wak miá wé Jesús nu bléne ee. Ie' tó isué tó ák wa áruk kkö wötéule, e' sinettsá bánet. <sup>2</sup>Ie' tunemi bet wé Simón Pedro ena Jesús ttökata ská tso' ee. Ittökata e' daléritsök ie' bak tajé. Tã ichéitö ie'pa a:

—¡Yile wã Skékëpa nu minets'er! ¡kë sa' wã ijcher tó wes ie'pa tó iwé!

<sup>3</sup>Ie'pa miyal pö a. <sup>4</sup>Ie'pa bül tunemirak, eré Jesús ttökata ñe' tunemi bet Pedro tsata, e' kuekí ie' demi kewe pö a. <sup>5</sup>Eë ie' e' wöéwa tã iká sué áruk shuá. Jesús nu kë ku'. Ie' tó datsi' wa Jesús nu parratewã e' ë sué, eré kë ie' minewã áruk a iweblök. <sup>6</sup>Ie' itökí Simón Pedro debitu miwã áruk a tã ñies e' ë suéitö. <sup>7</sup>Ñies datsi'tak wa Jesús wökir monewã, e' suéitö wörrat tär bánet. <sup>8</sup>Jesús ttökata de kewé, e' miwãñak áruk a tã isuéitö tã iklö'wéitö tó mokí Jesús shkenekane. <sup>9</sup>Kãm ie'pa éna iwã arwã tó Jesús kãwötã shkenukkane wes ikitule Skéköl yëkkuö kí es. <sup>10</sup>E' ukuökí tã ittökata pö miyalne wé ikapökerö ee.

*Mariá tó Jesús sué shkeulekane*  
(Marcos 16.9-11)

<sup>11</sup>Mariá iü dur áruk kkö a. Ie' iukeiã tã ie' e' wöéwa kã sauk áruk a. <sup>12</sup>Etã Skéköl biyöchökwakpa suéitö bül idatsi' sarurué, e'pa tulur wé Jesús nu bak tär ee. Eköl tkër wé iwökir bak tär ee, iëköl tkër wé iklö bak tär ee. <sup>13</sup>Ie'pa tó Mariá a ichaké:

—A tayé, ¿i jëitseke be' tó?

Ie' tó ie'pa iüté:

—Ye' Kékëpa nu minets'er yile wã. Kë ye' wã ijcher tó wes ie'pa tó iwé.

<sup>14</sup>E' wöshã tã Mariá wötrée tã ee Jesús dur. Ie' tó isué eré ie' kë wã isunewã tó Jesús idir. <sup>15</sup>Jesús tó ie' a ichaké:

—A tayé, ¿i jëitseke be' tó? ¿Yi yuleke be' tó?

Mariá tó ibikeitsé tó ee idur e' dör kal klö tso' tkéule, e' kanéukwak, e' kuekí ie' tó iché ie' a:

—A kékëpa, be' wã iminets'er, e' tã ichö ña wé be' tó iblé, as ye' mi' itsuk.

<sup>16</sup>Etã Jesús tó iché ie' a:

—¡A Mariá!

Tã Mariá e' wötrée tã ichéitö ie' a hebreoie: —¡Rabuni! (e' wã kiane ché: "S'wöbla'ukwak")

<sup>17</sup>Jesús tó iché ie' a:

—Ye' öwa. Kãm ye' mi'ka ye' Yé ska', e' kuekí kë ye' wöklö'waria. Eré be' yü ichök ye' ttökatapa a tó ye' mi'kekane ye' Yé ska', e' dör a' Yé ñies. Ie' dör ye' Kéköl, a' Kéköl ñies.

<sup>18</sup>Etã Mariá Magdala wak miá Jesús ttökatapa ska', tã ichéitö: "Ye' tó Skékëpa sué."

Ñies i kôs ché Jesús tó ie' a, e' pakéneitö Jesús ttökatapa a.

*Jesús e' kkaché ittökatapa a*

(Mateo 28.16-20; Marcos 16.14-18; Lucas 24.36-49)

<sup>19</sup>Eno diwö, e' bule es nañewe tã Jesús ttökatapa tulur ñita u etkue ë a. Ie'pa suane judiowak wökirpa yöki, e' kuekí ie'pa u wékkö wöté'tkër daréré. Eré e' bet tã ie'pa tó isué tó Jesús de dur ie'pa shuá. Ie' tó ie'pa shke'wé tté i' wa:

—¡A' senü bërè!

<sup>20</sup>Mik e' ché one tã ie' tó iulã ena ichane shka'ule, e' itö kkaché ie'pa a. Etã ittökatapa ttsé'ne buaé tó Skékëpa suéne ie'pa tó ttsé'ka. <sup>21</sup>Ie' tó iskã ché ie'pa a:

—¡A' senü bërè! Wes ye' Yé tó ye' patkë'bitu kã i' a ie' tte pakök, es ye' tó a' patkëmi ye' tte pakök.

<sup>22</sup>Ie' tó ie'pa wöiké siwã' wa tã ichéitö ie'pa a:

—Wiköl Batse'r kiöwã buaé a' tó a' er a.

<sup>23</sup>Yi kí iyi sulu nuí tso', ese olo'yé a' tó, e' tã ñies Skéköl tó ilo'yeraé iki. Yi kí iyi sulu nuí tso', ese kë olo'yane a' wã, e' tã ñies Skéköl kë tó ilo'yepa iki.

*Tomás tó Jesús suéne ttsé'ka*

<sup>24</sup>Jesús ttökatapa ñabom eyök kí bül (12), e' eköl kié Tomás, e' kié ñies Dídimó. Ie' kë ku' imalepa tã mik Jesús dë'dur ie'pa shuá eta.

<sup>25</sup>E' kuekí ie'pa tó iché ie' a:

—Sa' tó Skékëpa sué.

Eré Tomás tó ie'pa a' iché:

—Ye' kë wã iulã shka'ule clavo wa, e' itö sune, ye' kë wã ye' wák ulatska patkënewã itö a, ye' kë wã ye' ulã patkënewã ichane shka'ule e' a, e'ma ye' kë tó yi tte klö'wepa yés.

<sup>26</sup>Kã de paköl, eta Jesús ttökatapa skã iënëne iu a, eta Tomás tso'ñak ie'pa tã. U wékkö wöté'tkër, eré Jesús skã dedurne ie'pa shuá, tã ichéitö ie'pa a:

—¡A' senü bërè!

<sup>27</sup>E' ukuökí tã ichéitö Tomás a:

—Be' ulatska patkõwã ye' ulã shka'ule a, eta isaü. Be' ulã patkõwã ye' chane shka'ule e' a. Kë ibikeitsaria bötböt. ¡iklö'ü!

<sup>28</sup>Etã Tomás tó iüté:

—¡Be' dör ye' Blú! ¡Be' dör ye' Kéköl!

<sup>29</sup>Jesús tó iché ie' a:

—Be' ye' sué, e' kuekí be' erblé ye' mik. Eré wëpa erblé ye' mik, eré kë iwã ye' sune, jayëcha buaé esepa!

*Yëkkuö i' wã dör i' es*

<sup>30</sup>I kë or yi a ese o' tajé Jesús tó ittökatapa wörki ikkachoie tó yi dör ie', ese kibiie kë kitule yëkkuö i' kí. <sup>31</sup>Eré yëkkuö i' shtekeyö as a' tó iklö'ü tó Jesús dör Skéköl Alã pairine'bitu idi' wa s'blúie e'. Ñies ishtekeyö as sene michöe dö a' ulã a, a' erblö ie' mik e' wa.



**21**

*Ittökatapa kul tö Jesús suéne ttsë'ka*

<sup>1</sup> E' ukuökí tã Jesús e' kkachéne ittökatapa a batsóri kié Tiberias, e' kkömik. E' pake dör i' es: <sup>2</sup> Ittökatapa ñi dapa'wé ee, e'pa dör Simón Pedro, Tomás (e' kié ñies Dalimo), Natanael (e' dör kã kié Canã aṭe Galilea e' wak), Zebedeo ala'r bõl tso'ñak, ñies Jesús ttökatapa skã bõl tso'ñak. <sup>3</sup> Simón Pedro tö iché ie'pa a:

—Ye' mĩa nima klõ'uk kla' wa.

Ie'pa tö iüté:

—Sa' mi'keñak be' ta.

Etã ie'pa míyal tã ie' iékarak kanò a. Erë e' nafewe ie'pa kē wã nima klõone yēs. <sup>4</sup> Mik kã ñirketke, etã Jesús demi batsóri kkömik, erë ittökatapa kē wã ijcher tö ie' idir. <sup>5</sup> Ie' tö ie'pa a ichaké:

—A wēpa, ¿a' nima klõne?

Ie'pa tö iüté:

—Au, kē sa' wã iklõne yēs.

<sup>6</sup> Etã ie' iché:

—A' kla' uyó ulã bua'kka kke, etã nima klõrdaē.

Etã ie'pa tö iuyé tã iwã klõne tajē, kē dē'kaia' ie'pa kī. <sup>7</sup> Etã ittökata dalēr tajē ie' éna, e' tö iché Pedro a:

—jskëkëpa Jesús idir!

Mik Simón Pedro tö ittse tö Skëkëpa Jesús idir, etã bet idatsi' iékanëitò, ie' dur kīparuó ē mik kanëblök e' kuëkī. Etã ie' e' ppée di' a ulaiklémi dõmi Jesús ska'. <sup>8</sup> Jesús ttökatapa malepa wã kanò datse batsóri kkömik, kla' wã deka chiē, e' kueratse énaena. Ie'pa tso' kukuie batsóri kkö a, cien metro ekkē, e' kuëkī ie'pa tö kla' kueratse. <sup>9</sup> Mik ie'pa e' yétsã kanò a, etã ie'pa tö isué bõ' ñarke, e' kī nima me'r etò. Ñies pan tso'. <sup>10</sup> Etã Jesús tö iché:

—Nima klõ'wé a' tö, e' wele tsúbitu.

<sup>11</sup> Simón Pedro e' iéka kanò a tã ikla' wã deka chiē nima blublu ē wa, e' yétsaitò kã sí kī. Nima dõka cien eyök kī dabom skeyök kī mañatò (153). Nima e' dör tajē, erë ikla' kē butsolone. <sup>12</sup> Jesús tö ie'pa a iché:

—A' shkõ chkõk.

Ie'pa wã ijcher tö Skëkëpa Jesús idir, e' kuëkī ie'pa kē wã ie' a ichakine tö ¿be' dör yi? <sup>13</sup> E' ukuökí tã ie' mĩa bõ' kkömik tã pan ena nima klõ'wëitò blaté méitò ittökatapa a.

<sup>14</sup> I' tã mañatõkicha Jesús e' kkachéne ittökatapa a ishkenëkane e' ukuökí.

*Jesús tté Pedro ta*

<sup>15</sup> Ie'pa chké one tã Jesús tö ichaké Simón Pedro a:

—A Simón, Juan alã, ¿be' éna ye' dalène, ye' ttökatapa malepa éna ye' dalēr, e' tsatã?

Pedro tö iüté:

—A Këkëpa, be' wã ijcher tö be' dalène ye' éna.

Jesús tö iché ia:

—E' ma wépa dör ye' icha, esepa kkö'nú ña buaē wēs obeja kkö'nukwakpa tö iobejala kkö'neke buaē es.

<sup>16</sup> Jesús tö iskã chakéne:

—A Simón, Juan alã, ¿be' éna ye' dalène?

Pedro tö ie' a iché:

—A Skëkëpa, be' wã ijcher tö be' dalène ye' éna.

Jesús tö iché:

—E' ma wépa dör ye' icha, esepa kkö'nú ña buaē wēs obeja kkö'nukwakpa tö iobejala kkö'neke buaē es.

<sup>17</sup> Jesús tö Pedro a iskã chakéne i' tã ide mañatõkicha.

—A Simón, Juan alã, ¿be' éna ye' dalène?

Jesús tö Pedro a ichaké mañatõkicha, e' kuëkī Pedro erianekã. Ie' tö Jesús iüté:

—A Skëkëpa, i' kōs ijcher be' wã. Be' wã ijcher tö be' dalène ye' éna.

Jesús tö ie' a iché:

—E' ma wépa dör ye' icha, esepa kkö'nú ña buaē wēs obeja kkö'nukwakpa tö iobejala kkö'neke buaē es. <sup>18</sup> Mokí ye' tö be' a iché tö mik be' bak duladula, etã be' wák e' paiõke ena be' mi'ke wé be' wák shkak eē. Erë mik be' dewã wõ'kela siarëla, etã be' ulã shulõraē tã o'ka tö be' kī datsi' ieraē tã be' tseramiitò wé be' kē shkak eē.

<sup>19</sup> Ttè e' wa Jesús tö iwaché Pedro a tö wēs ie' duõrawã, e' wa ie' tö Skëkõl kikerakã. E' ukuökí tã Jesús tö iché ia:

—Be' e' tkõwã darërè ye' ttõkataie këkraē.

*Ittökata dalēr tajē Jesús éna, e' paké*

<sup>20</sup> Pedro e' wõtrée tö isué tö Jesús ttökata dalēr tajē ie' éna, e' datse ie'pa itõki. Mik Jesús ttökatapa bata chka' ie' tã, etã ittökata e' e' tkësér tkër Jesús o'mik tã ie' a ichakëitò, “A Skëkëpa, ¿yi tö be' wõmeratssa?” <sup>21</sup> Mik Pedro tö isué Jesús ttökata e' datse ie'pa itõki, etã ie' tö Jesús a ichaké:

—A Skëkëpa, be' ttökata datse se' itõki ¿i tkõmi e' tã?

<sup>22</sup> Ie' tö iüté:

—Ye' kī ikiane tö ie' at ttsë'ka dõ mik ye' dõne ekkē, e' tã ¿wēs e' de be' yõkí? Be' e' tkõwã darërè ye' ttõkataie këkraē.

<sup>23</sup> Ttè e' kuëkī Jesús ttökata e' tté tñekã iyamipa shua, tö kē iduõpawã. Erë Jesús kē wã iyène tö kē iduõpawã. È ie' tö iché: “Ye' kī ikiane tö ie' at ttsë'ka dõ mik ye' dõne ekkē, e' tã ¿wēs e' de be' yõkí?”

<sup>24</sup> Jesús ttökata e' tso' ttè i' pakõk a' a, e' tso' ttè i' shtõk yëkkuõ i' kī. Sa' wã ijcher tö ttè i' dör mokjë.

<sup>25</sup> Jesús tö ì skã o' tajē, e' kōs shtõpa yëkkuõ kī, e' ma ye' iklõ'wé tö yëkkuõ kitule e' kōs kē chõpakã kã i' a.

# I o' Jesús ttekölpa tsá e'pa tö e' pakè Hechos

Yèkkuò i' dör yèkkuò skà kit Lucas tö Teófilo a e', i' ta ide bót. Itsá kite ie' a e' dör i' o' Skèképa Jesús tö e' pakè. Ie' mine'ka ká jai a e' ukuòki ta i' kí o' ie' tö ká i' kí ittekölpa tsá e'pa wa Wiköl Batse'r batamik, e' pakè Lucas tö yèkkuò i' kí.

Kam Jesús mi'kane ká jai a e' yòki ie' tö ittekölpa tsá e'pa patké ttè i' wa: Mik Wiköl Batse'r de a' kí, etá ie' tö diché meraè a' a ye' ttè pakoie. A' miraè ipakök s'tso' kos Jerusalén e'pa a. Nies ipakeraè a' tö s'tso' Judea ká malepa a ena Samaria ena ká wa'ne dö wé iyök erkerò ee. E' tso' kitule yèkkuò i' kí 1.8 ee. E' ukuòki ta i' o' Skèköl tö Pedro wa Jerusalén ena Judea ká malepa ena Samaria e' ttè tso' kitule yèkkuò i' kí.

E' ukuòki ta Pablo tö Jesús ttè buaè paka' ká tajè wakpa a e' ttè kit Lucas tö yèkkuò i' kí. Yèkkuò i' wa Lucas tö se' a' ikkachè tö Jesús dör sulitane tsatökökwak.

Lucas bak s'kapeyök'wakie. Iekkè ta ká kos wé Pablo dè'rò ee Lucas mir ie' ta. E' kueki Lucas tö isu' iwák wöbla wa tö wes Skèköl kanèblè' Pablo wa. E' ttè tso' kitule yèkkuò i' kí.

## Skèköl tö i'Wiköl patkeraè

1-2 A kèkè Teófilo, i' o' Jesús tö ena i' wa s'wöbla'itò kuaè dö mik imineka ká jai a, e' kos paka' ye' tö be' a yèkkuò tsá kityò e' kí. Kam ie' mi'kane ká jai a, e' yòki i' kiane ie' kí tö ittekölpa tsá shukitbakitò, e'pa tö iwè, e' uk ie'pa kéitò Wiköl Batse'r wa. 3 Ie' kòtewa shkenekane, e' ukuòki ta ie' wák e' kkayène tajè ie'pa a doka ká dabom tkèyök (40) ekkè. Es ie' tö ie'pa a ikkachè tö mokí ie' tso'ne ttsè'ka. Nies ie' tö i'blúie Skèköl tso' e' ttè paké ie'pa a. 4 Ká et ta ie' tso' ittekölpa tsá e'pa ta, ta ichéitò iarak:

—A' kè kàne e' yòktsá Jerusalén. Ye' Yè kablè' i'Wiköl patkòk a' a yè' ye' tö a' a, e' panú dö mik ide etá. 5 Juan tö s'wòsuk di' a, erè ká kè tkòpa tajè ta Skèköl tö a' ierawa i'Wiköl Batse'r a.

## Jesús mineka ká jai a

6 Mik Jesús ttekölpa tsá ñi dapa'wèka ie' ta, etá e'pa tö ie' a ichakè:

—A Skèképa, ¿i' ta be' tö se' wakpa tkekekane se' Israel aleripa, e' wòkirpaie?\*

7 Ie' tö iüté:

\* 1:6 Israel aleripa e' wòkirpaie: Jesús ttekölpa tso'ia' ibikeitsök tö ie' e' tkòkeka Israel aleripa blúie ie'pa ká kí ta ie'pa tkekekà ie' kayuapaie. † 1:12 shkoie eno diwò a ekkè: E' dör kilómetro etk ulatòk. ‡ 1:20 Salmo 69.25 § 1:20 Salmo 109.8

—E' kèwò kè mène a' a jchenoie. E' kèwò tso' ye' Yè wa klòuletke. 8 Erè mik Wiköl Batse'r de a' kí, etá ie' tö diché meraè a' a ye' ttè pakoie. A' miraè ipakök s'tso' kos Jerusalén e'pa a. Nies ipakeraè a' tö s'tso' Judea ká malepa a ena Samaria ena ká wa'ne dö wé iyök erkerò ee e'pa a.

9 Mik ie' tö e' ché one, etá ibutséka míá ká jai a ie'pa wòrki ta ichowa mò shua kè wèr ta'ia. 10 Ie'pa tso' ká sauk ká jai a krereè tö wes imichoka, e' dalewa bet wèpa bòi datsi' saruruè de ièter ie'pa o'mik. 11 E'pa tö iché iarak:

—A Galilea wakpa ¿iök a' ièteriá ká sauk ká jai a? Jesús bak a' shua e' mítser Skèköl wa. Wes a' tö isuè tö imía ká jai a, e' suè idòrane ká i' kí.

## Matías ate Judas skéie

12 Etá Jesús ttekölpa tsá e'pa tso' Olivo kébata a, ie'pa biteane Jerusalén. E' ñalé dö wèkkè ulat káwò mène judiowak a shkoie eno diwò a ekkè.† 13 Mik ie'pa dene Jerusalén ta ie'pa tkaka u etkuò kí wé ikapòkerak ee. Eè itso' rak Pedro, Juan, Santiago, Andrés, Felipe, Tomás, Bartolomé, Mateo, Santiago Alfeo alá, Simón Celote, ñies Judas Santiago alá. 14 Ie'pa ulitane ñi dapa'uke kekraè ttök S'yé ta. Alakölpa wèlepa ena María, Jesús mi, ena Jesús èlpa, e'pa tso'ñak ie'pa ta ttök S'yé ta.

15 Jesús mik erblòkwakpa e' dapa'uke e'pa doka cien eyök kí dabom böyök ekkè ulatòk (120). E' kèwò ska' ta Pedro e' kèka ie'pa wòrki ta ichéitò: 16 “A yamipa, ima Judas yè' Wiköl Batse'r tö se' blú bak David e' wa, e' wá tka wes itso' kitule Skèköl yèkkuò kí es. Judas wa pè' míne Jesús klò'ukwa. 17 Ta ie' bak Jesús kléie wes se' es, ie' bak kanèblök Jesús ta wes se' es. 18 (Ie' tö i' sulu wamblè', e' ské wa ie' tö ká tué et. E' ukuòki ta ie' anebitü wòwakkòt ñawi tskinewa ta iñattse yèrulune. 19 Mik Jerusalén wakpa tö ttè e' ttsé, etá ká e' kiè mékarakitò iwákpa ttè wa Hacéldama e' wá kiane ché S'pè Ké). 20 Es itso' kitule Skèköl yèkkuò kiè Salmo e' kí e' tö iché i' es: 'As ie' u weir ñies as kè yi seriá e' a.”‡

Ñies ichéitò:

'Q'ka múka iskéie ie' kanè méat e' kanéukne.' „§

Es itso' kitule Skèköl yèkkuò kí.

21 “Wèpa tso' íe e'pa manetwa se' ta kekraè Jesús bakia se' shua etá. 22 Mik Juan tö Jesús wòsuk e' kos ta ie'pa tso'ñak se' ta dö mik Jesús mineka ká jai a etá. Se' káwòta wèpa

ekkëpa shushtök eköl se' kïie as itö Jesús shkenekane, e' tté pakö se' ta."

23 Es ie'pa tö wëpa shushtë böi. Eköl kiè José, e' kiè Justo ñies. E' kkabata dör Barsabás. Iëköl kiè Matías. 24 Eta ie'pa tö ikié S'yé a' i' es: "A Skëköl, be' wä sulitane er sule buaë. E' kuekï ikkachö sa' a wéne shushtë be' tö 25 as iat Jesús ttekölpa tsá e' kïie Judas skéie. Judas e' wamblé sulu, e' kuekï ie' tö kané e' méat ta imía weinuk wé ikawötä weinuk ee."

26 Eta ie'pa iné isuoie tö wëpa böi shushtëtke ie'pa tö e' wéne kiè dömittsa. Eta Matías kiè dettsa. Es ie' atë Jesús ttekölpa tsá e' kïie imalepa döka dabom eyök kï eköl (11) e'pa ta.

2

Wiköl Batse'r de Jesús mik erblökwakpa kï

1 Mik Pentecostés kéwö\* de, eta Jesús mik erblökwakpa kos tso' dapaule ek tsjini éme. 2 E' bet ta ká jai a' i' blane tajë wës siwä darërëes es, e' blane u shü kos a wé ie'pa tso' ee. 3 Eta ie'pa tö isué tö idebitu tajë ku'ie bö' wörkua sué, e' ane ie'pa ulitane kï et et. 4 Eta ie'pa a Wiköl Batse'r iënewä ta eköl eköl ttémi ká bánet wakpa ttö wa kuä'kï kuä'kï wës Wiköl Batse'r tö ie'pa ké ttök es.

5 E' kéwö ska' ta judiowak tö Skëköl daloieta' datse ká ulitane kï, esepa tso' tajë Jerusalén. 6 Mik ie'pa tö Jesús mik erblökwakpa aláneka tajë e' ttsé, eta ie'pa e' dapa'wéka ikï tssök bua'ie. Ie'pa tö ittse eköl eköl iwäkpa ttö wa kuä'kï kuä'kï es. E' kuekï ie'pa tkinewä tajë. 7 Ie'pa wökranewä ta ichérakitö ñi a:

—¿A'ka ie'pa ké dör Galilea wakpa tso' ttök? 8 ¿Wës se' ulitane tso' ittsoök tö ie'pa ttöke se' ulitane ttö kuä'kï kuä'kï wa? 9 Íe se' shuä se' tso' datse Partia, Media, Elam, Mesopotamia, Judea, Capadocia, Ponto, Asia, 10 Frigia, Panfilia, Egipto ena ká tso' Libia atë tsjinet Cirene kke. Ñies pë' datse Roma serke íe esepa tso' íe. 11 Se' welepa dör judiowak chökle. Welepa ké dör es, esepa e' yö'bak judiowakie. Ñies se' tso' íe datse Creta ena Arabia. Erë i kos kaneq' Skëköl tö buaë e' chök ie'pa tso' e' ane buaë se' éna se' wäkpa ttö kuä'kï kuä'kï e' wa.

12 E' kuekï ie'pa ulitane wökrarlune tajë ikittsoök. Ie'pa wöa ká chowa. Ie'pa ñi chakérak:

—Íyi ikké, ¿ima e' wä kiane ché?

13 Erë welepa tö Jesús mik erblökwakpa wayué sulu ta ichérakitö:

—Ie'pa tteke blo' tö.

Pedro tö ttè paké

14 Eta Pedro e' duéka shkë'ka Jesús ttekölpa tsá malepa döka dabom eyök kï eköl (11), e'pa ta. Ie' tö iché sulitane a aneule: "A yamipa judiowak, ñies a' ulitane serke Jerusalén. Íyi ikké e' wä pakekeyö a' a. Ye' ttö tssö buaë a' tö. 15 Sa' ké tteku' blo' tö wës a' tö ibikeitsé es. Erpa diwö de sulitu (9) bla'mi, diwö ikké ké yi e' ttöta'ka blo' wa. 16 Erë i tköke sa' ta, e' dör wës Skëköl tteköl kiè Joel, e' tö iyë'atbak es. Ie' tö iyë'at i' es:

17 "Skëköl tö iché tö mik ká i' erkewatke, eta ye' tö ye' Wiköl patkeraë sulitane kï.

E' kuekï a' ala'r, wëpa ena alakölpa, ekkëpa kos ttóraë wës ye' ttekölpa es. A duladulapa a ilé kkeyërdaë kabsueie ie'pa ké kü' kapökwa e' dalewa.

Ñies a' kékëpa a ilé kkeyërdaë kabsue a.

18 Ñies e' kéwö ska' ta ye' Wiköl patkeraëyö ye' kané mésopa kï, wëpa ena alakölpa. Es ie'pa tö ye' ttè pakerane imalepa a.

19 Ká jai a ye' tö íyi tajë suluë kkacheraë, ké sule a' wä ese.

Ká i' kï ñies íyi kkacheraëyö as a' isaü: s'pë sueraë a' tö, bö' sueraë a' tö, shkle tajë sueraë a' tö ñies.

20 Diwö tsserdawa. Si'wö iardawa batsé wës s'pé es.

E' kos tkóraë kam Skëköl kéwö dö e' yöki. Kawö e' dör buaë shute, e' olo ta tajë.

21 E' kéwö ska' ta yi kos tö e' tsatké kié Skëköl a,

esepa ulitane tsatkërdaë.'†

Es Joel tö iyë'at.

22 "A Israel aleripa, ye' ttö tssö. A' wä ijcher tö mik Jesús Nazaret wak sene' ká i' kï, eta i ké or yi a ese wéitö tajë se' shuä Skëköl batamik kkeyënoie. Es Skëköl tö se' a ikkaché tö ie' tö ipatké'. 23 Erë Jesús menettsä a' a klö'wëwä wës Skëköl tö isuletë'atbak kuaë es, ñies wës ie' kï ikiane es. A' tö wëpa sulusipa ké ie' ttökwa wötëulewä krus mik. 24 Ie' weine siarë ie' kôtewä, erë Skëköl tö ie' shkeo'kane. Duewa ké a ie' wöklöne yës. 25 E' kuekï ká iaiäé blu' David ut Skëköl ta ima Jesús ttömi e' ye'itö i' es:

'Ye' wä ijcher tö kekraë be' tso' ye' ta. Be' tso' ye' ta ye' ulä bua'kka ye' kïmuk, e' kuekï ké i' a ye' orpa wës.

26-27 E' kuekï ye' tssé'r buaë, ye' tssö kanéé.

Be' ké tö ye' mepaät pö a, e' kuekï ye' enuraë iwä panuk bërë.

Ye' dör be' kané méso batse'r e', e' kuekï be' ké tö imepaät as ye' nurwa.

28 Be' tö sene michoë ñalé e' kkeyé' ye' a.

\* 2:1 Pentecostés kéwö: Pentecostés wä kiane ché Ká Dabom Skeyök kéwö. Judiowak tö Ie'pa Yëpa Yërlune Egipto e' kéwö tkö'wé one, e' kï ká de dabom skeyök, eta kawö ská tkö'wëke ie'pa tö e' kiekerakitö Pentecostés. Ñies e' kéwö kiërakitö Iyiwö Shtök Kéwö. Kawö e' dör wëstela choie Skëköl a iyiwö kite e' kï. Éxodo 23.16 saü. † 2:21 Joel 2.28-32 ‡ 2:28 Salmo 16.8-11

Ye' tso' be' wörkj, e' kuękj be' tō ye' ttsē'weraē buaē.†

Es David tō iyē'at.

29 "A yamipa, ye' tō icheke a' a yēsēsē. Se' blū kēkē David bak ká iaiāē, e' du'wabak tā inū wōtēnewa. Ie' pō tso'ia dō ikkē tā ie. 30 Erē David bak Skēkōl ttekōlie. E' kuękj ie' wā ijcher tō Skēkōl kablē' ie' a iwák ttō wa ttē i' wa: 'Ye' tō be' aleri tkerakā ekōl blu'ie wēs be' es.' 31 E' jcher David wā, e' kuękj ie' tō Cristo shkenekane e' yē'. Ie' tō iyē' tō inū kē atuk pō a, kē inurpawā. 32 Es iwā tka. Skēkōl tō Jesūs shkeō'kane, e' suē sa' ulitane tō sa' wākpā wōbla wa. 33 Skēkōl tō ie' tō tsemikā tā itkēkaitō iulā bua'kka dalōiērtā' tajē. Ie' Yē tō iWikōl mé ie' a wēs ikablē' imuk es. E' ukuōki tā ie' tō iWikōl Batse'r patké sa' kī. E' suē a' tō, e' ttsē a' tō eniā. 34 Erē David kē mine'kā ká jai a wēs Jesūs es. Ie' wák tō iyē'at:

'Skēkōl tō ichē ye' Kēkōl a:

Be' e' tkōkā ye' ulā bua'kka,

35 e' dalewa ye' tō be' bolōkpa merarō be' klō dikija.‡

Es David tō iyē'.

36 "A Israel aleripa ulitane. Ijchēnú buaē a' wā tō ye' tso' Jesús chōk. E' kōtwa a' tō wōtēulewā krus mik, erē e' wák tkēkā Skēkōl tō se' wōkirie nīes se' blūie."

37 Mik ie'pa tō ttē e' ttsē, etā ie'pa erianekā tajē. Ie'pa tō Pedro ena imalepa a ichaké:

—A yamipa, ¿wēs sa' e' ūmi?

38 Ie' tō iūtē:

—A' er mane'ú Skēkōl a tā a' e' wōskuōō ekōl ekōl Jesucristo ttō wa as a' nuj olo'yar a' kī. A' tō iwē es, e' tā Skēkōl tō iWikōl Batse'r meraē a' a. 39 Kablē e' dōr a' a ena a' aleripa ulitane a ena sulitane serke ká kamiē, esepa a nīes. Kablē e' dōr wēpa kōs kieke Kēkē dōr Se' Kēkōl e' tō esepa a.

40 Es ttē e' wa ena ttē skā tajē wa Pedro tō ichē iarak darērēē, ipattē tajē tā ichēitō iarak:

—A' e' tsatkō i tkōraē pē' sulusipa tā e' yōkī.

41 Es wēpa tō i chē Pedro tō, e' klō'wē, e'pa wōskuérakitō. E' diwō Skēkēpa Jesús icha erule e' kī iēne tajē dōkā mil mañayōk ulatōk (3000). 42 Etā ie'pa e' chē ttē wa Jesús ttekōlpa tsā e'pa tō s'wōbla'wēke, e' tōsōk kēkraē er bua' wa. Nīes ie'pa e' chē nī kīmuk i tso' ie'pa wā e' wa. Nīes kēkraē ie'pa e' dapa'uke pan nūk Jesūs kōtēwā e' kēwō tkō'woie. Nīes ie'pa e' chē ttōk S'yē tā.

*Wēs Jesūs mik erblōkwakpa tsā e'pa ser*

43 Etā i kē or yi a ese wēke tajē Jesús ttekōlpa tsā e'pa tō Skēkōl batamik. E' tō pē' ulitane wōkrawē tajē. 44 Wēpa erblē Jesús mik e'pa kōs serke wēs wák ekōl ē es. I' tso' ie'pa wā ese kakkemekarakitō nī a. 45 Es

iyi tso' ie'pa wā, ká ō ilē skā, ese watueke ie'pa tō tā iské blatekerakitō imalepa kimē kiane esepa a. 46 Diwō bit tā ie'pa ulitane e' dapa'ukerak Skēkōl wē a. Nīes u a u a ie'pa chkōke nīta er bua' wa ttsē'rdak buaē. Jesús kōtēwā e' kēwō tkō'wēke pan nīe wa nīta. 47 Skēkōl kīkekeka ie'pa tō. Sulitane wa ie'pa wēr buaē. Ká bit ekkē Skēkōl tō s'tsatkeke tajē, e' kuękj ie'pa kī daparke tajē.

### 3

*Pedro tō s'kraulewā ekōl e' bua'wēne*

1 Ká et tsālī diwō de mañat tā Pedro ena Juan mīyal ttōk Skēkōl tā iwē a. Diwō e' dōr ttoie ie' tā. 2 Etā eē wēm tkēr ekōl kune' klō kraulewā. E' datse iyamipa wa itkeser kekraē Skēkōl wē wēkkō kiē Wēkkō Buaala e' a as inukōl kak kiōitō sulitane dōkēwā eē esepa a. 3 Mik ie' tō Pedro ena Juan dōkēwatke e' suē, etā inukōl kak kiēitō ie'pa a. 4 Etā ie'pa tō ie' suēwā kreerē iwō kī tā Pedro tō ichē ia:

—Sa' saū.

5 Etā ie' tō ie'pa suē tā ibikeitsēitō tō ilē kakkemeitō ye' a. 6 Erē Pedro tō ichē ia:

—Kē ye' wā inukōl tā'. Kē ye' wā oro tā'. Erē i tso' ye' wā e' mekeyō be' a. Jesucristo Nazaret wak e' ttō wa, be' e' kōkā tā be' shkō.

7 Etā Pedro tō iklō'wēwā iulā bua'kka tā ibatsēka. E' wōshā tā iklō a idichē iēne 8 tā itunekā e' duēkaie tā ishkémī wī'kē iō'kē. E' ukuōki tā imīwā Skēkōl wē a Pedro ena Juan tā iwák klō wa. Ie' turkeka, es Skēkōl kīkekaramiitō. 9 Etā pē' tso' kōs e'pa tō isuē tō ishkōrami tā Skēkōl kīkekaramiitō. 10 Ie'pa tō ie' suēwā tō ie' dōr wēm e' tkōke inukōl kak kiōk Skēkōl wē wēkkō kiē Wēkkō Buaala e' a e'. E' tō ie'pa tkiwēwā tajē. Ie'pa wōkranēwā iweblōk.

*Pedro tō s'pattē Skēkōl wē a*

11 Skēkōl wē e' ūle kiē Salomón ūle, eē wēm buanene e' tso'ia Pedro ena Juan paklō'uk. E' dalewa pē' kōs datse tuneule wē ie'pa tso' eē tā ie'pa tkinēwā tajē isauk. 12 Mik e' suē Pedro tō, etā ie' tō ie'pa a ichē: "A Israel aleripa i' kuękj a' tkirke? ¿I' kuękj a' tso' sa' sauk kreerē wēsua sa' wák tō wēm i' bua'wēne shkōwēne sa' wák dichē wa ō sa' serke yēsēsē Skēkōl a e' kuękj? 13 Erē Skēkōl dōr Abraham, Isaac, Jacob ena se' yēpa malepa bak ká iaiāē, e'pa Kēkōl, e' tō ie' kanē mēso kiē Jesús, e' kīkēkā iyi ulitane tsatā, e' dōr yi me'ttsa ttēwā a' tō e'. Ie' watē'ttsa a' tō Pilato wōrkj erē e' tō ibikeits-bak iōkshka. 14 Jesús dōr batse'r ena yēsēsē warma a' tō iki' tō e' yōttsā. Erē e' skēie a' tō pē' suluē e' yōktsā ka'. 15 Es sēne mukwak e' kōtwa a' tō, erē ishkeō'kane Skēkōl tō. E' kōs su' sa' tō sa' wōbla wa. 16 Wēm i' kraulewā e'

suule a' wə buaë. Ie' diché iënene sa' erblöke Jesús mik e' wa. Jesús mik erblè, e' tò wëm i' bua'wéne buaë a' wörki.

17 "A yamipa, ye' wə ijcher tò mik a' ena a' wörkirpa tò Jesús kōtwə, etə a' kē wə ijcher mokj tò i' wamblok a' tso'. 18 Erè i' yē'atbak Skèköl tò ittekölpa ulitane kkō wa tò wé pairine'bitu idi' wa s'blúie e' kawōtə ttəwə es, e' wawé Skèköl tò es. 19 E' kuekji i' sulu watōttsə. A' er mane'ú Skèköl a' as a' nuì olo'yōitō a' kji. 20 Etə es ie' tò a' er pablraë tə Jesús pairi'bituitō idi' wa s'blúie e' patk-eraneitō se' a'. 21 Erè i' tə ie' kawōtə senuk ká jai a' dō mik Skèköl tò i' kōs yuëne buaë wēs kenet es etə. Es Skèköl tò iyē'bak ká iaiə ittekölpa batse'r e'pa wa. 22 Moisés tò Jesús yē' se' yēpa bak ká iaiə, e'pa a' i' es: 'A' shuə Skèköl tò itteköl keraka eköl wēs ye' es. E' ttō kōs dalōiō a' tò. 23 Wépa kē wə ie' ttō dalōiëne, esepa ulitane skerattsa se' wakpa yöki bānet, ie'pa erdawa sēraa.\* Es Moisés tò iyē'at.

24 "Es ñies Samuel ena Skèköl ttekölpa malepa dē'bitu ie' itōki, e'pa kōs tò i' tkōke kawō ikkē tə, e' yē'atbak. 25 I' uk Skèköl kablè' ká iaiə ittekölpa wa, e' wə dōraë se' ulə a'. Ñies ttè me'atbakitō se' yēpa bak ká iaiə e'pa a, e' wə dōraë se' ulə a'. Ie' tò iyē'atbak Abraham a' i' es: 'Be' aleripa batamik ye' er buaë chōraë ká ulitane wakpa a'. 26 E' kuekji mik ie' tò ilà Jesús shkē'wékane, etə ipatkéitō se' a' kēwe se' a' er buaë choie as se' ser sulu ese olo'yōsō eköl eköl."

4

*Pedro ena Juan e' tsatké judiowak wörkirpa wörki*

1 Etə Pedro ena Juan tso'ia s'pattök, e' shuə sacerdotepa bitesha Skèköl wé shkèkipa wörkir tə ena saduceowakpa tə. 2 Pedro ena Juan tso' s'wōbla'uk tò Jesús kōtwə e' shkēnekəne. E' wa iwə kkachéitō tò s'duowə e'pa shkerdakəne. U' tò sacerdotepa ena ie'pa malepa uluwékə tajé. 3 Ie'pa tò Pedro ena Juan klō'wəwə. Ká detke tsáli, e' kuekji iméarakitō s'wōto wé a' dō bule es. 4 Erè wépa tso' Pedro ttō ttsök, e'pa shuə tajé ie'pa tò Jesús tté buaë klō'wé. Es Jesús mik erblök'wakpa wépa è esepa deka mil skeyök e' ulatök (5000).

5 Bule es tə judiowak wörkirpa ena ikuëblupa ena s'wōbla'uk ttè dalōiëno wa wakpa e' dapa'wékə Jerusalén. 6 Ñies sacerdote kibi kiè Anás e' tso'. Ñies Caifás, Juan, Alejandro ena imalepa dör sacerdote kibi e' ditswō e'pa kōs tso'. 7 Ie'pa tò Pedro ena Juan tsuk patké tə iduēsərak ie'pa wörki tə iwə chakéarakitō:

—¿Yi diché wa, yi ttō wa wëm klō kraulewə e' bua'wéne a' tò?

8 Etə Pedro a' Wiköl Batse'r iënewə tajé tə iütéitō:

—A s'wörkirpa, a s'kuëblupa. 9 Sa' tò s'kirirke e' kime' er bua' wa, e' chaké a' tò sa' a. A' kji ikiane jchenuk tò wēs ibuanene. 10 I'ñe tə sa' tò iché a' wörki, ñies Israel aleripa ulitane e'pa wörki tò wëm i' buanene sulitane wörki Jesucristo Nazaret wak e' ttō wa. E' wák kōtwə a' tò krus mik eré Skèköl tò ishkeo'kane. 11 Skèköl yëkuuō kji itso' kitule: "Ák watè'ttsə u' yuök'wakpa tò, e' yōnene ák bua'buaië.\*" Ák e' dör Jesucristo ché. 12 Ie' dör S'tsatkōkwak. Skèköl kē wə yi ská patkéule ká i' kji s'tsatkoie. E' kuekji Jesucristo eköl è wa s'tsatkërmi.

13 Mik iwörkirpa tò isué tò Pedro ena Juan dör skle siarla, kē wōblaule yëkuuō wa eré ittōke buaë kē suane, etə ie'pa tkinewa. Ie'pa éna ianewə tò ie'pa bak shkōk Jesús tə ittōkatapaie. 14 Wëm buanene e' dur Pedro ena Juan tə, e' kuekji ie'pa kē a' iyënuk tò e' dör kache. 15 Etə ipatkémirakitō u'rki tə ie'pa atə ileritsök. 16 Ie'pa iché ñi a':

—¿Wes sō wépa i' wëm? Kōs Jerusalén wakpa wə ijcher tò i' kē or yi a' ese wé ie'pa tò etk. E' kē yënuk se' a' tò e' dör kache. 17 Erè ipauñusō as i'tami Jesús tté i' kē pakōia ie'pa tò yi a, es kē itté bunukká ká wa'ñe.

18 Etə ikiéarakitō tə iché iarak:

—Kē a' kawō tə'ia Jesús tté pakök yi a. Ñies a' kē kawō tə'ia yi wōbla'uk tté e' wa.

19 Erè Pedro ena Juan tò iütérak:

—A' wákpa tò ibikeitsō tò Skèköl wōa yi ttō dalōië dör buaë sa' a, a' ttō ö ie' ttō. 20 Erè i' su' sa' tò ena i' tstsé' sa' tò, e' pakeraë sa' tò kekraë sulitane a.

21 Etə iwörkirpa tò ie'pa kji pauñé darèrèe tə iémirakitō. Wëm kraulewə buanene e' kuekji pé' kōs tso' Skèköl kíkōkka. E' kuekji iwörkirpa kē ulə dē'wə Pedro ena Juan we'ikök. 22 Wëm buanene Skèköl diché wa e' kji duas tso' dabom tkéyök (40) kija.

*Jesús mik erblök'wakpa tò ikié Skèköl a*

23 Etə Pedro ena Juan émirakitō tə imiyal wé imalepa tso' eë. I' kōs ye' sacerdotepa wörkirpa ena judiowak kuëblupa e'pa tò e' pakéarakitō imalepa a sēraa. 24 Mik e' tstsé ie'pa tò, etə ie'pa ulitane kkōché ñita Skèköl a' i' es: "A Skèköl, ká jai ena ká i' ena dayé ena i' kōs tso' iki, e' yó' be' tō. 25 Ká iaiə è be' tò sa' kékəpa David dör be' kanè méso, e' ka' ttök Wiköl Batse'r wa. Ie' tò iyé' i' es:

¿Iök ká malepa wakpa ulunekə tajé troka tajé Skèköl kji?

¿Iök ie'pa ileritseke ñippök ie' tə? Kē e' wamblənuK ie'pa a.

\* 3:23 Deuteronomio 18.15,18-19 \* 4:11 Salmo 118.22

† 4:26 Salmo 2.1-2

26 *Ká* wökirpa ena blu'pa e'pa ulitane ñippakka ie' ta. Ie'pa ileritseke ñippök ie' ta ena wé pairi'bitütö idi' wa s'blúie e' ta.<sup>†</sup>

Es David tö iyè'.

27 "Ttè e' dör mokjë. Iwà sué sa' tö tö s'wökirpa kiè Herodes ena Poncio Pilato, e'pa ñi dapa'wéka ká i' a Israel aleripa ta ena pè' kè dör Israel aleripa esepa ta ñita Jesús we'ikök. Ie' dör be' kanè méso batse'r pairi'bitü be' tö idi' wa s'blúie e'.<sup>28</sup> Es i kos wé ie'pa tö ie' ta e' wé ie'pa tö wés be' tö isuletè'atbak es.<sup>29</sup> A Skèköl, e' kuékj ie'pa tso' sa' pauñuk darèrèè, e' ttsö. Sa' dör be' kanè méso pa e'pa a diché kï mú Jesús tté pakoie kè suane.<sup>30</sup> Be' diché kkachö. S'kirirke bua'üne, i kè or yi a ese ú iwà kkachöie, ñies íyi ese ú tajè Jesús dör be' kanè méso batse'r e' ttö wa."

31 Mik ie'pa tö ikié one, etá wé ie'pa tso' e' ké wötj'ne. Etá ie'pa ulitane a Wiköl Batse'r ienewa ta ie'pa tö Skèköl tté pake kè suane.

*Jesús mik erblökwakpa ñi kímé*

32 Jesús mik erblökwakpa dör tajè. Ie'pa kabikeitsöke ñikkèè, ulitane er ttsè'r ñittsèè. Kè yi tö icheku' tö ie'pa íyi e' dör ie'pa è icha, e' skéie e' dör ie'pa icha ñikkèè.<sup>33</sup> Jesús ttekölpa tsá e'pa tö Jesús shknekane, e' tté kï pakeke diché tajè wa. Skèköl tö ie'pa kos kimeke tajè.<sup>34-35</sup> Yi wa ká tso' ö ilè ská tso' rak iwá, ese watuekerakitö ta iské mekerakitö Jesús ttekölpa tsá e'pa a blaté wépa dör siarè esepa a wés e'pa kiane kímè eköl eköl es. E' kuékj kè yi weirku' siarè ie'pa shuá.<sup>36</sup> Ie'pa shuá wém tso' eköl dör Leví aleri datse ká kiè Chipre, e' kiè José. Jesús ttekölpa tsá tö ikiè méka Bernabé (e' kiane yéno s'pablökwak).<sup>37</sup> Wém e' wá ká tso'. E' watuétitö ta iské méitö Jesús ttekölpa tsá a as ie'pa tö s'siarèpa kímü iwa.

## 5

*Í sulu wamblé Ananías ena Safira e'pa tö e' pake*

1 Erè wém bak eköl kiè Ananias, e' tayè kiè Safira. E'pa tö ká watuéttsa.<sup>2</sup> Etá wém e' tö iká ské tsá yétttsa iwákpa a ta ieyök méitö Jesús ttekölpa tsá a wés ká ské seraá es. E' jcher ilaköl wá seraá.<sup>3</sup> Etá Pedro tö iché ie' a:

—A Ananías, ¿jök be' e' mettsa Satanás a kítö'wé ta be' kéitö kachök Wiköl Batse'r a? Ká watuébö e' ské kak tséatbö.<sup>4</sup> Kam be' tö iwataüttsa etá be' icha idir. Ta be' tö iwatuéttsa, etá iské dör be' icha. ¿jök be' ibikeitsé wamblé es? Be' kè kayène s'ditsö a. Be' kaché Skèköl a.

5 Mik e' ttsé Ananías tö etá ianewa duowaie. Etá ie'pa kos wá ijchenewa, e'pa suane tajè.<sup>6</sup> Etá duladulapa wélepa debitu ta inu patrèwarakitö tsémi bléwa.

7 Hora tka mañat e' ulatök, etá Ananías tayè dewá Pedro ska'. Wés iwém de e' kè jcher ie' wá.<sup>8</sup> Ta Pedro tö ie' a ichaké:

—Ichö ña. ¿Mokj a' tö ká watuét kos a' tö iché ekké?

Safira tö iüté:

—Tö, ekké je'.

9 Pedro tö iché ia: ¿jök a' tö kawö mé ñi a Skèköl Wiköl wötsiriuk? Wépa wa be' wém nu mí bléwa, se e' wakpa doyalane ta író ie'pa wá be' nu michoé bléwa ñies.

10 E' bet ta Safira anewa ta iduowa Pedro klö ska'. Mik duladulapa dewá ta Safira nu tèt ta ie'pa wá inu mitsèr bléwa iwém o'mik.

11 Etá Skèkèpa Jesús icha erule ulitane ena sulitane wá ijchenewa, e'pa suanerak tajè.

*Í kè or yi a ese wé tajè Jesús ttekölpa tsá tö*

12 Jesús ttekölpa tsá e'pa tö i kè or yi a, ese wéke tajè pè' shua iwà kkachöie. Jesús mik erblökwakpa ulitane e' dapa'úke Salomón úle a.<sup>13</sup> Pè' éltèpa tö ie'pa dalöieta' erè kè diché dè'ka e' tiükwá ie'pa shuá.<sup>14</sup> Erè wépa erblé Jesús mik, wépa ena alakölpa, esepa kï iérkerak tajè kekraé.<sup>15</sup> Pè' tö s'kirirke tsémirak kata shuéur ñala kkömik as Pedro tkö ta ilo mú ar esepa wéle kï as ibuarne.<sup>16</sup> Ñies ká tso' kos Jerusalén pamik, e' wakpa de tajè s'kirirke wétttsè. Ñies wimblupa sulusi s'tteke esepa wétttsè. Etá e'pa ulitane buanene seraá.

*Jesús ttekölpa tsá wötènewa s'wöto wé a*

17 Etá sacerdote kibi ena iklépa kiè saduceowakpa, e'pa ukyèneká tajè Jesús ttekölpa tsá e'pa kï.<sup>18</sup> E' kuékj iklö'wéwarakitö wötéwa s'wöto wé a.<sup>19</sup> Erè nañewe ta Skèköl biyöchökwak eköl tö s'wöto wékkö ppéé ta iyétttsarak ta iché ia: <sup>20</sup> "A' yúne Skèköl wé a. Eé a' e' duóka sene pa'alí Jesús ta, e' tté pakök sulitane a." <sup>21</sup> Bule es bla'mi ta idewarak Skèköl wé a ta ie' kékarak s'wöbla'uk wés ie'pa a iyène es.

Etá sacerdote kibi ena iklépa tö Israel aleripa wökirpa ulitane kiétttsa e' dapa'úka ie'pa ta. Etá Jesús ttekölpa tsá e'pa tsuk patkérakitö.<sup>22</sup> Erè mik ishéképa demirak s'wöto wé a, etá kè iwá ikunerak. Ta ideb-iturak ibiyó mukne <sup>23</sup> ta ichéraitö:

—Sa' tö s'wöto wékkö kué wötéule buaé. Ñies shkéképa tso' rak iwékkö kkö'nuk. Erè mik sa' tö iwékkö ppéé, etá kè sa' wá yi kune ee.

24 Mik Skèköl wé shkéképa wökir ena sacerdote wökir kibipa, e'pa tö ttè e' ttsé etá ie'pa éna ká chowa ta íñi chakerak: "¿Wés iwá dötttsami?"<sup>25</sup> E' ukuökj ta bet eköl de ibiyó muk ta iché iaraku:

—Wépa wötè'wá a' tö s'wöto wé a, e'pa tso'ne Skèköl wé a s'wöbla'uk.

26 Etá shkéképa wökir mía iyulök ishéképa ta. Iklö'wéwarak erè ie'pa suane dö' pè' tö

s'tè ák wa, e' kueḡi ie'pa kē wā iweineia.  
 27 Mik ideminerak eta itsémirakitō ju-  
 diowak wōkirpa wōrkī. Eta sacerdote kibi  
 tō iché ie'pa a:

28 —Sa' tō a' a iyē' etkēme tō wēm e' tté  
 kē pakar yēs. Eta ḡi wamblé a' tō? A' tō  
 Jerusalén wakpa ulitane wōbla'weke tté e'  
 wa. Nies a' tso' ichök tō wēm e' kōtēwā, e' nuí  
 tkēnewā sa' mik.

29 Erē Pedro ena Jesús ttekōlpa tsá malepa  
 tō iütérak:

—Sa' kawōtā Skékōl ttō dalōiök s'ditsō ttō  
 tsatā. 30 A' tō Jesús ttōkwa ka' wōtēulewā krus  
 mik. Erē se' wakpa bak iaiāē e' Kékōl e' wák  
 tō Jesús shkeō'kane. 31 Skékōl tō ibatsékami  
 e' ska' tkēsēr iulā bua'kka s'wōkirie ena  
 s'tsatkōkwakie as Israel aleripa er mane'ū tā  
 ie'pa kī ie'pa nuí olo'yarmi. 32 Íyi ikkē kōs su'  
 sa' tō e' pakōk sa' tso' a' a. Nies Wikōl Batse'r  
 mēne wēpa tō Skékōl ttō dalōieke esepa a, e'  
 tso' a' a ipakōk.

33 Mik ie'pa tō e' tssé eta ie'pa ulunekā tajē  
 Jesús ttekōlpa tsá e'pa kī. Ie'pa éna ittakulur.  
 34 Erē ie'pa shuā wēm tso' ekōl e' dōr farise-  
 owak kiē Gamaliel. Ie' dōr s'wōbla'uk tté  
 dalōiēno wa wakpa ese ekōl. Sulitane tō ie'  
 dalōieke tajē. Ie' e' duékā tā iché: “Jesús klépa  
 yōlur kañikā ekuölō.” Eta ie'pa tō iyélur.

35 E' ukuōkī tā ichéitō imalepa a:

—A yamipa Israel aleripa. A' isaú bua'ie  
 tō i weke a' tō wēpa wikkēpa tā. 36 A' éna  
 ianú tō barbane wēm kiē Teudas e' e' ka'ka  
 ichök tō e' dōr wēm tajē ese. Wēpa dōka  
 cien tkēyök (400) e'pa e' yuē ie' klépaie. Ie'  
 du'wā kōtulewā tā iklépa pone'mi wī a diā a.  
 Es ilone'. 37 E' ukuōkī tā mik s'wōkirpa s'kiē  
 shtök patkē', e' kéwō ska' tā wēm skā ekōl kiē  
 Judas Galilea wak e' e' ka'ka. Pē' welepa e'  
 yuē ie' klépaie. Erē nīes ie' kōtēwā tā iklépa  
 pone'mi sēraa wī a diā a tā eē ilone'. 38 E'  
 kueḡi ye' tō iché a' a tō wēpa wī muat bēre.  
 Kē i sulu wamblar ie'pa tā. I aleritseke ie'pa  
 tō ena i weke ie'pa tō e' dōr tté èsē, e' tā bet  
 tā kē itā'ia. 39 Erē Skékōl tté idir, e' tā kē a'  
 e' alōpakā iki. A' isaú buaē dō' a' tso' ñippök  
 Skékōl tā.

Ie'pa tō Gamaliel ttō iuté. 40 Ie'pa tō  
 Jesús ttekōlpa tsá e'pa tsuḡ patkēne tā iḡpōk  
 patkérakitō tā iché iarak: “Kē a' a kawō  
 tā'ia Jesús tté pakōk.” E' ukuōkī tā iémirakitō.  
 41 Es Jesús ttekōlpa tsá e'pa e' yélur judiowak  
 wōkirpa wē a. Skékōl tō ie'pa mé weinuk  
 Jesús tté kueḡi, e' tō ie'pa tssé'wē buaē. 42 Es  
 kekraē ká bit ekkē Skékōl wé a nīes u a u a  
 ie'pa tō s'wōbla'weke s'patteke Jesús dōr wé  
 pairine'bitū idi' wa s'blúie e' tté buaē wa.

**6**

*Wēpa kul shushtérakitō Jesús ttekōlpa tsá  
 kimoie*

1 E' kéwō ska' tā Jesús ttōkatapa kī daparke  
 tajē e'pa dōr judiowak. Ie'pa welepa ttōke  
 griegoie, esepa tō imalepa ttōke iwakpaie  
 e'pa cheke suluē. Ie'pa tō icheke:

—Mik chké blatērke kekraē, eta sa' tayēpa  
 schō, esepa kē a imēne kōs imalepa ttōke  
 judioie esepa a imēne ekkē.

2 E' kueḡi Jesús ttekōlpa tsá dabom eyök kī  
 ból (12), e'pa tō Jesús ttōkatapa ulitane kié e'  
 dapa'uk tā ichéitōrak:

—A yamipa, kē idōr buaē sa' a  
 s'wōbla'weke sa' tō Skékōl tté wa e' kané  
 mukat íyi watioie e' ē kueḡi. 3 E' kueḡi a'  
 shuā wēpa yulō kul as kané e' ū ie'pa tō.  
 Wēpa sūle sulitane wā tō ie'pa a Wikōl  
 Batse'r tso' tajē ena ikābikeitsō buaē, esepa  
 shushtō tā sa' tō ie'pa mekekā kané ñe' ūk.  
 4 Eta sa' e' ché kekraē ttōk Skékōl tā ena  
 s'wōbla'uk ie' tté wa.

5 E' wēr buaē ie'pa ulitane wa. Ie'pa tō  
 Esteban shushté. E' erblé buaē Skékōl mik  
 nīes ie' a Wikōl Batse'r tso' tajē. Nies Fe-  
 lipe, Prócoro, Nicanor, Timón, Pármenas ena  
 Nicolás e'pa shushté ie'pa tō. Nicolás dōr  
 Antioquía wak, e' e' yō'bak judiowakie. 6 Eta  
 itsémirakitō wé Jesús ttekōlpa tsá e'pa tso'  
 eē. Eta ie'pa ulā mékā wēpa ñekkēpa kī tā  
 ie'pa tō ikié S'yē a tō ikimū.

7 Es Skékōl tté kī pakanemi tajē. Nies Jesús  
 ttōkatapa kī daparke tajē Jerusalén. Nies  
 judiowak sacerdotepa tajē tō tté mik se'  
 erblōke e' wa klō'wé.

*Esteban klōnewā*

8 Eta Skékōl er buaē ché Esteban a tajē tā  
 diché méitō ia tajē. E' wa i kē or yi a ese  
 wekeitō tajē pē' shuā iwā kkachioie tō Jesús  
 tté dōr moki. 9 Erē wēpa welepa tō Esteban  
 chémi suluē. Ie'pa welepa dōr judiowak  
 ñi dapa'wō wé kiē Kané Mésopa Auleshka  
 Esepa Wé e' wakpa. (Ie'pa bak klōulewā  
 kaneblök erē iyērulunebak.) Nies judiowak  
 welepa tso' datse Cirene, Alejandría, Cili-  
 cia ena Asia, e'pa kōs wōñarke Esteban kī.  
 10 Erē Wikōl Batse'r tō Esteban a tté mé  
 ttoie buaē, e' kueḡi ie'pa kē a e' alirka ie'  
 kī. 11 E' kueḡi ie'pa tō wēpa welepa patuē  
 kachök: “Sa' ittse tō Esteban tso' Moisés  
 ena Skékōl chök suluē.” 12 E' wa ie'pa tō  
 pē' uluwéka tajē Esteban kī. Nies judiowak  
 kuēblupa ena s'wōbla'uk tté dalōiēno wa  
 wakpa uluwékarakitō Esteban kī. E' kueḡi  
 ie'pa de Esteban ska' tā iklō'wéwarakitō  
 tsémirakitō judiowak wōkirpa ska'. 13 Nies  
 wēpa yulérakitō kachioie, e'pa tō iché:

—Kekraē wēm wī tō Skékōl wé dōr batse'r  
 i' ena Moisés tté dalōiēno e' cheke suluē.  
 14 Nies sa' tō ie' tssé ichök tō Jesús Nazaret  
 wak e' tō Skékōl wé tskerawā ena sene me'at  
 Moisés tō se' a e' mane'wékettsaitō.

<sup>15</sup> Etá judiowak wókirpa qos tulur ee, e'pa tó isué tó Esteban wó wër dalólöe wes Skéköl biyöchökwak wó wër es.

**7**

*Esteban e' tsatké*

<sup>1</sup> Sacerdote kibi, e' tó Esteban a ichaké: —Í kî be' kkatërke ¿e' dör mokî?

<sup>2</sup> Ie' iüté: “A yamipa, a yépa, ye' ttó ttsó. Mik se' kéképa Abraham bak iaiäé Mesopotamia, kam imi' senuk Harán, etá ee se' Kéköl olo ta' tajë, e' e' kkayé' ie' a. <sup>3</sup> Etá ichéitö ia: ‘Be' ká ena be' yamipa, e' múat ta' be' yúshka senuk, ká kkachekeyö be' a ee.’ <sup>4</sup> Es Abraham e' yé'ttsá Caldea atë Mesopotamia ee, ta imiá senuk Harán. Iyë blénewa e' ukuökî ta' Skéköl tó ie' patké' senuk ie, wé se' serke i'ne ta' ee. <sup>5</sup> Kuaé Skéköl kè wa ká i' mène ie' a yës, elkela wè'ia è kè ie' a imène. Erë e' kèwö ska' ta' ie' kè ala'r ta', erë Skéköl kablé' ie' a tté i' wa: ‘Ká i' meraeyö be' aleripa a be' blénewa e' ukuökî ta.’ <sup>6</sup> Nies Skéköl tó iché ie' a: ‘Be' aleripa serdaé ká senuk kî wés ká kuá'kî wakpa es. Eë ie'pa klórdawa kané mésoie kè patueta' ese. Iweirdarak siarë döká duas cien tkéyö (400).’ <sup>7</sup> Erë Skéköl tó iché ia: ‘Ká wé wakpa tó ie'pa we'ikera, esepa ské we'ikerayö siarë. E' ukuökî ta' ie'pa e' yóratssa ká e' a as ye' dalóiorakitö ká i' kî.’ <sup>8</sup> Etá Skéköl tó iché ia: ‘A' ala'r wépa kurke qos esepa tottola kkuölitla tóö tsir. E' ú kekraé iwá kkachöie tó ye' tó tté me' be' a.’ E' kuékî mik ie' alá kié Isaac kî ká de pakól, etá itóttola kkuölitla tééit tsir. Es nies Isaac tó iwé'ila Jacob” ta. E' sú Jacob tó iwé'ila'rla dabom eyök kî böi (12), e'pa ta. Ie'pa dör se' dör Israel aleripa ditséwöpa dabom eyök kî böi e' yépa tsá.

<sup>9</sup> “Erë se' yépa tsá, e'pa ukyëne iël tsirla kié José e' ta. E' kuékî ie'pa tó iwato'ttsá ta yi tó itué e' wa imits'er Egipto. Erë Skéköl tso' ie' ta. <sup>10</sup> Ie' tó itsatké kekraé qos iweirke e' shua. Nies kábikeitsé buaé méitö ia. Nies ie' tó Faraón ké isaük er bua' wa (Egipto wakpa tó iblúpa qos kié Faraón). E' kuékî Faraón tó ie' tkéka Egipto iyi qos e' wókirie nies ie' wák u wókirie.

<sup>11</sup> “E' ukuökî ta' ketba aneká Egipto ena Canaán, e' qos a. E' wakpa weine siarë. Se' yépa tsá kè wa i' kune'ñanoie katanoie. <sup>12</sup> Erë mik Jacob wá ijchenewa tó iyiwö tso' Egipto, etá ie' tó ila'r dör se' yépa tsá, e'pa patkémi iyiwö taük ee, e' dör ie'pa tsá dè'rö. <sup>13</sup> Mik ie'pa ská dè'rö etá José tó ie'pa a'iché: ‘ye' dör a' èl. Es Faraón wá ijchenewa tó iyiwö tso' ditséwö José dör. <sup>14</sup> E' ukuökî ta' ie' tó iyë Jacob ena iyamipa qos tsük patké as idóbitü Egipto. E'pa döká dabom kuryök kî skel (75). <sup>15</sup> Es Jacob mineá senuk Egipto. Eë iblénewa. Eë

ie' ala'r dör se' yépa tsá, e'pa blérulune ñies. <sup>16</sup> Ie'pa nu minene Siquem wótéwa iwakpa pö a. Ká e' watö' Hamor ala'r tó Abraham a pöie.

<sup>17</sup> “Erë Skéköl kablé' Abraham a tté i' wa: ‘Be' aleripa yerattsane ye' tó Egipto.’ Mik e' kèwö dökewatke, etá se' yépa kî alóne tajë. <sup>18</sup> E' kèwö ska' ta' Egipto blú ské tkénéka, e' kè wa José paké jcher. <sup>19</sup> Blu' e' tó se' yépa kítö'wé we'iké siarë. Ie' tó ie'pa kè késik wa ila'rla wépa kune erpa esepa qos watóktsa as iduölur. <sup>20</sup> E' kèwö ska' ta' Moisés kune', e' dör buaala shute. Iyë ena imi tó ikkö'né u a döká sa' mañat. <sup>21</sup> E' ukuökî ta' ie'pa kawöta' iwatóktsa as iduöwa erë Egipto blú alá busi tó ikuéwa tsémi u a tala'wé wes iwák alá es. <sup>22</sup> Es Moisés yöne tajë iyi jcher Egipto wakpa wa, qos e' wa. Ittö è kî ittsénewa, ñies i' wekeitö e' è kî iwénewa tó ie' dör wém tajë ese.

<sup>23</sup> “Mik ie' kî duas de dabom tkéyök, (40) etá ibikeitséitö: ‘Ye' mía ye' yamipa dör Israel aleripa e' weblök.’ <sup>24</sup> Etá ie' isué tó egiptowak eköl tso' Israel aleri eköl we'ikök. E' kuékî ie' mishka itsatökö ta' egiptowak ttéwáitö iskéie. <sup>25</sup> Ie' ibikeitsé tó iyamipa Israel aleripa éna iarmi tó Skéköl tó ie' patké ie'pa tsatökö. Erë kè iwá ene ie'pa éna. <sup>26</sup> Bule es ta' ie' tó Israel aleripa kué böi ñippök. Ie' kî ikiane tó ie'pa mú er buarne ñi kî, e' kuékî ichéitö iarak: ‘A' dör ñi yamipa. ¿Iök a' ñi we'ikö?’ <sup>27</sup> Etá eköl tó iyami we'ikeke, e' tó Moisés patkéumi ta' ichéitö ia: ‘¿Yi tó be' tkéka sa' wókirie sa' shulökwakie? <sup>28</sup> ¿Be' éna ye' ttakwa ye' tséké be' tó egiptowak kötwa es?’ <sup>29</sup> E' ttséwa Moisés tó ta' itkashkar ká bánet kié Madián ee. Eë isené wes ká kuá'kî wak es. Eë ila'rla kéká böi.

<sup>30</sup> “Eë ie' sené dö duas dabom tkéyök (40). Ká et ta' Skéköl biyöchökwak eköl e' kkaché ie' a Sináí kébata a tsinet ká sir poé wé kè yi serku' ese ska'. Ie' e' kkaché ia kal tsir wónarke bö'ie e' shua. <sup>31</sup> Moisés wókranewa iweblök. Erë mik ie' e' skéwa isaük bua'iewa ta' Skéköl ttó ttséitö, e' tó iché ia: <sup>32</sup> ‘Ye' dör be' yépa bak iaiäé kié Abraham, Isaac ena Jacob e'pa Kéköl.’ Etá Moisés painéka tajë suane kuékî. Ie' kè diché dè'kaia isaük. <sup>33</sup> Etá Skéköl tó iché ia: ‘Wé be' dur, e' ké dör batse'r, e' kuékî be' klökkuo yóttssa. <sup>34</sup> Mokî ye' isué tó wépa dör ye' ichta tso' Egipto e'pa weirke. Ie'pa kköchöke e' tséyö. E' kuékî ye' dè'ttsá ie'pa tsatökök. E' kuékî ittsó: Ye' tó be' patkerami Egipto.’

<sup>35</sup> “Israel aleripa tó iyé' Moisés a: ‘¿Yi tó be' tkéka sa' wókirie sa' shulökwakie?’ Erë ie'pa tó ie' waté'ttsá, erë Skéköl tó patké' ie'pa wókirie ena ie'pa tsatökökwakie. E' bak mik Skéköl biyöchökwak e' kkayé'wa ie' a kal tsitsirla shua etá. <sup>36</sup> Es Moisés tó se' yépa

\* 7:8 Jacob: E' kié nies Israel.



yè'ttsa Egipto a. Egipto ena dayë kiè Dayë Mat eë ie' tò ì kè or yi a ese wé tajë. Nies e' wéitò duas dabom tkéyök ekkè ká sir poë wé kè yi serku' eë. <sup>37</sup> Ie' wák tò iché ie'pa a: 'Skèköl tò itteköl keraká eköl a' shuá wes ye' es'. <sup>38</sup> Mik Israela aleripa tso' rak echkaie ká sir poë wé kè yi serku' eë, eta' Moisés tso' ie'pa shuá. Nies Skèköl biyöchökwak tté ie' ta' Sinai kébata a. Skèköl tté tò sene meke sia e' yéne ie' a eë, e' pakéne ie' tò se' a.

<sup>39</sup> "Erë se' yépa kè wa ie' ttè dalöiene'. Ie'pa tò ie' tté waté'ttsa. Ie'pa shkakne Egipto. <sup>40</sup> E' kuëkí ie'pa tò iché Aaron a: 'Moisés tò se' yè'ttsa Egipto a. Kè sa' wá ijcher ì tka ie' ta'. E' kuëkí iyi diököl yuó se' a bót mañat dalöie skèkölíe as e' mi' se' wéttsuk.' <sup>41</sup> Es ie'pa tò baka pupula diököl yué dalöie. Ta' iyiwak jchéraakitò mè baka diököl a idalöioie. Ie'pa tò e' kéwö tkö'wé tajë, baka diököl yuérakitò iwákpa ulá wa, e' dalöioie. <sup>42</sup> E' kuëkí Skèköl e' skéttsa ie'pa yöki. Ie' tò ie'pa méat as békwö dalöiorakitò ie' skéie. Es Skèköl ttekölpa tò ikit iyékuó kí. Ie'pa tò iché:

'A Israel aleripa, mik a' sene' ká sir poë wé kè yi serku' eë duas dabom tkéyök (40) ekkè, eta' a' tò iyiwak jché' erë e' kè döer ye' dalöioie. <sup>43</sup> Wé dalöiekie pè' tò skèkölíe kiè Moloc, e' diököl wéla dami a' wá. Nies wé dalöiekie pè' tò skèkölíe kiè Refán e' diököl békwöie, e' dami a' wá. E' kós diököl yué a' wákpa tò, esepa dami a' wá dalöie. E' kuëkí ye' tò a' patkeraë kamië weinuk siarë Babilonia wj'kie.'†

Es ikiteat.

<sup>44</sup> "Es mik se' yépa bak senuk ká sir poë wé kè yi serku' eë, eta' ie'pa wa datsi'kuó dami e' shukuekar Skèköl wéie. E' a' ie' bak e' kkachök ie'pa a. U e' yöne wes ie' tò Moisés ka' iyuök es, wes ie' tò ikkayè' ia es. <sup>45</sup> E' ukuökí ta' u e' méat se' yépa bak e'pa tò ileripa a. Mik ie'pa demi Josué ta' pè' kuá'kí wakpa ká klö'ukwá, eta' u e' mirwarak iwá. Skèköl tò pè' kuá'kí wakpa uyéttsa ie'pa yöki. E' ukuökí ká tajë ta' David tkéneka blu'ie. E' kéwö ska' ta' u yöne iaiáe datsi'kuó wa, e' tso'ia. <sup>46</sup> David wër buaë Skèköl wa ta' ie' a David tò kawö kié ie' dalöio wé yuoie Israel aleripa a. <sup>47</sup> Erë David alá kiè Salomón, e' tò Skèköl wé e' yué. <sup>48</sup> Erë Skèköl döer iyi ulitane tsatá e' kè ser u yué s' ditsö tò ese a. Es itteköl eköl tò iyé'at, e' tò iché:

<sup>49-50</sup> 'Skèköl tò iché:  
 Ká jai e' döer ye' e' tköie.  
 ká i' döer ye' klö' tkoser.  
 Ye' wák tò iyi kós yö',  
 e' kuëkí çwes a' tò u yuëmi ye' a?  
 çWes a' tò ká mèmè ye' a enoie?‡  
 Es ikiteat.

<sup>51</sup> "Erë a' kè tò Skèköl dalöieta'. A' er darèrè. A' kukuöña darèrèé. Kékra Wiköl Batse'r wöklö'wè a' tò. A' döer wes a' yépa bak ká iaiáe es. <sup>52</sup> Ie'pa tò Skèköl ittekölpa kós we'ik. Es nies ittekölpa bak ichök tò yi döer Yésyèsè Chökle e' datse, e'pa kótulur ie'pa tò. I'ñe ta' yi döer Yésyèsè Chökle ñe' detke, erë iwatué'ttsa a' tò ttéwa. <sup>53</sup> A' ulá a Skèköl tté dalöiëno dè' ibiyöchökwakpa wa. Erë a' kè tò idalöie."

*Esteban ttéwa ie'pa tò*

<sup>54</sup> Mik iwökirpa tò ì pakè Esteban tò e' ttsé, eta' ie'pa uluneka iki tajë. Ie'pa ká wötéwa ulune è kuëkí. <sup>55</sup> Erë Esteban kí Wiköl Batse'r kí de tajë ta' iwö kéká ká jai a ta' Skèköl olo tajë e' suéitò. Nies ie' tò Jesús sué dur Skèköl ulá bua'kka. <sup>56</sup> Ie' tò iché:

—¡saú! Ye' tso' isaúk tò ká jai wékkö àr áie. Nies Jesús döer S'ditsö Alá e' saúk ye' tso' tò idur Skèköl ulá bua'kka.

<sup>57</sup> Erë ie'pa e' kukuöña wötéwa as kè iwattsér. Eta' ianekarak tajë ta' imishkarak seraq Esteban kí. <sup>58</sup> Ta' iyéttsarakitò Jerusalén a mitsér u'r'kí ee, ta' ie'pa tò ie' tème ák wa ittowaie. Esteban kkatökwakpa tso' itök, e'pa datsi' me'itörak duladula kiè Saulo e' a' blé.

<sup>59</sup> Ie'pa tso' Esteban tók ák wa, e' dalewa ie' tò ikié Skèköl a' i' es: "A Skèképa Jesús, ye' wiköl tsúmi be' ska'." <sup>60</sup> E' ukuökí ta' ie' e' tkéwa kuchè kí ta' ianeka tajë: "A Skèképa, ì sulu wamblok itso' rak, e' nu' olo'yó ie'pa kí." Mik e' chéitò ta' iduowa.

**8**

<sup>1</sup> Esteban ttéwa ie'pa tò e' tò Saulo ttsé'wé buaë.

*Saulo tò Jesús mik erblök'wakpa we'ikémitke*

E' diwö shà ta' Skèképa Jesús icha erule tso' Jerusalén e'pa we'ikémitke pè' tò. Ie'pa kós tkayalmi dö Judea ena Samaria. Erë Jesús ttekölpa tsá e'pa kè mineyal. <sup>2</sup> Wépa welepa tò Skèköl dalöiekie tajë, esepa tò Esteban nu bléwa ta' ie' jéitsérakitò tajë. <sup>3</sup> Erë Saulo tò Skèképa Jesús icha erule e'pa we'ikémi siarë. Ie' mirwa u a u a ie'pa yöktsa kuulemi patkèmi wötéwa s'wötö wé a wépa ena alakölpa nies.

*Jesús tté pakane Samaria wakpa a*

<sup>4</sup> Erë wépa bakyalmi Jerusalén, e'pa tò Jesús tté buaë pakémir ká wa'ñe wé imirwarak eë. <sup>5</sup> Es Felipe mia Samaria. Eë ie' tò wé pairine'bitu' idi' wa s'blúie e' tté pakémi ká e' wakpa a. <sup>6</sup> Mik ie'pa tò ie' ttöke e' ttsé nies ì kè or yi a ese wékeitò, e' suérakitò eta' ie'pa tò ittò kíttseske bua'iewa. <sup>7</sup> Es pè' a wimblupa sulusi tso', esepa bua'wéneitò tajë. Wimblupa sulusi yé'urulune

† 7:43 Amós 5.25-27    ‡ 7:49-50 Isaías 66.1-2

arkekarak tajë. Es ñies s'kraulewã tajë ena s'bachiulewã tajë, esepa buanene buaë. <sup>8</sup> E' kuekij kã e' wakpa kôs ttsë'ne buaë.

<sup>9</sup> Eta kã e' a wëm tso' eköl kië Simón. Ie' kanablë'mi iaiãë wës awá es. E' wa ie' tó Samaria wakpa kitë' tajë. Es ie' e' kkeó tó ie' dör imalepa tsãta. <sup>10</sup> Kã e' wakpa ulitane, siarëpa ñies inuköl blúpa, e'pa tó ie' ttó klö'g' buaë. Ie'pa tó iyë': "Skëköl kië Dichë Tajë, e' e' yué Simónie."

<sup>11</sup> Bãnet ie' tó ie'pa kitë'bitu ikanë wa. E' kuekij ie'pa tó ie' ttó iütë' buaë. <sup>12</sup> Erë mik Felipe tó i' blúie Skëköl tso' e' ttë buaë paké ñies Jesucristo ttë buaë paké, eta ie'pa tó iklö'wë tã ië' wöskuélor wëpa ena alakölpa. <sup>13</sup> Ñies Simón wák erblë Jesús mik tã iwöskuëe. Ie' michoë Felipe tã kekraë. Es ie' isue' tó i' kë or yi a ese weke Felipe tó tajë, e' tó ie' tkiwéwã.

<sup>14</sup> Mik Jesús ttekölpa tsã tso' Jerusalén, e'pa wã ijchenewã tó Samaria wakpa tó Skëköl ttë klö'wë, eta ie'pa tó Pedro ena Juan patkëmi eë. <sup>15</sup> Mik idemirak, eta ikiérakitó S'yë a Samaria wakpa tó iklö'wë, e'pa kij as Wiköl Batse'r dö ie'pa kij. <sup>16</sup> Kam Wiköl Batse'r döbitu ie'pa ulitane kij. Ie'pa wösuule Skëképa Jesús tó wa, e' è o' ie'pa tó. <sup>17</sup> E' kuekij Pedro ena Juan ulã mékã ie'pa kij tã Wiköl Batse'r de ie'pa kij.

<sup>18</sup> Simón tó isue' tó mik Jesús ttekölpa tsã ulã mékã ie'pa kij eta Wiköl Batse'r debitu iki. E' kuekij ie' tó inuköl watké Pedro ena Juan a, <sup>19</sup> tã ie' tó iché iarak:

—A' wã dichë tso' se, e' mú ye' a as yi kij ye' ulã mékã tã ese kij Wiköl Batse'r döbitu wës a' tó iweke es.

<sup>20</sup> Pedro tó iütë:

—Be' tó ibikeitsë tó i' kakmé Skëköl tó e' tormi inuköl wa, e' kuekij be' inuköl weinú kekraë be' wák tã. <sup>21</sup> Be' er kë dör yësyësë Skëköl wöã, e' kuekij dichë i' kë menuk be' a. <sup>22</sup> Be' er mane'ü i' sulu wamblekebó i', e' yöki. Skëköl a ikió as i' bikaitsëbó suluë isalema e' nuj olo'yemiitó be' kij. <sup>23</sup> Ye' tó isue' tó be' er dör suluë kësik ëme. E' wã be' wák kôs tso' klöulewã.

<sup>24</sup> Simón tó iütë:

—Skëköl a ikió as i' kôs chë a' tó e' kë tkö ye' tã.

<sup>25</sup> Eta i' o' Skëköl tó ie'pa tã e' ttë paké Pedro ena Juan tó. Ñies s'pattërákitó Skëképa Jesús ttë wa. E' ukuökij tã ie'pa miyalne Jerusalén. Tã ñalã wa Samaria shuã kã tso' tajë, e' wakpa a ie'pa tó Jesús ttë buaë pakerami wës imirdak es.

*Felipe tó Etiópia wák eköl wöbla'wë*

<sup>26</sup> E' ukuökij tã Skëköl biyöchökwak eköl tó iché Felipe a: "Be' yúshka dayë ñak kke Jerusalén ñalé wa dö Gaza." Ñalã e' tkökemi

kã sir poë wë kë yi serku' e' kke. <sup>27</sup> Eta Felipe miã tã ñalã e' kij wëm kuéitó eköl, e' dör Etiópia wak. Ie' dör ikã wökirpa e' eköl. Ie' dör alaköl tso' Etiópia blúie, e' inuköl blök wökir. Ie' dare Jerusalén Skëköl dalóioök. <sup>28</sup> Ie' mirwãne ikaska' karreta kij, e' a itkër yëkkuó kit Skëköl tteköl kië Isaías tó, e' sauk.

<sup>29</sup> Eta Wiköl Batse'r tó iché Felipe a: "Be' yú, be' e' skówã karreta se o'mik." <sup>30</sup> Mik Felipe e' skéwã karreta o'mik, eta ie' tó ittse' tó Etiópia wak tó Skëköl yëkkuó kit Isaías tó, e' aritserami. Felipe tó ie' a ichaké:

—Yëkkuó se aritseke be' tó ç'e' wã ane be' éna?

<sup>31</sup> Ie' tó iütë:

—Kë yi ku' ye' wöbla'uk tã çwës ye' a iwã armi?

Ie' tó Felipe kié e' tkökã kã ie' o'mik. <sup>32</sup> Ie' tó iaritserami wë ichéitó:

"Ie' dör wës obeja urula tsëmi ttëwã es. Wës obeja pupula kë arta' mik iköyök tërke

eta, es ñies kë ie' wã i' yëne.

<sup>33</sup> Ie'pa tó ijaëwë siarë tã ikichatëttsarakitó, erë i' kij ikichatënettssa e' kë dör mokij.

Ie' ttëwarakitó as kë iseriã kã i' kij, e' kuekij kë ie' alã ate."\*

<sup>34</sup> Etiópia wak tó Felipe a ichaké:

—Be' we'ikëyó, ichó ña, çyi cheke Skëköl tteköl Isaías tó ttë i' wa? Çie' wák e' chöke ö o'ka chekeitó?

<sup>35</sup> Eta ttë aritsëtkeitó, e' wa Felipe tó ie' a Jesús ttë buaë pakëmi. <sup>36-37</sup> Es ittöramirak ñalã wa tã eë di' kuérakitó. Eta Etiópia wak tó iché Felipe a:

—Íe di' tso'. Çi' kuekij be' kë tó ye' wöskuë?†

<sup>38</sup> Eta Etiópia wak tó iché karreta ñakökwa a tó karreta wöklö'úwã. Tã ie'pa e' éwa tã imiyál bölä di' a. Eë Felipe tó Etiópia wak wöskuëe. <sup>39</sup> Mik ie' yélune di' a eta Skëköl Wiköl tó Felipe batsékãmi bet kã bãnet a, Etiópia wak kë wa isuneia yës, erë imiã ttsë'ne buaë kaneë. <sup>40</sup> Eta Felipe tó isue' tó ie' demi dur kã kië Azoto eë. Eta ie' miã Jesús ttë buaë pakök kã tso' ñalã kij ese wakpa a dömi Cesarea.

9

*Saulo er mane'wë Jesús a*

<sup>1-2</sup> E' dalewa Saulo tso'ia Skëképa ttökãtapa pañuk ttëwã. E' kuekij ie' miã sacerdote kibi ska' yëkkuó kiök shkowaie judiowak ñi dapa'wö wë tso' Damasco eë. Yëkkuó e' kij kawö mène ia' s'tso' ttë kië Jesús dör Ñalã Pa'ali e' dikia esepa yulök klö'wöwã tsëmi Jerusalén, kë tkine tó alakölpa ö wëpa idir. <sup>3</sup> Erë mik Saulo dökemitke tsinet Damasco e' bet ibitëshka kã jai a bö'wöie e' olo bune tajë

\* 8:33 Isaías 53.7-8 † 8:36-37 Yëkkuó kitule kã iaiãë keweie imalepa yöki esepa kë wã 8.37 kitekã. Ttë e' tó iché: Felipe tó ie' a iché: —Be' tó ttë i' klö'wë mokijë e' tã be' wösürmi. Eta wëm tó iütë: —Ye' tó iklö'wë tó Jesucristo döer Skëköl Alã e'.

ipamik. <sup>4</sup> Tã ie' anere jskj. Etã ttõ ttséitõ tö iché ia: "A Saulo, a Saulo, ¿ikõ be' tò ye' we'ikeke?"

<sup>5</sup> Saulo tö ie' a ichaké: "A Skékëpa, ¿be' dõr yi?" Etã iüténeitõ: "Ye' dõr Jesús we'ikeke be' tò e'. <sup>6</sup> Erë be' e' kókã. Be' yú Damasco. Eë be' a iyërmi tö i uk be' ké."

<sup>7</sup> Etã Saulo wapiëpa tkirulune tajë. Ie'pa tö yile ttõ tssé, erë kë ie'pa wã yú sune. <sup>8</sup> E' ukuõkj tã Saulo e' kékã tã iwõbla shuppée, erë kë iwawër. E' kuekj itsémirakitõ ulã iërule dõ Damasco. <sup>9</sup> Eë ie' sené kã mañat kë wõbla wawëne, kë wã i ñane, kë wã i yane yës.

<sup>10</sup> Jesús ttõkata ekõl kiè Ananías serke Damasco e' a Skékëpa Jesús e' kkachëwã kabsueie tã iché ia: "¡A Ananías!" Ie' iüté: "A Skékëpa Jesús, ichõ ña."

<sup>11</sup> Skékëpa tö iché ia: "Be' yú ñalã kiè Yësyesë e' kj dõ Judas u a. Eë wëm tso' kiè Saulo datse Tarso, e' yulõ. Ie' tso' ttõk S'yë tã. <sup>12</sup> Ie' tö isuë kabsueie tö wëm kiè Ananías dewã ie' ska' iulã mékã ikj as iwõbla wawërne, e' dõr be'."

<sup>13</sup> Ie' iüté: "A Skékëpa Jesús, erë ye' a iyëule tajë ie'pa wã tö wëm e' tö be' icha batse'r tso' Jerusalén e'pa we'ikeke siarë. <sup>14</sup> I'ñe tã e' de ië. Sacerdotëpa wõkirpa tö kawõ mé ie' a as wépa tö be' a e' tsatké kiè esepa kos klõ'uluritõ."

<sup>15</sup> Erë Skékëpa Jesús tö iché ia: "Be' yú. Ye' tö wëm e' shukitbak as ie' tö ye' tté pakõ pë' kë dõr Israel aleripa esepa a ena iblúpa a ñies Israel aleripa a. <sup>16</sup> Ye' wák tö ikkacheraë ie' a tö ie' kawõtã weinuk ye' tté kuekj."

<sup>17</sup> Etã Ananías demi Saulo ska' tã iulã mékã ikj tã iché ia:

—A yami Saulo, Skékëpa Jesús e' kKayë'wã be' a ñalã kj be' dë'bitü e' wa, e' tö ye' patké as be' wõbla wawërne ñies as Wikõl Batse'r iërwa be' a.

<sup>18</sup> E' bet tã i tso' Saulo wõbla mik nima kkuõ sù, e' darolone tã iwõbla wawëne. Etã ie' e' kékã tã imã tã ie' e' wõskuëe. <sup>19</sup> E' ukuõkj tã ichkéne tã idiché iënene. Etã ie' e' tséat Jesús ttõkatapa welepa tso' Damasco e'pa tã kã elke ulatõk.

*Saulo tö Jesús tté paké Damasco*

<sup>20</sup> E' ukuõkj tã bet Saulo tö Jesús tté pakémi judiowak a ie'pa ñi dapa'wo wé kos a. Ie'pa a ichekeitõ tö Jesús dõr Skékõl Alã chõkle. <sup>21</sup> Wépa kos tö ie' ttõ tssé, e'pa wõkrarulune ittõk tã iñi chakérak:

—¿Ie' wj kë dõr wépa tö e' tsatké kiè Jesús a tso' Jerusalén esepa we'ik siarë? ¿Kë ie' wëbi wj dë'bitü ie'pa esepa tso' ië e'pa klõ'ukwã wõmëttsã sacerdotëpa wõkirpa ulã a?

<sup>22</sup> Erë Saulo tö Jesús tté pakéwãe kjã kjã, kë suane. Ie' tö ikkachë judiowak serke Damasco e'pa a tö mokj Jesús dõr wé

pairine'bitü idi' wa s'blúie e'. Ttë e' wa ie'pa siwã'blõwëljur ie' tö.

*Saulo tkashkar judiowak yõkj*

<sup>23</sup> Kã tajë ukuõkj tã judiowak ttë ñitã Saulo ttowã. <sup>24</sup> Erë e' jchënewã ie' wã. Ñië nañëë ie'pa tso' ipanuk ttëwã kã wékõkõ dõkettã ese ska'. <sup>25</sup> Erë nañewe iklépa tö ie' iékã kkõ blublu a tã iëmi kã tso' kkõjëule shkit kãkkëë e' mik enaëna. Es ie' tkashkar.

*Saulo dene Jerusalén*

<sup>26</sup> Mik ie' demi Jerusalén, etã ie' dapa'wak Jesús ttõkatapa tã. Erë ie'pa kë wã iklõone tö mokj ie' erblë Jesús mik. Ie'pa suane iyõkj. <sup>27</sup> Erë Bernabé wã ie' mítser kkachë Jesús ttekõlpa tsã e'pa a. Bernabé tö ipaké ie'pa a tö Saulo tö Skékëpa Jesús su' ñalã kj tã eë ittë ie' tã. Ñies ichéitõ tö Saulo kapakétke Damasco Jesús ttõ wa kë suane. <sup>28</sup> Es Saulo e' tséat Jerusalén dami Jesús ttekõlpa tsã e'pa tã. Këkraë ie' tö Skékëpa Jesús tté pakeke kë suane. <sup>29</sup> Ñies ie' tö ittë pakeke judiowak ttõke griegoie esepa a. Erë ie'pa ñi iütékã tajë ie' tã. E' kuekj ie'pa tö ima'wé ttëwã. <sup>30</sup> Mik e' jchënewã iyamipa wã, etã ie'pa wã imítser Cesarea, eë tã ipatkémi dõ Tarso.

<sup>31</sup> E' ukuõkj tã Skékëpa Jesús icha erule erule kos tso' Judea ena Galilea ena Samaria e'pa atene bërë, kë yi tö ie'pa we'ikëia. Ie'pa yörke buaë Skékõl ttë dikjã. Ñies ie'pa tö Skékõl dalõieke tajë. Wikõl Batse'r tö ie'pa kimeke as ikj iërdak tajë këkraë.

*Eneas buanene*

<sup>32</sup> Pedro shkõke kã wa'ñe ie'pa kos pakõk wé ie'pa tso' ese ska'. Etã ide ñies kã kiè Lida s'batse'rpa serke eë e'pa pakõk. <sup>33</sup> Etã eë wëm ekõl kuëitõ kiè Eneas e' kraulewã me'r kã' kj e' kj duas de pakõl (8). <sup>34</sup> Pedro tö iché ia:

—Jesucristo tö be' bua'wëne. Be' e' kõkã tã be' kã' pashuõ.

E' bet tã ie' e' kékã. <sup>35</sup> E' ukuõkj tã pë' tso' Lida ena Sarón, e'pa ulitane tö ie' suë. E' kuekj ie'pa er mane'wé Skékëpa Jesús a.

*Dorcas shkënekane*

<sup>36</sup> E' këwõ ska' tã kã kiè Jope eë alakõl serke ekõl dõr Jesús ttõkata, e' kiè Tabitã (griegoie ikie e' dõr Dorcas<sup>\*</sup>). Këkraë ie' bak i buaë uk ena s'siarëpa kjmuk. <sup>37</sup> Kã e' ulatõk tã ie' kirinewã tã iduowã. Inú pasunetke tã imékã úshy kãkkë ese a. <sup>38</sup> Jope atë Lida o'mik wé Pedro tso' eë. Jesús ttõkatapa serke Jope, e'pa wã ijcher tö ie' tso' Lida, e' kuekj ie'pa tö wépa patké bõl ichõk ie' a: "Be' shkõ bet Jope."

<sup>39</sup> Es ie' miã ie'pa tã. Mik idemirak, etã ie' tsémi u shuã wé Dorcas nu me'r eë. Alakõlpa schõ' kos jüke tajë. E'pa iënëwã ie' pamik.

\* 9:36 Dorcas: S'kiè e' wã kiane chë sulj. † 9:39 schõ: E' dõr alakõlpa wëm blëulewã kam serwane ese.

Etā ie'pa tō paio ena datsi' yō' Dorcas tō mik ibak t̄sē'ka etā, e' kkachē Pedro a. <sup>40</sup> Etā Pedro tō ie'pa ké e' yökulur t̄a ie' e' tkéwā kuchē k̄i t̄a ittē S'yē t̄a. E' ukuōk̄i t̄a ie' tō inū suē t̄a ichē:

—A Tabitá, be' e' kōka.

Etā ie' wōbla shuppée. Mik Pedro suéitō etā ie' e' tkésēr. <sup>41</sup> Pedro tō iklō'wéwā iulā a duéka. E' ukuōk̄i t̄a ie' tō alakōlpa schō ena s'batse'r malepa kié t̄a Tabitá kkachéitō ie'pa a t̄sē'ka. <sup>42</sup> E' jchenewā Jope wakpa kos wā t̄a ie'pa taiē erblé Skékēpa Jesús mik. <sup>43</sup> Tā Pedro e' tséat taiē Jope wēm kié Simón e' ska'. Wēm e' dōr iyiwak kkuōlit kanéukwak.

**10**

*Pedro tō Jesús ttē buaē paké Cornelio a*

<sup>1</sup> Ká kié Cesarea eē wēm serke ekōl kié Cornelio, e' dōr Roma ñippōkwakpa eruleē kié Italiano e' capitán. <sup>2</sup> Ie' kē dōr judiowak erē ie' dōr wēm yēsēsē Skékōl wōa. Ie' ena iyamipa ekka, e'pa tō Skékōl dalōieke taiē. Nies ie' tō inukōl kakmeke taiē judiowak kimoie. Kekraē ie' ttōke Skékōl t̄a. <sup>3</sup> Ká et tsālī t̄a diwō de mañat, etā ie' tō isué buaē kabsueie tō Skékōl biyōchōkwak ekōl dewā wē ie' tso' eē t̄a ichéitō ia: “A Cornelio.” <sup>4</sup> Ie' tkinewā t̄a Skékōl biyōchōkwak suéwaitō krereē t̄a ie' tō ichē ia: “A kēkē, ¿i kiane be' k̄i?” Etā Skékōl biyōchōkwak tō ie' iutē: “Be' ttōke Skékōl t̄a ena s'siarēpa kimeke, e' wēr buaē ie' wa. <sup>5</sup> E' kuēk̄i yile patkōmi Jope. Eē wēm tso' kié Simón, kié ñies Pedro e' kiōk patkō. <sup>6</sup> Ie' tso' wēm ekōl kié ñies Simón dōr iyiwak kkuōlit kanéukwak, e' ska', ie' u me'r dayē kkōmik.”

<sup>7</sup> Mik Skékōl biyōchōkwak ttē one Cornelio t̄a e' miā etā Cornelio tō ikanē mēsopa kié bōl ena ñippōkwak kiéitō ekōl ñies. Ñippōkwak e' tō Skékōl dalōieke taiē. Ie' dōr Cornelio k̄imukwak bua'ie. <sup>8</sup> Cornelio tō i kos tka ie' t̄a e' paké ie'pa a. E' ukuōk̄i t̄a ie'pa patkēmiitō dō Jope.

<sup>9</sup> Bule es diwō de bata a t̄a Cornelio kanē mēsopa dami ñalā wa dōketke tsinet Jope. E' dalewa Pedro tkakā u bata k̄i ttōk Skékōl t̄a. <sup>10</sup> Pedro dué bli wa erē ulirkeia ie' a, e' dalewa isuéitō kabsueie. <sup>11</sup> Ie' tō isué tō ká jai kkōbunane t̄a datsi' ukuō bērie suē iklōulewā ibata tkēl a, e' bitewā dō isk̄i. <sup>12</sup> Datsi' ukuō e' shuā iyiwak klōka, e' skōke ibatsi' k̄i ena dōr ñā judiowak a esepa tkērki tsakjē. <sup>13</sup> Etā ie' tō ttō tsé t̄a ichéitō ia: “A Pedro, be' e' kōka. Iyiwak se ttō t̄a ikatō.”

<sup>14</sup> Erē ie' tō iutē: “Au. A Skékōl, iyiwak dōr ñā ese kē kataule ye' wā yēs.” <sup>15</sup> Tā ttō e' tō ichéne Pedro a: “I batse'wétke Skékōl tō e' kē kiaria ñā.”

<sup>16</sup> E' tka mañatōkicha t̄a datsi' ukuō mikane ká jai a. <sup>17</sup> Pedro tso'ia ibikeitsōk taiē i suéyō

kabsueie ¿ima e' wà kiane chē? E' wōshāē t̄a wēpa patkē' Cornelio tō, e'pa tō Simón u kuē t̄a iēter Simón ukkō a. <sup>18</sup> Ie'pa tō ichakē: “¿Iē wēm kié Simón kiekerakitō ñies Pedro, e' tso'?”

<sup>19</sup> Pedro tso'ia i suéitō kabsueie e' bikeitsōk, etā Wikōl Batse'r tō ichē ia: “Ittsō. Wēpa mañal tso' be' yulōk. <sup>20</sup> Be' e' ōwa t̄a be' yū ie'pa t̄a. Kē ibikeitsar bōtbot. Ye' tō ie'pa patkēbitū be' tsukmi.”

<sup>21</sup> Etā Pedro e' éwa t̄a ichē ie'pa a:

—Yi yuleke a' tō, e' dōr ye'. ¿I dōr iwā?

<sup>22</sup> Ie'pa iutē:

—Wēm kié Cornelio dōr Roma ñippōkwakpa capitán ekōl, e' tō sa' patkē' be' yulōk. Ie' dōr wēm yēsēsē. Skékōl dalōiekeitō taiē. Judiowak ulitane k̄i ie' kiar taiē. Skékōl biyōchōkwak batse'r e' ekōl tō iyē' ie' a: “Pedro kiō as ie' bitū be' u a. I kos cheke ie' tō be' a, e' t̄sō.”

<sup>23</sup> Etā Pedro tō ie'pa kiéwā wēshkē. Eē ie'pa kapere. Bule es t̄a ie' miā ie'pa t̄a. Nies s'yamipa serke Jope e'pa wēlepa miā ie' wapieie. <sup>24</sup> Bōk̄ki es t̄a idemirak Cesarea. Eē Cornelio tō iyamipa ena pē' suule iwā buaē e'pa ki' e' dapa'uk̄ka Pedro ttō t̄sōk. E'pa kos de ie' panuk. <sup>25</sup> Mik ie' de Cornelio u a etā Cornelio dettsa ishke'uk̄ t̄a ie' e' tkéwā kuchē k̄i ie' wōshāē idalōioie. <sup>26</sup> Erē ie' tō ikē e' duōk̄ka t̄a ichē ia:

—Be' e' duōka. Ye' dōr s'ditsō ñies wēs be' es.

<sup>27</sup> Pedro ttōramiā Cornelio t̄a etā idewarāk wēshkē t̄a ie' isué tō taiē pē' dapanewā. <sup>28</sup> Ie' tō ichē ie'pa a:

—A wā ijcher tō sa' judiowak kē a kawō t̄a' pē' kē dōr judiowak esepa pakōk ena shkōk pē' esepa t̄a. Erē Skékōl tō ikkachē ye' a tō kē ye' kawō t̄a'ia ichōk tō yile dōr ñā. <sup>29</sup> E' kuēk̄i mik ye' kine, e' bet t̄a ye' biteg, kē wā i chakine. Ye' tō a' a' ichakē ¿iōk a' tō ye' kié?

<sup>30</sup> Cornelio tō iutē:

—Tkali ikēkkē t̄a ye' tkēr ttōk Skékōl t̄a ye' u a wēs ye' wōblar ká bit ekkē diwō de mañat etā. E' bet t̄a wēm ekōl de dur ye' wōrk̄i, e' datsi' dōr dalōiō. <sup>31</sup> E' tō ye' a' ichē: ‘A Cornelio, be' ttōke Skékōl t̄a e' t̄sē ie' tō. Be' tō s'siarēpa kimeke e' wēr buaē ie' wa. <sup>32</sup> Yile patkōmi Jope Simón kié ñies Pedro, e' kiōkbitū. Ie' tso' wēm skā kié Simón dōr iyiwak kkuōlit kanéukwak e' u a. E' u me'r dayē kkōmik.’ <sup>33</sup> E' bet t̄a ye' tō be' tsuk patkē t̄a be' debitū er bua' wa. Es sa' ulitane e' dapa'wē iē Skékōl wōa i chōk ie' tō be' ké sa' a' e' t̄sōk.

*Pedro tō Skékōl ttē buaē paké Cornelio ska'*

<sup>34</sup> Etā Pedro ttēmi t̄a ichéitō ie'pa a:

—I'ñe t̄a ye' éna iane tō mol̄k sulitane dōr ñies éme Skékōl a. <sup>35</sup> E' kuēk̄i ká wa'ñe wēpa tō ie' dalōieke t̄a iserke yēsēsē esepa kiar

ie' kɪ. <sup>36</sup> Ie' er buarmine se' kɪ Jesucristo dör sulitane Këköl e' batamik, e' tté buaë pakane sa' dör Israel aleripa e'pa a. E' jcher a' wā. <sup>37</sup> Nies i bak judiowak ké kos a e' jcher buaë a' wā. Juan tō iyè' tō s'kawōtā e' wōskuök. E' ukuökɪ tā Jesús tō s'pattémi Galilea. <sup>38</sup> Nies a' wā ijcher buaë tō Skëköl tō iWiköl Batse'r patké Jesús Nazaret wak e' kɪ idiché tajé. Ie' shké kəkraë pé' ulitane shuā íyi buaë kanéuk. Nies s'we'ikeke bé tō esepa bua'wéneitō Skëköl tso' ie' tā e' kuekɪ. <sup>39</sup> Í wé ie' tō Jerusalén ena judiowak ká malepa a, e' kos sué sa' tō. E' ukuökɪ tā ittéwarakitō wōtëulewā krus mik. <sup>40</sup> Eré e' kɪ ká de mañat tā Skëköl tō ishke'wékane tā ikkachéitō sa' a. <sup>41</sup> Ie' ké e' kkayéne sulitane a. Sa' é a ie' e' kkaché. Skëköl tō sa' shukitbak as sa' tō Jesús saū sa' wák wōbla wa. Ie' shkënekane e' ukuökɪ tā sa' chké sa' di'yé ie' tā. <sup>42</sup> Ie' tō sa' patké itté buaë pakök sulitane a nies ichök iarak tō ie' tkéka Skëköl tō s'ttsé'ka ena s'duulewā, e'pa shulökwakie. <sup>43</sup> Ká íaiáë Skëköl ttekölpa ulitane tō Jesús paka'atbak tā iyè'atrankitō tō yi erblé ie' mik esepa nuí olordaë ie'pa kɪ ie' batamik.

*Pé' ké dör judiowak esepa kɪ Wiköl Batse'r de*

<sup>44</sup> Pedro tso'ía ipakök ie'pa a tā e' shuā Wiköl Batse'r debitu ie'pa kos tso' ie' ttō kittsök, e'pa kɪ. <sup>45-46</sup> Eta Jesús mik erblökwakpa dör judiowak dë'bitu Pedro tā e'pa tō isué tō wës Wiköl Batse'r debitu pé' ké dör judiowak, esepa kɪ nies. Ie'pa tō ittse tō ittökerak ttō kuā'kɪ kuā'kɪ wa. Nies Skëköl kɪkökka itso'rak. E' tō ie'pa tkiwéwā. <sup>47</sup> Eta Pedro tō iché:

—Wiköl Batse'r debitu ie'pa kɪ wës sa' kɪ itsá dë'bitu es. E' kuekɪ ké yi a iwöklönuk tō ké ie'pa wōskuar di' a.

<sup>48</sup> Ie' tō ikérak e' wōskuök Jesucristo ttō wa. E' ukuökɪ tā ie'pa tō ie' a ikié tajé: “Be' e' tsúat sa' tā ká bôt mañat.”

**11**

*Pedro tō Cornelio tté paké Jerusalén*

<sup>1</sup> Jesús ttekölpa tsá ena s'yamipa malepa tso' Judea, e'pa tō ittse tō pé' ké dör judiowak, nies esepa tō Skëköl tté klö'wé. <sup>2</sup> Mik Pedro dene Jerusalén, eta Jesús mik erblökwakpa dör judiowak, esepa welepa tō ie' ché sulué. <sup>3</sup> Ie'pa tō ie' a ichaké:

—Íðök be' dare pé' ké dör judiowak esepa pakök ena chkök ie'pa tā?

<sup>4</sup> Ie' tō i kos tka e' paké ie'pa a sraa tā iché ía:

<sup>5</sup> —Ye' bak Jope tā ye' ttöke Skëköl tā, e' shuā ye' tō i sué kabsueie. Í suéyo e' dör datsi' ukuö bérie sué klöulewā íbata tkél a. E' bitéwā ká jai a dō wé ye' tso' ee. <sup>6</sup> Eta ye' tō isué bua'iewā isuoie tō i tso' ishūa.

Ye' tō iyiwak klöka, iyiwak kañiru, iyiwak e' sköke íbatsi' kɪ ena dù, esepa sué. <sup>7</sup> Eta ye' tō ttō tse e' tō iché ye' a: ‘A Pedro, be' e' kōka. Iyiwak se' ttō tā ikatō.’ <sup>8</sup> Ye' íiuté: ‘Au. A Skëköl, ye' ké wā iyiwak dör ñá ese kataule yés.’ <sup>9</sup> Tā ttō datse ká jai a, e' tō ichéne ye' a: ‘Í batse'wétke Skëköl tō ese ké kiaría ñá.’ <sup>10</sup> E' tka mañatökicha tā imíkane sekka ká jai a. <sup>11</sup> E' wōshāë tā, wépa mañal patkéule datse Cesarea ye' yulök, e'pa debitu wé ye' tkér e' wé a. <sup>12</sup> Wiköl Batse'r tō ye' a iché: ‘Ké íbikeitsar bōtöt. Be' yú ie'pa tā.’ Nies s'yamipa teröl i' dare ye' tā. Sa' kos dewā Cornelio u a. <sup>13</sup> Ie' tō sa' a ipaké tō wës ie' tō Skëköl biyöchökwak sué dur eköl ie' u a. E' tō iché ía: ‘Yile patkómi dō Jope ee wëm tso' kié Simón, e' kié nies Pedro, e' kióbitu.’ <sup>14</sup> Ie' tō icheraë be' a wës be' ena be' yamipa kos e'pa tsatkérmi.’ <sup>15</sup> Mik ye' tō Jesús tté pakémi ie'pa a, eta Wiköl Batse'r debitu ie'pa kɪ wës idé'bitu sa' kɪ kuaé es. <sup>16</sup> Eta í yé' Skëképa Jesús tō ye' a, e' ane ye' éna. Ie' tō ye' a iyè': ‘Juan tō s'wöskué di' a, eré a' ierdawā Wiköl Batse'r a.’ <sup>17</sup> Iwënewā tō Skëköl tō iWiköl mé ie'pa a wës imenebak se' a kuaé mik se' erblé' Skëképa Jesucristo mik eta es. E' kuekɪ íye' dör yi Skëköl wöklö'woie?

<sup>18</sup> Mik í ché Pedro tō e' tse ie'pa tō, eta isiwā'bléwarak tā Skëköl kɪkékarakitō. Ie'pa tō iché:

—E' wa se' wā ijcher tō pé' ké dör judiowak, esepa a nies Skëköl tō imé as ie'pa er mane'ù ie' a sènoie michoé.

*Skëképa Jesús icha erulé tso' Antioquia e' paké*

<sup>19</sup> Esteban kötwarakitō e' ukuökɪ tā Jesús mik erblökwakpa we'ikémitke tajé pé' tō. E' yökɪ ie'pa welepa tkayal. Welepa míyal dō Fenicia. Welepa míyal dō Chipre. Iská mírak dō Antioquia. Ká ekképa a ie'pa tō Jesús tté buaë pakeke judiowak é a. <sup>20</sup> Eré Jesús mik erblökwakpa datse Chipre ena Cirene, ese welepa míyal Antioquia. Eë Skëképa Jesús tte buaë pakéraitō pé' ké dör judiowak esepa a. <sup>21</sup> Eta Skëképa tō ie'pa kímé tajé. E' kuekɪ tajé ká e' wakpa erblé Skëképa Jesús mik tā ier mane'wérak ie' a.

<sup>22</sup> Mik Skëképa Jesús icha erule tso' Jerusalén, e'pa tō tté e' tse, eta Bernabé patkémirakitō tkörö Antioquia. <sup>23</sup> Mik ie' demi, eta ie' tō isué wës Skëköl er buaë ché ie'pa a. E' tō ie' tse'wé buaë. Ie' tō ie'pa kɪ patté as ie'pa e' tkōwā dareré kəkraë íer kos wa ie'pa erblö Skëképa mik e' a. <sup>24</sup> Ie' dör wëm yésyésé. Ie' a tajé Wiköl Batse'r tso'. Ie' tō Jesús bikeitseke bua'iewā. Es tajé pé' kɪ de erblök Skëképa mik.

<sup>25</sup> E' ukuökɪ tā ie' míá Tarso Saulo yulök. <sup>26</sup> Mik íkuéitō, eta itsémi Antioquia e' tā. Eë ie' tséarak duas ek. Ie'pa e' dapa'uke Skëképa Jesús icha erule e'pa tā. Ká e' wakpa

tajë wöbla'wekerakitö. Kä e' a Jesús ttökatapa tsä kine Cristo wakpa.

<sup>27</sup> E' kəwō ska' tã Skəköl ttekōlpa welepa tso' Jerusalén míyal Antioquia. <sup>28</sup> E'pa shūa eköl kiè Agabo, e' e' duékã tã ichéitö Wiköl Batse'r wa tō bli datse kã wa'ñe k̄i. E' debitu mik Claudio bak Roma wōkir kibi e' kəwō ska'. <sup>29</sup> Etã Jesús ttökatapa tso' Antioquia e'pa tō iché ñi a: "Mishka inuköl shtök patké se' yamipa serke Judea, e'pa kimoie kos se' a imer ekké." <sup>30</sup> Es ie'pa tō iwé. Etã ipatkémirakitö Bernabé ena Saulo ulã a as ie'pa tō imū Skəkēpa Jesús icha wōkir kibipa tso' Judea e'pa ulã a.

**12**

*Pedro wötəwərakitö s'wōto wé a*

<sup>1</sup> E' kəwō ska' tã blu' kiè Herodes, e' tō Skəkēpa Jesús icha welepa klō'wəwã we'iké. <sup>2</sup> Ie' tō Santiago dör Juan èl, e' ttökwa patké tabè wa. <sup>3</sup> Mik ie' isué tō e' wër buaè judiowak wa, etã ie' tō Pedro klō'ukwã patké. E' wéitö mik judiowak tō Pan Kē Yöule Iwölöwōkã Wa e' kəwō tkō'wekerakitö etã. <sup>4</sup> Mik Pedro klōnewã, etã Herodes tō iwötéwã s'wōto wé a. Eë ñippökwa dōkã dabom eyök k̄i teröl (16) e'pa tō ikkō'neke tkèl tkèl. E'pa mane'weke tkèl tkèl kukur kukur. Herodes tō ibikeitsé tō kawō tkō'wekerakitö, e' ukuök̄i tã iyekettsaneyö shulè sulitane wōa. <sup>5</sup> E' dalewa Pedro tso' s'wōto wé a. Erè Skəkēpa Jesús icha erule e'pa tso' ikiök Skəköl a darerèè ie' k̄i kekraë.

*Skəköl biyöchökwak tō Pedro yéttsã s'wōto wé a*

<sup>6</sup> Herodes tō Pedro yekettsã shulè, e' nañewe Pedro kapötër ñippökwa bōl shushã moulewã tabechka kichaie bötö wa. Nies ñippökwa bōl tso' s'wōto wé ukkō kkō'nuk. <sup>7</sup> E' bet Skəköl biyöchökwak de dur ie' ska' tã bö'wō olo bunekã dalölöè s'wōto wé a. Etã ikéwãitö ichane a as itj'rkã tã iché iã: "jBe' e' kōkã bet!" E' bet tã imoulewã tabechka kichaie wa e' wöyërlune. <sup>8</sup> Etã Skəköl biyöchökwak tō iché iã: "Be' datsi iōkã, be' klökkuō iōkã." Tã ie' tō iwé es. Skəköl biyöchökwak ik̄i ché iã: "Be' paio k̄ikkūō iōkã tã be' shkō ye' itök̄i."

<sup>9</sup> Etã Pedro miã itök̄i, erè ie' kē éna iane tō i weke Skəköl biyöchökwak tō e' dör mok̄i. Ie' tō ibikeitsé tō ie' tso' kabsauk. <sup>10</sup> Etã ie'pa tkami wé ñippökwa iëter ukkō kkō'nuk eë. E' ukuök̄i tã wé ñippökwa skã iëter eë itkamirak nies. Mik ie'pa demi ukkō kibi a yöule tabechka wa atë ñalã kke, etã e' kkōbunane er wa. Etã ie'pa deyal u'rk̄i shkémirak ekuölö tã Skəköl biyöchökwak tō iméat eköl.

<sup>11</sup> Ekké tã ie' éna iane tō i suéitö e' dör mok̄i. Ie' ibikeitsé: "Iñe tã yö isué tō mok̄i Skəköl tō ibiyöchökwak patké ye' tsatkök

Herodes ulã a ena i kos wamblak judiowak éna ye' k̄i, e' ulã a ñies."

<sup>12</sup> Mik ie' éna ianewã bua'iewã tã imiã María u a. María dör Juan mi. Juan kiè nies Marcos. Eë ie'pa daparke tajë ttök Skəköl tã. <sup>13</sup> Mik Pedro de dur ukkō a ie'pa chakök, etã busi eköl dör kanè méso kiè Rode e' miã iweblök tō yi idir. <sup>14</sup> Mik ie' ttö tsewã Rode tō, etã ittse'nekã buaè kē deia ukkō ppök tã itunemine weshké ichök tō Pedro de dur ukkō a. <sup>15</sup> Ie'pa tō iché iã:

—jBe' alinekã!

Erè ie' iuté:

—Mok̄i ye' ttöke.

Ie'pa ie' a iché:

—Au, e' kē dör ie'. E' dör Skəköl biyöchökwak patkéule ikkō'nuk e'.

<sup>16</sup> E' dalewa Pedro tso' iã ichakök ukkō a. Mik ukkō kkōppéerakitö, etã isuérakitö tō ie' e' idir tã itkinewarak tajë. <sup>17</sup> Erè ie' tō ikkaché ulã wa tō a' siwã'blö. E' ukuök̄i tã ie' tō ipaké ie'pa a tō wes Skəköl tō iyéttsã s'wōto wé a tã ichéitö:

—Ttè e' pakö Santiago a ena s'yamipa malepa a.

E' ukuök̄i tã ie' e' yéttsã miã bánet.

<sup>18</sup> Mik kã ñine etã s'wōto wé a ñippökwa shuñinekã tajë Pedro kē ku' e' kuek̄i.

<sup>19</sup> Herodes tō Pedro yulök patké. Erè mik ie'pa kē wã ikune, etã ie' tō inuñ tkéwã ñippökwa mik tã ie' tō ie'pa ttökwa patké.

E' ukuök̄i tã ie' e' yéttsã Judea miã senuk Cesarea.

*Herodes du'wã*

<sup>20</sup> E' kəwō ska' tã blu' Herodes ulurke tajë Tiro ena Sidón wakpa k̄i. E' kuek̄i ie'pa kawō mé ñi a shkowaie ie' ska' ttök ie' tã. Ie'pa tō wëm kiè Blasto e' pablé'bak as ie' mi' ie'pa ttekölíe ttök Herodes tã. Ie' kanéblöke Herodes a iu kuebluie. Ie' ttö wa ie'pa tō kawō kiè Herodes a tō ie'pa muat bërè, ie'pa tō chkwö tueke Herodes kã a e' kuek̄i.

<sup>21</sup> Kä et tã Herodes tō ie'pa kiéttsã. Mik e' kəwō de, etã ie' tō blu' datsi iékã tã ie' e' tkékã s'shulo kulé tso' iwé a e' k̄i tã eë ikapaké ie'pa tã. <sup>22</sup> Ie'pa tō Herodes ché aneule i' es: "jIttöke i', e' kē dör s'ditsö, e' dör kéköl wele ttök!" <sup>23</sup> E' tse'er buaè ie' kukua tã ie' e' k̄ikékã tajë, kē wã Skəköl k̄ikanekã. E' kuek̄i e' wöshã tã Skəköl biyöchökwak eköl tō dué mékã ik̄i. Ie' katéwa öña tã iduowa.

<sup>24</sup> E' dalewa tã Skəköl ttè pakarke éme kã wa'ñe.

<sup>25</sup> Mik Bernabé ena Saulo e'pa tō i uk ie'pa dē' Jerusalén e' wawé one, etã ie'pa míyalne Antioquia. Ie'pa wã Juan kiè nies Marcos, e' mitsernãk.

**13**

*Wiköl Batse'r tō Bernabé ena Saulo patké Jesús tté buaè pakök*

<sup>1</sup> Skékëpa Jesús icha erule tso' Antioquia, e'pa shuã Skéköl ttekölpa ena s'wöbla'ukwakpa tso'rak ee. E'pa dör Bernabé ena Simón (Simón e' kiè ñies Daloriwak), ena Lucio dör Cirene wak, ena Menahem (Menahem e' talane Galilea blú kiè Herodes e' tã ñita), ñies Saulo tso'ñak. <sup>2</sup> Ká et tã ie'pa tso' Skéköl dalöiök batsè wa tã e' shuã Wiköl Batsè'r tó iché ie'pa a: "Kanè kua'ki tso' ye' wã Bernabé ena Saulo a. Ie'pa shushtétkeyö iwakanéwoje e' kueki ie'pa bõl yõtsa ye' a kanè e' woje."

<sup>3</sup> Ie'pa batsé ena tté S'yé tã one, tã iulã mékarak ie'pa bõl kã e' dalewa ikié S'yé a iki. E' ukuöki tã ipatkémirakitó iwakanéuk.

*Bernabé ena Saulo tó Jesús tté paké Chipre wakpa a*

<sup>4</sup> Es Bernabé ena Saulo míyal Seleucia patkéule Wiköl Batsè'r wã. Tã ee ie'pa e' iéka kanò a míyal kã kiè Chipre ee. <sup>5</sup> Idemirak Chipre wé kanò irirke ee, e' ké kiè Salamina. Mik idemirak ee, etã ie'pa tó Skéköl tté pakémi judiowak a ñi dapa'wo wé kos a. Juan mirwã ie'pa tã ie'pa kímuk. <sup>6-8</sup> Chipre kos a itkarak demirak kã kiè Pafos ee. Ee ie'pa tó judiowak kué eköl kiè Barjesús (e' kiè griegoie Elimas). E' dör ie'pa awá eköl. Ie' e' chõ tó ie' dör Skéköl tteköl. Ie' y'arie kekraé kã e' wökir kiè Sergio Paulo, e' ska'. Sergio Paulo kabikeitsõ buaé, ie' kã Skéköl tté kiane tssé. E' kueki ie' tó Bernabé ena Saulo tsuk patké. Eré awá ñe' kè kã ikiane tó Sergio Paulo tó tté mik se' erblöke e' klõ'wé. E' kueki ie' tó Bernabé ena Saulo ma'wé wöklõ'wé. <sup>9</sup> Etã Saulo, e' kiè ñies Pablo, e' kã Wiköl Batsè'r debitu tãjé. Etã Elimas suéwaitó krereé <sup>10</sup> tã iché ia:

—Be' kaçõð. Be' e' wamblö sulué. Be' dör wés bè es. Sene yesyésè kos, e' bolók be' dör. ¿Kos be' tó Skéköl ñalé yesyésè e' shkuli'wémirõ? <sup>11</sup> I' tã Skéköl tó be' we'ikeraé. Be' wöbla kè wawërpaia. Kã tkõraé tãjé be' kã tã be' kè tó diwõ olo suépaia.

E' bet tã Elimas wõã kã míã ttsettsé, iwöbla kè wawënea, e' kueki yile yulekeitó as tó iulaiõ. <sup>12</sup> Mik kã e' wökir tó e' sué, etã ie' erblé Jesús mik. Ie' wökranewã wés Skékëpa tté dör e' kïttsók.

*Pablo ena Bernabé tó Jesús tté paké Antioquia atë Pisidia ee*

<sup>13</sup> Pablo ena ishkõwapa e' iékarak kanò a Pafos tã imíyal Perge atë Panfilia ee. Etã Juan tó ie'pa méat ee, tã imiãne Jerusalén. <sup>14</sup> E' ukuöki tã imíyal Antioquia atë Pisidia ee. Etã ee judiowak eno diwõ tã ie'pa dewã judiowak ñi dapa'wo wé a e' tulésér. <sup>15</sup> Etã wele tó i kit Moisés ena Skéköl ttekölpa tó yékkuõ kã, e' aritsé dõ ekuõlõ. E' ukuöki tã ñi dapa'wo wé wökirpa tó ichök patké Pablo ena Bernabé a:

—A yamipa, a' wã ilè tso' sa' pattoie, e' tã sa' pattó.

<sup>16</sup> Etã Pablo e' kèkã tã ikkaché ulã wa tó a' siwã'blõ tã ichéitõ:

—A Israel aleripa ñies kã kua'ki wakpa tó Skéköl dalöieta', a' tó ye' ttõ tssõ. <sup>17</sup> Skéköl dör Israel aleripa e' Kéköl, kuaé e' tó se' bak kã iaiaé, e'pa shukitbak iwák a. Ie'pa sene' Egipto wés kã kua'ki wakpa es. Ee ie' tó ie'pa kímé tãjé alõne tãjé. E' ukuöki tã ie' tó ie'pa yétsã kã e' kã idiché wa. <sup>18</sup> Ie' tó ie'pa dalè'tssé kã sir poé wé kè yi serku' e' a dõkã duas dabom tkéyök (40). <sup>19</sup> Pè' ditséwõpa dõkã kul bak senuk Canaán e'pa eo'waitó kã mè se' yépa bak kã iaiaé, e'pa a. <sup>20</sup> E' kos kã duas bak cien tkéyök kã dabom skeyök (450) ekké.

“E' ukuöki tã Skéköl tó ie'pa shu kèkã eköl eköl imalepa wétsoje dõ itteköl Samuel e' kèwõ ska'. <sup>21</sup> E' ukuöki tã ie'pa tó Samuel a blu' kié eköl. Es Skéköl tó Saúl mékã ie'pa blúie, e' dör Quis aladulaköl. Ie' dör Benjamín ditséwõ. Saúl sené ie'pa blúie dõkã duas dabom tkéyök (40). <sup>22</sup> E' ukuöki tã Skéköl tó Saúl uyétsã tã David mékaitó blu'ie iskéie. David ché Skéköl tó i' es: 'Ye' tó David dör Jesé alã, e' sué. Ie' wër buaé ye' wa, ie' erbikõ wés ye' erbikõ es. Ì kiane ye' kã wé, e' wakaneweraéitõ.' <sup>23</sup> David aleri eköl dör Jesús, e' patké Skéköl tó se' dör Israel aleripa e'pa tsatkök wés ie' kablé es. <sup>24</sup> Eré kam Jesús döbitu e' yõki Juan S'wõskuõkwak tó se' Israel aleripa ulitane patté tó se' kawõtã er mane'uk Skéköl a. Ñies se' kawõtã e' wõskuõklar di' a. <sup>25</sup> Mik Juan kanè erkewatke tã ie' tó iché: 'Wëm datsej eköl e' kijnuk a' tso', e' kè dör ye'. Ie' datsejã ye' itõki. Ie' dör ye' tsata, e' kueki ie' klõkkuõ kicha è kè wõtsenanuk ye' siarla e' a.'"

<sup>26</sup> “A s'yamipa, Abraham aleripa, ñies a' wépa kè dör ie' aleripa eré Skéköl dalöieta' esepa, se' ulitane a s'tsatkè tté e' patkënetke. <sup>27</sup> Jerusalén wakpa ena iwõkirpa e'pa kè wa ijcher tó Jesús dör S'tsatkõkwak. Ñies eno diwõ bit tã ie'pa tó ie' tté kitule yékkuõ kã Skéköl ttekölpa wã, e' aritseke, eré e' kè wã ane ie'pa éna. Mik ie'pa tó Jesús wómétsã ttèwã etã e' wa ie'pa tó ie' tté tso' kitule Skéköl yékkuõ kã e' wã tkõ'wé. <sup>28</sup> Ie'pa kè wã i sulu kune iki ittowã eré ikkatérakitó Pilato a as ittõkwã patkõitõ krus mik. <sup>29</sup> Es Jesús ttéwarakitó. Mik ie'pa tó i kos kitule Skéköl yékkuõ kã, e' wawé one, etã inú éwarakitó krus mik tã iwõtéwarakitó põ a. <sup>30</sup> Eré Skéköl tó ie' shké'wékane. <sup>31</sup> E' ukuöki tã ie' e' kkachéne kã tãjé wépa manetwã ie' wapie Galilea dõ Jerusalén, e'pa a. I'ñe tã ie'pa kos dör ie' ttekölpa judiowak ulitane wörki.

<sup>32</sup> “Es sa' tso' tté buaé i' pakök a' a. E' dör i' uk Skéköl kablé' sa' yépa bak kã iaiaé e'pa a <sup>33</sup> e' wã tka sa' dör ie'pa aleripa e' wörki. Itka

mik Skëköl tō Jesús shkë'wékane etā. Itka wes itso' kitule Salmo bōt kī es wé ichéitō: 'Be' dōr ye' alā. Iñe yō ikkachétke tō ye' dōr be' yē.\* 34 Nies Jesús yē'at Skëköl tō iyëkkuō kī: 'Wes ye' tō ye' ttē yēsēsē batse'r tajē e' me' David ā tō ye' er buaē chōraē ie' ā, es ye' er buaē chōraē be' ā.† E' wā dōr tō Skëköl tō ie' shkë'werane as kē ichkā nurwā. 35 E' kuëkjī nīes itso' kitule: 'Be' kanē méso batse'r, e' kē mepaqtō ās ichkā nurwā.‡ 36 Es David, se' blū bak iāiāē, e' tō imalepa bak e' kēwō ska', e'pa wēttsē wes Skëköl tō iyē'ia es. E' ukuōkī tā idu'wā tā itōbinewā iyēpa pō ā tā inunewā. 37 Erē wē shkë'kane Skëköl tō e' chkā kē nune'wā. 38 A yamīpa, a' wā ijchenū tō se' nuī olo'yarmi se' kī Jesús batamik, e' ttē pakeke sa' tō a' ā. 39 Ttē méat Moisés tō dalōiēno, e' kē ā se' nuī olonuk. Erē wēpa erblē Jesús mik esepa nuī olordaē ie'pa kī. 40 A' tso' erki as a' kē tā itkō wes Skëköl ttekolpa tō ikit es wé Skëköl tō ichē:

41 'A ye' wayuōkwakpa, ye' ttō ttsō. Ī weraēyō a' kēwō ska' tā, e' dōr tajē kē klōonuk a' ā ekkē.

Erē a' ā ipakarmi erē kē a' tō iklō'wēpa.

E' kuëkjī a' tkinū. A' enūwa.' §

42 Etā Pablo ena Bernabé e' yélur nī dapa'wō wé ā. Etā pé' tō ichē ie'pa ā a' kiēne ttē ekkēpa skā pakōkne sa' ā eno diwō étō wa. 43 Mik ie' dapa'wérak e' one, etā judiowak, nīes pé' e' yuē judiowakie esepa tajē mīyal Pablo ena Bernabé tā. Pablo ena Bernabé tō ie'pa pattē tō a' e' tkōwā darērēē Skëköl er buaē chōke se' ā e' ā.

44 Eno diwō étō wa etā kā e' wakpa iekkē tā idettsarak sēraā Skëköl ttē kīttsōk. 45 Erē mik judiowak tō isuē tō pé' dapane tajē Pablo ttō kīttsōk, etā ie'pa yōkī isulune tā ie' kēkarak ichōk tō ĩ cheke ie' tō e' dōr kache. Ie'pa tō ie' ché suluē. 46 Erē ie' ena Bernabé kē suane tā ichē iarak:

–Sa' kəwōtā a' dōr judiowak e'pa pattoie kewe Skëköl ttē wa, erē ā kē wā iklōne. Wēsua a' ĩbikeitseke tō sene michōē kē mēne a' kī. E' kuëkjī sa' mīyal ipakōk pé' kē dōr judiowak esepa ā. 47 Es Skëköl tō sa' patkē. Ie' yëkkuō tō ichē:

'Be' tkékayō wes bō'wō wōñar stui ā es.

Es ye' tō be' patkeraē kā ulitane wakpa pattōk,

Ie'pa tsātkē e' ttē pakeraēbō kā wañe dō wé kā ĩ' erkerō eē.\*

48 Mik pé' kē dōr judiowak e'pa tō ttē e' ttsē etā ie'pa ttsēnekarak buaē. Ie'pa e' kēkarak Skëkēpa Jesús ttē kīkōkka. Wēpa kos suletēneat senuk michōē, esepa erblē Jesús mik. 49 Es Skëkēpa Jesús ttē pakane

kā e' wañe ā. 50 Erē alakōlpa dalōiērtā' tajē kā e' kī esepa tō judiowak ttē dalōieke buaē, nīes wēpa dalōiērtā' tajē kā e' kī, esepa shutjwēkā judiowak tō as Pablo ena Bernabé we'ikōrakitō as ie' yōttsarak kā e' kī. 51 Etā Pablo ena Bernabé tō iklō pō ppēe ikkachoie ie'pa ā tō ie'pa kī inuī āne tā imīyal Iconio. 52 Erē Jesús ttōkatapa atē e'pa ttsē'ne buaē nīes ie'pa ā Wikōl Batse'r tso' tajē.

**14**

*Pablo ena Bernabé tō Jesús ttē pakē Iconio wakpa q*

1 Mik Pablo ena Bernabé demi Iconio, etā ie'pa dewā judiowak nī dapa'wō wé ā wes ie'pa wōblar es. Ie'pa tō Jesús ttē pakē buaē. Es judiowak nīes pé' kē dōr judiowak, esepa tajē erblē Jesús mik. 2 Erē judiowak kē erblēne imik, e'pa tō pé' kē dōr judiowak, esepa shutjwēkā ena iluwēkā tajē s'yamīpa kī as iwe'ikōrakitō. 3 Erē Pablo ena Bernabé e' tsēat kā tajē eē. Ie'pa tō Skëkēpa ttē pakeke kē suane. Skëköl tō dichē mé ie'pa ā ĩ kē or yi ā ese wōie iwā kkachoie tō ie' er buaē chōke siā e' ttē dōr mokī. 4 Erē kā e' wakpa nī blabatsēlor, shābōtspa wa judiowak ttē wēr buaē, shābōtspa wa Jesús ttekolpa tsā e'pa ttē wēr buaē. 5 Judiowak ena pé' kē dōr judiowak, e'pa tō kəwō mé nī ā iwōkirpa tā Pablo ena Bernabé we'ikoie, tē āk wa ittowaie. 6-7 Erē mik Pablo ena Bernabé, e'pa wa ijchenewa, etā ie'pa tkayalmi dōmi kā kiē Licaonia eē. Kā kiē Listra ena kā kiē Derbe atē eē. Kā e' wañe ie'pa tō Jesús ttē buaē pakē.

*Pablo tēne āk wa ittowaie kā kiē Listra eē*

8-9 Etā wēm tso' ekōl Listra, e' kune' klō bachiulewā. Ie' kē shko. Ie' tkēr Pablo ttōke e' ttsōk. Pablo tō isuēwā krereē. Ie' wā ijcher tō wē' ierblē Jesús mik as ibuarne. 10 Etā ie' tō ichē iā āneule:

–ĪBe' e' kōkā, be' e' duōkā!

Etā wēm e' kēkā tunekā tsut tā ishkēmi. 11 Mik pé' tō, ĩ wé Pablo tō e' suē, etā ie'pa tō ichēmi aneule ie'pa Licaonia ttō wa:

–ĪWépa dalōiekesō skëkōlie e'pa dettsā se' shuā s'ditsōie!

12 Pablo kapakē kibiie, e' kuëkjī ie'pa tō ie' klō'wé ie'pa kēkōl kiē Hermes e' skēie. Bernabé klō'wérakitō ie'pa kēkōl kiē Zeus e' skēie.\* 13 Zeus wē merkā kā e' ñalē ukuō o'mik tsjnet. Zeus sacerdotē wa baka wē'ñe ena ma'ma wōrkua debitū tajē. Ie' ena pé' ulitane ēna baka wē'ñe jchak mé Pablo ena Bernabé ā idalōioie ikēkōlpaie. 14 Erē mik Bernabé ena Pablo wa ijchenewa, etā ie'pa

\* 13:33 Salmo 2.7 † 13:34 Isaías 55.3 ‡ 13:35 Salmo 16.10 § 13:41 Habacuc 1.5 \* 13:47 Isaías 49.6

\* 14:12 Zeus ena Hermes: E'pa dalōiōk griegowak bak skëkōlie kā iāiāē. Ie'pa ā Zeus dōr skëkōl bua'ie imalepa tsatā. Ie'pa tō iklō'wé tō Hermes dōr Zeus ttekol. Romawak tō Zeus kiē mēkā Júpiter ena Hermes kiē mēkarakitō Mercurio.



e' datsi' jchéé ikkachoie tó e' dór sulué ie'pa a. Ta ie'pa míá pè' shuá tá ichérakitó aneule:

15 —A kéképa, ÷i ùk a' tso'? Sa' dór s'ditsó wés a' es. Sa' debitu' tte buaé pakök a' a' as a' tó iyi ikké ké wá ta' ese kos watöttsá tá a' er mane'ù Skéköl chók e' a. Ie' tó ká jai' ena ká i' ena dayé ena ì kos tso' ìki e' yó'at. 16 Ká iaiáé dō ikké tá sulitane serke wés iwák k' i' kiane es, e' dalé'ttsé'bitu' Skéköl tó. 17 Eré e' dór es, eré ie' dór buaé se' tá kekraé, e' wa ie' tó iwá kkaché siá tó ie' dór Skéköl chók. Ie' tó kalí patkeke a' a. Ie' tó iyiwó weke a' a. Ie' tó chké meke a' a' ñanoie a' ttsé'woie buaé.

18 Eré ie'pa tó ì kos ché iarak, eré iekké tá baka wé'ñe jchérakitó Pablo ena Bernabé dalóioie wés Zeus ena Hermes es.

19 E' shá tá judiowak welepa datse Antioquia ena Iconio, e'pa debitu' tá Listra wakpa dakíñerakitó Pablo ttökwa. Ikló'wéwarakitó tá itérakitó taié ak wa. Ibikeitsérakitó tó iduowa, e' kuékí ie'pa tó ikuémi méat tér Listra ké kkö a' wé'kie. 20 Eré mik Jesús ttókatapa malepa e' dapa'wéka ipamik, etá ie' e' kéká míane Listra. E' bule es tá ie' míá Bernabé tá dō ká kié Derbe ee.

21 Ie'pa demi Derbe tá Jesús tté buaé pakérakitó ká e' wakpa a. Taié ie'pa e' yué Jesús ttókataie. E' ukuökí tá ie'pa debitu'ne Listra ena Iconio ena Antioquia. 22 Ká ekké kos a' ie'pa tó Jesús ttókatapa er diché ie' ena ipablérakitó as ie' tkówarak daréréé tté mik se' erblóke e' a. Ie'pa tó iché iarak: "Se' wake' weirdaé ká i' k'í dowáie aishkuó tá ì blúie Skéköl tso' e' a." 23 Nies ká kos e' k'í ie'pa tó wépa shushtë kaneblök Skéképa Jesús icha erule erule e'pa wókirpaie. E'pa k'í ie'pa ikié S'yé a' ena batsé, e' ukuökí tá iméarakitó Skéképa mik ie'pa erblóke e' ulá a.

*Pablo ena Bernabé dene Antioquia ate Sirta ee*

24 E' ukuökí tá Pablo ena Bernabé tkami ká kié Pisidia demirak Panfilia. 25 Ie'pa tó Jesús tté buaé paké ká kié Perge e' wakpa a. E' ukuökí tá ie'pa míá ká kié Atalía ee. 26 Eé tá ie'pa e' iéka kanó a' míane Antioquia iyamipa tó ie'pa patké'mi Jesús tté pakök e'pa ska'. Eé iyamipa tó ie'pa me' Skéköl er buaé chöke se' a' e' ulá a' i' kanéuk ie'pa dare e' woie. 27 Mik ie'pa demine Antioquia, etá Skéképa Jesús icha erule e' dapa'wékarakitó. Tá ì kos wé Skéköl tó ie'pa tá, ñies wés ie' tó ikkayé' pé' ké dór judiowak, esepa a' tó ie'pa erblómi ie' mik wés judiowak es, e' kos pakérakitó iyamipa a. 28 Etá ie'pa e' tséat ká taié Jesús ttókatapa tso' Antioquia, e'pa tá.

**15**

*Skéképa Jesús icha e'pa wókir kibipa ñi dapa'wé Jerusalén*

1 E' kéwó tá, wépa welepa e' yéttsa Judea demi Antioquia. Ie'pa tó s'yamipa

wöbla'wémi tté i' wa: "A' wépa kos kawóta tottola kkuölit tée tsir wés Moisés ikitat es. E' ké kaneone a' wa, e' tá ké a' tsatképa." 2 E' kuékí Pablo ena Bernabé ñi iutéka daréréé ie'pa tá. E' kuékí iyamipa tó Pablo ena Bernabé ena welepa ska, e'pa shushtë as imi'yal Jerusalén tté ñe' shulök Skéképa Jesús icha wókir kibipa ena Jesús ttekölpa tsá, e'pa tá.

3 Es Skéképa Jesús icha erule tso' Antioquia, e'pa tó Pablo ena imalepa patkémí Jerusalén. Ie'pa tkami Fenicia ena Samaria. Etá ipakeramirakitó iyamipa a' tó wés pé' ké dór judiowak, esepa er mane'wé Skéköl a. Tté e' tó ie'pa tssé'wé buaé.

4 Mik Pablo ena Bernabé demirak Jerusalén, etá ee Skéképa Jesús icha eruleé e'pa kos ena iwókirpa ena Jesús ttekölpa tsá, e'pa tó ie'pa kiéwa buaé. Etá ì kos o' Skéköl tó ie'pa wa e' pakérakitó imalepa a. 5 Eré Jesús mik erblókwakpa dór fariseowakpa, esepa welepa e' kéká tá ichéitorak:

—S'yamipa ké dór judiowak esepa wépa kawóta ítóttola kkuölit tée tsir. Nies ie'pa a' ikawóta ché tó Moisés tté kitulebak e' dalóioe ie'pa kawóta.

6 Etá Skéképa Jesús icha wókir kibipa ena Jesús ttekölpa tsá, e'pa ñi dapa'wéka tté e' bikeitsök bua'iewa. 7 Ie'pa tó ipaké taié, e' ukuökí tá Pedro e' kéká tá ichéito:

—A yamipa, a' wa ijcher tó ká iaiáé Skéköl tó ye' shukitbak a' shuá Jesús tté buaé pakök, pé' ké dór judiowak, esepa a' as ie'pa erbló imik. 8 Ie' wa se' er' sule buaé, i' tó Wiköl Batsé'r mé ie'pa a' wés se' a' ime'itó es. Es ie'pa tó se' a' ikkaché tó ñies ie' tó ie'pa kló'wé ie' ichaie. 9 Ie' tó ie'pa er paiklé ie'pa erblé Jesús mik e' wa. Es se' wa ijcher tó ie'pa ena se' dór ñies éme ie' wó. 10 A' tó ie'pa ké Moisés tté daréréé e' dalóioe, eré e' ké dalóiene' se' a, ñies se' bak ká iaiáé e'pa ké a' idalóiene'. I'ñe tá ÷iók a' tso' Skéköl wóñatkök es? 11 E' ké dór es. Se' tó ikló'wé tó se' tsatkéne Skéképa Jesús er buaé chöke siá e' é wa. E' sué ie'pa tsatkéne ñies.

12 E' ukuökí tá ie'pa ulitane siwa' blélur tso' Bernabé ena Pablo e'pa kapaköke e' tssök. Ie'pa tso' ipakök tó wés ì ké or yi a' ese wéarakitó Skéköl batamik pé' ké dór judiowak, esepa shuá Skéköl diché kkachóie. 13 Ie'pa kapaké one etá Santiago tó iché:

—A yamipa, ye' ttó tssó. 14 Simón tó se' a' ipaké wés Skéköl tó, pé' ké dór judiowak, esepa tsá kímé er bua' wa as ie'pa welepa dō ie' wák ichaie. 15 Nies e' sini'kué Skéköl ttekölpa bak ká iaiáé e'pa tó. Ie'pa tó iyé': 16 Skéköl tó iché: 'Aishkuó tá ye' datsene. Etá David jchúlipa kerakayó iwák sué. Ie'pa dórane diché tá taié wés iaiáé es 17 as pé' malepa ké dór judiowak dór ye' icha esepa tó ye' yuló.

18 Es ye' tō ttē i' chétke.

Ká iaiãē ttē i' me'atbakyo' a' a.\*

19 "Ttē i' kueḡi ye' ibikeitsē tō, pē' kē dōr judiowak er mane'wē Skēkōl a, esepa kē tsiriuk s'kàne judiowak ser ese wa. 20-21 E' kueḡi yēkkūō patkōmisō ie'pa a e' kī ichōsō tō iyi meule iyi diōkōl tso' dalōiē skēkōlie ese a, ese kē kar, ese kē katar. Nies ie'pa kē kàne trēnuk. Iyiwak ttēwā kuli' siulekā ese chkā kē katar nies ipē kē katar. Ká iaiãē ttē i' pakanemi ká wa'ñe se' ñi dapa'wo wē a eno diwō bit ekkē. E' kueḡi iyi ekkē ē shtōmisō ie'pa a."

*Yēkkūō patkēne s'yamipa kē dōr judiowak, esepa a*

22 Skēkēpa Jesús icha eruleē e'pa ḡos ena iwōkir kibipa ena Jesús ttekōlpa tsá, e'pa wa iwēr buaē tō wēpa welepa shushtë ie'pa shuā as imi'rak Pablō ena Bernabé tã dōmi Antioḡiá. Es ie'pa tō Judas kiē nies Barsabás ena Silas, e'pa shushtë. Wēpa e'pa dalōieke taijē s'yamipa ulitane tō. 23 Etã yēkkūō shtë iwōkirpa tō e' mé ie'pa a as iwa imi'rak. Yēkkūō e' tō ichē i' es:

"Sa' dōr Skēkēpa Jesús icha eruleē e'pa wōkir kibipa ena Jesús ttekōlpa tsá, sa' dōr a' yamipa. Sa' tso' yēkkūō i' shtōk a' dōr sa' yamipa erē kē dōr judiowak serke Antioḡiá ena Siria ena Cilicia e'pa a. A' shkē'wēmi sa' tō. 24 Sa' wã ijchenewã tō sa' yamipa welepa e' yē'ttsã sa' shuā, e'pa dē'mi a' ska'. Ie'pa tō a' tsiriō' iwákpa ttē wa. E' tō taijē a' wōkir tsiriwēkã. Kē sa' wã ḡawō mēne ie'pa a a' wōbla'woie i' wa. 25 E' kueḡi sa' ulitane wa iwēr buaē wēpa welepa shushtëḡ sa' shuā as imi' a' saḡk Bernabé ena Pablō tã. Sa' yami e'pa dalēr taijē sa' éna. 26 Ie'pa e' me'ttsã weinuk taijē. Ie'pa kē suane ttēwã Skēkēpa Jesucristo ttē kueḡi. 27 Sa' tō Judas ena Silas patkēmi ttōk a' tã. Ie'pa tō ipakeraē a' wōshãē yēsýēsē wes yēkkūō i' ḡi ikitule es. 28-29 Buaē idir Wikōl Batse'r a, nies sa' a, tō a' kē ḡawōtã judiowak ser e' blōk s'raã. I' ē blōk a' kē: Chkē meule iyi diōkōl tso' dalōiē ese a, e' kē katar. Nies ipē kē katar ena iyiwak ttēwã kuli' siulekã ese chkā kē katar. Kē a' kàne trēnuk. Iyi ekkē ē ḡawōtã blē a' tō. A' tō iwē es, e' tã e' dōr buaē. Skēkōl tō a' ḡimē."

30 Etã ie'pa e' chéat tã imiyál Antioḡiá. Mik ie'pa demi eḡ tã ie'pa iyamipa dapa'wēkã, e'pa a yēkkūō mirdak iwã e' méitō. 31 Mik iyamipa tō yēkkūō aritsē, etã e' tō ie'pa er pablé taijē, e' kueḡi ittsē'nerak buaē. 32 Judas ena Silas, e'pa dōr Skēkōl ttekōlpa nies, e' kueḡi ie'pa tō iyamipa patté taijē. E' tō iyamipa er pablé taijē, iḡimé taijē. 33-34 Ie'pa sené eḡ kukuie. Mik ie'pa

mitkene itō wane etã iyamipa tō ichē iḡarak a' shkō wōbla wa. 35 Erē Pablō ena Bernabé e' tséat Antioḡiá. Ie'pa ena imalepa taijē e'pa tso'rak Skēkēpa Jesús ttē buaē pakōk. Nies ttē e' wa s'wōbla'uk ie'pa tso'.

*Pablō ena Bernabé kē kaneblōkū'ia' ñita*

36 ḡawō tka taijē, e' ukuōḡi tã Pablō tō ichē Bernabé a:

—Mishkane etōkichane ká ḡos ḡi se' bak Skēkēpa Jesús ttē pakōk e' ane s'yamipa saḡk tō is ie'pa tso'.

37 Bernabé ḡi Juan kiane tsēmi ie'pa tã. Juan e' kiē nies Marcos. 38 Erē Marcos tō ie'pa me'at ká kiē Panfilia eḡ. Ie' kē kaneblēneia' ie'pa tã. E' kueḡi Pablō kē éna ie' tsámi ie'pa tã. 39 Iñi iḡtérak darērēē erē kē ishuline. E' kueḡi ie'pa ñi blabatsélor. Bernabé wã Marcos mitsér e' tã tã ie'pa miyál kanō ḡi dō Chipre. 40 Pablō tō wēm kiē Silas e' kiēmi e' wapie. Iyamipa tō ie'pa me'at Skēkōl er buaē chō sia e' ulã a. Etã ie'pa e' yéttsã eḡ 41 tkamirak Siria ena Cilicia. Ie'pa tso' Skēkēpa Jesús icha erule erule tso' ká e' ḡi e'pa diché ḡi iōk Jesús ttē wa.

## 16

*Timoteo miã Pablō ena Silas wapie*

1 E' ukuōḡi tã Pablō ena Silas demi Derbe tã imiyál Listra. Eḡ wēm kiē Timoteo e' serke, ie' dōr Jesús ttōkata. Ie' mi dōr judiowak e' dōr Jesús ttōkata nies. Erē iyē dōr griegowak. 2 S'yamipa serke Listra ena Iconio, e'pa tō icheke tō Timoteo dōr pē' buaē. 3 Pablō ḡi ie' kiane tsēmi e' wapie. Erē judiowak serke ká e' ḡi e'pa ulitane wã ijcher tō Timoteo yē e' dōr griegowak. E' kueḡi Pablō tō ie' kē itōttola kkuōlit tōk tsir as judiowak kē ulurkã iḡi. 4 Ká ḡos wē ie'pa dami eḡ i' uk patkē' Skēkēpa icha erule tso' Jerusalén e'pa wōkirpa ena Jesús ttekōlpa tsá e'pa tō, e' wã pakē ie'pa tō s'yamipa ulitane a. 5 Es Skēkēpa Jesús icha erule erule e'pa ḡos diché ḡi iēne Jesús ttē a. Nies pē' ḡi iērke taijē ḡekraē.

*Pablō tō wēm dōr Macedonia wak e' sué kabsueḡe*

6 Etã Wikōl Batse'r kē wã ḡawō mēne ie'pa a Jesús ttē buaē pakōk kã kiē Asia eḡ. E' kueḡi ie'pa tkami ká kiē Frigia ena Galacia 7 demi kã kiē Misia e' ḡkōrōwã eḡ. Etã ie'pa tō ima'wē shkōkwa' ká kiē Bitinia e' a, erē Jesús Wikōl kē wã ḡawō mēne ie'pa a. 8 E' kueḡi ie'pa tkami yēsýēsē Misia kḡer demi ká kiē Trōade dayē ḡkō a wē kanō irirke eḡ. 9 Etã nañewe Pablō tō i' sué kabsueḡe. Ie' tō wēm sué ekōl, e' dōr ká kiē Macedonia e' wak. E' dur shkē'ka tã ikkōché ia: "Be' shkōtkō Macedonia sa' ḡimuk." 10 Pablō tō e' sué one tã bet sa' dali iēmi mitke Macedonia. Sa' wã

\* 15:18 Amós 9.11-12

ijcher buaë tö Skëköl kî ikiane tö sa' tö Jesús tté buaë pakë ká e' kî.

*Alaköl kië Lidia e' erblé Jesús mik*

<sup>11</sup> Etá sa' e' iéka kanò a Tróade, míyal yësyësë ká kië Samotracia eë. Bule es tá sa' demí ká kië Neápolis eë. <sup>12</sup> Eë tá sa' míyal klò kî dô ká kië Filipos eë. Ká e' a romawak tso' tajë. E' dôr ká bua' bua atë Macedonia. Eë sa' sené ká tkël ká skël ulatök. <sup>13</sup> Judiowak eno diwò tá sa' e' yélur míyal di' kkómik wé sa' tö ibikeitsë isalema judiowak wá ká tso' ttoie Skëköl tá eë. Mik sa' tö ikuë, etá eë sa' e' tulëser Jesús tté buaë pakök alakólpa ñi dapa'wëka e'pa. <sup>14</sup> Ie'pa eköl kië Lidia, e' dôr ká kië Tiatira e' wak. Ie' dôr datsi' bua' bua daloshdalosh ese wataukwak. Ie' tö Skëköl dalöieke tajë. Skëképa tö ie' er ñi' wé as Pablo ttöke kôs e' klò'ütö mokië. <sup>15</sup> Etá ie' e' wöskuë iyamipa tso' ie' u a e'pa tá. E' ukuökî tá ie' tö sa' a' iché kröröë:

—A' ibikeitsë tö mokië ye' dôr Jesús mik erblökwak, e' tá a' klönüia ye' ska'.  
Es ie' tö sa' ké klönükia ie' ska'.

*Pablo ena Silas wötënewá s'wöto wé a Filipos*

<sup>16</sup> Ká et tá sa' mirwane wé s'ttöke Syé tá eë. Sa' mirwäia tá pë' busi kuëwa sa' tö eköl, e' a wimblu sulusi tso' eköl, e' wa iyi tötkekitö. Wëpa wëlepa tö ie' t'ot'sa ie'pa a kanëblök iyi tötkök, e' ské klò'wëke ie'pa tö tajë e' a. <sup>17</sup> Busi e' shkëmi Pablo ena sa' itöki, Ie' ardatse:

—Wëpa ikképa dôr Skëköl iyi ulitane tsatá e' kané mësopa. Ie'pa tö s'tsatkë ñälé e' tté pakeke a' a.

<sup>18</sup> E' wambléitö ká tajë, bata ekké tá Pablo ulunëka tajë. Ie' e' wotrëene tá ichéitö wimblu sulusi tso' busi a' e' a:

—Jesucristo ttö wa ye' tö be' a' iché be' e' yöttsá ie' a.

E' wöshäë tá wimblu sulusi e' yëttsá ia.

<sup>19</sup> Mik busi wökirpa tö isuë tö inuköl kë dë'ia ie'pa ulá a busi batamik, etá ie'pa tö Pablo ena Silas klò'wëwá tsémirak wé tté shulökwakpa tso' eë. <sup>20</sup> Ie'pa tö ikkatérak tté shulökwakpa a tá ichérakitö:

—Wëpa ikképa dôr judiowak. Tajë ie'pa tso' sa' shütiük. <sup>21</sup> Sa' dôr romawak, e' kuëki kë sa' a' kawö mène ie'pa tö s'wöbla'wëke sene wa e' klò'ük ena e' wá uk.

<sup>22</sup> Etá ká e' wakpa bitesška Pablo ena Silas kî. Etá ishulökwakpa tö idatsi' yöktsa ké ikî tá ippök ké darërëë kal wa. <sup>23</sup> Iburnerak siarë wötëwarakitö s'wöto wé a. Tá ichérakitö s'wöto wé wökir a tö ikkö'nü bua'iewá as ké itköyal. <sup>24</sup> Mik ie' a' kawö e' mène, etá ie' tö Pablo ena Silas wötëwá iwé wötëulewá bua'iewá, ese a. Ie' tö ie'pa klò tiëwá kaltak wöbiule s'klò wötowá ese a. Es imëgarakitö.

<sup>25</sup> Ká de ká shaböts etá Pablo ena Silas tso' ttök Skëköl tá ena ittseittök. Imalepa tso' ittök. <sup>26</sup> E' wöshá tá i' tka darërëë. S'wöto wé wöppéitö darërëë. E' wöshäë tá ukkö ulitane kköburolone. I' kôs wa ie'pa tso' moulewa, e' wötsërolone. <sup>27</sup> S'wöto wé wökir t'ü'neká. Mik ie' isuë tö ukkö kôs tso' áie tá ibikeitsëitö s'tso' wötëule e' kôs tkayal. E' kuëki itabë kuëttsaitö e' ttowäie. <sup>28</sup> Erë Pablo anëka:

—jKë be' e' ttökwa! Sa' tso'ia ulitane.

<sup>29</sup> Etá s'wöto wé wökir tö bö'wö kié tá itunewá Pablo ena Silas ska'. Eë ie' e' tkëwá kuché kî ie'pa wöa painéka suane tajë. <sup>30</sup> Etá ie' tö ie'pa yëttsá u'rki tá ie'pa a' ichaké:

—A këképa, j' uk ye' kawöta e' tsatkoie?

<sup>31</sup> Ie'pa ie' iütë:

—Skëképa Jesús mik be' erblö etá be' tsatkërdaë ñies be' yamipa tsatkërmi es.

<sup>32</sup> Etá ie'pa tö Skëképa tté paké ie' a' ena iyamipa kôs tso' iu a, e'pa a. <sup>33</sup> Etá e' nañewe ulatök s'wöto wé wökir tö ie'pa tsémi e' tá. Ie'pa shka'ule tajë e' kapeyéitö. Etá ie' ena iyamipa kôs e' wöskuëlor. <sup>34</sup> E' ukuökî tá ie' tö itsémirak iu a tá itierakitö. Ie' ena iyamipa e'pa erblé Skëköl mik, e' kuëki ie'pa kôs tss'e'ne buaë.

<sup>35</sup> Ká ñine tá ishulökwakpa tö ishkekîpa patkëmi ichök s'wöto wé wökir a tö Pablo ena Silas ömine. <sup>36</sup> S'wöto wé wökir tö iché Pablo a:

—Sa' shulökwakpa tö ye' a' kawö mé a' ökmine. E' kuëki a' yüne bërë.

<sup>37</sup> Erë Pablo tö iché ia:

—Sa' dôr romawak\* Ie'pa tö sa' buk suli-tane wöshäë kam sa' shulir e' yöki. Sa' wötë'waitö s'wöto wé a. I'ñe tá ie'pa kî sa' kiane émine akir. Ie'pa ké a' kawö tá' iwoie es. As ie'pa wákpa bitü sa' ökmine.

<sup>38</sup> Etá shkëkipa tö tté e' chéne ishulökwakpa a. Mik ie'pa ittse tö Pablo ena Silas dôr romawak, etá tajë ie'pa suane. <sup>39</sup> Etá ie'pa míyal Pablo ena Silas ska' tá ichérakitö:

—j sulu wamblé sa' tö a' kî e' olo'yö sa' kî.

Etá iémine tá ikköcherak ia: "A' e' yölor sa' ká kî." <sup>40</sup> Etá Pablo ena Silas yënëttsá s'wöto wé a' míyal Lidia u a' iyamipa weblok. Ie'pa pablérakitö etá imíyal.

**17**

*Tesalónica wakpa tsirineka Jesús tté kuëki*

<sup>1</sup> Pablo ena Silas tkami ká kië Anfípolis ena ká kië Apolonia demirak ká kië Tesalónica wé judiowak wá ñi dapa'wo wé tso' eë. <sup>2</sup> Etá Pablo dewá e' wé a' eno diwö wa wes ie' wöblar es. Eë ie' kapaké ie'pa tá Skëköl yëkküö wa eno diwö mañat. <sup>3</sup> Ie' tö ikkaché ie'pa a' tö itso' kitule Skëköl yëkküö kî tö

\* 16:37 Romawak: Pablo ditsëwö dôr judiowak erë ie' yami bak e' wële e' yö' romawakie, e' kuëki ñies ie' dôr romawak.

wé pairine'bitü idi' wa s'blúie e' tterawá tá ishkerdakane. Ie' tò iché ie'pa a:

—Jesús pakök ye' tso' a' a, e' wák dör wé pairine'bitü idi' wa s'blúie e'.

<sup>4</sup> Judiowak welepa erblé Jesús mik, tá ie'pa de Pablo ena Silas kúie. Nies griegowak tò Skéköl dalóieke wés judiowak es, esepa tajé erblé Jesús mik ena alakólpa dalóiertá' esepa tajé erblé imik nies. <sup>5</sup> Eré e' tò judiowak malepa uluwéka tajé. Eta wépa sulusipa tso' éme ñala kí, esepa kíerakitö pé' dapa'ük tajé, e'pa kí uluwérakitö tá imíyal késik wa pé' malepa uluukka. Eta itkawarak késik wa Jasón u a Pablo ena Silas yulök yettsá mè imalepa ulurke tajé e'pa ulá a. <sup>6</sup> Eré kè iwá ikunerak ee. E' kuekí Jasón ena iyamipa welepa e'pa kuémirakitö ká e' wókirpa wóá tá ichéitörak aneule:

—Wépa ikképa tò ká ulitane wakpa tsirio', e'pa de íe nies. <sup>7</sup> Jasón tò ie'pa kiéwá iu a. Ie'pa ulitane tso' ichök tò se' blú kibi dör kuá kí, e' kié Jesús. Ie'pa tò sa' blú kibi e' tté dalósewéwá.

<sup>8</sup> Mik pé' ulitane ena iwókirpa tò tté e' tssé, eta ie'pa shüñeká tajé. <sup>9</sup> Eré Jasón ena iyamipa kérakitö inuköl mukat iwá kkachoié tò ie'pa datskene ishulök tá iémirakitö.

*Pablo ena Silas tò Jesús tté paké Berea wakpa a*

<sup>10</sup> Ká tuinetke eta bet iyamipa tso' Tesalónica e'pa tò Pablo ena Silas patkémi ká kié Berea ee. Ie'pa demi Berea eta imíyal judiowak ñi dapa'wó wé a. <sup>11</sup> Judiowak e'pa er dör buaé judiowak tso' Tesalónica e'pa tsáta. Ie'pa tò Jesús tté kí tssé er bua' wa. Kekraé ie'pa tò Skéköl yékkúu suékewá bua'iewá isuoié tò i ché Pablo tò e' yéne ö kè iyéne. <sup>12</sup> Es tajé ie'pa erblé Jesús mik. Nies tajé griegowak erblé imik alakólpa dalóiertá' ena wépa nies. <sup>13</sup> Eré mik judiowak serke Tesalónica e'pa wá ijchenewá tò Pablo tso' nies Berea Skéköl tté pakök, eta imíyal ee. Ie'pa tò Berea wakpa dapa'wémi shüñiwémi Pablo kí. <sup>14</sup> Eré s'yamipa tso' Berea, e'pa tò Pablo kè e' yöktsá tá ipatkémi dayé kkómik. Eré Silas ena Timoteo e' tséat Berea. <sup>15</sup> Wépa wá Pablo mirwá, e'pa wá imí dö ká kié Atenas ee. E' ukuókí tá ie'pa biteyalne. Pablo tò ie'pa ka' ichök Silas ena Timoteo a tò "a' kié bet."

*Pablo tò Jesús tté paké Atenas wakpa a*

<sup>16</sup> Pablo tso' Silas ena Timoteo kínuak Atenas, e' dalewa ie' tò isué tò ká e' wakpa wá iyi diököl tso' dalóie, ese tso' tajé. E' tò ie' tsiriwéka tajé. <sup>17</sup> E' kuekí judiowak ñi dapa'wó wé a ie' kapaköke judiowak tá

ena pé' kè dör judiowak eré Skéköl dalóietá' esepa tá. Nies ie' kapaköke kekraé Atenas wakpa tá wé ie'pa dóke tajé iyi taük ee. <sup>18</sup> Nies ie'pa wóbla'ükwakpa welepa kiekerakitö epicúreo wakpa\* ena estoico wakpa†, e'pa ñi iutémi Pablo tá. Ie'pa welepa tò ie' cheke i' es:

—Í kabeweke s'ñeñe dió tò?

Ie'pa welepa ská tò icheke:

—Ttsésqua e' dör kékólpa tsakjé dalóieke ká bár wakpa tò e'pa tté pakök'wak.

Pablo tso' Jesús kótewá shkenekane e' tté buaé pakök e' kuekí ie'pa tò ie' ché es. <sup>19</sup> E' kuekí ie' tsémirakitö wé ie'pa e' dapa'úke tté tsakjé pakarke ese tssök ee. Ká e' kié Areópago. Tá ichakérakitö:

—Tté pa'alí pakeke be' tò, ¿e' pakémibó sa' a? <sup>20</sup> Tté pakeke be' tò, e' kè tsséule sa' wá, e' kuekí e' kiane jchenukwá sa' kí ¿ima e' wá dör?

<sup>21</sup> Atenas wakpa kós ena ká kuá kí wakpa serke Atenas, e'pa ulitane tò tté pa'alí tseke ese é pakeke ñi a kekraé.

<sup>22</sup> Eta Pablo e' duéka ie'pa shuá Areópago wé a tá ichéitö:

"A Atenas wakpa, i kós suéyó, e' wa ye' wá ijcher tò a' tò kékólpa tsakjé dalóieke. <sup>23</sup> Mik ye' tkami a' ká shuá, eta wé a' tò kékólpa ñe' dalóieke ese ké suéyó tajé. E' shuá ye' tò ká tso' idalóioie ese kué et e' kí itso' kitule i' es: 'Skéköl eköl kè jcher se' wá tò yi idir, e' dalóioie'. Ie' dalóieke a' tò, eré a' kè wá ijcher tò yi idir. Skéköl e' pakeke ye' tò a' a.

<sup>24</sup> 'Ie' tò ká ulitane ena iyi ulitane tso' ikí e' yö'at. Ie' dör ká jai ena ká i' e' kós wák. Ie' kè serku' Skéköl wé yöule s'ditsó wa ese a. <sup>25</sup> Sulitane serke ie' mik. Nies iyi ulitane kiane se' kí senoie, e' mekeitö se' a kekraé. E' kuekí ie' kè kí ikiar tò se' ie' kímè i wa.

<sup>26</sup> "Wém eköl é wa ie' tò se' ditsówó ulitane alówé. Ie' tò se' kè senuk ká wa'ñe. Mik ie' tò ká i' yö', eta ie' tò se' kataté'atbak tò mik se' sermi, wé se' sermi ditséwó wa ditséwó wa. <sup>27</sup> Ie' tò se' kataté'at es as se' tò ima'ü yulé isalema só ikuémi. Eré mokí ie' kè ku' kamié se' yöki. <sup>28</sup> E' dör wes yile tò iché es, e' tò iché: 'Skéköl mik se' serke se' shkóke, ie' wa se' tso'.' Nies e' dör wes a' wápa tssóól eköl tò iyé'at es, e' tò iché: 'Sulitane dör Skéköl aleripa.' <sup>29</sup> Se' dör Skéköl ditséwó, e' kuekí kè se' káne ibikeitsök tò ie' dör wes iyi diököl yöule se' wá orochka wa ö inukólchka wa ö ákchka wa es. E' kós yuésó wes se' ibikeitsé es wes se' wápa a iyör es. Eré Skéköl kè dör es. <sup>30</sup> Iaiáé tá kè se' wá ijcher tò wes ie' dör, e' kuekí e' nuí tkó'o'atbak ie' tò ie'pa kí. Eré ñe' tá ie' tso' ichök ká ulitane wakpa a tò a' kawótá er mane'ük. <sup>31</sup> Skéköl tò

\* **17:18** epicúreo wakpa: E' wakpa tò ikló'wé tò s'ser e' wá bua'ie dör tssé'ne buaé. Tté e' wa s'wóbla'weke ie'pa tò. † **17:18** estoico wakpa: E' wakpa tò ikló'wé tò s'ser e' wá bua'ie dör se' e' kókó'nú i sulu kós e' yöki. Tté e' wa s'wóbla'weke ie'pa tò.

idiwō me'atbak wekkē alē tā ie' tō sulitane shuleraē yēsēsē wēm ekōl tkē'kaitō e' wa. Wēm e' kōtēwā erē ishkeō'kane Skēkōl tō, e' wa ie' tō iwā kkachē sulitane a tō mokjē wēm nē' tkē'kaitō."

<sup>32</sup> Erē mik Atenas wakpa tō ittsē tō Pablo tō s'du'wā shkenekane e' ché, etā ie'pa welepa tō ie' wayué, erē welepa skā tō iché:

—Ĭ pakeke be' tō, e' skā ttsēmi sa' tō iētōkichane.

<sup>33</sup> Etā Pablo mīa. <sup>34</sup> Erē wēpa welepa mīyal Pablo tā, tā e'pa erblé Jesús mik. Ie'pa e' shuā Dionisio tso'ñak, e' dōr Areópago wōkirpa ekōl. Nies alakōl ekōl kiē Dámaris ena pē' skā tso'ñak ishūa.

**18**

*Pablo mīa Corinto*

<sup>1</sup> E' ukuōkī tā Pablo e' yéttsa Atenas mīa Corinto. <sup>2</sup> Eē wēm kuéwaitō ekōl dōr judiowak kiē Áquila, e' dōr ká kiē Ponto e' wak. Ie' alakōl kiē Priscila. Ie'pa bak senuk Roma atē Italia eē. Ie'pa dē'bitū erpa Corinto. Ká tso' tseē romawak ttē dikīa e' wōkir kibi kiē Claudio, ie' tō judiowak kōs serke Roma e' yōkulur patké. E' kuekī Áquila ena ilakōl e' yē'lur Roma demi Corinto. Pablo mīa ie'pa pakōk. <sup>3</sup> Ie' kanē dōr ie'pa kanē ese ē, e' kuekī ie' e' tséat ie'pa tā kanēblōk. Kanē e' dōr iyiwak kkuōlit yueke ūie tsēmi ese kanē. <sup>4</sup> Eno diwō bit ekkē Pablo mi'ke judiowak nī dapa'wō wé a. Eē ie' tō Jesús ttē pakeke ie'pa ulitane a. Ie' tō judiowak ena pē' kē dōr judiowak e'pa ulitane pableke as ie'pa erblō Jesús mik.

<sup>5</sup> Mik Silas ena Timoteo tso' Macedonia, e'pa demirak Corinto, etā Pablo kē kanēblēneia Áquila tā. E' skēie ie' e' mé Jesús ttē buaē e' ē pakōk kekraē. Nies ie' tō judiowak pablē kekraē tō Jesús dōr wé pairine'bitū idi' wa s'blūie e'. <sup>6</sup> Erē ie'pa wōtkēmi Pablo tā tā iché suluē. E' kuekī ie' datsi' wōppēe iwā kkachoie tō ie' kē kī inuī ku' tā iché iarak:

—A' weirdaē siarē, e' wiie a' wákpa iane. E' kē wēneia ye' wōkī. I'tami ye' mīa pē' kē dōr judiowak esepa pattōk.

<sup>7</sup> Etā Pablo e' yéttsa judiowak nī dapa'wō wé a mīa wēm kiē Ticio Justo, e' u a senuk. Wēm e' tō Skēkōl dalōieke tajē. Ie' serke judiowak nī dapa'wō wé o'mik. <sup>8</sup> Wēm kiē Crispo, e' dōr judiowak nī dapa'wō wé, e' wōkir. Ie' erblé Skēkēpa Jesús mik iyamipa kōs e' tā. Es nīes tajē Corinto wakpa tō Jesús ttē tstsē tā ierblérak imik tā ie' wōskuēlor. <sup>9</sup> Ká et nañewe Skēkēpa Jesús tō Pablo a iché kabsueie: "Kē be' suanuk. Ye' ttē kī pakō kekraē. Kē be' siwā'blōk. <sup>10</sup> Ye' tso' be' tā. Kē yi a i sulu wamblēnuk be' kī yēs. Ye' wā pē'

tso' tajē ká i' kī." <sup>11</sup> Es Pablo atē duas ek kī shabōts Corinto ie'pa wōbla'uk Skēkōl ttē wa.

<sup>12</sup> Mik Galión bak Acaya wōkirie, etā judiowak serke Corinto e'pa nī dapa'wēka Pablo namēie ie' tsēmi ttē shulo wé a.

<sup>13</sup> Ie'pa tō Pablo kkatē Galión a tā iché ia:  
—Wēm i' tso' sa' pablōk tō Skēkōl dalōiō sa' tō, erē kē dōr wēs ttē dalōiēno meneat sa' a e' tō iché es.

<sup>14</sup> Pablo ttēmitke tā Galión tō iché judiowak a:

—Mokī i sulu wamblōpaitō, e'ma ye' tō a' ttō ttsēmi. <sup>15</sup> Erē a' tso' nī wōnatkōk ttē kī ena wēpa welepa kiē kī, ena a' wákpa ttē dalōiēno e' kī, e' kuekī e' shulō a' wákpa tō. Ye' kē tō ttē ese shulē.

<sup>16</sup> Etā Galión tō ie'pa uyéttsa ttē shulo wé a. <sup>17</sup> Etā pē' tso' tajē e'pa tō wēm kiē Sóstenes dōr judiowak nī dapa'wō wé wōkir, e' klō'wēwā ppérakitō ttē shulo wé wōshāē. Erē e' kī Galión kē tkine yēs.

*Pablo dene Antioquia*

<sup>18</sup> Pablo e' tséatia tajē Corinto. E' ukuōkī tā ie' e' chéat iyamipa a tā imīa ká kiē Cencreas wé kanō irirke eē. Etā eē ie' e' iéka kanō mi'ke Siria ese a. Áquila ena Priscila mitke ie' tā nīes. Kam ie' e' iōka kanō a, etā ie' tsā téē manene. E' wēitō ittē me'itō Skēkōl a e' blōie wēs iyē'itō es. <sup>19-21</sup> Mik ie'pa demi ká kiē Éfeso eē, etā Pablo mīa judiowak nī dapa'wō wé a Jesús ttē buaē pakōk judiowak nī dapa'uke eē, e'pa a. Ie'pa tō iché ia tajē: "Be' e' tsúatia sa' tā." Erē kē ie' e' tsakat. Ie' e' chéat ie'pa a tā ichéitō: "Skēkōl kī ikiane, e'ma ye' skā dōrane a' pakōk." Áquila ena Priscila e' tséat senuk Éfeso.

E' ukuōkī tā Pablo e' iéka kanō a tā imīa. <sup>22</sup> Mik idemi Cesarea tā imīa Jerusalén Skēkēpa Jesús icha erule e'pa shké'uk. E' ukuōkī tā imīa Antioquia. <sup>23</sup> Eē ie' senē ekuōlō. E' ukuōkī tā iská miāne Galicia ena Frigia, ká e' kōs a Jesús ttōkatapa er diché kī iōk.

*Apolo tō Jesús ttē pakē Éfeso wakpa a*

<sup>24</sup> E' kēwō ska' tā wēm ekōl kiē Apolo dōr judiowak, e' de Éfeso. Ie' datse ká kiē Alejandria eē. Ie' dōr wēm ttō buaē ese. Ie' wa Skēkōl yēkkuō sūle buaē. <sup>25</sup> Ie' yōule buaē Skēkōl nālē ttē wa. Ie' tō s'wōbla'wēke kaneē yēsēsē Jesús ttē wa. Erē ie' kē wā Jesús ttē jcher seraa. Ie' wā Juan S'wōskuōkwak, e' ttē ē sūle. <sup>26</sup> Ie' ttēmi judiowak nī dapa'wō wé a, kē suane. Etā mik Priscila ena Áquila tō ie' kapakōke e' tseē, etā ikiémirakitō iu a. Tā eē ie'pa tō ie' kī wōbla'wé buaē Skēkōl nālē ttē wa. <sup>27-28</sup> E' ukuōkī tā ie' shhak ká kiē Acaya eē. E' kuekī iyamipa serke Éfeso, e'pa tō ie' kīmé. Yēkkuō shtérakitō Jesús ttōkatapa tso' Acaya, e'pa a as ie'pa tō ie' kiōwā buaē. Mik ie' demi Acaya tā wēpa erblē'bak Jesús mik

Skëköl er buaë ché ie'pa a e' kueki, esepa kimé tajë ie' tò. Ie' e' alöke judiowak ki ie' ttë wa sulitane wörki. Ie' tò ie'pa siwa'blöweke. Ie' tò ikkacheke yësyesë Skëköl yëkuö wa tò mokj Jesús dör wé pairine'bitu' idi' wa s'blúie e'. Es ie' tò iyamipa kimé.

## 19

*Pablo tò Jesús ttë buaë paké Éfeso wakpa*

a

<sup>1</sup> Apolo tso'ia Corinto e' dalewa Pablo tkami kabata wa demi Éfeso. Eë ie' tò Jesús ttökatapa welepa kué. <sup>2</sup> Ie' tò ie'pa a ichaké:

Mik a' erblë' Jesús mik etä ¿Wiköl Batse'r tär' a' kj?

Ie'pa tò iüté:

—Kë sa' wä ittsëule tò Wiköl Batse'r tso'.

<sup>3</sup> Pablo tò ie'pa a ichaké:

—Etä ¿wöskuë wése wa a' wösune?

Ie'pa iüté:

—Juan s'wöskuë e' wa.

<sup>4</sup> Ie' tò iché iarak:

—Wépa er mane'wé Skëköl a, esepa wösuk Juan tò. Erë ie' tò iyé' ie'pa a tò wëm datse' ie' itöki e' mik ie'pa ké erblök.

<sup>5</sup> Ttë e' ttsérakitö tã iwöskuélor Skëképa Jesús ttö wa. <sup>6</sup> Pablo ulã méka ie'pa ki tã Wiköl Batse'r debitu' ie'pa ki tã ie'pa ttëmi ttö kua'ki kua'ki wa. Nies i mé Skëköl tò ie'pa a chë, e' ché ie'pa tò. <sup>7</sup> Seraa ie'pa döka dabom eyök kj böi (12) wépa.

<sup>8</sup> Si' mañat Pablo shkére judiowak ñi dapa'wö wé a, eë Jesús ttë pakéitö kë suane. Ie' tò ie'pa pableke tajë as ie'pa e' tiüwã i blúie Skëköl tso' e' ttë dikia. <sup>9</sup> Erë ie'pa welepa wökir darëréë, e' kueki ie'pa kë wä ttë e' klöne. Ie'pa tò Jesús dör se' ñalã e' ttë ché suluë sulitane kukua. Etã Pablo e' skëttsã ie'pa yöki. Wépa detke Jesús ttökatapaie e'pa tsëmi e' tã dö wé wëm kië Tirano e' wä u tso' s'wöbla'woie eë. Eë Jesús ttë pakeke Pablo tò këkraë. <sup>10</sup> Es iwëitö dö duas bök. Sulitane serke Asia, judiowak ena pë' kë dör judiowak, e'pa tò Skëképa Jesús ttë ttsé. <sup>11-12</sup> I kë or yi a ese wé Skëköl tò kibiie Pablo wa tköka imalepa tsatã dö tsamo ena datsi' döne ie' mik ese mi'kerak iwã wépa kirirke esepa ska' tã ibuanene tã wimblupa sulusi e' yélur ie'pa a.

<sup>13</sup> Erë judiowak welepa shkörãmi ñalã kj wimblupa sulusi yökulur pë' a. E'pa tò iché 'ima'üsö Skëképa Jesús ttö wa'. Ie'pa ichëmi wimblupa sulusi a i' es: "¡A' e' yölor Jesús pakeke Pablo tò, e' ttö wa!"

<sup>14</sup> Es wëm kië Esceva e' ala'r döka kul e'pa tò ima'wëmi ñies. Esceva dör judiowak sacerdotepa wökirpa e' eköl. <sup>15</sup> Erë etökicha tã wimblu sulusi tò ie'pa iüté: "Yi dör Jesús e' jcher ye' wä. Nies yi dör Pablo e' jcher ye' wä. Erë ¿a' dör yi?"

<sup>16</sup> E' wöshãë wëm a wimblu sulusi tso', e' unekã ie'pa ki. Ie' e' alékã ie'pa ki idiché tajë wa. Ie'pa ppëitö siarë. Ie'pa e' yélur tkayal sume shka'ule tajë. <sup>17</sup> Éfeso wakpa qos, judiowak ena kë judiowak, e'pa wä ijchenewa. Tajë ie'pa suane. Es Skëképa Jesús ttë kj bunekã tajë.

<sup>18</sup> Tajë pë' erblë Jesús mik esepa debitu i qos wamblë'rakitö suluë e' chökka sulitane kukua. <sup>19</sup> E'pa shuã tajë ie'pa awãpa tso'ñak. E'pa qos wä iyëkuö tso'rak iwã wakanewë, ese debitu tã ñina'wëwa sulitane wöshãë. Ie'pa tò iyëttsã qos yëkuö e' ské dö'r tã idettsã inuköl tajë. E' dö'r ie'pa inuköl döka 50.000 ekkë. <sup>20</sup> Es Skëképa Jesús ttë kj bunekã tajë. Sulitane tò isuë tò ttë e' diché tã' tajë.

<sup>21</sup> E' ukuöki tã Pablo ibikeitsé: "Ye' mi'ke kã kië Macedonia ena Acaya e' wakpa pakök. E' ukuöki tã ye' michoë dö Jerusalén. Eë tã ye' kawötã shkök dö Roma ñies."

<sup>22</sup> E' ukuöki tã ie' kimukwakpa böi, Timoteo ena Erasto, e'pa patkëmiitö dö Macedonia, e' dalewa ie' atëia Asia ekuölö.

*Éfeso wakpa shutineka tajë*

<sup>23</sup> E' këwö ska' Éfeso wakpa shutineka tajë Jesús dör Se' ñalã e' ttë kueki. <sup>24</sup> Wëm tso' eköl kië Demetrio e' dö'r iyi diököl yuök inukölchka wa e' stë. E' tò Éfeso wakpa Këköl kië Artemisa wak dö'r alakölie, e' wé diököl yuke inukölchka wa. Kanë e' wa ie' ena ikanë mësopa inuköl klö'uke tajë. <sup>25</sup> Ikanë mësopa dapa'wëkaitö imalepa kanëblöke kanë ese ë a e'pa tã, tã ichëitö: "A këképa, a' wä ijcher tö kanë i' wa se' inuköl klö'uke. <sup>26</sup> Erë a' isuë, a' ittse tò Pablo e' tso' ichök tö iyi diököl yuekesö dalöie skëkölle, e' kë dö'r skëköl mokj. Tajë pë' tò ttë e' klö'wëtkë jë Éfeso ñies Asia qos e' a. <sup>27</sup> E' dö'r suluë. E' tò se' kanë sulu'wëmiwã. Nies Artemisa, se' këköl tajë, e' wé dalöšewëwãmiitö. Se' këköl tajë dalöiertã' tajë Asia ena kã wa'ñe, e' dalöšewëwaraitö."

<sup>28</sup> Mik ttë e' ttsérakitö, etã ilunekarak tajë. Etã anekarak: "Artemisa dö'r Éfeso wakpa këköl, e' dö'r këköl tajë."

<sup>29</sup> Etã Éfeso wakpa qos alánëka tajë. Wépa datse böi Macedonia. Eköl kië Gayo iëköl kië Aristarco, e'pa dö'r Pablo wãpiewa, e'pa tso'ñak eë. Éfeso wakpa tò ie'pa böi klö'wëwã kuëmi dö wé ie'pa ñi dapa'uke e' wé a. <sup>30</sup> Etã Pablo shkakwã eë ttök ie'pa tã, erë Jesús ttökatapa malepa kë wä ianemi. <sup>31</sup> Nies Asia wökirpa welepa éna Pablo dalër tajë, e'pa tò ttë patké Pablo a: "Kë be' minukwã eë." <sup>32</sup> E' dalewa Éfeso wakpa daparke e'pa shutineka tajë. Ie'pa arkekarak tajë. Ikibiiepa kë éna iwã ane iök ie' dapa'wërak. E' kueki eköltëpa arke kua'ki, iëköltëpa arke

kuə'kʲi. <sup>33</sup> Etə judiowak tō wēm kiē Alejan- dro e' tsēmi patkēule duēsər sulitane wōrkʲi, e' kuękʲi pē' wēlepa tō ibikeitsē tō ie' wōkʲi iwērke. Etə ie' tō ikkachē ulā wa tō "A' siwə'blō. Ye' ttōke judiowak tsatkoie." <sup>34</sup> Erē mik ie'pa wa ijchenewə tō ie' dōr judiowak, etə ie'pa skā ę' kékəne ąnuk: "Artemisa dōr Ęfeso kékōl. E' dōr kékōl tajē." Es ie'pa arkerak dō hora bōt.

<sup>35</sup> E' ukuōkʲi tə ká wōkirpa yēkkuō shtōkwak, e' tō pē' kē siwə'blōkwa. Ie' tō ichē ie'pa a: "A Ęfeso wakpa, ká ulitane wakpa wə ijcher tō se' dōr Ęfeso wakpa e'pa dōr se' kékōl tajē Artemisa e' wē kko' nukwakpa, ņies ie' diōkōl anebitū ká jai ą, e' kko' nukwakpa. <sup>36</sup> Kē yi ą iyērapa tō kē idōr es. E' kuękʲi a' siwə'blōlur. Kē i wamblar kē bikeitsule buaē. <sup>37</sup> Wēpa i' debitū a' wə, e'pa kē wə i blēulewə se' kékōl wē ą. Ie'pa kē wə se' kékōl yēule suluē. <sup>38</sup> E' kuękʲi Demetrio ena ikanē mēsopa, ie'pa ęna yile kkatatak, e' tə ąs imi' rak ikkatōk tte shūlōkwakpa ą ena s'wōkirpa ą. E'pa tso' kanēblōk tte shūlō wē ą. Eę ię' tsatkōmirak ņi wōshəę. <sup>39</sup> Erē i skā kianēiə' a' kʲi yēnoie, e' tə e' choie a' kawōtə mik se' daparke wēs ikanewękesō es etə. <sup>40</sup> I' tka ięrō i' ņie, e' kʲi s'wōkirpa tō se' kkatēmi. Kē iwā tə' mokjē, e' kuękʲi ie'pa tō se' kkatē iki, e' tə kē se' a' e' tsatkēnuk iyōkʲi." <sup>41</sup> Ie' ttē one tə ichēitō ie'pa ą, "A' yúshka."

**20**

*Pablo mĩa Macedonia ena Grecia*

<sup>1</sup> Ęfeso wakpa shūtineka, e' olone tə Pablo tō Jesús ttōkatapa kiēttsə pattē. E' ukuōkʲi tə ie' e' chéat ie'pa a tə imiə Macedonia. <sup>2</sup> Ie' tkami ká e' wa' ņie iyamipa pattōk, e' tō ie'pa er kuwē tajē. E' ukuōkʲi tə ie' mĩa Grecia. <sup>3</sup> Eę ie' sené si' mañat. Ie' tso'tke kanō klō'uk shkomi dō Siria, e' shūə tə ie' wə ijchenewə tō judiowak ileritsēke ie' ttowə. E' kuękʲi ie' miāne klō wa tkamine Macedonia. <sup>4</sup> Ie' wapiepa dōr kul. Ekōl kiē Sópattro, e' dōr Berea wak, iyē kiē Pirro. Iēkōl kiē Aristarco. Iēkōl kiē Segundo, e' dōr Tesalónica wak. Iēkōl kiē Gayo, e' dōr Derbe wak. Iēkōl kiē Timoteo. ņies wēpa bōl dōr Asia wakpa, e'pa kiē Tiąquico ena Trófimo. <sup>5</sup> Wēpa ekkēpa mĩa kęwe sa' yōkʲi sa' kʲinuk ká kiē Tróade eę. <sup>6</sup> Pan Kē Yōule Iwōlōwoka Wa e' kēwō tka, etə sa' e' yélur Filipos mĩa kanō kʲi dō Tróade. Ká skęl ukuōkʲi tə sa' demī Tróade, etə ie'pa kuē sa' tō eę. Eę sa' e' tsęat ká kul.

*Pablo tō ttē bata pakē Skēkēpa Jesús icha erule tso' Tróade, e'pa ą*

<sup>7</sup> Eno diwō tuinetke tə sa' e' dapa'wēka ņitə Jesús kōtęwə e' kēwō tkō'uk. Pablo tso' iyamipa tə kapakōk. Ie' kawōtə e' yōktsə bule es, e' kuękʲi ie' kapakē dō ká shabōts. <sup>8</sup> Sa' dapanekə u kəkķē e' ą. Tajē bō'wō tso'

wōtskiulekə eę. <sup>9</sup> Duladula tkēr ekōl ukkō tsis- sir kʲi, e' kiē Eutico. Pablo tso' kapakōk tajē e' dalewa Eutico shtrinewatke kapakwatke. Bata ekkē tə ikapowə tə ibrutanemi dōttsə iskʲi. Etə ikékə ie'pa tō erē iduowəie. <sup>10</sup> Etə Pablo dur kəkķē, e' e' ęwa tə ie' e' méka duladula bata kʲi, ipaklō'wéwəitō tə ichēitō: —Kē a' tkinukiə. Itso' ttsē'ka.

<sup>11</sup> E' ukuōkʲi tə Pablo tkakane kəkķē tə Jesús kōtęwə e' kēwō tkō'wéitō ie'pa ta. Etə ie' kapakēiə dō ká ņine ekkē tə imiə. <sup>12</sup> Etə duladula tsémirakitō ttsē'ka iu ą. E' tō ie'pa ulitane kʲi ttsē'wéka buaē.

*Pablo e' yéttsə Tróade mĩa Mileto*

<sup>13</sup> Sa' miyal kęwe Pablo yōkʲi kanō kʲi dō ká kiē Aso eę. Pablo wák shkak klō wa dō eę, e' kuękʲi sa' kawō me'attke ie' tə ņi kʲinuk eę. <sup>14</sup> Mik sa' tō ie' kuē, etə ie' e' iéka sa' tə kanō kʲi tə sa' miyal ká kiē Mitilene eę. <sup>15</sup> Tə sa' michoē. Bule es tə sa' tkami ká kiē Quío, e' wōshəę. E' bule es tə sa' demī wé kanō irirke kiē Samos eę. E' bule es tə sa' mĩa Mileto. <sup>16</sup> Pablo shkakmi bet dō Jerusalén Pentecostés kēwō tkō'uk, e' kuękʲi sa' mineyal es. Pablo kē e' wōklō'wak tajē Asia, e' kuękʲi ie' kē dē' Ęfeso.

*Pablo kapakē Skēkēpa Jesús icha erule tso' Ęfeso e' wōkirpa tə*

<sup>17</sup> Pablo tso' Mileto e' tō Skēkēpa Jesús icha erule tso' Ęfeso e' wōkirpa tsuk patkē ņi dapa'uk ie' tə. <sup>18</sup> Mik idebiturak, etə Pablo tō ichē ięrak:

—Wēs ye' sené a' shūə ye' tsą dē'bitū Asia e'tami, e' jcher buaē a' wə. <sup>19</sup> Erē judiowak ileritseke ye' tsąiōk e' ye' rrewęke tajē, erē kękraē ye' e' wōawa diōshęt tə Skēkēpa Jesús kanē uk ye' bak a' shūə ję wa i wa. <sup>20</sup> ņies a' wə ijcher tō ttē buaē a' kimoie, ese kē blēnewə ye' wə yēs a' yōkʲi. Ese wa ye' bak a' wōbla'uk sulitane wōrkʲi, ņies u ą u ą. <sup>21</sup> Ye' bak ichōk wō yēsýēs wə judiowak ą ena pē' kē dōr judiowak esepa ą: 'A' kē er mane'uk Skēkōl ą. A' kē erblōk Skēkēpa Jesús mik mokjē.' <sup>22</sup> I' ņie ye' mitke Jerusalén. Ye' ittse tō es Wikōl Batsē'r kʲi kiane. Kē ye' wə ijcher wēs ye' wēmirakitō eę. <sup>23</sup> Ká wa' ņie wé ye' dē'ule eę Wikōl Batsē'r tō ye' a' icheke: 'be' wōtērdaē, be' weirdaē siarē,' e' ę jcher ye' wə. <sup>24</sup> Ye' a' tə ye' ttēwə ō ye' tso' ttsē'ka, kē e' kʲi ye' tkine. Kanē me' ye' a' Skēkēpa Jesús tō, e' ę ęwəkwa ye' ęna er bua' wa. Kanē e' dōr Skēkōl er buaē chōke sią, e' ttē buaē pakōk.

<sup>25</sup> I' blúie Skēkōl tso' e' ttē pakéyō a' a. I' ņie ye' wə ijcher buaē tō a' ulitane kē tō ye' suepaiane. <sup>26</sup> E' kuękʲi i' ņie tə yō ichē a' ą mokjē tō a' wēpa kē tsatkēne, e' tə kē ye' iane iwiie. <sup>27</sup> I' kiane kanewē Skēkōl kʲi, e' ttē pakéyō a' a se. Kē ye' wə ttē wēne blēnewə yēs a' yōkʲi. <sup>28</sup> E' kuękʲi a' e' kko'nú. ņies Wikōl Batsē'r tō a' tkē'ka Skēkōl ichapa erule e'pa

wökirpaie ikkö'nukrak, e' kuëkj ie'pa kkö'nú buaë a' tò. Ie'pa to'ttsa Skëköl tò iwák pé wa. <sup>29</sup>Ye' wá ijcher tò mik ye' mía e' ukuökj ta pé' döraë s'yamipa eukwa wes chichi sulusi tò iyiwak ewëwa es. <sup>30</sup>Nies a' shua welepa e' kórak s'wöbla'uk kache tté wa as s'yamipa erblé Jesús mik e'pa mi' ie'pa é itökj. <sup>31</sup>A' tso' erkj. A' éna íanú tò duas mañal, ñiwe nañewe, kekraë ye' bak a' ulitane pattök eköl eköl jè wa i wa.

<sup>32</sup>Es ye' tò a' méat Skëköl ulá a. Nies a' méatyö Skëköl er buaë chöke se' a e' tté a. Ie' wa diché ta' a' er diché kj ioie. Nies ie' wa diché ta' i kos buaë moie a' a' wes ikablé' imuk ie' icha batse'r esepa a es. <sup>33</sup>Kë ye' wá yi inuköl ena yi datsi' kkeyëule yës. <sup>34</sup>Erë a' wá ijcher buaë tò ye' kë bak senuk yi ulá mik. E' skéie ye' kaneblé' ye' wák ulá i' wa e' kkö'moie. Nies e' wa ye' tò ye' wapiepa kímé. <sup>35</sup>Es ye' bak a' wöbla'uk kekraë tò s'kawöta kaneblök darërëë wépa kë a kaneblër, esepa kimoie. Kë se' éna ichökwa tò Skëképa Jesús wák tò iyé': "Se' tò ikakmé e' dör ibua'ie se' a, kë dör ikaktsë."

<sup>36</sup>Mik Pablo tté one, eta' ie' e' tkéwa kuché kj ta itté Skëköl ta' ie'pa ulitane ta. <sup>37</sup>Ie'pa ulitane tso' e' chökät Pablo a iuke tajé ta ie'pa tò ipaklö'wémi iwöalattsémi. <sup>38</sup>Pablo tò ichétke ie'pa a: "A' kë tò ye' suepaiane." E' tò ie'pa eriawé tajé. E' ukuökj ta' ie'pa mía ññalemuk dö wé kanö irirke ee.

## 21

### *Pablo mía Jerusalén*

<sup>1</sup>Mik sa' tò sa' yamipa méat, eta' sa' e' iéka kanö a. Sa' míyal yësyësë ká kiè Cos ee. E' bule es ta sa' míyal ká kiè Rodas ee ta sa' míyal ká kiè Pátara ee. <sup>2</sup>Eta' sa' tò kanö kué Pátara mi'ke ká kiè Fenicia, e' a sa' e' iéka ta sa' míyal. <sup>3</sup>Sa' tkami ta sa' tò ká kiè Chipre e' sué, e' atë ulá baklj'kka. Eta' sa' mir dö Siria. Dalí mir kanö a e' mekeat Tiro, e' kuëkj sa' demi ee. <sup>4</sup>Eta' Jesús mik erblökwa'pa serke ee, e'pa yulé sa' tò ta ikué sa' tò. Sa' sené ká kul ie'pa ska'. Ie'pa tò iché Pablo a Skëköl Wiköl wa: "Be' mú kë mi' Jerusalén." <sup>5</sup>Erë ká kul tka sa' kj eta' sa' e' yéttšane. Ie'pa kos, ilakölp a ena ila'r, e' yéttša ie'pa ká a míyal sa' ññalemuk dömi dayé kkomik. Ee sa' e' tuléwa kuché kj ttök Skëköl ta. <sup>6</sup>E' ukuökj ta' sa' e' chéat ie'pa a ta sa' e' iéka kanö a. Eta' ie'pa míyalne iu a.

<sup>7</sup>Sa' e' yéttša Tiro demi ká kiè Tolemaida ee. Sa' tò s'yamipa serke ee e'pa shké'wé. Sa' e' tséat ie'pa ska' ká et. <sup>8</sup>E' bule es ta sa' e' yéttšane demi klö wa Cesarea. Ee sa' mí Felipe dö'r Jesús tté buaë pakökwa' e' u a. Ie' dör wépa kul shukitulebak Jesús ttekölpa tsá e'pa kímuk, e' eköl. Ie' ska' sa' e' tséat. <sup>9</sup>Ie' ala'r busipa döka tkél kam iserdak wépa ta. Ie'pa kos dö'r Skëköl ttekölpa. <sup>10</sup>Sa' sené ie'

ska' elkeë eta' wëm debitu' eköl datšé Judea, e' kiè Agabo. Ie' dö'r Skëköl tteköl. <sup>11</sup>E' dewa sa' o'mik ta' Pablo kipamo klö'wéwáitö. Ta' e' wa ie' e' muéwa' iklö a ena iulá a ta' ichéitö:

—Wiköl Batse'r tò iché: "T' es judiowak tò kipamo i' wák, e' muera'wa Jerusalén. Ta' imerattša ie'pa tò pé' kë dö'r judiowak, esepa ulá a."

<sup>12</sup>Mik sa' tò tté e' ttsé, eta' sa' ena Cesarea wakpa tso'ñak sa' ta, e'pa ulitane kkóché tajé Pablo a: "Kë be' minuk Jerusalén." <sup>13</sup>Erë Pablo tò iüté:

—¿I kuëkj a' iuke? E' tso' ye' eriauk tajé. Ye' e' méttšatke monukwa, ñies tté'wa Skëképa Jesús tté kuëkj Jerusalén.

<sup>14</sup>Ie' kë wá sa' ttö iütene, e' kuëkj kë sa' wá i kj yëne ia. Sa' iché:

—As Skëképa tò iü wes ie' kj ikiane es.

<sup>15</sup>E' ukuökj ta' sa' dali ié míyal Jerusalén. <sup>16</sup>Jesús ttökatapa tso' Cesarea, e'pa welepa míyal sa' ta. Ie'pa wá sa' míts'er wëm kiè Mnasón, e' u a kapókrö. Wëm e' datšé ká kiè Chipre ee. Ie' dö'r wépa tsá erblé' Jesús mik esepa eköl.

### *Pablo mía Santiago pakök*

<sup>17</sup>Mik sa' deka' Jerusalén, eta' s'yamipa tso' ee, e'pa tò sa' kiéwa buaë, ittš'nerak buaë.

<sup>18</sup>E' bule es ta' Pablo mía sa' ta' Santiago pakök. Nies Skëképa Jesús icha e'pa wökir kibipa tso'ñak Santiago ska' seraa. <sup>19</sup>Ie' tò ie'pa shké'wé ta' i kos wéitö Skëköl batamik, pé' kë dö'r judiowak, esepa shua, e' pakéitö ie'pa a yësyësë. <sup>20</sup>Mik e' ttsé ie'pa tò, eta' Skëköl kjkékarakitö tajé. Ie'pa tò iché ia:

—A yami Pablo, be' isué buaë tò jé judiowak döka' miles e'pa erblétke Jesús mik. Ie'pa ulitane e' mettsá da'á Moisés tté dalöieno e' tsatök. <sup>21</sup>Ie'pa a iyéne tò be' tò judiowak tso' ká kuá'kj kuá'kj kj, esepa wöbla'weke tò tté e' olo'yó. Nies ichekerakitö tò be' tò icheke tò ila'r kurke wépa, esepa tottola kkuölit kë tar. Nies ichekerakitö tò be' tò s'wöbla'weke tò se' judiowak ser e' kë dalöiaria. <sup>22</sup>Ie'pa ulitane wá ijcherdawa' tò be' dö'bitü. E' kuëkj ¿i wëmi be' tò ie'pa siwa'blöwowa? <sup>23</sup>¿cheke sa' tò be' a e' ú. Ié sa' shua wépa tso' tkél kawó me'bak Skëköl a, e' orketke. <sup>24</sup>E'pa tsúmi e' ta, ta' be' e' batse'ú ie'pa ta. Kos e' patuë e' pataúbö as ie'pa tsá töttsa manene iwá kkachöie tò kawó me' ie'pa tò Skëköl a e' one. Be' tò iwé es, e' ta' judiowak ulitane isuera' tò i kos kj pé' tso' be' chök sulué e' dö'r kache. Ie'pa tò isugmi tò Moisés tté dalöieno e' dalöieta' be' tò ñies. <sup>25</sup>Erë s'yamipa kë dö'r judiowak, esepa a i bikeitsé sa' tò e' kitmibak sa' tò yëkuü kj. E' kj sa' tò ie'pa a iyé' tò ie'pa kë káne chké meule iyi diököl tso' dalöie ese a ese katök. Iyiwak pé kë katar. Iyiwak tté'wa kuli' siuleká ese chká kë katar. Nies ie'pa kë káne trënuk.



*Pablo klō'wéwarakitō Skékōl wé pamik*

<sup>26</sup> Es Pablo e' yéttsa wépa tkêl, e'pa ta. E' bule es ta ie' e' batse'wé ie'pa ta. E' ukuökî ta ie'pa tkawâ Skékōl wé a. Eë Pablo tō ibiyō ché tō mik ta ie'pa batse'ne e' diwō ene ta ie'pa íyî meke Skékōl a iwakpa bil ekkē.

<sup>27</sup> Kawō kul shūa ie'pa tso' batse'ne e' erkewatke etâ judiowak wélepa datse Asia, e'pa tō Pablo sué Skékōl wé a. Ie'pa tō imalepa shūtîwéka ta imishkarak Pablo kî iklō'wéwarakitō. <sup>28</sup> Ie'pa anekarak: "A yamipa, sa' kimú. Wēm i' shkōke kâ wa'ñe s'wōbla'yuk tō se' judiowak ser; e' kē dōr buaē. Ie' icherami tō Moisés ttē dalōiēno ena Skékōl wé i' kē dōr buaē. I'ñe ta pē' kē dōr judiowak esepa wélepa debitū ie' wâ íe Skékōl wé a. E' tō kâ i' dōr batse'r e' ia'wéka."

<sup>29</sup> Wēm kiē Trófimo e' su' ie'pa tō Jerusalén ie' dōr Éfeso wak. Ie'pa tō ibikeitsé tō Pablo wa' imi Skékōl wé a, e' kuekî ie'pa tō iché es.

<sup>30</sup> Kâ e' wakpa kos shūtînekâ debitū tuneule. Tâ Pablo klō'wéwarakitō kuémî ur'kî. E' bet Skékōl wé wékkō ulitane wōtēwarakitō. <sup>31</sup> Ie'pa tō ittekewatke etâ ttē de Roma ñippōkwakpa eruleē e' comandante a tō Jerusalén wakpa ulitane shūtînekâ tajē. <sup>32</sup> Etâ ie' tō ñippōkwakpa dapa'wé ikayuapa ta, etâ itunemirak wé pē' daparke eë. Mik pē' tō ñippōkwakpa ena icomandante sué, etâ ie'pa tō Pablo méat, kē ippēia. <sup>33</sup> Etâ comandante debitū, e' tō Pablo klō'wéwâ ta imaukwâ ké tabechka kichaie bōtō wa. E' ukuökî ta ie'pa a ichakéitō: "¿I' dōr yi? ¿I' wambléitō?" <sup>34</sup> Erē wélepa tō iché ku'kî aueule, ieltēpa iché ku'kî aueule. Tajē ie'pa arkerak ku'kî ku'kî, e' wa kē ishulir, e' kuekî ie' tō itsukmî kē ñippōkwakpa wé a. <sup>35</sup> Pē' éna ie' klō'wakwâ kēsik wa, e' kuekî mik idemirak ñippōkwakpa wé klékata kî, etâ ñippōkwakpa tō Pablo batsékami. <sup>36</sup> Pē' kos arke Pablo itōkî: "¡ittōwâ!"

*Pablo e' tsatké judiowak wōrkî*

<sup>37</sup> Mik Pablo dōkewatke ñippōkwakpa wé a etâ ie' tō comandante a iché:

–Kawō mú ña ttōk be' ta.

Etâ comandante tō iütē:

–Ye' kē wâ ijcher tō be' ttō griegoie.

<sup>38</sup> E'ma be' kē dōr Egipto wak dē'bitū ekōl e' ka'kâ ñippōk sa' ta e'. Ie' miâ kâ wé kē yi ku' eë s'ttōkwâ wakpa ta dōkâ mil tkéyōk (4000).

<sup>39</sup> Etâ ie' tō iché ia:

–Au, ye' dōr judiowak kune Tarso, kâ e' dōr kâ kibi ate Cilicia. Kawō mú ye' a ttoie ie'pa ta.

<sup>40</sup> Etâ comandante tō kawō mé ia. Etâ ie' dur shkē'ka ñippōkwakpa wé klékata kî ta iulâ kkaché pē' tso' tajē, e'pa a tō a' siwâ'blōlur. Mik isiwâ'bléwarak, etâ ie' ttē ie'pa ta he-breioie. Tâ ichéitō iarak:

**22**

<sup>1</sup> "A yamipa, a kékēpa, ye' e' tsatkōke, e' tttō."

<sup>2</sup> Mik ie'pa tō ittsé tō Pablo ttōke ie'pa ta iwákpa ttō wa, etâ ie'pa kî siwâ'blélur. Ie' tō iché:

<sup>3</sup> "Ye' dōr ñies judiowak wēs a es. Ye' kune' Tarso ate Cilicia eë. Erē ye' talane íe Jerusalén. Gamaliel tō ye' yō' yēsēsē wēs se' ttē dalōiēno kiteat íaiāē e' tō iché es. Kēkraē ye' tso'ie Skékōl dalōiōk ye' er kos wa kos a' ulitane tō idalōieke i'ñe ekkē. <sup>4</sup> Mik se' wépa tō Jesús dōr Se' ñala e' ttē klō'wé, etâ esepa tōtiyuk ye' bak ttēwâ, klō'wéwâ, wōtēwâ s'wōto wé a. Kē ye' tkine tō wēm idir ō alalak idir. <sup>5</sup> Ñies sacerdote kibi ena s'kuēblupa ulitane, e'pa tō a' a' ichēmî tō e' dōr mokîē. Ie'pa tō ye' a' yēkkuō me' tsēmî s'yamipa tso' Damasco e'pa a. Yēkkuō e' tō kawō me' ye' a' Jesús mik erblōkwakpa esepa tsōbitū dō Jerusalén we'ikē.

<sup>6</sup> "Erē ye' miria ñala kî. Diwō de bata a ta ye' dōkemitik Damasco tsinet, e' bet ta i biteshka kâ jai a bō'wōie e' ōlo bune tajē ye' pamik. <sup>7</sup> Eë ye' anere ískî. Etâ ittō ttsyō tō iché ña: 'A Saulo, a Saulo ¿iōk be' tō ye' we'ikeke?' <sup>8</sup> Etâ ichakéyo: 'A Skékēpa, ¿be' dōr yi?' Etâ ie' tō iütē: 'Ye' dōr Jesús Nazaret wak, e' we'ikeke be' tō.' <sup>9</sup> Itso'rak ye' ta, e'pa tō bō'wō sué, erē i yēne ye' a, e' wâ kē ane ie'pa éna. <sup>10</sup> Etâ ye' tō ie' a' ichakē: 'A Skékēpa Jesús, ¿i wēmiyō?' Ta ie' tō iché ye' a: 'Be' e' kōkâ. Be' yú Damasco. Eë i kos wēmî be' tō, e' yērdaē be' a.' <sup>11</sup> Bō'wō ōlo tō ye' wōbla batuwéwâ, e' kuekî ye' wapiepa tō ye' ulâ íemirak dō Damasco.

<sup>12</sup> "Eë wēm tso' ekōl kiē Ananías, e' tō Skékōl dalōieke tajē. Moisés ttē dalōiēno kitule e' dalōiekeitō yēsēsē. Judiowak kos serke Damasco e'pa tō ichēke tō ie' dōr wēm buaē. <sup>13</sup> Ie' debitū ye' ska' ta ye' a' iché: 'A yami Saulo, be' wōbla buanú.' E' wōshāē ta ye' wōbla buanene iwawēnene Ananías suéyo iwa. <sup>14</sup> E' ukuökî ta ie' tō ye' a' iché: 'Skékōl dalōiōk se' yēpa bak kâ íaiāē, e' tō be' shukitātbak as i kiane wē ie' kî e' jcher be' wa. Ñies be' shukititō as yi dōr Yēsēsē e' saübō ena ie' wák ttō tttōbō. <sup>15</sup> Be' dōraē ie' ttekolie. I kos su' be' tō, i kos tse' be' tō, e' cheraēbō sulitane a. <sup>16</sup> I' ta kē bō ipanukia. Be' e' kōkâ. Be' e' wōskuō. Skékōl a' ikio as i' sulu kos wamblébō e' nu' ōlo' yōitō be' kî.'

<sup>17</sup> "Mik ye' dene Jerusalén etâ, ye' miâ ttōk Skékōl ta iwé a, eë ye' tō i' sué kabsueie.

<sup>18</sup> Skékēpa Jesús suéyo ta ichéitō ña: 'Be' tō ye' ttē pakēmî judiowak a, e' kē klō'wépa ie'pa tō. E' kuekî be' e' yōttsa bet Jerusalén.'

<sup>19</sup> Etâ ye' iché ia: 'A Skékēpa, ie'pa wákpa wâ ijcher tō ye' bak ie'pa ñi dapa'wō wé kos a, be' mik erblōkwakpa, esepa yulōk ppē, wōtēwâ s'wōto wé a. <sup>20</sup> Mik Esteban dōr be'

kanè méso bak be' tté pakök, e' kötwá ie' pa tö, etá ye' tso' eé. E' wène buaè ye' wa. E' dalewa ye' tso' ie' pa datsi' kkò'nuk.' 21 Erè ie' tö ye' a iché: 'Be' shkómitke ñalá kî. Ye' be' patkeke kamiè pè' kè dör judiowak esepa a.' "

*Pablo atë comandante ulà a*

22 Pablo ttöke e' ttsök ie' pa tso' buaè, erè mik pè' kè dör judiowak e' aritséitò, etá ie' pa ñi kéká anuk darèrèé: "iWèm ese kè kawõtá senukiá! i'ttòwasò!" 23 Ie' pa arkekarak tajè, ta idatsi' wòti'wèkerakitò kashuk a, ñies ká po uyekerakitò kashuk a kèsik wa. 24 E' kuekî comandante tò Pablo tsukmi kè weshké ñippökwa pa wé a ta ippök kè as itò ichöká i kuekî pè' wòñarke ie' kî tajè. 25 Erè mik ie' pa tò Pablo muéwatke ppè tsa'bata daloie wa, etá ie' tö capitán dur eé, e' a ichaké:

—¿A' a kawò mène wépa dör romawak esepa ppök kam ishulir e' yökî?

26 Mik e' tssé capitán dur eé e' tö, etá imía icomandante a ibiyö chök ta iché ia:

—¿Wes be' iwèmi? Wèm e' dör romawak.

27 Etá comandante debitu Pablo ska' ta ie' tö ie' a ichaké:

—¿Mokî be' dör romawak?

Pablo iüté:

—Tò, es idir.

28 Etá comandante tò iché:

—Ñies ye' dör romawak, e' pato'yö inuköl tajè wa.

Ta Pablo iüté:

—Erè ye' dör romawak ye' kune' es e' kuekî.

29 Mik ittserakitò, etá ippökwa pa tò Pablo méat bèrè. Mik comandante wa ijchënewá tò Pablo dör romawak, etá ie' suane tò iök ie' tò imaükwa patké'.

*Pablo e' tsatké judiowak wökirpa wörki*

30 Comandante kî ikiane ijchënowá mokjë tò i kî Pablo kkateke judiowak tò. E' kuekî bule es ta ie' tö sacerdotepa wökirpa ena judiowak wökir malepa kè e' dapa'ukka. E' ukuökî ta ie' tö Pablo wötsöök patké ta iyéttsaitò tsémi duésér ie' pa wörki.

**23**

1 Etá Pablo tò ie' pa suéwa krereé iwö kî ta iché iarak:

—A yamipa, ikké ye' senére, etá ye' er kè wa ye' kkatène i kî Skéköl wöa.

2 Etá sacerdote kibi kiè Ananías, e' tö, its'o rak Pablo o'mik, e' pa kè Pablo ppök ikkö kî. 3 Erè Pablo tò iüté:

—iBe' dör e' ökwak, e' pperaé Skéköl töl Së be' tkër ye' shulök Moisés ttè dalöiëno e' wa. Erè ¿iök ye' ppök kébö? E' wa ttè ñe' dalösëwëwa be' tö.

4 Itso' rak eé, e' pa tò iché Pablo a:

—iBe' tso' Skéköl sacerdote kibi e' chök sulué!

5 Pablo tò iché:

—A yamipa, ye' kè wa ijcher tò ie' dör sacerdote kibi. Skéköl yëkküö tò iché: 'Yi tso' s'wökirie, ese kè char sulué.'

6 Mik Pablo wa ijchënewá tò iwökirpa shabòtspa dör saduceowakpa, shabòtspa dör fariseowakpa, etá ie' tò ie' pa a iché a neule:

—A yamipa, ye' dör fariseowak. Ñies ye' yépa qos dör fariseowakpa. S'duowa shkerkane, e' wa panekeyö kröröé, e' kî a' tso' ye' kkatök.

7 Mik Pablo tò ttè e' ché, etá fariseowakpa ena saduceowakpa e' pa wöñanemi ñi kî. Etá ie' pa ñi blabatsélor. 8 Saduceowakpa tò icheke tò s'duowa kè shkertá'kane. Ñies ichekerakitò tò Skéköl biyöchökwa pa kè ta', wimblupa sulusi kè ta'. Erè fariseowakpa tò iyi ekké qos klö'wé tò its'o'. E' kuekî ie' pa ñi blabatsélor. 9 Ie' pa ulitane arkerak tajè. Fariseowakpa dör s'wöbla'uk ttè dalöiëno wa wakpa welepa e' kéká ta iché'akitò:

—Wèm i' kè wa i sulu wamblène. Isalema wimblu ö Skéköl biyöchökwa wele utule ie' ta'.

10 Erè ie' pa kî shutirkeka tajè kèsik wa, e' kuekî comandante suane dö' Pablo ttëwarakitò. E' kuekî iñippökwa pa tsuk patkéitò Pablo yottsá eé tsémi ñippökwa pa wé a.

11 E' nañewe ta Skékëpa Jesús debitu e' tö Pablo a iché: "Be' er kuü. Wes be' tö ye' tté paké ié Jerusalén es ñies be' kawõtá ipakök Roma."

*Judiowak kawö mé ñi a Pablo ttökwa*

12 E' bule es ta judiowak welepa tò kawö mé ñi a Pablo ttökwa. Ie' pa tò ittè mé Skéköl a ttè i' wa: "Kè sa' chköpa, kè sa' di' yöpa dö mik Pablo ttëwa sa' tö etá." 13 Wëpa tò ittè mé es, e' pa doka dabom tkëyök (40). 14 Etá ie' pa miyal sacerdotepa wökirpa ena judiowak kueblupa, e' pa ska' ta iché iarak:

—Sa' tò ttè me' Skéköl a tò kè sa' chköpa, Pablo kam ttöwa sa' tö e' yöki. E' kè wa one sa' wa, e' ta as Skéköl tò sa' we'ikö. 15 E' kuekî a' ena s'wökirpa malepa, a' ichö comandante a tò Pablo tsúbitu bule. A' e' ö tò a' kî ie' kiane chaké bua'iewá ishuloie. E' dalewa sa' tso'tke ikinuk ñalá kî ttëwa kam idö a' ska' e' yöki.

16 Erè Pablo nauyö wa ijchënewá ta imía ñippökwa pa wé a ta ibiyö méitò Pablo a. 17 Etá Pablo tò capitán kié eköl ta iché ia:

—Duladula i' tsúmi comandante ska'. Ie' wa ilè tso' yönoie ie' a.

18 Etá capitán e' tò itsémi comandante ska' ta iché ia:

—Pablo tso' wötëule, e' tö ye' kié ta ikköché ye' a tò duladula i' tsúmi be' ska'. Ie' wa ilè tso' yönoie be' a.

19 Etá comandante tò iklö'wëwa iulá a ta itsémi bánet. Eé ie' a ichakéitò:

—¿Ì cheke be' tò ye' a?

<sup>20</sup> Ie' tò iché ia:

—Judìowak kawō métké ñi a be' a ichök tò bulepa Pablo tsūmi wé judìowak wōkirpa e' dapa'uke eé. Ie'pa e' öke tò Pablo tté kiane shulé bua'ie ie'pa kî. <sup>21</sup> Eré ie'pa tté ké klō'war. Judìowak wépa dōka dabom tkéyök (40) kîta, e'pa tso' bléule Pablo panuk. Ie'pa kablé' Skéköl a tté i' wa: “Ké sa' chkōpa, ké sa' di' yōpa dō mik sa' tò Pablo ttéwa eta.” Ie'pa tso'tke, ima be' icheke, e' é panuk.

<sup>22</sup> Eta comandante tò ipatkémine ta iché ia: “Ké yi a ichar tò e' ché be' tò ye' a.”

*Pablo patkémi Judea wōkir kié Félix e' ska'*

<sup>23</sup> Eta comandante tò ikimukwakpa kié bōl ta ichéitō ie'pa a: “Ñippōkwakpa mi'ke klō wa esepa klō'ú dōka cien böyök (200). Nies ñippōkwakpa mi'ke kabaio kî esepa shtō dōka dabom kuryök (70). Nies ñippōkwakpa wa két mi'ke esepa klō'ú dōka cien böyök (200). Kaṭuine de sulitu (9:00 pm) eta e'pa kos dapa'ú as imi'rak Cesarea.” <sup>24</sup> Nies ichéitō: “Kabaio yulō Pablo tsōmi. Itsūmi kkō'nú buaé dōmi s'wōkir Félix ska'.” <sup>25</sup> Ie'pa ta comandante tò yékuō patkémi mè Félix a. Ikitule yékuō kî e' tò iché i' es:

<sup>26</sup> “A Félix, s'wōkir kibi. Ye' dör Claudio Lisias. Yékuō i' shtéyō be' a. Be' shké'wéyō. <sup>27</sup> Judìowak wōkirpa tò wém i' klō'wā iminerak ittōkwā. Eré mik ye' wā ijchenewā tò ie' dör romawak, eta ye' miā ye' ñippōkwakpa ta ta tsatké sa' tò. <sup>28</sup> Ye' kî ikiane jchenukwā tò i kî ie'pa tò ikkateke. E' kuéki itsémiyō judìowak wōkirpa wōrki. <sup>29</sup> Ie'pa tò ikkaté ie'pa tté dalōiēno kitule, ese kî. Eré ké ye' wa i sulu kune ie' kî ittowaie ö iwōtoie s'wōto wé a. <sup>30</sup> Eré ye' wā ijchenewā tò judìowak wélepa kawō mé ñi a ittowaie, e' kuéki ye' tò ipatkébitū be' a. Nies ye' tò ichétké ikkatōkwakpa a tò i kî ie'pa éna ikkatak, e' chó be' wōshāé.”

<sup>31</sup> Eta ñippōkwakpa wā Pablo mítser nañewe wés ie'pa a ikéwō mēne es. Ie'pa demí ká kié Antípatris eé. <sup>32</sup> Bule es ta ñippōkwakpa dami klō wa, e' éltépa biteane ñippōkwakpa wé a. Eta iéltépa dami kabaio kî, e'pa wā Pablo mítser. <sup>33</sup> Mik ie'pa demirak Cesarea eé, eta ie'pa tò yékuō mé iwōkir kibi a. Nies Pablo méitōrak ia. <sup>34</sup> Iwōkir kibi tò yékuō sué one eta ie' tò Pablo a ichaké: “¿Wé be' datse?” Mik ie' wā ijchenewā tò idatse Cilicia, <sup>35</sup> eta iché ia:

—Mik be' kkatōkwakpa debitū eta be' tté tteraeýō.

Eta ie' tò Pablo wōtōkwā patké s'wōto wé tso' u bérie yō' blu' Herodes tò ká e' wōkirpa a e' a. Eé iwōtēwarakitō.

## 24

*Pablo e' tsatké Félix wōrki*

<sup>1</sup> Ká de skel eta sacerdote kibi kié Ananías, e' demi Cesarea judìowak kuéblupa wélepa ta Pablo kkatōk. Nies wém ekōl kié Tértulo, e' de ie'pa wā ie'pa ttekōlie Pablo kkatōk Félix a. <sup>2</sup> Mik Pablo debitū eta Tértulo tò ikkatémi. Ie' tò Félix a iché:

A kéképa s'wōkir kibi, be' tté dikîa ká taié sa' serke bère ñita. Be' erbikō buaé, e' wa be' tò sa' wakpa kímé taié. E' kuéki sa' tò wéstela ché be' a. <sup>3</sup> A Félix, kéképa taié, be' tò sa' kíméke taié, e' kuéki kékraé ká ulitane kî sa' tò wéstela ché taié be' a. <sup>4</sup> Ké ye' éna be' kawō chōwak taié, eré be' we'ikéyō, sa' ttō ttsō bērbēr ē er bua' wa. <sup>5</sup> Sa' wā ijchenewā tò wém i' dör pé' sulué. Ie' shkōke ká wa'ñe judìowak shūtiuk ñi kî as iñi blabatsōlor. Ie' dör Jesús Nazaret wak e' klépa eruleé e' wōkir ekōl. <sup>6-7</sup> Nies ie' éna Skéköl wé ia'wakwā ñaie. E' kuéki sa' tò ikló'wéwā.\* <sup>8</sup> Be' wák a ie' chakirmi, es be' wā ijchermi tò i kî sa' tò ikkateke, e' dör mokjē.

<sup>9</sup> Judìowak tso' ee, e'pa ulitane tò Pablo kcateke ñittsēé. <sup>10</sup> Eta Félix tò ie' a kawō mé ttōie ta ie' tò iché:

—Ye' wā ijcher tò ká iaiaé be' dör ká i' wakpa tté shulōkwak. E' kuéki ye' tssē'ne buaé e' tsatkōk be' wōrki. <sup>11</sup> Be' wák wa ijchermi tò ye' dē'rōka Jerusalén Skéköl dalōiök, e' kî ká detke dabom eyök kî bōt (12). <sup>12</sup> Ie'pa ké wā ye' kune yi ta ñi chök. Ie'pa ké wā ye' sune pé' shūtiukwā Skéköl wé a, nies judìowak ñi dapa'wé wé malepa a, nies Jerusalén kos a. <sup>13</sup> Ì kos kî ie'pa tò ye' kcateke, e' ké yērpa ie'pa a yésyēsé be' a. <sup>14</sup> Eré ye' tò be' a iché tò Jesús dör ñala chōkle, e' tté wa ye' tso' sa' yépa bak ká iaiaé e'pa Kéköl dalōiök. Ie'pa tò iché tò tté e' ké dör buaé. Eré nies i kos kîtaṭbak yékuō kî Moisés ena Skéköl ttekōlpa tò, e' klō'wé ye' tò. <sup>15</sup> Nies ye' erblōke Skéköl mik wés ie'pa es tò se' yésyēsé ena se' sulué duowā e' shkerdakane. <sup>16</sup> E' kuéki kékraé ye' e' chōke senuk buaé Skéköl wō ena sulitane wōa as ké ye' er tò ye' kkatō i kî.

<sup>17</sup> “Ye' mine sené duas taié ké dē'ia íe, e' ukuōkî ta ye' dene íe ye' wakpa shūa inukōl kakmuk s'siārēpa a. Nies ye' dene íyi muk Skéköl a idalōioie. <sup>18</sup> E' kanéuk ye' tso' Skéköl wé a e' dalewa ye' sué ie'pa tò. Ye' e' batse'wétke wés sa' tté kitule tò iché es. Eé pé' ké ku' taié. Ké yi shūtineka. <sup>19</sup> Eré

\* **24:6-7** Yékuō kitule ká iaiaé wélepa tò tté i' kî méka tté i' wa: Sa' kî ikiane shulé wés sa' tté dalōiēno tò iché es. <sup>7</sup> Eré shkékpa wōkir kibi kié Lisias, e' debitū ta iyéttsa sa' ulā a kēsik wa. <sup>8</sup> Ie' tò sa' a iché tò Pablo kkatōkwakpa kawōta ikkatōk be' wōrki.

judiowak welepa datse Asia, e'pa tso' ee. E'pa éna ye' kkaták ilè kí, e' ta warma ie'pa kawötá shkòkrò íe ye' kkatòk. <sup>20</sup> Ie'pa kè shkàkrò, e' ta as íe itso'rák e'pa tò ichò tò ì sulu kué ie'pa tò ye' kí mik ye' dè' e' tsàtkòk judiowak wòkirpa wòrké ta. <sup>21</sup> Erè mìk ye' bak ie'pa wòrkí, etá ttè ì' è yè' ye' tò àneule: 'S'duowá e' shkerkàne e' klò'wéyò, e' kí a' tso' ye' kkatòk j'ñe.' "

<sup>22</sup> Jesús dör ñala chòkle e' ttè jchertke buaè Félix wá. E' kuekí mik ì ché Pablo tò, e' ttséitò tá ie' kè kí ttè ì' kianeia' tssè. Ie' íché ie'pa á:

—Mik comandante kiè Lisias, e' de, e' wa ye' tò a' ttè shulè.

<sup>23</sup> Etá Félix tò capitán ekòl ké Pablo wötòkwane s'wòto wé á, erè íchéitò ia:

—Ikò'nú er bua' wa wes kè s'wòtèule es. Kawò mú ie' á as iyamipa bitú ikané uk.

<sup>24</sup> Bökkí es ta Félix debitu'ne ilakòl kiè Drusila e' tá. E' dör judiowak. Félix tò Pablo tsuk patké. Pablo tò s'kawötá erblòk Jesucristo è mik e' wá paké Félix á. E' tssòk ie' tso'. <sup>25</sup> Erè mik Pablo tò sene yésyèsè ena e' kkò'nè sene sulu yòkí ena s'shulir aishkuò tá e' wá paké, etá e' tò Félix tkiwéwá. Ie' tò íché Pablo á:

—Be' yúne. Mik ye' kawò kune e' wa ye' tò be' kiène.

<sup>26</sup> Ñies Félix tò ipaneke tò Pablo mú tò inukòl watké ia iomine bër, e' kuekí ie' tò Pablo kiekero kèkrae ttòk ie' tá. <sup>27</sup> Es itka dò duas bök. E' ukuòkí tá Félix kè kaneblòia s'wòkirie. Ie' skéie wëm kiè Porcio Festo, e' de s'wòkirie. Félix aták buaè judiowak tá, e' kuekí Pablo méatitò wòtèule s'wòto wé á.

## 25

### *Pablo e' tsatké Festo wòrkí*

<sup>1</sup> Festo demí Cesarea kaneblok s'wòkirie e' kí ká de mañat tá imía Jerusalén. <sup>2</sup> Ee tá sacerdotepa wòkirpa ena judiowak wépa kibipa, e'pa tò Pablo kkaté Festo á. <sup>3</sup> Ie'pa tò ikié ie' á: "Sa' kímú er bua' wa. Kawò mú Pablo tsobitu' íe Jerusalén." E' dör Pablo ttowá ñala kí. <sup>4</sup> Erè Festo tò iiuté:

—Pablo tso' Cesarea wòtèulewá s'wòto wé á. Ee ye' mi'ke kukuie. <sup>5</sup> Ì sulu wamblé ie' tò, e' ta as a' wòkirpa mi' ye' tá Cesarea ie' kkatòk ee.

<sup>6</sup> Festo sené Jerusalén ká pàkòl (8) ká dabom (10) e' ulatòk tá imiáne Cesarea. E' bule es tá ie' e' tkéka ikula' kí ttè shulo wé á. Etá Pablo tsuk patkéitò shulè. <sup>7</sup> Mik Pablo dewa, etá judiowak datse Festo tá Jerusalén, e'pa dewa ie' o'mik tá ikkaté íyi sulué tajè ese kí. Erè ie'pa kè á iwòklónuk yès tò e' dör mokí. <sup>8</sup> E' ukuòkí tá Pablo tté e' tsatkoie. Ie' tò íché ia:

—Ye' kè wá ì sulu wamblène yès judiowak ttè dalòieño kí, ñies Skèkòl wé kí, ñies Roma wòkir kibi e' tá. Ekkèpa kè yèule ye' wá sulué.

<sup>9</sup> Erè Festo aták buaè judiowak tá, e' kuekí ie' tò Pablo á ichaké:

—¿Be' shkak Jerusalén as ye' tò be' shulò ee?

<sup>10</sup> Ie' tò iiuté:

—Au. Ye' tso'tke Roma wòkir kibi e' ttè shulo wé á. Íe a' kawötá ye' shulòk. Be' wá ijcher buaè tò ye' kè wá ì sulu wamblèule judiowak tá. <sup>11</sup> Erè ilè sulu wambléyò, ese kué a' tò, e' kí ye' kawötá ttèwá, e' tá ye' ttòwá. Erè ì kos kí ie'pa tò ye' kkatéke, e' kè yène, e' tá kè yi kawötá ye' muksá ie'pa ulà á. E' kuekí ye' tò ikié tò Roma wòkir kibi as e' wák tò ye' shulò\*.

<sup>12</sup> Etá Festo tté ipattòkwakpa tá etá íchéitò Pablo á:

—Buaè be' ikiétke tò Roma wòkir kibi tò be' shulò. E' kuekí ye' tò be' patkekemi Roma as ie' be' shulò.

### *Festo tò Pablo tté paké blu' Agripa á*

<sup>13</sup> Ká tka wekké alè e' ukuòkí tá blu' kiè Agripa e' demí Cesarea ikutà kiè Berenice e' tá Festo tkèneká ká wòkirie e' kéwò tkò'uk. <sup>14</sup> Ie'pa e' tséat ká tajè. E' dalewa Festo tò ì tkòke Pablo tá e' paké blu' Agripa á. Ie' tò íché ia:

—Íe wëm tso' ekòl méat Félix tò wòtèule s'wòto wé á. <sup>15</sup> Mik ye' bak Jerusalén, etá sacerdotepa wòkirpa ena judiowak kueblupa, e'pa debitu' wëm e' kkatòk ye' á. Ye' á ikierakitò as ye' iwòmütsá ttèwá. <sup>16</sup> Ye' tò ie'pa iuté tò romawak wòkirpa kè yi tteta' wá, kam ye' tsatòk ikkatòkwakpa tá ñi wòshaè e' yòkí. <sup>17</sup> E' kuekí mik ie'pa debitu' íe, etá kè ye' kawò chòone. E' bule es tá ye' e' tkéka ye' kula' kí ttè shulo wé á tá wëm e' tsuk patkéyò. <sup>18</sup> Erè mik ikkatòkwakpa debitu, etá ie'pa kè wá ikkatène íyi sulu kí wes ye' ibikeits es. <sup>19</sup> Ie'pa tò ikkaté wes ie'pa Skèkòl dalòieke ese kí. Ñies wëm kòtèwá kiè Jesús, e' ché Pablo tò tò itso' tssè'ka, ese è kí ie'pa tò ikkaté. <sup>20</sup> Ye' kè wá ijcher wes yò ttè e' wè, e' kuekí ye' tò Pablo á ichaké: "¿Be' shkak Jerusalén as ee be' shulir ttè ì' kí?" <sup>21</sup> Erè ie' ikié tò as se' wòkir kibi tò ishulò. E' kuekí ye' tò ikéwò mé tò as itkèr wòtèule dò mik ye' tò ipatkekemi etá.

<sup>22</sup> Etá Agripa tò íché Festo á:

—Ye' éna wëm e' tò tssak ñies.

Tá Festo tò iiuté:

—Bule bõ ittseraè.

<sup>23</sup> Bule es tá Agripa ena Berenice, e'pa debitu, tkawá u á shkòrami wes kèké tajè es. Nippòkwakpa wòkirpa ena ká e' kèképa dalòier'tá tajè, esepa debitu' ie'pa tá ñies. Etá Festo tò Pablo tsuk patké <sup>24</sup> tá íchéitò:

\* **25:11** Pablo dör romawak e' kuekí ie' á kawò tá' ikiòk Roma wòkir kibi á tò e' tò ishulò. Roma wòkirpa tsitsir kè á iwòklónuk.

—A blu' Agripa ena kéképa ulitane tso' íe se' ta, íe wém dur ekól kié Pablo. Judiowak kós tó íe' kkteake ye' a Jerusalén ñies íe Ce-sarea. Ie'pa ké shtrirtá'wá ye' a ikiök áneule tó ikéwó múttśa ttéwa. <sup>25</sup> Eré ye' a ta íe' ké wá i wambléne i kji yó ittókwá ipatkémi. Eré íe' wák tó ikié as Roma wókir kibi tó ishulól. E' kueki ye' tó ibikeitsbak patkémi ee. <sup>26</sup> Eré ké i kúne ye' wá shtëmi yékkuó kji mēmi s'wókir kibi a ikkatoie. A Agripa, e' kueki ye' wá idebitú a' wórkj, bua'ie be' wórkj, as be' ichakó. Ima be' íché, e' ukuóki ta iyékkuó shtëmiyó. <sup>27</sup> ¿Wes ye' tó yi patkemimi shulé ké wayéule tó i kji ikkatérke?

**26**

*Pablo e' tsátké blu' Agripa wórkj*

<sup>1</sup> E' ukuóki ta Agripa tó Pablo a íché:

—Be' ttó e' tsátkoie.

Eta Pablo ulá kéká ta ittémítke i' es: <sup>2-3</sup> “A blu' tajé Agripa. Se' judiowak ser, e' jcher buaé be' wá. Ñies tté i' kji sa' ñi chóke, e' jcher buaé be' wá. E' kueki i' ñie ta ye' tśś'ne buaé e' tsátkók be' wórkj i' kós kji judiowak tó ye' kkteake, e' yóki. Es ikiéyó be' a tó ye' ttó tśś' enaé.

<sup>4</sup> “Se' wakpa kós wá ijcher buaé tó wes ye' ser ye' kaska' ena Jerusalén mik ye' bak duladula eta. <sup>5</sup> Ñies íe'pa wá ijcher buaé tó kékraé ye' dór fariseowak. Ese wakpa e' tiúke Skékól tté dikja yéyśśé se' wakpa malépa tsata. Ie'pa kji ikiane, e' ta íe'pa tó íchémi tó mokj ye' dór fariseowak. <sup>6</sup> Skékól kablé' se' yépa bak ká íaiáé e'pa a tó s'duowá e' shkerdakane, e' wá panekeyó mokj, e' kji íe'pa tso' ye' kkatók i' ñie ta. <sup>7</sup> Se' dór Israel aleripa e' ditséwópa dóka dabom eyók kji ból (12), e'pa tó iwá paneke ñies er mokj wa. E' kueki íe'pa tó Skékól dalóie e' wakanewékerakitó ñie nañé kékraé. A blu' Agripa, s'duowá shkerdakane, e' panekeyó wes se' wakpa malépa es, e' ta ¿i kji íe'pa tso' ye' kkatók? <sup>8</sup> ¿I' kueki a' ibikeitseke tó s'duowá e' ké shkenukkane Skékól a?

<sup>9</sup> “Ye' wák bak ibikeitsók tó ye' kawótá i kós or ye' a e' uk Jesús Nazaret wak e' tté wókló'woie. <sup>10</sup> Es ye' tó iwamblé' Jerusalén. Sacerdotepa wókirpa tó ye' a kawó me' iwambloie. S'batse' rpa tajé wóté'wá ye' tó s'wóto wé a. Ké dór e' é, ñies mik íe'pa ttekerakitó, eta ye' a ta e' dór buaé. <sup>11</sup> Tajé íe'pa we'ikyó se' ñi dapa'wó wé ulitane a íe'pa koie íe'pa erbló Jesús mik e' olo'yók. Ye' késik blé' íe'pa kji tajé. Ye' tó íe'pa tóte'ró tkóro ká bár kji we'íké.

<sup>12</sup> “Sacerdotepa wókirpa tó ye' a kawó me' ena ye' patké' ese wamblók Damasco, e' wakanéuk ye' mirwá. <sup>13</sup> Eré, a blu', ñíalá kji díbata a ta ká jai a ye' tó i' sué bó'woie e' tkóká diwó olo tsata. Bó'wó e' olo bune ye' pamik ena imirwá rak ye' ta e'pa pamik ñies.

<sup>14</sup> Sa' kós anere ískj ta ittó tśśéyó e' tó íché ña hebreoie: ‘A Saulo, a Saulo, ¿iók be' ye' we'ikeke? Í sulu wamblekebó ye' kji e' wa be' wák e' mukettsá we'íké wes iyiwak ké shkak ppésó kal wa es.’ <sup>15</sup> Ye' tó íe' a íchaké: ‘A Skéképa, ¿be' dór yi?’ Ie' ye' iuté: ‘Ye' dór Jesús, e' we'ikekebó. <sup>16</sup> Eré be' e' duóká. Ye' e' kkaché be' a be' patkoie kanéblók ye' a. Í kós suébó i' ñie ena i kós kkacheraéyó be' a, e' pakerabó sulitane a. <sup>17</sup> Ye' tó be' patkeraé be' yamipa a ena pé' ké dór judiowak esepa a. Ye' tó be' tsátkeraé íe'pa ulá a. <sup>18</sup> Ye' tó be' patkeraé íe'pa wóka ká ñi'uk as ishkorak Skékól ta ká ñi a, ké ku'ia klóulewá stui a Satanás ulá a; ñies as inuí olo'yardak ík as idórak Skékól icha batse'r e'pa kji ie' rblérak ye' mik e' wa.’

<sup>19</sup> “A blu' Agripa, i' yéne ña ká jai a e' wawéyó. <sup>20</sup> Jesús tté buaé tsá pakéyó Damasco wakpa a, e' ukuóki ta yó ipaké Jerusalén wakpa a ñies ká malé tso' Judea e' kós wakpa a. Ñies ipakéyó pé' ké dór judiowak esepa a. Ye' tó íe'pa kós patté: ‘A' er mane'yá Skékól a. A' senú buaé yéyśśé ikkachoie tó mokj a' er mane'wétke íe' a.’ <sup>21</sup> E' kueki se' yamipa judiowak e'pa tó ye' kló'wá Skékól wé a ttéwa. <sup>22</sup> Eré dó ikké ta Skékól tó ye' kímé, e' kueki ye' tso'ia íe' tté pakók sulitane a, s'dalóier'ta' tajé esepa a, ñies se' ésepa a. Í yé'atbak Skékól ttekolpa ena Moisés, e'pa tó tó itkóraé, e' é pakekeyó. Ké ye' wá tté kuá'kji pakane. <sup>23</sup> Ie'pa tó iyé'at tó wé pairine'bitu idi' wa s'blúie e' kawótá ttéwa. E' ukuóki ta íe' shkerdakane kéweie sulitane yóki, ta s'tsatko tté pakeraéitó judiowak a ena ká ulitane wakpa a. Tté e' dór wes bó'wó es se' er ñi'woie.”

*Pablo tó Agripa shkéñé erblók Jesús mik*

<sup>24</sup> Es Pablo e' tsátkóke e' shuá Festo tó íché íe' a áneule:

—¡A Pablo, be' alíneka! Be' e' yué yékkuó wa tajé, e' tó be' alíwéka.

<sup>25</sup> Eré íe' iúuté:

—A kéképa Festo. Ye' ké alíneka. Í chéyó e' ké dór alípa tté, e' dór tté mokj. <sup>26</sup> Se' blu' Agripa tkér. Ie' wá tté ikké suule buaé. E' kueki ké ye' tkine ttók íe' wórkj. Íyi ikké kós ké wambléne bléulewá. E' kueki ye' wá ijcher tó íe' wá íyi ikké jcher buaé. <sup>27</sup> A blu' tajé Agripa, ye' wá ijcher buaé tó be' tó i' yé'atbak Skékól ttekolpa tó, e' kló'wé.

<sup>28</sup> Agripa tó iúuté:

—Ké be' ibikeitsók tó be' ye' kēmi e' mane'uk Cristo kléie i' ta.

<sup>29</sup> Pablo tó íché:

—I' ta ó i' ukuóki ta, eré Skékól mú kji ikiar tó be' ena a' kós tso' i' ñie ye' ttó tśśók, e'pa mú dór wes ye' es, eré ké moulewá tabechka kicha wa wes ye' es.

<sup>30-31</sup> Etā blu' ena s'wōkir kibi ena Berenice ena koš itulur ee, e'pa ulitane e' kékā míyal bánet ttōk řitā Pablo tté kī. Ie'pa tō iché ři a:  
 –Wēm i' kē wā i' sulu wamblēne i kī ittēwašō, warma kē ie' kawōtā wōtēwa.

<sup>32</sup> Etā Agripa tō iché Festo a:

–Wēm i' kē tō ichōpa: 'ye' patkōmi Roma wōkir kibi a šulè', e'ma šō iēmimi.

**27**

*Pablo patkémirakitō Roma*

<sup>1</sup> Mik ie'pa tō ibikeitsétke tō sa' patkekemi Italia, etā Pablo ena pē' skā tso' wōtēule, e'pa mérahitō wēm ekōl kiē Julio e' ulā a. Wēm e' dōr řippōkwakpa eruleē kiē Emperador Icha, e' capitán. <sup>2</sup> Etā sa' e' iékā kanō a. Kanō e' datse ká kiē Adramitio ee michoē Asia wē kanō irirke dayē kkōmik ese a. Wēm kiē Aristarco, e' tso'ñak sa' tā řies. Ie' datse Tesalónica aťe Macedonia ee. <sup>3</sup> Bule es tā sa' demi Sidón. Julio tō Pablo suē er bua' wa. Ie' tō iémi s'yamipa serke ee, e'pa pakōk as i' kiane ie' kī e' mū ie'pa tō ie' a. <sup>4</sup> Sa' e' yétsa Sidón mir wōwī, erē siwa' bitsirke darērēē wōiá. E' kueķi sa' míyal dayē nane kiē Chipre e' kke wē siwa' kē bitsirku' tajē e' éka. <sup>5</sup> Sa' tkami Cilicia ena Panfilia demi Mira aťe Licia ee.

<sup>6</sup> Etā ee capitán tō kanō datse Alejandria, e' kuē etō. E' mi'ke Italia. Eē sa' e' mane'wē kanō e' etō a tā sa' míyal. <sup>7</sup> Siwa' kueķi sa' mirwā kanō kī enaē, kanē tajē wa. Kā bōt ō ká mañat alē etā sa' demi ká kiē Cnido wōshaē. Siwa' bitsirkeia sa' kke, e' kueķi sa' tkami Salmona wōshaē tā sa' tkami dayē nane kiē Creta e' wışhet. <sup>8</sup> Sa' mí kanō kī dayē kkō ē wa kanē tajē wa. Etā sa' demi ká kiē Buenos Puertos (kiē e' wā kiane chē wē kanō irirke buaē), e' aťe tsjinet ká kiē Lasea ee.

<sup>9</sup> Sa' kī kawō chó tajē tā yuēdiō dewatke. E' kēska' tā kē se' a shkanukia dayē kī dō' i' sulu tkō s'ta. E' kueķi Pablo tō ipattérak:

<sup>10</sup> –A kékēpa, yō isuē tō se' mirwā i' etā i' sulu tkōmi. Kanō i' ena dali i', e' weirwami, řies dō' se' wákpa duōlur.

<sup>11</sup> Erē capitán kē wa Pablo ttō iutēne. Ie' tō kanō wák ena kanō ñakōkwakpa wōkir, e'pa ttō iuté. <sup>12</sup> Wē ie'pa kanō irine e' kē dōr buaē yuēdiō tkō'woie. E' kueķi kanō wakpa kibiiepa tō ibikeitseke tō se' mū dōmi Fenice yuēdiō tkō'uk ee, e' dōr bua'ie. Ká e' aťe dayē nane kiē Creta ee. Eē dayē aťe noroeste ena sudoeste.

*Siwa' bitsirke tajē dayē kī*

<sup>13</sup> Etā siwa' datse sur kke, e' bitsinemitke bērebērē. Ie'pa tō ibikeitsē tō se' tkōmimi, e' kueķi ie'pa e' yétsa míyal Creta dayē kkō ē mik kanō kī. <sup>14</sup> E' ukuōkī bet tā sērke bitsineka' tajē datse nordeste kke, e' tērke kanō mik. <sup>15</sup> E' tō kanō uyēmi. Sa' kē a

kanō wōklōneia siwa' kke. E' kueķi sa' tō iémi as siwa' wā imítser sa' tā. <sup>16</sup> Sa' tkami dayē nane tsitsir kiē Cauda, e' tsikka, wē kē siwa' bitsirku' darērē šutē ee. Sa' kaneblē darērēē, e' wa sa' tō kanōla tso' s'tsatkoie e' muēwa buaē as kē imi' a dayē a. <sup>17</sup> E' ukuōkī tā ie'pa tō kanō kibi etō kī payuēwa buaē tsa' wa. Ie'pa suane dō' kanō tkērka tsa'wō tso' tajē kiē Sirte, e' kī. E' kueķi ie'pa tō datsi' ukuō tso' kanō shkōwoie, e' iēwa dayē a kanō wōklō'woie as imi' enaē. Tā ie'pa tō iémi as siwa' wā imi'. <sup>18</sup> Bule es tā siwa' bitsirkeia tajē, e' kueķi ie'pa tō dali damirak iwā kanō a, e' tuléttsami dayē a. <sup>19</sup> Bōiki es tā ie'pa tō řyi tajē tso' kanō shkōwoie, e' kibiie tuléttsa dayē a iwákpa ulā wa. <sup>20</sup> Ká tka tajē etā diwō kē wēneia bēkwō kē wēneia. Sērke tajē tērkeia sa' kī. E' kueķi sa' tō ibikeitsē tō sa' duōlurdaē, kē sa' tsatkēpaia.

<sup>21</sup> Sa' tka ká tajē kē chkaule. E' kueķi Pablo e' kékā ie'pa tso' kos e' šuā tā ichéitō:

–A kékēpa, a' tō ye' ttō tso'pa, e'ma kē se' e' yēnettsa Creta ena i' sulu tka se' tā, e' kē bak se' tā. Nies kē se' řyi weinewa. <sup>22</sup> Erē ř'ñe tā a' er kuū. Kē yi duōpawā. Erē kanō ē weirwami. <sup>23</sup> Enia nañewe Skēkōl dōr ye' blū dalōieke ye' tō, e' tō ibiyōchōkwak patké ye' ska', <sup>24</sup> e' tō ye' a iché: 'A Pablo, kē be' suanukia. Be' kawōtā shkōkrō Roma wōkir kibi e' ska'. Skēkōl er buaē chē be' a. E' kueķi pē' kos tso' be' tā kanō a, e'pa tsatkeraeitō.' <sup>25</sup> A kékēpa, e' kueķi a' er kuū. Ye' erblōke Skēkōl mik. Ye' wā ijcher buaē tō i' kos tkōraē wēs Skēkōl biyōchōkwak tō ye' a iché es. <sup>26</sup> Erē siwa' tō se' patkeraē dō ká wēle dayē kkōmik.

<sup>27</sup> Dayē kiē Adriático e' kī sa' dami siwa' wā wī'kē iō'kē. E' kī ká de domingo bōtō e' nañewe ká šabōts etā kanō ñakōkwakpa éna iane tō sa' dōketke ká sí kī. <sup>28</sup> Ie'pa tō dayē šu ma'wē tō wēkkē idir dōttsa řski tā ide metro dōka dabom mañayōk kī terōl (36). E' ukuōkī tā wī'kie iskā ma'wēnerakitō tā ide metro dabom bōyōk kī kul (27). <sup>29</sup> Ie'pa suane dō' ak tso' blublūē ese mik kanō tēr, e' kueķi tabechka tso' kanō wōklō'woie e' émirakitō tkēl kanō ñakka dayē šuā. Tā ikiérakitō Skēkōl a tō sa' kīmū ká řirke e' dalewa. <sup>30</sup> Erē kanō ñakōkwakpa tō ibikeitsē: se' tkōyalme as se' e' tsatkō. E' kueķi ie'pa tō kanōla éwami dayē a. Ie'pa e' é tō ie'pa mí tabechka tso' kanō wōklō'woie, e' ōkmi kanō wōkka dayē šuā. <sup>31</sup> Erē i' wēke ie'pa tō e' biyō chē Pablo tō řippōkwakpa a ena capitán a. Ie' tō iché:

–Ie'pa tkaya, e' tā a' kē tsatkēpa.

<sup>32</sup> Etā řippōkwakpa tō kanōla e' ttsé tēlor tā iémirak dayē a.

<sup>33</sup> Ká řirketke etā Pablo tō ie'pa ulitane a iché:

–Ilē řū. A' tso' ipanuk tō i' tkōmi, e' kī domingo de bōtō e' dalewa kē i' řiane a' wā

yés. <sup>34</sup> A' kényò ilè ñiuk. A' e' tsatkak, e' ta' a' kawõtá ilè ñiuk. Kè a' weirpa yés. <sup>35</sup> Pablo tté one, etá pan klò'wéitò et, ta' wéstela chéitò Skékòl a. Sulitane wòrkì iblatéitò ta' ie' wák tò itsá ñé. <sup>36</sup> Etá e' tò imalepa erkiowé ta' ichkérak ñies. <sup>37</sup> Sa' dòka cien böyök kì dabom kuryök kì teröl (276) seraá. <sup>38</sup> Ie'pa chké one kòs ie'pa kì kiane ekkè ta' dali èyök até e' tuléttsarakitò dayé a' as kanò at öböbla. Dali e' dör trigawò.

*Kanò jchénane*

<sup>39</sup> Ká ñine ta' kanò ñakòkwakpa kè wá dayé kkò suule. Eré ie'pa tò isué tò ttsa'wò buaé ulat tèt kanò ikloká. E' kuekì ie'pa tò ibikeitsétke tò kanò ma'üsò klèkà ee. <sup>40</sup> Etá iyi tso' kanò wòklò'woie, e' ttsé télor ie'pa tò émi dayé a. Etá kaltak tso' kanò ñakoie, e' wóttésélor ie'pa tò. E' ukuökì ta' datsi'kuò skékarakitò kanò wókka ta' idòkemitke dayé kkòmik. <sup>41</sup> Eré ttsa'wò tkérka dayé dikia, e' kì kanò tkéne kuj. Ta' kanò wókka bunewa ttsa'wò a, kè yénettsaia. E' dalewa dayé tètke kanò ñakka e' tò kanò tskélor tajé.

<sup>42</sup> Wépa mir klóulewá e'pa kiane ñippòkwakpa kì ttélur as kè itkóyal ùkule. <sup>43</sup> Eré capitán éna Pablo tsatkak, e' kuekì ie' kè wá ikéwò mène ittókulur. Ie' tò iché: "Wépa ukuo, e'pa e' ppólur kewe dayé a' as e'pa döttsá ká sí kì. <sup>44</sup> As imalepa mi' kanò tak kì." Es sa' ulitane dettsá ká sí kì buaé.

**28**

*Pablo sené si' mañat ká kiè Malta eé*

<sup>1</sup> Mik sa' dettsá etá sa' wá ijchénewa tò ká e' kiè Malta. <sup>2</sup> Ká e' wakpa tò sa' kiéwa buaé seraá. Kase sulué ena kalì yérke, e' kuekì bö' batsékarakitò tajé ta' sa' kiarakitò bö' baiklök. <sup>3</sup> Etá Pablo tò bö' ulatska shtë, e' tuleke bö' a. E' wòsháé ta' tkabé sulusi e' yéttsá bö'ba yöki, e' tò Pablo kuéwá iulá kkue a, kè éwa. <sup>4</sup> Mik ká e' wakpa tò isué tò tkabé moar Pablo ulá mik, etá ichéraitò ñi a: "Wém i' wá s'kotulewá alè. Eré dayé a' itsatkéne, eré s'shülökwak tso' ká jai a' e' kè wá kawò mène ia' as iser."

<sup>5</sup> Eré Pablo ulá wöppé ta' tkabé anewa bö' a. Kè wés Pablo dé'. <sup>6</sup> Wékké Pablo ièrkeká ö wékké Pablo duómiwa etkéme, e' panuk ie'pa tso' seraá. Eré ie'pa tò ipané tajé. Mik ie'pa tò isué tò kè i' bak ie' ta', etá ie'pa ibikeitséne kuá'kì. Ie'pa tò ichémi tò Pablo dör kékòl wéle.

<sup>7</sup> Eé tsjinet ká tso', e' dör Malta wókir kibi kiè Publio, e' icha. Ie' tò sa' kiéwá ena sa' sué buaé dö ká mañat. <sup>8</sup> Ta' Publio yé, e' duòke duè dalölò wá ena ishütérke tajé. E' ie' teme'r. Etá Pablo miá iweblök ta' ie' tò ikié S'yé a' ta' iulá méká iki ta' ibua'wéneitò. <sup>9</sup> E' ukuökì ta' imalepa kirirke tso' ká e' a, e'pa kòs debitü ta' ibuanerak ñies. <sup>10</sup> E' kuekì ká e' wakpa tò iyi kákmé sa' a' tajé. Mik sa'

mitkene kanò kì ta' i' kòs kiane sa' kì shkoie, e' kákmé ie'pa tò sa' a.

*Pablo demi Roma*

<sup>11</sup> Sa' sené ká e' a' si' mañat ta' sa' e' iéne kanò iétò a. Eé kanò e' tò yuédiò tkòg'. E' datse Alejandria. Kanò e' kiè ie'pa kékòlpa dalòiekerakitò dör klò' e'pa kiè wa. <sup>12</sup> Sa' míyal kanò e' kì ká kiè Siracusa ee. Eé sa' sené ká mañat. <sup>13</sup> E' ukuökì ta' sa' míyal ká kiè Regio ee. E' bule es ta' sa' e' yélur Regio a. Siwá' bitsirke buaé datse sur kke, e' wa ká bót ta' sa' demi Pozzuoli wé kanò irirke ee. <sup>14</sup> Eé sa' tò s'yamipa wélepa kué. Ie'pa tò sa' kè e' tsukat ie'pa ta' domingo etò. Bata ekkè ta' sa' demi Roma. <sup>15</sup> S'yamipa tso' Roma, e'pa wá ijchertke tò sa' datse. E' kuekì ie'pa de sa' ñaletsuk dö wé dali wé tso' tajé kiekerakitò Apio ee. Ñies ie'pa skà de sa' ñaletsuk ká kiè S'kaporò Wé Mañat ee. Mik Pablo tò ie'pa sué ta' wéstela chéitò Skékòl a' ta' ittse'neká buaé. <sup>16</sup> Mik sa' demi Roma, etá Roma wókirpa tò ie' kè senuk u' etkue a' ekòrla, eré ishékèki méarakitò ekòl Pablo kkò'nuk.

*Pablo tò Jesús tté paké Roma*

<sup>17</sup> Pablo demi Roma, e' kì ká de mañat, etá ie' tò judiowak wókirpa tso' Roma, e'pa kiök patké. Mik ie'pa e' dapa'wéká ie' ska' ta' ie' tò iché iarak:

—A yamipa judiowak, kè ye' wá i' sulu wamblène se' wakpa kì. Ñies kè ye' wá i' sulu wamblène se' yépa bak ká iaiáé e'pa sene e' kì. Eré ye' tso' Jerusalén e' me'ttsarakitò Roma wakpa ulá a. <sup>18</sup> Roma wakpa tò ye' ichaké iskié, eré kè ie'pa wá i' sulu kune ye' kì ye' ttowaie. E' kuekì ie'pa éna ye' akmi. <sup>19</sup> Eré judiowak kè kì ikiane tò ye' émi ie'pa tò. E' kuekì ye' kawõtá ikiök tò ye' patkò Roma wókir kibi a' as ie' tò ye' shülö. Eré ye' kè wá i' ta' se' judiowak kkoatoie. <sup>20</sup> I' paneke se' dör Israel aleripa e'pa tò, e' kuekì ye' tkér jé moule. Ñies e' kuekì ye' tò a' kiök patké a' suóie ena ttoie a' ta.

<sup>21</sup> Ie'pa tò iché ia:

—Judea wakpa kè wá yékküò patkéule sa' a' be' choie iélu. Ñies sa' yamipa datse Judea, e'pa kè wá i' sulu yéule sa' a' be' kì. <sup>22</sup> Sa' wá ijcher tò tté pa'ali i' paké be' tò e' cheke sulué sulitane tò ká wa'ñe. E' kuekì sa' kì ikiane ttsé tò zima be' tò ibikeitseke?

<sup>23</sup> Ie'pa tò kawò skà mè ñi a' kapakoie. Mik e' kèwò de, etá ie'pa dapaneká tajé Pablo ska'. Ie' tò i' blúie Skékòl tso' e' tté paké bla'mi dö tsáli. I' kit Moisés ena Skékòl ttekòlpa tò yékküò kì e' wa' ie' tò ie'pa pablé tajé as ie'pa tò iklö'ù tò Jesús dör wé pairine bitü idi' wa' s'blúie e'. <sup>24</sup> Ie'pa wélepa tò tté paké Pablo tò, e' klò'wé. Eré wélepa kè wá iklöone. <sup>25</sup> Ie'pa kè wá ibikeitse' ñikkéé, e' kuekì imitkerak eré Pablo tò tté i' bata ché iarak:

—Ï yë' Wiköl Batse'r tö a' yëpa bak iaiäë,  
e'pa a, itteköl bak kië Isaiás e' wa, e' dör  
moki. Skëköl tö iché ia:

<sup>26</sup> Be' yú ta ichö ká i' wakpa a.

A' tö ittseraë je', erë kē a' éna iwà anak.

A' tö iwebleraë je', erë kē a' tö isugpa.

<sup>27</sup> Es ie'pa dör, ie'pa wökir suluë, e' kuëki.

Ie'pa tö ikukuö wötéwä as kē iwattsër.

Ie'pa tö iwöbla tsjimiwéwä as kē iwawër.

Ie'pa kē éna iwà anak.

Ie'pa kē shkakne ye' ska' as ye' tö ibua'üne.\*

Es Isaiás tö iyë'at. <sup>28-29</sup> A' wä ijchenú tö i'  
ukuöki ta Skëköl tö s'tsatkë e' tté tso'tke pakë  
pë' kē dör judiowak esepa a. Ie'pa e' tö  
iklô'weraë.

<sup>30</sup> Pablo e' tséat duas bök wa'ñe wé u  
patuëkeitö eë. Sulitane mi'ke ie' weblök ta  
eë ie' tö ikiéwä. <sup>31</sup> Ie' tso'ie i blúie Skëköl tso' e'  
tté pakök ena s'wöbla'uk Skëképa Jesucristo  
tté wa. Kē yi wä ie' wöklöone. Kē yi wä ie'  
tsiriöne yës.

\* **28:27** Isaiás 6.9-10



## Yëkkuö kit Pablo tö Roma wakpa a Romanos

Yi tö yëkkuö i' kit, e' wák kiè Pablo. Welepa tö ibikeitsè tö yëkkuö i' kit ie' tö etä ie' wák tso' Corinto. Ie' tö ikit duas dabom skeyök kî kul (57) Cristo kune'bak e' ukuökî ta. Ie' ikkeyè' tajè shkökmi Jesús mik erblökwakpa tso' Roma e'pa pakök. Erè kè ie' a kawö kune shkoie. E' kuekî ie' tö yëkkuö i' kit patkëmi ie'pa a as ie'pa wa ijcher tö i' g' Jesús tö ie'pa dalërmik. Ie'pa kibiiëpa kè dör Israel aleripa erè Israel aleripa erblè Cristo mik esepa e' iè'wa ie'pa ta. Israel aleripa erblè Cristo mik esepa tö ibikeitsè tö ie'pa klö'bak Skëköl tö kewei e' kuekî ie'pa dör ibu'ie'pè' kè dör ie'pa ditséwè esepa tsata. E' kuekî ie'pa kè ñi sini'kune.

E' kuekî Pablo kî ikiane kkachè ie'pa a yëkkuö i' kî tö sulitane dör ñies è Skëköl wöa. Israel aleri ö kè idör ileri e' dör ñies ème. Kewe Pablo tö ie'pa a ikkachè tö sulitane tö Skëköl watè'ttsa e' kuekî e' nu' tso' sulitane kî. E' ukuökî ta ie' tö ie'pa a ikkachè tö Jesús tté buaè e' è wa Skëköl tö se' tsatkëmi ñikkèè, Israel aleripa ena kè idör ileripa esepa ñies. E' kkachè ie' tö ie'pa a. Ñies Pablo tö ikkachè tö erblè Jesús mik e' wa Skëköl tö se' klö'wëmi wës pè' buaè yësyèsè es. Israel aleripa tö ibikeitsè tö Moisés tté dalöiëno e' dalöiè wa Skëköl tö se' klö'wëmi wës pè' buaè yësyèsè es. Erè Pablo tö ie'pa a iché tö e' kè dör es. Se' kè a i' onuk Skëköl ttsé'woie buaè as se' tsatköitö. Erè Jesús mik erblè e' wa ie' tö se' tsatkeke. Es Pablo tö iché yëkkuö i' kî.

### Shké'wé

<sup>1</sup> Ye' dör Pablo. Ye' dör Cristo Jesús kanè méso klöule ie' ttekölpä tsá e' ekölie. Ñies ye' klöule tté buaè kkayé' Skëköl tö e' pakök.

<sup>2</sup> Ká iaiaè Skëköl kablè' tö tté buaè ñe' kkayërdaè, e' kit ittekölpä tö iyëkkuö batse'r e' kî. <sup>3</sup> Tté buaè ñe', e' dör ilä Skëkëpa Jesucristo e' tté. S'ditsö wa ie' dör Israel blü bak kiè David e' aleri. <sup>4</sup> Erè mik ishkenekane, etä e' wa ikkayène Wiköl Batse'r wa tö ñies ie' dör Skëköl Alä diché ta' tajè e'.

<sup>5</sup> Ie' batamik Skëköl er buaè ché ye' a. Ie' ye' tké'ka kaneblok Jesucristo a ittekölpä tsá e' ekölie as ká wa'ñe'pè' kè dör judiowak esepa kur ie' ttö iutök erblè ie' mik e' wa. <sup>6</sup> Ñies a' tso' ie'pa shua. A' klöule Jesucristo ichaie. <sup>7</sup> Ye' tso' yëkkuö i' shtök a' dalèr tajè Skëköl éna serke Roma e'pa a. A' klöule ie' wa s'batse'rpä kjié. S'yé dör Skëköl ena

Skëkëpa Jesucristo as e'pa er buaè chö ena sene bërè mù a' a.

### Pablo wëstela ché Skëköl a

<sup>8</sup> Kewe ye' iché tö a' erblè Jesús mik e' tté bunekä ká wa'ñe. E' kuekî wëstela chekeyö Skëköl a Jesucristo ttö wa a' ulitane kî. <sup>9</sup> Skëköl a ye' kanebloke ye' er kos wa ie' alä tté buaè e' pakök, e' wák wa ijcher tö kekraè ye' er arke a' ska'. <sup>10</sup> Kekraè ie' a ikiekeyö tö ie' kî ikiane, e'ma as bata ekké ta ie' kawö mù ye' a shkoie a' pakök. <sup>11</sup> Sulu ye' éna a' suaq. Ye' éna a' kïmak as a' er diché kî iër buaè Skëköl Wiköl wa. <sup>12</sup> E' wà dör tö se' erbloke Jesús mik eköl eköl, e' wa se' ñi er diché iö buaè.

<sup>13</sup> A yamipa, ye' kî ikiane tö a' wa ijcher tö tajè ye' ileritsé shkoie a' pakök, erè dö ikké ta ye' wötkërke. Ye' kî ikiane tö kanè me' Skëköl tö ye' a e' wà dötsa buaè a' shua wës ká malepa wakpa shua idé'ttsa es. <sup>14</sup> Ye' ittsé tö ye' kî kanè tso'ia' Jesús tté buaè pakök sulitane a. Kè ye' tkine tö s'dalöiër ta' tajè ese idir ö s'èsepa idir ö s'yöule ö kè s'yöule idir. <sup>15</sup> E' kuekî ñies ye' shkak Roma Jesús tté buaè pakök a' wakpa shua.

### Jesús tté buaè dör Skëköl diché tajè s'tsatkoie e'

<sup>16-17</sup> Jesús tté buaè e' wa Skëköl a wëpa kos tö iklö'wé esepa tsatkëmi. E' kuekî ye' kè jaène tté e' kî. Tté e' pakane judiowak a kewe, e' itökî pè' kè dör judiowak esepa a. Tté e' tö ikkachè se' a tö wës Skëköl tö se' klö'wëmi wës pè' buaè yësyèsè es. Se' klö'wéitö es se' erblè Jesús mik e' wa. E' è wa ie' tö se' klö'wëmi es. E' dör wës itso' kitule Skëköl yëkkuö kî es, e' tö iché: "Yi dör yësyèsè ierblö Skëköl mik e' batamik, ese serdaè."\*

### Sulitane kî i' sulu nu' tso' Skëköl wöa

<sup>18</sup> Skëköl tso' ká jai a, e' tso' wëpa tö i' sulu wambleta' ena kè ser yësyèsè esepa we'ikök. E' wa ie' tso' ikësik kkachök. I' sulu kos wambleke ie'pa tö, ese tö ie' tté mokî e' wöklö'wëke. <sup>19</sup> Kos s'éna iaè tö wës ie' dör, e' kkayé' ie' wák tö ie'pa a, e' kuekî buaè ie'pa wa ijcher. <sup>20</sup> Kewe ta' ie' tö ká i' yö'at, e'tami sulitane wa ijcher tö wës ie' dör. Ie' kè wërta' erè i' kos yó'itö e' wa iwënewa buaè tö ie' dör Skëköl, ñies tö ie' diché kè ertä'wa. E' kuekî kè ie'pa a iyënu'k tö kè sa' wa ijcher. <sup>21</sup> Erè ie'pa wa ijcher buaè tö ie' tso'tke, erè ie'pa kè wa ikikanekä wës ikawötä kîkëkä es. Ñies ie'pa kè wa wëstela yène ie' a. E' skéie i' bikiëitseke ie'pa tö ese kè wà ta'. Ie'pa erbiököke kos ese dör sulu ème. <sup>22</sup> Ie'pa e' chö tö ie'pa wa i'yi kos ese jcher buaè, ñermata ie'pa ianewä kè kabikeitsöta'. <sup>23</sup> Ie' olo ta' tajè kè ertä'wa, e' kè dalöiëne' ie'pa wa. E' skéie ie'pa tö s'duötä'wa ese diököl dalöieke.

\* 1:16-17 Habacuc 2:4

Dõ kal õ ak yöule dùie õ bakaie õ talokie ese dalõiekerakitõ ie' skéie.

<sup>24</sup> E' kueķi Skékõl tõ ie'pa émi e' ia'ũķķa sene sulusi wa wēs ie'pa ķi ikiane es. Es ie'pa ñi dalõsewēwā íyi s'jaewē tajē ese wa. <sup>25</sup> Ie' tõ mokĳi e' olo'yékerakitõ, e' skéie kache ttē ē klõ'wékerakitõ. Íyi yö'at ie' tõ ese ē dalõiekerakitõ skékõlie, kē dõr ie' wák dalõie. Ie' ē ķi kĳikēķā mēne buaē ķekraē. Es e' idir.

<sup>26</sup> E' kueķi Skékõl tõ ie'pa émi e' ya'ũķ wēs ie'pa er sulu ķi ikiane es. Dõ alakõlpa e' mane'wéttsā kē senakĳā wēpa tā wēs ime-neat es. Ie'pa senēķā ñitā iwakpa ē. <sup>27</sup> Es ñies wēpa kē senakĳā alakõlpa tā. Ie'pa e' mane'wéttsā. Suluē ie'pa éna senakĳā iwákpa ē ñitā. E' dõr jaē tajē. Ie'pa e' ya'ũ sulu es, e' nuĳi ķi iwákpa weirke siarē wēs ikiane we'ikē es.

<sup>28</sup> Ie'pa kē éna Skékõl bikeitsak, e' kueķi ie' tõ ie'pa émi i suluē e' ē bikeitsõk as i kē wamblõk s'káne ese wamblõrakitõ. <sup>29</sup> Es ie'pa er sulunewā da'áie. Í sulu kōs e' wambleke ie'pa tõ tajē. Ie'pa wõttserke tajē. Ie'pa e' wamblõke suluē. Ie'pa ukýerke imalepa tā. Ie'pa s'ttekewā ena ñi wõñakkõke suluē ena s'ķitõ'weke tajē. Keķraē ie'pa er me'rie i sulu ē ķi. Ie'pa biyõblõke ñi ķi. <sup>30</sup> Ie'pa tõ s'malepa cheke suluē. Sulu ie'pa éna Skékõl ar. Ie'pa e' kkeõkeķā tajē e' ttsõkeķā tajē ena kē tkirķu' imalepa ķi. Íyi sulusi bikeitseke ie'pa wákpa tõ, ese wamblekerakitõ. Ie'pa kē tõ imi ena iyē ttõ dalõietā'. <sup>31</sup> Í dõr buaē e' kē ane ie'pa éna. Í ũķ ie'pa kablē e' kē wawetā'itõ. Ie'pa kē éna yi dalērtā'. Kē yi suetā' er siarē wa. <sup>32</sup> Erē ie'pa wa ijcher buaē tõ Skékõl ttē dalõieño tõ ichē tõ wēpa tõ íyi ekkē wambleke esepa ķi duēwā kiáne, erē ie'pa tõ iwamblekeiā. E' kĳie tā ie'pa wa buaē iwēr tõ s'malepa tõ iwamblē.

## 2

### *Skékõl tõ sulitane shuleraē ñikkē*

<sup>1</sup> A' isie \* tõ pē' chéyõ ñe'sepa kichatekettsā, esepa kē a i yēnuk e' tsatkoie Skékõl wõrķi. Í sulu kōs wambleke ie'pa tõ ese wambleke a' tõ ñies. E' kueķi mik a' tõ ie'pa kichatēttā, etā e' wa a' wákpa tso' e' kichatõktsā. E' kueķi kē a' a' e' tsatķēnuk. <sup>2</sup> Se' wā ijcher tõ Skékõl tõ s'shulē yösyēsē, e' tõ se' e' wamblõ sulu es esepa kōs kichaterattsa. <sup>3</sup> A' tõ i sulu wamblē wēs wēpa kichatēttā a' tõ es, e' tā žwes a' ibikeitsēmi tõ Skékõl kē tõ a' kichatepattsa ñies? <sup>4</sup> A' tõ ibikeitseke es, e' tā e' wa ie' er buaē se' ta, e' watõktsā a' tso'. Ie' tõ se' anewēkeiā tajē, ie' kē tõ se' we'ikē bet. Ie' er buaē a' tā, e' tõ a' dalē'ttsekeiā buaē, e' wa ie' tso' a' ulaiõķ as a' er mane'ũ ie' a, že' kē

jcher a' wā? <sup>5</sup> Erē a' er darērēē. A' kē éna er mane'wak ie' a, e' nuĳi ķi a' tso' Skékõl kēsik e' ķi kiõk e' ķi. Mik ie' s'shuleraē e' kēwõ de etā ie' tõ s'shuleraē yösyēsē. <sup>6-11</sup> Sulitane dõr ñies éme ie' a, e' kueķi ie' tõ iske meraē ekõl ekõl a wēs s'ser es. Wēpa e' chõke keķraē i buaē ũķ, tso' ilo ena ikĳikēķā ena sene michoē yulõk, esepa ulā a sene michoē dõraē. Erē wēpa tkirke iwák ē ķi, e' wamblõ sulu, kē tõ ie' ttē mokĳi dalõie, esepa we'ikeraeitõ kēsik wa da'a. Wēpa e' wamblõ suluē esepa kōs weirdaē siarē kewe judiowak e' ukuõķi tā sulitane, e' dalērdarak imik tajē. Erē wēpa serke yösyēsē esepa kōs a ilo ena ikĳikēķā ena sene bērē e' merdaē tajē kewe judiowak a e' ukuõķi tā sulitane a.

<sup>12</sup> Pē' kē dõr judiowak esepa kē ku' Moisés ttē dalõieño e' dikĳā. Ie'pa tõ i sulu wamblē, e' tā iweirdaē siarē erē ie'pa kē shulirpa ttē ñe' wa. Erē judiowak tso' ttē e' dikĳā, e'pa tõ i suluē wamblē e' tā ttē e' wa ie'pa shulirdaē. <sup>13</sup> Wēpa tõ ttē dalõieño e' ttsé, e' ē kueķi ie'pa kē klõ'wēpa Skékõl tõ wēs pē' wā dalõie esepa klõ'weraeitõ es. <sup>14-15</sup> Pē' kē dõr judiowak esepa kē wā Skékõl ttē dalõieño kit Moisés tõ yēkkuõ ķi e' jcher. Erē mik ie'pa tõ ttē ñe' wā dalõie iwákpa wā ijcher e' kueķi, etā e' wa iwēnewā tõ ttē dalõieño tso' ie'pa er a. Ttē e' dikĳā ie'pa tso'. Ttē e' ē wa ie'pa er tõ ie'pa a icheke tõ i dõr buaē i dõr suluē. Ttē e' wa mikle tā ie'pa er tõ ie'pa kcateke, mikle tā ie'pa tsatkeke. Ttē e' wa ie'pa shulirdaē. <sup>16</sup> E' tkõraē aishkuõ tā mik Skékõl tõ i kōs tso' blēulewā se' er a e' shuleraē Cristo Jesús batamik eta, wēs ttē buaē pakekeyõ e' tõ ichē es.

<sup>17</sup> Erē a' wēlepa dõr judiowak, esepa erblõke Moisés ttē dalõieño e' mik. A' e' ttsõķā tõ a' dõr Skékõl icha. <sup>18</sup> Í kiáne ie' ķi ese jcher buaē a' wā. A' yöule buaē ie' ttē wa, e' kueķi i dõr ibua'ie e' shukitmi a' a' wē. <sup>19</sup> A' ibikeitseke tõ o'ka pautmi a' a' buaē. E' dõr wēs s'wõbla kē wawēr esepa ulaiē es õ wēs se' tso' stui a' esepa a' bö'wõ kkachē es. <sup>20</sup> A' wā ttē dalõieño tso', e' dõr ttē mokĳi ena íyi jcher tajē e' ttē. E' kueķi a' ibikeitseke tõ a' a' se' kam yöer esepa yömi ena wēpa kē wā i jcher esepa wõblarmi. <sup>21</sup> E' dõr es, e' tā žwes a' kē e' wõbla'ũ? A' tõ s'patteke tõ kē s'káne akblõk tā žwes a' akblõke? <sup>22</sup> A' icheke tõ kē s'kawõtā s'senewābak dalõseũķwā tā žwes a' tõ idalõsewēwā? Íyi diõkõl tso' dalõie e' ar suluē a' éna tā žwes íyi tso' iwē a' e' ekibleke a' tõ? <sup>23</sup> Ttē dalõieño meneat a' a, e' wa a' e' ttsõķā tajē tā žwes a' kē tõ idalõie? E' wa a' tõ ie' dalõsewēwā. <sup>24</sup> Wēe' Skékõl yēkkuõ tõ ichē: "Pē' kē dõr judiowak, esepa tõ Skékõl cheke suluē a' ukuõmik."†

\* **2:1** Versículo i' a Pablo ttõkemi judiowak tā. E' wēnewā bua'ie verículo 12 ena itõķi itso' e' ķi. † **2:24** Isaías 52:5; Ezequiel 36.22

<sup>25</sup> Mokj wépa tö Moisés ttè dalöiëno e' iuteke, esepa a itóttola kkuólit t'èule tsir e' dör buaë. Eré yi kè tö iutè, esepa a kè idör ië bua', e' dör wës kè s'wakyöule es. <sup>26-29</sup> ¿Wépa dör judiowak chökke? E' kè dör iditséwó è wa. E' kè dör iwakyöule iyese alè k'è wa. Judiowak chökke e' dör wépa er yësyësé Skèköl wöa esepa, e' dör wës ie'pa wakyöule ier a es. E' kè onuk ttè dalöiëno e' a. E' ormi Wiköl Batse'r è a. Esepa wër buaë Skèköl wa, kè dör s'ditsó wa. E' kuekji pè' kè dör judiowak, kè wakyöule, kè wä Moisés ttè dalöiëno e' ku', esepa tö idalöié buaë, e' ta' ie'pa sueraë Skèköl tö wës judiowak wakyöule es eré kè iwakyöule mokj. Pè' tö ttè dalöiëno e' dalöié, eré kè iwakyöule ichkà k'è, esepa tö judiowak kè tö iutè esepa kkateraë ikj aishkuó ta, eré iwakyöule ena ttè dalöiëno tso' iwa.

**3**

<sup>1</sup> Yile tö ichakèmi: "E' dör es, e' ta' ¿ië bua' idir tö se' dör judiowak? Se' tottola kkuólit t'èule tsir ¿ië bua' e' dör?" <sup>2</sup> Ye' iutè tö e' dör buaë shütè ena iwä dör tajè. Ibu'a'ie dör tö Skèköl tö ittè me'atbak judiowak ulà a. <sup>3</sup> Yéne tö ie'pa welepa tö ttè ñe' dalósewéwa, eré e' è kuekji ¿ichémisó tö Skèköl kè ttò mokjé? <sup>4</sup> Au, kè idör es. Eré sulitane kachómi suluë, eré ie' ttò mokjé kekraë. E' dör wës itso' kitule ie' yèkkuó k'è es, e' tö ie' ché i' es:

"Sulitane isueraë tö be' ttò mokjé. Be' ttè shulirmi, e' ta' be' e' alórakà be' kkatókwakpa k'è."<sup>\*</sup> Es Skèköl yèkkuó tö ichè.

<sup>5</sup> Pè' welepa kè wä ijcher yësyësé, esepa tö icheke tö s'ser suluë, e' wa ikj wénéwa bua'ie tö Skèköl dör yësyësé sulitane tsatà. E' kuekji ie'pa tö icheke tö e' nuj k'è s'we'ikéitó, e' kè dör yësyësé. ¿Es idir? <sup>6</sup> Au, kè idör es. Skèköl chöpa kè dör yësyësé, e' ma ¿wes ie' a sulitane shulirmi yësyësé?

<sup>7</sup> Es yile tö ichakèmi: "Ye' kache wa Skèköl ttò mokjé e' k'ikarkeka tajè, e' ta' ¿i kuekji e' nuj k'è ye' k'katekeiaitó?" <sup>8</sup> E' chöpa es, e' ma só ichémi tö "i sulu k'è wamblösó as e' wa i buaë k'è d'ó tajè." Welepa tö icheke tö ttè ese wa ye' tö s'wöbla'weke. Ie'pa éna ye' wóakwa, e' kuekji ie'pa tö ye' cheke sulu es. Eré ie'pa esepa kichatéttsà kiane.

*Kè yi dör yësyësé Skèköl wöa*

<sup>9</sup> E' ma ¿i chémisó? Sa' dör judiowak ¿esepa dör buaë sulitane tsatà? Au, kè idör es. Ikkachétkeyó a' a' tö sulitane, judiowak ena wépa kè dör judiowak, esepa kos tso' sene sulu dikja. <sup>10</sup> E' dör wës itso' kitule Skèköl yèkkuó k'è es, e' tö ichè:

"¡kè yi ku' ekól wè'ia dör yësyësé Skèköl wöa!  
<sup>11</sup> I dör buaë Skèköl a ese kè ane yi éna yës.

Kè yi ku' Skèköl yulók.

<sup>12</sup> Sulitane tsi tróuke ie' yökj;

Ie'pa er sulunewá suluë.

Kè yi ku' ekól wè'ia i buaë ese uk.<sup>†</sup>

<sup>13</sup> Ie'pa ttò suluë, e' dör wës s'nu kélkuó k'kóppèe alar suluë es.

Ie'pa kkó k'è s'k'jtó'wé me'rie.<sup>‡</sup>

Ie'pa kapakó e' dör wës tkabè ichók kapóli es.<sup>§</sup>

<sup>14</sup> Ie'pa tso'ie alibchók s'malepa k'è kèsik wa.\*

<sup>15</sup> Ie'pa er me'rie s'ttèwá è k'è.

<sup>16</sup> Wé ie'pa dami eë s'we'ikè ena s'eriawé siarè ese mekearakitó.

<sup>17</sup> Sene bèrè ñalé e' kè s'ule ie'pa wá.<sup>†</sup>

<sup>18</sup> Skèköl dalöie e' kè eri ta' ie'pa wá yës."<sup>‡</sup>

Es Skèköl yèkkuó tö ichè.

<sup>19</sup> Se' wä ijcher tö i kos ché Skèköl ttè dalöiëno tö, e' chéitó wépa tso' idikja, esepa a. Ttè e' wa sulitane siwá'blówekewa Skèköl tö. Nies ttè e' tö ikkacheke tö sulitane k'è nuj tso' ie' wöa. <sup>20</sup> Ttè dalöiëno e' dör ikkachóie se' a' tö se' dör i sulu wamblökwakpa. E' kuekji kè yi a iyénukka: "ttè dalöiëno iutéyo seraq, e' kuekji Skèköl k'awótà ichók tö ye' dör pé' buaë yësyësé."

*Wës Skèköl tö se' kló'wémi wës pé' buaë yësyësé es*

*(3.21-31)*

<sup>21-23</sup> Eré i'ñe ta' Skèköl tö se' a' ikkachétke tö wës ie' tö se' kló'wémi wës pé' buaë yësyësé es. E' kè dör ttè dalöiëno iutésó e' wa. E' dör se' erblé Jesucristo mik e' wa. Wépa kos erblé ie' mik, esepa kló'wé Skèköl tö wës pé' buaë yësyësé es. Nies Skèköl yèkkuó kos e' tö isini'kué tö mokj idir. Sulitane dör i sulu wamblökwak. Kè se' serku' buaë yësyësé wës Skèköl olo ta' tajè e' ser es. E' kuekji sulitane dör ñies ie' wöa. <sup>24</sup> Eré Cristo Jesús tö se' ye'ttsa' i sulu ulà a. E' wa Skèköl tö se' kló'wé wës pé' buaë yësyësé es. E' kè k'è se' ñarku', e' dör éme. Es ie' er buaë ché se' a. <sup>25</sup> Ie' tö Jesucristo me'ttsa' ttèwá se' skéie e' pé tène tajè se' nuj olo'yoie. E' de se' ulà a se' erblé Jesús mik e' wa. E' wa ie' tö ikkaché tö ie' dör yësyësé. Ká iaiaé ie' tö sene suluë dalé'ttsé'bitu' enaë. <sup>26</sup> E' kéwó ska' ta' ie' kè wá se' weine wës s'kawótà weinuk es. Eré se' nuj patóne Jesucristo weine e' wa. E' wa Skèköl tso' ikkachók i'ñe ta' tö ie' dör yësyësé. Nies ie' tso' ikkachók tö wës ie' tö wépa erblé Jesús mik esepa kló'wémi wës pé' buaë yësyësé es.

<sup>27</sup> E' dör es, e' ta' ¿i wa se' e' t'tsókami Skèköl wöa? ¡Kè i wa! Se' erblé Jesús mik e' kuekji ie' tö se' kló'wé wës pé' buaë yësyësé es. Kè idör ttè dalöiëno iutésó e' kuekji. E' kuekji kè se' a' e' t'sténukka i wa yës. <sup>28</sup> Es se' tö íbata chéat tö Skèköl tö se' kló'wé wës pé' buaë

\* 3:4 Salmo 51.4 † 3:12 Salmo 14.1-3; 53.1-3 ‡ 3:13 Salmo 5.9 § 3:13 Salmo 140.3 \* 3:14 Salmo 10.7  
 † 3:17 Isaías 59.7-8 ‡ 3:18 Salmo 36.1

yësyësë es se' erblë Jesús mik e' kueķi. Kë idör ttë dalöiëno e' iütësö e' kueķi.

<sup>29</sup> Erë ħSkëköl dör judiowak ë Këköl? ħIe' kë dör pë' malepa Këköl? Tö, ie' dör pë' kë dör judiowak esepa Këköl ñies. <sup>30</sup> Ie' dör eköl ðme. Wëpa erblë Jesús mik esepa klö'wëitö wës pë' buaë yësyësë es. Kë ie' tkine tö judiowak idir ö kë idir judiowak. <sup>31</sup> Se' tsatķermi se' erblë Jesús mik e' wa, etä ħsö ichëmi tö Moisés ttë dalöiëno e' kë dichë tã'ia? ħAu, e' kë dör es! E' skëie se' tö ikĳ chë mokĳ tö idichë tso'ia iwäk es.

**4**

*Abraham erblë Skëköl mik*

<sup>1</sup> Etä sa' judiowak yë bak kië Abraham, ħima e' chëmisö? ħI jchenewa ie' wã erblë Skëköl mik e' wa? <sup>2-3</sup> Skëköl tö Abraham klö'upa wës pë' buaë yësyësë es i buaë wëitö e' kueķi, e' ma buaë ie' a e' ttsërmikã. Erë Skëköl yëkküö tö ichë: "Abraham erblë Skëköl mik, e' kueķi iklö'wëitö wës pë' buaë yësyësë es."\* E' kueķi ie' kë a e' ttsënukkã yës Skëköl wöã. <sup>4</sup> E' dör wës s'kanebletke ese patuë es, e' kë dör kakmeule. E' dör ikanebletke e' skë. <sup>5</sup> Erë yile erblë Skëköl tö s'sulusipa klö'wëmi wës pë' buaë yësyësë es e' mik, e' tã ese klö'weraë Skëköl tö es, erë kë iwã i buaë one e' tsatkoie. <sup>6</sup> Ñies e' sini'ku' David tö. Ie' ichë tö ayëcha buaë wë klö'wë Skëköl tö wës pë' buaë yësyësë es, kë dör i buaë wëitö e' kueķi. <sup>7</sup> Ie' tö iyë': "Wëpa kĳ inuĳ olo'yë Skëköl tö ena itköwëe ikĳ, jayëcha buaë esepa!

<sup>8</sup> Wëpa kë chakepaia Skëköl tö inuĳ kĳ, jayëcha buaë esepa!"† Es itso' kitule.

<sup>9</sup> Ye' ichakë tö wëpa yë' David tö ayëcha buaë ħesepa dör wëpa wakyöule itöttola kkuölit tëule tsir e' wa esepa ë? Au. Ñies ie' pa dör wëpa kë wakyöule esepa. Ye' ichëtke tö Abraham erblë Skëköl mik, e' kueķi iklög'itö wës pë' buaë yësyësë es. <sup>10</sup> Erë ħmik Skëköl tö iklög' es? ħE' dör iwakyöne e' ukuökĳ ö e' yöki? Kë idör e' ukuökĳ, e' dör e' yöki. <sup>11</sup> Ie' tö iklö'wë es ierblë imik e' kueķi. E' ukuökĳ tã ie' këitö e' wakyuök iwã kkachöie tö iklö'wëitö wës pë' buaë yësyësë es. Es ie' de wëpa erblë Skëköl mik erë kë iwakyöule, esepa kqs yë tsawëie. Es ie' pa kqs klö'wë Skëköl tö wës pë' buaë yësyësë es. <sup>12</sup> Ñies ie' dör wëpa wakyöule ena ierblë Skëköl mik wës ie' es kam iwakyuö e' yöki, esepa kqs yë.

*Skëköl tö ttë me' Abraham a*

<sup>13</sup> Skëköl kablë' Abraham a ttë i' wa: "Ye' tö kã ulitane meraë be' a ena be' aleripa a." Erë ie' kë wã imëno Abraham a ttë dalöiëno e' iütë wa. Imëitö ia ierblë imik e' wa. E' wa Abraham klöne wës pë' buaë yësyësë es.

<sup>14-15</sup> Mik Skëköl ttë dalöiëno dalösewëwäsö, etã e' nuĳ kĳ se' we'ikeraëitö. Erë ttë ñe' kë kunüpa, e' ma kë i tã' dalösewëwã. E' kueķi i uk Skëköl kablë' Abraham a e' wã mü dö wëpa tö ttë dalöiëno e' wã iütë esepa a, e' ma erblë Skëköl mik ena ie' kablë' Abraham a e' kë dör ñie bua'.

<sup>16</sup> E' kueķi i uk Skëköl kablë' Abraham a, e' wawëitö ðme wës iyi kakmeule es ie' erblë imik e' wa. Ie' tö iwë es er buaë choie sulitane a as iwã dö Abraham aleripa ulitane ulã a. E' wã dör tö i yëno Abraham a, e' kë dör wëpa tso' ttë dalöiëno dikĳã esepa ë a. Ñies e' dör wëpa kqs erblë Skëköl mik wës Abraham es esepa a. Es Abraham de se' ulitane erblë Skëköl mik esepa yëie. <sup>17</sup> E' dör wës itso' kitule Skëköl yëkküö kĳ es. E' kĳ Skëköl tö ichë Abraham a: "Ye' tö be' tkëka kã tajë wakpa yëie."‡ Skëköl dör s'duowã shķe'ukķanewak e'. ĩ kë ku' e' yuëmiitö ittö ë wa. Skëköl e' mik Abraham erblë.

<sup>18</sup> I yë' Skëköl tö Abraham a wësua kë iwã tköpa suë. Erë Abraham tö iklö'wë mokjë tã iwã panëitö. E' kueķi ie' de kã kuã'kĳ tajë e' wakpa yëie wës ie' a iyënebãk es. Skëköl tö ie' a iyë': "Be' aleripa alördaë tajë."§ <sup>19</sup> Tsir etã ie' kĳ duas de cien yëkö (100). Ie' wã ijcher tö ie' ena ilaköl Sara dewãtke këkëpa alula kë döpaia alãë. Erë erblë Skëköl mik e' kë olo'yane ie' wã yës. <sup>20</sup> Ie' kë wã ibikeitseka bötböt. Skëköl kablë' ie' a e' kë bikeitse ie' wã tö kë iwã tköpa. E' skëie ie' kĳ erblë Skëköl mik tã ikĳikëãitö. <sup>21</sup> Ie' tö iklö'wë mokjë tö Skëköl wã dichë tso' i uk ie' kablë' ese wöie. <sup>22</sup> E' kueķi Skëköl tö iklö'wë wës pë' buaë yësyësë es.

<sup>23</sup> "Skëköl tö iklö'wë wës pë' buaë yësyësë es." Ttë e' kë kiteãt yëkküö kĳ Abraham ë a. <sup>24</sup> Ñies kiteãt se' a. Skëköl tö Skëkëpa Jesús shķeö'kane e' mik se' erblë, e' tã ñies ie' tö se' klö'weraë wës pë' buaë yësyësë es. <sup>25</sup> Jesús wömenettsã ttëwã se' nuĳ kĳ, e' ukuökĳ tã ishķeö'kaneitö as se' klör wës pë' buaë yësyësë es.

**5**

*Skëköl er buanene se' kĳ*

<sup>1</sup> Se' erblë Jesucristo mik e' wa Skëköl tö se' klö'wë wës pë' buaë yësyësë es. E' kueķi ĩ'ñe tã ie' er buanene se' kĳ Skëkëpa Jesucristo batamik. <sup>2</sup> Jesucristo batamik ie' er buaë chë se' a, se' erblë ie' mik e' wa. Ie' er buaë chö se' a, e' a e' se' tkëwã darërë. Se' wã ijcher tö se' dörami ie' ska' olo tã' tajë ie' tã ñita. E' wã paneke se' tö kröröë, e' tö se' ttsë'weke buaë. <sup>3</sup> Erë kë dör e' ë, ñies se' ttsë'rke buaë mik se' weirke etã. E' wã dör tö se' wã ijcher tö mik se' weirke, etã e' tö se' kĳ dichë ieke idalë'ttsök er bua' wa. <sup>4</sup> ĩ kqs

\* 4:2-3 Génesis 15.6 † 4:8 Salmo 32.1-2 ‡ 4:17 Génesis 17.5 § 4:18 Génesis 15.5

dalë'ttsésò er bua' wa e' wër buaë Skëköl wa. Se' wër buaë ie' wa, e' ta' e' tò se' ké iwà kí panuk kröröë. E' kuëkí se' ttsé'rke buaë se' weirke' er shuá. <sup>5</sup> Wiköl Batse'r mène se' a' e' tò se' a' ikkacheke tò Skëköl éna se' dalër tajë, e' kuëkí ipané ñe' e' kè tò se' eriawëpa.

<sup>6</sup> Mik Skëköl tò ikéwò me' e' de, eta' Cristo kótëwà se' nuí skéie se' tso'ia kè a' e' tsatkër e' dalewa. <sup>7</sup> Darërë idir se' a' e' muktsà ttëwà o'ka skéie, erë imú dör pè' buaë yësyësë ese. Isalema yile e' mumittsà ttëwà pè' buaë shütë ese skéie. <sup>8</sup> Erë Cristo e' me'ttsà ttëwà se' skéie, se' bakia' e' wamblök suluë e' dalewa. E' tò se' a' ikkacheke tò kòs Skëköl éna se' dalër. <sup>9</sup> Ie' kótëwà ipë tène tajë e' wa Skëköl tò se' kló'wé wës pè' buaë yësyësë es. E' yitá buaë ie' wa se' tsatkërdaë Skëköl kësik yöki. <sup>10</sup> Mik se' bak Skëköl holökpaie, eta' ie' wák tò ier bua'wéne se' kí ilà ttëwà e' batamik. Erë j'ñe ta' ie' er buanene se' kí, e' yitá buaë se' tsatkërdaë Cristo tso'ne ttsé'ka e' diché wa. <sup>11</sup> Erë kè dör e' é. Skëképa Jesucristo batamik Skëköl er buanene se' kí, e' kuëkí se' ttsé'rke buaë ie' batamik.

#### *Adán ena Cristo*

<sup>12</sup> Wëm tsá yöne kiè Adán, e' wà sene sulu tsá dë'bitu ká i' a. Ie' dör sulitane yéie. E' kuëkí mik ie' tò i sulu tsá wamblé', eta' e' dör wës sulitane tò iwamblé' ie' ta' ñita es. E' tò sulitane wöme'ttsà i sulu wamblök ena e' nuí kí duókwa. E' kuëkí duëwà de sulitane kí. <sup>13</sup> Kam ttë dalöiëno mer Moisés a, e' yöki i sulu wamblënemibak je'. Erë e' kéwò ska' ta' ttë dalöiëno kè ta', e' kuëkí kè yi kkatëne inuñ kí. <sup>14</sup> Erë Adán kéwò ska' dō Moisés kéwò ska' sulitane blërke. Nies wépa kè wà Skëköl ttò dalösögonëwà wës Adán es, esepa blërlulune. Ie' dör wëm eköl doia' ie' itökí e' klíla.

<sup>15</sup> I sulu wamblé' Adán tò ena i buaë o' Skëköl tò se' a' e' dör kuá'kí. Adán tò i sulu wamblé', e' kuëkí tajë s'blërlulune. Erë wëm eköl skà, e' dör Jesucristo, e' batamik Skëköl er buaë ché se' a' éme kè tuë ta'. E' dör buaë ichökke, e' wa s'tsatkërke tajë. <sup>16</sup> Adán tò i sulu wamblé' etökicha éme, e' nuí kí sulitane kichatë'ttsà Skëköl tò. Erë Skëköl er buaë ché se' a, e' kuëkí ie' tò se' kló'wé wës pè' buaë yësyësë es, erë se' tò i sulu wamblëke tajë. E' kuëkí i buaë o' ie' tò se' a, e' kè dör wës i sulu wamblé' Adán tò es. <sup>17</sup> Es wëm eköl è tò i sulu wamblé', e' wa duëwà e' aléká sulitane kí. E' yitá i o' Jesucristo tò, e' wa wépa a Skëköl er buaë ché kló'wéitò wës pè' buaë yësyësë es, esepa kòs ulá a sene pa'ali doraë ta' ie'pa e' alóraká ie' ta' ñita. E' dör tajë tkóka i wamblé Adán tò e' tsatá.

<sup>18</sup> I sulu wamblé Adán tò etökicha, e' wa sulitane kichatënettsà. Erë i yësyësë wé Jesucristo tò etökicha, e' wa sulitane klömi wës pè' buaë yësyësë es as iser michoë. <sup>19</sup> Adán

tò Skëköl ttò tsá dalösögonëwà e' wa sulitane wömenettsà i sulu wamblök. Erë Jesucristo tò Skëköl ttò dalöië, e' wa se' tajë klórdaë wës pè' buaë yësyësë es.

<sup>20</sup> Skëköl tò ttë dalöiëno mé se' a' as i sulu wamblëkesò kòs e' jcherwà se' wà yësyësë tò e' dör suluë. Erë mik ijchenëwà se' wà, eta' se' éna iwà armi bua'ie tò kòs Skëköl er buaë ché se' a. E' dör tajë i sulu kòs wamblëkesò e' tsatá. <sup>21</sup> Mik se' bak klöulewà duëwà ulá a, eta' sene sulu e' ali'ka se' kí. Erë Skëköl er buaë ché se' a, e' dikjá se' tso' j'ñe ta' wës se' bak kuaë sene sulu dikjá es. Ie' er buaë ché se' a Skëképa Jesucristo batamik, e' wa se' kló'wéitò wës pè' buaë yësyësë es ta' sene michoë méitò se' a.

## 6

### *Se' dör wës s'duulewà es sene sulu yöki*

<sup>1</sup> E' dör es e'ma çima sö ichëmi? Çi sulu kí wamblëiasò as Skëköl er buaë kí chò se' a' tajë shütë? <sup>2</sup> Au, e' kè dör es. Se' dör wës s'duulewà es sene sulu yöki. Çwës i sulu wamblëmijasò? <sup>3</sup> Ça' kè wà ijcher tò se' wösune e' tò iwà kacheke tò se' batsulewà Cristo Jesús mik? E' dör wës se' ttëwafnak ie' ta' es. <sup>4</sup> Se' wösune e' wa kiane ché tò se' töbinëwà ie' ta. E' dör es as se' serne kua'kí wës Cristo shkenekane S'yé olo ta' tajë e' wa e' ser es.

<sup>5</sup> Se' batsulewà ie' mik ie' dunëwà eerò, es ñies se' shkerdakane wës ie' shkenekane es. <sup>6-7</sup> Se' wà ijcher tò s'duulewà kè ku'ia' i sulu wamblök. Es ñies wës se' dör kuaë e' dunëwà Cristo ta' wötëulewà krus mik. E' tka es as s'wák dër suluë e' diché erwa ta' s'tkòshkar sene sulu ulá a kè ku'ia' klöulewà. <sup>8-9</sup> Se' wà ijcher tò Cristo shkenekane, e' kuëkí ie' kè duöpawane. Duëwà kè e' alópaka' ie' kí. E' kuëkí se' duulewátke ie' ta, e' ta' se' tò ikló'wé mokjë tò se' serdane ie' ta. <sup>10</sup> Mik ie' kótwa, eta' ikótwa etökicha éme se' nuí kí, kè iskà duöpawaiene. Erë ishkenekane serkene Skëköl a. <sup>11</sup> Es ñies a' e' ttös mokjë tò a' duulewà sene sulu yöki, erë a' tso' ttsé'ka senoië yësyësë Skëköl a' a' batsulewà Cristo Jesús mik e' wa.

<sup>12</sup> E' kuëkí kè a' kawò mukjá sene sulu a' as kè ie' alóka' a' kí ta' i sulu kòs wamblak a' éna ese wamblé' a' tò. <sup>13</sup> Kè a' e' muktsaia' sene sulu ulá a' as e' kè tò a' kló'üwà i sulu wamblöie. E' skéie a' e' múttsà Skëköl a' wës s'duulewà shkenekane es. A' e' múttsa wa'ñe Skëköl a' senuk yësyësë. <sup>14</sup> A' kè ku'ia' Moisés ttë dalöiëno dikjá. A' tso' Skëköl er buaë chöke se' a' e' dikjá. E' kuëkí a' e' múttsà senuk yësyësë ta' es sene sulu kè e' alópaka' a' kí.

### *Skawótá senuk buaë yësyësë Skëköl a*

<sup>15</sup> E' dör es, e' ta' çima sö ichëmi? Se' kè ku'ia' ttë dalöiëno e' dikjá. Se' tso' Skëköl

er buaë chõ se' a e' dikja. E' ma e' kueki ÷i sulu wamblösõ? Au, kã idõr es. <sup>16</sup> A' wã ijcher buaë tõ yi ttõ iutekesõ, ese ulã a se' tso' klõulewã wës s'klõulewã kanë mësõie tso' iwõkir ulã a es. Es sene sulu ttõ iutekesõ, e' ta' e' ulã a se' tso' klõulewã wës kanë mësõ es ta' e' nuj ki se' duõralur weir michõë. Erë Skëkõl ttõ iutekesõ, e' ta' e' ulã a se' tso' ta' e' wa se' serdaë yësyesë. <sup>17</sup> A' bak klõulewã sene sulu ulã a wës kanë mësõ es. Erë wëstela Skëkõl a tõ i'ñe ta' ttë buaë pakane a' a e' iutë a' tõ er mokj wa. <sup>18</sup> Es a' yëulettatke sene sulu ulã a ta' i'ñe ta' a' de sene yësyesë e' ulã a. <sup>19</sup> (A' iã katõtõ Skëkõl ttë a' e' kueki ttë i' kleekeyõ a' a kanë mësõ ttë wa.) Kenet a' e' me'ttsã e' ia'ukka sene sulusi wa ena i sulu ë kji wamblös. Erë e' sù i'ñe ta' a' e' müttsã senuk yësyesë as a' ser batse'r.

<sup>20</sup> Mik a' bakiã klõulewã sene sulu ulã a, etã kã a' tkine sene yësyesë kji. <sup>21</sup> E' wa ÷i bua' dë' a' ulã a? E' ulã a a' mine duõkukur weir michõë. I'ñe ta' i sulu wamblë' a' tõ ese tõ a' jaëwëne. <sup>22</sup> Erë a' yënetsã sene sulu ulã a. A' de Skëkõl kanë mësõpaie. E' ulã a a' serke batse'r, e' bata dõr sene michõë. <sup>23</sup> I sulu wamblekesõ ese skëie s'duõrawã. Erë wëpa batsulewã Skëkëpa Cristo Jesús mik, esepa a' sene michõë meraë Skëkõl tõ ëme.

## 7

### *Se' du'ulur ttë dalõieno yõki*

<sup>1</sup> A yamipa, Moisés ttë dalõieno, e' sùle buaë a' wã. A' wã ijcher tõ ttë e' dikja s'tso', s'tso'ia' tse'ka e' dalewa. <sup>2</sup> E' dõr wës alakõl senewãbak es. Ese kã kawõtã iwëm õkwa iwëm tso'ia' tse'ka e' dalewa. Erë mik iwëm blënewã, etã e' ttë olone ie' kji. <sup>3</sup> Alakõl ese senë wëm õ'ka ta' iwëm chõkle tso'ia' tse'ka e' dalewa, e' ta' ttë e' dalõşewëwaitõ. Erë iwëm chõkle blënewã, e' ta' ie' kã ku'ia' ttë e' dikja. Ie' a' serwãmne buaë wëm skã ta', e' kã dõr trë.

<sup>4</sup> A yamipa, es idõr se' a' ñies. Se' batsulewã Cristo mik, e' kueki se' du'ulur ie' ta' ttë dalõieno e' yõki. Nies se' shkënekane ie' ta' as se' ser wës Skëkõl wa iwër buaë es.

<sup>5</sup> Mik se' bak senuk s'wãk dër sulu e' dikja, etã ttë dalõieno tõ se' wõrieike i sulu kji wamblös. E' ulã a se' mine duõkukur. <sup>6</sup> Se' bak klõulewã ttë dalõieno e' dikja, erë i'ñe ta' se' durulune ttë e' yõki. Se' yënetsã ttë e' ulã a as se' kaneblõ Skëkõl a kua' kji sene pa'ali mé iWikõl tõ se' a' e' wa. E' kã dõr wës se' bak kaneblõk ie' a' ttë dalõieno kitule yëkkuõ kji e' iutë wa es.

### *Sene sulu ta' ñippõk*

<sup>7</sup> Es idir, e' ma ÷ima sõ ichëmi? Moisés ttë dalõieno kitule ÷e' dõr suluë? Au, kã idõr es. Ttë e' kã kunúpa, e' ma ye' kã wã ijcher tõ i dõr suluë. Ttë e' kã tõ ichõpa: "Kã a' kawõtã' õ'ka iyi kkechõk," e' ma ye' kã wã ijcher tõ e'

dõr suluë. <sup>8</sup> Erë ttë dalõieno kã kunúpa, e' ma sene sulu kã diché ta'. E' kueki ttë dalõieno e' wa sene sulu tõ ye' erkiõwëka i sulu tsãkji wamblös. <sup>9</sup> Kã iãiaë kam ye' wã ttë dalõieno jcherwã, e' yõki ye' tse'ne' buaë. Erë mik ye' wã ttë e' jchënewã, etã sene sulu tso' ye' a' e' diché iëne ta' ye' éna iãnewã tõ ye' dõr i sulu wamblöskwak <sup>10-11</sup> kichatëulettã. Ttë dalõieno batamik sene sulu tõ ye' kjitõ' wë as i sulu wamblös, ese tõ ye' kichatëttsã. Es ttë e' tõ warma sene michõë mëmi ye' a, e' skëie ye' kichatëttsaitõ.

<sup>12</sup> Es Moisés ttë dalõieno e' dõr buaë, e' dõr yësyesë, e' dõr batse'r. <sup>13</sup> Etã ÷e' yëne tõ ttë buaë e' tõ ye' kichatëttsã? Au, kã idõr es. Ttë buaë e' batamik, i sulu wamblekeyõ, ese tõ ye' kichatëttsã. Ttë dalõieno e' tõ se' a' ikkacheke mokjië tõ i sulu wamblekesõ, ese dõr suluë ichõk. Es ttë dalõieno dõr buaë, e' wa sõ isuëmi tõ mokjië i sulu wamblekesõ ese dõr sulu ëme.

<sup>14</sup> Se' wã ijcher tõ ttë dalõieno e' dõr Skëkõl wák ttë. Erë ye' dõr siarë kã diché ta' klõulewã sene sulu ulã a ikanë mësõie. <sup>15</sup> I wamblekeyõ ese kã ane ye' wák éna. I buaë wãk ye' éna ese kã wëyõ. Erë i ar suluë ye' éna, ese wamblekeyõ. <sup>16</sup> I kã wamblak ye' éna ese wamblyõ, e' ta' e' wa ye' icheke tõ ttë dalõieno e' dõr buaë. <sup>17-18</sup> I buaë wãk ye' éna, ese kã or ye' a, e' wa ye' wã ijcher tõ i dõr buaë e' kã ku' ye' er a. Sõ ichõma kã i bua' ku' ye' wák dër sulu e' a. Es idir e' kueki ye' kã tõ i sulu wambleku' ye' wák er wa. Sene sulu tso' ye' er a, e' tõ ye' kã iwamblös. <sup>19</sup> I buaë wãk ye' éna, ese kã wëyõ. Nies i sulu kã wamblak ye' éna, ese wamblekeyõ. <sup>20</sup> Es i sulu kã wamblak ye' éna, ese wamblyõ, e' ta' e' kã dõr tõ ye' tõ iwambleke ye' wák er wa. E' dõr tõ sene sulu tso' ye' éna, e' tõ ye' keke iwamblös.

<sup>21</sup> Es ye' éna iãne tõ erë i buaë wãk ye' éna erë ye' a sene sulu tkër. <sup>22</sup> Ttë dalõieno me'at Skëkõl tõ, e' wa ye' wõbatsõ tajë. <sup>23</sup> Erë ilë skã tso' ye' a, e' tse'yõ tõ e' tso' i buaë wãk ye' éna ese wõklõ'uk. E' dõr sene sulu tso' ye' er a e' a, e' ulã a ye' tso' klõulewã.

<sup>24</sup> Ye' dõr siarëla. I sulu tso' ye' er a, e' tõ ye' kichatëttsã. E' yõki ÷yi tõ ye' tsãtkëmi? <sup>25</sup> Skëkõl tõ ye' tsãtkë Skëkëpa Jesucristo batamik. E' kueki wëstela chëyõ iã.

Es ye' éna ttë dalõieno me'at Skëkõl tõ e' ë iutak. Erë ye' wák dër suluë, e' tõ ye' kã i sulu wamblös.

## 8

### *Se' sermi buaë yësyesë Skëkõl Wikõl wa*

<sup>1-2</sup> Cristo Jesús batamik Skëkõl Wikõl tõ sene michõë meke se' a, e' tõ ye' yëttsã sene sulu ena duëwa e' ulã a. E' kueki i'ñe ta' wëpa batsulewã Cristo Jesús mik, esepa kã kichatepa Skëkõl tõ yës. <sup>3</sup> I kã õnuk Moisés

ttè dalöiëno a, e' wé Skëköl tö. Se' wák dër sulu e' kè tö se' kè ttè dalöiëno iütök buaë, e' kuekji e' kè a se' tsatkënu. Erë Skëköl tö iwák alà patkë'bitu s'ditsöie ttëwà se' skéie se' nuj patuoje. Es ie' tö sene sulu tso' se' er a e' kichatë'ttsa. <sup>4</sup> E' wé ie' tö as se' klö'ütö wës pë' buaë yësyesë es wës ttè dalöiëno yësyesë e' tö se' a ikië es. Se' klöne es, esepa serke wës Skëköl Wiköl kji ikiane es. Ie'pa kè serku'ia wës s'wák dër sulu kji ikiane es.

<sup>5</sup> Wépa serke wës s'wák dër sulu kji ikiane es, esepa er me'rie i kiane e' kji ese ë kji. Erë wépa serke wës Skëköl Wiköl kji ikiane es, esepa er me'rie i kiane e' kji ese ë kji. <sup>6</sup> I kiane s'wák dër sulu kji, ese kji se' er me'rie, e' ta e' bata dör se' duöwà. Erë se' er me'rie i kiane Skëköl Wiköl kji, ese kji, e' ta e' bata dör sene michoë, nies sene bërë Skëköl ta e'. <sup>7</sup> Erë wépa er me'rie i kiane s'wák dër sulu kji, ese kji, esepa kè tö Skëköl ttè dalöiëno e' dalöie, mokji ie'pa kè a idalöiër. E' kuekji ie'pa dör Skëköl bolökpà. <sup>8</sup> Wépa serke wës s'wák dër sulu kji ikiane es, esepa kè a i onuk wër buaë Skëköl wa.

<sup>9</sup> Erë Skëköl Wiköl tso' se' a, e' ta se' kè ku'ia s'wák dër sulu ulà a. E' skéie se' tso' Skëköl Wiköl ulà a. Yi kè a Cristo Wiköl ku', ese kè dör ie' icha. <sup>10</sup> Erë Skëköl tö se' klö'wé wës pë' buaë yësyesë es, e' kuekji Cristo tso' se' a. E' dör es, e' ta erë s'chkà nurdawà se' nuj kuekji, erë se' wiköl ser michoë. <sup>11</sup> Skëköl tö Cristo Jesús shkëg'kane, e' Wiköl tso' se' a, e' ta aishkuö ta ie' tö se' nu shkë'werakà iWiköl tso' se' a e' wa.

<sup>12</sup> A yamipa, e' kuekji kè se' kàne senukia wës s'wák dër sulu kji ikiane es. <sup>13</sup> Se' serke es, e' ta se' duörawà. Erë se' e' aléka iki Skëköl Wiköl wa, e' ta se' ser michoë.

<sup>14</sup> Wépa wëttsëke Skëköl Wiköl tö, esepa dör Skëköl ala'r. <sup>15</sup> Skëköl kè wà iWiköl mène se' a se' klö'wöwà kësik wa as se' suarne. E' skéie iWiköl wa se' de ie' ala'rie. Ie' Wiköl wa ie' a ichëmisö: "A yëwöla." <sup>16</sup> Nies ie' Wiköl tö se' kè ittso'k se' er a tö se' dör ie' ala'r. <sup>17</sup> Es se' dör ie' ala'r. Se' weirke Cristo ta ñita, e' je' ta ñies se' kirdawà buaë ie' ta ñita ie' olo ta' tajë e' ska'. Aishkuö ta i kës tso' blëule Skëköl wà mè se' a, e' döräe se' ulà a Cristo ta ñita.

*I tso' se' a aishkuö ta e' dör buaë chökle*

<sup>18</sup> Ye' a ta ie' olo tajë e' a se' döräñak aishkuö ta, e' dör buaë shu'te. E' o'm'ik ta se' weirke kës kà i' kji e' kè dör i. <sup>19</sup> Aishkuö ta ikkayërdaë wöshäe tö se' dör Skëköl ala'r. E' kèwó paneke kröröë iyi ulitane yö'at Skëköl tö ese tö. <sup>20</sup> İyi ulitane yö'at Skëköl tö ese kës sulunewà. I kës yöule e' kè wák e' suluonewà. Erë Skëköl wák tö iwöme'ttsa es. Erë ibua'wëneräitö aishkuö ta. <sup>21</sup> Ie' wák tö iyë'at: "Aishkuö ta iyi kës yö'at ye' tö e' yerattsaneyö iweirke tajë e' ulà a as

itsatkënar ena ilökarka tajë ye' olo wa ye' ala'r ta ñita." E' kuekji iyi ulitane yö'atitö e' tso' kawö e' panuk kröröë. <sup>22</sup> Se' wà ijcher tö dö ikkè ta iyi ulitane yö'atitö e' rrerkeia ena iweirkeia wës alaköl alà kyrketke weir es. <sup>23</sup> Erë kè e' ë rrerku' kawö e' panuk. Nies se' a Skëköl Wiköl menetke wës iyi tsä kakmè sia es, e'pa rrerkeia kawö e' panekesö e' dalewa. E' kèwó ska' ta Skëköl tö se' tseratkö da'a ila'rie, ta se' chkà mane'werattsaneitö buaë kè duötà'wajä. <sup>24</sup> Se' tsatkëne erë se' tsatkërkette da'aie e' panekesö. I tso'tke s'wà ese kè paneku'sö. E' kuekji mik se' tö ichë tö e' kèwó panekesö, eta e' wà kiane chë tö kam sö isaü. <sup>25</sup> Erë i kam saüsö ese panekesö, e' ta se' kawötà ipanuk bërë s'weirke kës e' dalë'ttsë wa.

<sup>26</sup> Es nies se' kè diché ta', e' kuekji Skëköl Wiköl tö se' kimeke. Kè se' wöblar buaë ttök Skëköl ta wës se' kè ttök ita es. Erë ie' wák Wiköl tso' se' tté chök ie' a tajë kköchë wa ena ttè kè yër sia ese wa. <sup>27</sup> Ie' wà se' er suule buaë. Ie' Wiköl tö ikieke ie' ichapa batse'r kji wës ie' kji ikiane es. E' kuekji i cheke iWiköl tö ie' a e' ane buaë ie' éna.

*Se' e' aléka iyi ulitane kji Cristo batamik*

<sup>28</sup> Se' wà ijcher tö wépa éna Skëköl dalër, nies iklö'bakitö wës ie' wák tö ibikeitsbak es, esepa ta i kës tköke, e' a ie' ulà ter ie'pa kimoie as idötsa buaë wës ie' kji kiane es. <sup>29</sup> Wépa shukitbakitö e'pa bikeitsbakitö tö idöräe wës ie' Alà es as ie' Alà dö ie'pa tajë e' shuà wës ikok es. <sup>30</sup> Wépa bikeitsbakitö e'pa kiéitö nies. Wépa kiéitö e'pa klö'wéitö wës pë' buaë yësyesë es. Wépa klö'wéitö es, esepa döräe ie' ta ñita ilo tajë e' a.

<sup>31</sup> E' dör es, e' ta kè i kianeia chë. Skëköl tso' se' ta, e' ta çl e' alömikà se' kji? <sup>32</sup> Ie' kè wà iwák Alà klëone, e' me'ttsaitö ttëwà se' ulitane skéie ie' yitã i kës meraëitö se' a ilà ta ñita! <sup>33</sup> Çyi tö wépa shukitbak Skëköl tö esepa kkatëmi? Kè yi. Ie' wák tö ie'pa klö'wétkë wës pë' buaë yësyesë es. <sup>34</sup> Çyi a ie'pa kichatërmi? Kè yi. Cristo Jesús kötwà se' skéie, e' kjië ta ishkenekane tkër Skëköl ulà bua'kka se' tté chök. <sup>35</sup> Çl tö se' yëttsami Cristo éna se' dalër tajë e' ulà a? Çse' weir tajë alé? Çl darërëe alé? Çse' weir Jesús tté batamik alé? Çse' duöke bli wà alé? Çkè se' datsi' ta' alé? Çlè tkö se' ta alé? Çs'ttëwà alé? Au. Kè i a se' yërpattsa ie' ulà a. <sup>36</sup> E' dör wës Skëköl yëkküö tö ichë es, e' tö ichë: Be' dalërmik wëkkë alé ta sa' tterawà pë' tö. Sa' suëke ie'pa dör wës obeja tsëmi ttëwà es.\* Es Skëköl yëkküö tö ichë.

<sup>37</sup> Erë e' shuà se' dör e' alökwakpa tsata, Cristo éna se' dalër tajë e' batamik. <sup>38</sup> E' kuekji ye' wà ijcher buaë tö kè i tö se' yepattsa Skëköl éna se' dalër tajë e' ulà a. Duewà, sene, ie' biyöchökwakpa, iyi wökir kè

wërta'wa, ì tkòke se' ta' j'ñe ta, ì tkòmi se' ta' aishkuò ta, ì skà tso' diché ta',<sup>39</sup> ì kòs tso' ká jai a, ì kòs tso' ká diòshet, ekké kòs ena ì skà yò'atitò, e' kòs kè a se' yèrpattsa ie' éna se' dalèr tajè e' ulà a. Ie' éna se' dalèr tajè, e' kkachéitò se' a Skèkèpa Cristo Jesús e' wa.

9

*Skèkòl tò Israel aleripa shùkitbak ie' alar'ie*

<sup>1</sup> Ì cheke ye' tò a' a e' dör mokjë. Ye' dör Cristo icha, kè ye' kachò. Nies Wikòl Batse'r wa ye' er tò ye' a' icheke tò e' dör mokjë.<sup>2-3</sup> Mokjë ye' chkenewa siarè, tajè ye' eriarke kekraè ye' wák ditséwòpa kuekji. Ye' wák mú kichaté Skèkòl tò yèttssa Cristo ulà a as ie'pa tsatkèr ye' skéie. <sup>4</sup> E'pa dör Israel aleripa. Ká iaiäè Skèkòl tò ie'pa tse'tkò ie' alar'ie. Ie'pa a ie' tò ilo tajè e' kkayè'. Ie' ena ie'pa ttè me' ñi a tsakjë ñies ittè dalöièno e' me'itò ie'pa a. Wés iyi wakanewè ie' dalöioie e' wa ie'pa wòblao'itò. Nies ie' kablè' ie'pa a er buaè chök. <sup>5</sup> Ie'pa dör sa' yèpa bak ká iaiäè dalöièrta' tajè, e'pa aleripa. Nies wé pairine'bitu idi' wa s'blúie e' kune' ie'pa ditséwò wa, e' dör Skèkòl dör iyi ulitane tsata' kïkarkèka kekraè e'. Es e' idir.

<sup>6</sup> Kè ye' ku' ichök tò Skèkòl kablè' er buaè chök ie'pa a e' kè wa bak. E' kè dör es. E' dör tò kè ie'pa sèraa dör Israel aleripa chökle Skèkòl a. <sup>7</sup> Nies Abraham aleripa, e'pa kibiiepa kè dör ie' aleripa chökle Skèkòl a. Skèkòl tò iyè' ie' a: "Be' aleripa chökle, e'pa doraè Isaac wa."<sup>\*</sup> <sup>8</sup> E' wà kiane chè tò kè yi dör Skèkòl ala'r s'ditséwò wa. E' skéie wépa tò ì uk Skèkòl kablè' e' klò'wé wés Abraham tò iklò'wé es, esepa è dör Abraham aleripa chökle Skèkòl a. <sup>9</sup> Skèkòl kablè' ie' a ttè i' wa: "Kawò ikké ta' duas ièk ye' dörane ta' be' alakòl Sara alà ta'tke."<sup>†</sup> E' klò'wé Abraham tò.

<sup>10</sup> Erè kè dör e' è. Sara alà kune' ñe' dör sa' yé bak ká iaiäè kiè Isaac e'. Ie' alà ka'ka itayè Rebeca ta' e'pa dör klò' wakpa wém. <sup>11-13</sup> Erè kam ie'pa kur, kam ie'pa tò ì buaè ù ò ì sulu wamblò, e' yòkì Skèkòl tò iyè' Rebeca a: "Ikibi èk doraè itsirla kanè mésoie."<sup>‡</sup> E' dör wés iskà tso' kitule Skèkòl yèkkuò kï es, e' kï ie' tò ichè: "Jacob dalène ye' éna, erè Esaú watéttsayò."<sup>§</sup> Es iätetke tò wéne shushtak ie' wán éna, ese shushtéitò as iwà döttssa wés ie' kï ikiane es. Kè dör ì wésò ese kuekji.

<sup>14</sup> Es idir, e' ta' çsò ichèmi tò Skèkòl kè dör yésyèsè? Au, kè idör es. <sup>15</sup> Ie' tò iyè' Moisés a: "Wé a ye' er buaè chak, ese a ye' er buaè chóraè. Nies wé suak ye' éna er siarè wa, ese suerayò er siarè wa."<sup>\*</sup> <sup>16</sup> E' kuekji ie' kè

er buaè chò se' a, se' kï ikiane ò ì wèkesò e' kuekji. Erè wépa suèke ie' tò er siarè wa, esepa a ie' er buaè chóraè. <sup>17</sup> E' dör wés itso' kitule Skèkòl yèkkuò kï es. E' kï Skèkòl tò ichè Egipto blú a: "Ye' tò be' tkéka ká i' blúie, e' wà ta' ye' wa. E' dör ye' diché kkachoe be' wa as yi dör ye' e' ttè pakar ká wa'ñe."<sup>†</sup> <sup>18</sup> Es yi suak Skèkòl éna er siarè wa, ese sueräitò er siarè wa. Nies yi er darè'wakwa ie' éna, ese er darè'werawa ie' tò.

<sup>19</sup> Erè isalema a' wéle tò ye' a' ichèmi: "Mokjë tò ì kiane wé Skèkòl kï ese kè wòklónuk yi a çwés ie' tò se' chakèmi se' nu' kï?" <sup>20</sup> Erè ye' iütèmi: A wém çima be' erbikò be' dör yi, e' tò Skèkòl iütè er sulu wa? Skaü kè tò ichèpa iyuökwak a: "çl' kuekji be' tò ye' yuè i' es?" <sup>21</sup> Skaü yuökwak e' a iyörmì wés ie' éna iyuak es. Skaüchka e' è yörmì skaü bua'buaiè ena skaü èsie ñies.

<sup>22</sup> Es ñies Skèkòl tò iwèmi wés ie' kï ikiane es. Ie' éna ie' kèsik ena ie' diché kkachak ì sulu wamblòkwakpa wòmeulettsa weinuk esepa ewéwa wa, e' ta' e' wèmi ie' tò. Erè e'pa kòs dalè'ttsekiä ie' tò bèrè énaè <sup>23</sup> as ie' olo tajè shütèè e' kkachòitò se' shùkitbakitò e'pa a. Ká iaiäè ie' tò se' shùkitbak suè er siarè wa ñies se' klò'bakitò as se' dör ie' ska' olo ta' tajè ie' ta' ñita. <sup>24</sup> Es judiowak ena pè' kè dör judiowak, e'pa shua' ie' tò se' klò'bak ie' wák a. <sup>25</sup> E' dör wés Oseas tò ikit iyèkkuò kï es. E' kï Skèkòl tò ichè:

"Wépa kè dör ye' icha, esepa kieraèyò ye' icha.

Wépa kè dalèr ye' éna, esepa a icheraèyò: 'ye' éna a' dalèr."<sup>‡</sup>

<sup>26</sup> Nies ká wé kï ye' tò iyè': 'a' kè dör ye' icha' ká e' è kï ye' icherane: 'Ye' dör Skèkòl chök e' ala'r a' dör.'<sup>§</sup>

<sup>27-28</sup> Isaías tò Israel aleripa yè' i' es:

"Ká wa'ñe wépa wòmeulettsa kichatènung e' wakanewèraè Skèkòl tò bet kè wòtkènu k yès.

E' kuekji erè Israel aleripa dör tajè wés dayè tséwò es,

erè ie'pa welepa è tsatkèrdaè, kè dör tajè."<sup>\*</sup>

<sup>29</sup> E' dör wés Isaías tò iyè' es. Ie' ichè:

"Skèkòl diché ta' iyi ulitane tsata', e' kè tò se' aleripa múpaat,

e'ma se' enewa sèraa wés Sodoma ena Gomorra wakpa enewa es."<sup>†</sup>

*Jesús ttè buaè e' dör Israel aleripa a ñies*

<sup>30</sup> Es sò isué tò pè' kè dör Israel aleripa, kè ku' sene yésyèsè e' yulök, esepa klò'wé Skèkòl tò wés pè' buaè yésyèsè es ie'pa erblé Jesús mik e' wa. <sup>31</sup> E' skéie Israel aleripa kï ikiane tò Skèkòl tò ie'pa klò'wé wés pè' buaè yésyèsè es ttè dalöièno e' dalöiè wa, erè e' kè ska'

\* 9:7 Génesis 21.12 † 9:9 Génesis 18.10,14 ‡ 9:11-13 Génesis 25.23 § 9:11-13 Malaquías 1.2-3 \* 9:15 Éxodo 33.19 † 9:17 Éxodo 9.16 ‡ 9:25 Oseas 2.23 § 9:26 Oseas 1.10 \* 9:27-28 Isaías 10.22-23 † 9:29 Isaías 1.9



ie'pa ulà dè'. 32 ¿Ì kuęki e' kè dè' ie'pa ulà a? Ie'pa kè erblène Jesús mik e' kuęki. Ie'pa erblé i buaé wekerakitó e' mik. E' kuęki ie'pa tène Jesús mik węs s'klasktêr ák mik es. 33 E' dór węs itso' kitule Skékól yękkuó kị es, e' tò ichè:  
 "Ye' ttó ttsó. Ák tkè'atyó et Sión,  
 e' mik pè' klastkèrdaé, ák e' tò ie'pa eróraé iskị.  
 Erè wépa erblé ák e' mik, esepa kè eriarpa."‡  
 Es Skékól yękkuó tò ichè. Ák e' tò Jesús ché.

**10**

1 A yamipa, Israel aleripa mú tsatkêr e' kkechekeyó tajé ye' er a, e' kiekeyó Skékól a. 2 Ye' ichè tò mokị ie'pa kaneblak darèrèé Skékól a. Erè ie' ttè mokịe e' wà kè ane ie'pa éna buaé. 3 Ie'pa kè éna iane tò ie' tò s'kló'weke węs pè' buaé yęsyésè es s'erblé Jesús mik e' wa. Ttè e' watéttsa ie'pa tò. Ie'pa atak buaé yęsyésè ie' wóa ie'pa serke es e' wa. 4 Erè Moisés ttè dalóieno e' wà dór Cristo kkaché. E' kuęki mik ie' de, etá ttè e' wà de. E' kuęki wépa erblé ie' mik esepa ulitane kló'weraé Skékól tò węs pè' buaé yęsyésè es.

5 Se' wër yęsyésè Skékól wa sene yęsyésè wa, e' ye' Moisés tò i' es: "Yi tò ttè dalóieno e' dalóie yęsyésè sęraa, ese sęr michoé ttè e' wa."\* 6 Erè se' wër yęsyésè Skékól wa se' erblé Jesús mik, e' ye' Moisés tò i' es: "Kè a' tò ibikeitsar tò ¿yi mi'mi ká jal a?" —E' dór węs se' mú mi' Cristo yulók as ibitune ká i' kị.— 7 "Nies ¿yi mi'mi ká dià kaska?" —E' dór węs se' mú mi' Cristo yulók as ishkerkane s'duulewá tso' esepa shuá.— 8 Erè ttè e' tò ichè: "Ttè buaé e' tso' tsjnet se' ska' ena se' kkó a ena se' er a."† Ttè buaé e' dór as a' erbló Jesús mik, e' ttè pakeke sa' tò. 9-10 Se' er a ttè e' kló'wésó as Skékól tò se' kló'ù węs pè' buaé yęsyésè es. Nies s'wák kkó wa ichésó tò Jesús dór Skéképa ekól è e' as se' tsatkêr. E' kuęki iché a' tò a' wák kkó wa tò Jesús dór Skéképa ekól è e', nïes ikló'wé a' tò a' er a' tò Skékól tò ishkeo'kane, e' ta' a' tsatkèrdaé.

11 Skékól yękkuó tò ichè: "Yi erblé ie' mik esepa kè eriarpa."‡ 12 Skéképa ñe' è dór sulitane Kékól. Judiowak ena wépa kè dór judiowak, esepa kọs Kékól ie' dór. E' kuęki ie'pa dór ñikkèé ie' wóa. Wépa kköchóke ie' a as ie'pa tsatkóitó, esepa a ie' er buaé chó tajé. 13 E' dór węs Skékól yękkuó tò ichè es, e' tò ichè: "Yi kọs tò e' tsatké kié Skékól a, esepa ulitane tsatkèrdaé."§ 14 Erè kè s'erblène ie' mik, e' ta' ¿węs s'kkóchómi ie' a? Nies kè s'wá ie' ttè ttséule, e' ta' ¿węs s'erblómi ie' mik? Nies kè yi wá ie' ttè pakane sia, e' ta' ¿węs ittsemisó? 15 Nies ie' ttè pakókwakpa kè

patkéne yi wá, e' ta' ¿węs e'pa dómi ie' ttè pakók sia? E' dór węs Skékól yękkuó tò ichè es, e' tò ichè: "Wépa wá ttè buaé datse sia, esepa de e' dór buaé shuá."\*

16 Erè kè sulitane wá ttè buaé e' klóne. Es Isaías tò iyé'bak: "A Skékól, ttè paka' sa' tò wésua kè yi wá e' klóne."† 17 Es sò isuè tò se' erblé Skékól mik, e' datse ie' ttè ttsésó, e' wa. Ttè e' dór Cristo ttè.

18 Erè ye' ichaké: ¿A' ichè, kè iwarak ttè e' ttséule? Erè ye' e' iutóne tò, ie'pa wá ittseule je'. E' dór węs Skékól yękkuó tò ichè es wé ichéitó:

"Skékól ttè pakókwakpa, e'pa tka ká wa'ñe, Ttè i' de dó wé ká i' erkeró ee."‡  
 Es Skékól yękkuó tò ichè.

19 Ye' iská chakéne: ¿A' ichè Israel aleripa kám éna iwá ar? E' iuté' Moisés tò mik ie' tò iyé' ie'pa a' tò Skékól tò iyé' i' es:  
 "Ye' tò a' keraé sibirukká pè' kè dór ì, esepa wa.

Ye' tò a' keraé ulunukká pè' kè éna ì ane, esepa kị."§

20 E' ukuókị ta' Isaías diché dè'ká ichók tò Skékól tò pè' kè dór Israel aleripa esepa ye' i' es:

"Wépa kè ku' ye' payulók, esepa tò ye' kué. Wépa kè ku' ye' chakók, esepa a ye' e' kkaché."\*

21 Nies Isaías tò iská yé' tò Skékól tò Israel aleripa ye' i' es:

"Ie'pa tò ye' ttó dalósewéwa ñippóke ye' ta, esepa a kekraé ye' tò ikimé watké."†  
 Es Skékól yękkuó tò ichè.

**11**

*Skékól er buaé chóraé Israel aleripa a*

1 I' ta' ye' ichaké: ¿A' ichè, Israel aleripa watéttsa Skékól tò sęraa? Au, kè idór es. Ye' wák dór Israel aleri ekól. Ye' dór Abraham aleri ekól Benjamín ditséwó wa. 2 Kuaé Skékól tò Israel aleripa shukitbak iwák ichaie. Kè ie'pa wateulettsa ie' wá. Elias ttè tso' kitule Skékól yękkuó kị węs Israel aleripa kkaté'kaitó Skékól a, ¿e' kè jcher a' wá? Ie' iché Skékól a: 3 "A Skékól, ie'pa tò be' ttekólpa malepa kọs ttélur. Nies ká' tso' íyi moká be' a, e' kọs tkéttýsarakitó. Ye' è atéat ttsé'ka erè ye' ttakwá ie'pa éna nïes."\* 4 Erè Skékól tò ie' iuté: "Wépa dóká mil kuryók (7.000) e'pa kè e' tkéulewá kuché kị Baal dalóioie ekképa tso'ia ye' wá."† 5 Es nïes íñe ta' Israel aleripa tso' tajé, erè e' shuá wépa a Skékól er buaé yé' ta' ishukititó, esepa kè dór tajé. 6 Ie'pa shukititó ie' er buaé ché ie'pa a e' kuęki, e' ta' e' wá kiane ché tò e' kè dór i' buaé

‡ 9:33 Isaías 8.14; 28.16 \* 10:5 Levítico 18.5 † 10:8 Deuteronomio 30.14 ‡ 10:11 Isaías 28.16 § 10:13 Joel 2.32 \* 10:15 Isaías 52.7 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 \* 10:20 Isaías 65.1 † 10:21 Isaías 65.2 \* 11:3 1 Reyes 19.10,14 † 11:4 1 Reyes 19.18

wé ie'pa tò e' kuekji. Ichópa es, e'ma kē ie' er bua' yēne.

<sup>7</sup> E' kuekji sō isué tò Israel aleripa bak tsatkè yulók, e' kē dē' ie'pa ulitane ulà a. Erè ie'pa welepa shukit Skèkòl tò, e'pa ulà a ide, erè malepa er darèrulune. <sup>8</sup> E' dōr wēs Skèkòl yèkkuò tò ichè es. E' ichè: "Skèkòl tò ie'pa kē er chòukwa ie' ska'. E' dōr wēs ie'pa wòbla tà', erè kē iwawēr es. E' dōr wēs ie'pa kukòña tà' erè kē iwattsēr. Dō j'ñe tà ie'pa dōr es."<sup>9</sup> Es ñies David tò ie'pa yē' i' es:

"Mik ie'pa tso' kawō tkò'uk kanēē, etā as ee ibolòkpa tò iklò'ùwā kēsik wa as ie'pa klastkēr ta iweirda.

<sup>10</sup> Iwòbla mú kē wawèria.

Itsijwò mú kōrwā dali ekkēē dikijā kekraē."§

*Pē' kē dōr Israel aleripa esepa tsatkērdaē*

<sup>11</sup> I' tà ye' ichakē: A' ichè Israel aleripa tò Jesús watē'ttsa çe' wà kiane chē tò ie'pa kē tsatkērpa? Au, e' kē dōr es. E' skéie i sulu wamblé ie'pa tò ñe' batamik pē' malepa tsatkērmi. E' tka es as ie'pa sibirka pē' malepa kī tà ierkindak erblók Jesús mik. <sup>12</sup> I sulu wamblé' ie'pa tò, e' batamik pē' malepa a Skèkòl er buaē ché tajē ká wa'ñe. E' yitā buaē sulitane a ie' er buaē kī chóraē tajē shutē mik judiowak tajē erblé Jesús mik etā.

<sup>13</sup> Erè a' kē dōr judiowak, esepa a ye' tò ilè cheke. Skèkòl tò ye' a kanē i' me' Jesús ttekòlie pē' kē dōr judiowak esepa a ttè pakók. Kanē e' dalēr tajē ye' éna. <sup>14</sup> Isalema kanē e' wa ye' tò ye' wák ditséwōpa welepa mú ukýwèkka tà ie'pa ñies erblómi Jesús mik as itsatkēr. <sup>15</sup> Ie'pa watéttsa Skèkòl tò e' batamik ie' ena ká wa'ñe wakpa malepa er buarmine ñi kī. E' yitā mik ie' tò ie'pa ská kiéwane buaē, etā e' dōr buaē shutē. E' dōr buaē wēs s'duulewā e' shkenekane es. <sup>16</sup> Harinachka tsá meule Skèkòl a\* e' dōr batse'r, e' tà iéyók dōr batse'r ñies. Ñies kal wikicha dōr batse'r, e' tà kal e' kōs dōr batse'r ñies. Es judiowak yépa tsá dōr Skèkòl icha, e' kuekji ileripa dōr ie' icha ñies.

<sup>17</sup> Skèkòl tò judiowak watéttsa, e' dōr wēs kal uru kié olivo e' ulà tē es. Pē' kē dōr judiowak esepa dōr wēs olivo klò kañiru ulà tkéwā olivo uru ulà tēule ese skéie es. E' batamik j'ñe tà a' serke buaē olivo klò uru e' wì mik. <sup>18</sup> E' kuekji olivo uru ulà tēule, e' kē kī a' e' ttsókka. Erè a' e' tsakka, e' tà a' éna ianú tò ulà serke iwí mik; iwí kē serku' iulà mik.

<sup>19</sup> Isalema a' ichèmi: "E' yēne erè iulà uru tērolone as sa' tkérwane iskéie." <sup>20</sup> E' yēne erè ie'pa tērolone ie'pa kē erbléne Jesús mik e' kuekji. Erè a' erblé Jesús mik, e' ē kuekji a' tkéulewā olivo klò uru mik. E' kuekji kē a'

e' ttsókka. Warma a' kawōtā Skèkòl dalóiök.

<sup>21</sup> Ie' kē wā kal chók e' ulà meneat, e' yitā kē ie' tò a' mepaat. <sup>22</sup> A' éna ianú tò wēs Skèkòl dōr. Ie' er buaē chómi se' a, erè ñies ie' a' s'kichatērmi. Wépa anemi i sulu a, esepa kichaterattsaitó. Erè ie' er buaē ché a' a. A' erblókeia ie' mik, e'ma buaē idir. Erè a' kē serku'ia es, e' tà a' tērdattsa ñies. <sup>23</sup> Judiowak kē erbléne Jesús mik. Erè e' kē wambléia ie'pa tò tà ierblé imik, e' tà Skèkòl wā diché tso' ie'pa tkowane iwákpa kéli mik, e' kuekji itkērdawarak. <sup>24</sup> E' wā dōr i' es: a' kē dōr judiowak, e'pa dōr wēs olivo kañiru ulà tēule tkéulewā olivo uru mik es. Erè e' kē wētā'so es, er es Skèkòl tò iwé a' a. E' yitā buaē judiowak dōr wēs ulà chók es, esepa tkērwamine buaē iwákpa kéli mik.

*Israel aleripa tsatkērdaē tajē*

<sup>25-26</sup> A yamipa, kenet ta ttè tso' bléule, ese chekeyó a' a. Ye' kī ikiane tò ttè e' jcherwā a' wā as a' kē e' ttsókka tò a' wā iyi jcher Israel aleripa tsatā. Ttè bléule e' dōr i': j'ñe tà Israel aleripa kibiiēpa er darèrulune dō mik pē' malepa shukitbak Skèkòl tò e' kōs tsatkēne etā. E' ukuókī tà ie'pa kōs tsatkērdaē wēs Skèkòl yèkkuò tò ichè es, e' tò ichè:

"S'tsátkók'wak datse' Sión,

e' tò sene sulu kōs yerattsa Jacob aleripa shua.

<sup>27</sup> Ttè e' meraëyó ie'pa a mik ie'pa nuì olo'yéyo ie'pa kī etā."<sup>†</sup>

Es Skèkòl yèkkuò tò ichè.

<sup>28-29</sup> Mik Skèkòl tò s'shushtë er buaē choie sia, etā e' kē mane'wepaitó. Israel aleripa tò Jesús ttè buaē watéttsa, e' kuekji j'ñe tà ie'pa dōr Skèkòl bolòkpa. Erè ká iaiāe ie'pa yépa bak e'pa shukititò er buaē choie ie'pa a. E' kuekji ie'pa aleripa dalérkeia ie' éna. E' tka es ie'pa tà as a' tsatkēr. <sup>30-32</sup> Sulitane tò ie' ttè dalóséwéwa, e' nuì ulà a se' tso' klóulewā. E' me'atbakitò es as ie' a sulitane sur er siarē wa ñikkéē. E' kuekji kenet a' tò ie' dalóséwéwa, erè j'ñe tà a' sauitò er siarē wa, ie'pa tò ie' dalóséwéwa e' kuekji. Es ñies j'ñe tà ie'pa tò ie' dalóséwéwéwa, erè e' dōr as a' sauitò er siarē wa, ñies as ie'pa saūneitò er siarē wa.

<sup>33</sup> Skèkòl er buaē ché tajē shutē se' a. Ie' wā iyi ulitane jcher buaē sulitane tsatā. Ie' kabikeitsō tajē iskjē. I bikeitseke ie' tò ese kē wā pakanuk yi a. I wēkeitò ese kē anuk yi éna. <sup>34-36</sup> I kōs e' wì dōr ie'. I kōs tso' ie' batamik. I kōs tso' ie' wák a. E' kuekji Skèkòl yèkkuò tò ichè:

"Skèkòl erbikò e' kē jcher yi wā.

Kē yi a' ie' pautuk.

Kē yi a' i' menuk ie' a' kēweie

‡ **11:8** Deuteronomio 29.4; Isaías 29.10 § **11:10** Salmo 69.22-23 \* **11:16** Harinachka tsá meule Skèkòl a: Pablo tso' ichòk tò judiowak dōr wēs harinachka es. Harinachka tsá e' dōr wēs judiowak yépa tsá Abraham ena Isaac ena Jacob es. Harinachka iéyók e' dōr wēs ileripa datse' itókj es. † **11:27** Isaías 59.20-21; 27.9

as ie' tō iské mūne iā." jSkékōl kĭkōkašō kĕkraē! jEs e' idir!

## 12

*Wes se' kawōtā senuk Skékōl ala'rie*

<sup>1</sup> A yamipa, Skékōl er buaē ché se' a tajē, e' kuēkĭ ye' kĕkōhō a' a tō a' e' mūttsa ekōl ekōl ie' a kĕkraē wes i batse'r meule ie' a wēr buaē ie' wa es. Es se' tō ie' dalōiē e' wakanewēmi mokĭē. <sup>2</sup> Kē a' senukiā wes wēpa kē tō ie' dalōiē esepa ser es. E' skēie a' erbiĕ mane'ūttsa pa'alĭ tā e' wa a' sermi buaē yēsýēsē. Es i kiane ie' kĭ ese jĕhermi buaē a' wā wawē. E' wā dōr i dōr buaē, i wēr buaē ie' wa ena i dōr yēsýēsē ese.

<sup>3</sup> Ie' er buaē ché ye' a, e' kuēkĭ ie' tō kanē me' ye' a Jesús ttekolie. E' wa ye' tō a' kos a' ichē tō kē a' e' bikeitsōkka tkōka kos s'ké e' bikeitsōk e' tsatā. E' skēie se' e' bikeitsō yēsýēsē kos Skékōl tō imē se' a erbioie ie' mik ekkē. <sup>4</sup> E' dōr wes se' dōr es. Se' wōbla tā, ulā tā' ena s'yese skā tso' tajē kua'kĭ kua'kĭ, erē e' kos wōiēulewā nĭtā s'wák ekōl ē a. <sup>5</sup> E' sū se' erblōke Cristo mik esepa dōr tajē kua'kĭ kua'kĭ, erē se' kos dōr wes wák ekōl ē es, se' kos batsulewā ie' mik e' wa.

<sup>6</sup> Es Skékōl tō imē se' a kua'kĭ kua'kĭ nĭ kĭmoie wes ie' kĭ ikiane es. E' kuēkĭ wēpa a imēitō ttoie ittekolie, esepa ttō es, ie' pa erblō Skékōl mik e' wa. <sup>7</sup> Wēpa a imē Skékōl tō s'kĭmoie, esepa tō s'kĭmú. Wēpa a imēitō s'wōbla'woie Skékōl ttē wa, esepa s'wōbla'ú. <sup>8</sup> Wēpa a imēne s'er diché ioie, esepa tō s'er diché iō. Wēpa a imēne íyi kakmoie, esepa ikakmú er bua' wa kē dōr i skēie. Wēpa a imēne s'wēttsōie, esepa s'wēttsú kanē. Wēpa a imēne s'malepa suoiē er siarē wa, esepa tō iwā ú ttsé'ne buaē wa.

*Jesús mik erblōkwakpa nĭ dalēr*

<sup>9</sup> A' nĭ dalēritsō er mokĭ wa. Sene sulu kos e' watōttsa. E' skēie sene yēsýēsē kos e' a' a' senu' kĕkraē. <sup>10</sup> A' nĭ dalēritsō wes nĭ ēlpa nĭ dalēr es. A' nĭ dalōiō tajē.

<sup>11</sup> jKos weke a' tō, e' ú kanē. Kē a' bikēnuk. Skékōl kanē ú ttsé'ne buaē meke iWĭkōl tō se' a' e' wa.

<sup>12</sup> jBuaē panekesō, e' kuēkĭ a' senu' ttsé'ne bua' wa. A' weirke e' dalē'ttsō er bua' wa. A' ttō S'yē tā kĕkraē.

<sup>13</sup> S'batse'rpa malepa weirke kĭ ilē kiane, esepa kĭmú. Yi de a' pakōk, ese kiōwā er bua' wa.

<sup>14</sup> Wēpa tō a' we'ikeke Jesús ttē kuēkĭ, kē esepa kĭ alibĕhōk, e' skēie er buaē chō iarak.

<sup>15</sup> Wēpa ttsé'rke buaē, esepa tā a' ttsé'nú buaē. Wēpa jūke, esepa tā a' jū.

<sup>16</sup> A' senu' bĕrē nĭtā. Kē a' e' ttsōkka s'malepa tsatā. E' skēie a' e' batsō se' ēsepala

tā buaē. Kē a' e' bikeitsōkka tō a' wā íyi jĕher tajē.

<sup>17</sup> Yi tō i sulu wamblē a' kĭ, e' tā kē iské wamblarne. jKos dōr buaē yēsýēsē sulitane a' ese ú. <sup>18</sup> A' senu' bĕrē sulitane tā kos a' dirmi ekkē. <sup>19</sup> A' yamipa dalēr ye' éna, kē i sulu skē wamblarne yi kĭ. E' skēie imúat Skékōl kēsik ulā a. Ie' tō ichē iyēkkuō kĭ i' es: "Ye' ē wōkĭ iské wērke wē. Yi tō i sulu wamblē, e' skē wērayō iĕi."\* <sup>20</sup> Nĭes ichē: "A' bolōkpa dué bli wā, e' tā itĭō. Ie' er sine, e' tā dĭ' mū iā yē. A' iwé es, e' tā ie'pa jaērdaē."<sup>†</sup> <sup>21</sup> Kē sene sulu kar e' alōkka a' kĭ. E' skēie a' e' alōka sene sulu kĭ sene yēsýēsē wa.

## 13

<sup>1</sup> Sulitane kawōtā ká wōkirpa ttē dalōiōk. Skékōl tō kawō me' ie'pa a' s'wēttsōie. Itso'rak kos e'pa tkē'ka ie' tō. <sup>2</sup> E' kuēkĭ wēpa kē tō ie'pa dalōiē, esepa nĭppōke wēpa tkē'ka ie' tō esepa tā. Ese wakpa weirdaē iulā a. <sup>3-4</sup> S'wōkirpa kē tkēnekā s'er yēsýēsē esepa we'ikōk as isuwardak. Ie'pa dōr Skékōl kanē mēsopa a' kĭmoie. Ie'pa tso' s'er suluē esepa we'ikoie. Esepa je' kawōtā suanuk. A' senu' kē suar tā' s'wōkirpa yōkĭ, e' tā a' senu' yēsýēsē tā ie'pa tō a' kĭkeraka. Erē wēpa serke suluē, esepa je' kawōtā suanuk. Kē ē ichōk ie'pa a' kawō mēne s'we'ikoie. Ie'pa tso' kanēblōk Skékōl a' s'er sulu we'ikoie wes kawō meneat ie'pa a' es.

<sup>5</sup> E' kuēkĭ se' kawōtā ie'pa ttē iūtōk, e' kē dōr as kē itō s'we'ikō e' ē kuēkĭ. E' dōr tō se' er tō se' a' icheke tō e' dōr buaē yēsýēsē e' kuēkĭ. <sup>6</sup> E' kuēkĭ nĭes inukōl patauk ie'pa tō se' keke ese patuēkesō. Ie'pa dōr Skékōl kanē mēsopa kanēblōke ie' a' s'wōkirpaie. E' dōr ie'pa kanē, e' kuēkĭ ie'pa patuē e' dōr buaē. <sup>7</sup> E' kuēkĭ imusō ie'pa a' ekōl ekōl wes s'kawōtā imuk es. Ilē kawōtā patuē etā ipataú. Wēpa kawōtā dalōiē esepa dalōiō.

<sup>8</sup> A' wā nuĭ tso' kos e' pataú. Erē nuĭ tso'ia se' kĭ kĕkraē, e' dōr nĭ dalēritsē, e' kē patonuktsa se' a. S'malepa dalēritsesekesō, e' tā e' wa ttē dalōiēno me'at Moisés tō e' wā kos dalōiēsō. <sup>9</sup> Ttē e' tō ichē: "Kē a' kawō tā' s'senewabak dalōseukwā; kē a' kawō tā' s'ttōkwā, kē a' kawō tā' akblōk; kē a' kawō tā' o'ka íyi kĕchōk."\* Ttē e' ena imalepa kos e' wōiēnewā ttē etkē a, e' dōr i': "A' malepa dalēritsō wes a' wákpa e' dalēr es."<sup>†</sup> <sup>10</sup> S'malepa dalēritsesekesō, e' tā kē i sulu wamblapasō yi tā. Es ttē dalōiēno kos e' dalōiekesō mokĭē yēsýēsē.

<sup>11</sup> A' senu' es. S'tsatkē kēwō kĭ dewatke tsĭnet se' erblē' Jesús mik kuaē e' tsatā. E' kēwō a' se' tso' j'ne tā, e' anu' a' éna. E' kuēkĭ kē a' senukiā wes s'kapōtēr nañewe es. <sup>12</sup> Sene sulu kēwō erkwatke tā se' tsatkeke

\* 12:19 Deuteronomio 32.35 † 12:20 Proverbios 25.21-22 \* 13:9 Éxodo 20.13-17 † 13:9 Levítico 19.18

e' kəwō dökəwatke wəs ká ñirketke s'kij es. E' kuęki kē se' e' wamblōia suluē wəs pē' tso'ia stui a e' wamblō es. E' skēie se' senū yēsýsē, e' dōr wəs s'ser ká ñi a es. Se' e' duōser ñippōk sene sulu ta wəs ñippōkwakpa es. <sup>13</sup> Se' senū buaē yēsýsē wəs s'ser ká ñi a es. Kē se' káne e' wamblōkia bloblopa es. Kē se' káne trēnuk, e' ya'uk sulu. Kē se' káne ñippōk. Kē se' káne ukyēnuk s'malepa ta. <sup>14</sup> E' skēie a' senū buaē yēsýsē wəs Skēkēpa Jesucristo kji kiane es. Kē a' tō ibikeitsōk tō wəs a' a' s'wák dēr sulu e' wōpatērmi.

## 14

### *Kē a' ñi bikeitsōk suluē*

<sup>1</sup> Wēpa erblōke Jesús mik, erē kam ierblō bua'ie, esepa kiōwā er bua' wa. Ttē bikeitseke a' tō kua'kji kua'kji ese kē kji a' ñi iūtōk. <sup>2</sup> A' wēlepa tō ibikeitseke tō Jesús mik erblōkwakpa a' iji ulitane katarmi. Erē a' wēlepa skā kam erblō bua'ie Jesús mik, esepa tō iklō'wē tō iyiwak chka kē katar. <sup>3</sup> Wēpa tō iji ulitane katé, esepa kē káne wēpa kē ikatē esepa chōk iki. Nies wēpa kē ikatē, esepa kē káne wēpa tō ikatē esepa chōk iki, Skēkōl tō ie'pa klōo'bak ie' ichaie e' kuęki. <sup>4</sup> Se' dōr Skēkēpa Cristo kanē mēsopa. Wəs se' wēr ie' wa ekōl ekōl, e' wērke ie' wák wōki. Ie' a' se' kimermi as se' wēr buaē ie' wa, e' kuęki se' wērdaē ie' wa buaē. E' kuęki ž wəs s'yamipa chēmiso suluē?

<sup>5</sup> Nies se' šuā wēlepa tso' tō ibikeitseke tō s'kawōta diwō wēle batseitsōk imalepa tsata. Erē ieltēpa tō ibikeitseke tō diwō ulitane dōr ñies ēme. Se' kawōta wā ijchēnuk ekōl ekōl tō i klō'wēsō e' dōr yēsýsē. <sup>6</sup> Wēpa tō iklō'wē tō s'kawōta diwō wēle batseitsōk bua'iewā, esepa tō batseitseke Skēkēpa Cristo dalōioie. Nies wēpa tō iji ulitane katé esepa tō ikateke Skēkēpa Cristo dalōioie ta wéstela chekeitō Skēkōl a' iki. Wēpa kē tō iyiwak chka katēia, esepa tō ilo'yé Skēkēpa Cristo dalōioie ta wéstela chekerakitō Skēkōl a' i ñekerakitō e' kji.

<sup>7</sup> Se' dōr Skēkēpa Cristo icha, e'pa tso' ttsē'ka o' e'pa duowā e' dōr ie' dalōioie, kē idōr se' wák dalōioie. <sup>8</sup> Mik se' tso'ia ttsē'ka, e'ta se' serke ie' a. Mik se' duowā, e'ta se' duowā ie' a. Se' tso' ttsē'ka o' se' duowā, erē se' dōr ie' icha. <sup>9</sup> Ie' kōtēwā e' shkenekane as ie' dō s'durulune ena s'tso' ttsē'ka e'pa kōs Kēkōlie.

<sup>10</sup> Se' ulitane dōraē Skēkōl tkēr s'shulo kulé kji e' wōrkji. E' kuęki žiōk a' ñi chō o' ñi saū suluē? <sup>11</sup> Skēkōl tō ichē iyēkuō kji i' es:

“Ye' wák ser wa yō ichē:

Sulitane e' tulōrawā kuchē kji ye' wōrkji.

Sulitane tō ye' kikerakā.”\*

Es Skēkōl yēkuō tō ichē. <sup>12</sup> Es sō isuē tō wəs se' serke e' kji Skēkōl tō se' chakerane ekōl ekōl.

<sup>13</sup> E' kuęki kē se' káne ñi chōkia suluē. E' skēie a' e' tkōwā darērē tō s'yamipa wōklō'wēmi o' i tō iēmimine sene sulu a, ese kē war. <sup>14</sup> Ye' wā ijcher buaē tō kē chke wēne tō s'ia'wēpa ñaie Skēkōl wōa. Ye' erblōke Skēkēpa Jesús mik, e' wa ye' iklō'wē yēsýsē tō es idir. Erē wēpa tō iklō'wē tō chke wēle tō s'ia'wēmi ñaie, e' ta es idir esepa a. <sup>15</sup> E' kuęki a' tō s'yami wēle siawēwā i kateke a' tō e' batamik, e' ta e' kē dalēritseku'ia' a' tō. Nies ie' skēie Cristo kōtēwā, e' kē sulu'warwā i kateke a' tō e' batamik. <sup>16-18</sup> I blúie Skēkōl tso' e' wá kē dōr chke ena di'yē. E' wá dōr sene yēsýsē ena sene bēre ena ttsē'ne buaē Wikōl Batse' wa. Yi tō Cristo káne wēke es, ese wēr buaē Skēkōl wa ñies sulitane wa. E' kuęki i tō a' yamipa kēmi a' chōk suluē i dōr buaē a' a' e' kji, ese kē war.

<sup>19</sup> Es i kōs tō se' kimeke senuk bēre ñita ena ñi dichē iōk Skēkōl a, ese ūsō. <sup>20</sup> I buaē wētkē Skēkōl tō a' er a, e' kē sulu'warwā chke ē kuęki. Mokji chke ena di'yē kōs dōr batse'r. Erē sulu idir tō s'yamipa armine sene sulu a se' ukuōmik i katēsō i yēsō ese wa. <sup>21</sup> Buaē idir tō iyiwak chka mú kē katēsō o' blo' mú kē yēsō o' i kōs mú kē wēsō. Erē kē idōr buaē tō s'yamipa armine se' ukuōmik. <sup>22</sup> Ima a' ttē i' bikeitsē e' blō a' er a Skēkōl ē a. Wēpa tō i wēr buaē ie'pa wa ese wē ta ittse tō kē iki i nuji ku', jayēcha buaē esepa! <sup>23</sup> Erē yi tō i katé ta ibikeitsékaitō bōtbōt dō' ye' tso' i sulu wamblōk, e' ta e' nuji tso' iki. Ie' kē wā iklōne mokji tō buaē idir, e' kuęki e' dōr suluē ie' a. I kōs wēsō e' kē one se' wā yēsýsē wəs iklō'wēsō es, e' ta e' dōr suluē se' a.

## 15

### *S'kawōta s'malepa kimum*

<sup>1</sup> Se' wēpa erblōke buaē Cristo mik, esepa kē wēpa kam erblō buaē tso'ia katōtō esepa sauk wəs se' wák katōrwā es. Kē se' káne i tō se' wák ttsē'wēke buaē ese ē bikeitsōk. <sup>2</sup> Se' kōs kē i tō s'malepa ttsē'wēmi buaē ese bikeitsōk ekōl ekōl ikiimoie ena idichē ioie buaē Skēkōl a. <sup>3</sup> Cristo wák kē wā i tō ie' ttsē'wēke buaē ese ē bikeitsē. E' skēie ie' ta itka wəs Skēkōl yēkuō tō ichē es, e' tō ichē: “A Skēkōl, wēpa tō be' cheke suluē esepa tō ye' cheke suluē ñies.”\* <sup>4</sup> I kōs kite ká iaiāē Skēkōl yēkuō kji, e' kite s'wōbla'woie as se' e' tkōwā darērēē ena as se' er pablō. E' wa i buaē panekesō e' kē olo'yepasō. <sup>5</sup> Skēkōl tō se' kē e' tkōwā darērē ñies se' er pablekitō. As ie' tō a' kimum senuk bēre ñita wəs Cristo Jesús ser es. <sup>6</sup> A' serke es, e' ta Skēkōl dōr Skēkēpa Jesucristo Yē e' kikerakā a' ulitane tō šekka ñita.

\* 14:11 Isaiás 45.23 \* 15:3 Salmo 69.9

<sup>7</sup> Es a' ñi kiõwã er bua' wa wës Cristo tã a' ki'wã es as sulitane tã Skëkøl kïkõka.  
<sup>8</sup> Mokï ye' ichè a' a' tã Cristo dë'bitu judiowak kïmuk ikkachoie ie'pa a' tã uk Skëkøl kablè' sa' yëpa bak kã iaiã e'pa a, e' wawëitõ.  
<sup>9</sup> Nïes idë'bitu as pë' kã dör judiowak, esepa tã Skëkøl kïkõka ie'pa suëitõ er siarè wa e' kuekï. E' dör wës Skëkøl yëkkuõ tã ichè es wëg ichèitõ:

“E' kuekï ye' tã be' kïkerakã pë' kã dör judiowak esepa ulitane shua.

Ye' ttsõraë be' kïkokãie buaë.”†

<sup>10</sup> Nïes itso' kitule i' es:

“iA' kã dör judiowak esepa ttsë'nú buaë wëpa dör Skëkøl icha esepa tã ñita!”‡

<sup>11</sup> Nïes ichèitõ:

“iA pë' kã dör judiowak Skëkøl kïkõka!

iA kã ulitane wakpa, Skëkøl kïkõka!”§

<sup>12</sup> Nïes Isaías tã ikitãt iyëkkuõ kï i' es:

“Jesé aleri eköl döraë se' shua, e' tkërdakã kã ulitane wakpa wëtsoie. Pë' kã dör judiowak esepa tã ie' è paneraë e' tsãtkoie.”\*

Es itso' kitule.

<sup>13</sup> I buaë kôs doia se' a' e' panekesõ kröröë e' wï dör Skëkøl. As e' tã ttsë'ne buaë ena sene bërè mù a' kôs erblé ie' mik e'pa a. As ie' tã a' kïmù iwã kï panuk buaë Wikøl Batse'r diché batamik.

<sup>14</sup> A yamipa, mokï ye' iklõ'wë tã a' serke buaë yësýsë. Nïes ye' iklõ'wë tã a' wa iyi jcher tajë. A' a' ñi pautmi buaë. <sup>15</sup> Erë yëkkuõ i' kï ye' er deka' a' pattök wõshaë tã wësele wa as kã a' éna ichõwa. Skëkøl er buaë ché ye' a' e' wa kanè me'itõ ye' a, e' kuekï ye' a kawõ tã' a' pattoie es. <sup>16</sup> Ye' dör Cristo Jesús kanè méso ie' tã buaë kkayë' Skëkøl tã se' a' e' pakoie pë' kã dör judiowak esepa moie Skëkøl a' batse'gule Wikøl Batse'r wa. E' dör wës iyi mè sacerdotepa tã Skëkøl dalõioie wër buaë ie' wa es.

<sup>17</sup> Ye' batsulewã Cristo Jesús mik, e' kuekï ye' kaneblõke Skëkøl a' e' tã ye' ttsë'wëke buaë. <sup>18</sup> Ye' kã er dë'kã kabenukkã i kã one Cristo wa ye' wa ese kï. Ie' batamik ye' tã pë' kã dör judiowak esepa ulaië Skëkøl tã iütök. E' wë ye' tã ipakè wa ena iwakanewë wa <sup>19</sup> ena Skëkøl Wikøl diché wa. Nïes i kã or yi a' ese wëyõ tajë ie'pa wörkï ikkachoie tã i chéyõ e' dör mokï. Es kanè mène ye' a' Cristo tã buaë pakoie e' wawëtkeyõ kã tso' kôs Jerusalén dö Iliria e' shua. <sup>20</sup> Këkraë ye' e' mukettsã tã buaë e' pakök wë kã yi tã Cristo dalõietã' ese ska'. Ye' iwë es as ye' kã dör wës yi tã u yuëkã u chki tulu'wabak o'ka tã ese kï es. <sup>21</sup> E' skéie ye' éna iwak wës Skëkøl yëkkuõ tã ichè es, e' tã ichè: “Wëpa a' ie' tã kã pakauie, esepa a' kã ardaë;

Wëpa kã wã ie' tã ttsëule, esepa éna iardaë.”†

### *Pablo shkãk Roma*

<sup>22</sup> Këkraë ye' shkãk a' weblök, erë kanè i' tã ye' wöklõ'wëke. <sup>23</sup> Erë i'ñe tã ye' kaneone kã ikkëpa kï. Bãnet ye' tã a' kkeyë'mi pakè, <sup>24</sup> e' kuekï ye' mù tkõmi Roma a' pakök mik ye' mi'ke España eta. Erë ye' kã a' kawõ kunuk tajë a' ska' senuk, erë ye' ttsë'rmi buaë. E' ukuõkï tã a' mù ye' kïmè as ye' dö España. <sup>25</sup> Erë i'ñe tã ye' mitke Jerusalén s'batse'r malepa serke eë e'pa kïmuk. <sup>26</sup> E' dör tã s'yamipa serke Macedonia ena Acaya e'pa tã inukøl kitbak iwãkpa er wa patkëmi s'batse'rpa dör siarè tso' Jerusalén e'pa kïmoie. <sup>27</sup> E' wë ie'pa tã iwãkpa er wa, erë mokï ie'pa kï inu' tso'. E' kuekï buaë idir tã ie'pa tã judiowak kïmè. E' dör tã i buaë de judiowak ulã a' Cristo wa, e' de ie'pa ulã a' ñies judiowak wa. E' kuekï buaë idir tã i tso' ie'pa wa e' kãkmè s'yamipa dör judiowak esepa a. <sup>28</sup> Es mik ye' tã inukøl kitule kôs ie'pa a' e' mé ie'pa ulã a, eta ye' miã España e' tkökemi a' pakök. <sup>29</sup> Ye' wë jcher tã mik ye' demi a' ska', eta se' ñi er diché iõraë buaë Cristo er buaë chõ sia' e' kôs wa.

<sup>30</sup> A yamipa, Skëkëpa Jesucristo tã wa, ñies se' ñi dalëritsõke Skëkøl Wikøl wa, e' wa ye' kkõchõ a' a' tã a' e' chõ darèrè ye' tã ñita kanè mène ye' a' e' wã uk. E' wëmi a' tã, a' tã Skëkøl a' ikie ye' kï e' wa. <sup>31</sup> Ikiõ ie' a' as ie' tã ye' tsãtkõ Judea wakpa kã tã Jesús tã iütè esepa yökï. Nïes ikiõ ie' a' tã i kôs mi'ke ye' wã s'batse'rpa tso' Jerusalén e'pa kïmoie as ie'pa tã e' tsü er bua' wa. <sup>32</sup> Es ikiõ ie' a' as ye' dömi a' ska' ttsë'ne buaë wa enuk a' pakekeyõ e' dalewa, es ie' kï ikiane e'ma. <sup>33</sup> Ie' dör sene bërè mukwak as e' tã a' wapiõ. Es e' idir.

## 16

### *Roma wakpa shkë'wëmi Pablo tã*

<sup>1</sup> Tayë eköl kiè Febe dör s'yami, e' tã chekeyõ a' a. Ie' dör Skëkëpa Jesús icha erule tso' Cenreas e' kïmukwak eköl. <sup>2</sup> Ie' kiõwã buaë Skëkëpa Jesús tã wa wës s'batse'rpa ñi kiõwã es. Ie' tã s'yamipa tajë e'pa kïmè, ñies ye' wák kïmèitõ. E' kuekï mik ie' kï ilè kiane eta ie' kïmù.

<sup>3</sup> Prisca ena Áquila e'pa shkë'ú ña. Ie'pa bak kaneblök ye' tã Cristo Jesús kanè a. <sup>4</sup> Ie'pa e' me'ttsã ye' tsãtkök, kã tkine tã dö' ittëwã. Wëstela chekeyõ ie'pa a, erë kã dör ye' è. Skëkëpa Jesús icha erule erule kôs kã dör judiowak, e'pa tã wëstela cheke ie'pa a' ñies. <sup>5</sup> Nïes Skëkëpa icha erule daparke Prisca ena Áquila u a, e'pa shkë'ú ña. Nïes ye' yami dalër tajë ye' éna kiè Epéneto, e' shkë'ú ña. Ie' dör

† 15:9 2 Samuel 22:50; Salmo 18.49 ‡ 15:10 Deuteronomio 32.43 § 15:11 Salmo 117.1 \* 15:12 Isaías 11.10

† 15:21 Isaías 52.15

s'tsá erblé' Cristo mik Asia e'. <sup>6</sup> María shké'ú ña. Ie' kaneblé tajé a' a. <sup>7</sup> Wépa bôl kié Andronico ena Junias, e'pa shké'ú ña. Ie'pa dör judiowak wés ye' es. Ie'pa bak wôtéule s'wôto wé a ye' ta. Ie'pa dör Jesús ttekôlpa kkeauléka buaé imalepa wa. Ie'pa erblé' Cristo mik ye' yökí kéwe.

<sup>8</sup> Ampliato shké'ú ña. Ie' dör ye' yami Skéképa Jesús ttô wa, e' dalér tajé ye' éna. <sup>9</sup> Urbano shké'ú ña. Nies ie' kanebloke Cristo a wés sa' es. Nies Estaquis shké'ú ña. Ie' dalér tajé ye' éna. <sup>10</sup> Apeles shké'ú ña. Ie' wér buaé Cristo wa. Nies wépa dör Aristóbulo icha, e'pa shké'ú ña. <sup>11</sup> Herodión, e' shké'ú ña. Ie' dör judiowak wés ye' es. Nies wépa dör Narciso icha erblé Skéképa mik e'pa shké'ú ña. <sup>12</sup> Tayépa kié Trifena ena Trifosa shké'ú ña. Ie'pa kanebloke Skékôl a. Nies tayé dalér se' éna kié Pérside e' shké'ú ña. Ie' kanebloke tajé Skékôl a. <sup>13</sup> Rufo shké'ú ña, e' dör Jesús mik erblökwa buaé sùle sulitane wa. Nies ie' mi e' shké'ú ña. Ie' dör wés ye' wák mi es. <sup>14</sup> Asíncrito, Flegonte, Hermes, Patrobas, Hermas ena s'yamipa kôs tso' ie'pa ta, e'pa kôs shké'ú ña. <sup>15</sup> Nies Filólogo, Julia, Nereo ena ikutá, Olimpás ena s'batse'r malepa tso' ie'pa ta, e'pa kôs shké'ú ña.

<sup>16</sup> A' ñi shké'ú ñi dalér wa. Cristo icha erule erule e' kôs tó a' shké'wémi.

<sup>17</sup> A yamipa, ye' kkôchô a' a tó wépa éna se' blabatsak ena se' akmine sene sulu a, esepa yökí a' e' kkô'nú. Ie'pa se' a icheke tó tté wa se' wôblaule kéwe e' kô dör mokjé. Esepa yökí a' e' skô. <sup>18</sup> Ie'pa kô ku' Skéképa Cristo kanéuk. E' skéie ie'pa tso' iwákpa é kanéuk. Se' kam éna iar buaé esepa dakíñekerakitô tté ttsér buaé ese wa. E' kuéki esepa yökí a' e' skô. <sup>19</sup> Sulitane wa ijcher tó Skékôl tté mokjé e' dalóieke a' tó buaé. E' tó ye' ttsé'wéke buaé. Ye' kú ikiane tó a' mú wôblar tté buaé yéysésé wa wawé. Eré a' mú kô e' wôbla'ú kache tté wa i sulu wambloie. <sup>20</sup> A' serke es, e' ta betka Skékôl dör sene béré mukwak, e' tó Satanás shtowerawa a' klô dikjá. As Skéképa Jesús er buaé chô a' a.

<sup>21</sup> Ye' yami Skéképa Jesús kané a kié Timoteo e' tó a' shké'wémi. Nies Lucio ena Jasón ena Sosípatro, e'pa tó a' shké'wémi. Ie'pa dör judiowak wés ye' es.

<sup>22</sup> Ye' dör Tercio, e' tso' Pablo ttôke e' shtök yékuú i' kú. Nies ye' tó a' shké'wémi Skéképa tó wa. I' ta i cheke Pablo tó e' shtekeneyô.

<sup>23-24</sup> Gayo tó a' shké'wémi, e' u a ye' serke. Eé Skéképa Jesús icha erule tso' ká i' kú e'pa daparke. Erasto tó a' shké'wémi. Ie' dör ká i' inukôl kuéblu. Nies s'yami kié Cuarto, e' tó a' shké'wémi.

*Pablo tó Skékôl kíkéká*

<sup>25</sup> ¡Skékôl kíkókásó! Ie' a a' kimermi e' tkôkwa daréré Jesucristo tté buaé pakekeyô

e' a. Ká iaiaé tté buaé e' bléule se' yökí. <sup>26</sup> Eré i'ñe ta ikkayénewa se' a i kit Skékôl ttekôlpa tó yékuú kú e' wa. Skékôl yöbié e' tó ie'pa ka' ishtök. Tté buaé ñe' kkayénewa as ká ulitane wakpa erblô imik ta iwá iütô.

<sup>27</sup> Skékôl e' dör Skékôl ekôl éme e'. Ie' erbikô tajé sulitane tsáta. ¡As e' kíkarká kékraé Jesucristo wa! Es e' idir.

## Yëkkuö tsá kit Pablo tö Corinto wakpa a 1 Corintios

Mik Pablo bak kanablök Éfeso eta ie' tö yëkkuö i' kit Jesús mik erblökwakpa serke Corinto e'pa a. Pablo kəwō ska' ta Corinto dör Grecia ká bua'ie. Pè' bak senuk iki dōk<sub>a</sub> 650.000. E'pa shu<sub>a</sub> 400.000 klōulew<sub>a</sub> kanablök è. Pablo wák tö tsawe Corinto wakpa a Jesús tté buaè paka'. E' tté tso' kitule Hechos 18.1-17 e' k<sub>i</sub>.

Alaköl eköl kiè Cloe e' yami wēle de Pablo pakök ie' tso' Éfeso ee. E' tö ie' a iyè' tö Jesús mik erblökwakpa tso' Corinto e'pa ñippöke tajè ena wēlepa tso' iyi sulusi wamblök tajè, e' kuek<sub>i</sub> ie' tö yëkkuö i' kit. Ñies ie' tö ikit ilè chaki' ie'pa tö ie' a e' iutoie ie'pa kimoie ena ipattoie.

Kam Corinto wakpa erblö Jesús mik eta ie'pa tö iyi tajè dalöieke Skèköl skéie, e' dör kabene et. Ì dalöieke ie'pa tö e' a ie'pa tö iyiwak jcheke e' chkà katekerakitö iyamipa ta Ì dalöiekerakitö e' dalöioie. E' cheke Pablo tö yëkkuö i' k<sub>i</sub>.

Ñies Ì dalöieke ie'pa tö e' wé kōs a alakōlpa sulusi datse ta wēpa serkerak ita. Erè mik wēpa ñekkēpa erblè' Jesús mik eta ie'pa kē éna iane tö wēs ie'pa ké senuk. E' kuek<sub>i</sub> Pablo tö ikkaché tö wēs wēpa alaköl ta' ena alaköl kē ta' e'pa kawōt<sub>a</sub> senuk.

Kiie ta pè' wēle bak ñi dapa'uk Jesús mik erblökwakpa ta, e'pa tö ie'pa wōbla'wēke kache tté wa. Ese ché Pablo tö yëkkuö i' k<sub>i</sub>.

### Shke'wè

<sup>1</sup> Ye' dör Pablo. Skèköl tö ye' klōō'bak iwák er wa Cristo Jesús ttekolpa tsá, e'pa ekölie. S'yami kiè Sóstenes tso' ye' ta. <sup>2</sup> A' dör Skèköl icha erule serke Corinto, e'pa a sa' tso' yëkkuö i' shtök. A' batse'gule a' bat-sulew<sub>a</sub> Cristo Jesús mik e' wa. A' klōō' Skèköl tö ie' icha batse'rpaie wēpa kōs tso' ká wa ñie tö e' tsatkè kiè Skèkēpa Jesucristo a e'pa ta ñita. Jesucristo dör ie'pa ena se', e' Kèköl. <sup>3</sup> Skèköl dör S'yè ena Skèkēpa Jesucristo, as e'pa er buaè chō ena sene bèrè mù a' a.

### Pablo tö wēstela ché Skèköl a

<sup>4</sup> Skèköl er buaè ché tajè a' a Cristo Jesús batamik, e' kuek<sub>i</sub> ye' tso' wēstela chök ie' a kekraè. <sup>5</sup> A' batsulew<sub>a</sub> Cristo mik, e' wa Ì kōs kiane a' k<sub>i</sub> wakanewē Skèköl a, e' mēne a' a tajè. Skèköl tö ieri mé a' a iwā pakoie buaè, ñies iwā jchenow<sub>a</sub> buaè. <sup>6</sup> E' wa iwēnew<sub>a</sub> a' shu<sub>a</sub> tö mok<sub>i</sub> a' tö Cristo tté klō'wé buaè. <sup>7</sup> Es Ì kōs kiane a' k<sub>i</sub> kanebloie Skèköl a, e' métké ie' tö a' a iWiköl wa. E' wakanewēke

a' tö a' tso' Skèkēpa Jesucristo datskene e' panuk, e' dalewa. <sup>8</sup> Ñies ie' tö a' kimeræ buaè as a' e' tkōwā darèrèè ie' mik dō bata ekkè. Es a' kē k<sub>i</sub> Ì nu<sub>i</sub> ta' ie' wō<sub>a</sub> mik Skèkēpa Jesucristo datskene e' kēwō ska'. <sup>9</sup> Skèköl tté mok<sub>i</sub> è' tö a' klōō'bak as a' ser batsulew<sub>a</sub> ie' alà Jesucristo dör Skèkēpa e' mik.

### Jesús mik erblökwakpa ñi blabatsélor

<sup>10</sup> A yamipa, ye' tö a' a ichè Skèkēpa Jesucristo tté wa tö a' kōs erbi<sub>k</sub>ō ñikkèè. Kē a' ñi blabatsök. A' senu<sub>i</sub> buaè ñita. A' kabikeitsō ñikkèè wēs wák eköl è es. <sup>11</sup> A yamipa, tayè kiè Cloe, e' yamipa wēlepa tö ibiyō ché ye' a tö a' tso' ñippök tté k<sub>i</sub>. E' kuek<sub>i</sub> ye' tso' a' a ichök es. <sup>12</sup> Ie'pa tö ye' a ichè tö a' kōs ñippöke ñita i' es: A' wēlepa tö icheke: "Ye' dör Pablo klé." Wēlepa skā tö icheke: "Ye' dör Apolo klé." Ièkōlpa tö icheke: "Ye' dör Cefas\* klé." A' skā tö icheke: "Ye' dör Cristo klé." <sup>13</sup> Ima a' ihikeitsè tö Cristo tso' blabatsule? Au, kē idör es. IYe' kōtew<sub>a</sub> krus mik a' skéie? Au. I A' wōsune ye' tté wa? Au. <sup>14</sup> Wēstela chekeyō Skèköl a tö ye' kē w<sub>a</sub> a' wōsune tajè. Wēpa kiè Crispo ena Gayo, e'pa è wōsuk ye' tö. <sup>15</sup> Kē yi a iyēnuk tö ye' tö a' wōsuk ye' tté wa. <sup>16</sup> Ye' éna ianew<sub>a</sub> i' ta tö ñies ye' tö wēm kiè Estéfanos e' wōsuk ena ie' yamipa ekkā. Kē ye' éna iane tö yi skā wōsuk ye' tö. <sup>17</sup> Cristo kē w<sub>a</sub> ye' patkēne s'wōsukōk, ie' tö ye' patké ie' tté buaè pakök. Ye' kē tö tté e' paketa' tté iskiè wa wēs s'yōule tajè esepa kapakō es. Ye' tö ipakeke tté wōshakla wa as Cristo kōtew<sub>a</sub> krus mik e' tté diché kē chōwa.

### Skèköl diché tajè ena ie' siwé iskiè, e' wā dör Cristo

<sup>18</sup> Wēpa weirdaè aishkuō ta, esepa a Cristo kōtew<sub>a</sub> krus mik, e' tté dör alipa ttèie. Erè se' tsatkèrke, esepa a Skèköl diché tajè, e' tté idir. <sup>19</sup> E' dör wēs itso' kitule Skèköl yëkkuö k<sub>i</sub> es, e' tö ichè:

"Skèköl tö ichè: Wēpa wa siw<sub>a</sub> jcher iskiè, esepa meraatyō wēs kē w<sub>a</sub> Ì jcher es.

Wēpa kabikeitsō tajè, esepa éna ká chōwerawayō."<sup>†</sup>  
Es Skèköl yëkkuö tö ichè.

<sup>20</sup> Es idir e' kuek<sub>i</sub> s'ditsō wā siw<sub>a</sub> jcher iskiè, Iwēs esepa de? S'wōbla'uk tté dalöiēno wa wakpa, Iwēs esepa de? Wēpa a s'ditsō iyi tté wā pakar ñi a buaè Iwēs esepa de? Skèköl a ta siw<sub>a</sub> iskiè jcher s'ditsō wā, e' kē wā ta', e' dör wēs alipa tté es. <sup>21</sup> Tté e' wā dör i' es: Skèköl wā iyi jcher iskiè, e' kuek<sub>i</sub> ie' kē wā imeneat tö se' tsatkèr Ì jcher s'ditsō wā iskiè ese wa. E' skéie ie' tö ime'at tö wēpa erblè Cristo mik itté pakarke e' wa, esepa è tsatkèrdaè erè ittser alipa ttèie.

<sup>22</sup> Ì kē or yi a ese kiane suè judiowak k<sub>i</sub> tté klō'woie. Griegowak tö siw<sub>a</sub> iskiè ese yuleke tajè. <sup>23</sup> Erè Cristo kōtew<sub>a</sub> krus mik,

\* 1:12 Cefas: E' è kiè ñies Pedro. † 1:19 Iwanías 29.14

e' tté pakeke sa' tó. Ttè e' sulune judiowak yöki. Pé' kè dör judiowak, esepa a ta e' dör alipa ttè. <sup>24</sup> Erè wépa kôs klôo'bak Skéköl tó iwák a, judiowak ö pé' kè dör judiowak, esepa a Cristo dör Skéköl diché tajë ena ie' siwé iskië e'. <sup>25</sup> I wé ie' tó e' wër wës i wë aliwakpa tó es. Nermata ie' wa siwä' jcher iskië tkôka sulitane tsäta. Iwër wësua tó ie' kè diché ta', nermata ie' diché ta' tajë tkôka sulitane tsäta.

<sup>26</sup> A yamipa, mik Skéköl tó a' klôo'bak, etä zes a' dör? E' anü a' éna. Kä i' wakpa a ta a' kibiiepa kè wa siwä' iskië jcher. A' kibiiepa kè ttó dalóier'ta'. A' kibiiepa kè dör kéképa tajë ese ditséwa. <sup>27</sup> Erè wépa cheke kä i' wakpa tó tó kè iwä i jcher, esepa shukit Skéköl tó wöbla wa, wépa wa siwä' jcher iskië, esepa jaéwoie. Wépa kè dör kéképa tajë kä i' wakpa a, esepa shukit ie' tó wöbla wa, wépa dör kéképa tajë, esepa jaéwoie. <sup>28</sup> Wépa watéuletsa, wépa bikeitseke kä i' wakpa tó tó kè idör lie bua', wépa kè dör i, esepa shukit ie' tó, wépa dalóier'ta' tajë kä i' kî, esepa wöowaie diöshet. <sup>29</sup> Es kè yi a e' t'sénukka Skéköl wörki. <sup>30</sup> Erè Skéköl wák tó a' bats'wa Cristo Jesús mik. Cristo batamik ie' tó se' kè siwä' mokî jchenukwa iskië. Nies Cristo batamik ie' tó se' kló'wé wës pé' buaë yésyésé es, nies se' de ie' wák ichaie bats'e'r yénetsa sene sulu ulä a. <sup>31</sup> E' kueki s'kawötä senuk wës Skéköl yékkuö kî es, e' tó iché: "Yi e' t'sakka as ese e' t'sökä i wé Skéköl tó ese wa."<sup>†</sup>

## 2

*Cristo kôtéwä wötéulewä krus mik, e' tté paké Pablo tó*

<sup>1</sup> A yamipa, mik ye' dé' kéwe Skéköl tté buaë pakök a' a, etä kè ye' wä iwä pakane siwä' iskië ese wa wës a' wakpa yöule tajë esepa tó s'wöbla'weke es. <sup>2</sup> Mik ye' bak a' shua, etä ye' kè kî i bár tté kianeia. Ye' ibikeitsétke Jesucristo kôtéwä wötéulewä krus mik e' tté é pakök. <sup>3</sup> Mik ye' dé'bitü a' ska', etä ye' t'sé'rke alabébë kè diché ta' tajë, ye' suarke tajë painuke tajë. <sup>4</sup> Ye' tó Skéköl tté buaë e' paké a' a, erè kè ye' wä ipakane siwä' iskië s'ditsö a ese wa a' dakiñoie. E' skéie i pakéyo a' a, e' wä kkaché a' a Skéköl Wiköl tó idiché wa tó mokî idir. <sup>5</sup> Skéköl tó iwé es as a' kè erblö siwä' iskië ese mik, e' skéie as a' erblö ie' diché mik.

*Se' wä Skéköl siwé jcher iWiköl wa*

<sup>6</sup> Erè wépa tkéulewatke darèrè Cristo mik, esepa je' éna iane tó tté pakeke sa' tó, e' dör siwä' iskië chökle. Erè e' kè dör s'ditsö ena iwökirpa siwä' ese; esepa diché erkewatke. <sup>7</sup> Siwä' pakeke sa' tó, e' dör Skéköl siwä' bak bléulewä s'ditsö yöki e'. Kä iaiaé kam kä i'

yör, e' yöki ie' tó ibikeitsbak tó sene michöé olo ta' tajë, e' meraëtö se' a ie' siwä' wa. <sup>8</sup> Siwä' e' kè ane s'ditsö wökirpa éna. Ie'pa éna ianüpa, e'ma ie'pa kè wä Skéképa Jesús olo ta' tajë e' kôtéwä. <sup>9</sup> Erè e' dör wës itso' kitule Skéköl yékkuö kî es, e' tó iché:

"I buaë kè sule yi wä,

i buaë kè t'séule yi wä,

i buaë kè bikeitsule yi wä,

ese tso' Skéköl wä mè wépa éna ie' dalër esepa a."<sup>\*</sup>

<sup>10</sup> Erè e' kôs wä kkachéitö se' a iWiköl wa. Iwiköl tó iyi ulitane shuyulekett'sa sékka dö Skéköl erbikö iskië eséé.

<sup>11</sup> Se' wiköl tso' se' a, e' é wä ijcher i tso' se' er a. Es nies Skéköl Wiköl é wä ijcher i tso' ie' er a. <sup>12</sup> Ie' tó iWiköl mé se' a, e' kueki kè se' kabikeitsöia wës s'ditsö kabikeitsö es. Ie' tó iWiköl mé se' a as i buaë kôs méitö se' a er bua' wa e' wä ar se' éna. <sup>13</sup> E' kueki kè sa' tó s'wöbla'weku' kä i' a siwä' tso' ese wa. S'wöbla'weke sa' tó tté kkaché Skéköl Wiköl tó sa' a e' wa. Es sa' tó Skéköl Wiköl iyi e' wä pakeke tté méitö sa' a ese wa.

<sup>14</sup> Wépa kè a Skéköl Wiköl ku', esepa a ie' iyi e' dör alipa iyi, e' kueki ie'pa kè kî ikiane. Nies ie'pa kè éna iwä ar, tté e' wä arke se' éna Skéköl Wiköl é wa e' kueki. <sup>15</sup> Erè wépa a Skéköl Wiköl tso', esepa éna ie' iyi ulitane wä armi buaë. Erè i weke ie' tó ie'pa a e' kè wä anuk yi éna. <sup>16</sup> E' dör wës itso' kitule Skéköl yékkuö kî es, e' tó iché: "Skéköl erbikö e' kè jcher yi wä. Kè yi a ie' pautük."<sup>†</sup> Erè se' éltépa wä Cristo erbiké tso'.

## 3

*Se' kôs dör Skéköl kané mésopa*

<sup>1</sup> A yamipa, mik ye' bak a' shua, etä ye' kè a kapakar a' ta wës s'wétt'séke Skéköl Wiköl tó esepa ta kapaké es. E' skéie ye' kawötä kapakök a' ta wës ye' kunüpa kapakök s'tso'ia s'wák dër sulu dikia ö ala'r tsitsirla kè yöule buaë Cristo tté wa esepa ta kapaké es. <sup>2</sup> Ttè wa ye' tó a' wöbla'g e' dör tottola wës tsu'diö mè ala'rla a es, kam a' a chké darèrè katar e' kueki. jErè ikké ta kam a' a chké darèrè katar, <sup>3</sup> a serkeia wës s'wák dër sulu kî ikiane es e' kueki! A' nïppöke, a' ukyërke nî kî tajë, e' wä kiane ché tó a' seria wës s'wák dër sulu kî ikiane es, wës pé' kè a Wiköl Bats'e'r ku' es. <sup>4</sup> A' wélepa tó icheke: "ye' dör Pablo klé." A' wélepa skä tó icheke: "ye' dör Apolo klé." A' ttökéia es, e' wa iwënewä tó a' dör wës pé' kè a Wiköl Bats'e'r ku' es.

<sup>5</sup> Etä ichö ye' a tó ¿Apolo dör yi? ¿Pablo dör yi? Sa' dör Skéköl kané mésopa é. Sa' tó Jesús tté buaë paka' a' a, e' batamik a' bak erblök Jesús mik. Kané mè ie' tó sa' böl a



kuə'kɪ kuə'kɪ, e' wakanewé sa' tō. <sup>6</sup> Jesús tté buaë e' tsá tkéyō a' er a, wés iyi kuatké es. Apolo tō ikkō'né as italar, erē Skékōl wák tō iwá tala'wéke. <sup>7</sup> Yi tō iyi kuatkeke, ñies yi tō ikkō'neke, esepa ké dōr i. Skékōl tō iwá tala'wéke, e' dōr ibua'ie. <sup>8</sup> Yi tō iyi kuatkeke, ñies yi tō ikkō'neke, esepa dōr ñies éme ie' a. Ie' tō iské meraë ie'pa a ekōl ekōl wés iwakanewekerakitō es. <sup>9</sup> A' dōr wés ie' tē es, e' a sa' bōl kaneblōke ie' a. Ñies a' dōr wés u yōrke ie' a es. <sup>10-11</sup> Ie' er buaë ché ye' a, e' wa ime'itō ye' a ichki tkōkwə wés u yuōkwak bua'buas e. E' ukuōkɪ tə u yuōkwakpa skā de ikɪ yuōkmi. U yōrke Skékōl a' e' chki tkēnewatke e' dōr ekōl ē, e' dōr Jesucristo. Kē yi a ichki kuə'kɪ tkēnukwane. E' kuekɪ se' ulitane ekōl ekōl kawōtə e' kkō'nuk buaë tō wés iwá kɪ yuekemisō. <sup>12</sup> Se' tō iwá yuēmi orochka wa, inukōlchka wa ena ak bua'buas wa ō iwá yuēmisō kaltak wa, kākō wa ena kuakōl wa. <sup>13</sup> Mik Jesucristo datskene, etə iwēdaë tō is iwá yuēsō. E' kéwō ska' tə se' kanē ma'ordaë bō' wa isuōie tō is idir. <sup>14</sup> U chki tulunewə, e' kɪ se' tō iwá yuē, e' tə e' ké ñanewə bō' a tə esepa a iské merdaë. <sup>15</sup> Erē i yuēsō e' ñanewə, e' tə kanē e' weirdawa. Erē esepa tsatkērdaë bō' yōkɪ, erē ké i atə ie'pa ulā a wés s'tkōshkar u ñarkewa yōkɪ es.

<sup>16</sup> ¿A' kē wə ijcher tō a' wákpa dōr Skékōl wé, ie' Wikōl serke a' shuə e' kuekɪ? <sup>17</sup> Ie' wé dōr batse'r, e' dōr a' wákpa. E' kuekɪ e' olo'yéwə yi isie tō, e' tə ese olo'yerawə ie' tō.

<sup>18</sup> Kē a' e' kɪtō'ukɪa. A' welepa e' bikeitsō tō a' wə siwə' iskiē jcher wés s'ditsō tō ibikeitseke es, e' tə esepa kawōtə e' ōkwa alɪie as siwə' mokɪ jcherwə iwə. <sup>19</sup> I' dōr siwə' iskiē s'ditsō a, ese dōr alɪpa tté Skékōl a. E' dōr wés ie' yēkkuō tō ichē es: "Wəpa wə siwə' iskiē jcher tajē, esepa klō'werawə Skékōl tō iwákpa erbikō s'dakɪñoie e' wa wés iyiwak klō'wəwasō sho' wa es." <sup>20</sup> Ñies ichéitō i' es: "Skékōl wə ijcher buaë tō i' tso' ká i' a, ese siwə' jchermi s'wə tajē, e' ké dōr iie bua'." <sup>21-23</sup> Erē a' dōr Cristo icha ena Cristo dōr Skékōl icha. E' wə kiane chē tō iyi ulitane mé Skékōl tō a' a' kɪmoie. Ye' ena Apolo ena Pedro, e'pa tso' a' kɪmuk. E' kɪie tə i' kōs tkōke j'ñe tə, ñies aishkuō tə, s'ser ena s'duōwə, ekkē kōs tso' a' kɪmuk. E' kuekɪ kē a' kane s'ditsō wēle kkeōkə tajē tō e' dōr ibua'ie as s'mi' ikléie.

#### 4

##### *Jesucristo ttekōlpa tsá, e'pa kanē*

<sup>1</sup> Sa' bikeitsō tō sa' dōr Cristo kanē mēsopa. Skékōl tté bak blēulewə e' wə pakē wērke sa' wōkɪ wés iyi kueblu es. <sup>2</sup> Iyi kueblu kawōtə iwakanéuk yēsýēsé wés iwōkir tō iuk patké es. <sup>3</sup> Es idir, e' kuekɪ jma a' tō ō yile skā tō is ye' kaneblōke Cristo a' e' bikeitseke, e' ké kɪ ye' tkine. E' kɪie tə jma ye' wák tō ye' kanē

bikeitseke, e' ké kɪ ye' tkine. <sup>4</sup> Ye' er ké wə ye' kkaténe, erē ké e' wa yō ichepa tō ké i' sulu ku' ye' kɪ. Skékēpa Jesucristo tō ye' shuleraë, ima e' tō ye' bikeitseke, e' ē kɪ ye' tkirke.

<sup>5</sup> Mik ie' dene etə sulitane shuleraëitō. I' kōs tso' blēulewə se' er a, ñies i' dalérmik se' serke, ese kōs kkacheraëitō wōshak sulitane wōrkɪ. E' kéwō ska' tə se' kōs kaneblōke buaë ie' a, e'pa kɪkerakə ie' tō. E' kuekɪ kē s'kkatar, kam s'shulir kéwō dōkə e' yōkɪ.

<sup>6</sup> A yamipa, ye' tō ye' wák ena Apolo ché a' a' a' kɪmoie as e' wa a' tō iwá saɪ tō ké a' kane i' tso' kitule Skékōl yēkkuō kɪ chétkeyō ñe' dalōséukwə. Kē a' kane e' ttsōkə tajē sa' ekōl wa ena sa' ekōl wōōkwa diōshet. <sup>7</sup> ¿Wés a' tō ichēmi tō a' dōr s'malepa tsatə? I' kōs tso' a' wə, i' buaë eri tə a' a' wə, wés a' kabikeitsō, e' kōs me' Skékōl tō a' a. ¿Iok a' e' ttsōkə tajē tō wésua iyi kōs e' dē'bitu' a' wákpa wə, a' wákpa er wa?

<sup>8</sup> Wésua a' ibikeitseke tō Skékōl siwə' jcher tajē a' wə, e' dōr wē, ké i' kɪ kianeɪa' a' kɪ. A' e' tso' tō a' s'wēttsémítke blu'paie, erē kam sa' dōkə ekkē. Mokɪ a' mú s'wēttsémítke blu'paie, e'ma sa' detke a' tə ñita s'wēttsuk. <sup>9</sup> Erē ye' a' tə, wésua sa' dōr Jesús ttekōlpa tsá e'pa méat Skékōl tō s'ditsō malepa bataie. Ye' ittse' tō ká ulitane wakpa ñies Skékōl biyōchōkwakpa ulitane e'pa tso' sa' weirke e' weblōk. Sa' dōr wés s'bolōkpa tō s'klō'wéwə tsēmī sulitane wōrkɪ ttewə es. <sup>10</sup> Cristo tté kuekɪ sa' wēr alɪie, erē a' e' bikeitsō tō a' wə siwə' iskiē jcher buaë a' batsulewə Cristo mik e' kuekɪ. Iyerke tō sa' ké diché tə, erē a' diché tə tajē. A' dalōiērtə' tajē, erē sa' ké dalōiērtə'. <sup>11</sup> Dō ikkē tə sa' tekeɪa' bli tō ersir tō; ké sa' datsi' tə buaë; pē' tō sa' we'ikeke siarē; sa' wákpa ké wə u tə' senoi; <sup>12</sup> sa' kaneblōke darērēe sa' wák ulā wa dō sa' shtrinewə da'a ekkē. Mik pē' a' alibhōke sa' kɪ, etə e'pa a' sa' er buaë chōke. Mik ie'pa tō sa' we'ikeke, etə e' dalé'ttseke sa' tō er bua' wa. <sup>13</sup> Mik pē' tō sa' cheke suluē, etə e' iutekene sa' tō tté bua' wa. Dō ikkē tə ká i' wakpa wa sulu sa' wēr. Ie'pa a' sa' dōr wés ushña uyanettsə u'rkɪ es.

<sup>14</sup> Ye' ké wə tté i' kite a' a' jaéwəie, ē ye' tso' a' pattōk wés iyé éna ila'r dalér ese pattéitō es. <sup>15</sup> Cristo Jesús tté buaë paka' ye' tō a' a' kewe, e' wa a' bātsewə ie' mik. E' kuekɪ mokɪ ye' dōr wés a' yé es. A' mú wə s'wōbla'ukwakpa Cristo tté wa tso' dōkə 10.000, erē ye' ekōl ē dōr wés a' yé es. <sup>16</sup> E' kuekɪ ye' tō a' patté tō a' senú wés ye' serke es. <sup>17</sup> E' kuekɪ ye' tō Timoteo patkēmi a' ska'. Ie' dōr wés ye' wák alá es Skékēpa wa. Ie' dōr ye' ttōkata yēsýēsé dalér tajē ye' éna. Wés ye' dōr Cristo Jesús mik erblokwak e' ser, e' tté wa ye' tō ie' icha kōs tso' erule erule ká wa'ñe, e'pa wōbla'wéke. Tté e' ska' Timoteo tō a' er erane.

<sup>18</sup> A' wēlepa e' tšékā tajē tō ibikeitseke tō ye' kē dōpa a' ska'. <sup>19</sup> Erē Skēkēpa kī ikiane, e' ta ye' mi'ke a' pakōk bet. Mik ye' de etā ye' tō isugeraē tō a' wēpa e' tšékā tajē, esepa wā Skēkōl diché ta' ō ie'pa kabērke ē. <sup>20</sup> Ī blūie Skēkōl tso' e' wā wēnewā idiché tajē e' kī, kē dōr ttē ē wa. <sup>21</sup> ĶĶ kiane a' kī? ĶA' kī ikiane tō ye' dō kēsik wa a' uñuk? ō Ķa' kī ikiane tō ye' dō a' ska' er bua' wa, a' dalēritsē wa?

## 5

### *Sene sulu watōtšasō*

<sup>1</sup> Ye' ittē tšē tō a' šuā wēm tso' ekōl e' trērke suluē tkōkā pē' kē tō Skēkōl dalōie, esepa tsātā. Ie' wā iyē alakōl tso'. <sup>2</sup> Ī sulu e' tkōke a' šuā, erē e' wa a' e' tšōkekaiaj tajē. E' skēie Ķwes e' kē wā a' jaēne? ĶWes e' kē wā a' eriane? Warma wēm ñe' uya'ttsabak a' tō a' šuā. <sup>3-4</sup> Erē ye' wāk kē ku' a' ta, erē ye' ttōke wēs ye' wāk tso' a' ta es. Wēm ñe' šulētē ye' tō Skēkēpa Jesús ttō wa wēs ye' wāk tso' a' ta es. Mik a' ñi dapa'ūke etā eē ye' tso'ñak a' ta Wikōl Batse'r wa. Ñies Skēkēpa Jesucristo diché tso' a' ta. <sup>5</sup> E' wōšā tā wēm ñe' wōmūtšā a' tō Satanás ulā ā as iwāk dēr suluē e' wōklōr tā iwā tsātķēr mik Skēkēpa datskene e' kēwō ska'.

<sup>6</sup> A' e' tšōkā tajē sene sulu wa, e' kē dōr buaē. Ķkē a' wā ijķher tō pan wōlōwōkā elkela tō harinachka kōš wōlōwēkā? <sup>7</sup> Sene sulu e' dōr wēs pan wōlōwōkā kēchke\* es, e' tō a' sulu'wēkewā. E' kuēķj ese kōš uyōtšā a' šuā. Es a' dōraē buaē yēsýsē kē ā ĩ sulu ta'ia wēs pan yōule kē ā iwōlōwōkā iēne es. Cristo kōtēwā se' nuj skēie. Ie' dōr wēs obeja jķeķe Judiowak Yēpa Yērulune Egipto, e' kēwō tkō'woie es. E' kuēķj ñermata a' batse'ule Skēkōl wōā Cristo batamik. <sup>8</sup> Es kē se' kane Cristo kōtēwā se' skēie, e' kēwō tkō'uk pan yōule iwōlōwōkā wa ese wa. Itkō'ūsō pan kē yōule iwōlōwōkā wa ese wa. E' wā kiane chē tō itkō'ūsō kēkraē sene mokj yēsýsē ese wa. Kē se' kane itkō'uk sene sulu tō s'sulu'wēkewā ese wa.

<sup>9</sup> Yēkkuō iēt patkē' ye' tō a' ā, e' kī ye' iyē' tō a' kē kane e' batsōk trēr wakpa tā. <sup>10</sup> Erē pē' kē tō Skēkōl dalōie dōr trēr wakpa ō ĩyī kķechōk tajē ese wakpa ō akblōkwakpa ō ĩyī diōkōl dalōiōkwakpa, esepa kē chōk ye' ku' a' ā. Esepa chōpa ye' tō, e'ma a' kawōtā duōkwā ās kē a' e' batsō esepa tā. <sup>11</sup> Wēpa ye' ye' tō a' ā yēkkuō kī, esepa dōr wēpa e' chō tō ie'pa erblōke Jesús mik esepa. Erē ie'pa dōr trēnukwakpa ō ĩyī kķechōk tajē wakpa ō ĩyī diōkōl dalōiōkwakpa ō s'chōk suluē wakpa ō bloblopa ō akblōkwakpa. Kē a' e' batsōk esepa tā, ñies kē a' chķōk esepa tā. <sup>12-13</sup> Wēpa kē dōr Skēkēpa Jesús icha Ķwes esepa šulēmī

ye' tō? Skēkōl wāk tō ie'pa šuleraē. Erē wēpa dōr Skēkēpa icha ñi dapa'ūke a' ta, esepa kawōtā šulē a' tō. E' kuēķj a' tō ĩyī wēs itsō' kitule Skēkōl yēkkuō kī es, e' tō ichē: "Yi tō ĩ sulu wamblē, e' uyōtšā a' šuā."

## 6

### *A' ñippōke e' šulō a' wākpa tō*

<sup>1</sup> Mik a' wēle tō ĩ sulu wamblē iyami ekōl kī, etā Ķwes ese mi'ke ie' wā kkatē s'shulōkwakpa kē tō Skēkōl dalōie, esepa ska'? ĶĶōk e' kē šulē a' wākpa dōr batse'r e'pa tō? <sup>2</sup> ĶA' kē wā ijķher tō se' batse'r, e'pa tō kē ĩ' wakpa šuleraē aishkuō tā? E' dōr es, e' tā Ķwes ĩñe tā ĩyī tsitsirla ese ē kē šulir a' ā? <sup>3</sup> ĶA' kē wā ijķher tō ñies Skēkōl biyōchōkwakpa šuleraēsō? Ie'pa šuleraēsō, e' tā Ķwes a' kē a' ñippē tso' kē ĩ' kī ese šulir? <sup>4</sup> E' kuēķj a' wēlepa ñippōke ñita, e' tā Ķwes ese mi'ke a' wā šulē pē' bānet ska'? <sup>5</sup> ĩ' chēyō a' jaēwoie. Yi ā a' šulirmi Ķese kē ku' a' šuā da'a? <sup>6</sup> Erē e' skēie a' mi'ke ñi kkatōk s'shulōkwakpa kē erblōtā? Jesús mik esepa ska'.

<sup>7</sup> A' ñi kkatōke s'shulōkwakpa ska', e' ē wa iwēnewā tō sene sulu e' alēķatke a' kī. Idalē'ttsōk bēre Ķe' dōr ibua'ie? ĶAs itō se' ĩyī ekiblō? <sup>8</sup> Erē e' skēie a' wākpa tō ĩ sulu ñe' wambleke ñi tā dō s'yamipa erblōke Cristo mik esepa ĩyī ekibleke a' tō.

<sup>9</sup> ĶA' kē wā ijķher tō wēpa dōr ĩ sulu wamblōkwakpa, esepa kē dōpa ĩ blūie Skēkōl tso' e' ā? Kē a' e' ķitō'uk. Wēpa dōr trēnukwakpa, wēpa dōr ĩyī diōkōl dalōiōkwakpa, s'senewābak dalōseukwā wakpa, wēpa trēr wēpa tā, alakōlpa trēr alakōlpa tā, esepa kōš kē dōpa ĩ blūie Skēkōl tso' e' ā. <sup>10</sup> Ñies wēpa dōr akblōkwakpa, wēpa dōr ĩyī kķechōk tajē wakpa, bloblopa, s'chōk suluē wakpa, esepa kōš kē dōpa ĩ blūie Skēkōl tso' e' ā. <sup>11</sup> A' wēlepa bak senuk ĩyī ekkē wamblōk, erē Skēkōl tō a' pakōa'bak, a' batseō'bak, a' klōg'bak wēs pē' buaē yēsýsē es ĩWikōl wa Skēkēpa Jesucristo ttō wa.

### *Skēkōl kē wā se' tsātķēne ās se' tō ĩ sulu wamblōiā*

<sup>12</sup> A' wēlepa tō ichecke: "se' wā kawō tso', ĩ kōš kiane wēs se' kī, ese woie." Erē ye' ichē tō kē ĩ ulitane dōr buaē se' ā wē. Ye' wā kawō tā ĩ ulitane woie, erē kē ye' e' mupātšā ās ilē e' alōkā ye' kī. <sup>13-14</sup> A' wēlepa tō ichecke: "chķē dōr s'ñawi ā, ñies s'ñawi dōr chķē a." E' yēne erē aishkuō tā ĩyī bōt ñe' ewerawa Skēkōl tō. Erē s'chķā kē dōr trēnoie. Skēkōl tō s'chķā shķē'werakane aishkuō tā idiché tajē wa wēs ie' tō Skēkēpa Jesús shķeō'kane es. E' kuēķj s'chķā kē meneāt trēnoie wēs a' tō

\* 5:7 pan wōlōwōkā kēchke: Judiowak wōblar pan wōlōwōkā tso' ie'pa u ā e' kōš uyōtšā Ie'pa Yēpa Yērulune Egipto e' kēwō tkō'wēketke ie'pa tō e' yōkī.

ibikeitseke es, imeneat i buae wöie Skëképa a, ñies ie' tò s'chka kkò'neke.

<sup>15</sup> ¿A' kè wà ijcher tò se' batsulewà Cristo mik, e' kueki se' chka dör etkè ie' chka tã? E' dör es, e' tã ¿wes se' tò s'chka dör Cristo icha e' ia'wëmikã senukã alaköl sulusi tã ese wa? ¿Kè se' kãne e' ia'ukã yës! <sup>16</sup> ¿A' kè wà ijcher tò mik yi sené alaköl sulusi tã, e' tã ie'pa bõl miã wes wák eköl ã es? E' dör wes itso' kitule Skëköl yëkkuõ kã es. E' tò wëm ena ilaköl e' chë i' es: "Ie'pa bõl serdaë ñita tã ie'pa miã wes wák eköl ã es."\* <sup>17</sup> Erë yi batsulewà Skëképa Jesús mik, ese dör wes wák eköl ã es ie' tã.

<sup>18</sup> E' kueki a' tkõshkar trë yöki. Sene sulu skã kos, e' kè tò s'chka dalõsewëwã wes trë es. Mik se' trërke, etã s'chka dör Cristo icha, e' mèttasõ o'ka kè dör Cristo icha, ese a. E' wa s'wák chka dalõsewëwasõ. <sup>19-20</sup> ¿A' kè wà ijcher tò a' chka dör Wiköl Batse'r e' wé? Skëköl tò iWiköl mé a' a, e' tso' a' a. Ie' tò a' to'ttsabak, e' ské dör darerëë. A' kè dör a' wákpa icha, a' dör ie' icha. E' kueki a' kè senuk yësyësë as ie' kãkarka.

## 7

### *Se' serwã ñita e' pakë*

<sup>1</sup> I' chaki' a' tò ye' a' yëkkuõ kã, e' wà iuteke ye' tò i'ne. A' tò ye' a' ichaki' tò ¿buaë idör tò se' kè serwã alakõlpa tã? <sup>2</sup> Erë ye' ichë a' a' tò tajë trë tso', e' yöki a' kos maso tsüwã eköl eköl. <sup>3</sup> A' wëpa kos kawõtã senuk ilaköl tã, es ñies a' alakõlpa kos kawõtã senuk iwëm tã. <sup>4</sup> Alaköl chka kè meneat ie' wák ã a, e' meneat ñies iwëm a. Es ñies iwëm chka kè meneat ie' wák ã a, e' meneat ñies ilaköl a. <sup>5</sup> Ie'pa kè kãne ichkã kkëuk ñi yöki. Erë ie'pa kawõ mé ñi a e' batsõktsã ñi yöki ekuölõ ã ttoie S'yë tã, e' tã e' ã dalewa kè ie'pa ñi kõpawã. Mik kã e' tka, etã ie'pa ñi kõwane dõ' Satanãs tò ie'pa erkiõwë trënuke, kè ie'pa diché dë'kã e' kkõ'nuk e' kueki. <sup>6</sup> Erë ye' kè ku' a' a' ichök tò a' kawõtã ñi batsõktsã ñi yöki es, a' kã ikiane, e' tã a' tò iwëmi es. <sup>7</sup> Ye' a' tã sulitane mú dör wes ye' es, kè alaköl tã. Erë Skëköl tò imé sulitane a' kuã'kã kuã'kã ñi kãmoie.

<sup>8</sup> A' wëpa tso'ia' ekõrla ñies a' wëpa dör schõ, esepa a' ye' ichë tò buaë idör tò ie'pa mú ser këkraë ekõrla wes ye' es. <sup>9</sup> Erë ie'pa kè e' kkõ'nuku' trë yöki, e' tã ie'pa mú maso yulõne senowãie. S'serwã e' dör bua'ie maso kkechekesõ ñie e' tsãta.

<sup>10</sup> A' wëpa senewãbak, esepa a' ye' tò ttë dalõiëno i' meke: a' kè kãne ñi õkwa. Ttë e' kè dör ye' ttë, e' mé Skëképa Jesús tò se' a. Alakõlpa kè kãne iwëm õkwa. <sup>11</sup> Erë ie' tò iéwã, e' tã ie' kè kãne senukwã wëm o'ka tã, ie' kawõtã senuk ekõrla kè wëm tã. Ie' kè senak es, e' tã ie' kè er bua'ukne iwëm

kã. Ñies wëpa alaköl tã, esepa kè kãne ilaköl õkwa.

<sup>12-14</sup> A' malepa senewãbak, erë e' maso kè erblõtã Jesús mik, esepa a' ttë dalõiëno kè meneat Skëképa Jesús wa. Erë esepa a' ye' ichë tò a' masopa e' tsãta. Iwëm kè erblõtã Jesús mik, isalema e' tsãtkëmi ilaköl olomik. Ñies alaköl kè erblõtã Jesús mik, isalema e' tsãtkëmi iwëm olomik. Ie'pa ñi éwa, e' tã ie'pa ala'r dör wes pë' kè erblõtã Jesús mik esepa ala'r es, ie'pa tsãtkë e' dör darerë. Erë iyé ena imi serke ñita, kè ñi anewa, e' tã isalema ie'pa tsãtkëmi iyé õ imi olomik. E' kueki ye' ichë tò a' maso senakia' a' tã, e' tã kè iarwa. <sup>15</sup> Erë a' maso kè erblõtã Jesús mik, e' éna a' akwa krõ wa, e' tã kè iwõklõ'war a' kè klõulewã iulã a. Erë Skëköl tò se' klõõ'bak senuk bërë ñita. <sup>16</sup> E' kueki ibua'ie dör tò a' sermiã bërë ñita. A' wëm ¿i tò be' a' ichök tò be' alaköl kè tsãtkërpa be' olomik? A' alaköl ¿i tò be' a' ichök tò be' wëm kè tsãtkërpa be' olomik?

<sup>17</sup> E' dör wes ttë wa ye' tò Skëképa Jesús icha erule erule e'pa ulitane wõbla'weke kã wa'ne es. Ye' tò ie'pa a' ichë tò wes a' ku' Skëköl tò mik a' klõõ'itõ iwák a' etã, es a' atü bër. Ie' tò ieri mé a' a' seno eköl eköl es. <sup>18</sup> Wëpa tottola kkuõilit tẽule tsir, mik ie'pa klõõ' Skëköl tò iwák a' etã, esepa kè kãne e' mane'ukne wes. Es ñies wëpa kè wakyõule es, mik Skëköl tò ie'pa klõõ' etã, esepa kè kãne e' wakyuõk. <sup>19</sup> Se' wakyõule õ kè se' wakyõule e' ska' Skëköl kè tkine yës. Ie' ttë dalõiëno, e' dalõiekesõ, e' je' kã ie' tkirke. <sup>20</sup> A' kos e' tsuat wes a' dör mik ie' tò a' klõõ' iwák a' etã. <sup>21</sup> Mik ie' tò a' klõõ', etã ¿a' klõulewã kanë mésoie? e' tã kè a' tkinuk e' kã. Erë a' a' kawõ tso'ia' e' yõktsa e' ulã a, e' tã a' e' yõttã. <sup>22</sup> Mik ie' tò a' klõõ', etã a' klõulewã kanë mésoie, e' tã e' ye'ttsã ie' tò sene sulu ulã a' kanëbloie Skëképa Jesús a. Es ñies mik Skëköl tò a' klõõ', etã a' kè dör kanë méso'ne'se, e' tã e' klõõ' Cristo tò ie' wák kanë méso'paie. E' kueki a' klõulewã kanë mésoie, e' tã kè a' tkinuk e' kã. <sup>23</sup> Skëköl tò a' to'ttsabak, e' kueki kè a' e' tiukne yile skã ttë dikã. <sup>24</sup> A' yamipa, wes a' ku' Skëköl tò mik a' klõõ'itõ etã, es a' atü bër. A' senu' buaë yësyësë ie' a', sene me'itõ a' a' e' a.

<sup>25</sup> Ima a' tò ye' chaki' yëkkuõ kã wëpa tso'ia' ekõrla, esepa kã, e' iuteke ye' tò i'ne. Ese ttë kè mène ye' a' Skëképa Jesús wa. Erë ima ibikeitsëyõ, e' chekeyõ a' a. Skëköl ye' suë er siarë wa e' wa ieri méitõ ye' a' iwã jchenowã buaë. E' kueki i' chekeyõ e' mik a' erblõm. <sup>26</sup> I'ne tã se' serke kawõ darerë a, e' kueki ye' a' tã buaë idir tò se' kos e' tsuat wes s'tso' es. <sup>27</sup> Wëm senewãbak, ese kè tò ilaköl õkwa. Wëm duriã ekõrla, ese tayë kè yular. <sup>28</sup> Erë wëm senewã, e' tã buaë idir. E' wa ie' kè

\* 6:16 Génesis 2.24

wà i sulu wamblène. Nies alaköl kam serwà, ese senéwa, e' ta e' dör buaë. E' wa ie' kè wà i sulu wamblène. Erè wépa senewabak, esepa we'ikèmi ká i' k'j s'weirke ese tó tkòka wépa kè senewabak esepa tsatà. E' yöki ye' éna a' tsatkak, e' è kuekji ye' ichè tó buaë idir tó a' ser ekörla.

<sup>29-31</sup> A yamipa, ye' ichè tó kè se' a kawò tã'ia tajë. Wes ká i' dör j'ñe ta e' erkewatke. E' kuekji j'ñe ta ena kekraë kè se' kàne senukia er me'rie i tso' ká i' k'j ese k'j. Se' senewabak, esepa kè er mukwà e' k'j. Se' juke siarë, esepa kè er mukwà e' k'j. Nies se' tsts' rke buaë, esepa kè er mukwà e' k'j. Se' tó i tuë ta', esepa kè er mukwà i tso' rak iwà ese k'j. Se' serke buaë i tso' ká i' k'j ese mik, esepa kè er mukwà ese k'j.

<sup>32</sup> Ye' k'j ikiane tó a' mú tsts' r buaë, kè tkir i k'j. Wépa serke ekörla, esepa wà kawò tso' kibiiie Skèköl i'yi sauk ena i wër buaë ie' wa ese uk. <sup>33</sup> Erè wépa senewabak, esepa kawòtã i tso' ká i' k'j ese sauk as iwër buaë itayè wa. <sup>34</sup> Es ie'pa k'j i'yi bót kané tso'. Es nies alakölpa dör schö ena busipa wëm kè ta', esepa wà kawò tso' kibiiie Skèköl i'yi sauk. Ie'pa e' mumittsã senukbatse'r. Erè alakölpa senewabak, esepa kawòtã i tso' ká i' k'j ese sauk as iwër buaë iwëm wa. <sup>35</sup> Ttè ekkè chéyö a' kimoie, kè dör a' wöklö'woie. Ye' k'j ikiane tó a' ser buaë yësyësè Skèköl è a, kè wötkew' i tó.

<sup>36</sup> Wépa ttè meuletke tayè a senukwà, esepa wele tó ibikeitsè: "Tayè duéswö detke senowà, nies ye' kè a seneia ekörla. Bua' idir ye' a senukwà ie' ta", e' ta esepa a ye' ichè tó a' senakwà, e' ta a' senúwa, e' kè dör suluë. A' senúwa. <sup>37</sup> Erè wépa ttè meuletke tayè a senukwà, erè esepa kè éna senakwàia, e' ta esepa a ye' ichè tó e' dör buaë tó a' kè serwà. Erè a' kawòtã ibikeitsökwa bua'iewà kewe tó a' wákpa er wa a' kè senakwà. Nies a' kawòtã isauk buaë tó kè yi ku' a' a' ichök tó kè a' senukwà. A' tó ibikeitsétke tó a' senak ekörla kekraë, e' ta bua' idir tó a' kè serwà. <sup>38</sup> Es ye' tó ichè tó wépa senéwa, esepa tó iwé buaë. Erè wépa kè sene'wà, esepa tó iwé bua'ie.

<sup>39</sup> Alaköl senewabak, e' kawòtã senuk iwëm è tã dō mik iwëm blénewa etã. Iwëm blénewa e' ta ie' serwamine wëm o'ka ta. Erè ie' kawòtã senukwà wëm erblé Skèkèpa mik ese è ta. <sup>40</sup> Erè ye' ichè tó bua' idir ie' a tó ie' mú ser ekörla, kè senewane. E' tó ie' tsts'weraë buaë shute. Ye' tó iklö'wé tó ye' a Skèköl Wiköl tso' nies, e' kuekji ye' tó a' a' ichè es.

## 8

*Iyiwak jchëule i'yi diököl tso' dalöie ese a, e' pakè*

<sup>1</sup> Chkè meule i'yi diököl tso' dalöie ese a, ese k'j a' tó ye' a' ichaki' yëkuò k'j, e' iutekeyö j'ñe.

Ima a' tó i'yi diököl ñe'se ché, e' dör mokj e' jcher se' wà. Erè kè a' éna ichökwa tó se' wa i'yi jcher, e' tó se' kèmi e' tstsökka tajë s'malepa k'j. Erè s'malepa dalèritsesesö, e' tó ie'pa diché k'j ieraë. <sup>2</sup> Yi e' bikeitsö tó ie' wà i'yi jchertke tajë, e' wa iwènewà tó kam ie' wà i'yi jcher wës ikawòtã jchenuk es. <sup>3</sup> Erè yi tó Skèköl dalèritseke, ese mik ie' batsè buaë.

<sup>4</sup> Chkè meule i'yi diököl tso' dalöie ese a ese katèsö, e' k'j a' tó ye' a' ichaki'. Se' wà i'yi jcher buaë tó i'yi diököl ñe'se wák kè ta', e' kuekji kè idör ie' bua'. Skèköl chökke, e' dör eköl è. <sup>5</sup> Pè' kè tó Skèköl dalöie, esepa tó iklö'wé tó i' dalöiekerakitö, esepa tso' tajë serke ká jai a' o' ká i' a. Esepa kiérakitö kèköl ö skèkèpa. Mokj esepa tso', <sup>6</sup> erè Skèköl dalöieke se' tó, e' dör Skèköl eköl ème e'. Ie' dör S'yé. Ie' dör i'yi ulitane wì, nies se' tso' ie' è a. Nies Skèkèpa dör eköl è, e' dör Jesucristo. I'yi ulitane tso' ie' mik, nies se' tso' ie' mik.

<sup>7</sup> Erè kè s'yamipa ulitane éna iwà ane buaë tó i'yi diököl tso' dalöie, ese kos kè wà ta'. Ie'pa bak i'yi diököl ñe'se dalöiök, e' kuekji e' tso'ia' ie'pa er a' dō ikkè ta'. Mik ie'pa tó chkè meule i'yi diököl a, ese katé, etã e' k'j ier tó ikkaté. Ie'pa diché kè dè'ka ierbiök es, ese wöklö'woie. E' kuekji ie'pa tó ittse tó iianekane ñaie. <sup>8</sup> Se' bats Skèköl mik e' kè dör chkè wa. I' katekesö ö i' kè katèsö e' kè a' se' onuk buaë ö suluë ie' wò. <sup>9</sup> E' jcher a' wa, e' kuekji e' tó iklö'wé tó chkè kos katèmi a' tó. E' yène, erè a' e' kkö'nú as kè a' ukuömik s'yamipa kam éna iwà ar buaë, esepa ardone sene sulu a. <sup>10</sup> Ichösö tó be' éna iane buaë, e' mia' e' tkéser chkè meule i'yi diököl a, ese katök iwé a. Erè e' dalewa s'yami kam éna iwà ar buaë ese eköl tó be' sué chök ká e' tó ie' erkiöwéka ta imia' ta ikatèitö nies. <sup>11</sup> Be' tó iwé es, e' wà e' wa be' tó se' yami, kè diché dè'ka wé', e' émine sene sulu a ta isulurdawà be' ukuömik. Ie' dör s'yami, nies Cristo e' mettsã ttéwà ie' skéie. Be' tó iwé es, e' ta be' tó i'yi sulu wamblé s'yami k'j. <sup>12</sup> Se' tó s'yamipa kam éna iwà ar buaë, esepa k'j i' sulu wamblé es, e' ta nies se' tso' i' sulu wamblök Cristo k'j. <sup>13</sup> E' kuekji ye' ichè tó s'yami wele armine sene sulu a' ye' ukuömik, iyiwak chkà katéyö e' kuekji, e' ta kè ye' tó ikatepaiane.

## 9

*Pablo tó ikané tsatké*

<sup>1</sup> Wes a' tó ibikeitsèmi tó ye' kè a' kawò tã' i' woie wës ye' k'j ikiane es? Wësua a' tó ibikeitseke tó ye' kè dör Jesús ttekölpa tsá e'pa eköl. Erè ye' tó Skèkèpa Jesús su' ye' wák wöbla wa, e' kuekji mokj ye' dör ie'pa eköl. A' dör ye' kaneblöke Skèkèpa a' e' wà. <sup>2</sup> A' wakpa k'j iwènewà tó mokj ye' dör Jesús ttekölpa tsá e'pa eköl. O'kapa tó ichèmi tó ye' kè dör es, erè e' kè yènuak a' a.

<sup>3</sup> Wépa tō ye' ché es, esepa yöki ye' e' tsatköke i' es. <sup>4</sup> ¿Wes a' ibikeitsëmi tō wépa wöbla'wekeyö, esepa kë kawötä ye' kímuk inuköl wa chkoie di' yoie? <sup>5</sup> Nies ¿ima a' ibikeitsë tō ye' kë a kawö ta' senukwä tayë erblömi Jesús mik ese tä tsëmi e' ta wes Jesús tteköla malepa ena Jesús ëlpa ena Pedro e'pa tō iweke es? <sup>6</sup> ¿ima a' ibikeitsë tō ye' ena Bernabé, sa' böi ë kawötä kanablök sa' wákpa ulä wa e' kkö'noie? <sup>7</sup> ¿Wé a' wa isuule tō ñippökwa'pa mi'ke, erë iwákpa e' kkö'nuke ichkë wa idi'yë wa? ¿Wé a' wa isuule tō iyiwö tkësö, erë kë sö iwä katepa? ¿Wé a' wa isuule tō yi' tso' chibo kkö'nuk, erë ese kë tō chibo tsu'diö yepa? <sup>8-9</sup> ¿Chök ye' tso' a' a, e' kë bikeitsë s'ditsö ë wä, ñies itso' kitule Moisés tte dalöiëno ki, e' tō ichë i' es: "Baka wë'ñie tso' kanebloie trigo wöttsoie, e' kë kawö ta' kkö' payuëwä itso' kanablök e' dalewa es trigowö katdütö." ¿ima a' ibikeitsë? ¿Tte dalöiëno e' me'at Skököl tō baka wë'ñie ë kkö'noie? <sup>10</sup> Au, ie' tō ime'at se' a' ñies. Wépa tō iyiwö tkeke ena wépa tō ishteke, esepa tō iwakanewëke ie'pa tō iwö kak paneke e' kuëki. <sup>11</sup> Es ñies sa' tō Wiköl Bats'e' i'yi tsä paka' a' a, e' dör wes iyiwö tkësö es, e' kuëki kë idör suluë tō a' tō sa' kímü i' tso' a' wa ese wa, e' dör wes iyiwö shtekesö es. <sup>12</sup> A' wöbla'ukwakpa skä e' kkö'nuk a' kawötä, e' yitä buaë a' kawötä sa' kkö'nuk.

Erë e' wä kë kine sa' wä a' a. Mik sa' bak a' ska, e' ta sa' kë wä a' i'yi kâne e' kkö'noie. Sa' kanablë' sa' wákpa ulä wa e' kkö'noie. E' dör darërë sa' a, erë e' kōs dalë'ttsë' sa' tō as kë i' tō a' wöklö'ü Cristo ttë buaë e' klö'ük. <sup>13</sup> A' wä ijcher tō wépa kanablöke Skököl wé tso' Jerusalén e' a, esepa serke i' kanewëke ie'pa tō ese mik. E' wä dö tō iyiwak jcheke ie'pa tō kã' tso' imoka Skököl a' e' ki, ese chkä kak tsekeat ie'pa tō katë. <sup>14</sup> Es ñies Skökëpa Jesús tō iyë'at tō wépa kanablöke ie' a' ittë buaë pakök, esepa serdaë kanë e' mik. <sup>15</sup> Erë ye' kë wä i'yi ikkë kine a' a yës. Nies ye' kë ku' i' chök a' a as a' tō ye' a' imü. Ye' tō Jesús ttë buaë pakeke ëme, e' tō ye' ttsë'wëke buaë shütë. E' kë yepattsa yi' tō ye' ulä a. Ye' a' ta buaë idir tō ye' duöwa, erë ye' kë tō a' ulä a' i' klö'wëpa.

<sup>16</sup> Erë ye' patkëule Jesús ttë buaë pakök, e' kuëki e' wa ye' kë a' e' ttsë'nukkä yës. Ye' kawötä iwä pakök. Ye' kë tō ipakë, e' ta jwëstela ina ye' ta! <sup>17</sup> Ipaköpayö ye' wäk er wa, e'ma ye' wä kawö ta' s'ña'woie ikü. Erë kanë e' me'at Skököl tō ye' ulä a, e' kuëki ye' kawötä ipakök. <sup>18</sup> E' dör es e'ma ¿i dör iské ye' a? Ye' ttsë'ne buaë ipakök ëme e' dör iské ye' a. E' wä kiane chë tō erë ye' wä kawö ta' senuk ye' kanë e' wa, erë e' kë ki ye' s'ña'wëku' yës. E' tō ye' ttsë'wëke buaë shütë.

<sup>19</sup> Erë ye' kë dör yi kanë méso, erë ye' e' mettsa sulitane kanë mésoie as kos ie'pa erblömi Jesús mik, ekkëpa dö erblök imik. <sup>20</sup> Mik ye' tso' judiowak shüa, e' ta ye' serke wes sa' judiowak ser Moisés ttë dalöiëno dikjä es as ie'pa erblö Jesús mik. Erë ye' kë ku'ia Moisés ttë dalöiëno e' dikjä, erë mik ye' tso' ie'pa shüa, e' ta idalöiekeyö as ie'pa erblö Jesús mik. <sup>21</sup> Es ñies mik ye' tso' pë' kë dör judiowak esepa shüa, e' ta ye' serke wes ie'pa ser es as ie'pa erblö Jesús mik. (Erë kë i' sulu wambleku'yö. E' wä dö tō erë ye' kë ku'ia Moisés ttë dalöiëno e' dikjä, erë ye' tso'ia Skököl ttë dalöiëno e' dikjä, ye' tso' Cristo ttë dikjä e' kuëki.) <sup>22</sup> Mik ye' tso' s'yamipa kam éna Jesús ttë wä ar buaë, esepa shüa, e' ta ye' serke wes ie'pa ser es, as ye' a' ie'pa kimer as ie'pa éna iwä ar buaë. Es mik ye' tso' pë' shüa e' ta ye' serke wes ie'pa es as wes alë ie'pa wëlepa tsatkër. <sup>23</sup> I kos wëkeyö e' döer Jesús ttë buaë ki shköwoie as iwä döñak ye' ulä a.

<sup>24</sup> A' wä ijcher tō mik se' turke tseë isuoie tō wé e' alömi, e' ta iturkerak seraa, erë eköl ë e' alömi, ese ulä a' iské döraë. E' s'ü a' senü Skököl a' buaë as iské dö a' ulä a' wes wé e' alé ese ulä a' iské de es. <sup>25</sup> Tunukwakpa ulitane e' kkö'nuke, e' yuöke kekraë e' aloka imalepa ki. I kos tō ie'pa wöklö'wëmi, e' olo'yeke ie'pa tō. E' kos wëke ie'pa tō as kal kö yuekerakitö wöshkiie\* tkëkä iwökir ki, ese dö ie'pa ulä a' ie' alérak e' skéie. Iské e' chklörtä'wä, erë se' iyuleke, e' dör yöbië kë chklörtä'wä. <sup>26</sup> Ye' serke Skököl a' wes yi tur e' aloka ese es, kë döer wes tunukwak turke éanas ese es. Ye' kë döer wes ñippökwa' tō iulä tsini' yupeke e' siwa' ki, kë wä ta' ese es. <sup>27</sup> Ye' e' wöklö'uke darërë, ye' chkä kekeyö kësik wa as tō iü wes Skököl ki ikiane es. E' wëkeyö es dö' ye' s'pattë tajë Skökëpa ttë wa, erë ye' wäk kë ulä a' iské dö.

## 10

### *Kë a' minuk i'yi diököl dalöie ese wé a*

<sup>1</sup> A yamipa, ye' kë ki ikiane tō a' éna ichöwa tō i' bak se' yamipa bak kã iaiäë Moisés këwö ska' e'pa ta. Ie'pa kos wëts'e' Skököl tō mö ar tajë e' wa. Nies Skököl diché wa ie'pa kos baktsä klö wa dayë kië Dayë Mat, e' shüa kë nune'ka dayë wä. <sup>2</sup> E' döer wes ie'pa wösunerak mö a' ena dayë a' es iwä kkachöie tō ie'pa batsulewä Moisés mik. <sup>3</sup> Es ñies chkë mé Skököl wäk tō ie'pa a, e' ë ñë ie'pa ulitane tō. <sup>4</sup> Nies di' mé ie' wäk tō ie'pa a, e' ë yë ie'pa ulitane tō. Di' e' döwëttsgäitö äkkuö a. Äkkuö e' tō Cristo wä ché, e' mir ie'pa ta kekraë ikimukrak. <sup>5</sup> Erë ie'pa kibiiepa kë wër Skököl wa buaë. E'

\* 9:25 kal kö yöule wöshkiie: E' merke tunukwakpa e' alé esepa a, e' kkecheke ie'pa tō tajë. Wé ki itkënekä ese wäk dalöiërtä' tajë.

kuęki ie'pa kibiiepa durulune, nu atę tkęter ká wa'ne ká sir poę e' kį.

<sup>6</sup> E' kọs tka ie'pa tą se' a iwà kkachoię tọ kę se' káne i sulu kkechọk węs ie'pa tọ ikkeyę' es. <sup>7</sup> Se' kę káne iýi diọkọl dalıoiọk węs ie'pa węlepa tọ idalıoię' es. I wambłę' ie'pa tọ e' tso' kitule Skękọl yękkuọ kį. E' tọ ichę: "Ie'pa e' tulęwá chkọk di'yọk taję buaę iýi diọkọl dalıoię. E' ukuọki tą ię' kękarak klótọk tręnuk i sulu wambłọk taję e' ttsę'wọkarak buaę." <sup>8</sup> Kę se' káne tręnuk węs ie'pa węlepa tręnerak es, e' nuį kį ie'pa taję e'pa durulune ká etkę a dọka 23,000. <sup>9</sup> Kę se' káne Cristo wọnatkọk i sulu wa węs ie'pa węlepa iwọnatkę' es, e' nuį kį ie'pa kótulur tkabę wa. <sup>10</sup> Kę se' káne kkọchọkka Skękọl wọa węs ie'pa węlepa kkọyę'ka es, e' nuį kį S'ttókulurwak tọ ie'pa kótulur.

<sup>11</sup> Iýi ekkę kọs tka s'yamipa bak ká iaiąę, e'pa tą iwà kkachoię se' a tọ se' kę káne i sulu wambłọk węs ie'pa es. E' kọs kiteat Skękọl yękkuọ kį se' serke i'ne tą ká i' erkewatke e' kęwọ ska', esepa a ikkachoię tọ wępa tọ Skękọl watętsą, esepa weirdaę inuį kį.

<sup>12</sup> A' węlepa e' bikeitsọ tọ "ye' e' tkęwá darerę Jesúš mik, kę ye' arpamine i sulu a." Ese wakpa kawọta senuk erki as kę iarmine i sulu a. <sup>13</sup> Se' erkirke i sulu wambłọk, ese kọs tkọke sulitane tą. Erę Skękọl ttọ mokję, ie' kę tọ se' mepattsa tọ i sulu tọ se' erkiowę taję shųtę kę se' a iwọklör ekkę. Mik se' erkiowęke i sulu tọ, etą ię' tọ se' a ikkacheraę węs se' tkọshkarmi iulá a as se' a iwọklör.

<sup>14</sup> A yamipa, a' dalęr taję ye' ęna, iýi diọkọl tso' dalıoię ese kọs yọki a' tkọshkar bąnet. <sup>15</sup> A' kąbikeitsọ buaę, e' kuęki i chekeyọ a' a, e' bikeitsọ tą a' isueraę tọ mokję idir. <sup>16</sup> Mik se' ni dapa'uke Cristo kọtęwá e' kęwọ tkọ'uk, etą węstela chęsọ Skękọl a' vino yekesọ nią tka' etkę a' e' kį. Vino ne' tọ ie' pę tene taję s'tsatkoię e' wá chę. E' wa se' kọs tso' batsulewá ie' mik. Nies pan etọ ę blatekesọ ni a' e' nękesọ nią. E' tọ ie' chká wá chę. E' wa se' kọs tso' batsulewá ie' mik. <sup>17</sup> Se' dör taję, e' kọs tọ pan etọ ę e' nęke, e' kuęki se' kọs dör węs wák ekọl ę es.

<sup>18</sup> I węke Israel aleripa tọ e' wá bikeitsọ. Mik ie'pa tọ iýiwak jcheke ka' tso' imoką Skękọl a' e' kį, etą wępa tọ ese chká kak kateke, esepa kọs tso' ie' dalıoiọk nią. Es nies a' mi'ke iýi diọkọl dalıoię wę a, tą chkę meule iýi diọkọl a, ese kak katę a' tọ, e' tą a' tso' idalıoiọk ie'pa tą nią. <sup>19</sup> E' wa ye' kę ku' ichọk tọ iýi diọkọl ese ena chkę meule ią ese dichę tą. <sup>20</sup> Au, kę idör es. Ye' tso' ichọk tọ pę' kę tọ Skękọl dalıoię esepa tọ iýiwak jcheke mę iýi diọkọl a, nęmata e' meule aknamapa a, kę meule Skękọl ichọk e' a. Ye' kę kį ikiane tọ a' e' tių aknamapa iýi shųą yęs. <sup>21</sup> A' kę a Skękępa Jesúš tka' ena aknamapa tka' e'

wá yanuk nią. A' kę a Skękępa chkę ena aknamapa chkę katanuk nią. <sup>22</sup> Iwęsọ es, e' tą s'tso' Skękępa tsiriuk as isibirka s'kį. Ie' uluneką s'kį, e' tą ęwęs e' dalę'ttsęrmi sią?

### I kọs ų Skękọl ę kįkọka

<sup>23</sup> A' węlepa tọ icheke tọ "se' wá kawọ tso', i kọs kiane se' kį wę, ese wọie." E' yęne erę kę i ulitane e' dör buaę se' a wę. I kọs kiane se' kį wę, e' węmisọ, erę kę i ulitane a' s'yamipa er dichę ięnuk. <sup>24</sup> Se' kę káne tkinuk se' wák ę kį. Nies s'kawọta tkinuk s'malepa kį.

<sup>25-26</sup> Skękọl yękkuọ tọ ichę: "Ká i' ena iýi kọs tso' i kį, e' dör Skękọl icha." <sup>27</sup> E' kuęki iýiwak chká watırke iwę a, ese kọs katęmisọ. Kę iwá chakar tọ imeule iýi diọkọl a' ọ au as s'er kę tọ s'kkatọ i kį.

<sup>27</sup> Yi kę erblóta' Jesúš mik, ese ekọl tọ a' węle kię chkọk ie' tą, tą a' shkak, e' tą a' yú. I kọs wa a' dęne e' katọ bęrę kę ichakar as a' er kę tọ a' kkatọ i kį. <sup>28</sup> Erę ọka tọ a' a' ichę: "Iýiwak chká sę meule iýi diọkọl a", e' tą kę ikatar ie' dalęrmik, nies erbike dalęrmik. <sup>29</sup> Ye' tso' ie' erbike chọk, ye' kę ku' a' erbike chọk.

Ye' a' kawọ tą iýiwak chká ulitane katọk, ęwęs e' kę katepayọ, imęne sulu ọ'ka kį e' ę kuęki? <sup>30</sup> I kateke ye' tọ, ese kį ye' tọ węstela cheke Skękọl a, e' tą ęwęs e' sulurmi ọ'ka yọki? ęwęs e' kį ie' tọ ye' chęmi sulue?

<sup>31</sup> E' kuęki i kọs yekesọ, nękesọ, nies i kọs wękesọ, e' ųsọ as Skękọl kįkarka. <sup>32</sup> A' senu wọsh wa as kę yi wọklör a' ukuómik. Ju-diowak idir ọ kę idör judiowak ọ wępa dör Skękọl icha ese idir, ese kọs kę wọklör wá. <sup>33</sup> A' senu węs ye' serke es. Ye' wák e' chę senuk kękraę as e' węr buaę sulitane wa. Ye' kę tkirku' ye' wák kį. Ye' tkirke sulitane kį ie'pa kimoie as itsatkęrdak.

## 11

<sup>1</sup> A' senu węs ye' serke es. Ye' serke węs Cristo sęr es.

*Wes alakọlpa kawọta e' ųk mik se' ni dapa'uke etą*

<sup>2</sup> Kękraę a' er arke ye' ska'. Nies i kọs wa ye' tọ a' wọblaọ, e' wękeia a' tọ. E' kuęki ye' tso' a' kįkọkka. <sup>3</sup> Erę ye' kį ikiane tọ a' wá ijchęr tọ Cristo dör wępa dör ie' icha esepa kọs wókir. Nies węm dör alakọl wókir. Nies Skękọl dör Cristo wókir. <sup>4</sup> Mik a' ni dapa'uke ttọk Skękọl tą, etą a' wępa węlepa ttọke ie' tą ọ ilę chekerakitọ ie' ttekolie tą iwókir pabakekewaitọ, e' tą e' wa yi dör iwókir e' dalósewękewaitọ. <sup>5</sup> E' skię kę dör es alakọlpa. Ie'pa ttọke Skękọl tą ọ ilę chekerakitọ ie' ttekolie, kę wókir pabakulewá, e' tą e' wa ie'pa tọ yi dör iwókir e' dalósewęwá. Ie'pa dör węs alakọlpa tsą tọ dabebe esepa es. <sup>6</sup> Alakọl węle kę ęna iwókir pabakawá,

e' tã ese mú tò itsã tõe wes wëm es. Erë e' dör jaë tajë ie' a. E' kuekji buaë idir ie' a tò iwökir pabakõwa. <sup>7-9</sup> Skëköl tò wëm yö' wes ie' wák es, e' kuekji wes ie' dör e' wërke wëm kj. E' kuekji wëpa kã kãne iwökir pabakõwã mik ittõke ie' tã e' dalewa. Erë alaköl dë'kã wëm wa, e' kã dör tò wëm dë'kã alaköl wa. Nies alaköl yöne wëm kuekji ikimoie, e' kã dör tò wëm yöne alaköl kuekji. E' kuekji wes wëm dör e' wërke alaköl kj. <sup>10</sup> E' kuekji alakõlpa kã e' wã kkachök iwökir pabakëwa wa. Nies ie'pa kã e' uk Skëköl biyõchõkwakpa kuekji. <sup>11</sup> Erë alakõlpa ena wëpa batsulewa Skëkëpa mik esepa kã meneat ulawa ulawa ñi yöki. E' skëie imeneat ñi kïmuk ñi dalõioök. <sup>12</sup> Mokj tò alaköl tsã dë'kã wëm tsã wa. Erë nies e' ukuõkja tã wëpa ulitane kurke alaköl wa. Erë se' kõs ena iyi kõs, e' dë'kã Skëköl wa.

<sup>13</sup> A' wakpa tò ibikeitsõ. ¿Buaë idir tò alakõlpa ttõke Skëköl tã wökir kã pabakule? <sup>14</sup> Sulitane wa ijcher tò iwake' meneatbak tò wëm tsã batsj, e' dör jaë. <sup>15</sup> Erë alaköl tsã batsj, e' mène ie' a iwökir pabakõie, e' kuekji e' mène buaë ie' kj ikikokã. <sup>16</sup> Yile kã wã ye' sini'kune, e' tã ese ãna ãnã tò se' dör Skëköl icha erule erule ñi dapa'uke kã wa'ñe, e'pa kõs wõblar tò alakõlpa ttõke Skëköl tã wökir pabakulewa.

### *Wes se' kã Skëkëpa kötëwã e' këwõ tkõ'uk*

<sup>17</sup> Ì cheke ye' tò a' a' i' tã, e' kã kj ye' a' a' peñanuk. Mik a' ñi dapa'uke, etã e' wã dettsã suluë ichõk ñi buaë tsãtã. <sup>18</sup> Këweie yö ichè tò ye' wã ibiyõ jcher tò mik a' ñi dapa'uke, etã a' ñi blabatsëlor. Wele tã ye' iklõ'wë tò e' dör mokj. <sup>19</sup> Mokj e' dör buaë tò a' ñi blabatsõ as iwërwa' a' shuã tò a' wëpa wër mokj Skëköl wa buaë. <sup>20-21</sup> Mik a' ñi dapa'uke Skëkëpa kötëwã e' këwõ tkõ'woie chkã wa di'yë wa, etã a' wãkpa tò a' chkã ñëwã kã wã yiamipa kã wã i' tã' esepa bikeitse. Bataie tã a' wëlepa atë kã chkaule wëlepa e' ttëkã tajë blo' wa. E' wa i' chã a' tò tò ikëwõ tkõ'weke a' tò e' dalõsëwëwã a' tò. <sup>22</sup> Wësua a' kã u' tã' chkoie di'yoie. Wësua se' dör Skëköl icha e'pa dalõsëwëkëwã a' tò. Wësua a' ãna s'yamipa dör siarë, esepa jaëwãkã. ¿Ì chëmiyõ a' a' iyi ekkë kuekji? ¿A' kj ikiane tò ye' tò a' peñë ikj? Au, ye' kã tò iwëpa.

<sup>23</sup> Skëkëpa Jesús ttë meneat ye' a' paka'neyõ a' a, e' dör i' es: Nañewe kam ie' merttsã, e' yöki ie' tò pan klõ'wë. <sup>24</sup> E' kj wëstela chëitõ Skëköl a. E' ukuõkja tã jblatëitõ tã ichë: "Pan i' dör ye' chkã merdattsa' a' tsatkoie e'. I' ú kekraë as a' er arne ye' ska'." <sup>25</sup> Es nies mik ie'pa chkã õne tã tkã' a' vino tkër, e' klõ'wëitõ tã ichë: "Vino i' dör ye' pë. Ye' tterawã e' pë tërdaë, e' wa ttë pa'ãlj me' Skëköl tò, e' wã de. Bitõkicha a' tò iyeke, etã a' er anũ ye' ska'." <sup>26</sup> Es bitõkicha a' tò pan ñe' ñe' ena vino ñe' yé, e' wa a' tso' ichõk tò

ie' kötëwã se' skëie. Es a' tò ichè michoë dõ mik ie' datskene etã.

<sup>27</sup> E' kuekji yi isie tò pan ñe' ñe' ena vino ñe' yé, erë kã iserku' wes kawõ tkõ'weke ñe' wã kiane chë es, e' tã esepa tso' Skëkëpa chkã ena ipë dalõsëukwã. <sup>28-29</sup> Iñësõ ena iyësõ, erë s'yamipa malepa dör wes wák eköl ã es se' tã Skëkëpa batamik, esepa dalõsëwëwã, e' tã Skëköl wõ kiekesõ e' kj. E' kuekji se' kõs eköl eköl kawõtã e' sauk kewe tò is s'tso', e' ukuõkja tã pan ñũ ena vino yö. <sup>30</sup> Erë a' kã ku' iwã dalõioök es. E' kuekji a' tajë kirirke ianewã alabëbë, nies a' wëlepa duolur. <sup>31</sup> Se' e' suë buaë, e' ma Skëkëpa kã tò se' shulepa. <sup>32</sup> Erë ie' tò se' shuleke, e' tã e' dör se' kimoie as se' kã kichatër aishkuõ tã wëpa kã tò ie' dalõietã' esepa tã ñita. <sup>33</sup> A' yamipa, mik a' ñi dapa'uke chkõk ñita Skëkëpa kötëwã e' këwõ tkõ'woie, etã a' ñi panũ. <sup>34</sup> A' wëpa duë bli wã, e' tã esepa chkõbitũ iwãk u' a' as a' kã tò Skëköl wõ kiõ e' kj a' ñi dapa'uke chkõk ñita e' wa. İyi malë kianeia' shulë, ese shulekeyõ mik ye' dene a' ska' etã.

## 12

### *Ì merke Wikõl Batse'r wa e' pakë*

<sup>1</sup> A' yamipa, i' tã ye' tò ì merke Wikõl Batse'r wa se' a' e' ttë pakeke a' a. Ye' kj ikiane tò a' ãna ttë e' wã ar buaë. <sup>2</sup> A' wã ijcher buaë tò kënët tã kam a' tò Skëköl dalõio, e' yöki a' bak e' muksã wëttsë wes alë iyi diõkõl kã ttõ tã', ese dalõioök. <sup>3</sup> E' kuekji j'ñe tã ye' kj ikiane tò a' wã ijcher tò wëpa ttõke Skëköl Wikõl wa, esepa kã tò ichepa: "Jesús mú kichatër!" E' sũ wëpa kã ttõku' Wikõl Batse'r wa, esepa kã tò ichepa mokj: "Jesús dör sulitane Këkõl!"

<sup>4</sup> Ì mène se' a' ñi kimoie ese dör kuã'kj kuã'kj, erë e' wì dör Skëköl Wikõl eköl ã. <sup>5</sup> E' sũ kanë tso' se' wã s'kimoie ese dör kuã'kj kuã'kj, erë e' wì dör Skëkëpa Jesús eköl ã. <sup>6</sup> E' sũ ñi wëkesõ ese wã dõkettã kuã'kj kuã'kj, erë e' wì dör Skëköl eköl ã, e' tò iwakanewëke se' a' as iwã dõttã wes ie' kj ikiane es. <sup>7</sup> Se' kõs eköl eköl a' imène Skëköl Wikõl wa s'malepa kimoie. <sup>8</sup> Wëlepa a' imerke Skëköl Wikõl wa Skëköl siwë skjë e' pakoie. Wëlepa skã a' Wikõl e' ã wa imerke ttë blëule ese wã pakoie. <sup>9</sup> Wëlepa skã a' imerke Wikõl e' ã wa erbloie Skëköl mik bua'ie. Wëlepa skã a' imerke Wikõl e' ã wa s'duõke ese bua'wõne. <sup>10</sup> Wëlepa skã a' imerke ñi kã or yi a' ese woie. Wëlepa skã a' imerke ttoie Skëköl ttekölie. Wëlepa skã a' imerke isuõie tò yile kapakõke ese dör Skëköl ttë mokj õ au. Wëlepa skã a' imerke ttoie ttõ kuã'kj kuã'kj wa. Wëlepa skã a' imerke wëpa ttõke ttõ kuã'kj kuã'kj wa, ese wã pakone. <sup>11</sup> Erë ekkë kõs dör Skëköl Wikõl eköl ã e' kanë. Ie' tò imeke se' kõs a' eköl eköl

wes ie' kǝ ikiane es. <sup>12-13</sup> Se' dör Cristo icha e'pa dör wes wák eköl ë es. Se' ulà tǝ', klö tǝ' ena se' yese skà tso' tajë, erë e' kǝs wöiëulewǝ etkëme. Es ñies se' dör kuǝ'kǝ kuǝ'kǝ. Se' wëlepa dör judiowak, se' wëlepa skà kë dör judiowak, se' wëlepa klöulewǝ kanë mësoie, se' wëlepa skà kë dör es. Erë se' kǝs iënewǝ Skëköl Wiköl a, e' ë a se' kǝs tso'. E' wa se' de wes wák eköl ë es Cristo tǝ' ñita.

<sup>14</sup> S'chka kë dör etkëme, iyese tso' tajë kuǝ'kǝ kuǝ'kǝ. <sup>15</sup> Ichösö tó s'klö mú tó ichë: "Ye' kë dör ulà, e' kuëkǝ ye' kë ku' chka mik." Ie' tó ichëmi es, erë ie' tso' chka mik. <sup>16</sup> S'kukuöña mú tó ichë: "Ye' kë dör wöbla, e' kuëkǝ ye' kë ku' chka mik." Ie' tó ichëmi es, erë ie' tso' chka mik. <sup>17</sup> S'chka kǝs e' mú dör wöbla ë, e'ma çwes ì ttsëmisö? S'chka kǝs e' mú dör kukuöña ë, e'ma çì wa ìyi alar ttsëmisö? <sup>18</sup> Erë Skëköl kë wa se' chka yöne es. Ie' tó ì kǝs tso' s'chka mik, e' mëat wë ie' kǝ ikiane mëat eë as ikaneblö buaë ñita. <sup>19</sup> Es s'chka ulitane mú dör wöbla ë ö kukuöña ë, e'ma s'chka kë dör mokǝ. <sup>20</sup> Erë kë idör es. S'yese tso' tajë.

<sup>21</sup> E' kuëkǝ s'wöbla kë a iyënu k s'ulà a: "Be' kë dör ìie bua' ye' a." Es ñies s'wökir kë a iyënu k s'klö a: "Be' kë dör ìie bua' ye' a." <sup>22</sup> E' skëie, s'chka wësele bikeitsekësö tó kë ìa ì or buaë, e' kë tǝ' etǝ kë se' serpa. <sup>23</sup> S'chka wësele kǝ se' jaërke, kë kkeyër tǝ', ese paiekesö buaë datsǝ' wa kkö'neke buaë. <sup>24</sup> Erë s'chka wësele kë kǝ se' jaërku', e' kë paieku'sö datsǝ' wa. S'chka wësele bikeitsekësö tó kë idör buaë chökle, ese kkö'nekesö bua'ie. Es Skëköl tó s'chka tulu'wa. <sup>25</sup> Ie' tó iwë es as s'chka kë ñi blabatsö e' skëie ñni kkö'nurak buaë ñnikëë. <sup>26</sup> Se' yese alë dalëne s'mik, e' tǝ' s'chka kǝs e' tó ittse. Ñies se' yese alë peñarke buaë, e' tǝ' s'chka kǝs e' tssë'ne buaë.

<sup>27</sup> A' kǝs eköl eköl tso' batsulewǝ Cristo mik wes wák eköl ë es. <sup>28</sup> Se' dör Skëkëpa Jesús icha e'pa shuǝ Skëköl tó se' tkë'ka kanë kuǝ'kǝ kuǝ'kǝ uk. Këwe ie' tó Jesús ttekolpa tsǝ, e'pa tkë'ka. E' ukuöki tǝ ittekolpa malepa tkëneka. E' ukuöki tǝ s'wöbla'ukwakpa ittë wa esepa tkëneka. E' ukuöki tǝ ì kë or yi a ese ukwakpa tkëneka, ñies s'duöke ese bua'ukwakpa ena s'kimukwakpa ena s'wëttsukwakpa esepa tkëneka. Ñies wëpa ttöke ttö kuǝ'kǝ kuǝ'kǝ wa, esepa tkëneka. <sup>29</sup> Se' ulitane kë dör Jesús ttekolpa tsǝ. Se' ulitane kë dör Skëköl ttekolpa. Se' ulitane kë dör s'wöbla'ukwakpa. Se' ulitane kë dör ì kë or yi a ese ukwakpa. <sup>30</sup> Se' ulitane kë dör s'duöke ese bua'ukwakpa. Se' ulitane kë ttöpa ttö kuǝ'kǝ kuǝ'kǝ wa. Ì chekerakitö ttö kuǝ'kǝ kuǝ'kǝ wa, ese wa kë pakanukne se' ulitane a. <sup>31</sup> Erë ì merke se' a Wiköl Batse'r

wa, e' bua'ie yulö a' dör poë.

*Se' ñi dalëritsö e' dör ñalǝ bua'ie*

Erë ñalǝ bua'ie shutë, e' kkachekeyö a' a' ì tǝ.

## 13

<sup>1</sup> S'ttö kuǝ'kǝ kuǝ'kǝ dö Skëköl biyöchökwakpa ttö e' kǝs mú yër ye' a, erë s'malepa kë dalër ye' éna, e' tǝ ye' dör wes tabechka ppësö ese blar es ö wes panakuö ppësö ese blar es kë wà tǝ'. <sup>2</sup> Ye' mú ttö Skëköl ttekolie, ñies ie' siwë blëule e' kǝs mú ar ye' éna ñies ìyi kǝs mú jcher ye' wǝ ñies ye' mú erblö Skëköl mik tajë dö kabata skéü ekkë, erë s'malepa kë dalër ye' éna, e' tǝ ye' kë dör ì. <sup>3</sup> Ì kǝs tso' ye' wǝ e' mú mëttsayö s'siarëpa a, ñies ye' wák mú e' müttšǝ we'ikë siarë Skëköl ttë kuëkǝ e' ttsokǝ\*, erë s'malepa kë dalër ye' éna, e' tǝ e' kë dör ìie bua' ye' a.

<sup>4</sup> Se' ñi dalëritsöke, e' tǝ ì kǝs dalë'ttsekësö bërë, ñies se' er buaë chöke s'malepa a. Se' ñi dalëritsöke, e' tǝ kë se' ukyërta' ñi kǝ, kë se' e' tssöta'ka s'malepa kǝ se' e' bikeitsöta'ka tó se' dör pë' tajë. <sup>5</sup> Se' ñi dalëritsöke, e' tǝ kë s'malepa suësö er sulu wa, kë se' er mutǝ'wǝ se' wák ë kǝ, kë se' ulurta'ka bet, ì sulu wamblërke se' tǝ, e' tǝ ese nuǝ olo'yekësö. <sup>6</sup> Se' ñi dalëritsöke, e' tǝ ì sulu wamblërke ese kë tó se' tssë'wëpa buaë. E' skëie mik s'malepa serke wes ttë mokǝ tó ichë es, e' tǝ ese je' tó se' tssë'wëke buaë. <sup>7</sup> Se' ñi dalëritsöke, e' tǝ ì kǝs dalë'ttsekësö, se' erblö michoë Skëköl mik, ì buaë yë' Skëköl tó se' a ese kǝs wǝ panekesö kröröë, ì kǝs wöklö'wëkesö.

<sup>8</sup> Se' ñi dalëritsöke e' kë ertǝ'wa. Ìñe tǝ imerke ttoie Skëköl ttekolie, erë aishkuö tǝ e' kë merpaia es. Ìñe tǝ imerke ttoie ttö kuǝ'kǝ kuǝ'kǝ wa, erë aishkuö tǝ e' kë ku'ia. Ìñe tǝ imerke ìyi blëule ese jchenoie Wiköl Batse'r wa, erë aishkuö tǝ e' erdawa. <sup>9</sup> E' wǝ dör tó ì mëne se' a jchenoie ìñe tǝ ese kë dör Skëköl ìyi wa'ne, e' dör ikakla ë. Ñies ì chekesö Skëköl ttekolie, ese kë dör serǝa. <sup>10</sup> Ese kǝs erdawa mik ì dör ibua'ie e' de serǝa etǝ.

<sup>11</sup> E' dör ì es: Mik ye' ìa alala, etǝ ye' ttöke wes alala es, ye' erbiköke wes alala es, ìyi suëkeyö wes alala es. Erë mik ye' kibineone, etǝ ye' kë dör alala, e' kuëkǝ ye' kë seriǝ wes alala es. <sup>12</sup> Ìñe tǝ se' wǝ Skëköl jcher wes ìyi olo suësö wösuö nula wa es. Erë aishkuö tǝ isuerausö ñi wöshǝë. Ìñe tǝ ìe' kak jcher ye' wǝ, erë aishkuö tǝ ijcherdawǝ ye' wǝ buaë wes ìe' wǝ ye' jcher buaë es.

<sup>13</sup> Ìñe tǝ se' erblöke Skëköl mik. Ñies ì ye'atbakitö, ese wa panekesö kröröë. Ñies se' ñi dalëritsöke. ìyi mañat ekkë wawëkesö ìñe tǝ, erë ibua'ie dör se' ñi dalëritsö.

\* **13:3** ye' wák mú e' müttšǝ we'ikë siarë: Yëkkuö këchke wële tó ichë: ye' mú e' müttšǝ ña'wëwa



## 14

*Imène ttoie ttò kuà'kì kuà'kì wa, e' pakè*

<sup>1</sup> A' e' chò ñi dalèritsòk buaè. Ñies i merke se' a Wikòl Batsè'r wa ñi kimoie ese yulò poè. Erè ttòk Skèkòl ttekolie e' yulò bua'ie imalepa tsata. <sup>2</sup> E' wà dör tò yi a imène ttoie ttò kuà'kì wa ese kè ttòku' imalepa ta, ittòke Skèkòl è ta. Kè yi skà éna ittòke e' anak. Erè ttè blèulewà ese chekeitò Skèkòl Wikòl wa. <sup>3</sup> Erè yi a imène ttoie Skèkòl ttekolie, ese ttòke imalepa ta ie'pa er diché k'ioie, ie'pa pattoie ena ie'pa er pabloie. <sup>4</sup> Yi ttòke ttò kuà'kì wa Wikòl Batsè'r wa, ese tò iwàk è er diché k'ieke. Erè yi ttòke Skèkòl ttekolie, ese tò Skèkèpa Jesús icha malepa er diché k'ieke. <sup>5</sup> Ye' k'ì ikiane tò a' ulitane mú a' imer toie ttò kuà'kì kuà'kì wa. Erè a' mú ttò Skèkòl ttekolpaie, e' dör ibua'ie ttòk ttò kuà'kì kuà'kì wa ese tsata. Erè a' ttòke ttò kuà'kì kuà'kì wa ta yile tò iwà pakène imalepa a' as ie'pa er diché k'ie, e' ta' e' dör buaè wés yi ttòke Skèkòl ttekolie ese es.

<sup>6</sup> A' yamipa, e' wà pakekeyò a' i' es. Ichòsò tò ye' de, e' ttòke a' ta ttò kuà'kì wa, e' ta' çè' tò a' kìmèmi? Au, e' kè dör ñie bua'. Erè ilè kkayène ye' a' ese chéneyò a' a' ò ilè jcher ye' wà ese pakéneyò ò ilè chéyò Skèkòl ttekolie ò a' wòbla'wéyò ttè wésele wa ese kòs chéyò a' wàkpa ttò wa, e' ta' e' je' tò a' kìmèmi buaè. <sup>7</sup> E' dör wés ma'ma tso' blarta' pulè sù ò ma'ma kicha ta' sù ese blar es. Kè iblane wés ikawòta' bla'wè es, e' ta' çì se' a' ichòk tò i bla'wèkerakitò? <sup>8</sup> Ñies duk bla'wèke ñippòkwakpa kioie ñippòk ibolòkpa ta, e' kè blane wés ibla'wèke es, e' ta' ñippòkwakpa kè bitùpa ñippòk. <sup>9</sup> E' sù a' ta' itkòke. A' ttòke ttò kuà'kì kuà'kì wa, e' ta' çwes e' wà armí yi éna? A' ttòke è, wés yi ttò ekòrla ese es. <sup>10</sup> S'ttò daklilie, e' tso' tajè ká i' a, ese kòs wà ane iwàkpa éna. <sup>11</sup> Erè wèle ttòke iwàkpa ttò wa, kè wà ane ye' éna, e' tséyò, e' ta' ie' dör ká kuà'kì wak ye' a, ñies ye' dör ká kuà'kì wak ie' a. <sup>12</sup> I meke Skèkòl tò se' a' iWikòl wa, ese kòs yuleke a' tò poè. E' kuekì yò ichè a' a, e' wése tò se' malepa dör Skèkèpa icha e'pa er diché k'ieke, ese kòs yulò bua'iewa.

<sup>13</sup> E' kuekì yi ttòke ttò kuà'kì wa ese wák tò ikiò Skèkòl a' as imùitò ie' a' iwà pakone imalepa a. <sup>14</sup> Ichòsò tò ye' tso' ttòk Skèkòl ta ttò kuà'kì wa, e' ta' mokì ye' tso' ttòk ie' ta, erè iwà kè ane ye' wák éna. <sup>15</sup> Çwes ye' iwèmi? Ye' iwèke i' es: ye' ttòke Skèkòl ta ttò kuà'kì wa, ñies ye' ttòke ie' ta ttò ane ye' éna ese wa. E' sù ye' tso'ke ie' k'ikokaiè ttò kuà'kì wa, erè ñies ye' tso'ke ttò ane ye' éna ese wa. <sup>16</sup> Ichòsò tò a' wèle tso' wéstela chòk Skèkòl a' ttò kuà'kì wa a' malepa kukua, erè iwà kè ane a' éna, e' ta' çwes a' ichèmi, "Es e' idir?" <sup>17</sup> Mokì ie' tò wéstela ché buaè Skèkòl a, erè e' kè wà a' er diché k'ie. <sup>18</sup> Ye' ttòke ttò kuà'kì wa tajè a' tsata, e' k'ì ye' tò wéstela

cheke Skèkòl a. <sup>19</sup> Erè mik se' ñi dapa'uke, età e' ye' a' ta' ye' kapakòke ttè böt mañat wà ane se' éna ese wa, e' dör buaè ye' kapakòke ttè tajè ttò kuà'kì wa dòka 10.000 kè ane yi éna e' skéie.

<sup>20</sup> A' yamipa, kè a' kabikeitsòkia wés ala'rla es. A' kabikeitsò wés s'kibinetke es. Erè buaè idir tò sene sulu yòkì a' kabikeitsò wés ala'rla es. <sup>21</sup> Skèkòl tò ichè iyèkkuò k'ì i' es: "Erè ye' ttòraè ká i' wakpa ta' s'ttò kuà'kì kuà'kì wa ena ká kuà'kì kuà'kì wakpa wa, erè ie'pa kè tò ye' ttò iutepa." <sup>22</sup> E' wa isuésò tò s'ttòke ttò kuà'kì wa e' dör ilè kkachioie wépa kè erblòta' Jesús mik esepa a, kè idör se' erblò Jesús mik esepa a. Erè se' ttòke Skèkòl ttekolie e' je' dör se' erblò ie' mik esepa a. <sup>23</sup> E' wà dör i' es: A' ñi dapa'uke e' kòs tso' ttòk ttò kuà'kì kuà'kì kè ane yi éna ese wa, e' wòsha' pè' kè yöne Jesús ttè wa kè erblòta' ie' mik, esepa dewa a' shua, e' ta' ie'pa tò ibikeitseraè tò a' dör aliie. <sup>24</sup> Erè e' skéie a' ulitane ttòke Skèkòl ttekolie wà ane sulitane éna ta' pè' kè erblòta' Jesús mik kè yöne ie' ttè wa esepa dewa, e' ta' ie'pa éna iardaè tò nu' tso' ie'pa k'ì ta' ie'pa e' shulòraè. <sup>25</sup> I' tso' blèule ie'pa er a, ese yènèka' sulitane kukua ta' ie'pa e' kòralur kuchè k'ì Skèkòl dalòioie ta' icheraèrakitò, "Mokì Skèkòl tso' a' ta."

*A' ñi dapa'ù bèrè kè chiliwarka*

<sup>26</sup> A' yamipa, ttè ikkè kòs bata dör i' es: Mik a' ñi dapa'uke, età a' ulitane wa ilè bitumi ekòl ekòl s'malepa er diché ioie. A' wèle wà Salmo bitumi ttoie. A' wèle skà wà ttè tso' s'wòbla'woie. A' wèle skà wà ttè kkachè Skèkòl tò ese tso' chè. A' wèle wa ilè skà tso' chè ttò kuà'kì wa. A' wèle wa i' yène ttò kuà'kì wa, e' wà pakè tso'ne. E' kòs ù ñi er diché ioie. <sup>27</sup> A' wépa ttòke ttò kuà'kì kuà'kì wa, e' ta' buaè idir tò bøl è ttò, isalema mañal, erè e' dör wè'. Ñies esepa kawòta' ttòk ekòl ekòl. Ñies i chekerakitò e' wà pakòkne yile kawòta'. <sup>28</sup> Erè kè yi ku' iwà pakòkne, e' ta' ie'pa kawòta' siwà'blòkwa. As ie'pa ttò Skèkòl ta' ttò kuà'kì wa bánet ekòrla. <sup>29</sup> Es ñies wépa a' imène ttoie Skèkòl ttekolie, esepa ttò bøl ò mañal, e' ukuòkì ta' a' malepa tò iwà bikeitsò isuoie tò mokì idir ò au. <sup>30</sup> Erè a' wèle ttòke Skèkòl ttekolie, e' dalewa a' wèle skà tkér ee, ese a' Skèkòl tò ittè é ñies, e' ta' wé tso' ttòk ese siwà'blò as ièkòl tò icha chò. <sup>31</sup> Es a' ulitane tòmì Skèkòl ttekolie ekòl ekòl as a' ulitane wòblar ane a' ulitane a' diché k'ie. <sup>32-33</sup> Skèkòl dör sene bèrè mukwak e' kè chilirta'ka. E' kuekì ie' k'ì ikiane tò se' ñi dapa'ù bèrè, kè chilirta'ka wés s'batsè'rpa erule erule ñi dapa'uke ká wa'fie es. E' kuekì wépa a' imène ttoie Skèkòl ttekolpaie, esepa a' e' wòklòrmi as ittò ekòl ekòl.

<sup>34</sup> Mik a' ñi dapa'uke, età alakòlpa kòs kè siwà'blòkwa. Ie'pa kè kàne ttòk, e' skéie

ie'pa ké ittšök bërë wës Skëköl ttë dalöiëno tö ichë es. <sup>35</sup> Ie'pa ttöke mik a' ñi dapa'uke, e' dalewa e' dör jaë. E' kuekji ie'pa éna ilë chakak, e' ta' as ichakörakitö iwëm a' iu a.

<sup>36</sup> ¿Ima a' ibikeitsë? ¿Skëköl ttë de a' batamik? ¿A' ë ulà a' ide? Au. ¡A' e' kitel! <sup>37</sup> Yi e' bikeitsö tö ie' dör Skëköl tteköl ö Wiköl Bats'e'r tö ie' ké ichök, e' ta' ese kawötä ichök tö i' shteke ye' tö a' a' e' dör i' uk se' patkë' Skëképa Jesús tö e'. <sup>38</sup> Erë yi tö ttë i' watëttsa, ese watërdattsa.

<sup>39</sup> A yamipa, es ye' tö a' a' ichë tö ttök Skëköl ttekölie, e' yulö poë. Nies wépa ttöke ttö kuw'kij wa, esepa ké wöklö'war. <sup>40</sup> Erë iyi kōs ese ũ a' tö buaë yësyëse, ké chiliwarka.

## 15

### *Cristo shkënekane, e' pake*

<sup>1</sup> A yamipa, Jesús ttë buaë paka' ye' tö a' a, e' skä pakekeneyö a' a' i' ta' as e' ska' a' er döne. Ttë ñe' klö'bak a' tö, e' a' a' tso' tkëulewä darërëë. <sup>2</sup> A' e' tkëwä michöë ttë buaë ñe' a' yësyëse wës ye' tö a' a' iwä paka' es, e' ta' e' wa a' tsatkëne. Kë idör es, e' ta' ë ichök a' erblë imik.

<sup>3</sup> Ttë meneat ye' a, e' ë paka'neyö a' a. E' bua'ie dör i' es: Cristo kōtëwä se' nuji kji wës itso' kitule Skëköl yëkkuö kji es. <sup>4</sup> Nies ie' wötënewä pö a, e' kji ká de mañat, etä ishkenekane wës itso' kitule Skëköl yëkkuö kji es. <sup>5</sup> Nies ie' kkaché Cefas a'. E' ukuökji ta' ie' kkaché ittekölpä tsä dabom eyök kji böi (12), e'pa a. <sup>6</sup> E' ukuökji ta' ie' kkaché s'yamipa dökä cien skeyök (500) kija, e'pa a' mik iñi dapa'wë ek tsjni éme eta. Ie'pa ekkëpa wëlepa blërulunetke, erë ikibiiepa dobyërkeia. <sup>7</sup> E' ukuökji ta' ie' e' kkaché Santiago a. E' ukuökji ta' ie' e' kkaché ittekölpä kōs a.

<sup>8</sup> Bata ekkë ta' ie' e' kkaché ye' a. Ye' dör ittekölpä tsä e'pa yulë, erë ñies ie' e' kkaché ye' a. <sup>9</sup> Skëköl icha, e'pa we'ikök ye' bak. E' kuekji ye' dör ittekölpä malepa dikija diöshet. Ye' kiök ie'pa eköl, e' ké dör ye' siarla e' a. <sup>10</sup> Erë Skëköl er buaë ché ye' a, e' kuekji ye' dör ie'pa eköl. Ie' er buaë ché ye' a e' ké dör éme. E' wakanewéyö taië ie'pa malepa tsata. Nermata ké dör tö ye' wák tö iwakanewé. Iwakanewéyö Skëköl er buaë chö ye' a e' batamik. <sup>11</sup> Erë Jesús ttë buaë, e' dör etkëme, e' paka' sa' tö a' a, e' mik a' erblë. Ye' tö ipakë ö ie'pa tö ipakë, e' ké dë' wës.

### *Se' duulewä shkërdakane*

<sup>12</sup> Sa' tö ipakeke tö Cristo kōtëwä, e' shkënekane. Erë a' wëlepa tö icheke tö s'duulewä ké shkërtä'kane. ¿Wës e' chëmi ie'pa tö? <sup>13</sup> S'duulewä ké shkërtä'kane, e'ma Cristo ké shkënekane. <sup>14</sup> Ie' ké shkënpakane, e'ma ë ye' tö ie' ttë buaë

pakeke. Nies ë a' erblöke ie' mik. <sup>15</sup> Sa' tö ipakeke tö Skëköl tö ie' shkë'kane, erë s'duulewä ké shkërtä'kane, e'ma ie' ké shkënekane. E' mü dör es, e'ma ttë pakeke sa' tö Skëköl ttö wa e' dör kache. <sup>16</sup> S'duulewä ké shkërtä'kane, e'ma Cristo ké shkënekane. <sup>17</sup> Ie' ké shkënpakane, e'ma ë a' erblöke ie' mik. Se' tso'ia' se' nuji ulà a. <sup>18</sup> Nies e' mü dör es, e'ma wépa erblë' ie' mik blërulune, esepa tso'tke weinuk. <sup>19</sup> Se' tö Cristo paneke, e' ké wä tköpa aishkuö ta, e'ma se' dör siarë chökke s'malepa dikija.

<sup>20</sup> ¡Erë mokji Cristo shkënekane! Ie' dör se' shkërkane e'pa tsä, e' kuekji se' wä ijcher tö ñies se' shkerdakane. <sup>21</sup> E' wä dör i' es: Wëm eköl wa s'duöwä e' ali'ka sulitane kji. E' s'ü wëm skä eköl wa s'duulewä shkerdakane. <sup>22</sup> Sulitane de'ka Adán wa, e' kuekji sulitane wömenettsä duökwa wës ie' es. Erë se' batsulewä Cristo mik e'pa kōs shkerdakane wës ie' shkënekane es. <sup>23</sup> Erë e' kōs mir wës ikawötä minuk es. Cristo shkënekane kewe. E' itökji mik idene, etä se' dör ie' icha, e'pa kōs shkerdakane. <sup>24</sup> Etä ká i' erdawa. E' këwö ska' ta' Cristo e' alörakä iyi wökir, iyi wák, iyi këköl wa diché ta' ese kōs kji. I' kōs blu'ie ie' tso' i' merattsa'itö Skëköl dör S'yë e' ulà a. <sup>25</sup> Erë i'ñe ta' ie' tso'ia' iyi kōs shksuk blu'ie dö mik ibolökpa kōs menewä ie' klö dikija etä. <sup>26</sup> Ie' bolök bata, e' dör s'duöwä, e' kji ie' e' alörakä bataie. <sup>27</sup> E' dör wës itso' kitule Skëköl yëkkuö kji es, e' tö ichë: "Iy ulitane menewä ie' klö dikija." Erë se' éna iane tö mik iyëne "Iyi ulitane" etä Skëköl klö ku' e' shya, ie' wák tö i' kōs mérö Cristo klö dikija e' kuekji. <sup>28</sup> Erë mik iyi ulitane mérötke Skëköl tö Cristo dör ilä e' klö dikija, etä ñies Cristo e' murattsä iyë ulà a as iyi ulitane dö ie' dikija.

<sup>29</sup> S'duulewä ké shkërtä'kane, e'ma wépa wösune s'duulewä skéie\* ¿iök e' wëkerakitö? S'duulewä ké shkërtä'kane, e'ma ¿iök ie'pa wösune esepa skéie? <sup>30</sup> S'duulewä ké shkërtä'kane, e'ma ¿iök se' e' mümi weinuk kekraë ttë e' pakök? <sup>31</sup> A yamipa, ká bit ta' ye' kji idalö me'rie tssësua ye' ttemiwa yile tö. E' dör mokji wës a' tso' batsulewä Skëképa Cristo Jesús mik, e' tö ye' tssëwëke buaë e' dör mokji es. <sup>32</sup> ¡E' Efeso ye' bolökpa tso' ñippök ye' ta' wës iyiwak sulusi es. Kë se' shkërtä'kane, e'ma ¿iök e' dalë'ttsekeyö? E' ké dör iie bua' ye' a. Mokji tö s'duulewä ké shkërtä'kane, e'ma iüsö wës wëlepa tö icheke es. E' dör i' es: "Bulepa s'duöralur, e' kuekji i'ñe se' chkö, se' di'yö buaë kanëe."

<sup>33</sup> Kë a' e' muktsä e' kitö'uk es. E' dör wës yile tö iyë' es, e' dör i' es. "S'yamipa e' wamblö sulu esepa tö s'ser yësyëse esepa sulu'wëkewa." <sup>34</sup> A' erbiköne buaë yësyëse.

\* 15:29 s'wösune s'duulewä skéie: E' dör i' uk ie'pa wëlepa wöblar es. Kë iyëne Skëköl wä tö iü es.

Ì sulu kě wambłarią a' tō. A' wẹlepa kě båtse Skėkōl mik yēs. E' chėyō a' ą a' jaėwōką.

*Se' duulewą shkerdakane ıis e' chkà dōr?*

<sup>35</sup> Isalema a' wẹlepa tō ichakėmi: "Se' duową, ıwes e' shkėrmikane? ıis e' chkà dōr?" <sup>36</sup> İ chakė a' tō wēs kě s'kabikeitsō ese i chakė es! İyiwō tkėśō, e' kě dē'kane, ikuala deka tą iwō dalola nunėwą. <sup>37</sup> Mik se' tō trigo wō tkėwą, eą kě se' wą itkėne kuąie. Se' tō iwō dalola tkė. <sup>38</sup> E' ukuōkī tą ikua deka wēs Skėkōl ime'atbak es. E' sū İyiwō ulitane dōraką iwakmik iwakmik wēs imeneat es.

<sup>39</sup> S'ditsō ena İyiwak klōka ena dū ena nima e' wák dōr kuą'kī kuą'kī ņies ichkà dōr kuą'kī kuą'kī. <sup>40</sup> ņies i meneat ká jai a ena i meneat ká i' ą e' dōr kuą'kī kuą'kī. E' kōs dōr buaala, erė İwēr kuą'kī kuą'kī. <sup>41</sup> Diwō si'wō bėkwō e' kōs dalōburke kuą'kī kuą'kī. ņies bėkwō kōs e' wák dalōburke ek ek kuą'kī kuą'kī.

<sup>42</sup> Mik se' shkėnekane, eą se' manenetsatke wēs İyiwō tkėne e' man-erttsą es. Se' chkà i' nurtą'wą, erė mik ishkenekane, eą kě inurpawąia. <sup>43</sup> S'chkà i' dōr ěsela, erė ishkerdakane olo tą tajė. S'chkà i' kě dichė tą, erė ishkerdakane dichė tą tajė. <sup>44</sup> S'chkà i' dōr buaė sėnoie i' ņie tą, erė mik ishkenekane, eą imanenetsa sėnoie buaė aishkuō tą Wikōl Bats'e'r tą. <sup>45</sup> E' dōr wēs Skėkōl yėkkuō tō ichė es, e' tō ichė: "Wēm tsą kiė Adán, e' yōne se'ie tts'ka."† Erė wēm skà de ekōl Adán es, e' dōr Cristo, e' yōne sėne michoė mukwak. <sup>46</sup> Erė s'chkà sėnoie aishkuō tą, e' kě mēne Skėkōl wą se' ą kėwe. S'chkà i' me'itō se' ą kėwe. E' itōkī chkà sėnoie aishkuō tą Wikōl Bats'e'r tą ese merdaė se' ą. <sup>47</sup> Wēm tsą yōne İyōk wą, e' kuėkī e' dōr ká i' wak. Erė wēm skà de Adán es, e' datse ká jai ą. <sup>48</sup> Wėpa dōr ká i' wakpa, esepa dōr wēs wēm tsą yōne İyōk wą ņie' es. Erė wėpa dōr Skėkōl tso' ká jai ą e' icha esepa dōr wēs wēm datse eę es. <sup>49</sup> Se' tō wēm datse ká jai ą e' kītseraė wēs wēm yōne İyōk wą ņie' kītse'sō es.

<sup>50</sup> A yamipa, ye' tō a' ą ichė tō se' chkà i' duōtą'wą nurtą'wą e' kě dōpawą i blūie Skėkōl tso' e' ą. <sup>51-52</sup> Ye' tō ttsō. Tė bak blėulewą ese chekeyō a' ą i' tą: Kě se' ulitane duōpawą erė mik Skėkōl duk blane iwą kka-choie tō kawō i' enawatke eą se' kōs maneordatsą bet wēs s'wōbla tsjimiū es. Mik duk ņie' blane, eą s' duulewą kōs shkerdaką, kě duōpawąia. ņies se' tso'ia tts'ka, e' chkà maneordatsą. <sup>53</sup> Se' chkà i' nurtą'wą, e' maneordatsą chkà kě nurtą'wą ese wa. Se' chkà i' duōtą'wą, e' maneordatsą chkà kě duōtą'wą, ese wa. <sup>54</sup> Mik se' chkà i' manenetsą kě duōpawąia, kě nurpawąia, eą i' tso' kitule Skėkōl yėkkuō kī, e' wą de, e' tō ichė: "Duewą kī Skėkōl e' alėka."‡ <sup>55</sup> A

Duewą, ıwė be' dichė tajė e'? ıWė be' e' alō tajė e'? Be' kirėbata tso' e' rrewoie tajė, ıwė e' i' tą?"§ <sup>56</sup> Se' ser sulu kuėkī duewą tō se' rrewėke ena sėne sulu dichė iėne ttė dalōieno wa. <sup>57</sup> Erė se' nuī olo'yane se' kī Skėkėpa Jesucristo batamik, e' kuėkī kě se' suaneia s' duōwą yōkī. E' kuėkī kėkraė wėstela chekesō Skėkōl ą.

<sup>58</sup> E' kuėkī, a yamipa dalėr ye' ęna, a' e' tkōwą darėrė kėkraė Skėkėpa ttė ą, kě a' e' skōktsa bānet. A' wą İjcher tō i kōs kanewė a' tō ie' ą, e' kě weirpa ęme. E' kuėkī a' kī kanėblō buaė kėkraė ie' ą.

## 16

*Inukōl shteke s'siqrėpa kimoie, e' pakė*

<sup>1</sup> Inukōl shteke a' tō s'batse'rpa serke Jerusalėn e'pa kimoie, e' pakeke ye' tō a' ą i' tą. Inukōl shtō wēs ye' tō iyė' Skėkėpa icha erule erule tso' Galacia, e'pa ą es. <sup>2</sup> Domingo bit tą a' wakpa bik ekkė tō a' inukōl shta'ú tō kōs a' ulą ą ide. Eą kōs a' ą imermi, e' blō bānet. A' tō iwė es, eą mik ye' de a' ska', eą kě a' kawōtą inukōl shtōk, a' wą itso'tke blėule e' kuėkī. <sup>3</sup> Mik ye' de a' ska', eą wėpa shushtėke a' tō patkėmi Jerusalėn inukōl ņie' muk, e'pa ttė choie yėkkuō shtekemiyo e' mi'ke ie'pa wą. Es ye' tō ie'pa patkeke Jerusalėn. <sup>4</sup> A' ibikeitse tō buaė idir tō ye' mi'ņak ie'pa tą, e' tą ye' mi'mi.

*Pablo tō ishkak e' aleritsė*

<sup>5</sup> Ye' kawōtą minuk Macedonia, e' ukuōkī tą ye' mi'ke a' ska'. <sup>6</sup> Isalema ye' e' tsuėkeat a' ska' si' et si' bōt ulatōk ō isalema ye' e' tsūmiat dō yuėdiō tka ekkė. Es a' ą ye' kimermi i kiane ye' kī shkoie ese wa ąs ye' mi' buaė wė ye' mi'mirō eę. <sup>7</sup> Ye' kě shkak a' pakōk shkaule. Ye' mi' s' ska' ká tajė, Skėkėpa kī ikiane e'ma. <sup>8</sup> Erė ye' e' tsuėkeat ię ěfeso dō Pentecostės kėwō tka ekkė. <sup>9</sup> İe buaė ye' ą kawō kune Jesús ttė buaė pakoie. Ye' bolōkpa tso' tajė, erė ņies tajė pė' ęna Jesús ttė buaė ttsak. E' kuėkī kě ye' e' yaktsą i' tą ię.

<sup>10</sup> Timoteo kanėblōke Skėkėpa ą wēs ye' es, e' kuėkī ie' de a' ska', e' tą ikiōwą buaė. <sup>11</sup> Kě yi káne ie' dalōsėukwą. E' skėie ie' kīmū ąs ie' dōne bėrė ye' ska'. Ye' tso', ie' ena s'yamipa urke ie' tą, e'pa panuk.

<sup>12</sup> Ye' tō s'yami Apolo e' cheke a' ą i' tą. Ye' kkōyė' ie' ą tajė tō ie' yuņak s'yamipa mi'ke a' pakōk e'pa tą. Ie' kě shkak i' tą, erė wėkkė alė tą ie' ą kawō kurmi, eą ie' mi'mi.

*Pablo tō ie'pa bata pattė*

<sup>13</sup> A' sėnū erkī. A' e' tkōwą darėrė a' erblōke Jesús mik e' ą. A' e' tkōwą wėbla suė, kě a' suanuk. A' erblō darėrė ie' mi'ka. <sup>14</sup> İ wėke a' tō kōs ese ū ņi dalėritsė wa.

<sup>15</sup> A yamipa, a' wā ijcher tō Estéfanas ena iyamipa e'pa dōr Acaya wakpa tsá erblè' Jesús mik e'pa. Ie'pa e' ché buaë s'batse'r malepa kimuk. <sup>16</sup> Ye' tō a' a ikiè tajè tō ie'pa esepa ttō dalöiö er bua' wa. Nies yi isie tso'ñak kaneblök Skèkèpa kanè a esepa ttō dalöiö.

<sup>17</sup> Ye' ttsé'ne buaë tō Estéfanas ena Fortunato ena Acaico e'pa de ye' ska'. Ie'pa tso' ye' kimuk tajè a' kē ku' e' skéie. <sup>18</sup> Ie'pa tō ye' er pablé wēs a' er pablérakitō es. Buaë idir ie'pa esepa kikkōkka.

*Pablo e' chéat*

<sup>19</sup> Skèkèpa Jesús icha erule erule kos tso' Asia, e'pa tō a' shké'wémi. Áquila ena Prisca ena Skèkèpa icha ñi dapa'uke ie'pa u a, e'pa tō shkēne patké tajè a' a Skèkèpa ttō wa. <sup>20</sup> S'yamipa kos tso' ie, e'pa tō a' shké'wémi. A' ñi shké'ú ñi dalēr wa.

<sup>21</sup> Ye' dōr Pablo e' tō shkēne i' shté ye' wák ulà wa.

<sup>22</sup> Yi kē éna Skèkèpa dalēr, e' ta as ese kichatēr. ¡A Skèkèpa, be' shkōne bet!

<sup>23</sup> As Skèkèpa Jesús er buaë chō a' a.

<sup>24</sup> Ye' éna a' dalēr Cristo Jesús batamik. Es e' idir.

## Yëkkuö skà kit Pablo tó Corinto wakpa a, i' ta ide böt 2 Corintios

Mik Pablo bak kanèblök Macedonia etä ie' tó yëkkuö skà kit Jesús mik erblökwakpa serke Corinto ena ipamik e'pa a. Wëm kië Tito e' kanèblöke Pablo ta Jesús tté pakök. Ie' tso' Corinto, mik ie' dene Pablo ska' etä ie' tó Jesús mik erblökwakpa tso' Corinto e'pa kabërke ñita e' paké Pablo a. E' kueki Pablo tó yëkkuö i' kit. I' tköke Corinto wakpa ta e' dör i': Wëlepa e' chö tó ie'pa dör Jesús ttekolpa erë kè idör mokj. Esepa dë'mi Corinto ta Jesús mik erblökwakpa tó iki'warak buaë. Ie'pa ñekkëpa tó s'wöbla'weke kache tté wa. Ie'pa e' ù tó ie'pa dör buaë Pablo tsata. Ie'pa tó icheke tó Pablo dör siarë kè dör kékëpa tajë. Es ie'pa tso' Jesús mik erblökwakpa kit'ö'uk. Pablo éna Jesús mik erblökwakpa dalër tajë e' kè kiane ie' k'j tó imi'yal ñalá sulusi k'j kachökwakpa itöki. E' kueki ie' tó yëkkuö i' kit ie'pa a as ie'pa tso' tssé'ka kachökwakpa yöki ena er bua' wa i' kwayëne ie'pa a e' dalö'ök. Nies ie' tó ie'pa a iche tó ie' dör Jesús ttekol mokj.

E' k'jie ta kam ie' tó yëkkuö i' shtö etä ie' tó inuköl ki' ie'pa a Jesús mik erblökwakpa siarëpa tso' Jerusalén e'pa kimoie. S'kit'ö'ukwakpa tó iyë' tó Pablo tó inuköl e' tsekëtkö iwák a, erë ie' tó iche tó e' kè dör es. Ie' mi'ke betkä Jerusalén pakök e' kueki Jesús mik erblökwakpa tso' Corinto e'pa kawötä inuköl k'j shtök tsëmi Jerusalén.

### Shke'wè

<sup>1</sup> Ye' dör Pablo. Skököl wák er wa ye' dör Cristo Jesús ttekolpa tsá e'pa eköl. S'yami kië Timoteo, e' tso' ye' ta íe. Sa' tso' yëkkuö i' shtök a' dör Skököl icha erule serke Corinto, e'pa a. Nies sa' tso' yëkkuö i' shtök s'batse'r malepa serke ká malepa atë Acaya, e'pa ulitane a. <sup>2</sup> Skököl dör S'yé ena Skékëpa Jesucristo as e'pa er buaë chö ena sene bèrè mù a' a.

### Pablo weirke e' shuq Skököl k'jekëkaitö

<sup>3</sup> Skököl dör Skékëpa Jesucristo yé, e' k'jökösä taje. Ie' dör S'yé e' tó se' sueke er siarë wa ena se' er pableke kekraë. <sup>4</sup> Sa' weirke kos Cristo tté kueki, e' shuq sa' er pableke Skököl tó as s'malepa weirke esepe er pablö sa' tó wes ie' tó sa' er pableke es. <sup>5</sup> Cristo weine tajë, e' ukuö miriä sa' k'j tajë. Erë nies ie' batamik sa' er pablërke tajë shuq. <sup>6</sup> Sa' weine es, etä e' dör a' er pabloie, a' tsatkoie. Nies Skököl tó sa' er pablé, etä nies e' dör a' er pabloie as a' weirke wes sa' es ese dalë'tsö a' tó er bua' wa. <sup>7</sup> Sa' wä ijcher

tó a' weirke wes sa' es, erë nies a' er pablërke wes sa' er pablërke es. E' kueki sa' wä ijcher buaë tó a' kè tó sa' eriwepa.

<sup>8</sup> A yamipa, sa' k'j ikiane tó a' wä ijcher tó sa' weine Asia e' dör darërë sa' a. Sa' diché kè dé'ka iwöklö'woie. Sa' ibikeits tó kè sa' döpattsä tssé'ka. <sup>9</sup> Sa' e' tssé' wes s'wömenettsä ttëwä es. Erë e' wamblëne sa' ta as kè sa' erblö sa' wákpa mik, e' skéie as sa' erblö Skököl tó s'shke'wëkane e' wák mik. <sup>10-11</sup> Sa' ttekelur ñe' e' ulä a' ie' tó sa' tsatké'ttsä ena sa' tsatkeraëitö. Ie' dapömik sa' moneka darërë. A' sa' k'imé S'yé a' ikiök sa' k'j, e'ma ie' tó sa' tsatké michoë. A' tajë tó iwé es, e' ta' ie' tó sa' k'imeraë e' k'j wëstela cheraë ie' a' se' tajë tó.

### I' kueki Pablo kè dë' Corinto

<sup>12</sup> Sa' er kè tó sa' kkatè i' k'j, e' tó sa' tssé'weke buaë. Kekraë Skököl tó sa' a' imè seno yësyésé e' batseitsök buaë er mokj wa sulitane wö wa ena bua'ie a' wö wa. Sa' ser es, e' kè dör siwä'iskj tso' ká i' a' ese wa, e' dör Skököl er buaë chö se' a' e' wa. <sup>13-14</sup> Yëkkuö kos kitmi sa' tó a' a, e' wä kè dör tté blëulewä ese, iaritsmi a' a ena iwä armi a' éna. Erë wes sa' dör e' kè ane a' éna bua'ie, erë ye' ipaneke tó wekké alé ta' a' éna iaräda seraq. E' dör es, e' ta' mik Skékëpa Jesús datskene, etä e' k'éwö ska' a' e' tssórakä buaë sa' wa wes sa' e' tssórakä buaë a' wa es.

<sup>15</sup> Ye' ibikeitsé tó a' e' tsséka ye' wa buaë, e' kueki warma ye' ibikeitsé tó ye' mi' a' pakök bötökicha as a' tssé'r buaë bötökicha. <sup>16</sup> Ye' ibikeitsé tó mik ye' mi'ke Macedonia, etä warma ye' tkökemi a' pakök. Ye' datskene, e' ta' ye' damitköne a' pakök. Es a' a' ye' kimermi shkoie Judea. <sup>17</sup> Erë kè ye' wä iöne es. Ye' dë' a' pakök etökicha é, e' kueki za' ibikeitsé tó ye' kè wä iwä bibeitsé buaë kewe? ¿A' ibikeitsé tó ye' ttö bötöböt wes s'ditsö èse es? <sup>18</sup> Erë Skököl ttö mokjé, e' ttö wa ye' iché a' a' tó ye' kè ttö a' ta' bötöböt. <sup>19</sup> E' wä dör tó Jesucristo dör Skököl Alä, e' kè ttö bötöböt, ie' tó etkëme. Ie' tté buaë paka' ye' ena Silvano ena Timoteo, e'pa tó a' a. <sup>20</sup> I' kos uk Skököl kablé, e' wéitö Cristo wa. E' kueki mik se' ñi dapa'uke Skököl k'jökka, etä se' tó icheke: "Es e' idir" Cristo Jesús ttö wa. <sup>21</sup> Yi tó a' ena sa' kkö'neke as se' tulurie Cristo mik, e' dör Skököl. Ie' tó se' shukitbak iwák a. <sup>22</sup> Ie' tó se' er wakyuë ie' wák a. Nies i'wököl méitö se' a' wes íyi tsá patuésö es ikkachoie tó se' tsatkeraëitö da' a.

<sup>23</sup> Ie' wä ye' s'uule buaë e' wöwa ye' iché a' a' tó kam ye' döne Corinto warma wes ye' ibikeitsé es, e' wä dör tó kè ye' éna a' k'j eriwák. <sup>24</sup> Sa' wä ijcher tó a' erblöke buaë Jesús mik, e' wa a' tkënewä darërëë. E' kueki sa' tso' a' k'imuk er bua' wa as a' tssé'r buaë. Kè sa' ku' a' patkök kësik wa a' erblöke e' iütök.

## 2

<sup>1</sup> E' kueki ye' ibikeitsë tö ye' kë shkakne a' pakök a' eriawojie. <sup>2</sup> A' ë tö ye' ttsë'wëmi buaë. Erë a' eriawëyö, e' ta çyi tö ye' ttsë'wëmi buaë? <sup>3</sup> Warma a' ye' ttsë'wë buaë, e' kueki yëkküö iët kitmiyö a' a' e' ki a' pautyö darërë as a' e' shulö, etä es a' kë tö ye' eriawepa. Ye' iklöo' yësyësë tö a' ulitane ttsë'rdaë buaë ye' ta ñita. <sup>4</sup> Mik ye' tö yëkküö ñe' kit, etä ye' eriane siarë, ye' chkenewa tajë dö ye' jëttsaie ekkë. Erë kë ye' wä ikitë a' eriawojie. E' skëie ye' ikitmi as a' éna iar tö a' dalër tajë ye' éna.

*Yi tö i sulu wamblë' e' nu' olo'yé Pablo tö*

<sup>5</sup> Wëm tö kabene tski'ka a' shua i sulu wamblëitö e' wa, e' kë wä ye' ë eriaone. Isalema ye' tso' iki kuötkökka, erë ye' ichë tö wës alë ie' tö a' ulitane eriawë. <sup>6</sup> Kos a' kibiiepa tö ie' ki inu' métkë e' dö wë'. <sup>7</sup> Ñe ta a' tö inu' olo'yö iki ta ikimú as kë ieriar tajë kë er pablëneia ekkë. <sup>8</sup> E' kueki ye' kköchö a' a' tajë tö ikkachöne ie' a' tö mokí a' éna ie' dalër. <sup>9</sup> Yëkküö ñe' kitmiyö a' a' isuoie tö ye' ttö iüté a' tö seraö ö au. <sup>10</sup> Yi isie nu' olo'yé a' tö iki, ñies ese ki ye' tö ilo'yeke. Mokí yö ichë Cristo wöwa ena a' dalërmik tö ilë nu' tso' kiane olo'yé, e' ta e' olo'yétkëyö <sup>11</sup> as Satanás kë e' alökä se' ki. Wës ie' éna se' sulu'wakwä, e' ane se' éna buaë.

*Tito kë dë' Tróade*

<sup>12</sup> Mik ye' de ká kië Tróade Cristo tté buaë pakök ee, etä ye' isué tö Skëképa tö ye' a' ñala yuétke buaë itté pakoie. <sup>13</sup> Erë s'yami Tito wä a' biyö done ye' a, e' kë kune ye' wä wës ikablë' es. E' tö ye' tkiwë kabikeitséka tajë. E' kueki ye' e' chéat Tróade wakpa a' ta ye' mia Macedonia ie' yulök.

*Íyi ulitane ki se' e' alökami Cristo wa*

<sup>14</sup> ðErë wëstela Skëköl a! Kekraë ie' tö sa' wëttsëke e' aloka íyi ulitane ki Cristo ta ñita. Sa' wa ie' tö Cristo tté buaë pakeke ká wa'ñe, e' dö wës kiö masmas alabur es. <sup>15</sup> Sa' tö Cristo tté pakeke, e' dö wës íyi alar masmas ña'wë Cristo tö Skëköl a' ikikokä es. Sa' dö wës kiö masmas alar es. Erë wépa tsatkërke ena wépa kë tsatkërku' esepa böltëpa wö ilär kuä'ki kuä'ki. <sup>16</sup> Wépa kë tsatkërku' esepa a' tté pakeke sa' tö e' dö wës s'nu alar es, e' wa ie'pa duöralur e' kueki. Erë wépa tsatkërke esepa a' e' dö wës íyi alar buaë es, e' wa sene michoë döraë ie'pa ulä a' e' kueki. Çyi dirmi tté i' wakanéuk? <sup>17</sup> Tajë pé' tö Skëköl tté pakeke inuköl ë klö'woie, erë sa' kë dö es. Ie' tö sa' patké ipakök, e' kueki sa' tö ipakeke er mokí wa ie' wöwa Cristo dalërmik.

## 3

*Skëköl tté pa'ali e' wakanéukwakpa sa' dö*

<sup>1</sup> ÇIma a' ibikeitsë tö sa' wákpa e' tté chöke a' a? ÇIma a' ibikeitsë tö sa' ki yëkküö kiane sa' tté choie a' a ö a' tö yëkküö mëmi sa' a sa' tté choie wës wele tö iweke es? Yëkküö ese kë kiane sa' ki. <sup>2</sup> A' wakpa dö wës sa' tté choie yëkküö es. E' kitule sa' er a' sule ena aritsule sulitane wä. <sup>3</sup> Iwënewä wöshak tö a' dö wës yëkküö kitmi Cristo tö patkëne sa' ulä a' es. Yëkküö e' kë kitule tinta wa, e' skëie ikitule Skëköl ichökke e' Wiköl wa. E' kë kitule ákkue ki wës tté dalöiëno kite ákkue ki es. E' skëie ikitule a' er a.

<sup>4</sup> Sa' erblöke Skëköl mik Cristo batamik, e' ë kueki sa' tö a' ché es. <sup>5</sup> Sa' kë a' iyënuök kanë wë sa' tö a' shua, e' dö sa' wákpa diché wa. Skëköl tö sa' a' ierí mé iwakanéwojie. <sup>6</sup> Ie' tö sa' a' ierí mé ie' tté pa'ali mëne se' a' e' wakanéuk. Ttë e' kë datse tté dalöiëno mëne ká iaiäë e' wa. E' skëie idatse Skëköl Wiköl wa. Ttë dalöiëno ñe' tö s'kichateta'tsa erë Skëköl Wiköl tö sene michoë meke se' a.

<sup>7</sup> Ttë dalöiëno këchke kitule ákkue ki, e' mëne ká iaiäë Israel aleripa a. Mik tté e' tsá mëne, etä Skëköl olo bune tajë. E' klöne Moisés wö ki dalölöë dö imalepa kë wö dë'wa ie' wö sauk ekkë. Erë dalö e' chowamine énaëna. Ttë ñe' mëne olo ta' tajë ikkacheie tö e' dö tté dalö ta' tajë ese. <sup>8</sup> ðE' yita Skëköl Wiköl kanë e' olo tkökä tajë tté ñe' tsata! <sup>9</sup> E' wä dö tö tté tö s'kichateta'tsa ñe' mëne dalö ta' tajë, je' yita tö wa Skëköl tö s'klö'wëmi wës pé' buaë yësyësë es e' pakë olo ta' tajë shutë tkökä tté tsá mëne e' tsata! <sup>10</sup> Mokí tté pa'ali e' olo ta' tajë shutë, e' o' mik tté iët olo kë dö i. <sup>11</sup> Ttë kë dö yöbië e' de olo ta' tajë, je' yita tté dö yöbië e' olo ta' tajë shutë!

<sup>12</sup> Ttë e' wä paneke sa' tö kröröë, e' kueki sa' tö iwä pakeke sulitane kukua kë suarta'. <sup>13</sup> Sa' kë tö iweku' wës Moisés tö io' es. E' wö pabakéwä datsi'tak wa as Israel aleripa kë tö isaü tö ie' wö dalö bune e' chowamine seraä. <sup>14</sup> Erë ie'pa er darë'newä, kë éna iwä ane. Ie'pa er pabakulewä wës Moisés wö pabakwä es. Es ñies ð'ñe ta' ie'pa aleripa er pabakulewä mik ie'pa tso' tté këchke mëne iyëpa bak e'pa a' e' aritsök eta. Ie'pa er pabakulewä e' sirmittsa erblë Cristo mik, e' ë wa. E' kueki ie'pa icha kam sirttsa. <sup>15</sup> Dö ikké ta, mik ie'pa tö yëkküö kit Moisés tö e' aritseke, etä ie'pa er tso'ia pabakulewä. <sup>16</sup> Erë mik se' er mane'wë Skëképa a, etä se' er pabakulewä, e' sinettsä. <sup>17</sup> Skëképa e' dö Skëköl Wiköl. Wé e' tso', etä ee se' yënettsä tté dalöiëno ulä a. <sup>18</sup> Es se' dö wës s'wö kë pabakulewä es, esepa kos ki Cristo olo wërke buaë wës wösuo es. Se' maner michoë as se' dö wës Skëképa olo ta' tajë es. E' kos wakanéweke Skëköl Wiköl tö.

## 4

*Sa' dö Jesucristo ttekölpa tsä*

<sup>1</sup> Skëköl tō sa' suë er siarë wa, e' batamik kanë i' méitō sa' a. E' kueḷḷi kē sa' e' chkeuwa. <sup>2</sup> E' skéie kē sa' tō iwakanewëḷḷi blëule wës i' dör jaë ese es. Sa' kē ku' s'kitō'uk. Sa' kē ku' Skëköl ttë shütōḷḷa kache ttë wa. E' skéie ttë mokī pakeke sa' tō yësyësë Skëköl wōa as sulitane wā ijcher tō i' ché sa' tō, eḷa es idir. <sup>3</sup> Erë Jesús ttë buaë pakeke sa' tō, e' pabakulewā, e' ta ipabakulewā wëpa kichatërke esepa ë yöki. <sup>4</sup> E'pa kē erblōta' Cristo mik. Bë dör ká i' kéköl, e' tō ie'pa er pabakewā da'aie as kē ie'pa éna Cristo dör Skëköl wák suë olo ta' tajë e' ttë buaë wā ar. <sup>5</sup> Sa' kē tō sa' wákpa ttë pakeku'. Sa' tō Jesucristo dör Skëképa, e' ttë pakeke. Sa' e' chō tō sa' dör wës a' kanë mésopa es a' kimoie Jesús dalërmik. <sup>6</sup> Mik Skëköl tō ká i' yö', eḷa ie' iyë': "ká ñinú," eḷa ká ñine. Ie' wák tō se' er ñi'wé as ie' olo tajë burke Jesucristo wō ki, e' ar se' éna. E' kueḷḷi sa' tō ie' ttë buaë e' pakeke sulitane a.

*Se' weirke ká i' kī, e' dör bërber ë*

<sup>7</sup> Jesús ttë buaë, e' dör wës iyi bua'buá ské darërë es, e' meneat sa' a wakanewë. Erë sa' kē diché ta'. Sa' dör tottola wës skau es. E' dör iwā kkachioie tō diché wa sa' tō iwakanewëke e' meke Skëköl tō sa' a, e' kē dör sa' diché. <sup>8</sup> Erë kabene tso' sa' kī tajë kekraë, erë e' kē e' alineka sa' kī. Erë sa' kē wā ijcher wës sa' e' ùmi, erë kē sa' e' òwa e' yöki. <sup>9</sup> Erë sa' bolōkpa tō sa' tōtieke, erë Skëköl kē wā sa' meneat. Erë sa' dettsa iski, erë sa' e' kōkekanë. <sup>10-11</sup> Se' tso'ia ttsë'ka ká i' a, e' dalewa sa' chōke sa' bolōkpa ulā a sa' ttekelur Jesús ttë kueḷḷi wës ie' kōtwarakitō es. Sa' weirke es as iwërwa sa' kī tō mokī ie' shkënekane, e' tso' sa' ta. <sup>12</sup> Duewa dalō me'rie sa' kī, es sa' weirke a' dalërmik as sene michoë dö a' ulā a. <sup>13</sup> Tso' kitule Skëköl yëkuō kī wé yile tō iyë': "Ye' erblë imik e' kueḷḷi ye' ichë."\* Es ñies sa' erblōke Skëköl mik wës yi ñie' es, e' kueḷḷi sa' tō ie' ttë pakeke. <sup>14</sup> Sa' wā ijcher tō ie' tō Skëképa Jesús shkëḷḷekane ñies ie' tō sa' shkë'wërakane wës Jesús shkëḷḷekaneitō es, sa' batsulewā Jesús mik e' kueḷḷi. Aishkuō ta' ie' wā sa' mirae a' ta ñita wé ie' tso' eë. <sup>15</sup> Sa' weirke kōs e' dör a' kimoie as se' tajë tō wëstela chō Skëköl a' ier buaë ché se' tajë a' e' kueḷḷi. E' wa ie' kīkardaka tajë. <sup>16</sup> E' kueḷḷi sa' kē e' chkeuwa. Erë sa' chka mir wa'k ë, erë sa' er diché kī iërke kīta kīta ká bit ekkë. <sup>17-18</sup> I' kōs suëkesō s'wōbla wa ese erḷa'wa. Erë i' kōs kē wërta' ese dö yöbië. E' kueḷḷi kē sa' er menewa i' suëkesō ese kī. E' skéie sa' er me'rie i' kē wërta' ese kī. E' kueḷḷi sa' weirke siarë, e' kē dör tajë sa' a, e' dör ekuölō ë. E' wā dör tō e' wa i' dör buaë, olo ta' tajë yöbië, e' dōraë sa' ulā a tajë shütë tkōka kōs sa' weine e' tsata.

## 5

<sup>1</sup> S'chka dör wës ulā es, e' dör buaë senoie ká i' kī ë. Se' wā ijcher tō mik se' ulā i' panane, eḷa u yöbië tso'tke Skëköl wā se' a ká jai a. E' dör se' chka pa'alj ser michoë yöule ie' wā e'. <sup>2</sup> E' kueḷḷi mokī ká i' kī se' rrerke. S'chka pa'alj merke se' a aishkuō ta' ká jai a, e' kkecheke se' tō poë. Se' éna s'chka i' mane'waktke s'chka pa'alj wa wës datsi' mane'wësō es. <sup>3</sup> E' kiane se' kī as se' wíkol kē at aishkuō ta' kē chka ta' wës se' sume es. <sup>4</sup> Se' tso'ia se' ulā i' a eḷa se' kōchōke se' serke chkeulewā wës dali ekkeë e' dikia es. Kē dör tō se' duakulurke senoie chka kē ta'. E' skéie se' éna s'chka i' mane'waktke chka pa'alj ñe' wa as i' duōta'wā ese manerttsane i' ser michoë ese wa. <sup>5</sup> Skëköl wák tō se' kanewëtkë maneḷḷi se' a. Ie' tō iwíkol mé se' a wës iyi tsá patuësō es iwā kkachioie tō iwā dōraë se' ulā a wake'.

<sup>6</sup> E' kueḷḷi kē se' tki'ku' i' kī, erë se' wā ijcher tō se' tso' kamië Skëképa yöki, se' tso'ia ttsë'ka ká i' a' e' dalewa. <sup>7</sup> I' ñe' ta' ie' kē sḷuk se' a, erë se' serke se' erblë ie' mik e' wa. <sup>8</sup> Kē se' tki'ku' i' kī. Se' a' ta' s'chka i' mü meätsō, e' ta' es se' mia sḷuk ie' ska', e' dör ibua'ie. <sup>9-10</sup> Se' ulitane kawōta' dökwā Cristo tker s'shulo kulë kī e' wörki. Eë i' kōs wé se' tō ká i' kī, buaë ena suluë, ese kkayërdaë ta' e' ské meraëitō se' a eköl eköl. E' kueḷḷi se' tso'ia ttsë'ka ö se' mia ie' ta', erë kekraë se' e' chōke sḷuk yësyësë as ie' wa iwër buaë.

*Skëköl er buarne se' kī e' pakë*

<sup>11</sup> Sa' tō Skëképa dalōieke tajë, e' kueḷḷi sa' e' chōke darërë s'malepa pablōk as ñies ie'pa tō ie' dalōiō. Skëköl wā ijcher buaë tō sa' er yësyësë, e' mü jcher a' wā ñies. <sup>12</sup> Sa' kē skā ku'ne e' ttë chōk a' a. E' skéie sa' tso' a' a kawō skā mukne e' tso'ka sa' wa. E' wa a' tō sa' tsatkëmi wëpa tō sa' cheke suluë, esepa yöki. Ie'pa esepa e' tso'ka tajë is imalepa wa iwër ese wa, kē dör is ie'pa er dör Skëköl wōa ese wa. <sup>13</sup> Sa' wër aljje, e' ta' e' dör Skëköl dalërmik. Kē sa' wër es, e' ta' e' dör a' kimoie. <sup>14</sup> Sa' éna iane tō Cristo éna se' dalër tajë, e' tō sa' kē sḷuk ie' a. Sa' éna iane tō ie' eköl ë kōtëwā sulitane skéie, e' wa kiane chë tō e' dör wës sulitane kōtëwā es. <sup>15</sup> Ie' kōtëwā sulitane skéie as se' tso'ia ttsë'ka esepa kē seriā wës se' kī ikiane es, e' skéie as se' ser wës ie' kōtëwā shkënekane se' skéie e' kī ikiane es.

<sup>16</sup> E' kueḷḷi kē sa' ku'ia s'malepa bikeitsōk wës ká i' wakpa tō ibikeitseke es. Keḷet sa' tō Cristo bikeits es. Sa' ibikeits tō ie' dör se' ëse ë. Erë i' ñe' ta' sa' kē tō ie' bikeitseku'ia es. <sup>17</sup> E' kueḷḷi yi batsulewā Cristo mik, esepa er maneḷḷi tsa yöne pa'alj. Wës ie'pa bak sḷuk e' kē ku'ia, e' skéie isenëmine pa'alj. <sup>18</sup> E' kōs wé Skëköl tō. Ie' er buanene se'

\* 4:13 Salmo 116.10

kij Cristo batamik. Nies ttè buaë pakè e' kané me'itò sa' a. <sup>19</sup> Ttè buaë ñe' dör i' es: Skèköl er buarmine ká ulitane wakpa kij Cristo batamik kè ie'pa wöchakeku' inui kij. Nies ie' tò ttè buaë e' me' sa' a wà pakè sulitane a. <sup>20</sup> Sa' dör Cristo ttekölpa. E' dör wës Skèköl wák kköchöke a' a sa' wa es. E' kuekij sa' kköchöke a' a Cristo ttò wa tò a' er bua'üne Skèköl a. <sup>21</sup> Cristo kè wà i' sulu wamblène yès, erè Skèköl tò ie' su' wës i' sulu wamblökwak es se' skéie. Ie' tò iwé es as se' batsulewà Cristo mik e'pa sa'uitò wës iwák dör yësyèsè es.

## 6

<sup>1</sup> Sa' kaneblöke Skèköl tã ñita, e' kuekij sa' kköchöke a' a tò ie' er buaë ché a' a, e' kè tsarè. <sup>2</sup> E' wà dör tò ie' tò ichè iyèkkuò kij i' es:

“Mik ye' er buaë chö be' a e' kèwö de, etã be' kköchöke e' ttsyéò.  
Mik be' tsatké e' kèwö de,  
etã be' kiméyò.”\*

Ye' ttò tssó: Skèköl er buaë chö a' a, e' kèwö detke. Ie' tò a' tsatké e' kèwö de j'ñe.

<sup>3</sup> Sa' e' kkö'nuke buaë kekraë sulitane wörki as kè yi' tò Skèkèpa Jesús watöttsa sa' ukuömik. E' kè dör es, e' tã sa' kaneblöke Skèköl a e' yèrmi sulué. <sup>4-5</sup> E' skéie i' ulitane wa sa' tò ikkacheke tò mokij sa' dör Skèköl kané mésopa. Mikle tã sa' weirke, mikle tã sa' kè wà i' tã, mikle tã kawö darèrè tköke sa' tã. Mikle tã sa' burke siarè, sa' wötërke, pè' ièrkeka tajè sa' kji. Sa' kaneblöke darèrèè tajè shute, wöñirke tajè, tteke bli tò. Erè e' kòs dalè'ttseke sa' tò bèrè. <sup>6</sup> Nies sa' tò ikkacheke sa' ser batse'r ena i' jcher se' wa e' wa. I' kòs paneke sa' tò bèrè er bua' wa. Sa' er buaë chöke s'malepa a. E' kòs wa sa' tò ikkacheke tò mokij sa' dör Skèköl kané mésopa. Iwènewà tò Wiköl Batse'r tso' sa' tã. S'malepa dalèritseke sa' tò er mokij wa. <sup>7</sup> Ttè mokij pakeke sa' tò. I' kòs wèke sa' tò diché meke Skèköl tò sa' a' e' wa. Sa' serke yësyèsè, e' dör sa' a wës tabè tso' ñippökwapka wa ñippoie ena e' tsatkoie es. <sup>8</sup> Mikle tã sa' dalöierke, mikle tã kè sa' dalöierku'. Mikle tã sa' kikekeka buaë, mikle tã sa' cheke sulué. Sa' ttò mokij, erè mikle tã sa' suèke kachökwapkaie. <sup>9</sup> Ie'pa wà sa' sùle buaë, erè ie'pa tò sa' suèke wës ie'pa kè wà sa' sùle es. Wësua sa' duökèlurke, erè sa' tso'ia tssè'ka. Ie'pa tò sa' we'ikè siarè, erè kè itò sa' ttélur. <sup>10</sup> Sa' eriarke tajè, erè sa' tssè'rke buaë kekraë. Wësua sa' dör siarèpa, inuköl kè tã, erè Skèköl ttè wa sa' tò s'blu'wèke tajè. Wësua sa' kè wà i' tã, ñermata i' ulitane tso' sa' wà.

<sup>11</sup> A Corinto wakpa, sa' ttöke a' tã yësyèsè. A' dalèr tajè sa' éna. <sup>12</sup> E' kè blène sa' wà a' yöki, erè a' je' tò iblé sa' yöki. <sup>13</sup> E' kuekij ye' kköchöke a' a wës alà a iyè kköchö es, sa' bikeitsö er bua' wa wës sa' tò a' bikeitseke es.

*A' e' batsöttsa i' sulu kòs e' yöki*

<sup>14</sup> Kè a' e' batsök wépa kè erblöta' Jesús mik esepa tã. ¿Wës sene yësyèsè batsmi sene sulu tã? ¿Wës ká tsetsete ena ká ñi a e' shuirmika ñita? <sup>15</sup> ¿Wës Cristo ena bë sermi bèrè ñita? Yi' erblöta' Jesús mik ena yi' kè erblöta' imik ¿wës esepa batsmi ñi mik? <sup>16</sup> Se' dör wës Skèköl ichök e' wé mokij es. E' kuekij ¿wës e' ñi sini'kumi iyi diököl tso' dalöie es tã? E' yè' Skèköl tò i' es:

“Ye' serdaè ie'pa shua,  
Ye' shkoraè ie'pa tã ñita;  
Ye' doraè ie'pa Kèköl  
ena ie'pa doraè Ye' icha.”†

<sup>17</sup> E' kuekij ñies Skèköl tò iyè':

“A' e' yöttsa, a' e' sköttsa banet pè' kè tò ye' dalöie esepa yöki.

I' kòs dör ña esè kè kar  
e' tã Ye' tò a' kierawà buaë.

<sup>18</sup> A' serke es, e' tã Ye' doraè a' yèie  
ena Ye' tò a' klö'weraè Ye' ala'rie.

Ye' dör Skèköl diché tã' tajè iyi ulitane tsata,  
e' wák tò ichè es.”‡

## 7

<sup>1</sup> A yamipa dalèr tajè ye' éna, es se' a' Skèköl kablè' e' kuekij se' e' paiklò sene sulusi kòs tò se' er ena se' chká ia' wèmi, e' yöki. Se' e' chö senuk batse'r kekraè, ie' dalöie tajè e' wa.

*Pablo tssè'wé buaë Corinto wakpa tò.*

<sup>2</sup> jSa' bikeitsö er bua' wa! Kè sa' wà i' sulu wamblène yi' tã. Kè sa' wà yi' weine yès. Kè sa' wà yi' kitène kache tté wa. <sup>3</sup> A' dalèr tajè sa' éna, e' kuekij kè ye' ku' ttè i' chök a' kkatoie. Ye' tò a' a iyè'baktke kuaè tò sa' tò a' bikeitsè michoè dö sa' duolur ekkè. <sup>4</sup> Ye' erblöke buaè a' mik. A' wa ye' e' tsséka tajè. Sa' weirke kòs e' shua ye' er kùnene buaë. Ye' tssè'ne buaë shute.

<sup>5</sup> Sa' de Macedonia tã kè sa' wà kawö kune enoie. E' skéie kabene kí de tajè sa' kji. Tajè sa' tsiriwé sa' bolökpa tò. Nies sa' suane tajè. <sup>6</sup> Erè Skèköl tò s'er pableke, e' tò sa' er pablé s'yami Tito de sa' ska' e' wa. <sup>7</sup> Kè dör tò ie' de e' è kuekij. Nies wës a' tò ie' er kuwé e' biyö tò sa' er pablé tajè. Ie' tò sa' a' iché tò sulué a' éna ye' suak. Nies ie' iché tò i' wamblé a' tò sulu, e' tò a' eriawé tajè tã j'ñe tã a' tso'ne ye' tsatök. Ttè e' tò ye' kji tssè'wé buaë.

<sup>8</sup> Yèkkuò patkè'miyò a' a, erè e' tò a' eriawé, erè kè ye' tkine tò iök ye' tò ipatkè'mi. Tsawe tã ye' tssè'wéitò sulu, erè j'ñe tã kè ye'

\* 6:2 Isaiás 49.8 † 6:16 Levítico 26.12; Jeremías 32.38

‡ 6:18 2 Samuel 7.14; Isaiás 52.11; Ezequiel 20.34,41



ttsèrkü'ia es. Mokj yèkkuò e' tò a' eriawé, eré e' dör ekuölò è. <sup>9</sup> I'ñe ta ye' ttsè'ne buaè. E' kè dör tò ye' tò a' eriaq' e' kuekji. E' dör tò a' eriane es, e' tò a' er mane'wéne Skèköl a. A' eriane wes Skèköl kji ikiane es, e' kuekji sa' kè wa' a' suluqne yös. <sup>10</sup> Mik se' eriane wes ie' kji ikiane es, etä e' dör se' er mane'woie ie' a' as se' tsatkèr. E' kuekji kè se' kàne ttsè'nuk suluè se' eriar ese kji. Eré se' eriar èse, kè mène Skèköl wa, ese tò duèwa tskeke. <sup>11</sup> A' eriane wes Skèköl kji ikiane es, e' saü, jiwà dettsa buaè! E' wà bikeitsó. E' batamik a' er téwa darèrè ta' a' ñi kèkarak wém tò i sulu wamblé a' shuq, e' shulök. E' wa a' tò ikkaché tò a' kè kü' i sulu e' a. Iwènewa' tò a' e' tuléwaje darèrè. I sulu e' tò a' uluwé a' suawéitò. Iwènewa' tò a' éna ye' dalène tajé. Iwènewa' tò a' tso'tke i sulu shulök. E' kos wa iwènewa' tò mokj a' kè kü'ñak i sulu ñe' a. <sup>12</sup> Ye' kè wa yèkkuò ñe' kitèmi a' a' wém tò i sulu wamblé' ñe' kkatoie. Nies ye' kè wa ikitemi yi ta iwambléitò e' tsatköe. E' skéie ye' tò ikitmi as a' wákpa éna iar buaè Skèköl wöa' tò mokj a' tò sa' bikeitseke tajé. <sup>13</sup> I' wé a' tò, e' tò sa' er kji kuwéne buaè.

E' kúie ta' a' tò Tito er kuwé tajé. Ie' ttsè'ne buaè e' tò sa' kji tsé'wé buaè. <sup>14</sup> A' kika'kayò ie' a' ta' a' kè wa ye' jaèone. Kèkraè sa' tto mokj a' ta, ñies ima sa' e' tsékä a' wa Tito kukua, e' suéitò tò e' dör mokj. <sup>15</sup> A' tò ie' kiéwa suane wa painé wa ena a' tso'tke ie' tto dalöiök, mik e' ska' ie' er ane etä e' tò ie' ké a' kji dalérisök tajé. <sup>16</sup> Ye' erblömi a' mik e' tò ye' ttsé'weke buaè.

## 8

### *Se' er buaè chö siarëpa kimoie*

<sup>1</sup> A' yamipa, sa' éna a' a' ipakak tò wes Skèköl er buaè ché Skèkëpa icha erule erule ñi dapa'uke Macedonia kos a, e' pa a. <sup>2</sup> Ie'pa weine siarë iyi ulitane ulä a, eré e' shuq ie'pa ttsè'rke buaè. Ie'pa dör siarë, kè i ta' tajé, eré ie'pa tò inuköl kakké er bua' wa. Wësua ie'pa dör inuköl blüpa. <sup>3</sup> Ye' tò a' iché tò ie'pa imé kos ie'pa a' imermi, e' tsatä iwákpa er wa. <sup>4</sup> Ie'pa kköché tajé sa' a' tò ñies kawö mü sa' a' s'batse'r malepa serke Jerusalén, e'pa kimoie inuköl wa. <sup>5</sup> Ie'pa tò imé tajé shüte, sa' kè wa ibikeitse' tò ie'pa a' imermi ekké. Kéwe ie'pa wákpa e' mé Skèkëpa a, e' ukuökj ta' ie'pa e' ché sa' a' wes Skèköl kji kiane es. <sup>6</sup> E' kuekji sa' tò ikié Tito a' tò ie' mi'ne a' ska' inuköl tsä kititò a' shu' a' e' bata shtöksa' s'iarëpa kimoie. <sup>7</sup> I' kos weke Skèköl a' e' weke a' tò tajé. A' erblö buaè Jesús mik. A' tò tte paké buaè. A' wa iyi jcher tajé. Sulu a' éna s' malepa kimak. Sa' dalër tajé a' éna. E' sù sa' kji ikiane tò ñies a' er buaè chö tajé s'iarëpa a.

<sup>8</sup> Ye' kè kü' ichök a' a' patkoie. E' skéie ye' éna isuak tò mokj a' éna s' malepa dalër wes s'yamipa tso' Macedonia e'pa éna s' malepa dalër es. <sup>9</sup> A' wa ijchertke buaè tò Skèkëpa Jesucristo er buaè ché a' a' tajé. Ie' iyi tso' tajé ká jai a, e' me'atitò dè'bitü ká i' a' siarëpaie a' dalèrmik as a' blur ie' iyi tajé wa.

<sup>10</sup> A' tò ibikeits kéwe sulitane yöki tò a' éna s'iarëpa kimak. Dwas suköt bak e' wa a' tò iwä kímémi kéwe. E' kuekji ima ye' tò ibikeitsé, e' chekeyö a' a. <sup>11</sup> Kané buaè o'mi a' tò, e' eüwa er bua' wa wes tsawe a' tò ibikeits es. Inuköl shtö s'iarëpa kimoie kos a' a' ikit ekké. <sup>12</sup> I' kè ta' se' wa, ese kè kiekü' Skèköl tò se' a. Eré i tso' se' wa ese kakkésö er bua' wa kos se' a' imer ekké, e' ta' e' wër buaè ie' wa.

<sup>13</sup> Ye' kè kü' ichök tò a' iyi kakkümü etä a' atne weinuk kè wa i ta'. E' skéie buaè idir tò a' ñi kímü ñikké. <sup>14</sup> I'ñe ta' a' wa iyi tso' tajé, e' kuekji buaè idir tò a' tò s'yamipa kè wa i ta', esepa kímü. Es aishkuò ta' mik a' kè wa i ta' tajé, eré ie'pa wa itso', etä ie'pa tò a' kímèmi. Es a' ulitane ñi kímümi ñikké. <sup>15</sup> E' dör wes itso' kitule Skèköl yèkkuò kji es, e' tò iché: "Wé tò ishtë tajé, e' icha kè bata atë. Wé tò ishtë bërèbèrè, e' icha deka wé!"\*

### *Tito ena iwapiepa*

<sup>16</sup> Skèköl tò Tito erkiöwé a' kímuk wes sa' éna a' kimak es. E' kuekji ye' tò wéstela cheke Skèköl a. <sup>17</sup> Mik sa' tò ikié Tito a' tò ie' mi' a' ska' a' kímuk inuköl shtök, etä ie' éna a' kimak tajé, e' kuekji ie' e' ché iwák er wa minuk a' ska'. <sup>18</sup> Tito ta' s'yami skä patkekemi sa' tò eköl. E' tò Jesús tté buaè pakeke buaè ká wa'ñe. E' kuekji ie' tté cheke buaè Skèkëpa Jesús icha erule erule tso' ká wa'ñe e'pa tò. <sup>19</sup> E' kúie ta' ie'pa kos tò ie' shushtë as imi' sa' ta' Jerusalén, inuköl shteke sa' tò e' muk. E' kaneweke sa' tò buaè Skèkëpa kíkoka' ena iwä kkachöie tò mokj sa' éna ie'pa kimak. <sup>20-21</sup> Sa' e' chöke iwakanéuk buaè Skèkëpa wörkj ñies sulitane wörkj. E' kuekji wém ñe' mi'ke sa' wa, e' wa kè yi a' sa' kkaténuk inuköl shteke tajé sa' tò e' kji.

<sup>22</sup> Nies sa' tò s'yami skä patkeke ie'pa böl ta. E' er me'rie kaneblök buaè kèkraè. Bänet sa' tò ie' su'bitü, e' kuekji ie' suule buaè sa' wa. Nies ie' isué tò a' dör pè' buaè, e' kuekji ie' e' ché sa' kímuk kané i' wa. <sup>23</sup> Tito dör ye' wapie e' kaneblöke ye' ta' a' kímuk. S'yamipa böl ñe' mi'ke ie' ta, e'pa patké Skèkëpa Jesús icha erulé tso' ká wa'ñe e'pa tò. Ie'pa wa Cristo kïkarékä. <sup>24</sup> E' kuekji ikkachö ie'pa a' tò ie'pa dalër a' éna as Skèkëpa icha erulé tso' ká wa'ñe e'pa kos wa ijcher tò mokj a' tò s'dalérisetä'. Ikkachö ie'pa a' tò wéé' sa' e' ttsökä tajé a' wa.

\* 8:15 Éxodo 16:18

9

1-2 Ye' wá ijcher tó s'batse'r malepa serke Jerusalén, e'pa kímak a' éna er bua' wa. E' kuekji inukól shteke sa' tó ie'pa a, e' kji ye' kě kawótá a' a' yěkkuó ská shtókne. Kěkraē ye' e' t'tsókeka a' tté pakók Macedonia wakpa a. Ye' iché ie'pa a' tó duas sukót bak e' wa a' dór Acaya wakpa, e'pa éna inukól mak er bua' wa. E' tó ie'pa kibiie erkiówé. 3 Eré s'yamipa mañal ñe' patkekeyó a' ska' as ye' e' t'tsókeka a' wa e' kě dór é. E' skéie ye' kji ikiane tó a' wa inukól tso'tke kitule wa mē ē wēs ye' tó a' paké es. 4 Dó' Macedonia wakpa dōbitu ye' ta' e'pa tó isuégwá tó kam a' tó inukól e' shtó. E' tó sa' jaéweraē tajé sa' ikló'wé tó a' tó ishtétke e' kuekji. ¿Wēs e' kě tó a' jaéwepañak? 5 E' ē kuekji ye' ibikeitsé tó buaē idir s'yamipa mañal ñe' a' ikió tó ie'pa mi' ye' yókj kewe a' kímuk inukól muk a' kablé' e' shtóksa. Es inukól meke a' tó e' tso'tke kitule mik ye' de eta, iwá kkachoie tó a' imeke er bua' wa, kě dór kké'blé wa.

6 Ttē i' anú a' éna: “Yi tó i kuantké elkela, ese ulá a' iwá wórdane elkela. Eré yi tó i kuantké tajé, ese ulá a' iwá wórdane tajé.” 7 A' ulitane ekól ekól tó imú kós a' ibikeitsé mē ekké. Wépa tó imeke t'tsé'ne bua' wa esepa dalér Skékól éna, e' kuekji kě imar er sulu wa ó diché wa. 8 Kě a' tkinuk. Skékól er bua' kji chómi a' a' tajé as i kós kiane a' kji senoie ese dō a' ulá a' wē' kěkraē. Nies ie' tó ikj mēmi a' a' tajé shuṭe as a' ulá a' idó tajé i buaē kós e' wóie. 9 E' dór wēs itso' kitule Skékól yěkkuó kji es. E' tó, yi tó i meke er bua' wa, ese chē i' es:

“Ie' tó ikakme' tajé er bua' wa s'siārēpa a;

Ì buaē wéitō e' ska' Skékól er arke kěkraē.”\* Es Skékól yěkkuó tó iché. 10 Skékól tó iwó meke kuantké ena chké mekeitō se' a' ñē, ñies e' ē tó i kós kiane se' kji s'kimoie, ese kji meraēitō a' a' tajé as a' tó i buaē ese kji ū tajé. 11 Kěkraē ie' tó a' a' íyi kji meraē buaē wē' as a' tó s'malepa kímù buaē kěkraē. Ie' tó iweraē es as wéstela yēr tajé ie' a' inukól mēmi a' tó sa' ulá a' e' kji. 12 Es i meke a' tó i' Skékól dalóioie, e' wa s'batse'r malepa kímē kiane, esepa ulá a' i kiane ie'pa kji ese dōraē. E' kjiē ta' ie'pa tó wéstela cheraē tajé ie' a' t'tsé'ne bua' wa. 13 Ì buaē wēke a' tó ie'pa kimoie, e' wa iwérdawá tó mokj a' tso' Cristo tté buaē cheke a' tó tó mokj idir e' wa i' yútók. Nies iwérdawá tó a' tó ie'pa ena sultane kimeke tajé er bua' wa. E' kós kuekji ie'pa tó Skékól kikeraká tajé. 14 E' kjiē ta' ie' er buaē ché a' a' tajé shuṭe, e' kuekji ie'pa tó ikieraē ie' a' a' kji a' daléritsé tajé e' wa. 15 Wéstela chósó Skékól a' ilá méitō se' a' e' kji, e' dór buaē shuṭe kě se' a' iyēnuk ekké.

\* 9:9 Salmo 112:9

10

*Pablo tó kanē me' Skékól tó ie' a, e' tsatké*  
 1-2 Ye' dór Pablo, e' wák kkóchóke a' a' bēré er bua' wa wēs Cristo es tó ye' ttó t'tsó. A' wēlepa tó sa' cheke tó sa' kaneblóke e' kě dór Skékól a, e' dór sa' wákpa a' wēs s'ditsó malepa es. Ie'pa icheke tó mik ye' tso' a' ska', eta ye' kēsik kě ta' a' uñoie. Eré mik ye' tso' yěkkuó shtók ká bānet, e' je' ta' ye' kēsik deka. Eré e' kě yēne. Ye' kēsik ta' yi isie tso' ye' chók ese uñoie darērēē. E' kuekji ye' kkóchóke a' a' tó a' e' shuḷó as kē' ye' kawótá a' uñuk darērēē mik ye' de a' ska' eta. 3 Mokj sa' dór s'ditsó wēs sultane es, eré kě sa' ñippókú' wēs s'ditsó ñippóke es. 4 Ì tso' sa' wá e' aloká i sulu kji, e' kě dór wēs i tso' s'ditsó w' aloká ibolókpa kji es. E' skéie e' dór i meke Skékól tó sa' a' diché ta' tajé e' aloká i sulu diché kji ese. E' wa sa' tó kache tté ewékewa. 5 Nies tté kós pakarke e' t'tséka wa s'wókló'wóie as kě s'wá Skékól jcher, ese chówékewa sa' tó. Erbiké kós kló'wékewa sa' tó mekeró Cristo kló dikjá as itó ittó i' yútó. 6 Mik a' de sa' ttó i' yútók buaē, eta sa' tso'tke wépa kě éna i' yútak, esepa kós we'ikók.

7 A' tó pé' suéke ikiké ē, e' kě dór buaē. A' wēlepa e' bikiétsó tó e'pa ē dór Cristo icha, e' ta' as esepa tó ibikeitsóne. Nies sa' dór Cristo icha wēs ie'pa es. 8 Skékól tó ye' a' ikéwó me' a' wóbla'wóie. Isalema e' wa ye' e' t'tsóka tajé shuṭe. Eré e' kéwó mēne ye' a' er diché kji ioie, kě dór a' sulu'wóie. E' kuekji kě ye' jaēne e' t'tsóka ikéwó mēne ye' a' e' wa. 9 Kě a' tó ibikeitsar tó ye' éna a' tkiwák yěkkuó shtekeyó a' a' e' wa. 10 Wēlepa tó icheke: “Yěkkuó kós kitbitu Pablo tó se' a, e' kji ie' tó se' uñébitu darērē t'tséska ie' kēsik deka buaē se' uñuk. Eré mik itso' se' ska' eta ikēsik kě ta' yēs. Wēs ie' kapakó e' kě wa yi wá ie' dalóioie.” 11 Wépa tó icheke es, esepa wa ijchenú tó mik sa' demi a' ska' eta i kit sa' tó yěkkuó kji ká bānet, e' waweraē sa' tó.

12 Ie'pa esepa ñi kíkókeka tajé. Kě sa' diché dé'ka e' chók tó sa' dór buaē wēs ie'pa e' chō es. Ie'pa wákpa tó itské ier wa tó i dór buaē wē. Wēs ie'pa wakpa serke e' wéwa ie'pa ñi saṭ. Ie' kuekji ie'pa dór me'ukuóie! 13 Kanē me' Skékól tó sa' a, e' ē wa sa' a' e' t'tsérmika. Kě sa' a' e' t'tsénukka i ská wa. Kanē mēne sa' a' ñies e' wá dór a'. 14 E' kuekji kě sa' ku' e' t'tsóka tajé shuṭe. Sa' kě dōpa kewe kaneblók a' shuṭa, e' ma ē sa' e' t'tsóka. Eré sa' tó Cristo tté buaē e' paka' a' a' tsawe. 15 Nies sa' kě e' t'tsóka o'ka kanē wa, e' kéwó kě mēne Skékól wa sa' a' e' kuekji. E' skéie sa' kji ikiane tó sa' kanē a' shuṭa e' mú kji iēr buaē wēs a' kji erbló mir Skékēpa mik es. Eré kě sa' kaneblópa kós sa' a' ikéwó mēne e' tsata. 16 Nies Jesús tté buaē e' kji pakak sa' éna a' serke ee' ká bānet tso' diwó mi'kewa e' kke

ee. Erë kě sa' éna ipakak ká wé o'ka tso' ipakók ee' as kě sa' e' tso'ka o'ka kané wa.

<sup>17-18</sup> Wépa e' tso'ka tajé, esepa kě wër buaé Skékól wa. Erë wépa kikéka ie' wák tó, esepa je' wër buaé ie' wa. Wé' itso' kitule iyékkuó kǐ i' es: "Yi e' tso'ka as ese e' tso'ka i' wé Skékól tó ese wa."<sup>\*</sup>

## 11

### *Pablo tó s'kitó'ukwakpa ché*

<sup>1</sup> Ye' ttóke aliwakpaie eré a' mú tó ye' dalé'ttséja bərbér è. <sup>2</sup> Ye' éna a' dalér tajé. Ye' éna a' kko'nak wés Skékól tó se' kko'neke es. Ye' kǐ ikiane tó a' e' tkówa kékraé daréréé Jesús è a. E' dór wés ye' tó a' mé senukwa wém ekól è tǎ es as a' dō wés busi batse'r dō imaso ulá a es. A' maso e' dór Cristo. <sup>3</sup> I'ne tǎ a' tso' tkéulewa buaé daréréé Cristo è a, eré ye' suane dō' a' e' müttsá e' kǐtó'uk wés Eva kǐtō'ka Satanás e' a' tkabéie e' tó kache wa es. Ye' suane dō' a' er tso' buaé etkéme Cristo è a, e' waté a' tó. <sup>4</sup> Wélepa de a' ska' Jesús tté pakók, eré kě idór imokǐ wés sa' tó ipakeke es. Eré e' tso'ke a' tó buaé. Wikól tté pakeke ie'pa tó, e' kě dór Wikól Batse'r dē'wa a' er a e'. Tté buaé pakeke ie'pa tó, e' kě dór imokǐ wés sa' tó ipaka' a' a es. Eré esepa kiekewa a' tó buaé. E' kuekǐ ye' suane dō' a' erblō Cristo mik, e' olo'yéne a' tó. <sup>5</sup> Ie'pa de a' ska' sa' itókǐ e' chók tó ie'pa dór Jesús ttekolpa tsá bua'iewa, eré ye' kě e' tso'ne ie'pa dikǐa diōshet yés. <sup>6</sup> Isalema ye' kě a' ipakar buaé wés ie'pa icha pakó es. Eré tté pakeke ye' tó e' wǎ jcher buaé ye' wǎ. E' wǎ kkeyé'bitu sa' tó a' a' tajé iyi ulitane shǔa.

<sup>7</sup> Mik ye' tó Skékól tté buaé e' paka' a' a, etǎ ye' kě wǎ a' na'one e' kǐ yés. E' kuekǐ isalema a' tó ibikeitsé tó tté pakeke ye' tó a' a, e' kě dór buaé. Eré es ye' e' wóewa diōshet as a' dalöier. ¿Ima a' tó ibikeitsé? ¿I wéyó es e' dór sulué? <sup>8</sup> Skéképa icha erule erule nǐ dapa'uke kǎ bánet, e' dapómik ye' monéka kanebloie éme a' shǔa. E' dór wés ie'pa iyi ekiblélyó a' kǐmoie es. <sup>9</sup> Mik ye' sene' a' shǔa, etǎ ilé kiane ye' kǐ senoie, e' tǎ ye' kě wǎ a' tsirione ese wa. Eré s'yamipa datse Macedonia, e'pa wa i' kǐs kiane ye' kǐ e' de ye' a. Es ye' kě wǎ i' kine a' a, nǐes kě yó i' kiepa. <sup>10</sup> Ye' e' tso' es e' kě yénuksǎ ye' ulá a' a' dór Acaya wakpa e' kǐs a. E' dór mokǐ wés Cristo tso' ye' a' e' dór mokǐ es. <sup>11</sup> Ye' ttó es, ¿e' dór tó ye' kě éna a' dalér? Au, e' kě dór es. ¿skékól wák wǎ ijcher buaé tó ye' éna a' dalér!

<sup>12</sup> Ye' kaneblōraé a' shǔa wés ye' iǒ'bitu es as ie'pa nǐe' kě e' tso'ka tó ie'pa kaneblōke wés sa' es. <sup>13</sup> Ie'pa kě dór Jesús ttekolpa tsá

mokǐ esepa. Ie'pa dór s'kitó'ukwakpa. Ie'pa e' dō tó ie'pa dór Cristo ttekolpa tsá mokǐ, eré e' kě dór es. <sup>14</sup> E' kě dór i' kě sǔule se' wǎ ese. Satanás wák e' dō tó ie' dór Skékól biyóchókwak olo tǎ' tajé ese. <sup>15</sup> E' kuekǐ kě se' tkine tó ie' kané mésoa e' dō tó ie'pa tso' sene yésyésé e' tsatǐkók. Bata ekké tǎ ie'pa ulá a' iské dōraé wés ie' wamblōrak es.

### *Pablo weine ie' dór Cristo ttekol e' kuekǐ*

<sup>16</sup> Ye' tó iskà chéne a' a, kě a' tó ye' bikeitsók tó ye' dór aliie. Eré a' wélepa tó ye' bikeitsé es, etǎ kawó mú nǐa bərbér è e' tso'ka wés aliwak es. <sup>17</sup> Ye' e' tso'keka, e' tté kě mēne Skéképa Jesús wa ye' a. Ye' wák tó icheke aliie. <sup>18</sup> Tajé itso'rak e' tso'ka iwákpa iyi wa, es nǐes ye' e' tso'keka wés ie'pa es. <sup>19</sup> ¡Aj! A' dór iyi jcher tajé ese wakpa. Eré s'kukuó daréré esepa dalé'ttseke a' dór er bua' wa. <sup>20</sup> Wépa de a' ska' a' kló'ukwǎ wés ie'pa icha es, esepa kiekewa buaé a' tó. Ie'pa de a' kǐtó'uk a' iyi yottsǎ a' ulá a. Ie'pa e' tso'ke tajé a' kǐ, a' ppeke a' wó kǐ, a' cheke eré ie'pa kiéwa a' tó er bua' wa. <sup>21</sup> ¡Aj! ¡Ye' wák e' jaéune mik ye' iché tó sa' diché kě dē'ka a' sauk es etǎ!

Ie'pa diché deka e' tso'ka tajé, e' tǎ nǐes ye' diché deka e' tso'ka. Ye' wák a' tǎ ye' ttó es, e' dór wés aliwakpa ttó es. <sup>22</sup> Ie'pa dór hebrewak, e' wa ie'pa e' tso'keka tajé. Eré nǐes ye' dór ie'pa ditséwó. Ie'pa e' chō tó ie'pa dór Israel aleripa, eré nǐes ye' dór Israel aleri. Ie'pa e' tso'keka tajé tó ie'pa dór Abraham aleripa. Nǐes ye' dór Abraham aleri. <sup>23</sup> Ie'pa e' chō tó ie'pa dór Cristo kané mésoa. Es ye' dór nǐes, eré ye' dór ikané méso bua'ie ie'pa tsata. Ye' ttó es e' dór wés aliwak ttó es, eré Cristo a' kaneblé e' wa ye' e' aléka tajé ie'pa kǐ. Ye' wótúle s'wóto wé a' tajé ie'pa tsata. Ye' buule tsa'bata daloie ese wa tajé shuté ie'pa tsata. Tajé ye' bakshkar ye' duówa e' ulá a. <sup>24</sup> Skétókicha judiowak tó ye' buk tsa'bata wa. Bitókicha ie'pa tó ye' ppé, etǎ ie'pa tó ye' ppé dō dabom tkéyók tsá yénettsǎ et ekké<sup>\*</sup> <sup>25</sup> Mañatókicha romawak tó ye' buk kal wa. Etókicha ye' tē'rakitó ak wa ye' ttowǎ. Mañatókicha kanó kǐ ye' mirwa, e' wótunewa dayé a. E' shǔa etókicha ye' bak ar kaltakla kǐ dayé kǐ kǎ et nǐe nañé. <sup>26</sup> Ye' shké tajé, e' shǔa dǐ' tajé ena akblókwakpa tó ye' tkiwé siaré. Ye' wák ditséwopa ena o'kapa, e'pa tó ye' wéike, e' daló tajé e' shǔa ye' shké. Wé pé' serke tajé ena wé pé' kě serku' tajé, nǐes dayé kǐ, ese ska' ye' shké wósh wa. Nǐes wépa e' dō tó ie'pa dór Jesús mik erblókwakpa, esepa daló mēne tajé ye' kǐ. <sup>27</sup> Ye' kaneblé tajé daréréé. Ye' wóñine tajé, ye' bli dalé'tsǎ' tajé, ye' ersi dalé'tsǎ' tajé.

\* **10:17-18** Jeremías 9.24 \* **11:24** dabom tkéyók tsá yénettsǎ et: E' kéwó ska' tǎ judiowak tté dalóieno tó iché tó kě kawó tǎ' sppók dōka dabom tkéyók tsata. Ie'pa wóblane pé' sulusipa ppók dōka dabom mañayók kǐ sulǐtu as kě itkōka dabom tkéyók tsata.

Mikle ta ye' kē wā i kune ñanoie, tteke kase to tajē, kē datsi' ta' wē' e' patroie.

<sup>28</sup> E' kī skā tso', e' dōr tō Skēkēpa Jesús icha erule erule, e' pa kōs bikeitsekeyō kekraē tō is ie'pa mir. <sup>29</sup> Mik ie'pa wēlepa diché kē dē'kaia buaē e' tkōwā darērē Jesús mik, e' ta ye' mik e' dalēne. Mik yile tō ie'pa kē i sulu wamblōk, e' ta' tō ye' uluwé suluē. <sup>30</sup> Ye' mū e' ttsakka, e' ma i tō ikkacheke tō ye' kē diché ta' ese wa ye' e' t̄tsōmika, <sup>31</sup> Skēkōl dōr Skēkēpa Jesús Yē ena iKēkōl kīkarka kekraē, e' wā ijcher tō ye' kē ku' kachōk. <sup>32-33</sup> Mik ye' bak Damasco, e' ta' ká e' wōkir kanēblōke iblū kiē Aretas e' a, e' tō ishkekīpa patkē ye' klō'ukwā ká e' k̄kōiēule shkit k̄akkeē, e' wēkkō a. Erē s'yamipa wēlepa tō ye' iēkā k̄kō a ta t̄tsa' wa ye' ēmi enaēna iwēkkō tsitsir tso' ese a dōttsa' iski. Es ye' tkashkar ie' yōki.

## 12

### *I kkaché Skēkēpa tō Pablo a kabsueie*

<sup>1</sup> Kē dōr iie bua', erē ye' kawōtā kī e' t̄tsōkkaia e' tsatkoie. I kkaché Skēkēpa Jesús tō ye' a kabsueie e' pakekeyō a' a' i' ta. <sup>2</sup> Wēm sūle ye' wa ekōl dōr Cristo t̄tōkata, e' minetser ká jai a, e' kī duas de dabom eyōk kī tkēl (14). Ye' kē wa ijcher tō ie' mine'ka chkaē ō wikōlie, e' jcher Skēkōl ē wa. <sup>3-4</sup> Wēm e' sūle ye' wā, e' minetser ká jai a e' dōr ká buaala eē. Eē t̄tē kē yēnuk se' a ena kē se' a ikēwō mēne chē, ese t̄tsēitō. Iskā chekeneyō a' a' tō ye' kē wā ijcher tō imine'ka chkaē ō wikōlie, e' jcher Skēkōl ē wa. <sup>5</sup> Wēm ese kīkēmika ye' tō, erē ye' wák kē e' kīkōpaka. Erē ye' diché kē ta' e' ē wa ye' e' kīkōmika. <sup>6</sup> Ye' mū e' ttsakka, e' ma ye' a' e' t̄tsērmika t̄tē mokj wa, e' kuēkī e' kē dōr suluē. Erē kē ye' e' t̄tsōtā'ka as kē yi ibikeit̄sō tō wēs ye' wēr ena wēs ye' t̄tō e' tsatā ye' dōr. <sup>7</sup> Iyi tajē buaē k̄kayēne ye' a ká jai a, ñe' kuēkī ilē mēne ye' a ye' wōowaie as kē ye' e' t̄tsōkā i buaē su'yō e' wa. E' dōr wēs dika' tkērwa ye' chkā a es, e' wa ye' rreweke Satanás tō kekraē. <sup>8</sup> Mañatōkicha ye' k̄kōyē' Skēkēpa a tō iyōttsa ye' a. <sup>9</sup> Erē ie' ye' iūtē: "Mik be' diché kē ta', e' ta' e' kī Ye' diché wēnewā bua'iewā. E' kuēkī ye' er buaē chō be' a, e' ē dōr wē' be' a." E' kuēkī buaē idir ye' a' e' t̄tsōkka ye' diché kē ta' e' wa as Cristo diché tajē e' wērwa bua'iewā ye' kī. <sup>10</sup> Mik ye' t̄tsē'r tō ye' diché kē ta', e' je' ta ye' diché ta' tajē. E' kuēkī mik ye' diché kē ta', mik ye' yērke suluē, mik ye' kē wā i ta', mik ye' we'ikeke siarē pē' tō, mik ye' kawō tkōke suluē, mik ese kōs tkōke ye' ta' Cristo dalērmik, e' ta' ye' t̄tsē'ne buaē.

<sup>11</sup> Erē ye' kē dōr yi, erē wēpa cheke a' tō tō e'pa dōr Jesús ttekolpa tsā bua'iewā, e' pa kē dōr ye' tsatā. A' tō ye' tsat̄kōpa ie'pa yōki erē e' kē one a' wā. E' kuēkī a' tō ye' kē e' t̄tsōkka tajē wēs aliwak es. <sup>12</sup> Mik ye' bak senuk a' shuā, e' ta' ye' weine kōs e' dalē't̄tsēyō bēre

er bua' wa. Ñies i kē or yi a' ese wēyō tajē a' wōrkī Skēkōl diché tajē wa s'kiwē ekkē. E' wa iwēnewā tō mokj ye' dōr Jesús ttekolpa tsā, e' pa ekōl. <sup>13</sup> Ye' kē wā a' káne ye' kanēuk. E' ē wa a' wōanewa Skēkēpa icha erule erule malepa e' diklā diōshēt. A' we'ikēyō, e' nūf olo'yō ye' kī.

### *Pablo kablé ie'pa pakōk*

<sup>14</sup> Ye' tso'tke shkōk a' pakōk. I' ta ide mañatōkicha. I' ētōkicha wēs kekraē kē ye' e' maupaka a' mik as a' tō ye' k̄kō'nū. Ye' kē tkirku' a' iyi kī, e' tkirke a' wákpa kī. A' dōr wēs ye' ala'r es. Ila'r kē kawōtā iyē k̄kō'nuk, e' skēie iyē kawōtā ila'r k̄kō'nuk. <sup>15</sup> E' kuēkī ye' e' chētkē i kōs tso' ye' wā e' eukwa er bua' wa a' k̄jimoie dō ye' wákē. Ye' tō a' dalēritseke kīta kīta, e' ta' ēna ye' dalēr ze' mir wa'k ē?

<sup>16</sup> A' ye' sinī'kuē buaē tō mik ye' bak a' ska', e' ta' ye' kē e' moneka a' mik. Erē a' wēlepa tō icheke tō ye' tō a' k̄itō'wé a' inukōl klō'woie akir. <sup>17</sup> ĺma a' erbikō tō wēpa patkē'yō a' ska', e' pa wa ye' tō a' k̄itō'wé? <sup>18</sup> Ye' k̄kōyē' tajē Tito a' tō ie' mi' a' ska', e' ta' s'yami skā ekōl patkē'miyō ie' ta. ĺTito tō a' k̄itō'? A' u, ie' sene buaē yēsēsē a' shuā wēs ye' es. Sa' bōl senē a' shuā ñi suē.

<sup>19</sup> Isalema a' tso'ia' ibikeitsōk tō sa' e' tsat̄kōke a' yōki. E' kē dōr es. Ñermata sa' tso' t̄tōk Skēkōl wōrkī wēs s'batsulewā Cristo mik esepa t̄tō es. A' yamipa dalēr ye' ēna, i kōs weke sa' tō e' dōr a' er diché kī ioie. <sup>20</sup> Mokj ye' suane dō' mik ye' de a' ska', e' ta' ye' kē tō a' suē wēs ye' kī a' kiane suē es. Ñies ye' suane dō' a' kē tō ye' suē wēs a' kī ye' kiane suē es. Ye' suane dō' ye' ikuē tō a' ñippōke, a' ukyērke ñi kī, a' ulurke ñi kī, a' er me'rie a' wákpa ē kī, a' biyōblōke ñi kī, a' ñi chōke suluē, a' e' t̄tsōkeka tajē, a' ñi chiliūke. <sup>21</sup> Ñies ye' suane dō' mik ye' dene a' ska' e' ta' Skēkōl tō ye' jaewē a' kuēkī. Dō' a' tajē kē er maneone. Dō' a' e' ia'ukekaia sene sulusi wa. Dō' a' tso'ia' trēnuk ena a' tso'ia' i sulu skā kukuēña a' wā e' a. E' dōr es, e' ta' Skēkōl tō ye' iuwēraē siarē a' wa.

## 13

<sup>1</sup> I' ta mañatōkicha ye' mi'ke a' pakōk. I' tso' a' wā shulē, e' shuleraēsō wēs itso' kitule Skēkōl yēkkūō kī es, e' tō ichē: "T̄tē shūlekesō e' ta' ittekolpa kiane bōl ō mañal ichoie tō mokj idir ō au." <sup>2</sup> Mik ye' bata dē'rō a' ska', e' ta' wēpa tō i sulu wamblē, e' pa a' ye' iyē' tō a' kawōtā ilo'yōk. I'ñe ta' ye' kē ku' a' ska', erē ye' tō iskā chekene ekkēpa a' ena a' malepa tso' i sulu wamblōk, esepa a' tō mik ye' dene, e' ta' a' shuleraēyō darērē. <sup>3</sup> A' ichē tō a' kī kiane suē tō mokj ye' t̄tōke Cristo diché wa. Mik ye' de a' ska', e' ta' a' isuēraē tō es idir. Cristo diché ta' tajē, e' tso' iwakanēuk a' shuā, ie' kē dōr wēs se' kē diché ta' es. <sup>4</sup> Mokj ie' kōtēwā

wõtëulewā krus mik wēs se' kē diché tǎ' es, erē ie' serkene Skëköl diché tajë e' wa. Es ñies sa' batsulewā ie' mik, e' kuëkj wēsua sa' kē diché tǎ', erē Skëköl diché wa sa' serdaë a' kimoie.

<sup>5</sup> A' wakpa e' saú tò mokj a' erblöke Jesucristo mik. A' ibikeitsö buaë. ¿A' kē wā ijcher tò ie' tso' a' er a? E' kē dör es, e' tǎ e' wā kiane chë tò a' kē dör ie' icha. <sup>6</sup> A' mú wōā iwēne tò sa' kaneblë' a' shūa e' wā dettsa buaë. <sup>7</sup> Sa' tso' ikiök Skëköl a' tò a' kē tò ì sulu wamblökia. Sa' kē ku' e' kiök as iwēr tò ye' kaneblë' a' shūa e' wā dettsa buaë. E' skéie sa' kj ikiane tò a' ser buaë yēsyesë wēs Skëköl kj ikiane es, erë wēlepa wa iwēr tò sa' kaneblë' e' kē wā dē'ttsa buaë. <sup>8</sup> Mik a' serke buaë wēs Skëköl ttë mokj tò ichë es, etǎ e' kj kē sa' a' ì yënuK. E' skéie e' kikekëkǎ tajë sa' tò. <sup>9</sup> Sa' kē diché tǎ', erë mik a' e' tkëulewā darërë Skëkëpa ttë a, etǎ e' tò sa' ttsë'weke buaë. Sa' tò ikië michoë Skëköl a' tò a' mú dō senuk buaë yēsyesë kekraë wēs ie' kj ikiane es. <sup>10</sup> Mik ye' de a' ska', etǎ kawō mène ye' a' a' kj, e' kē wā shulak ye' éna darërë kësik wa. Skëkëpa Jesús tò e' kéwō me' ye' a, se' er diché ioie, e' kē dör se' sulu'woie. E' kuëkj ye' tso' yëkuö i' shtök a' a' kam ye' dō a' ska' e' yökj as ì kōs tso' shulë, e' shulō a' tò kam ye' dō e' yökj.

*Pablo e' chéat*

<sup>11</sup> A' yamipa, bataie yö ichë tò a' ttsë'nú buaë. A' e' chō senuk yēsyesë. A' er kuú. A' kabikeitsö ñikkëë. A' senu bërë ñita. A' serke es, e' tǎ Skëköl dör dalëritsökwa ena sene bërë mukwak, e' serdaë a' tǎ kekraë.

<sup>12</sup> A' ñi shké'ú ñi dalëritsë wa. S'batse' rpa kōs tò a' shké'wëmi.

<sup>13-14</sup> As Skëkëpa Jesucristo er buaë chō a' a. As Skëköl tò a' a' ikkachō tò a' dalër tajë ie' éna. Ñies as Wiköl Batse'r tò a' kō senuk wēs wák eköl ë es.

## Yëkkuö kit Pablo tö Galacia wakpa a Gálatas

Pablo tö yëkkuö i' kit Jesús mik erblökwakpa tso' ká kië Galacia e' shuä ká wa'ñe e'pa a ikimoie. Iekkëta ie'pa kos e' kē dör Israel aleripa. E' kuëkj kam ie'pa erblö Jesús mik eta ie'pa kē tö Moisés ttē dalöiëno e' dalöië. Mik Pablo dē'rö Jesús ttē buaë kkachök ie'pa a eta ie' tö ie'pa a iché tö kē se' tsatkerpa Moisés ttē dalöiëno e' dalöië wa.

Erë mik ie' mineane eta Israel aleripa shuä pé' demi e' ö tö ie'pa dör Jesús mik erblökwakpa. E'pa tö ie'pa wöbla'weke sulu ikitöwoie. Ie'pa tö iché tö se' kē tsatkerpa Jesús mik erblö e' ë wa. E' kuëkj ñies se' kawötä Moisés ttē dalöië. I sulu e' wöklö'woie Pablo tö yëkkuö i' kit. Jesús mik erblökwakpa tö s'wöbla'uk kache ttē wa, e'pa ki'wä buaë, e' kuëkj Pablo tö yëkkuö i' kit as ie'pa tso' tssé'ka iyöki ena ie'pa shulir er bua' wa. S'wöbla'uk kache ttē wa e'pa tö icheke tö Pablo kē dör Jesús tteköl chökle ie' kē wa Moisés ttē e' dalöiëne e' kuëkj.

Pablo tö iché Jesús mik erblökwakpa a tö Jesús wák tö ie' klöo' kaneblok ittekölie. Nies ie' tö iché tö Jesús mik erblö e' ë wa Skököl tö se' klö'wëmi wës pé' buaë yësyésë es. Kē dör Moisés ttē dalöië wa Skököl tö se' tsatkeke. E' skéie ie' er buaë ché se' a' wa ie' tö se' tsatkeke señoie ie' a iWiköl wa. E' kkacheke Pablo tö yëkkuö i' kī.

### Shke'wë

<sup>1</sup> Ye' dör Pablo. Ye' dör Jesús ttekölpa tsä, e'pa eköl. Ye' kē kine s'ditsö wä ñies ye' kē patkëne s'ditsö wä. E' skéie Skököl dör S'yé tö Jesús shkeö'kane, e' ena Jesucristo, e'pa tö ye' patkë' ie' ttē buaë pakök. <sup>2</sup> Ye' tso' yëkkuö i' shtök Skökëpa Jesús icha erule erule kos tso' Galacia e'pa a. Ye' ena s'yamipa kos tso' ye' ta' ië, e'pa tö a' kos shke'wëmi. <sup>3</sup> Skököl dör S'yé ena Skökëpa Jesucristo, as e'pa er buaë chö ena sene bërë mü a' a. <sup>4</sup> Jesucristo e' me'ttsa ttëwä se' nüi skéie wës Skököl dör S'yé e' kī ikiane es. E' o' ie' tö se' yottsä sene sulu kos tso' ká i' a' e' ulä a. <sup>5</sup> ië' kīkōkasö kekraë! Es idir.

### Jesús ttē buaë, e' dör etkëme

<sup>6</sup> Ye' tö a' me'at, e' itökī bet ta, Skököl olo'yé a' tö. Ie' tö se' klöo'bak. Ie' er buaë ché tajë se' a' Cristo batamik. Erë ie' olo'yé a' tö. E' skéie a' tso'ne ttē kuä'kī klö'uk. E' tö ye' tkiwëwä eriwëkä tajë. Wëlepa tö icheke tö ttē e' dör Jesús ttē buaë, <sup>7</sup> erë e' kē dör es. Jesús ttē buaë mokī, e' dör etkëme. Pë' wëlepa de a' wökir a ká chökwa ttē kuä'kī

wa. Ie'pa tö Cristo ttē buaë, e' kī kuötkëkä. Es ie'pa tö ie' ttē buaë mokī e' shkuli'weke. <sup>8</sup> Erë ye' tö a' a' iché tö yi tö ttē kuä'kī pakeke a' a' Jesús ttéie, kē dör wës sa' tö a' a' ipaka' kuaë es, e' ta' as ese wák kichatër. Kë ye' tkine tö ye' wák alë tö ipakë ö Skököl biyöchökwa wële datse ká jai a, ese tö ttē kuä'kī pakë a' a, as esepa kichatër. <sup>9</sup> Ye' tö a' a' iskä chëne: Yi tö ttē kuä'kī pakë a' a' Jesús ttéie, kē dör ie' ttē buaë paka' sa' tö a' a' e', kē dör ttē klöo' a' tö kewe e', e' ta' as ese wák kichatër. <sup>10</sup> ¿Ima a' ibikeitsè? Ye' ttöke es, ¿e' wa ye' atak buaë Skököl ta' ö s'ditsö ta? Ye' mü atak buaë s'ditsö ta, e' ma ye' kē dör Cristo kanë méso mokī.

### Jesús ttē buaë, e' kē dē'bitü s'ditsö wä

<sup>11</sup> A yamipa, a' wa ijchenü tö Jesús ttē buaë pakekeyö, e' kē dē'bitü s'ditsö wä. <sup>12</sup> Ttē e' kē yëne yi wa ye' a, kē yi wa ye' wöblane iwa, e' skéie Jesucristo wák tö ikkayë' ye' a.

<sup>13</sup> Wës ye' bak senuk judiowak ttē dikjä, e' tssëule a' wä buaë. Ye' bak Skököl icha e'pa we'ikök siarë töiök kësik wa. Ye' éna ie'pa ewäkwä seraä. <sup>14</sup> Mik ye' bak judiowak ttē dikjä, eta ye' tö sa' yépa bak e' ser kos iuté buaë yësyésë, iwakpa bak kos ye' ta' e' këska', e'pa tajë tsatä. <sup>15-16</sup> Erë Skököl er buaë ché ye' a' tajë, e' kuëkj ie' tö ye' shükitbak iwäk a, kam ye' kur e' yökī. Ie' tö ye' klöo'bak kaneblok ie' a. Mik ie' éna ilä kkachak ye' a, eta ie' tö ye' a' ikkaché as ye' tö ilä ttē buaë e' pakö pé' kē dör judiowak esepa a. Mik ie' tö ilä kkaché ye' a, eta ye' kē dē' s'ditsö ska' e' yuök. <sup>17</sup> Nies ye' kē dē' Jerusalén, wëpa dör Jesús ttekölpa tsä ye' yökī kewe, e'pa ska' e' yuök ie'pa ttē wa. E' skéie bet ye' miä Arabia, e' ukuökī ta' ye' dene Damasco.

<sup>18</sup> Dwas de mañal, e' ukuökī ta' ye' miä Jerusalén Pedro, kē suule ye' wä, e' sauk. Erë kē ye' sene ie' ska' ká tajë, domingo bötö ë. <sup>19</sup> Nies Santiago dör Skökëpa Jesús ël, e' suéyö. Erë kē ye' wä Jesús ttekölpa tsä, e'pa malepa sune. <sup>20</sup> Mokī ye' tö a' a' iché Skököl wörki tö i' shtekeyö yëkkuö i' kī, e' dör mokī.

<sup>21</sup> E' ukuökī ta' ye' miä bánet Siria ena Cìlicia. <sup>22</sup> E' kéwö ska' ta' Cristo icha erule erule tso' Judea, e'pa wa ye' ttē jcher, erë ie'pa kē wä ye' suule. <sup>23</sup> Ie'pa tö ittsé: "Pablo bak se' we'ikök, ttē mik se' erblöke e' olo'yakwä ie' éna, erë i'ñe ta' ie' tso'ne ipakök." <sup>24</sup> E' kuëkj ie'pa tö Skököl kīkëkä tajë ye' kuëkj.

## 2

<sup>1</sup> Dwas de dabom eyök kī tkël (14), e' ukuökī ta' ye' skä miäne Bernabé ta' Jerusalén. Nies Tito miä ye' ta. <sup>2</sup> Skököl tö ye' a' ikkayë' tö ye' kawötä shkök Jerusalén ttök Skökëpa Jesús icha kos e'pa wökirpa ta, e' kuëkj ye' miä. Se' ulitane wä ie'pa suule tö ie'pa dör se' wökirpa. Mik ye' de Jerusalén, eta ttē buaë pakekeyö pé' kē dör judiowak

ešepa a, e' wa pakéneyö se' wökirpa ulitane e'pa ë a bánet isuojie tö iyéne ö ké iyéne. Ye' ké kǐ ikiane tö yi tö iché tö Jesús kané kōs o'bituyö, e' dör ë.

<sup>3</sup> Ie'pa tö iché tö tte pakekeyö, e' dör buaë yésyēsē, ké i ská kianeia. Tito mirwā ye' tā, e' dör griegowak, e' kuekǐ ie' tottola ké kkuölit tēule tsir wēs judiowak wöblar es. Erē ie'pa ké wā ie' káne itóttola kkuölit tōk tsir. <sup>4</sup> Erē pē' wēlepa tso' eē e' chō tö ie'pa dör Jesús mik erblōkwakpa, erē ké idör es. Ie'pa ké ichōpa tö Tito tottola kawōtā kkuölit tēe tsir, e'ma s'wōkirpa ké wā i yēne. Pē' ešepa tso' se' šuā se' wēblōk bēr tö wēs se' sēr buaē, tšē'r buaē Cristo Jesús ttē a. Ie'pa a tā ké idör buaē tö ké se' tö judiowak ttē dalōiēno e' iūtēia. Ie'pa kǐ ikiane tö se' klōrwāne ttē ñe' ulā a. <sup>5</sup> Sa' kǐ ikiane tö Jesús ttē buaē mokjē, e' ë klō'ū a' tö kekraē. E' kuekǐ sa' ké wā ie'pa ttē iūtēne yēs.

<sup>6</sup> Se' wōkirpa kiēsö skékēpa tajē, e'pa iché tö tte pakekeyö e' dör buaē. Ie'pa ké wā ikǐ kuōtkēne yēs. (Skékōl a tā se' ulitane dör ñies ēme, e' kuekǐ ē yō iché tö ie'pa dör kékēpa tajē ö ké idör es, e' ké kǐ ye' tkine.) <sup>7</sup> Ie'pa éna iane tö Skékōl tö kané me'at ye' ulā a Jesús ttē buaē pakōk, pē' ké dör judiowak, ešepa a, wēs ie' tö kané me'at Pedro ulā a ipakōk judiowak a es. <sup>8</sup> Skékōl tö Pedro patkē' Jesús ttē buaē pakōk judiowak a, e' ē tö ye' patkē' ipakōk pē' ké dör judiowak ešepa a. <sup>9</sup> Santiago ena Pedro ena Juan, e'pa suule se' ulitane wā tö ie'pa dör se' wōkirpa kibiie. Ie'pa éna iane tö Skékōl er buaē yē' ye' a kané i' wa. E' kuekǐ ie'pa ulā mé ye' a ena Bernabé a iwā kkachōie tö ie'pa tö sa' klō'wé ie'pa kǐie. Ie'pa éna iane tö Skékōl tö sa' patkē' Jesús ttē buaē pakōk pē' ké dör judiowak ešepa a, erē ie'pa patkē' itō ipakōk judiowak a. Es buaē idir ie'pa a. <sup>10</sup> Íyi etké kié ie'pa tö sa' a, e' dör tö s'yamipa siarēpa serke Jerusalén, ešepa kimé sa' tö. E' wawēkyö kekraē er bua' wa.

### *Pedro uñé Pablo tö Antioquía*

<sup>11-12</sup> Erē e' ukuōkǐ tā mik Pedro demi Antioquía sa' pakōk, etā kēwe ie' chkōke buaē Jesús mik erblōkwakpa ké dör judiowak, ešepa tā. Erē s'yamipa dör judiowak datse Jerusalén, patkē' Santiago tö, e'pa de. E'pa tö iklō'wé tö s'yamipa ké dör judiowak, ešepa kawōtā itóttola kkuölit tōk tsir. Ñies ie'pa tö iklō'wé tö ešepa kawōtā senuk wēs judiowak ser es. Pedro suane ie'pa yōkǐ, e' kuekǐ mik ie'pa de, etā ie' e' batséttsā wēpa ké dör judiowak, ešepa yōkǐ. Ie' ké chkōia ie'pa tā ñita. <sup>13</sup> Ñies judiowak malepa tö Pedro e' a ñe' es, e' wambléñak dö Bernabé. <sup>14</sup> E' kuekǐ, mik ye' isuē tö Pedro ké ku' iwā iūtōk yésyēsē wēs Jesús ttē buaē mokǐ tö iché es, etā ye' tö ie' a iché sulitane kukua: "Be' tso' e' ök. Be' dör judiowak, erē be' ké serku'

wēs judiowak ser es. ¿Iōk be' tö, pē' ké dör judiowak, ešepa keke senuk wēs judiowak ser es? <sup>15</sup> Se' bö! dör judiowak se' ditsēwō wa. Se' ké dör pē' sulusipa ké tö Skékōl dalōie ešepa. <sup>16</sup> Erē se' wā ijcher tö Skékōl ké tö se' klō'wēpa wēs pē' buaē yésyēsē es, Moisés ttē dalōiēno e' iūtēsō e' batamik. Se' wā ijcher tö se' erblé Jesucristo mik, e' kuekǐ ie' tö se' klō'wé wēs pē' buaē yésyēsē es. Ie' iché tö ie' ké tö se' klō'wēpa wēs pē' buaē yésyēsē es, ttē dalōiēno e' iūtēsō e' batamik. E' kuekǐ se' bö! erbléke Jesucristo mik as Skékōl tö se' klō'ū wēs pē' buaē yésyēsē es. E' ké dör tö Moisés ttē dalōiēno, e' iūtēsō buaē e' batamik." Es ye' tö iché Pedro a.

<sup>17</sup> E' ukuōkǐ tā ye' tö ie'pa ulitane a iché: "Se' erblōke Cristo mik, e' batamik Skékōl tö se' klōg' wēs pē' buaē yésyēsē es, e' wā paneke se' tö. Es se' ké erblōku'ia Moisés ttē dalōiēno e' mik. E' kuekǐ judiowak tö se' chēmi tö se' dör i sulu wamblōkwakpa wēs pē' ké dör judiowak es. E' kuekǐ ¿sō ichēmi tö Cristo tö se' ké i sulu wamblōk? Au, ké idör es. <sup>18</sup> Se' éna iane tö Skékōl ké tö se' tsatkepa ttē dalōiēno e' batamik. E' kuekǐ se' ké erblēneia ttē e' mik e' tsatkoie. Erē se' erblēne ttē dalōiēno e' mik e' tsatkoie, e' tā e' je' tö se' a ikkacheraē tö mokǐ se' dör i sulu wamblōkwakpa, se' ké a iwā iūtēnuk seraa e' kuekǐ. <sup>19</sup> Mik ye' bak erblōk Moisés ttē dalōiēno e' mik e' tsatkoie, etā ye' éna iane tö ye' ké a ttē e' iūtēnuk yésyēsē wēs s'kawōtā iūtōk es. E' kuekǐ ye' éna iane tö nu' tso' ye' kǐ, e' kǐ Skékōl tö ye' kichaterattsa. E' kuekǐ i'ñe tā ye' ké erblōia ttē dalōiēno e' mik e' tsatkoie. Ye' a tā e' dör wēs ye' du'wā ttē dalōiēno e' yōkǐ es. I'ñe tā ye' erblōke Cristo ē mik as ye' ser yésyēsē mú dö se' ulā a ttē dalōiēno e' iūtē wa, e'ma e' wā kiane chē tö Cristo kōtēwā éme, ké wā tā." Es ye' tö iché Jesús mik erblōkwakpa tso' Antioquía, e'pa a.

## 3

*Skékōl tö iWikōl mé se' a, se' erblō Jesucristo mik, e' batamik*

<sup>1</sup> ¡A Galacia wakpa, wēsua a' ké kǐbikēitsōtā! ¿Yi alibché a' kǐ, e' tö a' wōlīwēka tajē es? Jesucristo kōtēwā krus mik se' skéie, e' ttē wa sa' tö a' wōblaq' buaē yésyēsē, e' wā ane buaē a' éna kuaē. Etā ¿wēs ttē e' olo'yakne a' éna? <sup>2</sup> I' chakeke ye' tö a' a, e' iūtō: ¿I batamik Skékōl Wikōl dö' a' kǐ? ¿E' dör Moisés ttē dalōiēno e' iūtē a' tö

e' batamik? Au, kē idör es. Ie' dē' a' kī mik a' tō Jesucristo ttē buaē e' ttsē' t̄a' a' erblē' imik et̄a. <sup>3</sup> ¡A' kē k̄abikeitsōt̄a! Kuaē Skēkōl tō se' yuē ie' ala'rie iWikōl wa, erē ŷwes a' tō ibikeitsē j̄ñe t̄a' tō se' k̄awōt̄a Moisés ttē dalōiēno e' iūtōk se' w̄akpa dichē wa as se' at̄ buaē yēsýēsē ie' wōa? <sup>4</sup> Es idör, e' t̄a' ěme se' weine tajē Jesús ttē buaē kuek̄i. ¡Ayēcha, e' kē weinewa ěme! <sup>5</sup> Ye' tō isk̄a chakēne a' a: ŷSkēkōl tō iWikōl me' se' a, ñies i kē or yi a ese o'itō a' sh̄ua, e' dör Moisés ttē dalōiēno e' iūtēsō, e' batamik? Au, kē idör es. E' kos o' Skēkōl tō, se' tō Jesucristo ttē buaē e' ttsē' t̄a' se' erblē' imik e' kuek̄i.

*Abraham erblē Skēkōl mik, e' kuek̄i Skēkōl tō ie' klō' wē wes pē' buaē yēsýēsē es*

<sup>6</sup> Es ibak ñies sa' yē bak kiē Abraham e' t̄a. Skēkōl yēkkuō tō ichē: Abraham erblē Skēkōl mik, e' kuek̄i iklō' wēitō wes pē' buaē yēsýēsē es. <sup>7</sup> E' kuek̄i a' w̄a ijchenū tō wēpa erblō Skēkōl mik, esepa dör Abraham aleripa chōk. <sup>8</sup> K̄á iaiāē Skēkōl ibikeitsbak tō mik pē' kē dör judiowak, esepa erblē ie' mik, et̄a ie' tō ie'pa klō' weraē wes pē' buaē yēsýēsē es. E' kuek̄i tē buaē e' tso' kitule ie' yēkkuō kī wē ie' tō iyē' Abraham a' i' es: "Be' batamik ye' er buaē chōraē k̄á ulitane wakpa a." <sup>9</sup> Es se' isuē tō wēpa kos erblōke ie' mik wes Abraham es, esepa kos a ie' er buaē chōraē wes ie' er buaē yē' Abraham a' es. Esep̄a ē a' ie' er buaē chōraē.

<sup>10</sup> Skēkōl yēkkuō tō ichē i' es: "Wēpa kē tō i kos tso' kitule ttē dalōiēno yēkkuō kī e' w̄a dalōieku' yēsýēsē, esepa kos kichat- eraē Skēkōl tō."† Erē kē yi tō iw̄a iūtēpa es, e' kuek̄i se' w̄a ijcher tō wēpa erblē ttē dalōiēno mik e' tsatkoie, esepa kos kichat- eraēitō. <sup>11</sup> Ñies ie' yēkkuō tō ichē i' es: "Yi dör yēsýēsē ierblō Skēkōl mik e' batamik, ese serdaē."‡ Es se' w̄a ijcher tō kē yi tsatkēnuk Moisés ttē dalōiēno iūtē wa. <sup>12</sup> Ñies Skēkōl yēkkuō tō ichē i' es: "Yi tō ttē dalōiēno e' dalōiē yēsýēsē seraa, ese ser michoē ttē e' wa."§ Ttē e' tō se' a' ikkachē tō ttē dalōiēno, e' tō se' kē idalōiōk seraa. Erē se' erblō Cristo mik, e' kē dör es, e' kī erblē ē kiane ie' mik. E' kuek̄i ttē e' kē sh̄utunukka Moisés ttē dalōiēno e' wa, e' dör ttē kūa' kī e' kuek̄i.

<sup>13</sup> Skēkōl yēkkuō tō ichē: "Yi ttēw̄a kichatkēule kal mik, e' wa iwēnew̄a tō ese kichatētts̄a Skēkōl tō."\* Es Cristo kōtēw̄a krus mik, e' w̄a kiane chē tō ikichatētts̄a Skēkōl tō. Erē ikichatēnetts̄a se' skēie, Skēkōl ttē dalōiēno e' dalōsēwēwasō e' nuī kī. Es Cristo tō se' yē'tts̄a se' nuī ul̄a a. <sup>14</sup> Es ibak ie' t̄a' as Skēkōl kablē' er buaē chōk Abraham a, e' w̄a dō ñies pē' kē dör judiowak esepa ul̄a a Cristo Jesús batamik. E' dör tō Skēkōl

kablē' iWikōl muk se' a, se' erblō Cristo mik, e' batamik.

*Skēkōl er buaē chē se' a, e' kē dē' ttē dalōiēno e' batamik*

<sup>15</sup> A yamipa, se' a' t̄a' mik se' tō se' ttē mé ñi a, e' shtēsō yēkkuō kī t̄a' s'kiē shtēsō ikj, et̄a ttē e' kē maneorpattsane yēs, kē ikj kuōtkērpakaīa yēs. <sup>16</sup> Es i ŷk Skēkōl kablē' Abraham a ena ileri ekōl a, e' dör. Skēkōl yēkkuō tō Abraham ditsēwō ekōl ē e' cheke, kē dör seraa. Abraham ditsēwō chekeitō e' dör Cristo. <sup>17</sup> ¡ chōk ye' tso' e' dör i': Skēkōl tō ittē me'tke Abraham a t̄a' ikkachēitō īa tō mokj iwaweraēitō. E' ukuōk̄i t̄a' duas tka dōk̄a cien tkēyōk kī dabom mañayōk (430) t̄a' ie' tō ittē dalōiēno me' Moisés a as Israel aleripa tō idalōiō. E' wa isuēsō tō ttē mēne Abraham a, e' mēne īa kewe, ttē dalōiēno mēne Moisés a, e' yōk̄i. E' kuek̄i ttē dalōiēno mēne Moisés a, e' kē a i ŷk Skēkōl kablē' Abraham a, e' wōiutkw̄a. <sup>18</sup> ¡ ŷk Skēkōl kablē' se' a, e' w̄a dōpa se' ul̄a a, Moisés ttē dalōiēno e' iūtēsō e' batamik, e'ma e' kē dē'tts̄a se' a wes i kablēule es. Erē Skēkōl kablē' Abraham a imuk ěme.

<sup>19</sup> E' dör es, e' t̄a' ŷi kuek̄i Skēkōl tō ittē dalōiēno me' Israel aleripa a? Ie' kablē' Abraham a, e' ukuōk̄i t̄a' ittē dalōiēno méitō ie'pa a i sulu wamblekerakitō, e' w̄a kka- choie dō mik Abraham aleri ekōl yēne ie' a, e' de et̄a, e' dör Cristo. Ttē dalōiēno e' me' Skēkōl biyōchōkwakpa tō Israel aleripa a Moisés dör ittekōl e' wa. <sup>20</sup> Erē Skēkōl w̄ak kablē' Abraham a, e' kē dör ittekōl wele wa. E' kuek̄i se' w̄a ijcher tō ttē e' dör kibiie, ttē dalōiēno mēne Moisés a e' tsat̄a.

*ŷi kuek̄i Skēkōl tō ittē dalōiēno me' Israel aleripa a?*

<sup>21</sup> E' dör es, e' t̄a' ŷe' w̄a kiane chē tō ttē dalōiēno, e' kē ñi sini'kune Skēkōl kablē' Abraham a e' t̄a? ¡Au, kē idör es! Ttē dalōiēno tō sene michoē m̄upa se' a, e'ma se' dōmi buaē yēsýēsē Skēkōl wōrk̄i ttē ñe' dalōiēsō e' wa. <sup>22</sup> Erē e' kē dör es. Skēkōl yēkkuō tō ichē tō s'ditsō kos klōulew̄a sene sulu ul̄a a, kē se' a e' tsatkēnuk. E' dör es as Skēkōl kablē', e' w̄a dō se' ul̄a a, se' erblō Jesucristo mik e' wa.

<sup>23</sup> Kam Cristo dōbitū' tsat̄kōk se' erblō ie' mik e' wa, e' yōk̄i se' bak klōulew̄a ttē dalōiēno dik̄ia wes s'wōtēw̄a s'wōto wē a es. Erē se' kē a e' yēnukts̄a ttē e' dik̄ia dō mik Cristo dē'bitū' ikkachōk se' a tō s'k̄awōt̄a erblō ie' mik e' tsatkoie et̄a. <sup>24</sup> Ñies ichēmisō tō Skēkōl tō se' mēw̄a ttē dalōiēno dik̄ia s'kkō'noie dō mik Cristo de et̄a. E' dör wes al̄a yē tō yi yulē il̄a kkō'noie es. Skēkōl tō iwē es as ie' tō se' klō'ū wes pē' buaē yēsýēsē es, se' erblō Cristo mik e' wa. <sup>25</sup> ¡ñe t̄a' se' erblō Jesucristo ttē buaē e' mik, e' kuek̄i ttē dalōiēno kē ku' īa se' kkō' nuk

\* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 \* 3:13 Deuteronomio 21.23



wes alá kkò'nukwak es. <sup>26</sup> A' kòs dör Skèkòl ala'r, a' erblé Cristo Jesús mik e' wa. <sup>27</sup> A' wépa kòs wòsune iwà kkachioie tò a' erblé Cristo mik, esepa kì Cristo ser iène wes se' datsi' iò es. E' kuèkì a' serke buaé wes Cristo ser es. <sup>28</sup> Se' kòs batsulewà Cristo Jesús mik, e' kuèkì se' dör wes wák ekòl è es. E' kuèkì se' dör judiowak ò se' kè dör es, se' klòulewà kanè mésoie ò se' kè dör es, se' dör wèm ò se' dör alakòl, e' kè dè' wes Skèkòl a. <sup>29</sup> Se' dör Cristo icha, e' tã se' dör Abraham aleripa chòk. Nies i uk Skèkòl kablè' Abraham a' e' wà doraè se' ulà a.

## 4

### *Se' kè ku'ia Moisés ttè dalòieno e' dikia*

<sup>1-2</sup> Ye' tò ikleeke a' a ttè i' wa: Ichòsò tò pè' ekòl dör inukòl blu' tajè e' blènewà. Ie' íyi kòs méatitò ilà ulà a. Erè ie' alà iã tsirlala, kè a ikanegruk. E' kuèkì o'ka tso'ne ie' kkò'nuk, ie' wètsuk. Ie' kawòtã ie'pa ttè iutòk dō mik wèkkè iyè tò ikéwò me'at ekkè. Erè ie' dör iyè blènewà e' dali kòs e' wák, erè kam ikéwò dō e' yòkì ie' dör wes s'klòulewà kanè mésoie tso' iu a es. Erè mik iyè blènewà e' tò ikéwò me'at e' deka, etã iyè dali kòs doraè iulà a. <sup>3</sup> E' sù sa' judiowak bak wes alala ñe' es. Kam Skèkòl tò ilà patkò e' yòkì sa' bakia klòulewà ttè èse tso' ká i' a ese dikia idalòioek. <sup>4</sup> Erè mik kawò bikeitsitò e' de, etã ie' tò ilà patké ká i' kì, e' kune' s'ditsòie sene' Moisés ttè dalòieno e' dikia. <sup>5</sup> Ilà debitù sa' bak klòulewà ttè e' ulà a, e'pa yòktsã as sa' dō Skèkòl ala'rie. <sup>6</sup> A' erblé Cristo mik, e' kuèkì a' dör Skèkòl ala'r ñies wes sa' es. E' kuèkì ie' tò ilà Wikòl patké senuk se' er a, e' wa se' kkòchòke buaé Skèkòl ska', ie' wa se' tò icheke buaé Skèkòl a: "¡A yéwòla!" <sup>7</sup> Es se' kè ku'ia wes s'klòulewà kanè mésoie es. E' skéie se' detke Skèkòl ala'rie, e' kuèkì i kòs tso' ie' wà e' dör se' icha ñies.

<sup>8</sup> Kenet tã a' kè e' batsòtã' ie' mik, e' kéwò ska' tã a' bak klòulewà skèkòlpa dalòioek a' bak esepa ulà a. Nermata ie'pa kè dör Skèkòl ichòkle e'. <sup>9</sup> Erè i'ñe tã a' båtse buaé Skèkòl chòk e' mik —ò ichèmisò bua'ie tò ie' båtse buaé a' mik— ¿wes i'ñe tã a' e' maktsane ttè èse kòs e' ane? Ttè èkkèpa kè a se' tsatkenuk. Ttè e' kè dör iie bua' se' a. Kè se' senukne ttè ese dikia. <sup>10</sup> Judiowak tò idiwò tkò'wèke, isi'wò tkò'wèke, ikéwò tkò'wèke ñies iduéswo tkò'wèke. ¿Iòk se' tò e' wakanewèke es? <sup>11</sup> Ye' suane dō' kanè kòs wéyò a' shuã, e' weirwa è.

*Kenet tã Galacia wakpa tò Pablo kiéwa buaé*

<sup>12</sup> A yamipa, ye' dör judiowak erè ye' kè serku'ia judiowak ttè dikia. ¿Wes i'ñe tã a' e' tiakwã ttè e' dikia? E' kè war a' tò es. Ye' kkòchò a' a tò a' senuk wes ye' es. Mik ye' bak a' ska' kuaè, etã a' kè wã i sulu wamblène ye'

tã. <sup>13</sup> Mik ye' tò Jesús ttè buaé tsá paka' a' a, etã ye' kirirke tajè, e' kuèkì ye' e' tséat a' ska'. <sup>14</sup> Ye' kirirke, e' dör darèrèè a' a, erè e' kuèkì a' kè wã ye' watènettsã. E' skéie a' tò ye' sué buaé wes Skèkòl biyòchòkwak sué es. A' tò ye' kiéwã buaé wes Cristo Jesús kiéwã a' tò es. <sup>15</sup> A' ttsè'ne buaé ye' tã kuaè, ¿wes e' de i'ñe tã? Ye' ichè tò a' wák wòbla mú yèrttsã a' a tkéwã ye' icha skéie, e'ma a' tò iò' es. Es a' kíkékayò. <sup>16</sup> Erè i'ñe tã wésua a' ye' sué a' bolòkie, ttè mokì chéyò a' a e' è kuèkì.

<sup>17</sup> Pè' tso' a' wòbla'uk judiowak ttè wa, e'pa tò ichè tò ie'pa kì a' kiar tajè, erè e' kè dör er bua' wa. Ie'pa kì kiane tò a' tò sa' watòttsã ta es a' mi' ie'pa è ttè iutòk. <sup>18</sup> Ie'pa tò a' saúpa, a' kímúpa er bua' wa mik ye' tso' a' tã ò ye' kè ku' a' tã, e'ma buaé idir ye' a. Erè ie'pa tso' a' wòbla'uk ttè kè dör mokì ese wa. E' kuèkì ye' yòkì isulune. <sup>19</sup> A ye' ala'r, ye' skà weirke tajè a' dalèrmik wes alakòl alà kurke weir es dō mik a' de senuk wes Cristo ser es etã. <sup>20</sup> I' tã ye' mú dō a' ska' tòk bua'ie a' tã as a' isaù tò a' dalèr tajè ye' éna. I wambleke a' tò es, e' tò ye' tkiwéwã suawé tajè.

### *Agar ena Sara, e' pakè*

<sup>21</sup> A' wèlepa senak judiowak ttè dikia, erè i tso' kitule Moisés yèkkuò kì, ¿e' jcher a' wã? <sup>22</sup> E' tò ichè tò Abraham ala'r bòl. Ekòl kune' alakòl kiè Agar, e' tã. E' kiè Ismael. Agar dör Abraham alakòl kiè Sara e' kanè méso toulettsã ese. Ièkòl kune Sara tã. E' kiè Isaac. Sara kè dör yi kanè méso. <sup>23</sup> Kanè méso ñe' alà kune' wes se' èsepa kur es. Erè Sara kè dōtã alàè, e' alà kune' mik idetke kèkèpalatke etã, wes Skèkòl kablè' Abraham a es. <sup>24-25</sup> E' tò ilè kleeke se' a. Alakòlpa bòl ñe' tò ttè mène bót e' wà chè. Agar bak kanè méso e' tò ttè dalòieno mène Israel aleripa a Sinai kèbata atè Arabia, e' wà chè. E' wà dör tò Israel aleripa erblé ttè dalòieno e' mik e' tsatkoie. E' dör wes ie'pa tso' klòulewà ttè e' dikia wes kanè méso tso' klòulewà iwòkir ulà a es. E' kuèkì wépa kòs tso' klòulewà ttè dalòieno e' ulà a, esepa dör wes Agar ala'r es. Nies Sinai kèbata, e' tò Jerusalén tso' ká i' kì i'ñe tã e' wà chè. Eè judiowak serke. Ie'pa tso' klòulewà Moisés ttè dalòieno dikia wes kanè méso es. <sup>26</sup> Erè Sara alà kune' e' tò ttè mène Abraham a, e' wà chè. Se' kè ku' klòulewà Moisés ttè dikia, e' kuèkì se' dör wes Sara alà es. Se' dör Jerusalén èt tso' ká jai a e' wakpa. <sup>27</sup> E' dör wes itso' kitule Skèkòl yèkkuò kì es, e' tò ichè i' es:

A alakòl, be' kè dōtã alàè,  
is alala kur, e' kì alakòlpa weir, e' kè ttsèule  
be' wa.

Erè be' doraè alàè tajè  
tkòkã alakòl dōtã alàè e' tsatã.  
E' kuèkì be' ttsè'nú buaé.

Be' anù tajè ttsè'ne bua' wa.\*

\* 4:27 Isaias 54.1,2

Es Skéköl yékkuò tò ichè.

<sup>28</sup> A yamipa, se' dör wës Isaac es. Isaac kune' wës Skéköl kablè' Abraham a es. Es ñies se' erblé Cristo mik, esepa de Skéköl ala'rie wës ie' kablè' es. <sup>29</sup> Agar alá kune' wës s'ditsò kur es, eré Isaac kune' Skéköl Wikòl batamik. E' kèwò ska' tã Agar alá tò Isaac we'ik tajè. E' sù i'ñe tã wëpa tso' klöulewã Moisés ttè dikĩa, esepa tso' se' dör Skéköl ala'r, esepa we'ikòk. <sup>30</sup> Eré Skéköl yékkuò tò ichè i' es: "Iyè iyi tso' mè alakòl kè dör kanè méso, e' alá a, e' kè kawò tã' blate alakòl dör kanè méso e' alá a. E' kuekĩ iyuòshkar alàè."<sup>†</sup> <sup>31</sup> E' kuekĩ, a yamipa, se' kè dör wës alakòl dör kanè méso e' ala'r es. Se' dör wës alakòl kè dör kanè méso, e' ala'r es.

## 5

### *Se'yènettsã ttè dalöièno dikĩa*

<sup>1</sup> Cristo tò se' yè'ttsã Moisés ttè dalöièno e' yòkĩ as se' kè ku'ia klöulewã ttè e' ulã a. E' kuekĩ se' e' tkòwã darèrè erblòk Cristo è mik. Kè se' e' tiukwane ttè dalöièno dikĩa wës s'klöulewã kanè mésoie es.

<sup>2</sup> A' tò ye' ttò tssò. Ye' dör Pablo. Ye' wák tò ichè a' a' tò a' wëpa e' mettsã itóttola kkuòlit tòk tsir wës judiowak wöblar es e' tsatkoie, e' tã Cristo kè tò a' kimepa yés. <sup>3</sup> Ye' tò iská chène wëpa ulitane e' mettsã itóttola kkuòlit tòk tsir, esepa a' tò ie'pa kawòtã Moisés ttè dalöièno e' wã dalöiòk seraa. <sup>4</sup> A' ulitane éna ttè dalöièno, e' iutak as a' dõ yésyèsè Skéköl wã, esepa kos e' batsëttsã bánet Cristo yòkĩ. Es Skéköl er buaè ché se' a' Cristo batamik, e' watëttsã ie'pa tò seraa. <sup>5</sup> Eré se' erblòke Cristo mik, esepa wa ijcher Skéköl Wikòl wa tò ie' tò se' klò'weraè wës pè' buaè yésyèsè es, se' erblé Cristo mik, e' batamik. E' wã panekesò tssè'ne bua' wa. <sup>6</sup> Se' batsulewã Cristo Jesús mik, e' tã yi tottola kkuòlit tëule tsir ò kè itèule e' kè ska' Skéköl tkine. Se' erblò Cristo è mik, e' tò se' kè ñi dalèritsòk, e' dör ibua'ie.

<sup>7</sup> Kuaè tã a' mir buaè. ¿Yi tò a' wöklò'wé as a' kè tò ttè mokĩ iutò? <sup>8</sup> E' kè dör Skéköl tò se' klöo'bak iwák a' e'. <sup>9</sup> A' tajè e'pa sulu'wërawã ttè suluè elkela è tò wës pan wölöwòkã elkela ttè harinachka kos wölöwëkeka es. <sup>10</sup> Eré ye' erblòke Skékëpa Jesús mik tò a' kè mi'pa ttè sulu e' itòkĩ. Wë tso' a' tsiriuk ttè ese wa, e' we'ikera Skéköl tò. Kè kĩ ie' tkine tò yi idir.

<sup>11</sup> Eré a yamipa, ye' mú tso'ia ipakòk tò wëpa kawòtã itóttola kkuòlit tòk tsir, e'ma ¿i kuekĩ judiowak tò ye' we'ikekeia tajè? Ye' tò ttè e' pakópaia, e'ma ie'pa kè ulurku' ye' kĩ mik ipakekeyò tò Cristo kòtewã krus mik se' skéie eta. <sup>12</sup> Eré wëpa tso' a' wòkir a kã

chöukwa ttè ese wa, jesepa mú e' biòttsaie i' tã!

### *Ñi dalèritsè*

<sup>13</sup> A yamipa, Skéköl tò se' klöo'bak as se' kè seriã ttè dalöièno dikĩa. Eré e' kè dör i sulu wamblöie wës s'wák dër sulu kĩ ikiane es. E' skéie se' ñi kimù, ñi dalèritsè kuekĩ. <sup>14</sup> Moisés ttè dalöièno kos e' wöiènewã ttè etkè a, e' tò ichè: "A' malepa dalèritsò wës a' wákpa e' dalèr es."<sup>\*</sup> <sup>15</sup> A' e' kkò'nú. A' ñi saukeia suluè, a' ñippòkeia tajè wës iyiwak sulusi es, e' tã a' wákpa è ñi eurawa.

### *Sene Wikòl Batsè'r wa*

<sup>16</sup> Es ye' tò a' a' ichè tò se' senù Skéköl Wikòl wa. Se' serke es, e' tã i sulu kiane s'wák dër sulu e' kĩ wamblè, ese kè wamblepasò. <sup>17</sup> I kiar s'wák dër sulu e' kĩ, ese kè kiar Skéköl Wikòl kĩ. Ñies i kiar Skéköl Wikòl kĩ, ese kè kiar s'wák dër suluè e' kĩ. S'wák dër suluè ena Skéköl Wikòl e'pa ñi wöklò'uke, e' kuekĩ i kiar se' kĩ wës ese kè or se' a. <sup>18</sup> Eré Skéköl Wikòl tò se' wëttsëke, e' tã se' kè ku'ia ttè dalöièno dikĩa.

<sup>19</sup> Wëpa tso' iwák dër sulu e' iutòk, e' wërwa wòshak. Esepa trèr ena e' ia'uke sene sulusi wa. Iyi sulu ese skã kakuetewarakitò darèrèè. <sup>20</sup> Ie'pa tò iyi diòkòl dalöieke. Ie'pa dör alibchòkwakpa. Ie'pa ñi saù suluè, ñi wònatkò ñie, ñippò tajè, ukyer ñi kĩ. Ie'pa ulurkã bet. Ie'pa e' tssòkã imalepa tsata. Ie'pa dör s'blabatsòkwakpa. Wëpa e' batsòke ie'pa mik, e'pa è tã ie'pa ser buaè. <sup>21</sup> Ie'pa kè wòbatsò tò i kiane ie'pa kĩ, ese tso' s'malepa wa. Ie'pa e' ttòke blo' wa, e' kuekĩ i sulu kĩ wamblekerakitò tajè. E' sù iyi skã suluè wambleke ie'pa tò. Ye' tò a' a' ichekene wës ye' tò iyè'bak es tò wëpa serke es, esepa kè dõpa i blúie Skéköl tso' e' a.

<sup>22</sup> Eré mik se' serke Skéköl Wikòl wa, eta se' ñi dalèritsòke, se' tssè'rke buaè, se' serke bèrè, i kos dalè'ttsekèsò er bua' wa, se' ñi saù er bua' wa, se' er buaè chò s'malepa a, se' ttò mokĩ, <sup>23</sup> kè se' e' tssòkã tajè, se' e' kkò'nú buaè. Se' serke es, e' tã ttè dalöièno kos, e' kè dalòseonewã se' wa. <sup>24</sup> Se' wák dër suluè, ñies i kos suluè wamblak se' éna, ese kos watëttsã se' dör Cristo Jesús icha e'pa tò. E' dör wës se' tò ese kos ttèwã wõtèulewã krus mik es.

<sup>25</sup> Se' serke Skéköl Wikòl mik, e' kuekĩ se' e' mù as ie' tò se' wëttsù. <sup>26</sup> Kè se' e' tssòkã tajè, kè se' ñi tsiriuk, kè se' ukyènuk ñi kĩ.

## 6

### *Se'kawòtã ñi kimuk*

<sup>1</sup> A yamipa, a' wele anemine i sulu wamblè a, e' tã a' serke Wikòl Batsè'r wa, esepa kè ie' kimuk er bua' wa as ie' e' kòkane. Eré a' e' kkò'nú dõ' i sulu tò a' erkiowè tã

† 4:30 Génesis 21.10

\* 5:14 Levítico 19.18

a' armi ì sulu wamblè a wës ie' es. <sup>2</sup> A' welepa kawõ tkõke suluë, e' ta' a' ñi kímú. A' tó iwé es, e' ta' a' serke wës Cristo ttè dalöiëno tò ichè es. <sup>3</sup> A' wele e' bikeitsõ tò buaë idir imalepa tsatá, ñermata kè dör ì, e' ta' ie' kítõ'uke.

<sup>4-5</sup> Is se' ser buaë ö suluë ese wërke se' wõkì eköl eköl. E' kuëkì se' ulitane ké e' sauk tò is se' ser, e' wa se' e' kkõ'nù. Se' serke buaë yësyësë, e' ta' se' ttsë'rdaë buaë se' wák a. Erë kè se' kàne e' kkõ'nuk wës s'malepa serke es.

<sup>6</sup> Ì buaë kos tso' a' wá ese kalmú wépa tò a' wöbla'weke Skéköl ttè wa esepa a.

<sup>7</sup> Kè se' e' kítõ'uk tò se' a' Skéköl wayörmi kè nuí ta'. Ì kuantkésõ buaë ö suluë, e' wá wöwëranesõ. <sup>8</sup> Ì sulu kiane s'wák dër suluë e' kì wamblè, ese wamblésõ, e' ta' e' wá dörane s'kì ta' se' weir michoë. Erë ì buaë kiane Skéköl Wiköl kì wè ese wésõ, e' ta' e' wá dörane s'kì ta' sene michoë döraë se' ulá a.

<sup>9</sup> Ì buaë wekesõ kekraë, kè ilo'yeta', e' ta' aishkuõ ta' mik ikéwõ de, etá iské döraë se' ulá a. E' kuëkì kè se' shtrinuk ì buaë uk kekraë. <sup>10</sup> E' kuëkì mik se' a' ì buaë ormi, etá iüsõ sulitane a, bua'iewá s'yamipa erblöke Cristo mik, esepa a.

*Pablo e' chéat*

<sup>11</sup> Ttè bata i' shtök ye' tso' ye' wák ulá wa. A' isaü tò ikité bérie, es a' wá ijchermi tò mokì ye' tso' ishtök. <sup>12</sup> Wépa tò a' keke a' wépa tottola kkuölit tók tsir, e'pa tò iwéke es as ie'pa at buaë judiowak malepa ta. Ie'pa tò ichõpa tò se' tsatkërke, Cristo kõtëwá krus mik se' skéie, e' batamik, e'ma judiowak tò ie'pa we'ikera siarë. <sup>13</sup> Erë ie'pa wákpa tottola kkuölit tëule, e'pa kè tò Moisés ttè dalöiëno e' iütè sëraa. Ie'pa tò a' keke a' tottola kkuölit tók tsir e' ttsoká iwákpa a tò ie'pa tò a' ké e' wakyuök wës judiowak es. <sup>14</sup> Erë ye' i', e' kè e' ttsõpaka ì ulitane kì. Skékëpa Jesucristo kõtëwá krus mik, e' ë kikekekayõ. E' batamik ì sulu kos tso' ká i' a' ese dunewabak ye' a, ñies ese a ye' dunewabak. <sup>15</sup> S'tottola kkuölit tëule tsir ö kè tëule, e' kè kì Skéköl tkine. Ie' tò se' er mane'wé pa'alì i'Wiköl wa, e' ë kiar ie' kì. <sup>16</sup> Wépa kos serke wës ttè i' tò ichè es, as esepa a' ie' tò sene bërè mü ena isaü er siarë wa. Esepa dör ie' ala'r chök, esepa dör Israel aleripa chök ie' a.

<sup>17</sup> Ye' weine kos Jesús ttè kuëkì, e' tò tso' ye' wá ye' chká kì. E' wa ye' tò iwá kkacheke tò ye' dör ie' kanè méso mokì. E' kuëkì i'tami kè yi tò ye' tsiriwariá ttè e' kì.

<sup>18</sup> A' yamipa, as Skékëpa Jesucristo er buaë chõ a' ulitane a. Es e' idir.

## Yëkkuö kit Pablo tö Éfeso wakpa a Efesios

Pablo tö yëkkuö i' kit mik ie' bak Roma wötëulewä s'wöto wé a Jesús tté buaé paké kuekji e' ta. Ì bak ie' ta e' tso' kitule yëkkuö Hechos 28.17-31 e' kji. Pablo tö yëkkuö i' kit Jesús mik erblök wakpa tso' Éfeso ena ipamik e'pa a. E' kéwö ska' ta Éfeso dör ká bua'ie ena eé tajé u tso' i dalóieke ie'pa tö Skéköl skéie e' dalóioie. E' bua'ie dör ie'pa kéköl eköl kié Artemisia e' dalóioie (Hechos 19.23-31). Mik Pablo shka' Jesús tté buaé pakök, etä ie' dë'mi Éfeso (Hechos 18.18-21). Eré eé ie' sené bërbër é ta iminea. E' ukuökj ta iská mineane ta isené eé duas mañal Skéköl tté kkachök. E' tso' kitule Hechos 19 kji.

Jesús mik erblök wakpa kë wä kabene ku' tajé. E' kuekji Pablo kë wä i kite tajé e' kji. E' skéie i buaé tsäkjé o' Skéköl tö se' a, ier buaé yé' siä e' batamik, e' kji ie' tö ikit kibiie. Ie' tö iché tö e' kuekji se' kawöta senuk Skéköl kjkokaie. E' kit ie' tö yëkkuö i' kji.

Jesucristo wa Skéköl tö se' ulitane tsätké' Israel aleripa ena pë' ulitane, ñies e'pa er bua'wëitö ñi kji.

### Shke'wé

<sup>1</sup> Ye' dör Pablo. Skéköl wák er wa ye' dör Jesús ttekölpä tsá, e'pa eköl. Ye' tso' yëkkuö i' shtök s'batse'rpa e' tkëulewä darërë Cristo Jesús mik serke Éfeso, e'pa a. <sup>2</sup> Skéköl dör S'yé ena Skéképa Jesucristo as e'pa er buaé chö ena sene bëré mü a a.

### Skéköl tö se' tsätké Jesucristo batamik

<sup>3</sup> Skéköl dör Skéképa Jesucristo yé, e' kjkökäsö tajé. Se' batsulewä Cristo mik, e' kuekji Skéköl er buaé ché se' a i kós buaé tso' ie' wä ká jai a e' wa. <sup>4</sup> Kam ie' tö ká i' yuö, e' yökj se' shukitbakitö as se' dö batse'r, kë kji i sulu ta' yés ie' wöa, se' batsulewä Cristo mik e' batamik. Ie' éna se' dalér tajé, <sup>5</sup> e' kuekji ie' tö ibikeitsbak tö se' tseratkoitö ila'rie Jesucristo batamik, e' kiane ie' wák kji, ñies e' tö ie' tssé'weke buaé. <sup>6</sup> Ie' tö iwé es as se' tö ie' kjkökä michöe ie' er buaé ché se' a tajé shütë e' kuekji. E' kós wé ie' tö ilä dalér tajé ie' éna, e' batamik. <sup>7-8</sup> Cristo kótewä se' skéie, ie' pë tène, e' wa se' yénettsä sene sulu ulä a ena se' nuö olo'yé Skéköl tö se' kji. E' wa se' isué tö ie' er buaé ché tajé shütë se' a. Ñies ie' tö erbike buaé mé se' a as i weke ie' tö e' wä ar se' a. <sup>9</sup> I bikeitsbak ie' tö wé, e' wawëitö i' o' Cristo tö e' batamik. Kuaé ta iblë'wäitö sulitane yökj, eré iwä kkachéitö se' a. <sup>10</sup> Ie' ibikeitsbak tö mik ikéwö de, etä ie' tö Cristo tkerakä iyi ulitane tso' ká jai a ena ká i' a e' wökirie.

<sup>11</sup> I kós weke Skéköl tö, e' weke ie' tö iwák er wa wes ie' kji ikiane es, wes ie' tö ibikeit-seke es. Es sa' dör judiowak e'pa shukitbak ie' tö as sa' dö ie' ichaie, sa' batsulewä Cristo mik e' batamik wes ie' tö ibikeitsbak es. <sup>12</sup> Ie' tö iwé es as sa' erblë' kéwe Cristo mik e'pa tö ie' olo tajé e' kjkökä. <sup>13</sup> Es a' ñies, mik a' tö s'tsätké tté buaé mokj e' tssé ta a' erblë imik, etä a' batsewä Cristo mik ena Wiköl Batse'r muk ikablë' e' méitö a' a iwä kkachöie tö a' dör ie' icha. <sup>14</sup> Wiköl Batse'r tso' se' a, e' dör iwä kkachöie tö i kós yé' Skéköl tö tö imeke, se' dör ie' icha, e'pa a aishkuö ta, e' meraëitö se' a. E' kuekji se' wä ijcher tö ie' tö se' tsätkeräe da'a. E' kuekji ie' olo ta' tajé, e' kjkökäsö.

### Pablo tté Skéköl ta Éfeso wakpa kji

<sup>15</sup> E' kuekji, mik ye' tö a' tté tssé tö a' erblöke mokjé Skéképa Jesús mik, ñies mik ye' ittsé tö s'batse'r malepa kós daléritekse a' tö tajé, <sup>16</sup> e' tami wëstela yé'miyö Skéköl a a dalérmik kekraé mik ye' ttöke ie' ta eta. <sup>17</sup> Ie' dör Skéképa Jesucristo e' Kéköl. Ie' dör S'yé olo ta' tajé e'. Ie' a ye' tso'ie ikiök tö ie' tö a kímé iWiköl wa as ie' iyi wä ar buaé a' éna, ñies as a' wä ijcher bua'iewä tö yi dör ie'. <sup>18</sup> Ie' tö se' klöo' ikablë' se' a e' wä panuk kröröe. E' tso' ie' wä më se' dör ie' icha batse'rpa esepa a. Ye' tso'ie ie' a ikiök tö a' er ñi'üitö as kós kablë ñe' bua' dör ena olo dör e' wä ar a' éna. <sup>19</sup> Ie' diché ta' tajé iyi ulitane tsäta. I kós ormi ie' a. Diché e' wa ie' tso' se' erblöke Cristo mik, e'pa kímuk. Ye' tso'ie ikiök ie' a tö a' er ñi'üitö as e' kós wä ar bua'ie a' éna. Diché e' dör tajé shütë, <sup>20</sup> e' wa Cristo kótewä, e' shkeo'kane ie' tö. Diché e' wa ie' tö Cristo tkékä ká jai a iulä bua'kka iyi ulitane wökirie. <sup>21</sup> Eé Cristo tkerä diché ta' tajé iyi wökir, iyi wák, iyi kéköl wä diché ta', ese kós tsäta. Ie' tkënekä iyi ulitane tsäta. Ie' dör i kós tso' i' ñe ta' ena aishkuö ta e' tsäta. <sup>22</sup> Skéköl tö i kós méwä ie' klö dikjä. Ñies ie' tö iméka se' dör ie' icha e'pa kós wökirie. <sup>23</sup> Se' dör wes Cristo wák chkä es, ta ie' dör wes s'wökir es. Ie' tö se' wëttseke i kós kiane ie' kji wé ká i' kji, e' uk. Ie' tso' ká wa'ñie, kë i a ie' wöklönuk.

## 2

### Skéköl er buaé ché se' a se' tsätkoie

<sup>1</sup> Kam a' erblö Cristo mik, e' yökj a' bak e' wamblök sulué, e' kuekji a' bak wes s'duulewä es Skéköl a. <sup>2</sup> E' kéwö ska' ta a' bak senuk sulué wes wépa kë tö Skéköl dalóie esepa ser es. Wimblu sulusi dör i sulu kós tso' ká i' a e' wökir e' ttö iütök a' bak. Ie' tso' Skéköl tté dalöseukwä wakpa esepa wörieikök. <sup>3</sup> Se' kós bak senuk wes ie'pa es. I sulu kós kiane s'wák dër sulué e' kji wamblë, ese wamblök se' bak. Se' erbike sulu, e' é wä wamblök se' bak s'wák tssé'woie buaé. Se' bak wömeulettsä weinuk Skéköl ulä a wës pë'

malepa es. <sup>4-5</sup> Se' bak duulewə se' nuŋ kɪ, erë Skëköl tō se' suë er siarë wa tajë. Ie' tō se' dalëritsé tajë. E' kuëkɪ ie' tō sene michoë mé se' a. E' dör wës ie' tō se' shkë'wëkane Cristo tã es. Ie' er buaë ché se' a tajë, e' kuëkɪ se' tsatkëne. <sup>6</sup> Se' batsulewə Cristo Jesús mik, e' kuëkɪ e' dör wës Skëköl tō se' shkë'wëkane Cristo tã ñita es. Ñies ie' tō se' tkëkə Cristo tã ñita ká jai a. <sup>7</sup> E' kōs wé ie' tō es iwā kkachoië aishkuō tã tō kōs ie' er buaë ché se' a ì wé Cristo Jesús tō se' dalërmik e' batamik. E' dör tajë shütë kē wōet tã' ekkë. <sup>8-9</sup> Skëköl er buaë ché a' a, e' batamik a' tsatkëne, a' erblöke Jesucristo mik e' kuëkɪ. E' kē dör i buaë wé a' tō ie' wörkɪ ese skéie. Ie' tō a' a imé éme wës iyi kakkmé es. Ie' tō iwé es as kē yi e' ttsōkə tō ie' tsatkëne i buaë wéitō ese batamik. <sup>10</sup> Ie' tō se' er mane'wé pa' ali se' batsulewə Cristo Jesús mik e' batamik. Ie' tō iwé es as se' tō i buaë kōs ese ù. E' kōs bikeitsbakitō as se' ser wës ie' kɪ ikiane es.

*Judiowak ena wépa kē dör es, esepa de wës wák eköl ë es Cristo batamik*

<sup>11</sup> A' wépa kē dör judiowak, kē a' éna ichōkwa tō wës a' bak kam a' erblō Cristo mik e' yōkɪ. Judiowak wépa kōs esepa tottola kkuölit tēule tsir iwā kkachoië tō ie'pa dör Skëköl icha. Pë' kē dör judiowak, esepa kië ie'pa tō tottola kkuölit kē tēule ese wakpa. Es ie'pa tō a' cheke suluë. Ie'pa a' a' dör ñā. <sup>12</sup> A' éna ianū tō a' bak e' butsulettšə bānet Cristo yōkɪ. A' kē bak Israel aleripa šuə. Ì uk Skëköl kablë' ie'pa a' ena tte mēne ie'pa a' tsakjé e' šuə a' kē bak. A' bak senuk ká i' a Skëköl chōk kē tã', kē a' i panetã'. <sup>13</sup> Erë j'ñe tã' a' batsulewə Jesucristo mik. E' kuëkɪ a' dewə Skëköl ska' buaë, Cristo Jesús kōtəwə a' skéie, ie' pë tēne a' tsatkoie, e' batamik.

<sup>14</sup> Cristo tō judiowak ena pë' kē dör judiowak, esepa er bua'wé ñi kɪ. Se' bak ñi bolōkpaie, erë Cristo tō se' er bua'wé ñi kɪ. Ie' tō se' wōiëwə ká etkë wakpaie. Ì tō se' wé ñi bolōkpaie ese shulé ie' tō ikōtəwə krus mik se' skéie e' wa. <sup>15</sup> Tte me'atbak Skëköl tō judiowak a' daloiëno, e' tō se' me'ka ñi bolōkpaie. Erë Cristo kōtəwə se' skéie e' kuëkɪ tte e' kōs kē diché tã'ia. Skëköl tō iwé es as sa' dör judiowak ena a' kē dör judiowak, e'pa dō ñi yampiaie batsulewə Cristo mik wës wák eköl ë es. Es ie' tō se' er bua'wé ñi kɪ. <sup>16</sup> Ì tō se' wé ñi bolōkpaie, ese shulé Cristo tō. Ie' kōtəwə krus mik se' skéie, e' wa ie' tō Skëköl er bua'wé judiowak kɪ ena pë' kē dör judiowak esepa kɪ. Es se' de wës wák eköl ë es Skëköl a. <sup>17</sup> Sene bërë Skëköl tã, e' tte buaë pakōk Cristo de, pë' kē dör judiowak e' butsulettšə bānet Skëköl yōkɪ, esepa a, ñies judiowak kē e' butsulettšə bānet esepa a. <sup>18</sup> Cristo batamik se' kōs dōwami buaë S'yë ska', iWiköl dör eköl ë, e' wa. <sup>19</sup> E' kuëkɪ j'ñe tã' a' kē dör wës ká kuə'kɪ

wakpa es. A' de s'batse'rpa kjië. Ñies a' de Skëköl ala'rie. <sup>20</sup> Se' dör wës u es. Jesús ttekölpa tsá ena Skëköl ttekölpa, e'pa dör wës u kukulëwō es. Jesucristo wák dör wës u chki es. <sup>21</sup> Cristo dör u wöklō'ukwak. Se' kōs dör u e' yese alë. Cristo batamik u e' yörmir dō ide u etkue batse'r Skëkëpa a' ekkë. <sup>22</sup> Se' batsulewə Cristo mik, ñies se' batsulewə ñi mik, es se' kōs dō wës Skëköl wé es, e' a Skëköl serke iWiköl wa.

### 3

*Pablo klōne Cristo tte pakōk pë' kē dör judiowak esepa a*

<sup>1</sup> Ye' wák tso' wötëulewə s'wōto wé a' Cristo Jesús tte pakë kuëkɪ a' kē dör judiowak esepa kimoie. Skëköl er buaë ché a' a tajë, e' kuëkɪ ie' a' ye' tso' ikiök a' kɪ. <sup>2</sup> Ye' wə ijcher tō a' wə ittšule tō Skëköl er buaë ché ye' a, e' kuëkɪ ie' tō kanë i' me' ye' a' Jesús tte pakōk a' kē dör judiowak esepa a. <sup>3</sup> Ibikeitsbak Skëköl tō wé, e' blë'waitō erë iwā kkeyë'itō ye' a. E' wə shtétke ye' tō a' a' yëkkuō i' kɪ bōt mañat. <sup>4</sup> Yëkkuō i' suë a' tō, etə a' éna iwā armi tō Cristo tte blëulewə se' yōkɪ kuaë, e' wə ane ye' éna buaë. <sup>5</sup> Ibikeitsbak Skëköl tō wé Cristo batamik, e' blëulewə kuaë. Erë j'ñe tã' ie' tō iwā kkaché iWiköl wa sa' dör Cristo ttekölpa tsá e'pa a, ñies Skëköl ttekölpa batse'r e'pa a. <sup>6</sup> Tte e' blëulewə se' yōkɪ kuaë, e' wə dör i' es: A' kē dör judiowak, esepa kieke Skëköl tō Jesús tte buaë e' wa as i' kōs tso' ie' wə mē sa' a, e' mütitō a' a' ñies, as a' dōñak sa' tã' ñita wës wák eköl ë es, as i' kōs muk Skëköl kablë' sa' a' e' dō a' ulā a' ñies, a' batsulewə Cristo Jesús mik e' kuëkɪ. <sup>7</sup> Skëköl er buaë ché ye' a, e' kuëkɪ ie' diché wa ie' tō ye' me'kə tte buaë ñe' wakanëuk.

<sup>8</sup> S'batse'rpa kōs, e' sulula ye' dör. Erë Skëköl er buaë ché ye' a, ie' tō ye' shushtë Cristo tte buaë e' pakōk pë' kē dör judiowak esepa a. Ì tso' Skëköl wə ie'pa a' Cristo batamik, e' dör buaë shütë, kē se' a' iwā bikeitsuk ekkë. <sup>9</sup> Nies i' bikeitsbak Skëköl tō wé Cristo wa, e' wə pakōk sulitane a' ie' tō ye' patké. Tte e' bak blëulewə ká iaiə, e' tō dör iyi ulitane yuökwa e' wə. <sup>10</sup> Ie' kē wə ikkayëne yi a' ká iaiə tã, ie' tso' se' dör Skëkëpa Jesús icha e'pa panuk e' kuëkɪ. Se' wa ie' tō iwā kkaché j'ñe tã' iyi wökir ena iyi wák tso' kē wërta'wə ese kōs a' as ie'pa éna iar tō ie' siwā' dör iskjé tsakjé iyi ulitane tsatã. <sup>11</sup> E' kōs wé ie' tō Cristo Jesús dör Skëkëpa e' wa, wës ie' tō iwā yöbië e' bikeitsbak es. <sup>12</sup> Se' batsulewə Cristo mik, se' erblöke ie' mik, e' kuëkɪ se' dōmiwə buaë ttök ie' tã kē suarta', kē wöklör i' a. <sup>13</sup> Ye' weirke kōs a' dalërmik, e' wa a' kē e' ttsōkka. E' kuëkɪ ye' tō a' iché tō kē a' e' siaukwə.

*Pablo tténe Skëköl tã Éfeso wakpa kɪ*

<sup>14</sup> İyi ekké kōs kuēkj ye' e' tkéwā kuchē kj S'yé wōrkj ttōk ie' tā. <sup>15</sup> İ kōs dōr ttšé'ka ká jai a ena ká i' a, e' tso' ie' ē batamik. <sup>16</sup> İe' olo tā' tajé šuṭe, e' a ye' tō ikieke tō ie' tō a' er diché iō iwīkōl wa. <sup>17</sup> Nies ye' tō ikieke ie' a tō Cristo mō ser a' er a, a' erblōke ie' mik e' kuēkj. Ye' tō ie' a ikieke tō a' e' tkōwā darērēē nī dalēritsōk nīes Skēkōl dalēritsōk. <sup>18</sup> Ye' tō ikieke ie' a es aš a' ena s'batse'r malepa, e'pa kōs éna iwā ar tō kōs Cristo éna se' dalēr, e' dōr tajé, shoé, batsjē, kakkēē, iskjē, kē enukwa. <sup>19</sup> Ye' kj ikiane tō a' éna iwā anū buaē tō kōs Cristo éna se' dalēr, e' tkōkā kōs se' kabikeitsō e' tsatā. Es ye' kj ikiane aš a' ser buaē yēsýsē, kabikeitsō buaē mokjē wēs Skēkōl wák es.

<sup>20</sup> Skēkōl diché tā' tajé, e' tso' iwakanéuk se' er a. İe' tō i buaē wēmi se' a, i kōs kiekēsō ena i kōs bikeitsekesō e' tsatā, e' kuēkj ie' kīkōkāsō. <sup>21</sup> Aš Skēkōl kīkōkā se' dōr Skēkēpa Jesús icha e'pa tō. Nies ikīkōkāsō Cristo Jesús kuēkj kekraē. Es e' idir.

#### 4

*Se' dōr wēs nī yamipa es Wikōl Batse'r wa*

<sup>1</sup> Ye' tso' wōtēulewā Skēkēpa Jesús ttē kuēkj. Skēkōl er buaē ché a' a' tajé Cristo batamik, e' kuēkj ye' kōkōhō a' a tō a' senū buaē yēsýsē wēs Skēkōl tō a' klōg'bak senuk es. <sup>2</sup> A' e' wōōwa bēre, a' senū buaē nīta kē kēsik wa. A' nī dalēritsō, nīes a' nī dalē'ttsō er bua' wa. <sup>3</sup> A' kōs dōr wēs nī yamipa es Skēkōl Wikōl wa. A' e' chó darērē aš a' kē nī blabatsōlor nī yōkj. A' senū bēre nīta. <sup>4</sup> Se' kōs dōr wēs wák ekōl ē es. Skēkōl Wikōl tso' se' tā e' dōr ekōl ē. Skēkōl tō se' kōs klōg' aš se' ser michoē ie' tā, e' wā paneke se' kōs tō nīta tšē'ne buaē wa. <sup>5</sup> Se' Kēkōl dōr ekōl ē, ttē mik se' erblōke e' dōr etkē. S'wōskue etkē a' se' ulitane wōsune. <sup>6</sup> Skēkōl dōr ekōl ē, e' dōr se' ulitane yē. İe' dōr se' ulitane wōkir. İe' tso' iwakanéuk se' ulitane wa, nīes ie' tso' se' ulitane tā.

<sup>7</sup> Se' kōs dōr wēs wák ekōl ē es, erē Cristo tō imé se' a ekōl ekōl kanebloie ie' a kua'kj kua'kj wēs ie' kj ikiane es. <sup>8</sup> E' dōr wēs itso' kitule Skēkōl yēkkuō kj es, e' tō iché:

“Mik ie' e' alékā ibolōkpa kj etā ie' mīkane ká jai a. İbolōkpa klō'wéwaitō tajé, e'pa mītser iwā e' tā,

nīes i buaē méitō iwakpa a.”\*

Es Skēkōl yēkkuō tō iché.

<sup>9</sup> Wé ichéitō tō “ie' mīkane kákkē”, etā zima e' wā dōr? E' wā dōr tō ie' dē'rō kewe ká diā kaska'. <sup>10</sup> E' wā kiane chē tō ie' dē'rō ká diā kaska', e' ē mine'kane ká jai a iyi ulitane tsatā ká kōs wā ioie ie' olo tajé e' wa.

<sup>11</sup> Cristo tō diché mé se' a ekōl ekōl kanebloie ie' a. Se' wēlepa šušhté ie' tō kaneblok ie' a ittekōlpa tsáje. Se' wēlepa skā

šušhté ie' tō Skēkōl ttekōlpaie. Se' wēlepa skā šušhté ie' tō ittē buaē pakōkwakpaie. Se' wēlepa skā šušhté ie' tō ittē klō'ukwakpa wōkirpaie ena s'wōbla'ukwakpaie ittē wa. <sup>12</sup> Esepa kanē dōr s'batse'r malepa kōs wōbla'uk kaneblok buaē ie' a ena nī kīmik buaē. Se' serke wēs ie' kj ikiane es, e' tā se' kōs dōr wēs Cristo chká es, e'pa er diché kj iērdaē Cristo ttē a. <sup>13</sup> Es se' kōs dōraē erblōk nīkkēē Jesús dōr Skēkōl Alā, e' mik. Nīes se' kōs wā ijcherdaē nīkkēē se' er a tō wēs ie' dōr. Se' dōraē wēs wēm kibineone es. Se' serdaē buaē yēsýsē wēs Cristo es. <sup>14</sup> Es se' kē dōpaia wēs alala es kiṭer tottola ttē ulitane wa. Esepa dōr wēs dichawō ppé siwā tō es. S'wōbla'ukwakpa kache ttē wa, e'pa erbiķō tajé, ie'pa tō ttē pa'alj yuēmi s'kitō'woje. Mik se' kibine Cristo ttē a, etā esepe kē kitōgnukia yi a. <sup>15</sup> Kē se' e' muksā kitō'wē kache ttē wa. E' skéie ttē mokj, ese chekesō nī a se' nī dalēritsō e' kuēkj. Se' tō iwē es, etā se' diché iērke buaē Cristo dōr s'wōkir, e' ttē kōs a. <sup>16</sup> Cristo batamik se' kōs dōr wēs s'chká es. S'chká a' s'dichéwō tso', s'kicha tso' ena s'yese skā tso' tsákjē, e' kōs tso' iēulewā buaē nīkkēē, kanebloie buaē nīkkēē nīta. Es se' dōr tajé, e'pa kanebloie Cristo a ekōl ekōl kanē dōr kua'kj kua'kj, erē Cristo batamik se' dōr wēs chká etkē es, iēulewā buaē nīta, kanebloie buaē nīta. Es se' mir buaē, nī kj diché iōke buaē nīkkēē nī dalēr wa.

*Kē se' senukia wēs pē' kē tō Skēkōl dalōie es*

<sup>17</sup> Skēkēpa Jesucristo ttō wa ye' tō a' a iché tō kē se' seriā wēs pē' kē tō Skēkōl dalōie ser es. İ kōs bikeitseke ie'pa tō, e' wā kē dōr iie bua'. <sup>18</sup> İe'pa erbiķē tšsenewatke. Skēkōl ttē mokj, e' wā kē ane ie'pa éna yēs. İe'pa er darērēē, e' kuēkj sene mokj meke Skēkōl tō se' a, e' kē dē' ie'pa ulā a. <sup>19</sup> İe'pa er burinewa. İe'pa e' mettsā i sulu kukuētōkwa darērēē. İe'pa e' ia'uke sene sulusi wa, kē e' wōklō'tutā yēs.

<sup>20</sup> Erē Cristo ttē kē wa se' wōblane senuk es. <sup>21</sup> Mokj a' tō ie' ttē tšsé, a' e' yuē ie' ttē mokj wa. <sup>22</sup> E' kuēkj se' bak senuk suluē, ese kōs olo'yōsō. Nīes se' wák dēr suluē, e' olo'yōsō. E' tō se' kitō'weke i sulu wamblōk. Se' tō iutē es, e' tā se' er sulurdawā. <sup>23</sup> Erē se' erbiķōne kua'kj buaē yēsýsē. <sup>24</sup> Skēkōl tō se' wák dēr suluē, e' mane'wēttsā pa'alj wēs ie' wák es, e' kuēkj se' senū yēsýsē ena batse'r wēs ttē mokj tō iché es.

<sup>25</sup> E' kuēkj a' kē káčhōkia nī kj. Se' kōs dōr wēs wák ekōl ē es, e' kuēkj i cheke a' tō nī a, e' chó ttē mokj wa.

<sup>26</sup> A' ulune, e' tā kē iwā wamblar. A' er buanūne kām kaṭuirwā e' yōkj. <sup>27</sup> Kē kawō mar bē a' aš ie' tō a' kō i sulu wamblōk.

<sup>28</sup> Yi bak akblök, e' kē akblökia. E' skéie ese kaneblō iwāk ulā wa aš iulā a iwā dō tā ikakmētō s'siārēpa a.

<sup>29</sup> Ttē sulusi kē chariā. E' skéie a' tō ttē buaē ese ē chō s'malepa kukua as ie'pa kī er tōwā Skēkōl mik darērē. Es a' tō ie'pa kīmēmi buaē mik ie'pa kī ikiane etā. <sup>30</sup> Skēkōl tō iWikōl me' se' a iwā kkachoie tō se' dōr ie' icha. Es se' wā ijcher moki tō Skēkōl tō se' bleraē buaē dō mik se' tsatkērdattsa aishkuō tā, e' kēwō ska' tā. E' kuēkī kē i sulu wamblariaš Wikōl Batse'r kē eriar. <sup>31</sup> Kē a' kēsik blōkia nī kī. Kē a' nī saukia suluē. Kē a' ulunukia nī kī. Kē a' wōñanukia nī kī. Kē a' nī chōkia suluē. Ese kōs olo'yō. <sup>32</sup> E' skéie i buaē ē ū nī a. A' nī saū er siarē wa. I sulu wambleke a' tō nī kī, ese nuī olo'yō nī kī wēs a' nuī olo'yē Skēkōl tō a' kī Cristo batamik es.

## 5

<sup>1</sup> A' dōr Skēkōl ala'r dalēr tajē ie' éna, e' kuēkī a' senū buaē yēsēsē wēs ie' ser es. <sup>2</sup> A' nī dalērītsō kekraē wēs Cristo tō se' dalērītsē es. Ie' e' mettsā ttēwā se' skéie. E' wēr buaē Skēkōl wa wēs íyi mekesō ie' a' ala'r buaē masmas es. <sup>3</sup> A' senū s'wēs s'batse'ra kē senuk es. Kē a' káne trēnuk. Kē a' káne e' ia'ukka sene sulusi wa. Kē a' káne íyi kkechōk. Íyi ese yōkī a' e' kkō'nū bua'iewā aš kē yi tō a' kkatō iki. <sup>4</sup> Ttē sulusi kōs, ttē kē wā tā' kōs, ttē tsuleie kulūie kōs, ese kē char. E' skéie Skēkōl ē kīkōkā. <sup>5</sup> A' wā ijchenū buaē tō wēpa trērke ena wēpa tō íyi sulusi wambleke, nīes wēpa tō íyi kkecheke (e' dōr wēs íyi diōkōl dalōie skēkōlie es), esepa kōs kē dōpa i blūie Cristo ena Skēkōl e'pa tso' e' a.

### *Sene buaē yēsēsē*

<sup>6</sup> Íyi sulu ekkē kōs kuēkī wēpa tō Skēkōl ttē dalōšewēwā, esepa kī Skēkōl kēsik ardaē. E' kuēkī kē a' e' muktsa yi a' kītō'wē ttē kē wā tā' ese wa. <sup>7</sup> Kē a' e' tiūk ie'pa esepa tā, a' e' skō ie'pa yōkī bānet. <sup>8</sup> A' bak senuk suluē, e' dōr wēs a' bak senuk kē ttsettsēē a es. Erē íñe tā a' tso' batsulewā Skēkēpa Jesús mik, e' dōr wēs a' serke kā nī a es. E' kuēkī a' senū wēs s'ser kā nī a es. <sup>9</sup> S'serke wēs kā nī a es, esepa er buaē, ser yēsēsē ena ttō mokīē. <sup>10</sup> A' e' chō e' wōbla'uk i wēr buaē Skēkēpa wa ese wa. <sup>11-12</sup> I sulu wambleke wēpa ser wēs kē ttsettsēē a es, esepa tō, ese kē dōr íie bua'. I sulu wambleke ie'pa tō akirie, ese pakē tō s'jaewē ekkē. E' kuēkī kē i sulu wamblariaš yēs wēs ie'pa es. E' skéie i buaē kī ū kekraē. E' tō ie'pa a' ikkachēmi tō i wambleke ie'pa tō e' dōr suluē. <sup>13-14</sup> Erē kā nīwe tō íyi ulitane kkachēwā buaē mīā nīweie. E' kuēkī mik i sulu wambleke ie'pa tō e' kkachēsō ie'pa a,

e' tā ie'pa wēlepa éna iarimi tō e' dōr suluē tā ier mane'umi tā imiā ser buaē wēs kē nīwe wakpa es. E' kuēkī ttē tō ichē i' es:

“A' dōr wēs s'kapōtkēter es, esepa tī'nū, a' dōr wēs s'duulewā es, esepa shkēnūkanē, etā Cristo tō a' er nī'weraē.”

<sup>15</sup> E' kuēkī a' ser kkō'nū a' tō. Kē a' senukia wēs wēpa kē er tā' esepa ser es. E' skéie a' senū yēsēsē. <sup>16</sup> Tajē pē' tō íyi sulu wambleke íñe tā, e' kuēkī i buaē ormi se' a, e' tā iūsō kōs se' a' ormi ekkē. <sup>17</sup> Kē a' senuk wēs kē se' erbikōtā' buaē es. Erē i kiane Skēkēpa Jesús kī tō se' tō iwē, ese wā anū a' éna. <sup>18</sup> Kē a' e' ttōkkaia blo' wa yēs. E' tō s'sulu'wēkewā da'ā. E' skéie a' senū buaē yēsēsē kekraē Wikōl Batse'r dichē wa. <sup>19</sup> Mik a' nī dapa'uke, etā a' ttsō nīta Salmo wa ena Skēkōl ttsē wa, nīes ttsē meke iWikōl tō a' a' ese wa. A' ttsō Skēkōl a' ikkōkaie a' er kōs wa. <sup>20</sup> Wēstela chō kekraē Skēkōl dōr S'yē e' a' Skēkēpa Jesucristo ttō wa.

### *Wēs se' kē senuk nīta*

<sup>21</sup> Cristo dalōieke a' tō, e' kuēkī a' nī dalōiō. <sup>22</sup> Alakōlpa kē iwēpa dalōiōk wēs ie'pa tō Skēkēpa dalōieke es. <sup>23</sup> Alakōl wēm dōr ie' wōkir wēs Cristo dōr ie' ichapa wōkir es. Ie' dōr ie'pa tsatkōkwak. Ie'pa dōr wēs ie' chkā es. <sup>24</sup> E' kuēkī alakōlpa kē iwēpa dalōiōk i kōs a wēs wēpa dōr Cristo icha esepa tō ie' dalōieke es.

<sup>25</sup> A wēpa, a' alakōlpa dalērītsō wēs Cristo tō se' dōr ie' icha esepa dalērítseke es. Ie' e' mettsā ttēwā se' skéie. <sup>26</sup> Ie' tō iwē es se' batse'wojie. Ie' tō se' paiklé ittē wa aš se' dō manene Skēkōl wōā. E' wā sukesō mik se' wōsune etā. <sup>27</sup> Ie' tō iwē es aš se' dō ie' wāk wōrkī batse'r, kē kī i sulu tā' yēs, olo tā' tajē wēs alakōl ulabatsōketke es, ese paiēule buaē, kē iauleka, idatsi' kē wōkliūleka. <sup>28-30</sup> Es nīes wēpa kē ilakōlpa dalērītsōk wēs ie'pa e' dalērītsō es. Kē yi e' sautā' suluē. E' skéie se' e' kkō'nū buaē, e' tiō buaē. E' kuēkī wēm tō ilakōl dalērítseke, e' wa ie' wāk ie' dalērītsō. Es nīes se' dōr Cristo icha, e'pa dōr wēs ie' chkā es, e' kuēkī ie' tō se' kkō'neke buaē. <sup>31</sup> Itso' kitule Skēkōl yēkkuō kī i' es: “Wēm kē serpaia iyē ena imi e'pa dapōmik, e' skéie iserdawā ilakōl tā. Ie'pa bōl serdaē nīta tā ie'pa mīā wēs wāk ekōl ē es.”\* <sup>32</sup> Ttē e' dōr tajē jskjē, kē se' éna iwā ar bet. Erē ye' a' tā, ttē e' tso' Cristo ena se' dōr ie' ichapa e'pa chōk. <sup>33</sup> Erē nīes ttē e' tso' se' a' ichōk tō wēpa kōs kē ilakōlpa dalērītsōk wēs iwāka e' dalērītsō es. Nīes alakōlpa kōs kē iwēpa dalōiōk.

## 6

<sup>1</sup> A ala'rīa, a' yē ena a' mī, e'pa ttō dalōiō Skēkēpa Jesús dalērmik, e' dōr buaē yēsēsē e' kuēkī. <sup>2-3</sup> Ttē dalōiēno me'atbak Skēkōl tō

\* 5:31 Génesis 2:24

e' et tò ichè: "A' yé ena a' mì e'pa dalöiö. A' tò iwé es, e' ta' a' kawö tköraë buaë ena a' serdaë ká tajë ká i' kî."\* Ttè e' dör ttè dalöiëno tsá kablé se' a' ilè uk iütè skéie e'.

<sup>4</sup> A' dör ala'rla yéwöpa ena imiwöpa, kè a' tò a' ala'rla uluukká. E' skéie ie'pa tala'ú buaë, ie'pa shulö er bua' wa. Nies ie'pa wöbla'ú Skékëpa Jesús ttè wa.

<sup>5</sup> A' klöulewá kanè mésoie, a' wökirpa tso' ká i' kî, e'pa ttö iütö er mokî wa. Ie'pa dalöiö suane wa painé wa. A' kaneblö ie'pa a' buaë wës a' chöpa kaneblök Cristo a' es. <sup>6</sup> A' kaneblö buaë ie'pa a' kékraë, kè dör mik ie'pa tò a' suëke e' ë ta' ie'pa wökatoie tò a' dör kanè mésopa buaë ese. Mokî a' dör Cristo kanè mésopa, e' kuekî a' kaneblö ie'pa a' kaneë wës Skéköl kî ikiane es. <sup>7</sup> A' kaneblö ie'pa a' kaneë wës Skékëpa Jesús wák a' s'kaneblö es, kè dör wës s'kaneblö s'ditsö a' es. <sup>8</sup> A' wá ijcher tò wépa tso' klöulewá kanè mésoie ena wépa kè dör es, esepa kos a' Skékëpa Jesús tò iské meraë eköl eköl wës i' buaë wésö es.

<sup>9</sup> A' dör kanè wökirpa, a' kanè mésopa dalöiö nies. Kè ie'pa pauñar. A' éna ianú tò a' ena ie'pa, e'pa kos wökir dör Skéköl tso' ká jai a' e'. Se' kos kawötá ie' ttè dalöiök. Se' dör kanè wökirpa ö se' dör kanè mésopa esepa, esepa kos dör nies éme ie' a'.

#### *Se' e' tsatkö bë yökî*

<sup>10</sup> A' yamipa, ibataie ta' ye' tò a' a' icheke tò a' e' diché iö kékraë a' batsulewá Skékëpa Jesús ta' e' wa, nies ie' diché tajë e' wa. <sup>11</sup> I' kos mé Skéköl tò a' a' e' tsatkoie i' sulu yökî, e' dör wës i' kos tso' ñippökwa kpa wá e' tsatkoie es. E' iö a' tò as a' e' tsatkö, e' wa a' e' tköwá darërè bë éna se' kitö'wak e' yökî. <sup>12</sup> Kè se' ñippökü' s'ditsö ta'. E' skéie se' ñippöke i' sulusi diché ta' kè wërta'wá esepa ta'. E'pa dör i' wökir ena i' wák tso' i' sulu kos tso' s'pamik wës stui a' es ese wëttsuk. <sup>13</sup> E' kuekî i' kos mé Skéköl tò a' a' e' tsatkoie, e' iö a' tò, e' klö'ú as mik i' sulu datse a' erkiöyk i' sulu wamblök, eta' a' a' iwöklör. A' tò iwé es kékraë, e' ta' a' e' alöraká i' sulu kî ta' a' a' e' tkërdawá darërè mokjë.

<sup>14</sup> E' kuekî a' tso' erki' ñippök i' sulu ta'. Skéköl ttè mokî e' klö'ú a' tò, e' dör wës ñippökwa kpa kipamo es. A' senu' yësésé Skéköl a, e' tò a' kimeräë wës i' daloie i' eke ñippökwa kpa tò ibatsj' kî e' tsatkoie es. <sup>15</sup> Skéköl tò a' er bua'wéne ie' kî Cristo batamik, e' ttè buaë klö'wé a' tò, e' dör a' a' wës ñippökwa kpa klökkuö iöká as kè ikulirtsa es. <sup>16</sup> Nies a' erblö kékraë Skékëpa Jesús mik, e' dör wës i' tso' klöule ñippökwa kpa wá iulá a' shoë e' tsatkoie es. E' wa a' tò i' sulu kos patkeke bë tò a' kî ese kos wöklö'weraë. E' dör wës kuaböt wönarke bö'ie uyeke

ñippökwa kpa kî, e' wöklö'wéke wöshteke i' tso' ie'pa wá iulá a' e' wa es. <sup>17</sup> Skéköl tò a' tsatkeräë, e' bikeitsö a' tò kékraë, e' dör wës i' daloie tkekeka' ñippökwa kpa tò iwökir kî e' tsatkoie es. Nies a' er múwá ie' ttè kî, e' dör wës ie' Wiköl tabé es. <sup>18</sup> I' kos a' ta' ikiö ie' a' tò ie' tò a' kímè. Ie' ta' a' ttö kékraë i' Wiköl wa, kè ilo'yar yës. Nies ie' a' ikiö s'batse'r malepa kos kî. <sup>19</sup> Nies ikiö ie' a' tò ye' a' ttè mèitö wá paké as ye' tò Jesús ttè buaë bléulewá ká iaiäë, e' wá pakö kè suarta'. <sup>20</sup> Ye' patkeule ttè buaë e' pakök, eré i' ñe ta' ye' tso' wötöulewá s'woto wé a' ttè e' kuekî. A' ikiö Skéköl a' ye' kî as ye' tò iwá pakö buaë kè suarta'.

#### *Pablo e' chéat*

<sup>21-22</sup> Ye' kî ikiane tò a' wá ijcher tò is ye' tso' ena i' weke ye' tò. E' kuekî ye' tò yëkküö i' patkeke Tíquico ulá a. Ie' dör s'yami dalér tajë sa' éna. Ie' dör Skékëpa Jesús kanè méso yësésé ese. Ie' tò a' a' ichèmi tò is ye' tso'. Nies ie' tò a' er diché ièmi.

<sup>23</sup> Skéköl dör S'yé ena Skékëpa Jesucristo as e'pa tò sene bèrè mù s'yamipa kos a. Nies as Skéköl tò ie'pa kímü ñi daléritsök buaë. Nies as ie'pa erblö Skéköl mik kékraë. <sup>24</sup> As Skéköl er buaë chö wépa éna Skékëpa Jesucristo dalér kékraë kè manerta'ttsa esepa kos a.

\* 6:2-3 Deuteronomio 5.16



## Yëkkuö kit Pablo tö Filipos wakpa a Filipenses

Mik Pablo tö yëkkuö i' kit, eta ie' tso' Roma wötëulewā s'wōto wé a Jesús tté buaé paké kuëkj. E' tso' kitule Hechos 28.14-31 e' kj. E' yōki mik Pablo dë'rō Filipos Silas ena Timoteo e'pa ta Jesús tté buaé pakök, eta tajë pé' erblë' Jesús mik (Hechos 16.11-40). Mik Jesús mik erblök'wakpa wa ijchenewā tö Pablo tso' wötëulewā, eta ie'pa tö inuköl ena ilë skā patkë'mi Epafrodito ulā a ikimoie. E' kj wëstela ché Pablo tö yëkkuö i' kj.

Filipos wakpa weirke Jesús mik erblë e' kuëkj. E' kuëkj Pablo tö ie'pa a ikkaché tö erë ie' weirke, erë ie' tsts'ërke buaé. Ie' tö ie'pa a iché tö ie'pa ké senuk wëş Jesús sené es. Ie' e' wōawa diöšet s'malepa kimoie. Es se' kawōtā senuk ñi kimoie.

E' kjië tā ie' tö ie'pa a ibiyō ché tö Israel aleripa wëlepa tso' s'wōbla'uk suluë. E' yōki ie'pa kawōtā e' kkō'nuk. Ie'pa ñëkkëpa s'wōbla'wëke tö ké se' tsatkërpa erblë Jesús mik e' ë wa. Erë Pablo tö iché tö e' ké idör es.

### Shkë'wë

<sup>1</sup> Ye' dör Pablo. Ñies Timoteo tso' ye' tā ië. Sa' dör Cristo Jesús kanë mësopa. Ye' tso' yëkkuö i' shtök a' dör batse'r batsulewā Cristo Jesús mik serke Filipos e'pa a, ñies a' wōkirpa ena ie'pa k'imukwakpa e'pa kōş a. <sup>2</sup> Skëköl dör S'yë ena Skëkëpa Jesucristo aş e'pa er buaé chō a' a ena sene bërë mü a' a.

*Pablo tö wëstela ché Skëköl a Filipos wakpa dalërmik*

<sup>3</sup> Bitökicha ye' er ane a' ska', eta ye' tö wëstela cheke Skëköl a' a' dalërmik. <sup>4</sup> Ke kraë mik ye' tö ikieke Skëköl a' a' kj, eta ye' tsts'ëne buaé. <sup>5</sup> Kuaë dö ikkë tā, buaé a' tö ye' kimeke Jesús tté buaé paké e' kané wa. E' kuëkj ye' tsts'ëne buaé a' dalërmik. <sup>6</sup> Ye' wā ijcher buaé tö i' buaé tsā tkëwamitke Skëköl tö a' er a, e' wā kj weraëitō buaé dö mik Jesucristo dōne eta. <sup>7</sup> A' dalër tajë ye' éna, e' kuëkj e' dör buaé tö ye' tö a' bikeitsë es. Ke kraë a' er tso' ye' ska'. Erë ye' tso' wötëule s'wōto wé a' Jesús tté buaé kuëkj, erë a' er tso' ye' ska'. Ñies mik ye' ké ku' wötëule tso' Jesús tté buaé tsatkök ena ichök tö e' dör mokj, eta a' er tso' ye' ska'. Skëköl er buaé ché ye' a' e' kuëkj kanë méitō ye' a' Jesús tté buaé pakök. Kanë e' a' a' ulitane tso' ye' tā ñita. E' kuëkj buaé idir tö ye' tö a' bikeitsë es. <sup>8</sup> Skëköl wā ijcher buaé tö kōş ye' éna a' dalër wëş Cristo Jesús éna a' dalër es. <sup>9</sup> Ye' tö Skëköl a' ikieke tö a' kj ñi dalëritsō tajë. Ñies ye' tö ie' a' ikieke tö aş a' kj erbikō yësyësë ena a' kj éna ká

ar buaé <sup>10</sup> aş i' dör ibua'ie ese shushtō a' tö wë kekraë. Es a' sermi batse'r; ké kj i' nuí tā' dö mik Cristo dōne eta. <sup>11</sup> Es Jesucristo batamik a' sermi yësyësë, e' wërdaë buaé wëş kal bua' bua wör buaé ese wër es. E' dör es, eta Skëköl dalöierdaë buaé ikikardakā tajë a' batamik.

*Pablo tso' wötëule erë Jesús tté buaé kj pakarke*

<sup>12</sup> A yamipa, ye' kj ikiane tö a' wā ijcher tö i' sulu tköke ye' tā, mokj e' ké wa Jesús tté buaé wöklōne. E' skëie ikj pakarke tajë.

<sup>13</sup> Shkëkëpa kōş tso' ië ká i' wōkir kibi u a, ñies imalepa kōş tso' ië, e'pa wā ijcher tö ye' tso' wötëule Cristo tté kuëkj. <sup>14</sup> Ñies ye' tso' wötëulewā moulewā, e' tö tajë s'yamipa tso' ká i' a, e'pa kj erkiōwë tté pakök ké suarta'ia, ie'pa kj erblöke Skëkëpa mik e' wa.

<sup>15</sup> Mokj s'yamipa wëlepa ukyërke ye' kj, ie'pa wötköke ye' kj, e' kuëkj ie'pa tö Cristo tté pakeke. Erë wëlepa tö ipakeke er mokj wa. <sup>16</sup> Ie'pa éna ye' dalër tajë, ñies ie'pa wā ijcher buaé tö ye' tso' wötëulewā ië, e' dör Jesús tté buaé tsatkoie. E' kuëkj ie'pa tö Cristo tté pakeke. <sup>17</sup> Erë wëlepa skā tso' e' ë bikeitsök, esepa tö ipakeke, erë e' ké dör er mokj wa. Ie'pa éna ye' kj wë'ikak ye' tso' s'wōto wé a' e' dalewa. <sup>18</sup> Erë ipakarke er sulu wa ö er mokj wa, e' ké dé' wëş ye' a. I bua'ie dör tö Cristo tté buaé e' pakarke, e' tö ye' tsts'ëwëke buaé.

Eta ye' kj tsts'rdaë buaé. <sup>19</sup> E' wā dör tö ye' wā ijcher tö ye' yërdattsane e' kieke a' tö Skëköl a' e' batamik, ñies Jesucristo Wiköl tso' ye' k'imuk e' batamik. <sup>20</sup> Mokj yō iklö'wë tö ye' ké jaënukkā Cristo kj s'şhulök'wakpa wörki. Ye' wā ijcher tö mik ye' e' tsatköke ie'pa wörkj, eta ye' ttöraë ie'pa tā ké suane wëş kekraë ye' tö Cristo tté pakeke es aş ie' kikarkā tajë ye' wa. Ye' serkeia ö ye' ttëwā e' wa Cristo kikarkëka. <sup>21</sup> Ye' a' ta, ye' serkeia, e' dör Cristo kikökka. Erë ye' blënewā, e' tā ye' e' alé. <sup>22</sup> Ye' serkeia ká i' a, eta es ye' kanëblömiia Cristo a' ta e' wā kj dörrattsā buaé. Ye' wák ké wā wā ijcher tö wëne döer ibua'ie. <sup>23</sup> Darërë ishukit ye' a. Sulu ye' shkakmitke Cristo ska', e' dör ibua'ie ichökke. <sup>24</sup> Erë a' a' buaé idir tö ye' serkeia a' kimoie. <sup>25</sup> Ye' wā ijcher buaé tö e' dör mokj, e' kuëkj ye' wā ijcher tö ye' serkeia ká i' a' a' kimoie aş a' kj tsts'r buaé tté mik se' erblöke e' a. <sup>26</sup> Ñies ye' serkeia ká i' a' e' dör aş a' tö Cristo Jesús kikökka tajë mik a' tö isuë tö ie' wā ye' dene a' ska' eta.

*Sene wëş Cristo kj ikiane es*

<sup>27</sup> I bua'ie dör tö a' senu yësyësë wëş Cristo tté buaé tö iché es. Ye' de a' ska' ö ye' ké dé' a' ska', erë ye' kj ikiane tö a' şer es aş ye' tö a' tté tso' tö a' er méwā ñita ñikkëë. Ñies aş ye' tö ittso' tö a' e' tkëwā darërë ñita Jesús tté

buaé mik se' erblöke e' tsatök. <sup>28-29</sup> Skëköl er buaé ché se' a, e' kuekji ie' tò kawö mé se' a erblök Cristo mik ñies weinuk idalërmik. E' kuekji kè a' suanuk se' bolökpa yöki. Ie'pa tò se' we'ikeke, e' dalë'ttsésö er bua' wa, e' ta' e' tò ikkacheke ie'pa a' tò ie'pa weirdaé siarë aishkuö ta, erë se' tsatkerdaé. E' qos dör Skëköl kanë. <sup>30</sup> I'ñe ta' a' weirke wës a' tò isu' tò ye' weine mik a' ta' ye' bak etä es. Ñies i'ñe ta' a' tò ittse tò ye' tso'ia weinuk.

## 2

*Se' ké e' wöökwa diöshet wës Cristo e' wöawa es*

<sup>1</sup> Cristo tò a' er kuweke. Ie' éna a' dalër tajë e' tò a' er pableke. A' batsulewa ñi mik Skëköl Wiköl wa. Ñies a' ñi saü er bua' wa, er siarë wa. <sup>2</sup> E' kuekji ye' tò a' a' ikië tajë tò a' er múwa ñita ñikkëé. A' ñi dalëritsö ñikkëé. A' erbikö ñikkëé Skëköl a. A' senú buaé ñita ñikkëé, e' wa a' tò ye' ttsë'ü buaé. <sup>3</sup> Kè i war wötkoie ñita. Kè i war e' ttsokä ñi kji. E' skéie a' e' wöowa bërë. Ibikeitsö tò s'malepa dör buaé a' tsata. <sup>4</sup> Kè a' e' tkiuk a' wákpa iyi è kji. A' ké s'malepa kji tkinuk ikimé wa isué wa.

<sup>5</sup> Se' erbikö wës Cristo Jesús erbikö es, e' dör i' es:

<sup>6</sup> Ie' wák dör Skëköl je', erë ie' kè tkine e' kji tò iwák dör Skëköl.

<sup>7</sup> E' qos méatitö iwák er wa, ie' de ká i' a yöne s'ditsöie wës kanë méso es. Ie' kune' s'ditsöie.

<sup>8</sup> Mik ie' bak ká i' a, etä i qos kiane Skëköl kji e' iütë'itö seraa dō ie' e' me'ttsa ttëwa wötëulewa krus mik wës pé' sulusi es.

Ekké ie' e' wöa'wa.

<sup>9-11</sup> E' kuekji Skëköl tò ie' tkékä iyi ulitane tsata.

Ñies ikië mékaitö Këköl iyi ulitane tsata.

Ie' tò iwé es as i qos tso' ká jai a, ena ká i' a ena ká diöshet e'pa qos e' tulöwa kuchë kji Jesús wörki idalöioie, ñies as sulitane tò ichökä tò Jesucristo dör Skëköl,

Skëköl dör S'yé e' kikokä tajë.

*Sene yësyësé pé' sulusipa shüa*

<sup>12</sup> A ye' yamipa dalër tajë ye' éna, Cristo tò Skëköl ttë iüté buaé, e' kuekji ye' tò a' a' ichë tò a' tsatkéne e' wá ü suane wa painë wa. Mik ye' bak a' ska' etä kekraé a' tò Skëköl ttë iüté buaé, erë i'ñe ta' ye' kè ku' a' ta, etä ikj iütö bua'iewa. <sup>13</sup> Skëköl wák tò a' erkiöwé i kiane ie' kji wë ese woie. Ñies ie' tò idiché mé a' a' iwakanewoie. E' kuekji a' tò iwakanewëmi buaé.

<sup>14</sup> I qos wëke a' tò, e' ü bërë, kè dör kabene wa, kè dör ukyëne wa. <sup>15</sup> Iü es as kè i sulu ttë kur a' kji. Es a' s'ermi pé' sulusipa

shüa yësyësé kè kji i nuí ta' wës Skëköl ala'r es. Ie'pa shüa a' dör wës bëkwö wöñar ká ttsettse a es. <sup>16</sup> Jesús tò sene michoë mè se' a, e' ttë wá pakö ie'pa a. A' tò iwakanewé es, e' ta ye' ttsë'rdaé buaé mik Cristo dene etä. Es ye' tò isugraé tò ye' kanëbl darërë e' kè weine é. <sup>17</sup> A' erblöke Jesús mik, a' tò Skëköl ttë iuteke buaé. Ñies a' e' mettsa weinuk ie' ttë kuekji. E' dör wës iyiwak jché sacerdote tò mè Skëköl a es. Isalema ie'pa tò ye' ttëwami Jesús ttë kuekji. E' wá tka ye' ta, e' ta' ye' döraé wës vino tekettsa iyiwak jchéne mè Skëköl a e' kji es. Ie'pa tò ye' ttëwami, erë ye' ttsë'r buaé a' ta' ñita. <sup>18</sup> Es ñies a' ttsë'nú buaé ye' ta' ñita.

*Timoteo*

<sup>19</sup> Skëképa Jesús ttö wa ye' mú tò Timoteo patkëmi bet a' ska'. Ie' tò a' a' ye' biyö meraé buaé, e' tò a' ttsë'weraé buaé. Ñies ie' wá a' biyö döraé ye' a' as ye' ttsë'r buaé. <sup>20</sup> Kè yi skä ku' ye' ta' tkirke a' kji mokj wës ie' es. <sup>21</sup> Imalepa tkirke i kiane ie'pa wákpa kji, ese è kji, kè tkirta' i kiane Jesucristo kji ese kji. <sup>22</sup> Erë a' wa ijcher tò Timoteo tò ikkayë'bak tò ie' dör Jesús kanë méso buaé. Ie' kanëblëule buaé ye' ta' Jesús ttë buaé pakök wës ye' wák alä es. <sup>23</sup> E' kuekji mik ye' wa ijchertke tò wës ye' dömi je, etä ye' mú tò Timoteo patkëmi a' ska'. <sup>24</sup> Ñies ye' erblöke Skëképa mik tò ye' dömine a' ska' kukuie.

*Epafrodito*

<sup>25</sup> Ñies ye' tò ibikeitsé tò ye' kawötä s'yami Epafrodito patkökmine a' ska'. Ie' dör wës ye' èl es. Ie' kanëblöke buaé ye' ta. Ie' tò Jesús ttë tsatkeke buaé ye' ta. A' tò ie' patkë'bitü ye' kímuk a' skéie.

<sup>26</sup> Ie' kji a' kiane sué kröröé. Mik ie' wa ijchenewa' tò a' tò ibiyö ttsë' tò ie' duöke, etä e' tò ie' eriawékä tajë. <sup>27</sup> Mokj ie' kirinebak. Tsir etä ie' blënewa, erë Skëköl tò isué er siarë wa, e' kuekji ie' buanene. Es Skëköl tò ye' sué er siarë wa ñies. Epafrodito duöpawa, e'ma ye' kji eriane tajë. <sup>28</sup> E' kuekji sulu ye' éna ipatkakmi bet a' ska' as a' ttsë'rne buaé isaukne, ñies as ye' kè kji eriarä. <sup>29-30</sup> A' tò ie' kiöwa ttsë'ne bua' wa wës Jesús mik erblökwa kpa ñi kiöwa es. Tsir etä ie' blënewa Cristo kanë wë kuekji. Wës a' kè a' ye' kimer, e' kuekji ie' tò ye' kímé a' skéie. Eë iekkë ta' ie' blënewa. E' kuekji se' esepa dalöio.

## 3

*Cristo dör buaé ichökle i ulitane tsata*

<sup>1</sup> A yamipa, e' kjié ta' ye' tò ichë a' a' tò a' ttsë'nú buaé Skëképa Jesús batamik. I kitbak ye' tò yëkküö kji a' a, e' skä shtekeneyö a' a' i' ta. Ye' kè shtrine iskä chökne a' a. E' dör buaé a' a' a' tsatkoie wépa éna a' kitö'wak esepa yöki. <sup>2</sup> A' e' kkö'nú pé' sulusipa datse

wes chichi sulusipa es esepa yöki. Ie'pa e' wamblörak suluë. Ie'pa icheke tö wëpa tottola kkuölit tëule tsir wes Moisés tö ikitat es, esepa ë dör Skëköl ala'r chökke. Ie'pa éna a' er sulu'wakwa ttë ese wa. E' kuekji a' e' kkö'nú esepa yöki. <sup>3</sup> E' kë dör wes ie'pa tö ichë es. Se' tö Skëköl dalöieke iWiköl batamik, esepa je' dör Skëköl ala'r chökke. Kë se' erblöku' se' wákpa mik e' tsatkoie. E' skéie se' erblöke i' o' Cristo Jesús tö e' mik, e' wa se' e' tsökeka tajë. <sup>4</sup> Yile e' ttsöka tö itsatkërmi iwák batamik, e' ta ye' e' ttsökami tajë e' tsatä. <sup>5</sup> Mik ye' kji ká deka páköl (8) eta ye' tottola kkuölit tëne tsir wes Moisés tö ime'at es. Ye' dör Israel aleripa e' eköl. Ye' dör Benjamin ditsëwö. Ye' dör hebreo ditsëwö chökke. Ye' bak fariseowakie e' kuekji Moisés ttë kitule dalöieno e' dalöiök ye' bak buaë wes fariseowakpa es. <sup>6</sup> E' k'éwö ska' ta ye' bak ttë e' tsatkök darërë dö Skëkëpa Jesús icha esepa we'ikök siarë. Sene yösyësë kiekie ttë ñe' tö se' a' e' wà iutëule ye' wa seraa, kë kji i sulu ttë ta' yës. <sup>7</sup> Ye' bak ibikeitsök tö iyi ekkëpa kôs e' dör buaë ye' a' e' tsatkoie, erë i'ñe ta ye' éna iane tö e' kôs kë dör iie bua' ye' a. E' kuekji e' kôs kë wà ta'ia ye' a Cristo dalërmik. <sup>8</sup> E' kjië ta, Cristo Jesús dör ye' Këköl, e' mik ye' batsë buaë, mokji e' dör buaë ye' a iyi ulitane tsatä. Ie' dalërmik iyi malë kôs watëttsayö, e' dör ushñae ye' a as ye' ulä dö ie' ska' <sup>9</sup> ena ye' bätswa ie' mik da'gie. Es Skëköl tö ye' klö'wë wes pë' buaë yösyësë es ie' wörki, e' kë döer Moisés ttë dalöieno e' dalöiéyö buaë e' kuekji. E' skéie ie' tö ye' klö'wë wes pë' buaë yösyësë es ye' erblé Cristo mik e' kuekji. E' wà dör tö mik ye' erblé Cristo mik eta, e' kuekji Skëköl tö iché tö ye' dör pë' buaë yösyësë ie' a. Nies ie' tö ye' k'imë senuk yösyësë ie' a. <sup>10</sup> Ye' kji e' batsak Cristo mik bua'iewa. Ie' kôtwa pë' tö e' shkéo'kane Skëköl tö ie' diché tajë wa, e' diché kiane ye' kji ye' er a. Ye' e' chak weinuk ie' dalërmik wes ie' weine ye' dalërmik es. Ye' e' chak ttëwa ie' dalërmik wes ie' kôtëwa ye' dalërmik es. <sup>11</sup> Ye' s'enak es as Skëköl tö ye' shké'ükane aishkuö ta.

#### *Kam se' ser yösyësë wes Cristo es*

<sup>12</sup> Ye' kë tö icheku' tö e' kôs wëtkeyö. Ye' kë tö icheku' tö ye' dekatke ser yösyësë wes Cristo Jesús ser es. Erë ie' tö ye' klö'bak as ye' dö wes ie' es. E' kuekji ye' e' tkëwa darërë as ye' dö wes ie' es. <sup>13</sup> A yamipa, ye' kë ibikeitsë tö iyi ekkë kôs detke ye' ulä a. I' o' ye' tö, ese kë bikeitseku'iaiyö. E' skéie i tso' Skëköl wä ye' a aishkuö ta, ese ë yuleke ye' tö darërë. <sup>14</sup> Ye' e' tkëwa darërë këkraë dö mik ye' demi ká jai a eta as iské dö ye' ulä a. E' dör sene michoë Skëköl ta. E' tso' ie' wä bil yi klöule ie' wä Cristo Jesús batamik esepa a. <sup>15</sup> Se' ulitane erblö buaë Cristo mik, esepa kawötä ibikeitsök ñe' es. A' wëlepa

tö ilë bikeitseke kuä'kji eta Skëköl tö a' er ñi'wërane. <sup>16</sup> Erë ibua'ie dör tö se' ulitane ké senuk yösyësë kôs se' a ikkayëne eköl eköl ekkë.

#### *Se' dör ká jai wakpa*

<sup>17</sup> A yamipa, a' senuk wes ye' serke es. Nies wëpa serke wes sa' serke es esepa weblö ta a' senuk es. <sup>18</sup> Ye' tö a' a iyë' tajë tö pë' tso' e' chö tö ie'pa erblöke Jesús mik, erë ie'pa serke wes Cristo kôtëwa krus mik e' bolökpa es. E' skä chëneyö a' a i' ta ië wa. <sup>19</sup> Ie'pa ekkëpa michoë ewëwa. I' kiane ie'pa kji ese döer ie'pa këköl. Warma i tö ie'pa ké jaënuk tajë, ese wa ie'pa e' tsökeka. Ie'pa er me'rie i tso' ká i' a ese ë kji. <sup>20</sup> Erë se' dör ká jai wakpa. Skëkëpa Jesucristo döer S'tatskökwak tso' ká jai a, e' datskene, e' panekë se' tö kröröë. <sup>21</sup> Ie' wä diché tso' tajë e' aloka iyi ulitane kji. Idiché wa ie' tö se' chkä nurta'wä e' mane'wërattsa as idö wes ie' wák chkä olo ta' tajë es.

## 4

<sup>1</sup> A yamipa, a' e' tköwä darërë Skëkëpa Jesús a këkraë. Suluë ye' éna a' suakne, a' dalër tajë ye' éna. A' tö ye' tse'wëke buaë. A' dör wes ye' kaneblöke Skëköl a' e' ské es.

#### *Evodia ena Síntique*

<sup>2</sup> A Evodia ena Síntique, a' böel döer Skëkëpa Jesús icha, e' kuekji ye' kköchö a' a tö a' erbikö ñikkëë. <sup>3</sup> Eköl tso' a' shua, e' döer ye' k'imukwak buaë, e' a' ye' ikië tö alakölpä e'pa k'imú er buanukne ñi kji. Ie'pa bak kaneblök buaë ye' ta Jesús ttë buaë pakë wa. Ie'pa ena Clemente ena imalepa bak kaneblök darërë ye' ta, e'pa kië kôs tso' tke kitule sene michoë yëkuö kji.

#### *A' tse'nú buaë këkraë*

<sup>4</sup> A' tse'nú buaë këkraë a' döer Skëkëpa Jesús icha e' kuekji. Ye' tö iskä chëne a' a tö a' tse'nú buaë. <sup>5</sup> Sulitane saü er bua' wa këkraë. Skëkëpa Jesús datskene bet.

<sup>6</sup> Kë i tö a' eriauk, e' skéie i kiane a' kji, ese kôs mü Skëköl ulä a, ie' a' ikië wa ena kköché wa. Nies wëstela chö iq. <sup>7</sup> A' tö iwë es, e' ta sene bërë meke ie' tö e' meraëitö a' a. E' dör tajë iskië kë se' éna iwä ar ekkë. E' tö a' er ena a' erbikë kkö'neraë Cristo Jesús batamik. <sup>8</sup> A yamipa, ibataie ta ye' tö a' a icheke tö i kôs döer mokjië, i kôs dalöiërta', i kôs döer yösyësë, i kôs döer batsë'r, i kôs döer buaala, i kôs kijaulekä buaë, iyi ese kôs kji a' er müwä këkraë. I' kôs döer buaë ena i kôs kjkarkata', ese bikeitsö këkraë.

<sup>9</sup> I' kôs wa ye' tö a' wöblaq', ttë kôs yë' ye' tö a' a, e' tse' a' tö. Wes ye' serke, e' su' a' tö. A' senuk es, e' ta Skëköl döer sene bërë mukwak, e' tso' a' ta' këkraë.

#### *Pablo tö ie'pa a wëstela ché*

<sup>10</sup>Ye' t̄tsē'ne buaē tō bata ekkē tā a' er dene ye' ska'. Ì patké a' tō ye' a, e' wà de ye' ulà a, e' tō ye' ké wēstela chök Skëképa Jesús a. Ye' éna iane tō moki a' kē er chē'wa ye' ska', erē a' kē ulà dē' wēs ipatkoie ye' a. <sup>11</sup>Ye' kē ku' e' chök a' a ilè k̄i kianeia ye' k̄i e' kuek̄i. Ye' wöblanewatke t̄tsē'nuk buaē ì k̄os tköke ye' tā e' a. <sup>12</sup>Ye' wöblanewatke senuk mik ye' wā íyi tso' tajē etā, ñies mik ye' kē wā íyi tā' yēs etā. Ye' wöblanewatke ì k̄os tköke ye' tā e' dalē't̄tsök. Íyi tso' ye' wā ñè ö íyi kē tā' ye' wā ñè, erē ye' t̄tsē'rke buaē. Ì tso' ye' wā tajē ö ì kē tā' ye' wā yēs, erē ye' t̄tsē'rke buaē. <sup>13</sup>Íyi k̄os dalē't̄tsē'rm̄i ye' a buaē Cristo batamik, e' tō ye' a diché meke e' kuek̄i. <sup>14</sup>Erē buaē idir tō a' tō ye' k̄imé ye' weirke tajē e' shūa.

<sup>15</sup>A yamipa, a' wā ijcher buaē tō mik a' tō Jesús t̄tē buaē e' tsā t̄tsē', e' kēwō ska' tā ye' e' yē't̄tsā Macedonia tā a' erule serke Filipos e'pa ē tō ye' k̄imé inuköl wa. Kē imalepa skā wā ye' k̄imēne wēs a' es. <sup>16</sup>E' k̄iie tā mik ye' bak Tesalónica, etā a' tō íyi patkē' ye' a e' k̄imoie bötökichakkē. <sup>17</sup>Ye' kē ku' ì kakmeke a' tō ye' a e' ē bikeitsök. Ì buaē k̄i merke a' a k̄á jai a ì k̄akmé a' tō ye' a e' skéie, ese bikeitsök ye' tso' bua'ie. <sup>18</sup>A' wā ijcherú tō ì k̄os patkē' a' tō ye' a, e' dē' ye' ulà a, e' kuek̄i tajē ye' wā itso'. E' k̄iie tā ì ipatkē' a' tō Epafrodito ulà a, e' k̄os tā ye' wā itso' tajē shūte. Ì wé a' tō e' wēr buaē Skëköl wa wēs íyi meule ie' a ala'r buaē masmas es. Ese kiar ie' k̄i. <sup>19</sup>E' kuek̄i ye' Këköl tō ì k̄os kiane a' k̄i senoie ie' a ese meraē a' a ì tso' ie' wā buaē tajē shūte e' wa Cristo Jesús batamik. <sup>20</sup>ìskëköl dör S'yé, e' k̄ikökasö tajē k̄ekraē! Es e' idir.

*Pablo e' chéat*

<sup>21</sup>Jesucristo ícha batse'r e'pa k̄os shkē'ú ye' a. Ñies s'yamipa tso' ye' tā, e'pa tō a' shkē'wémi. <sup>22</sup>Ñies s'batse'rpa serke íe, e'pa k̄os tō a' shkē'wémi. Sa' shūa wépa kaneblöke Roma wökir kibi a, e'pa tō a' shkē'wémi bua'iewa.

<sup>23</sup>As Skëképa Jesucristo er buaē chö a' a.

## Yëkkuö kit Pablo tö Colosas wakpa a Colosenses

Mik Pablo tö yëkkuö i' kit etä ie' tso'ia wötëulewä Roma s'wöto wé a. Wés i bak ie' ta e' tso' kitule Hechos 28.17-31 e' k'i. Pablo wák kē wä Jesús tté buaë pakane Colosas. Wēm eköl kiē Epafra, e' tö Colosas wakpa a ipaka'. E' ukuöki ie' dë'rö Pablo weblök s'wöto wé a ta ie' tö Pablo a ipaké tö Colosas wakpa shuä kabene tso' tajë.

Epafra tö ie' a ipaké tö pë' wele tso' s'wöbla'uk Jesús tté wa erë kē dör yësyësë. Pë' ñe'pa tö s'wöbla'weke tö Skëköl kē wä iyi kōs yöne Cristo wa. Ñies ie'pa tö icheke tö Jesús kē dör kēkēpa tajë ese. E' skéie Jesús mik erblökwakpa kawōtä tkinuk bua'ie i k'i Israel aleripa tkirke ese k'i, es ie'pa tö s'wöbla'weke.

E' kuëki Pablo tö yëkkuö i' kit ñippoie ie'pa ñekkēpa ta Jesús tté buaë tsatkoie. Ie' tö ichë tö Jesús ē a se' tsatkërmī. E' kuëki Skëköl tö ie' tkë'ka sulitane ena iyi ulitane tsata. Ñies ie' ichë tö i k'kacheke pë' esepa tö e' kē dör ñie bua' ena e' kē a se' tsatkëruk. E' k'ie ta ie' tö ikkaché tö wēs se' kawōtä senuk Skëköl wörki.

### Shkë'wë

<sup>1</sup> Ye' dör Pablo. Skëköl wák er wa ye' dör Jesucristo ttekölpa tsä, e'pa eköl. Ñies s'yami Timoteo e' tso' ye' ta ie'. <sup>2</sup> Ye' tso' yëkkuö i' shtök a' dör batse'r serke Colosas e'pa a. A' dör s'yamipa e' tkëulewä darërë Cristo mik. Skëköl dör S'yë as e' er buaë chō ena sene bërë mü a' a.

### Pablo tö wëstela chë Skëköl a ie'pa dalërmik

<sup>3</sup> Këkraë mik sa' tö ikieke Skëköl a' a' k'i, etä sa' tö wëstela cheke ie' dör Skëkēpa Jesucristo Yë e' a' a' dalërmik. <sup>4</sup> Sa' tö a' tté ttes tö a' tso'ia erblök buaë Cristo Jesús mik. Ñies sa' tö ittse tö a' tö s'batse'r malepa kōs dalëritseke buaë. E' kuëki sa' tso' wëstela chök ie' a' a' dalërmik. <sup>5</sup> Mik Jesús tté buaë mokjē e' dë' a' ska' kuaë, etä a' tö ittse' tö Skëköl wa i buaë tso' blëule a' a, e' tso' a' panuk ká jai a. E' wä paneke a' tö kröröe, e' kuëki a' erblöke Cristo mik ena a' ñi dalëritsöke buaë këkraë. <sup>6</sup> Ttë buaë e' pakarke tajë ká wa'ñe, e' klö'weke pë' tö tajë. E' tö ie'pa er mane'weke as iser buaë yësyësë. Es ñies ibak a' ta kuaë mik a' tö ittse' ta iklöo'mi mokj tö Skëköl er buaë chë se' a' Cristo batamik. Kuaë dö i'ñe ta ttë e' wakaneorkear buaë a' shuä. <sup>7</sup> Ttë e' paka' Epafra s' tö a' a, ie' dalër tajë se' éna. Ie' dör Cristo kanë méso wēs sa' es. Ie' dör Cristo kanë méso yësyësë a' kimoie. <sup>8</sup> Ie' wä a' tté

de sa' ska' tö a' tö sa' dalëritseke tajë Skëköl Wiköl wa.

<sup>9</sup> E' kuëki mik sa' tö a' tté ttsë' kuaë, etä sa' utmi S'yë ta a' k'i. E' kē olo'yeta' sa' tö dö ikkë ta. Sa' tö ikiear Skëköl a' tö ie' Wiköl tö a' er ñi'ü kabikeitsoie buaë, as i kiane ie' k'i tö a' iwë e' wä ar buaë a' éna. <sup>10</sup> E' ane buaë a' éna, e' ta a' serdaë buaë yësyësë wēs wépa dör Skëkēpa Jesús icha, esepa kē senuk es. A' serke es, e' ta i kōs weke a' tö, e' wër buaë ie' wa. I buaë kōs weraë a' tö tajë wēs kal wör tajë buaë es. Ñies wēs Skëköl dör, e' wä k'i ar michoë a' éna buaë. <sup>11-12</sup> Sa' tö ikieke S'yë a' tö ie' tö a' er diché iö, ie' olo tajë, ie' diché tajë, e' wa. Es idir, e' ta a' weirke kōs e' dalë'ttsërmi a' a' er bua' wa. Ñies i kōs wé S'yë tö a' a, e' k'i wëstela cheraë a' tö ie' a' ttsë'ne bua' wa. I tso' ie' wä mē se' dör ie' icha batse'rpa e'pa a' ilo bur tajë e' a, e' yök a' yuétkeitō as idö a' ulä a' ñies. <sup>13</sup> Ie' tö se' yëttsä i sulu kōs dör wēs stui es, ese ulä a' ta se' tsëmiitō wépa blüie ilä dalër iéna e' tso' esepa k'ie. <sup>14</sup> E' batamik se' tsatkëitō ena se' nüi olo'yéitō se' k'i.

### Skëköl er buanene se' k'i Cristo batamik

<sup>15</sup> Skëköl kē wërta'wä, erë Cristo wa ie' e' kkayë' s'ditsö a. Kam iyi ulitane yör, e' yöki Cristo tso'tke. Ie' dör iyi ulitane kōs e' tsata. <sup>16</sup> I kōs tso' ká jai a ena ká i' a, e' yö' Skëköl tö Cristo ta ñita. I wërta'wä, ñies i kē wërta'wä iyi wökirie ena iyi kékölīe ena iyi wákie wä diché ta' ese kōs yö' ie' tö Cristo ta ena Cristo k'ikokä. <sup>17</sup> Kam iyi ulitane yör, e' yöki Cristo tso'tke. Iyi ulitane yöne ie' ta ñita ta i'ñe ta e' kōs kicha a'tser ie' wä. <sup>18</sup> Ñies se' dör ie' icha, e'pa wökir ie' dör. Se' dör wēs Cristo wák chkä es, etä ie' dör wēs s'wökir es. Ie' kōtewä, e' shkenëkane se' tsäie as ie' dö iyi ulitane tsata. E' kuëki ie' dör se' sene michoë, e' wä kicha bua'ie. <sup>19</sup> Wēs Skëköl dör, e' kōs wënëwä Cristo k'i, es Skëköl tö ibikeitsbak. <sup>20</sup> Ñies ie' tö ibikeitsbak tö iyi ulitane tso' ká jai a ena ká i' a ena ká wa'ñe e' dörane ie' ulä a' Cristo batamik. Es ie' tö se' er bua'wëne ie' wák k'i Cristo kōtewä krus mik, ipë tēne tajë se' nüi skéie e' wa.

<sup>21</sup> Kenet se' bak i sulu wamblök ena i sulu bikeitsök, e' kuëki se' bak Skëköl bolökpa siulettsä bánet ie' yöki. <sup>22</sup> Erë ie' tö se' er bua'ne ie' k'i Cristo kōtewä se' nüi skéie e' wa as se' döwä ie' wörki batse'r, kē k'i i sulu ta, kē k'i i nüi ta'. <sup>23</sup> Erë se' kawōtä e' tkökwa darërë këkraë se' erblö Cristo mik e' a. Ttë buaë ttsë' a' tö wä paneke a' tö e' kē olo'yar, e' ta iwä döraë a' ulä a. Ttë buaë e' pakane sulitane a' ká wa'ñe ñies ye' tso' ñak ipakök.

### Kanë mēne Pablo a

<sup>24</sup> Erë ye' weirke a' dalërmik, erë ye' ttsë'rke buaë. Cristo weine ie' icha dalërmik. Ie'pa dör wēs ie' chkä es, e' kuëki ie'pa

weirke e' dör wës ie' wák tso'ia weinuk es. E' kuekji ye' weirke kos a' dalërmik, e' dalë'ttsók ye' tso'. Es ye' tso'ñak weinuk Cristo ta. E' tò ye' tse'weke buaë. <sup>25</sup> Skëköl tò kanè mé ye' a Skëkëpa Jesús icha e'pa kanëuk. Ie' tò ye' patké ie' ttë buaë kos e' pakök a'. <sup>26</sup> Se' bak ká iaiäë, e'pa yöki ttë buaë e' bak blëulewa, erë j'ñe ta ikkayëne ie' icha batse' rpa a. <sup>27</sup> Ie' tò ibikeitsbak tò ttë e' kkacheraë ie'pa a. Ttë e' dör buaë shutgë, e' wa ie' er buaë chömi pë' kos kè dör judiowak esepa a. Ttë buaë blëulewa, e' dör tò Cristo tso' se' er a, e' batamik se' dorañak Skëköl olo ta' tajë, e' ska'. E' wà paneke se' tò krörëe.

<sup>28</sup> E' kuekji sa' tò Cristo ttë pakeke sulitane a. E' wa sa' tò sulitane patteke wöbla'weke kabikeitsè buaë yësyësë wa as sa' tò ie'pa kos mù Skëköl ulä a yöuletke buaë batsulewa Cristo ta ñita. <sup>29</sup> E' kuekji ye' e' tkëwa darërëë kanëblök diché tajë meke Cristo tò ye' a, e' kos wa.

## 2

<sup>1</sup> Ye' kji ikiane tò a' wà ijcher tò ye' tso' kanëblök darërëe a' dalërmik kè shtrirta' wä. Nies ye' tso' kanëblök s'yamipa serke Laodicea e'pa dalërmik ena s'yamipa malepa kè wä ye' suule, e'pa kos dalërmik. <sup>2</sup> Ye' kanëblöke darërëe ie'pa dalërmik as ie'pa er diché kji iër buaë, nies as ie'pa kji ñi dalëritsò tajë wës s'yamipa akka ñi dalëritsò es. E' dör es, e' ta ttë buaë blëulewa Skëköl wa kuaë, e' wà kos ardaë ie'pa éna buaë. Ttë buaë e' dör Cristo wák. <sup>3</sup> Skëköl erbikö kos, ena Skëköl wä iyi jcher kos, e' tso' Cristo a blëule wës iyi bua' bua tuë darërë blësö es. <sup>4</sup> Ye' tò a' a ichë es as kè yi tò a' kütö'ü ttë tse' buaë, erë kè dör ttë mokji, ese wa. <sup>5</sup> Ye' wák kè ku' a' ta, erë e' dör wës ye' wák tso' a' ta es. Ye' wä ijcher tò a' e' tkëwa darërë ñikkëë a' erblö Cristo mik e' a wës wák eköl ë es. E' tò ye' tse'weke buaë.

### *Sene pa' ali Cristo a*

<sup>6</sup> A' tò Jesucristo klö'wëtkë e' këkölle, e' kuekji a' senü wës ie' kji ikiane es. <sup>7</sup> A' e' tköwä darërëe ie' mik wës kal wì kicha klörwä es. A' talanü ie' mik wës kal talar iwì mik es. A' kji erblö ie' mik këkraë wës a' wöblagne es. Wëstela mü këkraë ie' a.

<sup>8</sup> A' tso' erkji as kè yi tò a' kütö'ü ttë kè wä ta' ese wa. Ttë e' tse' buaë erë iwä kè dör mokji, ese dör s'ditsö ttë ë. Ttë ese kos pakane' bitü ká iaiäë, e' dör ttë èse tso' ká i' kji ese kè idör Cristo ttë. <sup>9</sup> Cristo dör s'ditsö erë wës Skëköl dör, e' kos wënewä ie' kji. <sup>10</sup> A' batsulewa ie' mik, e' kuekji kè i skä kianeia a' kji Skëköl wörki. Iyi wökir wa diché ta' kè wërta' wä ese kos tsatä ie' dör. E' kuekji kè a' e' kütö'ük ttë kuä'ki wa.

<sup>11</sup> A' batsulewa Cristo mik, e' tò a' wák dër suluë yëttsä. Es ie' tò a' wakyué a' er a iwä

kkachöie tò a' dör ie' icha. E' dör wës sa' judiowak wöblar iwëpa tottola kkuölitla ttök tsir es iwä kkachöie tò ie'pa dör Skëköl icha. <sup>12</sup> A' tò iklö'wé mokji tò Cristo shkëq'kane Skëköl tò idiché tajë wa. E' kuekji mik a' wösune, eta e' dör wës a' wötënewä ena a' shkënekane Cristo ta es. <sup>13</sup> Kënet ta' a' dör i sulu wamblök wakpa, e' këwö ska' ta' a' kè dör Skëköl icha, e' kuekji a' dör wës s'duulewa es ie' a. Erë ie' tò a' shkëq'kane, sene mokji méitö a' a' Cristo ta ñita. Sene sulu e' nuji kos olo'yéitö a' kji. <sup>14</sup> Ie' ttë dalöiëno, e' dalöseq'wä se' tò, e' nuji kos e' kji se' kkatëne. E' dör wës se' nuji kos tso' kitule yëkküö kji es. Erë ie' tò e' nuji kos patuëttsä Cristo këtëwä e' batamik. E' dör wës ie' tò se' nuji yëkküö wötë'wä krus mik Cristo ta ñita es. <sup>15</sup> Cristo batamik ie' tò iyi wökir ena iyi wák wa diché ta' kè wërta' wä esepa diché yë' lur. Ie' e' ali'ka ie'pa kji ta ijaë'itö wës s'klöulewa ñippë shuä jaëwë sulitane wörki yi e' alëkä iki e' tò es.

### *I tso' ká jai a ese kji a' er müwa*

<sup>16</sup> E' kuekji kè yi kar a' kkatök chkë kji di'yë kji. Nies kawö tkö'weke judiowak tò duas bit ena si' pa' ali bit ena eno diwö bit ekkë, ese kè tkö'wë a' tò e' kè kji yi kar a' kkatök. <sup>17</sup> E' kos me'atbak Skëköl tò ie'pa a iwä kkachöie tò i wëraë Cristo tò mik ide eta. Erë Cristo dë'bak. Es ttë e' kos wä tka. E' kuekji ttë dalöiëno këchke ese kè dalöiaria. <sup>18</sup> Wëpa e' ö tò ie'pa dör pë' buaë ser bërë, esepa tò Skëköl biyöchökwakpa dalöieke. Nies ie'pa e' chö tò Skëköl tò iyi kkacheke ie'pa a kabsueie. E' wa ie'pa e' tse'këka tajë. Erë ie'pa ttë kè wä ta', e' dör iwä'kpa kabikeitsö ë. Kè a' e' muktsä e' kütö'ük ie'pa esepa ttë wa. <sup>19</sup> Ie'pa esepa kè ku'ia e' batsökwa Cristo dör s'wökir e' mik. Cristo dör wës s'wökir es, eta se' dör wës ie' chkä es. Se' wöbla ta', se' kukuöña ta' ena s'yese skä tso' tajë kuä'ki kuä'ki, e' kos iëulewa buaë ñikkëë ta' ikaneblöke buaë ñita. Erë iwökir kè ta' eta s'chkä kos e' kè dör iie bua'. Es se' dör Cristo ta ñies. Se' batsulewa Cristo ta, e' ta se' kos ser buaë ñita, ñi tsatöke buaë wës s'chkä etkë es. E' dör es, e' ta se' er diché kji iërdaë buaë wës Skëköl kji ikiane es.

<sup>20</sup> A' duulewäbak Cristo ta ñita ttë èse tso' ká i' a ese kos yöki. A' kè ku'ia idikiä. ¿Wes a' tò iütekeia? Ttë ese dör i' es: <sup>21</sup> Chkë së kè kar; chkë wì kè katar, kè ñar; chkë diö kè kar. <sup>22</sup> I kos dör ñä cheke ttë ese tò, e' ertä' wa. Mik ichkë one, di'yë one, eta kè itä'ia. Ttë ese kos e' dör ttë dalöiëno me' s'ditsö tò ese ë. <sup>23</sup> Kuaë ta' ittësö tò ttë ese dör mokji, wä ta'. Wëpa tso' ttë ese iütök, esepa wër wësua ie'pa tò Skëköl dalöieke buaë mokji. Ie'pa e' ö tajë, suësö tò wësua mokji idir. Ie'pa wák e' we'iköke tajë. E' kuekji iwër tò ttë ese dör buaë, erë kè idör es. Ttë ese kè a' i wamblak s'wák dër suluë éna ese wöklönuk yës.

## 3

<sup>1</sup> Se' shkeulekane Cristo ta ñita, e' kueki i kos tso' ka' jai a, e' ki se' er' muwa. Ee' Cristo tker Skëkol ulà bua'kka daloiërta' tajë. <sup>2-4</sup> Se' duulewa' Cristo ta ñita. Se' sene mokij e' tso' blëule Skëkol wa' Cristo ta ñita, e' kueki kam ikkayërwa' da' aie. Cristo dör sene mokij se' a. Mik ie' dene ka' i' a, eta' ikkayërdaë sulitane a. Se' kkeyërdaë ie' ta' ñita olo ta' tajë. E' kueki se' er' muwa' kekraë i' tso' ka' jai a ese ki. Kë se' er' mukwa, i' tso' ka' i' a, ese ki.

*Wépa dör Cristo icha, esepa serke wes ie' ki ikiane es*

<sup>5</sup> E' kueki, i' sulu tso' ka' i' a' to se' erkiöweke, ese kos olo'yö a' to. Trë kos, sene sulusi kos, s'er me'rie trë ki, s'er bikö sulusi kos, ese olo'yö a' to. Nies iyi kkechë tajë, e' olo'yö a' to (e' dör wes iyi diököl daloië skëköl ie' es). <sup>6</sup> Iyi ekkë kos kueki, wépa kë to Skëkol ttë iüteta', esepa ki Skëkol kësik ardaë. <sup>7</sup> A' bak senuk i' sulu kos ese diché dikja. <sup>8</sup> Erë j'ne ta' a' kawöta' i' sulu skä tso' kos e' olo'yök. Ulune, kësik, ni' wamblö sulu, ese kos olo'yö a' to. Kë a' ni' chökia suluë. Kë a' to ttë sulusi chökia. <sup>9</sup> A' wák dër suluë ena wes e' ser, e' olo'ya' a' to, e' kueki kë a' kachök ñita. <sup>10</sup> A' wák dër suluë, e' maneonebak sene pa' ali' er. Skëkol to a' er yuëne pa' ali'. Ie' to a' er mane'wë michoë kekraë as a' er dö wes ie' wák er es. E' uk ie' tso' as a' dö ie' sini'pa chökia. <sup>11</sup> Se' dör Cristo icha, e' shua' s'tso' dör judiowak ena s'tso' kë dör judiowak. Se' shua' s'tso' datse ka' banet, nies s'tso' kë yöule tajë esepa. Se' shua' s'tso' klöulewa' kanë mésoie ese ena s'tso' kë dör es. E' kos kë dë' wes se' a. Cristo batamik se' kos dör ñikkë. Ie' dör iyi ulitane tsata, nies ie' tso' se' kos er a.

<sup>12</sup> Skëkol to a' shukitbak iwak a. A' batseo' ito ena a' dalër tajë ie' ena. E' kueki a' ni' saü er siarë wa, er bua' wa. A' e' öwa diöshet ni' yöki. A' senu' bërë. Iyi kos panü a' to enaë. <sup>13</sup> A' ni' dalë'ttsö er bua' wa. Yile to i' sulu wamblé a' ta, eta' e' nu' olo'yö a' to iki. A' nu' olo'yö a' to ni' ki wes Skëkëpa to a' nu' olo'yé es. <sup>14</sup> Iyi ulitane ekkë tsata, a' ni' dalëritsö kekraë, e' dör iwi bua'ie. A' ni' dalëritsö ese, e' ta' a' serdaë buaë ñita wes wák eköl ë es. <sup>15</sup> Mokij Skëkol to a' klö'bak senuk bërë ñita wes wák eköl ë es. E' kueki a' e' mu' as Cristo to a' wëtsü senuk bërë ñita kekraë. Nies wëstela chö a' to ie' a' kekraë.

<sup>16</sup> Cristo ttë blö a' to a' er a' kekraë. A' ni' wöbla'ü iwa, a' ni' pattö iwa erbikë buaë kos meke Skëkol to a' a, ese wa. Wëstela chö a' to kekraë Skëkol a' a' er a' Salmo wa ena Skëkol tse wa ena tse meke Wiköl Batse' to se' a' ese wa. <sup>17</sup> I' kos weke a' to, nies i' kos cheke a' to, e' kos ü ena ichö Skëkëpa Jesús ttö wa. Kekraë wëstela chö a' to Skëkol dör S'yë e' a' Cristo batamik.

*Wes se' ké senuk ñita*

<sup>18</sup> A' alakölpa wëm ta', a' wëm ttö daloiö wes Skëkëpa mik erblokwa'ka kawöta' iuk es. <sup>19</sup> A' wëpa, a' alaköl dalëritsö, kë kësik blök iki.

<sup>20</sup> A' ala'r, a' yë ena a' mi, e' pa' ttö daloiö, e' wër buaë Skëkëpa wa e' kueki. <sup>21</sup> A' iyëpa, kë a' to a' ala'r uluwar'ka ë ichökle as ie' pa' kë eriar tajë shüte.

<sup>22</sup> A' klöulewa' kanë mésoie, a' wökirpa ttö daloiö kekraë. A' kaneblö buaë ie' pa' a' kekraë, kë dör to mik ie' pa' to a' sueke e' ë ta' ie' pa' wökatoie. E' skéie a' kaneblö ie' pa' a' er mokij wa, Skëkëpa daloiëke a' to e' kueki. <sup>23-24</sup> Nermata a' dör Cristo kanë mésoie, ie' dör a' wökir mokij. A' kaneblö buaë ka' i' a' a' wökirpa a, e' ta' e' ské meraë Cristo to a' a' aishkuö ta. E' kueki i' kos weke a' to e' ü kaneë wes a' tso' iuk Skëkëpa wák a' es, kë dör wes s'ditsö a' iwë es. <sup>25</sup> Erë Skëkol a' sulitane dör nies ëme, e' kueki wépa to i' sulu wamblëke, ese nu' ki ie' to ie' pa' we'ikeraë aishkuö ta.

## 4

<sup>1</sup> A' wépa wa kanë mésoie tso', esepa to ie' pa' saü er bua' wa yësyësë. A' éna ianü to a' wa' wökir tso' nies, e' dör Skëkëpa tso' ka' jai a' e'.

*Se' e' chö ttök Skëkol ta*

<sup>2</sup> A' e' chö ttök Skëkol ta kekraë, kë ilo'yar. Mik a' ttöke ie' ta, eta' e' ë wa bikeitsö, nies wëstela chö ie' a. <sup>3</sup> Ye' tso' wötëule ie' s'wöto wé a' Cristo ttë buaë blëulewa' kuaë, e' pakë kueki. E' kueki ikiö Skëkol a' to ie' to sa' kimü Cristo ttë ki' pakök buaë ka' wa' fie as kë i' to sa' wöklö'ü. <sup>4</sup> Ikiö Skëkol a' to ye' mü ipakë buaë yësyësë wes ye' kawöta' ipakök es as sulitane éna iwä ar buaë.

<sup>5</sup> Mik a' tso' pë' kë dör Jesús mik erblokwa'ka, esepa ta, eta' a' senu' buaë wes Skëkol ala'r ké senuk es. Kë a' kawö chöuk ë. Kawö yöttsa' kapakök ie' pa' ta. Cristo ttë buaë pakö ie' pa' a. <sup>6</sup> A' ké ttök ie' pa' ta ttë bua' buaë wa as ie' pa' to a' ttö ttsö er bua' wa. A' tso' erki' i' kos chakeke ie' pa' to a' a' eköl eköl, e' iütök yësyësë.

*Pablo e' chëat*

<sup>7</sup> Ti'quico to ye' biyö cheraë a' a. Ie' dör s'yami dalër tajë sa' éna ese. Ie' dör ye' kimukwak yësyësë ese. Ie' dör Skëkëpa Jesucristo kanë mésoie ye' ta. <sup>8</sup> E' kueki ye' tso' ie' patkök a' ska' as ie' to a' a' ichö to is sa' tso', nies as a' er kuütö. <sup>9</sup> Ie' ta Onésimo mi'ke nies. Ie' dalër sa' éna, ie' dör s'yami e' tkëulewa' darërë ese. Ie' datse a' ka' a. Ie' pa' bö to a' a' icheraë to is sa' kawö tköke.

<sup>10</sup> Aristarco tso' wötëule ye' ta s'wöto wé a, e' to a' shké'wëmi. Nies Marcos dör Bernabé duö', e' to a' shké'wëmi. A' a' iyënetke to ie' de a' pakök, eta' ikiöwa' buaë. <sup>11</sup> Jesús kië nies Justo, e' to a' shké'wëmi. Wépa tso' ye' ta i' blüie Skëkol tso' e' kanë a' e' pa' shua' ie' pa'

mañal ẽ dör judiowak. Ye' er pablérakitö tajë. <sup>12</sup> Epafras dör a' wakpa eköl, e' tö a' shkë'wëmi. Ie' dör Cristo Jesús kanè méso. Këkraë ie' kköchöke Skëköl a' dalërmik tö a' mü e' tkëwä darërëë Cristo ttë a' kë ibikeitsë bötböt ena e' meulettsa da' aie i kiane Skëköl kï ese wöie. <sup>13</sup> Ye' wák tö ie' cheke mokï tö ie' kaneblöke darërëë a' dalërmik, ñies Jesús mik erblökwakpa tso' Laodicea ena Hierápolis, e'pa dalërmik. <sup>14</sup> Lucas tö a' shkë'wëmi. Ie' dör s'kapeyökwak dalër tajë se' éna. Ñies Demas tö a' shkë'wëmi.

<sup>15</sup> S'yamipa serke Laodicea, e'pa shkë'ú sa' a. Ñies Ninfa ena Skëképa icha erule ñi dapa'úke ie' u a, e'pa shkë'ú sa' a. <sup>16</sup> Yëkkuö i' aritsé one a' tö sulitane kukua, e' ukuökï tã ipatkömi a' tö Skëképa icha erule ñi dapa'úke Laodicea, e'pa a as ie'pa tö iaritsö ñies. Ñies yëkkuö patkë' ye' tö Laodicea wakpa a, e' saú mik ide a' ska' etã. <sup>17</sup> Ichö Arquipo a' tö Skëképa Jesucristo kanè mène ie' a wë, e' wà ú ie' tö sërãã buaë.

<sup>18</sup> Ñies ye' dör Pablo, e' tö shkëne i' shtë ye' wák ulà wa. Kë a' éna ichökwa tö ye' tso' wötëule s'wöto wé a. As Skëköl er buaë chö a' a.



## Yëkkuö Tsá Kit Pablo tö Tesalónica wakpa a 1 Tesalonicenses

Pablo tö yëkkuö i' kit duas dabom skeyök ena skeyök kî et Jesús kune'bak e' ukuökî (50-51 AC) e' shu'ulat. E' kuekî i' dör yëkkuö tsá kit ie' tö e'. Mik ie' ská dë'rö Tesalónica Skëköl tté buaë e' pakök etá Timoteo ena Silvano e'pa mir ie' ta. Mik Pablo tö Skëköl tté paka' ká e' a, etá tajë pé' uluneka ie' kî, e' kuekî ie' bakshkarmi dö Atenas. E' ukuökî ie' shkakmine kaneblo'kne Tesalónica Jesús mik erblökwakpa kîmuk, erë kē ie' dë'röne. Erë Jesús mik erblökwakpa we'ikee tajë pé' kē dör Jesús mik erblökwakpa esepa tö, e' kuekî Pablo tö Timoteo ë patkë'mi yëkkuö i' muk ie'pa a ier diché ioie (Hechos 12.1-14).

I' kit Pablo tö yëkkuö i' kî e' dör i' es: Et: Ie' tö wëstela mé Skëköl a i' buaë o' ie' tö Jesús mik erblökwakpa tso' Tesalónica e'pa a e' kî. Nies Pablo tö ie'pa a ieri mène tö Skëköl tso' ie'pa ta.

Böt: Pablo tö ie'pa a ieri mène tö wes ie' bak senuk ie'pa shuá ena wes ie' tö ie'pa dalërmis. Ie' tö ikit es ie'pa er diché ioie senuk Jesús a.

Mañat: Pablo tö ie'pa er diché ié senuk kekraë Jesús a. Nies i' tköraë Jesús mik erblökwakpa ta mik iblërulune etá, e' paké ie' tö ie'pa a. Nies ie' tö ikkaché tö wes se' kawötá Jesús datskene e' panuk kröröë.

### Shke'wë

<sup>1</sup> Ye' dör Pablo. Silvano ena Timoteo tso' ye' ta ië. Sa' tso' yëkkuö i' shtök Skëkëpa Jesús icha erule serke Tesalónica e'pa a. A' bat-sulewá Skëköl dör S'yë e' mik, nies Skëkëpa Jesucristo mik. As ie'pa er buaë chö ena sene bërë mù a' a.

*Pablo wëstela ché Skëköl a Tesalónica wakpa dalërmik*

<sup>2</sup> Kekraë sa' tö wëstela cheke Skëköl a' a' dalërmik. Mik sa' ttöke ie' ta, etá kekraë sa' tö ikieke a' kî. <sup>3</sup> Sa' éna iane tö a' erblöke Jesús mik, e' kuekî a' tö i' kos buaë weke. S'yë dalër tajë a' éna, e' kuekî a' kanebloke darërë ie' a. Skëkëpa Jesucristo datskene, e' paneke a' tö mokjé, e' kuekî a' e' tkéwá darërë ie' mik. E' kos kuekî kekraë mik sa' ttöke Skëköl ta, etá sa' tö wëstela cheke ie' dör S'yë e' a' a' dalërmik. <sup>4</sup> A yamipa dalër tajë Skëköl éna, sa' wá ijcher tö ie' tö a' shukitbak ie' ala'rie. <sup>5</sup> Mik sa' tö Jesús tté buaë paka' a' a, etá kē sa' wá ipakane tté ë wa. Nies Wiköl Batsë'r diché e' kkayë' sa' tö a' a. A' tö isué tö i' ché sa' tö, e' ché sa' tö er mokjé wa. A' wá ijcher buaë tö sa' bak senuk yësyësë a' shuá iwá kkachoie tö a' kawötá senuk es.

<sup>6</sup> Es a' dë'bak senuk yësyësë wes sa' ser es, nies wes Skëkëpa Jesús ser es. Mik a' tö Jesús tté buaë klö'bak, etá e' kuekî pé' tö a' we'ik siarë, erë a' tö tté e' klö'wekeia ttsë'ne bua' wa Wiköl Batsë'r batamik. <sup>7</sup> E' wa a' tö iwá kkaché Jesús mik erblökwakpa serke Macedonia ena Acaya, e'pa kos a' tö wes s'kawötá senuk Skëköl a. <sup>8</sup> A' batamik Skëkëpa Jesús tté buneka Macedonia ena Acaya. Ká wa'ñe, wé ye' mirwa, ee pé' kos wá ijcher tö a' erblöke Skëköl mik. E' kuekî kē i' ku'ia ché yi a' tté e' kî. <sup>9</sup> Sulitane tö sa' a' icheke tö a' tö sa' kî'wa buaë. Nies ie'pa tö icheke tö iyi diököl tso' dalöie, ese kos watétsa a' tö kanebloie Skëköl chökle eköl ë e' a. <sup>10</sup> Nies ie'pa tö icheke sa' a' tö a' tso' Jesús datse ká jai a, e' panuk er mokjé wa. Ie' dör Skëköl Alá. Ie' kótewa, erë Skëköl tö ie' shke'wane. Ie' tö se' tsatkée, se' weirdäe siarë aishkuö ta, e' yökî.

## 2

### I' o' Pablo tö Tesalónica

<sup>1</sup> A yamipa, a' wá ijcher buaë tö sa' sene' a' shuá, e' wá kē dör éme, e' tö a' kímé buaë. <sup>2</sup> A' wá ijcher tö kam sa' dö a' ska' e' yökî Filipos wakpa tö sa' yé' suluë, sa' we'ik siarë. Nies a' ká a' pé' bak e'pa éna sa' wöklö'wak erë Skëköl tö sa' kime'. Ie' tö diché mé sa' a' Jesús tté buaë pakoie a' a. <sup>3</sup> Sa' kē tö s'patteta' kache tté wa ö iyi sulusi dalërmik ö s'kit'woje. <sup>4</sup> Sa' kē tö s'patteta' es. Skëköl tö sa' er webleke, e' tö sa' shukit. Ie' tö kané me'at sa' ulá a' Jesús tté buaë pakök. E' kuekî sa' ipakeke as sa' wër buaë ie' wa, kē dör s'ditsö wa. <sup>5</sup> A' wá ijcher tö sa' kē dë'rö a' ska' a' kjköká kache tté wa. Kē sa' wá a' pautule inuköl kiane sa' kî e' kuekî. Skëköl wá ijcher tö sa' kē wá iwamblene es. <sup>6</sup> Sa' kē dë'rö a' ska' as a' tö sa' kjköká ö yi ská tö sa' kjköká. <sup>7</sup> Sa' dör Cristo ttekölpa tsá, e' kuekî sa' wá kawö ta' as a' tö sa' saü buaë, erë e' kē kine sa' wá a' a. Sa' tö a' suë wes alá mì tö ila'rla suë es. <sup>8</sup> Sa' éna a' dalër tajë, e' kuekî sa' ttsë'ne buaë a' pattök Skëköl tté buaë wa. Kē dör e' ë wa, nies sa' e' mumittsa weinuk a' dalërmik. <sup>9</sup> A yamipa, a' éna iane tö mik Skëköl tté buaë paka' sa' tö a' a, e' dalewa sa' kanebli' darërë. Sa' kanebli' ñie nañë as sa' kē tö a' ulá panü sa' tioie.

<sup>10</sup> A' wá ijcher, nies Skëköl wá ijcher, tö sa' sene' batsë'r yësyësë kē kî i' sulu tté ta' a' dör Jesús mik erblökwakpa e'pa shuá. <sup>11-12</sup> A' wá ijcher tö sa' tö a' paut, a' er pablë' eköl eköl wes iyë tö iwë iwák ala'r ta es. Nies sa' tö a' a' iyë' kekraë tö a' senu yësyësë wes Skëköl kî ikiane es. E' tö se' klö'bak as se' dö i' blúie ie' tso' olo ta' tajë e' kjie.

<sup>13</sup> Mik sa' tö Skëköl tté paka' a' a, etá a' kē wá itsëne wes s'ditsö tté es. E' skéie a' tö itse' wes Skëköl tté mokjé es, ta es je' idir. E'

kuekji kekraë sa' tso' wëstela chök Skëköl a' a' dalërmik. Ie' ttë batamik, iwakanewëkeitö a' dör Jesús mik erblökwakpa e'pa er a. <sup>14</sup> A yamipa, a' wakpa ditsëwöpa e'pa tö a' we'ik siarë. Es ñies ibak Skëköl icha erule erule erblö Cristo Jesús mik tso' Judea e'pa ta. Judiowak malepa tö ie'pa we'ik siarë ñies. <sup>15</sup> Judiowak tö iwakpa we'ik Jesús ttë kuekji, e' wakpa ë tö Jesús kötwa wës ká iaiäë ie'pa tö Skëköl ttekölpa kötulurbak es. Ñies ie'pa ë tö sa' trëg'yal. i'le'pa kë wër buaë Skëköl wa! i'le'pa kë wödör yi mik! <sup>16</sup> Mik sa' tö Skëköl ttë pakeke pë' kë dör judiowak esepa a' as ñies ie'pa tsatkër, etä judiowak ñie'pa tö sa' ma'wë wöklö'wë as kë sa' tö ttë e' pakö, erë ie'pa kë ulä dë' iska'. Es i sulu nuí, e' kji kiekie ie'pa tö e' kji tajë. Bata ekkë ta Skëköl tö ie'pa kichatëttsatke.

#### *Pablo shkakne ie'pa weblök*

<sup>17</sup> A yamipa, sa' manétyal, sa' kë ku'ia a' ta ñita, erë sa' er me'rie a' kji. Sa' manétyal erë bet ta sa' éna shkakne suluë a' weblökne. <sup>18</sup> Sa' tö ima'wë, ye' wák tö ima'wë tsee erë Satanás tö sa' wöklö'wë. <sup>19</sup> Mik Skëkëpa Jesús dene, etä zyí tö sa' ttsë'wëmi buaë mokjië ie' wöa? i'le' dör a'! I' buaë paneke sa' tö Jesús wörki a' batamik. A' dë' Skëköl ala'rie, e' tö sa' ttsë'wëraë buaë Jesús wörki. <sup>20</sup> Yëne e', a' wa sa' e' ttsökeka, a' tö sa' ttsë'wëke buaë.

### 3

#### *Timoteo patkëmine Tesalónica wakpa ska'*

<sup>1</sup> Bata ekkë ta, mik sa' kë a' idalë'tsëneia, etä sa' tö ibikeits tö "sa' böi atë ië Atenas <sup>2</sup> ta s'yami Timoteo e' patkekemi sa' tö a' weblök." Ie' dör Skëköl kanë méso Cristo ttë buaë pakök wës sa' es. Sa' tö ie' patkë'mi a' kimuk as a' diché kji iër Jesús ttë a' ena a' erblöia mokjië imik. <sup>3</sup> Sa' kë kji ikiane tö a' wële eriwäwë, a' weirke siarë Jesús ttë kuekji, e' tö. E' tköraë se' ta wake'. <sup>4</sup> Mik sa' bak a' ska', etä sa' tö a' a' iyë' tajë tö se' weirdaë pë' kë dör Jesús mik erblökwakpa esepa ulä a. A' wa ijcher buaë tö iwä tka es. <sup>5</sup> E' kuekji mik ye' wák kë a' idalë'tsëneia, etä Timoteo patkë'miyö a' ttë ttsök tö zis a' erblöke Jesús mik e' mir? Ye' suane siarë dö' Satanás tö a' erkiöwë ta a' èmine ta kos sa' tö a' pattë e' weirdawa ë.

<sup>6</sup> Erë Timoteo tso' a' ska', irö ie' dene. Ie' wa biyö buaë debitu sa' a. Ie' ichë tö a' erblökeia Cristo mik, ñies a' ñi dalëritsökeia buaë. Kekraë a' tö sa' bikitseke er bua' wa. A' éna sa' suakne suluë wës sa' éna a' suakne es. <sup>7</sup> A yamipa, a' erblöke Jesús mik buaë, e' tö sa' er pableke tajë sa' eriarke kos sa' weirke kos e' shuga. <sup>8</sup> Mik sa' ittse tö a' e' tkëwä darërë Skëkëpa mik, etä sa' er dekane. <sup>9</sup> A' tö sa' ttsë'wë buaë ichökke Skëköl wöa. Kekraë sa' tö wëstela cheke ie' a' tajë a' kji, erë e' kë dör wë'. <sup>10</sup> Sa' tö ie' a' ikieke tajë

ñië nañëë as kawö mùitö sa' a' a' suoie a' kji wöbla'woie as a' kji yör erblök Jesús mik.

#### *Pablo ttë Skëköl ta*

<sup>11</sup> Skëköl dör S'yë e' ena Skëkëpa Jesús e'pa a' sa' tö ikieke tö sa' kimü shkoie a' ska'. <sup>12</sup> As Skëkëpa tö a' kō ñi kji dalëritsök tajë shütë ñies sulitane dalëritsök wës sa' tö a' dalëritseke es. <sup>13</sup> As ie' tö a' er diché kji dö as a' dö Skëköl dör S'yë e' wörki batse'r, kë kji i sulu ttë ta', mik Skëkëpa Jesús datskene ie' icha batse'rpa ta etä. Es e' idir.

### 4

#### *Sene wër buaë Skëköl wa ese*

<sup>1</sup> A yamipa, sa' tö a' wöbla' tö a' senü wës Skëköl wa iwër buaë es, e' iuteke buaë a' tö. I' ta sa' tö a' a' ikieke, sa' tö a' patteke Skëkëpa Jesús ttö wa, tö a' kji senü yësyesë kekraë.

<sup>2</sup> I' uk a' ka' ye' tö Skëkëpa Jesús ttö wa, e' jcher buaë a' wa. <sup>3</sup> Skëköl kji ikiane tö a' ser batse'r, e' wä kiane chë tö a' e' sköttsa trë kos yöki. <sup>4</sup> A' e' wöbla'ü e' kko'nuk batse'r dalöier'ta'. <sup>5</sup> A' kë kane senuk wës pë' kë e' batsö'ta' Skëköl mik es. Ie'pa trër tajë wës iwäka kji ikiane es. <sup>6</sup> A' dör ñi yamipa Jesús ttë wa, e' kuekji kë a' kane ñi tsiriük a' alakölpa wa. A' ñi wamblö es, e' ta a' ñi dalösëukewa. Sa' tö a' a' iyë'bak tö wëpa tö iwambeleke es esepa we'ikeraë siarë Skëkëpa Jesús tö. <sup>7</sup> Skëköl kë wa a' klöone e' ia'ukka sene sulusi wa. Ie' tö a' klö' senuk batse'r ie' a. <sup>8</sup> E' kuekji yi tö ttë i' watëttsa, ese kë wa s'ditsö ttë watënetttsa, ie' tö Skëköl tö Wiköl Batse'r mé se' a, e' ttë watëttsa.

<sup>9</sup> Skëköl wák tö a' wöbla'wë ñi dalëritsök, e' kuekji kë i shteku'ia sa' tö ttë e' kji. <sup>10</sup> A yamipa, e' yëne tö Jesús mik erblökwakpa serke Macedonia, e'pa kos dalër tajë a' éna. Erë sa' tö a' kji patteke tö a' kji ñi dalëritsö tajë shütë. <sup>11</sup> Ñies a' e' chö senuk bërë. Pë' kë tsiriwar kanë wa, ttë wa, i wa. A' wakpa i'yi ë wä saü wä shülö. A' kanëblö a' wäka ulä wa wës sa' tö a' iyë' es. <sup>12</sup> A' tö iwë es, e' ta pë' kë erblö Jesús mik, esepa tö a' dalöieraë. Ñies a' tö iwë es, e' ta i kos kiane a' kji senoie, e' döraë a' ulä a' as a' kë tö yile ulä panü a' kanéwoie.

#### *Skëkëpa Jesús datskene*

<sup>13</sup> A yamipa, sa' kji ikiane tö a' wa ijcher tö i tköraë se' blërlunebak esepa ta as a' kë eriar wës wëpa kë ku' i panuk, esepa eriar es. <sup>14</sup> Se' tö iklö'wë tö Jesús kötëwä shkënekane, e' kuekji ñies se' tö iklö'wë tö wëpa batsulewä ie' mik blërlunebak, esepa tserabitu Skëköl tö Jesús ta mik idatskene etä.

<sup>15</sup> E' kuekji i kka'yë' Skëkëpa tö sa' a' e' chekene sa' tö a' a, e' dör tö mik ie' dene, etä se' dör ie' icha tso' ttsë'ka, esepa kë mine se' malepa blënewä, esepa yöki kewe. <sup>16</sup> Mik Skëkëpa wák bitukene ká jai a, etä ittöraë

aneule darërë ttseraë sulitane tõ. Ñies Skëköl biyöchökwakpa wökir kibi, e' ardaë tã Skëköl duk bla'weraëitö tajë. Etã wëpa batsulewã Cristo mik blërlunebak, esepa shkërdakane kewë. <sup>17</sup> E' ukuökü tã se' tso' tssë'ka kã i' a, esepa kos busdaka ie'pa tã ñita mõ a tã Skëkëpa Jesús kueraësö kashuk a, etã es se' tso'ie ie' tã kekraë. <sup>18</sup> E' kuekji a' ñi er diché iö ttë e' wa.

## 5

<sup>1-2</sup> A yamipa, a' wa ijcher buaë tõ mik Skëkëpa Jesús datskene, etã këwö e' datse kë biyö yëule wës akblökwakpa döwa se' u a nañewë es. Kë yi wã ijcher tõ mik idatskene, e' kuekji e' këwö kë kituk sa' a yëkkuö kji a' a. <sup>3</sup> Mik sulitane tõ ichë: "Ire' sulitane serke bërë ñita, kë pauirkü", e' bet tã i sulu döraë kã i' kji tã s'ditsö weirdaë siarë. Ie'pa kë tköpashkar iulã a wës tayë alã kurke e' kë tköpashkar iweir tajë e' ulã a es. <sup>4</sup> Erë a yamipa, a' kë serkü'ia kã ttsettse a wës ie'pa es. E' kuekji e' këwö kë döpa a' kji wës akblökwakpa döwa es. <sup>5</sup> A' kos serke yësyësë Jesús ttë dikia, e' dör wës se' serke kã ñiwe a es. Skëkëpa Jesús këwö, e' tõ a' tssë'weraë buaë. Kë se' tõ i sulu wamblekü'ia wës kã ttsettse wakpa es. <sup>6</sup> E' kuekji kë se' kãne senuk wës ie'pa es. Ie'pa dör wës se' kapötulur es, kë kü' i panuk. Erë se' kawötã senuk wösh wa, kabikeitsöke buaë wës s'tso' kkãme es. <sup>7</sup> Wëpa kapötkëter, esepa kapötkëter nañewë. Wëpa tteke blo' tõ, esepa tteke blo' tõ nañewë. <sup>8</sup> Erë se' dör wës kã ñiwe wakpa es, esepa kë kabikeitsök buaë wës s'tso' kkãme es. Se' erblö Jesús mik, ñies se' ñi dalëritsö, e' tõ se' bieraë wës iyi daloie ieke ñippökwakpa tõ ibatsi' kji kuaböt yöki es. Ñies se' tsatkërdaë, e' panusö kröröë, e' tõ se' tsatkëraë wës iyi daloie tkekekã ñippökwakpa tõ iwökir kji e' tsatkoie es. <sup>9</sup> Skëköl kë wã se' klöone ie' ala'rie se' we'ikoie. E' skëie se' klöo'bakitö se' tsatkoie Skëkëpa Jesucristo batamik. <sup>10</sup> Cristo kötëwã se' skëie as se' ser michoë ie' tã ñita. Se' blënewã ö se' tso'ia tssë'ka, e' kë dë' wës ie' a mik ie' datskene etã. <sup>11</sup> E' kuekji a' ñi er pablö, a' ñi diché iö, ttë ikkë wa wës a' tso' iwã uk es.

### *Pablo tõ ie'pa kji pattë*

<sup>12</sup> A yamipa, wëpa tso' kaneblök darërë a' wökirpaie Skëkëpa Jesús ttë a, esepa tõ a' kkö'neke, a' patteke as a' ser buaë yësyësë Skëköl a. E' kuekji sa' tõ a' a ikieke tõ ie'pa dalöiö. <sup>13</sup> Ie'pa dalöiö tajë. Ie'pa dalëritsö ie'pa kanë kuekji. A' senu bërë ñita.

<sup>14</sup> Ñies sa' tõ a' pattë tõ a' wëpa bikëne, kë éna kaneblak, esepa uñú. Wëpa eriarke, esepa er pablö. Wëpa kë kü' tkëulewã darërë erblök Jesús mik, esepa kímú. Sulitane dalë'ttsö er bua' wa.

<sup>15</sup> A' e' kkö'nú. Mik yi tõ i sulu wamblë a' kji, etã kë a' tõ i sulu wamblökne ie' kji iskëie. E' skëie a' e' chö kekraë er buaë chök ñi a' ena sulitane a.

<sup>16</sup> A' tssë'nú buaë kekraë. <sup>17</sup> A' ttö me'rie Skëköl tã. <sup>18</sup> I' kos kji wëstela chö Skëköl a. A' dör Cristo Jesús icha, e' kuekji Skëköl kji ikiane tõ a' ser es.

<sup>19</sup> I' weke Skëköl Wiköl tõ a' shua, e' kë wöklö'war. <sup>20</sup> Ttë Skëköl ttekölie, ese kë watarttsa. <sup>21</sup> Iwã kos bikeitsö bua'iewã. Wë dör buaë ese blö. <sup>22</sup> I' sulu kos, ese yöki a' e' skötttsã.

<sup>23</sup> Skëköl dör sene bërë mukwak, as e' tõ a' kímú senuk batse'r. Ñies as ie' tõ a' chkã, a' er, a' wiköl, a' wák wa'ñe kkö'nú kë kji i sulu ttë tã' yës dö mik Skëkëpa Jesucristo datskene etã. <sup>24</sup> Yi tõ a' klöo'bak, e' ttö mokjië. Ie' tõ ese kos waweraë.

### *Pablo e' chëqt*

<sup>25</sup> A yamipa, a' tõ ikiö Skëköl a sa' kji.

<sup>26</sup> S'yamipa kos shkë'ü sa' a' ñi dalër wa.

<sup>27</sup> Ye' tõ a' kë Skëkëpa Jesús ttö wa yëkkuö i' sauk s'yamipa kos a.

<sup>28</sup> As Skëkëpa Jesucristo er buaë chö a' a.

## Yëkkuö Skà Kit Pablò tò Tsalónica wakpa a, i' ta ide böt 2 Tesalonicenses

Mik Pablò bak Corinto età ie' tò yëkkuö i' kit Jesús mik erblökwakpa tso' Tsalónica e'pa a. I' dör yëkkuö skà kit ie' tò ie'pa a, i' ta ide böt. S'wöbla'ukwakpa wele tò iché tò Jesús skà dè'röbakne e' kueki kè s'kawötà kaneblö. Jesús mik erblökwakpa welepa tò e' klö', e' kueki ie'pa kè kaneblöia chké yuloie. E' kueki Pablò tò Jesucristo skà datskene e' paké ie'pa a.

Pablò éna ie'pa a ichak yësyèsè tò Jesús kam döne e' kueki ie' tò yëkkuö i' kit. Ie' tò ie'pa a iché tò Jesucristo datsketkene e' yöki wëm döraè eköl sulitane kító'uk. E' kaneblöraè Satanás diché wa. Nies ie' tò ie'pa a iché tò mik Jesús dene età pè' kòs kè erblène ie' mik e' we'ikeraè Skèköl tò.

Erè kam Jesús döne età ie' mik erblökwakpa kawötà senuk yësyèsè éna ie'pa kawötà kaneblö e' kkó'noie. Es Pablò tò ie'pa a iché.

### Shke'wè

<sup>1</sup>Ye' dör Pablò. Silvano éna Timoteo tso' ye' ta íe. Sa' tso' yëkkuö i' shtök Skèkèpa Jesús icha erule serke Tsalónica e'pa a. A' batsulewà Skèköl dör S'yè éna Skèkèpa Jesucristo e'pa mik. <sup>2</sup>As ie'pa er buaè chò éna sene bèrè mù a' a.

### Mik Jesús dene, età pè' suluè we'ikeraèitò

<sup>3</sup>A yamipa, kekraè sa' kawötà wéstela chök Skèköl a a dalèrmik. A' erblöke Jesús mik, e' k'j mir buaè. E' sù a' ñi dalèritsòke, e' k'j mir buaè. E' tò sa' kè wéstela chök Skèköl a. <sup>4</sup>Sa' tò a' tté ppéka buaè Skèköl icha eruleè kòs e'pa shua. Erè a' weirke siarè s'bolökpa ulà a, a' tòiërke siarè Jesús tté kueki, erè a' e' tkéwà darèrèè, a' erblökeia Jesús mik buaè, e' kueki sa' tò a' k'jéké. <sup>5</sup>E' kòs wa iwènewà tò Skèköl tò s'shulé yësyèsè. Ie' dör se' blú, e' tté kueki a' weirke. E' wa iwènewà tò ie' tò ibikeitseke tò a' je' didir i' blúie ie' tso' e' k'jìe.

<sup>6</sup>Skèköl tò s'shüleke yësyèsè kekraè, e' kueki buaè idir tò wépa tò a' we'ikeke esepa we'ikeraè ie' tò siarè. <sup>7</sup>Tà a' weirke siarè e'pa énuràè sa' ta' ñita. E' kòs tkóraè mik Skèkèpa Jesús datskene ie' biyöchökwakpa diché ta' tajè e'pa ta' éna b'wò ñarke tajè e' shua età. <sup>8</sup>Wépa kè e' batsötà' Skèköl mik, kè wà Skèkèpa Jesús tté buaè e' iutène, esepa kòs we'ikòk ie' datse. <sup>9</sup>Ie'pa weir miçhöè siarè busdattsa bánet Skèköl diché ta' tajè olo ta' tajè, e' yöki. <sup>10</sup>E' kòs tkóraè mik Skèkèpa Jesús datskene età. E' kéwò ta' ie' icha batse' rpa kòs tò e' k'jikerakà. Se' erblè

ie' mik, esepa kòs tò ie' dalöieraè. A' tò tté yè' sa' tò a' a, e' klö'wé e' kueki a' tso' ñak e'pa shua.

<sup>11</sup>E' kueki sa' tò Skèköl a ikieke kekraè a' k'j. Sa' tò ikieke ie' a' as ie' tò a' saù tò a' serke yësyèsè wele ie' tò a' klö'bak senuk es. Nies sa' tò ikiè ie' a' tò ie' tò a' k'imù i' buaè kòs kiane wè a' k'j e' wà uk buaè ie' diché wa. E' kòs wàk a' éna a' erblöke Jesús mik e' kueki. <sup>12</sup>Sa' tò ikieke es as Skèkèpa Jesús k'jarkà a' batamik, ñies as Skèköl tò a' k'jökòka buaè. Ie' éna Skèkèpa Jesucristo e'pa er buaè chò a' a, e' kueki ie'pa tò a' k'jimeràè iwà uk buaè.

## 2

### Wëm Sulusi Ichökle

<sup>1</sup>A yamipa, mik Skèkèpa Jesucristo datskene, età se' busdakà kashuk a ñi dapa'uk ie' ta, e' tté pakeke sa' tò a' a' ñie. Sa' tò a' a' ikieke kröröè tò <sup>2</sup>yile iché tò Skèkèpa Jesús datskene, e' kéwò detke, e' ta' kè a' e' k'jító'uk e' tkiuk tté ese wa. Isalema yile tò a' a' icheke tò Wiköl Batse'r tò sa' a' ikkaché tò Jesús denetke. Isalema yile tò icheke tò sa' tò ie'pa a' iyè' ö sa' tò ikit yëkkuö k'j tò Skèkèpa Jesús denetke ká i' a. Yile tò iché es, e' ta' e' dör kache. <sup>3</sup>Kè a' e' k'jító'uk tté ese wa yès. Skèkèpa Jesús kam döne e' yöki tajè pè' tò Skèköl waterattsa. Nies wëm sulusi ichökle wömenettsabak weinuk e' döraè. <sup>4</sup>I' kòs tso' dalöie skèkölíe, ese kè kiarpa ie' k'j. Ie' wák e' ttsörakà ese kòs tsatà. Ie' k'j ikiane tò sulitane tò ie' è dalöie. Ie' e' tkörakà Skèköl wé kibi a' ta' ie' chöraè: "ye' dör íyi ulitane kèköl."

<sup>5</sup>Mik ye' bak a' a' s'ka, età íyi ekké yè'yö a' a, ye' a' ta' e' ane a' éna. <sup>6</sup>I' tò wëm sulusi ñe' wöklö'wekeia as kè idö kam ikéwò dö e' yöki e' jcher a' wa. <sup>7</sup>Erè ñie ta' Satanás tso'tke iwakanéuk bèr akirie as s'ditsò tò Skèköl tté watöttsa. Erè wëm sulusi ñe' kè döpa dö mik yi tso' iwöklö'uk e' yènettš età. <sup>8</sup>Mik iyènettš, età wëm sulusi e' döraè sulitane wörki. Erè mik Skèkèpa Jesús de, età ie' e' alörakà ik'j ilo tajè wa ta' itterawaitò ikkò siwé è wa. <sup>9</sup>Mik wëm sulusi ñe' de (kam Jesús tò ittöwà e' yöki), età ie' döraè Satanás batamik. Satanás diché wa, ie' tò i' kè or yi a' ese kòs weraè s'kitö'woie. <sup>10</sup>I' sulu kòs wa ie' tò s'wömeuletš weinuk aishkuö ta' esepa k'jító'weraè. Ie'pa kè wa Jesús tté mok' e' dalèritš e' tsatkoie, e' kueki ie'pa wömeuletš weinuk. <sup>11</sup>E' kueki Skèköl tò ie'pa wömerattsa as ie'pa e' k'jító'ù Wëm Suluè Ichökle e' kache wa. <sup>12</sup>Es ie'pa kè tò tté mok'ie ñe' klö'wè. E' skéie ie'pa ttsè'r buaè i' sulu wamblö, e' kueki Skèköl tò ie'pa wömerattsa weinuk aishkuö ta. Esepa kòs k'j inuí döraè.

### S'yè tò se' shukitbak tsatke

<sup>13</sup>Erè, a yamipa, a' dalèr tajè Skèkèpa Jesús éna. Tsawé ta' Skèköl tò a' shukitbak tsatke

iWiköl tö a' batse'wè e' batamik. Ñies a' tsatkëne ttè mokjè kló'wé a' tö e' batamik. E' kòs kuèkí sa' kawõtá wéstela chök Skèköl a' kekraè a' kí. <sup>14</sup> Sa' tö Jesús tté buaè paka' a' a, e' wa Skèköl tö a' kló'bak as a' ser michoë Skèkëpa Jesucristo ta' ñita e' olo tajè e' a.

<sup>15</sup> A yamipa, e' kuèkí, ttè wa sa' tö a' yö' mik sa' bak a' shua eta, ñies mik sa' tö yèkkuö kit a' a eta, ttè e' kòs blö buaè a' er a, kè ilo'yar. <sup>16</sup> Skèkëpa Jesucristo ena Skèköl dör S'yé, e'pa éna se' dalër tajè. Ie'pa er buaè chè se' a, e' tö se' er pablè michoë. Ñies ie'pa kablè' sene michoë muk se' a, e' panuk kröröè se' tso'ie. <sup>17</sup> As ie'pa tö a' er pablö. As ie'pa tö a' er diché kí iö as a' tö i' buaè kòs ù ttè wa ena iwawatke.

### 3

#### *S'yé a' ikiö sa' kí*

<sup>1</sup> A yamipa, bata ekkè ta, a' tö Skèköl a' ikiö sa' kí as Skèkëpa Jesús tté pakeke sa' tö, e' kí pakar bet ká ulitane wakpa a' ta e'pa tö ikló'wé wés a' tö ikló' es. <sup>2</sup> Ñies pé' tso' tajè kè erblökü' Jesús mik, e' kuèkí a' ikiö Skèköl a' tö ie' tö sa' tsatkó pé' sulusi yöki. <sup>3</sup> Erè Skèkëpa Jesús ttö mokjè, ie' tö a' se'weraè tkèulewa darèrè ie' mik ta' a' tsatkeraèitö i' sulu yöki. <sup>4</sup> Sa' e' mué ie' mik tö ie' tö a' kimerae. E' kuèkí sa' wa ijcher tö i' uk a' ké sa' tö, e' wawé a' tö ta' a' iwè michoë. <sup>5</sup> As Skèkëpa tö a' kìmù kòs Skèköl éna se' dalër e' wà anuk. Ñies as a' kïmuitö a' weirke kòs e' dalè'ttsök wés Cristo tö ie' icha dalè'ttsé' es.

#### *Se' kawõtá kanèblök*

<sup>6</sup> A yamipa, Skèkëpa Jesucristo ttö wa sa' tö a' a' icheke tö s'yamipa wèlepa bikërke, esepa yöki a' e' skö. Wépa kè tö ttè me'at sa' tö e' iuteku', esepa yöki a' e' skö, kè iutar. <sup>7</sup> A' wá ijcher buaè tö a' kawõtá senuk wés sa' bak senuk a' ska' es. A' kè wá sa' sune bikè nuk. <sup>8</sup> Sa' kè wá yi chké ñane kè patoule. E' skéie sa' bak kanèblök darèrè ñie nañeè shtrine wa i' wa chkoie, di' yoie as sa' kè tö yi tsiriü e' tiè wa e' kanewè wa. <sup>9</sup> Mik sa' bak a' ska' warma a' kawõtá sa' sauk, sa' kkö'nuk, erè sa' kè wá i' kine a' a' es. Es sa' kanèblè' a' ska' as a' wöblar kanèblök wés sa' tö a' a' iwà kkeyé' es. <sup>10</sup> Mik sa' bak a' ska', eta ttè i' yé' sa' tö a' a': "Yi kè kanèblak, ese kè tiar." <sup>11</sup> Sa' tö ittse tö a' wèlepa bikërke tajè. Ie'pa kè kanèblökü' yés, e' skéie wépa kanèblöke esepa tsiriwèkerakitö ñie. <sup>12</sup> Pé' esepa patté sa' tö, ñies ie'pa ké sa' tö Skèkëpa Jesucristo ttö wa kanèblök darèrè bèrè e' kanéwoie.

<sup>13</sup> Erè, a yamipa, kè a' shtrinuk i' buaè uk kekraè. <sup>14</sup> Ttè shtéyö yèkkuö i' kí, e' kè iute yile tö, e' ta' ichö a' malepa a. Ie' yöki a' e' skö as ijaèrká ta' ier mane'üne. <sup>15</sup> Erè kè ie' suar sulué wés s'bolök es, e' skéie ipattö er bua' wa wés s'él es.

#### *Pablo e' chéat*

<sup>16</sup> Skèkëpa Jesús dör sene bèrè mukwak, as e' tö sene bèrè mù a' a' kekraè i' kòs tköke a' ta' e' shua. As ie' tkérie a' ulitane ta' kekraè.

<sup>17</sup> Ye' dör Pablo, e' tö shkéne i' shté ye' wák ulá wa wés ye' tö ishteke yèkkuö kòs shtéyö ese kí es. Es sulitane wá ijcher tö ye' wák tö ishté. <sup>18</sup> As Skèkëpa Jesucristo er buaè chö a' ulitane a' tajè.

## Yëkkuö tsá kit Pablo tö Timoteo a 1 Timoteo

Pablo tö yëkkuö kit mañat Jesús mik erblökwakpa wökirpa a, e' et e' dör itsá kititö Timoteo a e'. Yëkkuö i' dör ie' pattoie wes ie'pa kawöta s'wëttsuk s'wökirpaie.

Timoteo dör Pablo wapiöuk ikanè a. Mik ie' bak duladula eta Pablo tö ie' klöo' kaneblök ie' ta. Timoteo bak senuk ka kiè Litra ate Asia ee. Ie' yé dör griegowak ena imi dör Israel aleri. Mik Pablo tö Jesús tté buaé paka' Litra eta Timoteo erblè' Jesús mik. E' ukuöki mik Pablo ská bak Litra eta ie' tö Timoteo shukit kaneblök ie' ta (Hechos 16.1-4). E' ukuöki Timoteo kaneblè' tajè Pablo ta Jesús tté buaé pakök ka kua' ki kua' ki a. E' ukuöki ta Timoteo bak Jesús mik erblökwakpa wëttsuk Éfeso. Pablo tö yëkkuö i' kit Timoteo a ie' kimoie wes ie' ké senuk kaneblök.

E' kjieta wése ké kaneblök Jesús mik erblökwakpa wökirpaie ena e'pa kímukwakpaie, e' kit Pablo tö Timoteo a. Nies Jesús mik erblökwakpa tso' Éfeso e'pa shua kabene tso' tajè. Pè' welepa tö s'wöbla'weke kache tté wa, esepa kí talarke tajè, e' ché Pablo tö Timoteo a tö wes ie' kawöta tté ese shulök.

Yëkkuö i' tö se' kímèmi tajè i'ñe ta. Yëkkuö i' tö se' a ikkachè tö se' wése kawöta shushtë s'wökirpaie, nies se' wése kawöta shushtë s'wökirpa kímukwakie. E' kjieta wes s'wökirpa ké kaneblök e' tso' kitule yëkkuö tsá kit Pablo tö Timoteo a e' ki.

### Shke'wè

<sup>1</sup>Ye' dör Pablo. Ye' dör Cristo Jesús ttekölpa tsá, e'pa eköl. Skéköl dör S'tsatökowak ena Cristo Jesús mik se' erblöke, e'pa ye' ka' kané e' wá uk. <sup>2</sup>A Timoteo, ye' tso' yëkkuö i' shtök be' a. Be' dör wes ye' alá chök es tté mik se' erblöke e' wa. Skéköl dör S'yé ena Skékèpa Cristo Jesús, as e'pa er buaé chö be' a ena be' saü er siarè wa nies sene bèrè mü be' a.

Se' wöbla'ukwakpa kache tté wa, esepa wöklö'ú

<sup>3</sup>Mik ye' minea Macedonia, eta ye' kköyè' be' a: "Be' e' tsuat Éfeso pé' welepa tso' ee e'pa a ichö tö ké s'wöbla'war kache tté wa." <sup>4</sup>Ie'pa kawö chöke tajè se' ditséwö bak ka iaiä e' tté paké wa. Tté e' ké erta'wa, e' dör tté èse. Ichö ie'pa a tö ké yi wöbla'wariä kache tté ese wa. Tté ese kí sulu s'ni chö. Tté ese tö, i' weke Skéköl tö se' erblé ie' mik e' wa, ese wöklö'weke.

<sup>5</sup>Ye' kí ikiane tö s'yamipa ñi dalèritsö er maneneé wa, erbiké bua' wa. Mik ie'pa

ñi dalèritsö es, eta e' wa iwènewa tö mokí ie'pa erblöke Jesús mik. E' kueki ye' tö be' ké s'wöbla'ukwakpa kache tté wa esepa wöklö'uk, ké kar s'wöbla'uk. <sup>6</sup>Ie'pa welepa tö tté mokí méat ta ittémirak biraraé. <sup>7</sup>Ie'pa erkiöke s'wöbla'uk tté dalöièno wa. Eré ipakekerakitö wes ichöpa éna iwá anerak buaé es, eré iwákpa ké éna iwá ane.

<sup>8</sup>Se' wa ijcher tö tté dalöièno e' dör buaé, eré se' kawöta iwá jchenukwa tö i' kueki imeneat. <sup>9</sup>Se' wa ijcher tö tté dalöièno, e' ké meneat s'ser yésyèsè esepa shuloie. E' skéie imeneat wépa ké senak yésyèsè, wépa tö tté dalösewekewa, wépa dör pé' sulusi, wépa e' wamblö sulu, wépa ké tö Skéköl ena ie' siwé dalöie, wépa tö imi ö iyé ttéwa, wépa dör s'ttökwakpa, <sup>10</sup>wépa trèr, wépa serke wépa ta alakölpa skéie, wépa tö s'ditsö eki-bleke watué, wépa dör kachökowakpa, wépa tö s'kkateke kache wa, nies wépa tö i' ská ké dör tté yésyèsè sini'kué ese wambleke, esepa kos shuloie tté dalöièno meneat. <sup>11</sup>Es tté buaé ichöke e' tö se' a ikkacheke. Tté e' paké kané me'at Skéköl kikauleka tajè, e' tö ye' ulá a.

### Pablo tö wéstela ché Cristo a

<sup>12</sup>Skékèpa Cristo Jesús tö ye' er diché ieke. Ie' isuéwa tö ye' ttö mokíè, e' kueki ye' me'kaitö kaneblök ie' a. E' kueki wéstela chéyö ie' a tajè. <sup>13</sup>Ye' bak ie' chök sulué. Nies ye' bak ie' ttökatapa chök sulué, we'ikök siarè. Eré Skéköl tö ye' sué er siarè wa, kam ye' erblö ie' mik e' kueki. I' wamblé' ye' tö ie' ta, e' wá ké ane ye' éna tö e' dör sulué, e' kueki ie' tö ye' sué er siarè wa. <sup>14</sup>Es Skékèpa Jesús er buaé ché ye' a tajè shute as ye' erblö ie' mik, nies as ye' tö s'malepa dalèritsö buaé Cristo Jesús ttö wa.

<sup>15</sup>Cristo Jesús dè'bitü ká i' a pé' sulusipa tsatök. Tté e' dör yésyèsè je', silitane ké iklö'uk. Ye' bak e' wamblö sulué silitane tsata. <sup>16</sup>Eré Skéköl tö ye' sué er siarè wa, ie' tö ye' tsatkée silitane a ikkachöie tö kos Jesucristo tö se' dalè'ttsese ena er bua' wa. Ie' tö iwé es as silitane erblö Jesús mik wes ye' es ta sene michöé dö ie'pa ulá a. <sup>17</sup>Skéköl dör s'blü yöbié, ké duöta'wa, ké werta'wa, e' dör eköl éme. ¡As silitane tö ie' dalöiè tajè, ie' kjkökä tajè kekraé!

<sup>18</sup>A Timoteo, be' dör wes ye' alá es, ye' tö be' ké iwakanéuk wes Skéköl tteköl tö iyé'bak be' a es. Be' e' tköwa darèrè wes ñippökowak bua'buwa ñippö es. <sup>19</sup>Be' erblö michöé Jesús mik. Be' erbikö buaé e' wá iütö. Welepa ké wa ierbikö buaé e' wa iütène, e' kueki ie'pa erblöke Jesús mik e' olo'yé ie'pa tö. <sup>20</sup>Esepa tso' böi kiè Himeneo ena Alejandro. Ie'pa méttsa ye' tö Satanás ulá a as iwötkirdak tö Skéköl ké yerta' sulué.

## 2

*Skëköl a ikiösö sulitane kî*

<sup>1</sup> A Timoteo, ttë i' cheke ye' tō be' a e' dōr ttë bua'ie: Jesús mik erblōkwakpa kawōtā Skëköl a ikiök sulitane kî kēkraē. Ichō ie'pa a tō ie' a ikiō tō ie' tō sulitane kîmē, ñies wēstela chō ie' a sulitane kî. <sup>2</sup> Ie' a ikiō wēpa tso' se' blūpaie se' wōkirpaie esepa kōs kî as ie'pa s'wēttsū buaē. Ie'pa tō iwē es, e' tã se' serdaē bēre buaē Skëköl dalōiök ē, kē ñi chōtā suluē. <sup>3</sup> E' dōr buaē, ñies iwēr buaē Skëköl dōr S'tsatkōkwak e' wa. <sup>4</sup> Ie' kî ikiane tō sulitane tsatkēr. Ñies ie' kî ikiane tō sulitane ēna ttë mokjē e' wa ar. <sup>5</sup> Ttë e' dōr i' es:

Skëköl dōr eköl ēme.

Ñies wēm tso' eköl ēme, e' tso' se' ttë chōk Skëköl a,

e' dōr Cristo Jesús.

<sup>6</sup> Ie' wāk ē' me'ttsabak ttēwā sulitane nuī skēie.

E' bak mik Skëköl tō ikēwō me'wā etā,

as sulitane wā ijchēr tō mokjē ie' ēna se' tsatkak.

<sup>7</sup> Ttë e' wā pakōk Skëköl tō ye' klōō'bak Jesús ttekolpa tsā e'pa ekōlie. Ie' tō ye' patkē' pē' kē dōr judiowak esepa wōbla'uk ttë mokjē mik se' erblōke e' wa. I' chē ye' tō e' dōr mokjē, e' kē dōr kache.

<sup>8</sup> Bitōkicha a' ñi dapa'uke ká wa'ñe, etā ye' kî ikiane tō wēpa ttō Skëköl tã er batse'r wa, kē ulune yi kî, kē ñi chōtā'. <sup>9</sup> Ñies ye' kî ikiane tō alakōlpa e' paiō buaē, kē dōr ichkā kkachōk. Alakōlpa kē kane iyi tulōkkā tajē itsā kî. Ñies ie'pa kē kane ē' kītōkkā tajē iyi wōñarke dalōiōe oroiē lie ese wa. Datsi' tuē darērē ese kē iēr ē' tso'kā tajē. <sup>10</sup> E' skēie ie'pa kē ē' kītōkkā i buaē wēkerakitō ese wa wēs alakōlpa e' chō tō ie' tkēulewā darērē Skëköl ttë a esepa kē senuk es. <sup>11</sup> Ie'pa kawōtā s'wōblarke e' kīttsōk bēre dalōiē wa. <sup>12-14</sup> Skëköl tō Adán yō' kewe, e' ukuōkî tã Eva yō'itō. Ñies Adán kē kītēne, Eva kītēne, es ie' tō Skëköl ttë dalōseq'wā. E' kuēkî mik a' ñi dapa'uke Skëköl dalōiök, etā ye' kî ikiane tō alakōlpa tulur bēre. Ye' kē tō kawō mē ie'pa a s'wōbla'uk. Ñies ye' kē tō kawō mē ie'pa a e' alōkkā wēpa kî. <sup>15</sup> Erē alakōlpa tō ila'r kaneweke buaē ena ierblōke Jesús mik ena s'dalēritseke ena iserke batse'r ena ierbikōke buaē yēsēsē e' kōs a itkērie, e' tã itsatkērdarak.

## 3

*Skëkēpa Jesús ichapa erule e'pa wōkirpa*

<sup>1</sup> Ttë i' dōr yēsēsē: Yi ēna kanēblak Skëkēpa Jesús ichapa erule e'pa wōkirie, e' tã ese ēna kanē buaē wāk. <sup>2</sup> E' kuēkî esepa kē senuk yēsēsē, kē kî i' sulu kuēpa yi tō ikkatoie. Esepa kē alakōl tsukwā eköl ē, e'

dalōiök tajē, kē kane trēnuk. Esepa kē e' kō' nuk buaē, kãbikēitsōk buaē, ñies senuk yēsēsē as idalōiēr. Esepa kē s'yamipa datse bānet, esepa kiōkwā buaē iu a. Esepa a buaē s'wōblar Skëköl ttë wa. <sup>3</sup> Esepa kē kane ē' ttōkkā blo' wa. Esepa kē dōr kēsik tsiriwēta', e' skēie ie' er buaē chō sulitane a tã iserke bēre. Esepa kē er me'rie inukōl kî. <sup>4</sup> Esepa dōr iu wōkir buaē. Ñies esepa ala'r wōblane buaē ie' ttō dalōiök, ñies sulitane dalōiök. <sup>5</sup> Esepa kē dōr iwāk u wōkir buaē, e' tã z'wēs idōmi Skëköl ichapa erule e'pa wōkirie buaē? <sup>6</sup> Wēpa mīwā erpa Skëköl ttë a, esepa kē menukkā s'wōkirpaie dō' ie' tso'kā tajē tã iwōmerrtsā weinuk wēs bē es. <sup>7</sup> Ñies e' wakpa kē senuk yēsēsē as wēpa kē dōr Skëkēpa Jesús ichapa esepa tō idalōiō. Kē dōr es, e' tã ie'pa tō iwayuēmi tã ijaērka mi tã iarmine wēs bē kî ikiane es.

*Skëkēpa Jesús icha wōkirpa e'pa kîmukwakpa*

<sup>8</sup> Es ñies Skëkēpa Jesús ichapa erule wōkirpa e'pa kîmukwakpa kē senuk yēsēsē as idalōiēr. Esepa kē ttōk mokjē. Esepa kē kane ē' ttōkkā blo' wa. Esepa kē kane inukōl klō'uk kache wa. <sup>9</sup> Esepa kē ē' tkōkwā darērē ttë mik se' erblōke kkeyēne se' a, e' a erbike manene' wa. <sup>10</sup> Wēpa merkeka iwōkirpa kîmukwakpaie, esepa kawōtā suē kewe tō is iserdak. Kē iki i' nuī tã', e' tã imerkāmi kîmukwakpaie. <sup>11</sup> Esepa alakōlpa ñies kē senuk buaē as idalōiēr. E'pa kē kane biyōblōk, kē kane ē' ttōkkā blo' wa. E'pa kē i' kōs uk yēsēsē. <sup>12</sup> Wēpa kanēblak kîmukwakpaie, esepa kē alakōl tsukwā eköl ēme, e' dalōiök tajē, kē kane trēnuk. Esepa wōblane buaē ila'r wēttsuk ñies ie' dōr iwāk u wōkir buaē. <sup>13</sup> Kîmukwakpa tō iwakaneweke buaē, e' tã ie'pa dalōiērdaē, ñies Cristo Jesús ttë mik se' erblōke, e' pakeraeitō kē jaēne.

*Jesucristo siwē kkeyē' Skëköl tō se' a*

<sup>14</sup> Ye' mú mi' bet be' weblōk. Ye' tso' yēkkuō i' shtōk be' a <sup>15</sup> dō' ye' wōklōr etā be' wā ijchēr tō wēs se' dōr Skëköl yamipae esepa kawōtā senuk. Se' dōr Skëköl chōk e' ichapa, e'pa dōr wēs u chki bua'ie es ttë mokjē e' tsatkoie iwōklō'woje. <sup>16</sup> Jesucristo siwē e' kkeyē' Skëköl tō se' a, ttë e' dōr mokjē buaē shutē. Ttë e' dōr i' es:

Jesucristo yōne s'ditsōie.

Ie' dōr yēsēsē e' kkeyē' Skëköl Wikōl tō.

Ie' su' Skëköl biyōchōkwakpa tō.

Ie' ttë buaē e' pakane ká wa'ñe wakpa a.

Ie' mik pē' erblōke ká wa'ñe.

Ie' kinewā buaē ká jai a olo tã' tajē ee.

## 4

*S'wōbla'ukwakpa kache ttë wa*

<sup>1</sup> Skëköl Wiköl tö ichè yësyësè tö mik ká i' erkwatke, etá tajë pé' tö ierblö Jesús mik e' wateratssa. E' skéie ttè datse wimblupa tö s'kit'wëke esepa wá ena aknamapa wá esej klö'wëkerakitö. <sup>2</sup> Pé' e' ö sulu kachö tajë erbikè burinewatke esepa iutekerakitö. <sup>3</sup> Pé' ñe'sepa kè tö s'kè senukwa. Ñies ie'pa tö icheke tö chké wésele kè katar, kè ñar. Erè chké kos me'atbak Skëköl tö se' a katanoe ñanoie. E' kueki se' dör Jesús mik erblökwapka wá ttè mokjè e' jcher, e'pa wá kawö ta' chké ulitane katök ñuk wéstela chekesö ie' a' wa. <sup>4-5</sup> I' kos yö' ie' tö e' dör buaë, kè se' káne iwatöksa. Chké kos batse'ormi ie' ttè wa ena ie' a' ikie wa. E' kueki ie' a' wéstela chésö iki, e' ta' inëmisö.

### *Jesucristo kanè méso buaë*

<sup>6</sup> Ttè ekkè wa be' tö se' yamipa wöbla'wé, e' ta' be' doraë Cristo Jesús kanè méso buaë ese. Ñies iwënewá tö be' er diché iërke buaë ttè mokj mik se' erblöke e' kos wa. Ttè e' wá iutë'bitü be' tö buaë dö ikké.

<sup>7</sup> Erè kapakè èse, kè wá ta', kè tö Skëköl dalöie, ese kos kè iutar. E' skéie be' e' paulaú kekraë senuk wës Skëköl kji ikiane es. <sup>8</sup> Se' e' diché iöke e' pa kè'woie e' dör bërëbërë buaë se' a' ká i' kji è. Erè sene wës Skëköl kji ikiane es, e' tö sene buaë shütëe' e' meraë se' a' ká i' kji ñies aishkuö ta. <sup>9</sup> Ttè e' dör yësyësè, sulitane ké iklö'uk. <sup>10</sup> Se' erblétke Skëköl chök e' mik, e' kueki se' dobchöke darèrè kaneblök ie' a. Ie' dör sulitane tsatökkwak, erè bua'iewá ie' dör wépa erblé ie' mik esepa tsatökkwak.

<sup>11</sup> Ttè ekkè wa s'yamipa wöbla'ú ta ikö iwa iutök. <sup>12</sup> Kè be' e' muktsa watè be' dör duladula e' kueki. E' skéie be' ttö wa, be' ser wa, be' s'dalëritsè wa, be' erblö wa ena be' ser batse'r wa ikkachö s'malepa erblöke Jesús mik esepa a' tö wës se' kè senuk. <sup>13</sup> Kam ye' dö e' yöki be' e' chö Skëköl yëkkuö aritsök s'yamipa a' mik a' ñi dapa'uke etá. Ie'pa wöbla'ú iwa, ie'pa pattö iwa. <sup>14</sup> Mik Skëképa Jesús icha e' wökirpa ulá me'kabak be' kji, etá Skëköl tteköpa tö iyè' be' a' tö i me' Wiköl Batse'r tö be' a' kanebloie Skëköl a, e' wakaneú ie' a' buaë, kè iwe'ikar. <sup>15</sup> Be' e' chö ttè ekkè kos e' wakanéuk as sulitane tö isaú tö be' kji yörke buaë Cristo ttè wa. <sup>16</sup> Wës be' ser ena wës s'wöbla'wëbö e' kkö'nú. Be' tö iwé es kekraë, e' ta' be' ena wépa tö be' ttöke e' tsé, e'pa kos tsatökërdäe.

## 5

### *Wës be' kè senuk Jesús mik erblökwapka ta*

<sup>1</sup> Wépa kékëpatke esepa kè uñar kësik wa, e' skéie ie'pa pattö er bua' wa wës s'yéwö es. Duladulapa pattö wës s'ëlpa es. <sup>2</sup> Es ñies alaköpa kékëpatke, e' pattö wës s'mi es. Ñies busipa pattö wës s'kutapa es er yësyësè wa.

<sup>3</sup> Alakölpá schö siarëla, kè wá yi ta' e' kkö'nuk, esepa dalöio, esepa kkö'nú. <sup>4</sup> Erè schöpa wá ala'r ta' ö uyökpa ta' ö wj'chkepa ta' esepa ala'r ö isibayökpa kawötá e' wöbla'uk iwikëla ö imi atë siarë e' kkö'nuk impa tö ie'pa kköna' e' skéie. E' wër buaë Skëköl wa. <sup>5</sup> Alakölpá schö kè wá yi ta' e' kkö'nuk, serke ekörla, morke Skëköl è mik, ttöke ie' ta' ñië nañëe, esepa kawötá kímè. <sup>6</sup> Erè alakölpá schöpa e' mettsá i sulu wamblöke e' ttsé'woie buaë esepa tso' ttsé'ka, erè Skëköl a' ie'pa dör wës s'duulewá es. Esepa kè kawö ta' kímè. <sup>7</sup> Ttè e' wá iutök s'yamipa kó as kè yi tö i sulu kü ie'pa kji ikkatoie. <sup>8</sup> Es yi kè tö iyamipa kkö'nè, kè tö iyamipa ekka kkö'nè bua'iewá, ese tö ttè mik se' erblöke e' watëttsá. Ie' dör suluë tköka pé' kè erblötá' Jesús mik esepa tsatá.

<sup>9</sup> Alakölpá schö kji duas de dabom teryök (60) ö kji ta, senewabak wëm eköl è ta, esepa è kiè shtö kímè. <sup>10</sup> E' kjië ta ijcher sulitane wá tö ie'pa s'kimeke buaë, ie'pa ala'r talao' buaë, ie'pa tö ipakökwakpa datse bänet esepa ki'wá buaë, kè ie'pa tkine kanè èse uk s'batse'r malepa kimoie, ñies s'weirke esepa kimeke ie'pa tö, ie'pa e' muke íyi buaë kos ese uk e' waweke ie'pa tö. Alakölpá schö esepa kiè shtök se' kawötá yëkkuö kji ikimoie.

<sup>11-12</sup> Erè alakölpá schö kam kji duas dö dabom teryök (60) esepa kiè kè shtar yëkkuö kji, esepa kè kawötá kímè. Ie'pa tö ichëmi Cristo a' tö kè sa' serpawane, erè ie'pa erkiöwëne wépa tö, e' ta' ie'pa serdawane. Es ie'pa ttè me' kuaë, e' kè dalöiëne ie'pa wá, e' ta' e' nuí atë ie'pa kji. E' kueki esepa kiè kè shtar yëkkuö kji as kè itkö ie'pa ta' es. <sup>13</sup> Ñies a' tö alakölpá schö esepa kímè etá ie'pa bikërdaká tajë, michoë upakök u' èt u' èt biyöblök suluë, e' tiü mir mir s'yamipa tsiriuk, ttè kè yër ta' ese cherami shabatshabat. <sup>14</sup> E' kueki alakölpá schö iä busipa, esepa a' ye' tö ichè tö a' senuwane, a' ala'r kókane, a' wákpa u' kaneú. Ie'pa tö iwé es etá pé' kè wöbatsö Jesús ttè wa e'pa kè tö se' chepa suluë. <sup>15</sup> Alakölpá schö wëlepa anemibakne Cristo ttè yöki tso'ne Satanás ttö iutök, e' kueki ye' tö ichè es.

<sup>16</sup> Alaköl isie dör Jesús mik erblökkwak, e' yamipa alè dör alakölpá schö, etá ie' kè ie'pa kkö'nuk as kanè e' kè arka Skëképa icha malepa kji. Es imalepa tö alakölpá schö kè wá yi ta' e' kkö'nuk, esepa kkö'nemi.

<sup>17</sup> Skëképa Jesús icha erule erule e'pa wökirpa tö se' wëttseke buaë, esepa kawötá dalöie tajë patuë buaë. Ie'pa wépa e' ché s'pattök s'wöbla'uk Skëköl ttè wa, esepa kawötá pasuë bua'iewá. <sup>18</sup> Skëköl yëkkuö tö ichè: "Baka wë'ne tso' kanebloie trigo wöttsoie, e' kè kawö ta' kkö' payuëwá itso' kaneblök e' dalewa as ie' tö trigowö katö."



Ñies ichëitö: “Kaneblökwakpa kawötä patuë.”  
E' kuekji s'wökirpa pasauk buaë se' kawöta.

<sup>19</sup> Yile debitü s'wökirpa eköl kkatök, ese kë iutar. Erë mik idebiturak bül mañal ikkatök tä ichë tö ie'pa tö isuë, eta ttë e' wä chakö tö iyëne ö kë iyëne. <sup>20</sup> S'wökirpa tö i sulu wamblekeia, kë éna ilo'yak, esepa wöuñü s'yamipa ulitane wörki as imalepa suarka tä ie'pa kë tö iyi sulu wamblö.

<sup>21</sup> Ye' tö be' a icheke Skëköl wörki ñies Jesucristo wörki ñies Skëköl biyöchökwakpa shukitule e'pa wörki tö ttë ekképa wä iütö ñikkëë s'wökirpa ulitane tä. Ie'pa saü ñikkëë.

<sup>22</sup> Kë yi marka betbet s'wökirie. Mik be' tö imekeka, eta iwä bikeitsöwä buaë kewe. Wëm tö i sulu wamblé, ese mékabö s'wökirie e' tä ie'pa tö ichëmi tö be' tso' ie' pabakök. Ñies be' sueraë suluë ie'pa tö. Be' e' kkö'nu batse'r i sulu kos e' yöki.

<sup>23</sup> Be' shü dalër ñië, e' kuekji kë be' kàne di' ë yök. Mikle tä vino yö elkela kapöliie.

<sup>24</sup> I sulu wambleke welepa tö ese jcherwä sulitane wä bet, kam ishulir e' yöki. Erë i sulu skä tso' ese kë jcherwä yi wä dö aishkuö tä mik ishuline eta. <sup>25</sup> Es ñies i buaë wekesö ese wërwa bet. Erë kë iwëne bet, e' tä iwërdaë aishkuö tä, kë iblënu. E' kuekji kë yi marka betbet s'wökirie kam iwä bikeitsöwä buaë e' yöki.

## 6

<sup>1</sup> Wépa tso' klöulewä kanë mésoie, esepa a ichö tö ie'pa kawötä iwökirpa dalöök er bua' wa as iwökirpa kë tö Skëköl chö suluë, ñies as ie'pa kë tö ttë buaë wa se' tö s'wöbla'weke, e' chö suluë. <sup>2</sup> Ie'pa wökirpa döer Jesús mik erblökwakpa, e' tä ie'pa kë kàne idalösëukwa, ie'pa de ñi yamiie Jesús ttë wa e' kuekji. E' skéie ie'pa kë kaneblök bua'iewa. E' wä döer tö iwökirpa döer ñies Jesús mik erblökwakpa. Ie'pa döer ñi yamipa ñi dalër tajë. Ttë ekkë wa s'wöbla'ü, ichö sulitane a tö iütö.

*Se' er me'rie inuköl ki, e' döer suluë*

<sup>3</sup> Ttë buaë wa se' wöblaö' Skëképa Jesucristo tö, e' tö se' a ikkacheke tö wes seneke yësyësë Skëköl a. Ttë e' wa se' tö s'wöbla'weke. Yile tso' s'wöbla'uk ttë kua'ki wa, kë döer wes ttë wa se' tö s'wöbla'weke es, <sup>4</sup> e' tä ie' e' tso'kä tajë, erë ie' kë wä i jcher yës. Ttë kë wä tä, ese ë tso' ie'pa er a, e' kabewëkerakitö ñië se' tsiriwoie. Wépa tö ie'pa tö iüteke, esepa ukyerke s'malepa tä, ñi blabatsökëlor, ñi chöke suluë ena ñi bikeitsöke suluë. <sup>5</sup> Kekraë ñi tsiriukerak ttë kuekji. S'wöbla'ukwakpa ttë kua'ki wa, esepa er me'rie i sulu ë ki. Ttë mokj ese kë ku'ia ie'pa wä. Ie'pa tö ttë kua'ki pakeke e' blu'woie éme. <sup>6-7</sup> Erë ye' tö a' a ichë tö mik se' kune, eta se' kë wä i dë'ka. Ñies mik se' blënewa, eta kë se' wä i mine yës. E' kuekji se' serke yësyësë wës Skëköl ki ikiane

es ena se' tssë'r buaë, i tso' se' wä e' ë wa, e' tä e' döer buaë shütë se' a inuköl tajë tsata. <sup>8</sup> E' kuekji se' wä chkö tä' datsi' tä', e' tä se' kë tssë'nuk buaë, e' döer wë' se' a. <sup>9</sup> E' skéie wépa e' blu'wakka tajë, esepa erkirke i sulu wamblö tä inamëne i sulu ulä a wes düla klörwä shö' a es. Ie'pa klöulewä sene sulu a, erë ese tö ie'pa sulu'weke, erë ie'pa tö iwawëkeia, bata ekkë tä ie'pa yilitewä idikja weinuk. <sup>10</sup> Inuköl dalër s'éna e' döer i sulu tsakjië e' wä. Welepa tö inuköl kkecheke tajë, e' ukuömik ttë mik se' erblöke e' olo'yërakitö tä iweirke eriarke siarë.

*Pablo tö Timoteo bata pattë*

<sup>11</sup> Erë be' döer Skëköl kanë méso buaë. Be' e' sköttsa i sulu kos ekkë yöki. E' skéie be' e' chö senuk yësyësë wës Skëköl ki ikiane es. Be' erblö Jesús mik kekraë. S'malepa dalëritsö. Be' weirke kos e' dalë'ttsö er bua' wa. S'malepa saü er bua' wa. <sup>12</sup> Be' erblöke Jesús ttë buaë e' mik, e' kuekji be' e' tköwä darërë ñippök i sulu datse be' ki e' tä. Mik be' erblë' Jesús mik kuaë, eta e' yë'ka be' tö pë' tso' tajë e' kukua. E' këwö ska' tä Skëköl tö be' klöo'bak senuk michoë ie' tä, ttë e' mik be' e' klö'ü darërëë kekraë, kë arwa as iwä dö be' ulä a. <sup>13</sup> Skëköl döer sene muwak e' wörki, ñies Cristo Jesús e' tsatkë' ttë mokj wa Poncio Pilato ska', e' wörki ye' tö be' a ichë tö <sup>14</sup> i uk ye' tö be' ké e' wä iütö yësyësë as kë yi tö i sulu kü be' ki be' kkatöie dö mik Skëképa Jesucristo datskene olo tä' tajë eta. <sup>15</sup> Mik ikëwö de, eta Skëköl tö Jesucristo patkerane kkachë sulitane a.

Skëköl kïkarkeka tajë,  
e' eköl ë döer iyi ulitane tsata.

Ie' döer blu'pa kos e'pa Blü  
ena skëkölpa kos e'pa Këköl.

<sup>16</sup> Ie' eköl ë kë duötä' wä!

Ie' serke ie' olo tä' tajë e' shua,  
kë yi döpawä e' ska'.

Kë yi wä ie' suule iwöbla wa,  
ñies kë yi a ie' sunukwä.

ñie' ë kawötä kïkëka kekraë!

ñie' ë diché tä' tajë kekraë! ñEs e' idir!

<sup>17</sup> A Timoteo, inuköl blüpa a ichö tö ie'pa kë kàne e' tso'kä tajë. Inuköl ertä'wa, chöta'wa e' kuekji ichö ie'pa a tö ie'pa kë kàne e' maukka inuköl mik. E' skéie ie'pa a ichö tö a' e' mauka Skëköl ë mik. Ie' tö se' a iyi buaë meke tajë sënöie, se' tssë'woie buaë. <sup>18</sup> Ichö ie'pa a tö i buaë ü tajë s'kimoie. A' kë kàne kkë'blök. S'kimü a' inuköl wa er bua' wa. <sup>19</sup> Ie'pa tö iwë e' e' tä iské merane buaë Skëköl tö ie'pa a aishkuö tä. Es sene chökke e' döraë ie'pa ulä a.

*Pablo e' chëät*

<sup>20</sup> A Timoteo, Skëköl ttë buaë mëne be' ulä a, e' wakaneü er mokj wa. Kapakë kë wä tä', kë döer Skëköl dalöioie, ese kos yöki be' e' sköttsa. Ie'pa wäpa tö ichë tö e' döer ttë

mokjē. Ie' chōrak tō ie'pa wā iyi jcher tajē,  
erē e' dōr kache. <sup>21</sup> Se' welepa tō iché tō  
ttē ese sini'kuérakitō tā ttē mik se' erblōke e'  
olo'yérakitō. E' kuęki be' e' skōttsā bānet ttē  
ese kōs yōki.

As Skēkōl er buaē chō a' ulitane a.

## Yëkkuö skà kit Pablo tó Timoteo a, i' ta ide böt 2 Timoteo

Pablo bak wötëulewà Roma s'wöto wé a, e' yënetsa duas dabom teryök ena teryök kî böt Jesús kune'bak e' ukuökî (60-62 DC) e' ulatök. E' ukuökî ta ie' skà minea Jesús tté buaë pakök i' ta ide tkëtökicha. E' kèwö ska' ie' tó yëkkuö tsá kit Timoteo a ena Tito a. E' ukuökî ta wëm kiè Nero e' yöne Roma blúie eta Pablo skà wötënewane s'wöto wé a. Mik ie' tso' wötëule e' dalewa ie' tó yëkkuö i' kit Timoteo a. I' ètökicha Pablo wötënewa kuá kî. Kewe ie' bak wötëule iwák u a. I' ètökicha ie' wötënewa ká suluë ena sësëë ese a. Nies ie' monewá tabechka kicha wa. Ie' wá ijcher tó e' dör ie' kanè bata, e' kuëkî yëkkuö i' kit ie' tó Timoteo a. I' es ie' tó ikit. Et: Pablo ittse' tó ie' atë ekörla e' kuëkî ie' siánewa. Wépa kiè Figelo ena Hermógenes dör ie' wapiepa e'pa tó ie' méat. Nies wëm kiè Demas e' ena imalepa skà tó ie' méat. E' kuëkî ie' kî ikiane tó Timoteo bitü bet ie' kîmuk.

Böt: Jesús mik erblökwa kpa we'ikeke siarë Roma blú ñe' tó, e' kî Pablo tkirke tajë. E' kuëkî ie' tó Timoteo patté tajë tó ie' kawötá e' tkökwa darërë Jesús tté a. Nies ie' tó Timoteo a ichè tó ie' kawötá Jesús tté buaë e' kî wa s'wöbla'uk. E' kîieta' ie' tó Timoteo a ichè tó ie' kawötá e' chökke weinuk Jesús tté buaë kuëkî.

Yëkkuö i' tó se' a ikkachè tó wës se' kawötá senuk Jesús a. Nies se' a ichèitö tó se' kawötá e' chök weinuk Jesús mik erblè kuëkî. Welepa tó ibikeitsé tó i' dör yëkkuö bata kit Pablo tó e'.

### Shke'wè

<sup>1</sup> Ye' dör Pablo. Skèköl wák er wa ye' dör Cristo Jesús ttekölpá tsá, e'pa eköl. Ie' kablé sene michoë muk wépa batsulewá Cristo Jesús mik esepa a, e' tté pakök ye' patké'itö. <sup>2</sup> A Timoteo, ye' tso' yëkkuö i' shtök be' a. Be' dalër tajë ye' éna wës ye' wák alá es. Skèköl dör S'yé ena Skèképa Cristo Jesús, as e'pa er buaë chö be' a ena be' saü er siarë wa nies sene bërë mù be' a.

*Pablo wéstela ché Skèköl a Timoteo dalèrmik*

<sup>3</sup> Skèköl dalöieke ye' tó erbikè maneneë wa wës ye' yépa bak ká iaiaë idalöiök es. Kekraë mik ye' ttöke ie' ta ñie nañeë, eta ye' er arke be' ska' ta wéstela chekeyö be' dalèrmik. <sup>4</sup> Mik ye' minea, eta be' ii' siarë. Mik e' anewa ye' éna, eta tssësua ye' mù be' suëne as ye' tssè'rne buaë. <sup>5</sup> Nies ye' éna iane tó be' erblöke Jesús mik er mokî wa. Ye' wá ijcher buaë tó be' erblöke Skèköl mik wës be'

wi'kela Loida ena be' mi Eunice e'pa erblè' imik kewe be' yöki es.

*Kè be' jaënuK Jesús tté buaë pakök*

<sup>6</sup> E' kuëkî i me' Skèköl tó be' a kanebloie ie' a mik ye' ulá me'ka be' kî eta, e' kè olo'yar, e' kî wakaneü bua'iewá. <sup>7</sup> Skèköl kè wá se' a iWiköl mène as se' suar. E' skéie iWiköl tó se' a diché mé senoie yësyesë ie' a, ñi dalèritsoie, nies erbikoie buaë yësyesë. E' kuëkî be' kaneblo Skèköl a kè suarta'. <sup>8</sup> Kè be' jaënuK Skèképa Jesús tté buaë pakök. Nies ye' tso' wötëule Jesús tté pakè kuëkî, e' kè kî be' jaënuK. E' skéie ye' tó be' a ichè tó be' e' chö se' weirke Jesús tté kuëkî e' dalè'ttsök ye' ta Skèköl diché wa.

<sup>9</sup> Skèköl wák tó se' tsatké'ttsa ñies ie' tó se' klög' senuk batse'r ie' a. E' kè dör tó se' tó i buaë wé ie' a e' skéie. E' dör tó ie' wák tó ibikeitsé es ta iwawéitö, ie' er buaë ché se' a, e' kuëkî. Kam ká i' yör e' yöki ie' tó ibikeits tó ie' er buaë chöraë se' a Cristo Jesús batamik.

<sup>10</sup> Cristo Jesús dör S'tsatkökwaK e' dè'rö ká i' a se' a ikkachök tó Skèköl er buaë ché se' a. Ie' kotëwá shkenekane, e' wa ie' tó iwa kkaché

tó ie' e' aléka duëwá kî.

Ie' tté buaë e' tó se' a ikkacheke

tó se' kè duöpawá da'a,

e' skéie sene michoë dóraë se' ulá a

ie' tté buaë e' batamik.

<sup>11</sup> Tté buaë e' wá pakök ena s'wöbla'uk iwa Skèköl tó ye' klög' Jesús ttekölpá tsá e'pa ekölie. <sup>12</sup> E' kuëkî erë ye' weirke, erë ye' kè jaëne e' kî. Yi mik ye' erblöke, e' mik ye' batsë buaë, e' dör Jesús. Ye' wá ijcher buaë tó kanè me' Skèköl tó ye' a e' kkö'neraë ie' wák tó dö mik Skèképa Jesús datskene eta. E' kuëkî ye' kè jaëne weinuk ie' dalèrmik.

<sup>13</sup> Tté yësyesë wa ye' tó be' wöbla' e' wá iütö. Be' e' tköwá darërëë erblök Jesús è mik. Nies s'malepa dalèritsö Cristo Jesús batamik.

<sup>14</sup> Tté mokjè mène be' a, e' wá kkö'nú buaë Wiköl Bats'e'r tso' se' a e' wa as kè yi tó imane'üttsa.

<sup>15</sup> Be' wá ijcher buaë tó s'yamipa serke Asia, e'pa sraaë iekkè ta ye' watè'ttsa, e'pa böl kiè Figelo ena Hermógenes. <sup>16</sup> Erë Onesiforo kè jaëne ye' tso' wötëule e' kî. Kekraë ie' tso' ye' er pablök. As Skèképa Jesús tó ie' ena iyamipa saü er siarë wa. <sup>17</sup> Mik ie' de ié Roma, eta ie' tó ye' yulé poë ta ye' wakuéitö. <sup>18</sup> Skèképa Jesús datskene, mik e' kèwö de eta as ie' tó Onesiforo saü er siarë wa. Be' wá ijcher buaë tó wekkè ie' tó se' kîme' Éfeso.

## 2

*Be' weirke Jesús tté kuëkî e' dalè'ttsö*

<sup>1</sup> A Timoteo, be' dör ye' aläie, Skëköl er buaë chö se' a Cristo Jesús batamik, e' mik be' e' diché iö. <sup>2</sup> Wëpa ttö mokïë dirmi buaë s'wöbla'uk esepa yulö tã i yë'yö s'yamipa tajë e' kukua, ttsë' be' tö ese wa ie'pa wöbla'ü as ie'pa tö s'malepa wöbla'ü iwa.

<sup>3</sup> Se' weirke Cristo Jesús ttë kuëkj, ese dalë'ttsö darërëë wes ñippökwak buaë tö iweirke kôs e' dalë'ttseke es. <sup>4</sup> Mik ñippökwakpa tso' ikanë a, etã ie'pa kë ku' e' tiük i kuã'ki a as iwër buaë iwökir wa. <sup>5</sup> Es ñies wëpa inuke esepa kawötã ittë iütök buaë. Kë iwã iütëne, e' tã kë e' alöpakã. <sup>6</sup> Wëpa kanebloke darërë iyi kuatök, esepa ulã a iyiwö tsã döraë kewe. <sup>7</sup> I cheke ye' tö be' a ttë i' wa, e' wã bikeitsö buaë tã Skëkëpa Jesús tö be' kïmeraë as be' ëna iwã kôs ar buaë.

<sup>8</sup> Be' tö Jesucristo bikeitsö me'rie. Ie' dör se' blü bak kã iaiãë kië David e' aleri. Cristo kötëwã shkenekane, e' ttë buaë pakeke ye' tö. <sup>9</sup> Ttë buaë e' kuëkj ye' weirke siarë. Ye' tso' wötëulewã mowëwã s'wötö wë a wes pë' sulusipa es. Erë Skëköl ttë e' kë ku' wötëulewã. <sup>10</sup> E' kuëkj ye' tö i kôs dalë'ttseke wëpa shukitbak Skëköl tö esepa kïmoie as ie'pa tsatkër ena ölo yöbië dö ie'pa ulã a Cristo Jesús batamik.

<sup>11</sup> Ttë i' dör yësyësë:

Se' bätsewã Cristo kötëwã, e' tã ñita,  
e' tã se' ser michoë ie' tã ñita.

<sup>12</sup> Se' weirke Cristo dalërmik, e' dalë'ttsësö,  
e' tã ñies se' döraë s'wökirpaie ie' tã ñita.  
Se' tö ichë s'malepa a tö se' kë dör Cristo icha,  
e' tã ñies ie' tö icheraë aishkuö tã tö se' kë dör  
ie' icha.

<sup>13</sup> Ie' wák kë a e' watënuq,  
e' kuëkj erë se' tö ie' watëmittsa,  
erë ie' kë tö se' watepattsã.

*Be' kaneblö as be' wër buaë Skëköl wa*

<sup>14</sup> Be' tö ttë ekkëpa chö ie'pa a as ie'pa er arne iska' këkraë. Ie'pa pattö Skëköl wörki tö a kë kane ñi wötök ñië ttë ëse kj. E' kë dör iie bua'. E' tö wëpa tso' ittök esepa sulu'wëkewã. <sup>15</sup> Be' e' chö kanebloë Skëköl a buaë as ie' wa be' wër buaë. S'wöbla'ü yësyësë ttë mokïë e' wa, kë shiliwar shilit-shilit as be' kë jaërã be' kanë kj. <sup>16</sup> Kapakë kë dör Skëköl dalöioie, kë wã tã', ttë ese kôs yökj be' e' skötttsã. Ttë ese tö ie' wëttsëmi i sulu ë a, kë tö Skëköl ttë iütëia. <sup>17</sup> Ttë ese tö s'sulu'wëwami wes smewö tö s'katë es. Wëpa böi kië Himeneo ena Fileto e'pa s'wöbla'weke kache ttë wa. <sup>18</sup> Ie'pa tö ttë mokï watëttsã. Ie'pa tö s'wöbla'weke kache ttë wa. Ie'pa tö ichëke tö mik se' wöskuëe, etã e' dör wes se' wiköl du'wã shkenekãnetke Skëköl a es. E' kuëkj mik se' duowa, etã se' nu kë shkerpakãne aishkuö tã. Ttë e' wa ie'pa tso' wëlepa er sulu'uk tã kë ierblöiarak

Jesús mik. <sup>19</sup> Ie'pa tö s'wöbla'weke kache ttë wa, erë Skëköl ttë dör mokï e' kë manerta', e' kë wötirtã' wes ak blubluë kë wötirtã' es. Itso' kitule Skëköl yëkkuö kj, e' tö ichë: "Wëpa dör Skëköl icha, esepa s'uule ie' wã buaë." Ñies e' tö ichë: "Wëpa ichë tö ie'pa dör Skëköl icha, esepa kawötã i sulu kôs wamblekerakitö e' olo'yök."

<sup>20</sup> Inuköl blu' u a tã' tso' dakilië wëlepa yöule orochka wa, inukölchka wa, ese döi tã' bua'buwa ikawö tkö'uke buaë ese tkëie. Ñies u e' a tã' ëse tso' yöule skauchka wa, ñies kal yöule tã'ie ese döi tã' ëse. <sup>21</sup> Es se' dör. Se' e' kkö'nuke i sulu ñe' yökj, e' tã se' dömi wes tã' bua'buwa maneneë es, batse'oule, döi buaë se' Blü a iyi ulitaneie tso'tke i kôs buaë ese woie ie' a.

<sup>22</sup> I sulu wamblak duladulapa ëna, ese kôs yökj be' tköshkar. E' skëie be' e' chö senuk yësyësë. Be' kj erblö Jesús mik. S'malepa dalëritsö. Ñies be' senü bërë sulitane tã. E' kôs yulö s'malepa tö Skëkëpa chakë er maneneë wa esepa kôs tã ñita. <sup>23</sup> Ttë kë wã tã', ese kabewëkerakitö, e' kë iutar be' tö. Be' wã ijcher buaë tö ttë ese tö sulu se' kë ñippök. <sup>24</sup> Skëkëpa Jesús kanë méso kë kawötã e' tiük ñippë a. E' skëie ese kë senuk bërë sulitane tã. Ese a s'wöblarmi buaë Skëköl ttë wa, sulitane dalë'ttsekeitö er bua' wa. <sup>25</sup> Wëpa kë ëna ttë mokï iutar, esepa kawötã shuleitö er bua' wa, isalema wëkkë alë tã ie'pa er mane'umi Skëköl a tã iyörmine ttë mokï wa. <sup>26</sup> Ie'pa er mane'wëne, e' tã es ëme ie'pa tkömishkar bë ulã a. Ie' wã ie'pa tso' klöulewã wes düla klöulewã shö' a es as ie'pa e' wamblö wes ie' kj ikiane es.

### 3

*Mik kã i' erkewa, etã s'ditsö e' wamblöraë suluë*

<sup>1</sup> Be' kawötã wã ijchenuk tö mik kã i' erkewatke, etã kawö suluë datse tajë s'kj. <sup>2</sup> Pë' wák ë e' dalëritsöraë. Ie'pa er murawã inuköl kj. Ie'pa e' ttsörakã tajë, kë tkirpa yi skã kj. Ie'pa ñi chöraë suluë. Iyë ena imi, e'pa tö kë iuteparakitö. Ie'pa er suluë, kë wëstela chepa yi a. Ie'pa kë tö Skëköl dalöiepa. <sup>3</sup> Kë er ttsë'rapã buaë yi kj, kë er buarpane yi kj. Ie'pa biyöblöraë tajë. I sulu datse ie'pa er a, ese wã wambleraë ie'pa tö. Ie'pa tö s'we'ikeraë siarë. I buaë kôs suëraë suluë ie'pa tö. <sup>4</sup> Iyi sulu wambleraë akirie, iyi wambleraë kë ulë klöule. Ie'pa e' ttsörakã tajë shutëë. Skëköl kë dalëritsepaütö, e' skëie i tso' kã i' a s'ttsë'weke buaë, ese ë wa ie'pa wöbatsöraë tajë. <sup>5</sup> Ie'pa e' ö tö mokïë Skëköl dalöiekerakitö, erë wes ie' wamblörak e' wa iwënewã tö e' döi kache.

Esepa yökj be' e' kkö'nü. <sup>6</sup> Wëpa esepa wëlepa micho u ët u ët tã iwachekerakitö tö itso' s'pattök, erë e' döi kache. Ie'pa

tso' alakölpä kītēr tottola esepa dakīñuk. Alakölpä esepa tso' klöulewā i sulu wamblek-erakitō ese ulā a. İ sulu wa ie'pa wöbatsō, ese tō ie'pa erkiōweke tajē. <sup>7</sup> Ie'pa e' yuak ttē kua'kī wa mirmir kekraē, erē Skēköl ttē mokī kē ska' ie'pa er dē'. <sup>8</sup> Ie'pa esepa tō Skēköl ttē mokī cheke suluē wēs kā iaiāē Janes ena Jambrés tō Moisés yē' suluē Skēköl ttē kuekī es. Ie'pa kē a kabikeitsiā buaē. Ie'pa kē erblöku'ia mokjē Jesús mik. <sup>9</sup> Erē i wambleke ie'pa tō, ese wā kē kī ká dōpa tajē. Bet tā sulitane wā ijcherdawā tō ie'pa ttē e' kē wā tā' wēs ibak kā iaiāē Janes ena Jambrés e'pa tā es.

### *Pablo tō Timoteo bata pattē*

<sup>10</sup> Erē ttē wa ye' s'wöbla'weke e' jcher buaē be' wā. Nies wēs ye' ser, i kiane ye' kī, wēs ye' erblō Jesús mik, wēs ye' tō s'dalē'ttseke er bua' wa, wēs ye' tō s'dalēritseke, wēs ye' weine e' kōs dalē'ttsē'yō, e' kōs jcher buaē be' wā. <sup>11</sup> Wēs ye' yē'bak suluē pē' tō, wēs ie'pa tō ye' we'ik siarē Antioquia ena Iconio ena Listra, e' kōs suule buaē be' wa. Ye' weinebak tajē siarē erē Skēkēpa Jesús tō ye' tsatkē' e' kōs yōkī. <sup>12</sup> Ttē i' dōr mokjē: yi senak yēsēsē wēs Cristo Jesús kī kiane es, esepa kōs weirdaē siarē ie' ttē kī. <sup>13</sup> Erē pē' sulusipa ena s'kītō'ukwakpa esepa kī e' wambllōraē suluē shūte, s'kītō'uk ena e' kītō'uk.

<sup>14</sup> Erē be' e' tkōwā darērēē kekraē ttē wa be' wöblaone e' a. Ttē e' dōr mokjē e' jcher yēsēsē be' wā. Wēpa tō be' wöbla' iwa e'pa suule bua' be' wā, e' kuekī be' e' tkōwāia kekraē. <sup>15</sup> Es nīes, mik be' iā alala, etā Skēköl yēkkuō batse'r e' suule be' wā, e' a be' talane. Ttē e' tō be' a ikkachēmi tō Skēköl tō se' tsatkēmi se' erblē Cristo Jesús mik e' batamik. <sup>16</sup> Skēköl yēkkuō kōs, e' kitule yēsēsē wēs ie' wák tō ibikeits es. E' dōr buaē se' a s'wöbla'woie, s'wōuñoie, s'shūloie, nīes ikkachoie se' a wēs seneke yēsēsē <sup>17</sup> as wēpa dōr Skēköl icha, esepa yōr buaē da'āie tso'tke i buaē kōs ese uk.

## 4

<sup>1</sup> Cristo Jesús datskene s'blūie ká i' a olo tā' tajē s'blērulunebak kōs ena s'tso' ttsē'ka kōs esepa shūlök. Ie' wōā ena Skēköl wōā, ye' tō be' a ichē tō be' kē <sup>2</sup> ie' ttē buaē pakōk krörōē, be' éna ipakak ö be' kē éna ipakak, erē ipakō kekraē. S'shūlō, s'uñú, s'pattō, s'wöbla'ú enaē er bua' wa. <sup>3</sup> Kawō datse etā pē' kē tō Jesús ttē mokjē e' ttsepaia. E' skēie s'wöbla'ukwakpa yuleke ie'pa tō tajē ie'pa wöbla'woie ttē wēse ttsak ie'pa éna ese ē wa. <sup>4</sup> Ttē mokjē e' waterattsarakitō tā kapakē ese kōs ese klō'wērarakitō. <sup>5</sup> Erē be' e' tkōwā darērēē. Be' erbiō buaē yēsēsē. Kōs be' weirke e' dalē'ttsō buaē. Jesús ttē buaē pakō.

Kanē kōs me'at Skēköl tō be' a, e' wakaneū er bua' wa.

<sup>6</sup> Ye' duökewā, e' kēwō dökewatke. Ye' a tā e' dōr wēs iyi mekesō Skēköl a idalōioie es. <sup>7</sup> Ye' e' tkēwā darērēē kanē me' Skēköl tō ye' a e' a, e' wawéyō buaē, ye' e' batseitsē iwawoie kekraē. <sup>8</sup> E' kuekī sene yēsēsē skē, e' tso' blēule ye' a. Mik ikēwō de, etā imeraē ye' a Skēkēpa Jesús dōr s'shūlökwak yēsēsē e' tō. Kē dōr ye' ē a, nīes e' dōr wēpa éna ie' dalēr tajē ena itso'rak ie' datskene olo tā' tajē e' panuk esepa kōs a.

### *Pablo ttē bata chē Timoteo a*

<sup>9-11</sup> Demas tō ye' méat, i tso' ká i' kī e' dalērmik tā imiā Tesalónica. Nies Crescente miā Galacia ena Tito miā Dalmacia. Lucas ē atē ye' tā. E' kuekī be' shkō bet ye' weblök, kē be' e' wöklō'uk i wa. Marcos yulō tā ikiōbitū e' tā. Ye' kī ie' kiane e' kīmuk ye' kanē wa. <sup>12</sup> Tíquico patkēmiyō Éfeso. <sup>13</sup> Be' we'ikēyō, mik be' datse, etā ye' paio kīkkuō me'atyō Tróade Carpo u a, e' tsūbitū ña. Nies ye' yēkkuō me'at tseē, e' shūā wele tso', e' dōr iyiwak kkuōlit yöule yēkkuōie, ese kōs kiane ye' kī, ttē bua'iewā tso' kitule iki e' kuekī, e' kōs tsūbitū ña.

<sup>14</sup> Alejandro dōr iyi yuökwak tabecka wa, e' e' wambllē suluē ye' tā. Skēkēpa Jesús tō ie' patueraē wēs ie' e' wambllē es. <sup>15</sup> Ttē buaē pakekesō e' chē ie' tō suluē. E' kuekī be' e' kkō'nú ie' yōkī nīes.

<sup>16</sup> Ye' tsá mine shulē s'wökirpa ska' etā kē yi dē' ye' kīmuk. Sulitane tō ye' méat ekōrla. Skēköl mú kē tō ie'pa we'ikē e' kī. <sup>17</sup> Erē Skēkēpa Jesús tō ye' kīmē, ie' tō ye' a idichē mé as ye' tō S'tsátkōkwak ttē pakō sulitane tso' ee, kē dōr judiowak, e'pa kukua. Es Skēkēpa Jesús tō ye' tsatkēe ye' bolōkpa éna ye' ttakwā e'pa ulā a. <sup>18</sup> Nies ie' tō ye' yerattsa i sulu kōs e' ulā a. Ie' tō ye' tserami ká jai a wē ie' tkēr s'blūie ee, es ye' tsatkeraēitō. ¡Ie' kīkōkāsō tajē kekraē! Es e' idir.

### *Pablo e' chēat*

<sup>19</sup> Prisca ena Áquila ena Onesíforo yamipa, e'pa shke'ú ña. <sup>20</sup> Erasto e' tsēat Corinto. Trófimo kirirke, e' me'atyō Mileto. <sup>21</sup> Be' mú bitū kam tskiridiō dōwā e' yōkī. Eubolo, Pudente, Lino, Claudia ena s'yamipa kōs tso' jerō e'pa tō be' shke'wēmi.

<sup>22</sup> As Skēkēpa Jesucristo tso'ie be' tā. As Skēköl er buaē chō a' ulitane a tajē.

## Yèkkuö kit Pablo tö Tito a Tito

Mik Pablo bak klöulewä Roma e' yënettsa, etä yèkkuö i' kititö Tito a duas dabom teryök kï mañal ena teryök kï skël Jesús kune'bak e' ukuökï (63-65 DC) e' ulatök. S'wä ijcher tö Tito erblé' Jesús mik Pablo ttö wa. E' ukuökï tä ie' kaneblé' Pablo ena Timoteo e'pa tä ñita. Mik Pablo tsä bak klöulewä e' yënettsa etä ie' kaneblé' Tito tä kánane blublué' tso' dayë kië Mediterráneo e' a' e' et kië Creta eë. E' ukuökï tä Pablo mineä bñanet tä ie' tö Tito méat e' skéie. Pablo ena Tito bak senuk e' kéwö ska' tä Creta wakpa bak senuk suluë. E' kuëkï Pablo tö yèkkuö i' kit Tito a ipattoie tö se' wëse kawötä shushtë Jesús mik erblökwakpa wökirpaie ena ikimukwakpaie.

Ñies Pablo tö ie' patté tö wes ie' tö wépa ké kï Jesús tté buaë kiane, esepa wöklö'wëmi. E' kïte tä Pablo tö ie' a' iché tö s'wöbla'ukwakpa kache tté wa esepa döraë s'kitö'uk.

### Shke'wë

<sup>1</sup> Ye' dö'r Pablo. Ye' dö'r Skéköl kané méso. Ñies ye' dö'r Jesucristo ttekölpa tsä e'pa eköl. Ie' tö ye' patkë' wépa shukithakitö, esepa kimuk as ikï erblörak bua'ie ie' mik ena siwä' mokï e' kï wä ar buaë ie'pa éna. <sup>2</sup> Es ie'pa ser michoë aishkuö tä Skéköl tä, e' wä paneke ie'pa tö kröröë. Skéköl ké kachö tä'. Kam ká i' yör e' yökï ie' kablé' sene michoë muk se' a. <sup>3</sup> Mik kéwö me'bakitö e' de, etä ie' tö Jesucristo tté buaë e' wä kkaché sulitane a. Tté e' wä pakök ye' ka' Skéköl dö'r S'tsatkökwak e' tö. <sup>4</sup> A Tito, ye' tso' yèkkuö i' shtök be' a. Tté mik se' höl erblöke e' wa be' dö'r wes ye' alä chök es. Skéköl dö'r S'yë ena Jesucristo dö'r S'tsatkökwak, as e'pa er buaë chö ena sene bërë mü be' a.

*Wes Skékëpa Jesús ichapa wökirpa ké senuk*

<sup>5</sup> Ye' tö be' méat Creta, kané kianeia wë, e' eukwa. Ñies ye' tö be' méat eë as be' tö wépa tköka Skékëpa icha wökirpaie wë its'o'rak erule erule eë Creta kos a wes ye' tö be' a iyë' es. <sup>6</sup> Wépa serke yësyësë, ké yi tö i' sulu kuëpa ie'pa kï ikkatoie, esepa yulö. Esepa ké alaköl tsukwä eköl ë, e' dalöiök tajë. Esepa ala'r kos ké erblök Jesús mik buaë, ké kkatënik i' kï. Esepa ala'r ké ie'pa ttö dalöiök buaë. Wépa esepa tköka be' tö Skékëpa Jesús icha erule erule wökirpaie. <sup>7</sup> Skékëpa icha erule erule e'pa wökirpa dö'r wes Skéköl kané kuëblupa es. E' kuëkï esepa ké senuk yësyësë, ké yi tö i' sulu kuëpa ie'pa kï ikkatoie. Esepa ké e' tso' tö ie'pa ë wä iyi jcher tajë sulitane tsata. Esepa ké dö'r kësikie, ké e' ttötä'ka blo' wa. Esepa ké kane ñippök yi tä. Esepa ké kane inuköl klö'uk

kache wa s'kitö'wë wa. <sup>8</sup> E' skéie ie'pa ké s'yamipa datse ie'pa pakök, esepa kiökwa er bua' wa. Esepa ttsë'r buaë i' buaë kos e' uk. Esepa ké erblök buaë, senuk yësyësë ena batse'r ena e' kkö'nuk. <sup>9</sup> Jesús tté yësyësë wa ie'pa wöblaule, e' a' ie'pa ké e' tkökwa darërë, ké kane ilo'yök. Es esepa tö s'malepa kimëmi Jesús tté mokï wa. Ñies wépa tö tté mokï cheke suluë, esepa a' ikkayërmï tö wes ie'pa tö ibikeitseke, e' dö'r suluë.

### S'wöbla'ukwakpa kache tté wa

<sup>10</sup> Jesús mik erblökwakpa serke Creta e'pa shuä tajë s'tso' ké éna Jesús tté mokï e' iutak. Ie'pa esepa kibiiepa dö'r judiowak tö s'wöbla'wëke tö Jesús mik erblökwakpa kawötä senuk wes judiowak ser es. Tté pakeke ie'pa tö, e' ké wä tä'. Ie'pa tö s'kitö'wëke. <sup>11</sup> Ie'pa mir u' ét u' ét s'wöbla'uk kache tté wa, es ie'pa tö u' wäka welepa tso', e' kos wöä kachöwëkewa kache tté wa. Ie'pa tö s'wöbla'wëke es inuköl ë klö'woie. E' kuëkï ie'pa esepa kawötä wöklö'wë.

<sup>12</sup> Kä iaiäë wëm bak eköl Creta e' wä iyi jcher tajë, ie' tö iwakpa yë' i' es: "Creta wakpa kachö tajë kekraë. Ie'pa dö'r wes iyi-wak kañiru es, ie'pa bikër tajë, chkö tajë." <sup>13</sup> I' yë' ie' tö, e' yëne, e' kuëkï ie'pa uñü darërëë as ie'pa tö tté mik se' erblöke e' iutö yësyësë. <sup>14</sup> Es ie'pa tö judiowak tö kache tté pakeke ké wä tä', ese ké iutepaia. Es ñies wépa tö tté mokï e' watëttsä, esepa tté dalöiëno ké dalöiepaia ie'pa tö. <sup>15</sup> Wépa er maneneë, esepa a' i' kos dö'r maneneë. Eré wépa er suluë, ké erblö Jesús mik, esepa a' ké i' dö'r maneneë. Ie'pa er ena ie'pa erbië dö'r suluë. <sup>16</sup> Ie'pa e' chö tö ie'pa batsë buaë Skéköl mik, eré wes iserdak sulu, e' wa iwënewä tö e' dö'r kache. Ie'pa dö'r suluë ichök, ké tö Skéköl ttö dalöierak, ké iarak i' buaë er yës.

## 2

### Wes se' kawötä senuk Skéköl a

<sup>1</sup> Eré be' ké s'wöbla'uk kekraë Jesucristo tté mokï wa. <sup>2</sup> Wépa kékëpatke, esepa wöbla'ü tö ie'pa ké e' kkö'nuk sene sulu yöki. Ie'pa ké senuk buaë yësyësë as sulitane tö idalöiö. Ie'pa ké erbiök buaë yësyësë. Ie'pa ké e' tkökwa darërëë tté mik se' erblöke e' a. Ie'pa ké s'dalëritsök mokï ena i' kos dalë'tsökö er bua' wa. <sup>3</sup> Es ñies tayëpa kékëpatke, esepa wöbla'ü senuk Skéköl dalöië a. Ie'pa ké kane blo' kukueblökwa. Ie'pa ké kane biyöblök. E' skéie ie'pa ké s'wöbla'uk senuk buaë. <sup>4</sup> Ie'pa ké tayëpa wöbla'uk tö ikawötä imaso ena ila'rla e'pa dalëritsök buaë. <sup>5</sup> Ie'pa ké erbiök yësyësë. Ie'pa ké senuk ké trërta'. Ie'pa ké iu kanëuk buaë. Ñies ie'pa ké iwëm dalöiök buaë as ké yi tö Skéköl tté chö suluë.

<sup>6</sup> Ñies duladulapa pattö tö ie'pa ké e' kkö'nuk sene suluë kos yöki. <sup>7-8</sup> Be' senuk

yěsyěsē ie'pa wōrkj ʒs ie'pa sēr wēs be' ser es. Mik be' tso' ie'pa wōbla'uk, etā iwōbla'ū yěsyěsē er mokj wa Skēkōl dalōioie, es kē yi ʒ i sulu yērpa be' kj. Es be' holōkpa kē ʒ i sulu kunuk be' kj, e' kuēkj ie'pa jaerdakā se' kj.

<sup>9</sup> S'tso' klōulewā kanē mēsoie, esepa pattō tō ie'pa kē iwōkirpa tō kōs e' iūtōk er bua' wa ʒs iwērdak buaē iwōkirpa wa. Ie'pa kē kāne iwōkirpa iūtōk kēsik wa. <sup>10</sup> Ie'pa kē kāne iwōkirpa iyi ekiblōk, e' skēie ie'pa kē i kōs wēkerakitō e' uk buaē yěsyěsē iwā kkachole i kōs wa tō Skēkōl dōr S'tsātōkwak, e' ttē dōr buaē.

<sup>11</sup> Skēkōl tō s'tsātke, e' watkekeitō sulitane ʒ. Es ie' tō se' ʒ iwā kkacheke tō ie' er buaē chē se' ʒ. <sup>12</sup> Mik se' ʒna iʒne tō kōs Skēkōl er buaē chē se' ʒ, etā kē se' ʒna i sulu wamblakiʒ wēs wēpa kē tō ie' dalōie esepa es. Ie'pa er me'rie i sulu ē kj. E' skēie se' erbikak buaē. Se' senak yěsyěsē ena batse'r ie' ʒ wēs ie' kj ikiane es, se' serkeiʒ kā i' kj e' dalewa. <sup>13</sup> Se' tso'ia' kā i' kj etā se' tso' Jesucristo datskene olo tʒ tajē, e' panuk, e' tō se' ttsē'wēke buaē. Ie' dōr S'tsātōkwak, ie' dōr Se' Kēkōl tajē e'. <sup>14</sup> Ie' e' me'ttsʒ ttēwʒ se' skēie se' yottsʒie i sulu kōs e' ulā ʒ, n̄ies se' er paikloie manene. Es se' de ie' wāk ʒ, es se' er de i buaē uk kēkraē.

<sup>15</sup> A Tito, ttē e' chō ie'pa ʒ, ie'pa pattō, ie'pa uñū dichē wa. Es kē yi tō be' watepattsʒ.

### 3

*Wēs Jesús mik erblōkwakpa ulitane kʒwōtʒ senuk*

<sup>1</sup> A Tito, iskā chōne ie'pa ʒ tō kʒ wōkirpa ena s'shkēkipa, e'pa dalōiō, ie'pa ttē iūtō. Ichō ie'pa ʒ tō a' tso' erkj i buaē kōs e' wōie.

<sup>2</sup> Ie'pa kē kāne yi chōk suluē; ie'pa kē senuk bēre, sulitane ʒ er buaē chōk. Ie'pa kē sulitane sauk er bua' wa.

<sup>3</sup> Se' bak senuk suluē, kē kʒbikēitsōtʒ buaē, kē Skēkōl ttē iūteta'. Se' bak senuk kʒtōoule; se' bak klōulewā i sulu ulā ʒ. I sulu kiane se' kj wamblē, ese ē wamblōk se' bak. I sulu tō se' ttsē'wēke buaē, ese ē wamblōk se' bak. Se' bak senuk i sulu ē ʒ. Se' bak ukyēnuk n̄i kj. Se' sauk suluē s'malepa bak, n̄ies ie'pa sauk suluē se' bak. <sup>4</sup> Erē Skēkōl dōr S'tsātōkwak, e' er buaē chē sulitane ʒ, ie' ʒna se' dalēr tajē, e' kkachēitō se' ʒ Jesucristo wa. <sup>5</sup> Ie' tō se' tsātke ie' wāk er wa, kē dōr tō se' serke yěsyěsē e' kuēkj. Ie' se' suē er siarē wa, e' ē kuēkj ie' tō se' tsātke. Skēkōl tō Wikōl Batse'r mé senuk se' ʒ, e' tō se' er paiklé mane'wē yuē pa'ali. Sene pa'ali méitō se' ʒ. <sup>6</sup> Skēkōl tō iWikōl mé se' ʒ tajē Jesucristo dōr S'tsātōkwak, e' batamik. <sup>7</sup> Skēkōl tō se' klō'wē wēs pē' buaē yěsyěsē es ie' wōʒ, ie' er buaē chē se' ʒ, e' kuēkj. Ie' tō iwē es ʒs se' sēr michōē ie' tʒ. E' wā panēke se' tō krōrōē,

ttsē'ne buaē wa. E' kōs kuēkj ie'pa kē senuk buaē yěsyěsē Skēkōl ʒ.

<sup>8</sup> Ttē ikkē dōr yěsyěsē. Ye' kj ikiane tō be' tō ttē ikkē wa s'kj wōbla'wē tajē buaē ʒs wēpa erblōke Skēkōl mik, esepa tso'ie i buaē uk. Iyi ikkē dōr buaē sulitane ʒ s'kimoie buaē. <sup>9</sup> Erē be' e' skōttsʒ ttē tō suluē s'blabatsēlor n̄i yōkj ese kōs yōkj. Pē' wēlepa ʒna s'bak kā iʒiʒē, esepa ditsēwō ese ttē pakak kēkraē, esepa yōkj be' e' skō. N̄ies pē' wēlepa n̄i uñuke kēsik wa kēkraē ttē dalōiēno mēne Moisés a' e' kj, esepa yōkj be' e' skō n̄ies. N̄i uñē esepa kōs kē wā tʒ', kē dōr iē bua', kē ʒ s'kimer i wa. <sup>10</sup> Yi tō Jesús mik erblōkwakpa blabatsēlor, ese wōuñū darērēē etōkicha bōtōkicha. Kē itō iūtē, etā ie' uyōttsʒ a' shʒ. <sup>11</sup> Be' wʒ iʒher buaē tō pē' ese er sulu'wēwʒ i sulu tō. I sulu wamblēitō, ese tō ikichatētsʒatke.

*Ttē bata yēne Tito ʒ*

<sup>12</sup> Artemas ō Tíquico, e' ekōl patkekeyō be' ska'. Mik ie' de, etā be' kawō yōttsʒ tʒ be' shkō krōrōē Nicópolis wē ye' tso' eē. Eē ye' tō ibikeitsētke tskiridiō tkō'uk. <sup>13</sup> Zenas dōr s'shulōkwak ena Apolo, e'pa k̄imū buaē i kiane ie'pa kj kōs e' wa, ʒs imi'rak buaē. <sup>14</sup> Se' icha wōbla'ū buaē i kōs buaē e' uk. N̄ies ie'pa wōbla'ū s'siarēpa k̄imuk. Es ie'pa s̄ermi buaē Skēkōl wōrkj.

*Pablo e' chēʒt*

<sup>15</sup> Ie'pa kōs tso' ye' ska', e'pa tō be' shkē'wēmi. Wēpa ʒna sa' dalēr ttē mik se' erblōke e' dalērmik, e'pa shkē'ū n̄a. ʒs Skēkōl er buaē chō a' ulitane ʒ.

## Yëkkuö kit Pablo tö Filemón a Filemón

Pablo tö yëkkuö i' kit mik ie' bak Roma s'wöto wé a eta. E' kèwö ska' ta ie' tö yëkkuö kit Èfeso ena Filipos ena Colosas wakpa a. Ie' tö yëkkuö i' kit iklé eköl kiè Filemón e' a. Ie' serke Colosas ee. Ie' tö kanè méso kè patueta' ese to'ttsa eköl e' kiè Onésimo. E' ukuöki ta Onésimo tö ie' iyi blélur ta ibakshkarmi. E' kèwö ska' ta akblökwakpa ttekelur. E' kueki Onésimo bakshkarmi dö Roma. Eë Pablo tso' wötëulewä Jesús tté buaë paké kueki. Pablo tö Onésimo a Jesús tté buaë paké ta ierblé Jesús mik. E' kueki ie' shkakmine iwökir Filemón ska' ie' a kët kët chökne.

E' kueki Pablo tö yëkkuö i' kit Filemón a as ie' kè ulurka Onésimo ki. Pablo tö iché Filemón a tö Jesús éna ie' daléne tajé ena i sulu nuí tso' ie' ki e' olo'ya'itö ta iki'wa buaë. Es ñies ie' kawötä Onésimo ki inuì olo'yök ta ikiökwa wës iyami ekka es.

S'kiè Onésimo griegoie e' wà kiane ché kanenamé buaë. Eré yëkkuö i' tö iché tö kam Onésimo tö Jesús tté klö'ù eta ie' kè döer kanenamé buaë. Es Pablo tso' ichök tö Jesús batamik Onésimo dömi wës ikiè wà kiane ché es.

### Shké'wè

<sup>1</sup> A Filemón, ye' döer Pablo tso' wötëulewä Cristo Jesús tté paké kueki, e' tso' yëkkuö i' shtök be' a. Ye' ena s'yami Timoteo, e'pa tö be' shké'wémi. Be' dalér tajé sa' éna, ñies be' tso' kanéblök Cristo a wës sa' es. <sup>2</sup> Ñies sa' tö s'yamipa kiè Apia ena Arquipo, e'pa shké'wémi. Arquipo döer Jesucristo tté buaë e' tsatökökwa buaë wës sa' es. Ñies Skéképa Jesús icha erule daparke be' u a, e'pa kos shké'wémi sa' tö. <sup>3</sup> Skéköl döer S'yé ena Skéképa Jesucristo, as e'pa er buaë chö ena sene bèrè mü a a.

### Pablo tö wéstela ché S'yé a Filemón ki

<sup>4-5</sup> Ye' tö be' tté tstsé tö be' erblöke buaë Skéképa Jesús mik, ñies s'batse'r malepa kos dalér be' éna. E' kueki mik ye' ttöke Skéköl ta, eta kekraé wéstela chekeyö be' dalérmik. <sup>6</sup> Tté mik se' erblöke e' a be' e' tköwä buaë s'yamipa ta ñita. Ye' tso' ikiök Skéköl a tö e' wa i buaë kos wëmisö Cristo dalérmik, e' ar be' éna. <sup>7</sup> A yami, s'batse'r malepa kos er pableke be' tö buaë, ie'pa dalér tajé be' éna. E' tö ye' tstsé'wéke buaë, tstsësua ye' er dekane.

### Pablo tö Onésimo tté ché Filemón a

<sup>8-9</sup> E' kueki ye' tö be' a ikiè er bua' wa tö i kiekeyö be' a, e' wà ú. Cristo tö ye' a kawö

mé be' kök iuk. Eré se' ñi dalér tajé, e' kueki ye' tö be' a ikieke er bua' wa. Ye' döer Pablo kéképatke tso' wötëulewä Cristo Jesús tté paké kueki e'. <sup>10</sup> Ye' be' a ikiè tö Onésimo saüne er bua' wa. Ie' erblé Jesús mik ye' ttö wa ië wé ye' tso' wötëule ee. E' kueki ie' döer wës ye' alá es.

<sup>11</sup> Kuaé ta ie' bak be' wa toulettsa be' kanè mésoie kè döer iie bua' be' a, eré i'ñe ta ie' döer buaë be' a ñies ye' a. <sup>12</sup> Ie' dalér tajé ye' éna, eré ye' tö ie' patkémine be' a. <sup>13</sup> Ye' a ta imú e' tsuat ye' ta ye' kimoie be' skéie ye' tso'ia wötëulewä Jesús tté buaë paké kueki e' dalewa. <sup>14</sup> Eré kè ye' éna i wak kam be' tö ikéwö mü e' yöki. Ye' ki ikiane tö i weke be' tö, e' ùbö be' wák er wa, kè döer tö ye' tö be' kè iuk e' kueki. <sup>15</sup> Isalema ie' minea be' yöki ekuölö è as idöne tso' be' ta kekraé. <sup>16</sup> Eré ie' dene e' kè döer kanè mésoie è, ie' dene be' yamiie Jesús tté wa dalér tajé be' éna, e' döer buaë shüté kanè méso èse tsata. Ie' dalér tajé ye' éna, eré ie' döer be' kanè kam be' ñies ie' döer wës be' èl es Jesús wa. E' kueki be' kè idaléritsök, ye' tö idaléritseke e' tsata.

<sup>17</sup> Be' tö ye' klö'wé be' yamiie Jesús mik erblé e' wa, e' ta ie' klö'ù wës ye' wák es. <sup>18</sup> Ie' tö ilé sulu wamblé' ö be' tö ie' ña'weke ilé kueki, eta ye' ña'ú iskéie. <sup>19</sup> Ye' döer Pablo tso' yëkkuö i' shtök ye' wák ulá wa, e' wák tö ie' nuí patuëraé. Kè ye' éna ichak, eré kè be' éna ichökwa tö ye' ttö wa be' tö Jesús tté klö', e' kueki be' wa nuí ta'ia ye' a. <sup>20</sup> A yami, be' we'ikéyo, be' mü er buaë chö ye' a Skéképa Jesús dalérmik. Ye' er Pablo Cristo batamik.

<sup>21</sup> Ye' wa ijcher buaë tö be' tö ye' iüteraé, e' kueki ye' tso' yëkkuö i' shtök be' a. Ye' éna iane buaë tö i kiéyo be' a, e' tsata be' tö iwëraé. <sup>22</sup> Ñies Skéköl mü tö kawö mö ye' a a' pakoie wës a' tso' ie' a ikiök es. E' kueki u yulö ye' a.

### Pablo e' chéat

<sup>23</sup> Epafras tö be' shké'wémi. Ie' tso' wötëule ye' ta Cristo Jesús tté paké kueki. <sup>24</sup> Ñies Marcos, Aristarco, Demas ena Lucas, e'pa kanéblöke Skéköl a ye' ta, e'pa tö be' shké'wémi ñies. <sup>25</sup> As Skéképa Jesucristo er buaë chö be' a.



# Yëkkuö kitule hebreowak

## a Hebreos

Yëkkuö i' kitë Israel aleripa erblé Jesús mik e'pa a. Nies ie'pa kië hebreowak ena judiowak. Kë yi wa ijcher yi tö yëkkuö i' kit. Pé' wele tö ibikeitsë tö Pablo tö ikit. Wele skä tö ichë tö Bernabé tö ikit. Wele tö ichë tö Apolo tö ikit erë kë s'wä ijcher yi tö ikit. Wele tö ibikeitsë tö ikite Roma wakpa tö Jerusalén sulu'wä e' yöki duas dabom kuryök Jesús kune'bak e' ukuöki (70 D.C.).

Israel aleripa erblé Jesús mik e' kueki e'pa bak weinuk. Ie'pa welepa éna ierblö Jesús mik e' olo'yak tä ishkakne Moisés ttë dikjä. E' kueki yëkkuö i' kitë ie'pa a ikimorak e' tkökwa darërë Jesús mik. S'kitökwakpa tö ie'pa wöbla'weke tö Jesús kë diché tä ie'pa kimoie, e' kueki ie'pa kawötä ie'pa erblö imik e' olo'yök. E' kueki yëkkuö i' kitë Jesús mik erblökwapka a Jesús kkachöie ie'pa a i' es: Skököl e' kkaché se' a Jesús wa as se' éna iar buaë. Kä iaiäë tä ie' utbitü se' tä ittekölpa wa ena ibiyöchökwapka wa ena Moisés wa, erë bataie tä iut se' tä ilä eköl ë Jesucristo e' wa.

E' kie tä kä iaiäë Skököl tö iyë'bak tö ie' kablörane Israel aleripa a. E' wä tka Jesucristo wa e' chë yëkkuö i' tö. Nies sacerdotepa tö iyiwak jcheke Jerusalén kä bit ekkë judiowak nuï olo'yoie. Iyiwak jcherke e' kë diché tä' se' nuï paiklottsä da'äie. E' kueki ie'pa tö ijcheke kekraë erë e' kë dör buaë shütë Skököl wöa. E' kueki Jesucristo köte'wä etökicha ë se' nuï paiklottsä, e' je' dör buaë shütë Skököl wöa. E' kueki Jesús dör ibua'ie. E' kueki se' kawötä erblök ie' mik ena ie' ë kawötä ttö iutë. I'ñeta ie' tkër Skököl wörki se' ttë chök Skököl a. Ie' dör ibua'ie e' kueki Israel aleripa erblé ie' mik e'pa kë kawötä ie' olo'yök. Ie' wa iyë tö ñälä yö' se' a döka ikäska'. E' kueki se' kawötä senuk e' meulettsä weinuk erblé Jesús mik e' kueki. Se' tö ie' watëttsä e' tä Skököl tö se' shuleraë wes ie' tö Israel aleripa shuli' es.

### Skököl ut se' tä ilä wa

1 Skököl utbitü taië se' yëpa bak kä iaiäë e'pa tä ittekölpa wa. Ie' utbitü ie'pa tä taië kuä'ki kuä'ki. 2 Erë j'ñe tä, mik kä i' erkawatke e' këwö ska' tä, ie' ttë se' tä iwäk alä patkë'itö kä i' ki e' wa. Tsawe tä ie' tö iyi ulitane yö' ilä tä ñita. Nies ie' tö ilä tkë'kabak as iyi ulitane dö ie' ulä a aishkuö tä. 3 Skököl Alä dör iyë olo taië e'. Wes Skököl dör e' suë ie' dör. Iyi ulitane kicha a'tser ie' wa

ittë diché taië e' wa. Se' nuï paiklëttsaitö e' ukuöki tä ie' tkëkä kä jai a dalöiertä' taië Skököl ulä bua'kka.

Skököl Alä olo tä' taië shütë Skököl biyöchökwapka tsäta

4 E' wa iwënewä tö Skököl Alä dör Skököl biyöchökwapka tso' kä jai a, e'pa kos tsäta. Es nies wes Skököl tö ie' kië iwäk alä, e' dör bua'iewä wes ie' tö ibiyöchökwapka kië e' tsäta. 5 Skököl yëkkuö ki itso' kitule tö Skököl tö ichë ilä a:

“Be' dör ye' alä;

j'ñe yö ikkachétke tö ye' dör be' ye.”\*

Erë ttë e' kë yëule ie' wä ibiyöchökwapka isie a. Nies Skököl yëkkuö ki Skököl tö ilä ttë chë i' es:

“Ye' tö icheraë tö ye' dör ie' ye,

etä ie' dör ye' alä.”†

Erë Skököl kë wä ibiyöchökwapka isie ttë yëule es. 6 Nies mik ie' tö ilä eköl ëme, e' patketetke kä i' a, etä ie' tö itté yë' i' es:

“Ye' biyöchökwapka ulitane kawötä ie' dalöiök taië.”‡

Ttë ekkë kos kueki se' wä ijcher tö Skököl Alä dör Skököl biyöchökwapka ulitane tsäta.

7 Mik Skököl tö ibiyöchökwapka ttë cheke, etä ie' tö ichë i' es:

“Ye' tö ye' biyöchökwapka patkeke wes siwa' batsjr es,

e'pa dör ye' kanë mésopa patkekeyö wes bö' wörku wöñar es.”§

8 Erë ie' tö ilä ttë cheke i' es:

“iA Skököl, be' tö s'wëttsëke s'blüie e' dör yöbië!

Be' tö s'wëttsëke yësyësë.

9 Sene yësyësë dalër be' éna, erë sene sulu ar suluë be' éna;

e' kueki, ye' dör be' Kököl, e' tö be' klö'wë tä ttsë'ne buaë méyö be' a taië be' malepa ulitane tsäta.”\*

10 Nies Skököl tö ilä ttë cheke i' es:

“A Kököl, tsawe tä be' tö kä i' yö',

ñies kä jai ena i' kos tso' iki e' yö' be' wäk tö.

11-12 E' kos chöräwa erdäwa wes datsi' nurwä tä ierwa es,

e' kos manerdattsa wes s'datsi' mane'wë tä iwötrewä es.

Erë be' tso'tke kenet. Be' kë manerpattsa, be' ser nichöë.”†

13 Skököl tö ichë ilä a i' es:

“Be' e' tköser ye' ulä bua'kka

dö mik ye' tö be' bolökpa mero' be' klö dikjä etä.”‡

Erë Skököl kë wä ttë e' yëule ibiyöchökwapka isie a. 14 Skököl biyöchökwapka dör wes siwa' es kë wërta'. E'pa kos kanëblöke Skököl a. Ie' tö ie'pa patkeke wëpa tsätkërdaë, esepa

\* 1:5 Salmo 2.7 † 1:5 2 Samuel 7.14; 1 Crónicas 17.13 ‡ 1:6 Deuteronomio 32.43 § 1:7 Salmo 104.4 \* 1:9 Salmo 45.6-7 † 1:11-12 Salmo 102.24-27 ‡ 1:13 Salmo 110.1

kimuk. E' kuęki ie' kę wā ttę ese yęule ie'pa isie a.

2

Skęköl Alå ttę buaę e' kawõtą dalöię

1 Skęköl Alå dör İyİ ulitane tsatą, e' kuęki se' kę e' tkökwa daręre ie' ttę buaę mokj ttsęule se' wā, e' a ąs kę se' mi'ne węs kanò emi di' kį es. 2 Skęköl tō ittę dalöięno, e' me'atbak İbyöchökwakpa wa se' yępa bak kå İaiąę e'pa a. Wępa kęs kę wā ttę e' dalöięne', e' nuİ kį ie'pa weine İkåwõtą weinuk es. 3-4 Es İbak ie'pa tå, erę Skęköl Alå ttę buaę, e' ę wa se' tsatkermi, e' dör ttę buaiewą ttę ulitane tsatą. S'tsatko ttę, e' tsą yę' Skękępa Jesús wák tō. Wępa tō ttę e' ttsę', e'pa tō İyę'ne se' a tå İwå kkachęrakıtō tō e' dör ttę mokj. Nies İ kę ęr yi a ese o' Skęköl tō ie'pa wa taję kua'kį kua'kį İwå kkačioe tō İ chę ie'pa tō e' dör mokj. Nies Wiköl Batse'r wa İę' tō İmę se' a kanebloie buaę ie' a taję kua'kį kua'kį węs ie' kį İkiane es. E' wa ie' tō İwå kkachę tō ie'pa ttę dör mokj. Ttę e' wå kę dalöięne se' wā, e' tå ųwęs se' tkömishkar İnuİ ulå a?

Jesús dę'bitų se' yamıę

5 Aishkuó tå kå İ' mane'werattsane Skęköl tō buaę pa'ali, e' chök sa' tso'. Skęköl tō İbikeitsbak tō kå pa'ali e' kę merpa İbyöchökwakpa a ąs ie'pa dō İwökırpaie. 6 Kę İdör es. İe' tō İbikeitsbak tō İmerdaę s'ditsó ulå a. E' dör węs İtso' kitule Skęköl yękkuó kį es, e' tō İchę: "A' Skęköl, ųs'ditsó dör yi? ųİók e' ska' be' er de?

ųWęs ie'pa kį be' tkine?

7 Erę ekuóló ę ie'pa yō' be' tō be' İbyöchökwakpa dikįą diöshęt tsir.

Erę ie'pa yō'bó olo tå taję dalöięrtå' taję.

8 İe'pa tkę'kå be' tō İyİ ulitane yō'bó e' wökirie.\*

Yękkuó e' İchę tō Skęköl tō se' tkę'kå İyİ ulitane yō' İe' tō e' wökirie. "İyİ ulitane" e' wå kiane chę tō kę İ ku', e' kę ku' se' ulå a. Erę İ'ne tå kam se' tō İsaųwå es. 9 Erę se' wā İjcher tō İ chę yękkuó e' tō, e' wå tka Jesús wa. İe' yöne s'ditsöie, e' wōanewa Skęköl İbyöchökwakpa dikįą diöshęt tsir ekuóló ę. Skęköl ęr buaę chę se' a, e' kuęki ie' tō Jesús me'tsą ttęwå sulitane nuİ skęie. Jesús weine İsarę kótęwå se' skęie, e' kuęki Skęköl tō ie' kįka'kå taję, tkę'kå İyİ ulitane İlúie dalöięrtå' taję.

10 Skęköl dör İyİ ulitane wİ, e' kęs tso' İe' wa nİes İe' a. İe' kį İkiane tō se' taję dör İe' ala' İesepa dō İe' tå nİta olo tå' taję. E' wawę İe' tō Jesucristo wa. E' kuęki buaę İdir İe' a tō Jesús weine kótęwå s'tsatkoie. Es İ kęs kiane

Skęköl kį tō Jesús tō İwę s'tsatkoie, e' węİtō seraa.

11 Jesús ena se' batse'wękeıtō, e'pa Yę dör ekól ę, e' dör Skęköl. E' kuęki Jesús dör Skęköl Alå, e' kę İaęne İchök tō se' dör İe' ęİpa ena İe' kutapa. 12 Es İtso' kitule Skęköl yękkuó kį wę İe' tō İchę Skęköl a İ' es:

"A Skęköl, ye' tō be' ttę cheraę ye' ęİpa ena ye' kutapa a.

Mik İe'pa nİ dapa'ųke, etą ye' tō be' kįkerakå ttę wa İe'pa kukua."†

13 Nİes İskå tso' kitule Skęköl yękkuó kį wę Jesús tō İchę İ' es:

"Ye' ęrİlöraę Skęköl ę mik."‡

Nİes İchęİtō:

"İę ye' dur, wępa me' Skęköl tō ye' a ala'rie, e'pa tå."§

14-15 Se' dör Jesús İcha. Erę se' dör s'ditsó ę. Se' ulitane serkeİą tå sulu se' suar s'duówå yökİ, e' wå se' tso' klöulewå. E' kuęki Jesús yöne s'ditsöie. İe' dę'bitų e' muktsą ttęwå se' skęie e' alokaİe bę İane s'duówå wİie e' kį. Es İe' tō se' tsatkeę, se' suar s'duówå yökİ, e' ulå a. 16 İwęnewå buaę tō Jesús kę dę'bitų Skęköl İbyöchökwakpa kimuk. İe' dę'bitų se' dör se' yę bak kå İaiąę Abraham, e' alerİpa kimuk. 17 E' kuęki İe' yöne s'ditsöie węs se' es ąs İe' dō sacerdote kİbİie se' ttę chök Skęköl a e' wakanewękeıtō yęsyęsę. İe' dör s'ditsó węs se' es, e' kuęki İe' tō se' suęke ęr İsarę wa. İe' wák e' me'tsą ttęwå se' skęie ąs se' nuİ olo'yar se' kį. 18 İe' weİnebak nİes İe' ęrkİöęne İ sulu wamİlök, e' kuęki İ'ne tå wępa ęrkİöęrke İ sulu wamİlök, İesepa kİmermi buaę İe' a.

3

Jesús dör Moİsés tsatą

1 A yamİpa, a' batse' Skęköl tō. İe' tō a' klö'ňak ąs a' dō İe' İchaie. Jesús İbikeİtsó bua'İe. Se' tō İchekeķą tō İe' dör Skęköl tteklö bua'İe ena se' sacerdote kİbİ mik se' ęrİlöke e'. 2 Skęköl tō İe' tkę'kå kaneİlök se' sacerdote kİbİie e' wakanewęİtō yęsyęsę węs Moİsés tō, kanę me' Skęköl tō İe' a, e' wakanęo' yęsyęsę es. Kęs İ kiane wę Skęköl wę a e' o' Moİsés tō yęsyęsę. 3 Erę Jesús dalöięrtå' taję tkökå Moİsés tsatą węs u wák dalöięr tkökå u tsatą es. 4 Se' wā İjcher tō u ulitane yuę İle tō, erę Skęköl dör İyİ ulitane yuókkwak. 5 Mokj Moİsés kaneİlę' yęsyęsę Skęköl wę a İkanę męsoie. İ o' İe' tō, e' wa İe' tō İ buaę kkachera Skęköl tō aİshkuó tå Cristo wa e' klea'. 6 Erę Cristo dör Skęköl wák ala, e' kaneİlöke yęsyęsę se' dör węs Skęköl wę es e'pa wökirie. İ buaę yę' Cristo tō tō İdoİą se' a, e' wå panekesó kröröę ttsę'ne

\* 2:8 Salmo 8.4-6 † 2:12 Salmo 22.22 ‡ 2:13 İsaías 8.17 § 2:13 İsaías 8.18

bua' wa kē tō ilo'yè, e' tã mokj se' dör Skëköl icha.

*A' e' kkö'nú Skëköl kē watarttsa*

<sup>7</sup> E' kuekj, ì ché Wikól Bats'e'r tō Skëköl yëkkuö kj, e' wã iutö buaë. E' tō ichè i' es:

"Ì cheke Skëköl tō e' tssé a' tō j'ñe tã, <sup>8</sup> etã kē a' er darë'ukwã iyökj wës a' yëpa bak kã iaiãë es.

Ie'pa e' ka'ka' e' uk kësik kësik Skëköl wöã. Ie'pa tō ie' wõñatkë' kã sir poë wé kē yi serku' tajë e' ké a.

<sup>9</sup> Skëköl tō iché tō duas dökã dabom tkëyök (40),

e' dalewa ye' tō ì kē or yi a ese wé tajë ie'pa se'woie, ie'pa kkõ'noie, erë ie'pa tō ye' wõñatkë' tajë.

<sup>10</sup> E' kuekj ye' ulunekã tajë ie'pa kj etã ye' tō ie'pa ché i' es:

'Këkraë ie'pa kē kj ikiar tō ye' ie'pa wëttsë, ie'pa kē senak wës ye' kj ikiane es.'

<sup>11</sup> E' kuekj ye' ulunekã ie'pa kj etã ye' iché tō ie'pa kē döpawã wé warma ie'pa enuweke ye' tō ee."\*

<sup>12</sup> A yamipa, a' e' kkö'nú dö' a' isie er sulurwã tã a' kē erblöia Skëköl chök e' mik tã a' e' batsöttsa iyökj. <sup>13</sup> E' skéie a' ñi er diché iö këkraë s' tsatké kéwö tso'ia j'ñe ta e' dalewa. A' tō iü es as kē a' isie e' kitö'ü sene sulu wa tã a' er darërwa Skëköl yökj. <sup>14</sup> Se' erblö Cristo mik buaë këkraë dö ibata ekké wës kuaë es, e' tã mokj se' tso' ie' tã. E' kuekj a' ñi er diché iö buaë. <sup>15</sup> Skëköl yëkkuö tō iché i' es:

"Ì cheke Skëköl tō e' tssé a' tō j'ñe tã, etã kē a' er darë'ukwã iyökj wës a' yëpa bak kã iaiãë es.

Ie'pa e' ka'ka' e' uk kësik kësik Skëköl wöã."

<sup>16</sup> Wépa tō Skëköl ttö tssé' erë ie'pa e' o' ie' wöã kësik kësik, ¿e' wakpa dör yi? ¿Kë dör ie'pa ulitane ye'ttsa Skëköl tō Egipto Moisés wa, e'pa ë? <sup>17</sup> ¿Yi kj Skëköl ulune dö duas dabom tkëyök (40)? ¿Kë dör ie'pa tō ì sulu wamblë' kã sir poë wé kē yi serku' e' a' e'pa ë? E' nuj kj idurulune. <sup>18</sup> ¿Yi a' Skëköl tō ichétke: "A' kē döpawã wé warma a' enuweke ye' tō ee?" ¿Kë dör ie'pa tō ie' tté dalöseö'wã e'pa ë? <sup>19</sup> Es se' tō isué tō ie'pa kē erblène ie' mik, e' kuekj ie'pa kē dë'wã wé warma Skëköl tō ie'pa enuweke ee.

**4**

<sup>1</sup> Ñies Skëköl kablë' se' a' tō se' döwãmi ie' tō se' enuweke e' a. E' kuekj e' tso'ia e' dalewa se' kawõtã e' kkõ'nuk tajë dö' se' wele kē ulã a idö. <sup>2</sup> Se' a' Skëköl tté buaë e' pakane wës ie'pa bak kã iaiãë, e'pa a' ipakane es. Erë ie'pa kē erblène imik, e' kuekj tte buaë tssé' ie'pa tō, e' kē dör ìie bua' ie'pa a. <sup>3</sup> Se' erblé Skëköl mik, e'pa dörãwã ie' tō se' enuweke e'

a. Erë wépa kē erblöku' ie' mik, esepa ché Skëköl tō iyëkkuö kj i' es:

"Ye' uluneka ie'pa kj etã yö ichétke ie'pa kē döpawã wé warma ie'pa enuwekeyö ee."\*

Ie' tō iché es, erë ie' kanè enewa mik kã i' yöne one etã. <sup>4</sup> Skëköl tō iyi ulitane yö' dö kã teröl. Kã de kul tã ie' eni'. Es itso' kitule wele Skëköl yëkkuö kj. E' tō iché:

"Kã de kul etã ì kos yö'bitütö e' yöne one, e' kuekj diwö e' wa ie' kē kaneblēne."

E' kuekj se' wã ijcher tō mokj Skëköl tō se' enuweke e' tso'tke. <sup>5</sup> Erë tté kitule chétkeyö, e' kj Skëköl tō iché:

"Ie'pa kē döpawã wé warma ie'pa enuwekeyö ee."\*

<sup>6</sup> Es se' wã ijcher tō Skëköl tō se' enuweke e' tso'tke se' a. Erë wépa a' tté buaë e' pakane kuaë, e'pa kē dë'wã, ie'pa tō idalöseö'wã e' kuekj. <sup>7</sup> E' ukuökj tã duas tka tajë etã Skëköl tō tté e' ë skã pakène se' a' ì kit se' blú bak kié David e' tō e' wa. Tté kitule ñe' chétkeyö, e' dör i' es:

"Ì cheke Skëköl tō e' tssé a' tō j'ñe tã, e' tã kē a' er darë'ukwã iyökj."

Es se' isué tō ikéwö skã mé Skëköl tō se' a' as se' döwã ie' se' enuweke e' a, e' kéwö dör j'ñe.

<sup>8</sup> Josué tō Israel aleripa enuúpa ie' kéwö ska' tã, e' ma Skëköl kē wã ene skã yënene. <sup>9</sup> E' wã kiane ché tō Skëköl tō se' enuwëmi wës ie' eni' mik kã i' yö'itö etã es, e' tso'ia wépa dör ie' icha esepa a. <sup>10</sup> Wépa dewã Skëköl ene e' a, esepa enuraë wës ie' eni' es. <sup>11</sup> E' kuekj se' kē e' diché iök shkowã ene e' a' as se' kē isie tō ñe'pa kē wã Skëköl tté iutène e'pa waköü.

<sup>12</sup> Skëköl tté dö'r tssé'ka, diché tã tajë, e' tō iwakaneweke buaë tkökã tabè kã yaule di'dië wj'kë iö'kë e' tsatã. Idökewã buaë dö se' er a, se' wiköl a. Ì kos dalërmik se' serke tso' blëule se' er a, ena ì kos bikeitsekesö, ese weblekettsaitö tō buaë idir ö sulu idir. <sup>13</sup> Se' e' chörakã Skëköl a. Ie' yökj ì kos yö'itö e' kē a' e' blënukwã. Ì kos tso' aie ie' wörkj. E' kuekj se' e' tköwã darërë ie' tté a.

*Jesús dör se' sacerdote kibi buaë shütë*

<sup>14</sup> Se' wã sacerdote kibi tso' eköl, e' dör sacerdotepa ulitane tsatã. E' dör Jesús, ie' dör Skëköl Alã. Ie' mineatke tso' kã jai a se' tté chök Skëköl a. E' kuekj se' kawõtã e' tkökã darërë ie' tté buaë klö'wëkesö, e' a. <sup>15</sup> Se' sacerdote kibi e' wa se' wër siarë. Mik ie' bak senuk kã i' kj, etã erë ie' ma'oule ì sulu kos wamblök wës se' es, erë ie' kē wã ì sulu wamblène yës. E' kuekj ie' wã ijcher buaë tō is s'ttsër mik se' ma'örke ì sulu wamblök etã. <sup>16</sup> E' kuekj a' shkõwã Skëköl wörkj. Mik s'kimë kiane etã ikiösö ie' a, kē

\* 3:11 Salmo 95.7-11 † 3:15 Salmo 95.7-8 \* 4:3 Salmo 95.11 † 4:4 Génesis 2.2 ‡ 4:5 Salmo 95.11

suar tã'. Ie' tò se' suëke er siarë wa, e' kuekji ie' tò se' kimeräe er bua' wa.

**5**

1 Wëpa dör sacerdotepe kibipa e'pa kos tso' shükitule iwakpa shuã kanebloie imalepa ttë chök Skëköl a. Ie'pa kanë dör iyiwak jchëule ena ilë skà merke Skëköl a, ese wakanëuk imalepa nuì olo'yoie. 2 Ie'pa dör wës imalepa es. Ie'pa dichë kè dë'ka buaë ì sulu wöklö'woie. Ie'pa weirke siarë wës imalepa weir ì sulu ulà a es. E' kuekji imalepa kè wöblaule iyi buaë wa, arkedö ì sulu a këkraë, esepa wërmi siarë ie'pa wa. 3 Nies ie'pa wakpa tò ì sulu wambleta', e' kuekji ie'pa kawötã iyiwak jchök mè Skëköl a ie'pa nuì kji nies imalepa nuì kji. 4 Kaneblök Skëköl a sacerdote kibiië, e' dör kanë buaë, dalöiërta' tajë. Kë yi yörtã' sacerdote kibiië iwák er wa. E' shushteke Skëköl ë tò ta itkëka sacerdote kibiië wës ie' tò Aarón tkë'ka es. 5 E' sù Cristo kè e' tkënekã sacerdote kibiië iwák er wa e' kjikoka. E' skéie Skëköl tò ichë ie' a:

“Be' dör ye' alà;

j'ñe ye' tò ikkacheke tò ye' dör be' yë.”\*

6 Ttë kitule skà tò ichë ì es:

“Be' dör sacerdote këkraë wës Melquisedec ese es.”†

7 Mik Jesús tso'ia kã ì' kji, etã ie' kköyë' Skëköl a tajë aneule wj'wjë ìë wa ì wa. Skëköl ë a ie' yërmittsa duëwã ulà a, e' kuekji ie' tò iki' Skëköl a tò ye' yöttsa iulà a. Ie' tò Skëköl dalöieë tajë, ittë iuteke buaë, e' kuekji ì kiéitò e' iuté Skëköl tò. 8 Erë ie' dör Skëköl Alà, erë ie' weine tajë, e' wa ie' éna iane tò wës s'weir Skëköl ttë dalöieë kuekji. 9 Mik ì uk ie' patkëne e' wéitò seraã, etã ie' de S'tsatkókwakie. Wëpa tò ie' ttë iuteke, esepa kos tsatkë michoë ie' tò. 10 Nies Skëköl tò ie' tkëka sacerdote kibiië wës Melquisedec ese es.

*A' erblöke Cristo mik, e' kè olo'yar a' tò*

11 Ttë ese tso'ia sa' wã yëno tajë, erë kè a' éna ianuk bet, e' kuekji iwà pakë a' a e' dör darërëë. 12-13 Kã iaiaë a' erblë'mi Cristo mik, ikkë tã warma a' detke s'wöbla'ukwakpaie. Erë a' skã kianene wöbla'wë Skëköl ttë tsawe tottola ese wa. A' dör wës ala'rla es kè a' chkë darërë ñar, tso' tsu' ë mik. Kam a' a iwër tò ì dör buaë ì dör suluë. 14 E' skéie chkë darërë ese dör s'wöblauletke esepa a. Ie'pa a iwënetke tò ì dör buaë ì dör suluë. E' kuekji ie'pa éna iane mik tã buaë idir mik tã sulu idir.

**6**

1 E' kuekji Cristo ttë tsã wa s'wöblane, e' ë kè chariã këkraë. E' skéie Cristo ttë kji tso' tajë, ese wa se' kji e' yuö as se' yör

iskjë wës se' kibirwã es. Kë se' kàne e' wöbla'ukne Cristo ttë tsã jchertke se' wã, ese wa. Se' wã ijchertke tò s'kawötã ì sulu nuì kji s'duöwãmi, ese kos olo'yök. Se' wã ijchertke tò s'kawötã erblök Skëköl ë mik. 2 S'wöskuë ttë ena s'ulã mùkã s'yamipa kji ese ttë wa se' wöbla'netke. S'duulewã shkerdakane ena s'weir michoë ese ttë jchertke se' wa. 3 E' kuekji kè se' e' wöbla'ukia ttë ese wa. E' skéie se' kji e' yuö Cristo ttë skà tso'ia ese wa. Skëköl tò ikëwö mé se' a, e' tã iweraësö es.

4 Wëpa wöã kã ñine'bak Cristo ttë wa, erë e'pa tò ilo'yé, e' tã çwes kawö mermine ie'pa a er mane'ukne? Ì buaë mé Skëköl tò se' a, e' kak tsëule ie'pa wa. Wiköl Batse'r dë'ñak ie'pa kji. 5 Ie'pa éna iane tò Skëköl ttë dör buaë. Skëköl këwö olo ta' tajë datske aishkuö tã, e' dichë kak sule ie'pa wa. 6 E' kos tsëule ie'pa wa, e' watëttsã ie'pa tò, e' tã çwes ie'pa dömine e' ska'? E' dör wës ie'pa tso'ne Skëköl Alà ttökwane wötëwane krus mik es. Ie'pa tso' ie' wayuök sulitane wö wa. 7 Se' dör wës të es. Iyi kuatkëne iki, kalj yëne iki buaë, warma e' wã tskirmi buaë wã wörmi buaë wës iwák kji ikiane es. Të ese a Skëköl er buaë chöraë. 8 Erë të e' kji dika'chka tsvine, kualkò tsvine, ì tsvine, e' tã e' kè dör ìie bua'. Kukur tã iwayënarcketke ì sulu a tã ñnardawã.

9 A yamipa dalër tajë sa' éna, sa' ttöke a' tã es, erë mokj sa' iklö'weke tò a' shköke buaë s'tsatkë ñalë kji. A' kè dör wës wëpa tò Cristo watëttsã esepa es. 10 Skëköl dör yësyësë. A' kanebloke buaë ie' a. A' tò s'batse'r malepa kimeke buaë, e' wekeia a' tò buaë. E' wa iwënewã tò mokj a' éna Skëköl dalër. E' kos kè ska' ie' er chöpawa. 11 Erë sa' kji ikiane tò a' ulitane tò, ì buaë weke a' tò, ese kji ü er bua' wa dö ibata ekkë. Es ì buaë kos panekesö, e' wã döraë a' ulà a da'äie. 12 Sa' kè kji ikiane tò a' bikër. E' skéie sa' kji ikiane tò a' dö wës wëpa erblötã' mokj Skëköl mik esepa es. Ì muk Skëköl kablë' se' a, e' wã panekesö enäe, e' wa iwã döraë se' ulà a.

*Se' erblömi Skëköl kablë' se' a, e' mik*

13 Mik Skëköl kablë' Abraham a, etã ie' kè kablëne yi skà ttö wa. Ie' kablë' iwák ttö wa, kè yi ku' ie' tsatã e' kuekji. 14 Ie' tò iyë' Abraham a: “Mokj ye' ichë tò ye' er buaë chöraë be' a' tajë. Be' aleripa alöweraëyö tajë.”\* 15 Ttë e' wã panë Abraham tò enäe tã Skëköl kablë'ia, e' wã de iulà a. 16 Mokj mik se' tò ttë mé yi a, etã imekesö yi dör se' tsatã, ese ttö wa. Mik se' tò ttë métkë es, etã ttë e' kji kè ì skà ku'ia chë. 17 Es nies Skëköl kji ikiane kkachë wöshak wëpa a ikablë' esepa a' tò mokj iwã döraë ie'pa ulà a, kè imane'wepaneitö yës. E' kuekji ikablë' iwák ttö wa. 18 Es se' éna iane buaë

\* 5:5 Salmo 2.7 † 5:6 Salmo 110.4 \* 6:14 Génesis 22.17

tö Skëköl tö itte mé se' a iwák ttö wa, e' kë mane'wëpaneitö yës, ie' kë kachöta' e' kueki. Ie' tö itte mé se' a iwák ttö wa tö se' erblöke ie' mik e'pa tsatkeräëitö. E' tö se' er pableke buaë. Ttë e' wä paneke se' tö kröröë, e' a se' e' tköwä darërë këkraë. <sup>19-20</sup> Ttë e' wä paneke se' tö, e' tö se' tkéwä darërëë wës tabechka tso' kanö wöklö'woje dayë shuq es. Jesús mikáne se' yöki kewe ká jaì a. Eë ie' tso' Skëköl wé kibi e' úshu batse'r tajë shute, e' a. Úshu e' kköiëule àr datsi' buririë shuqar e' wa, e' etmik ie' tso' se' ttë chök këkraë Skëköl wörki. Es ie' de se' sacerdote kibi këkraë wës Melquisedec ese es.

**7**

*Jesús dör sacerdote kibi wës Melquisedec ese es*

<sup>1</sup> Melquisedec bak ká kië Salem e' blúie. Nïes ie' kanëblë' sacerdotëie Skëköl dör iyi ulitane tsata e' a. Abraham e' ali'ka blu'pa skël wä ilayök Lot minetser e'pa ki. Mik Abraham dotkene iu a, etä Melquisedec dettsä ie' ñaletsuk tä ikië Skëköl a as e' er buaë chö ie' a. <sup>2</sup> Nïes dali kos dé'ne Abram ulä a ñippë shuq, e' blatëitö doka dabop, e' eyök méitö Melquisedec a. S'kië Melquisedec, e' wä kiane chë "sene yësyësë e' blú." Nïes ie' dör ká kië Salem, e' blú. Salem, e' wä kiane chë "sene bërë," e' kueki ñies ie' dör sene bërë blú. <sup>3</sup> Kë se' wä ijcher tö yi dör iyë, yi dör imi, yi dör iditsëwö, mik ikune ö mik idu'wä. E' kos kë ku' kitule Skëköl yëkkuö ki. E' kueki se' tö ichëmi tö ie' dör sacerdote kë ertä'wä wës Skëköl Alä es.

<sup>4</sup> Ibiëitsö buaë, e' tä a' wä ijcherdaë tö Melquisedec dalöiërta' tajë sacerdotëpa dör Leví aleripa, e'pa kos tsata. Abraham dör se' yë bak ká iaiäë dalöiërta' tajë ese. Nippë shuq ibolökpa dali de ie' ulä a, e' blatëitö doka dabop, e' eyök tsä méitö Melquisedec a. <sup>5</sup> Leví aleripa yë tsä dör Abraham wës Israel aleripa malepa es. Leví aleripa ë meneat sacerdotëpaie. Ie'pa dör Israel aleripa malepa yamipa, erë itso' kitule Moisés ttë dalöiëno, e' ki tö Israel aleripa kos kawötä iyyi kos blatök doka dabop, tä e' eyök tsä muk Leví aleripa a. <sup>6</sup> Skëköl kablë' Abraham a tö ie' döräë skëképa tajë. Erë Melquisedec kë dör Leví aleri, erë e' a Abraham tö iyyi tsä mé. Nïes Melquisedec tö ikië Skëköl a as e' er buaë chö Abraham a. <sup>7</sup> Sulitane wä ijcher tö yi tö e' ché o'ka a, ese wák dör yi a iyëne e' tsata. <sup>8</sup> Israel aleripa tö iyyi tsä meke sacerdotëpa duötä'wä esepa a. Erë Skëköl yëkkuö tö Melquisedec chë wës ie' tso'ia tstsë'ka es. <sup>9-10</sup> Mik Abraham tö iyyi tsä mé Melquisedec a, etä Leví kam kur. Erë se' tö ichëmi tö Leví aleripa bak tö iyyi tsä mé

Melquisedec a Abraham wa, Abraham dör ie'pa yë tsä e' kueki.

<sup>11</sup> Ttë dalöiëno me' Skëköl tö Israel aleripa a Moisés wa, e' ichë tö Leví aleripa ë meneat sacerdotëpaie Israel aleripa ttë chök Skëköl a as e' tö ie'pa nuö'yö. Erë e' mú a nuì olo'yarmi se' ki seraq, e'ma kë sacerdote ské ku'ki kianeia. E' kueki Skëköl tö sacerdotë ské patké. E' kë dör Leví aleripa e' eköl wës Aaron es. Ie' dör sacerdotë wës Melquisedec ese es. <sup>12</sup> Sacerdotë wësepa ské maneone ku'ki, e' tä ñies ttë dalöiëno tsä e' kawötä mane'wëttsä. <sup>13-14</sup> Sacerdotë ské patké' Skëköl tö chëyö a' a, e' dör Skëképa Jesús. E' kë dör Leví aleripa eköl. Sulitane wä ijcher buaë tö ie' dör Judá aleri. Moisés kë wä i yëule tö Judá aleripa dömi sacerdotëie. E' kueki kë ie' aleri isie tkëulekä sacerdotëie.

<sup>15</sup> Sacerdotë ské tkënekane ku'ki wës Melquisedec ese es, e' tä se' éna iwä ane tö ñies ttë dalöiëno meneat Moisés a e' maneonettsä. <sup>16-17</sup> Skëköl yëkkuö ki itso' kitule tö ie' tö Jesús a ichë i' es: "Be' dör sacerdotë këkraë wës Melquisedec ese es."\*

E' kueki se' wä ijcher tö Jesús kë tkënekä sacerdotëie ie' ditsëwö wa wës Moisés ttë ki itso' kitule es. Ie' de sacerdotëie ie' ser michoë, kë duötä'wä, e' diché wa. <sup>18-19</sup> Moisés ttë dalöiëno bak kenet, e' kë a yi onuk buaë yësyësë Skëköl wöa. E' kë diché tä, kë dör iie bua' ese wöje. E' kueki ttë e' maneonettsä. E' skéie ttë pa'ali wä panekesö kröröë e' dör i'buä'ie ttë këchke tsata, e' wa se' e' batsowami buaë Skëköl mik kë ki i sulu nu' tä'ia.

<sup>20</sup> Nïes mik Skëköl tö Jesús tkë'ka sacerdotëie, etä ie' kablë'ia iwák ttö wa tö ikaneblö michoë sacerdotëie. Ie' kë kablëne es sacerdotëpa dör Leví aleripa, e'pa a. <sup>21</sup> Erë mik ie' tö Jesús tkë'ka sacerdotëie, etä ie' kablë'ia iwák ttö wa ttë i' wa: "Be' dör sacerdotë këkraë.

Ye' kablë be' a ye' wák ttö wa, e' kë olo'yepayö yës."†

<sup>22</sup> Es Skëköl kablë' Jesús a, e' wa se' wä ijcher mokö tö ttë pa'ali mène se' a, e' dör bua'iewä ttë këchke mène Israel aleripa a e' tsata. Jesús wa se' wä ijcher yësyësë tö iwä suerasö.

<sup>23</sup> Nïes sacerdotëpa dör Leví aleripa, e'pa duötä'wä, e' kueki ie'pa kë a kanëblëne këkraë. E' kueki ie'pa ské tkëulekä tajë. <sup>24</sup> Erë Jesús ser michoë, e' kueki ie' kë skéie yi tkënuqka. <sup>25</sup> Wëpa kos shkökewä Skëköl wörki Jesús batamik, esepa ttë chök ie' tso'ie këkraë Skëköl a, e' kueki ie'pa kos tsatkermi ie' a buaë këkraë.

<sup>26</sup> Es se' isuë tö Jesús dör sacerdotë kibiie chökke. Ie' dör batse'r. Kë i sulu ku' iki, kë laulekä sene sulusi wa. Ie' butsuletttsä

\* 7:16-17 Salmo 110.4 † 7:21 Salmo 110.4

pë' sulusipa yöki. Skëköl tö ie' tkéka ká jai a iyi ulitane tsata. Sacerdote ese kiane se' ki. <sup>27</sup> Ie' kë dör wës sacerdote kibi malepa es. Ká bit tá ie'pa kawötá iyiwak jchök mè Skëköl á ie'pa nuí kuekí. E' ukuökí tá iyiwak kí jchekerakitó mè Skëköl á imalepa nuí kuekí. Erë e' qos skéie Jesús e' me'ttsá ttèwá etökicha ã se' nuí patuöie, e' kë ská tköpaia. <sup>28</sup> Wëpa tkëuleka sacerdotepa kibiie Moisés ttè wa, mokí e'pa dör wës s'malepa es, kë diché dë'ka e' kkö'nuk buaë yësyësë. Erë Moisés ttè kite, e' ukuökí tá Skëköl kablë' iwák ttò wa tö ie' alá tkërdaka se' sacerdotepa kibiie, e' dör se' sacerdote kibi yöbie bua'iewá yësyësë e'.

**8**

*Jesús dör ttè pa'alí me' Skëköl tö, e' wakanéukwak*

<sup>1</sup> Í qos cheratse sa' tö e' wà dör i': Jesús tso' se' wá sacerdotepa kibiie. Ie' tkër dalöiërtá tajë ká jai á Skëköl ulá bua'kka. <sup>2</sup> Ie' dör se' sacerdotepa kibi. Ie' tso' iwakanéuk Skëköl wé batse'r chökke tso' ká jai á e' a. E' kë yöne s'ditsó wá, e' yö' ie' wák tö.

<sup>3</sup> Sacerdote kibi qos tkëneká iyiwak tso'rak iwá jchë mè Skëköl á ena í ská mekerakitó, e' wakanéuk imalepa tsatkoie ie'pa nuí ulá a. E' kuekí Jesucristo kawötá ñies ilè muk Skëköl á se' tsatkoie. <sup>4</sup> Erë ie' kë tö ikanewëkú' ká i' a, iwakanewëkeitó ká jai á. Moisés ttè dalöiëno tö ichè tö Levi aleripa ã tkërkami sacerdotepa. E' kuekí Jesús mú tö iwakanewëke ká i' a, e'ma ie' kë tkënukká sacerdotepa, ie' kë dör Levi alerí e' kuekí. <sup>5</sup> Í kanewëke sacerdotepa tö ká i' a, ese dör ibua'ie tso' ká jai á, e' kleeke ie'pa tö ká i' a. E' dör wës ibak Moisés tá es. Mik Moisés tö u yueketke Skëköl á, eta Skëköl tö iché ie' a: "Ittsó, í qos yuó wës be' á ikkayëne Sináí kébata á e' suë." E' kuekí se' wá ijchër tö Skëköl wé kibi tso' ká i' a, e' dör ichökke tso' ká jai á e' klí ã. <sup>6</sup> Erë Jesús tkëneká se' sacerdotepa kibiie, e' wakanewëkeitó buaë sacerdotepa tso' ká i' a e'pa tsata. Ñies ie' batamik í muk Skëköl kablë' se' á ttè pa'alí wa, e' dör ibua'ie. E' kuekí ttè e' dör buaë shütë ttè këchke tsata.

*Ttè tsá mène Israel aleripa a, e' kë dalötá'ia*

<sup>7</sup> Ttè tsá mène Israel aleripa a, e' mú dör wë' as Skëköl tö se' kiöwá buaë, e'ma ttè ská pa'alí kë kianukia. <sup>8</sup> Erë ie' isuë tö ie'pa kë wá ttè tsá mène ie'pa a, e' wá iütëne buaë. E' kuekí itsó' kitule Skëköl yëkkuó kí e' tö ie'pa chë i' es:

"Skëköl tö ichè: Aishkuó tá kawö döraë, e' kéwö ska' tá ye' tö ttè pa'alí meraë Israel wakpa á ena Judá wakpa á.

<sup>9</sup> Ttè e' kë dör wës ttè tsá me' ye' tö ie'pa yépa bak ká iaiáë e'pa á es.

Ttè e' me'yó ie'pa á mik ie'pa ulaië'yó er bua' wa ibak klöulewá Egipto e' yottsaië eta.

Erë ttè me'yó ie'pa a, e' wá kë iütëne ie'pa wá,

e' kuekí ye' tö ie'pa me'at.

<sup>10</sup> Ñies Skëköl tö ichè:

Ttè pa'alí meraëyó Israel aleripa á aishkuó tá, e' dör i' es:

Ye' ttè dalöiëno e' merdaë ie'pa er a, tá ie'pa tö iüterae er bua' wa iwákpa er wa.

Ye' döraë ie'pa Këköl,

tá ie'pa döraë ye' icha.

<sup>11</sup> Ie'pa qos, tsitsirpa dö këkëpa,

e'pa batsdaë ye' mik.

E' kuekí kë ikiaripaia tö yi tö iyamipa ö o'ka wöbla'weia as ibats ye' mik.

<sup>12</sup> Í sulu qos wamblekerakitó, e' nuí olo'yeraëyó ie'pa kí,

kë ibikeitsepaiayó."\*

<sup>13</sup> Es Skëköl tö ichè tö ttè pa'alí meraëitó se' a. E' wa ie' tso' ichök tö ttè tsá mène, e' dör këchke wöitëwa. Í qos ianewatke këchke, e' bet tá kë iku'ia.

**9**

*Cristo dewá Skëköl wé a ká jai á se' ttè chök*

<sup>1</sup> Ttè dalöiëno tsá me' Skëköl tö Israel aleripa a, e' a ttè tso' tö wës ie'pa kawötá Skëköl dalöië e' wakanéuk. Ñies ie'pa wá u tso' etkue batse'r ká i' a iwakanéwoie. <sup>2</sup> Ie'pa tö u yö' Skëköl dalöie e' wakanéwoie, e' blatérakitó böt. Úshu kéwe e' kië úshu batse'r. Úshu e' a bö'wö taloká tso' et, ñies ká' tso' et, e' kí pan meke Skëköl a, ese me'r. <sup>3</sup> Úshu ská tso' datsi' buririë shukuar, e' etnik, e' kië úshu batse'r tajë shütë. <sup>4</sup> Úshu e' a ká' tso' yöule orochka wa iyi masmas ña'woie Skëköl á e'. Ñies kalkuó tkër ek, e' paiëulewá orochka wa. Kalkuó e' shuá tká' tso' etk yöule orochka wa. Tká' e' á chké me' Skëköl tö Israel aleripa á kië maná, e' kakt tso' blëule. Ñies kalkuó ñe' shuá Aarón shko kéli përi tskineka, e' tso' blëule. Ñies ishüá ák tak tso' böt, e' kí Skëköl tö ittè dalöiëno kit. Kalkuó e' kië Ttè Mène Ñi A Kélkuó. <sup>5</sup> Kalkuó e' bata kí Skëköl biyöchökwa pik tá' kië kërub, e' diököl tulur böt. E' tö se' á iwá kkacheke tö Skëköl olo tso' eë. Ipike meuleka kalkuó kköshto bata kí, eë Israel aleripa nuí olo'yarke. Erë i' tá iyi ekkë kë wá pakanuktsá ye' á jskjë.

<sup>6</sup> Es iyi ulitane bak kaneoule buaë Skëköl wé a, tá sacerdotepa bak shkökwa kékraë úshu batse'r e' á iwakanéuk. <sup>7</sup> Erë sacerdotepa kibi, e' ã á kawö tso' shkowá úshu ská tso' dör batse'r tajë shütë e' a. Eë ie' döwami etökicha ã duas wa duas wa. Mik ie' mi'kewa eë, eta ie' wá iyiwak pë mi'ke mè Skëköl á

\* 8:12 Jeremías 31.31-34

e' nuì kj, ñies ì sulu wamblé pé' malepa tò kè wà jcher ie'pa wa, ese nuì kj. <sup>8</sup> E' kos wa Wikòl Batsè'r tò se' a iwà kkacheke tò úshu batsè'r; e' wakanéorkèia, e' dalewa kè sulítane dôpawà úshu batsè'r tajè shùtè e' a. <sup>9-10</sup> Ì kos kanewèke judiowak sacerdotepa tò ttè dalòieni tsá mène ie'pa a, e' wa, e' dör chkeie, di'yeie, se' batsè'weie, ese kos dör s'pa kíkke è batsè'woie. E' tò se' kimeke kam ttè manerne e' dalewa è. E' kuekì ì meke ie'pa tò Skèkòl a idalòie e' wakanéwoie, ñies iyiwak kos jcheke mè ie' a se' nuì kj, ese kos kè a wépa tò ie' dalòiee es, esepa erbikè pairinuk. Ie'pa ittse tò inuì tso'ia ie'pa kj. Erè ì kos kanewèke ie'pa tò Skèkòl wè a, e' tò ttè pa'alì mé Skèkòl tò se' a Jesús batamik, e' wà kkacheke ì ñe ta.

<sup>11</sup> Cristo dè'bitubak. Ie' dör se' sacerdote kibi. Ie' dör ttè buaè pa'alì me' Skèkòl tò se' a e' wakanéukwak. Ie' dur iwakanéuk Skèkòl wé tso' ká jai a, e' a. Skèkòl wé e' kè yöne s'ditsò wa, e' kè dör wés iyi tso' ká i' a es. E' kuekì Skèkòl wé e' dör buaè shùtè itso' ká i' a e' tsatá. <sup>12</sup> Etökicha ème Cristo dewà Skèkòl wé tso' ká jai a e' shù batsè'r tajè shùtè, e' a s'tsatkoie. Ì wé ie' tò ee, e' dör wè', kè ie' mi'pane iská kanéukne. Mik ie' dewà ee, etá kè ie' wa chibo ò baka pé mine mè Skèkòl a se' nuì kj. E' skéie ie' wák kótewà e' pé mi ie' wa. Es ie' tò se' yéttsa michoè se' nuì ulà a. <sup>13</sup> Wépa bak ttè kèchke dikjá, esepa iane ña, e' tã chibo pé ò baka wè'ñe pé ese sklippeke sacerdotepa tò ie'pa kj ò isalema baka alaki pupula ña'wèke ese muluchka diòbléká di' wa e' sklippekerakitò ie'pa kj. Mokj e' tò ie'pa pa kíkke batsè'wéne paiklé. <sup>14</sup> Erè e' dör es, e' yitá buaè Cristo pé diché ta' tajè iyiwak pé tsatá. Skèkòl Wikòl yöbiè, e' batamik ie' wák e' me'ttsa ttèwà se' skéie wés iyiwak kè kj ì sulu ku' mè Skèkòl a ese es. Ie' pé tò se' erbikè paiklèmi ì sulu nuì kj s'duòwami ese yökj as se' tò Skèkòl chök e' dalòio.

<sup>15</sup> Jesucristo dör ttè pa'alì me' Skèkòl tò se' a, e' wakanéukwak. Ì sulu kos wamblé' wépa bak ttè tsá mène e' dikjá e'pa tò, e' nuì ulà a ie'pa yènettssá Jesús kótewà krus mik e' batamik. Ñies e' batamik ì buaè yöbiè muk Skèkòl kablè' wépa klò'obakitò as idò ie' ichaie esepa a, e' dóraè ie'pa ulà a. <sup>16-17</sup> Ye' tò iwà pakè a' a' i' es: Kam s'duòwà e' yökj s'wòblane ì mekesò s'yamipaa a, ese yèkkuò mukat. Yèkkuò e' wà kè mepa, yi tò imé ese tso'ia tssè'ka e' dalewa. Iwak blènewà, e' è tã imermi. E' kuekì s'kawötá isaukwà bua'ie tò yi tò imé, ese wák blènewatke yèkkuò e' wakanéwomi. <sup>18</sup> Es ñies ttè tsá mène, e' mène iyiwak jchèule e' pé tène ese wa. <sup>19</sup> Ttè tsá mène dalòieno, e' wà paka' Moisés tò Israel aleripa kos a. E' ukuòkj tã chibo ena baka wè'ñe pé shutuékãitò di' wa. E' sklippéitò

yèkkuò kj Skèkòl ttè dalòieno tso' kitule e' kj, ñies e' sklippéitò Israel aleripa kos kj kal kiè hisopo e' ulatska mik datsi'tak batsè' rrat-ulewà e' wa. <sup>20</sup> E' wèkeitò tã icheramitò i' es: "Pè i' dör iwà kkachioie tò ttè mè Skèkòl tò se' a e' tsá kanegnemitke." <sup>21</sup> E' sù Skèkòl wé ena ì kos tso'ia Skèkòl dalòie e' wakanéwoie, ñies ese kj Moisés tò pé sklippé. <sup>22</sup> Mokj ttè dalòieno tsá mène, e' wa tã tsir etã iyi ulitane batsè'wèkene pé wa. Ñies e' tò ichè tò iyiwak jchèule ese pé kè tène, e' tã se' nuì kè olonuk se' kj. <sup>23</sup> İyi tso' Skèkòl wé tso' ká i' a e' a, e' dör ì tso' Skèkòl wé tso' ká jai a, e' klí è. İyi ekkè kawötá batsè'wè iyiwak jchèule mè Skèkòl a, ese pé wa. Erè Skèkòl buaè iyi tso' ká jai a, e' kawötá batsè'wè ì dör buaè shùtè iyiwak pé tsatá, ese wa.

<sup>24</sup> Ì buaè e' dör Cristo. Ie' kè dè'wà Skèkòl wé shù batsè'r yöne s'ditsò wa tso' ká i' a, e' a. E' dör ibua'ie tso' ká jai a, e' klí è. E' skéie ie' de ká jai a Skèkòl wé chòkle e' a, ee ie' tso' Skèkòl a se' ttè chök. <sup>25</sup> Judiowak sacerdotepa kibipa, e'pa kawötá shkòkwa Skèkòl wé shù batsè'r tajè shùtè, e' a iyiwak pé muk Skèkòl a se' nuì kj duas bik ekkè etökicha etökicha. Erè Jesús kè dè'wà tajè wés ie'pa es. <sup>26</sup> Imú dör es, e' ma ká i' yöne dò ikké tã, etã ie' kawötá e' muktsá ttèwà duas bit ekkè. Erè e' kè dör es. E' skéie, ì ñe tã mik ká i' erkewatke, etã ie' de e' muktsá ttèwà se' skéie etökicha è se' nuì kos paiklottsa. <sup>27</sup> Sulitane a kawö meneat duòkwa etökicha è, e' ukuòkj tã se' shulirdaè. <sup>28</sup> Es ñies Cristo e' me'ttsa ttèwà etökicha è, se' tajè e' nuì paiklottsa. Ie' ská dörane, erè e' kè dör se' nuì shülök. Ie' dörane wépa tso' ie' panuk esepa tsatökòk.

**10**

*Ttè dalòieno kè a se' nuì pairinuktsa*

<sup>1</sup> Ttè dalòieno mène ká iaiã Moisés wa, e' dör ì bua'ie doia se' a Cristo batamik aishkuò tã, e' biyò yène. E' dör wés ilo es, kè dör iwà chök. E' kuekì ttè e' kè a wépa dòkewà Skèkòl ska' iyiwak jchök mè ie' a kèkraè duas bik ekkè esepa batsè'onuk da'a. <sup>2</sup> Ttè e' mú a ie'pa nuì pairinettssá mokj, e'ma ie'pa er kè tò ie'pa kkatèpaia tã ie'pa kè tò iyiwak jchepaia mè Skèkòl a. <sup>3</sup> Erè e' kè dör es. E' skéie mik ie'pa tò iyiwak jcheke mè Skèkòl a duas bit ekkè, etã e' tò ie'pa er awèkene ì sulu wamblekerakitò ese ska'. <sup>4</sup> E' wà dör tò se' nuì kè pairirpattsa baka wè'ñe pé wa ena chibo pé wa.

<sup>5</sup> E' kuekì mik Cristo dòketke ká i' a, etã ì tso' kitule Skèkòl yèkkuò kj, e' chéitò Skèkòl a, e' tò ichè i' es: "Iyiwak jcheke mè be' a ena ilè ská tso' mè be' a, e' kè kiane be' kj. Erè be' tò ye' yueketke s'ditsòie chká ta' diché ta'.

6 Iyiwak jcheke ña'wè wa'ñe be' a ena ilè skà tso' mè be' a nuì paikloie, e' kè wër bua' be' wa."

7 E' ukuòkì tã Cristo tò iché Skèkòl a: "A Skèkòl, i' ye' dur ì kiane be' kì wè e' wòie, wës ye' ttè tso' kitule be' yèkkuò kì es."

8 Kewe ie' tò iché Skèkòl a: "Iyiwak jcheke mè be' a ena ilè skà tso' mè be' a, ñies iyiwak jcheke ña'wè wa'ñe be' a nuì paikloie, ese kos kè kiane be' kì, kè iwër bua' be' wa." Erè ie' tò iché es, erè ese kos yè'atbakitò dalòie Skèkòl ttè dalòieño tso'tke kitule e' kì. 9 E' ukuòkì tã ie' tò iché: "A Skèkòl, i' ye' dur ì kiane be' kì wè e' wòie." E' wa se' éna iane tò iyiwak jcheke ie'pa tò ttè tsá dikija ese kos skéttsã Skèkòl tò iské pa'alj mokane, e' dör Cristo kötëwã se' skéie e'. 10 Ì kiane Skèkòl kì e' wà o' Jesucristo tò. Ie' wák e' me'ttsã ttëwã se' skéie etókicha è, kè skà ttetã waiã. E' kuekì Skèkòl tò se' batseo'.

11 Këkraë judiowak sacerdotepa tò iwakaneweke. Ká bit tã ie'pa tò iyiwak jcheke mè Skèkòl a sene sulu nuì kì. E' è kaneweke ie'pa tò tajë këkraë, erè e' kè a nuì pairinuktsã. 12 Erè Jesucristo e' me'ttsã ttëwã se' nuì skéie etókicha è, kè skà ttetã waiã, e' ukuòkì tã ká jai a ie' tkè'kã dalòieñta' tajë Skèkòl ulã bua'kka. 13 Eë ie' tkër Skèkòl e' alékã ibolòkpa kos kì, e' mekerò ie' klò dikija e' panuk. 14 Ie' e' me'ttsã ttëwã se' skéie etókicha è, e' wa wëpa dör ie' icha, esepa batse'wéitò buaë ichòkle Skèkòl a etókicha è, kè batse'wè kianeia.

15 Ñies Wikòl Batse'r tò ichè tò e' dör mokì. Ie' tò iché Skèkòl yèkkuò kì i' es:

16 "Kawò doraë ta ye' tò ttè pa'alj meraë ie'pa a,

e' tò ichè i' es: Ye' ttè dalòieño e' merdaë ie'pa er a,

etã ie'pa tò iüterã er bua' wa iwákpa er wa. 17 Ie'pa e' wamblo sulu kos,

kè e' biekitsëpaia ye' tò."†

18 Es se' éna iane tò se' nuì olo'yane se' kì, kè se' kawòtãia ì skà muk Skèkòl a se' nuì kì.

*Se' a kawò mène shkowã Skèkòl wörkì*

19 A yamipa, e' kuekì j'ñe tã se' dõwami buaë Skèkòl dör batse'r tajë shütë e' ska, kè suarta', Jesús kötëwã ipè tène tajë, e' batamik. 20 Kè yi dõtã'wã Skèkòl wörkì éanas wës kè yi dë'wã éanas Skèkòl wé ushü nanetkëar datsi' buririë wa e' etmik es. Erè Jesús kötëwã se' skéie e' chë datsi'ukuò jchënane e' tò. E' wa ñalã pa'alj dõ Skèkòl ska', e' kköyë'ttsã ie' tò se' a, e' dör sene michoë e' ñalë. 21 Jesús dör se' sacerdotë tajë. Ie' dör se' dör Skèkòl icha, e'pa kos wökir. 22 E' kuekì se' shkõwã Skèkòl wörkì er mokì wa ena erblè ie' mik yësyesë e' wa. Se' erbike sulu e' pairiulettsã. Se' batse'ouletke, e' dör

wës s'pa skuè buaë manene di' maneneë wa es. 23 Skèkòl ttò mokjè. Ì uk ie' kablè' se' a, e' weraëitò. E' wã panekesò kröröe. E' kuekì se' e' tkõwã darèrè ttè e' a, kè tò ibikeitsè bõt bõt. 24 A' tò ibikeitsò tò wës a' a ñi kimermi as a kì ñi dalèritsò buaë, ñies as a' tò ì buaë kì ù tajë ñi kimoie. 25 Se' ñi dapa'uke, e' kè olo'yar a' tò wës se' wëlepa wöblane iwambloëk es. E' skéie a' er kì diché iò ñita. E' yita mik se' tò isuë tò Skèkèpa Jesús datskene, e' kèwò dökewatke, etã a' er kì diché ièrmi ñita.

26 Ttè mokjè e' jchertke se' wa, erè e' ukuòkì tã ì sulu wamblekeiasò wöbla wa, e' tã kè ì ku'ia jchè mè Skèkòl a' e' nuì olo'yoie se' kì. 27 Iwamblesò es, e' tã s'pauirke shülë wa, e' è tso' se' panuk. E' dör bö' ñarke tajë wa Skèkòl tò ibolòkpa ewerawa e'. 28 Ká iaiã ye' tò ttè dalòieño me'at Moisés tò, e' dalòsëwëwã tã ikkatòkwakpa dör bö' ò mañal, e' tã ese wák ttekwã kè ulé klòule. 29 E' dör es, e' tã wëpa tò Skèkòl Alã dalòsëwëwã ¿wës esepa kè weirpa tajë shütë? Jesús pé wa ttè pa'alj mène se' a e' wakanegone, e' pé tuë tajë e' wa ie'pa batse'one, erè isuekerakitò wës se' èse pé es. Ñies Skèkòl Wikòl er buaë ché se' a, e' chekerakitò suluë. ¿Wës ie'pa tkómishkar e' nuì ulã a? 30 Skèkòl mik se' batsë e' tò ichè iyèkkuò kì i' es: "Ye' è wökì iské wërke wè. Yi tò ì sulu wamblé ese ské werayò iki."‡ Ñies ichéitò: "Skèkòl icha kos esepa shülëraë ie' tò."§ 31 jse' arwa Skèkòl chòk ulã a weinuk, e' dör siarë ichòk!

32 Erè a' éna ianú tò mik kuaë Skèkòl tò a' er ñi o' Jesús ttè buaë wa, e' kèwò ska' tã pé' tò a' we'ik siarë Jesús ttè buaë kuekì. Erè e' kos dalë'ttsè' a' tò er bua' wa. 33 Mikle tã pé' tò a' yè' suluë, ie'pa tò a' we'ik siarë sultitane wörkì. Mikle tã a' wák er wa a' e' ché weinuk wëpa weirke es esepa tã. 34 Wëpa wõtène s'wòto wé a' Jesús ttè kuekì, esepa sù' a' tò er siarë wa, ie'pa kime' a' tò. A' wã ijcher tò ì bua'ie kè ertã'wa ese tso' tajë a' wã ká jai a, e' kuekì mik pé' tò a' iyi kos yè'lur a' yökì, etã e' dalë'ttsè' a' tò ttsé'ne bua' wa. 35 A' kè e' ökwa a' weirke e' yökì, e' ské merdaë a' a' tajë, e' kuekì iwòkló'ú a' tò darèrè. 36 A' weirke e' dalë'ttsök a' kawõtã bërë er bua' wa as a' tò iü wës Skèkòl kì kiane es, ñies as ì buaë muk a' a' ie' kablè' e' mùitò. 37 E' dör wës itso' kitule Skèkòl yèkkuò kì es, e' tò Cristo ttè ché i' es:

"Wé kawõtã dök e' datsë kukuie, e' kè kì kawò tkõpa tajë.

38 Erè wëpa dör ye' icha serke yësyesë, esepa erblè buaë ye' mik, e' kuekì ie'pa ser michoë.

Erè ie'pa wëpa suanékã tã ye' ttè olo'yérakitò,

\* 10:7 Salmo 40.6-8 † 10:17 Jeremías 31.33,34 ‡ 10:30 Deuteronomio 32.35 § 10:30 Deuteronomio 32.36 \* 10:38 Habacuc 2.3-4



e' tã kã ye' wa ie'pa wërpaia buaë.\*<sup>8</sup>  
 Es itso' kitule Skëköl yëkkuö kï. <sup>9</sup> Erë se'  
 kã dör wës wëpa tö Jesús ttë buaë e' olo'yé  
 esepa es. Ie'pa weirdaë siarë aishkuö ta.  
 Se' erblöke buaë Jesús mik, e' kuekï se'  
 tsãtkërdaë.

## 11

*Se' erblö Skëköl mik wës këkëpa bak kã  
 iaiãë erblë' imik es*

<sup>1</sup> Erblë Skëköl mik, e' wã kiane chë tö se' tö  
 iklö'wë mokïë tö i muk ie' kablë' panekesö, e'  
 meraëitö se' a. Erë e' kã wërta' j'ñe ta, erë se'  
 tö iklö'wë yësýsë tö iwã suerasö. <sup>2</sup> Se' yëpa  
 bak kã iaiãë, e'pa bak erblök Skëköl mik, e'  
 kuekï ie'pa yé' ie' tö tö ie'pa dör buaë ie' wöã.

<sup>3</sup> Se' erblöke Skëköl mik, e' kuekï se' wã  
 ijcher tö ie' tö iyi ulitane yö' iwãk ttë wa. E'  
 wã kiane chë tö i kôs wërta' suësö j'ñe ta, e'  
 yöne i kã wërta', e' ë wa.

<sup>4</sup> Abel erblë' Skëköl mik, e' kuekï i mé ie' tö  
 Skëköl a inuï kï, e' dör bua'ie i mé Cain tö, e'  
 tsãta. Abel erblë Skëköl mik, e' kuekï Skëköl  
 tö ie' klö'wë wës pë' buaë yësýsë es. Nies i  
 mé ie' tö Skëköl a e' wër buaë Skëköl wa. Ie'  
 blënewabak kã iaiãë, erë ie' erblë Skëköl mik,  
 e' tö pakarkeia j'ñe ta.

<sup>5</sup> Enoc erblë' Skëköl mik, e' kuekï ie' kã  
 blënewã. Ie' minetsër ttsë'ka Skëköl wã, e'  
 kuekï kã yi wã ie' nu kune. Skëköl yëkkuö  
 ichë tö kam Enoc mi'tsër Skëköl wã, e' yökï  
 ie' wër buaë Skëköl wa. <sup>6</sup> Yi isie shkakwã  
 Skëköl wörkï, ese kawötã iklö'uk tö mokï  
 Skëköl tso'. Nies ie' kawötã iklö'uk tö wëpa  
 tö Skëköl yuleke er mokï wa, esepa ulã a iwã  
 döraë. E' kuekï kã se' erblöku' Skëköl mik, e'  
 tã kã se' a i onuk wërmi buaë ie' wa.

<sup>7</sup> Noé erblë' Skëköl mik, e' kuekï mik  
 Skëköl tö ie' a ichë tö i sulu tköraë kã i' kï  
 kã şule yi wã ese, etã ie' tö ittë iütë. Ie' tö  
 kanö bërie yué etö, e' a' ie' ena iyamipa e' ë  
 tsãtkëne. E' wa ikkayëne tö imalëpa kï nuï  
 tso'. Nies sene yësýsë dömi se' ulã a s'erblë  
 Skëköl mik e' wa, e' de ie' ulã a.

<sup>8</sup> Abraham erblë' Skëköl mik, e' kuekï mik  
 e' tö ichë ia: "Be' yú kã yë'yö tö imeraë be' a  
 e' a," etã iütëitö. Erë ie' kã wã ijcher tö kã wë  
 a ie' mïró, erë bet tã ie' yëttsã iwãk a a. <sup>9</sup> Ie'  
 erblë Skëköl mik, e' kuekï mik ie' de kã yöne  
 ie' a eë, etã ie' sené wës s'dami shkal ser es.  
 Ie' sené úla yöule datsi'tak wa, ese a. Ie' alã  
 Isaac ena itala Jacob, e'pa ñies sené wës ie'  
 es. Nies ie'pa a kã e' muk Skëköl kablë'. <sup>10</sup> Kã  
 bua'ie kã ertã'wa bikeitsbak Skëköl tö, yö'itö  
 kã jai a, e' wã panë Abraham tö. E' kuekï ie'  
 sene' wës s'dami shkal ser es, e' dalë'ttsëitö  
 er bua' wa.

<sup>11</sup> Skëköl tö iyë' ie' a: be' alã kërakã be'  
 alaköl Sara e' tã. Erë ie' dewãtke këkëpala  
 aluë, ñies Sara wake' kã döta' alãë, erë ie'  
 iklö'wë tö Skëköl kablë' ie' a e' wërãëitö.

E' kuekï dichë mène ie' a alã koka. <sup>12</sup> Ie'  
 dewãtke këkëpala aluë, erë es ie' de alãë.  
 Ilã e' wa ileripa dë'bitü tajë kã shtar ekkë  
 wës bëkwö tso' tajë ö tsa'wö tso' tajë dayë  
 kkömik kã shtar es.

<sup>13</sup> Ie'pa ekkëpa kôs erblë' Skëköl mik, kã  
 ilo'yane ie'pa wa wã, es ie'pa blërulune. Kã muk  
 Skëköl kablë ie'pa a, e' wã kã dë' ie'pa ulã  
 a ie'pa tso'ia ttsë'ka e' dalewa. Erë ie'pa tö  
 iklö'wë tö iwã döraë ie'pa ulã a aishkuö ta.  
 E' dör ie'pa a wës ilo suë kamië es. E' kuekï  
 ie'pa tö iyë' tö ie'pa ser kã i' kï wës kã kuã'kï  
 wakpa dami shkal es. <sup>14</sup> Wëpa tö ichë es, e'  
 wa iwënewã tö ie'pa tso'ia kã yulök iwãkpa  
 a. <sup>15</sup> Ie'pa mú tso'ia wë ie'pa manetë, e' kã  
 bikeitsök, e'ma ie'pa mi'mine buaë kã e' a.  
<sup>16</sup> Erë ie'pa tö kã bua'ie e' kkecheke, e' dör  
 kã tso' kã jai a. Skëköl tö kã e' yö'bak ie'pa a,  
 e' kuekï Skëköl kã jaëne tö ie' kië ie'pa Këköl.

<sup>17-19</sup> Skëköl kablë' Abraham a ttë i' wa:  
 "Be' aleripa chöke, e'pa döraë Isaac wa."  
 Erë e' ukuökï tã ie' tö ichë ia: "Isaac ttöwã  
 më ye' a ye' dalöioie." Ie' kï ikiane suë tö  
 mokï Abraham erblöke ie' mik, e' kuekï ie'  
 ima'wë es. Abraham erblë Skëköl mik, e'  
 kuekï mokï ie' tö Isaac mekettsã wës Skëköl  
 tö ie' a iyë' es. Ie' tö ibikeitsë tö ie' tö ilã  
 ttëwã, e' tã Skëköl a ishkerkamine, e' kuekï  
 ie' tö ittekewa. Erë bata ekkë tã Skëköl tö  
 ie' wöklö'wë. E' kuekï ichëmisö tö e' dör wës  
 Isaac kötëwã shkenekane es.

<sup>20</sup> Isaac erblë' Skëköl mik, e' kuekï ie' tö  
 iyë', ilã'r Jacob ena Esau, e'pa a tö aishkuö  
 tã Skëköl er buaë chöraë ie'pa a.

<sup>21</sup> Jacob erblë' Skëköl mik, e' kuekï mik  
 ie' blërkewa, e' këwö döketke, etã ie' tö iyë'  
 italapa dör José ala'r e'pa a eköl eköl tö  
 Skëköl er buaë chöraë ie'pa a. Nies Skëköl  
 dalöie ie' tö ie' e' duedur ishko kéli mik e'  
 dalewa.

<sup>22</sup> José erblë' Skëköl mik, e' kuekï mik  
 ie' blërkewãtke, etã ie' tö ichë tö aishkuö tã  
 Israel aleripa e' yöratsarak Egipto. Es ie'  
 ichëãt tö mik a' e' yëttsã kã i' a etã ye' nu tso'  
 blëule e' tsümi a' tö blëwã wë a' mïró eë.

<sup>23</sup> Nies Moisés yë ena imi, e'pa erblë'  
 Skëköl mik. Mik ie' kune, etã ie'pa tö isüë tö  
 alala buaala kune. Egipto blü tö iyë' tö Israel  
 aleripa alala kurke wëpa, e'pa kôs ttekelur.  
 Erë Moisés yë ena imi, e'pa erblë Skëköl mik,  
 e' kuekï ie'pa kã suane blu' ttë yökï. Ie'pa tö  
 Moisés blë döka'ni mañat itsãtkoie.

<sup>24</sup> Moisés talane Egipto blü duöchkeie  
 dalöiërtã' tajë. Erë ie' erblë Skëköl mik, e'  
 kuekï mik ie' de këchke, etã e' kôs watëttsã  
 ie' tö. Ie' kã kï ikiane tö ie' kirwã Egipto blü  
 duöchke. <sup>25</sup> Ie' a tã weinuk wëpa dör Skëköl  
 icha, esepa tã, e' dör buaë tkökã sene sulu tö  
 s'ttsë'wëke buaë ekuölö ë, ese kôs tsãta. <sup>26</sup> I'  
 buaë döraë ie' ulã a aishkuö tã iskieie, e' ë kï  
 ie' er me'rie. E' kuekï ie' tö bikeitsë tö iweir

kos wé pairine bitu idi' wa s'blúie e' tté kǵ, e' dör buaé shute, íyi bua' bua tso' Egipto ese kos tsata.

<sup>27</sup> Moisés erblé' Skéköl mik, e' kueki ie' e' yétsa Egipto, kē suane Egipto blú ulune yóki. Ie' e' tkéwa darère Skéköl kē wërta' e' mik kē ilo'yane ie' wa. <sup>28</sup> Ie' erblé Skéköl mik, e' kueki ie' tó Israel aleripa patké Ie'pa Yépa Yêrulune Egipto e' kēwō tkō'uk. Ie' tó ie'pa patké obeja pupula ttōkwa tā ipé sklippök ie'pa ukkō kos e' mik. Ie'pa tó iwé es as Skéköl biyōchōkwak patké Skéköl tó s'ttökulur, e' kē mi'wā u ā alā wēm tsā kune, esepa kos ttōkulur.

<sup>29</sup> Israel aleripa erblé' Skéköl mik, e' kueki ie'pa tkami Dayè Mat shuā wēs íyök ē kǵ shkē es. Eré mik Egipto wakpa mi ie'pa itōki, etā e'pa kǵ dayè unekā tó ie'pa kos ttélur.

<sup>30</sup> Israel aleripa erblé' Skéköl mik, e' kueki ie'pa shkē ká kiè Jericó kkōiēule e' pamik dōka ká kul. E' ukuōki tā ká e' kkōiēule kos, e' tkēnettsa iski. <sup>31</sup> Nies alakól sulusi kiè Rahab, e' erblé' Skéköl mik. E' kueki mik wépa bōl patké' Josué tó Jericó weblök bër akir, etā e'pa ki'waitō bère blé' itsatkoie. E' kueki ie' kē dunewāñak wépa tó Skéköl ttē dalōsēwéwā esepa tā.

<sup>32</sup> Ye' ā ikǵ yërmi tajé. Gedeón ena Barac ena Sansón ena Jéfté ena David ena Samuel ena Skéköl ttekolpa kos, e'pa kos tté pakarmi ye' ā, eré ye' kē kawō kune i' tā ipakoiē seraā. <sup>33</sup> Ie'pa ena pé' skā erblé' Skéköl mik wēs ie'pa es, e' wa e'pa wēlepa e' alékā ká kuā'kǵ kuā'kǵ wakpa kǵ. Nies ie'pa wēlepa ttē dalōiēno e' wakanewé yēsýsē. Nies Skéköl kablé' ie'pa ā, e' wā de ie'pa ulā ā. Ie'pa wēlepa tó ma' name kkō tsatéwā.

<sup>34</sup> Ie'pa wēlepa kē kǵ bō' dakanekā. Ie'pa wēlepa ttekwatke tabé wa, e' tsatkée Skéköl tó. Ie'pa wēlepa kē diché tā, eré idiché iēne. Ie'pa wēlepa ñippé darère tā ie' alékā ká kuā'kǵ ñippōkwakpa kǵ. <sup>35</sup> Nies alakólpa bak erblök Skéköl mik, e'pa wēlepa deütōpa shkēnekāne menene ie'pa ā.

Pé' wēlepa skā erblé' Skéköl mik, e'pa klō'wéwā pé' tó tā iwe'ikérakitō tajé siarē dō iduowā ekké. Eré ie'pa erblé Skéköl mik, e' kē watēnettsā ie'pa wā. Ie'pa wā ijcher tó ie'pa shkerdakāne aishkuō tā senoie buaé shute, e' kueki ie'pa ekemine áie, e' kē kinewā ie'pa wā. <sup>36</sup> Ie'pa wēlepa wayōne tajé, bune siarē. Ie'pa wēlepa skā monewā tabechka yöule tsa'ie ese wa, es iminerak s'wōto wé ā. <sup>37</sup> Ie'pa wēlepa ttélur āk wa. Wēlepa ttélur jchēulettsā shushāē. Nies wēlepa ttélur tabé wa. Ie'pa bak shkōk wǵ ā diā ā paiēule obeja kkuōlit ō chibo kkuōlit wa. Ie'pa dör siarē, tōiēne siarē, weine tajé. <sup>38</sup> Ie'pa dör buaé shute, kē dör bua' tó ie'pa ser imalepa serke ká i' kǵ e' shuā. Eré ie'pa

bak shkōk wǵ ā diā ā ká sir poē wé kē yi serku' tajé ese ska' ō kabata ā. Ie'pa bak senuk siarē ákuā ā ō kǵuk ā.

<sup>39</sup> Ie'pa ekkēpa kos erblé' Skéköl mik buaé, e' kueki ie' wa ie'pa wēne buaé. Eré ie' kablé' ie'pa ā, e' wā kam mer ie'pa ā, <sup>40</sup> ie' tó iská bikeitséne bua'ie se' batamik e' kueki. I buaé meke ie' tó se' ā aishkuō tā, e' kiane ie' kǵ tó ie'pa ena se', e'pa ulā ā idō ñita. E' kueki kam idō ie'pa ulā ā.

**12**

*A' erblö Skéköl mik wēs Jesús es*

<sup>1</sup> A yamipa, se' erblöke Skéköl mik ena se' serke ie' ā, e' dör wēs s'tur e' aloka ās i merke siā e' dō se' ulā ā es. Wépa erblé' Skéköl mik ká iaiāē e'pa durulunebak, e' dör wēs ie'pa tune e' ali'kabak es. Ie'pa ekkēpa dör tajé, e' kos erblé' buaé Skéköl mik, e' dör wēs ie'pa iēne se' turke e' sauk es, tó is se' mir. E' kueki i kos tó se' wōklō'weke ese ulā watōsō. I sulu wamblekesō, ese dör wēs tsa' mǵlitswā s'klō mik es, e' kueki ilo'yōsō. Etā se' tunū darère dō mik se' deka wé se' mi'kerō eē. <sup>2</sup> Se' er mùwā Jesús ē kǵ. Se' erblöke Skéköl mik e' wërke Jesús wōki tsawe dō bataie. Ie' kōtēwā krus mik, e' dör jaé tajé, eré e' kē kǵ ie' t'kine yēs. Ie' wā ijcher tó ie' tse'rdaē buaé aishkuō tā, e' kueki idalē'ttséitō er bua' wa. Iñe tā ie' tkērka' dalōiērtā' tajé Skéköl tkēr ikulé kǵ e' ulā bua'kka.

<sup>3</sup> Pé' sulusipa tó ie' we'ik tajé, e' kos dalē'ttséitō. E' bikeitsō buaé ās ā kē shtrirwā erblök Skéköl mik tā ilo'yē. <sup>4</sup> Moki a' tso' ñippök sene sulu tā, e' kueki a' weirke tajé, eré kam a' weir dō a' duōwā pé tēr tajé ekké wēs Jesús es. <sup>5-6</sup> Skéköl yēkkuō kǵ ie' tó a' patté wēs ie' ala'r es, wēsua e' chowa ā' éna, e' tó iché i' es:

“A ye' alā, wépa kos dalér Skéköl éna, esepa paruekeitō.

Wépa klō'wé ie' tó ila'rie, esepa uñekeitō.

E' kueki mik ie' tó be' parueke, etā e' kē watōktsā be' tó.

Mik be' uñekeitō, etā kē be' erianuk.”\*

Es itso' kitule Skéköl yēkkuō kǵ.

<sup>7</sup> A' weirke kos, e' wa Skéköl tso' a' paruök, e' kueki e' dalé'ttsō er bua' wa. A' parueke e' wā kiane chē tó ie' tó a' sué wēs ie' ala'r es. <sup>8</sup> Wé wé ā wā isyule tó alala kē parueta' iyé tó?

<sup>8</sup> Skéköl kē tó a' parué wēs ila'r ulitane es, e' tā e' wā kiane chē tó a' kē dör ie' ala'r chōkle, a' dör wēs ñalā alé es. <sup>9</sup> Mik se' bak ala'rla, etā se' yé tso' ká i' kǵ, e'pa tó se' parueta' tā ie' dalōiē se' tó. E' dör es, e' yita buaé se' kawōtā S'yé tso' ká jai ā e' dalōiök tajé ās sene michoē dō se' ulā ā. <sup>10</sup> Se' yé tso' ká i' kǵ, e'pa tó se' parueta' ekuōlō ē wēs ie'pa wa iwér buaé es. Eré Skéköl tó se' parueke se'

\* 12:5-6 Proverbios 3.11-12

kjimoie as se' ser batse'r wes ie' es. 11 Mik se' padurke, eta' e' kewo ska' ta' ke ittse'r buae idalene s'mik. Ere s'woblane iwa, e' ta' s'serdae bere yesyese.

12 E' kueki' a' er diché ione. A' erblöke Jesús mik, e' ke armi a' to' a' shtrine kueki'. 13 A' shkó kekrae tte yesyese e' nale wa as a' wépa ke erblöku' buae Jesús mik, shkokeia wes s'kló kranewa shkó es, esepa ke ki' ardó, e' skéie ie'pa buarne ta' ishkómi buae.

*Skéköl er buae ché se' a, e' ké watarttsa*

14 A' e' mú senuk bere sulitane tá. Nies a' e' mú senuk batse'r wes Skéköl ki' ikiane es. Yi isie ke serku' es, ese ke to' Skéképa Jesús suépa. 15 A' ni' kkó'nú buae as Skéköl er buae chöke se' a, e' ké watótsa yi to'. Yi to' iwatétsa, ese dór a' shuá wes kalkua sulusi tskirká es. Mik ideká, eta' imalepa tajé sulu'wéwáitó. 16 A' ké káne trénuk. A' ké káne i' dór batse'r ese dalóseukwa wes Esaú es. Ie' dór iyé alá tsá, e' kuéki' iyé iyi kuó meke ie' a. Ere e' wato'ttsa ie' to' iél a' chké tká' etké, e' é skéie. 17 A' wa ijcher to' e' ukuók' ta' ie' ki' ikiane to' iyé mú er buae chö ie' a' wes ie'pa wóblar alá wém tsá kune ese a' er buae chök es. E' kiéitó iyé a' jé wa kkóché wa tajé, eré ké wes ie' a' ionukiá, iwake' waténetsa.

18 J'ne ta' a' ké dóku' Skéköl wórk' wes ká iaiáe se' yépa dè'ró ie' ska' es. Mik ie'pa dókewatke Sinaí kébata a, eta' ká ttsenewa miá tsettsé, e' shuá bó' tajé narke kabata k'j, siwa' bitsirke daréré, e' qos ttsé ie'pa to' sué ie'pa to'. 19-20 Duk blarke tajé ttsé ie'pa to'. Nies Skéköl ttöke e' ttsé ie'pa to'. I' ché ie' to' ie'pa a, e' yöki' ie'pa suane tajé. Ie' iché ie'pa a: "Yi deká kabata i' k'j, se' ö iyiwak, ese kawóta' ttwéa' ká wa." Tté e' ké dalé'ttsénuk ie'pa a. E' kuéki' ie'pa kkóché tajé to' mú ké ittóia' ie'pa ta. 21 Moki' i' sué ie'pa to', i' ttsé ie'pa to' e' to' ie'pa suawé tajé. Nies Moisés wák kkóchówéitó ta' ichéitó: "i' Tajé ye' painéka suane é wa!"

22 Ere j'ne ta' ké idór es a' a. E' skéie a' detke kabata ké wérta' kié Sión kébata ee, e' dór Jerusalén tso' ká jai a' e'. Eé Skéköl chök serke. Eé ie' biyóchókwaka tso' tajé, ké shtarta' ekké, e'pa daparke ie' k'jókka. 23 Eé wépa qos de Skéköl alá tsáie esepa tso' ni' dapa'uk ttsé'ne bua' wa. Ie'pa kié tso' kitule yékuó tso' e' e' k'j, e'pa shu' a' dór. Eé a' detke Skéköl dór sulitane shulókwak, e' wórk'. Nies a' detke pè' bak senuk yesyese ká i' k'j, esepa ta' ni'ta. Ie'pa yuétke Skéköl to' yesyese, ké i' kianeia' ie'pa k'j. 24 Nies a' detke Jesús ska', ie' dór tté pa'ali' me' Skéköl to' se' a, e' kanéukwak. Ie' kótewa ipé tène tajé, e' wa se' batse'wé Skéköl to'. Ie' kótewa e' dór s'atskoie, e' ké dór wes Abel kótewa, e' nu' k'j iél tsáie'ne es.

25 E' kuéki' a' e' kkó'nú. Skéköl ttöke a' ta, e' ké watarttsa. Ká iaiáe wépa ta' ie' ut ká i' k'j, e' waté'ttsa ie'pa to', e' nu' ké ulá a' ie'pa bakyal, e' ta' zes se' tkóyalmi j'ne ta' ie' ttöke ká jai a' e' ttó waté'ttsasó e' nu' ulá a? 26 Ká iaiáe mik ie' ut ie'pa ta, eta' e' to' ká i' wóti' daréré. Ere j'ne ta' ie' iché: "kawó dórae ta' ká i' wóti'weraeyó etókichane, eré ké dór ká i' é, nies ká jai qos wóti'weraeyó." 27 Mik ie' to' iché es, eta' e' wá kiane ché to' iyi qos yö'itó wóti'rtá', ese wóti'weraeitó, skerattsa'itó as i' ké wóti'rtá' ké erta'wa, ese é atne iskéie.

28-29 I' blúie Skéköl tso' e' a' se' tso', e' ké wóti'rtá' ké erta'wa. E' kuéki' wéstela chósó ie' a. Ie' daló ta' tajé wes bó' nar tajé es, e' kuéki' ie' dalóiosó tajé suane wa, wes ie' wa iwér buae es.

**13**

*Wes Jesús mik erblókwakpa kawóta' senuk*

1 A' ni' dalérisó buae kekrae ni' élpaie, ké ilo'yar.

2 Yi ké suule a' wa, ese de a' u a, eta' ikiówa buae. Welepa to' io' es eta' Skéköl biyóchókwakpa dé'wa ie'pa u a, eré e' ké ane ie'pa éna. E' kuéki' ké a' éna ichókwa s'malepa kiókwa buae a' u a.

3 S'yamipa tso' wóteule s'wóto wé a, esepa k'jímú wes a' wákpa tso' wóteule ie'pa ta' ni'ta es. S'yamipa welepa weirke Jesús tté kuéki', eta' a' to' ibikeitsó wes a' wákpa weirke es.

4 S'senewabak e' tté dalóio. Wépa to' tté e' dalósewéwa tré wa i' wa esepa wómerattsa weinuk Skéköl to'. E' kuéki' ké a' trénuk yés. Ké a' to' s'senewabak dalóseukwa.

5 Ké a' er mukwa inukóli k'j yés. Skéköl to' iyé'bak i' es: "Ye' ké to' be' mepa'at yés, ye' to' be' kkó'né michóe."\* E' kuéki' i' tso' a' wa, as e' to' a' ttsé'ú buae. 6 Se' erblöke Skéköl mik, e' kuéki' ké se' suane i' yöki. Se' to' ichémi wes itso' kitule Skéköl yékuó k'j es, e' to' iché: "Skéköl dór ye' k'jímukwak,

e' kuéki' i' wémi s'ditsó to' ye' ta, e' ké yöki' ye' suane."†

7 A' wókirpa bak a' wóbla'uk Skéköl tté wa, e'pa ska' a' er anúne. Wes ie'pa bak senuk qos ena wes ie'pa blé'newa, e' bikiéitsó buae ta' a' erbló Jesús mik wes ie'pa es. 8 Jesucristo ké manerta'. Wes ie' dór ká iaiáe, es ie' dór j'ne, nies es ie' dórae aishkuó ta' kekrae. 9 E' kuéki' ké a' e' muktša e' k'jít'uk tté kua'k qos ké dór Jesús tté mok'j ese wa. Tté dalóieño wele to' iché to' chké wésele ké katar. Tté ese qos ké dór iie bua' se' er diché ioie. Wépa to' tté ese dalóieke, e' ké to' ie'pa k'jimepa. Ere Skéköl er buae chöke se' a, e' je' to' se' er diché iémi buae.

10 Sacerdotepa bak ká' tso' iyi moká Skéköl a' e' wakanéuk, e'pa a' kawó méne iyiwak ná'wekewa ká' e' k'j ese chká kak katók. Ere

† 12:26 Hageo 2.6 \* 13:5 Deuteronomio 31.6 † 13:6 Salmo 118.6-7

se' erblöke Jesús mik, e' dör wes ká' ñe' wakanewekerakitó es, ie' wa se' tsatkërmi. Erë wépa tso'ia erblök ká' ñe' mik, esepa kë a e' tsatkënuuk. <sup>11</sup> Iyiwak jchök sacerdote kibi bak duas bik ekkë nuü olo'yoie, ese pé tsukmi ie'pa bak Skëköl wé shü batse'r tajë shütë ee. Erë iyiwak ese nu ña'ukwa ie'pa bak ie'pa ká dowa e' wishët. <sup>12</sup> Es ñies Jesús kötëwá Jerusalén kköiëule e' wishët se' batse'woie ipé wa. <sup>13</sup> E' kuekji kë se' erblöia judiowak ttë dalöiëno e' mik. Mishka bánet Jesús ta weinuk jaënuuk wes ie' weine jaëne es. <sup>14</sup> E' wà dör tò ká i' a kë se' wá ká ta' wes Jerusalén es. E' skéie ká yöbië doia aishkuö ta, e' panuk se' tso' kröröë. <sup>15</sup> E' kuekji Skëköl kíkôkasö këkraë Jesucristo batamik. E' dör buaë wes iyiwak jchësö më ie' a idalöioie es. E' kuekji ikíkôkasö s'wák kkö wa. <sup>16</sup> Kë a' éna ichökwa i buaë uk ena ñi kïmuk. E' dör buaë ñies wes iyi mekesö Skëköl a es. A' tò iwë es, e' ta e' wër buaë ie' wa.

<sup>17</sup> A' wökirpa wöñirke tajë a' kkö'në batamik. Ie'pa éna iane tò e' kï ie'pa chakerane Skëköl tò. E' kuekji ie'pa ttö iutó ena idalöiö. E' ú as ie'pa ttsé'ü buaë ikanë tò, kë kköchöku'. A' kë tò iwë es, e' ta e' kë dör buaë a' a.

<sup>18</sup> A' tò ikiö Skëköl a këkraë sa' kï. Sa' wa ijchër tò sa' er kë tò sa' kcateku' i kï. Këkraë sa' e' ché senuk buaë yësyësë. <sup>19</sup> Ñies ye' kköchö a' a tò a' ikiö Skëköl a as ie' tò ye' a ikëwö mù tò ye' mi'ne bet a' weblök.

*Yëkkuö shtökwak e' chéat*

<sup>20-21</sup> Skëköl dör sene bërë mukwak e' tò Skëképa Jesús shkéö'kane. As ie' tò i kôs kiane a' kï senoie wes ie' kï ikiane es, e' mù a' a. Ñies i wër buaë ie' wa as ese kôs uk ie' tò a' kô Jesucristo diché wa. Jesús tò ttë pa'alí yöbië mène se' a, e' kaneö' ie' pé wa. Ie' dör se' kkö'nukwak kibiie. ¡Cristo kíkôkasö tajë këkraë! Es e' idir.

<sup>22</sup> A yamipa, ttë böt mañat i' shtéyö a' pat-toie, e' mú klö'ü a' tò er bua' wa. <sup>23</sup> Ñies ye' kï ikiane tò a' wá ijchënú tò s'yami Timoteo bak wötëule, e' yënettsane. Ie' de bet ye' ska', eta ye' wá ie' mi'ke e' ta mik ye' mi'ke a' weblök eta.

<sup>24</sup> A' wökirpa kôs ena s'batse'r malepa kôs shké'ü ña. Ñies s'yamipa dör Italia wakpa tso' ye' ta, e'pa tò a' shké'wémi.

<sup>25</sup> As S'yë er buaë chö a' ulitane a.

## Yëkkuö kit Santiago tö Santiago

Yëkkuö i' kit Santiago tö. Welepa tö ibikeitsë tö ie' dör Jesús ël eköl. Ie' bak senuk Jerusalén ena eë ie' bak Jesús mik erblökwakpa wökirie. Nies mik Jesús ttekölpa tsá ena Jesús mik erblökwakpa wökirpa malepa e'pa ñi dapa' Jerusalén Pablo kanë pakoie, etá Santiago tso' iwökirie (Hechos 15 saü). Mateo 13.55,56 tö Jesús ëlpa ena ikutapa e'pa chë.

Israel aleripa erblë' Jesús mik esepa tajë bak senuk ká bánet kua'kí kua'kí a o'kapaie. E'pa a Santiago tö yëkkuö i' kit. Yëkkuö i' kit ie' tö kabene kua'kí kua'kí cheke erë e' yökí ie' tö ichë: Mik se' serkeiá ká i' kí etá se' weirdaë Jesús mik erblë kuekí, e' wa Skëköl tö se' kimeke senuk yësyësë ie' a. E' kuekí kë se' káne tkinukwá se' weirke e' wá. Se' ké ttsë'nuk buaë mik s'weirke etá. Es Santiago tö ichë.

E' kúie tá ie' tö ichë wes se' serke ena i weke se' tö, e' wa iwënewá tö mokí se' erblöke Jesús mik ö au. Wes se' tö s'malepa suëke ie' dör ibua'ie. S'siarëpa kí Skëköl tkirke ena ie' wóá tá sulitane dör nies. E' kuekí kë se' káne inuköl blúpa sauk bua'ie s'siarëpa tsatá.

E' kúietá Santiago tö ichë tö inuköl blúpa tö s'siarëpa watëttsá ena kë ipatuë buaë, esepa kí tajë kabene tso' S'yë wóá, e' tö iwe'ikeraë s'siarëpa we'ikë e' nu' kí.

### Shke'wë

<sup>1</sup> Ye' dör Santiago. Ye' dör Skëköl ena Skëképa Jesucristo, e'pa kanë méso eköl. Ye' tso' yëkkuö i' shtök a' dör Skëköl icha\* e'pa a. A' shke'wémíyö.

### S'weirke qos e' dalë'ttsösö

<sup>2</sup> A ye' yamipa, mik i sulu tköke a' tá tsakjé a' ma'woie, etá a' ibikeitsö: "iAyëcha buaë ye' tá!" <sup>3</sup> E' wá dör tö a' wá ijcher tö mik se' erblöke Skëköl mik e' ma'örke, etá e' tö se' kimeke e' tkökwa darërëë. <sup>4</sup> E' kuekí a' e' tkökwa darërëë erblök Skëköl mik, kë ilo'yar as a' er kurwá buaë darërëë wes ie' kí ikiane es, kë i' kiarpaia a' kí ie' wóá.

<sup>5</sup> Erë e' welepa kë éna iane tö i dör bua'ie wë, e' tá ikiö Skëköl a' tá ie' tö a' kimeräë as a' éna iwá ar buaë. E' kiésö ie' a, e' kë tö ie' tsiriwë. Ie' tö i buaë meke sulitane a' tajë kë erta'wa ekkë. E' kuekí ikiö ie' a. <sup>6</sup> Erë mik a' tö ilë kié ie' a, etá a' erblök darërëë ie' ë mik, kë ibikeitsar bötböt. Yi ibikeitséká bötböt, ese dör wes dayë uyë siwa' tö wí a' diá a' es, kë merta'wá bërë. <sup>7-8</sup> Yi dör es, ese erbiökë bötböt kekraë, kë erbiök etkëme. E' kuekí ese kë tö ibikeitsök tö Skëköl tö i' mëmi ie' a.

<sup>9</sup> S'yamipa siarëpa erblöke Jesús mik, esepa ttsë'nú buaë shute, Skëköl tö ie'pa tkéka pé' tajë ie' a e' kuekí. <sup>10</sup> Es nies s'yamipa inuköl blúpa erblöke Jesús mik, esepa ttsë'nú buaë shute, Skëköl tö ie'pa wóewa diöshët e' kuekí. Ie'pa tá itköraë wes ma'ma wörkua es. <sup>11</sup> Mik diwö deká ba'baë, etá e' tö ma'ma wörkua alabëwëwá anewa, kë wëriá buaë wes kuaë es. E' suë itköraë inuköl blúpa tá, ie'pa iyi tso' tajë, e' shuá iblërdawarak.

<sup>12</sup> Wépa ma'örke e' dalë'ttsekerakitö er bua' wa, ayëcha buaë esepa. Ie'pa dettsá buaë, e' tá sene michoë merdaë ie'pa a' iskéie. E' muk Skëköl kablë' wépa éna ie' dalër esepa qos a.

<sup>13</sup> Mik yi erkië i sulu wamblök, e' tá kë ichar: "Skëköl tö ye' erkiöwë i sulu wamblök." Kë yi a Skëköl erkinuk i sulu wamblök. Nies Skëköl kë tö yi erkiöwepa i sulu wamblök. E' kuekí kë yi káne ichök: "Skëköl tö ye' erkiöwë i sulu wamblök." <sup>14</sup> E' skéie, se' wák dër suluë, e' tö se' erkiöwëke i sulu wamblök tá sulu se' éna iwamblak. <sup>15</sup> E' ukuökí tá iwawamblësö. E' ukuökí tá se' wöblanewatke i sulu ë wamblök, e' nu' kí s'duörawa.

<sup>16</sup> A yamipa dalër tajë ye' éna, kë a' e' kítö'uk. <sup>17</sup> I' qos dör buaë yësyësë tso' se' wá, ese meke se' a' S'yë tso' ká jai a, e' tö. I' qos dalöburke ká jai a, e' yö' ie' tö. Iyi ekkë qos e' olo maneorta'ne, erë ie' kë e' mane'uta'ne. Ie' wák dër buaë yësyësë kekraë. <sup>18</sup> Ie' wák er wa, ie' tö ibikeits se' er mane'uk pa'alí ie' ala'rie, se' tö ie' ttë mokí klö'wë e' batamik. Ie' tö iwë es as se' dö iyi qos yö' ie' tö ese tsá bua'ie.

### Skëköl ttë iütösö

<sup>19</sup> A yamipa dalër tajë ye' éna, ye' ttö tso'. Mik yile ttöke a' tá, etá ikukueblö bua'ie, kë iütar bet ena kë a' ulunukka bet. <sup>20</sup> Se' ulur e' kë tö se' kë senuk yësyësë Skëköl wörki. <sup>21</sup> E' kuekí e' ya'wë qos ena i sulu ská tso' tajë, ese qos watöttsá uyöttsá a' tö seraá. E' skéie Skëköl ttë tso' se' er a, e' klö'ü, e' wá iütö bërë er bua' wa. Ttë e' tkéule a' a' wes iyi kuatkësö es. Ttë e' a' a' tsatkërmí.

<sup>22</sup> Erë kë a' tö Skëköl ttë kútsar kukuö ë wa, iwá iütö mokjé. A' kë tö iwë es, e' tá a' e' kítö'uke. <sup>23</sup> Yile tö Skëköl ttë ttsé kukuö ë wa, erë kë itö iwá iütë, e' tá ese dör wes wëm e' saü wösuq wa es. <sup>24</sup> Ie' e' suë wösuq wa tá imía, erë bet iéna ichowa tö i' suéitö iwö kí. Tá jiók ie' e' wö sué? <sup>25</sup> Erë yi er me'rie ttë dalöieno yësyësë tso' s'yottsá i sulu ulá a' e' kí, tá e' a' ie' tkökewá darërëë ena iwá iütekeitö buaë, kë ichötá'wa iéna, ese a' Skëköl er buaë chöraë i' qos wekeitö e' a.

<sup>26</sup> Yi e' bikietsö tö ie' dör Skëköl dalöiökwaq mokjé, erë kë ikkö kí i sulu blërtá'wá chë, e'

\* 11 a' dör Skëköl icha: Griegoie ttë i' dör: ditsëwö dabom eyök kí bül bakyalmi ká wa'ñe.

tà ese e' kītō'ŭke sīarē. Ie' e' bikeitsō tō ie' dōr Skēkōl dalōiōkwak, erē e' dōr kache, kē wā tā'. <sup>27</sup> Erē Skēkōl dōr S'yē, e' wōā wēpa tō ie' dalōieke yēsēsē, kē i sulu tā', esepa tō jchu'rlapa ena alakōlpa schōpa weirke sīarē, esepa kīmeke. Nīes ie'pa kē e' ia'utā'ka i sulu tso' ká i' a ese wa.

## 2

### *Sulitane dalōiōsō ñikkēē*

<sup>1</sup> A yamipa, se' erblōke Skēkēpa Jesucristo olo tā' tajē e' mik, esepa kē sulitane sauk ñikkēē. <sup>2-3</sup> Iwā kkachekeyō a' a' i' es: ichōsō tō wēm inukōl blū debitu ekōl wēm a' ñi dapa'ŭke ee, paiēule buaē datsi' bua'buwa wa, ñies ula'tsio iēitō dalōlōē. E' kiēwā a' tō wēshkē tā ishke'wē buaē tā ichē iā: "be' e' tkōser iē kula' buaē i' kī." E' wōshā tā s'sīarē debitu ekōl datsi' nula sulu dō ē tā a' tō ichē ie' a': "Be' e' duōdur seē ō be' e' tkōser iski." <sup>4</sup> A' tō iwē es, e' tā a' e' wambō suluē. A' er suluē, e' kuekī a' kē tō s'dalōieta' ñikkēē.

<sup>5</sup> A yamipa dalēr tajē ye' éna, ye' ttō tso' wēpa dōr sīarē ká i' a esepa shukitbak Skēkōl tō as ie'pa dō erblē ie' mik e' blúie. Nīes ie'pa shukitbakitō as idōrak wēpa blúie ie' tso' e' kīie wēs ie' kablē' wēpa éna ie' dalēr esepa a es. <sup>6</sup> Erē ie'pa dalōsewēkwē a' tō. E' skēie inukōl blúpa suēke a' tō buaē dalōieke tajē, erē esepa tō a' wē'ikeke sīarē. Ie'pa wā a' mi'ke kkatē s'shulōkwakpa wōrkī. <sup>7</sup> A' dōr Jesucristo icha erē inukōl blúpa tō ie' cheke suluē. ¿Wēs esepa dalōiēmi a' tō s'sīarēpa tsatā?

<sup>8</sup> Skēkōl ttē dalōiēno bua'ie kitule iyēkkuō kī, e' tō ichē, "A' malepa dalēritsō wēs a' wákpa e' dalēr es."\* Ttē e' wā iūtē a' tō mokī, e' tā e' dōr buaē. <sup>9</sup> Erē a' kē tō sulitane suē ñikkēē, e' tā a' tso' i sulu wambōk. E' wa a' tso' ttē dalōiēno bua'ie e' dalōseukwā. <sup>10</sup> Yi tō ttē dalōiēno e' dalōieke iekkē tā seraa, erē e' et dalōsewēwāitō, e' tā e' dōr wēs ie' tō ttē kōs dalōsewēwā es. E' nuī kōs ane ie' kī. <sup>11</sup> E' wā dōr tō Skēkōl tō iyē: "kē a' kawō tā' s'senewābak dalōseukwā," ñies e' wák tō iyē: "kē a' kawō tā' s'ttōkwā." Kē se' wā s'senewābak dalōsewēwā, erē s'ttēwāsō, etā e' wa se' ianewā ttē dalōiēno e' dalōseukwāwak. <sup>12</sup> Ttē e' me'at Skēkōl tō se' tsatkoie se' er sulu e' yōkī. Ttē e' wa ie' tō s'shulerae aishkuō tā. E' kuekī a' ttō, a' senū wēs ttē e' tō ichē es. <sup>13</sup> Kē sō s'malepa suē er sīarē wa, e' tā mik se' shulirketke, etā Skēkōl kē tō se' suēpa er sīarē wa. Erē s'malepa suēkēsō er sīarē wa, e' tā idōratsā buaē se' a' mik se' shulirketke etā.

*I' buaē wēsō s'malepa a e' wa iwēnewā tō mokī se' erblōke Skēkōl mik*

<sup>14</sup> A yamipa, yi e' chō: "ye' erblōke Skēkōl mik", erē ese kē tō i buaē wēku' s'malepa kīmoie iwā kkachōie, e' tā ie' e' chō es, e' kē dōr iē bua'. ¿Wēs ie' tsatkermi? <sup>15</sup> E' wā kkachekeyō a' a' i' es: ichōsō tō s'yami ekōl, wēm ō alakōl, ese tso' sīarē, datsi' kē tā', chkwō kē tā', <sup>16</sup> etā a' wele tō ichē ie' a': "Be' shkō wōbla wa, Skēkōl be' kimē. Be' e' paiō buaē, be' chkō buaē." A' tō ichē ie' a es, erē i kiane ie' kī e' kē mēne a' wā ie' a, e' tā e' wa ¿i buaē wē a' tō? <sup>17</sup> Es ñies se' e' chō tō se' erblōke Skēkōl mik, erē se' kē tō i buaē wēku' s'malepa a iwā kkachōie, e' tā se' e' chō es, e' kē dōr iē bua'.

<sup>18</sup> A' wele tō ichēmi ye' a': "ye' tsatkerdaē ye' erblōke Skēkōl mik e' ē batamik." A' wele skā tō ichēmi ye' a': "ye' tsatkerdaē i buaē wēkeyō e' ē batamik."

Ye' tō ie'pa iūtēmi i' es: S'erblōke Skēkōl mik ena i buaē wēkesō, e' mir ñita. Se' kē wā i buaē one, e' tā kē se' a iwā kkayēnuk tō se' erblōke Skēkōl mik. Erē se' tō i buaē wēke, e' tā e' wa se' tso' iwā kkachōk tō mokī se' erblōke Skēkōl mik. <sup>19</sup> Se' e' chō tō iklo'wēsō tō Skēkōl dōr ekōl ēme, etā e' dōr buaē. Erē ñies aknamapa tō iklo'wē es, etā e' tō ie'pa suawēkeka painuwēkeka tajē.

<sup>20</sup> Kē a' senuk wēs kē se' er tā' es. A' éna iwā anū tō yi e' chō tō ierblōke Skēkōl mik, erē kē itō i buaē wēku', e' tā ie' chō es e' kē dōr iē bua'. <sup>21</sup> Se' yē bak ká iaiāē kiē Abraham, e' tō ilā kiē Isaac, e' mēka ká' yō'itō iyi mokā Skēkōl a' e' kī ttēwā ña'wēwa wēs Skēkōl tō iuk patkē' es. Mokī ie' mí e' wā ŭk erē Skēkōl tō iwōklō'wē. Skēkōl tō isuē tō mokī ie' mí ittō wā iūtō. E' kuekī ie' tō iklo'wē wēs wēm yēsēsē es. ¿E' kē jcher a' wā? <sup>22</sup> Es a' éna iarmi tō mokī ie' erblē Skēkōl mik. Ie' tō Skēkōl ttō wā iūtē, e' tō iwā kkachē tō mokī ie' erblē imik. <sup>23</sup> Es i tso' kitule Skēkōl yēkkuō kī e' wā ane se' éna, e' tō ichē: "Abraham erblē Skēkōl mik, e' kuekī iklo'wēitō wēs pē' buaē yēsēsē es."† E' kuekī ie' kine Skēkōl sini'. <sup>24</sup> Es se' wa ijcher tō Skēkōl tō se' klō'wē wēs pē' buaē yēsēsē es, i buaē wēkesō iwā kkachōie tō se' erblōke ie' mik ese batamik. E' kē dōr tō se' erblōke ie' mik e' ē batamik.

<sup>25</sup> Es ñies ibak ká iaiāē alakōl trēr tajē kiē Rahab, e' tā. Josuē tō wēpa patkē Jericō weblōk tō wēs iulā dōmi iska'. Ká e' a' e'pa kiēwā Rahab tō buaē ie' u a' itsatkoie. E' ukuōkī tā ie' tō ñalā kuā'kī kkachē ie'pa a' as e' wa itkōshkardak. Es ie' tō iwā kkachē tō ie' erblē Skēkōl mik. E' batamik Skēkōl tō ie' klō'wē wēs alakōl yēsēsē es.

<sup>26</sup> Mik se' duowa, etā se' wikōl miā tā s'nu ē atē. E' sū mik se' e' chō tō se' erblōke Skēkōl mik, erē kē i buaē wēku'sō iwā kkachōie, e'

\* 2:8 Levítico 19.18 † 2:23 Génesis 15.6

tà se' e' chō es, e' dōr wēs s'nu es, kē dōr iie bua'.

### 3

#### *S'kkō paklōysō as kē sō i sulu chō*

<sup>1</sup> A yamipa, a' wā ijcher tō sa' wēpa tso' a' wōbla'uk Skēkōl bē wa, esepa chakeraē aishkuō tā Skēkōl tō tajē s'malepa kē dōr s'wōbla'ukwakpa esepa tsata. E' kueki kē a' e' yuōkka s'wōbla'ukwakpaie tajē. <sup>2</sup> Sulitane tō i sulu wambleta' tajē. Erē wē kē tō i sulu cheta' yēs, ese dōr buaē yēsēsē. Ie' a' e' wōklōrmi as kē itō i sulu kōs wamblō. <sup>3</sup> Kabao dichē tajē, erē ikkō payuekewasō tsa'ukuōla wa tā iwēttsēmīsō wēs se' kī ikiane es. <sup>4</sup> Nies kanō blublue shkōke dayē kī, ese bikeitsō. E'pa dōr bērie, e' uyeke siwā' tō darērē, erē iñakoe e' dōr tsirlala, e' wa iñakōkwak tō iñakeke buaē dō wē ie' kī ikiane tō imi' ee. <sup>5</sup> Es s'kkō dōr tsirlala, erē e' a' i tajē wamblērmi wēs bō'wō tsir tō tē tajē ña'wēwa es. <sup>6</sup> S'kkō dōr wēs bō' es, e' dōr i sulu chōk tso' se' a. Se' tso'ia' tse'ka, e' dawala e' tō se' wāk kōs e' sulu'wēkewa' kēkraē wēs bō' s'ña'wē es. Bō' e' datse bō' kē a. <sup>7</sup> Iyiwak ulitane urutērmi se' a. Iyiwak kañuru kōs, dū, tkabē, ñies i tso' dayē a, e' kōs urutōule se' wā. <sup>8</sup> E' skēie kē yi' a ikkō paklōnuk as kē itō i sulu chō. S'kkō a' i sulu dōkettsā kēkraē, kē wōklōr se' a. E' tō s'sulu'weke wēs kapōli sulusi tō s'ttēwā es. <sup>9</sup> S'kkō wa se' tō Skēkōl dōr S'yē e' kikekeka' e' ē wa se' alibchōke s'malepa yō'itō wēs ie' wāk es e'pa kī. <sup>10</sup> Se' er buaē chōke, se' alibchōke s'kkō e' ē wa. A yamipa, kē se' kane e' wamblōk es. <sup>11</sup> Ūwē a' wā isūle tō di' tum etkē a' yēri tskirke ena di' sesē tskirke? <sup>12</sup> A' wā ijcher buaē tō higo klō kē wōrta' olivoie ō uva kicha kē wōrta' higoie. A yamipa, es ñies di' sesē ena yēri kē tskirku' di' tum etkē a.

#### *Skēkōl siwē mokī, e' tō se' kē senukyēsēsē*

<sup>13</sup> A' wēlepa e' bikeitsō tō a' wā siwā' meke Skēkōl tō e' jcher tajē iwā a'ne buaē a' ēna, e' tā e' wā kkachō sene yēsēsē e' wa. A' senu kē e' tso'ta'ka wēs wēpa wa siwā' yēsēsē jcher esepa ser es. <sup>14</sup> Erē a' ukyērkeia' ñita, a' kkōwērkeia' ñita, ese tso'ia' a' er sulu'ukwā, e' tā kē a' e' tso'ōka tō a' wā siwā' yēsēsē jcher. A' e' tso'ōka es, e' tā a' tso' kachōk. <sup>15</sup> Siwā' ese kē mēne Skēkōl tso' ká jai a' e' wā. E' dōr siwā' tskirke ká i' kī s'ditsō er a' ese. E' meke se' a' tō. <sup>16</sup> Mik se' ukyērke kkōwērke ñi tā etā eē tajē se' ñi chiliuke, eē i sulu kōs wamblērke. <sup>17</sup> E' skēie, wēpa tō Skēkōl siwā' datse ká jai a' e' iuteke, esepa serke yēsēsē. Esepa serke bēre ñita. Ie'pa er buaē ñi kī. Ie'pa tō s'malepa suēke er siarē wa tajē. Ie'pa tō i buaē weke kēkraē sulitane a' ñikkē er mokī wa. <sup>18</sup> Wēpa tō s'patteke er bua'ukne ñi kī, esepa dōr wēs iyi

kuatkōkwak es. Sene bēre kuateke ie'pa tō tā e' wā dōratssa sene yēsēsē.

### 4

#### *Yi ēna sene sulu dalē, ese dōr Skēkōl bolōk*

<sup>1</sup> Ū' tō a' kē ñi tsiriuk ñippōk ñita? E' dōr tō a' ēna i sulu wamblak e' tse'wōie buaē, ese tso' ñippōk, i buaē tso' a' er a, ese tā. <sup>2</sup> Ilē kkecheke a' tō tajē, erē e' wā kē dō a' ulā a, e' kueki a' tso'tke s'ttōkwa. Ilē tō a' ukyēweke, erē e' kē dō a' ulā a, e' kueki a' ñi tsiriuke ñippōke ñita. Erē i kiane a' kī, ese kē kiē a' tō Skēkōl a, e' kueki kē idō a' ulā a. <sup>3</sup> Mik ilē kiē a' tō Skēkōl a, etā kē a' wā ikine er mokī wa. A' ēna iwā wē'ikawa a' wākpa kī e' tse'wōie buaē. E' kueki kē a' ulā a' idē'. <sup>4</sup> Ū' kē tō Skēkōl dalōie wēs trēr wakpa kē tō imaso dalōie es! Ū' kē wā ijcher tō i sulu tso' ká i' a, ese wa se' wōbatsō, e' tā se' mīa Skēkōl bolōkie? Iskā chekeneyō, yi tō i sulu tso' ká i' a' ese sini'kuē, e' tā ese wāk mīa Skēkōl bolōkie. <sup>5</sup> Kē a' tō ibikeitsōk tō ē Skēkōl yēkkuō tō ichē: "Skēkōl tō se' wikōl me'at senuk se' er a, e' ulatska tkēnettsā se' kī, e' tō se' sibirtseke tajē." <sup>6</sup> Erē i sulu wamblak se' ēna ese wōklō'uk Skēkōl tō s'kimeke tajē. Es itso' kitule ie' yēkkuō kī wē ichēitō: "Wēpa e' tso'ōka tajē, esepa wōklō'weke Skēkōl tō. Erē wēpa e' wōēwa diōshet, esepa a' ie' er buaē chō."\* <sup>7</sup> E' kueki a' e' mū Skēkōl tte dalōiōk. Bē kē iutar tā ie' tkōrashkar a' yōki. <sup>8</sup> A' e' batsō Skēkōl mik tā ie' e' batsōra a' mik. Ū' pē' sulusipa, sene sulu olo'yō, a' er batse'ū! A' erbikōkeia' bōtōt, e' olo'yō, e' skēie a' erbikō etkēme Skēkōl ē a. <sup>9</sup> Ū' erianū, a' kkōchō tajē, a' iū siarē! jkē a' jañukia, e' skēie a' iū siarē! jkē a' tse'ñukia buaē, e' skēie a' erianū! <sup>10</sup> A' e' ōwa bēre Skēkōl wōa tā ie' tō a' kikeraka.

#### *Kē se' ñi chōk suluē*

<sup>11</sup> A yamipa, kē a' ñi chōk suluē. Yi tō iyami cheke suluē ō iwatekeitō, e' dōr wēs Skēkōl tte dalōiēno cheke suluē ena iwateke es. Es ese tō idalōsēwēwā. <sup>12</sup> E' tō iwē es, e' tā a' e' tkēka iwā shulōk, kē dōr iwā dalōiōk. <sup>13</sup> Skēkōl ekōl ē tō itte dalōiēno me'at se' a. Ie' ē dōr s'shulōkwak. Ie' ē a' se' tsatkērmi. Ie' ē a' se' kichatērmi. Etā Ū'yi tō a' a' kawōt me' s'malepa kichatōk?

#### *Kē se' e' tso'ōkka*

<sup>13</sup> Ye' tō tso'. A' wēlepa tō ichēmi i' es: "Bulebōk sa' mi'ke ká kuā'kī, etā eē sa' serke duas ek tā sa' kanēblōmi tajē, inukōl klō'weraē sa' tō tajē e' blu'wōie." <sup>14</sup> A' tō ichēmi es, erē i tkōmi a' tā e' kē ijcher a' wā. A' dōr wēs mochka es, bla'mi tā sō isuē, erē bet tā kē iku'ia. <sup>15</sup> A' kawōtā ichōk i' es: "Skēkōl kī ikiane, e' tā sa' sermiia tā kanē wēsele wēmi sa' tō." <sup>16</sup> Erē a' e' tso'ōka tajē,

\* 4:6 Proverbios 3.34

e' kueḡi a' kē tō icheta' es. A' ibikeitseke tō a' serke a' wākpa ē mik. Se' e' ttsōka es, e' kōs dōr suluē. <sup>17</sup> Ī dōr buaē wē, ese jcher se' wa, erē kē se' wā iōne, e' ta' e' dōr suluē.

## 5

### *Inukōl blūpa pattē*

<sup>1</sup> ĵA inukōl blūpa, ye' ttō ttsō! ĵskēkōl tō a' we'ikeraē, e' kēwō dōketke a' kī! ĵe' kueḡi a' ĵū, a' kōchō tajē! <sup>2</sup> Ī bua' bua' tso' a' wā tajē, ese sulunewaṭke, a' datsi' katētkē powak tō. <sup>3</sup> Nies a' orochka, a' inukōlchka kōs, e' dōli tokatke weirketke. Dōli e' tō iwā kkacheke tō a' kē'blō suluē. E' kueḡi aishkuō tā a' weirdaē bō' kē a. Kā i' erkewatke, erē a' tso'ia ĵi blōk tajē a' wākpa a. <sup>4</sup> A' tō ittsō. Wēpa kaneblōke a' a' a' iyiwō shtōk, e'pa kē patone a' wā. E' tō ie'pa kōchōweke tajē, e' tse' Skēkōl dichē tā' tajē e' tō. <sup>5</sup> Kā i' a' a' wā ĵi bua' bua' tso' tajē e' tse'woie buaē. Nēmata a' dōr wēs kōchi kiēiesō ttēwā es; kōchi kē ēna iāne tō i sulu datsē ikī. <sup>6</sup> Pē' ser yēsēsē kē a e' tsatkēr a' yōkī, esepa kkatē a' tō wōmēttsa ttēwā.

### *Se' weirke dalē'ttsōsō bēre er bua' wa*

<sup>7</sup> A yamipa, a' weirke kōs, e' dalē'ttsō er bua' wa bēre dō mik Skēkēpa Jesucristo datskene eṭa. Ĵi kuatkōkwakpa saū wēs ie'pa tō iwōrke e' wā paneke bēre er bua' wa es. Nies ie'pa tō kalī paneke bēre er bua' wa es iyiwō tskir, talar buaē, wōne tajē. <sup>8</sup> Skēkēpa datskene e' kēwō dōketke tsinet, e' kueḡi e' wā panū bēre. A' e' tkōwā darērēē ie' a.

<sup>9</sup> A yamipa, kē a' nī chōk suluē as a' kē we'ikō Skēkōl tō. Jesucristo dōr s'shulōkwak, e' dōketke tsinet wēs yi dōkewaṭke ukkō a es. <sup>10</sup> A yamipa, Skēkōl ttekōlpa bak kā ĵaiaē, e'pa weine tajē, e' dalē'ttsē'rakitō bēre er bua' wa. E' saū, eṭa iwā ū es. <sup>11</sup> Se' tō ichē: "Wēpa weine siarē, e' dalē'ttsē'rakitō bēre er bua' wa, ayēcha buaē esepa." A' wā ittsēule tō kā ĵaiaē wēm bak ekōl kiē Job, e' weine tajē, erē ie' tō idalē'ttsē' bēre er bua' wa. Nies a' wā ĵcher tō mik iweine siarē e' tka, eṭa Skēkōl er buaē yē' ie' a tajē. Skēkōl er dōr buaē, se' wēr siarē ie' wa, e' kueḡi ier buaē yē' Job a tajē.

<sup>12</sup> A yamipa, ttē chekeyō i' e' dōr ibua'ie: Mik a' tō i cheke, eṭa kē ichar: "Ĵ chēyō e' dōr mokī Skēkōl tō kā ĵai ena kā i' yō' e' wōwa" ō yile skā wōwa. A' ttō etkē. Mik a' icheke, "tō", eṭa es idir; mik a' icheke, "au", eṭa es idir. A' ichō es as kē a' kichatēr.

### *Ikiōsō Skēkōl a nī kī*

<sup>13</sup> A' wēle weirke eriarke siarē, e' tā ese ttō Skēkōl tā. A' wēle tse'rke buaē, e' tā ese tō Skēkōl kīkōkā ittsē wa. <sup>14</sup> A' wēle duōke, e' tā ese tō Skēkēpa Jesús icha erule e'pa wōkirpa tsuk patkō, as e'pa bitū ikiōk Skēkōl a ikī ena kiō tōk ikī Skēkēpa ttō wa. <sup>15</sup> Ie'pa tō

ikiē Skēkōl a erblē imik mokī e' wa, e' tā ibuardane tā Skēkēpa tō ikerakane. Nies i sulu nuī tso' ikī, e' tā e' olō'yeraēitō ikī. <sup>16</sup> E' kueḡi a' e' kkatōkā nī a tā ikiō Skēkōl a nī kī as a' buarne. Mik s' ser yēsēsē, esepa tō i kiē Skēkōl a er mokī wa, eṭa ie' tō iwā iṭteraē buaē tajē. <sup>17</sup> Skēkōl ttekōl bak kā ĵaiaē kiē Elías, e' dōr s'ditsō wēs sulitane es. Erē ie' tō ikī' Skēkōl a er mokī wa tō as kalī kē yēr, eṭa kalī kē yēne dō duas mañal kī shabōts. <sup>18</sup> E' ukuōkī tā ie' tō ikiēne Skēkōl a tō as kalī yērne, eṭa mokī kalī yēnene tā ĵi kuā kōs talane buaē.

### *Ĵ sulu wamblēkwakpa kīmusō ilo'yōk*

<sup>19</sup> A yamipa, a' wēle tō ttē mokī, e' olō'yé, erē a' wēle skā tō ikīmē as idōne iṭtōkne, e' tā e' dōr buaē. <sup>20</sup> A' ēna ianū tō wēpa tō pē' sulusi kīmē i' wamblēitō e' olō'yōk, esepa tō ie' tsatkēe ikichatēr yōkī, nies inuī tajē e' kōs olō'yane ikī.



## Yëkkuö tsá kit Pedro tö 1 Pedro

Pedro, kië ñies Simón, e' tö yëkkuö i' kit. Jesús ttókatapa shuá ie' dör kékë tajë imalepa tsatá. Erë mik Jesús klönewá ttëwá etá Pedro ä tö iyë' tö ie' kë wá Jesús sùle. E' ukuökí tã ie' eriane tajë ta ie' e' me' Jesús dalöiökne. Kë s'wá ijcher wé ie' bak senuk mik ie' tö yëkkuö i' kit etá. Ie' tö iché tö ie' bak senuk Babilonia (1 Pedro 5.13) erë ká bak bôt kua'kí kua'kí Babilonia. Roma wakpa tajë bak senuk sulué Skëköl wöá wës Babilonia wakpa bak senuk es. E' kuekí ie'pa ká kië ñies Babilonia. E' kuekí pë' tajë tö ibikeitsë tö mik Pedro tö yëkkuö i' kit, etá ie' tso' Roma.

Ie' tö yëkkuö i' kit Jesús mik erblökwakpa bak senuk ká kua'kí kua'kí tso' Asia Menor shuá e'pa a. Iñe ta ká e' kiëne Turquia. Ie'pa bak weinuk, e' kuekí Pedro éna ikimák senuk batse'ne këkraë Jesús a mik ie'pa weirke e' dalewa. Ñies ie' tö ie'pa a iché tö Skëköl wák tö ie'pa klöo'bak iwák ichaie, e' kuekí ie'pa tuë tajë Skëköl a. E' kuekí ie'pa kë káne tkinuk iwák ë kí. E' skéie ie'pa kë senuk tso'tke e' meulettsá er bua' wa weinuk Jesús dalërmik wës ie' weine ie'pa dalërmik es. Mik ie'pa weirke Jesús kuekí etá ie'pa kë ttsë'nuk buaë Wikól Batse'r tso' mokjé ie'pa a e' kuekí. Es Pedro tö iché.

### Shke'wë

<sup>1</sup> Ye' dör Pedro. Ye' dör Jesucristo ttekölpa tsá, e'pa eköl. Ye' tso' yëkkuö i' shtök wépa shukitbak Skëköl tö iwák a mineyal senuk Ponto, Galacia, Capadocia, Asia, ñies Bitinia, esepa a.

<sup>2</sup> Skëköl dör S'yë e' tö se' shukitbak wës ie' tö ibikeitsbak kuaë es. Iwiköl wa ie' tö se' batseq' as se' tö Jesucristo ttë iütö, ñies as se' er pairir Jesucristo pë wa se' nuí yökí. As Skëköl er buaë chö ena sene bërë mü a' a tajë.

### Skëköl kíkókasö

<sup>3-4</sup> Skëköl dör Skëképa Jesucristo yë, e' kíkókasö tajë. Ie' tö se' sué er siarë wa. Jesucristo kótewá shkenekane, e' batamik ie' tö se' a sene pa'alí mé. Aishkuö tã i' buaë kos tso' ie' wá blëule se' a ká jai á. E' doraë se' ulá a, e' wá panekesö kröröë. E' kos kë nurtá'wa, kë sulurta'wa, kë ertá'wa yës. <sup>5</sup> A' erblöke Jesucristo mik, e' kuekí Skëköl tso' a' kkö'nuk ie' diché wa as ie' tö a' tsatké, e' dö a' ulá a. E' tso'tke kkachë sulitane a ká erkewatke etá.

<sup>6</sup> Isalema a' kãwötá weinuk ekuölö wí sù diö sù Cristo ttë kuekí, erë e' dalewa a' ttsë'rke buaë a' wá ijcher tö Skëköl tö a'

tsatkeräë aishkuö tã e' kuekí. <sup>7</sup> A' erblö Jesucristo mik, e' ské dör orochka weirta'wa, e' ské tsatá. Se' tö orochka ma'wëke bö' wa iwá kkachöie tö mokí oro wöchka idir. I' kë dör oro wöchka ese ñarkewa. E' sù a' weirke, e' dör a' ma'woie iwá kkachöie tö mokí a' erblöke Jesucristo mik. A' dettsá buaë, e' tã mik Jesucristo datskene, etá Skëköl tö a' ttë keraká, a' kikeraká buaë.

<sup>8-9</sup> A' kë wá Jesucristo sùle a' wöbla wa, erë a' éna ie' dalër. Iñe tã a' kë ku' ie' sauk, erë a' erblöke ie' mik, e' wá tö a' tsatkeräë. E' kuekí a' ttsë'rke buaë shutë, kë ttë tã iwá choie ekkë.

<sup>10</sup> Ká iaiaë Skëköl ttekölpa tö s'tsatké ñe' bikeits ena itö yulö'ttsarakitö. Ñies i kos meraë Skëköl tö se' a' ie' er buaë ché se' a' e' dalërmik, e' yë'rakitö. <sup>11</sup> Cristo Wikól tö ie'pa ka' ijchenuk tö Cristo weirdaë siarë, e' ukuökí tã ilo kardaká tajë. Erë kë ie'pa éna iwá ane tö yi idir ö mik ö wës iwá tkömi. <sup>12</sup> Erë Skëköl tö ie'pa a' iwá kãayë' tö ttë e' kë wá tköpa ie'pa këwö ska', e' skéie iwá tköraë se' këwö ska'. Ttë buaë yë' ie'pa tö, e' dör Jesucristo ttë buaë ttsë'bak a' tö e'. Ipakókwakpa tö a' ipaka' Wikól Batse'r patkéulebitü ká jai a' e' diché wa. Iyi ikkë jchenakwá sulué Skëköl biyöchökwakpa wá.

### Skëköl tö se' kié senuk buaë yësyësë

<sup>13</sup> E' kuekí a' erbikö buaë yësyësë, a' e' kkö'nú, a' tso' erki. Mik Jesucristo datskene, etá Skëköl er buaë ché a' a, e' wá doraë a' ulá a. E' wá panü kröröë, e' kí a' er múwäie këkraë. <sup>14</sup> Skëköl ttë iütö wës ala'rla buaë tö s'ttö iütë es. Kë a' e' muksane a' bak i sulu wamblok ese ane wës a' bak kenet kë wá ie' ttë mokí jcher es. <sup>15</sup> E' skéie a' senú batse'r këkraë, Skëköl tö a' klöo' e' dör batse'r e' kuekí. <sup>16</sup> Skëköl yëkkuö tö iché i' es: "Skëköl tö iché: Ye' dör batse'r, e' kuekí a' senú batse'r."\* Es iyë'itö.

<sup>17</sup> Skëköl tö sulitane shuleke yësyësë ñikkë wës se' serke es, e' kieke a' tö "S'yë", e' tã a' kãwötá ie' dalöiök suane wa a' serkeia ká i' kí e' dalewa. <sup>18</sup> A' wá ijcher tö ie' tö a' yë'ttsá a' ser sulué wës a' yëpa bak senuk sulué es, e' nuí ulá a. E' ské kë patone iyi ertá'wa wës orochka ö inukölkha ese wa. <sup>19</sup> E' skéie ipatone Cristo kótewá pë tene tajë, e' wa. Ie' pë tuë tajë kë tönuk yi a. Ie' dör wës obeja wë'ne pupula jchë judiowak tö më Skëköl a es. Obeja e' dör bua'buäë kë ikí i sulu ku' yës. E' sù Cristo kë kí i sulu tã yës, erë ie' e' me'ttsá ttëwá se' skéie. E' kuekí Skëköl dalöiösö këkraë. <sup>20</sup> Kam ká i' yör, e' yökí ie' tö Cristo wöme'ttsabak ttëwá, erë i'ñe tã mik ká i' erkewatke, etá iwá tka a' tsatkoie. <sup>21</sup> Cristo batamik a' erblöke ie' mik. Ie' tö Cristo shkeq'kane s'duulewá shuá tã ilo me'itö ie' a' buaë. Ie' tö iq'bak es as a'

\* 1:16 Levítico 11.44-45

erblö ie' mik, ñies as ì weraä ie' tö, e' wa panu' a' tö.

<sup>22</sup> I'ñe ta' tte' mokì e' daloié a' tö, e' batamik a' batse'one ñi daléritsoie er mokì wa. Es a' kí ñi daléritso' a' er kos wa. <sup>23</sup> A' a' sene pa' ali mène, e' dör wes a' kurne erpa etökichane es. Eré e' kè dör wes s'kurne erpa s'mi wa s'yé wa es, e' duöta'wa. A' kurne' etökichane Skéköl tte' dör ttsé'ka tso' kekraé e' wa. <sup>24</sup> E' dör wes Skéköl yékkuö tö ichè es, e' tö ichè:

“S'ditsö ulitane dör wes kakö es, Ie'pa dör wes ma'ma wörkua es. Kakö sinewa' ta' iwörkua anewa, <sup>25</sup> eré Skéköl tte' e' tso' kekraé.”†

Ie' tte' e' dör Jesús tte' buaé pakane a' a' e'.

## 2

<sup>1</sup> E' kueki, sene sulu kos olo'yö. Kè a' kachökia' ñi kí. Kè a' e' ökia' tö a' dör pè' buaé. Kè ukyénukia. Kè yi charia' sulué a' tö. <sup>2-3</sup> Skékëpa Jesús er buaé ché se' a, e' kke ttsétke a' tö, e' kueki ie' tte' wák wöchka yulö poé wes alala kurne erpa ese tö imi tsu' yulé es as a' er kí diché ier buaé as a' tsatkër.

*Cristo dör wes ak kibi tso' u katabloie es*

<sup>4</sup> A' shköwa Skékëpa Jesucristo ska', ie' dör wes ak tso' u yuoie es eré ttsé'ka. E' waté'ttsa s'ditsö tö wes u yuökwapka tö ak kè dör buaé u yuoie ese këu es. Eré Skéköl a' ta' ie' dör wes ak shükitule tué daréré es. <sup>5</sup> Es ñies se' dör wes ak tso' u yuoie es eré ttsé'ka. Se' wa Wiköl Batse'r tso' iwé yuök. U e' a' se' dör wes sacerdotepa batse'r es. Eé se' tö ì wër buaé Skéköl wa ese meke ie' a' Jesucristo batamik. I' wër buaé ie' wa, e' dör tö se' tö ie' dalöiö Wiköl Batse'r wa se' er wa ena se' ser kos e' wa. <sup>6</sup> E' dör wes itso' kitule Skéköl yékkuö kí es. E' kí Skéköl tö Cristo ché i' es:

“Ittsö. Ye' tö ak kibiie tkéat ye' u katabloie Sión,

e' dör ak bua'ie shükitule tué daréréé ese.

Yi erblöke imik, ese kë eriarpa.”\*

<sup>7</sup> Ak e' dör Jesucristo. Se' erblöke ie' mik, esepa kikeraka' Skéköl tö. Eré wépa kë erblöku' ie' mik, esepa a' ta' e' kè dör es. Itköke ie'pa ta' wes itso' kitule Skéköl yékkuö kí es, e' tö ichè:

“Ak waté'ttsa u yuökwapka tö, e' yönene ak bua'buaié.”†

<sup>8</sup> Nies e' tö ichè:

“Ak e' mik pè' klastkérdaé, ie'pa ardarö jski ak e' kueki.”‡

Ie'pa kë wä Jesucristo tte' buaé e' iütène, e' kueki ie'pa weirda e' nuíki. E' dör wes ie'pa klastkër Jesucristo mik es. Skéköl tö ie'pa wöme'ttsabak as itkö ie'pa ta' es.

<sup>9</sup> Eré a' kè dör es. Skéköl tö a' shükit as a' dö ie' wák ichaie. Ie' dör a' blü ena a' dör ie' sacerdotepa. A' dör batse'r ie' a. A' bak senuk i' sulu dikia' wes s'ser stui a' es, eré ie' tö a' yé'ttsa e' ulá a' senuie ie' olo buaé tajé e' a. Ie' tö iwé es as ì buaé kos wé ie' tö, e' wä pakö a' tö sulitane a. <sup>10</sup> Kenet ta' a' kè dör ie' icha, eré i'ñe ta' a' dör ie' wák icha. Kenet ta' ie' kè wä a' sune er siaré wa, eré i'ñe ta' ie' tö a' sueke er siaré wa.

*Se' senu' wes Skéköl kí ikiane es*

<sup>11</sup> A' ye' yamipa dalér tajé ye' éna, se' tso' bërberla é ká i' kí wes upaké shkal es. Se' ká bua'ie e' dör ká jai a. E' kueki a' wák dër sulué tö a' erkiöweke ì sulu wamblok, e' kè iutar. E' tö a' wöklö'weke as a' kè tö Skéköl ttö iütè. <sup>12</sup> A' senu' yésyésé kekraé pè' kè tö Skéköl daloié esepa wörki. Eré i'ñe ta' ie'pa tö a' kcateke wes a' chöpa pè' sulusipa es, eré ie'pa tso' a' serke yésyésé e' wä sauk. E' kueki aishkuö ta' mik Skéköl de s'chakök se' nuíki, etá ie'pa tö ie' kikeraka' wes a' serke e' kí. E' kueki a' senu' buaé yésyésé kekraé.

<sup>13</sup> S'wökirpa kos tte' iütö a' tö Skékëpa Jesús batamik. Ká wökir kibi, e' tte' iütö, ie' dör s'wökir kibi ká i' kí e' kueki. <sup>14</sup> Nies wépa patkeke ie' tö s'wökirpaie, esepa tte' iütö a' tö. Ie' tö ie'pa patkeke wépa tö ì sulu wambleke esepa we'ikök ena wépa tö ì bua' weke esepa kikökka. <sup>15</sup> Skéköl kí ikiane tö a' tö ì buaé wé, pè' tö ie' tte' waté'ttsa, kë wä iwä jcher yés, esepa siwa'blöwöwäie as ie'pa kë tö a' chöia sulué.

<sup>16</sup> A' senu' wes pè' tsatkéulettsa es. A' bak klöulewa' ì sulu ulá a, e' yöki a' tsatké'ttsa Skéköl tö, eré e' kë klö'war a' tö ì sulu wambloie. E' skéie a' senu' yésyésé ie' kané mésopaie. <sup>17</sup> Sulitane dalöiö. S'yamipa malepa daléritso'. Skéköl dalöiö. Nies ká wökir kibi, e' tte' dalöiö.

*S'weirke kos e' dalé'ttsösö*

<sup>18</sup> A' wépa klöulewa' kané mésoie, esepa tö a' wökirpa ttö iütö. Wépa er buaé tö a' sueke buaé, ñies wépa er sulué tö a' sueke késik wa, esepa tö iütö er bua' wa. <sup>19</sup> A' kë kí ì nuí ta', eré a' wökir tö a' we'ikeke éme, e' dalé'ttséke a' tö bère, a' er me'rie Skéköl kí e' kueki, e' ta' e' wër buaé ie' wa. E' kueki a' wökirpa ttö iütö. <sup>20</sup> Se' weirke ì sulu wamblesö ese nuíki, ese dalé'ttsésö bère, e' ta' Skéköl kë tö se' kikepaká yés. Eré se' weirke ì buaé wésö ese kueki, ese dalé'ttsésö bère, e' ta' e' je' wër buaé ie' wa. <sup>21</sup> Ie' tö se' klö'bak as se' tö idalé'ttsö es. Cristo weine tajé se' dalérmik, e' dalé'ttsé' ie' tö bère. Es ie' kí ikiane tö se' tö se' weirke ese dalé'ttsö bère wes ie' tö idalé'ttsé' es. <sup>22</sup> Cristo kë wä ì sulu wamblene yés, ie' kë kayéne yés. <sup>23</sup> Mik ie'pa tö ie' yé' sulué iwöshagé, etá ie' kë wä ie'pa

† 1:25 Isaiás 40.6-8

\* 2:6 Isaiás 28.16

† 2:7 Salmo 118.22

‡ 2:8 Isaiás 8.14

yène sulu. Mik ie'pa tò ie' we'ik tajë, etä ie' kè wä yì pauine. E' skéie e' me'atitò, Skéköl tò s'shüleke yësyësë, e' ulä a. <sup>24</sup>Cristo kötëwä wötëulewä krus mik se' nuì kòs patuoie as se' ser yësyësë, ñies as i sulu kè wamblöiasò. Ie' shkä'ne ichkä kì tajë, e' batamik a' buanene. <sup>25</sup>A' bak wës obeja chöwa es, erë j'ñe tã a' dene Cristo ska'. Ie' dör a' kkö'nukwak buaë, ie' tò a' kkö'neke er bua' wa.

### 3

*Wës s'senewabak esepa ké senuk ñita*

<sup>1</sup>A tayëpa, a' wëpa ttò iutò er bua' wa. A' tò iwë es, e' tã a' wëpa wëlepa ké erblöku' Jesús mik, esepa erblömi alë Jesús mik, a' serke buaë ie'pa tã, e' ð batamik, kè wä pakaule ie'pa a. <sup>2</sup>A' wëpa tò isuë tò a' serke yësyësë, Skéköl ttë dalöieke mokjé, e' tò ie'pa erkiöwëmi erblök Jesús mik. <sup>3</sup>A' tayëpa, ¿moki a' e' tsakkã buaala? e' tã kè a' e' kjtarkã tajë a' chkä kì. Kè i tularã tajë e' kì ena a' tsã kì wönarke dalölöë oroie iie. Kè a' e' paiökã datsi' tuë darërëe ese wa. Ese kòs weirtã'wa. <sup>4</sup>E' skéie er buaë ñies sene bërë, ese wa a' e' kjtök. E' kè weirtã'wa ñies e' wër buaë shütë Skéköl wa. <sup>5</sup>Alaköpa bak kã iaiäë tò Skéköl dalöieta', esepa bak e' kjtök es. Ie'pa bak e' maukã Skéköl mik, ñies ie'pa bak iwëpa ttë iutök buaë. <sup>6</sup>Sara tò iwëm Abraham ttë iutë' buaë tã iki'itò kékëpa. A' tò i buaë wëke, kè suarta' i yökì, e' tã a' dör wës Sara es.

<sup>7</sup>A wëpa alaköl tã, a' senu' itã bërë er bua' wa. Ie'pa diché kè tã' tajë wës se' wëpa es. Ñies ie'pa ulä a' sene michoë döraë se' tã ñita Skéköl er buaë ché se' a' e' wa. E' kuëkì ie'pa dalöiö. Iú es as i kieke a' tò Skéköl a, ese kè wöklör.

*Jesús mik erblökwapka ké senuk buaë sultane tã*

<sup>8</sup>Es bata ekkë tã ye' tò ichë a' ulitane a, a' senu' buaë ñita bërë. A' ñi saú er siarë wa. A' ñi dalëritö buaë ñi èlpaie. A' ñi saú er bua' wa. A' e' öwa ñi yökì diöshet. <sup>9</sup>Yi tò i sulu wamblé a' kì, ese kè kì iskë wamblarne. Yi tò a' ché suluë, ese kè ské charne suluë. E' skéie esepa a' a' er buaë chöne. Skéköl tò se' klöo'bak er buaë choie se' a, e' kuëkì a' er buaë chö s'malepa a. <sup>10-12</sup>E' dör wës Skéköl yëkküò tò ichë es, e' tò ichë:

“Skéköl wöbla me'rie s'ser yësyësë, esepa kì ikkò'nuk.

I kieke ie'pa tò ie' a, ese meraëitö ie'pa a.

Erë wëpa e' wamblö sulu, esepa suëkeitö ibolökpaie.

E' kuëkì yì kì ikiane tò ikawö tkö buaë ttsëne bua' wa kekraë,

ese wák kawötã e' kkö'nuk as kè itö i sulu chö, as kè itö yì kütö'ü.

Ese wák kawötã i sulu kòs olo'yök,

kawötã senuk yësyësë.

Ie' kè e' chök senuk bërë kekraë sultane tã.”\*

<sup>13</sup>A' e' tkëwã darërëe senuk yësyësë kekraë, e' tã kè yì a' a' sulunukwã da'a. <sup>14</sup>Erë a' serke yësyësë, e' kì a' weirmi alë, e' tã ayëcha e' dör buaë. Kè a' suanuk wëpa tò a' we'ikeke esepa yökì. Kè a' tkinuk i yökì. <sup>15</sup>E' skéie Cristo dalöiö a' tò e' blüie. Yile tò a' chaké Cristo paneke a' tò kröröë, e' kì, e' tã a' tso'tke erki kekraë iwã iutök. <sup>16</sup>Erë iwã iutö bërë er bua' wa. A' senu' yësyësë as a' er kè tò a' kkatö i kì. E' dör es, e' tã mik pë' tò a' ché suluë a' dör Cristo mik erblökwapka' kuëkì, etã e'pa jaërdakã i ché ie'pa tò e' dör kaçhe e' kuëkì.

<sup>17</sup>Se' weirke i buaë wëke se' tò ese kì, Skéköl kì ikiane alë es, e' tã e' dör buaë. Erë se' weirke i sulu wamblekesö ese kì, e' tã e' dör suluë. <sup>18</sup>Ñies Cristo weine siarë se' nuì patuoie. Ie' kötëwä etökicha ème kè duötã'waiã yës. Ie' dör yësyësë, erë ie' e' mettsã ttëwã se' kè dör yësyësë e'pa skéie se' tsömi Skéköl ska'. Mokjé ie' kötãwã pë' tò, erë ie' shkeq'kane Skéköl tò iWiköl wa. <sup>19</sup>Ñies Wiköl Bats'er wa ie' dë'rö wë wimblupa tso' wötëule ee, ie' e' ali'kã e' chök ie'pa a. <sup>20</sup>Kã iaiäë ie'pa tò Skéköl ttö dalösewã Noé këska'. Noé bak kanö tajë e' yuök, e' dalewa Skéköl tò ipana' enaë tò pë' er mane'ü ie' a, erë ie'pa kè wä igne. E' kuëkì Noé ena iyamipa päköl wa'ñe, e'pa ð tsatkëne kanö a' di' tajë yökì. <sup>21</sup>Di' tajë bakmi Noé këska', e' tò di' a' s'wöskueke e' tsatkoie j'ñeta' e' klea' se' a. S'wösküë e' kè dör s'chkä paskuoie. E' skéie iwã kkachekeitö tò se' tso' ikiök Skéköl a' tò se' nuì olo'yö s'kì as se' er kè tò s'kkatöia. E' tò se' tsatkeke Jesucristo shkënekane e' batamik. <sup>22</sup>I'ñe tã Jesucristo mine'kane kã jai a' e' tkër Skéköl ulä bua'kka† Skéköl biyöchökwapka ulitane, ñies i ulitane tso' s'wökirie wã diché tã' kè wërtã'wã esepa kòs tso' ie' klö dikã.

### 4

<sup>1</sup>Cristo weine tajë se' skéie, e' kuëkì a' e' chö a' weirke kòs e' dalë'ttsök er bua' wa wës Cristo es. Yi weine i buaë wëitö e' kuëkì, esepa kè èna i sulu wamblakia. E' kuëkì a' e' chö weinuk. <sup>2</sup>Wëpa dör es, ese wakpa serkeja kã i' a' etã kè ie'pa èna i sulu wamblakia wës s'malepa tò iwambleke es. E' skéie ie'pa sènak buaë yësyësë kekraë wës Skéköl kì ikiane es. <sup>3</sup>Keñet tã a' kè wã Skéköl suule, e' këwö ska' tã a' bak i sulu è wamblök tajë wës pë' malepa kè wã ie' suule esepa ser es. A' bak trënuq tajë. I sulu kukuëtë'wã darërëe. A' bak e' ttökã blo'

\* **3:10-12** Salmo 34.12-16 † **3:22** ulä bua'kka: E' këwö ska' tã yì tkër blu' ulä bua'kka ese wák dalöiërtã' tajë imalepa tsatã.

wa tajë. A' bak ñi dapa'uk blo' yök tajë. E' kèwa a' tó i sulu kí wambleke tajë. Ñies iyi diököl tò s'dako'wë ekkë, ese dalöiök a' bak tajë skëkölie. <sup>4</sup> Erë j'ñe ta' a' kè mineia pë' kè tò Skëköl dalöie esepa ta' i sulu wamblök wës ie'pa tò iwambleke kè wöklörta' es. E' tò ie'pa tkiwëwa, e' kuekji ie'pa tò a' cheke suluë. <sup>5</sup> Skëköl dör s'duulewä ena s'tso'ia tssë'ka, e'pa kôs shülökwa. Aishkuö ta' i sulu wamblë' ie'pa tò, e' kôs kji ie'pa kawöta e' chökka ie' wörki. <sup>6</sup> Cristo ttë buaë e' pakanebak ñies s'durulune esepa a. Ie'pa durulune i sulu wamblë' ie'pa tò e' kuekji, wës Skëköl tò ime'at tò sulitane kawöta duökwa es. Erë Cristo ttë buaë e' pakanebak ie'pa a as ie'pa wikölpä ser michoë wës Skëköl ser es.

### Se' kè ñi kimum

<sup>7</sup> Ká i' erkewatke, e' kuekji a' tso' erkji, a' e' kkö'nú buaë as a' a' s'yëyër buaë. <sup>8</sup> İyi kôs tsatä a' ñi dalëritsó a' er kôs wa. A' ñi dalëritsóke es, e' ta' wës alë s'yamipa e' wamblö suluë a' kji, ese kè kji a' tkirpa. <sup>9</sup> A' tò s'yamipa kiöwä er bua' wa a' u a, kè isuar suluë. <sup>10</sup> Skëköl er buaë ché a' a, e' kuekji ie' tò ime' a' a' kua'kji kua'kji ñi kimoie, e' kueblupa a' dör. E' kuekji i mène a' eköl eköl a' s'malepa kimoie ese wä kaneü. <sup>11</sup> A' welepa a' imène ttë pakök, e' ta' esepa kawöta Skëköl ttë ë pakök. A' welepa a' imène s'kimum, e' ta' esepa kawöta s'kimum kôs Skëköl tò e'pa a' diché métkë ekkë. I' kôs wëkesö e' üsö buaë as Skëköl kikarkä tajë Jesucristo batamik. Jesucristo diché ta' tajë, olo ta' tajë iyi ulitane tsatä këkraë. Es e' idir.

### Se' tssë'nú buaë se' weirke etä

<sup>12</sup> A' yamipa dalër tajë ye' éna, mik a' weirke siarë Cristo ttë kuekji, etä kè e' kji a' tkinuk. Kè a' tò ibikeitsök tò a' ta' itkömi wës i kè suluë yi wa tkö s'ta' es. <sup>13</sup> E' skéie a' tssë'nú buaë. Cristo weine kôs e' bata de a' kji ñies, e' kuekji a' tssë'nú buaë. E' tköke a' ta' es as a' tssë'r buaë shutë mik Cristo dene olo ta' tajë etä. <sup>14</sup> Ayëcha buaë mik ie'pa tò a' ché suluë Cristo kuekji, e' wa dör tò Skëköl Wiköl olo ta' tajë e' tso' a' ta'. <sup>15</sup> A' weirke s'ttëwä kuekji, akblë kuekji, i sulu wamblë kuekji ö ulä tië o'ka iyi a' e' kuekji, e' je' ta' a' jaënú. <sup>16</sup> Erë a' weirke se' dör Cristo icha e' kuekji, etä kè e' kji a' jaënu. E' skéie Skëköl kikóka a' tò ie'pa tò a' kië Cristo icha e' kuekji.

<sup>17</sup> Skëköl tò sulitane shuleketke, e' kèwö dökewatke. Erë ie' tò iwäk icha shuleraë kewe. Se' weirke j'ñe ta, e' dör sulitane weirdaë e' tsá, e' ta' jì kè tköpa wépa kè tò ttë buaë me' Skëköl tò e' dalöieta' esepa ta? <sup>18</sup> E' dör wës its'o' kiture Skëköl yëkkuö kji es, e' tò ichë:

“Pë' serke yësyësë, iekkë ta' esepa kè tsatkëne,  
e' ta' jì kè tköpa pë' sulusipa ena pë' e' wamblö sulu esepa ta?”\*

<sup>19</sup> Wépa mé Skëköl tò weinuk ie' ttë kuekji, esepa kè i buaë wëkerakitö, ese kji uk. Ie' se' yó', ie' ttö mokjië, e' kuekji se' e' mü bërë ie' ulä a.

## 5

*Skëképa Jesús icha wökirpa esepa patté Pedro tò*

<sup>1</sup> I'ñe ye' tò ilë cheke a' dör Skëképa Jesús icha wökirpa esepa a. Ñies ye' dör Jesús icha wökir eköl. Cristo weine siarë, e' su'yö ye' wäk wöbla wa. Mik ie' datskene, etä ie' olo tajë e' kkayërdaë sulitane a, e' a ye' tso'ñak a' ta. E' kuekji ye' tò a' a' ichë tò <sup>2</sup> wépa me' Skëköl tò a' ulä a' kkö'në wës obeja es, esepa kkö'nú buaë, er buaë wa wës ie' kji ikiane es. Kè dör tò a' kè éna iwäk, erë a' tò iweke. E' skéie iwakaneü er bua' wa. Ñies kè ie'pa kkö'nar inuköl ë dalërmik, e' skéie ikkö'nú er bua' wa ie'pa kimoie. <sup>3</sup> Kè a' tò ie'pa wëtttsuk kësik wa. Kè a' e' tssökka tajë ie'pa kji. E' skéie a' senü buaë yësyësë ie'pa wöki as ie'pa ser buaë wës a' ser es. <sup>4</sup> A' tò iwë es, e' ta' mik Cristo dör se' ulitane wökir kibi e' datskene, etä iské buaë olo ta' tajë, kè sulurta'wä e' meraëitö a' a.

### Jesús icha malepa patté Pedro tò

<sup>5</sup> A' duladulapa, a' kéképa ttö iütö buaë. Ñies a' ulitane e' wöwä diöshët ñi yöki, a' ñi dalöiö er bua' wa. Skëköl yëkkuö tò ichë:  
“Wépa e' tssökä tajë, esepa wöklö'wëke Skëköl tò.

Erë wépa e' wöwä diöshët, esepa a' ie' er buaë chö.”\*

<sup>6</sup> E' kuekji a' e' wöwä diöshët ie' diché ta' tajë e' yöki, as ie' tò a' kikóka mik ikéwö de etä. <sup>7</sup> Ie' er me'rie a' kji a' kkö'noie, e' kuekji kè a' tkinuk i kji. I' kôs tò a' tkiwëke, a' tsiriwëke, e' múat ie' ulä a.

<sup>8</sup> I'a' tso' erkji, a' e' kkö'nú! Bë dör a' bolök. Ie' tso' a' tötiuk wës ma' name arke tajë, e' tò iyiiwak tötiëke katëwa es. <sup>9</sup> A' e' tköwä darërë a' erblöke Skëköl mik e' a, es a' tò Satanás wöklö'wëraë. A' wa ijcher tò ká wa'ñe s'yamipa tso' weinuk wës a' es. E' kuekji a' e' tköwä darërë Skëköl a. <sup>10</sup> Ie' er buaë ché se' a' tajë shutë. Ie' tò se' shukitbak as se' döñak ie' olo yöbië e' a, se' batsulewä Cristo mik e' wa. Se' weirke ekuölö ë ká i' a, mik e' tka, etä i sulu tso'ia se' a, e' yerattsigitö sëkka. Ie' tò se' tkewaraë darërë. Ie' tò se' er diché ieraë, kè i' e' alópakaja se' kji. <sup>11</sup> Ie' diché ta' tajë iyi ulitane tsatä. Ie' dör iyi ulitane wökir këkraë. Es e' idir.

\* 4:18 Proverbs 11.31

\* 5:5 Proverbs 3.34

*Pedro e' chéat*

<sup>12</sup> Ye' tō Silvano ké yèkkuō i' shtök. Ye' wa ijcher tō ie' dör s'yami e' tkëulewa darërë ese. Yèkkuō i' shtéyō a' a' er diché kí ioie. Skëköl er buaë ché se' a' tajë, e' shtéyō yèkkuō i' k̄i. Ye' tō ichè tō e' dör ttè mokjè, e' a' e' tkōwa darërëë.

<sup>13</sup> Jesús mik erblökwakpa k̄os tso' Babilonia, e'pa tō a' shkë'wémi. E'pa shukit Skëköl tō wes ie' tō a' shukit es. Nies Marcos dör wes ye' wák alá es, e' tō a' shkë'wémi. <sup>14</sup> A' ñi shkë'ú er bua' wa.

A' k̄os dör Cristo icha, e'pa s̄enú bërë.

## Yëkkuö skà kit Pedro tö, i' ta ide böt 2 Pedro

Yëkkuö skà i' kit Pedro tö. Ie' wà ijchenewa tö iblërkewatke, e' yë'itö 2 Pedro 1.12-15 e' kî. Jesús mik erblökwakpa weirke ierblö ñe' kuekî, e'pa a' Pedro tö yëkkuö i' kit ie'pa er one Jesús tté mokjê e' ska' as iserdak yësyësê ena kekraë Jesús a. E' kîieta ie' tö ie'pa a' ieri mène tö pë' e' ò tö ie'pa dör Jesús mik erblökwakpa esepa döraë ie'pa shuà ikítóukrak. Ie' tö ie'pa a' iché tö wes s'kító'ukwakpa ñe'sepa serdaë. Nies ie' tö ie'pa a' iché tö s'kító'ukwakpa we'ikeraë Skéköl tö. E' kîieta i' tkömi ká i' erkewatke età e' eri mène Pedro tö ie'pa a. Ie' tö iché ká i' erkewa e' kèwö dewatke tsjinet, e' kèwö skà' ta' ie'pa kawötà senuk yësyësê Jesús kîkokaie.

Ñies Pedro tö iché tö mokjê Jesús datskene erê Skéköl tö sulitane suêke er sjarê wa ena ie' kî ikiane tö se' er mane'ù ta' se' erblö Jesús mik. E' paneke ie' tö er bua' wa, e' kuekî kam ie' tö Jesús patköne.

### Shkewè

1 Ye' dör Simón Pedro. Ye' dör Jesucristo kanè méso. Nies ye' dör ittekölpa tsá, e'pa eköl. Jesucristo dör Skéköl ena S'tsatkókwak. Ie' dör yësyësê, e' batamik sa' de erblök ie' mik. Ye' tso' yëkkuö i' shtök wépa de erblök ie' mik buaë mokjê wes sa' es, esepa a.

2 Skéköl ena Skéképa Jesús as e'pa er buaë chö ena sene bërè mù a' a' tajê, a' kî batsmir buaë ie'pa mik e' a.

### Se' er diché iö senukyësyësê Skéköl a

3 Jesús tö se' klö'bak as se' dō ie' ta' ñita ie' olo tajê e' a, ñies as se' ser wes ie' ser es. Se' batsë ie' mik, e' wa i' kos kiane se' kî senoië wes ie' kî ikiane es e' me'tkeitö se' a' ie' diché tajê e' wa. 4 Iyi ekkê kos wa ie' kablê' se' a' as se' dō wes ie' wák dër es, as se' tköshkar i' sulu tso' ká i' a' wamblak se' éna tö se' sulu'wëwami ese ulá a. Skéköl kablê' se' a, e' me'tkeitö se' a, e' dör tajê buaë shutë. 5 E' kuekî a' e' diché iö a' erblöke Cristo mik, e' kîie senuk yësyësê. Sene yësyësê, e' kîie Skéköl iyi anuk. 6 Skéköl iyi ane, e' kîie e' kkó'nuk. E' kkó'nè, e' kîie iyi panuk bërè. Iyi panè bërè, e' kîie er mukwa Skéköl è kî. 7 Er mewa Skéköl è kî, e' kîie ñi sauk er bua' wa wes ñi élpa es. Ñi suê er bua' wa, e' kîie ñi dalëritsök. 8 Iyi ekkê kos weke a' tö, ñies ikî weke a' tö kekraë, e' ta' e' wa kiane ché tö mokjê a' batsë buaë Skéképa Jesucristo mik. A' serke es, e' ta' i' kos weke a' tö Skéköl a, e' wà dörattsa buaë. 9 Erê wépa e' chö tö ie'pa erblö Cristo mik, erê ie'pa kè tö iyi ekkê

wawè, esepa dör wes s'wöbla kè wawër buaë es. Ie'pa kè éna iwà ane buaë. Wësua ie'pa éna ichowa tö i' sulu wamblê' ie'pa tö, e' pairi'ttsa Skéköl tö ie'pa kî. 10 A' yamipa, a' e' diché iö senuk buaë yësyësê kekraë, e' wa iwà kkayërdaë tö mokjê Skéköl tö a' klö'bak, a' shukitbakitö iwák a. A' tö iwé es, e' ta' a' erblöke Cristo mik, e' kè olo'yepa a' tö yës. 11 E' wa aishkuö ta' a' kirdawa buaë i' blúie Skéképa Jesucristo dör S'tsatkókwak, e' tso' e' a. E' dör yöbië.

12 Iyi ekkê jcher a' wa buaë. Ttè mokjê wa a' e' wöblao', e' a' tso' e' tkéulewa darërèë. Erê ye' tö a' a' ikî ché michoë as a' kè éna ichowa. 13 Ye' tso'ia' tssé'ka, eta ye' a' ta buaë idir tö ye' tö a' a' ttè i' kî ché as a' tö iyi ekkê wà bikeitsö kekraë. 14 Skéképa Jesucristo tö ye' a' iyè' tö wëkké alé ta' ye' kè ku'ia' ká i' kî. 15 Ye' tö i' kos weraë as ttè i' kè chöwa a' éna yës i' ñie ta' ñies mik ye' blënëwatke e' ukuökî ta.

16 Skéképa Jesucristo olo ta' tajê, e' su' sa' tö sa' wákpa wöbla wa. E' kuekî mik sa' tö a' wöblao' ie' diché ta' tajê ena ie' datskene e' tté wa, età kè sa' wà ipakane a' a' tté kè wà ta' wes sa' wákpa tö ibikeitsé ché es a' kító'woie. 17-18 Mik sa' dërö ie' ta' kabata batse'r, e' tukir kî, eta ege Skéköl dör S'yê, e' tö ie' kîkéká tajê. Ttö datse Skéköl olo ta' tajê e' ska', e' tö ie' ché i' es: "Së dör ye' alá dalër tajê ye' éna, e' wër ye' wa buaë shutë." E' kos su' sa' tö. Ttö ñe' datse ká jai a, e' tssé' sa' tö, sa' tso'ñak ie' ta' ege e' kuekî.

19 I' su' sa' tö, i' tssé' sa' tö, e' tö ikî cheke se' a' tö Jesús tté tso' kîitule Skéköl yëkkuö kî ká iaiäë ittekölpa wa, e' yène mokjê. E' kuekî tté kit ie'pa tö yëkkuö kî, e' wà iütök a' kawötà bua'iewa. Ttè e' dör wes bö'wö batséká stui a' tö ká olo ppeeke ese es. E' tö se' er ñi'weke as se' éna iar tö i' dör mokjê, i' dör kache. Ttè e' tö se' kimeräë dō mik Skéképa Jesucristo datskene età. Mik ie' de, età i' kos ardaë buaë se' éna, e' dör wes ká ñir s'kî es. Jesucristo dör wes békwo bérie wërke bla'mi e' es. 20-21 Erê i' kos tsatà a' wa ijchenú tö i' yè' Skéköl ttekölpa tö, tso' kîitule Skéköl yëkkuö kî, e' kè yène ie'pa wa ie'pa wákpa er wa. Erê Skéköl tö ie'pa kè ichök wes ie' kî ikiane es Wiköl Batse'r wa. E' kuekî i' kit Skéköl ttekölpa tö ká iaiäë, e' kè yène ie'pa wa iwákpa er wa, e' dör Skéköl tté mokjê.

## 2

### S'wöbla'ukwakpa kache tté wa

1 Ká iaiäë Israel aleripa shuà kachökwakpa e' ka'ka e' chök tö ie'pa dör Skéköl ttekölpa. Es ñies i' ñie ta' a' shuà kachökwakpa e' kōrakā e' chök tö ie'pa dör s'wöbla'ukwakpa Skéköl tté wa. Ie'pa e' ò tö ie'pa tso' tté mokjê pakök, erê tté wa ie'pa tö s'wöbla'weke, e' tö s'er sulu'wëwami e' iütésö, e' ta' Skéköl tö s'we'ikeraë. Skéképa Jesucristo tö ie'pa

nuj to'ttsa, erë e' wák watéttsa ie'pa tö. E' kuekji ie' tö ie'pa we'ikeraë bet. <sup>2</sup> Erë tajë s'yamipa ardarö kache ttë e' a itrërdarak tajë wës iwöbla'ukwakpa es. Ie'pa kuekji ttë mokj e' cheraë suluë pë' malepa tö, <sup>3</sup> S'wöbla'ukwakpa kache ttë wa, e'pa kji inuköl ë kiane tajë, e' kuekji ie'pa tö a' inuköl yerattsa ttë kë wä ta' pakeke ie'pa tö ese wa. E' kuekji ká iaiäë ie'pa esepa wöme'ttsabak weinuk Skëköl tö, e' kë chë'wa ie' éna.

<sup>4</sup> Ká iaiäë Skëköl biyöchökwakpa welepa tö i sulu wamblë' ie' kji, e' nuj kë olo'yane ie' wä ie'pa kji. Ie' tö ie'pa batrëlor bö' kë a, eë ie'pa tso' wötëule moulewa stui a' ie'pa kichateraëitö aishkuö ta' e' panuk. <sup>5</sup> Nies ká iaiäë wakpa bak senuk Noé këska' ta, e'pa tö i sulu wamblë' tajë, e' nuj kë olo'yane ie' wä ie'pa kji. Noé tö ipaka' ie'pa a' tö ie'pa kawötä senuk yësyësë, erë ie'pa kë wä ie' ttë iütëne. E' kuekji Skëköl tö ie'pa ewëwa di' tajë wa. Noé ena imalepa doka kul (7), e'pa ë tsatké Skëköl tö di' tajë yöki. <sup>6-8</sup> Nies ká iaiäë ká bö't kië Sodoma ena Gomorra, e' wakpa dör pë' sulusi. E'pa shuä wëm serke eköl kië Lot, e' serke yësyësë. Ie'pa trër tajë, e' tteke, e' suëke ie' tö këkraë, e' tö ie' dör buaë e' eriawëke siarë. Ie'pa nuj kji Skëköl tö ie'pa wömëttsa ewëwa. Ie' tö ie'pa ena ie'pa ká e' kos ña'wëwa seraq imuluchka ë ate. Erë Lot, e' ë tsatkëttsaitö. Ie' tö ie'pa ewëwa es iwä kkaçho silitane a' tö es itkoraë pë' sulusipa kos esepa ta.

<sup>9</sup> E' kos bak ká iaiäë, e' wa se' wä ijcher tö wëpa serke buaë yësyësë, esepa tsatkërimi buaë Skëköl a' i kos tö ie'pa we'ikeke e' ulä a. Nies se' wä ijcher tö wëpa dör i sulu wamblök'wakpa, esepa tso' blëule ie' wä ishulirkerak e' këwö panuk. <sup>10</sup> Wëpa e' mettsa e' ia'ukka sene sulusi wa wës ie'pa wák dër sulu kji ikiane es ena Skëköl ttë watëttsarakitö, esepa kos we'ikeraëitö tajë s'malepa tsata.

S'wöbla'ukwakpa kache ttë wa, e'pa e' wamblörak kësik kësik, kë tö i ulë klö'wëta', iwökir darërëë. Ie'pa kë suane wëpa olo ta' tajë, esepa chök suluë. <sup>11</sup> Skëköl biyöchökwakpa diché ta' tajë, olo ta' tajë s'wöbla'ukwakpa kache ttë wa, esepa tsata, erë ie'pa kë tö imalepa dör suluë esepa cheta' Skëköl a' suluë as ikichatër. <sup>12</sup> Erë i sulu wambleke s'wöbla'ukwakpa kache ttë wa, esepa tö, e' wamblekerakitö kë wä bikeitsule wës iyiwak kañiru kë a' ká arta' tso' klö'wëwa ttëwä es. I' kë ane ie'pa éna, e' kos cheke suluë ie'pa tö. Ie'pa duörawa wës iyiwak kañiru ttëwä es. <sup>13</sup> Ie'pa tö s'malepa we'ikeke, e' skéie ie'pa weirdaë siarë. I' sulu tö ie'pa tssë'wëke buaë, ese kos wambleke ie'pa tö tajë ñiwe kë jaër ta'ia, ese tö ie'pa tssë'wëke buaë. Mik a' ñi dapa'uke

chkök ñita di'yök ñita, eta' ie'pa tso' a' shua i sulu wamblök e' tssë'woie buaë. Ese wa ie'pa éna a' kütö'wak. Es ie'pa tö a' kawö sulu'wëkewa. Ie'pa tö a' jaëwëkëka tajë. <sup>14</sup> Ie'pa er me'rie trë ë kji. Ie'pa kë shtrirta' wä i sulu wamblök. Wëpa kë e' tkënewa darërë S'tsatkök'wak ttë a, esepa dakiñekerakitö as ie'pa tö i sulu wamblöne wës ie'pa es. Ie'pa tö inuköl ë kkecheke tajë këkraë. Ie'pa wöme'ttsabak kichatëe Skëköl tö. <sup>15-16</sup> Ie'pa dör wës s'cholor es. Nala yësyësë e' olo'yé ie'pa tö e' wambloie wës ká iaiäë Beor alä kië Balaam dör Skëköl tteköl, e' e' wamblë' es. Ie' mi i sulu wamblök inuköl ë dalërmik, erë Skëköl tö ie' burro kë ttökka ie' ta' ta iuñéitö ta' ichéitö ia: ¿I wambleke be' tö aljie? E' tö Balaam wöklö'wë.

<sup>17</sup> S'wöbla'ukwakpa kache ttë wa, e'pa dör wës di' tum itö kë a' di' ta' es. Ie'pa dör wës kaji morka mochka a' uyë siwa' tö kë wä yërta' es. Ie'pa wömeulettsa weinuk michoë stui kë a. <sup>18</sup> Ttë pakeke ie'pa tö e' tssë'r buaë, erë kë iwä ta'. I' sulu kukuëña ie'pa ena i sulu kiane s'wák dër sulu e' kji, e' wa ie'pa tö wëpa e' yëttsa tsaririë iserkerak kütëule e' ulä a, esepa erkiöwëkekane as iarmine i sulu a. <sup>19</sup> Ie'pa tö icheke: "A' tö sa' ttë iütë, e' ta' a' kë ku'ia klöulewä i ulä a, a' sermi wës a' wäpa kji ikiane es." Ie'pa tö icheke es, erë ie'pa wäpa tso' klöulewä i sulu ulä a, ie'pa kë a' e' yëpattsa wës. Mik se' kë a' e' yënëttsa i ulä a, eta' e' wä dör tö se' tso' klöulewä i ulä a. <sup>20</sup> Skëképa Jesucristo dör S'tsatkök'wak e' mik se' e' batsé, e' wa sene sulusi tso' ká i' a' e' olo'ya'sö. Erë se' anemine i sulu ulä ane, kë tö ilo'yeta', e' ta' se' a' e' dör sulu ichökke kewe tsata. <sup>21</sup> Se' tö sene yësyësë e' ttë klö'bak buaë kewe. Erë e' ukuökj ta' ttë dalöiëno batse'r mène se' a, e' olo'yésö, e' ma buaë idir tö kë sö iklö'üpa. <sup>22</sup> E' dör wës ttë mokj i' tö iché es: "Chichi chöli tuëttsa, e' ukuökj ta' iñéwaneitö."\* Nies skä tö iché: "Köchi kuöwësö buaë, e' miä' kuekane dö a."

### 3

#### Skëképa Jesús dörane

<sup>1</sup> A yamipa dalër tajë ye' éna, ye' tö yëkkuö tsá kit a' a, e' skä shtekyö a' a, i' ta ide bö't. Yëkkuö bö't e' kji ye' tso', ttë jchertke a' wa, e' chökne a' a' pattök as a' er arne iska' ta iwä bikeitsö bua'iewä yësyësë. <sup>2</sup> I' yë' Skëköl ttekölpa batse'r e'pa tö ká iaiäë, e' ska' a' er anú. Nies ttë dalöiëno me'at Skëképa dör S'tsatkök'wak e' tö, e' ska' a' er anú. Sa' dör ittekölpa tsá, e' pa tö ttë e' yé' a' a.

<sup>3</sup> A' wä ijchenú bua'iewä tö ká i' erkewatke e' këwö ska' ta' pë' serke suluë esepa doraë. Ie'pa tö i sulu ë wambleke wës ier sulu tö ikieke ia' es. Ie'pa tö a' wayueraë <sup>4</sup> ta' a' a

\* 2:22 Proverbios 26.11

ichakeraë: “Jesucristo kablë' dökne çwes e' de? Ikkë tã kë iwër tã, çwé idir? Se' kékëpa blërulunebak, etã iyi kôs mir iwák suë wes iyöne kuaë es.”<sup>5</sup> Erë ie'pa wã ijcher tã ì cheke ie'pa tã e' kë yëne. Ie'pa kë kï ikiane ttséno tã kã iaiãë Skëköl tã kã jai ena ì kôs tso' ia, e' yö' ittö ë wa. Nies kã i' ena ì kôs tso' iki, e' yö' ie' tã ittö ë wa. Kã i' dë'kã ie' wã di' a, es di' tso' kã i' pamik shkit.<sup>6</sup> Ie'pa kë kï ikiane ttséno tã ì ulitane bak senuk kã i' a, e' eo'wa Skëköl tã di' tajë bak e' wa.<sup>7</sup> Erë kã jai ena kã i' tso' j'ñe tã, e' kicha a'ria ie' wã iwák tte wa dö mik ie' tã iewëkewa bö' wa aishkuö tã etã. E' kôs tköraë mik pë' sulusipa shulirke kichatërketsã e' këwö de etã.

<sup>8</sup> A yamipa dalër tajë ye' éna, kë a' éna ichökwa tã Skëköl a kã etkë, e' dör wës duas döka mil eyök es, nies duas döka mil eyök, e' dör wës kã etkë es.<sup>9</sup> Skëkëpa Jesús kablë', e' wã tköraë. Ie' datskene sulitane shulök mik Skëköl kï ikiane etã. E' kë dör tã ie' kablë' e' chowa ie' éna wës pë' wëlepa tso' ibikeitsök es. E' kë dör es. Ie' kë kï ikiane tã yi weir aishkuö tã. Ie' kï ikiane tã sulitane er mane'u ie' a. E' wã panuk ie' tso' énaë. E' kuekï ie' kãm döne.

<sup>10</sup> Erë ie' dörane, kë tköpa. Mik ie' datskene, etã e' këwö döraë kë e' biyö yëule wës akblökwakpa döwa nañewe es. Mik ie' de, etã kã jai kôs blardaë tajë tã ichörawa kë wërpaia. Ì kôs tso' kã jai a, e' ñardawa diardawa. E' sù kã i' ena ì kôs tso' iki, e' ñardawa sekka, kë ì atukia.<sup>11</sup> E' kôs erdawa es, e' tã çwes kë se' serpa batse'r e' tkëulewã darërëë Skëköl ë a? <sup>12</sup> E' këwö panuk se' tso' poë, e' dalewa se' e' chõ senuk wës Skëköl kï ikiane es as ikëwö e' dö bet. Mik e' këwö de, etã kã jai ñardawa ena ì kôs tso' ia, e' diardawa erdawa bö' wa.<sup>13</sup> Erë Skëköl kablë' kã jai pa'alì ena kã i' pa'alì e' yuök se' a. Wëpa serke yësyësë, esepa ë serdaë ee. Eë ì sulu kë tã'. E' wã paneke se' tã poë.

<sup>14</sup> A yamipa dalër tajë ye' éna, a' tso' iyi ekkë wã panuk, e' dalewa a' e' tköwã darërëë senuk as mik e' këwö de, etã ie' tã a' kù senuk bërë ñita, kë iaulekã, kë kï ì sulu ttë tã'.<sup>15</sup> A' éna ianú tã Skëkëpa Jesús kãm dö, ie' tso' ia ipanuk as s'atsãkër. Nies tte e' kitãt a' a yëkkuö kï s'yami Pablo dalër tajë se' éna e' tã. Ie' tã ikitãt erbikë tajë me' Skëköl tã ie' a e' wa.<sup>16</sup> Tte ì kit Pablo tã yëkkuö kôs kit ie' tã ekkë kï. Ie' tte wële dör darërë, kë wã ar se' éna bet. Pë' wëlepa kë yöule buaë, kë e' tkëulewã buaë Jesucristo tte a, esepa tã Pablo tte darërë, e' wã shkulì wëkewã wës ie'pa tã Skëköl tte kitule yëkkuö kï malepa, e' wã shkulì wëkewã es. E' nuì kï ie'pa weirdaë siarë.

#### *Ttë bata*

<sup>17</sup> A yamipa dalër tajë ye' éna, iyi ekkë kôs chertke a' wã buaë. E' kuekï a' e' kkö'nú pë'

sulusi ñe'sepa yökï as a' kë tã ie'pa ttö iutö. A' tso' erkï as a' e' tkëulewã buaë S'atsãkëkwak mik, e' kë olo'yö a' tã.<sup>18</sup> Skëkëpa Jesucristo dör S'atsãkëkwak, e' er buaë chë se' a, e' tte wa a' kï e' yuö. Ie' mik a' kï e' batsö bua'ie. jAs ie' kïkarkã tajë j'ñe tã ena këkraë! Es e' idir.



## Yëkkuö tsá kit Juan tö 1 Juan

Yëkkuö i' kit Jesús ttekölpa tsá e' eköl kië Juan e' tö. Ie' tö ikit Jesús mik erblökwakpa serke Asia e'pa a. I'ñe ta ká e' kië Turquia. Ie' tö ikit etá ie' tö dewatke kékëla. Nies yëkkuö ská kit ie' tö döká tkël, e' böt dör tsitsir, böt dör blublu. Yëkkuö blublu e' et kië 'Jesús Tté Buäë kit Juan tö' ena iët kië 'i Kkayë' Jesucristo tö Juan a e' Pakë'.

Skëköl éna Jesús mik erblökwakpa dalër tajë ena iyi tajë buäë o' ie' tö ie'pa a Jesucristo batamik, e' pakë Juan tö yëkkuö i' kï. Nies ie' tö ichë tö mik se' ñi dalëritsöke etá se' wá ijcher tö Skëköl dör se' wák, e' kuekï se' kawötá ñi dalëritsök.

E' kúie ta ie' tö yëkkuö i' kit Jesús mik erblökwakpa a s'wöbla'ukwakpa kache tté wa esepa biyö choie. Ie'pa tö s'wöbla'weke tö Jesús kë dör wës s'ditsö es. Ie'pa tö ichë tö ie' wër se' sù erë kë idör se' es. Jesús mik erblökwakpa kë káne ie'pa ttö ttsök. Ie'pa dör s'kítö'ukwak. Skëköl Wiköl e' je' tö Skëköl ena ilá Jesucristo e'pa tté mokï e' kkacheraë se' a. Es Juan tö ichë yëkkuö i' kï.

### Sene michoë mukwak

<sup>1</sup> Itso' eköl dör ttë tö sene michoë meke se' a e'. E' ttë pakeke ye' tö a' a yëkkuö i' kï. Tsawemi ta ie' tso'tke, erë i'ñe ta sa' tö ichë a' a tö ie' ttö ttsë' sa' tö, ie' sù' sa' tö ena i' o' ie' tö e' sù' sa' tö, nies ie' ka' sa' tö sa' ulá wa. <sup>2</sup> Ie' dör sene michoë mukwak, e' patkë'bitü S'yë tö ká i' a s'ditsöie e' kkachök se' a, e' sù' sa' tö. E' kuekï sa' tö ie' tté mokï e' pakeke a' a. Sa' tö ichë a' a tö ie' tö sene michoë meke se' a. Ie' bak S'yë ta ñitá kuaë kekraë, erë S'yë tö ie' kkayë' sa' a. <sup>3</sup> Es ie' sù' sa' tö, ittö ttsë' sa' tö, e' tté pakeke sa' tö a' a i' ta as a' bätswá sa' mik wës sa' batsulewá S'yë mik ena ilá Jesucristo mik es. <sup>4</sup> Yëkkuö i' shteke sa' tö a' a as a' ttsë'r buäë mokïë.

### Sene yësyësë

<sup>5</sup> Tté wa Jesucristo tö sa' wöblag', e' wá pakeke sa' tö a' a, e' dör i': Skëköl dör buäë yësyësë, kë kï i' sulu ta' wës ká ñi kë a ká ttsetse ta' es. <sup>6</sup> E' kuekï se' e' chö tö se' batsulewá ie' mik, erë se' tso'ia i' sulu wamblök, e' ta se' tso' kachök. Se' kë tö tté mokï e' iütëku'. E' dör wës se' serkeia ká ttsetse a es. <sup>7</sup> E' skéie, se' serke yësyësë wës ie' ser yësyësë es, e' ta se' bätse buäë ñi mik. Nies ie' alá Jesucristo, e' pé wa se' pairirke se' nuï kos e' kï.

<sup>8</sup> Se' e' chö tö se' kë tö i' sulu wamblëta', e' ta se' wák e' kütö'uke, nies tté mokï kë ku' se' er a. <sup>9</sup> Erë Skëköl ttö mokïë ena ie' dör yësyësë. E' kuekï se' e' kkatéka ie' a, e' ta se'

nuï olo'yeraëitö se' kï, nies sene sulu nuï kos paikleraëitö se' er a. <sup>10</sup> Se' e' chö tö se' kë tö i' sulu wamblëta', e' ta se' tso' ichök tö Skëköl kachöta', nies iwënewá tö ie' tté kë ku' se' er a.

## 2

<sup>1</sup> A' ye' ala'rla, ye' tso' tté ikkë shtök a' a as a' kë tö i' sulu wamblö. Erë se' wele tö i' sulu wamblé, e' ta s'tsatkökwak tso' eköl S'yë ska', e' dör Jesucristo dör yësyësë e'. <sup>2</sup> Jesucristo e' me'ttsá ttëwá se' skéie sene sulu nuï olo'yoie se' kï. Erë ie' kë kôtëwá se' ë nuï kï, nies ie' kôtëwá ká ulitane wakpa nuï kï.

### Se' kawötá ñi dalëritsök

<sup>3</sup> Skëköl tté dalöiëno e' dalöiekesö, e' ta e' wa se' wá ijcher buäë tö se' bätse ie' mik. <sup>4</sup> Yi e' chö: "Ye' bätse buäë Skëköl mik", erë ese kë tö ittë dalöieku', e' ta ie' tso' kachök, kë ittö mokï. <sup>5</sup> Erë yi tö ie' tté dalöieke, ese je' éna ie' dalër mokïë. Es se' wá ijcher tö se' batsulewá ie' mik. <sup>6</sup> Yi e' chö: "Ye' tkérie Skëköl mik", ese kë senuk wës Jesucristo sene' es.

<sup>7</sup> A yamipa dalër tajë ye' éna, tté dalöiëno shtekeyö a' a i', e' kë dör tté pa'alí a' a. Tsawe ta tté e' yënebak a' a. Tté e' meneat ká iaiä, e' tseuletke a' wá, e' dör i': se' kawötá ñi dalëritsök. <sup>8</sup> Tté e' meneat ká iaiä, erë e' këwö ska' ta se' er tso'ia wës ká ttsetse a es, e' kuekï kë se' éna iwá ane buäë. Erë i'ñe ta se' er a ká ñirketke Cristo tté mokï e' kuekï. Wës Cristo éna se' dalëne, nies wës a' ñi dalër, e' wa iwër wësua tö tté e' dör pa'alí.

<sup>9</sup> Yi e' chö: "Cristo tté tö ye' er ñi'wé", erë ese éna iyami ar suluë, e' ta ie' er kam ñir, ie' er tso'ia ká ttsetse a. <sup>10</sup> Erë yi éna iyami dalër mokï, ese er a ká ñine buäë, kë i' tö ie' epamine sene sulu a. <sup>11</sup> Erë yi éna iyami ar suluë, ese er tso'ia ká ttsetse a. Ie' e' wamblö suluë, kë ie' wá ijcher i' dör suluë. Ie' dör wës s' shköke ká ttsetse a es. Ká ttsetse kë tö ie' kawö mè ká sauk, e' kuekï kë ie' wá ijcher wé ie' mörö.

### A' kë káne er mukwá i' kos tso' ká i' a ese kï

<sup>12</sup> A ala'rla, a' nuï kos olo'yane a' kï Jesús batamik, e' kuekï ye' tso' yëkkuö i' shtök a' a. <sup>13</sup> A' dör kékëpatke, a' bätse Jesús tso'tke tsawe ta e' mik, e' kuekï ye' tso' yëkkuö i' shtök a' a. A duladulapa, a' e' ali'ka bë kï, e' kuekï ye' tso' yëkkuö i' shtök a' a.

A ala'r, a' dör wës ye' ala'rla es, a' bätse S'yë mik, e' kuekï ye' tso' yëkkuö i' shtök a' a. <sup>14</sup> A' dör kékëpatke, a' bätse Jesús tso'tke tsawe ta e' mik, e' kuekï ye' tso' yëkkuö i' shtök a' a. A duladulapa, a' e' tkéwa darëre Skëköl tté a, e' tso' a' er a, nies a' e' ali'ka bë kï, e' kuekï ye' tso' yëkkuö i' shtök a' a.

<sup>15</sup> Kë a' er mukwá ká i' kï ena i' tso' ikï ese kï. Yi er méwá ikï ese kë éna S'yë dalërta'. <sup>16</sup> ¿I' tso' ká i' a? E' dör i' kos tö s'wák dër

sulu ttsë'weke buaë ese. Nies e' dör i kqs wa s'wöbatsö kkechekesö tajë ese. Nies e' dör iyi tso' se' wä wa se' e' tsoäka tajë ese. İyi ekkë kqs tso' kä i' a, ese kë menebitü S'yë wä se' a, e' datse i sulu tso' kä i' a ese wä. E' kueki kë se' er mukwä iyi ekkë ki. <sup>17</sup> Kä i' erkewatke, nies i sulu kqs tso' ikü tö se' erküweke ese erkewatke. Erë wëpa tö i kiane Skëköl ki ese weke, esepa ser michoë.

<sup>18</sup> A ye' ala'rla, kä i' erkewa e' këwö dökette. A' éna iane tö sa' tö a' a iyë' tö mik kä i' erkewatke, etä eköl idatse kië Cristo Bolök. Es i'ne ta' a' tö isueke tö tajë Cristo bolökpa tso', e' kueki se' wa ijcher tö kä i' erkewa e' këwö dökette. <sup>19</sup> İe'pa bak se' éltëpa ta, erë ie'pa e' yélurne. E' wa iwënewä tö ie'pa kë dör mokü se' éltëpa. İe'pa chöpa se' éltëpa mokü, e'ma ie'pa tso'ia se' ta. Erë ie'pa e' yélurne, e' wa iwënewä wöshak tö ie'pa kë dör se' éltëpa.

<sup>20</sup> Cristo dör yi dör batse'r ichökle, e' tö a' batse'wë Wiköl Batse'r wa, e' kueki a' wä Cristo ttë mokü e' jcher. <sup>21</sup> Ye' tso' yëkküö i' shtök a' a, e' wä kë dör tö a' kë wä Cristo ttë jcher. E' skéie a' wä ie' ttë jcher buaë, e' kueki ye' tso' yëkküö i' shtök a' a. A' wä ijcher tö kachökwapka kë tö ttë mokü paketa'. <sup>22</sup> Etä çwëpa dör kachökwapka? Wëpa tö icheke tö Jesüs kë dör wë pairine'bitü idi' wa s'blüie e', esepa dör kachökwapka. Esepa dör Cristo bolökpa, ie'pa tö S'yë éna ilä watëttsä e' kueki. <sup>23</sup> Wëpa tö icheke tö Cristo kë dör Skëköl Alä, esepa tso' ie' watöktsa, nies ie'pa tso' S'yë watöktsa. Erë wëpa tö icheke tö Cristo dör Skëköl Alä, esepa tso' buaë S'yë ta.

<sup>24</sup> Cristo ttë mokü ttsë' a' tö mik a' tö iklöç' tsawe ta, e' seü a' er a' këkraë. E' wë a' tö es, e' ta' a' serdaë batsulewä S'yë éna ilä mik këkraë. <sup>25</sup> İ muk Jesucristo kablé' se' a' e' dör i': sene michoë e'.

<sup>26</sup> Ye' tso' yëkküö i' shtök a' a as a' e' kkö'nü s'kitö'ukwapka yöki. <sup>27</sup> Erë Cristo tö a' batse'wë Wiköl Batse'r wa, e' tso'ie a' a, e' kueki ye' wä ijcher tö ie'pa kë tö a' kitö'wëpa. Wiköl Batse'r mène a' a, e' tö a' er ni'weke as ttë ikkë kqs wä ar buaë a' éna. Ttë wa ie' tö a' wöbla'weke, e' dör ttë mokü, kë dör kache. E' kueki a' kë ki ikiane tö yi skä bitü a' wöbla'uk. Es a' senü batsulewä Cristo mik wës Wiköl Batse'r tö a' wöbla'weke es.

*A' kë e' muktsä e' kitö'uk yi a i sulu wamblöie*

<sup>28</sup> A ala'rla, a' senü batsulewä Cristo mik këkraë as a' kë suar éna a' kë jaër ie' wörki mik idatskene etä.

<sup>29</sup> A' wä ijcher tö Cristo ser yësyësë, e' kueki a' wä ijcher nies tö wëpa serke yësyësë, esepa dör Skëköl ala'.

### 3

<sup>1</sup> A' ittso' tö wëkkë Skëköl dör S'yë e' éna se' dalër, ie' tö se' kië iwäk ala'r. Mokü se' detke

ie' ala'rie. Erë wëpa kë tö ie' dalöie, esepa kë e' batsöta' ie' mik, e' kueki ie'pa kë éna iwä ane tö se' dör ie' ala'r. <sup>2</sup> A yamipa dalër tajë ye' éna, i'ne ta se' tso'tke Skëköl ala'rie, aishkuö ta ie' tö se' mane'wëraë bua'ie, erë kam se' éna iwä ar tö wës se' manegirmi. Mik Cristo datskene, etä se' tö ie' wäk suëraë, e' kueki se' wä ijcher buaë tö se' doraë wës ie' wäk es. <sup>3</sup> Wëpa kqs tso' ttë e' wä panuk, esepa e' batse'uke sènoie yësyësë wës Cristo ser es.

<sup>4</sup> Yi tö Skëköl ttë dalöiëno e' dalösewëkewa, ese tö i sulu wambleke. E' kueki wëpa tö i sulu wamblekeia, esepa tö Skëköl ttë dalöiëno, e' dalösewëkewa. <sup>5</sup> A' wä ijcher buaë tö Jesucristo dë'bitü kä i' a se' nüi olo'yök. İe' kë tö i sulu wambleta' yës. <sup>6</sup> E' kueki wëpa tkërie Cristo mik, esepa kë ku'ia i sulu wamblok. Erë wëpa tö i sulu wamblekeia, esepa kë wä Cristo sule mokü, ie'pa kë bats ie' mik. <sup>7</sup> A ye' ala'rla, a' kë e' muktsä e' kitö'uk yi a i sulu wamblöie. Yi serke yësyësë, ese dör yësyësë wës Cristo dör yësyësë es. <sup>8</sup> Erë yi tö i sulu wambleke, ese dör bë iche. İe' e' wamblö sulu kuaëmi', es ie' dör këkraë. E' kueki yi tö i sulu wambleke, ese dör ie' iche. Erë Skëköl Alä dë'bitü e' wä dör bë kanë kqs e' olo'yökwa. <sup>9</sup> Wëpa erblë Jesucristo mik, esepa künene etökichane Wiköl Batse'r wa, ie'pa dör Skëköl ala'r, e' kueki ie'pa wäk dër wës Skëköl wäk es. E' kueki ie'pa kë serku'ia klöulewä i sulu ulä a. İe'pa dör Skëköl ala'r e' kueki ie'pa kë a i sulu wambblönikia. <sup>10</sup> İ wä isuëmisö tö wëpa dör Skëköl ala'r ö bë ala'r? Wëpa kë ser yësyësë, kë tö s'yamipa dalëritsë, esepa kë dör Skëköl ala'r.

#### *Se' ni dalëritsö*

<sup>11</sup> Kuaë, mik a' tsä erblë' Cristo mik, e'tami ttë i' ttsë'bitü a' tö: se' ni dalëritsö. <sup>12</sup> Kë se' kâne ni sauk sulüë wës Caïn tö iël sü' sulüë es. İe' dör bë iche. İe' tö iël kötwa. İe' e' wamblö sulüë erë iël ser yësyësë, e' kueki ie' tö ikötwa.

<sup>13</sup> A ye' yamipa, wëpa kë tö Skëköl dalöie esepa tö a' sueke sulüë, e' ta' kë e' ki' a' tkinuk.

<sup>14</sup> Se' ni dalëritsöke e' wa iwënewä tö Skëköl tö se' er mane'wëttsä pa'alj. Kam se' erblö Skëköl mik, etä se' dör wës s'duulewä es ie' a, erë i'ne ta se' dör ttsë'ka ie' a. Yi kë tö iyami dalëritsë, ese tso'ia wës s'duulewä es ie' a. <sup>15</sup> İe' a' wëpa kqs tö s'yamipa sueke sulüë, esepa dör s'ttökwa wakpa. A' wä ijcher tö s'ttökwa wakpa kqs kë wä sene michoë ta'. <sup>16</sup> Jesucristo e' me'ttsä ttëwä se' skéie, e' wa ie' tö iwä kkaché tö wës se' kawötä ni dalëritsök. E' kueki se' kawötä e' muktsä s'yamipa kimuk se' wäk er wa dö s'ttëwä ie'pa skéie ekkë. <sup>17</sup> E' kueki yi wä iyi tso' kä i' a, ese tö s'yamipa suë tö iweirke, erë ie' er tawä darërë iyöki, kë tö i kakkë ia,

e' ta çwes ie' ichèmi tò ie' éna Skèkòl dalèr? 18 A ye' ala'rla, kè se' kàne ñi dalèritsòk kkò è wa, e' skéie se' kawòtá ñi dalèritsòk mokjè iwawatke.

19-20 Se' ñi dalèritsòke, e' wa se' wá ijcher mokjè tò se' serke buaè wés Skèkòl ttè mokjè tò ichè es. Mikle tã se' wák er tò se' kcateke tò kè se' ku' iwá iutòk buaè. Erè Skèkòl dör se' er tsatã, ie' wá íyi ulitane jcher. E' kuekjè se' ñi dalèritsòke, e' tã se' er ttsè'rdã buaè ie' wòã kè suane. 21 A yamipa dalèr tajè ye' éna, se' er kè tò se' kkatè, e' tã se' ttsè'rmi buaè Skèkòl wòã kè suane. 22 Ie' ttè iutekesò ena ì wèr buaè ie' wa ese wekesò, e' tã ì kòs kiekeso ie' a, e' meraèitò se' a. 23 Ie' ttè dalòieno, e' dör i': se' kawòtã erblòk ie' alá Jesucristo mik, ñies se' kawòtã ñi dalèritsòk wés Cristo tò se' a iyè'at es. 24 Wépa tò ie' ttè dalòieke, esepa serke batsulewá ie' mik, ñies ie' tso' batsulewá ie'pa mik. Ie' tò iWikòl me' se' a, e' wa se' wá ijcher tò ie' tso' batsulewá se' mik.

## 4

*A' ké ttè ulitane wá sauk buaè tò mokjè idir*

1 A yamipa dalèr ye' éna, tajè kachòkwakpa tso' ká wáñe e' chò tò ie'pa dör Skèkòl ttekòlpa. Esepa weblò buaè tò ie'pa dör Skèkòl icha ò au. 2 Wépa tò ichekeka tò Jesucristo yöne s'ditsòie, esepa dör Skèkòl icha. Es a' wá ijchermi tò wépa a Skèkòl Wikòl tso'. 3 Erè wépa kè tò Jesús chè es, esepa kè a Skèkòl Wikòl ku'. E' skéie Cristo Bolòk wikòl tso' iarak. A' wá ittseule tò ie'pa esepa datske, itso'raktké i'ñe tã ká i' a.

4 A ala'rla, a' dör Skèkòl icha. Ie' Wikòl tso' a' a, e' diché tajè tkòkã yi tso' wépa kè tò ie' dalòietã esepa a e' tsatã. E' kuekjè a' e' alékã kachòkwakpa ñe'pa kã. 5 Ie'pa kè tò Skèkòl dalòie, e' kuekjè ie'pa tò s'wòbla'weke ttè ese wa. Imalepa tò ie'pa ttè tseke buaè. 6 Erè se' kè dör es, se' dör Skèkòl icha. Wépa batsè ie' mik, esepa tò se' ttè tseke buaè. Wépa kè dör ie' icha, esepa kè tò se' ttè ttsepa. E' wa sò isuèmi tò yi tò s'wòbla'weke ttè mokjè wa Wikòl Batsè'r wa, ò yi tò s'wòbla'weke kache ttè wa.

*Skèkòl tò se' dalèritseke tajè*

7 A yamipa dalèr tajè ye' éna, Skèkòl tò se' a diché mé ñi dalèritsoie, e' kuekjè se' kè ñi dalèritsòk. Wépa ñi dalèritsòtã, esepa dör ie' icha, ñies ie'pa batsè ie' mik. 8 Skèkòl wák éna s'dalèr, es ie' dör, e' kuekjè wépa kè ñi dalèr, esepa kè bats ie' mik. 9 Ie' tò ilà ekòl ème e' patkè' ká i' a as sene michoè dō se' ulà a ilà batamik, e' wa ie' tò se' a iwá kkaché tò se' dalèr ie' éna. 10 Skèkòl dalèr se' éna, e' kè dör iwá. Iwá dör tò ie' tò se' dalèritsè tã ilà patkèitò ttèwã se' skéie as se' nuñ olo'yar.

11 A yamipa dalèr tajè ye' éna, ekkè Skèkòl tò se' dalèritsè, e' kuekjè se' kè ñi dalèritsòk.

12 Kè yi wá ie' suule iwòbla wa, erè se' ñi dalèritsòke mokjè, e' tã e' wa iwènewã tò ie' batsulewá se' mik ena se' ñi dalèritsòke wés ie' kã ikiane es. 13 Ie' tò iWikòl me' se' a, e' wa se' wá ijcher tò se' batsulewá ie' mik ena ie' batsulewá se' mik. 14 Ñies sa' tò isu' tò S'yè tò ilà patkè' ká i' a sulitane tsatkòk. Í cheke sa' tò, e' dör mokjè. 15 Wépa tò iklö'wé tã icheke tò Jesús dör Skèkòl Alà, esepa mik Skèkòl batsulewá, ñies ie'pa batsulewá ie' mik.

16 Es se' wá ijcher ena iklö'wésò tò Skèkòl éna se' dalèr tajè. Kèkraè ie' wák éna se' dalèr tajè. Wépa éna s'malepa dalèr ena ie' dalèr, esepa batsulewá ie' mik ena ie' batsulewá ie'pa mik. 17 Se' ñi dalèritsòk wés ie' kã ikiane es, e' tã es se' serke yösyèsè ká i' a wés Jesucristo ser es. Se' serke es as kè se' suar s'shulirke e' kèwò yöki. 18 Se' suane Skèkòl yöki, e' tã e' wá kiane chè tò se' éna iane tò se' weirdaè ì sulu wamblekesò ese nuñ kã. Erè wépa éna ie' dalèr ena s'malepa dalèr, esepa kè suane ishulirketke aishkuò tã e' yöki. E' kuekjè wépa suane e' yöki, e' wá kiane chè tò kam ie'pa éna ie' dalèr ena s'malepa dalèr buaè wés ie' kã ikiane es.

19 Skèkòl tò se' dalèritsè kewe, e' kuekjè se' ñi dalèr. 20 Se' e' chò tò se' éna ie' dalèr, erè s'yamipa erblòke Jesús mik, esepa suèkesò suluè, e' tã se' tso' kachòk. S'yami suèsò, ese kè dalèr se' éna, e' tã çwes Skèkòl kè sune s'wá e' dalèrmi se' éna? E' kuekjè se' wá ijcher tò se' e' chò es, e' tã s'tso' kachòk. 21 Ie' tò ttè i' me'at se' a dalòie: yi éna Skèkòl dalèr, ese kè iyamipa dalèritsòk ñies.

## 5

*Se' erblò wa se' e' alòkã ì sulu tso' ká i' a ese kã*

1 Wépa kòs tò iklö'wé mokjè tò Jesús dör wé pairine'bitù idi' wa s'blúie e', esepa dör Skèkòl ala'r mokjè. Yi tò iyè dalèritseke, ese tò ila'r dalèritseke ñies. 2 Skèkòl dalèr se' éna ena ittè dalòieno e' wá iutekesò, e' wa se' wá ijcher tò mokjè se' tso' Skèkòl ala'r dalèritsòk ñies. 3 Skèkòl dalèr se' éna e' wá dör tò ittè dalòieno e' wá iutekesò. Ie' ttè dalòieno, e' kè dör darèrèè se' a iutè. 4 E' wá dör tò wépa dör Skèkòl ala'r, esepa e' alòkã ì sulu tso' ká i' a ese kã. Se' erblòke Jesús mik, e' wa se' a diché mène e' alokã ì sulu kòs ese kã. 5 Wépa tò iklö'wé mokjè tò Jesús dör Skèkòl Alà, esepa è e' alòkã ì sulu kòs tso' ká i' a ese kã.

6 Jesucristo dè'bitù ká i' a, e' wòsuk Juan tò di' a, ñies ie' kòtèwã krus mik ipè tène tajè; e' wa se' tò isueke tò ie' dör Skèkòl Alà. Ie' kè dè'bitù wòskuè è, ñies ie' dè'bitù ttèwã pè tène tajè. Skèkòl Wikòl tò se' a ikkacheke tò mokjè idir, ie' ttò mokjè kèkraè e' kuekjè. 7 Jesucristo dör Skèkòl Alà, e' wá kkayène se' a íyi mañatòkicha wa. 8 Skèkòl Wikòl tò icheke se' a tò mokjè idir, ñies ie' wòsuk di' a,

ñies ie' kötəwə krus mik ipé tēne; ttè mañat e' tō icheke ñikkēē. <sup>9</sup> S'ditsō ttè klō'wēsō, e' yitə Skəkōl ttè klō'wēmīsō buaē, e' dōr ibua'ie e' kuəkj. E' dōr ie' Alà chéitō se' a e' tté. <sup>10</sup> Yi ərblōke ie' alà mik, ese wə ijcher buaē tō mokj Jesús dōr ie' Alà wēs ie' tō iyē' es. Erē yi kē tō iklō'wè, ese tō Skəkōl suəke kachōkwakie, ie' kē tō ittè klō'wè e' kuəkj. <sup>11</sup> Ttè e' dōr i' es: Skəkōl tō sene michoē meke se' a ie' Alà batamik. <sup>12</sup> Yi batsulewə ie' Alà mik, ese wə sene michoē tso'. Erē yi kē ku' batsulewə imik, ese kē wə itə'.

#### *Ttè bata*

<sup>13</sup> Ye' tso' yēkuō i' shtōk a' ərblōke Skəkōl Alà mik esepa a əs a' əna iar buaē tō a' wə sene michoē tso'.

<sup>14</sup> E' dōr es, e' tə kē se' suane ilè kiōk Skəkōl a. E' wə dōr tō se' wə ijcher tō ilè kiēsō ie' a e' dōr i' kiane ie' kī ese, e' tə ie' tō ittse. <sup>15</sup> Se' wə ijcher tō ie' tō ittse, e' tə se' wə ijcher tō i' kiēsō ie' a, e' detke se' ulà a.

<sup>16</sup> Yile tō isuē tō iyami ərblōke Cristo mik, ese tso' i' sulu wamblōk, erē e' kē kī ie' kichatēnuk aishkuō tə, e' tə a' kawōtə ikiōk Skəkōl a ikj tə ie' tō inuj olo'yeraē ikj tə sene michoē meraēitō ia. Erē i' sulu tso' et, e' nuj kē olo'yepa Skəkōl tō se' kī, e' nuj kī se' kichatērdaē wake'. Ye' kē tō icheku' tō a' tō ikiō yi tō i' sulu e' wamblé ese kī. <sup>17</sup> I' sulu kōs wamblekesō, e' dōr suluē S'yē wōa. I' sulu wamblekesō kōs e' nuj olo'yēmiitō se' kī. Erē i' sulu chéyō ñe' ē nuj kē olo'yepaitō se' kī.

<sup>18</sup> Se' wə ijcher tō wépa wə Skəkōl tso' iyēie, esepa kkō'neke Skəkōl Alà tō əs bē kē a ie'pa or wēs, e' kuəkj ie'pa kē tō i' sulu wambléia. <sup>19</sup> Se' wə ijcher tō se' dōr Skəkōl icha, ñies se' wə ijcher tō pē' malepa kōs tso' klōulewə bē ulà a. <sup>20</sup> Ñies se' wə ijcher tō Skəkōl Alà dē'bitū ká i' a, e' tō se' ər ñi'wé əs se' e' batsō yi dōr Skəkōl ichōkle e' mik. I' ñe tə se' serke batsulewə yi dōr ichōkle e' mik, se' batsulewə ilà Jesucristo mik e' wa, e' dōr Skəkōl ichōkle ena sene michoē e' mukwak. <sup>21</sup> A ala'rla, a' e' kkō'nú, iyi diōkōl tso' dalōie ese kōs yōkī.

## Yëkkuö skà kit Juan tö i' ta ide böt 2 Juan

Yëkkuö i' kit Jesús ttekölpa tsá e' eköl kié Juan e' tö. Ie' tö yëkkuö skà kit dōka tkél. Pè' wëlepa tö ibikeitsè tö ie' tö yëkkuö i' kit alaköl eköl ena ila'rla e'pa a. Erë iëltëpa tö ibikeitsè tö "alaköl" ena "ala'rla" e' wà kiane chè Skèkëpa Jesús icha erule wële. E' kuekji wëlepa tö ibikeitsè tö ie' tö ikit Skèkëpa icha erule wële a.

S'kjitō'ukwakpa dē'mi Jesús mik erblōkwakpa shūa e'pa kē tö s'wōbla'wëkū' Jesús tté buaë e' wa. Ie'pa éna Jesús mik erblōkwakpa tsakmi ñalá sulusi kji. E' kuekji Juan tö yëkkuö i' kit pé' ñekkëpa biyō choie ie'pa a. Ñies ie' tö iché tö Jesús mik erblōkwakpa kawōtā ñi dalëritsök.

### Shkë'wè

<sup>1</sup> A tayë\*, be' shukitbak Skèköl tö. Ye' kiè a' tö blë'këkëpa, e' tso' yëkkuö i' shtök be' a ena be' ala'r a. Mokjè a' dalër tajë ye' éna. Ñies wëpa tö Skèköl ttè mokjè e' klō'wé, esepa kōs éna a' dalër tajë. <sup>2</sup> Ttè mokjè e' tso' se' kōs er a, e' tso' se' ta kekraë, e' kuekji sa' éna a' dalër tajë. <sup>3</sup> Skèköl dōr S'yé ena ilà Jesucristo, as e'pa er buaë chō a' a ena a' saū er siarè wa. As ie'pa tö sene bërè mù a' serke ttè mokjè a ena ñi dalëritsè a, esepa kōs a.

### Se' kawōtā ñi dalëritsök

<sup>4</sup> Ye' wā ijchenewā tö be' ala'r wëlepa tso' S'yé ttè mokjè, e' wà dalōiök buaë wës ie' tö ime'at se' a es. E' tö ye' ttsë'wëke buaë. <sup>5</sup> A tayë, ye' tö be' a iché tö se' ulitane kawōtā ñi dalëritsök. Ttè e' kē dōr ttè dalōiëno pa'ali shtekeyō a' a. E' dōr ttè yënebitū se' a tsawe e'. <sup>6</sup> Se' serke yësyesè wës Skèköl ttè dalōiëno tö iché es, e' ta se' tso' Skèköl dalëritsök mokjè. Ie' ttè dalōiëno tö iché tö se' kawōtā ñi dalëritsök. Ttè e' ttsë'bitū a' tö tsawe.

### S'wōbla'ukwakpa kache tté wa

<sup>7</sup> Tajë s'kjitō'ukwakpa tso' ká wa ñe. Ie'pa tö icheke tö Jesucristo dē', erë kē idē'bitū s'ditsōie. Yi tö icheke es, ese dōr s'kjitō'ukwak ena Cristo Bolök. <sup>8</sup> A' e' kkō'nú pē' esepa yökjè as sa' kanëblé' a' shūa, e' kē wà weirwa éme. Ye' kji ikiane tö iské mú dō a' ulā a sëraa.

<sup>9</sup> Ttè wa Cristo tö s'wōbla', e' kē klō'wëkū'ia yile tö erë ikjè kuōtkëkaitō tajë kōs Cristo tö iyé', e' tsata, e' ta ese kē batsulewā Skèköl mik. Erë yi e' tkéwā darërèe Cristo ttè mokjè a, ese batsulewā S'yé mik ena ilà mik. <sup>10</sup> Yile de a' ska' kē wā Cristo ttè mokjè mir, etā kē ese a wëshkë char, kē ishke'wār. <sup>11</sup> Yi tö ishke'wé, ese tö i

sulu wamblekeitō e' kimeke. E' kuekji esepa kē shkë'wār.

### Juan e' chéat

<sup>12</sup> Tajë ye' wā íyi tso' chè a' a, erë kē ye' éna ishtak yëkkuö kji. Ye' mú mi' a' ska' ta se' tö iwā chëmi ñi a. Es se' ttsë'rdaë buaë shutë.

<sup>13</sup> Be' èl shukitbak Skèköl tö, e' ala'r tö be' shkë'wëmi.

\* 11 tayë: Es Juan tö Skèkëpa icha erule a ie' tso' yëkkuö i' shtök e'pa kié.

## Yëkkuö skà kit Juan tö i' ta ide mañat 3 Juan

Juan tö yëkkuö et ena bôt kit e' wák tö i' kit. Ie' tö ikit isini' eköl kiè Gayo e' a. Ie' tö yile patké' Gayo ska' Jesús tté buaë pakök erë wëm eköl e' ttsökä tajë kiè Diótrfes e' kè éna Juan tö ipatké' e' pa kiakwa. E' kè mène buaë Juan a, e' kuëki ie' tö yëkkuö i' kit Gayo a. Ie' wöa iwëne buaë tö Gayo tö s'wöbla' ukwakpa kiekewä buaë e' chak ie' éna Gayo a ena ie' kï ikiane tö e' kï wë Gayo tö es. E' kuëki ie' tö yëkkuö i' kit.

### Shkë'wë

<sup>1</sup> A Gayo, ye' dör blë'këkëpa, e' tso' yëkkuö i' shtök be' a. Ye' éna be' dalër tajë Jesús tté mokï e' kuëki.

### Juan tö Gayo kïkëka buaë

<sup>2</sup> A yami dalër tajë ye' éna, ye' tso' ikiök Skëköl a tö be' mú mir buaë ì kôs tso' be' wä e' a, ena be' mú tso' buaë kè duöta' wës be' er tso' buaë Skëköl ta es. <sup>3</sup> Mik s'yamipa welepa dë' ye' ska', etä e'pa tö ye' a iyë' tö be' serke buaë këkraë yësyësë wës Skëköl tté mokïë tö ichë es. E' tö ye' ttsë' wëke buaë. <sup>4</sup> Këkraë mik ye' tö ittsé tö wépa dör wës ye' ala'r es, esepa serke buaë yësyësë wës Skëköl tté mokï tö ichë es, etä e' tö ye' ttsë' wëke buaë tkökä iyï ulitane tsäta.

<sup>5</sup> A yami, be' dalër tajë ye' éna, s'yamipa shköke ká wa'ñe Jesús tté buaë pakök, esepa kiekewä be' tö buaë këkraë, bua'iewä wépa kè suule be' wä esepa. <sup>6</sup> Ie'pa welepa dene sa' ska', e'pa tö be' paké Skëkëpa Jesús icha erule e'pa a tö be' éna ie'pa dalër tajë. Ye' tö be' a ichë tö ie'pa esepa kï kïmú. Ì kôs kiane ie'pa kï shkoie Jesús tté buaë pakök, ese kôs wa ie'pa kïmú. Ie'pa kïmú er bua' wa wës Skëköl kï ikiane es. <sup>7</sup> Ie'pa mi'ke ká wa'ñe kaneblök Jesucristo a, ie'pa kè tö ì kieta' pë' kè tö Skëköl dalöieta' esepa a. E' kuëki ie'pa kïmú. <sup>8</sup> Se' ulitane kawöta' ie'pa kïmuk, ì kôs kiane ie'pa kï e' wa. Es se' kôs tö ie'pa kïmekeñak Jesús tté mokï e' wä pakök.

### Diótrfes dör se' e' ttsökä tajë ese

<sup>9</sup> Skëkëpa Jesús icha erule serke a' ká a, e'pa a ye' tö yëkkuö kit. Erë wëm tso' eë eköl kiè Diótrfes, e' wöbatsö e' tkökä imalepa wökirie, e' kuëki kawö mène ye' a Jesús ttekölíe, e' watéttsaitö. <sup>10</sup> E' kuëki mik ye' de a' ska', etä ì sulu wamblé ie' tö, e' cherakayö a' ulitane kukua. Ie' tso' kachök ye' ta. E' kïie ta mik s'yamipa de a' weblök, etä e'pa kè kiëwä ie' tö. A' welepa éna ie'pa kiakwa e'pa wöklö'wëkeitö, uyekettsaitö Skëkëpa Jesús icha erule e' shüa.

<sup>11</sup> A yami dalër tajë ye' éna, ì sulu wamblë pë' tö, ese kè wamblar be' tö. E' skéie pë' ser buaë yësyësë, es be' senü buaë yësyësë. Yi serke yësyësë, ese dör Skëköl icha. Yi e' wamblö sulu, ese kè bätse Skëköl mik.

<sup>12</sup> Sulitane tö icheke tö wëm kiè Demetrio, e' dör pë' buaë. Ie' serke buaë yësyësë wës Skëköl tté mokï tö ichë es. E' wa iwënewä tö ie' dör pë' buaë. Ñies sa' tö ichë tö ie' dör pë' buaë. Be' wä ijcher tö ì kôs cheke sa' tö e' dör mokï.

### Juan e' chéat

<sup>13</sup> Ye' wä iyï tso' tajë chë be' a, erë kè ye' éna ishtak yëkkuö kï. <sup>14</sup> Ye' mú mi' be' ska' bet, e' wa ye' tö be' a iwä chë.

<sup>15</sup> As be' ttsë'r buaë. Íe' s'yamipa tö be' shkë'wëmi. S'yamipa tso' be' ska', e'pa shkë'ü ña eköl eköl.

## Yëkkuö kit Judas tö Juan

Yëkkuö i' kit Judas tö. Kë s'wä ijcher mokjê tö yi döer ie'. Erê welepa tö ibikeitsê tö Jesús ttekölpä tsá e' eköl kiê Judas cheke Lucas tö (Lucas 6.16; Hechos 1.13), e' tö ikit. Pë' tajê tö ibikeitsê tö ie' döer Jesús ël eköl wës Santiago es. Mateo 1.55 ena Marcos 6.3 e' tö Jesús ël kiê Judas e' chë, e' kuekji welepa tö ibikeitsê es.

Judas tö yëkkuö i' kit Jesús mik erblökwapka a, ie'pa a s'wöbla'uk kache ttë wa, esepa biyö choie. Pë' esepa dë'bitu e' chök tö ie'pa döer Jesús mik erblökwapka erê ie'pa döer s'kitö'ukwapka ëme. Ie'pa kji Jesús mik erblökwapka kiane tsëmi ñalä sulu kji. E' chök Judas tso' ie'pa a tö a' e' kkö'nü iyöki. Ie'pa esepa tö s'wöbla'weke tö Skëköl ëna se' dalër tajê ena i sulu nuj tso' se' kji e' olo'ya'itö s'ki, e' kuekji se' a i sulu kji wamblërm. Judas tö iché tö e' kë döer es. Kä iaiäë wëpa bak e' wamblök suluë e'pa wa we'ik Skëköl tö siarë. E' sù ie' tö s'kitö'ukwapka ñe' we'ikeraë. E' kkachak Judas ëna Jesús mik erblökwapka a e' kuekji ie' tö yëkkuö i' kit.

### Shke'wë

<sup>1</sup> Ye' döer Judas, ye' döer Jesucristo kanë méso, ñies ye' döer Santiago ël, e' tso' yëkkuö i' shtök a' a. Skëköl döer S'yë e' tö a' klöo'bak ie' ala'rie. Tajê a' dalër ie' ëna. Jesucristo tso' a' tsatkök i sulu kos yöki. <sup>2</sup> As Skëköl tö a' saü er siarë wa ena sene bërë kji mü a' a. Ñies as a' kji ñi dalëritsö tajê.

### Jesús ttë buaë, e' tsatkö

<sup>3</sup> A yamipa, a' dalër tajê ye' ëna. Kewe tä ye' ibikeitsé yëkkuö shtök a' a se' tsatkëne e' ttë pakoie. Erê ye' ittse tö ye' kawöta kköchök a' a tö ttë mik se' erblöke e' tsatkö këkraë. Ttë e' meneat etökicha ëme s'batse'rupa a' kkö'në këkraë. <sup>4</sup> Pë' welepa dewa a' shua, erê a' kibiiëpa kë wä ijcher tö e'pa döer s'kitö'ukwapka. E' kuekji ye' tso' yëkkuö i' shtök a' a. Esepa kë tö Skëköl dalöietä' mokj. Ie'pa tö icheke tö ie' er buaë ché se' a, e' kuekji i sulu kos wamblak se' ëna, e' wamblëmisö, kë ulë klöule. Erê kë idör es. Ttë e' wa ie'pa tö Skëképa Jesucristo döer se' blü eköl ë, e' dalösewëwä. Kä iaiäë Skëköl tö iyë'bak iyëkkuö kji tö esepa kos wömeulettsatke weinuk aishkuö tä. E' kuekji ye' tso' a' a ichök tö Jesús ttë buaë tsatkö ie'pa esepa yöki.

### Skëköl tö i sulu wamblökwapka we'ikeraë

<sup>5</sup> A' wä ijchertke buaë, erê ye' ëna ichakne a' a, as a' ëna iarne tö Skëköl tö Israel aleripa tsatkë'tsa egiptowak ulä a, ye'tsa Egipto. E' ukuökj tä ie'pa wëpa kë erblëne ie' mik

e'pa eq'waitö. <sup>6</sup> Ñies a' ëna ianü tö Skëköl biyöchökwapka, e'pa welepa tö kanë mëne ie'pa a, e' olo'yé tä ie' yélur wé ie'pa bak senuk ee. E' kuekji ie' wä ie'pa tso' wötëule stui ké a. Eë ie'pa tso' moule tabechka kë butsta'ttsa yöbië ese wa. Eë ie'pa tso' ikichatërke e' këwö panuk. <sup>7</sup> Es ñies a' ëna ianü tö Sodomä ena Gomorra wakpa, ñies kä tso' tsinet ie'pa o'mik e' wakpa, e'pa bak trënuq tajê ena e' ya'uk suluë. E' kuekji Skëköl tö ie'pa kos we'ik michoë bö' wa. Ie'pa wa ie' tö ikkaché tö i tköraë i sulu wamblökwapka tä'.

<sup>8</sup> Es ñies wëpa chök ye' tso' a' a, esepa e' wamblök suluë. Ie'pa e' ia'ukekä trë wa tä ichekerakitö tö e' kkayëne ie'pa a kab-suë a. Ñies Skëköl ttë watekerakitö ena ibiyöchökwapka olo tä' tajê, e'pa chekerakitö suluë. <sup>9</sup> Kä iaiäë mik Moisés blënewä, etä bë kji inü kiane, erê Skëköl biyöchökwap wökir eköl kiê Miguel, e' kë tö imë ie' a, e' kuekji ie'pa ñi iutë iki. Miguel döer Skëköl biyöchökwap olo tä' tajê ese, erê ie' kë wä bë yëne suluë as ikichatër. Ie' tö iché ia: "Skëköl tö be' unü." E' ë ché Miguel tö ie' a. Etä çwës wëpa chök ye' tso' esepa tö Skëköl biyöchökwapka chëmi suluë? <sup>10</sup> I kë ane ie'pa ëna, i kë jcher ie'pa wä, ese kos cheke suluë ie'pa tö. Erê i jcher ie'pa wä iwákpa er wa, ese wambleke ie'pa tö kë wä bikeitsule wës iyiwak es. E' kuekji ie'pa weirdäë siarë aishkuö tä.

<sup>11</sup> jwëstela ina ie'pa tä! Ie'pa e' wamblök suluë wës Caïn e' o' es. Ie'pa tö ttë mokj olo'yé inuköl klö'woie wës Balaam es. Ie'pa tö Skëköl dalösewëwä wës Coré tö Moisés dalösewëwä es. E' kuekji aishkuö tä ie'pa weirdäë siarë wës Coré es. <sup>12</sup> Mik a' ñi dapa'uke chkök di'yök ñita er bua' wa Cristo kötewä e' këwö tkö'uk, etä e' sulu'wëkewä ie'pa tö wës ie' wamblörak ese wa. Ie'pa kë jaër i sulu wamblök kawö e' a. Ie'pa er me'rie iwákpa ë kkö'nuk. Ie'pa döer s'kitö'ukwapka wës kalj dami siwä wa tajê, erê kë iwä yër yës es. Ie'pa döer wës kal kë wör tä' mik iwörke e' këwö skä' es. Ie'pa döer wës kal ponettsä iwë e' sirwä es. <sup>13</sup> Ie'pa tö i sulu wambleke kë jaër tä', e' uyekerakitö wës dayë tö iyi tso' kos ie' a e' uyëttsä ur'ki es. Ie'pa döer wës bëkwö kë ku'ar eksjini ëme es. Skëköl wä kä tso' ie'pa a ttsettsëe, eë ie'pa wötërdawä kë yërpattsäia.

<sup>14</sup> Adán aleripa de ie' itökj döka kul, e' shua wëm eköl bak, e' kiê Enoc. Ie' tö pë' sulusi esepa yë' i' es Skëköl ttekölie: "Ye' ttö ttsö. Skëköl döraë ibiyöchökwapka batse'r tajê shütë e'pa tä <sup>15</sup> sulinane shulök. Pë' sulusipa kë tö ie' dalöiekü' tö i sulu wambleke tö ie' cheke suluë, esepa kos wömerattsä ie' tö weinuk." <sup>16</sup> Wëpa chök ye' tso' a' a, esepa wa iyi ulitane wër suluë, iyi ulitane tö ie'pa

kköchöweke. Ì sulu kiane ie'pa kǐ wamblè ese wamblekerakitò. Ie'pa e' ttsòkǎ tajè. Ñies s'malepa dakǐñekerakitò ttè ttsè'r bua' ese wa ǎs tò iù wēs ie'pa kǐ ikiane es.

*A' e' tkōwǎ darērēē Skēkōl ttè ǎ*

<sup>17</sup> Erè a yamipa, a' dalēr tajè ye' éna. Ì ye' Skēkēpa Jesucristo ttekōlpa tsǎ e'pa tò, e' ska' a' er anú. <sup>18</sup> Ie'pa tò se' ǎ iyè: "Mik kǎ i' erkewatke, etǎ s'wayuōkwakpa datse tajè. Ie'pa serdaè wēs ie'pa wák dēr suluè kǐ ikiane senuk es." <sup>19</sup> Ye' tò a' ǎ ichè tò pè' esepa tso' a' shuǎ a' blabatsók. Ie'pa serke wēs ie'pa er tò ikieke iǎ es. Skēkōl Wikōl kē ku' ie'pa tǎ.

<sup>20</sup> Erè a yamipa dalēr tajè ye' éna, ttè batse'r ichòkle mik se' erblòke, e' ǎ a' kǐ er diché ió. A' ttò Skēkōl tǎ Wikōl Batse'r wa.

<sup>21</sup> Skēkēpa Jesucristo tò se' suè er siarè wa, e' kuekǐ sene michoè dōraè se' ulǎ ǎ aishkuò tǎ, e' wǎ panuk se' tso' er bua' wa. E' dalewa kē a' éna ichòkwa tò Skēkōl éna se' dalēr tajè, e' ǎ a' e' tkōwǎ darērēē.

<sup>22</sup> A' wépa erblòke Jesús mik, erè ibikeit-sekeia bötböt, esepa saù er siarè wa tǎ ie'pa kǐmú. <sup>23</sup> A' wépa skǎ mi'ketke ì sulu ǎ, esepa tsǎtkó wēs s'ñarkewa ese tsǎtkēsò es. A' wépa skǎ tso' ì sulu wamblök tajè ichök, esepa saù er siarè wa tǎ ikǐmú, erè a' tso' erkǐ dō' a' ǎrmi ì sulu wambleke ie'pa tò e' ǎ. Ì sulu wambleke ie'pa tò, e' yökǐ a' suanú tajè; e' kē kiarwǎ a' ǎ elkela wè'ia.

*Ttè bata*

<sup>24</sup> Skēkōl è ǎ se' kkō'narmi ǎs kē s'armine ì sulu ǎ. Ie' è ǎ se' nuǐ olo'yarmi ǎs se' dō ie' olo tajè e' wörkǐ ttsè'ne buaè wa, kē kǐ ì sulu tǎ yēs. E' kuekǐ ie' kǐkōkāsò ttè bua' wa. <sup>25</sup> Ie' kǐkōkāsò Skēkēpa Jesucristo batamik. Ie' dör ekōl ème. Ie' dör S'tsǎtkōkwak. Tsǎwe tǎ, i'ñe tǎ, ñies dō kekraè ie' olo tǎ tajè, ie' diché tǎ tajè íyi ulitane tsǎtǎ. Ie' dör se' blú tajè. ǎs sulitane tò ie' kǐkōkǎ er bua' wa kekraè. Es e' idir.



# Ì kkeyè' Jesucristo tò Juan a, e' tté pakè Apocalipsis

Jesús ttekolpa tsá eköl kiè Juan e' tò yèkkuò i' kit. Ie' bak klóulewá dayénane kiè Patmos ee. Eè ie' bak senuk mik ie' tò yèkkuò i' kit eta.

Jesucristo wák tò Juan ka' ishtök. Ì kos kkeyène ie' a ena yène ie' a kabsueie, e' shtök Jesucristo tò ie' ka'. Mik Jesucristo e' kkeyè' ie' a kabsueie eta e' tò ika' yèkkuò i' shtök Skèkèpa icha erule erule döká kul serke ká kuá'ki kuá'ki tso' Asia shuá e'pa a.

E' kúie ta Satanás ñippöke Skèköl ta wës e' ukuò miriá Juan kéwö ska' ena e' ukuöki, e' paké ie' tò yèkkuò i' kú as Jesús mik erblókwakpa wá ijcher tò Skèköl ena Jesucristo e' alóraká da'áie Satanás ena iklépa kú.

### Shke'wè

<sup>1</sup> Ttè shtök ye' tso' yèkkuò i' kú e' dör ì kkeyè' Skèköl tò Jesucristo a as ie' tò ikkachöne ikané mésopa a as ie'pa éna iar tò ì tkóraè bet. Ye' kiè Juan, ye' dör Cristo kané méso. Ie' tò ibiyöchökwak patké' eköl ye' ska' íyi ikké kkachök ye' a. <sup>2</sup> Ì kos sué ye' tò, e' shteke ye' tò yèkkuò i' kú sèraa. Ye' tò a' a ichè tò e' dör Skèköl ttè mokí, ñies e' dör ttè mokí kkeyè' Jesucristo tò e'.

<sup>3</sup> Ì shteke ye' tò yèkkuò i' kú, e' wá döketke bet. E' kuéki wépa tò iaritseke ena ittseke ena iwá iuteke, ayécha buaè esepa.

<sup>4-5</sup> Ye' tso' yèkkuò i' shtök Skèkèpa Jesús icha eruleè serke ká kuá'ki kuá'ki döká kul atè Asia e'pa a. Skèköl ena iWiköl ena Jesucristo, as e'pa er buaè chö ena sene bèrè mù a' a. Skèköl e' tso'tke tsawe ta, íñe ta, ñies kekraè. Wikölpa Kul\* tso' wé Skèköl tkér s'blúie e' wörki. Jesucristo tò Skèköl ttè cheke yésyèsè kekraè. Ie' dör s'duulewá e' tsá shkenekane sulitane yöki kéwe e'. Ie' dör ká ulitane blúpa e'pa blú. Ie' éna se' dalér tajè. Ie' kótewa, ie' pé tène se' skéie, e' wa ie' tò se' tsátké sene sulu nuí ulá a. <sup>6</sup> Ie' tò se' shukit as e' dör s'blúpaie ena sacerdotepaie kaneblok Skèköl dör ie' yé e' a. Jesucristo olo ta' tajè, ie' diché ta' tajè, as sulitane tò ie' kíkóká kekraè. Es e' idir.

<sup>7</sup> ¡ttsó! Jesucristo datse mò a.

Sulitane tò ie' sueraè,

ñies wépa tò ie' kótwa, ie' tké' rakitò kuaböt wa,

e'pa tò isueraè.

Mik ká ulitane wakpa tò isué,

eta ie'pa iuraè siarè suane yöki.

Es iwá tkóraè. Es e' idir.

<sup>8</sup> Skèköl diché ta' tajè íyi ulitane tsata, ie' tso'tke tsawe ta, íñe ta, ñies kekraè. Ie' tò ichè: "Ye' dör íyi wí ena íyi bata."

### Juan tò Jesucristo sué kabsueie

<sup>9</sup> Ye' dör a' yami Juan, e' batsulewá Jesús mik e' wa ye' tso'ñak a' ta wépa blúie Skèköl tso' esepa shuá. Ñies ye' tso'ñak weinuk a' ta ena idalé'ttsök a' ta er bua' wa. Ye' tò s'wöbla'wé Skèköl ttè wa, ñies ye' tò Jesús ttè paké sulitane a, e' kuéki ie'pa tò ye' uya'mi senuk dayé nane kiè Patmos e' a. <sup>10</sup> Skèkèpa Jesús diwö, e' dör Domingo, e' kéwö ska' ta Skèköl Wiköl de ye' kú tajè, eta ye' ittse ye' tsikka tò yi tté ye' ta, e' ttö dör darèrèè wës duk blar es. <sup>11</sup> Ie' tò ye' a' ichè: "Í sueke be' tò, e' shtö yèkkuò kú ta ipatkömi Skèkèpa Jesús icha eruleè serke Éfeso, Esmirna, Pérgamo, Tiatira, Sardes, Filadelfia ena Laodicea e'pa kos a."

<sup>12</sup> Ye' wötrée isaúk tò yi ttöke ye' ta, eta bô'wöla wöbastulur döká kul, e' sué ye' tò. E' tulur ituloká yöule orochka wa e' kú. <sup>13</sup> Bô'wöla kul shua, ye' tò isué tò ì dur s'ditsö sué. Ie' datsi' dör batsjë dötsä iklökie kú. Ikiparuo ar icho' mik e' dör oro. <sup>14</sup> Ie' tsakö dör saruru shutéè wës suiyök es wës mochka saruruè es' Ie' wöbla wër wës bô'wö wöñar es. <sup>15</sup> Ie' klö wër dalölöè wës tabechka bua' bua' ba'wé bô' a ena ipaíklè ta iwèr dalölöè es. Ie' ttö tssèr wës di' blar tajè ákttö mik es. <sup>16</sup> Ie' ulattò bua'kka a' ie' wá békwo tso' döká kul. Ie' kkö a' tabè dettsá kaoule di'diè wí'ké io'ké. Ie' wö wër dalölöè wës mik diba arke buaè eta diwö wër es.

<sup>17</sup> Mik ye' tò ie' sué, eta ye' anewa wöwakköt ie' klö ska' wës s'duowa es. Erè ie' ulá bua'kka méka ye' kú ta ichéitö ye' a: "Kè be' suanuk. Ye' dör ttè tsá ena ttè bata. <sup>18</sup> Ye' dör sene michoè e' wák. Ye' du'wá e' tso'ne tssè'ka kekraè. Ye' wá diché tso' s'duowa kú. S'wimblu ké e' wékkö yottsá tso' ye' wa. Ie'pa shkeormika ye' a. <sup>19</sup> Ì tso' íñe ta ena ì kos datseia sueke be' tò e' shtö yèkkuò kú. <sup>20</sup> Békwo döká kul sué be' tò ye' ulattò bua'kka a' ñies bô'wöla tuloká yöule orochka wa, e' wá cheke ye' tò be' a' i' ta. Békwo kul, e' tò Skèköl biyöchökwakpa döká kul e'pa wá ché. E'pa dör Skèkèpa Jesús icha eruleè serke ká kul a' ñe' kkö'nukwaka. Bô'wöla döká kul, e' tò Skèkèpa Jesús ichapa eruleè serke ká kul a' ñe' wá ché."

\* **1:4-5** Wikölpa Kul: Mik yèkkuò i' tò Wikölpa Kul cheke, eta e' wá kiane ché Wiköl Batse'r. Isalema Juan tò ikíe es ichoie tò ì kaneweke Wiköl Batse'r tò ese dör tsákiè buaè kè ì kianeia' ikí. Apocalipsis 3:1, 4:5; 5:6 saú. † **1:14** suiyök ena mochka: Si'kuaie e' dör lana ena nieve.

**2**

*Ì ché Jesucristo tò ie' ichapa erule serke Éfeso, e'pa a*

<sup>1</sup> Età ie' tò ye' a íché: “Yèkkuò shtë Skèkòl biyòchòkwak tso' ye' icha erule serke Éfeso, e'pa kkò'nuk e' a. Yèkkuò e' kí ishtëmí ie' a i' es:

‘Yi wà bèkwò kul tso' iulatò bua'kka a, ñies yi shkòdur bò'wòla tulokà yòule orochka wa, e' shuà, e' tò ichè a' a' i' es: <sup>2</sup> Wés a' serke e' kòs jcher ye' wà. A' kaneblòke darèrèè, a' weirke kòs ye' kuèkí, e' dalè'ttseke a' tò er bua' wa, e' kòs jcher ye' wà. Ye' wà ijcher tò pè' sulusipa kè wèr a' wa buaè. Wépa de a' ska' e' chòk tò ie'pa dör ye' ttekòlpa erè ikachòrak, esepa ma'wé a' tò tã a' isué tò ie'pa dör kachòkwakpa. <sup>3</sup> A' weirke tajè ye' ttè kuèkí, e' dalè'ttseke a' tò er bua' wa, kè ilo'yane a' wà. <sup>4</sup> Erè ye' wà ilè tso' kí a' kkatè: a' kè ñi dalèritsòkú'ia ena a' kè ye' dalèritsèia wés kuaè es. <sup>5</sup> E' kuèkí wés kuaè tã a' éna ye' dalèr, ñies wés kuaè tã a' ñi dalèrits e' anu' a' éna. A' er mane'üne tã a' sènúne wés a' sene' kuaè es. A' kè er maneone, e' tã ye' datskene bet a' ska' tã a' bò'wòla tulokà e' yerattsa ye' tò. <sup>6</sup> Erè i sulu wamleke Nicolaiwakpa tò e' suèkè tò suluè wés ye' tò isuèke es, e' tò ye' tstsé'wé buaè. <sup>7</sup> Ì cheke Skèkòl Wikòl tò ye' icha eruleè e'pa a, e' ttsò a' ulitane tò! Wépa e' aléka i sulu kí, kè wà ye' ttè olo'yaule, esepa kòs a' ye' tò kawò meraè sene michoè e' kéli wò katòk. E' kéli àr ká buaala tso' ká jai a eè.' ”

*Ì ché Jesucristo tò ie' ichapa erule serke Esmirna, e'pa a*

<sup>8</sup> E' ukuòkí tã ie' tò iché ye' a: “Yèkkuò shtë Skèkòl biyòchòkwak tso' ye' icha erule serke Esmirna, e'pa kkò'nuk e' a. Yèkkuò e' kí ishtëmí ie' a i' es:

‘Yi dör ttè tsawe ana ttè bata. Yi kòtèwà e' shkènekane, e' tò ichè a' a' i' es: <sup>9</sup> A' weirke siarè ye' ttè kuèkí ñies a' kè wà i tã, e' kòs jcher ye' wà, erè a' dör Skèkòl icha e' kuèkí a' dör wés inukòl blúpa es. Ñies ye' wà ijcher tò pè' wèlepa tò a' cheke suluè. Ie'pa e' chò tò ie'pa dör Skèkòl icha, ñermata ie'pa dör Satanás icha. <sup>10</sup> A' weirdaè kòs, e' kè yòki a' suanuk. Ye' ttò ttsò: Bè tò a' wèlepa uyerawà s'wòto wé a, a' erblòke ye' mik e' ma'wòje. A' weirdaè siarè dòka ká dabop è. Ie'pa tò a' ttèwami ye' ttè kuèkí, erè a' erblòke ye' mik, e' kè olo'yar a' tò yès, e' tã sene michoè meraèyò a' a' iskéie. <sup>11</sup> Ì cheke Skèkòl Wikòl tò ye' icha eruleè esepa a, e' ttsò a' ulitane tò! Wépa e' aléka i sulu kí, kè wà ye' ttè olo'yaule, esepa kè duòpawà bötòkicha.’ ”\*

*Ì ché Jesucristo tò ie' ichapa erule serke Pérgamo, e'pa a*

<sup>12</sup> E' ukuòkí tã ie' tò iché ye' a: “Yèkkuò shtë Skèkòl biyòchòkwak tso' ye' icha erule serke Pérgamo, e'pa kkò'nuk e' a. Yèkkuò e' kí ishtëmí ie' a i' es:

‘Yi wà tabè tso' kaoule di'diè wí'kè iò'kè, e' tò ichè a' a' i' es: <sup>13</sup> Ye' wà ijcher tò a' serke wé Satanás tkèr blu'ie ee, erè a' e' tkéwà darèrèè ye' a. Erè ye' ttè chòkwak ekòl yèsyèsè kiè Antipas, e' kòtwà ie'pa tò a' kè a' wé Satanás serke ee, erè a' kè wà a' erblòke ye' mik e' olo'yane. <sup>14</sup> Erè ilè tso' ye' wà böt mañat kí a' kkatè: A' shuà wèlepa tso', e'pa tso' ttè sulu iutòk. Ttè e' dör wés ttè wa Balaam bak s'wòbla'uk es. Ká iaiè Balaam tò Balac wòbla' as ie' tò Israel aleripa kò i sulu wamblòk. Balaam tò Israel aleripa dakíñè chké meule iyi diòkòl tso' dalóie ese a, ese katòk ñies trènk tajè. <sup>15</sup> Es ñies a' shuà wèlepa tso', e'pa kè éna Nicolaiwakpa ttè olo'yak. <sup>16</sup> E' kuèkí a' er mane'üne Skèkòl a. A' kè tò iwè es, e' tã bet ye' datske ñiùpòk ie'pa tã tabè tso' ye' kkò a e' wa. <sup>17</sup> Ì cheke Skèkòl Wikòl tò ye' icha eruleè e'pa a, e' ttsò a' ulitane tò! Wépa e' aléka i sulu kí, kè wà ye' ttè olo'yaule, esepa kòs tierae'yo chké tso' blèulewà kiè maná ese wa. Ñies ákwòla sarurula meraèyò ie'pa a ekòl ekòl, e' kí kiè pa'ali tso' kitule. Kiè e' kè jcher yi wà. Yi a imène, ese è wà ijcherdaè.' ”

*Ì ché Jesucristo tò ie' ichapa erule serke Tiatira, e'pa a*

<sup>18</sup> E' ukuòkí tã ie' tò iché ye' a: “Yèkkuò shtë Skèkòl biyòchòkwak tso' ye' icha erule serke Tiatira, e'pa kkò'nuk e' a. Yèkkuò e' kí ishtëmí ie' a i' es:

‘Skèkòl Alà, e' wòla wèr wés bò'wò wòñar es. Ie' klò wèr dalólòè wés tabechka bua'buá paiklèsò tã iwèr dalólòè es, e' tò ichè a' a' i' es: <sup>19</sup> Wés a' serke e' kòs jcher ye' wà. Ye' wà ijcher tò a' ñi dalèritsòke buaè ena a' erblòke ye' mik. Ñies ye' wà ijcher tò a' ñi kímuke ñikkèè buaè ena a' weirke kòs, e' dalè'ttseke a' tò er bua' wa. I'ñe a' tò ikí wèke bua'ie, kuaè a' tò iò' e' tsatá. <sup>20</sup> Erè ye' wà ilè tso' kí a' kkatè: alakòl tso' a' shuà kiè Jezabel, e' a' tò kawò meke s'wòbla'uk. Ie' e' chò tò ie' dör Skèkòl ttekòl, erè ie' tò s'wòbla'wèke, e' wa ie' tò ye' kanè mèsopa dakíñe as itrèr ñies as itòrak chké meule iyi diòkòl dalóie ese a, ese katò. <sup>21</sup> Ye' tò ie' panè tajè as ie' tò iyi suluè e' olo'yò tã ier mane'ù ye' a, erè ie' kè er mane'wàk yès. <sup>22</sup> E' kuèkí súyò duè patké ie' kí darèrèè as kè ikarkaiá. Ñies wépa kòs trène ie' tã, esepa we'ikerayò. Ie'pa kè er mane'ù, kè tò i sulu e' olo'yè, e' tã bet ye' tò ie'pa we'ikeraè. <sup>23</sup> Ñies ye' tò alakòl e' klépa

\* 2:11 kè duòpawà bötòkicha: S' duòwà bötòkicha e' dör se' uyèwà bõ' kè a' wé s'weir michoè ee e'. Apocalipsis 20.16 saú.

tteralur. Es ye' icha eruleë serke ká wa'ñe, e'pa wa ijcherdaë tò ye' wa sulitane er suule buaë tò wes idir, wes iser. Ye' tò a' ulitane a iské meraë eköl eköl wes iser es. <sup>24</sup> Erë a' malepa tso' Tiatira, a' kě ku' ttè sulu e' iutök. Ttè e' kiè ie'pa tò "Satanás ttè blèulewá se' ésepa yöki." Ttè e' dör suluë. E' kě iutène a' wa, etá e' dör buaë. E' kueki ye' tò a' ichè tò ye' kě tò ttè dalöiëno darërëë ese skà kí meku' a' a' dalöië. <sup>25</sup> Erë ye' ttè tso'tke a' wa klöule, e' a' a' e' tköwá darërë michoë dö mik ye' datskene etá. <sup>26-27</sup> Wépa e' aléka i sulu kí, kě wa ye' ttè olo'yaule, wépa serke wes ye' kí ikiane es dö mik s'ënewa ekké, esepa a' ye' tò káwö meraë s'blüpaie wes ye' Yé tò ye' a' imé es. Ie'pa tkeraká ye' tò ká ulitane wakpa wökirpaie. Ie'pa tò ká ulitane wakpa wéttseraë yésyësë kě janéwetá' yés. Wépa tò ie'pa ttè dalösewéwá, esepa olordawá wes skaüña olorwá es. <sup>28</sup> Nies ye' tò békwo kiè dukir wërke bla'mi e' meraë ie'pa a. <sup>29</sup> ð cheke Skéköl Wiköl tò ye' icha eruleë e'pa a, e' tssó a' ulitane tò! "

### 3

*Ì ché Jesucristo tò ie' ichapa erule serke Sardes, e'pa a*

<sup>1</sup> E' ukuöki tá ie' tò ye' a' ichè: "Yèkkuö shtó Skéköl biyöchökwak tso' ye' icha erule serke Sardes, e'pa kkö'nuk e' a. Yèkkuö e' kí ishtómi ie' a' i' es:

'Yi wá Skéköl Wikölpá Kul\* tso'. Nies yi wá iulató a' békwo tso' döká kul, e' tò ichè a' a' i' es: Wes a' serke e' kos jcher ye' wá. Sulitane tò ibikeitseke tò a' serke buaë ye' a' erë ye' wá ijcher tò e' kě dör es. A' kě serku'ia ye' a' buaë. Ye' a' tá a' dör wes s'duulewá es. <sup>2</sup> Ye' tò isuë tò a' serke Skéköl a, e' kam döká wë' ie' wöa. E' kueki a' t'ñúne, a' senúne ye' a' buaë. Ì buaë tso'ia' a' a' elkela, e' a' a' e' diché ióne kam ichöwa da'a' e' yöki. <sup>3</sup> Ttè buaë wa a' wöblane, e' ska' a' er anúne. Ttè e' iutöne. Ì sulu wamblé a' tò, ese olo'yó tá a' er mane'ú ye' a. A' kě tò iwë es, e' tá ye' döraë a' ska' wes akblökwak es a' we'ikök, e' kěwö kě jcherpa a' wá. <sup>4</sup> Erë a' tso' Sardes, e'pa welepa kě e' iaoneka sene sulu wa. E'pa serke yésyësë ye' a, e' kueki aishkuö tá ie'pa shkóraë ye' tá paiëule buaë datsi' saruru wa. <sup>5</sup> Es nies wépa e' aléka sene sulu kí, kě wa ye' ttè olo'yaule, esepa kí datsi' saruruë iërdaë. Ie'pa kiè kě yepattsayö sene michoë e' yèkkuö kí. E' skéie ye' tò icheraë Skéköl wörki ena Skéköl biyöchökwakpa wörki tò ie'pa dör ye' icha. <sup>6</sup> ð cheke Skéköl Wiköl tò ye' icha eruleë e'pa a, e' tssó a' ulitane tò! "

*Ì ché Jesucristo tò ie' ichapa erule serke Filadelfia, e'pa*

<sup>7</sup> E' ukuöki tá ie' tò ye' a' ichè i' es: "Yèkkuö shtó Skéköl biyöchökwak tso' ye' icha erule serke Filadelfia, e'pa kkö'nuk e' a. Yèkkuö e' kí ishtómi ie' a' i' es:

'Yi dör batse'r ena ttö mokjë e' ulá a' s'blü bak kiè Davide e' kě ukkó yottsá tso'. Ie' wá káwö tá' i'yi ulitane kí. Mikie' tò iukkó yéttá, etá kě yi a' iwöténukwane. Mik ie' tò iukkó wötéwa, etá kě yi a' ikkó yénuksane. Ie' tò ichè a' a' i' es: <sup>8</sup> Wes a' serke e' kos jcher ye' wá. Ye' wá ijcher tò erë a' kě dalöiërta' tajë, erë a' tò ye' ttè iuté buaë, a' kě wá ye' waténetsá. E' kueki ukkó yéttá ye' tò a' a, kě yi a' iwöténukwane. <sup>9</sup> Ye' ttö tssó. A' shúa welepa tso', e'pa dör Satanás icha. Ie'pa e' chö tò ie'pa dör Skéköl icha, erë ie'pa kachö. Ie'pa keraë ye' tò e' tulökwá kuché kí a' wörki. Es ie'pa wa ijcherdaë tò ye' tò a' daléritseke. <sup>10</sup> A' weirke ye' ttè kueki, e' dalé'ttsé a' tò er bua' wa wes ye' tò a' patké' iwá uk es. E' wá iuté a' tò buaë, e' kueki ye' tò a' tsatkeráë mik s'weirke tajë e' kěwö de ká ulitane wakpa kí ima'woje etá. <sup>11</sup> Ye' datsene bet. Ye' ttè wa a' wöblane, e' a' a' e' tköwá darërë kekraë as kě yi tò a' ulá a' iské buaë e' yöttá. <sup>12</sup> Wépa e' aléka sene sulu kí, kě wa ye' ttè olo'yaule, esepa döraë wes u' chki bua'ie es Skéköl wé tso' ká jai a' e' a. E' ie'pa ser michoë kekraë. Skéköl kiè shteraëyö ie'pa mik. Nies Skéköl kě, e' kiè shteraëyö ie'pa mik. Ká e' kiè Jerusalén Pa'alj, e' datsé ká jai a. Nies ye' wák kiè pa'alj, e' shteraë ye' tò ie'pa mik. <sup>13</sup> ð cheke Skéköl Wiköl tò ye' icha eruleë e'pa a, e' tssó a' ulitane tò! "

*Ì ché Jesucristo tò ie' ichapa erule serke Laodicea, e'pa*

<sup>14</sup> E' ukuöki tá ie' tò ye' a' iché i' es: "Yèkkuö shtó Skéköl biyöchökwak tso' ye' icha erule serke Laodicea e'pa kkö'nuk e' a. Yèkkuö e' kí ishtómi ie' a' i' es:

'Yi dör ì kos yë' Skéköl tò e' wá, yi tò ie' tté cheke yésyësë kekraë, yi tá ie' tò i'yi ulitane yö', e' tò ichè a' a' i' es: <sup>15</sup> Wes a' serke e' kos jcher ye' wá. Ye' wá ijcher tò a' tò ye' ttè dalöieke bërëbërë è, kě bua'ie. A' dör wes di' bashbash es, kě dör ba'baë, kě dör sesëë, a' dör bashbash è. ja' mü dör ba'baë ö sesëë! <sup>16</sup> Erë a' dör wes di' bashbash es ye' a. A' kě dör ba'baë, nies a' kě dör sesëë. E' kueki ye' tò a' tuerattá ye' kkö a. <sup>17</sup> A' tò ichè tò a' dör inuköl blüpa. A' tò ichè tò a' káwö tköke buaë, kě ì kí kianeia a' kí. Erë a' kě wá ijcher tò ñermata ye' a' tá a' dör wes pë' weirke siarë es. A' dör wes se' wër siarë s'yamipa wa es. A' dör wes pë' kě wá i' ku'ia es. A' dör wes pë' wöbla kě wawër es. A' dör wes pë' kě wá datsi' tá' es. <sup>18</sup> E' kueki ye' tò a' patteke tò a' tò orochka ta'ú ye' ska'. Oro ese dör oro bua' bua diaqule bö' wa ibua' bua yottsá ese.

\* 3:1 Apocalipsis 1.3 sa'ú.

E' je' tō a' blu' wemi buaē. Nies datsi' saruruē ese taŷ ye' ska'. E' wa a' e' paiōmi buaē as a' kē jaeria. Nies a' tō kapōli taŷ ye' ska' a' wōbla bua'woie as iwawēr buaē. <sup>19</sup> Wēpa dalēr ye' ēna, e'pa kōs unēke ye' tō shurueke ye' tō as iserdak buaē. E' kuēkŷ ye' dalōiō er bua' wa. I' sulu wambleke a' tō, ese watōtsa. A' er mane' ŷ bua'iewa ye' a. <sup>20</sup> ŷYe' ttō ttsō! Ye' dōr wēs wēm dur ekōl ukkō a' a' ikiōk tō ye' a' kawō mŷ shkwa es. Yi tō ye' ttō tstsē ta ye' kiēwaitō weshkē, e' ta ye' dōrawa ta ye' chkōraē ie' ta. <sup>21</sup> Ye' e' alēka ŷyi ulitane kŷ ta ye' e' tkēka ye' Yē ta wē ie' tkēr blu'ie eē. Es nies wēpa e' alēka i' sulu kŷ, kē wa ye' ttē olo'wane, esepa a' kawō meraē ye' tō e' tkōksēr ye' ta wē ye' tkēr blu'ie eē. <sup>22</sup> ŷ cheke Skēkōl Wikōl tō ye' icha eruleē e'pa a, e' ttsō a' ulitane tō! "

## 4

*Skēkōl kŷkarkeka buaē kŷ jai a*

<sup>1</sup> E' ukuōkŷ ta ye' tō ŷyi skā suē kabsueie. Ye' isuē tō kŷ jai a' ukkō tso' aie ta s'ttō tstsē' ye' tō kewe wēs duk blar es, e' tō ye' a' ichē: "Be' shkōkŷ iē, etā i' wamblērmi i' ukuōkŷ ta, e' kkecheke ye' tō be' a."

<sup>2</sup> E' wōsha ta Skēkōl Wikōl de ye' kŷ tajē, ta ye' tō blu' kulē tso' kŷ jai a' e' suē et. E' kŷ itkēr ekōl. <sup>3</sup> Yi tkēr kula' e' kŷ, e' dalōburke dalōlōē wēs ak bua' bua dalōbur es, e' wōaule spaspa ena mat wēs ak bua' bua kiē diamante ena rubi es. Ie' kula' pamik shkaba' tkērke oloburke dalōlōē, e' wōaule spaspa wēs ak bua' bua kiē esmeralda es. <sup>4</sup> Nies ie' kula' pamik blu' kulē skā suēyō dōka dabom bōyōk kŷ tkēl (24). E' kŷ kēkēpa tulur dōka dabom bōyōk kŷ tkēl (24), e'pa paiēulewā datsi' saruruē wa, nies ie'pa wa orochka tso' yōule tkēulekŷ iwōkir kŷ wēs blu'pa es. <sup>5</sup> Blu' kulē suē ye' tō kewe, eē alā wōnarke tajē, talachke blarke tajē. Kula' e' wōshaē bō'wō narke kul wēs kuatak wōbatsēs es. Bō'wō kul, e' tō Skēkōl Wikōl chē. <sup>6</sup> Kula' e' wōshaē i' me'r dayēie kkuēie wēr sarērēē wēs widrio es.

I' ttsē'ka tso' kula' pamik dōka tkēl e'pa wōbla dōr tajē tsjika wōkka. <sup>7</sup> Itsā e' wōkir wēr ma' name suē. Iētō wōkir wēr baka wē'ne suē. Iētō skā wō dōr s'ditsō wō suē. Ibatā wēs pu ŷr ar es. <sup>8</sup> Itsā pik dōr terōl, es imalepa kōs pik dōr terōl nies. Ie'pa pa kōs e' dōr wōbla ē dōtsā ipik dikŷa. Nīē nañē ie'pa tso' Skēkōl tseitstōk, kē iē' wōklō'uta' rak ta ichekerakitō i' es:

"Skēkōl dōr batse'r tajē, ie' dōr batse'r tajē, ie' dōr batse'r tajē.

Ie' dichē ta' tajē ŷyi ulitane tsata.

Ie' tso'tke tsawe ta, ŷ'ne ta, nies kēkraē."

Es ie'pa tō icheke kēkraē.

<sup>9</sup> Skēkōl yōbiē tkēr kula' e' kŷ, e' pamik i' ttsē'ka tso' tkēl, e'pa tso' ie' kŷkōkka, ie' olo kŷkōkka, ie' a' wēstela chōk kēkraē. <sup>10</sup> Mik ie'pa tso' e' ŷk, e' dalewa kēkēpa dōka dabom bōyōk kŷ tkēl (24) tulur ie' pamik, e'pa e' tulōkeser iskŷ wōwakkōt itkēr kula' kŷ e' dalōioie. Ie'pa tso' Skēkōl ser michōē e' dalōiōk, e' dalewa i' tkēr ie'pa wōkir kŷ yōule orochka wa, e' kōs mekewarakitō iskŷ Skēkōl kula' wōshaē ta ichekerakitō:

<sup>11</sup> "A Sa' Kēkōl, ŷyi ulitane yō' be' tō.

ŷyi ulitane tso' be' wāk ttō wa.

E' kuēkŷ sa' ulitane kawōta' ichōk tō be' olo ta' tajē.

Sa' ulitane kawōta' be' dalōiōk nies be' dichē kŷkōkka."

## 5

*Yēkkuō kitule wōrratule ena Obeja Pupula, e' pake*

<sup>1</sup> E' ukuōkŷ ta ye' tō isuē tō itkēr kula' kŷ, e' wa yēkkuō wōrratule a'tser iulā bua'kka, e' kŷ itso' kitule ikŷkē ena ishūa. Yēkkuō e' kōk wōbatsulewā dōka kul. <sup>2</sup> Etā Skēkōl biyōchōkwak suē ye' tō ekōl, e' dichē tajē, e' tō ichakē aneule: "ŷA yi wē, yi e' didir yēkkuō wōbatsulewā, e' kōk batsōōk wē iwōbatsulewā eē ta ishuppōōk?" <sup>3</sup> Erē kŷ jai a' ena kŷ i' kŷ ena kŷ diā kaska' kē yi didir yēs yēkkuō e' shuppōōk ena iwā saŷk. <sup>4</sup> Ye' ŷuke tajē, kē yi didir yēkkuō e' shuppōōk ena iwā saŷk e' kuēkŷ. <sup>5</sup> Etā skēkēpa tso' eē dabom bōyōk kŷ tkēl (24), e' ekōl tō ye' a' ichē: "Kē be' ŷukŷa. Ittsō, ekōl kiē Ma' name e' dōr judāwak ditsēwō, ie' kēkōl dōr blu' bak kŷ iaiaē kiē David e'. Ie' e' alŷkabak ibolōkpa kōs kŷ. Ie' je' didir yēkkuō wōbatsulewā kul e' kōk batsōōk ena ishuppōōk."

<sup>6</sup> Etā ye' tō obeja wē'ne pupula suē etō, e' pa kŷ itō tso' wēsua iŷchēulea mē Skēkōl a, ese shkēnekane. E' dur itkēr kula' kŷ e' ŷ'mik, i' ttsē'ka dōka tkēl ena kēkēpa dōka dabom bōyōk kŷ tkēl (24) e'pa shushā. Obeja e' dula' dōka kul nies iwōbla dōka kul. Iwōbla dōka kul e' wa dōr tō Skēkōl Wikōl Kul\* patkē Skēkōl tō kŷ wa'ne. <sup>7</sup> Obeja Pupula e' de itkēr kula' kŷ e' ska' ta' yēkkuō a'tser itkēr kula' kŷ e' ulā bua'kka, e' klō'wēitō. <sup>8</sup> Mik ie' tō yēkkuō klō'wē, etā i' ttsē'ka dōka tkēl ena kēkēpa dōka dabom bōyōk kŷ tkēl (24), e'pa kōs e' tēlur wōwakkōt Obeja Pupula wōrkŷ. E'pa kōs wa ma'ma tso' blano kicha ta' kiē arpa. Nies tka' yōule orochka wa, ese tso' ie'pa kōs wa. Tkā' e' a' ŷyi masmas tso' ŷa'wē Skēkōl a, ese tso' chikchiē. E' tō s'batse'rpa ttōke ie' ta' e' wa chē. <sup>9-10</sup> I' ttsē'ka dōka tkēl ena kēkēpa dōka dabom bōyōk kŷ tkēl, e'pa kōs tstsē' mtsē

\* 5:6 Apocalipsis 1.3 saŷ.

pa'ali wa Obeja Pupula k̄ikokaie. Ie'pa tō itseittsé i' es:

“Be' kōtulewa, be' p̄e tēne tajē wēs obeja pupula jchē mē Skēkōl a es, e' wa be' tō s'ditsō t̄tō kua'k̄i kua'k̄i ena ditsōwō kua'k̄i kua'k̄i ena k̄a kua'k̄i kua'k̄i wakpa tō'ttsa aš ekkēpa ulitane šuḡa se' dō tajē Skēkōl ichaie.

E'pa klō'wē be' tō aš ie'pa kaneblō Skēkōl a blu'paie ena sacerdotepaie.

Ie'pa dōraē k̄a ulitane wakpa blūpaie, es ie'pa tō s'wēttsēraē.

E' kuek̄i be' je' didir mok̄i yēkkuō wōrratule sē, e' klō'uk̄ ena ikkō batsōkōk wē iwōbatsulewā eē.”

11 E' ukuōk̄i t̄a ye' wōkēka eṭa ye' tō isuē tō Skēkōl biyōchōkwakpa tso' tajē, kē ishtanuk̄ yi a, e'pa tō t̄tsē ye' tō. Ie'pa tso' itkēr kula' k̄i ena i' t̄tsē'ka dōka tkēl ena kēkēpa dōka dabom bōyōk k̄i tkēl, e'pa pamik. 12 Ie'pa tō itseittsé w̄i'w̄iē i' es:

“Obeja Pupula kōtulewā, e' je' k̄i sulitane ie' k̄ikēka e' mēne buaē.

Ie' olo t̄a' tajē, ie' dōr īyi ulitane wāk, ie' wā īyi ulitane jcher, ie' dichē t̄a' tajē,

e' kuek̄i sulitane kawōt̄a ie' dalōiōk, ie' k̄ikōkka.”

13 Nies ye' tō it̄tsē tō īyi ulitane yō' Skēkōl tō tso' k̄a jai a ena k̄a i' k̄i ena k̄a diā k̄aska' ena dayē a, e' kōs tō ichē i' es:

“Itkēr kula' k̄i ena Obeja Pupula, e'pa olo t̄a' tajē, dichē t̄a' tajē īyi ulitane tsata, e' kuek̄i sulitane kawōt̄a ie'pa k̄ikōkka, ie'pa dalōiōk kēkraē.”

14 I' t̄tsē'ka dōka tkēl e'pa tō ichē: “iEs e' idir!” Kēkēpa dōka dabom bōyōk k̄i tkēl, e'pa e' tēlur wōwakkōt Skēkōl ena Obeja Pupula wōrk̄i ie'pa dalōiōk.

## 6

*Yēkkuō wōrratule e' k̄kō batsulewā dōka kul e' batsēe Obeja Pupula tō etk etk*

1 E' ukuōk̄i t̄a ye' tō isuē tō Obeja Pupula tō yēkkuō wōrratule e' k̄kō batsulewā dōka kul e' tsā batsēe. Eṭa i' t̄tsē'ka dōka tkēl, e' ekōl t̄tō t̄tsēyō, e' t̄tō darērēē wēs alā blar es. Wēpa tso' ipatkērke e' panuk e' ekōl a ie' tō ichē: “iBe' yū!” 2 Ye' wōkēka t̄a kabaio saruru suēyō etō. Yi tkērka ik̄i, e' ulā a shkame' ār, n̄ies i' tkekeka wōkir k̄i iwā k̄kachoie tō ie' dōr e' alōkwak ese mēne ie' a et. Ie' m̄ia k̄i e' alōkka ibolōkpa k̄i.

3 Mik Obeja Pupula tō yēkkuō k̄kō batsulewā, e' skā batsēe et, eṭa ye' tō it̄tsē tō i' t̄tsē'ka dōka tkēl, e' skā tō ichē wēpa tso'

ipatkērke e' panuk e' skā a: “iBe' yū!” 4 Eṭa kabaio batsē dettsa. Yi tkērka ik̄i, e' a kawō mēne sene b̄ērē n̄ita e' yōttsa k̄a i' a aš p̄ē n̄i t̄tōwā. Ie' a tabē b̄erie mēne.

5 Mik Obeja Pupula tō yēkkuō k̄kō batsulewā, e' skā batsēe et, i' t̄a ide mañat, eṭa ye' tō it̄tsē tō i' t̄tsē'ka dōka tkēl, e' skā tō ichē wēpa tso' ipatkērke e' panuk e' skā a: “iBe' yū!” Ye' wōkēka eṭa ye' tō kabaio dalolo suē etō. Yi tkērka ik̄i, e' wā īyi es ma'woie dami iulā a. 6 I' t̄tsē'ka dōka tkēl, e' šuḡa ye' tō t̄tō t̄tsē tō ichē: “Harinachka kilo elka ē e' tōrdaē s'kaneblō k̄a et e' skē ekkē. Nies cebada kilo mañalka tōrdaē s'kaneblō k̄a et e' skē ekkē; erē oliwo kiē ena vino e' kē sulu'warwā be' tō.”

7 Mik Obeja Pupula tō yēkkuō k̄kō batsulewā, e' skā batsēe et, i' t̄a ide tkēl, eṭa ye' tō it̄tsē tō i' t̄tsē'ka dōka tkēl, e' bata tō ichē wēpa tso' ipatkērke e' panuk e' skā a: “iBe' yū!” 8 Ye' wōkēka eṭa kabaio tskrittskris suēyō etō wēr suluē. Yi tkērka ik̄i, e' kiē dōr S'duōwā. E' itōk̄i ekōl skā dat̄sē e' kiē dōr S'wimblu Kē. Ie'pa a kawō mēne k̄a ulitane wakpa e' mū blatēsō tkēl ts̄ini t̄a e' et ts̄ini eṭukwa tabē wa, bli wa, duē wa ena iyiwak dōr se' name ese wa.

9 Mik Obeja Pupula tō yēkkuō k̄kō batsulewā, e' skā batsēe et, i' t̄a ide skēl, eṭa s'kōtulewā Skēkōl t̄tē paka' ie'pa tō taniniē e' kuek̄i, e'pa wimblupa suēyō k̄a' tso' īyi mok̄a Skēkōl a e' dik̄ia. 10 Ie'pa tso' ichōk Skēkōl a aneule: “A Sa' Kēkōl, be' dōr īyi ulitane tsata, be' dōr batse'r, be' t̄tō mok̄iē. iDō mik be' tō wēpa serke diā iyōk k̄i tō sa' kōtulur esepa dalē'ttsekerō? iMik be' tō ie'pa wōmekettsa weinuk i' wamblē'rakitō sa' k̄i, e' nuī skēie?” 11 Eṭa ie'pa wakpa bil ekkē e'pa a datsi' saruru mēne iē. Skēkōl tō ichē ie'pa a: “A' enūia b̄erb̄ēr ē dō mik p̄ē' tō a' malepa dōr ye' kanē mēsopa kianeia t̄tēlur, e'pa kōs ttekeluriā wēs a' kōtulurakitō es eṭa. E'pa panūia tsir.”

12 Mik Obeja Pupula tō yēkkuō k̄kō batsulewā, e' skā batsēe et, i' t̄a ide terōl, eṭa i' t̄ka darērēē. Diwō t̄tsenewā m̄ia t̄tsettseē wēs datsi' daloloē es. Si'wō m̄ia batsē wēs p̄e es. 13 Bēkwō darolone iyōk k̄i wēs kalwō tkēttsa siwā' tō mik ibitsirke tajē eṭa es. 14 Eṭa k̄a jai, e' wōrratēwā wēs yēkkuō wōtrēwasō es, kē iwērtaiā. Kabata ulitane, dayē nane ulitane, e' kōs e' skēlur bānet. 15 Eṭa k̄a blūpa kōs, p̄ē' tajē kōs, n̄ippōkwakpa wōkirpa kōs, inukōl blūpa kōs, s'dalōiēr t̄a' tajē esepa kōs, n̄ies s'klōulewā kanē mēsoie, n̄ies kanē mēsopa malepa, esepa kōs e' blēlur ākuk a ena āk blublu tso' kabata a ese dik̄ia e' tsatkoie. 16 Eṭa ie'pa tō ichē aneule kabata a ena āk blublu a: “iSa' blō a' dik̄ia, sa' k̄kō'nū Skēkōl tkēr ikula' k̄i k̄a jai a e' yōk̄i! Nies Obeja Pupula kēsik yōk̄i sa' k̄kō'nū. 17 Ie'pa

tò sulitane we'ikeraë siarë e' k'éwò detke, kě yi tkòpashkar e' ulà a."

**7**

*Skèkòl kanè mèsopa wakyòule ie' a*

<sup>1</sup> E' ukuòkì tã ye' tò Skèkòl biyòchòkwakpa sué dòkã tkèl, e'pa ièter wé ká i' erkerò e' kkò mìk. Bòl ièter diwò tskirke e' kke; ekòl dur ulà bua'kka, ekòl dur ulà baklì'kka. Bòl ièter diwò mì'kewã e' kke; ekòl dur ulà bua'kka, ekòl dur ulà baklì'kka. Ie'pa tso' siwã' kòs bitsirke e' wòklò'uk as kě ibitsirìa ká i' kì, dayè kì, kal kì, i kì yès. <sup>2</sup> Ie'pa a kawò mène ká i' ena dayè sulu'ukwã. Nìes ye' tò Skèkòl biyòchòkwak skà sué ekòl, e' datse diwò tskirke e' kke. E' ulà a ìyi tso' s'wakyuoie Skèkòl chòk wã, e' a'tser. Ie' ane imalepa tkèl tsakã tã ichéitò ie'pa a: <sup>3</sup> "¡A' kě tò ká sulu'ukwã, dayè sulu'ukwã, kal sulu'ukwã kam sa' tò Skèkòl kanè mèsopa wakyuò iwòtsã kì e' yòkì!"

<sup>4-8</sup> Etã bil wakyòule e' yène ye' a. Wépa wakyòule e'pa dór se' yé bak ká iaiã kiè Israel, e' ala'r dabom eyòk kì bòl (12), e'pa aleripa shùkitè iditséwò wa iditséwò wa. Ie'pa ditséwò kiè Judá, Rubén, Gad, Aser, Neftalí, Manasés, Simeón, Leví, Isacar, Zabulón, José ena Benjamín. Ekkèpa ditséwò shùkitè dòkã 12.000 iditséwò wa iditséwò wa. Ishùkitè e'pa dór sèraã 144.000 ekkè.

<sup>9</sup> E' ukuòkì tã ye' wò kékã tã ye' isué tò s'ditsò dapane tajè kě shtanuk yi a ekkè. E'pa dór ká ulitane wakpa, ttò kuã'kì kuã'kì, ditsówò kuã'kì kuã'kì. Ie'pa ièter, itkér kula' kì ena yi kiè Obeja Pupula, e'pa wòrkì. Ie'pa kòs datsi' ié saruruè. Ie'pa ulitane wã s'j kò dami iulã a. <sup>10</sup> Ie'pa tò iché aneule:

"¡S'tsatkè e' datse  
Skèkòl tkér kula' kì ena Obeja Pupula e'pa  
wã!"

<sup>11</sup> Kékèpa dòkã dabom böyòk kì tkèl (24) ena i tse'ka dòkã tkèl, e'pa pamik Skèkòl biyòchòkwakpa kòs ièter. E'pa kòs e' télur wòwakkòt, itkér kula' kì, e' dalòioie <sup>12</sup> etã ichéraitò:

"¡Es e' idir!  
Be' dór sa' blú yòbiè, sa' tò be' kìkekeka  
kèkraë.

Be' olo ta' tajè, be' wã ìyi ulitane jcher buaè.  
Sa' tò wèstela cheke be' a kèkraë.

Be' dalòieke sa' tò kèkraë.

Be' diché tã' tajè ìyi ulitane tsatã, be' è a ì kòs  
or,

¡Es e' idir!"

<sup>13</sup> E' ukuòkì tã kékèpa dòkã dabom böyòk kì tkèl (24), e'pa ekòl tò ye' a ichaké: "¿Ie'pa paièule datsi' saruru wa, e'pa dór yi? ¿Wé ie'pa datse?" <sup>14</sup> Ye' tò ie' iutè: "A kékèpa, ye'

kě wã ijcher, ichò ye' a." Etã ie' tò ye' a iché: "Ie'pa dór wépa weine siarè sulitane weirke tajè e' k'éwò ska' e'pa. Erè e' dalé'ttsé' ie'pa tò buaè. Ie'pa tò idatsi' skué yi kiè Obeja Pupula e' pé wa etã idatsi' miã saruruè.

<sup>15</sup> "E' kuekì ie'pa ièter Skèkòl tso' ikulé kì, e' wòrkì.

Ñiè nañèè ie'pa tso' ie' dalòie e' wakanéuk iwé a.

Ie'pa tso' ie' tã ena ie' tò ie'pa kkò'neraè kèkraë.

<sup>16</sup> Ie'pa kě duòpaia bli wã, ie'pa kě er sirpaia. Diba kě tò ie'pa ña'wepaia, kaba kě tò ie'pa wè'ikepaia.

<sup>17</sup> Obeja Pupula tso' Skèkòl kula' o'mik, e' dór ie'pa kkò'nukwak, e' kuekì ie'pa kě weirpaia yès.

Obeja Pupula tò ie'pa wèttseraè di' tum tò sene michoè meke se' a, e' di' yòk.

Skèkòl tò ie'pa wòriò kòs e' paikleraè as ie'pa tse'r buaè."

**8**

*Obeja Pupula tò yèkkuò wòrratule e' kkò batsulewã dòkã kul, e' bata batsée*

<sup>1</sup> Mik Obeja Pupula tò yèkkuò wòbatsulewã, e' bata kkò batsée, etã ká jai a ká miã mejmeè dò hora shabòts ekkè.

<sup>2</sup> E' ukuòkì tã Skèkòl biyòchòkwakpa dòkã kul ièter Skèkòl wòrkì, e'pa suéyò. Ie'pa a duk mène ekòl ekòl. <sup>3</sup> E' ukuòkì tã Skèkòl biyòchòkwak skà de wé kã' tso' ìyi moka Skèkòl a' e' wòrkì. Ie' wã iulã a tka' yòule orochka wa ese a'tser. Ie' a ìyi masmas mène tajè s'batsè' rpa kòs e'pa ttòke Skèkòl tã e' kì ioie as ie' tò ìña'ù kã' yòule orochka wa ìña'woie tso' Skèkòl kulé wò shaè, e' kì. <sup>4</sup> Etã ie' tò ìyi masmas ña'wé kã' ñe' kì, e' shklè tka ie' ulà mik deká Skèkòl wòrkì s'batsè' rpa ttòke ie' tã e' tã ñita. <sup>5</sup> Ie' tò itkã' wã iéka bö' wòrkua tso' kã' ñe' kì, e' wa. Bö' wòrkua e' uyémi ie' tò ìyòk kì. Etã ká wa ñe kì alá wòñane tajè, iblane tajè, kã wòtì' wé tajè j' tò.

*Duk dòkã kul*

<sup>6</sup> Skèkòl biyòchòkwakpa dòkã kul, e'pa wã duk tso' iwakpa bli ekkè, ie'pa tso'tke iduk bla'wèke e' panuk.

<sup>7</sup> Etã Skèkòl biyòchòkwak ekòl tò iduk bla'wé kewe. Etã mò wòli wòsi sèseè, ñies bö'wò shùtuule pé tã, ese dane tajè ìyòk kì wés kalì yèr es. Ká i' ena kal e' ñanewã tajè. Ká i' ena kal kòs e' mú blatèsò mañat tsjní tã e' et tsjní ñanewã. Nìes kakò kòs tso' ká i' kì e' ñanewã sèraã.

<sup>8</sup> E' ukuòkì tã Skèkòl biyòchòkwak skà tò iduk bla'wé. Etã ì biteshka kabataie bérie wòñarke bö'ie, e' anewa dayè a. Etã dayè mú blatèsò mañat tsjní tã e' et tsjní miã péie. <sup>9</sup> Iyiwak kòs serke dayè a ena kanò kòs

shkõke dayë kî, e' mú blatësö mañat tsjní tã e' et tsjní enewa.

<sup>10</sup> E' ukuõkî tã Skëkõl biyõchõkwak skã tö iduk bla'wë, i' tã ide mañatõkicha. Etã bëkwõ bërie wõñarke wës kuàtak wõñar es, e' biteshka anewa di' a ena di' tum a tajë. Di' tso' kôs ena di' tum tso' kôs, e' mú blatësö mañat tsjní tã e' et tsjní a bëkwõ anewa. <sup>11</sup> Bëkwõ e' kië Bacha'bachaë. Wë bëkwõ e' anewa, e' di' kôs miã bacha'bachaë. Di' e' tö s'ttélur tajë.

<sup>12</sup> E' ukuõkî tã Skëkõl biyõchõkwak skã tö iduk bla'wë, i' tã ide ktëtõkicha. Etã diwõ ena si'wõ ena bëkwõ, e' kôs mú blatësö mañat tsjní tã e' et tsjní kôs ttsenewã. E' kuëkî ñiwe ena nañewe, e' mú blatësö mañat tsjní tã e' et tsjní ttsenewã.

<sup>13</sup> E' ukuõkî tã ye' wõkéka tã ye' tö pu suë et ur àr kashuk a, e' tö iché aneule: "¡Ayëwëë, ayëwëë, ayëwëë! ¡Wëstela ina kã ulitane wakpa tã, mik Skëkõl biyõchõkwakpa tso'ia mañal e'pa tö iduk bla'wëke eta!"

**9**

<sup>1</sup> E' ukuõkî tã Skëkõl biyõchõkwak skã tö iduk bla'wë, i' tã ide skëtõkicha. Etã bëkwõ et anewabak, e' suëyõ iskj. Eë kãuk ter tajë iskjë, kë s'wõ dë'mi ekkë. Kãuk e' kkõ wõtëule, e' kkõyottsã mène bëkwõ suëyõ iskj, e' a. <sup>2</sup> Mik ie' tö kãuk kkõyëttsã, eta e' a ishklë dekã tajë wës bö' wõñar tajë e' shklë es. E' tö kashuk ttsewëwã, e' kuëkî diwõ kë olo buneia. <sup>3</sup> Shklë e' shua ditski blubluë dettsã tajë iyõk kî, ponekã kã wa'ñe, kã ulitane wã iëwã. Ie'pa a kãwõ mène s'we'ikõk wës bachë' tö s'kuëwã tã idalë'r es. <sup>4</sup> Ie'pa kë a kãwõ mène kãkõ kôs, kalkõ kôs, e' katõk. Ie'pa a kãwõ mène, wëpa kë wakyõule Skëkõl wã iwõ tsã kî, esepa ë we'ikõk. <sup>5</sup> Erë ie'pa kë a kãwõ mène ittõkukur. Ie'pa a kãwõ mène irreuk idalë'r tajë wa dö si' skël ekkë. E' dalër tajë wës bachë' s'kuëwã es. <sup>6</sup> E' këwõ ska' tã s'ditsõ tö duëwã yuleraë poë, erë duëwã wák, e' tkõrashkar ie'pa yõkî.

<sup>7</sup> Ditski e' wër wës kabaio tso' ñippoie ese payõule es. Iwõkir kî itkëulekã, i tkëkã blu' tö iwõkir kî yõule orochka wa ese suë. Iwõ wër wës s'ditsõ wõ wër es. <sup>8</sup> Itã batsjë wës alakõlpa tsã es. Ikã dör wës namu kã es. <sup>9</sup> Tabechka àr ibatsj' mik wës ñippõkwakpa tö ieke e' tsatkoie e' sù. Ipik blar tajë wës carreta skë kabaio tö tũneule michoë ñippõk es. <sup>10</sup> Ikirë dör wës bachë' kirë es, e' diché wa ie'pa tö s'we'ikeke dö si' skël ekkë. <sup>11</sup> Ie'pa blu' e' dör Skëkõl biyõchõkwak dör kãuk iskjë, e' wõkir. Hebreoie e' kië dör Abadõn. Griegoie e' kië dör Apoliõn (kië e' wã kiane chë: Se' eukwawak).

<sup>12</sup> ¡Yi sulu e' tsã tka et, erë iskã kianeia bõt.

<sup>13</sup> E' ukuõkî tã Skëkõl biyõchõkwak skã tö iduk bla'wë, i' tã ide tektõkicha. Ye' tö s'ttõ tssë datse kã' tso' yõule orochka wa iyi moka

Skëkõl a ee. Kã e' e' bata tkël a iyõule dula'ie, e' shua s'ttõ tssëyõ. <sup>14</sup> E' tö iché Skëkõl biyõchõkwak tö iduk bla'wë író e' a: "Skëkõl biyõchõkwakpa dõkã tkël tso' moulewã di' tajë kië Eufrates e' kkõmik, e'pa wõtsõlor be' tã." <sup>15</sup> Skëkõl biyõchõkwakpa dõkã tkël e'pa tso'tke Skëkõl wã iwakanëwõie i' këwõ ska'. Ie'pa kanë dör pë' tajë eukwa. Pë' ulitane mú blatësö mañat tsjní tã e' et tsjní erdawa seraã ie'pa ulã a. Etã Skëkõl biyõchõkwakpa dõkã tkël wõtsërolone iwakanëuk. <sup>16</sup> Etã ye' a iyëne tö ñippõkwakpa dami kabaio kî, e'pa dõkã 200.000.000.

<sup>17</sup> Ñippõkwakpa ekkëpa dami kabaio kî, e' suë ye' tö, e'pa wã tabechka àr ibatsj' mik e' tsatkoie, e' wõaule batsë wës bö' wõrkua suësõ es ena sië wës àk bua'buã kië jacinto es, ena tskiriri wës azufre es. Kabaio ekkëpa wõkir wër wës namu wõkir es. Ñies ikkõ a bö' ena shklë ena azufre, e' dõkettsã. <sup>18</sup> Bö' ena shklë ena azufre dõkettsã kabaio ekkëpa kkõ a, e' dör i mañat suluë dõke pë' kî e'. E' tö pë' ewëwã tajë. Pë' ulitane mú blatësö mañat tsjní tã e' et tsjní enewa seraã. <sup>19</sup> E' wã dör tö kabaio ekkëpa wã diché tso' ikkõ a ena ikirë a s'we'ikoie. Ikirë bata dör tkabë chõk wõkir es, e' wa s' shkã'wëkeitõ.

<sup>20</sup> Erë pë' malepa atë kë durulune i sulu tka e' wa, e'pa kë wã i sulu wamblekerakitõ ese olo'yane. Ñies aknamapa ena iyi diõkõl dalõiekerakitõ esepa kë olo'yanerak iwã. ¡Yi diõkõl ñe'pa yõule orochka wa, inukõlchka wa, broncechka wa, àkchka wa ena kal tak wa, ese kôs wõbla kë wawër, kë kukuõ watsser, kë shko, erë ie'pa tso'ia idalõiõk ikëkõlie. <sup>21</sup> Ie'pa kë er maneone. Ie'pa s'ttekewãia, alibchõkeia, trërkeia, akblõkeia.

**10**

*Skëkõl biyõchõkwak e' wã yëkkuõ a'tser iulã a*

<sup>1</sup> E' ukuõkî tã ye' tö Skëkõl biyõchõkwak suë ekõl, e' diché tã' tajë. Ie' datse kã jai a paiëulewã buaë mò wa. Shkaba' tkënear iwõkir tsaka. Ie' wõ dalõburke wës diwõ es. Ie' klõlobo wa'ñe wër wës bö' wõñar es. <sup>2</sup> Ie' wã yëkkuõ tsitsirla a'tser iulã a shubukaule. Ie' klõ bua'kka tkëkaitõ dayë kî, iklõ baklî'kka tkëkaitõ kã sí kî. <sup>3</sup> Etã ie' ane tajë wës ma' name ar es. Mik e' one, eta alã blane dõkã kuktõkicha. <sup>4</sup> ¡Ché alã tö e' shtõk ye' mí yëkkuõ kî, erë ttõ tssëyõ datse kã jai a e' tö iché: "Kë ishtar, iblõwãbõ bërë."

<sup>5</sup> Etã Skëkõl biyõchõkwak suëyõ iklõ et tkërka dayë kî, iklõ et tkërka kã sí kî, e' ulã bua'kka këka kã jai a <sup>6</sup> tã ichëitõ: "Skëkõl ser michoë e' tö kã jai ena kã i' ena dayë ena i kôs tso'ia, e' yõ'. Ie' wõrkî ye' tö iché tö i cheke ye' tö e' dör mokî. Skëkõl kë tö i panepaia. <sup>7</sup> ¡Tso' Skëkõl wã ier a blëule wë,

e' ye' bakiṭo ikanè mēsopa dör ittekölpa e'pa a, e' wà ordaè mik Skèköl biyöchökwak bata tò iduk bla'wé etä."

<sup>8</sup> Etä s'ttò tsts'yo datse ká jai a, e' tténe ye' taṭa ichéitò: "Be' yú Skèköl biyöchökwak klò et tkérka dayè kǐ etä iklò et tkérka ká si kǐ, e' ska', etä yèkkuò a'ts'er iulà à shùbukauale, e' klò'ú." <sup>9</sup> Etä ye' mí Skèköl biyöchökwak dur e' ska' ta yèkkuò e' kiéyo ie' a. Ie' tò ye' a iché: "Íkè, ikatöwabò. Be' kkò à be' tò ittseraè tò blo'bloè idir wés bulali es, erè be' shua imiaraè bacha'bachaè."

<sup>10</sup> Etä yèkkuò a'tser Skèköl biyöchökwak ulà a, e' klò'wéyo taṭa ikatéwayò. Ye' kkò a ta blo'bloè idir wés bulali es, erè mik ide ye' shua, etä imia bacha'bachaè. <sup>11</sup> Etä ttè i' yéne ye' a: "Í wamblérmi ká kua'kǐ kua'kǐ wakpa tajè ta, ñies ditsöwò kua'kǐ kua'kǐ wakpa tajè ta, ñies s'ttò kua'kǐ kua'kǐ wakpa tajè ta, ñies ká blúpa tajè ta, e' kòs chök be' kawötä Skèköl ttekölíe."

**11**

*Skèköl ttekölpa bøl*

<sup>1</sup> Etä ye' a kua' mène ká ma'wojie. Ye' a iyène: "Be' yú, Skèköl wé kibi, e' ma'uk. Ñies ká' tso' íyi moká Skèköl a, e' ma'ú. Bil s'tso' Skèköl dalíoiök iwé a, e' shta'úttsa. <sup>2</sup> Erè Skèköl wé kibi upa aṭe u'rkǐ e' meule pè' kè dör judiowak esepa a, e' kueḷǐ e' kè ma'war be' tò. Ie'pa tò Skèköl kè, e' dör Jerusalén dör batse'r e', e' klò'werawa, sulu'werawa i sulu wa dö si' döká dabom tkéyök kǐ böt (42) ekkè. <sup>3</sup> Etä eḷ ye' tò ye' ttekölpa patkeraè bøl ye' tté pakók ká döká mil eyök kǐ cien böyök kǐ dabom teryök (1.260 dias) ekkè. Ie'pa paièule datsi' kra'kraè wa s'ká datsi' sü."

<sup>4</sup> Olivo klò bølka ena bö'wöla tulur ituloka kǐ döká böt tso' Skèköl wörkǐ ká jai a, e' yè'bak ká iaiaè Zacarias tò, e' wà dör ttekölpa bøl e'. <sup>5</sup> Yi datse ie'pa bøl we'ikök suluè kiane ppè, kiane ttèwa, e' ta ese ewerawa ie'pa tò bö' dökettsa ie'pa kkò a e' wa. <sup>6</sup> Ie'pa tso' Skèköl tté pakók ittekölpaie, e' dalewa ie'pa a kawò mène kalǐ wökló'ukwa as kè iyèr. Ñies ie'pa a kawò mène di' mane'uktsane pèie. Ñies kawò mène ie'pa a i sulu kòs mukka ká i' wakpa kǐ bitökicha ie'pa kǐ ikiane ekkè.

<sup>7</sup> Erè mik ie'pa tò Skèköl tté paké one, etä iyiwak sulusi aknamaie e' döraká kauk tajè iskjè e' a. E' ñippöraè ie'pa ta, etä ie' alòraká ie'pa kǐ, etä itteraluritò. <sup>8</sup> Ie'pa nu ardaè tkéter Jerusalén ká shushaè sultane wörkǐ. Ká e' a ie'pa Kèköl kòtwarakitò wötèulewà krus mik. Skèköl a ká e' dör suluè wés Sodoma ena Egipto es. <sup>9</sup> Pè' datse ká wa'ne, ditséwò kua'kǐ kua'kǐ, ttò kua'kǐ kua'kǐ ena ká kua'kǐ kua'kǐ wakpa e'pa tò Skèköl ttekölpa nu sugraè dö ká mañiat kǐ shabòts ekkè. Ie'pa kè tò kawò mepa yi a inú wötökwa. <sup>10</sup> Ká ulitane wakpa tse'rdæ buaè,

ie'pa bøl duolur e' kueḷǐ. Skèköl ttekölpa bøl tò ie'pa we'ik siarè, e'pa duolur, e' tò ie'pa tse'weraè buaè, e' kueḷǐ ie'pa íyi kakmeraè ñi a.

<sup>11</sup> Mik ká mañiat kǐ shabòts e' tka, etä Skèköl tò ittekölpa bøl duolur, e'pa shke'wékane taṭa ie'pa e' duéka. Wépa tò e' sué, e'pa kòs suane iyöki tajè. <sup>12</sup> E' ukuökǐ ta ttò darèrè datse ká jai a, e' tse ittekölpa tò, e' tò iché: "¡a! shkóka íe!" Etä ie'pa mika ká jai a mò shua, e' sué ibolòkpa tò. <sup>13</sup> E' wöshá ta í tka darèrèè, e' tò Jerusalén mú blatèsò döká dabop ta e' et tsjini chöraè í ulà a. Iwakpa duolur döká mil kuryök (7.000). Imalepa aṭe tse'ka, e'pa kòs suanerak tajè. Ie'pa tò Skèköl tso' ká jai a, e' kíkèka.

<sup>14</sup> Es i suluè ská tka, i' ta ide bötökicha. Í suluè ská datseia bet, e' ta ide mañatökicha.

*Duk blane, i' ta ide kuktökicha*

<sup>15</sup> Etä Skèköl biyöchökwak bata tò iduk bla'wé, i' ta ide kuktökicha. Etä s'ttò tse'ne tajè darèrèè ká jai a, e'pa tò iché:

"T ta ká ulitane wakpa ena iwökirpa, e'pa de Skèköl ena wé pairine'bitü idi' wa s'blúie, e'pa ulà a. Ie'pa tò s'wèttse michoè blu'ie."

<sup>16</sup> E' ukuökǐ ta kèkèpa döká dabom böyök kǐ tkèl (24) tulur ikula' kǐ Skèköl ska', e'pa e' télur wöwakot Skèköl wörkǐ idalíoiök. <sup>17</sup> Ie'pa tò iché:

"A sa' Kèköl, be' diché ta' tajè íyi ulitane tsata.

Be' tso'tke tsawe ta, be' tso' j'ñe ta, ñies be' tso' aishkuò ta kekraè.

Be' e' tkéka ká ulitane wakpa blúie be' diché tajè wa, e' kueḷǐ sa' tò icheke wèstela be' a.

<sup>18</sup> Ká ulitane wakpa wépa dör be' bolòkpa, esepa we'ikeketke be' tò kèsik wa, e' kéwö de i' ta.

E' kueḷǐ ie'pa ulune tajè be' kǐ. S'duulewa kòs e' shulírke, e' kéwö detke.

Ñies be' kanè mēsopa ena be' ttekölpa ena s'batse'r malepa tò be' dalíoièke, pè' dalíoiertá esepa ena pè' èsepa, e'pa kòs a iskè meketke be' tò, e' kéwö de. Wépa tò s'ditsò ewéwa ká i' kǐ, esepa ewekewa be' tò, e' kéwö detke."

<sup>19</sup> Etä Skèköl wé tso' ká jai a, e' wékkò bunane, e' shua Skèköl tò ittè me' se' a, e' kélkuò suéyo. Etä alá wöñane blane tajè, e' tse'yo. Í tka darèrèè, ñies mò wösi se'seè blubluè, e' dane tajè kalíie.

**12**

*Alaköl eköl ena bè dör kètali kèkölíe e'*

<sup>1</sup> E' ukuökǐ ta ilè tajè suéyo ká jai a ilè wà kkachioe. E' dör alaköl eköl parratulewà



diwō wā. Si'wō tso' ie' klō dikīā. Iwōkir kī ì tkērka wēs blu' wōkir kī itkēka es, e' yōle bēkwō dōkā dabom eyōk kī bōt (12) e' wa. <sup>2</sup> Alakōl batsōketkēr buklū, e' kīrinemitke, e' tō ie' kōchōweke tajē.

<sup>3</sup> E' ukuōkī tā ye' tō ilē skā suē kā jai ā ilē wā kkachōie. E' dōr iwiwak sulusi aknamaie blublūē, e' dōr kēтали kēkōl wāk batsē e'. Iwōkir dōkā kul, e' kī idula' tururka dōkā dabop. Nies iwōkir kōs kī itulurka wēs blu' wōkir kī itkēr es. <sup>4</sup> Bēkwō kōs mū blatēsō mañat tsjini tā e' et tsjini kalēttsaitō dō kā i' kī ikirē wa. Ie' e' duēka alakōl alā kurketke, e' wōshāē ipanuk ilā kurketke e' katowaje. <sup>5</sup> Alakōl alā kune wēm, e' suletēnebak kā ulitane wakpa wēttsuk iblūie. Ie' tō ie'pa wēttsēraē yēsēsē idichē tajē wa. Erē alā e' yēnettsā imi ulā ā, minetsēr wē Skēkōl tkēr ikulē kī ee. <sup>6</sup> Alakōl e' tkashkar kēтали kēkōl yōkī tā imīā kā sir poē wē kē yi serku' tajē ese ska'. Eē Skēkōl tō kā me'baktke ie' ā. Eē ie'pa tō alakōl se'weke kā dōka mil eyōk kī cien bōyōk kī dabom teryōk ekkē (1260).

<sup>7</sup> E' ukuōkī tā ie'pa ñippēmi tajē kā jai ā. Skēkōl biyōchōkwak kibi kiē Miguel, e' ena imalepa, e'pa ñippē tajē kēтали kēkōl tā. Kēтали kēkōl ena iklēpa, e'pa ñippē tajē ñies, <sup>8</sup> erē Miguel e' alēkā ie'pa kī. E' kuekī kēтали kēkōl ena iklēpa, e'pa kē ā kawō mēne senukīā kā jai ā. <sup>9</sup> Es kēтали kēkōl bērie uyēttsarakitō kā jai ā dōttsā kā i' kī iklēpa kōs etā. Kēтали kēkōl e' dōr tkabē bak kā iaiāē kiē Bē ena Satanās e'. Ie' dōr kā ulitane wakpa kitō'ukwak ās ie'pa tō i' sulu wamblō.

<sup>10</sup> E' ukuōkī tā ttō darērēē ttséyō kā jai ā tō ichē:

“Bata ekkē tā Skēkōl tō se' tsātkeē, ie' e' tkēkatke ì ulitane blūie dichē tā' tajē. Wē pairi'bitū ie' tō idi' wa s'blūie e' detke kā ulitane wakpa wōkirie. Satanās bak s'yamipa kkatōk ñiē nañēē Skēkōl ā,

erē bata ekkē tā ie' uyēttsaitō.

<sup>11</sup> Obeja Pupula kōtēwā, e' pē tēne se' skēie, ie' mik s'yamipa erblē, e' ttē buaē pakē ie'pa tō, e' kuekī ie'pa e' alēkā Satanās kī.

Ie'pa kē tkine ttē buaē e' dalērmik ittēwā e' kī. <sup>12</sup> jA Skēkōl biyōchōkwakpa serke kā jai, a' tstsē'nū buaē!

Erē jwēstela ina wēpa tso' kā i' kī ena dayē kī esepa tā!

Bē wā ijcher tō ie' kēwō dōkewātke tsjinet, e' kuekī ie' ulune tajē, ie' dē'ttsā a' wē'ikōk.”

<sup>13</sup> Mik kēтали kēkōl tō isuē tō ie' uyanettsā dōttsā kā i' kī, etā ie' tō alakōl alā kune', e' tōtiēmi. <sup>14</sup> Erē alakōl ā pū pik mēne ās iur kāmīē kēтали kēkōl yōkī ie' kā tso' kā sir poē wē kē yi serku' ee. Eē ie'pa tō ie' se'wēraē dō duas mañal kī shābōts. <sup>15</sup> Etā kēтали kēkōl

tō di' tuē ikkō ā tajē ās e' tō alakōl katōmi. <sup>16</sup> Erē iyōk tō alakōl kimē. Iyōk tskine ta di' tuē kēтали kēkōl tō ikkō ā, e' yēwa iyōk tō. <sup>17</sup> E' tō kēтали kēkōl uluwēka tajē alakōl kī. E' kuekī ie' mīā ñippōk alakōl e' aleripa datse ie' itōkī e'pa tā. Ie'pa dōr wēpa tō Skēkōl ttē dalōiēno, e' iuteke buaē e'pa. Nies ie'pa e' tkēwā darērēē kēkraē Jesús ttē mokī e' ā kē olo'yeta'. <sup>18</sup> Etā kēтали kēkōl demi e' duēka dayē kōkō mik.

## 13

*Iyiwak sulusi aknamaie e' deka dayē ā*

<sup>1</sup> Etā ye' tō isuē tō iwiwak sulusi aknamaie deka etō dayē ā, e' wōkir dōka kul, idula' tururka dabop. Idula' kōs kī itulurka wēs itkēr blu' wōkir kī es. Ie' wōkir bik ekkē kī kiē kitule et et, e' kōs tō Skēkōl cheke suluē.

<sup>2</sup> Iyiwak sulusi suē ye' tō, e' dōr wēs namu es, iklō dōr wēs sini'urri bērie klō es, ikkō dōr wēs ma'name kōk es. Iyiwak sulusi e' ā kēтали kēkōl tō idichē ena kawō mē s'blūie s'wēttsōie. <sup>3</sup> Iyiwak sulusi e' wōkir dōka kul, iwōkir ek shka'ule tajē wēsua ittēwamitō ekkē. Erē e' buanene bet. E' tō kā ulitane wakpa tkiwēwā tajē. E' kuekī ie'pa tō ie' klō'wē iblūie. <sup>4</sup> Kēтали kēkōl tō idichē me'baktke iyiwak sulusi dē'kā dayē ā e' ā, e' kuekī ie'pa tō idalōiē ikēkōlie. Nies ie'pa tō iyiwak sulusi e' dalōiē. Ie'pa tō ichē: “Kē yi dōr wēs ie' es. Kē yi e' alōpakā ie' kī.”

<sup>5</sup> Iyiwak sulusi dē'kā dayē ā e' ā kawō mēne e' tssōkka tajē, Skēkōl chōk suluē. Nies kawō mēne ie' ā blu'ie s'wēttsuk si' dōka dabom tkēyōk kī bōt ekkē (42). <sup>6</sup> Etā es ie' tō iwā wamblē. Ie' tō Skēkōl ena Skēkōl kiē e' chē suluē. Nies ie' tō Skēkōl wē ena wēpa serke kā jai ā, e' kōs chē suluē. <sup>7</sup> Nies kawō mēne ie' ā ñippōk s'batse'rpa tso' kā i' kī e'pa tā e' alōkka ie'pa kī. Kawō mēne ie' ā blu'ie kā ulitane wakpa, s'ttō kuā'kī kuā'kī, ditsōwō kuā'kī kuā'kī, e'pa kōs wēttsuk. <sup>8</sup> Wēpa dōr Obeja Pupula kōtulewā se' skēie, e' icha, esepa kiē tso' kitule iyēkkuō kī kuaē, mik Skēkōl tō kā i' yō' e' yōkī. Yēkkuō e' dōr sene michōē e' yēkkuō. Wēpa kiē tso' kitule yēkkuō e' kī, esepa kē wā iyiwak suluē e' dalōiēne'. Erē kā ulitane wakpa malepa, wēpa kiē kē ku' kitule sene michōē yēkkuō kī, esepa kōs tō iyiwak sulusi dē'kā dayē ā e' dalōiē ikēkōlie.

<sup>9</sup> Ì cheke ye' tō, e' tssō a' ulitane tō:

<sup>10</sup> “Wēpa suletē'bak Skēkōl tō klō'wēwā, esepa tserdami klōulewā.

Wēpa suletē'bak Skēkōl tō duōkwā tabē kōkō ā, esepa tterawā tabē wa.”

E' wa s'batse'rpa e' tkōwā darērē ena ierblō ie' mik e' wērdaē.

*Iyiwak Sulusi aknamaie deka etö iyök a*

<sup>11</sup> E' ukuöki tä ye' tö iyiwak sulusi aknamaie skà sué etö, e' deka iyök a. Idula' dör bötö wes obeja wè'ñe dula' es, ittö wes kètali kèköl ttö es. <sup>12</sup> Ie' wà kawö tso' i kòs wöje wes iyiwak sulusi dè'ka dayè a' e' wà itso' es. Ie' kanèblöke iyiwak sulusi dè'ka dayè e' a. Ie' kanè dör ká ulitane wakpa kòk iyiwak sulusi dè'ka dayè a shka'ule tajè iwökir kji wësua ittèwamiitö, e' dalöiök. <sup>13</sup> Ì kè or yi a, ese wéitö tajè dökà b' kiéitö ká jai a, e' ta ibiteshka tajè döttsa ká i' kji sulitane wörki. <sup>14</sup> Ì kè or yi a, ese wé tajè ie' tö iyiwak sulusi dè'ka dayè a e' wörki. E' wa ie' tö ká ulitane wakpa kè dör Skèköl icha, esepa kòs kítö'wé tajè. Ie' tö ie'pa a iché: "Iyiwak sulusi dè'ka dayè a e' shka'ule tajè iwökir kji tabè wa erè ishkenekane e' diököl yuö iwák sué idalöioe." <sup>15</sup> Iyiwak sulusi dè'ka iyök a e' a kawö mène siwá' muk iyiwak dè'ka dayè a e' diököl yöne e' a as ittöká, ñies as tö wépa kè tö idalöie, esepa ttökwa patkö. <sup>16</sup> Ñies iyiwak sulusi dè'ka iyök a, e' tö ká ulitane wakpa kè e' muk wakyuè iulá bua'kka kji ö iwötsá kji. Pè' èsepa ena pé' dalöier'ta', pé' siarèpa ena pé' inuköl blúpa, pé' klöulewá kanè mésoie ena pé' kè dör es, e'pa kòs kawötá e' muk wakyuè. <sup>17</sup> Wépa wakyöule es, esepa è a kawö mène iyi taúk ena iyi wataúk. Ie'pa kòs wakyöule iyiwak sulusi dè'ka dayè a e' kiè wa ö kiè e' número wa.

<sup>18</sup> A' kawötá iwá bikeitsökwa buaè as a' éna iar tö i kiane yènu. Wépa didir ena ká ane buaè, esepa éna iwá armi buaè. Iyiwak sulusi dè'ka dayè a e' número dör s'ditsó eköl e' número, e' dör cien teryök kji dabom teryök kji teröl (666).

**14**

*Obeja Pupula ena wépa tsatkène esepa*

<sup>1</sup> E' ukuöki tä ye' tö Obeja Pupula sué tö idur kabata kiè Sion e' wöbata kji. Ie' ta pé' tso' tajè döká 144.000 ekkè. Ie'pa kòs wötsá kji Obeja Pupula ena iyé, e'pa kiè tso' kitule. <sup>2</sup> E' ukuöki tä ye' tö ittse tö i' blarke tajè ká jai a, e' blar wés di' blar tajè ákttó mik es, wés alá blar tajè es, e' dör wés s'blar tajè ma'ma kiè arpa wa es. <sup>3</sup> Pè' tso' tajè döká 144.000, e'pa ièter Skèköl kulé wösháè ñies itso' t'ssè'ka döká tkèl ena kèkèpa döká dabom böyök kji tkèl (24), e'pa wösháè ie'pa ièter. Ie'pa tso' t'ssók t'ssè pa'alj wa. Ká ulitane wakpa shüa e'pa è tsatkène, e' kuèkji kè yi skà a e' yönuk t'ssè e' wa. <sup>4</sup> Ie'pa dör yèsyésè, kè e' iaquleká trè wa yès. Ie'pa michoè Obeja Pupula itöki wé imi'ke ee. Ie'pa tsatkène, ie'pa dör wés iyi tsá mène Skèköl a ena Obeja Pupula a es. <sup>5</sup> Ie'pa kè kayèule yès. Ie'pa kè kji i' sulu ta' Skèköl wöa.

*Skèköl biyöchökwakpa döká teröl*

<sup>6</sup> E' ukuöki tä ye' tö Skèköl biyöchökwak skà sué eköl urkear kashük a. E' wà Skèköl ttè buaè yöbiè e' dami wà pakè ká ulitane wakpa a, s'ditsöwö ulitane a ena s'ttö kuá'kji kuá'kji ulitane a. <sup>7</sup> Ie' tö iché aneule: "Skèköl tö sulitane shuleketke, e' kéwö detke. E' kuèkji Skèköl dalöiö, ie' kíkòka. Kashük ena ká i' ena dayè ena di' ulitane, e' kòs yö'itö, e' kuèkji idalöiö sulitane tö."

<sup>8</sup> Eta Skèköl biyöchökwak skà debitu idè'bitü kewe, e' itöki, e' tö iché: "Ká kibi tajè bua'iewá kiè Babilonia, e' enewa seraa, sulunewá. Babilonia wakpa tö ká malepa wakpa erküiwé i' sulu wamlök ie'pa ta wés s'ttèka blo' wa senokká itá es. E' kuèkji ká e' wakpa enewa."

<sup>9</sup> Eta Skèköl biyöchökwak skà debitu itöki, e' tö iché: "Wépa tö iyiwak sulusi dè'ka dayè a e' ena idiököl dalöie ta ie' mérak wakyuè iwötsá kji ö iulá kkue kji, <sup>10</sup> esepa we'ikeraè Skèköl tö. Ie' kèsik tajè e' ardaè seraa ie'pa kji. E' dör wés ie' tö ie'pa kè i' bacha'bachaè e' yökwa seraa es. Ie' tö ie'pa we'ikeraè tajè kekraè b' wönarke azufre ta e' wa ibiyöchökwakpa batse'r e'pa wörki ena Obeja Pupula wörki. <sup>11</sup> Wépa tö iyiwak sulusi dè'ka dayè a e' dalöie, ñies idiököl dalöierakitö, e'pa e' me' wakyuè iyiwak sulusi e' kiè wa, esepa weirke b' kè a, e' shklè batrö michoè kè iwöittá'wá ñie nañeè."

<sup>12</sup> S'batse'rapa tö ie' ttè dalöieno, e' iuté buaè, ñies ie'pa tkèulewá darèrèè Jesús mik. E' wa ie'pa diché wèrdaè.

<sup>13</sup> E' ukuöki tä ye' tö ttö datse ká jai a e' t'ssè. E' tö ye' a iché: "I'ñe ta ena aishkuö ta wépa erblè' Jesús mik ta idurulune es, ayècha buaè esepa." Ñies Skèköl Wiköl tö iché: "E' dör mokji, ie'pa kanèblè' darèrèè Skèköl a ká i' kji, e'pa enuraè aishkuö ta. Ì buaè kòs o' ie'pa tö, e' ské doraè ie'pa ulá a."

<sup>14</sup> E' ukuöki tä ye' tö mò saruru sué, mò saruru e' kji yi tkèr eköl wèr tö ie' dör S'ditsó Alá. Ie' wökir kji itkèuleká i' tkekeká blu' wökir kji yöule orochka wa ese. Tabè ká di'diè tso' iyiwö toie, ese a'tser ie' wa. <sup>15</sup> Eta Skèköl biyöchökwak eköl e' yéttsa Skèköl wé tso' ká jai a e' a, eta iché aneule yi tkèr mò bata kji e' a: "Ká ulitane wakpa dör wés iyiwö es, e' kéwö detke wösh'tè wés iyi wösh'tésö es. E' kuèkji e'pa wösh'tö be' tabè wa." <sup>16</sup> Eta yi tkèr mò bata kji, e' tö itabè waté ká i' kji, eta iwá wösh'téitö.

<sup>17</sup> E' ukuöki tä Skèköl biyöchökwak skà e' yéttsa Skèköl wé tso' ká jai a e' a. Ie' wà tabè ká di'diè a'tser. <sup>18</sup> E' ukuöki tä Skèköl biyöchökwak skà tso' e' dör ká' tso' iyi moká Skèköl a e' b' kanékwak. Ie' dettsa ta ichéitö aneule wé wá tabè dami e' a: "Uvawö kòs tso' ká diá a e' detke wösh'tè, e' kuèkji uvawöli kicha tö tabè wa." <sup>19</sup> Eta Skèköl biyöchökwak, e' tö uvawöli kòs

kicha të ta iékaitò ákuk a wé iwóli ñateke idiò yottsaié e' a. Ákuk e' wà kiane chè tò Skèkòl tò ibolòkpa we'ikeraè ikèsik wa wes uvawò ñatèsò es. <sup>20</sup> Ákuk e' tso' Jerusalén bānet, e' a iwòshhtë Skèkòl biyòchòkwak tò e' iène. Mik ñinatène, eta s'pè tène tajè wër wës di' tajè suèsò es. Ibatšj dör kilòmetro dòka cien mañayòk (300) ekkè, ishólò dör metro et kš şhābòts.

**15**

*Ì sulu bata datse*

<sup>1</sup> E' ukuòkì tã ye' tò ì skà sué ká jai a ilè wà kkachoié, e' tò ye' tkiwéwã. E' dör Skèkòl biyòchòkwakpa dòka kul, e'pa wã ì sulu bata datse dòka kul ká i' wakpa kì, e' dami. Mik ì sulu ikkèpa tka, eta Skèkòl kèsik tajè e' wòklòne.

<sup>2</sup> Nies ye' tò isué tò ì me'r bèrie dayè sué, e' wër wòsuòchka sué sarèrèè şhutuule bö' wòrkua wa. Nies wépa e' ali'kábak iyiwak sulusi dè'kã dayè a e' kì ena idiòkòl kì, esepa suéyò. Ie'pa kè e' menettsã wakyuè iyiwak sulusi kiè e' número wa. Ie'pa ièter dayè e' kkòmik. Ma'ma blartã' kiè arpa me' Skèkòl tò ie'pa a, e' a'tser ie'pa wa. <sup>3</sup> Skèkòl kanè méso kiè Moisés e' ttsè, ñies Obeja Pupula ttsè, e' tseittseke ie'pa tò, e' tò ichè i' es:

“A Skèkòl, be' diché tã' tajè iyi ulitane tsatã. Ì kòs wé be' tò, e' dör tajè buaè, e' tò sa' tkiwéwã.

Be' è dör ká ulitane wakpa blú.

Be' dör yèsyèsè, be' ttò etkè.

<sup>4</sup> A Skèkòl, sulitane tò be' dalòieraè.

Sulitane tò be' kikerakã.

Be' è dör batse'r.

Sulitane wã ijcher tò be' tò s'shùleke yèsyèsè,

e' kuekì ká ulitane wakpa döraè be' ska' be' dalòioèk.”

<sup>5</sup> E' ukuòkì tã Skèkòl wé tso' ká jai a, e' úshu dalòieràtã' tajè şhute, e' suéaryò áie, e' şhũã ttè me'bak Skèkòl tò se' a e' tso' blèule.

<sup>6</sup> Skèkòl biyòchòkwakpa dòka kul wã ì sulu datse ká i' kì e' damirak iwã iulã a, e'pa dettsã Skèkòl wé e' a. Ie'pa datsi' yòule datsi' kiè lino ese wa e' dör saruruè wõnarke dalalã, ikiparuo àriwã icho' mik, e' dör oro.

<sup>7</sup> Ì tso' ttsè'ka dòka tkèl, e' ekòl tò tka' yòule orochka wa, e' me' Skèkòl biyòchòkwakpa kul a ekòl ekòl. Tka' e' a Skèkòl ser michoè e' kèsik iène chiè. <sup>8</sup> Eta Skèkòl wé e' wã iènekã Skèkòl olo tajè ena idiché tajè e' shkìe wa. Kè yi dòpawã Skèkòl wé e' a dò mik, ì sulu dami Skèkòl biyòchòkwakpa kul wa, e' wã tka eta.

**16**

<sup>1</sup> Ye' tò yile ttò ttsè darèrèè Skèkòl wé a, e' tò ichè Skèkòl biyòchòkwakpa kul a: “iA' yú tã

a' tka' wã iène Skèkòl kèsik wa, e' wã tkòttšã ká diã kì!”

*Tka' wã iène Skèkòl kèsik wa dòka kul*

<sup>2</sup> Skèkòl biyòchòkwak tsã, e' tò itka' wã tkéttsã ká i' kì, eta wépa wakyòule iyiwak sulusi dè'kã dayè a e' kiè wa ñies idiòkòl dalòieràkitò, esepa kòs kì s'méwò sulusi tskine dalèr tajè.

<sup>3</sup> E' ukuòkì tã Skèkòl biyòchòkwak skà tò itka' wã tkéttsã dayè kì. Eta dayè miã péie wës wëm kòtulewã pé es. Iyiwak kòs tso' dayè a duolur yès.

<sup>4</sup> E' ukuòkì tã Skèkòl biyòchòkwak skà tò itka' wã tkéttsã di' kòs kì. Eta di' kòs miã péie. <sup>5</sup> E' ukuòkì tã ye' tò ittsé tò Skèkòl biyòchòkwak dör di' kkò'nukwak, e' tò ichè:

“A Skèkòl, be' dör batse'r,

be' tso'tke tsawé ta, i' ñe ta ena kekraè.

Kekraè be' tò s'shùleke yèsyèsè,

e' kuekì e' dör buaè tò be' tso' ie'pa we'ikòk es.

<sup>6</sup> Ie'pa tò s'batse'rpa ena be' ttekòlpa,

e'pa kòtulur pé tène tajè, e' kuekì e' dör buaè tò be' tò ie'pa we'ikè es.

Ì ñe tã be' tò ie'pa ské kéne pé yòk.

Es ie'pa kì inuí ské dene.”

<sup>7</sup> E' ukuòkì tã kã' tso' iyi mokã Skèkòl a eé ttò ttsyè se' ttòie e' tò ichè: “A Skèkòl, be' diché tã' tajè iyi ulitane tsatã, ayècha e' dör mokìe, be' tò ie'pa nuj şhulè mokìe yèsyèsè.”

<sup>8</sup> E' ukuòkì tã Skèkòl biyòchòkwak skà tò itka' wã tkéttsã, e' ane diwò kì. Eta diwò a kawò mène s'ditsò ña'ukwa iba tajè e' wa.

<sup>9</sup> Diba e' tò sulitane pa shayo'wéttsã tajè. Ì sulu ikkè kòs patké Skèkòl tò ie'pa kì, erè ie'pa kè éna ì sulu wambleke ie'pa tò ese olo'yak, ie'pa kè er mane'wak ie' a. Ie'pa kè éna ie' kikakka. E' skéie ie'pa tò ie' ché suluè.

<sup>10</sup> E' ukuòkì tã Skèkòl biyòchòkwak skà tò itka' wã tkéttsã, e' ane wé iyiwak sulusi dè'kã dayè a e' tkerka' e' kì. Eta ie' ká kòs tssenewã wës stui es. Ká ulitane wakpa tò iku' kueke ipã dalèr tajè e' è kuekì. <sup>11</sup> Erè ì sulu wambleke ie'pa tò, ese kè olo'yè ie'pa tò. Ie'pa pa dalèr tajè ñies ie'pa tteke smewò sulusi tò, e' kuekì ie'pa tò Skèkòl tso' ká jai a e' ché suluè.

<sup>12</sup> Skèkòl biyòchòkwak skà tò itka' wã tkéttsã, e' ane di' tajè kiè Éufrates e' a. Eta di' tajè e' sinewã as blu'pa datse diwò tskirke e' wa, esepa tkòmi buaè ñinppòkwakpa tã.

<sup>13</sup> E' ukuòkì tã ye' tò wimblupa sulusi sué bukuè'ie mañat. Et dettsã kètalì kèkòl e' kkò a. Et dettsã iyiwak sulusi dè'kã dayè a e' kkò a. Ibata èt dettsã iyiwak sulusi e' ttekòl kkò a. <sup>14</sup> Bukuè' e'pa dör aknamapa. Ì kè or yi a, ese ormi ie'pa a. Ie'pa mi'ke blu'pa tso' ká wa'ñe, e'pa dapa'uk ñinppòk Skèkòl diché

ta' tajë iyi ulitane tsata, e' ta, mik ikëwö de sulitane shulök eta.

<sup>15</sup> Skëkëpa Jesucristo tö iché i' es: "Ye' ttö ttsö. Mik ye' datsene, eta ye' datse kë e' biyö yëule wes akblökwak döwa es. Wépa tso' er'kij ye' panuk, idatsi' tso'tke buaë iënoie, ayëcha buaë esepa. Es ie'pa kë shkôpa sume sulitane wörki ta' ijaërkarak."

<sup>16</sup> Eta aknamapa mañal, e'pa tö blu'pa dapa wëka kä kië hebreoie Armagedón eë.

<sup>17</sup> Eta Skëköl biyöchökwak bata tö itka' wä tkëttsa, e' ane kashuk a. Eta se' ttöie darërëë ttsé ye' tö datse blu' kulé tso' Skëköl wé a' ska', e' tö iché aneule: "ÿye' tö iwakanewëtke!" <sup>18</sup> Eta alä wöñane tajë iblane tajë. Í tka darërëë, e' tö ká wötí'wé tajë kos í bakule ká i' kú e' tsata. <sup>19</sup> Ká wa'ñe wé s'ditsö serke, e' ké kos enewa. Ká kibi tajë bua'iewa kië Babilonia, e' tskinewa atë mañat tsiní. Es Babilonia kú Skëköl kësik suluë blé, i sulu wamblekerakitö ese nuí kuëki. E' dör wes Skëköl tö ie'pa ké i' bacha'bachaë yökwa seraa es. <sup>20</sup> Dayë nane kos, kabata kos, e' cholur. <sup>21</sup> Nies mò wöli wösi sësëë, e' wösi es tköká dabom tkëyök (40) kilo tsata, ese dane tajë s'ditsö kú wes kalj yer es. E' tö s'ditsö we'iké tajë e' kuëki ie'pa uluneka Skëköl kú ta' ie' ché suluë.

**17**

*Alaköl trër tajë e' weirdäë*

<sup>1</sup> Skëköl biyöchökwakpa döka kul wä tka' tso', e' eköl de ye' ska' ta' ye' a' ichéitö: "Be' shkö ye' ta, süyö be' a' ikkachë wes Skëköl tö alaköl trër tajë kkeauleka tajë, e' we'iké. Alaköl e' tkërka di' tso' tajë e' bata kú. <sup>2</sup> Kä ulitane blúpa e' mettsa trënuik ie' ta. Nies ká ulitane wakpa e' mettsa i sulu wamblok wes ie' es kë wöklörta' wes s'tteke blo' tö es."

<sup>3</sup> E' ukuökí ta' Skëköl Wiköl de tajë ye' kú ta' Skëköl biyöchökwak wä ye' mütser ká sir poë wé kë yi serku' tajë ese ska'. Eta eë ye' tö alaköl sué eköl tkërka' iyyiwak sulusi dë'ka dayë a wák batsé e' kú. Iyyiwak sulusi e' pa kos kú kië tso' kitule tajë kua'kú kua'kú. Kië e' wä kos tö Skëköl cheke suluë. Iwökir döka kul, idula' döka dabop. <sup>4</sup> Alaköl e' paiëule buaë idatsi' dör siësiël ena batsé. Ikitkëule buaë tajë oro wa ena ák bua'buwa ena ákwöla bua'buwa kië perla ese wa. Tka' yöule oro wa, e' a'tser iwä wä iëule chië blo' wa. Blo' e' tö i' kos wër suluë Skëköl wa ena alaköl e' ia'wëka trë wa e' chë. <sup>5</sup> Ie' wötsa kú tte tso' kitule. Tte e' wä blëulewä se' yöki, e' tö iché: "Ye' dör ká kibi tajë kië Babilonia. Ye' dör alakölpa trër suluë esepa kos mi. Nies ye' dör i kos tso' ká i' kú wër suluë Skëköl wa ese mi." <sup>6</sup> Eta ye' tö isuë tö alaköl tteke blo' tö. Blo' e' dör s'batsé rpa kótulur ie'pa tö Jesús tté kuëki, e'pa pë. E' tö alaköl e' tteke blo'ie. Mik ye' tö ie' sué eta ye' tkinewa' tajë. <sup>7</sup> Eta

Skëköl biyöchökwak tö ye' a' ichaké: "ÿ kuëki be' tkinewa? Alaköl e' ena iyyiwak sulusi wökir döka kul, idula' döka dabop, e' kú alaköl tkërka, e' wä pakeke ye' tö be' a. <sup>8</sup> Iyyiwak sulusi sué be' tö, e' bak senuk ká iaiäë, e' kë ku'ia' i'ñe ta, erë ie' döraka kauk tajë iskië, kë s'wö dë'mi ekkë, e' a. E' ukuökí ta' Skëköl tö ie' we'ikök patkeraë kekraë. Wépa kië kë ku' kitule kuaë sene michoë yëkuö kú kam Skëköl tö ká i' yuö e' yöki, esepa kos tkirdawarak mik ie'pa tö iyyiwak sulusi dë'ka dayë a e' sué eta. Iyyiwak sulusi e' bak senuk, e' kë ku'ia' i'ñe ta, erë ie' dörane.

<sup>9</sup> "Wépa didir ena ká ane buaë, esepa éna i cheke ye' tö a' a' e' wä armi buaë. Iyyiwak sulusi e' wökir döka kul, e' wä kiane chë kabata döka kul, e' kú alaköl sulusi tkërka. Nies e' wä kiane chë blu'pa döka kul. <sup>10</sup> E' skël blërulunebak, e' eköl tso' blu'ie, blu' bata doia itökí erë e' kë kaneblöpa ká tajë blu'ie. <sup>11</sup> Iyyiwak sulusi bak senuk ká iaiäë, e' kë ku'ia' i'ñe ta, mikie' dene blu'ie, eta iäë päköl, ie' dör blu' bak kul e' eköl nies. Erë ie' dene blu'ie weinuk ë.

<sup>12</sup> "Idula' döka dabop sué be' tö, e' wä kiane chë tö blu'pa döka dabop e'pa doia. Ie'pa a kawö merdaë s'wëttsöie iyyiwak sulusi e' ta ekuölö ëme. <sup>13</sup> Blu'pa döka dabop, e'pa er mé ñikkëë iwakpa bil ekkë, kawö ena diché tso' ie'pa wä s'wëttsöie, e' muk iyyiwak sulusi e' a. <sup>14</sup> Ie'pa ñippöraë Obeja Pupula ta, erë e' e' alöraka ie'pa kú. Ie' dör skëkölpa ulitane e' kéköl, nies ie' dör blu'pa ulitane e' blü, e' kuëki ie' e' alöraka ie'pa kú. Wépa tso' ie' ta, e'pa klöo' bak Skëköl tö, nies ie'pa shukitbakitö. Ie'pa dör Obeja Pupula ttökatapa e' tkökewä darërëë ie' a ese."

<sup>15</sup> Nies Skëköl biyöchökwak tö ye' a' iché: "Di' tso' tajë sué be' tö, e' bata kú alaköl trër tajë, e' tkërka, e' wä kiane chë, ká tso' tajë e' wakpa s'tso' tajë ttö kua'kú kua'kú e'." <sup>16</sup> Idula' döka dabop ena iyyiwak sulusi, e'pa tö alaköl trër tajë e' sugraë suluë. Í kos tso' ie' wä, e' yerattsarakitö iulä a, imeraarakitö sume. Ie'pa tö ie' chka' katerawa eta ikuö atë e' ña'werawa ie'pa tö. <sup>17</sup> Skëköl wák tö blu'pa dabop er méwä ñikkëë as ie'pa wä kawö tso' s'wëttsöie, e' müitörak iyyiwak sulusi e' a. Es ie'pa tö iweräë dö mik iwä tka wes Skëköl tö iyë'at es. <sup>18</sup> Alaköl trër tajë sué be' tö, e' wä dör ká kibi tajë. Ká e' wakpa e' aléka ká malë blúpa kú."

**18**

*Babilonia wakpa enewa ta iké sulunewa*

<sup>1</sup> E' ukuökí ta' ye' tö Skëköl biyöchökwak skä sué eköl datse ká jai a, e' diché ta' tajë. Ilo tajë, e' buneka ká i' kos kú. <sup>2</sup> Ie' tö iché aneule:

"¡Babilonia wakpa enewa ta iké sulunewa!

Ká e' sulunewá míane aknamapa kéie.  
Eë wimblupa sulusi tsákië e' dapa'wéka senuk.

E' dör iyiwak sulusi dör ñá ena dù dör ñá, ese wé.

<sup>3</sup> Ká ulitane wakpa erkiöwéka Babilonia wakpa tö

trénuk wës s'tteke blo' tö es.

Ká ulitane blúpa senéka ie' ta.

Ì sulu qos tuëke ie' tö ì sulu wambloie,  
e' tö dali wataukwakpa ulitane blu'wéka tajë."

<sup>4</sup> Ttö skà ttsé ye' tö datse ká jai a, e' tö iché:  
"Wépa dör ye' icha, e'pa qos e' yólur Babilonia

as a' kè tö ì sulu wamblërke eë e' wamblöñak.  
Ñies a' e' yólur as ì sulu datse ie'pa kú e' kè dö a' kú.

<sup>5</sup> Ì sulu wamblé ie'pa tö, e' dör tajë shüte,  
e' mú dapa'wësö, e' ma ideka ká jai a.

Ì sulu wamblé ie'pa tö, e' jcher buaë Skéköl wa.

<sup>6</sup> Etá ttö ttsé ye' tö e' iché inamépa a:

Ì sulu wamblé ie'pa tö pé' malepa kú,  
e' nuí ské patkóne ie'pa kú tajë dö bötökicha.

Ì sulu wamblé ie'pa tö pé' malepa kú,  
e' dör wës ie'pa tö pé' malepa ké ì bacha'bachaë yök es.

E' kueki ibaché döká bötökicha,

e' ské yökwa ie'pa kó inuíe.

<sup>7</sup> Ie'pa e' kkeöká tajë, ie'pa wá iyi bua'buatso' tajë shüte,

ekkë ie'pa we'ikó tajë shüte.

Ie'pa e' bikeitsö:

"Se' tso' buaë wës alaköl dör blu' es,  
se' kè dör wës schö es weir siarë."

<sup>8</sup> Ie'pa e' bikeitsö es, e' kueki ì suluë döraë ie'pa kú bet.

Ie'pa teraë bli tö, ie'pa weirdaë siarë,

ie'pa duöralur, ie'pa ñardawa bö' a.

Skéköl diché ta' tajë iyi ulitane tsata,  
e' wa ie' tö ie'pa wöme'ttsabak weinuk."

<sup>9</sup> Ì sulu wambleke Babilonia wakpa tö,  
ese wamblë'ñak ká blúpa tö ie'pa ta. Ñies iyi bua'buatso' tajë Babilonia, e' tö ie'pa ttsé'wé buaë. Mik ie'pa tö Babilonia ñarkewa e' shkë sué, etá ie'pa eriardaë tajë, iuraë siarë. <sup>10</sup> Ie'pa suardaë dö' ì sulu e' dö ie'pa kú ñies. E' kueki ie'pa e' tsuraarak kamië ikú sauk ta icherakitö:

"iWéstela ina Babilonia wakpa ta!

Ie'pa dör pé' tajë. Ie'pa ká dör tajë buaë.

Ì sulu wamblé ie'pa tö e' nuí de ie'pa kú bet,  
ekuölöie ie'pa enewa, ie'pa ká sulunewá!"

<sup>11</sup> Dali wataukwakpa tso' ká i' kú e'pa eriardarak siarë iurarak tajë, kè yi ku'ia

Babilonia ie'pa dali taúk e' kueki. <sup>12</sup> Dali watuëke ie'pa tö e' dör orochka, inukölchka, ák bua'buatso' bua'buatso' kië perla, datsi' bua'buatso' kië lino ena seda, ñies datsi' bua'buatso' wöaule siëlsiel ena batsë; ñies kal ulitane alar jamamaë; ñies iyi ulitane bua'buatso' yöule marfil\*, ena kaltak bua'buatso' wa, ena tabechka kië hierro e' wa ena tabechka kië bronce e' wa, ena ák bua'buatso' kië mármol e' wa; <sup>13</sup> ñies canela klö e' kkuölit, ñies iyi poie alar jamamaë ena iyi masmas ña'wé, kiö masmas kië mirra ena iyi masmas poie tuë darërë kië olibano; ñies vino ena kiö, ñies harina bua'buatso' ena trigowö; ñies baka ena obeja ena kabaio ena carreta; ñies pé' klöulewá kanë mésoie ena pé' ská tso' watuë ese. İyi ekkë qos watuëke ie'pa tö. <sup>14</sup> Dali wataukwakpa tö icheraë:

"A Babilonia wakpa, ì qos bua'buatso' kiarke a' kú tajë,

e' kè ku'ia a' wá.

Iyi bua'buatso' qos wër buaë wöñarke dalölöë,  
e' qos kè dö'ia a' ulá a."

<sup>15</sup> Dali wataukwakpa e' blu'wé Babilonia wakpa wa, e'pa e' tsuraarak kamië ikú sauk. Ie'pa suane dö' ì sulu tka Babilonia wakpa kú, e' dö ie'pa kú ñies. Ie'pa eriardaë siarë, iuraë tajë. <sup>16</sup> Ie'pa tö icheraë:

"iWéstela ina Babilonia wakpa ta!

A' e' paiëule datsi' bua'buatso' kië lino ese wa  
ñies datsi' wöaule siëlsiel ena batsë ese wa.

A' e' kútkëule buaë oro wa ena ák bua'buatso' ena ákwöla bua'buatso' kië perla ese wa.

<sup>17</sup> iKá etkë ta' wá iyi tso' bua'buatso' tajë, a' blune tajë, e' enewa!"

Es ñies kanö blublüë shköke tajë dayë kú, e' wökirpa qos ena ikaneblökerak qos ena wépa shköke kanö shüa, wépa qos inuköl klö'weke kanëblök kanö wa, esepa qos e' tséat kamië Babilonia kúsaúk. <sup>18</sup> Mik ie'pa tö ká e' ñanewá e' shkë sué, etá ie'pa ane tajë: "iKá wé ská dör buaë tajë wës Babilonia es?" <sup>19</sup> Ie'pa tö ká po tkéka e' wökir kú iwá kkachöie tö ie'pa erianerak tajë ta iuke tajë ta icherakitö aneule:

"iWéstela ina ká e' buaë tajë, e' wakpa ta!

Sa' qos wá kanö tso', e'pa blune tajë ie'pa batamik.

iKá etkë ta' ká e' sulunewá!"

<sup>20</sup> iA a' tso' ká jai a,

Skéköl tö Babilonia wakpa ewéwa,

e' kueki a' ttsé'nú buaë!

A' dör batse'rpa,

ñies Jesús ttekölpá tsá,

ñies Skéköl ttekölpá, ie'pa qos ttsé'nú buaë!

\* 18:12 marfil: E' dör iyiwak kië elefante ese ká taléki wá.

Skëköl tō Babilonia wakpa we'iké,  
i sulu wamblé ie'pa tō a' kī, e' nu' ské de ie'pa  
kī,  
e' kuekī a' ttsē'nú buaē.

<sup>21</sup> E' ukuökī tã Skëköl biyöchökwa skà de  
eköl diché tã tajë. E' tō ák bërie kéka, ák e'  
dör kōs ák tso' wawè ekké, e' uyémiitō dayé  
ã tajë ichéitō:

“A Babilonia wakpa, a' chōrawa  
wēs ák i' chowa dayé ã es,  
kē yi tō a' suepaia.

<sup>22</sup> Ma'ma tso' bla'wè kiè arpa ena flauta ena  
duk,  
ese kē blarpaia a' kã ã.  
A' kanè mēsopa kōs kē ku'ia.

Ák tso' wawè ese kē blarpaia a' kã ã.

<sup>23</sup> Bō'wō ñarke e' kē wōñarpaia a' kã ã.  
Kē yi ku'ia ulabatsōk.

A' dali wataukwakpa e'pa kkeaulekã tajë,  
ie'pa dör pē' tajë kã i' kī.  
Es a' tō kã ulitane wakpa kitō'wé alibchō wa,  
e' kuekī i'yi ikkè sulu de a' kī.”

<sup>24</sup> Skëköl ttekolpa ena s'batse'r malepa kōs  
kötulur Babilonia wakpa tō, e'pa pē tēne  
ie'pa kã kī. Ñies pē' malepa tajë kötulur ie'pa  
tō. E' kuekī e' nu' de ie'pa kī.

**19**

<sup>1</sup> E' ukuökī tã ye' tō ittse tō kã ja' a pē'  
daparke tajë, e'pa tté darèrè tã ichérakitō  
aneule:

“Skëköl tō s'shulè yēsýesè tté mokj wa,  
e' kuekī jikikōkasō!  
Ie' dör S'tsatkōkwak.

Ie' olo ta' tajë, ie' diché tã tajë i'yi ulitane  
tsata. <sup>2</sup> Babilonia wakpa dör wēs  
alaköl trër tajë es.

Ie'pa bak kã ulitane wakpa erkiöyuk i sulu  
wamblök wēs ie'pa es.

Ie'pa tō Skëköl kanè mēsopa kötulur.

E' nu' kī Skëköl tō ie'pa kã sulu'wéwã tã  
iwakpa ewéwaitō.

E' kuekī se' wã ijcher tō ie' s'shuleke yēsýesè  
mokjé.”

<sup>3</sup> E' ukuökī tã ie'pa tō iska chéne:

“iSkëköl kīkōkasō!  
Babilonia shkļè dià e' batrō michoè.”

<sup>4</sup> Këkëpa dōkã dabom böyök kī tkël (24) ena  
i' ttsé'ka dōkã tkël, e'pa e' tēlur iSkī wōwakkōt  
tã Skëköl tkërka ikulé kī, e' daloiérakitō. Ie'pa  
tō iché: “iEs e' idir! iSkëköl kīkōkasō!”

<sup>5</sup> Skëköl tkër e' ska' ttō ttsé ye' tō, e' iché:

“iA' ulitane tō se' Këköl kīkōka,  
se' tsitsipa ñies se' blublupa.  
A' dör ie' kanè mēsopa tō ie' daloiéke,  
e'pa kōs tō Skëköl kīkōka!”

*Obeja Pupula ulabatsōke e' kēwō tkō'uk*

<sup>6</sup> Etã ye' tō ittse tō i blarke tajë wēs s'tso'  
tajë ttō es, wēs di' blar tajë ákttō mik es, wēs  
alá blar tajë es, e' tō iché:

“iSkëköl kīkōkasō!  
Këkë dör se' Këköl, e' diché tã tajë i'yi ulitane  
tsata.

Ie' detke s'blúie s'wëttsuk,  
e' kuekī ikikōkasō.

<sup>7</sup> Obeja Pupula ulabatsōketke, e' kēwō  
dewaŕtke,

e' tayé e' kanè wétke ulabatsoie ie' tã.  
E' kuekī se' ttsé'nú buaé kaneé, ie' olo  
kīkōkasō.

<sup>8</sup> Ie' tayé ã datsi' bua'buã kiè lino e' mène e'  
paioie,

Datsi' e' dör sarurué, wōñarke dalalaé.

Datsi' e' wã kiane ché

s'batse'rpa ser yēsýesè e'.”

<sup>9</sup> Skëköl biyöchökwa tō ye' ã iché: “Ishtō  
yëkkuō kī i' es: ‘Wépa shkëñaule Obeja  
Pupula ulabatsōketke, e' kēwō tkō'uk, ayëcha  
buaé esepa.’ ” Ñies ie' tō iché ye' ã: “Ttè e'  
dör Skëköl tté mokjé.”

<sup>10</sup> Ye' e' téwã iSkī wōwakkōt Skëköl  
biyöchökwa wōshaé idaloiök, erè ie' tō ye'  
ã iché: “iSë kē war! Ye' dör Skëköl kanè méso  
wēs be' ena be' malepa e' tkëulewã darèrè  
Jesús tté ã e'pa es. iSkëköl è daloiö!”

Jesús tté e' tō Skëköl ttekolpa erkiöweke  
s'pattök.

*Itkërka kabaio saruru kī*

<sup>11</sup> E' ukuökī tã ye' tō isué tō kã ja' a ukkō  
tso' áie, eë kabaio suéyō etō sarurué. E' kī  
itkërka, e' kiè dör Ttō Yēsýesè Këkraé. Ie' tō  
s'wëttsëke yēsýesè. Mik ie' e' kéka ñippök e'  
kē dör è. <sup>12</sup> Ie' wōbla wër wēs bō'wō wōñar  
es. Ie' wōkir kī i tkërka tajë wēs itso' tkëka  
blu' wōkir kī es. Ie' kī ikiè tso' kitule. Kiè e'  
kē jcher yi wã, e' jcher ie' wák è wã. <sup>13</sup> Ie'  
datsi' nuulewã pē wa. Ie' kiè dör Skëköl Ttè.

<sup>14</sup> Ñippökwa tso' tajë kã ja' a, e'pa datse  
ie' itōkī kabaio saruru kī. Ie'pa paiëule datsi'  
bua'buã kiè lino ese wa, datsi' e' dör sarurué  
wōñarke dalalaé. <sup>15</sup> Ie' kkō ã tabè dökettsã  
kã yëule di'diè, tabè e' wa ie' e' alorãka kã  
ulitane wakpa kī. Ie' tō ie'pa wëttseraé  
yēsýesè idiché tajë wa. Skëköl diché tã tajë  
i'yi ulitane tsata, e' kësik wa ie' tō ibolökpa  
ñatskerawã wēs uwawō ñatskëwãšō s'klō wa  
idiō yottsã es. <sup>16</sup> Itu' shã ie' paio kī itso'  
kitule, e' tō iché: “Blu'pa ulitane e'pa Blú,  
skëkölpa ulitane e'pa Këköl.”

*S'tsatkōkwak e' alékã i'yiwak sulusi kī*

<sup>17</sup> E' ukuökī tã ye' isué tō Skëköl  
biyöchökwa dur eköl diwō kī. E' tō iché  
aneule ðù kōs urke kashuk a e' ã: “iA' shkō,  
a' ñi dapa'uka chkè tso' tajë Skëköl wã a' ã  
e' katök! <sup>18</sup> A' shkō blu'pa chkã katök, ñies

ñippökwaqpa wökirpa ena wëpa kësik suluë, esepa chkä katök a' shkö. Kabaio ena iwäqpa e'pa chkä katök a' shkö. S'klöulewä kanë mésoie ena pë' kē dör es, ñies s'dalöier ta' tajë ena se' ësëpa ena pë' ulitane chkä katök a' shkö."

<sup>19</sup> Etä ye' tö iyiwak sulusi dë'ka dayë a' e' suë. Kä ulitane blüpa ena inippökwaqpa, e'pa tso' ie' ta. E'pa ñi dapa'uke ñippök itkërka kabaio saruru ki ena inippökwaqpa e'pa ta. <sup>20</sup> Iyiwak sulusi dë'ka dayë a ena itteköl e'pa klö'wëwarakitö. Itteköl e' tö i kē or yi a ese o' iyiwak sulusi wörki. Ese wa ie' tö wëpa e' me' wakyuë iyiwak sulusi e' kië wa ena idiököl dalöier, esepa kitö'ka. Etä iyiwak sulusi ena itteköl, e'pa batrelormi ttsë'ka bö' me'r tajë batsöriie e' a. Eë bö' wönarke tajë azufre ta. <sup>21</sup> Imalepa tëlur itkërka kabaio ki e' tö, tabë döketsä ikkö a' e' wa. Etä dü tö ie'pa chkä katë tajë dö che.

## 20

### *Skököl e' alëka Satanás kj*

<sup>1</sup> E' ukuöki ta Skököl biyöchökwaq suë ye' tö eköl, e' datse kä jai a. Ie' wa kaçuk ter tajë iskjë e' kköyotsä tso'. Nies tabecka kichaie bërie e' a'tser iwa. <sup>2-3</sup> Etä ie' tö këtali kéköl klö'wëwä. Këtali kéköl e' dör Bë kië Satanás dë'ka ktabëie kä iaiä e'. Skököl biyöchökwaq tö ie' muëwä tabecka kichaie wa batréemi kaçuk ter tajë iskjë e' a. Ta e' kkö wötëwaitö daloie ena iwakyuëitö as kē yi a ikköyërttsane. Eë ie' wötëne dö duas mil eyök as kē ie' a kä ulitane wakpa kjtëria. Erë mik duas mil eyök deka, etä ie' wötënardeä erë ekuölö ë.

<sup>4</sup> E' ukuöki ta ye' tö s'blüpa kulë suë tulur kä jai a. Wëpa tulur kula' e' ki, e'pa a kaçwö mène s'wëtsuk. Nies wëpa kuli' tërdulune Skököl ttë ena Jesús ttë mokj pakë kuëki, esepa wiköl suë ye' tö. Ie'pa kē wä iyiwak sulusi dë'ka dayë a ena idiököl dalöierne'. Nies ie'pa kē e' mène wakyuë iyiwak sulusi kië wa iwötsä ki ö iulä kkuë ki. Ie'pa shkenekane, etä ie'pa tö s'wëtsë Cristo ta dökä duas mil eyök. <sup>5</sup> Ie'pa shkenekane e' dör s'duulewä e' tsä shkenekane. S'duulewä malepa e'pa kē shkerpakane dö mik duas mil eyök ene etä. <sup>6</sup> Wëpa shkerdakane kewe, ayëcha buaë esepa. Ie'pa dör wëpa batseö Skököl tö esepa ki. Ie'pa kē duöpawä bötökicha. Ie'pa kaneblöraë Skököl a ena Cristo a sacerdotëpaie. Nies ie'pa tö s'wëtsëraë Cristo ta ñitä dö duas mil eyök ekkë.

<sup>7</sup> Mik duas mil eyök deka, etä Satanás yërdattsane wë itso' wötëulewä eë. <sup>8</sup> Ie' e' yörattsä Gog ena Magog kitö'uk. Gog ena Magog, e' wä kiane chë kä ulitane wakpa. Satanás tö ie'pa dapa'wëraë ñippök Skököl

ta. Ie'pa ñippökwaqpa dör tajë wes dayë tsëwö es.

<sup>9</sup> Ie'pa ulitane datse kä wa'ñe demi Jerusalén. Eë s'batse'rupa serke. Kä e' dalër tajë Skököl ëna. Ie'pa tö kä e' kköiëwä shkit s'batse'rupa ewöwa, erë bö' bitëshka kä jai a, e' tö Skököl bolökpa ewëwa seraä. <sup>10</sup> Etä Bë tö ie'pa kitöo', e' batréemi bö' wönarke azufre ta me'r tajë batsöriie e' a. Eë iyiwak sulusi dë'ka dayë a ena itteköl e'pa uyanemibak. Eë ie'pa weir michoë ñië nañë.

### *Skököl tö sulitane shuleke bata ekkë ta*

<sup>11</sup> E' ukuöki ta ye' tö isuë tö Skököl tkër ikulé ki. Ikula' dör bërie saruruë. Kä jai ena kä i' e' tkashkar ie' yöki, kē iwëniëä yës. <sup>12-13</sup> Etä ye' tö isuë tö s'duulewä kos iëter Skököl kulë wörki as ishulirdak. Wëpa datse s'wimblu kē a esepa tso', ñies wëpa durulune dayë a esepa tso'. S'dalöierne' tajë ena s'ësëpa kos iëter Skököl wörki as ie' tö ie'pa shulö wes ie'pa e' wamblë' es. Yëkkuö tso' tseë eë, e' ki i kos o'sö ena i kos wamblë'sö e' tso' kitule. Yëkkuö skä tso' eë et, e' dör sene michoë yëkkuö. Yëkkuö e' ki wëpa ula a sene michoë döraë, e'pa kië tso' kitule. Yëkkuö e' shuppëlor, etä s'duulewä kos shulë Skököl tö wes ie'pa e' wamblë' es, ñies wes itso' kitule iyëkkuö ki es. <sup>14</sup> E' ukuöki ta s'duöwä ena s'wimblu kē e' kos batréemi bö' me'r tajë batsöriie e' a, e' dör s'duöwä bötökicha e'. <sup>15</sup> Wëpa kos kië kē kü' kitule sene michoë yëkkuö ki, e'pa batréemi bö' ñe' a.

## 21

### *Kä jai pa'ali ena kä i' pa'ali*

<sup>1</sup> E' ukuöki ta ye' tö isuë tö kä jai tsä ena kä i' tsä, e' kē ku'ia, e' kos skë yöne pa'ali. Nies dayë kē ku'ia. <sup>2</sup> Etä ye' tö isuë tö kä batse'r dör Jerusalén pa'ali e' datse kä jai a Skököl ska'. Kä e' wër buaala wes tayë ulabatsketke e' paiö buaala iwëm wörki es. <sup>3</sup> Skököl tkër, e' ska' ttö tse' ye' tö, e' tö ichë aneule: "Ittsö, j'ñe Skököl de senuk s'ditsö shüa. Ie' serdaë ie'pa ta këkraë. Ie'pa döraë ie' ichaie. <sup>4</sup> Ie'pa wöriö kos paikleraeitö. Kë yi duöpawaia, kē yi eriarpaia, kē yi kköchöpaia, kē yi mik i dalërpaia, iji ekkë kos bakbak e' kueki."

<sup>5</sup> Etä Skököl tkër ikula' ki, e' tö ichë: "Ye' tso' iji kos yuökne pa'ali." Nies ie' tö ye' a ichë: "Ttë i' dör mokjë, e' mik be' erblömi, e' kueki ishtö yëkkuö ki."

<sup>6</sup> E' ukuöki ta ie' tö ichë ye' a: "Iwä yöne one. Ye' dör iji wi ena iji bata, ttë tsä ena ttë bata. Wëpa ersine, esepa a kaçwö meraë ye' tö, sene michoë di' yök ëme, kē tuë ta'. <sup>7</sup> Wëpa e' alëka i sulu ki, kē wä ye' ttë olo'yaule, esepa a iji ekkë kos skë meraë ye' tö. Ye' döraë ie'pa Kéköl ena ie'pa döraë ye' ala'rie. <sup>8</sup> Erë wëpa tö ye' ttë olo'yë suane kueki, wëpa kē erblöta' ye' mik, wëpa e' ia'uke i sulu wamblekerakitö ese

wa, wépa dör s'ttökwa, wépa trérta', wépa wöbatsö alibchök, wépa tö iyi diököl dalöieke skökölöie, ñies wépa dör kachökwa, esepa kos batreerami bö' wöñarke azufre ta me'r tajë batsörüie e' a. E' dör s'duöwä bötökicha e'."

*Jerusalén pa'ali kkeyene Juan a*

<sup>9</sup> Skököl biyöchökwa dökä kul suéyö kewé tö tkä' damirak iwä wä tkëttsa ká ulitane wakpa we'ikoie, e' eköl de ye' ska', e' tö iché ye' a: "Be' shkó ye' ta. Obeja Pupula ulabatsökette, e' tayë kkacheke ye' tö be' a." <sup>10</sup> Eta Skököl Wiköl de tajë ye' ká ta Skököl biyöchökwa wä ye' mits'er kabata bérie kakkëe' e' ká. Ie' tö Jerusalén dör batse'r datse' ká jai a e' kkaché ye' a, e' dör Skököl ké. <sup>11</sup> Ká e' wöñarke dalölöe Skököl olo tajë e' wa. Ká e' olo burke tajë dalölöe wes ák bua'buwa tuë darërëe kië jaspe es. Ák e' wöaule spaşa ena mat, e' wër sarërëe. <sup>12</sup> Ká e' kköiëulewä shkit kakkëe buririë. E' ukkö dökä dabom eyök ká böt (12). E' ukkö kos a Skököl biyöchökwa iët'er eköl eköl. Nies Israel aleripa ditséwö dökä dabom eyök ká böt, e'pa kië tso' kitule eköl ukkö kos e' mik. <sup>13</sup> Ukkö tso' mañat diwö tskirke, e' kke. Ukkö tso' mañat diwö mi'kewa, e' kke. Ukkö tso' mañat wä wa. Nies ukkö tso' mañat i' wa. <sup>14</sup> Ká e' kköiëulewä shkitkë, e' yöule ák blublüë ká dökä dabom eyök ká bök. Obeja Pupula ttekolpa tsá dabom eyök ká bök, e'pa kië tso' kitule eköl eköl ák blublüë kos e' mik.

<sup>15</sup> Skököl biyöchökwa tso' ttök ye' ta, e' wä orochka yöule batsjé ká ma'woie, ese a'tser. E' wa ie' tö ká kos ñe' ma'weke, ikköiëulewä shkit ena iukkö kos e' ma'weke ie' tö. <sup>16</sup> Ká e' yöule ñikkëe, kos ibatsjé dör, ekkë ishölö dör. Skököl biyöchökwa tö ká e' ma'wé ká ma'wö a'tser ie' wä e' wa. Ká e' batsjé dör kilómetro dökä mil böyök ká cien tkëyök (2.400); ñies ishölö ena ikákke e' dör ekkë ñies. <sup>17</sup> E' ukuöki ta Skököl biyöchökwa tö ká kköiëulewä shkit, e' burri ma'wé. E' dör metro dökä dabom teryök ká teröl (66). Skököl biyöchökwa tö ima'wé wes s'ditsö tö ká ma'wé es.

<sup>18</sup> Ká kköiëulewä shkit, e' yöule ák bua'buwa kië jaspe ese wa. Ká e' yöule orochka wák ë wa; e' damiwä sarërëe wes widrio es. <sup>19</sup> Ák blublüë tuluulewä ká kköiëulewä e' chkáie, e' mik ák bua'buwa kua'kí kua'kí bastulur tajë. Ák blublüë e' tsá e' dör ák bua'buwa kië jaspe; ák blublüë ská dör zafiro; iská dör ágata; iská dör esmeralda; <sup>20</sup> iská dör ónice; iská dör cornalina; iská dör crisólito; iská dör berilo; iská dör topacio; iská dör crisoprasa; iská dör jacinto; ibata dör amatista. <sup>21</sup> Ukkö dökä dabom eyök ká böt, e' dör ák bua'buwa saruru kië perla dökä dabom eyök ká böt. Ukkö bit e' dör perla et. Ká e' ñalé kibi e' yöule orochka wák ë wa damiwä sarërëe.

<sup>22</sup> Ké ye' wä Skököl wé sune ká e' ká. Skököl diché ta' tajë iyi ulitane tsáta ena Obeja Pupula e'pa serke eë, e' kuëki Skököl wé ké ta'. <sup>23</sup> Skököl olo burke tajë ká e' a, ñies Obeja Pupula olo burke tajë ká e' kos a wes bö'wö tajë olo bur es. E' kuëki diwö ké ta', si'wö ké ta'. <sup>24</sup> Ká ulitane wakpa serdaë ká e' olo burke e' a. Ká ulitane blüpa wä iyi bua'buwa tso' e' bituraë ie'pa wä më ká e' wakpa a. <sup>25</sup> Ká e' a nañewe ké ta', kekraë ká dör ñiwe. E' kuëki iukkö ké wötértawä yës. <sup>26</sup> Ká ulitane wakpa wä iyi bua'buwa kos tso', e' bituraë më ká e' wakpa a. <sup>27</sup> Erë iyi ulitane ké dör batse'r, ñies wépa tö i wër suluë Skököl wa ese wambleta' ö s'kítö'weta', esepa kos ké döpawä eë. Wépa kië tso' kitule Obeja Pupula yëkkuö ká, yëkkuö e' dör sene michoë yëkkuö, e'pa ë dówami eë.

## 22

<sup>1</sup> E' ukuöki ta Skököl biyöchökwa tö ye' a di' kkaché etö. Di' e' dör maneneë, damiwä sarërëe, e' dör sene michoë dí. E' tskirke wé Skököl ena Obeja Pupula tulur ikulé ká e' ska'. <sup>2</sup> Di' e' dami ká e' ñalé kibi e' shushäe. Di' e' kkömik kal tso' wí'ké iö'ké. Kal e' dör sene michoë moie se' a. E' wörke si' bit ekkë. E' wä kiane chë tö duas ek ta iwöne dökä dabom eyök ká bötökicha (12). Kal e' kó dör buaë kapölöie ká ulitane wakpa bua'woie. <sup>3</sup> I kos ké dör buaë Skököl wöa, e' ké ku' ká e' a. Eë ie' ena Obeja Pupula, e'pa tulur ikulé ká. Eë Skököl kané mésopa tö ie' dalöieraë. <sup>4</sup> Ie'pa tö ie' sueraë iwöbla wa. Ie' kië tso' kitule ie'pa wötsa ká. <sup>5</sup> Ká e' ñi'weraë ie' olo tö, e' kuëki nañewe ké ta'ia ká e' a. Ké yi ká diwö ena bö'wö kiarpaia ká suoie. Ká e' wakpa tö s'wëttsé michoë blu'paie.

*Jesucristo datskene e' kéwö dökewatke tsinët*

<sup>6</sup> Eta Skököl biyöchökwa tö ye' a iché: "Té kos ttsé be' tö e' dör mokjé e' mik be' erblömi. Skököl tö ittekolpa patké' itte pakök, e' wák tö ibiyöchökwa patké' i tköraë bet, e' kkachök ikané mésopa a."

<sup>7</sup> Jesús tö iché: "jittsó! Ye' datskene bet. I tköke i'ñe ta ena i tköraë aishkuö ta ese tté tso' kitule yëkkuö i' ká. Wépa tö tté e' wä iuteke, ayëcha buaë esepa."

<sup>8</sup> Ye' dör Juan. Ye' tö iyi ikké ttsé sué. Mik ye' tö ittsé ena isuë, eta ye' e' tewa wöwakköt Skököl biyöchökwa wörki idalöiök. <sup>9</sup> Erë ie' tö ye' a iché: "jé ké war! Ye' dör Skököl kané méso wes be' ena be' yamipa dör Skököl ttekolpa ena wépa kos tö tté tso' kitule yëkkuö i' ká e' wä iuteke, esepa es. jskököl ë dalöiö!"

<sup>10</sup> Nies ie' tö ye' a iché: "Té tso' kitule yëkkuö i' ká, e' wä tkökette bet, e' kuëki ké iblarwä be' wák ë a. <sup>11</sup> Wépa e' wamblö sulu esepa múat as ikí e' wamblö sulu. Nies wépa



e' ia'uke sene sulusi wa esepa múat as ikí e' ia'ù sene sulusi wa. Erè wépa dör yësyësë as esepa kí ser yësyësë. Nies wépa batseo' Skëköl tò as esepa kí ser batse'r."

<sup>12</sup> Jesús tò ichè: "Ye' datskene bet. Ye' wa iské datse mè sulitane a eköl eköl wes iser es. <sup>13</sup> Ye' dör iyi wi ena iyi bata, ttè tsá ena ttè bata. Ye' tso'tke iyi ulitane yökí kewe, ñies ye' ser michoë kekraë."

<sup>14</sup> Wépa tò idatsi' skueke Obeja Pupula pé wa as idótsa buaë maneneë Skëköl a, ayëcha buaë esepa. Esepa ë a kawö merdaë dökwa Skëköl ká a, sene michoë e' kéli wö katök. <sup>15</sup> Erè wépa dör i sulu wamblökwakpa, wépa wöbatsö alibchök, wépa trërta', wépa dör s'ttökwakpa, wépa tò iyi diököl dalöieke, wépa wöbatsö kachök, esepa kos ate ur'ki, kè dé'wa Skëköl ká a.

<sup>16</sup> Jesús tò ichè: "Ye' dör Jesús, e' tò Skëköl biyöchökwak patké ttè i' kos chök ye' icha eruleë e'pa a. Ye' dör s'blú bak ká iaiaë kiè

David, e' aleri datse s'blúie ie' skéie e'. Ye' dör wes bëkwö olo burke dalölöë ká ñirketke etá es."

<sup>17</sup> Wiköl Batse'r ena Obeja Pupula tayë, e'pa tò ichè: "¡A' shkó!" Nies wépa tò ttè i' ttsé, e'pa tò ichö: "¡A' shkó!" Wépa kos ersine éna sene michoë dí yák, esepa mú dö sene michoë dí yök éme kè tuë tá.

<sup>18</sup> I tköraë e' tso' kitule yëkkuö i' kí, wépa tò ittsé, esepa a ye' tò ichè i' es: Yi tò ttè i' kí kuötkéka, e' tá esepa we'ikeraë siarë Skëköl tò i' sulu kos tso' kitule yëkkuö i' kí ese wa. <sup>19</sup> Nies yi tò ttè tso' kitule yëkkuö i' kí e' wele yéttsa, e' tá esepa a Skëköl kè tò kawö mepa senuk Skëköl ká batse'r e' a, sene michoë kéli wö katök wes itso' kitule yëkkuö i' kí es.

<sup>20</sup> Jesús tò ttè i' kos ché a' a, e' tò ichè: "Mokí ye' datskene bet."

Es e' idir. ¡A Skëképa Jesús, be' shkó!

<sup>21</sup> As Skëképa Jesús er buaë chö s'batse'rpa ulitane a.